


# Gode Dowan Wengobe



The New Testament in the Mian Language of Papua New Guinea

**Gode Dowan Wengobe**  
**The New Testament in the Mian Language of Papua New Guinea**  
**Nupela Testamen long tokples Mian long Niugini**

copyright © 1986 Wycliffe Bible Translators, Inc.

Language: Mian Weng (Mian)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-24

---

PDF generated using Haiola and XeLaTeX on 21 Feb 2024 from source files dated 31 Aug 2023  
3aa1e1e5-7db8-5e53-bc5a-68f8d0194988

## Contents

Gode Dowan Wengobe . . .	1
Matyu . . . . .	2
Mak . . . . .	51
Luk . . . . .	80
Yon . . . . .	126
Abosel . . . . .	161
Lom . . . . .	201
1 Kolin . . . . .	228
2 Kolin . . . . .	258
Galesia . . . . .	274
Efesas . . . . .	284
Filibai . . . . .	292
Kolosi . . . . .	298
1 Tesalonaika . . . . .	305
2 Tesalonaika . . . . .	310
1 Timoti . . . . .	313
2 Timoti . . . . .	320
Taitas . . . . .	325
Failimon . . . . .	329
Hiblu . . . . .	331
Yems . . . . .	352
1 Fita . . . . .	358
2 Fita . . . . .	365
1 Yon . . . . .	369
2 Yon . . . . .	375
3 Yon . . . . .	376
Yut . . . . .	377
Lebelesen . . . . .	380
Read the New Testament . .	401

**Gode Dowan Wengobe**  
**The New Testament in the**  
**Mian language of Papua New**  
**Guinea**  
**Nupela Testamen long**  
**tokples Mian long Niugini**

*Gode Dowan Wengobe*  
 The New Testament in the Mian language  
 of Papua New Guinea  
 [mpt]

Translation by Wycliffe Bible Translators

© 1986 Wycliffe Bible Translators, Inc.

Print publication 1986 by Bible League  
 International

Web version  
 2014, Wycliffe Bible Translators, Inc.  
[www.Wycliffe.org](http://www.Wycliffe.org)

<http://pngscriptures.org>

[www.ScriptureEarth.org](http://www.ScriptureEarth.org)

This translation is made available to you under the terms of the Creative Commons license (Attribution-Noncommercial-No Derivative Works).

<http://creativecommons.org/licenses/by-nc-nd/4.0>

**Your are free to share** — to copy, distribute and transmit the text under the following conditions:

- **Attribution.** You must attribute the work to *Wycliffe Bible Translators* (but not in any way that suggests that they endorse you or your use of the work).
- **Noncommercial.** You may not use this work for commercial purposes.
- **No Derivative Works.** You may not alter, transform, or build upon this work.
- **In addition,** you have permission to port the text to different file formats, as long as you don't change any of the text or punctuation of the Bible.

**Notice** — For any reuse or distribution, you must make clear to others the license terms of this work.

**Tok Orait**

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem **yu ken givim kopi long narepela manmeri.** Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. **Yu mas givim nating.** Na tu, **yu no ken senisim Tok.**

Ol piksa i kam wantim ol Baibel na narepela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik stretim samting i no orait long dispela tok orait, stretim tok, salim Buk Baibel, o tainim Tok bilong God long nupela tok ples, yu ken **askim mipela.**

Olgeta tok orait na lo long tok ples English i stap long <http://creativecommons.org/licenses/by-nc-nd/4.0>

Sapos yu gat askim long dispela, **plis askim mipela.**

**Gode Dowan Wengobe**

## **Matyu Dowan Weng Olo Matyue Dolanebuotabe. Tekein kemin wengobe.**

Yesuse atdimu kaanea imin hananea ulanea abilim uneta omito Matyue dowan weng olo dolanebiobe. E Gode weng omkeimalin nakai sino Yesuse weng sango dolaibbuo Yesuse bain inanea daakenea atdimu kaanea imin hananea ulanea abilim unea i wengo yamo balino osa eka Yesuse daakenea atdimu kaanea imin hananea ulanea abilim unea o dimo Gode kilonea nibo kima binabeo weng osa eka Yesuse inamin namin okoko weng sang homono baanebu osa ota Matyue dolanebiobe. E weng olo dolaihua Yudai kiniba tekein keniba Yesuse Gode Dofakamin Naka bianeta daak te binebiobo geine geneta dolanebiobe.

1:1-2:23 Yesuse faninwali niniin osa eka e awoko dobmikinobuo weng sang osa otabe.

3:1-12 Yon aa fuayemin nakae e okoko weng sangobe.

3:13-4:11 Yone Yesuse aaye fuela-banebuo weng sang osa eka Gululame Yesuse dabamatemseo weng sang osa otabe.

4:12-18:35 Yesuse Galili betano nakaia unangai daaye binebuo weng sangobe.

19:1-20:34 Yesuse Galili betan ye danea monea Yelusalem bib onseo weng sangobe.

21:1-26:13 Yesuse atdimu dabasa ananomabib amo meb tebua e Yelusalem bib ye bianea okok ke-binebuo weng sangobe.

26:14-28:20 Yesuse kaanebuo weng osa eka e imin hananebuo weng osa otabe.

*Yesuse faninwali niniin otabe.  
(Luk 3:23-28)*

<sup>1</sup> Weng olo Yesus Klaiste faninwal itabe. Yesus ele Debite molofeitobe. Eka Debit ele Eblahame molofeitobe. <sup>2</sup> Eblaham ele Aisake dofanebiobe. Eka Aisak ele Yekobe dofanebiobe. Eka Yekob ele Yuda esa eka e nekel isa dlanebiobe. <sup>3</sup> Yuda ele Feles esa eka Sala esa i dlanebiobe. I dabi biem ole Tema otabe. Feles ele Heslone dofanebiobe. Eka Heslon ele Dame dofanebiobe. <sup>4</sup> Eka Dam ele Aminadabe dofanebiobe. Eka Aminadab ele Nasone dofanebiobe. Eka Nason ele Salmone dofanebiobe. <sup>5</sup> Eka Salmon ele Boase dofanebiobe. Boase biem ole Lehab otabe. Boas ele Obete dofanebiobe. E biem ole Lut otabe. Eka Obet ele Yesie dofanebiobe.

<sup>6</sup> Eka Yesi ele Isleli komok sume Debite dofanebiobe.

Eka Debit ele Solomone dofanebiobe. Sino naka make, e niniino Yulaaie, unang mako omobinea anaiba kaanea eka Debit esak omoneta Solomone dofanebiobe. <sup>7</sup> Eka Solomone ele Liaboame dofanebiobe. Eka Liaboam ele Abaisae dofanebiobe. Eka Abaisa ele Esae dofanebiobe. <sup>8</sup> Eka Esa ele Yihosafate dofanebiobe. Eka Yihosafat ele Yolame dofanebiobe. Eka Yolam ele Asaiaie dofanebiobe. <sup>9</sup> Eka Asaia ele Yotame dofanebiobe. Eka Yotam ele Ehase dofanebiobe. Eka Ehas ele Heseakaie dofanebiobe. <sup>10</sup> Eka Heseakaia ele Manasae dofanebiobe. Eka Manasa ele Emose dofanebiobe. Eka Emos ele Yosaiaie dofanebiobe. <sup>11</sup> Eka Yosaia ele Yekonaia esa e nekel isa i dlanebiobe. Am olo dim ota Bebilon bib seli teniba Isleli yafu dletniba moniba Bebilon bib ye une bisiobe.

<sup>12</sup> I inaniba yafu dleb moniba Bebilon ye daiba Bebilon ye bianibta Yekoniaie Sialtiele dofanebiobe. Eka Sialtiel ele Selababele dofanebiobe. <sup>13</sup> Eka Selababel ele Abaiate dofanebiobe. Eka Abaiat ele Elaiakime dofanebiobe. Eka Elaiakim ele Esoe dofanebiobe. <sup>14</sup> Eka Eso ele Sedoke dofanebiobe. Eka Sedok ele Ekime dofanebiobe. Eka Ekim ele Elaiate dofanebiobe. <sup>15</sup> Eka Elaiat ele Eliesae dofanebiobe. Eka Eliesa ele Matane dofanebiobe. <sup>16</sup> Eka Matan ele Yekobe dofanebiobe. Eka Yekob ele Yosebe dofanebiobe. Eka Yoseb ele Maliao imakobe. Eka Malia ota Yesuse dofanobiota nakaia unangai Klaiste ge nghanba binabiobe. Klaiste mitmakamo Gode Dofakamin Nakabe. <sup>17</sup> Eblahame Isleli mito kilonebio e mulubi walobi halebon halebon tatniba 13 yeb milim kenabibta eka komok sume Debite ute maneo e mulub isa walobi halebon halebon tatniba 13 yeb milim kenabibta Bebilon seli tenibta klabuto gena dleb onsiobe. Eka i Bebilon bib ye binibbio mulub isak walobi halebon halebon tatniba 13 yeb milim kenabibta Yesuse awoko dofanobiobe.

*Maliao Yesus Klaiste dofasobe.  
(Luk 2:1-7)*

<sup>18</sup> Weng olo Yesus Klaiste dofaso weng sang otabe. E awoko Maliao Yosebe omakabaniba Yosebe alelobo geibbuo otane i mo kam keim blim blibta Maliao Gode Hobe amunsansoa <sup>19</sup> Yosebe kukub ayam wafunin kesoa e funanea Ne Maliao nakaia unangai kin dimo fotebesia aal waisonomobo genea Ayok deibonano genea <sup>20</sup> teka bianea aambianea damo temea Sume abisake tenea baabanea Yosebo, Debite molofeit kobo keb alelo

Maliao omonamino mo tosianwemebe! O amunsano yo Gode Hob eta doulebo, <sup>21</sup> o miine naka ten dofanamabobo, kobo e niniino Yesus ge nganabanale! Niniino olo mitmakamo inaminobe. E meletani Isleli hengmin temo blibo dotlanea dleb mete e mitem danamabebo ge baabasebe.

<sup>22-23</sup> Sinanggwano Sume bobol tem funino e weng omkeimalin nakae omalea baanea

Wentine! Unang souo mako o nakai mo baka haanin blim bianoa amunsanoa mene dofanoo e niniino Emanyuel ge nganabanomabiobo genebuo bain inasobe.

Niniino olo mitmakamo makob Gode nibo bekebe biebe.

<sup>24</sup> Inang gene kesoa Yosebe hananea Sume abisake dam deib baabane inanea e alelo Maliao omose otane <sup>25</sup> i kamo biino mo heba aalamin blim blibta miine dofanota Yosebe e niniino Yesus ge nganabasebe.

## 2

*Afok tlebo nakai tekein kemin sumi tesiohe.*

<sup>1</sup> Am olo dimo Helote, Yudai komok suman bietabe. Yudia betano bibo niniino Betlehem bib ye Maliao Yesuse dofasobe. Omito awitnino mito tekein kemin nakai afoko tlebo daniba teniba Yelusalem bib ele tlaniba <sup>2</sup> kil baaibo Mene mema dofaibe Yudai komok sum anamabe fab biene? E dofaibo dimo awitnino mako afoko tlebo da ye mawesota ni watenobta teta e niniino dobtoulebo nom geta tlobobo gesiba <sup>3</sup> weng olo balianoa komok sume Helote wentenea e funanea Men ele damanea ne nemtlanea eta komok anemebo ge funanea e bobol temo usan kebanoa tosanabanoa eka Yelusalem bib sel isa i bobol temo tosanabenasobe. <sup>4</sup> E Gode amo kimanin nakai komokwal isa eka hekmel weng tekein kemin naka isa alukum nganabeneba tliba baabeneba Hekmel wengo baanoa Gode Dofakamin Nakae fab da dofanomabiobo genobione? gesea <sup>5</sup> i baabaniba Yudia betan olo bibo niniino Betlehem bib ye dofanomabiobe. Niminbabe, ni tekein kebuobe, sinanggwano Gode weng omkeimalin nakae Gode buk temo dolanea enangge baanea

<sup>6</sup> Yudia betano Betlehem bib ye blib ibo, naka homonba otane ib bibo besa bibbabe. Niminbabe, naka make ib isak tem wato komok anea ne meletani Isleli kimanamabebo ge baa dolanebiobo

ge baabaniba deiba uniba <sup>7</sup> omito Helote awitnino mito tekein kemin nakai afoko tlebo da tlibi ayok nganabeneba tliba weng obianiba baabeneba Awitnino fatnamin dim ota mawenota watenibta tlibe? ge baabesea i baabaniba Inaminimo dim otabo gesiba <sup>8</sup> e imin baabeneba Ibo moniba Betlehem bibo unaibo men ele kla hembianiba atemaibo e niniino dobtoulebo biniba te baatneibta nesak monita e niniino dobtoulebo nano gese otane e dim baanea Monia ananang geneta baabesebe. <sup>9</sup> I wenteniba deibaniba bebianiba temiba awitnino sino afoko tlebo sin ye mawenota watemem watememniba tlibbuo imin mawesota wateniba maki baabeniba Etemine! Awitnino imin mawenoba gesiba omsiletniba bebib awitnino tenoa amo mene bio golim ut mawesota <sup>10</sup> wateniba i bobol ayam funaniba kla seimbiniba <sup>11</sup> taniba am tamoo Yesus esa e biemo Maliao osa blib tam unaniba dlong dlong golbuo daak toulaniba e niniino dobtoulebo binib ole meen takan meen tem daako haniba tom ayamo, niniino gol osa eka at deno nama osa eka at den afeto tang ayam osa olubasiobe. O walonamino monio dot sumobe. <sup>12</sup> I deibe moniba aala bliba Gode dam deib baabeneba Ibo Helot esu deibo mo unaibe gene kesoa deibaniba deib afet deib bebib bita alim homono blimanota monibta ili bibam onsiobe.

*Yosebe alal hatwali dletnea Isib onsiobe.*

<sup>13</sup> Awitnino mito tekein kemin nakai inaniba ye uniba Sume abisake tenea Yosebe dam deib baabaneba Helote mene ananang genea hembobo, hananeba men esa e awok osa dletneba moneba Isib ye bieb binia nema baabkenia Tele gesite gesea <sup>14-15</sup> Yosebe hananea men esa e awok osa dletnea kwitimib bib olo deiboniba bebib bita am homono blimanota monibta Isib ye bisiohe. Sinanggwano Sume Gode e weng omkeimalin nakae wengo omalea e Gode buk temo dolanea baanea Ne miine Isib ye bieta nganabai tlamabebo genebuo

Yosebe Yesuse debetnea Isib onseo weng olo yamo balisobe.

*I moniba memei naka teni yem haamon-siohe.*

<sup>16</sup> Awitnino mito tekein kemin nakai Helot esuo imino mo unim blimobe. I deib afet deib onsiba Helote wentenea Dim baatne unibbiobo genea alo sumo tliaubanoa e funanea Sino awitnino mito tekein kemin naka eli baatneniba Awitnino olo mawebuo bifolo asu blimanobo ge baatneibbiobo ge funane kesoa e awa genalin nakai baabeneba Moniba Betlehem

bib sel isa eka Betlehem bib gwab gwabo sel isa memei naka teni bifolo asu blimanyebo isa eka i abuk dleb tlemin isa alukum yem haaine gesea ina monsiobe. <sup>17</sup> I inasibo sinanggwano Gode e weng omkeimalin nakae e niniino Yelemaiae weng olo baabanea dolanea baanea

<sup>18</sup> Nakaia unangai Yudai betano Lama bib ye memin weng osa halinin ans oia wentebiba eka Leselo molobseli i meleli dafao mebiba naka maki bobol ayamo omyom genabib otane i mo wentomabibbabe. I meleli blimaib kesota inabiobo ge baa dolanebuo

Helote inanea e awa genalin nakai dlanea moniba memei yalosiba i awokwali manggolom bisibo weng olo yamo balisobe.

*Yoseb esa e alal hatwal isa moniba Nasalet bib onsiobe.*

<sup>19</sup> Helote kaanea omito Sume Gode abisake tenea Yosebe Isib ye bianea aambio dam deib baabanea <sup>20</sup> Kobo hananeba men esa e biem osa dletneba imin moneba Isleli betan one! Nakae men ele Ananano gabe nakae kaanebo ge baabasea <sup>21</sup> Yosebe hananea men hatwali dletneba imin Isleli betan onsiobe.

<sup>22</sup> Ina otane e wentea i baaniba Helote miine Akeleas esak aalebe alango dokonea Yudia seli kima biebo gesiba Yosebe wentenea e Betlehem bib onamino tosiambea Gode imin dam deib baabaneta moneta Galili betano <sup>23</sup> bibo niniino Nasalet bib ye bisebe. E inaseo sinanggwano Gode weng omkeimalin nakai Yesuse weng sango baaniba

I naka ele Nasalet bib sak ge nganhamomabiobo geibbuo

weng olo bain inanoa yamo balisobe.

### 3

*Yone aa fuayemin nakae weng sangobe. (Mak 1:2-8; Luk 3:1-18; Yon 1:19-28)*

<sup>1</sup> I Nasalet bib ye bliba bifol homono blimanoa Yesuse damanabeta Yone aa fuayemin nakae tenea ibuantem ye Yudia betan ye tlaneta Gode wengo omkeima monsebe. <sup>2</sup> Nakaia unangai homoni tetemiba baabenea Ibo hengmino deiboniba ib bobol temo deskina omoniba Gode omaline! Gode nakaia unangai kimanamabeo mebanobo ge baabesebe.

<sup>3</sup> Sinanggwano Gode e weng omkeimalin nakae, niniino Aisiaiae, e wengo omalea baanea

Naka make ibuantem ye bianea ngambianea Sume tlamabeo deibo kebaniba klaubaine ge nganamabeo genebuo

Yone teseo weng olo bain inanoa yamo balisobe.

<sup>4</sup> Yone youme ayambabe. E til kameli dim ota klanea dubusanea eka hale eil blumakau i aale klanea tobonea kakame hawatibila gebianea eka e imen ole kweng kwablum isa eka manggeki un osa ota wembianetabe. <sup>5</sup> O dim ota Yudia betano bib gwab gwabo blib isa eka bib sumo Yelusalem bibo blib isa eka Yodan tamano bib mak bib mako blib isa alukum teniba Yon esu ye miniba e wengo wente bianiba <sup>6</sup> elekiem olokiem i hengmino omkeimabiba Yone aaye Yodane fuaye monsebe.

<sup>7</sup> Yone teme Felisi homon isa Sadyusi homon isa Aaye fuelanomo geniba tetemisa e baabenea Inab memei ulab ibo kukub misiamo sma wafu bliobo, Gode ib kukub misiam olo yang kenea enin sumo ib dimo tam tlamabobe. Waneta baabeneta Ibo aaye fuelanimibo Gode ib kukub misiamo mo yang kenamabebabo ge baabenebiote? Ne mo baabeim blimobe. <sup>8</sup> Ibo kukub ayamo wafueiba ne yatem tekein kenita I hengmino deiboniba i bobol temo deskinaniba Gode omalibbiobo genita aaye fuelabenano! <sup>9</sup> Ibo mo funanibta Ni Eblahame molobselobo, Gode ni hengmino ommlabenamabebo ge funanimibe! Wentine! Ibo hengmino mo deiboniba ib bobol temo deskinaim blim kenib mole ibo Eblahame molobselobo gabib olo mo daabenota Gode kin dimo molot anomabibbabe. Gode tom olo baabonea Obo naka nale ge baabone mole o inanoa Eblahame molobsel anamabo kesoa ibo ibo hengmino mo deibueim blim kenimibo ibo tomo mo gaisonomabibbabe. <sup>10</sup> Memalo Gode nakaia unangai kukubo klabe kesoa klaine! Makob aso yamo balinin blim biamo nakai teniba aso haniba feboniba kibanabo inaminobe. Ibo ibo hengmino mo deibueim blim blib kesoa ibo makob aso yamo mo balinin blim buo ulabobe. Gode ibo yenanamabebo.

<sup>11</sup> Ibo hengmino deiboniba ib bobol temo deskina omoniba Gode omkahabibo mitmakam ota ne ibo aaye fuayebibe. Otane naka make ne abuk tlamabe eta Gode Hobe dabanea tenea ib bobol temo tlanea makob aso eimbianoa inamin namino kibanoa nemat genabo inanea ib bobol temo as kibain kenea ib hengmino nemat genamabebo. E titilo ne titilo gaisonamabobe. E sumobe. Ne sumba kesoa ne e mo tenanobta wengo baanomobbabe. <sup>12</sup> E makob naka make

difib glitamino wafunea imen toumin biino glitanea imen ayamu olminea eka imen misiam osa aal osa banea oleb monea ase amit eimbinabe tem wat fanamabe inanea nakaia unangai maki dleb monea bib ayam danea eka mak ile dleb monea bib misiam da nanamabebo ge baabesebe.

*Yone Yesuse aaye fuelabesebe.  
(Mak 1:9-11; Luk 3:21-22)*

<sup>13</sup> Am olo dim ota Yesuse Galili betan danea Motemia Yone aaye fuelatneneko genea tenea Yodan teman ele tetemea <sup>14</sup> Yone baabanea Kobo nimin kenebta Ne aaye fuelatneneko geta tlebe? Ne naka sumbabe. Kebta ne aaye fuelatnenale ge baabase otane <sup>15</sup> Yesuse baabanea Yeye ne weng obi yota inanomo! Nibo Gode bobol temo naine gabe yota inanoba kukubo molot iwat nanomo gesea Yone e wengo wentene inabasebe.

<sup>16</sup> Yone Yesuse debeb daak aaye dababu fuelabanea hana nabea abile belasea temeaa Gode Hobe makob wan kubiamieie ulab daakenea Yesuse dim ele tleta <sup>17</sup> weng mako abilim ut danao baanoa Ele ne miinobo, ne kla gobabiania kla seinhabibo ge baasobe.

#### 4

*Gululame Yesuse dabamatemsebe.  
(Mak 1:12-13; Luk 4:1-13)*

<sup>1</sup> Yone Yesuse aaye fuelabanea utlea omioto Gode Hobe Yesuse debetnea monea ibuantem naka blim ye bia Gululame dabama tem dabama tem bise otane Yesuse e wengo mo wentim blimobe. <sup>2</sup> Yesuse imeno mo doweim blim bia amo 40 bliman-ota imen teb sumo ananabota <sup>3</sup> Gululame tenea Yesuse baabanea Kobo baaneba Ne Gode miinobo gabeb kesoa kobo tom olo baaboneba imen anoa downale gesea <sup>4</sup> Yesuse baabanea Gode buk temo baanoa Imeno nakae afen smike mo dabalamb-oba otane e Gode wengo alukum wentame ota afen smiksa namabebo genobiobo ge baabasebe.

<sup>5</sup> Omito Gululame Yesuse imin debetnea moniba Yelusalem bib ye unaniba debeb utnea Gode am sumo golim ut unanea <sup>6</sup> baabanea Kobo baaneba Ne Gode miinobo gabeb kesoa gobbia daak one, mo kananomobabe. Niminbabe, Gode buk temo baanoa

Gode abiseli baabeneba kafu komomabib kesoa tom yango mo bilab kenomob-abo genobiobo

gesea <sup>7</sup> eka Yesuse baabanea Ina otane Gode buk temo weng mako baanoa Keb Sume Gode mo dabama temaebe genobio

kesoa ne keb wengo wenti mole Gode dabama temamabibo ge baabasebe.

<sup>8</sup> Gululame Yesuse imin debetnea monea amgolime tekebmine golim ut dofanea dabalim olo betano alukum komokwali kima blib osa eka dabalim olo inamin namino ayam osa aleha bianea baabanea <sup>9</sup> Kobo dlong dlong golbua daak touneba ne niniino nemtoupleb neb mole ne inamin namin olo alukum omklamabibo gesea <sup>10</sup> Yesuse baabanea Gululam kobo de one! Gode buk temo baanoa

Kobo Sume Gode elekime ele niniin ota dobtoupleb bianeba ele okok ota okok kemale genobiobo

gesea <sup>11</sup> Gululame deiba unea abiseli teniba Yesuse daabasiobe.

*Yesuse okoko mikiktemo Galili betan ye kilosebe.*

*(Mak 1:14-15; Luk 4:14-15)*

<sup>12-13</sup> Yone wengo omkeima bianea baanea Helote misiam nanebiobo gesea Helote wentenea atliaubasoa awa genalin nakai dlane moniba Yone afu debeb moniba klabut am tam dasiba Yesuse weng olo wentenea monea Galili betano Kabaneam bib ye onsebe. Bib olo aamuke Galilie ken ye biotabe. E Nasalet bibo mo unim blimobe. Betano yo Sebyulan esa Naftalai esa i molobseli betanobe. <sup>14</sup> Yesuse inaseo Gode weng omkeimalin nakae Aisaiae wengo yamo balinobiobe. Aisaiae baanea

<sup>15</sup> Aamuke Galilie kek osa eka aaye Yodane teman osa ole Sebyulan esa Naftalai esa i molebseli betanobe. Betan olo nakaia unangai homoni Yudaba naka afeti ye bliobe. <sup>16</sup> I mililam bio tem tab bianiba ayal sume atemomabiobo, eka i God esuo mebo mo nim blim skeim kaanamim bib ye blibo ayale eibenamabebo genebiotabe.

<sup>17</sup> Olo dim ota Yesuse e okoko kilonea wengo omkeima bianea baabeneba Ib hengmino deiboniba ib bobol temo deskinaniba Gode omaline! Gode nakaia unangai kimanamabe amo meb tlobo ge baabesebe.

*Yesuse nakai asuke asuke nai dlakanebiobe.*

*(Mak 1:16-20; Luk 5:1-11)*

<sup>18</sup> Yesuse Galili aamuke ken tla bebianea temeaa Saimone, e niniin afeto Fita etabe. E ninge Endlue i dabo aningi yemin nakabe. I aameno omoniba Galili aamuk ele aningi habianiba yebib kesoa yatemnea <sup>19</sup> baabeneba Ibo ne beketneine! Ne alebeia tekein keniba makob memalo naniba aningi yaleb tlebib inaniba nakai dleb teniba nesu tlemomabiobo ge baabesea



wenteniba <sup>20</sup> i aameno hebmamsab deiboniba bekeba bliba <sup>21</sup> mes unaniba Yesuse temea Sebedie e meleli Yems esa e ninge Yon esa i dumwalo weseme tem daak bianiba aameno bikinabib kesoa yatemnea nganabesea <sup>22</sup> isak inaniba weseme esa eka i ay esa ye deibeniba Yesuse bekeba onsiobe.

*Yesuse monea Galili bib mak bib mako Gode wengo omkeima bisebe.*

*(Luk 6:17-19)*

<sup>23</sup> Yesuse Galili betano bib mak bib mako monea Gode amo tem tam unanea aleye bianea Gode nakaia unangai kimanamabeo wengo omkeima bianea eka nakaia unangai ginin gam isa eka skila kweilao misiam isa eka ginino afet afet omo blib isa klaye biam bisebe. <sup>24</sup> E okok naboo dowan wengo ometniba moniba Silia betano bib mak bib mako alukum baaiwa i nakaia unangai ginin gam isa eka enino sum enyebo isa eka hob misiam bekebe blib isa eka ginin sumo dlasambua gem-bib isa eka skilono dimilubenobio isa dleb tlebiba klayemonsebe. <sup>25</sup> Yesuse behea nakaia unangai homoni Galili betan da tlib isa eka Dekabolis betan da tlib isa eka Yudia bib mak bib mak da tlib isa eka Yudia bib sumo Yelusalem bib da tlib isa eka nakaia unangai Yodane milim wat bianiba tlib isa bekeba onsiobe.

## 5

*Yesuse amgolim ut Gode wengo omkeima monsebe.*

*(Luk 6:20-23)*

<sup>1</sup> Yesuse nakaia unangai dobsileb bebibi yatem deibenea utnea amgolim ut toubia e okok aleyemin nakai utemiba <sup>2</sup> aleyemonsebe. E inanea aleye bianea baabenea

<sup>3</sup> Nakaia unangai Gode baabaniba Ni titilo blimobo, kobo ni bainobo galin esa bobol tem funin esa daabenale ge ohabibi seinine! Gode daaye bianea kla kima biebe.

<sup>4</sup> Nakaia unangai bobol ilum omfubebuei seinine! Gode bobol tem ayamo omyamabebe.

<sup>5</sup> Nakaia unangai bobol fiab blibi seinine! I sinanomo Gode baanea Inamin namino omyamabibo genebuo omomabiobe.

<sup>6</sup> Nakaia unangai funaniba Gode baanea Ibo inamin namino inaine gene mole nibo nanomo gabib nakaia unangai seinine! Gode daabenea inamin namin olo kla nanomabiobe.

<sup>7</sup> Nakaia unangai naka mak unang maki dohalilaniba daayebibi seinine! Gode isa dohalilanea daabenamabebe.

<sup>8</sup> Nakaia unangai hengmino deiboniba Gode bobol tem funino wafu blibi seinine! Sinanomo i Gode keim atemomabiobe.

<sup>9</sup> Nakaia unangai bobol fiab bianiba naka mak unang maki baabeniba Nibo awao mo genaloobe ge baanimibi seinine! Gode baabenea Ibo ne melelobo ge baabenamabebe.

<sup>10</sup> Eka nakaia unangai kukub ayamo Gode namine gabeo wafu bliba naka mak unang maki enin kino omkaye biam eka weng misiam oye biam blibi seinine! Gode i kla kima biebe.

<sup>11</sup> Naka mak unang maki ibo misiam doka bianiba enin kino omkaye biam bianiba dim oye biam nabib yo niminbabe, ibo ne bainobo galin naka kesota nayebiobe. I inayemibo ibo seinine! <sup>12</sup> Inayemib mole ibo bobol ayam fumbianiba seinine! Ina binib biamo sinanomo Gode abilim ut inamin namin ayamo homon doyamabebe. Sinangwano i Gode weng omkeimalin naka isa inaye bianiba enino omkaye bianiba yebiam binibbiobo ge baabesebe.

*Yal osa ayal osa o saa wengobe.*

*(Mak 9:50; Luk 14:34-35)*

<sup>13</sup> Yesuse imin baabenea Ibo makob yalo ulabobe. Nakai yalo kulani tubusiba klaanino deibonoo gatanabo inaniba ibsa moniba dabalim naka isuo nimibo isa inaniba kukubo dot misiamo deibonomabiobe. Yale game blimanemeeo fatnabanibta imin gam ayam anamabene? E klaniba imin ayam anamino blimobe. Yal ele amitie misiam anea e okoko ye blimanamabe kesoa i obbiaiba nakaia unangai e dime tama tama unemomabiobe.

<sup>14</sup> Ibo makob nakai ayalo ulabobe. Nakai ayale oboniba einimibo i deibo alebenamabebe. Ib kukubo makob ayale ulab kesoa ibo nakaia unangai Gode deibo alebenomabiobe. Bib sum mako amgolime tekebmine golim ut genaib biamo ayoko mo biamabobabe. Ibo o ulabobe. Ib kukubo ayokba kesoa nakaia unangai yatemebiobe. <sup>15</sup> Nakai ayale mo ei ofanibta bakete obonibta obbubanimibbabe. I keim ofaiba bomat genea nakaia unangai alukum am tam blibi eibenamabebe. <sup>16</sup> Ibsa inaniba inamin namin ayamo namibo makob ayal einin kebliba nakaia unangai yatemniba ib Aye abilim ut bie e niniino dobtoulebe nomabiobo ge baabesebe.

*Gode hekmel wengo weng otabe.*

<sup>17</sup> Yesuse imin baabenea Ibo mo funanibta E tenea Mosese hekmel weng osa Gode weng omkeimalin nakai weng osa omtlabenang geneta tlebo genimibe! Yeye, ne tenia hekmel weng osa Gode

weng omkeimalin nakai weng osa baanoa Inamin namino tam tlamabobo genobu olo inania klanang genita tlibe.<sup>18</sup> Ne bain baabenamabibe, dabal esa abil esa sma biamo hekmel weng osa sma biamabobe. Otane hekmel wengo baanoa Inamin namino tam tlamabobo genobu olo Gode alukum inanamabebe.<sup>19</sup> Inanamabo kesoa naka make hekmel weng gwabo omtlane mole e naka mak isa alebenea isa inaniba naka ele Gode kimanin bibo e niniino men anamabebe. Ina otane nakae hekmel wengo kla wafunea naka mak unang maki alebenea isa inaniba wafu nimibo naka ele Gode kimanin bibo e niniino sum anamabebe.<sup>20</sup> Weng olosa kla wentine! Hekmel weng tekein kemin naka isa Felisi isa baaniba Ni kukubo molotobo gabib otane i Gode wengo klao mo wafu blibbabe. I inabib otane ibo i kukubo gaisenibta Gode wengo kla wafueine! Ibo mo inaim blim keib mole ibo Gode kimanin bibo mo unomabibbabo ge baabesebe.

*Atliyemin kukubo makob naka yemin kukubobe.*

*(Luk 12:57-59)*

<sup>21</sup> Yesuse imin baabenea Ibo tekein kebiobe, i Mosese hekmel wengo kibianiba baaniba O mitmakamo inaminobo, ibo nakai mo yenaiba kaanimibe! Naka make nakai yenanea kaab mole e debeb moniba kot kebaine geibbio otane<sup>22</sup> memalo ne ibo baabenamabibe, nakae waneta alo tliubanua e neke dobsuanane mole e makob naka ele ananea kaanamabe kesoa i debeb moniba kot kebaine! Eka nakae waneta e neke weng misiam ohabe mole i debeb moniba komokwali dimo kot kebaine! Eka nakae waneta e neke baabanea Kobo dot klamakinobo ge baabane mole e ase einamabebe.<sup>23</sup> Inamin kesoa ibo Inamin namino dleb tenoba funoba Gode heitdabanomo geniba taniba Gode am sumo tem tam unaniba funaniba Sino ne neke kukub misiam nabaia e Yebbabo genebiobo ge funaib mole<sup>24</sup> inamin namino Gode heitdabanomo geniba dleb tam biaiho heitdahanin biino kikib ye dlaniba deibo moniba naka ele tem naniba wengo klaiba blimansota tenibta dlo funiba Gode heitdabanibta lotu kebaine!

<sup>25</sup> Naka make kobo kot kebbenang genabea moniba Kot kenomo geniba bebib biamo hebmamsab wengo klanibta bobol temo makobaine! Ibo mo inaim blim kenib mole e kemeb monea kot kimanine kemansa eka esak kemonea awa genalin nakae kemalea kemeb monea klabut am tam danamabebe.<sup>26</sup> Kobo klabut am tamo biebo kot kimanin nakae baabkenea Monio inamin kina walone ge baabkene biamo

alukumo mo walim blim keneb mole amitie klabut anamabeobe. Ne wengo bain baabeibobo ge baabesebe.

*Taman kukubo weng sangobe.*

<sup>27</sup> Yesuse imin baabenea Ibo tekein kebiobe, i Mosese hekmel wengo kibianiba baaniba O mitmakamo inaminobo, unang tamano mo henganimibe geibbu otane<sup>28</sup> memalo ne ibo baabenamabibe, nakae waneta unango watenea e bobolo wabanua funanea Ne unang olo omeb denitabo ge funane mole kukub olo makob e tamano henganamabebe.<sup>29</sup> Inamin kesoa keb kine inamin namino waterneba bobolo wabkenoa henganeb mole ulo obbianale! Keb kine elekiem deiba bianeba moneba afen smike doboneba amit neb mole kukub olo ayamobe. Ina otane kobo deibaneba asu teme bianeba aseinin bib uneb mole kukub olo misiamobe.<sup>30</sup> Eka keb kweile kweitale kemab manea hengmino henganeb mole walo ombianale! Keb kweilone elekiem deiba bianeba afen smike doboneba amit neb mole kukub olo ayamobe. Ina otane kobo deibaneba asu tubu nabiam bineba aseinin bib uneb mole kukub olo misiamobo ge baabesebe.

*Alelwali fotebenamin kukubo wengobe.*

*(Matyu 19:9; Mak 10:11-12; Luk 16:18)*

<sup>31</sup> Yesuse imin baabenea Ibo tekein kebiobe, i baaniba Nakae e alelo fotebenangge mole e futano dolanea baanea Unang olo ne ael otane ne fotebeibobo ge baa dolanea e alelo omweneta fotebeneko geibbu otane<sup>32</sup> memalo ne ibo baabenamabibe, naka make e alelo tamano mo hengaim blim bua fotebesea monoa imake afet dobo mole imake emaye naneta o taman unang omfanamabebe. Eka naka mak esak unango sino o imake fotebenebua e ome mole esa tamano henganamabebo ge baabesebe.

*Gode niniino taisanamamin wengobe.*

<sup>33</sup> Yesuse imin baabenea Ibo tekein kebiobe, i Mosese hekmel wengo kibianiba baaniba O mitmakamo inaminobo, ibo baaniba Sume tekein kebebo, ni inamin namino bain ye nanomabbibo ge baab mole bain inaine geibbu<sup>34</sup> otane memalo ne ibo baabenamabibe, ibo weng afeto obib biamo Gode niniino mo taisanibta baanibta Bain ye Gode tekein kebebo genimibe! Abile niniin osa mo taisanibta baanimibe! Niminbabe, abile Gode binobe.<sup>35</sup> Dabale niniin osa mo taisanibta baanimibe! Niminbabe, dabale Gode biin gwabo skilo ola biebe. Eka Yelusalem bibo niniin osa mo taisanibta baanimibe! Niminbabe, Yelusalem bibo Komok Sume bibobe.<sup>36</sup> Eka ibo ib gabamono niniin osa

mo taisonibta baanimibe! Niminbabe, ib gabamano elekiem ke tobo tofata millilobe namaobe genomabibbabe. <sup>37</sup> Inamin kesoa ibo baaniba Ae genimibo bain inamine! Eka ibo Yeye genimibo bain yota inamine! Inamin namin weng afeto obianiba Gode niniino taisanamin ole naka misiame data tlebobo ge baabesebe.

*Kukub misiame yang kenamin wengobe.  
(Luk 6:29-30)*

<sup>38</sup> Yesuse imin baabenea Ibo tekein kebiobe, i Mosese hekmel wengo kibianiba baaniba O mitmakamo inaminobo, naka make keb kine bekelubkene mole naka mak ibsak e kine bekelubaine! Eka naka make kananea keb sitono haubkene mole naka mak ibsak e sitono haubaine geibbu otane <sup>39</sup> memalo ne ibo baabenamabibe, ibo naka make kukub misiame omkayebe biamo mo yang kenimibe! Naka make keb keneng wat blelabkene mole deskinaneba keneng milim osak blelabkeneko! <sup>40</sup> Eka kobo naka make inamin namino nabanebbua e kobo kot kebkenang genabea kot kimanin nakae baabkenea Keb youm eta gamubanebta koto walone genea kobo inaneba gamubanang geb mole tib elesa makob asu ye gemelubanale! <sup>41</sup> Eka kiab make menganea baabkenea Ne monio kobo walonamino blim otane kobo ne afobeingo skeimbabo meb olotabo oleb mo daatnenebte gene mole kobo monio bobolo mo funanemebe! Oluba moneba deibo inamin sin ye daatnenale gene biamo gaiso moneba skeim ye daabanale! <sup>42</sup> Eka naka make baanea Kobo inamin namino donene gene mole dlalale! Eka naka make Inamin namino donebbiota nesak yang kenano gene mole kobo mo Yeye genemebe! Dleleba dleb uneko ge baabesebe.

*Nibo nib makaai gobenomo!  
(Luk 6:27-28,32-36)*

<sup>43</sup> Yesuse imin baabenea Ibo tekein kebiobe, i Mosese hekmel wengo kibianiba baaniba O mitmakamo inaminobo, ib nekwali kla gobeniba eka ib makaai mo gobenimibe geibbu otane <sup>44</sup> memalo ne baabenamabibe, ibo ib makaai kla gobe nabianiba eka naka maki ibo enin sumo omkayebib biamoei Gode nganabaiba daabeneko! <sup>45</sup> Ibo inanimib mole ib Aye abilim ut bie ulab anomabiobe. E afoko omya nakaia unangai ayam isa misiam isa tubube biobe. Eka sok osa omane tenoa alukum nakaia unangai ayam isa misiam isa isu tlebo kesoa ib makaa isa nekwali isa alukum gobeine! <sup>46</sup> Ibo nakai ibo gobe blibi ilita ibsa gobeib mole olo besabe. Inamin kukubo Gode mo seinyemabebabe. Takis moni bokalin naka isa inaniba i nakai

gobe blibi ilita gobe binabiobe. I ina binabib otane ibole nakai alukum kla gobeine! <sup>47</sup> Eka ibo ib nekwali ilita Klayam blibo? ge oyebib osa besabe. Ib kukub olo nabibo naka maki kukubo mo gaisenomabibbabe. Bainobo galin nakaba isa ina binabiobe. Ibo nakai alukum Klayam blibo? ge oyemine! <sup>48</sup> Ibo kukub moloto wafuniba makob ib Aye abilim ut bie nabinabe inamine ge baabesebe.

## 6

*Nakaia unangai afobeingo blimi daabenamino wengobe.*

<sup>1</sup> Yesuse imin baabenea Naka maki funaniba Nakaia unangai kin dimo ni kukubo ayamo wafu bianoba nakaia unangai dohalinin kukub osa daayemin kukub osa wafu bioba I naka ayamobo geniba ni tak nganyemine ge fumbib naka ile klaine! Eka ibsa kukub olo klaine! Ibo kukub olo nakaia unangai kin dimo inabiba nakaia unangai ib niniino dotouleb binib biamo kukub olo makob i kukub ayamo ibo sin yang keib biamabo kesoa Gode ib kukub ayamo imino mo yang kenamabebabe. <sup>2</sup> Inamin kesoa ibo nakaia unangai afobeingo blimi inamin namino doym gaibo ibo mo Inanobta nakaia unangai ni tak nganyemine genibta makob dim omin nakai Gode am tam osa eka deib keim osa inanoba naka mak unang maki ni niniino dotouleb nine geniba nabinabib yo ibo namibe! Ne wengo moton baabenamabibe, nakai dabalim ele blibi kukub ayamo naka mak unang maki omkayebiba i niniino dotouleb binib biamo sinanomo i kukubo ayamo imin yang kenamino blimobe. <sup>3</sup> Ibo naka mak unang maki inamin namino blimi ibmio doym gaibo naka mak unang maki mo yatemaibe, ayok doynie! <sup>4</sup> Ib daayemin kukubo ayok bi otane ib Aye inamin namin ayoko alukum tekein kebe kesoa e ib beten wengo wentenea yang kenamabebo ge baabesebe.

*Beten kemino kukub otabe.  
(Luk 11:2-4)*

<sup>5</sup> Yesuse imin baabenea Eka ibo beten kenom gaibo dim omin nakai naniba Gode am tam osa eka deib sumo ken osa maniba Beten keboba nakaia unangai yateniba ni tak nganyemine geniba nabinabib yo ibo mo inamibe! Olo kla funaine! I inabiba naka mak unang maki i niniino dotouleb binib biamo sinanomo Gode mo baaneta Ibo klayam nabinibbiobo genamabebabe. <sup>6</sup> Ina otane ibo beten kenom gaibo taniba ilib aalamn biin tam unaniba amisalo douniba ib Aye ayok bie nganabaine! Ib Aye inamin namino ayok buo tekein kebe

kesoa e ib beten wengo wentenea yang kenamabebe.

<sup>7</sup> Ibo beten kebib biamo besa wengo mo obianibta makob bainobo galinbai naniba teke beten kebianiba Ni klayam beten kebob kesoa Gode wentebebo geniba nabinabib yo ibo mo inamibe! <sup>8</sup> Ibo mo i ulab animibe! Niminbabe, ibo ib Aye Gode oha bianiba Ni inamin namino blim biobobo gabibo e sin tekein kebebe. <sup>9</sup> Ibo beten kenom gaibo enagge baaine!

Ni Ay God kobo abilim ut biebobe.

Keb niniino kining kesoa ni keb niniino kemtouleb biobobe. <sup>10</sup> Kobo nakaia unangi kimanin amo omaeb tloko! Keb bobol tem funino abilimo nabeb ota nisa dabal dim olo namomo getabe. <sup>11</sup> Kobo memalo ni imeno am olo olo dim ota oyene! <sup>12</sup> Kobo ni hengmino omtlabeneba eka nisak naka maki hengmino omkayebib biamo funino dokobenoa deibenomo! <sup>13</sup> Gululame tenea menganea baabenea Ibo inamin namin kukub olo naine genemeo kobo e mo deibanebta ni dlananemene! Kobo ni kla daabeneba ni mo henganomobe ge baaniba beten keine!

<sup>14</sup> Ibo naka maki kukub misiamo omkayemibo ibo i kukub misiamo bobolo funino dokobenoa deibueib mole ib Aye abilim ut bie esak ib hengmino omtlabenemeo imino mo funemebabe. <sup>15</sup> Ina otane ibo naka maki hengmin kukubo omkayemibo ibo o amitie funimibo ib Aye abilim ut bie esak ib hengmino mo omtlabenamabebabe. E amitie funamabebo ge baabesebe.

*Imeno halamin weng otabe.*

<sup>16</sup> Yesuse imin baabenea Ibo Imeno halanoba Gode bobol ota fumbianoba beten kemomo gaibo ibo dim omin nakai kukubo mo wafunimibe! I imen teb yemin kibi kibal welasaniba haabliba nakaia unangi yateniba baaniba I imeno halaniba beten kebib kesoa i naka ayamobo geine geniba nabinabib yo ibo mo inamibe! Ibo olo funaine! I inabiba nakaia unangi dabalim ele blibi i niniino dotouleb binib biamo kukub olo makob i kukub ayamo sin yang keib biamabo kesoa i kukub ayamo imin yang kenamino blimobe. <sup>17</sup> I ina binabib otane ibole imeno halanimibo ib kibio fubaniba eka gabamano kom kena bliba <sup>18</sup> naka maki yatemaib otane ib kukub olo nabibo i mo tekein keim blim kesoa funaniba I imeno wembiobo ge funaine! Ibo inanomabib otane ib Aye ayok bie yatem tekein kebe kesoa e baanea Ibo klayam nabinibbiobo genamabebo ge baabesebe.

*Sinanomo nibo abilim ut inamin namin ayamo dlomabbiobe.*

*(Luk 12:33-34)*

<sup>19</sup> Yesuse imin baabenea Ibo inamin namin ayamo dabalim olo buo o bobolo mo wayebota olminamibe! Ibo mo funanibta Ni dabalim olo afobeing ayamo dlomabbiobo genimibe! Inamin namino dabal dim olo buo slub isa eka ngawal osa watwat dabua eka ayok henin nakai teniba daamo baniba ayok oleb une binabiobe. <sup>20</sup> Ina otane ib inamin namin ayam ole abilim omi ota olmieine! Abilim ole slub isa ngawal osa inamin namino ayamo mo watwat danimibbabe. Eka ayok henin naka isa mo tenibta daamo baniibta inamin namin olo ayoko mo oleb unaibbabe. <sup>21</sup> Inamin kesoa ibo ib bib mako inamin namin ayamo bibe biamo ibo funaniba Ni bib olo amit nomo ge fumbianiba ib bobol temo omolomabiobo ge baabesebe.

*Keb kino keb damo ayalobe.*

*(Luk 11:34-36)*

<sup>22</sup> Yesuse imin baabenea Nakai ayale oboniba am tam ofanimibo bomatowanea tubunamabebe. Ib kin osa makob inaminobe. Ib kino damo ayal kesoa ibo inamin namino ayam ota wateme bianiba namib mole ib bobol tem funin osa makob ayal inanao eibenamabobe. <sup>23</sup> Eka ib kino inamin namin misiam ota wateme bianiba namib mole ib bobol tem osa makob amo mililambio inanamabobe. Ib bobol tem funin osa inaminobe. Ibo funaniba Ninita ye biobobo ge fumbianiba naka mak unang maki mo daayemin blim keib mole ibo dot kla mililambio tem tab nomabiobe. Otane ibo naka mak unang maki bobolo fumbianiba daayemib ota ayale dimo nomabiobo ge baabesebe.

*Nakae elekieme okoko asuo mo okok kemabebabe.*

*(Luk 16:13)*

<sup>24</sup> Yesuse imin baabenea Komokwali asu biaibo naka make i okoko asuo mo okok kemebabe. E inanea asu okok keme mole mak eta gobanea make mo gobaim blim kenamabebe. Eka e okoko asu okok keme mole i dab i okoko klao mo okok kemebabe. Make okok ota kla okok kebianea make okoko deibanamabe inaminobe. Ibo Gode okoko okok kemib mole ibo moni sumo bobolo mo funimibe! Ibo moni bobolo funib mole ibo Gode okoko mo okok kemomabibbabo ge baabesebe.

*Bobolo usan keyemino weng sangobe.*

*(Luk 12:22-31)*

<sup>25</sup> Yesuse imin baabenea Inamin kesoa ibo ne wengo wentine! Ibo bobol temo usano mo keyebota bobol tem hekheko

mo fumbianibta Ni imeno fatda dlo downome? Ni aayo fatda ota downome? galaibe! Eka ibo aalo talo mo wabianibta Ni youmo fatda dlonobta ni aalo dlusa wasonome? galaibe! Imena aaya youmao dot misiambabe. Ye ayam otane ib dam ole afen blib kesoa ole dot ayamobe. Ib imena aaya youmao amit ninbabe. Afen smik ele amit nin kesoa ibo inamin namin olo bobolo mo fumbianibta ib bobolo usano mo keyemone! <sup>26</sup> Ne nimin kenita inangge baabeine? Niminbabe, wani asal eule eim haablibi asiam sano mo doli bianiba eka imeno mo olmina biam nabibbabe. I imeno mo olminiba am tamo mo okabibba otane ib Aye abilim ut bie i imeno okayebebe. Wan ile besa kulanobe. Gode emaye kima bianea imeno okayebebe. Otane naka ibole afen smiksa kesoa Gode emaye ibo kla kima bianea imeno okayebebe. E inayebe kesoa ibo imena aaya youmao bobolo mo fumbianibta ib bobolo usano mo keyemone! <sup>27</sup> Gode nakai kaanomabib amo omakabenea Yo dim ota kaanomabiobo gene biamo otane naka eli inamin namino bobolo funaniba i bobolo usan keyebua fumbianiba Ni imena youmao fatda dlomabbione? galaibo kukub olo daabenota Gode amo omakabenebuo gaiso meseinibta kaanomabiba? Yeye i mo inanomabibbabe. Gode am olo makob ye omakanebiobe.

<sup>28</sup> Ibo ib bobol tem daako usano mo keyebota youmo bobolo mo funimibe! Ibo aketo bobolo funaine! O sesa tam buo nakaba kesoa youmo mo bikina bianota okoko mo okok keboba otane o keto klayam bamtoubobe. <sup>29</sup> Sinanggwano Yudai komok sume Solomone youm ayamo kibinebu otane aket ota Solomone eito gaisanobiobe. <sup>30</sup> Aketo amito mo nomobabe. Mema yota bamtoufa denoa dilbinoo dimo gatanoo nakaia unangai mako heleb moniba aso fakam tanabiobe. Gode aket ole besa eit klabe otane naka ibole afen smiksa kesoa aketo gaisoibbiobe. E ina bianea naka ibole kla kima bianea youmo okayebebe. Ibo youmo bobolo fumbianiba ib bobolo usano keyemo mole ib bainobo galino mo sbal manomabibba <sup>31</sup> kesoa ibo mo funanibta Ni imeno fatda dlota downomabbione? Aayo fatda ota downomabbione? Youmo fatda ota dlota kimomabbione? gabianibta funimibe! <sup>32</sup> Nakaia unangai Gode mo bainobo gabibbai inamin namin olo bobolo fumbib otane ibo mo i ulab animibe! Niminbabe, ib Aye abilim ut bie ibo inamin namino blim bibebuo tekein kebebe. <sup>33</sup> Ina otane mikiktemo ibo Gode nakaia unangai kimanamabe amo tlamabo osa eka Gode inamin namino inaine gabe osa funaine! Ibo inaib mole Gode inamin

namin olo alukum oyamabebe. <sup>34</sup> Gode ibo kima bieta klayam blib kesoa inamin namino bomanoa tam tlamabo o bobolo mo funimibe! Memalo tam tlo bobol ota funine ge baabesebe.

## 7

*Kukubo moton sanin wengobe.*  
(Luk 6:37-38,41-42)

<sup>1</sup> Yesuse imin baabenea Ibo naka maki i kukubo moton sanib mole God esa ib kukubo inabenamabe kesoa ibo mo inamibe! <sup>2</sup> Niminbabe, ibo naka maki baabeniba I naka misiamobo genimibo God esak ibo baabenea Ibo naka misi-amobo ge baabenamabebe. Ibo naka mak unang maki inamin namino dokayebib biamo God esak yang kenea inamin namin yo olota ibsa doyamabebe. <sup>3</sup> Keb neke difib mamano kin tem wato bibabuo wateme-habeb otane atbele keb kin temo bibkebie ye mo fumbebbabe. <sup>4</sup> Kobo keb neke mo baabanebta Neko, difib mamano keb kin tem wato bibkebuo omtlabkenamabibo ge baabanemebe! Atbele keb kin tem iwaye bibkebie ye atemale! <sup>5</sup> Kobo inamin kukubo nameb mole dim omin sitalsabe. Mikiktemo atbel beselibe keb kin teme bie ye tobtlanebta kino kla teme bianebta keb neke difib mamano omtlabanale ge baabesebe.

*Ibo Gode inamin namin ayamo e makaai mo oyaibe galin wengobe.*

<sup>6</sup> Yesuse imin baabenea Nakai Gode wengo omdibihabibi makob tili ulab kesoa ibo e wengo mo omkayemibe! Eka ibo nakai Gode weng dobo weng ohabibi Gode inamin namin ayamo mo oyaibe! I baaniba Olo mitmakam blimobo genimiobe. Kukub olo makob nakai demeeo olaib daaknoa dabalim daak unoa eili teniba tama teilabbuboniba ut teniba naka ili yantamanomabib inaminobo ge baabesebe.

*Nakai amitie beten kemin wengobe.*  
(Luk 11:9-13)

<sup>7</sup> Yesuse imin baabenea Ibo Gode nganhabib bita Inamin namino doylene gabibo doylene eka ibo inamin namino hem-bibo watem nanimiobe. Eka amisal osa gong gong galaibo Gode betelabenamabebe. <sup>8</sup> Nakaia unangai Gode nganhamibi inamin namino dlomabiobe. Eka nakaia unangai wanita inamin namino hembib biam osa watemomabiobe. Eka nakaia unangai wanita amisalo gong gong geib mole Gode betelabenamabebe.

<sup>9</sup> Eka ib isak tem daako men gwabe aalebe baabanea Ayo, imene mo obnene genemeo aalebe tom eta obalamabea

bleka? Yeye e imene obalamabebe. <sup>10</sup> Eka e baabanea Ayo, aninge mo obnene ge baabanemeo inab misiam eta dabalamabea? Yeye, e aninge obalamabebe. <sup>11</sup> Dabalim naka ibo inaniba ib memei inamin namin ayam dokayebib otane ib Aye abilim ut bie ibo gaisenebiobe. E memei baabaniba Inamin namino doylene genimibo hain ye e inamin namin ayam ota doyamabebe.

<sup>12</sup> Ibo funaniba Naka maki ni kukubo yota nayemine gabib mole ibsak kukub olota i nayemine! Mosese hekmel weng osa Gode weng omkeimalin naka isa weng olo inange baaniba dolaibbiobo ge baabesebe.

*Deib asuo weng otabe.*  
(Luk 13:24)

<sup>13</sup> Yesuse imin baabenea Ibo Gode bibo unom gaibo amito gwabobe. As einin bibo amit osa eka o deib unemin esa o beselibobe. Bumolokba kesoa naka homon unang homoni deib sum eleta une binabiobe. Deib ele kaanamin bib deibobe.

<sup>14</sup> Nakaia unangai amit nin bibo unom gaibo bib olo amito gwabobe. Eka o deib esa gwab na kesoa bumolok bianibta tam unine! Deib ele afen smik bib deibobe. Nakaia unangai elekiem olokiem ita tam une binabiobo ge baabesebe.

*Nibo dim weng omkeimalin nakai klanomo!*

(Luk 6:43-44)

<sup>15</sup> Yesuse imin baabenea Ibo dim weng omkeimalin nakai klaine! I teniba ibsu tlaniba dim wengo baabeniba Ni Gode wengo ibo omyomabbiobo ge baabeniba ib bainobo galino watwat dabnomabiobe. I aal til oloko makob eil sibsibi ulabobe. I fiab otane i amun tem wat ole makob til satili nakai yena downom geniba tenabibi ulabobe. I teniba ib bainobo galino watwat dabnom genibta tlomabiobe. <sup>16</sup> Ibo i kukubo watemniba tekein keniba I naka misiamobo geine! I kukubo inaminobe. Nialie yamo waen yamo mo balinemebabe. Eka tetning osa o yamo et yamo mo bali nanomobabe. <sup>17</sup> Ase ayam damanemeo e yamo makob ayam balinamabebe. Eka ase amgumanemeo e yam osa makob misiam bali nanamabebe. <sup>18</sup> Ase ayam damanemeo e yamo misiamo mo balinemebabe. Eka ase amgumanemeo e yamo ayam mo bali nanemebabe. <sup>19</sup> Ase ele yame ayam mo balinim blim kene mole i ananiba waa oleb moniba ase faiba kibanamabe kesoa <sup>20</sup> ibo dim weng omkeimalin nakai kukubo namibo ibo yatemta tekein keine getabe.

*Sume naka maki baabenea Ne ibo mo tekein kebibabo genamabebe.*

(Luk 13:25-27)

<sup>21</sup> Ibo ib bobol temo mo funanibta Nakaia unangai ne one bianiba Kobo ni Sumobo ge onebibi alukum Gode kimanin bibo unomabiobo ge funanimibe! Yeye nakaia unangai wanita ne Aye abilim ut bie baanea Ibo okoko yota naine genemeo wenteniba ele baabene iwat nabinimib ita sinanomo Gode kimanin bibo unomabiobe. <sup>22</sup> Mubiang am bomanomo nakaia unangai homoni one bianiba Sumo, Sumo ge one bianiba baatneniba Keb niniino dim ota ni Gode wengo omkeima bianoba eka keb niniino dim ota ni hob misi-ami fotebena bianoba eka inamin namin okok sumo klabiam binobbiobo ge baatnenomabib otane <sup>23</sup> ne baabenia Ibo ne mo tekein kebibabo, ibo hengmino henga binabiobo, deitne unine ge baabenamabibo ge baabesebe.

*Amo asu genalino saa wengobe.*  
(Luk 6:47-49)

<sup>24</sup> Yesuse imin baabenea Ne inanamabi kesoa nakaia unangai wanita ne wengo wenteniba wafueib mole i makob nakae bobol tem funin ayame amo genang gameo ban sbale teme dikilanea amuno olabba tomo bebonea neketowasoa klanea genamabe ulabobe. <sup>25</sup> E inanea gene biamo soko beselibo tlem denoa aaye beselibe dobmouleb tena bianea eka glol sume tena dilubonemeo am olo mo dobo blelanomobabe. Niminbabe, e amo ban sbale tem eta genebio kesoa o mo dabamobabe. <sup>26</sup> Eka nakaia unangai wanita ne wengo wentebib otane i mo wafueim blim keib mole i makob nakae bobol tem funin blime amo nininalim ye ninine beitloke dikilanea amuno olabbanea tomo mo bebeuim blim deibonebua <sup>27</sup> soko beselibo tlem denoa aaye beselibe dobmouleb tena bianea eka glol sume tena dilubonemeo am olo dobo blelanoa alukum watwat danamabo ulabobo ge baabesebe.

<sup>28-29</sup> Yesuse weng olo aleyebeo blimanoa nakaia unangai homoni e wengo wenteniba funaniba E dabalim naka otane e wengo hekmel weng tekein kemin nakai wengo ulabbabo, e wengo titilsabo geniba dlou onsiobe.

## 8

*Yesuse naka make yayo klaubasebe.*  
(Mak 1:40-44; Luk 5:12-14)

<sup>1</sup> Yesuse amgolimo deibonea daak tlanea bebea nakaia unangai homoni dobsileb bebiba <sup>2</sup> naka make yayo kitdibiha binabobua tenea esu ye dlong dlong golbua daak tounea baabanea Sum kobo keb titilo sbal kesoa kobo daatnenemebo ne yayo ayamut nenamabobo gesea <sup>3</sup> Yesuse kwei tobbia afunea baabanea Ae ne klaubkeia ayam

anamabeobo ge baaba nabea hebmamsab e yayo kitdibihabuo blimanoa ayamu basoa <sup>4</sup> baabanea Kobo kla wentene! Kobo naka maki mo baabenemebe! Kobo hebmamsab moneba Gode amo kimanin naka esu unaneba keb aalo alebaneba katemnea Keb yayo ayamub kenobo geneko! Mosese hekmel wengo baanoa Keb yayo ayamub keno mole wani asu dloneba eka eil sib-sibe dobo naneba dlebneba moneba Gode amo kimanin naka esu ye temeba kate-mea kobo kulan eli dlaleba dlonea Gode dlalea nakaia unangai katemniba Keb yayo ayamub kenobo geine ge baanobiobo ge baabasebe.

*Yesuse awa genalin nakai komok make okok nakae klaubasebe.*

*(Luk 7:1-10)*

<sup>5</sup> Yesuse monea Kabaneam bib ye temeaa Lom seli awa genalin nakai komok make tenea baabanea <sup>6</sup> Ne okok nakae genam binea misiam anea skila kweilao dimiluba nanobua am tam bianea inamino deitnenobiobabo gabianea bobolo misiam fumbianea biebo gesea <sup>7</sup> Yesuse baabanea Ne monia klaubaia ayam anamabebo gese <sup>8</sup> otane naka ele baabanea Yeye kobo sumobo, ne sumba kesoa kobo ne amo mo na tlaebe! Besa weng baanebta ne okok nakae ayam aneko! <sup>9</sup> Nesa nakai ne okoko kima blibi i wengo wentebibo, eka ne awa genalin naka isa ne wengo wentebibo, naka make baabania Kobo one genimio e unamabebe. Eka make baabania Tele genimio e tlamabebe. Eka ne okok naka esa baabania Okok olo klanale genimio e klanabebe. Inamin kesoa kebsa inaneba ginin olo baaboneba Obo naka ele deiba one genemebo deiba unoa ayam anamabebo gesea <sup>10</sup> Yesuse weng olo wenteneba dlou unanea smike deiba unea esak nakaia unangai homoni bekeba haablibi baabanea Bainobo, ne ibo baabenamabibo, naka ele Yudaba otane e bainobo galino dot sbalobe. Nene meletani Isleli bainobo galino inamini ne mo yatemin blimobe.

<sup>11</sup> Kla wentine! Ne bain wengo baabenamabibe, nakaia unangai homoni Yudabai bib mak bib mako afoko tlebo sin da isa eka afoko unebo sin da isa teniba Gode kimanin bib ye toulaniba nib faninwali Eblaham esa Aisak esa Yekob esa i tenaniba miniba imeno unalomabiobe. <sup>12</sup> Yudai Gode dlakanea baanea Ibo ne kimanin bibo unomabiobo genebu otane i alukumo mo unomabibbabe. Niminbabe, mak ile mo bainobo geim blim kesoa e fotebenea skeim ye moniba mililanobio bib ye bianiba enin kino sum wateme bianiba eka memino sum mebianomabiobo ge baabanea <sup>13</sup> eka Yesuse awa genalin

nakai komoke baabanea Moneba kleb bib one! Kobo funaneba Yesuse ne okok nakae mo baka nim blim otane e titilsa kesoa klaubanamabebo ge fumbebta ne inabkenano ge baabaseo olo dim ota okok naka ele ayam ansebe.

*Yesuse Fitae andloko gembua klaubosebe.*

*(Mak 1:29-34; Luk 4:38-41)*

<sup>14</sup> Yesuse monea Fitae am ye unanea temeaa Fitae andloko kweimo webua gembianoa aambua <sup>15</sup> watemnea kwei gong wat wafunea omfaanea hananoa kweimo gilua bonoa imeno fubenoa downsiobe.

*Yesuse nakaia unangai homoni klaube-sebe.*

<sup>16</sup> Kwinoa afoko dawabbanoa i nakaia unangai homoni hob misiami bekebe blibi dleb teniba Yesus esu ele tliba Yesuse hob misiami baabenea Deibe unine genea deibe uniba eka e ginin gami alukum klaube naseo <sup>17</sup> sinanggwanoo Gode weng omkeimalin nakae Aisaiae baanea Elekiem eleta nib ginino omltabenea blimubenobo genebuo Yesuse inanea nakaia unangai klaye monseo weng olo yamo balisobe.

*Nakaia unangai Yesuse bekebanio wengobe.*

*(Luk 9:57-60)*

<sup>18</sup> Nakaia unangai homoni teniba Yesuse ge dabasiba e okok aleyemin nakai baabenea Walanoba Galili aamuke milim sin da unomo ge baabesea <sup>19</sup> eka hekmel weng tekein kemin nakae make tenea Yesuse baabanea Aleyemin naka kobo moneba bib mak bib mako haanamabebo ne bekebke haanamabibo gesea <sup>20</sup> Yesuse baabanea Til satili amo deib temo bibe biota aala biobo, eka wan isa deito bibe biota aala biam blib otane Abilim Da Tlemin Naka ne amo aanonamino blimobo, kobo ne beketne haanang geb mole keb am osa blimobe. Kobo bain beketne unang genebtio? Kla funanebte ge baabasebe.

<sup>21</sup> Yesuse okok aleyemin nakae make baabanea Sum kobo ne mo deibkenia monia blia ne aye kaanemeo dobbunita teta bekebke haanano? gese <sup>22</sup> otane Yesuse baabanea Temdeibanale! Nakai ne wengo wentebib otane mo wafueim blim blibi kaanabibi ulabobo, imaye kaanibibi dolbueine! Kobo ne beketne nale ge baabasebe.

*Yesuse glole sume baabanea desebe.*

*(Mak 4:36-41; Luk 8:22-25)*

<sup>23</sup> Yesuse daaknea weseme tem daak unea e okok aleyemin nakai daak tenaniba bebianiba Yesuse aambia <sup>24</sup> glole sume hebmamsab tenea yebianea aaye mousie halen tlebianea singa dibianea

daaknea weseme tem daak einang genamone otane Yesuse sma aambia <sup>25</sup> e okok aleyemin nakai dofufu bianiba baabaniba Sum kobo aaye weseme tem daak einea obeb daak unom genabuobo, kobo ni daabenele gesiba <sup>26</sup> Yesuse baabenea Ibo nimir kenibta tosiambibe? Ib bainobo galino men bibe biobo ge baabenea hananea glol esa aaye mousi esa baabonea Denale ge baabosea desoa <sup>27</sup> i smiko deibe unoa obianiba Dowe! Naka ele aa baka glol bakao baaboneo e wengo wentubanoa denobo geniba bobol tem hekhek funmonsiobe.

*Yesuse nakai asusunai hob misiami bekebe bliba fotebebesebe.*

*(Mak 5:1-17; Luk 8:26-37)*

<sup>28</sup> Yesuse inanea watnea Galili aamuke milim wato Gadalai betan wat temea nakai asukeniba ham gloutemo deiboniba teniba Yesu esu ele tesiobe. Naka eli hob misiami bekebe bliba weng misim misiam obianiba ham gloutemo tom temo hami dokam binabib ye aalabiba nakaia unangai funaniba Nibo motemaobo yenanomabiobo geniba ye deibe tosiana deiba binabibua <sup>29</sup> naka eli Yesuse ateniba ngam bianiba Gode miin kobo ni fatnabenabebe? Kobo teneba enin sumo omyang genebtio? Ni enin amo mo tam tlim blim biobo ge nanganha bianiba temiba <sup>30</sup> eil ami homoni skeimsa ye bianiba buo wembib kesoa <sup>31</sup> hob misiami Yesuse tlabianiba baabaniba Kobo ni fotebenang geb mole dlaneba watnoba eil eli tem wat unomo gesiba <sup>32</sup> Yesuse baabenea Unine gesea i naka asunai deibeniba watniba eili tem wat temsiba eili dlindeniba yolyoma daakniba yung dime geteisoniba dleb daaknoa aamuk daak blelaniba aaye downoniba kulilafaiba <sup>33</sup> eili kima blib nakai yateniba skilaniba down omeb moniba bibamo baana bianiba eka inamin namino naka asunai hob misiami bekebe binibi dimo tam tlo yeb baka baaiba <sup>34</sup> bib yo seli alukum tosiananiba teniba Yesu esu tlaniba baabaniba Kobo ni betan olo deiboneba moneba betan afet one ge baabsiobe.

## 9

*Yesuse naka make skila kweilao dimilubanobua klaubasebe.*

*(Mak 2:1-12; Luk 5:17-26)*

<sup>1</sup> Yesuse weseme obetnea aamuke yalanea imin tenea ele bib ele tetemea <sup>2</sup> naka make skila kweilao dimilubanobua bia naka maki atge debeb teniba Yesu esu ele tetemiba Yesuse i bainobo galino watemubenea skil misiam ele baabanea Ne miino, kobo bobol ayam funanale!

Keb hengmino omtlabkeiobo gesea <sup>3</sup> eka hekmel weng tekein kemir naka maki ye blibi atemniba i sinwalo obianiba Naka ele baanea Ne keb hengmino omtlabkeiobo gene kesoa e weng olo misiamobe. Nakai naka maki hengmino omtlabenamino blimobe. Gode elekiem eleta nakai hengmino omketouyemin nakabo ge omsiba <sup>4</sup> Yesuse i bobol tem funino tekein kenea haabenea Ibo nimir kenibta bobol tem misiam olo fumbibe? <sup>5</sup> Ne ibo fatnamin weng ota baabeita ibo ne titilo tekein kenomabibe? Ne naka ele baabania Ne keb hengmino omtlabkeiobo gei mole ibo tekein keniba E wengo bainobo genomabiba bleka? Yeye kukub olo ibo mo tekein kenomabibbabe. Otane ne baabania Kobo haabenea keb glouto ometneba one genimi ota ibo kukub olo watem tekein keniba E bain titilsabo genomabiobe. <sup>6</sup> Ina otane ne fumbio ibo tekein keine! Abilim Da Tlemin Naka ne dabalim olo hengmino omtlabenamabio titilsa kesoa omtlabenamabibo ge baabenea e skil misiam baabanea Hananea keb glouto ometneba moneba kleb bibam one ge baabasea <sup>7</sup> e inanea hananea glouto ometneba ele am unea <sup>8</sup> nakaia unangai atemniba tosiananiba i Gode niniino dobtouleh bianiba baaniba God eta enamin titilo nakai omkayebebo gesiobe.

*Yesuse Matyu ne nganatnesebe.*

*(Mak 2:13-17; Luk 5:27-32)*

<sup>9</sup> Yesuse deibenea monea temea Matyu ne takis moni bokalin am tam toubnania takis monio bokabia natemnea baatnenea Kobo ne bekette nale gesea ne okok olo deibonia hanania Yesuse bekeba unibiobe. <sup>10</sup> Yesuse ni dabo inanoba monoba ne am ye beboba takis moni bokalin naka homon isa eka naka homoni hengmin afeto nabib isa eka Yesuse okok aleyemin naka isa alukum te naiba ne am ye mibanoba imeno unanmonsobobe. <sup>11</sup> Eka Felisi nakai maki tekein kebiobe, takis moni bokalin nakai monio boka bianiba atosino ayok oleb unebiba yateme binabib kesoa i Yesuse okok aleyemin nakai baabeniba Ib aleyemin naka nimir keneta takis moni bokalin naka isa eka naka maki hengmino afeto nabib isa i imeno baka wembene? gesiba <sup>12</sup> Yesuse i wengo wentenea saa weng mako baabenea Nakai gembibbai mo moniba dokta isuo mo unaiabbabo, gembib ita monibta dokta isuo unaiabobo, <sup>13</sup> ne tlibu osa inaminobe. Ne mo tenita naka ayam unang ayam ita daabeita bainobo geine geta tlibiobabe. Ne tenia nakaia unangai hengmin gam ita daabeia i bobol temo deskina Gode omaline genita tlibiobe. Gode e buk tem wengo baanea Inamin namini



dloniba yenaniba ne dokanebib kukub olo ayam otane dohalinin kukub ota ne seinwebibio genebio kesoa weng olo kla funaine ge baabesebe.

*Sin kukub osa mema kukub osa o weng otabe.*

*(Mak 2:18-22; Luk 5:33-39)*

<sup>14</sup> Omito Yone aa fuayemin nakae e okok aleyemin nakai teniba Yesuse baabaniba Am mak dimo nisa eka Felisie isa Gode niniino dobtoulebb nom gaobo ni imeno mo wembinabobbabe. Ni hala bianoba Gode beten keha binabob otane keb okok aleyemin nakai fatnanibta i kukub olo wafunamino deibonibta Gode nganhamom gaibo imen osa aay osa wembinabibe? gesiba <sup>15</sup> Yesuse wentenea e atdimmo mo kaaaim blim sma e okok aleyemin nakai tena blib kesoa saa weng mako baabenea Naka make alelo omang genea e nekwali baka biameo i bobolo ilum omfubenoa imeno halanomabiba bleka? Yeye i seimbianiba imeno wembiam biniba sinanoa makaai alelo omang gabe nakae debeb uniba e kibi alang blim keneme o dim ota e nekwali bobolo ilum omfubenoa imeno halanomabiobo ge baabesebe.

<sup>16</sup> Eka Yesuse saa weng mako imin baabenea Nakai youme meklie mo balonibta sin youme mo dababma bikinimibbabe. I inaniba fubanimibo mema youme gogolanea sin youme menga debeb tetenasea sum belanea misiam anamabebe. <sup>17</sup> Eka nakai eil memei aalo gato mo gwelelonibta waen aayo memao mo banimibbabe. Inaib mole waen aayo sitanoa eil aalo banoa waen aayo unamabobe. Nakai eil aalo mema ota waen aayo memao ibaine! I inanimibo eil aale mo belaneta waen aaye mo unamebabo ge baabesebe.

*Yesuse komoke moon osa eka unang mak osa klaubesebe.*

*(Mak 5:22-43; Luk 8:41-56)*

<sup>18</sup> Yesuse weng oyebe damib wat Yuda komok make tenea Yesuse kibi kaba sin ye dlong dlong golbuanea mesa aauanea baabanea Ne moono memale kaatenob, kobo moneba wafuneba hananoa ayam anoko gesea <sup>19</sup> Yesuse ete eka e okok aleyemin nakai tenaniba bekeba <sup>20-21</sup> bebiba unang mako olomisabua bifolo 12 blimanobua o bobol temo funanoa Ne besa Yesuse youm eta melebanimio ne ginino ayamut nenamabobo genoa tenoa Yesuse abuk tam tlanoa kweil tobbianoa Yesuse youme ken eta melebanoa <sup>22</sup> Yesuse deskinanea watenea baabonea Ne moono obo bobol ayam funanale! Obo funaneba Ne Yesuse youm eta melebanimio ne ginino bain blimutnenamabobo ge funaneb kesoa

ob ginino ayamub kenobo ge baabonabea hebmamsab unango olomio walabonoo ayam ansobe.

<sup>23</sup> Omito Yesuse monea komoke am tam unanea temeaa nakaia unangai homoni memin anso ngambianiba mangglom bianiba weng dobma blib kesoa <sup>24</sup> e baabenea Deibo unine! Men olo mo kaaaim blimobe. O besa aambiobo gesea i aben gihamsiba <sup>25</sup> naka maki baabeniba Ibo tala bib unine gesiba i uniba Yesuse tanea aalalin biin tam unanea o kwei gong wat wafu omfanea hanasobe. <sup>26</sup> I weng sang olo ometniba bib mak bib mako alukum onon tlasioebe.

*Yesuse naka asunai kino tumu benobua klaubesebe.*

<sup>27</sup> E am olo deibonea bebea naka asunai kino tumu benobuei dobsileb bebianiba Yesuso! Komok sume Debite molofeit kobo ni dabo dohalilaneba daabonale ge ngan bebiba <sup>28</sup> Yesuse tanea am tam bebea naka asuna eli tam temsiba baabenea Ib dabo fumbibo E titilsa kesoa klaubenamabebo gabibo? gesea i baaniba Ae Sum kobo titilsa kesoa ni bainobo gabuobo gesiba <sup>29</sup> e kweilono i kino melebenea baabenea Ibo bainobo gabib kesoa ib kino ayamu benamabobo gesea <sup>30</sup> hebmamsab i kino webiabesoa e baabenea Ibo olo naka maki mo baabenimibe ge baabese <sup>31</sup> otane i deibaniba weng omeb moniba bib mak bib mako alukum baa tlasioebe.

*Yesuse naka make kobom anebua klaubesebe.*

<sup>32</sup> Naka eli Yesuse deibaniba unom genabiba nakai naka make hob misiam bekebanea kobom anebua debeb teniba Yesuse esu ele tetemiba <sup>33</sup> Yesuse hob misiam fotebebanea unea naka ele wengo omsea nakaia unangai dlou unaniba baaniba Islel nibo enamino sino nib dimo mo tam tlota watemin blimobo gesioebe. <sup>34</sup> I inaib otane Felisie baaniba Hob misiam komoke titil ota omkahabeta hob misiam fotebe nabebo gesioebe.

*Yesuse nakaia unangai dohalilasebe.*

<sup>35</sup> Yesuse monea bib sum osa bib gwab gwab osa Gode amo tem tam unanea Gode weng aleye bianea eka Gode sinanoa nakaia unangai kimanamabebo wengo omkaye bianea eka ginin gam isa eka skila kweilao misiam isa eka ginino afet afeto omo blib isa klaye biam bisebe. <sup>36</sup> E nakaia unangai homoni yatenea bobol ilum omfubanoa kla dohalilasebe. Niminbabe, i daabenamin nakai blim kesoa misiam bianiba bobol misiam fumbianiba makob eil sibsibi i kimanini blimi ulab blitabe. <sup>37</sup> E nakaia unangai Gode mitemo mo tlim blimi dim tounea e okok aleyemin nakai

saa weng mako baabene a Imen homono damibo damambu otane ula oleb te toumin nakai homonba kesoa <sup>38</sup> ibo damib gosake God eta beten kehabibta e okok nakai mo dlane moniba e damibo imeno ula oleb te mieine ge baabesebe.

## 10

*Yesuse okok aleyemin nakai 12 i niniin otabe.*

*(Mak 3:13-19; Luk 6:12-16)*

<sup>1</sup> Yesuse e okok aleyemin nakai 12 i Hob misiami fotebena biam eka nakaia unangai ginin gami klaye biam nine genea nganebene tliba titilo omyensebe. <sup>2</sup> Yesuse okok aleyemin nakai niniino elitabe. Mikiktemo Saimone, e niniin afeto Fita esa e ninge Endlu esa eka Sebedie meleli Yems esa eka e ninge Yon esa <sup>3</sup> eka Filib esa Batolomyu esa Tomas esa Matyu takis moni bokalin naka nesa eka Yems afete Alfiasa miin esa Tadias esa <sup>4</sup> eka Saimon afete Lom seli kimanin kukubo mo gobe binabea naka esa eka Yudas Iskeliote Yesuse komokwali dobyamabe naka esa nitabe.

*Yesuse e okok aleyemin nakai 12 i okoko omyensebe.*

*(Mak 6:7-13; Luk 9:1-5)*

<sup>5</sup> Yesuse nakai 12 eli dlanea unom genabiba baabene a Ibo mo monibta Yudaba naka afeti betano mo unai! Eka Samelilai bibam osa mo unai! <sup>6</sup> Ibo Islel ten ilisu ota unine! I makob eil sibsibi i kimanin blim bianiba bibamo hembianiba tobtlim binabib inabiobo, <sup>7</sup> ibo moniba Gode wengo omkeimaniba baabeniba Gode nakaia unangai kimanamabe dimo tlang genabobo ge oye bianiba <sup>8</sup> eka nakaia unangai ginin gami klaye bianiba eka kaabib biamoei dohaaniba hana tlebiam eka yayo aalo bobolabenobuei klaubeiba ayam ambiam eka hob misiami bekebe biaibo fotebebenaine! Ibo inamin namino klayemin titil olo ne misim omyi kesoa ibo moniba klayebib biamo mo baabenibta Monio oyine ge baabenimibe!

<sup>9</sup> Ibo monio mo oleb unai! <sup>10</sup> Eka meen osa mo gweleleb unai! Eka youm osa skil otabbumin osa ole oleb unomabib otane asu ota mo dleb unai! Eka fong osa mo tebeleb unai! Ibo imeno bobolo mo funimibe! Besa moniba nakaia unangai daayebibta isak imena amao oyine! <sup>11</sup> Ibo moniba bib sum osa bib gwab osa ye unaniba naka make atemiba baabene a Ibo ne am tam aala bianibte ge baabene mole ibo e am tamo olota aala bianiba okok kemde deibo watwat haabianibte! <sup>12</sup> Eka ibo moniba amo unaiibo baabeniba Klayam Gode ibo kima bieta tlobobo ge

baabeine! <sup>13</sup> Am yo seli Gode nakaia unangai kimanamabe wengo wentib mole ibo baabeniba Gode ibo daabenamabebo ge baabeine! Otane i weng olo ombiaib mole ibo mo baabenibta Gode ibo daabenamabebo genimibe! <sup>14</sup> Eka ibo moniba bib mak ye temiba bibam seli ibo dleb tamniba am tam danamino deibeniba eka ib weng osa mo wentubeim blim keib mole ibo bib olo deiboniba ib skilono dabalo glitaniba deibe uniba i yateniba funaniba Ni kukubo misiamobo ge funaine! <sup>15</sup> Ne bain baabenamabibe, sinanggwano Sodom bib sel isa Gomola bib sel isa henga binabibo, sinanomo Gode nakaia unangai kukubo klanang gameo dimo e i enino gwab omyamabebe. Niminbabe, i e wengo sino mo wentim blim kesoa enino gwab omyamabe otane bib yo seli ib wengo ombiabeibbo mole Gode i enino dot sum omyamabebo ge baabesebe.

*Inamin namino bobol tem abilo tam tlamabo wengobe.*

*(Mak 13:9-13; Luk 21:12-17)*

<sup>16</sup> Yesuse imin baabene a Wentine! Ne ibo dlaia moniba naka misiam isu unomabib kesoa i funaniba Misiam nabeno mo ge funanomabibo olo makob naka make e eil sibsibi dlanea moniba til satil isu unomabib inaminobe. Eka inab bimani kukubo inaminobe. I inamin namino heb-mamsabo mo nanimibbabe. Mikiktemo i kla funanibta mitdata inamin namino nabinabiobe. Ibsa inaniba inab bimani kukub olota wafu bianibta ibo inamin namino nanom gaibo mikiktemo kla funanibta namine! Eka wan aninini i kukub osa inaminobe. I bobol fiab bliobe. Ibsa makob i kukubo ulab aine! <sup>17</sup> Ibo Yudai naka misiami klaine! I ibo yafu dleb moniba komokwali dimo kot keye bianiba eka mak ole ibo yafu dleb taniba I Gode amo tem tam unaniba tek tebelo yebiam nomabiobe. <sup>18</sup> Ibo ne bainobo gabib kesoa o dafa ota i dleb moniba kiabwal isa komok sum isa isu unaniba kot keyemibo ibo naka elisa naka maki Yudaba isa ne dowan wengo omkayemine! <sup>19</sup> I ibo kot keyemibo ib bobol temo usano mo keye-ota fumbianibta Nibo fatnamin weng ota baabenomabbione? ge funimibe! Am olo dimo Gode inamin weng ota omkeimaine genea omyamabebe. <sup>20</sup> Weng obba ye baabenomabib yo ilib wengbabe. Ib Aye Hob eta wengo obeta ib sital dimo tam tlemabobe.

<sup>21</sup> Eka mak ole hekwali teniba ningwali dleb moniba naka maki doyiba yenaiba kulila biam eka ningwali hekwali dleb moniba naka maki doyiba yenaiba kulila biam eka awel isak ili memei makaalaniba

dleb moniba naka maki doyiba yenaiba kulila biam eka meme isak ili biem ay kamwali makaalaniba dleb moniba naka maki doyiba yebiba kulila biam nomabiobe. <sup>22</sup> Ibo ne niniino omkeimabib kesoa naka homon unang homoni bib mak betan mak olo blibi ib alo tliyebua inayemomabib otane nakaia unangai wanita sbal maniba i bainobo galino amitie wafu tatniba mubiang amo tam tlamu Gode nakaia unanga eli dleb mo danea amit nomabiobe. <sup>23</sup> Ibo bib mako bliiba enin sumo omkayemib mole bib olo deiboniba moniba bib afet unine! Ne bain baabenamabibe, ibo Isleli bibamo ne wengo omkayemibo atosino mo alukum blimaim blim biota Abilim Da Tlemin Naka ne imin tlamabibe.

<sup>24</sup> Aleyemin nakae naka make alebanea tekein kenemeo e mo sum aneta alebane nakae dababbunemebabe. Eka okok naka esa mo inaneta e kimanin nakae dababbunemebabe. <sup>25</sup> Kukub misiamo tenoa kimanin nakae dimo tlo mole o e okok nakae dim osa tam tlamabobe. Eka kukub misiamo tenoa aleyemin nakae dimo tlo mole o e alehabe nakae dim osa tam tlamabobe. Niminbabe, i naka makobobe. Inamin kesoa naka maki ib kimanin naka ne hob misiam aye niniino taisaniba Bielsebul geniba niniin misiam nganatnenib mole ne melel ibsa dot niniin misiam nganabonomabiobe.

*Nakai Gode elekiem ele tol ota tosianine!*  
(Luk 12:2-7)

<sup>26</sup> Inamin kesoa ibo nakaia unanga eli tolo mo tosianimibe! I inamin namino teilabbubo biabio sinanomo keim anamabobe. Eka inamin namino ayok biam osa keim anamabobe. <sup>27</sup> Ne inamin namino ayok baabei biamo ibo nakaia unangai kin dimo keim maniba weng olo omkeimabeine! Eka ibo inamin namin wengo ayok wentebib olo sinanomo taniba bib daang tam unaniba omkeimaine! <sup>28</sup> Naka maki ibo yenaiba kaanomabib otane ibo naka eli tolo mo tosianimibe! I dam iboko ye yenaiba kaanomabib otane ib afen smiko mo watwat dabenomabibbabe. Ibo Gode elekiem ele tol ota tosianine! Niminbabe, e titilsa kesoa e ib damo wananea kaanobua sinanomo afen smik olo aseinin bib ye bianoa enin kino watememabobe.

<sup>29</sup> Ibo 1 toea omoniba wan gwabi asu walomabibo olo moni sumba otane ib Aye wani elekiem olokiemi kaanamino kima-bie kesoa e mo Ae geim blim kene mole i mo kaanibta dolmein daakenibta dabalim ele tlaibbabe. <sup>30</sup> Eka elekiem elekiem kobo keb Aye kla tekein kebianea keb gabamano elekiem ke tobo tofa tofa biebe. <sup>31</sup> Wani

ayam otane i besa kulanobe. Eka naka kobole afen smiksabe. Keb Aye abilim ut bie kobo kla gobke bie kesoa kobo mo tosianamebe! E wani kima bie kesoa e kebsa kla kimanamabebo ge baabesebe.

*Yesuse niniino omkeimalino kukubobe.*  
(Luk 12:8-9)

<sup>32</sup> Yesuse imin baabenea Nakae waneta nakaia unangai baabenea Yesuse ne Sumobo ge baabenea ne niniino omkeimatnene biamo sinanomo nesak abilim utu ne Aye baabania E nemibo genamabi <sup>33</sup> otane nakae waneta nakaia unangai baabenea Yesuse ne Sumbabo ge baabene biamo nesak inania abilim utu ne Aye baabania Naka ele nemibabo genamabibo ge baabesebe.

*Yesuse tenea nakaia unangai afet anang geneta tlebiobe.*

(Luk 12:51-53; Luk 14:26-27)

<sup>34</sup> Yesuse imin baabenea Ibo mo funanibta E tenea nakaia unangai dabalim ele blibi alukum bobol fiab omyang geneta tlebiobo genimibe! Ne tlihuo naka mak unang maki ne bainobo getnenomabib kesoa naka maki dosuanomabiobe. <sup>35</sup> Naka maki ne bainobo getneiba eka mak ile ne mo bainobo getneim blim kenaniba miine aalebe i dumo wasi aiba eka moonu awoko i hat osa min inaniba wasi aiba eka miin alelo imak awoko i hat osa inaniba wasia nabianiba i sinwalo alang sanine genita tlebiobe. <sup>36</sup> Naka make e alel meleli amo olokiemo temo aalabib biam otane i sinwalo makaalanomabiobe.

<sup>37</sup> Nakaia unangai wanita i awok aaloki gobenimib otane i ne klaom mo gotneim blim kenib mole i mo ne ninek anomabibbabe. Eka wanita i miin esa i moonu osa gobenimib otane i ne klaom mo gotneim blim kenib mole isa mo ne ninek anomabibbabe. <sup>38</sup> Nakaia unangai wanita i niniino mo omabbuniba inamin namin misiamo i dimo tam tlemo omnakatouleb bianiba ne kukubo mo wafunim blim kenib mole isa mo ne ninek anomabibbabe. <sup>39</sup> Eka nakaia unangai wanita ili bobol tem funino wafu bianiba dabalim olo inamin namino goboblib mole i amito mo biomabibbabe. Otane nakaia unangai wanita ne bobolo funaniba dabalim olo inamin namino deibonimib nakai afen smiko amit namabobo ge baabesebe.

*Sinanomo nakaia unangai abilim utu inamin namin ayamo dlomabiobe.*

(Mak 9:41)

<sup>40</sup> Yesuse imin baabenea Ibo motemiba naka tab unang tab wanita baabeniba Klayam nata tliobo ge baabeniba dleb taniba am tam daniba imeno doiyib mole

olo makob Yesus ne tetemia i baatneniba Klayam nata tlebobo ge baatnenomabib inaminobe. Gode ne nemanea tlibio kesoa naka tab unang tab wanita baatneniba Klayam nata tlebobo ge baatneniba nemeb taniba am tam daniba imeno donib mole olo makob Gode tetemea i baabaniba Klayam nata tlebobo ge baabanomabib inaminobe. <sup>41</sup> Eka Gode weng omkeimalin naka make tenea naka make bib ele tlea naka ele baabanea Klayam nata tlebobo ge baabane biamo, naka ele Gode weng omkeimalin naka tleta baabane biamabo kesoa sinanomo Gode e inamin namin ayamo dlalang gameo inangge baabane biamo naka elesa emio ulab dlalamabebe. Eka nakae waneta naka molote make tenea e bib ele tlea Klayam nata tlebobo ge baabane biamo naka ele naka molot bieta baabane biamabo kesoa sinanomo Gode e inamin namin ayamo dlalang gameo inangge baabane biamo naka elesa emio ulab dlalamabebe. <sup>42</sup> Naka make niniin blim nakae tesa naka tab unang tab wanita atemniba funaniba Naka ele Klaiste bainobo galin naka kesoa ni daabanomo geniba e aaye obaliba dowone biamo ne moton baabenamabibe, sinanomo i inamin namin ayamo dlomabiobo ge baabesebe.

## 11

*Yone aa fuayemin naka esa Yesus esa i wengobe.*

*(Luk 7:18-35)*

<sup>1</sup> Yesus e okok aleyemin nakai 12 i inamin namin weng olo aleyebea blimanao Yesus bib olo deibonea monea Galili betano bib mak bib mako Gode wengo aleye biane omkeima biam bisebe.

<sup>2</sup> Yone aa fuayemin nakae klabut am bianea Yesus Klaiste okok kebo wengo wentenea Baaba wentano genea e okok aleyemin nakai maki dlane moniba Yesus esu unaniba baabaniba <sup>3</sup> Yone baabke-nea Sinanggwano Gode weng omkeimalin nakai baaniba Sinanomo Gode Dofakamin Nakae tlamabebo ge baabibu kebtia bleka ni naka afet wasanomo? ge baabke-seta tlobobo ge baabasiba <sup>4</sup> Yesus baabene Ibo imin moniba Yon esu unaniba inamin namino wengo wentib olosa eka inamin namino watemib olosa baabaine! <sup>5</sup> Nakai kino tum gebenobuei webiabenoa teme biam eka skil misiami tamana biam eka yayo kitdibiyebuei ayam an touye biam eka klango datenebenobuei imin we-labbebenoa wengo wente biam eka kaaib-biamuei imin hana tlebiam bliba eka ne Gode dowan weng ayamo omkeima-nia nakaia unangai inamin namino blimi omkaye bia <sup>6</sup> eka nakaia unangai wanita

ne bainobo gabibo mo deibueim blim kenimibi seimbiam bliobo ge baabesea <sup>7</sup> Yone okok aleyemin nakai deiba uniba Yesuse nakaia unangai Yone weng sango baabenea Sino ibuantemo mota namin watemomo geta unibbue? Nakai bobol temo tekayebua bobol tem homon homon fumbinabibi i makob glole makalo oleb une tlebinabe inaminobe, Yone i ulaba? Yeye. <sup>8</sup> Ibo ibuantemo mota namin watemomo geta unibbue? Ibo moniba naka make youm ayam ayamo kibe eta atemomo geta unibbua? Yeye. Nakai youm ayam kibibi komok sumi am tam bliobe. <sup>9</sup> Ina otane ibo moniba namin watemomo geta unibbione? Ibo moniba Gode weng omkeimalin nakae atemomo geta unibbua? Bainobe, ne baabenamabibe, ibo naka ele atemibbuo e Gode weng omkeimalin naka otane e Gode weng omkeimalin nakai maki gaisenebiobe. <sup>10</sup> Sinanggwano Gode Yon ele ni dab ni weng sango e buk temo baanea

Wentine! Ne dowan weng omkeimalin naka ele dabaia sin monea ne wengo omkeimane kebo deibo klaubkenabeta kobole abuk mo temebta nakaia unangai kebo wengo wentine genebio kesoa

<sup>11</sup> ne bain baabenamabibe, Yon aa fuayemin nakae dabalim nakai alukum gaisenebu otane Gode nakaia unangai kimanamabeo dimo nakaia unangai wanita ne bainobo getneniba Gode Hobe i bobol temo bibene mole i Yone gaisanomabiobe.

<sup>12</sup> Yon aa fuayemin nakae okoko kilonea Gode weng omkayem tlebuo dim osa eka memalosa nakaia unangai sbal maniba Gode kimanin kukubo wafunom genamiobe. Hengmin nakaia unanga isa bumolok bianiba Gode kimanin kukubo wafunom genamiobe. <sup>13</sup> Sinanggwano Gode weng omkeimalin naka isa eka Mosese hekml weng osa Gode kimanamabeo wengo omkeimabib bita omito Yone tlebiobe. <sup>14</sup> Yon ele nakai baaniba Naka make Ilaiyae ulab tlamabebo geibbue etabe. Ibo dowan weng olo wenteniba bainobo genom gib mole ayamobe. <sup>15</sup> Nakai ne weng olo wentebibi kla funaine!

<sup>16</sup> Naka homon unang homoni dabalim olo blibi i makob inaminobe. Meme gwabi bib daang ye toul bianiba ten maki ngan-abeniba <sup>17</sup> Ni halinin anso ngambob otane ibo mo mebibbabo, eka ni waso boubob otane ibo anso mo ngambibbabo ge ngambibi ulabobe. <sup>18</sup> Saa weng olo mitmakamo inaminobe. Yone aa fuayemin nakae tlebuo e Gode niniino dobtouleb namabe ke-

soa e imen osa waen aay osa halabea naka homon unang homoni oha bianiba Hob misiam e bekeba biebo geniba e kukubo mo gobanim blim binibbiobe. <sup>19</sup> Eka Abilim Da Tlemin Naka ne tlibuo ne Yone ulabbabe. Ne imeno wembiana waen aayo wembiam nabi otane naka homon unang homoni baaniba Naka ele atemine! E tali uninobo, e imeno homon wembiane waen aayo homon wembiam nabebo, e takis moni bokalin naka isa naka maki hengmin afeto nabib isa i nekobo ge one bianiba ne kukub osa mo gotnenim blim bliobe. Ina otane nakaia unangai Gode wengo tekein kebibi baaniba Naka asu eli kukubo afet afet otane Gode i dabo baabenea I ayamobo gabebo gabio bo ge baabesebe.

*Nakaia unangai mo bainobo geim blimi klaine!*

*(Luk 10:13-15)*

<sup>20</sup> Yesuse naka maki baabenea Ne ib bibo inamin namin okok sumo klabia wate mebib otane ib bobol temo mo deskina Gode omalim blim bli b kesoa kukub olo misiamobe. <sup>21</sup> Ibo ne weng olo wenteniba tosanaine! Ayoo! Kolasin bib sel ibsa Bet-saida bib sel ibsa enin sumo tam tlubenam- abobe. Ne ib bibamo biana okok sumo klabia ibo wate mebib otane ib hengmino mo deibueim blimobe. Sinanggwano naka make Taia bib osa Saidon bib osa inanea makob ne okoko ulab klabea Taia bib sel isa Saidon bib sel isa wate mib biota mole i mebianiba i hengmino deiboniba i bobol temo deskinaniba Gode omalomabib otane i sino mo wate min blim kesoa i hengmino mo deibueim blimobe. <sup>22</sup> Ibo mo inaim blim kesoa sinanomo Gode nakaia unangai kukubo klanang game dimo e Taia bib sel isa Saidon bib sel isa enino omyamabe otane ibole enin sumo omyamabebe. <sup>23</sup> Eka Kabaneam bib sel ibole funaniba Ni abilim ut unomabio bo ge fumbib otane ibo ne wengo wentebibo mo wafueim blim kesoa ibo dabbemaniba aseinin bib unomabio be. Niminbabe, naka make Sodom bibo sin inanea makob ne memalo ib bibo okok sumo klan haabli inanea klane biota mole Sodom bib seli wate miba i hengmino deibueib kesoa Gode bib olo deibonebua sma biobe. <sup>24</sup> Ibo mo inaim blim kesoa sinanomo Gode nakaia unangai kukubo klanang game dimo e Sodom bib seli enino omyamabe otane ibole enin sumo omyam- abe bo ge baabesebe.

*Yesuse baanea Ibo nesu tlibta bobol ayamo omyano genebiobe.*

*(Luk 10:21-22)*

<sup>25</sup> Am olo dim ota Yesuse Gode baabanea Ay kobo abilimo Sum eka dabalimo Sum na kesoa ne Klayamobo ge baabkenamabibe.

Niminbabe, naka maki funaniba Ni tekein kemino sumobo gabibi kobo keb inamin namin okok ayamo mitmakamo mo ale- beim blimobe. Otane naka maki tekein kemino sumba makob men gwabi bobol tem funino ulab aibi kobo kukub olo mito alebenebobe. <sup>26</sup> Ae Ay kobo kleb bobol tem funin ota inamin namin olo klabin- abeb kesoa ne Klayamobo gabibo ge ba- banea <sup>27</sup> eka omito nakaia unangai baabe- nea Ne Aye inamin namino alukum omne- nea Kimanale ge baatnenebiobe. Nakai Gode miin ne bobol tem funino mo tekein kebibbabe. Aye elekiem eleta ne bobol tem funino tekein kebebe. Eka nakai Ay Gode bobol tem funino mo tekein kebiba otane ne tekein kebibe. Nakai wanita ne dlakanimie isa Aye bobol tem funino tekein kenomabio be.

<sup>28</sup> Ibo inamin namin kukubo ge dlak- ibilanoa ib bobol temo ilum omfubeno mole ibo alukum teniba nesu tliba neta bobol ayamo omyano! <sup>29</sup> Ne untak nganin nakaba ne bobol fiab kesoa ibo teniba nesu tlaniba ne wengo wentemib mole ne alebenia bobol fiab omyamabibe. <sup>30</sup> Ibo ne wengo wentemib mole ne Inamin namino naine genimio ne daayemabi kesoa mo bumolok omfubenomobabo ge baabesebe.

## 12

*Singkalin amo okoko awem omkalin wengobe.*

*(Mak 2:23-28; Luk 6:1-5)*

<sup>1</sup> Singkalin am bomabua Yesuse e okok aleyemin nakai dletnea wit dang tla bebianiba e okok aleyemin nakai imen teb yemsoa wito yamo mako molaniba kwei tuba kikekaniba blongo gamdibiniba unan bebiba <sup>2</sup> Felisie i yateniba Yesuse baabaniba Keb okok aleyemin nakai nib hekmel wengo welaniba singkalin am otane i wit yamo molaniba kikekaniba blongo gamdibibib yole okok kebiobo gesiba <sup>3</sup> Yesuse baabenea Ibo sinanggwano nib fanine Debite nanebuo weng sango buk temo kibinabib otane o mitmakamo mo tekein kebibbabe. Am olo dimo Debit esa e meletan isa imen teb yemsoa <sup>4</sup> e tanea Gode am tam temeaa Gode amo kimanin nakae bleto Gode heitdaha bianiba toubibo olalea oleb tam tlea ete e meletan ite naniba downosibo blet olo i awemobe. Nib hekmel wengo baanoa Gode amo kimanin naka ita unaline genobu otane Debitwali downosiobe. <sup>5</sup> Ibo hekmel wengo kibianiba tekein kebinabib yotabe. Singkalin amo dimo Gode amo kimanin nakai okok kebianiba kulani yenaniba fubianiba Gode heitdaha binabibo olo hengminbabe. <sup>6</sup> Ne bain

baabenamabibe, Gode amo kimanin nakai e am tamo okoko ayam okok kebinabib otane ne okoko ib isak temo klabio dot ayam kesoa ibo mo baanipta ne okok aleyemin nakai misiam naibobo ge nimibe!<sup>7</sup> Gode e buk temo baanea Ibo kulani yenanipta ne heitdatnenamin kukubo ayam otane ibo nakaia unangai dohalilaniba daabeib mole kukub olo dot ayamobo genebiobe. Ibo weng olo mitmakamo kla tekein kebib biamo ibo nakai hengabibbai mo baabenibta Ibo misiam naibobo ge baabenomabibbabe.<sup>8</sup> Abilim Da Tlemin Naka ne titilsa kesoa Gode singkalin amo dimo ne baania Okok olo naine, eka okok olo mo nanimibe genimio ayamobe. Nininbabe, ne singkalin amo kimaninobo ge baabesebe.

*Gode singkalin amo Yesuse naka make kweilone klaubasebe.*

*(Mak 3:1-6; Luk 6:6-11)*

<sup>9</sup> Yesuse deibenea monea Gode amo tem tam teme<sup>10</sup> naka make kweile debelabanebue ye bia naka maki ye bli bi naniba Yesuse naka ele Gode singkalin am olo klaubane mole nibo kot kebanomo geniba i Yesuse baabaniba Nib hekmel wengo baanoa Gode singkalin amo nakae klaubanamino ayamobo genobua bleka? gesiba<sup>11</sup> Yesuse baabenea Ibo eil sibsibsba bliha singkalin am bomanoa eil sibsibe make kwiam bil amite geteisona debeb daak unamo ibo debeb ute danomabiobe.<sup>12</sup> Eil sibsibe e besa kulan ayamobe. Otane nakae afen smiksa kesoa e dot ayamobe. Inamin kesoa Gode singkalin amo dimo nibo nakaia unangai daabenom gaobo hekmel wengo baanoa Inaine genobiobo ge baabenea<sup>13</sup> omio Yesuse naka ele baabanea Keb kweilone tobtalona gesea e kweilone tobtalona ayamu banea makob kweile milim sine ulab ane otane<sup>14</sup> Felisie atemniba moniba i sinwalo miniba Yesuse ananoba kaaneko ge omsoniobe.

*Gode Yesuse dofakaia Ne okoko okok kenemeko ge baasebe.*

<sup>15</sup> Felisie baaniba Yesuse ananoba kaaneko gesiba e i wengo tekein kenea bibo yo deibonea beba nakaia unangai homoni bekeba bliha bebianiba ginin gami alukum klayebea ayam ambiba<sup>16</sup> e i watanea baabenea Ibo naka maki ne inamin namino nabeio wengo mo baabenimibe ge oyem oyem onsebe.<sup>17</sup> Yesuse okoko ina monseo sinanggwano Gode weng omkeimalin nakae Aisaiae wengo baanebuo yamo balisobe. Gode wengo Aisaiae dolanea baanea

<sup>18</sup> Naka ele ne dofakanibua ne okoko okok kebebo, ne e kla goba biania seinhabibo, ne Hobe e bekeba bia e

nakaia unangai Yudabai ne kukub moloto wengo omkeimabenamabebe.<sup>19</sup> E dleb wengo mo obiane eka weng sumo mo ngam biam nemebabo, e bib dango weng sumo mo omkeimanemebabe.<sup>20</sup> Nakaia unangai bobolo ilum omfubenomoi makob niimbumo afoko fubonoa tebelake tounabo inaminobe. E daabenea i sbal manomabiobe. Nakaia unangai bainobo galino beitloku benomoi makob aso kiminang genabo inamin kesoa e titilo omyenea i bainobo galino imin sbal manomabiobe. E klayam okok kebiane inamin namin misiamo gaisonea<sup>21</sup> nakaia unangai Yudabai baaniba Bainobo, e ni daayemin naka kesoa waisanomo genomabiobo ge baanea dolanebiotabe.

*I baaniba Yesuse Bielsebule tena okok kebiobo gesiobe.*

*(Mak 3:20-30; Luk 11:14-23; 12:10)*

<sup>22</sup> Omio nakaia unangai maki naka make debeb teniba Yesu esu tesibo hob misiane naka ele bekebanea e kino tum gebanoa kobom ane biotabe. Yesuse naka ele klaubanea kino bomabanoa eka wengo baanasebe.<sup>23</sup> E inasea nakaia unangai smiko deibe unoa baaniba Naka ele Gode weng omkeimalin nakae baanea Komok sume Debite molofeite tenea kimanamabebo genebue etaso? gesiba<sup>24</sup> Felisie wenteniba baaniba E Debite molofeitbabo, hob misiami komoke Bielsebule e ninin mako Gululame titil ota omkahabeta hob misiami fotebenabebo gesiba<sup>25</sup> Yesuse i bobol tem funino tekein kenea baabenea Betan mak seli i sinwalo makaalaniba belalananiba awa genalom gaibo i titil bli-manomabiobe. Eka bib mak sel mak isa inaniba i sinwalo makaalaniba belalananiba awa genalom gaibo isa titil bli-manomabiobe. Eka naka make meletan isa inaniba i sinwalo makaalaniba belalananiba awa genalom gaibo isa ming inaniba titil bli-manomabiobe.<sup>26</sup> Gululame daatnenea ne hob misiami fotebeni mole e kimanino sbal manamabua bleka? Yeye e titilo bli-manomabobe.<sup>27</sup> Ibo baaniba Bielsebule titil ota omkahabeta hob misiami fotebenabebo gabib otane waneta ib meletani daabeneta hob misiami fotebenayebibe? Bielsebul etia bleka? Yeye ibo weng olo baatneibo ib meletani wentib mole i baaniba Ib wengo dim obiobo, Gode Hobe titilobo genomabiobe.<sup>28</sup> Gode Hob eta ne titil olo omkanebeta hob misiami fotebenabi kesoa ibo watem tekein kenibta

Gode nakaia unangai kimanin kukubo tlobo geine!

<sup>29</sup> Eka ne saa weng mako baabenamabio inaminobe. Gululame naka sbal kesoa ne besao mo tanita e am tamo mo unanita e afobeingo mo oisanimibabe. Mikiktemo ne e skilla kweilao sayo gebanita omito tanita e afobeingo oisanamabibe.

<sup>30</sup> Nakae waneta ne mo daanemin blim kene mole e ne makaabe. Ne nakai dleb met tenia Gode mitem kalin nakabe. Nakae waneta ne mo daanemin blim kene mole e makob naka make nakai fotebene unaniba Gode deiba unomabib inaminobe.

<sup>31</sup> Ne ibo baabenamabibe, nakaia unangai hengmino henga bianiba Gode weng dobo weng oha biam bianiba hengmin olo omkeimanimibo Gode omtlabenamabe otane nakaia unangai Gode Hobe weng dobo wengo baabanimibo Gode i hengmin olo mo omtlabenamabebabe. <sup>32</sup> Eka nakaia unangai Abilim Da Tlemin Naka ne weng dobo wengo one bianiba hengmin olo omkeimanimibo Gode omtlabenamabe otane i Gode Hobe weng dobo weng baabanimibo Gode i hengmin olo mo omtlabenamabebabe. Memalosa sinanomosa amitie hengmin olo yeb baka sanomabiobe.

*As misiam yame misiam balinamabebe.*

*(Luk 6:43-45)*

<sup>33</sup> Ase ayam damanemeo e yamo ayam balinamabebe. Eka ase amgumanemeo e yam osa misiam balinamabebe. Nakai aso yamo watem motomanibta Ele as ayamobe. Ele as misiamobe genibta tekein kebinabiobe. <sup>34</sup> Inab misiamemei ulab ibo hengmin gam kesoa ib weng osa misiamobe. Ib bobol temo inamin namin bobolo funanimibo weng olo ib sitalimo tam tloa baanomabiobe. <sup>35</sup> Naka ayam ele bobol tem funin ayam e bobol tem amun temo kweki welubanobio kesoa ele kukub ayam wafubiebe. Eka naka misiam ele bobol tem funin misiam e bobol tem amun temo bibabio kesoa e kukub misiam ota wafu biebe. <sup>36</sup> Ina otane ne baabenamabibe, nakaia unangai wengo baanom gaibo kla funaniba omin blim besa halitie obinib biamo sinanomo Gode nakaia unangai kukubo klanamabeo dimo kil baabeneta yang kenomabiobe. <sup>37</sup> Kleb wengo ayam obeb biam ota Gode baabkeneta Kobo ne kin dimo keb hengmino blimobo ge baabkenamabe otane keb wengo misiam obeb mole e baanea Kobo ne kin dimo hengmin gamobo ge baabkenamabebe.

*Naka maki Yesuse baabaniba Ni okok sumo mo watemomabbio ge baabasiobe.*

*(Mak 8:11-12; Luk 11:29-32)*

<sup>38</sup> Omito hekmel weng tekein kemini naka mak isa eka Felisiei mak isa i Yesuse baabaniba Aleyemin naka kobo okok sumo mo klaneba ni watemnoba Gode titilo bain omkleta klanebobe genomo gesiba <sup>39</sup> Yesuse yang ke baabenea Nakaia unanga ibo hengmino henga bianiba Gode kukubo mo wafu blibba ibo te baatneniba Kobo okok sumo klaneba ni sino mo watemini blim kenobbuo watem tekein kenoba Kobo Gode titilsabo ge funanomo gabib otane Gode ibo okok sumo mo alebenamabebabe. Sinanggwano Gode e weng omkeimalin nakae Yonae okok sumo olokiem alebanebio yota funaine! Gode inanea klaneba ibo watemomabiobe. Okok sumo afeto blimobe. <sup>40</sup> Sinanggwano aning sumo Yonae dobtanobua amo asumatna o dimo aningo amun tem tab binebio yo Abilim Da Tlemin Naka nesa inania amo asumatna o dimo dabal tem daak biamabibe. <sup>41</sup> Sinanggwano Yonae monea Nineba bib ye unanea Gode weng Nineba bib seli omkayebea i e wengo wenteniba hengmino deibueibbio otane ne Yonae gaisaiobe. Mema dim olo nakaia unanga ibo ne wengo mo wentebibba kesoa sinanomo Gode nakaia unangai kukubo klanamabeo dimo Nineba bib seli ibo baabeniba Ib kukubo misiamobe. Niminbabe, ibo Yonae gaisanamin nakae wengo wentib otane ib hengmino mo deibueim blimobo ge baabenomabiobe. <sup>42</sup> Eka weng mak ole sinanggwano Yuda komok sume Solomone tekein kemini ayam o omkeimasea betan mak unango komok sumobe, o afoko melen sin da ye bianoa funanoa E wengo kla wentenite geno kesoa o bibo deibonoa aalan wat aalan wat binoa tenoa e wengo wente binobio otane ne Solomone gaisaiobe. Mema dim olo nakaia unanga ibo ne wengo mo wentebibba kesoa sinanomo Gode nakaia unangai kukubo klanamabeo dimo unang olo ibo baabeniba Ib kukubo misiamobe. Niminbabe, ibo Solomone gaisanamin nakae wengo mo wentim blimobo ge baabenamabobo ge baabesebe.

*Hob misiamemei imin de tlamabeo weng sangobe.*

*(Luk 11:24-26)*

<sup>43</sup> Yesuse saa weng mako baabenea Hob misiamemei naka make bekeba biane deibanea Sinanano genea monea betan eng engo hen haabia blim kesoa <sup>44</sup> baanea Temde monia amo bi tibio ye unano genea imin motemea naka ele sanggwan amo glitanea eito kibonanebua besa bio

kesoa watemnea <sup>45</sup> imin monea hob misi-ami maki 7 i i kukub misim misiamo namino e titilo gaisaibbuei baabe dletnea teniba naka ele bekebaniba e sino misiam binebuo otane am olo dimo e dot misiam anamabebe. Nakaia unangai memalo blibi baaniba Hengmino deibonomo gabib otane i bobol temo ne mo nemabbaim blim kesoa kukubo dot misiamo i dim osa tam tlubenamabobo ge baabesebe.

*Yesuse biem osa e ningwal isa i weng sangobe.*

*(Mak 3:31-35; Luk 8:19-21)*

<sup>46</sup> Yesuse nakaia unangai wengo sma oye-bea e biem osa eka e ningwal isa teniba bib tam tlaniba wengo baabanom genamsiba <sup>47</sup> naka make Yesuse esu ye bianea baabanea Etale temale! Keb biem osa keb ningwal isa teniba bib etale bianiba wengo baabkenom genabiobo gesea <sup>48</sup> Yesuse Gode meel anamin kukubo aleyemang genabe kesoa e naka ele baabanea Wanita ne biemwal eka ne ningwal nae? ge baabanea <sup>49</sup> e kweilone e okok aleyemin nakai kiye bianea baanea Ele temine! <sup>50</sup> Nakaia unangai ne Aye abilim ut bie wengo wentebib ita ne ningwal ne nengwal eka ne biemwal nabo ge baabesebe.

### 13

*Nakae wit sano damibo dibianebiobe.*

*(Mak 4:1-9; Luk 8:4-8)*

<sup>1</sup> Am olo olo dim ota Yesuse amo deibonea daaknea aamuke ken daak tounabea <sup>2</sup> nakaia unangai homoni te ge dabaib kesoa e daaknea weseme make ye ofaibbue tem daak touna eka nakaia unanga ile ninin alim ye mabliba <sup>3</sup> e weng homono alukum saa weng oye bianea baabanea Naka make wit sano kon sano ulabo oleb monea <sup>4</sup> damibo dibim haabinea dibia una mako dilbi daaknoa deib daak uno ole wani teniba doweibbiobe. <sup>5</sup> Eka mako dilbi daaknoa tome sume malanebua dabale tib ute gebanebue dim daak uno ole hebmamsab balbu utlobuo otane dabale sumba kesoa <sup>6</sup> kimkimo gibio tounoa afoko te isak ewit tlanoa fubonoa gatanobiobe. <sup>7</sup> Eka mako dilbi daaknoa aliam misiamo ningsao mitem daak uno ole aliam misiam baka balbi utlanoa ge omtebano kesoa o mo damanota yamo mo balinim blimobe. <sup>8</sup> Ina otane mako dilbi daaknoa dabale ayame dim daak uno ota ayam balbu utlanoa yamo bali bianoa mako 100 bali biam eka mako 60 bali biam eka mak ole 30 bali-nanobiobe. <sup>9</sup> Nakaia unangai ne weng olo Wentomo gabibi kla funaine ge baabesebe.

*Yesuse kukubo saa weng ominobe.*

*(Mak 4:10-12; Luk 8:9-10)*

<sup>10</sup> Omito Yesuse okok aleyemin nakai teniba esu ele tlaniba kil baabaniba Kobo nimin kenebta keb wengo i amitie saa weng oye binabebe? Nakaia unangai keb weng olo mitmakamo kla mo tekein kebibbabo gesiba <sup>11</sup> Yesuse baabenea Gode emaye weng ayok olo mitmakamo e kimanin kukubo ibo alebenebe. Ina otane e nakaia unanga eli mo alebenim blimobe. <sup>12</sup> Nakai ne wengo wenteniba kukub ayamo wafunib mole Gode daabenea i bainobo galino dot sbal manomabib otane nakai funaniba Ni bainobo galino sbalobo ge funaniba i kukub ayamo mo wafunim blim keib mole Gode i bainobo galino omltabenamabebo ge baabesebe. <sup>13</sup> Nakaia unangai kino inamin namino watemebib otane o mitmakamo kla mo tekein kebibbabe. Eka i klango wentebib otane i motono mo wentenibta tekein kebibbabe. Inabib kesota ne wengo amit saa weng ota oye binabibe. <sup>14</sup> Nakaia unanga eli inabibo Gode weng omkeimalin nakae Aisaiae wengo yamo balinobe. E Gode wengo dolanea baanea

Ibo wengo ye wentemomabib otane o mitmakamo mo tekein kenomabibbabe. Ibo kino tememomabib otane inamin namino mo watemomabibbabe. <sup>15</sup> Niminbabe, nakaia unanga eli bobol temo agoko mo yemin blimobe. Eka i klango kweimiki datananiba i kino bina bliobe. I kino inamin namino watemniba eka i klango wengo wenteniba eka i bobol temo weng olo mitmakamo funananiba nesu tlib mole ne klaubeia ayam anomabib otane i mo inaim blim kesoa ne mo klaubeita ayam anim blimobo ge baanea dolanebiobe.

<sup>16</sup> Ina otane ibo seinbibte! Niminbabe, Gode bobol tem funino ibo omyebio kesoa ib kino inamin namino kla watem nabianiba eka ib klango inamin namin wengo kla wente biam binabiobe. <sup>17</sup> Ibo olo kla funaine! Sinanggwano Gode weng omkeimalin naka homon isa eka naka molot homon isa i inamin namino ibo watemebib olo Watemomo geniba hembiniibu otane i mo watemin blimobe. Eka ibo wengo wentebib olo i Wentomo gabinibu otane i mo wentim blimobe. Ibo inabib kesoa seinne ge baabesebe.

*Yesuse wit sano saa wengo mitmakamo alebesebe.*

*(Mak 4:13-20; Luk 8:11-15)*

<sup>18</sup> Ibo wit sano kon sano ulabo dolimin nakae saa wengo mitmakamo wente bianiba funine! <sup>19</sup> Wit sano dilbi daaknoa



deib daak unobio yole o mitmakamo inaminobe. O makob nakaia unangai sinanomo Gode kimanamabeo wengo wentaib otane i klao mo funa omabbaim blim keiba Gululame tenea omketouye binabe otabe. <sup>20</sup> Eka mako dilbi daaknoa tome dabal baka genebue dim daak unobio yole o mitmakamo inaminobe. O makob nakaia unangai Gode wengo wenteniba seimbib <sup>21</sup> otane i klao mo funa omabbaim blim keniba mema yota fumiba naka maki Gode wengo omabbubanomo gabibi teniba naka eli kukub misiamo omkayem-siba bobol tem abilo i bobol temo tam tlubenoa Gode wengo hebmamsab deibo nabib otabe. <sup>22</sup> Eka mako dilbi daaknoa dabalim daak unanoa aliama ningsao yeb baka bela utlobio yole o mitmakamo inaminobe. O makob nakaia unangai Gode wengo wentebib otane dabalim olo inamin namino talo walin kukub osa eka Monio sum olonite galin kukub osa tam tenanoa i bobol temo Gode wengo omabbubenoa deibo nabib otabe. <sup>23</sup> Eka mako dilbi daaknoa dabal ayame dim daak unanoa bela ute damanoa yamo mako 100 balinoa eka mako 60 balinoa eka mako 30 bali nanobio yole o mitmakamo inaminobe. O makob nakaia unangai Gode wengo wenteniba wafuniba Gode daabenea e titilo omyenea maki e okoko sum okok kebib eka mak ile atosin ota okok kebib eka mak ile men okok kebiam bliib itabo ge baabesebe.

*Nakai misiam isa ayam isa i saa weng otabe.*

<sup>24</sup> Yesuse saa weng mako baabenea Gode kimanin kukubo inaminobe. Nakae wit san ayamo kon sano ulabo damibo dibim haabinea dibia unebua <sup>25</sup> kwinoa nakaia unangai aala uniba e makaae boublab sano oleb tenea wit san ayamo tem daak dolinea unebua <sup>26</sup> wit sano balbunoo damanoa yamo balinang genoa go tlebe go tlebe monoa boublab san osa balbu utsoa <sup>27</sup> damib okok kemini nakai wateniba damibo gosake baabaniba Ni funanoba Kobo wit san ayamo olob damibo dolinebiobo gabob otane fatnanota boublab sano yeb baka bela utlone? gesiba <sup>28</sup> e baabenea Yole nib makaa eta nanebiobo gesea i baabaniba Kobo funaneba Ni monoba boublab san olo ula olaine ge fumblebo? gesiba <sup>29</sup> e baabenea Yeye ibo ulomolom geniba wit san ayam yeb baka ulelaib kesoa <sup>30</sup> deibueibbua boublab san baka wit san baka bio bita wito sananoa welom gaobo dim ota nema okok nakai baabesita Boublabo sin ulaniba ge olatouniba eka wit ole mit wa oleb moniba imen toumin am tam olaine ge baabenamabibo genebiobo ge baabesebe.

*Mastet dabo saa wengobe.*

*(Mak 4:30-32; Luk 13:18-19)*

<sup>31</sup> Yesuse saa weng mako imin baabenea Gode kimanin kukubo inaminobe. Mastet dabo dot kengkengobe. Makob fut dabo ulabobe. Naka make mastet dabe obeb monea damibo dolinebiobe. <sup>32</sup> As afeto dabo sumobe. Mastete dab ole dot kengkeng otane e balbunoo damanea beselib anea as afeto gaisoneta wani tenibta e tung dimo deito fakam binabiobo ge baabesebe.

*Gode wengo bib mak bib mako unamabo o saa wengobe.*

*(Luk 13:20-21)*

<sup>33</sup> Eka Yesuse saa weng mako baabenea Gode kimanin kukubo inaminobe. O makob yiso ulabobe. Unang mako yis ele kikonoa bolite tem daak kikanoo daak unea kwekonoo habski habskibua sinanoa sitanamabe inaminobo ge baabesebe.

*Yesuse wengo saa wengo olota oye bisebe.*

*(Mak 4:33-34)*

<sup>34</sup> Yesuse inamin namin wengo nakaia unangai alukum saa weng olota oye binebiobe. E wengo keimo mo oyemin blimobe. Saa wengo olota oye binebiobe. <sup>35</sup> Gode weng omkeimalin nakae Aisaiae Yesuse weng sango Gode buk temo dolanea baanea

Ne wengo oyemang gamio saa weng ota oyemabibe. Sinanggwano Gode inamin namino klam tlebuosa memalosa inamin namin wengo ayok buo weng olo omkeimabenamabibo ge baanea dolanebuo

Yesuse ina monseo weng olo yamo bali-nobiobe.

*Boublab sano saa wengo mitmakam otabe.*

<sup>36</sup> Yesuse nakaia unangai deibenea monea am unea e okok aleyemin nakai moniba baabaniba Kobo boublab sano damibo balbu utlemino saa wengo mitmakamo ni alebenale gesiba <sup>37</sup> Yesuse baabenea Naka ele wit sano ayamo damibo dolinebio yele Abilim Da Tlemin Naka netabe. <sup>38</sup> Eka damib ole alukum dabale monea dene dene otabe. Eka wit dab ole nakaia unangai Gode wengo wentebiba e kima bie itabe. Eka boublab san ole Naka Misiam meletan itabe. <sup>39</sup> Eka makaae boublab sano oleb tenea wit sano ayamo tem daako dolinebio naka ele Kulan Misiam etabe. Eka wito ula toumino dim ole mubiang amo homanamabo otabe. Eka wito ula toumin naka ile abisel itabe. <sup>40</sup> Eka i boublab sano ula olminiba aso

ola tounibbio yole makob mubiang am bomanamo dimo abiseli nakaia unangai bainobo galin blimi dleb moniba aso dla tounomabib otabe. <sup>41</sup> Abilim Da Tlemin Naka ne abiseli dlaia moniba Gode kimanin betano inamin namino nakaia unangai bainobo galino watwat daye binabo dlo nabianiba eka nakaia unangai kukub misiamo wafu binabib isa alukum dolminiba <sup>42</sup> ase beselibe eimbe tem wat dlatouniba eimbianiba enin kino sum wateme bianiba memomabiobe. <sup>43</sup> Eka naka molot unang molot ile i Aye kimanin bib uta biomabibo i makob Gode ayale ulab aniba afok inamin tubunomabiobe. Nakai ne weng olo wentebibi kla funaine ge baabesebe.

*Naka make bokis monie ayok obuaibbua atemebue saa wengobe.*

<sup>44</sup> Yesuse saa weng mako imin baabenea I bokis monie make damib ye ayok ofaibbua naka make tenea atemnea e bobolo wabasoa esak imin obua biane kula sembianea monea naka maki e afobeingo alukum walonea monio oleb monea damib olo walosebe. Gode kimanin kukub osa inaminobe. Nakaia unangai Gode kimanin kukub bobolo kla wayebo kesoa i afobeingo bobolo funino deiboniba Gode kimanin kukub ota wafunomo gabiobo ge baabesebe.

*Bukub san awoko moni sumo saa wengobe.*

<sup>45-46</sup> Yesuse saa weng mako imin baabenea Gode kimanin kukub inaminobe. Inamin naminsa naka make bukub san awoko ayam ayamo bib mak bib mako hen haabiane teema moni sume dot ayame bie kesoa atemnea e bobolo wabasoa deibanea monea e afobeingo alukum olonea naka maki walonea monio oleb tenea bukub san ele walebiobe. Gode kimanin kukub osa inaminobe. Nakaia unangai Gode kukub olo bobolo wayebobo ge baabesebe.

*Aameno saa wengobe.*

<sup>47-48</sup> Yesuse saa weng mako imin baabenea Gode kimanin kukub inaminobe. I aameno omaiba daaknoa aamuke tem daak unoa omomom aningi tlakniba aameno tem daak unaniba kweki welosiba omeb wat ken ele omaniba toulabianiba aning ayami holafaniba diso mako tem daak baniba eka aning misiam ile dibiaibbiobe. <sup>49</sup> Mubiang am bomanomosa inanomabiobe. Abiseli teniba naka misiami Gode wengo wentebibbai naka molot unang molot i tem naniba kweko blibi yatemniba Misiam ele biebe geniba bingge dobo tlaniba <sup>50</sup> dolbiaiba watniba ase beselibe eimbe tem wat unaniba ase

eimbianiba enin kino sum wateme bianiba memomabiobo ge baabesebe.

*Hekmel wengo sin osa mema osa o weng otabe.*

<sup>51</sup> Yesuse baabenea Ne inamin namin saa wengo oyebio ibo o mitmakamo tekein kebibo? gesea i baabaniba Ae ni tekein kebuobo gesiba <sup>52</sup> e baabenea Am sake make e kukub inaminobe. E inamin namin afobeingo sin osa mema osa e am tamo okabebe. Hekmel weng aleyemin naka make Gode kimanin kukub wafune mole e makob am olo gosakobe. E bobol temo Gode hekmel wengo sin osa eka mema weng osa tekein kebianea wafu biebo ge baabesebe.

*Nasalet bib seli Yesuse mo gobanim blimobe.*

*(Mak 6:1-6; Luk 4:16-30)*

<sup>53</sup> Yesuse saa wengo oyebeo blimanoa bib olo deibonea monea <sup>54</sup> ele bibam unanea tanea Gode am tamo nakaia unangai aleyebia i e wengo wenteniba smiko deibe unoa baaniba E tekein kemino sumobe. Naka ele besa bibam sak makob ninib ulab otane e inamin namin okok sumo klabe yole e titil olo fatda omonete? <sup>55</sup> E am genalin nakae miinobe, eka e awoko Malia osa e ningwali Yems esa eka Yoseb esa eka Saimon esa eka Yudas esa itabe. <sup>56</sup> E nengwal isa ele bliobe. Otane e tekein kemino olo fatda tlubanota inamin namin okok sumo olo klaveso geib kesoa <sup>57</sup> dobsuananiba e wengo mo wentubaim blim deibaioibe. I inahamsiba Yesuse baabenea Bib mak bib mak seli Gode weng omkeimalin nakai kla gobe bianiba i wengo kla wenteyebib otane ili bibam sel isa eka ili dabua tlemin isa ile i mo gobe bianiba i wengo klao mo wenteyebibbabo ge baabesebe. <sup>58</sup> Eka Yesuse ele bibam olo okok sumo homono mo klamin blimobe. Niminbabe, nakaia unangai mo bainobo geim blim kesoa e deibe binebiobe.

## 14

*Yone aay fuayemin nakae kaansebe.*

*(Mak 6:14-29; Luk 3:19-20; 9:7-9)*

<sup>1</sup> Yesuse ina monse olo dimo Helote Galili betano komok an bietabe. <sup>2</sup> (-) <sup>3</sup> Sino Helote awa genalin nakai dlanea moniba Yone afuniba klabuto ge debeb moniba klabut am daibbiotabe. E inase olo mitmakamo inaminobe. Helote e ninge Filibe alelo Helodiaso omeb haabia <sup>4</sup> Yone Helote baabanea Kobo keb ninge alelo omeisa haabieb kesoa kobo hekmel wengo welanebobo gesea <sup>5</sup> Helote atliubasoa Yone anaia kaaneko ge funane otane e nakaia unangai tolo tosianeanea deibane biotabe.

Niminbabe, i bobol temo funaniba Yone Gode weng weng omkeimalin nakabo gabibtabe.

<sup>6</sup> Am mak homanoa Helote awoko dobmikinobuo amo tlo kesoa naka maki teniba Helote tem nabianiba falo ga wembiba Helodiaso moonoo tenoa naka homoni imeno wembibi kibi kaba sin ye blansoa Helote kla seinwe bianea <sup>7</sup> Gode niniino taisanea baabonea Ne moton ye obo inamin namino donene genemebo doklamabibo ge baabosebe. <sup>8</sup> Unang sou olo wentenoa tamnoa awakosu tam unanoa baabonoo Ne fatnamin ota mo baabaita doneke? gesoa awakoo baabonoo Obo taneba Helote baabaneba Yone aa fuayemin nakae gabam eta waisa ofutneneta obutne tele ge baabosoo moonoo wentenoa hebamsab imin tamnoa komok sume Helot esu tam unanoa baabanoa Kobo memale Yone gabame waisaneba flet kwame tem daak ofaneba obutne tele ge baabasobe. O funanoa Ne Yone gabame atemnita bain kaanebe genano genota weng olo Helote inangge baabasobe. <sup>9</sup> E wentenea bobolo ilum omfubano otane e Gode niniino taisanea naka maki e temna imeno wembibi kin dimo baabonea Ne inamin namino doklamabibo ge baabone kesoa e awa genalin naka make weng olo baabanea <sup>10</sup> e monea klabut am unanea Yone aa fuayemin nakae gabame waisa obonea <sup>11</sup> flet kwame tem daak obakanea obeb tenea unang sou olo obuensea eka osak obeb tamnoa awakoo obuensobe. <sup>12</sup> I inabasiba Yone okok aleyemin nakai teniba dame debeb moniba dofaniba moniba Yesuse baabasiobe. (v2) Yesuse inamsea Helote weng sango wentenea e okok kimanin nakai baabeneba Naka ele Yone aa fuayemin naka eta imin hanane kesoa e titulo omonea okok sumo sino ni mo watemin blimo klabea ni watemebuobo ge baabesebe.

*Yesuse nakai 5,000 i imeno oyenea downosiobe.*

*(Mak 6:31-44; Luk 9:10-17; Yon 6:1-13)*

<sup>13</sup> Yesuse Helote wengo wentenea bib olo deibonea elekiem weseme obetnea aamuke wela walanea monea ibuantem ye unang genea unea nakaia unangai homoni Yesuse unebo geiba wenteniba i bibamo deiboniba kan moniba ibuantem ye temiba <sup>14</sup> Yesuse weseme tem watnea ken wat obanea daak tlanea temeaa nakaia unangai homoni teniba waisa blib kesoa yatenea dohalilanea ginin gami klayebee <sup>15</sup> kwin tloa e okok aleyemin nakai teniba baabaniba Amo kwinobo, betan olo bibo blim kesoa nakaia unangai dlaneba moniba bib onon tlaniba imaye imeno waline gesiba

<sup>16</sup> Yesuse baabeneba Ibo i mo dlaiba unaiabe! Ibmaye imeno oyine gesea <sup>17</sup> i baabaniba Ni imeno homonbabe. Blet gwabo 5 olanoba eka aningi asu olananob biobo gesiba <sup>18</sup> Yesuse baabeneba Oleb tline gesea oleb tesiba <sup>19</sup> e nakaia unangai baabeneba Bukuban dim daak toulaine gesea toulasiba e blet gwabo 5 o olonea aningi asu olo nanea wafu bianea abilim ut teme bianea Gode gangobo genea bleto hanea e okok aleyemin nakai oyensea oloniba <sup>20</sup> nakaia unangai kikibeiba unam biniba matwayensoa atosino olaib kesoa e okok aleyemin nakai oloniba tlit meeno 12 o tem daak basiobe. <sup>21</sup> Nakai imeno downosiobi 5,000obe. Unanga tena isa imen olo downosiobitane i mo keim blimobe. Naka gang ilita kieibbiobe.

*Yesuse Galili aamuke dang dim wat mama onsebe.*

*(Mak 6:45-52; Yon 6:15-21)*

<sup>22</sup> Omito Yesuse e okok aleyemin nakai baabeneba Ibo weseme obetniba sin watniba aamuke milim emwale waitneine! Ne nakaia unangai dlaia uniba deibenita natlamabibo gesea i uniba e nakaia unangai dlanee <sup>23</sup> ili bib onon tlaiba e elekiem utnea am golim ut bianea beten kebea millilanta elekiem bietabe. <sup>24</sup> Yo dim ota weseme aamuke isak mimiabe wat bia aaye mousie haa tlebianea eka glole sume tenea yebiam nabianea glole weseme imin fuba obetnea alang tla unebeba bumolok bianiba fulo waldibibitabe. <sup>25</sup> Bomanang genoa bing genota Yesuse aalang dim wat mama tenea isu tlang genea tebea <sup>26</sup> e okok aleyemin nakai ateniba funaniba Winiminobo geniba kla tosiam bianiba ngansiba <sup>27</sup> Yesuse hebamsab baabeneba Ibo ib bobol temo mo dlou uneyebota tosianimibe! Netabo gesea <sup>28</sup> Fitae baabaneba Sum kobo bain ye tebeb biamo baatneneba nesa aa dang dim daak tama tamania kebsu natalano gesea <sup>29</sup> Yesuse baabaneba Tele gesea Fitae weseme tem daako deibonea daatnea aa dang dim daak tama monea Yesu esu onse otane <sup>30</sup> e glol baka aa bakao watenea tosianea dawabba daak unangge kesoa Sumo, nafunale ge ngansea <sup>31</sup> Yesuse afunea baabaneba Keb bainobo galino mo sbal maim blim biebobee. Kobo nimin kenebta bobol tem hekhek fumbebe? ge baabaneba <sup>32</sup> i dabo daatniba weseme tem daak tounabiba glole denea aaye tab genasea <sup>33</sup> e okok aleyemin nakai weseme tem daak blibi inamin namin olo watemniba Yesuse lotu keha bianiba baabaniba Kobo bain Gode miin kebtabo ge ohamonsiobe.

*Yesuse ginin gami homoni Genesalet betan ye klayemonsebe.*

*(Mak 6:53-56)*

<sup>34</sup> I inaniba weseme obetniba aamuke yalaniba watniba Genesalet betan wat temiba <sup>35</sup> nakaia unangai Wanetase? geniba temibo Yesus eta kesoa i hebie wengo omaiba monoa bib mak bib mako meb meb yo onon tlanoa nakaia unangai ginin gami dleb teniba esu tlaniba baabaniba <sup>36</sup> Kobo ginin gami deibeneba i kweilo keb youme ken eta melebaniba i ginino ayamu benoko gesiba e deibenea i inaniba e youme melebaibi ginino alukum ayamu besobe.

## 15

*Gode hekmel wengo faninwali hekmel wengo gaisonobiobe.*

*(Mak 7:1-13)*

<sup>1</sup> Yo dim ota Felisie mak isa eka hekmel weng tekein kemin nakai mak isa Yelusalem bib ye daniba teniba Yesus esu ele tlaniba <sup>2</sup> baabaniba Nib faninwali hekmel wengo baanoa Ibo imeno downom gaibo kweilao kla fubaniba Gode kin dimo kining anibta imeno doweine genobiobe. Keb okok aleyemin nakai nimin kenibta nib faninwali hekmel kukub olo deiboniba afet nabibe? I kweilao klao mo fubaim blim kenibta imeno wembiobo gesiba <sup>3</sup> eka Yesus esak yang ke baabenea Ibo Gode hekmel wengo omdib bianibta ilib faninwali hekmel kukub ota wafu bliobe. <sup>4</sup> Gode hekmel wengo baanoa Ibo ib biem ay kamwali kla gobe bianiba i wengo kla wenteye bianibte gena bianoa eka weng mak osa baanoa Nakaia unangai wanita i biem ay kamwali weng misiam baabeib mole yenaiba kaaine genanobu <sup>5</sup> otane ibo obianiba Nakaia unangai wanita inamin namina moniao bibebua oloniba i biem ay kamwali daabenamino deibaniba i baaniba Ni inamin namin olo Gode dlalomabbiobo genimibo <sup>6</sup> ibo baaniba Ibo biem ay kamwali mo daabenimibe gabinabib kukub olo ibo Gode hekmel wengo omabbubaniba ilib faninwali kukub ota wafu binabiobe. <sup>7</sup> Sinanggwano Gode weng omkeimalin nakae Aisaiae Gode buk temo dim omin sitalsai weng sango dolanebuo memalo ne tekein kenia Bain ibtabo geiobe. E baanea

<sup>8</sup> Nakaia unanga eli i sital dimo ne niniino nemtouble nomabib otane i bobol temo ne mo omnomabibbabo, <sup>9</sup> i dabalim nakai hekmel weng ota wafu bianiba nakaia unangai aleye bianiba Olo Gode hekmel wengobo galomabib kesoa i ne lotu kenemibo ne

i wengo mo wentamibabo genebiobo ge baabesebe.

*Inamin namino nakaia unangai misiam naye binabo wengobe.*

*(Mak 7:14-23)*

<sup>10</sup> Yesuse nakaia unangai saa weng mako baabenang genea nganabesea tesiba baabenea Ibo ne wengo kla wenteniba funaine! <sup>11</sup> Nakae imeno kweilao mo fubaim blim kenea downameo mo henganemeba otane e inamin namino bobol tem misiamo funaneme ota hengmino henganamabebo ge baabenabea <sup>12</sup> omioto e okok aleyemin nakai teniba baabaniba Felisie keb wengo wenteniba aal waisesoa atliyebohe. Kobo olo mo tekein kebeb-bayo? gesiba <sup>13</sup> Yesuse Felisie weng sango saa wengo baabenea Ne Aye abilim ut bie e damibsabe. Eka inamin namin osa alukum e mo dolieim blimobe. Inamin namino omaye damibo balbunobuo ole mit baka ulanamabebe. <sup>14</sup> Ibo i bobolo mo funimibe! I makob kino tum gebenobuei ulabobe. Nakai kino tum gebenobua make tenea make deibe alebanang gameo i dabo deibe getsisaniba atda unomabiobo gesea <sup>15</sup> Fitae baabenea Kobo saa weng ele baaneba Nakae kweilao mo fubaim blim deibonea imeno downameo mo henganemebabo geseb olo mitmakamo ni alebena gesea <sup>16</sup> Yesuse baabenea Ibsa sma tob tlim biobe. <sup>17</sup> Nakae inamin namino downameo e bobol temo mo unamobabe. O dowonea daaknoa amun tem daak unobua alo fanea monamabobe. Ibo olo mo tekein kebibbayo? <sup>18</sup> Ina otane inamin namin misiamo e bobol temo bibabua funbiana obea e sital dimo tam tlebo ota naka ele hengmino hengabebe. <sup>19</sup> Inamin namin kukub misiamo e bobol tem wato bio kesoa e inamin namin kukub misiamo nabinabeo makob bobol tem misiam funin osa eka nakai yanobba kaanamin kukub osa eka alelwali deibenoba unang maki taman deib dleb haanin kukub osa eka unang taman hengamin kukub osa eka ayok henin kukub osa eka dim omin kukub osa eka nakaia unangai dim oyemin kukub osa otabe. <sup>20</sup> Inamin namin kukub misiam olo nakae nabe ota hengmino hengabebe. Otane e kweilao mo fubaim blim biane imeno downameo mo henganemebabo ge baabesebe.

*Unang mako Islelba otane o Yesuse bain-obo gesobe.*

*(Mak 7:24-30)*

<sup>21</sup> Yesus esa eka e okok aleyemin naka isa i bib olo deiboniba moniba betan mak ye onsiobe. Betano yo bibo asube. O niniino Taia bib osa Saidon bib osa otabe. <sup>22</sup> Kenan unang mako ye binobiobe. O

Islelbabe. O ye binabobua tenoa Yesuse esu ele tlanoa baabanoa Sum kobo komok sume Debite molofeitobe. Ne moonoo hob misiambe bekebo bianea watwat dabonang genabebe. Kobo nemhalilaneba daabotne-nale ge baabaso <sup>23</sup> otane Yesuse o wengo mo yang ke baabueim blimobe. E okok aleyemin nakai teniba baabaniba Kobo unang olo omaneba unoko! O nibo dosi tebianoa ngan tebobo gesiba <sup>24</sup> Yesuse baanea Islel teni makob eil sibsibi deib ayame tob tlimbibi ulab kesoa Gode ne nemanen tenia daabenang genita tliiobe. Ne Islelba i mo daabenamabibabo ge klaasebe. <sup>25</sup> Otane unang olo tenoa e skilono kikib ye dlong dlong golbuwa tounoa baabanoa Sum kobo daatnenale gesoa <sup>26</sup> Yesuse baabonea Tili naka memei imeno oise downaibo ayamba kesoa nesa inania Isleli deibenia Islelba ita daabei mole olo misiamobo ge baabosea <sup>27</sup> unang olo baabanoa Sum keb wengo bain otane tili i aweli imeno wembiba atosino dilbi daaknoa biin daak unamo i unam binabiobe. Kebsa inaneba Islelba ne nemhalilaneba daatnenale gesoa <sup>28</sup> Yesuse baabonea Obo ob bainobo galino sbal mabieobe. Obo inamin namino inatneneko gabebo inabkenamabibo ge baabonea olo dim ota weng tosa o moonoo ayam ansobe.

*Yesuse nakaia unangai homoni ginin gami klayemonsebe.*

<sup>29</sup> E betano yo deibonea imin monea aamu-ke Galilie ken ye unanea utnea bibilim ut toubia <sup>30</sup> nakaia unangai homoni skil misiam isa kino tum gebenobue isa eka gilok yalobio naka isa eka kobom isa eka gembibi mak isa dleb teniba Yesuse esu ele dlasiba e klayemonsebe. <sup>31</sup> Yesuse klaubene kobomi weng obiam eka gilok yalobuei ayam ambiam eka skil misiami tema tema une biam eka kino tum gebenobue isa imin webiabenasoa Islel nakaia unangai eli yateniba smiko deibe unoa i Sume Gode niniino dobtoule bisiobe.

*Yesuse nakai 4,000 i imeno oya downsiobe.*

*(Mak 8:1-10)*

<sup>32</sup> Yesuse e okok aleyemin nakai nganabenea tesiba baabene Ne nakaia unanga eli dohalimbibe. I ne beketne bliba amo asumatna blimano i imen teb bliobe. Ne dlasia imen teb behianiba deib tama deibo beit doka bianoa kin bobob yemo kesoa ne mo dlaia unaibbabo gesea <sup>33</sup> e okok aleyemin nakai baabaniba Olo naka blim ibuantem olele nibo imeno faida olota naka homon unang homon eli oyomab-bione? gesiba <sup>34</sup> Yesuse baabene Ibo bleto fatnamin olaibbione? gesea i baabaniba Blet gwabo 7 olanoba eka aning gwabi

asumak olanobbiobo gesiba <sup>35</sup> Yesuse nakaia unangai Dabalim daak toulaine ge nganabesea inaniba toulasiba <sup>36</sup> e bleto 7 olo olonea aningi olonanea Gode gangobo genea hanea olonea e okok aleyemin nakai oyensea oloniba nakaia unangai kikibeiba <sup>37</sup> unam biniba matwayensoa atosino olaib kesoa Yesuse okok aleyemin nakai oloniba tliit meeno 7 o tem daak basiobe. <sup>38</sup> Nakai imeno yo downsibi 4,000obe. Unanga tena isa imen olo downsib otane i mo kieim blimobe. Naka gangi ilita kieibbiobe. <sup>39</sup> Omito Yesuse nakaia unangai dlanea uniba e weseme obetnea monea betano niniino Magadano ye onsebe.

## 16

*Naka maki Yesuse okok sumo mo klanea watemomo ge baasiobe.*

*(Mak 8:11-13; Luk 12:54-56)*

<sup>1</sup> Felisie mak isa eka Sadyusie mak isa i funaniba Nibo Yesuse inabatemoba e weng ayam mo yang keim blim kene mole kot kebanomo ge fumbianiba teniba baabaniba Kobo okok sumo mo klaneba ni watem tekein kenoba keb titilo bain abilim da tlobe genom gesiba <sup>2</sup> Yesuse baabene Kwinomo ibo baaniba Ban tomo fano olo bomanomo am ayam bomanam-abobo genabiobe. <sup>3</sup> Eka boman tlam ole baaniba Iib dim uto mililanoa abile sok eito kinane yole memalo soko tlemabobo genabiobe. Ibo klul olo watemniba moton sambinabib otane inamin namino memalo tam tebu olo watemebibo o mitmakamo mo tekein kebibbabe. <sup>4</sup> Ibo hengmino henga bianiba Gode kukubo mo wafu blibba ibo te baatneniba Ni okok sumo mo watemalaobobo gabib otane ibo sinangwano Gode e weng omkeimalin nakae Yonae okok sumo olokiem alebanebio yota funaine! Yonae aningo amun tem wat bia amo asu blimanao make dime imin fua dabaso inanea Gode nesa makob inatnamabebe. Gode inanea klanea ibo watemomabiobe. Okok sumo afeto blimobo ge baabene deibe onsebe.

*Felisi isa Sadyusi isa i bleto sitanamino saa wengobe.*

*(Mak 8:14-21)*

<sup>5</sup> Am mak bomanoa Yesuse okok aleyemin nakai weseme obetniba aamu-ke welaniba watniba milim sin da wat unib otane i bleto oleb onamino dokobenoa deibo unibbua <sup>6</sup> Yesuse saa weng mako baabene Ibo Felisie isa eka Sadyusi isa i bleto sitanamino ninino yiso klaine ge baabeseo <sup>7</sup> e wengo mitmakamo makob Felisie isa Sadyusi isa i kukub misiamo na met na met bebib ota baabene otane e okok aleyemin nakai weng olo mitmakamo mo

tekein keim blim keniba i sinwalo baasese bianiba teka bianiba baaniba Bleto deibo tlobbio yota baabenebo gabiba <sup>8</sup> Yesuse i bobol tem funino tekein kenea imin baabenea Ibo nimin kenibta ib sinwalo obianibta Nibo bleto blimobo gabibe? Ibo ib bainobo galino mo sbal maim blimobe. <sup>9</sup> Ibo sma tekein keim blim bliobe. Ne bleto 5 o olonia hania nakai 5,000 i kikibeia doweibbu otane i alukumo mo doweim blimobe. I unan deniba imen homono imin olaiba ibo oloniba tlit meen temo baibbu otane ibo olo mo fumbibbabe. <sup>10</sup> Eka bleto 7 o olo hania nakai 4,000 i kikibeia unam biniba atosino olaiba ibo oloniba tlit meeno temo imin baibbio yosa ibo mo fumbibbabe. Ib bleto blim otane ne bleto oyenamin titilsabe. Ne weng ele oyebi olo bleto wengbabe. <sup>11</sup> Ne bleto wengo baabei olo mitmakamo inaminobe. Felisie isa Sadyusi isa i inamin namin kukubo aleyebibo klaine genita o saa wengo baabei otane ibo tob tlim biobo gesea <sup>12</sup> i wenteniba tekein keniba e weng ele baabene olo Bleto sitanamino wengo mo baabeim blimobo e Felisie isa Sadyusi isa i inamin namin kukubo aleyebib ota klaine geneta baabenebo gesiobe.

*Fitae Yesuse baabanea Kobo Klaist kebtabo ge baabasebe.*

*(Mak 8:27-30; Luk 9:18-21)*

<sup>13</sup> Yesuse monea bibo niniino Sisalia Filibai bibo kikib ye unanea e okok aleyemin nakai baabenea Nakaia unangai Abilim Da Tlemin Naka ne wanetabo ge one bin- abibe? gesea <sup>14</sup> i baabaniba Maki oke bianiba E Yon aa fuayemin naka etabo gesib eka mak ile oke bianiba Gode weng omkeimalin nakae llaiya etabo gesib eka mak ile oke bianiba Gode weng omkeimalin nakae Yelegaia eta bleka Gode weng omkeimalin naka mak etase makobo gesib bliobo gesiba <sup>15</sup> e baabenea lbmal ole ne wanetabo gabibe? gesea <sup>16</sup> Saimon Fitae baabanea Gode Kemfakamin Naka Klaist kebtabe. Gode amit afen binabe miin kebtabo gesea <sup>17</sup> Yesuse baabanea Saimono, Yonae miin kobo ne seinkebibe. Dabalim nakai ne weng sang olo mo alebkeim blimobe. Ne Aye abilim ut bieta weng olo alebkenebe. <sup>18</sup> Ne kobo Fita ge nganabkei olo mitmakamo tomobe. Nakai amo genoma bianiba dabalo hakenaniba amuno olabbaniba tomo beboniba geib bi- amo mo fibamobabe. Sbal manamabobe. Keba makob tomo ulabobe. Kobo ne meletani ne bainobo gabibi daabeneba sbal manomabiobe. Aseinin bibo titilo ne meletani mo dlabbunomobabe. <sup>19</sup> Ne titilo omklamabio makob Gode kimanin bibo kie tobklamabibe. Kobo dabalim

olo inamin namin kukub misiamo tlemo Tolobo geneb biamo God esa inanea abilim uto kukub misiam olo Tolobo genamabebe. Eka kobo dabalim olo inamin namin kukub ayamo tlemo Ae ayamobo geneb biamo God esa inanea abilim uto kukub ayam olo Ae ayamobo genamabebo ge baabanea <sup>20</sup> Yesuse wengo blimanoa omite e okok aleyemin nakai baabenea Ibo naka maki mo baabenibta Yesuse Gode Dofakamin Nakabo ge baabenimibe ge baabesebe.

*Yesuse baanea Ne kaania imin hananamabibo gesebe.*

*(Mak 8:31-9:1; Luk 9:22-27)*

<sup>21</sup> Amo yo olo dim ota Yesuse e okok aleyemin nakai baabenea Ne watnia Yelusalem bib wat unamio komokwal isa eka Gode amo kimanin nakai komokwal isa eka hekmel weng tekein kemin naka isa enin sumo omneniba nanaiba kaania amo asu kenia make dime imin hananamabibo ge baabesebe. Sino e weng olo mo baabeim blimobe. E weng olo nena ye baabesebe. <sup>22</sup> Fitae wentenea Yesuse debeb tanea sesa tam unanea sbal weng baabanea Sum kobo kukub olo keb dimo mo tam tlamone! Gode Tolobo geneko gesea <sup>23</sup> Yesuse deskinaea Fitae baabanea Gululam kobo deitne one, ne mo watamebe! Keb bobol tem funin olo Gode bobol tem funinbabe. Nakai bobol tem funin ota funanebta obeobo ge baabasebe.

<sup>24</sup> Omite Yesuse e okok aleyemin nakai baabenea Nakai wanita ne beketne nom gib mole i niniino omabbuniba inamin namin kukub misiamo i dimo tam tlemo omnakatouleb bianiba ne kukubo wafu nine! <sup>25</sup> Eka nakaia unangai wanita ili bobol tem funino wafu bianiba dabalim olo inamin namino gobonimibo i amito mo biomabibbabe. Otane nakaia unangai wanita ne bobolo funaniba dabalim olo inamin namino deibonimib nakai afen smiko amit namabobe. <sup>26</sup> Nakaia unangai wanita dabalim olo inamin namino alukum olmina bianiba mo bainobo geim blim bianiba i kaaniba aseinin bib unib mole inamin namin olo fatnanota daabenamabone? O mo daabenamabobabe. I inamin namino dloniba i afen smike amit nine waloniba dobonamino blimobe. <sup>27</sup> Abilim Da Tlemin Naka ne abiseli dlonia eka ne Aye titilo ayal inamin einobuo omonania dleb tenia nakaia unangai kukubo dabalim olo nabinib biamo molo yang kebenamabibe. <sup>28</sup> Ne weng ele baabenamabi olo kla funaine! Naka maki memalo dabalim olo blibi mo kaaim blim bliba Abilim Da Tlemin Naka ne komok sum aia natenibta mit kaanomabiobo ge baabesebe.

## 17

*Yesuse aalo afet anea atemsiobe.*

*(Mak 9:2-13; Luk 9:28-36)*

<sup>1</sup> Amo asuke asuke asuke nao blimanao Yesuse Fitae dobonea eka Yemse e ninge Yone i dabo e dlonanea dletnea utniba amgolime tekebmine golim ut ilikiem bianiba <sup>2</sup> Yesuse aalo afet anea eka e kibi osa afet anea makob afoko tubunoa bomat genabo inanea eka e youm osa namabe bining genoa makob ayal inanao atem nabaniba <sup>3</sup> eka omito Yesuse okok aleyemin nakai asumatna eli temiba Moses esa Ilaiya esa i dabo abilim daniba daake temniba Yesuse tena mabaniba weng obiba yatemniba <sup>4</sup> Fitae Yesuse baabanea Sum kobo nibo ele biobo ayam kesoa kobo Ae geneb mole ne amo asumatna genamabibe. Mako kebmi gebke eka mako Moses emi geba eka mako Ilaiya emi geba nanano ge ohabea <sup>5</sup> ayungo bomat genoa ayal inamin tubunoa ge dlanao weng mako ayung tem iwat baabenoa Ele ne miinobe. Ne kla goba biania seinhabibe. Ibo e wengo kla wenteha bianibte ge baabeso <sup>6</sup> Yesuse okok aleyemin nakai kla tosananiba dlong dlong golbua daakniba dabalim daak unaniba gam dalabma bliba <sup>7</sup> Yesuse tenea isu tlanea melebenea baabenea Hanaine! Mo tosanimibe gesea <sup>8</sup> i hananiba temiba naka maki blim Yesuse elekiem bia atemsiobe.

<sup>9</sup> I inaniba amgolimo deiboniba dabbema tebianiba Yesuse i baabenea Ibo inamin namin olo watemibo naka maki mo baabenimibe! Kimik geibbua binia Abilim Da Tlemin Naka ne kaania imin hanaita weng olo baabeine ge baabenea watasea <sup>10</sup> eka e okok aleyemin naka isak baabaniba Hekmel wengo aleyemin nakai namin kenibta baanibta Ilaiyae imin sin tleta Gode Dofakamin Nakae abuk tlamabebo ge obinabibe? gesiba <sup>11</sup> Yesuse baabenea Bainobe. I baaniba Ilaiya ele sin tenea inamin namino alukum klanang genea tlamabebo geibbuo <sup>12</sup> e bain inanea sin tlebuo otane nakaia unangai e mo tekein keim blim keniba i ili bobol tem funin ota nabianiba e kukub misiam omkaha binibbiobe. Ne weng olo bain baabeio. I Abilim Da Tlemin Naka nesa inaniba enino omkanemomabiobo gesea <sup>13</sup> e okok aleyemin nakai wenteniba funaniba E baanea Ilaiyae sin tlebiobo gabe ye Yone aa fuayemin naka eta ohabebo gesiobe.

*Yesuse naka tene hob misiame bekeba bia fotebebasebe.*

*(Mak 9:14-29; Luk 9:37-42)*

<sup>14</sup> I amgolim ut daniba teniba nakaia unanga isu ele tetemiba naka make tenea

Yesus esu ye dlong dlong golbua tounea <sup>15</sup> baabanea Sum kobo ne miine dohalilaneba daabanale! E dabasam bianoa enin obba misiamo enha binabobe. Eka am mak dim ole e watnea ase eimbiana eka aan tem osa dobbiana daak bina binabe kesoa <sup>16</sup> ne funania Keb okok aleyemin nakai klaubaine genia debeb tetemi otane i titil blim kesoa i mo klaubaim blimobo gesea <sup>17</sup> Yesuse baabenea Ib bainobo galino blim eka i bobol tem funin osa molotbabe. Ibo makob memalo naka homon unang homoni dabalim ele bliibi ulabobe. Am homono dimo ne ibo amit ye bekebe binabi otane ibo ne mo bainobo getneim blim bliobe. Naka tene debeb tline gesea <sup>18</sup> debeb tesiba Yesuse hob misiame sbal weng baabanea fotebenea unanea naka ten ele deiba unea hebmamsab ayam ansebe.

<sup>19</sup> Omito e okok aleyemin nakai ilikiem teniba Yesuse kil baabaniba Ni nimin kenobta hob misiam ele mo fotebebaim blime? gesiba <sup>20</sup> Yesuse baabenea Niminbabe, ib bainobo galino men kesoa ibo mo inaim blimobe. Ib bainobo galino kla mo sbal maim blim biaib otane ibo funaniba Ni sma Gode daabenea inamin namin okok sumo nanomabbibo ge funanimibo nanomabiobe. Eka weng mak osa mitmakamo makobobe. As mastet dabe kengkeng otane dolinimibo belanea beselib damanabe inaniba ib bainobo galino men bibe biam otane ibo funaniba Ni sma Gode daabenamabebo ge funaib mole ibo amgolim make baabaniba Kobo ewat one genimibo e unamabebe. Ibo okoko mako tob tlin halonamino blimobe. Weng olo kla funaine! <sup>21</sup> [Inamin namin afeto naneba hob misiami fotebenamino blimobe. Beten osa eka imen halamin osa kukubo asu yo olotabo ge baabesebe.]

*Yesuse kaanea imin hananamabeo wengo imin baabesebe.*

*(Mak 9:30-32; Luk 9:43-45)*

<sup>22</sup> Yesus esa e okok aleyemin naka isa i alukum Galili betan ye mibaniba Yesuse e okok aleyemin nakai baabenea I Abilim Da Tlemin Naka ne nemeb moniba naka maki nemyiba <sup>23</sup> nenaiba kaam biania amo asu kenia make dime imin hananamabiobo ge baabesea e okok aleyemin nakai wenteniba i bobolo ilum omfubesobe.

*Yesuse Gode am sumo takis moni bokalin nakai monio oyensebe.*

<sup>24</sup> Yesus esa e okok aleyemin naka isa i moniba Kabaneam bib ye temiba Gode am sumo takis monio bokalin nakai teniba Fitae kil baabaniba Ib aleyemin nakae Gode am sumo takis monio okaye binabebo? gesiba <sup>25</sup> Fitae baabenea Ae e okaye

binabebo ge baabenea e imin tanea am tam unanea wengo mo baabaim blim bia Yesuse data sin weng omtamanea Fitae baabanea Saimon kobo fatnangge fumbebe? Dabalim olo komok sumi betan mak betan mak ye blihi fatnanihta takis monio bokam binabibe? Ili meletan ita i takis monio okaye binabiba bleka naka afet itio? gesea <sup>26</sup> Fitae baabanea Naka afet itabo gesea Yesuse baabanea Bainobe. Komokwali ili meletan ikobbabe. Naka afet ita takis monio okaye binabiobe. Nibo Gode meletan kesoa e am sumo takis monio walonamino denomobo klayam <sup>27</sup> otane i atliaubenomo kesoa kobo moneba aamuke aningi huke diyebaba aningo mikiktemo tetemoa wananomoneba anange teluboneba temehta monio biamo omeh tenebta nib dab nib takis monio omyene ge baabesebe.

## 18

*Waneta Gode kimanin bibo komok anamabene?*

*(Mak 9:33-37; Luk 9:46-48)*

<sup>1</sup> Weng tosa yota Yesuse okok aleyemin nakai teniba esu ele tlaniba kil baabaniba Keb okok aleyemin naka ni isak tem daako waneta komok aneta Gode kimanin bibo nakaia unangai kimanamabene? gesiba <sup>2</sup> Yesuse naka ten gwabe make nganabane tesea dobonea i kibi kaba sin ye dofanea masea baabenea <sup>3</sup> Ne bain baabenamabibe, ibo untak nganin kukubo deiboniba makob men gwabi bobol tem funino ulab animibo ibo Gode kimanin bibo unomabiobe. <sup>4</sup> Nakae waneta untak nganin kukubo deibonea men gwab ele bobol tem funino ulab am bie naka ele Gode kimanin bibo komok an biebe. <sup>5</sup> Eka nakae waneta ne bobolo fumbianea men gwab enamine daabane mole kukub olo makob neta daatnenamabebo ge baabesebe.

*Kukub misiam ota nakai bainobo galino watwat daye binabobe.*

*(Mak 9:42-48; Luk 17:1-2)*

<sup>6</sup> Yesuse imin baabenea Nakai tom beselebe oboniba naka make kwel wat obasa gebaniba dobbiaib watnea aaye sume dang wat blaneana kaanemeo kukub olo misiamobe. Ina otane meme gwabi ne kla bainobo gane binabib kesoa naka ele hengmino hengabea men gwab enamine atenea esak hengmino hengane mole ole dot misiamobe. Niminbabe, e inane biamo Gode atlihamino e dimo tam tlamabobe. <sup>7</sup> Inamin namin kukub misiamo nakaia unangai dimo tam tlanota dlabmanota hengmino henga binabib kesoa ne dohalimbibe. Otane naka make tenea

menganea baanea Nibo inamin namino inanomo gesea wenteniba inaniba henganimibo nakae tenea menganeme naka ele klaneko! Sinanomone enin sumo e dimo tam tlamabobe. <sup>8</sup> Keb kweilone kemab manea hengmino henganeb mole walo ombianale! Eka skilon eta kemab manea henganeb mole esa walo obbianale! Keb kweilone elekiem deiba bianeba afen smike doboneba amit neb mole kukub olo ayamobe. Ina otane kobo deibaneba asu tubuna biam bineba aseinin bib unaneba ase kiminaminba amit einine tem wat eineb mole kukub olo misiamobe. <sup>9</sup> Keb kine inamin namino watemneba bobolo wakkenoa henganeb mole ulo obbianale! Keb kine elekiem deiba bianeba moneba afen smike doboneba amit neb mole kukub olo ayamobe. Otane kobo deibaneba asu teme bianeba aseinin bib uneb mole kukub olo misiamobo ge baabesebe.

*Eil sibsibo mako omeh molaibbuo saa wengobe.*

*(Luk 15:3-7)*

<sup>10</sup> Yesuse baabenea Wentine! Ibo meme gwab eli mo misiam doka bianiba funaniba I besa nakabo galaibe! Niminbabe, i kimanin nakai abiseli abilim uto ne Aye bekeba bianiba ateme binabiobe. <sup>11</sup> [Inamin kesoa Abilim Da Tlemin Naka ne tenia nakaia unangai hengmin temo blihi dotlanang genita tliobiobe.]

<sup>12</sup> Ibo saa weng olo funaine! Naka make e eil sibsibi homon 100 bibabliba mako omeh molanemeo ninin kenamabene? E maki 99 i amgolime tabab ye dlanea bianiba tetano wembiba deibeneba monea mako omeh molaneana henamabebe. <sup>13</sup> E inaneana hen tenea watemameo kla seinwemabebe. E eil sibsibi mak isa seinyebe otane olole omeh molanebua imin ome kesoa kla seinwemabebe. <sup>14</sup> E inanamabe kesoa ib Aye abilim ut bie bobol tem osa inaminobe. E fumbleo Meme gwabi elekiem olokiem i mo monibta bib misiamo unaibe ge fumbleo ge baabesebe.

*Nekwali henganimibo dlo klanamino weng otabe.*

<sup>15</sup> Yesuse e okok aleyemin nakai weng mako imin baabenea Keb neke misiam nabkene mole klebkiem moteneba etemna toubnianiba baabaneba Kobo ne misiam natnenebobo ge baabaneba e keb wengo wenteneana inamin kukub olo deibone mole klayamobe. Ib dabo bobol temo makob omfaniba seinine! <sup>16</sup> Otane e keb wengo mo wentim blim kene mole deiba teneba naka mak unang maki elekiema asua mak ye dletneba motemniba etemna toubnianiba kobo weng olo imin baabaneba isak keb wengo daabkeniba Kobo naka ele misiam



nabanebobo ge baaba naine! <sup>17</sup> Otane e ib wengo mo wentim blim kene mole kobo debeb moneba alukum ne bainobo galin nakaia unangai dimaneba e i weng osa mo wentim blim kene mole fotebeine! E ibo mo baka lotu kemene! E makob bainobo galinba isa eka takis moni bokalin naka isa i ulab bianeta nanamabebo ge baabesebe.

*Dabalim olo bainobo galin nakai nabibo wengobe.*

<sup>18</sup> Yesuse imin baabene Ne ibo moton baabenamabibe, ibo dabalim olo inamin namin kukub misiamo tlemo tolobo geib biamo God esa inanea abilim uto kukub misiam olo tolobo genamabebe. Eka ibo dabalim olo inamin namin kukub ayam olo tlemo Ae ayamobo gabinib biamo God esa inanea abilim uto kukub ayam olo Ae ayamobo genamabebe. <sup>19</sup> Eka ne weng mako imin baabenamabibe, dabalim olo naka mak unang maki asua asumatnaea mak keniba funaniba Gode inamin namino inabenamabebo ge funaniba ne Aye Gode abilim ut bie nganhamb mole e inabenamabebe. <sup>20</sup> Nakai bain asua asumatnaea mak keniba miniba ne bobolo funom gaibo ne i baka biamabibo ge baabesebe.

*Okok naka make misiam nanebue saa wengobe.*

<sup>21</sup> Omito Fitae tenea Yesus esu ele tlanea kil baabanea Sum kobo ne neke ne kukub misiamo omkanemeo ne baabania Kobo hengmino ne omkanebobo dokotneoa deibueiobo genamin wengo ohamino fatnamin baabanamabine? <sup>7</sup> genana bleka? gesea <sup>22</sup> Yesuse baabanea Yeye inangge ohamin wengo kiminbabe. Homon baabanale! <sup>23</sup> Inamin kesoa Gode nakaia unangai kimanin kukub osa enaminobe. Komok sum make funanea Memalo ne okoko kimanini inamin namino doitneibbuo yano klasia yang ketneine genea <sup>24</sup> toubianea sin olebue emio kinea temea naka ele monio K10,000,000 kesoa watemnea baabene Ibo naka ele debeb tline gesea debeb tesiba baabanea Keb monio K10,000,000be. Kobo yang ketnenale ge baabene otane <sup>25</sup> naka ele monio olo yang kenamino blim kesoa komoko baabene Ibo naka elesa e alel melel isa eka e afobeing osa alukum oloniba naka maki waloniba monio olonibta ne yan olo nesak onine gesea <sup>26</sup> naka ele komok esu ye dlong dlong golbuanea tlabianea baabanea Sum kobo nemhalilaneba deitne biehta mitdata yang kebkenano gesea <sup>27</sup> sume naka ele dohhallilaneba baabanea Kobo ne yan olo mo walaebe! Temdeibonale ge baabasea <sup>28</sup> naka ele deibanea monea naka make i dabo dab asu keniba okok olo okok kebinabibbuwa e naka ele monio

K100 oisanebio kesoa kwel wat afunea baabanea Kobo ne yano memala alukum yang ketnenale gesea <sup>29</sup> e naka elesu ye dlong dlong golbuanea tlabianea baabanea Kobo ne nemhalilaneba deitne biehta mitdata yang kebkenano gene <sup>30</sup> otane e mo wentim blimobe. E sbal manea debeb mo daia klabut am bianea yano waloseta tileisanano genea debeb onsea <sup>31</sup> okok kimanin nakai maki ateniba Yebbabo geniba moniba i komoko baabaniba eko inanea mak sake ge debetnea klabut am unea deiba tlobobo gesiba <sup>32</sup> komoko wentene naka ele nganabanea tesea baabanea Kobo okok naka misiamobe. Kobo sino ne menebeb binia kemhalilania Ne yano mo kitnenemebe! Deitnenale ge baabkeibu otane <sup>33</sup> kobo nimin kenebta ne nabkeiobo inanebta keb neke dohhallilanebta e yano deibaim blime? ge baanea <sup>34</sup> komoko atli-aubasoa okok nakai maki baabene Ge debeb moniba klabut am daiba klabut am bia klabut am kimanin nakai enino omkahabib binea ne yano alukum yang ketneseta tileisaine ge baabenebiobo ge baabene eka <sup>35</sup> imin baabene Ib nekwalu hengmino ibo omkayemibo dokobenoa deibueine! Ibo mo inaim blim keniba sma ye funib mole ne Aye abilim ut bie esa inanea ib hengmino sma ye funamabebo ge baabesebe.

## 19

*Yesuse alelwali fotebenamin kukubo wengo baasebe.*

*(Mak 10:1-12; Luk 16:18)*

<sup>1</sup> Yesuse weng olo oyebeo blimanoa Galili betano deibonea imin monea aaye Yodane milim sin da wato Yudia betan ye bebea <sup>2</sup> naka homon unang homoni kan motemsiba denea ginin gami klayebea <sup>3</sup> Felisi maki Yesuse naatemoba e ni wengo klayamo mo yang keim blim kene mole kot kebanomo geniba teniba kil baabaniba Nib hekmel wengo mo baanoa Nakae e alelo fotebenang gameo ayamobo genobuo? gesiba <sup>4</sup> Yesuse baabene Ibo Gode buk tem weng olo kibinabiobe. Sinanggwan inamin namino mo tam tlim blim bua Gode mikiktem ye kilonea klana bianea eka nakae klanea unango klananea <sup>5</sup> baanea Ne inai kesoa nakae e awok aaleb kamwali deibene alelo omameo i kamo i damo makob elekiem anomabiobo genebiobe. <sup>6</sup> I kamo mo asuanimibbabe. Gode emaye dleb tete nanamabe kesoa naka maki mo danimibe ge baabesea <sup>7</sup> i imin kil baabaibo Mosese hekmel wengo mako afet dolanea enangge baanea Nakae e alelo fotebenang ge mole alelwali fotebenamin futano dolanea e alelo omweneta fotebene unoko genebio yo e nimin keneta inamin

wengo dolanebione? gesiba <sup>8</sup> Yesuse baabenea Mosese weng olo baanebue olo nimirnabe ibo weng omdibi bianiba kukub ayamo mo wafu blibba kesota e baanea Ibo inanibta alelwali fotebenamine ge baabenebiobe. Eka sinanggwano Gode naka esa unang osa klane dimo e inamin kukubo mo omfaim blimobe. <sup>9</sup> Ne weng olo bain baabenamabibe, naka make e alelo tamano mo hengaim blim bua imake fotebenea unang afet ome mole e tamano henganamabebo ge baabesea <sup>10</sup> e okok aleyemin nakai baabaniba Ni kukubo inaminobe. Nakae waneta e alelo fotebenangge mole ele bobol temobe. Otane kobo baaneba Naka make e alelo tamano mo hengaim blim bua imake fotebenea unang afet ome mole naka ele emaye tamano henganamabebo gabeb yole bumolok kesoa ni funanoba Nakai alelwali dlonamino deiboniba besa kakat nimibo klayamobo gabuobo ge baabasiba <sup>11</sup> Yesuse yang ke baabenea Gode mo baaneta Nakai alukum alelwali mo dlaibe gabebabe. Emaye nakai elekiem dabakaneme asu dlakanemeo daabenamabe kesoa ita kakat nomabiobe. Otane homon ile alukum alelwali bokaline genebiobe. <sup>12</sup> Nakai alelwali bokalino deibenamino mitmakamo afet afetobe. Naka maki i awokwali gongam tem da inamin dlaniba tekein keniba I damanimibo alelwali mo dloniba eka meme isa mo dla nanomabibbabo geib biamo ita alelwali mo dlaibbabe. Eka mak ile naka maki teniba i abuo weletlabeib biamo i alelwali mo dlaibbabe. Eka mak ile alelwali kweimiki dlonamino deibeniba besa bianiba Gode bobol ota fumbianoba e nakaia unangai kimanamabeo okok ota okok kemobobo gabibi blib nabe. Nakae waneta weng olo wentenea tekein kene mole e inameko ge baabesebe.

*Yesuse Meme gwabi nesu tline genebiobe.*

*(Mak 10:13-16; Luk 18:15-17)*

<sup>13</sup> Amo yo dim ota nakaia unangai funaniba Niobo meme gwabi dleb motemoba Yesuse i yafunea beten kebeneko geniba dleb tetemsib otane e okok aleyemin nakai dosuananiba baabeniba De unine ge baabesiba <sup>14</sup> Yesuse baabenea Ibo meme gwabi mo watanimibe! Deibeiba teniba nesu tline! Nakaia unangai ne kla bainobo getneniba meme gwab eli ulab animib ita Gode kimanin bibo unomabiobo ge baabene <sup>15</sup> e kweilono i gabam ut yafunea Gode baabanea Meme gwab eli daabenale ge baabanea blimanole betan olo deibonea onsebe.

*Naka tembale afobeing homonsae weng sangobe.*

*(Mak 10:17-31; Luk 18:18-30)*

<sup>16</sup> Naka make tenea Yesuse esu ele tlanea baabanea Aleyemin naka kobo ne kukub ayamo fatnamin ota nanita afen smike dobonita amit namabine? gesea <sup>17</sup> Yesuse baabanea Kobo nimirn kenebta ne kil baatnenebta Fatnamin ota ayame? geta obebe? Gode elekiem eleta ayamobe. Kobo afen smike dobonia amit nano geneb mole hekmel wengo alukum wafunebte ge baabasea <sup>18</sup> naka elesak Yesuse imin kil baabanea Hekmel wengo fatnamin ote? gesea Yesuse baabanea Kobo nakai mo yenanebta kaanimibe! Eka kobo unang tamano mo henganemebe! Eka kobo ayoko mo henemebe! Eka kobo naka mak unang maki dim wengo mo baabenemebe! <sup>19</sup> Kobo keb biem ay kamwali wengo kla wente bianebte! Eka makob kleb unaalo gobo biebananeba naka mak isa gobenanale ge baabasea <sup>20</sup> naka tembal ele baabanea Ne hekmel weng olo alukum wafu bli otane ne kukubo afet osa wafunano? gesea <sup>21</sup> Yesuse baabanea Kobo kukub ayam ota kla wafunimia geneb mole moneba keb afobeingo alukum oloneba naka maki waloneba monio oloneba nakaia unangai inamin nimirn blimi oyeb biam ota sinanimo abilim uto inamin nimirn homono olamabeobe. Kobo moneba inaneba teneba ne beketne nale ge baabase <sup>22</sup> otane naka tembal ele inamin namino homon kesoa Yesuse weng olo baabaneo wentenea funanea Ne afobeingo mo inanita naka maki oyamibabo ge funanea bobolo ilum omfubanoa e Yesuse deiba onsebe. <sup>23</sup> E inanea unea Yesuse e okok aleyemin nakai baabenea Nakae moni osa afobeing osa homono bibabinom e Gode kimanin bibo unang gameo bumolokobe. <sup>24</sup> Eka weng mak osa inaminobe. Til kamele youm bikinamin sile amit tem te tam unang gameo bumolok otane nakae waneta afobeingo homon bibabua Gode kimanin bibo unang gameo olo dot bumolokobo ge baabesea <sup>25</sup> e okok aleyemin nakai wenteniba i smiko deibe unoa baabaniba Kobo inang geneb yole nakai afobeingo homon bibebua i Gode kimanin bibo mo unim blim kenimibo nakae waneta afen smike dobonita amit namabene? gesiba <sup>26</sup> Yesuse yateme bianea baabenea Dabalim nakai abilimo imalo unom gaibo i titil blim otane Gode inamin namino bumolok omfubanamino blim kesoa e nakaia unangai daabene dletnea abilim unomabiobo ge baabesea <sup>27</sup> Fitae wentenea baabanea Ni bib osa inamin nimirn osa alukum deibonoba kobo bekebke haabiob kesoa ni nimirn dlonab-

bione? gesea <sup>28</sup> Yesuse baabenea Ne weng mako baabenamabio inaminobe. Sinanomo Gode mema dabale klaneme dimo Abilim Da Tlemin Naka ne Gode titilo ayal inamin einobuo omnea komok sume biin toulalino dimo tounia eka 12 ibo ne bainobo geniba beketne binib biamo ibsa komokwali biino dimo toulana bliba Islel nakai mito 12 i tliba ibo i wengo wenteniba i kukubo klayemomabiobe. <sup>29</sup> Eka nakaia unangai wanita ne bobolo funaniba ne okoko okok kebianiba i am osa damib osa eka biem ay kamwal isa eka i dabwal tlemin isa mikimwal tlemin isa eka i meme isa deibe haabinib biamo Gode yang kenea aywal isa biemwal isa inamin namn homon osa doyenea i afen smike doboniba amit nomabiobe. <sup>30</sup> Otane nakai wanita memalo funaniba Ni niniin sumobo ge fumbinimibi i niniino men anomabiobe. Eka nakai wanita funaniba Ni niniin blimobo ge fumbinimibi i niniino sum anomabiobo ge baabesebe.

## 20

*Tek waen dang dikmin nakai weng san-gobe.*

<sup>1</sup> Yesuse baabenea Gode nakaia unangai kimanin kukubo inaminobe. Tek waen damibo gosake Okok nakai maki mo dleb te daia ne dango diknemine genea boman tebuu kwitimib hananea monea <sup>2</sup> naka maki baabenea Ibo moniba ne dango diknemine! Ne wan kina nakae elekiem elekiem walamabibo ge baabesea i Ae, inanomabbiobo gesiba dlanea okok kem uniba e mo bia <sup>3</sup> kelanoa 9 kilokano kesoa monea imen wemin baan dim ye teme naka maki besa ye blib kesoa <sup>4</sup> isa baabenea Ibo moniba ne dango diknemine! Kwin tlamo ne ib okoko nabinim-ibo kinia moni osa ming inamin oyamabibo ge baabenea dlanea uniba e mo bia <sup>5</sup> kelanoa afoko te isak ewit tesoa imin motemea naka maki imin te blib kesoa yatemnea baabenea Ibo moniba ne dango diknemine! Kwin tlamo monio oyamabibo ge baabenea dlanea okok kem uniba e mo bia kwin tloa afoko delwab manoa 3 kilokanoa imin motemea naka maki imin te blib kesoa baabenea Ibo moniba ne dango diknemine! Kwinomo monio oyamabibo ge baabenea dlanea moniba e dango dikhabiba e mo bia <sup>6</sup> kwinoafoko dalang genoa 5 kilokanoa imin motemea naka maki imin te blib kesoa yatemnea baabenea Ibo nimin kenibta okok kemino deibonibta besa ye haablibe? gesea <sup>7</sup> i baabaniba Nakai ni okoko omyenamino blim kesota besa ye haabiobobo ge baaba-siba e baabenea Ibsa moniba ne dango

diknemine! Kwinomo monio oyamabibo ge baabenea dlanea moniba e damibo okok kem uniba e deibenea monea bib beba <sup>8</sup> amo kwino kesoa e okok kimanin nakae baabanea Kobo okok nakai nganabeneba tliba monio oyene! I tlaibo mubiang dlaia unibbuei sino ye oyaeb ole ye oyen oyen tatneba mikiktem dlaia unibbue ile abuko oyenanale ge baabasea nganabenea tliba <sup>9</sup> kwino dimo dlanea unibbuei nakae elekiem wan kina omyen omyen binea kikibesea eka <sup>10</sup> kwitimsa dlanea unibbuei yateniba funaniba I kwino dim dlane natlibbio kesota wan kina kebenebo niko kwitimsa dlanea monoba okok bioba afok smik homono blimanobio kesoa ni monio meseinoba homon olonomabbiobo gabib otane e isa moni sumo mo oyim blimobe. Isa wan kina omyen tlane kesoa <sup>11</sup> i damib gosake dobsuananiba <sup>12</sup> baabaniba Naka eli abuk teniba okok kebianiba afok smiko olokiem keibi moni ota wan kinabe. Nile kwitimib te okok keboba afok smiko homono blimanoa afoko ulanobbio otane kobo kwino tlibbu eli moni ota nisa oye-bobo ge baabasiba <sup>13</sup> eka damib gosake wentene okok nakae make baabanea Ne neko kobo wentene! Ne keb monio mo watlabkeim blimobe. Boman tebuo ne baabkenia Kobo monea ne dango diknemale! Ne wan kina walamabibo gesia kobo Ae genebbio kesoa ne wan kina omklibo, <sup>14-15</sup> kobo mo omebe! Nene moni kesoa ne okoko gwab okok kebibi monio sum oyang gamio kobo mo nemsuanemebe! Nene san eka nene bobol tem nabe. Keb monio oletneba am one ge baabasebo ge baabenea <sup>16</sup> Yesuse imin baabenea Gode nakaia unangai kimanang game dim osa inaminobe. E nakaia unangai mema bainobo ge blibi sin dloneta eka nakaia unangai sin bainobo ge bianiba e okoko okok kebin-abib ile mit dlonanamabe otane i inamin namn ole makob kimin dlomabiobo ge baabesebe.

*Yesuse kaanamabeo wengo imin baabesebe.*

*(Mak 10:32-34; Luk 18:31-33)*

<sup>17</sup> Nakaia unangai Yelusalem bib unebiba Yesuse e okok aleyemin nakai ilita dletneba bebianiba deib tamal deib baabene <sup>18</sup> Nibo utnoba Yelusalem bib ut unaobo naka maki Abilim Da Tlemin Naka ne nemoniba Gode amo kimanin nakai komokwal isa eka hekmel weng tekein kemn naka isa nemyensiba i baaniba Naka ele anaiba kaaneko ge baaniba nomoniba <sup>19</sup> Yudaba naka afeti nemyiba i ne weng dobo weng one bianiba tlane biam bianiba eka tek tebelo nebiama biniba atdimmo nemasa silo biki nenaiba kaania amo asu

kenia make dime imin hananamabibo ge baabesebe.

*Yemse biemo Yesuse baabanoa Ne memei mo komokwal anomabibo? ge baabasobe.*

*(Mak 10:35-45)*

<sup>20</sup> Omito Sebedi kamwali meleli asuei i awoko dletnoa tenoa Yesus esu ele tlanoa dlong dlong golbuanoa baabanoa Kobo ne inamin namino mo natnenamabebo? ge baabasoa <sup>21</sup> Yesuse baabonea Obo ne nimin ketneneko genebte? gesea o baabanoa Kobo bain wengo baatnenale! Sinanomo kobo komok sum anemeb dimo ne meme elisa komokwal aniba make keb biino kweital dae kikib ye tounea eka make afan dae kikib ye tounaneke gesoa <sup>22</sup> Yesuse enin sumo e dimo tlamabo fumbe kesoa e baabonea Obo ob weng olo mitmakamo mo tekein kebebba ge baabonea e Yemse Yone i dabo baabene Ib dabo ne kab aaye downomabie ib dabo mo sbal maniba downomabibo? ge baabesebe. Saa weng olo mitmakamo e enin kino watenea kaanamabeo ota baabesebe. I dabo baabaibo Ae nisa inanomabbiobo gesiba <sup>23</sup> e baabene Bainobe. Kab aay ele ne downomabie ib dab osa downomabib otane ne nakai mo dlakania baabeniba Nakae yeta komok anea ne kweile kweitale kikib ye tounamabebo, eka yeta komok anea kweile afane kikib ye tounamabebo genamin ole ne okokbabe. Ne Aye okokobe. E nakai sin dlakanea Ita inanibta toulanomabiobo genebiobo ge baabesea <sup>24</sup> e okok aleyemin nakai maki 10 i weng olo wenteniba Yemse Yone i dabo dosuansiba <sup>25</sup> Yesuse e okok aleyemin nakai alukum nganabeneas tesiba baabene Ib tekein kebiobe, Yudaba naka afeti i kukubo inaminobe. I komok sum ile nakaia unangai inamin namin okoko menga dlasam binabiobe. Eka naka sum ile nakaia unangai sbal weng oye bianiba Ibo inamin namino yota namine ge oye biam binabib otane <sup>26</sup> ibole kukub olo mo namibe! Nakae ib isak temo waneta komok anano gene mole e makob okok nakai ulab anea mak ibo daayemeko! <sup>27</sup> Eka ib isak temo waneta komok anangge mole e mak ib okok naka nete! <sup>28</sup> Abilim Da Tlemin Naka ne tlibu osa inaminobe. Ne mo tliba Nakaia unangai ne okoko okok kenemine genita tlim blimobe. Ne tenia nakaia unangai daabeniba atdimmo kaania nakaia unangai homoni hengmino walubenano genita tlibiobo ge baabesebe.

*Yesuse naka asunai kino tum gebenobua klaubesebe.*

*(Mak 10:46-52; Luk 18:35-43)*

<sup>29</sup> I Yeliko bibo deiboniba bebiba nakaia unangai homoni Yesuse dobsilebniba unebiba <sup>30</sup> eka naka asui kino tum gebenobua deib ken ye touna bliba nakaia unangai baaibo Yesuse te dotla unang gebo gesiba wenteniba ngambianiba Sumo! Komok sume Debite molofeit kobo ni dabo dohalilaneba daabenale ge ngansiba <sup>31</sup> nakaia unangai baabeniba Kimik geine ge baabeib otane i dabo temdeibeniba amdofa ngambianiba Sumo! Debite molofeit kobo ni dabo dohalilaneba daabenale ge ngambiba <sup>32</sup> Yesuse ma watananea nganabene Ib dabo ne fatnabeneko genibte? gesea <sup>33</sup> i baabaniba Sum kobo ni dabo kino klaubenale genobtabo gesiba <sup>34</sup> Yesuse dohalilane e kweilono i kin wat melebenea hebmamsab i dabi kino webiabenoa Yesuse dobsileb onsiobe.

## 21

*Yesuse makob komok sumi ulab anea Yelusalem bib onsebe.*

*(Mak 11:1-11; Luk 19:28-40; Yon 12:12-19)*

<sup>1</sup> I moniba Yelusalem bibo kikib ye angolime Olibe tababo bibo niniino Betfasi bib asak ye unaniba Yesuse e okok aleyemin nakai asu baabene <sup>2</sup> Ib dabo metniba bib meto temibta til dongki hatwali ye awoko omgi miine dogbi naibbiobo, tileiseniba dleb tline! <sup>3</sup> Inabiba naka maka ye te baabene Ibo fatnanibta dleb unom genibte? gene mole ibo baabaniba Sume okoksa kesota dlane tenobta dleb unom genobtabo ge baabaine! E hebmamsab tileiseneba baabene Dleb unine ge baabenamabebo ge baabesebe. <sup>4-5</sup> Yesuse inaseo sinanggwano e awoko mo dofaim blim bua Gode weng omkeimalin naka make Gode buk temo dolanea baanea Ibo Saion bib seli weng olo baabeniba Ib komok sume tebebo, atemine! E naka fiabobe. E ele untak nganin nakababe. E til dongki mene dim ut tounea tebebo ge baabeine ge baanea dolanebuo bain inasobe.

<sup>6</sup> Naka asu na eli metniba makob ele baabene unib inaniba <sup>7</sup> til dongki hatwali awok osa eka miin esa dleb tatniba Yesus esu tab teniba i youmo tibo gemeloniba til dongki mene dim ut donganaiba Yesuse utnea e dim ut tounea <sup>8-9</sup> nakaia unangai funaniba Yesuse komok sumobo geib kesoa maki youmo tibo gamfanabiba eka mak ile flim aan inamino heleb tenaniba Yesuse deib unamabe ye gunubiba Yesuse til dongki mene dim ut tounia debetnea biin tan dimo tama tamanea bebea nakaia unanga ile maki sin bebiba mak

ile Yesuse abuk dobsileb nabianiba ngambianiba Nibo komok sume Debite molofeit ele niniino dobtouleb nomo! E Sume niniin dim ota tlebo, Gode daabaneko! Nibo Gode niniino dobtouleb nomo ge ngan ngan bliba <sup>10</sup> metniba Yelusalem bib met temiba nakaia unangai bibo yo seli yateniba dlou unaniba baaibo Naka ele wanetane? gesiba <sup>11</sup> nakaia unangai Yesuse baka bianiba nganbebibi baabeniba Naka ele Gode weng omkeimalin nakae Yesus etabe. E Galili betano bibo niniino Nasalet bib ye daneta tlebo ge baabesiohe.

*Yesuse nakai Gode am sumo tem tamo inamin namino webibo fotebesebe.*

*(Mak 11:15-19; Luk 19:45-48; Yon 2:13-22)*

<sup>12</sup> Yesuse inanea tanea Gode am sumo daam tem tam unanea teme nakai inamin namino dleb teniba naka maki webianiba monio bokabib kesoa yatemnea fotebenea skila uniba eka mak ile tebolo kikib ye toulala bliba naka maki skeim da tlebibi Lom monio oleb teniba oyeniba Islel monio oise unebibi biin osa eka Gode heitdhamin wani o dimo toubianiba webib biin osa delabmabenea <sup>13</sup> baabenea Gode e buk temo baanea

Ne am sum ole ne beten kenemin amobo ge baanebu otane

ibo am olo misiam omkabiba o makob ayok henin nakai amo ulab anobo ge baabenea <sup>14</sup> e sma Gode am sumo daam tem tam bia nakai kino misiamu benobio isa eka skil misiam isa teteniba klayebea <sup>15</sup> Gode amo kimanin nakai komokwal isa eka hekmel weng tekein kemmin naka isa i Yesuse inamin namin ayamo nabeo watem nabianiba eka meme gwabi Gode am sumo daam tem tamo wengo ngambianiba komok sume Debite molofeite niniino dobtouleb blibo wente naniba atliaubesoa <sup>16</sup> i funaniba Meme eli ngambianiba Yesuse Debite molofeitobo ge ngambib olo misi-amobo ge funaib kesoa i Yesuse baabaniba Kobo weng olo ngambibo wentebebo? gesiba e baabenea Ae ne wentebibo, i klayam nabiohe. Niminbabe, Gode buk temo weng mako baanoa

God kobo naka ten isa unang ten isa meme gwab isa kukub ayam aleyebob kesoa i keb niniino kla kemtouleb bliobo genobiobo ge baabenea

<sup>17</sup> e Yelusalem bibo deibonea tabnea Betani bib tab aa unang genea tab onsebe.

*Yesuse ase ete baabanea Gatanale genea gatansebe.*

*(Mak 11:12-14,20-24)*

<sup>18</sup> E aan senoma boman tebea imin Yelusalem bib unano genea bebianea imen teb ansoa <sup>19</sup> temeasa ase ete deib ken ye bie kesoa atemnea Yame mo bali biameo walo downote genea temeta yame blim besa aanobbio kesoa atemnea baabanea Kobo yamo imino mo balinemebe ge baabanabea hebmamsab ye gatansea <sup>20</sup> e okok aleyemin nakai ateniba dlou unaniba baabaniba Ase ete fatnaneta hebmamsab gatanene? ge baasiba <sup>21</sup> Yesuse baabenea Ibo olo kla funaine! Ibo bobol temo asu funino deiboniba sbal maniba ne bainobo getnenib mole ibsa makob ne ase ete baabaia gatane ina bianiba eka inamin namin okoko mak osa namomabibo enaminobe. Galolim ele baabaniba Kobo hananeba daakneba aaye sole dang daak blelanale genimibo e bain inanamabebe. <sup>22</sup> Eka ibo ne bainobo geniba funaniba Gode bain titilsa kesoa ni inamin namino nabenamabebo ge funaniba Gode baabaniba Ni inamin namino nabendale ge baabanimibo e makob ilib weng baanimib inabenamabebo ge baabesebe.

*I Yesuse baabaniba Waneta kobo titil olo omkakebene? ge baabasiobe.*

*(Mak 11:27-33; Luk 20:1-8)*

<sup>23</sup> Yesuse inanea metnea Yelusalem bib met unanea tamnea Gode am sumo daam tem tam biane aleyebea Gode amo kimanin nakai komokwal isa eka Yudai naka gang isa teniba baabaniba Waneta baabkeneta Okok olo inanale ge baabkeneta kemane tlebbione? Eka waneta kobo titil olo omkakebeta okok olo klabebe? ge baabasiba <sup>24</sup> Yesuse baabenea Nesak ibo weng mako kil baabenamabibe. Ibo weng olo yang keib mole nesak baabenita Nakae yeta ne titil olo omneneta nemane tenita okok olo klabibo ge baabenano ge baabenea <sup>25</sup> eka imin baabenea Yone nakaia unangai aayo fuaye binebuo waneta e titilo omaneta dabane teneta fuaye binebione? God etia bleka naka itio? gesea i wenteniba i sinwalo obianiba Nibo baanoba God eta e titilo omaleta okok binebiobo genob mole e baabenea Ibo nimin kenibta e wengo mo bainobo geim blime? ge baabenamabebe. <sup>26</sup> Eka nibo baanoba Nakai titil ota e omkahabita okok kebinebiobo genob mole nakaia unangai wenteniba dosuananomabiobe. Niminbabe, i obianiba Yone Gode weng omkeimalin nakabo, God eta e titilo omkahabeta okok binebiobo ge obinabiobo ge baaniba <sup>27</sup> i Yesuse dim baabaniba Ni mo tekein kebobbabo gesiba Yesus esak baabenea Nesa mo baabenita Nakae yeta

ne titilo omkanebeta okok olo okok kebibo ge baabenimibabo ge baabesebe.

*Yesuse saa weng mako meme naka teni dim tounea baabesebe.*

<sup>28</sup> Yesuse Gode amo kimanin nakai komokwal isa eka Yudai naka gang isa imin baabenea Ne saa weng mako baabenamabio kla funaine! Naka make e memei naka teni asu bliba e monea hek esu unanea baabanea Memalo kobo moneba tek waen dango dikmale ge baabasea <sup>29</sup> miine baabanea Ne denamabio gesea deibanebua mitdanea ota monea dang olo dikbea <sup>30</sup> eka aalebe imin monea ningsak esak baabasea e baanea Ae ne inanamabio gene otane e mo moneta dikmin blimobe. <sup>31</sup> Waneta aalebe wengo wentubanebione? Hek eta bleka ning etio? gesea i baabaniba Hek etabo gesiba Yesuse baabenea Gode nakaia unangai kimanin bibo unemin osa inaminobe. Takis moni bokalin naka isa eka unangi tamano hengabib isa wanita hengmino deiboniba i bobol temo omoniba Gode omalaib ita ibo gaiseniba Gode kimanin bibo unomabiobe. <sup>32</sup> Niminbabe, Yone aa fuayemin nakae tenea kukub moloto ibo aleye biane baabenea Ib hengmino deiboniba Gode kukubo moloto wafunine ge baabene otane ibo e wengo mo wentenibta bainobo geim blimobe. Takis moni bokalin naka isa eka unangi tamano hengabib isa ile e wengo wenteniba bainobo geniba i hengmino deiboniba ibo yatemib otane ibo ib hengmino mo deibonibta e wengo mo bainobo geim blim kesoa ne bain baabeio bo ge baabesebe.

*Naka misiami tek waen damibo kima blibo saa wengobe.*

*(Mak 12:1-12; Luk 20:9-19)*

<sup>33</sup> Yesuse Gode amo kimanin nakai komokwal isa eka Yudai naka gang isa baabenea Ne saa weng mako baabenamabio kla wenteniba funaine! Naka make tek waen dango dikilanea sano dolinea ituo genea eka waen aaye bikilamomabib alange tome misiketoufanea klanea eka nakai amo o tem tam bianiba damibo kimanomabib amo asaalam genanea damib kimanin nakai baabenea Ibo damib olo kima bianiba okok kebiba tek waen yamo balinoa yamanomo! Deiloniba atosino ibo oleb une bianiba eka atosino nemi toune biam blibte ge baabenea e monea betan mak skeim ye bia <sup>34</sup> sinanoa funanea Enanoko tek waen yamo bali bianoa yaman toumobo genea e okok nakai maki dlaia moniba nakai damibo kima blib isu ye motemiba tek waen yamo weloniba nemio olutnenimibo olutne tline ge baabenea dlanea motemsiba <sup>35</sup> damibo

kima blib nakai yafuniba make ande dofaniba eka mak ele anaiba kaanea eka mak ele tom dum anaiba kaansea <sup>36</sup> damib gosake wentenea e okok nakai wekib homon dlanea motemiba isa imin sini nabeib inabesiba <sup>37</sup> damib gosake wentenea funaneo Ne miine dabaia motemameo i e wengo wentomabiobo genea dabanea moteme otane <sup>38</sup> damibo kima blib nakai atemniba i sinwalo baaniba Nibo naka ele ananoba kaaneko! Sinanomo naka ele aalebe kaanemeo inamin namin afobeingo eta olamabe kesoa nibo ananoba kaanebua sinanomo e aalebe kaanemeo inamin namino alukum nibta olomo geniba <sup>39</sup> afuniba dobbiaiba tanea sesa tam unea anaiba kaane biamo <sup>40</sup> damib gosake tlameo damib kimanin naka eli fatnabenamabene? gesea <sup>41</sup> i Yesuse baabaniba E tenea damib kimanin naka eli yananea kaaiba damib olo naka mak ita kima bianiba tek waen yamo balinoa yamanomo waaniba damib gosake okahamomabiobo gesiba <sup>42</sup> Yesuse baabenea Gode buk temo damibo gosake miine anaibbuo wengo baanoa

Am genalin nakai sbal as ele Misiamobo, temdeibanomo geibbu otane komoke baanea Yeye ibo sbal as ele isak amun ayamobo bikieine gesea i inaniba sbal as ele isak amun bikieiba nakaia unangai Sume okok olo naneo watemniba Klayamobo gabiobo genobuo

ibo kibinabib otane o mitmakamo mo tekein kebibbabo ge baabesebe. Yesuse saa weng olo oyebeo e bobol temo funanea Damib kimanin naka eli makob Yudai komokwal itabo ge fumbianeta baabesebe. <sup>43</sup> Inamin kesoa ne weng mako baabenamabi olo bainobe. Sinangwano Gode Yuda ibo dlakanea Ibo ne damibo kimaine genebu otane ibo klao mo kimain blim keib kesoa e omeisenea naka afeti kukub ayam wafu blib ita omia ita e damibo kimanomabiobo ge baabesebe. <sup>44</sup> [Eka Yesuse imin baabenea Nakai wanita sbal as ele dime yenano mole wa kengkeng manomabiobe. Eka sbal as ele dla daaknea naka make obbubane mole tualonea difib maman inanea ananea kaanamabebo ge baabesebe. Weng olo mitmakamo inaminobe. Sbal as ele Yesus etabe. Nakaia unangai e mo bainobo geim blim kenimib ile enin kino watemomabiobe.] <sup>45</sup> Gode amo kimanin nakai komokwal isa eka Felisi isa i Yesuse saa wengo baabeneo wenteniba tekein keniba Banita baabenebo geniba <sup>46</sup> Afunoba klabuto ge debeb unomo geib otane nakaia unangai Yesuse Gode weng omkeimalin nakabo gabib kesoa i

tolo toasiananiba deibasiobe.

## 22

*Fal sumo gabianiba nakae alelo omamabeo saa wengobe.*

*(Luk 14:16-24)*

<sup>1</sup> Yesuse saa wengo mako baabenea  
<sup>2</sup> Gode nakaia unangai kimanin bib unemino inaminobe. Komok sum make e miine alelo omamabe kesoa e fal sumo gabianea <sup>3</sup> e okok nakai dlanea moniba sino weng omfubenebio nakai baabeniba Ibo natline! Falo einobua tilanomabiobo ge baabeib otane i deib kesoa deibe tetemiba <sup>4</sup> eka komoke okok nakai maki debli isak baabenea Ibsak moniba baabeniba Komoke e miine alelo omamabe kesoa eil blumakau aweli yalanea eka mema eili waafeili yalo nanea ganebiobo, nibo motenoba downonomo ge baabeine ge baabenea dlanea moniba baabeib otane <sup>5</sup> i wengo yang ke baabenamino deibeniba ili okoko bobol ota funaniba make imen dang dikin unea eka make monea stuam okok kem onanea <sup>6</sup> eka mak ile komoke okok nakai dlanea tlibi yafuniba weng misiam oye bianiba yebib biniba kaaiba <sup>7</sup> komoke wentenea atliaubanoa e awa genalin nakai dlanea moniba e okok nakai yanubaibi yaloniba am aso ei tenebenasiba <sup>8</sup> komoke e okok nakai maki baabenea Ne falo gaibu otane nakai baabeniba Tliba falo tila downonomo geibio nakai misiam naib kesoa <sup>9</sup> ibo moniba deib deib ye haabianiba nakaia unangai yatemaibo baabe dleb tliba imena kulanao wembianoba ne miine alelo omeko ge baabesea <sup>10</sup> i moniba deib deibo hen haabianiba nakaia unangai ayam isa misiam isa homoni baa dleb motemniba imen unalin amo dinbianiba imena kulanao wembinibbiobe.

<sup>11-12</sup> Sino komoke e youmo memao kikibenea baabenea Ibo imeno downonom gaibo youm olo dlusa bianibta doweine ge baabenea kikibenebio kesoa tamnea imen unalin am tam unanea yatemem haabianea temeana naka make youme memae mo dubusanim blim kesoa atemnea baabanea Nek kobo fatnanebta youme memae dobklibue mo dubusa tlim blime? gesea naka ele weng blimane kesoa <sup>13</sup> e okok nakai baabenea Ibo naka ele afuniba e skila kweilao sayo gebaniba dobbianiba tanea bib tamo mililambio tem tam bianea enin kino sum wateme bianea memino sum memeko ge baabenebio ge baabene <sup>14</sup> eka Yesuse imin baabenea Ne saa weng olo baabeio ibo kla funaine! Gode komok sum ele ulabobe. E nakaia unangai homoni nganye bianea Ibo nesu tline ge nganyebea maki e wengo wentebib

ile e dlakanea abilim uto unomabiobo ge baabesebe.

*Komokwali komok sume Sisae monio olanamino wengo Yesuse baabasiobe.*

*(Mak 12:13-17; Luk 20:20-26)*

<sup>15</sup> Felisie Yesuse deibaniba moniba i sinwalo miniba Nibo Yesuse naatemoba e misiam yang kebene mole nibo kot kebanomo ge baa omfaniba <sup>16</sup> ili okok aleyemin naka mak isa Helote meletani mak isa i dlaiba moniba Yesus esu unaniba baabaniba Aleyemin naka kobo ni tekein kebuobe, keb wengo molot ota obianeba eka Gode wengo kla aleye biam binabeobe. Kobo mo fumbianebta Eli kimanin nakabe, eka elile kimanin nakababe gabinabebbbe. Kobo i wengo makob omkaye binabeb kesoa <sup>17</sup> kobo fatnangge fumbebe? Nib hekmel wengo mo baanoa Nib takis monio Lomo komoke Sisa eta olaline genobua bleka? Ni olaloma bleka deibanomo? gesiba <sup>18</sup> Yesuse i bobol tem funin misiamo tekein kenea baabenea Ibo dim omin sitalsabe. Ibo nimin kenibta ne naatemom genibte? <sup>19</sup> Ibo takis monio mo omeb tliba watemite gesea mako omeb teniba omsansa <sup>20</sup> e baabenea Monio dimo smik osa niniin osa buolo wanemie? gesea <sup>21</sup> i baaibo Komok sume Sisae e smik osa e niniin osa ota biobo gesiba Yesuse baabeneana Sisa emi biamo ema dlaniba eka God emi biamo ema dla naine ge baabesea <sup>22</sup> wenteniba dlou unaniba funaniba E baanea Ibo Gabman esa eka God esa i hekmel wengo kla wafu nanibte ge baabenebio ge funaniba deiba onsiobe.

*Nakai kaaniba imin hana tlomabibo weng sangobe.*

*(Mak 12:18-27; Luk 20:27-40)*

<sup>23</sup> Yudai komokwali maki niniino Sadyusiei fumbianiba Nakai afen smiki amit ninba kesoa kaanimibo imino mo hananimibbabo ge fumbinabib kesoa amo yo dimo maki teniba Yesuse baabaniba <sup>24</sup> Aleyemin naka kobo sinanggwano Mosese hekmel wengo baanea Naka make alelo omobie otane i kamo memei mo dlaim blim bianiba imake kaane mole e ning esak unang olo omonea memei dlaneko! Meme eli hek sume kaanebue memeobo genebio. <sup>25</sup> Eka ni weng mako baabkenomabbuo inaminobe. Ni bib seli nakai dabwal tlemini 7 bianiba hek sume alelo omobie otane memei mo dlaim blim bianiba kaanea omasea <sup>26</sup> eka wabman esak imin omobie otane esa memei mo dlaim blim bianea kaanea omasea eka ibwabman esak imin omobie kaanea omanasea eka nekel isak omobie kaan oma biniba alukum ye blimansiba <sup>27</sup> alel osak abuko ye kaananobiobe. <sup>28</sup> Sinanoa

kaaibbuei imin hana tlom gaibo am olo dimo unang olo waneta dabamabone? Niminbabe, i dabwalo 7 i alukum unang olo omo binibbiobo gesiba <sup>29</sup> Yesuse baabenea Gode buk tem weng osa eka e titil osa ibo mo tekein kebibba kesoa ibo tob tlim bianiba wengo yo afet ye obiobe.

<sup>30</sup> Sinanoa nakaia unangai imin hana tlaibo nakai alelwali imino mo dliba eka unang isa imakwali imin mo dlo nanimibbabe. I makob abiseli ulab aniba besa nomabiobe.

<sup>31</sup> Eka Gode buk temo nakai kaaniba imin hana tlomabibo wengo ibo kibinabib otane o mitmakamo mo tekein kebibbabe.

<sup>32</sup> Gode buk tem wengo Gode baanea Ne Eblaham esa Aisak esa eka Yekob esa i Sum netabo ge baanebiobo genobiobe. God ele nakaia unangai afen smike amit nine blim bianiba kulila binabibi Sumbabe. E nakaia unangai afen smike amit nine bibebie i Sumobe. Niminbabe, Eblaham esa Aisak esa Yekob esa i sin kaaibbio otane i afen smike amit nine bibebia imin hananomabib kesoa e i Sumobo ge baabesea <sup>33</sup> nakaia unangai e wengo wenteniba dlou onsiobe.

*Hekmel weng ayamo wengobe.*

*(Mak 12:28-31; Luk 10:25-28)*

<sup>34</sup> Sadyusiei Yesuse wengo wenteniba weng blim kesiba Felisiei yatemniba i sinwalo miniba weng obianiba <sup>35</sup> make hekmel wengo kla tekein kebe kesoa e baanea Neta Yesuse naatemamabibo genea e tenea Yesuse baabanea <sup>36</sup> Aleyemin naka kobo fatnamin hekmel weng ota hekmel wengo mako alukum gaisonobione? gesea <sup>37-38</sup> Yesuse baabanea Hekmel wengo dot ayamo enaminobe. Keb Sume Gode kla gobana bianeba keb bobol tem osa keb afen smik esa keb bobol tem funin osa alukum omoneba keb Sume Gode eleta omalale ge baanobio kesoa hekmel weng olo hekmel weng mako gaisonobiobe. <sup>39</sup> Eka weng mak osa makob inaminobe. Kobo kleb unaalo gobo bieb inaneba naka mak isa gobenale genobiobe. <sup>40</sup> Hekmel weng asu olo Mosese hekmel weng osa eka Gode weng omkeimalin nakai weng osa o mitobo ge baabasebe.

*Yesuse Felisiei baabenea Klaiste wanete? ge baabesebe.*

*(Mak 12:35-37; Luk 20:41-44)*

<sup>41</sup> Felisiei ye bliba Yesuse baabenea <sup>42</sup> Ibo Gode Dofakamin Nakae Klaiste wane molofeitobo ge fumbibe? gesea i baabaniba Komok sume Debite molofeitobo gesiba <sup>43</sup> Yesuse baabenea Sinanggwano Gode Dofakamin Nakae Klaiste dabalim olo mo tlim blimo dimo Gode Hobe bobol tem funino Debite omalea e buk Samo temo baanea Klaiste ne Sumobo ge oha bianea baanea

<sup>44</sup> Gode ne Sume baabanea Kobo ne kweile kweitale kikib ele toumbianeba inamin namino kima bieba sinanomone keb makaai alukum yalia i titilo blimanamabobo ge baabanebiobo genea

<sup>45</sup> Debite emaye Gode Dofakamin Naka ne Sumo ge one binebio kesoa ibo mo baanibta Ne Debite molofeit yetabo ge onemibe! Ne Debite molofeit eka e Sum nabo ge baabesea <sup>46</sup> i e wengo wenteniba weng blim keib kesoa i imin ohamino tosiananiba amit debiasiobe.

## 23

*Hekmel wengo aleyemin nakai kukubobe.*

*(Mak 12:38-39; Luk 11:43,46; 20:45-46)*

<sup>1</sup> Omito Yesuse nakaia unanga isa eka e okok aleyemin naka isa baabenea <sup>2</sup> Hekmel wengo aleyemin naka isa eka Felisiei isa i Mosese hekmel wengo tekein kebib kesoa <sup>3</sup> i hekmel weng olo ibo omkayemibo kla wentine! Ina otane i kukub namib ole ibo mo wafu nimibe! I weng homono omkaye bianiba lbo inaine! Inaine gabib otane imalo mo nabibbabe. <sup>4</sup> I kukubo inaminobe. I makob naka maki i okok nakai afobeing abilo bebeiba oleb bibib biamo i mo funanibta I afobeingo abil ye kiblib yole nibo daabenomo genimibbabe. I inamin namino imin oleb teniba tib buye binabibi ulabobe. I ibo baabeniba Inamin namino inaine genimib otane imalo mo daabenimibbabe. I inamin namin wengo imin baa omeh wat tibta tibta bianiba omkaye binabiobe. <sup>5</sup> I funaniba Ni inamin inamin kukubo alukum nanoba nakaia unangai yateniba ni niniino dotouleb nine geniba i futan gwaloniba Gode hekmel wengo dolaniba mako debelon dimo doginiba eka mak ole banonon dimo doginaniba eka i youmo keno eit ayamo teke tekeke oloniba bobubosiba gwalaketoufasoa Haabioba nakaia unangai yatemin geniba ina binabiobe. <sup>6</sup> Eka i imen sum unalin am tamo komokwali biino dimo toulalin osa eka Gode amo tem tamo nakaia unangai kin dimo biin ayamo dimo toulalin osa kla gobo binabiobe. <sup>7</sup> Eka i imen wemin baan dimo unaiobo funaniba Nakaia unangai ni yateniba oye bianiba Naka ayami ye tliobo ge oye biba eka naka mak ile ni baabeniba lbo ni aleyemin nakabo ge oye biam nine galin kukubo kla gobo binabiobe. <sup>8</sup> Ina otane nakaia unangai ibo Aleyemin nakabo ge oyemib mole olo misiamobe. Niminbabe, ibo alukum makobobe. Gode elekiem eta ib aleyemin nakabe. <sup>9</sup> Eka weng mak osa inaminobe. Ib Aye Gode



elekiem eleta abilim ut bie kesoa ibo dalalim naka make mo baabanibta Kobo ni Ayobo genimibe! <sup>10</sup> Eka ibo bliiba naka maki teniba baabeniba Kobo ni aleyebib kesoa kobo ni komokobo geib mole ibo tolobo geine! Niminbabe, Gode Dofakamin Naka ne nenekiem neneta ib komokobe. <sup>11</sup> Naka make ib isak temo sum anea kima bie mole esa makob okok naka anea ib okoko daabeneko! <sup>12</sup> Nakai i niniino omfufu binimibi Gode i niniino omabbubenamabebe. Eka nakai i niniino omabbu binimibi Gode i niniino omfabenamabebo ge baabesebe.

*Yesuse baanea Hekmel weng tekein kemim naka isa eka Felisie isa i dim omin sitalsabo ge baabesebe.*

*(Mak 12:40; Luk 11:39-42,44,52; 20:47)*

<sup>13</sup> Yesuse baabenea Hekmel weng tekein kemim naka ibsa eka Felisi ibsa kukub misiam ib dimo tam tlamabo kesoa klaine! Ibo dim omin sitalsabe. Naka maki Gode nakaia unangai kimanin bibo unom genabib otane ibo watabiobe. Ibmalo mo tam unomabibba kesoa ibo naka maki deib osa waise bliobe. <sup>14</sup> [Ibo kukub misiam ib dimo tam tlamabo kesoa klaine! Ibo dim omin sitalsabe. Ibo unang sasoni dim oye bianiba afobeingo oise une bianiba eka ibo funaniba Nakaia unangai ni yatemniba ni niniino dotoulebe nine geniba nakaia unangai kin dimo beteno teke beten kebiam binabib kesoa ibo enin kino sum watemomabiobe.] <sup>15</sup> Ibo ina binabib kesoa klaine! Ibo dim omin sitalsabo kesoa kukub misiam ib dimo tam tlamabobe. Ibo Si-ibo oletnoba aaye sole waanoba monoba skeim ye hem bianoba nakae mo debeb tenoba ni kukubo alebanomo ge obianiba moniba hen haabianiba naka make debeb teniba ib kukubo alehabiba tekein kenea ib kukub misiam gaisene kesoa ib sinwalo aseinin bib unomabiobe. <sup>16</sup> Ibo makob nakai kino tum gebenobua i naka maki deibo mo alebenomabibbai ulab kesoa kukub misiam ib dimo tam tlamabo klaine! Ibo i aleye bianiba baabeniba Naka maki inamin namino mako inanoma bianiba Gode am sumo niniino taisoniba baaniba Ni moton inanomabbiobo geib biamo sinanoa i mo inaim blim kenimibo ni baanoba Olo besabo gabinabob otane i tom golo oleb teniba inamin namim mako klaniba oleb taniba Gode am sumo tem tam olaibbuo niniino taisoniba baaniba Ni moton inanomabbiobo geib biamo sinanoa i mo inaim blim kenimibo ni baanoba Ibo weng awemo baaibbio kesoa weng olo mo deibonimibe gabinabuobo ge obinabiobe. <sup>17</sup> Kin misiam tob tinin gam ibo ne weng olo baabenimio kla funaine!

Nakai tom golo oleb teniba Gode am sumo temo toubibo ye kining ayam otane Gode am sum ole dot kining ayamobe. Nakai tom golo mo oleb teniba Gode am sumo temo tam oloaim blim kenimibo mo kining anomobabe. I oleb teniba Gode am sumo temo tam olaib kesota kining anobiobe. <sup>18</sup> Eka weng mak osa makob inaminobe. Ibo nakaia unangai aleye bianiba baaniba Naka maki inamin namim mako inanoma bianiba Gode heitdahamin biino niniino taisoniba baaniba Ni moton inanomabbiobo geib biamo sinanoa i mo inaim blim kenimibo ni baanoba Olo besabo gabinabob otane i inamin namino dleb taniba Gode heitdahamin biino dlabbuo olo niniino taisoniba baaniba Ni moton inanomabbiobo geib biamo sinanoa i mo inaim blim kenimibo ni baanoba Ibo weng awemo baaibbio kesoa weng olo mo deibonimibe gabinabuobo ge obinabiobe. <sup>19</sup> Kin misiam ibo ne weng olo baabenimio kla funaine! Nakai inamin namino dleb teniba Gode heitdahamin biino dim ut toubibo ye kining ayam otane Gode heitdahamin biino ole dot ayam kiningobe. I inamin namino Gode heitdahamin biino dimo mo dlabbuo blim kenimibo mo kining anomobabe. I Gode heitdahamin biino dim dlab kesota kining anobiobe.

<sup>20</sup> Inamin kesoa naka make Gode heitdahamin biino niniino taisoniba baanea Ne moton inanomabibo gene mole olo makob e Gode heitdahamin biino osa eka inamin namino o dim uto dlanebu osa o niniino taisoniba baanea Ne moton inanomabibo ge baanamabebe. <sup>21</sup> Eka naka make Gode am sumo niniino taisoniba baanea Ne moton inanomabibo gene mole olo makob e Gode am sumo niniino osa eka Gode ele am sumo temo tam bie e niniino osa taisoniba baanea Ne moton inanomabibo ge baanamabebe. <sup>22</sup> Eka naka make abilim uto niniino taisoniba baanea Ne moton inanomabibo gene mole olo makob e Gode biino niniino osa eka Gode biino olo toubie e niniino osa taisoniba baanea Ne moton inanomabibo ge baanamabebe.

<sup>23</sup> Hekmel weng aleyemin naka ibsa eka Felisi ibsa kukub misiam ib dimo tam tlamabo kesoa klaine! Ibo dim omin sitalsabe. Ibo tetan osa kumuk osa unin gwab gwabo mak osa 10 olminiba olok-imo Gode olaniba mako ibma unam binabibo kukub olo ayam kesoa ibo mo deibonimibe! Ibo hekmel weng olo ye wafu blib otane dot ayamo namine genobuo ibo mo wafu blibbabe. Kukubo dot ayam olo inaminobe. Kot kemim kukubo afet baka namimba olo unobio iwat namim kukub osa eka naka maki dohalila daabenamin kukub osa eka bainobo galino sbal man-

amin kukub osa otabe. <sup>24</sup> Ibo makob nakai kino misiamu benobua naka maki deibo mo alebenomabibbai ulabobe. Ibo hekmel wengo gwab gwabo fumbianiba kla ye wafu binabib otane ibo hekmel wengo sum ole mo fumbianibta wafu binabibba kesoa ibo makob naka make aaye dowa-nang gameo kinduaduae make aan tem daak bie bobolo funanea dobtlane otane eil blumakaue aan tem daak bie bobolo mo funaim blim deibanea e aa yeb baka dukgene unamabe ulabobe.

<sup>25</sup> Hekmel weng tekein kemini naka ibsa Felisie ibsa kukub misiamu ib dimo tam tlamabo kesoa klaine! Ibo dim omin sitalsabe. Ibo makob nakai aangketo tib olo fubawebib otane amun tem daako mo fubawemin blim deibo binabibo ulabobe. Ibo ib aal tib yota fuba bianiba klabib otane ib bobol tem iwat ole kukub misiamu ota kweki welubenobiobe. Ibo naka mak unang maki afobeingo ayok oise une bianiba eka Ninita ye biob ese gabinabiobe. <sup>26</sup> Felisie ibo makob nakai kino tum gebenobuei ulabobe. Mikiktemo aangketo amun tem daako kla ginggilaniba fuban-imib ota aangket olo ayam anamabobe. Ib bobol tem osa makob inaminobe. Kukub misiamu ib bobol temo bibebio yo deibon-imib ota ayam anomabiobe.

<sup>27</sup> Hekmel weng tekein kemini naka ibsa eka Felisie ibsa kukub misiamu ib dimo tam tlamabo kesoa klaine! Ibo dim omin sitalsabe. Ibo makob nakai haam gloutemo eito kiwe bianiba eka aketo doli biam bianiba funaniba Olo dot ayamobo gabib otane dabal tem daako ono kweki welo bianoa aala dimao klaambianoa kumbinabo ulabobe. <sup>28</sup> Nakai ib lotu kemini kukub osa eka ib aal tib osa yateme bianiba funaniba I naka molotobo gabib otane ib bobol tem daak ole dim omin kukub osa eka inamin namin hengmin homon osa kweki welubenobiobe.

*Yesuse hekmel weng tekein kemini naka isa eka Felisie isa baabenea Ibo enin kino watemomabiobo ge baabesebe.*

*(Luk 11:47-51)*

<sup>29</sup> Hekmel weng tekein kemini naka ibsa eka Felisie ibsa kukub misiamu ib dimo tam tlamabo kesoa klaine! Ibo dim omin sitalsabe. Sinanggwano Gode weng omkeimalin nakai kaaiba dleb moniba tom temo dokam binibbuo memalo ibo tom mako oleb moniba olaniba baaniba Ni naka eli bobolo mo dokobenomone gabianiba eka nakai kukub moloto nabinibbuei gloutemo eito kiwe bianiba <sup>30</sup> baaniba Sinanggwano nib faninwali naka eli yebinibbuo nita inanoba biaobo mo inanobta yenanomobbabo

gabinabiobe. <sup>31</sup> Ibo baaniba Nakai Gode weng omkeimalin nakai yebinibbuo yei ni faninwalobo gabib kesoa i molobsel ibo makob i bobol temsabe. <sup>32</sup> Ib faninwali Gode weng omkeimalin nakai yemin kukubo kiloniba nam tlibbuo i molofetwal ibsak makob kukubo yota wafu bianiba nabinabiobe. <sup>33</sup> Ibo kukub misiamu namin nakabe. Ibo makob inab misiamu nakai yantumuna binabibi ulabobe. Ibo mo funanibta Gode ni kukubo klanang gameo dimo e ni mo dlaneta aseinin bib unomabbiobabo genimibe! Yeye aseinin bib unomabiobe. <sup>34</sup> Ibo inamomabib kesoa kla wentine! Ne Gode weng omkeimalin naka isa eka tekein kemini naka isa eka Gode wengo aleyemin naka isa dlaia moniba ibsu natliba ibo maki yenaiba kulilaiba eka mak ile atdimu dlasaniba silo bikiniba yebianiba eka mak ile Gode amo tem tam yafuniba tek tebeloniba yemdeiba uniba kambliiba moniba bib mak bib mak ye haabliiba kan haanomabiobe. <sup>35</sup> Ibo inamomabib kesoa Gode ib kukub misiamu weng kenamabebe. Sinanggwano ib faninwali naka homoni kukub moloto nabibi yebinibbiobe. Mikiktemo Kene e ninge Ebele naka molot otane e ananea kaanabea eka ib faninwali nakai kukub moloto nabibi yem wat yem wat tebiama biniba teniba Belekaiae miine Sekalaiae Gode am sumo tem tamo Gode heitdahanin biino kikib ye mabia esa ananaibbio kesoa <sup>36</sup> Gode yang kenea i molobsel ibo yeneana enin kino omyamabebe. Ne bain baabeibo ge baabesebe.

*Yesuse Yelusalem bib seli dohalilasebe.*

*(Luk 13:34-35)*

<sup>37</sup> Yesuse baanea Ayoo! Yelusalem bib sel ibo ne dohalimbibe. Ibo Gode weng omkeimalin nakai yebiba kulila biam eka Gode dowan weng omkeimalin nakai dlabene tlaibo tom dum yenaiba kulila biam nabinabibo ne amitie ibo dolmina biania makob kakaluko memei belo tabab tem daako dlanao kima binabo inania Kimanano gabi otane ibo nesuo deitne bliobe. <sup>38</sup> Wentine! Ibo ne wengo mo wentaobbabo geib kesoa Gode ib bibo imino daabenamino deibenamabebe. <sup>39</sup> Ne ibo baabenamabibe, ibo imino ne mo natemomabibbabe. Otane sinanom ibo baaniba Sume naka ele dabane tle ele niniino dobtoule nomo genomabib o dim ota ne imin tlita natemomabiobo ge baabesebe.

## 24

*Yesuse baanea Gode am sumo watwat danamabobo gesebe.*

*(Mak 13:1-2; Luk 21:5-6)*

<sup>1</sup> Yesuse Gode am sumo temo deibo tanea bib tam bebea e okok aleyemin nakai teniba baabaibo Ele temale! Am sum olo dot ayamobo gesiba <sup>2</sup> e baabenea Ae am olo alukum ayam otane ne bain baabenam-abibe, i sinanoa am olo galanimibo tome elekieme mo deibaiba make dimo delab banamino blimobe. I alukum galafa dibiaiba unamabobo ge baabesebe.

*Yesuse baanea Bobol tem abilo tam tlamabobo ge baasebe.*

*(Mak 13:3-13; Luk 21:7-19)*

<sup>3</sup> Yesuse utnea amgolime Olibe golim ut tounabea e okok aleyemin nakai ilita teniba baabaniba Fatnamin dim ota kukub olo tam tlamabone? Fatnamin kukub ota sino tam tloa watemnoba tekein kenobta kobo tleba dabal ele blimanamabeo meb tesota namobe genomabbione? gesiba <sup>4</sup> e baabenea Ibo klaine! Naka maki teniba dim wengo oyem tlaibo ibo mo wentaibe! <sup>5</sup> Niminbabe, naka homoni teniba ne niniino taitneniba baaniba Ni Gode Dofakamin Naka nitabo ge oyebib naka homon unang homoni i wengo wenteniba bainobo galomabib otane ibole i wengo mo wentaibe! <sup>6</sup> Eka ibo wentebiba awao meb meb olo gembiba bil wengo tlem osa eka bib mak bib mako genan haabliba wengo tlem osa ibo mo wentenibta dlou une bianibta tosanimibe! Kukub olo tam tlamabo otane mubiang amo hebmamsabo mo tam tlamobabe. <sup>7</sup> Naka mit maki moniba mit maki tenaniba awa gembiam eka komok make meletani dleb monea komok make meletani tenaniba awa gembiam eka bib mak bib mako imeno blimana bianoa eka meimeie bib mak bib mako tlebiyam namabo <sup>8</sup> olo makob unango memei dlanang genoa enin kino watemamabo inaminobe. Kukub olo inanoa tam tlemabo otane ole besa kilonamabobe. Otane moton dam ole mitdata tam tloa enin kino sum watemomabiobe.

<sup>9</sup> Ibo ne niniino omkeimabib kesoa naka homon unang homoni bib mak bib mak seli ib alo tliyebua inayemom geniba yafu dleb moniba enin kino omkaye bianiba yebiba kulilamabiobe. <sup>10</sup> Am olo dimo naka homon unang homoni ne bainobo galino deibona bianiba eka naka maki i nekwali i sinwalo makaalasese bianiba alawali teniba alawali dleb moniba makaai doyiba yena sese bianiba <sup>11</sup> eka naka homoni dim wengo omkeimalin nakai teniba i dim omin wengo omkeimsiba nakaia unangai homoni i wengo wenteniba bainobo gabiam nabiba <sup>12</sup> kukub misiam homono tam te tam teno kesoa nakaia unangai homoni naka maki gobenin kukubo deibonomabib <sup>13</sup> otane nakaia unangai wanita

sbal maniba i bainobo galino amitie wafu tatniba mubiang amo tam tlamite Gode nakaia unanga eli dleb mo danea amit nomabiobe. <sup>14</sup> Ne bainobo galin nakaia unangai Gode nakaia unangai kimanamabe wengo omeh moniba bib mak bib mako alukum omkeimaiba nakaia unangai wentibta omito mubiang amo tam tlamabobo ge baabesebe.

*Enin kino watemomabib amo tam tlamabobe.*

*(Mak 13:14-23; Luk 21:20-24)*

<sup>15</sup> (Nakaia unanga ibo buk olo kinimibo kla funaine!)

Yesuse imin baabenea Sinanggwano Gode weng omkeimalin nakae niniino Daniele Gode buk temo dolanea baanea Sinanomo naka maki inamin namino mako bib amo watwat danamabo omeh teniba Gode biin awemo omfanomabiobo genebuo tam tloa ibo watemala <sup>16</sup> nakaia unangai Yudia betano blibo deiboniba hebmamsab skila ulaniba amgolim unine! <sup>17</sup> Am olo dimo naka make basalim tam biameo mo taneta am tamo afobeingo mo olamene! E hebmamsab blublu uneko! <sup>18</sup> Eka nakae waneta damibo bie mole e imino mo moneta e youme tibe dofane biamoe mo dabamene! E hebmamsab gilun uneko! <sup>19</sup> Eka unangi amunsa blib isa eka meme gwabsa isa ayoo, ne dohalimbibe. I hebmamsabo mo blublu unomabibbabe. <sup>20</sup> Mosee hekmel wengo baanoa Yuda ibo Gode singkalin amo dimo inamin namin okoko mo okok kemibe genobio kesoa ibo Gode nganha bianiba baaniba Inamin namin kukub misiam olo keb singkalin amo dimo mo tam tlamone ge ohamine! Eka am misiamo homanomo inamin namin misiam olo ib dimo tam tlamo ibo hebmamsabo mo unomabibba kesoa ibo olosa Gode nganhamine! <sup>21</sup> Am olo dimo nakaia unangai enin kino sum watememomabiobe. Sinanggwano Gode dabale mema klanebio dim osa eka mema dim olosa inamin enino mo tam tloa nibo watemin blimobe. Eka sinanomosa inamin enino imino mo tam tlamabobabe. <sup>22</sup> Enin olo tam tlanoo amit nomo nakaia unangai alukum blimanomabib kesoa Gode nakaia unangai dlakanebuei dohalilanea baanea Enin am olo hebmamsab blimanoko genamabebe. <sup>23</sup> Eka weng mak ole naka maki teniba baabeniba Ele temine! Gode Dofakamin Nakae imin tlebo genimibo ibo i wengo mo wentaibe! Weng olo dimobe. <sup>24</sup> Naka homoni Gode dlakanebio nakaia unangai bainobo galino misiam omfubenomo geniba teniba dim oye bianiba maki baaniba Ne Gode Dofakamin Naka Klaist netabo gesib eka maki

baaniba Ne Gode weng omkeimalin naka netabo gesib bianiba i inamin namin okok sumo klabianiba funaniba Nakaia unangai ni okok sum olo klamobo watemaibo ni bainobo gebenomabiobo geniba inamomabib otane <sup>25</sup> ne ibo weng olo sin baabeia wentib biamabo kesoa naka eli teniba inamibo ibo i wengo mo wentenibta bainobo genimibe!

<sup>26</sup> Inamin kesoa naka maki teniba ibo baabeniba Ele temine! Gode Dofakamin Nakae Klaiste imin tenea ibuantem ye biebo genimibo ibo i wengo mo wentenibta unai! Eka naka maki baabeniba Gode Dofakamin Nakae Klaiste am olo tem tam ayok toubiebo genimib osa ibo mo wentenibta bainobo genimibe! <sup>27</sup> Abilim Da Tlemin Naka ne tlang gamio abile heb-mamsab timin tilaing kenea belaneta tita nakaia unangai alukum natemomabiobe. <sup>28</sup> Abilim Da Tlemin Naka ne tlang gami osa makob wan tiami naniba noia wana i kaaibua fetango kunubesoa downom geniba tenabib inania tlia nakaia unangai natemomabiobo ge baabesebe.

*Sinanomo Abilim Da Tlemin Nakae tlamabebe.*

*(Mak 13:24-27; Luk 21:25-28)*

<sup>29</sup> Yesuse imin baabenea Enin sum olo blimanabua o abuko heb-mamsab afoko dalbinoa mililana bianoa eka alime dalbinanea awitnino datou tenabua eka abilim uto inamin namin sbalo fiba biam namota <sup>30</sup> Abilim Da Tlemin Naka ne tlang gamio nakai unangai dabalim olo blibi abilim uto temiba inamin namino mako tam tloa wateniba mebib ne ayung tem te tebiania Gode titil osa eka e titilo ayal inamin einobu osa omeb tlia natem nabiba <sup>31</sup> abisake make bigule sum obanea ne abiseli dlaia moniba dabale monea dene deneo Gode nakaia unangai dlakanebuei alukum dleb teniba minamomabiobo ge baabesebe.

*Ibo aso mako watemaibo funaine!*

*(Mak 13:28-31; Luk 21:29-33)*

<sup>32</sup> Yesuse imin baabenea Ibo aso mako watemaibo kla funaine! O keto balinomo wateniba funaniba O yamo balim tlang genota nanobo ge funanabib inaminobe. <sup>33</sup> Inamin kesoa inamin namin olo tam tloa watemaibo ibo tekein keniba Abilim Da Tlemin Nakae tlang geseta namobe geine! <sup>34</sup> Ne bain baabenamabibe, nakaia unangai dabalim olo mema ele blib eli molobseli mo kaa'im blim blihta inamin namin olo tam tlamabobe. <sup>35</sup> Abila dabalao blimanamabo otane ne wengo mo blimanomobabo, amit namabobo ge baabesebe.

*Naka maki Yesuse tlang gameo amo tekein kenamini blimobe.*

*(Mak 13:32-37; Luk 17:26-30,34-36)*

<sup>36</sup> Yesuse imin baabenea Naka maki ne imin tlang gamio amo tekein kenamin nakai blimobe. Abisel isa Gode miin nesa mo tekein kebobababe. Aye elekiem eleta am olo tekein kebebe. <sup>37</sup> Makob sinanggwano Noae bie dimo nakaia unangai naib binabo inania Abilim Da Tlemin Naka ne tlang gami osa inanamabiobe. <sup>38</sup> Noae siibe gembe dimo nakaia unangai dabalim kukubo goboniba Gode wengo Noae omkeimabeo omdibiha bianiba imena aayao wembianiba alelwali boka biam bliba Noae siibe genea tamnea siib tem tam une dim ole <sup>39</sup> aaye einea yaleb daak unea aaye downoniba kulilasib inania Abilim Da Tlemin Naka ne imin tlang gami osa inaminobe. Nakaia unangai Gode wengo omdibiha bianiba dabalim olo inamin namino bobol ota fumbibta ne tlamabibe. <sup>40</sup> Olo dimo nakai asu keniba dango dikbib biamo Gode mak eta dobonea make deibanamabebe. <sup>41</sup> Eka unangi asu keniba imeno ninibib biamo Gode mak ota omonea mako deibonamabebe. <sup>42</sup> E kukub olo inanamabe kesoa ibo waitne bianiba hembibte! Niminbabe, ib Sume tlamabe amo ibo mo tekein kebibbabe.

<sup>43</sup> Ne saa weng olo baabenamabio kla funaine! Am gosake tekein kenea ayok henin nakae tlamabebo gene mole e mo aa uneta ayok henin nakae teneta amo belan-eta afobeingo oisa unamabebebe. <sup>44</sup> Ibsa inaniba klaine! Abilim Da Tlemin Naka ne imin tlamabi amo ibo mo tekein kebibba kesoa klaniba waitne blihtane ge baabesebe.

*Saa weng olo okok nakai ayam esa misiam esa i wengobe.*

*(Luk 12:42-46)*

<sup>45</sup> Yesuse imin baabenea Nakae bobol tem funin ayam bianea e okoko ayam okok kebe naka ele inanamabebe. E kimanine baabanea Kobo okok naka eli kima bianeba imeno okayebembe ge baaba unebua <sup>46</sup> binea imin tetemea okok naka ele makob ele baaba unebio inabea atemameo e seinhamabebe. <sup>47</sup> Ne moton baabenamabibe, inaneme naka ele e kimanine baabanea Ne inamin namino alukum kebta kimanale ge baabanamabebe. <sup>48</sup> Otane okok naka misiam ele funanea Ne kimanin nakae heb-mamsabo mo tlamabebabo genea okoko debianea <sup>49</sup> okok nakai maki yebianea eka nakai aa misiamo wembib nakai bakanea imen osa aa misiam osa wembiam bianea <sup>50</sup> funanea Ne kimanin nakae memalo mo tlamabebabo ge fumbianea inabea

kimanin nakae tenea atemameo <sup>51</sup> ande dofanea dabanea monea bib misiamona nakaia unangai dim omin sitalsai tena bianiba enin kino sum wateme bianiba memin sumo memomabiobo ge baabesebe.

## 25

### *Unang souwali saa wengobe.*

<sup>1</sup> Yesuse e okok aleyemin nakai saa wengo mako imin baabenea Gode nakaia unangai kimanin kukubo inaminobe. Naka make alelo omang genea tlamabe kesoa unang souwali 10 i moniba Deib waisanoba deheb tlomo geniba damo oletniba moniba waisaibbiobe. <sup>2</sup> Asuke asuke make nai bobol tem funin blimobe. Eka asuke asuke make na ita bobol tem funin ayam nabe. <sup>3</sup> Bobol tem funin blim ile damo oleb unib otane klasin keto mo iba oleb unim blimobe. <sup>4</sup> Eka bobol tem funinsa ile damo oloniba klasin keto iba oleb na unibbua <sup>5</sup> i naka ele waisa blib otane e hebmmamsabo mo tlim blim bia i kinadububeso aala bliiba <sup>6</sup> ibalanoo naka maki ngam bianiba nakae alelo omamabe nakae tlebo, nibo motenoba unomo ge ngansiba <sup>7</sup> unang souwali wenteniba hananiba i damo klabe klabe bianiba <sup>8</sup> bobol tem funin blimi imio olo temiba klasino blimanoa kiminang go kesoa wateniba unangi bobol tem funin ayami baabeniba Ni damo klasino blimanoa kiminang genamobo ibmio mo sengeine gesiba <sup>9</sup> eka unangi bobol tem funin ayami baabeniba Yeye ni klasino nini kikib ese mak bio kesoa ni ibo mo sengeyomabbibobe. Ibo moniba stuam unaniba asitem walonibta iba oleb tline ge baabeiba <sup>10</sup> i walonam uniba eka nakae alelo omamabe nakae tlea unangi bobol tem funin ayami sin kla blib ile naka ele bakaniba taniba imeno downomabib am tam unaniba amisalo dounabiba <sup>11</sup> eka unangi bobol tem funin blim ile moniba klasino waloniba damo iba oletniba tetemibta amisalo dounibbio kesoa wateniba gong gong gabianiba alelo omamabe nakae baabaniba Kobo ni amisalo betelabeneba tam natlobte gesib <sup>12</sup> otane e baabenea Yeye. Ne bain baabenamabibe, ne ibo mo tekein kebibabo ge baabenamabe inaminobo ge baabenea <sup>13</sup> eka e imin baabenea Ibo weng olo fumbianiba eka ne tlamabio bobol osa fumbiam nine! Ne tlamabio ibo am osa afok smik osa mo tekein kebibba kesoa klaniba waitne bliibe ge baabesebe.

*Okok nakai kimanine monio kikibeseo saa wengobe.*

*(Luk 19:11-27)*

<sup>14</sup> Yesuse saa wengo mako imin baabenea Gode nakaia unangai kimanin kukubo inaminobe. Naka make amo deibonea betan mak unama bianea e okok nakai nganabenea tesiba baabenea Ibo ne am osa eka inamin namin osa kla kimatne bliibe ge baabenea <sup>15</sup> eka e okok naka eli kukub osa bobol tem funin osa kla tekein kebe kesoa make monio K5,000 olanea eka mak ele K2,000 olanea eka mak ele K1,000 olananea deibe unea <sup>16</sup> eka K5,000 o olan une nakae e moni olo hebbe olonea okok kebianea o blofet monio imin K5,000 olonabea <sup>17</sup> eka K2,000 o olan une naka esa e moni olo hebbe olonea okok kebianea o blofet monio imin K2,000 olonane <sup>18</sup> otane K1,000 o olan une naka ele e moni olo olonea dabale hakenanea ayok ilaak olanebua <sup>19</sup> sinanoa i kimanin nakae tenea baanea Tliiba monio klanomo gesea <sup>20</sup> K5,000 o olan unebio naka eta sin tenea baabanea Sum kobo keb monio K5,000 o onen unebbuo ne okok kebiania o blofeto imin K5,000 olibiobo ge baanea olminea K10,000 ansoa olansea <sup>21</sup> e kimanin nakae seinha bianea baabanea Kobo okok naka ayamobe. Ne okoko mako omklibu kobo klayam nabeb kesoa ne okok sumo omklamabibo, kobo ne okoko kimabieba seim bianobte ge baabasea <sup>22</sup> eka e abuko K2,000 o olan unebio naka esak tenea baabanea Sum kobo keb monio K2,000 o onen unebbuo ne okok kebiania o blofeto imin K2,000 olibiobo ge baanea olminea K4,000 ansoa olansea <sup>23</sup> e kimanin nakae seinha bianea baabanea Kobo okok naka ayamobe. Ne okoko mako omklibu kobo klayam nabeb kesoa kebsa ne okok sumo omklamabibo, kebsa ne okoko kimabieba seim bianobte ge baabasea <sup>24</sup> eka mubiango nakae K1,000 o olan unebio naka ele tenea baabanea Sum kobo ne keb kukubo tekein kebiibe. Kobo naka dleb kesoa naka maki inamin namino klabibo doise tlebianeba eka imen dango mo dolmain blim otane naka maki imeno weleise tlebiyam binabeb kesoa <sup>25</sup> ne keb tolo tosiانيا keb monio sma ele olaibua oleb tliibo gesea <sup>26</sup> kimanin nakae baabanea Naka misiam kobo blut bianeba okoko debiebo. Kobo baaneba E naka dleb kesoa naka maki inamin namino klabibo doise tlebianea eka imen dango mo dolmain blim otane naka maki imeno weleise tlebiyam binabebo gabeb otane <sup>27</sup> nimin kenebta ne monio moni bumin am temo mo olaim blime? Kobo moni bumin am temo olaeb biota mole o okok kebua blofet monio tlak unebota tenita olibo ge baabanea <sup>28</sup> e naka maki baabenea Ibo naka ele monio K1,000 olo oisaniba nakae K10,000 o oleb bie naka eta olaniba <sup>29-30</sup> eka naka ele dabaiba monea mililambio tem

ye bianea memino sum mebianea enin kino sum watememeko ge baabenea debeb unibbiobo ge baabenea eka Yesuse imin baabenea Gode nakae okoko oman temea e okok olo kla okok kerne mole e naka ele seinha bianea e okoko imin mesein kenea omalamabebe. Eka Gode nakae okoko gwab oman temea e okok olo mo okok kemin blim kene mole omeisanamabebo ge baabesebe.

*Abilim Da Tlemin Nakae nakaia unangai afet anamabebe.*

<sup>31</sup> Yesuse e okok aleyemin nakai baabenea Sinanomo Abilim Da Tlemin Naka ne titilo makob ayal inamin einobuo omona biania abiseli dlet nania tenia Komok Sum ne nene biino dim ye touia <sup>32-33</sup> nakaia unangai alukum teniba nesu ele minomabibo makob eil sibsib kimanin nakae nanea eil sibsibi dlonea kweile kweital dae dlonea eka eil gouti dlonea afan dae dlananabe inania nesa nakaia unangai afetania kweita sin dae dlania eka afan sin dae dlanania <sup>34</sup> eka Komok Sum ne kweile kweita sin dae blibi baabenia Ne Aye Gode ibo inamin namin ayamo daabenea omyebio kesoa ibo tlaniba bib unine! Sinanggwano dabale mema klane dimo bib olo klanea baanea lmbibo genebio kesoa ibo bib olo kimanomabiobe.

<sup>35</sup> Niminbabe, sino ne imen teb nebua ibo imeno oniba downonia bingabiobe. Eka aanteb nebo osa ibo aayo oniba doweibiobe. Eka ne bib mak da tlia ibo baatneniba Kobo ni am ele tele ge baatneniba ne tania ib am tam unibiobe. <sup>36</sup> Eka ne youmo blim biania aal keim blia ibo youmo doniba dlusaibiobe. Eka ne gambia ibo daatneibbiobe. Eka ne klabut am bli osa ibo teniba natem naibbio kesoa bib ayam ele bianiba amit nomabiobo ge baabesia <sup>37</sup> naka molot unang molot eli baatneniba Sum kobo fatnamin dim ota imen tebo kebota ni imeno doklobbione? Eka fatnamin dim ota aanteb kebota ni aayo oklobbione? <sup>38</sup> Eka fatnamin dim ota kobo bib mak da tlebta ni kemeb tanobta ni am tam danobbione? Eka fatnamin dim ota kobo youmo blim bianeba aal keim biebtia ni youmo doklobbione? <sup>39</sup> Eka fatnamin dim ota kobo gembetia ni daabkenobbione? Eka fatnamin dim ota kobo klabut am biebtia ni tenobta katemobbione? ge baatnenimibo <sup>40</sup> Komok Sum ne baabenia Bain ye ibo ne ningwala nengwalai niniin blimi daaye binibbuo makob neta daane binibbiobo ge baabenamabibe.

<sup>41</sup> Eka afan sin dae blib ile baabenia Gode ibo kukub misiam omyebe. Sinanggwano e ase amit einine klanea baanea Gululam esa

e meletan isa i as ele einomabiobo genebio kesoa ibo deitneniba aseinin bib unine! <sup>42</sup> Sino ne imen tebo nebo ibo imeno mo oniba doweim blimobe. Eka aa tebo nebo osa ibo aayo mo oniba doweim blimobe. <sup>43</sup> Eka ne bib mak dania tli osa ibo mo nemeb tanibta ib am tam daibta aa unim blimobe. Eka ne youmo blim biania aal keim blio ib youmo mo donibta dlusaim blimobe. Eka ne gembiania klabut am tam bli osa ibo mo tenibta daatneim blimobe gesia <sup>44</sup> i baatneniba Sum kobo fatnamin dim ota imen tebo kebianoa eka aa tebo kebiam biota ni mo oklim blim deibkenobbione? Eka fatnamin dim ota kobo bib mak da tlebta ni mo kemeb tanobta am tam daim blim deibkenobbione? Eka fatnamin dim ota kobo youmo blim aal keim biebtia ni mo doklim blim deibkenobbio? Eka fatnamin dim ota kobo gembetia ni mo daabkeim blime? Eka fatnamin dim ota kobo klabut am biebo ni mo daabkeim blim deibke nanobbio? gesiba <sup>45</sup> Komok Sum ne baabenia Bain ye ibo ne ningwala nengwalai mo daayemin blim kesoa ibo nesa mo daatneim blimobe, deitne unine ge baabenia <sup>46</sup> dlaia moniba enin kino amitie watememomabiobe. Eka naka molot unang molot ile dlaia moniba amit nomabiobo ge baabesebe.

## 26

*Komokwali baaniba Yesuse ananoba kaaneko gesiobe.*

*(Mak 14:1-2; Luk 22:1-2; Yon 11:45-53)*

<sup>1</sup> Yesuse weng olo aleyebeo blimanoo e okok aleyemin nakai baabenea <sup>2</sup> Ibo tekein kebiobe, am asuo blimanomo Yudai singkalin am sumo niniino Fasobao tam tola naka maki teniba Abilim Da Tlemin Naka ne nemeb moniba atdimo nemananiba nanaiba kaanamabibo ge baabesebe.

<sup>3</sup> Amo yo dim ota Gode amo kimanin nakai komokwal isa eka Yudai komokwal isa taniba Gode am sumo kimanin nakai i komok sume niniino Kaiafase am tam mibianiba <sup>4</sup> weng obianiba baaniba Nibo Yesuse ayok afu debeb monoba ananoba kaaneko geib <sup>5</sup> otane i funaniba Singkalin am dim olo inasoba nakaia unangai yateniba dosuam bianiba dleb weng oyemiobo geniba baaniba Nibo debioba singkalin amo blimansota mit afu debeb monobta ananomo gesiobe.

*Unang mako wel aaye Yesuse gabamon dime ibabasobe.*

*(Mak 14:3-9; Yon 12:1-8)*

<sup>6</sup> Yesus esa e okok aleyemin naka isa Yelusalem bibo deiboniba moniba Betani bib ye unaniba taniba Saimone am tam

onsiobe. Sino Saimon ele yayo kitdi bi-habinabo otane imin ayamu nanobiotabe. <sup>7</sup> Yesus esa e bekeb isa Saimone am tam bianiba imeno wembiba unang mako wel aaye tang ayame tom botole tem daak iba obeb tenoa Yesuse gabamon dim ut ibabasobe. Nakaia unangai wel aay ele walom gib mole monio sum walonabiobe. <sup>8</sup> O wel aay ele Yesuse gabamon dim ute ibabaso e okok aleyemin nakai wateniba omsuananiba i sinwalo obianiba O fatnanota wel aaye besa ye ibabanota sasalanone? <sup>9</sup> O wel aa ayam ele obeb monoa naka maki walanoa moni sumo olonoa nakaia unangai inamin namin blimi daabenamin ole fatnanota besa ye sasalanone? gesiba <sup>10</sup> Yesuse i bobol tem funino tekein ke-nea baabenea Ibo mo baanibta Unang olo misiam nanobo genibta omsuanimibe! O ne ayam natnenobe. <sup>11</sup> Nakaia unangai inamin namin blimi ibo amitie bekebe bliba daaye binabib otane nele ibo amito mo bekebe biamabibabe. <sup>12</sup> Unang olo wel aay ele ibatnenoa ne gloutemo klautnenobo ge baabesebe. (Kukub olo Yudai kukubobe. I nakai kaaniba dleb moniba dlanom gaibo wel aayo ibabenibta dokam binabiobe.) <sup>13</sup> Yesuse imin baabenea Ne bain baabenamabibe, nakaia unangai ne dowan weng ayam omeb moniba bib mak bib mako alukum omkayemom gaibo unang olo natneno biamo bobolo fumbianiba naka mak unang maki omkayemomabiobo ge baabesebe.

*Yudase baanea Ne Yesuse komokwali dobyamabibo gesebe.*

*(Mak 14:10-11; Luk 22:3-6)*

<sup>14</sup> Omito Yesuse okok aleyemin naka make, e niniino Yudas Iskeliote monea Gode am sumo kimanin nakai komokwal isu unanea <sup>15</sup> baabenea Ne Yesuse dobyamio ibo inamin namino fatnamin donomabibe? gesea i wenteniba tom silba monio 30 olansiba <sup>16</sup> oletnea monea bianea Ne Yesuse fatnabanita debeb monita komokwali dobyamabine? ge funmonsebe.

*Yesus esa e okok aleyemin naka isa i Fasoba imeno downsiobe.*

*(Mak 14:12-21; Luk 22:7-14,21-23; Yon 13:21-30)*

<sup>17</sup> Gode singkalin am sumo Yudai bleto yis blim unam binabibo o niniino Fasobao tam tloa Yesuse okok aleyemin nakai teniba Yesuse baabaniba Sum kobo ni imeno fatda funabobta kobo Fasobao downonale? gesiba <sup>18</sup> e baabenea Ibo ut-niba Yelusalem bib ut unaiibo nakae ne sino baabeibue atemaibo baabaniba Ni aleyemin nakae baanea Ne kaanamabio amo meb tlo kesoa nesa ne okok aleyemin naka isa ni singkalin amo imeno keb am

tam downomabbiobo genebo ge baabaine gesea <sup>19</sup> e okok aleyemin nakai moniba ele baabenebio inaniba singkalin amo imeno fusiobe.

<sup>20</sup> Kwinoa Yesus esa e okok aleyemin nakai 12 isa taniba am tam bianiba <sup>21</sup> singkalin amo imeno wembianiba Yesuse baabenea Ne wengo baabenamabi ole ib isak temo naka make ne nemeb monea komokwali nemia nananomabiobo gesea <sup>22</sup> i wenteniba i bobol temo Yebbabo ge tlaniba nakai elekiem elekiemi oha bianiba Sum kobo, netio? gesesesiba <sup>23</sup> Yesuse baabenea Ne blete halonia dis teme tubunia downang gamio e temna tubu downaob naka eta ne nemeb moneta komokwali nemyamabebe. <sup>24</sup> Abilim Da Tlemin Naka ne makob sinanggwan Gode buk temo baanobio inania kaanamabi otane nakae ne nemeb monea komokwali nemiamabe nakae ne dohhalimbibe. E ne kukub misiam natnenamabe kesoa Gode enin sumo e omalamabebe. E biemo dofanamino deibanobiota mole ayamobo ge baabesebe. <sup>25</sup> Nakae Yesuse debeb monea komokwali dobyamabe nakae Yudase Yesuse baabanea Aleyemin naka kobo netio? gesea Yesuse baabanea Kebmaye baa omkeimanebobo ge baabasebe.

*Yesuse e okok aleyemin nakai blet baka waen aa bakao oya downsiobe.*

*(Mak 14:22-26; Luk 22:15-20; 1 Kolin 11:23-25)*

<sup>26</sup> I inaniba imeno wembianiba Yesuse blete obonea Gode gangobo genea hanea e okok aleyemin nakai oyenea baabenea Olo ne damobo, ibo oloniba doweine ge baabenea doweib ole <sup>27</sup> eka waen aay esak obonea Gode gangobo genea obyenea baabenea Ele ne ilemobe. Ibo oboniba doweine! <sup>28-29</sup> Sinanggwan Gode moton wengo baanea Ne kaania ileme singania nakaia unangai hengmino omlabenamabibo genebuo ne bain inanamabibe. Ne baabenamabi ole ne waen aay ele dowe biamo imino mo doweim blim blia sinanoa ibte nete nanoba ne Aye kimanin bib uto minomob dim ota ne waen aay ele imin downomabibo ge baabenea obya doweib ole <sup>30</sup> ans mako nganananiba amo deiboniba ulaniba amgolime Olibe golim ut unom geniba onsiobe.

*Yesuse Fitae baabanea Kobo baaneba Ne Yesuse mo tekein kebibabo genamabeobo ge baabasebe.*

*(Mak 14:27-31; Luk 22:31-34; Yon 13:36-38)*

<sup>31</sup> I inaniba deib tamal deib bebianiba Yesuse e okok aleyemin nakai baabenea Memalo kwitimib olo dim ota ibo

alukum skila unaniba nenekiem deitne unomabiobe. Niminbabe, Gode buk temo ne weng sango baanoa Gode eil sibsibi kimanin nakae ananea kaanea eil sibsibi skila onon tlanomabiobo genobo <sup>32</sup> otane ne imin hanania sin monia Galili betan ye bebita ibo mit natlomabiobo ge baabesea <sup>33</sup> Fitae baabanea Mak iko ye deibkeniba skila unomabib otane ne mo deibke unamibabo gesea <sup>34</sup> Yesuse baabanea Ne bain baabkenamabibe, memalo boman tlamo kakaluke mo nganaim blim bieta kobo ne niniino omuatneneba baaneba Ne naka ele mo tekein kebibabo genamino asumatna kenamabeobo ge baabasea <sup>35</sup> Fitae baabanea I nib dabo asu keniba dleb moniba yenaiba kaanob mole ne keb niniino mo omuabkenimibabo gesea eka Yesuse okok aleyemin nakai mak isa alukum inangge baasiobe.

*Yesuse Getsemani damib ye bianea beten kebisebe.*

*(Mak 14:32-42; Luk 22:39-46)*

<sup>36</sup> Yesus esa e okok aleyemin naka isa i moniba damibo niniino Getsemani ye unaniba baabenea Mak ibole ele blibtane! Nele tania etale beten kenamabibo genea <sup>37</sup> e Fita esa Sebedie meleli Yemse Yone i dab osa dlonanea dletnea bebianiba e bobol temo dot misiamu basoa <sup>38</sup> baabenea Ne bobol temo ilum omfutnenoa kaanang genamibo, ibo ele blibte! Ibo inaniba biaibo mo aala unaiibe! Afen bianiba ne daane bianiba bobol tem ayam omkanebibte ge baabenea <sup>39</sup> e tanea meb ye dlong dlong baan bilbunea munung baan bilanea Gode baabanea Ay kobo Ae geneb mole ne bobol tem abilo omtlatnenale! Ina otane kobo ne bobol tem funino mo wafunebta nanemebe! Kleb bobol tem funin iwat nanale ge oha bianea beten kenea <sup>40</sup> hananea tanea teme e okok aleyemin nakai aala blib kesoa yatemnea Fitae baabanea Ne ele tania beten kebia afok smiko olokiem bliman olo ibo mo afen bianibta ne daanebibbabe. Ibo nimin kenibta hebmamsab aala blibe? <sup>41</sup> Ibo kin wayemino deiboniba afen bianiba Gode nganhbib mole Gululame dlananemo sbal manomabiobe. Ib bobol tem funin oko ye inanomo gabib otane naka dam ibta beitalo bliobo ge baabenea <sup>42</sup> e imin tanea beten kebianea Aalebe baabanea Ay kobo ne enin kin olo watemale geneb mole ne enin kin olo watemano gabi kesoa kobo kleb bobol tem funin iwat nanale ge baabanea <sup>43</sup> e imin teteme e okok aleyemin nakai sma ye kinadububebua aala blib kesoa <sup>44</sup> deibenea imin monea wengo sino baanea beten ke tle ota imin obianea beten kebea blimanoa eka <sup>45-46</sup> imin tanea e okok

aleyemin nakai baabenea Ibo sma ye aala bianiba singkabibo? Etemine! Abilim Da Tlemin Naka ne nemeb monea hengmin nakai nemiamabe nakae tle kesoa ibo hananiba isu unomo ge baabesebe.

*Nakai teniba Yesuse afu debeb onsiobe.*

*(Mak 14:43-50; Luk 22:47-53; Yon 18:3-12)*

<sup>47</sup> Yesuse weng olo oyebe dim ota e okok aleyemin naka make niniino Yudase Gode amo kimanin nakai komokwal isa eka Yudai komokwal isa naka maki baabeniba Ibo moniba Yesuse afu debeb tline ge baabesiba i bainata kwamao tubula binibbua dletnea tesiobe. <sup>48</sup> Sino Yudase naka eli baabenea Ibo ne natemebiba monia bukbuk gebai mole Yesuse ye bieta nabanamabibo, ibo afunibta ge debeb unine ge baabenebibo kesoa <sup>49</sup> e hebmamsab tenea Yesuse baabanea Aleyemin naka kobo ye biebo? ge oha bianea keneng wat bukbuk gahamsea <sup>50</sup> Yesuse baabanea Ne nek kobo inamin namino nanang geneba tlebo nanale ge ohamsea e afu debeb unomabib nakai teniba afusiba <sup>51</sup> naka make Yesuse bekeba bie bainate tobonea Gode amo kimanin nakai i komok sume e okok nakae ananang genea blelanea klon eta taisanea tesea <sup>52</sup> Yesuse baabanea Keb bainate imin ele mib tem tobbanale! Nakai bainat duma gembib mole naka maki teniba naka elisa bainat dum yanaiba kulilanomabiobe. <sup>53</sup> Ne funania Yang kenano gei mole ne Aye nganabaia e abisel homoni hebmamsab dlanea teniba daatnenomabib otane ne mo inanamabibabe. <sup>54</sup> Gode buk temo baanoa Naka maki teniba Gode miine afu debeb moniba anaiba kaanamabebo genobio kesoa ne Aye mo baabanamabibabe. Ne inai mole weng olo yamo mo balinamabobabo ge baabanea <sup>55</sup> omiito Yesuse e afu debeb unomabib nakai baabenea Ibo nimin kenibta bainat osa kwam osa tubulanibta tlibe? Ne ayok henin nakababe. Am obba ye bomanomo bomanomo ne Gode am sumo tem tamo toum biania Gode wengo aleye binabi otane ibo nafunamino deitne binabiobe. <sup>56</sup> Ina otane sinanggwano Gode weng omkeimalin nakai Gode buk temo ne weng sango baaniba Inamin namin mako tam tlamabobo geibbuo bain inanoa tam tlo kesoa weng olo yamo balinobo ge baabesea e okok aleyemin naka ni alukum wentenoba deibanoba skila unobbiobe.

*I Yesuse debeb moniba Yudai naka sumi dim onsiobe.*

*(Mak 14:53-65; Luk 22:54-55,63-71; Yon 18:13-14,19-24)*

<sup>57</sup> Nakai Yesuse afu debetniba moniba Gode amo kimanin nakai komok sume



niniino Kaiafase am tam unaniba hekmel weng tekein kemin naka isa eka Yudai komokwal isa alukum te minabibtabe. <sup>58</sup> Fitae Yesuse afu debeb bebib dimo dohsileb bebe otane mebo mo unim blimobe. Skeimsa ye biane kin ota atemem atememnea monea Gode amo kimanin nakai komok sume amo daam tem tam temnea awa genalin nakai ye blibo bekebe biane Yesuse inamin namino e dimo tam tlamotenite genea toubbia <sup>59</sup> Gode amo kimanin nakai komokwal isa eka Yudai naka sum isa Nakaia unangai baabenoba teniba Yesuse dim baabaniba e kukub misiamo yota nanebiobo geib mole ananoba kaaneko geniba baabeiba tliba hen monsis otane Yesuse inamin namin misiamo mo nanebiota atemin blimobe. <sup>60</sup> Naka homoni teniba dim ohamonsib otane i Yesuse kukub misiamo inanebio kesoa kaaneko genamin wengo mo baabeim blim kesiba deibenabiba eka nakai asu ita teniba <sup>61</sup> baabeniba Ni wenteboba naka ele baanea Ne Gode am sumo galafania genang gamio amo asumatna kenita genamabibo ge baanebiobo gesiba <sup>62</sup> Gode amo kimanin nakai komok sume hana manea Yesuse baabanea Kobo i weng ele okebib olo bain bleka dimo? Kobo nimin kenebta yang kenamino debiebe? ge baabase <sup>63</sup> otane Yesuse kimik gesea Gode amo kimanin nakai komok sume imin baabanea Ne Gode amit afen bie niniino taisai kesoa kobo moton baatnenale! Kobo Gode miin eka e Kemfakamin Naka kebta biaebo baatnenale gesea <sup>64</sup> Yesuse baabanea Bain ye baanebobe. Eka ne weng mako baabenamabibe, Abilim Da Tlemin Naka ne Gode titilsae e kweile kweitale kikib ye toubbinia ayung tem te tlia nate-momabiobo gesea <sup>65</sup> Gode amo kimanin nakai komok sume wentenea atliaubasoa ele youmo tububanea baabenea E baanea Ne Gode miinobo kebe kesoa e wengo misiamobe. Nibo kot kebanomabib nakai imino mo henomobe! Yesuse emaye Gode weng dobo weng baabanea ibmal osa wentib yotabe. <sup>66</sup> Ibo fatnangge fumbibe? ge baabesea i baabaniba E misiam nane kesoa kaaneko gesiba <sup>67</sup> i mimao kibi sine helaha bianiba eka kweilo miniba dibi dubu abianiba eka mak ile kweifam dum bing biangbua abiam bianiba <sup>68</sup> tlahi bianiba baabaniba Kobo baaneba Ne Gode Nemfakamin Nakabo genebbiobe. Kobo inamin namino alukum tekein kebeb kesoa naka ele waneta kananene? E niniino baabenale ge oha biam bisioibe.

*Fitae baanea Ne Yesuse mo tekein kebibabo ge baasebe.*

*(Mak 14:66-72; Luk 22:56-62; Yon 18:15-*

*18,25-27)*

<sup>69</sup> Fitae daam tem tam toubbia Gode amo kimanin nakai komok sume okok kehamin unango mako tenoa baabanoa Kebsa Galili nakae Yesuse bekeba binebiobo ge baabase <sup>70</sup> otane Fitae baabanea Ne ob wengo obeb yo ne mo tekein kebibabo gesea nakaia unangai alukum wente nasiba <sup>71</sup> Fitae deibe tanea amito kikib ye bia unang mak osak imin tenoa atemnoa nakai meb ye blibi baabenoa Naka ele Yesuse Nasalet bib sake bekeba binebiobo gesoa <sup>72</sup> Fitae Gode niniino taisanea baabonea Yeye Gode tekein kebebe, ne naka ele mo tekein kebibabo ge baabonebua <sup>73</sup> namonoo nakai esu meb ye mablibi isak baabaniba Keb wengo Galili nakai weng dikin mek kesoa bainoba, kebsa Galili nakabe. Yesuse okok aleyemin naka kebtabo ge baabasiba <sup>74</sup> Fitae Gode niniino taisanea baabenea Ne naka ele mo tekein kebibabe. Ne motono mo baabeim blim kei mole Gode nananamabebo ge baabenabea kakaluke ngansea <sup>75</sup> Fitae funanea Sino Yesuse baatnenea Kakaluke mo nganaim blim bieta kobo ne niniino omuatneneba baaneba Ne naka ele mo tekein kebibabo genamin asumatna kenamabeobo ge baatnenebiobo ge funanea daam temo deibo tamnea bib tam unanea biki dofanea mem wat mem wat onsebe.

## 27

*I Yesuse debeb moniba Failat esu onsiobe.*

*(Mak 15:1; Luk 23:1-2; Yon 18:28-32)*

<sup>1</sup> Glik gena Gode amo kimanin nakai komokwali alukum tenabiba eka Yudai komokwali tenaniba i Yesuse ananomabib wengo baaniba <sup>2</sup> e sayo gebaniba debeb moniba Failat esu onsiobe. Failate Lom nakabe. E komok anea Yudai kima bietabe.

*Yudas Iskeliote kaansebe.*

*(Abosel 1:18-19)*

<sup>3</sup> Yudase Yesuse komokwali dobyebuo wentebea i baaniba I Yesuse anaiba kaanamabebo gesiba wentenea aal waisasoa funanea Ne misiam naibiobo genea e tom silba monio 30 o imin oleb tenea Gode amo kimanin nakai komokwal isa eka Yudai komokwal isa baabenea <sup>4</sup> Yesuse kukub misiamo mo naim blim otane ne ibo doblia anaiba kaanamabe kesoa ne hengaiobo ge baabesea i baabaniba Kleb sanobo, ni sanbabo gesiba <sup>5</sup> Yudase moni olo Gode am sumo tem tam olbiabenea daaknoa biin daak unoa deibenea monea saye takaka tobginea gabame binane tam onsea menga tebetnea bumdei unang genea skomia dalo kaansebe. <sup>6</sup> Gode amo kimanin nakai komokwali moni olo

oloniba baaniba Moni olo olonoba naka walonoba ananoba kaanamabe kesoa nibo moni olo Gode am sumo monio temo mo olakanomobe! Inanob mole Mosese hekmel wengo baanoa mo inanimibe genobuo welanomabbioho geib kesoa<sup>7</sup> i sinwalo teka bianiba baaniba Nibo moni olo olonoba dabal ket klamin nakae baano mo walobbua bib mak da tlebibi kaanimibo dleb monoba dabal ele teme dolbumomo geniba<sup>8</sup> i moni olo oloniba dabal ele waliba nakaia unangai obianiba Dabal ele ilem dimobo ge oha binibbio kesoa nisa memalo inangge ohabuobe.<sup>9-10</sup> I inasibo Gode weng omkeimalin nakae niniino Yelemaiae wengo yamo balinobiobe. Sinanggwano Yesuse dabalim olo mo tlim blim bie dimo Yelemaiae Gode buk temo dolanea baanea

Islel teni baaniba Nibo tom silba monio 30 o olonoba naka ele walonoba ananoba kaaneko ge baaniba walibo ne Sume baatnenea Moni olo imin oleb moniba dabal ket klamin nakae baano waliobo ge baatnenebo ge baanea dolanebuo bain inasobe.

*Failate Yesuse kil ohamonsebe.*

*(Mak 15:2-5; Luk 23:3-5; Yon 18:33-38)*

<sup>11</sup> Yesuse komoke Failat esu ye bia komok ele Yesuse baabanea Kobo Yudai komok sum kebtio? gesea Yesuse baabanea Kebmaye baa omkeimanebobo gese<sup>12</sup> otane Gode amo kimanin nakai komokwal isa eka Yudai komokwal isa oha bianiba Kobo inamin namino misiam nanebbiobo ge ohabibo e mo yang keim blimobe. E kimik gene kesoa<sup>13</sup> Failate baabanea Kobo i weng olo okebibmo mo wentebaba bleka? Kobo ninim kenebta i wengo yang kenamino debiehe? ge baabane otane<sup>14</sup> Yesuse kimik gene kesoa komoke bobol tem hekhek fumbianea E ninim keneta yang kenamino kimik genehe? ge funasebe.

*I baaniba Yesuse anaiba kaaneko gesiobe.*

*(Mak 15:6-15; Luk 23:13-25; Yon 18:39-19:16)*

<sup>15</sup> Yuda ni kukubo inaminobe. Bifole elekiem elekieme dime Fasoba imeno downonom gaobo Lomo komoke nakai klabut am biaibo Yuda maki imaye baaniba Nakae yeta tileisaneba uneko genimibo e tileisanea onon binabibbua<sup>16</sup> olo dimo naka make niniino Balabase klabut am bia nakaia unangai e kukub misiamo tekein kebibbotabe.<sup>17-18</sup> Failate tekein kenea Yesuse kukub misiamo mo naim blim otane Yudai komokwali Yesuse okoko dafao ifananiba ge debeb teniba ne dim baatneniba Naka ele kukub misiamo nabinabebo ge baatneibobo gene otane

e funanea Nakaia unangai alukum ele miblib eli funin osa makob komokwali bobol tem fumbib ota isa fumbib bleka? ge funane kesoa i moniba Failat esu ye misiba e baabenea Ib bobol temo fumbib ole ne waneta tileisaneko gabibe? Balabas eta bleka Yesuse i Gode Dofakamin Nakabo ge nganhahib etio? ge baabesebe.

<sup>19</sup> Eka weng mak osa Failate kot kemin am tam toubbia e alelo wengo omfubanoa baabanoa Kobo naka molot ele inamin namin misiamo mo nabanemebe! Ne sintalo kwitimibo aambiania damo atemi sonoma ne bobol temo misiamut nebiobo ge baabasobe.

<sup>20</sup> Sino Gode amo kimanin nakai komokwal isa eka Yudai komokwal isa i nakaia unangai baabeniba Ibo Failate baabaniba Kobo Balabase tileisaneba unea Yesuse ele ananeba kaaneko ge baabaine ge baabesiba<sup>21</sup> komoke Failate nakaia unangai baabenea Nakae waneta ne tileisanita dobyane? ge baabesea i baabaniba Balabas etabo gesiba<sup>22</sup> Failate baabenea Otane Yesuse i oha bianiba Gode Dofakamin Naka etabo ge oha binabib nakae ne fatnabanamabine? gesea i baabaniba Atdimo dabasaneba silo biki ananeba kaaneko gesiba<sup>23</sup> Failate baabenea Ninim kenibte? E hengmin blim yole ne fatnanita inabanane? ge baabesea i weng sum ngambianiba Atdimo dabasaneba silo biki ananeba kaaneko ge ngambianiba<sup>24</sup> Failate wengo omabbubaib kesoa e funanea I ne wengo ombiatneniba awa genom genabiobo ge funanea aaye obonea kweilao fubanea baabenea Naka ele anaiba kaaneko ne sanbabo, ilib sanobo, ne kweilao fubai olo natem tekein keniba E sanbabo nini sanobo ge funaine ge baabesea<sup>25</sup> nakaia unangai alukum nganha bianiba Kobo ye deibenale! Ni obianoba kobo ananeba kaaneko gabob kesoa Gode naka ele molo yang kenea enino omyang game osa tenoa ni dim tena bianoa eka ni molofetwali dim onanamabobo gesiba<sup>26</sup> Failate wentenea e awa genalin nakai baabenea Mak ibo moniba Balabase klabut to tileisaniba dabaiba uneko! Eka mak ibole Yesuse tek dum ande dofaniba omito debeb moniba atdimio dabasaniba silo biki anaiba kaaneko ge baabesea inasiobe.

*Awa genalin nakai Yesuse debeb moniba tlahamansiobe.*

*(Mak 15:16-20; Yon 19:2-3)*

<sup>27</sup> Failate awa genalin nakai Yesuse debeb taniba Failate kot kemin amo daam tem tam daniba awa genalin nakai alukum esu ye mi deiboniba<sup>28</sup> e youmo gamketo-ufabaniba youm ileme komok sumi youme

ulabe tekebe doboniba dobtibilubaniba<sup>29</sup> eka isabuninge waloniba Hasobo geniba goholo geniba gabamone obtab bebananiba fonge tabaliba afunasea dlong dlong golbuaniba tlaha bianiba baabaniba Yudai komok sum kobo klayam biebo? ge oha bianiba eka<sup>30</sup> mima helaha biam bianiba ele fonge tebeisaniba gabamon dime binaha biam binib ole<sup>31</sup> blimanao deiboniba youm ele gamtlabaniba eka ele youmo imin olo kibaniba debeb moniba atdime dabasaniba silo biki ananom geniba debeb onsiobe.

*I Yesuse atdimo dabasaniba silo bikiba-siobe.*

*(Mak 15:21-32; Luk 23:26-43; Yon 19:17-27)*

<sup>32</sup> I Yesuse debeb bebiba naka make nini-ino Saimone e Sailini bib sakobe. E deib ye bia awa genalin nakai ateniba Yesuse ase obeisaniba eta meng meng te obaliba obeb bia moniba<sup>33</sup> bibilime niniino Golgota ut onsiobe. Golgota olo Hiblu wengobe. (Nib weng ole Naka Gabamon dikinobe.)<sup>34</sup> I inaniba utniba ye bianiba waen aaye enino watabenamin malasine yeb baka kweko klaniba obeb teniba obdibasiba nanta tenea Denomo gesea<sup>35</sup> deibaniba e youmo gemeisaniba doboniba atdime dabasaniba silo bikibaniba obo bikiniba e youmo oisaniba olaniba baaniba Elekiem ke dobo dofa bianoba tomo glim kimino olo tlan habinoba waneta gaiseneme debeb on debeb on binoba dleb onon tlanomo ge baaniba inaniba tlan habiniba<sup>36</sup> tlano bli-manole deiboniba ye touna bianiba Yesuse ateme bianiba<sup>37</sup> i weng mako dolaniba Yesuse gabam obeb ut da bie ut omginiba baaniba NAKA ELE YESUS ETABO, E YU-DAI KOMOK SUMOBO ge baaniba omgi deiboniba<sup>38</sup> eka ayok henin nakai asu dloniba make atdimo dabasaniba silo bikibaniba Yesuse kweile kweital dae bikiniba eka mak esak atdimo dabasaniba silo bikibaniba Yesuse kweile afan dae bikinaib-bua ye bliba<sup>39</sup> nakaia unangai teniba Yesuse dobtla uneka tleka bianiba aben giha bianiba weng dobo weng oha biam bianiba<sup>40</sup> baabaniba Kobo baaneba Ne Gode am sumo galafania amo asumatna kenya genamabibo genebbio kesoa kobo bain Gode miin biaebo kebmaye kleb skil daabkenota atdimo deibo daak tele ge oha biam nabiba<sup>41</sup> Gode amo kimanin nakai komokwal isa eka hekmel weng tekein kemin naka isa eka Yudai komokwal isa aben giha bianiba<sup>42</sup> baaniba E naka mak unang maki daaye binabe otane emalo ele skilo mo daabanamabebabe. E bain Isleli komok sum eta biameo emaye ele skil daabanea atdimo deibo daak tleta ni

atemnobta e bain Gode miinobo genom!<sup>43</sup> E Gode bainobo gabianea Ne Gode miinobo gabe kesoa Gode bain gobabie mole e memale daabaneko ge oha biam bliba<sup>44</sup> eka ayok henin nakai asuei atdimo dlasaniba silo bikibeibbue isa inaniba Yesuse weng dobo weng oha biam mon-siobe.

*Yesuse kaansebe.*

*(Mak 15:33-41; Luk 23:44-49; Yon 19:28-30)*

<sup>45</sup> Kelanoa afoko tenoa isak ewit tloa dabalim olo alukum mililanobio bita afoko delwab manota imin bomasobe.<sup>46</sup> O dimo Yesuse ngananea Eli Eli lema sabaktani? ge nganasebe. Weng olo Hiblu wengobe. Weng olo mitmakamo inaminobe. God kobo nimin kenebta deitne biebe? ge nganasea<sup>47</sup> naka maki meb ye maliibi wenteniba baaniba E Gode weng omkeimalin nakae, Ilaiyae, nganhabebo gabiba<sup>48</sup> make funanea Yesuse kwele gatou banebo genea blublu monea deibnamtab inamino omeb tenea waen aaye omabunea dikibasoa omonea atit bilanea omeb utnea Yesuse omdibaia dowoneko genea omalang genamonse<sup>49</sup> otane naka maki baabaniba Debieba atemnobte! Ilaiyae tenea silo ule tlabanea daak tlamabese makobo gesiba atemebiba<sup>50</sup> Yesuse imin amdofa ngana nabianea smike dabanea uea deibanea kaansebe.

<sup>51</sup> O dimo Gode am sumo tem tamo biin awemo youm teke amite dobdounibbue mutum ut danea blulu daakenea belanea balanea milim on on nanabea eka meimeie sume ye tlebianea tom beselibo klutaka biambua<sup>52</sup> eka ham gloutemo amito betanoa sino Gode nakaia unangai kulilabiba dolbu binabibi hananiba<sup>53</sup> ham gloutemo deiboniba tlebiane bliba Yesuse imin hana tle dim ole i moniba Yelusalem bib ye motemibta naka homon unang homoni yatemsiobe.

<sup>54</sup> Awa genalin naka isa eka i komokwal isa i ye bianiba Yesuse kima bliba dabale fiba bianea inamin namino tam tete tlano wateniba tosanianiba baaniba E bain Gode miinobo gesiobe.<sup>55</sup> Sino Yesuse Galili betano deibonea tebea unang homoni e inamin namino daabaniba bekeba tlib-buei Yesuse dofa blib isuo mebo deibeniba skeimsa ye mablib isa inamin namini olo tam tete tlano watemsiobe.<sup>56</sup> Unang eli maki niniin ole mako Maliao Magdala bib ulak otabe. Eka mak ole Yems esa Yoseb esa i biemo Malia otabe. Eka mak ole Sebedie meleli i biem otabe.

*I Yesuse debeb moniba tom teme dofa-siohe.*

*(Mak 15:42-47; Luk 23:50-55; Yon 19:38-42)*

<sup>57</sup> Monisa naka make niniino Yoseb etabe. Esa Yesuse okok aleyemin nakabe. E Alimatia bib sakobe. Kwinoa monea <sup>58</sup> Failat esu unanea baabanea Kobo Yesuse dame dobnene gesea Failate Ae gesea e awa genalin nakai Yesuse silo uleisaniba debeb teniba Yosebe dabaliba <sup>59</sup> e youme meklie tekebmine dobifane dime dofanea halbunea tete tlasoa ge <sup>60</sup> debeb monea ele tom teme dofasebu. E sino tom tem ele misiketoufanea klanebu otane hami sino mo dlaim blimobe. E inanea Yesuse tom ele tem dofanea tom kwame beselibe daisa daba daba debeb tenea amite dobdoubanea deiba onsebe. <sup>61</sup> Maliao Magdala bib ulako tem eka Malia mako Yems esa Yoseb esa i biemo tenaniba teniba tom ele kikib ye toula bliptabe.

*Awa genalin nakai gloutemo amit kinkin damibo toulabisiobe.*

<sup>62</sup> Bomanoa Gode singkalin amo inamin namino klabibo blimanoa Gode amo kimanin nakai komokwal isa eka Felisie isa moniba Failate baabaniba <sup>63</sup> Sum kobo dim omin naka ele sino baanea Ne kaania amo asu kenita make dime imin hananam-abibo genebio kesoa ni olo fumbuobe. <sup>64</sup> Kobo keb awa genalin nakai baabeneba i amito kima bliba amo asumatna bliman-sota deibaine! E okok aleyemin nakai teniba ayok debeb unaniba nakaia unangai dim baabeniba Emaye hana tebo gesiba mema dim omin weng olo danganoa sino gaisonomobo gesiba <sup>65</sup> Failate baabenea Ibo ibmaye ilib deibo toulalin nakai mo dleb mo daibta ilib obib inanibta kima-ine gesea <sup>66</sup> i moniba gloutemo amito asaalo douniba awem omfaniba nakai deibo toulaiba deibe onsiobe.

## 28

*Yesuse imin hanasebe.*

*(Mak 16:1-10; Luk 24:1-10; Yon 20:1-18)*

<sup>1</sup> Gode singkalin amo blimano sonoma Sande boman tebua Maliao Magdala bib ulak ote eka Maliao Yemse Yosebe i dab i biemo tenaniba Yesuse gloutemo wate-momo geniba tetemiba <sup>2-3</sup> meimei sume tlebiana dabale fibamsea tememoniba Sume abisake kibio makob ayal inamin eina bianea eka e youm namao makob ib inamino kinanea abilimo deibonea daak-enea tome amite dobdou unibbue daisa dabanea tanea ken tam unea e dim ut tounsea <sup>4</sup> deibo toula blib nakai ateniba e tolo tosaniniba tamameino sumo yalonoa

beitaloniba gluka tebeloniba daakniba da-balim daak blela bliba <sup>5</sup> abisake unang asu dabi baabenea Ibo mo tosaninimibe! Ne tekein kebibo, ibo teniba Yesuse at-dimo dabasa anaibbio naka eta hen tebib otane <sup>6</sup> e olo mo biebase. E makob sino baabenebio inanea hana unebe. Ibo teniba e dofa unibbuo biin alango wate-mine ge baabesea i taniba biino watemsiba <sup>7</sup> imin baabenea Ibo dabo hebmamamsab moniba e okok aleyemin nakai baabeniba E kaanebuo imin hananea sin monea Galili betan ye unebo, ibo monibta Galili betan ota atemine ge baabeine! Ne wengo bayotabo ge baabesea <sup>8</sup> unang asu dabi dlou unaniba Yesuse okok aleyemin nakai baabenobte geniba gloutemo deiboniba kla sein seiniba hebmamsab moniba <sup>9</sup> deib ye temiba Yesuse tenea hetananea baabenea Ibo ayam blibo? gesea i watniba e skilon wat afuniba e niniino dobtoulebe bisiba <sup>10</sup> e baabenea Ibo dabo mo tosaninimibe! Moniba ne nekwali baabeiba moniba Galili betan ye na tlanibta natemine ge baabenea deibe onsebe.

*Deib toulalin nakai wengobe.*

<sup>11</sup> Unang asu dabi mema bebiba deib toulalin naka maki sin moniba Yelusalem bib ye unaniba inamin namino tam tlo wengo alukum Gode amo kimanin nakai komokwali baabesiba <sup>12</sup> eka item Yudai komokwal item naniba miniba weng mako baa omfaniba awa genalin nakai moni sumo oyeniba <sup>13</sup> baabeniba Ibo baaniba Ni aala bioba e okok aleyemin nakai teniba e dame ayok debeb uniba deiba tlobobo geine! <sup>14</sup> Komoke Failate weng olo wente-nea ome mole ni baabanoba watanoba e kukub misiamo ibo mo nabenamabebabo ge baabesiba <sup>15</sup> awa genalin naka eli wenteniba ili baabeib inaniba monio oletniba uniba weng olo Yudai betano alukum balianobio kesoa mema dim olosa weng ota wafu bianiba obiobe.

*Yesuse e okok aleyemin nakai okoko omyensebe.*

*(Mak 16:14-18; Luk 24:36-49; Yon 20:19-23)*

<sup>16</sup> Yesuse okok aleyemin nakai <sup>11</sup> i moniba amgolime Yesuse sino baabenea Ibo moniba ye golim eta natline ge baabenebio ye motemiba <sup>17</sup> Yesuse bia atemniba e niniino dobtoulebe bisib otane mak ile funaniba Bain Yesuse kaanebu eta imin hananea bleka naka afet eso geniba bobol tem asusu na bliba <sup>18</sup> Yesuse baabenea Gode titilo alukum neta omne kesoa ne abilim ut osa dabalim olosa alukum kimaiohe. <sup>19</sup> Ne titilsa kesoa ibo moniba bib mak bib mako alukum nakaia unangai ne wengo aleyebiba i ne

okok aleyemin naka unang aniba Ay esa  
Miin nesa Hob esa ne niniin dimo aaye  
fuaye bianiba <sup>20</sup> eka ne wengo ibo omkaye  
binabio i alebeiba alukum wafuniba  
inamine! Ne amitie ibte nete nabioba  
dabale blimanamabe kesoa weng olo kla  
funine ge baabesebe.

## **Mak Dowan Weng Olo Make Dolanebuotabe. Tekein kemin wengobe.**

Yesuse atdimmo kaanea imin hananea ulanea abilim unebua bifolo 35 ese mak blimanota Make downan weng olo dolanebiobe. Make e niniin afeto Yon etabe. E aaleb kamwali dofaibbua damanea Yelusalem bib ye bianea Fita esa Fol esa i okoko daaye binebiobe. E weng olo Lom ten imi dolabenebiobe. Lom teni fumbianiba Inamin namin titilo klayamobo gabib kesoa e Yesuse okok sumo nabinebuo weng sango dolaibua weng olo wateniba Yesuse titilsabo geine geneta dolanebiobe.

*1:1-13 Mikiktem wengobe.*

*1:14-9:50 Yesuse Galili betano nakaia unangai daaye binebuo weng sangobe.*

*10:1-52 Yesuse Galili betan ye danea monea Yelusalem bib onseo weng sangobe.*

*11:1-14:9 Yesuse atdimmo dabasa ananomabib amo meb tebua e Yelusalem bib ye bianea okok kebinebuo weng sangobe.*

*14:10-16:8 Yesuse kaanebuo weng osa eka e imin hananebuo weng osa otabe.*

*16:9-20 Nakaia unangai Yesuse atemebiba ulanea abilim onseo wengobe.*

*Yone aa fuayemin nakae weng sangobe.*

*(Matyu 3:1-12; Luk 3:1-9,15-17; Yon 1:19-28)*

<sup>1</sup> Downan weng olo Gode miine Yesus Klaiste emaye downan weng ayamobe.

<sup>2</sup> Sinanggwano Gode weng omkeimalin nakae niniino Aisaiae Gode buk temo dolanea enangge baanea

Wentine! Ne downan weng omkeimalin naka ele dabaia sin monea ne wengo omkeimanae keb deibo klaubkenabeta kobole abuk mo temebta nakaia unangai keb wengo wentine! <sup>3</sup> Naka ele inanamabeo e ibuantem ye bianea ngambianea Sume tlamabeo deibo kebaniba klaubaine ge nganamabeo genebuo

<sup>4</sup> Yone aa fuayemin nakae bain inanea monea ibuantem ye bianea Gode wengo nakaia unangai omkaye bianea baabeneo Ibo hengmino deiboniba ib bobol temo deskina omoniba Gode omaliba ne aaye fuelabeia Gode ib hengmino omtilabeneko ge baabesea <sup>5</sup> nakaia unangai Yudia betano bib gwab bib gwabo blib isa eka bib sumo Yelusalem bibo blib isa alukum teniba Yon

esu ye miniba e wengo wente bianiba elekiem olokiem i hengmino omkeimabiba Yone aaye Yodane fuaye monsebe.

<sup>6</sup> Yone youme ayambabe. E til kameli dim ota klanea dubusanea eka hale eil blumakau i aale klanea tobonea kakame hawatibila gebianea eka e imen ole kweng kwablum isa eka manggeki un osa ota wembianetabe. <sup>7</sup> Eka e ina bianea downan wengo omkeima binebuo enaminobe. E baanea Ne sin tlibu otane nakae ne abuk tlamabe titilo ne titilo gaitnenamabebe. E Sumobe. Ne Sumba kesoa ne e mo ten-anobta wengo baanomobbabe.

<sup>8</sup> Ne ibo aaye fuayebi otane Yesus eta Gode Hobe ib bobol temo dababbenamabebo ge baabesebe.

*Yone Yesuse aaye fuelabasebe.*

*(Matyu 3:13-17; Luk 3:21-22)*

<sup>9</sup> Yone inanabea am olo olo dim ota Yesuse Galili betano Nasalet bibo deibonea tetemea Yone aaye Yodane fuelabasebe.

<sup>10</sup> E inanea fuelabane aatem daako deibo utenea sesa ele tlanea abilim uto temonea abile belanea Gode Hobe makob wan kubiamieie ulab daakenea Yesuse dim ele tleta <sup>11</sup> weng mako abilim ut danao baanoa Kobo ne miinobo, ne kla gobke biania seinkebibo ge baabasobe.

*Gululame Yesuse dabama temsebe.*

*(Matyu 4:1-11; Luk 4:1-13)*

<sup>12</sup> Weng olo inangge baabanabua omito Gode Hobe Yesuse debetnea monea naka blim ibuantem <sup>13</sup> eil halebi blib ye bia amo 40 o blimanso yo Gululame tenea Yesuse dabama tem dabama tem bise otane Yesuse Gululame wengo mo wentim blimobe. E wengo omdibihabea abiseli teniba daabasobe.

*Yesuse okoko mikiktemo Galili betan ye kilosebe.*

*(Matyu 4:12-17; Luk 4:14-15)*

<sup>14</sup> Yone wengo omkeima bianea baanea Helote misiam nanebiobo gesea Helote wentenea atliaubasoa awa genalin nakai dlane moniba Yone afu debeb moniba klabut am tam dasiba Yesuse weng olo wentenea monea Galili ye unanea Gode downan wengo omkeima bianea <sup>15</sup> baabeneo Memalo Gode nakaia unangai kimanamabe amo meb tlobo, ibo hengmino deiboniba ib bobol temo deskinaniba Gode omaniba Gode downan weng ayamo bainobo geine ge oyemonsebe.

*Yesuse nakai asuke asuke nai dlakasebe.*

*(Matyu 4:18-22; Luk 5:1-11)*

<sup>16</sup> Yesuse Galili aamuke ken tla bebianea teme Saimone e ninge Endlue i dabo aning yemin nakabe. I aameno

omoniba Galili aamuk ele aningi habi-aniba yebib kesoa yatemnea baabenea <sup>17</sup> Ibo ne beketneine! Ne alebeia tekein keniba makob memalo naniba aningi yaleb tlebib inaniba nakai dleb teniba nesu tlemomabiobo ge baabesea wenteniba <sup>18</sup> i aameno hebmamsab deiboniba bekeba bliba <sup>19</sup> mes unaniba Yesuse temeaa Sebedie meleli Yemse e ninge Yone i dabo weseme tem daak bianiba aameno bikinabib kesoa yatemnea <sup>20</sup> nganabesea isak inaniba weseme esa eka i ay esa e okok naka isa ye deibeniba Yesuse bekeba onsiobe.

*Yesuse naka make hob misiambe bekeba bie fotebebasebe.*

*(Luk 4:31-37)*

<sup>21</sup> I inaniba bekebaniba moniba Kabaneam bib ye bianiba singkalin amo dimo Yesuse tanea Gode amo tem tam unanea Gode wengo nakaia unangai aleye-bea <sup>22</sup> i e wengo wenteniba funaniba E dabalim naka otane e wengo hekmel weng tekein kemin nakai wengo ulabbabo, e wengo titsalobo geniba dlou onsiobe. <sup>23</sup> E ina bianea aleyebea naka hob misiambe bekeba bie Gode am tam bianea ngambianea <sup>24</sup> Yesuso, Nasalet bib sak kobo ni fatnabenamabebe? Kobo teneba ni yenanang genebta tlebo? Kobo ni mo yenanemebe! Deibenale! Ne tekein kebibo kobo naka kining Gode miinobo ge nganse <sup>25</sup> Yesuse hob misiam ele sbal weng baabanea Kobo kimik geneba naka ele deiba one gesea <sup>26</sup> hob misiambe naka ele deiba unang genea dabasam bianea weng sum ngambiam denea deiba unea <sup>27</sup> nakaia unangai alukum atemniba smiko deibe unoa i sinwalo obianiba E weng ele omkeimane yo mitmakamo fatnamine? E weng olo mema wengobo makob komokwali wengo ulab kesoa e hob misiami sbal weng baabenea e wengo wenteniba naka ele deiba uniobo ge omonsioebe. <sup>28</sup> Yesuse inanea e weng sango hebmamsab monoa Galili betano bib mak bib mak yo alukum onon tlasobe.

*Yesuse Fitae andloko gembua klaubosebe.*

*(Matyu 8:14-17; Luk 4:38-41)*

<sup>29</sup> Yesuse esa e bekeb isa i Gode amo deibo taniba bib tam helaniba taniba Saimone e ninge Endlue i dab i am tam unom genamsiba Yemse e ninge Yone i dabo ye tem naniba tamniba am tam unaniba <sup>30</sup> Fitae andloko kweimo webua gembianoa aambua i Yesuse baabaibo Fitae andloko ele gembianoa ambiobo gesiba <sup>31</sup> Yesuse tamnea osu tam unanea kweil gong wat wafunee omfaa nabea hebmamsab o kweimo gilubonoo o i imeno fubenoa downsiobe.

*Yesuse nakaia unangai homoni klaubesebe.*

<sup>32</sup> Kwinoaa afoko dawabbanoa bib sum yo seli nakaia unangai gembibi dlona bianiba eka maki hob misiami bekebe blibi dlonaniba dleb tenabiba <sup>33</sup> eka nakaia unangai amo meb meb ye blibi alukum teniba Yesus esu ele tenaniba amit deibo diniba walo bliba <sup>34</sup> e gembibi ginino klaye bianea eka hob misiami nakaia unangai bekebe blibi fotebesea hob misiami Yesuse tekein kebianiba E Gode Dofakamin Nakabo gabib kesoa i e niniino omkeimabanom genamsiba e baabenea Ibo wengo mo omibe, kimik geine ge baabesebe.

*Yesuse monea Galili bib mak bib mako Gode wengo omkeima bisebe.*

*(Luk 4:42-44)*

<sup>35</sup> E inaye binea ye aan senoma bomanole kwitimib hana utlanea monea naka blim ibuantem ye beten kebea <sup>36</sup> Saimon etem e nekwali i sinwal okok kebinabibi temnaniba Yesuse unebuo kan moniba <sup>37</sup> atemniba baabaniba Nakaia unangai alukum kobo hembioobo gesiba <sup>38</sup> e baabenea Nibo ile deibenoba bibo meb meb olota haanomo! Ne wengo isa omyang genita tlibiobo ge baabenea <sup>39</sup> e monea Galili betan olo bib mak bib mako haabianea Gode amo temo tanea Gode wengo omkeima bianea eka hob misiami bekebe blib nakai hob misiami fotebe naye biam bisebe.

*Yesuse naka make yayo klaubasebe.*

*(Matyu 8:1-4; Luk 5:12-16)*

<sup>40</sup> Yayo kitdibi habinabo nakae tenea Yesus esu ye ton ton golbua daak tounea tlabianea weng fiab omanea baabanea Sum kobo keb titilo sbal kesoa kobo daatnenemebo ne yayo ayamut nenamabobo gesea <sup>41</sup> Yesuse e kla dohalilanea kweil tobbia afunee baabanea Ae ne klaubkeia ayam anamabeobo ge baabanabea <sup>42</sup> hebmamsab e yayo kitdibi habuo blimanoa ayam ansebe. <sup>43-44</sup> E yayo inanoa ayamu basoa Yesuse baabanea Kobo naka maki mo baabenemebe! Kobo hebsamsab moneba Gode amo kimanin naka esu unaneba keb aalo alebaniba katemnea keb yayo ayamub kenobo genek! Moseshe hekmel wengo baanoa Keb yayo ayamub keno mole wani asu dloneba eka eil sibsibe dobo naneba dletneba moneba Gode amo kimanin naka esu ye temeaba e katemeaba kobo kulan eli dlaleba dlonea Gode dlalea nakaia unangai katemniba Keb yayo ayamub kenobo geine genobiobo ge baabanea dabaneaba onse otane <sup>45</sup> naka ele mo inaim blimobe. E monea Yesuse e yayo klaubaneaba weng sango baa omkeimaneaba bib mak bib mako

alukum balian tlano kesoa Yesuse bibo mo unim blimobe. E bibo une mole nakaia unangai homoni teniba ge dabanomabib kesoa e monea sesa naka blim ye bia nakaia unangai bib mak bib mako blibi teniba esu ye tlemonsioebe.

## 2

*Yesuse naka make skila kweilao dimilu banobua klaubasebe.*

*(Matyu 9:1-8; Luk 5:17-26)*

<sup>1</sup> Yesuse inanea naka blim ibuantem ye bia am mako ye blimanoa imin tenea Kabaneam bib ele tlea <sup>2</sup> nakaia unangai homoni wentiba Yesuse imin tenea ele bib tlebo gesiba wenteniba dli tete bianiba Yesuse amo diniba tam teniba amit osa din bliba Gode wengo omkayebea <sup>3</sup> eka nakai asuke asuke nai naka make skila kweilao dimilu banobua atge debeb tetemiba <sup>4</sup> nakaia unangai amo diniba biin deibo walo bliba i debeb taniba Yesus esu tam onamino tobtlin halib kesoa deiboniba debeb utniba amanalim ut unaniba Yesuse ele bie ut ye amano holo kenaniba naka ele glout baka sa da afu daba daba bliba daaknea Yesuse bie daak temsea <sup>5</sup> Yesuse i bainobo galino watemubenea skil misiam ele baabanea Ne miino ne keb hengmino omtlabkeiobo ge baabasea <sup>6</sup> hekmel weng tekein kemin naka maki ye toulu blibi wenteniba funaniba <sup>7</sup> Naka ele fatnamin naka bianeta Ne keb hengmino omtlabkeiobo gabene? E weng olo misiamobo, nakai naka maki hengmino omtlabenamino blimobo, Gode elekiem eleta nakai hengmino omketouyemin nakabo ge funsiba <sup>8</sup> Yesuse i bobol tem funino tekein kene kesoa baabenea Ibo nimin kenibta inangge fumbibe? Ib bobol tem funin olo misiamobe. <sup>9</sup> Ne ibo fatnamin weng ota baabeita ibo ne titilo tekein kenomabibe? Ne naka ele baabania Ne keb hengmino omtlabkeiobo gei mole ibo tekein keniba E wengo bainobo genomabiba bleka? Yeye kukub olo ibo mo tekein kenomabibba otane ne baabania Kobo hananeba keb glouto ometneba one genimi ota ibo kukub olo watem tekein keniba E bain titilsabo genomabiobe. Ina otane ne fumbio ibo tekein keine! <sup>10</sup> Abilim Da Tlemin Naka ne dabalim olo hengmino omtlabenamabio titilsa kesoa omtlabenamabibo ge baabene <sup>11</sup> e skil misiame baabanea Ne baabkenamabibo, kobo hananeba keb glouto ometneba moneba kleb bibam one ge baabasea <sup>12</sup> e inanea naka homon unang homoni kin dim ye hananea e glouto ometneba unea nakaia unangai ateniba dlou unaniba Gode niniino dobtouleb bianiba

obianiba ni inamin kukubo sino mo watem blimobo ge omonsioebe.

*Yesuse Libaie nganabasebe.*  
*(Matyu 9:9-13; Luk 5:27-32)*

<sup>13</sup> Yesuse imin aamuke ken tla metemea nakaia unangai homoni ye tetemsiba Gode wengo omkaye binea <sup>14</sup> metemea Alfiasie miine Libaie takis moni bokalin am tam toubianea monio bokabe kesoa atemnea baabanea Kobo ne beketne nale gesea e hananea okok olo deibonea Yesuse bekeba onsebe.

<sup>15</sup> Yesuse inanea Libaie dab moniba Libaie am ye bebiba takis moni bokalin naka homon isa eka naka homoni hengmin afeto nabianiba Yesuse bekeba haablib isa eka Yesuse okok aleyemin naka isa i alukum Libaie am ye mibianiba imeno unan monsiobe. <sup>16</sup> Felisiei maki hekmel wengo kla tekein kebiobe. I Yesuse atemiba takis moni bokalin naka isa eka naka maki hengmin afeto nabib isa bakanea imeno wembe kesoa atemniba e okok aleyemin nakai baabeniba E fatnanta takis moni bokalin naka isa eka naka maki hengmin afeto nabib isa i imeno baka wembene? gesiba <sup>17</sup> Yesuse i wengo wentenea saa weng mako baabenea Nakai gembibbai mo moniba dokta isuo mo unaibbabo gembib ita monibta dokta isuo unaibobo, ne tlibu osa inaminobe. Ne mo tenita naka ayam unang ayam ita daabeita bainobo geine geta tlibiobabo, ne tenia nakaia unangai hengmin gam ita daabeita i bobol temo deskina Gode omaline genita tlibiobo ge baabesebe.

*Sin kukub osa mema kukub osa o weng otabe.*

*(Matyu 9:14-17; Luk 5:33-39)*

<sup>18</sup> Yone aa fuayemin nakae e okok aleyemin naka isa eka Felisiei okok aleyemin naka isa i Gode niniino dobtouleb nom gaibo i imeno mo weminabibbabe. I hala bianiba Gode beten keha binabib kesoa am mak bomanoa naka maki teniba Yesus esu ele tlaniba baabaniba Yone okok aleyemin naka isa eka Felisiei okok aleyemin naka isa i imeno hala blib otane keb okok aleyemin naka ile fatnanibta imeno mo halaim blim blibe? gesiba <sup>19</sup> Yesuse wentenea e atdimo mo kaaim blim sma e okok aleyemin nakai tena blib kesoa saa weng mako baabenea Naka mabe alelo omang genea e nekwali baka biameo i imeno halanomabiba bleka? Yeye alelo omamabe nakae tena biaibo i imeno mo halanimibbabe. I seimbianiba wembiam biniba <sup>20</sup> sinanoa makaai alelo omang gabe nakae debeb uniba e kibi alang blim keneme o dim ota e nekwali bobolo ilum omfubenea imeno halanomabiobo



ge baabenea <sup>21</sup> eka saa weng mako imin baabenea Nakai youme meklie mo balonibta sin youme mo dababma bikinimibbabe. I inaniba fubanimibo mema youme gogolanea sin youme menga debeb tetenasea sum belanea misiam anamabebe. <sup>22</sup> Nakai eil memei aalo gato mo gwelelonibta waen aayo memao mo banimibe! Inaib mole waen aayo sitanoa eil aalo banoa waen aayo unamabobe. Nakai eil aalo mema ota waen aayo memao ibaine! I inanimibo eil aale mo belaneta waen aaye mo unamebabo ge baabesebe. Yesuse weng sang olo mitmakamo sin kukubo mo omo mema kukubo mo omo nata kwekonimibe geneta baabesebe.

*Singkalin amo okoko awem omkalin wengobe.*

*(Matyu 12:1-8; Luk 6:1-5)*

<sup>23</sup> Singkalin am bomabua Yesuse e okok aleyemin nakai dletnea wit dang tla bebianiba e okok aleyemin nakai wito yamo mako molaniba kwei tuba kikekaniba blongo gamdibiniba unan behiba <sup>24</sup> Felisiey yatemniba Yesuse baabaniba Nimin kenibta keb okok aleyemin nakai inabibe? <sup>25</sup> I nib hekmel wengo welaniba singkalin am otane i wit yamo molaniba kikekaniba blongo gamdibibib yole okok kebiobo gesiba <sup>26</sup> Yesuse baabenea Ibo sinanggwano nib fanine Debite nanebuo weng sango buk temo kibinabib otane o mitmakamo mo tekein kebobbabe. O dimo Abaiatae Gode amo kimanin nakai komok sum an bia Debit esa eka e meletan esa imen teb yemsoa Debite tanea Gode am sumo tem tam temea Abaiatae bleto Gode heitdaha bianiba toubibo olalea dowonea eka atosino e meletani oya downonasibo blet olo i awemobe. Nib hekmel wengo baanoa Gode amo kimanin naka ita unaline genobuo otane Debitwali downosiobo ge baabenea <sup>27</sup> eka e imin baabenea Mikiktemo Gode nakaia unangai klaneta mitdanea singkalin amo omfanebua nakaia unangai daabe biota singka binabiobe. E nakaia unangai mo klaneta Ibo singkalin amo daabueine geim blimobo ge baabenea <sup>28</sup> imin baanea E inanebuo Abilim Da Tlemin Naka ne titilsa kesoa Gode singkalin amo dimo ne baania Okok olo naine! Eka okok olo mo nanimibe genimio ayamobe. Niminbabe, ne singkalin amo kimaninobo ge baabesebe.

### 3

*Gode singkalin amo Yesuse naka make kweilone klaubasebe.*

*(Matyu 12:9-14; Luk 6:6-11)*

<sup>1</sup> Naka make kweilone debelabanebua Gode am tam bia Yesuse tanea Gode am olo tem tam tenea <sup>2</sup> naka maki ateniba fumbianiba Memalo Gode singkalin am kesoa nibo naka ele atemboba Yesuse klaubanea atemob mole kot kebanomo ge fumbiba Yesuse nakae kweile debelabanebue <sup>3</sup> baabanea Hananeba isak ele manale gesea e hananea masea <sup>4</sup> Yesuse nakaia unangai baabenea Nib hekmel wengo Gode singkalin am bomanomo fatnaine genobione? Kukub misiam namine genobua bleka kukub ayam namine genobuo? Nibo nakaia unangai daabenoba ayam aina bleka yanenoba kaaiono? gesea i wengo yang kenamino kimik gesiba <sup>5</sup> e al tliaubasoa yatemem haabinea temeta i bobol temo e wengo mo wentubanomobbabo gabib kesoa yatemnea e bobol temo ilum omfubanoa e naka ele baabanea Keb kweile tobtalonale gesea e inanea kweilone tobtalanea ayam banea <sup>6</sup> Felisiey atemniba hebmsamsab moniba Helote meletani baabenaniba baaniba Nibo Yesuse ananoba kaaneko gesiobe.

*Naka homon unang homoni aamuke Galilie ken ye minamonsiobe.*

<sup>7</sup> Yesus esa eka e okok aleyemin naka isa i bib olo deiboniba Galili aamuk unom geniba bebiba nakaia unangai homoni ye bekebena onsiobe. <sup>8</sup> Nakaia unanga eli maki Galili teman da te eka maki Yudia betan da te eka maki Yelusalem bib da te eka maki Idumia betan da te eka maki aaye Yodane milim sinda wato seli te eka maki bib sumo Taia bib esa eka Saidon bib esa o kikib meb meb ye bliibi tebib naniitabe. I Yesuse inamin namin okoko nabeo wengo wenteniba teterniba <sup>9</sup> Yesuse e okok aleyemin nakai baabene Naka homon unang homon eli gemaniba neketo watnenimiobo ibo weseme kla kima blipta inatnenom gaibo watnita weseme tem wat unano ge baabesebe. <sup>10</sup> E inangge baabeseo niminbabe, sino e naka homon unang homoni ginino klaubenebua kesoa ginin gami naka mak unang maki menganiba balaib wat minim minim bliiba teniba meletnenimiobo geneta baabesebe.

<sup>11</sup> Am obba ye bomano bomano yo nakaia unangai hob misiami bekebe bliibi Yesuse atemaibo dlong dlong golbua daak toulaniba ngambianiba Kobo Gode miinobo ge nganha binabibbua amo yo dim esa naka mak unang maki hob misiami bekebe bliibi teniba ateniba dlong dlong golbua daak toulaniba nganha bianiba Kobo Gode miinobo ge nganhamsiba <sup>12</sup> e i sbal weng baabenea Ibo naka maki

mo baabenibta Ne etabo genimibe ge baabesebe.

*Yesuse e okok dlasanin nakai 12 i dlakasebe.*

*(Matyu 10:1-4; Luk 6:12-16)*

<sup>13-14</sup> Yesuse naka maki dlakaibua ite netem nabianoba aleye biania dlaia Gode wengo ometniba moniba bib mak bib mako haabianiba omkayem haanine genea utnea bibilim un aneana nganabenea tesiba e nakai dlakanano gabei 12 dlakanea <sup>15</sup> hob misiami fotebenayemin titilo omye-nea <sup>16</sup> Saimone niniino afeto Fita ge nganabanea <sup>17</sup> eka Sebedie meleli Yemse e ninge Yone i dabo i niniino afet ole Boanesis ge nganabenesebe. Niniin olo mitmakamo inaminobe. Ame ngambinabe e memebe. <sup>18</sup> Eka mak ile Endlu esa Filib esa Batolomyu esa Matyu esa Tomas esa Alfiasa miine Yems esa eka Tadias esa eka Saimone Lom seli kimanin kukubo mo gobe binabeba naka esa <sup>19</sup> eka Yudas Iskeliote Yesuse komokwali dobyamabe naka esa ita dlakasebe.

*I baaniba Yesuse Bielsebule tena okok kebiobo gesiobe.*

*(Matyu 12:24-32; Luk 11:14-23; 12:10)*

<sup>20</sup> Yesus esa e okok aleyemin naka isa taniba am tam bebiba nakaia unangai homoni teniba ge dlaiba Yesus esa e okok aleyemin naka isa i imeno downamino debli-<sup>21</sup>ba Yesuse meletani wenteniba teniba Deheb unomo geniba tesio-be. Niminbabe, i wentiba nakaia unangai baaniba E weng misiam obianeta nabebo gesibtabe.

<sup>22</sup> Hekmel weng tekein kemn nakai maki Yelusalem bib daak daniba ut tibi i sinwal obianiba maki baaniba E Bielsebule bekeba bietabo gesiba eka maki baaniba E hob misiami komoko titilo omkahabeta hob misiami fotebenabebo genasiba <sup>23</sup> Yesuse wentenea nakaia unangai nganabenea teniba elesu ye tesiba saa weng mako baabenea Gululame fatnaneta ele skil fotebenamabene? <sup>24</sup> Betan mak seli i sinwalo imaye makaalaniba belalananiba awa genelom gaibo i titil blimanomabiobe. <sup>25</sup> Eka naka make meletani i sinwalo makaalaniba belalananiba awa genelom gaibo isa titil blimanomabiobe. <sup>26</sup> Ibo baaniba Gululame titil ota e omkahabeta hob misiami fotebenabebo gabib otane Gululam esa e meletan isa i makaalaniba belalananiba awa genelom gaibo i titil blimanomabiobe.

<sup>27</sup> Ne saa weng mako baabenamabio inaminobe. Gululame naka sbal kesoa ne besao mo tanita e am tamo mo unanita e afobeingo mo oisanimibabe. Mikiktemo ne e skila kweilao sayo gebanita omi to tanita e afobeingo oisanamabibe.

<sup>28</sup> Ne wengo moton baabenamabibe. Nakaia unangai hengmino henga bianiba Gode weng dobo wengo oha biam bianiba hengmin olo omkeimanimibo Gode omlabenamabe <sup>29</sup> otane nakaia unangai wanita Gode Hobe weng dobo wengo baabanimibo Gode i hengmin olo memalosa sinanomosa mo omlabenemebabe. Hengmin olo deibonea amit yebbaka sanomabiobo ge baabesebe. <sup>30</sup> Niminbabe, i baaniba Yesuse hob misiam bekeba bieta hob misiami fotebenabebo ge baasib olo i Gode Hobe weng dobo weng baabaib kesota e weng olo inangge baabesebe.

*Yesuse biem osa e ningwal isa i wengobe.*  
*(Matyu 12:46-50; Luk 8:19-21)*

<sup>31</sup> Amo yo olo dim ota Yesuse biem osa eka e ningwal isa teniba bib tam tlaniba weng omfubaniba Tele gesiba <sup>32</sup> naka homon unang homoni ge daba blibi baabaibo Etale temale! Keb biem osa keb ningwal isa teniba bib etale bianiba wengo baabkenom gabio-bo gesiba <sup>33</sup> esak yang ke baabenea Wanita ne biemwal eka ne ningwal nae? ge baanea <sup>34</sup> nakaia unangai ge dabaibbuei yateme bianea baanea Ele temine! <sup>35</sup> Nakaia unangai Gode wengo wentebib ita ne biemwal eka ne ningwal ne ningwal nabo ge baabesebe.

## 4

*Nakae wit sano damibo dibianebiobe.*  
*(Matyu 13:1-9; Luk 8:4-8)*

<sup>1</sup> Yesuse aamuke Galilie ken ye bianea aleyebea eka nakaia unangai homoni te ge dabaib kesoa e daaknea weseme make ye ofaibbue tem daak tounea naka maki dliba obaiba watnea aalang wat unea eka nakaia unanga ile aamuke ken ninin alim ye mabliba <sup>2</sup> e weng homono alukum saa weng oye bianea mako enangge baabene-<sup>3</sup>nea Ibo wentine! Naka make wit sano kon sano ulabo oleb monea damibo dibim haabianea dibia unea <sup>4</sup> wit sano mako dilbi daaknoa deib daak uno ole wani teniba doweibbiobe. <sup>5</sup> Eka mako dilbi daaknoa tome sume malanebua dabale tib ut gebanebue dim daak uno ole heb-<sup>6</sup>mamsab balbu utlobuo otane <sup>6</sup> dabale sumba kesoa kimkimo gibio tounoa afoko te isak ewit tlanoa fubonoo gatanobiobe. <sup>7</sup> Eka mako dilbi daaknoa aliam misiamo ningsao mitem daak uno ole aliam misiam baka balbi utlanoa ge omtembano kesoa o mo damanota yamo mo balinin blimobe. <sup>8</sup> Otane mako dilbi daaknoa dabale ayame dim daak uno ota ayam balbua utlanoa yamo bali bianoa mako 30 bali biam eka mako 60 bali biam eka mak ole 100 bali-<sup>9</sup>nanobio kesoa <sup>9</sup> nakaia unangai ne weng

olo kla wentomo gabibi kla funaine ge baabesebe.

*Yesuse kukubo saa weng ominobe.  
(Matyu 13:10-17; Luk 8:9-10)*

<sup>10</sup> Omito nakaia unangai homoni tlibbuei uniba Yesuse elekiem bia e okok aleyemin nakai 12 isa eka nakaia unangai e tena blib isa i baabaibo Saa weng olo mitmakamo baabenale gesiba <sup>11</sup> e baabenea Gode emaye weng ayok olo mitmakamo e kimanin kukubo ibo alebene otane nakaia unangai bainobo geim blim ile saa wengo olota wente bianiba o mitmakamo mo tekein kenomabibbabe.

<sup>12</sup> Inanomabib kesoa I kino tememomabib otane i inamin namino mo watemomabibbabe. Eka i wengo ye wentemomabib otane o mitmakamo mo tekein kenomabibbabe. I tekein keib mole i hengmino deiboniba Gode bobolo funaniba bainobo geiba e i hengmino omlabenamabe otane i mo inanomabibbabo ge baabesebe.

*Wit sano saa wengo mitmakam otabe.  
(Matyu 13:18-23; Luk 8:11-15)*

<sup>13</sup> Yesuse i baabenea Ibo saa weng olo mo tekein keim blim keib mole ibo saa wengo mako mo tekein kenomabibbabe. Ne saa weng olo mitmakamo alebenamabibe. <sup>14</sup> Wit sano dolinebio naka ele nakae Gode wengo ometnea bib mak bib mako haabianea omkayem haabie etabe.

<sup>15</sup> Mako dilbi daaknoa deib daak unobio yole o mitmakamo inaminobe. O makob nakaia unanga eli Gode wengo wentebiba Gululame tenea Gode wengo i bobol temo omketouye binabe otabe.

<sup>16</sup> Eka mako dilbi daaknoa tome dabal baka genebue dim daak unobio yole o mitmakamo inaminobe. O makob nakaia unangai Gode wengo wenteniba seimbib otane <sup>17</sup> i klao mo funa omabbaim blim keniba mema yota fun tlaniba nakai Gode wengo omabbubanomo gabibi teniba naka eli kukub misiamo omkayemsiba bobol tem abilo i bobol temo tam tlubenoa i Gode wengo hebmamsab deibonabib otabe.

<sup>18</sup> Eka mako dilbi daaknoa dabalim daak unanoa aliamo ningsao yebbaka bela utlobio yole o mitmakamo inaminobe. <sup>19</sup> O makob nakaia unangai Gode wengo wentebib otane dabalim olo inamin namino talo walin kukub osa monio sum olonite galin kukub osa eka inamin namino bobol wayemin kukub osa tam tenanoa i bobol temo Gode wengo omabbubenoa deibonabib otabe.

<sup>20</sup> Eka mako dilbi daaknoa dabale ayame dim daak unanoa yamo mako 30 balinoa

eka mako 60 balinoa eka mako 100 balinanobio yole o mitmakamo inaminobe. O makob nakaia unangai Gode wengo wenteniba wafuniba Gode daabenea e titilo omyenea maki e okoko sum okok kebib eka mak ile atosin ota okok kebib eka mak ile men okok kebiam blib itabo ge baabesebe.

*Ayalo saa wengobe.  
(Luk 8:16-18)*

<sup>21</sup> Yesuse imin baabenea I ayale mo ei ofanibta bakete obonibta obbubaniba eka biino kitem daako mo ofananomabibbabe. I keim ofaiba dukge tubunamabebe. <sup>22</sup> Inamin namino ayok biamo sinanomo keim anamabobe. Eka inamin namino nakai teilabbubo biaib osa keim anamabobe. <sup>23</sup> Nakaia unangai ne weng olo kla wentomo gabibi kla funaine ge baabenea <sup>24</sup> eka imin baabenea Weng olo wentibo kla funa omabbaine! Ibo inamin namino nakaia unangai okaye binib biamo Gode yang kenea inamin namino wekib mesein kenea doyamabebe. Eka ibo nakaia unangai kukub misiam omyib biamo Gode yang kenea kukubo dot misiamo ibo omyamabebe. <sup>25</sup> Nakai ne wengo wenteniba kukub ayamo wafunib mole Gode daabenea i bainobo galino sbal manomabib otane nakai funaniba Ni bainobo galino sbalobo ge funaniba i kukub ayamo mo wafunim blim keib mole Gode i bainobo galino omlabenamabebo ge baabesebe.

*Wit sano balbu damanobuo saa wengobe.*

<sup>26</sup> Yesuse imin baabenea Gode kimanin kukubo inaminobe. Naka make wit sano damibo dolinea <sup>27</sup> aalabea amo homono blimanoa wit sano bela damanomo e mo tekein kenamabebabe. O damano e mo tekein keim blim kesoa fatnanota belanota damanone? genamabebe. <sup>28</sup> Dabale ayam kesoa wit sano hebmamsab bela utlanoa damanoa dabo balina bianoa eka damo blong temte binano utlanoa sitanoa damo bobunoo sum anoa <sup>29</sup> sananota naka ele teneta welo oleb moneta am olanamabebo ge baabesebe.

*Mastet dabo saa wengobe.  
(Matyu 13:31-32; Luk 13:18-19)*

<sup>30</sup> Yesuse baanea Nibo fatnanobta Gode kimanin kukubo alebenobta inaminobo genomabbione? Nibo fatnamin saa weng ota baanobta o mitmakamo tekein kenomabibe? <sup>31</sup> O makob asiame niniino mastete dabe ulabobe. Mastet dabo dot keng kengobe. Makob fut dabo ulabobe. <sup>32</sup> Otane nakai e dabe dolinimibo bala utlanea damanea beselib anea as afeto gaisonabebe. E tunge beselib ifanea

dounebua wani teniba e tung dimo deito fakam binabiobo ge baabesebe.

*Yesuse wengo saa weng olota omkeima binebiobe.*

*(Matyu 13:34-35)*

<sup>33</sup> Yesuse nakaia unangai saa wengo homono omkeimana wentib mole saa wengo mak osa imin omkeima baabe baabe binebiobe. <sup>34</sup>E inamin namin wengo alukum saa weng olota oye binebiobe. E wengo keimo mo oyemin blimobe. Saa weng olota oye binebiobe. Ina otane ele okok aleyemin nakai ilita tena biaib ota wengo mitmakamo omkeimaneta weng olo mitmakamo inaminobo geneta aleye binebiobe.

*Yesuse glol sume baabanea desebe.*

*(Matyu 8:23-27; Luk 8:22-25)*

<sup>35</sup> Am olo dim ota kwinoa Yesuse e okok aleyemin nakai baabenea Nibo walanoba Galili aamuke milim sin da unomo gesea <sup>36</sup> i nakaia unangai ye deibeniba dli daakniba weseme Yesuse toubie ele tem daak temibole Yesuse temnaniba i weseme ele ye obetniba eka weseme afeto mako ye temnanao bebiba <sup>37</sup> glol sume te ye bianea aaye mousie halien tlebiana singa dibiana daaknea weseme tem daak unanea aaye weseme tem daake einang genabea <sup>38</sup> Yesus ele weseme kakam tem tab ye bianea filoe obonea gabame obanea aanebua e okok aleyemin nakai dofufu bianiba baabaniba Aleyemin naka kobo aaye weseme tem daak einea obeb daak unom genabob olole kobo mo tosiambabbay? gesiba <sup>39</sup> Yesuse hananea glol esa aaye mousi esa baabonea Denale gesea glole denea eka aaye mousie halien tlemino denasea <sup>40</sup> e okok aleyemin nakai baabenea Ibo nimin kenibta tosiambibe? Ib bainobo galino sma men bibebiobo gesea <sup>41</sup> i wenteniba kla tosiananiba i sinwalo baase baase bianiba baaniba Dowe! Naka ele fatnamin naka bieta glol esa aay esa o e wengo wentubanone? geniba bobol tem hekhek fun monsiobe.

## 5

*Yesuse naka make hob misiam bekeba bia fotebebasebe.*

*(Matyu 8:28-34; Luk 8:26-39)*

<sup>1</sup> Yesus esa e okok aleyemin naka isa inaniba watniba Galili aamuke milim wato Gelasa betan wat unaniba <sup>2</sup> Yesuse weseme tem daako deibonea daake bib ele tenabea naka make hob misiam bekebabia haam gloutem daanea tenea Yesus esu ele tetemsebe. <sup>3</sup> Naka ele haam gloutem ye aalam binabebiotabe. Naka maki e afu watanamino blimobe. Sen say osa

gebanamino blimobe. <sup>4</sup> Am homono dimo sen sayo tebeloniba skilona kweilonao gebanimibo kweilono seno wanea skilono seno tom dum waka biam binabe biotabe. E dot sbalobe. Naka maki e afunamino blimobe. <sup>5</sup> E tab dim osa kwino mo dim osa e haam gloutema bibilima ota binabebiotabe. E ina bianea weng sum ngam biam bianea tomo olonea e aalo manaka biam binabe bua <sup>6</sup> am olo dimo temea Yesuse skeim ye bie kesoa atemnea blublu tenea esu ele tlanea dlong dlong golbuasea <sup>7-8</sup> Yesuse baabanea Hob misiam kobo naka ele deibaneba one gesea hob misiam ele ngambiana Yesus kobo God Sume minobo, kobo ne fatnatnenamabebe? Gode niniin dim ota baabkeiobo, kobo ne enino mo omnaebe ge ngambea <sup>9</sup> Yesuse baabanea Keb niniino wangkekte? gesea e baabanea Ne niniino Homon netabe. Niminbabe, hob misiam ni homonobo ge baanea <sup>10</sup> eka e Yesuse baabanea Kobo hob misiam ni mo dlanebta monobta betan mako mo unaobe ge oha bianea <sup>11</sup> temea eil ami homoni meb bibilim ye wembib kesoa <sup>12</sup> hob misiami Yesuse baabaniba Kobo ni dlaneba watnoba eil emwali tem unomo gesiba <sup>13</sup> Yesuse baabenea Ae ibmaye unine gesea i naka ele deibaniba watniba eili tem wat temsiba eil homoni makob 2,000 i dlindeniba yolyoma daakniba yung dime geteisoniba dleb daaknoa aamuk daak blelaniba aaye downoiba kulilafaiba <sup>14</sup> eili kima blih nakai yateniba skilaniba dowan omeb moniba bib sum osa eka bib gwab gwabo bib sumo kikib meb meb ye bio yo sel isa alukum baaiba wenteniba Nakaia unangai monoba inamin namino tam tlo watemomo geniba <sup>15</sup> teniba Yesus esu ele tlaniba sino hob misiami homoni bekeba binibbio naka ele atemiba e youme dobo genea eka bobol temo kla funananea toubie kesoa atemniba tosiananabiba <sup>16</sup> eka nakai bib olo seli nakae hob misiami bekeba bliba fotebebane atemibo weng sang osa eka eili naibo weng sang osa naka mak unang maki alukum baabesiobe.

<sup>17</sup> Nakaia unangai Yesuse baabaniba Kobo ni betan olo deibeneba moneba betan afet one ge baabasiba <sup>18</sup> Yesuse bain inanea deibe daaknea weseme tem daak tounea unang genamsea hob misiami bekeba bliba fotebebane naka ele tenea tlabiana Yesuse baabanea Ne kobo bekebke unamabibo gese otane <sup>19</sup> Yesuse mo Ae ge baabaim blimobe. E baabanea Kobo moneba kleb bibam unaneba keb meletani Sume inamin namino klaubkeneo weng osa eka kemhalilaneo weng osa baabenale ge baabanea <sup>20</sup> naka ele inanea Yesuse deibanea monea Dikabolis betan ye unanea monea bibo 10 o seli Yesuse inamin namino naba-

neo weng sango omkeimabea nakaia unangai wenteniba smiko deibe onsoebe.

*Unang mako Yesuse youme afubanoa klaubosebe.*

*(Matyu 9:18-26; Luk 8:40-56)*

<sup>21</sup> Yesuse imin daaknea weseme tem daak tounea e okok aleyemin nakai tenaniba weseme obetniba Galili aamuke imin yalaniba watniba milim watemiba naka homon unang homoni teniba ge dabasiba Yesuse aamuke ken daak bia <sup>22</sup> Gode amo komoke niniino Yailase Yesuse atenea tena e skilo kikib ye dlong dlong golbuanea mesa aa unanea <sup>23</sup> tlabianea baabanea Ne moonoo katnenang gabobo kobo moneba wafuneba hananoa ayam anoko gesea <sup>24</sup> Yesuse wentenea bekeba bebeba naka homon unang homoni Yesuse bekeba bliibi tana tofaibua bokou ge bekelaniba minim ononaniba Yesuse isak daak dofakaniba onsiobe.

<sup>25</sup> Unang mako olomisa bua bifolo 12 blimanobua <sup>26</sup> dokta homoni ye klawebiba moni sumo webo otane o ginin olo mo ayamu buemin blimobe. Amit sum ye bibo binabo biotabe. <sup>27-28</sup> Unang olo Yesuse weng sango wento kesoa o bobol temo funanoa Ne besa Yesuse youm eta melebanimio ne ginino ayamut nenamabobo genoa tenoa Yesuse abuk tam nakaia unangai glagla daak manoa kweil tobbianoa Yesuse youme ken eta melebanoa <sup>29</sup> hebmamsab olomio walabonoo o funanoa Ne ginino blimut nenobo ge funasobe.

<sup>30</sup> Eka Yesus esa tekein kenea nakai ginino klaubenamin titilo mako blimu bano kesoa deskinanea baane Waneta ne youme melebanene? gesea <sup>31</sup> eka e okok aleyemin nakai baaiibo Ele temale! Naka homon unang homoni ele ge kama bianiba men kebib olole kobo fatnanebta Wanita meletneibe? geta obebe? gesiba <sup>32</sup> Yesuse Meletnene nakae atenia Nakae yeta natnenebe genite genea henhabia <sup>33</sup> eka unang olosak inamin namino o dimo tam tlo watemnoa dlou unanoa omasanin obba sumo omasambua tenoa Yesus esu ye tlanoo dlong dlong golbuanoa inamin namino nabono alukum baa omkeimasoa <sup>34</sup> Yesuse baabonea Ne moonoo obo funaneba Ne Yesuse youm eta melebanimio ne ginino bain blimut nenamabobo geneb kesoa ob ginino ayamub kenobo, bobol ayam funaneba moneba bobol ayam nale! Ob ginino blimub kenobo ge baabosebe.

*Yesuse komoke moonoo omfaanea hana-sobe.*

<sup>35</sup> Yesuse wengo owebe dim ye naka maki komoke Yailase am daniba teniba baabaniba Keb moonoo kaanobo, kobo aleyemin

nakae besao mo debeb natlaebe ge baabasib otane <sup>36</sup> Yesuse i wengo mo wentim blimobe. E klang ota wentebeba baasiba e komoke baabanea Kobo hobolo misiamo mo funemebe! Kobo ne bainobo getnenale ge baabanea <sup>37</sup> nakaia unangai watanea Ibo ne mo beketne tlaibe ge baabeneba e Fita esa eka Yemse e ninge Yon esa ita dletnea komoke bekeba onsiobe.

<sup>38-39</sup> I inaniba moniba komoke am ye temiba nakaia unangai mangglom bianiba weng dobma blib kesoa Yesuse yatemnea tanea am tam unanea baabeneba Ibo fatnanibta mangglom bianibta weng dobma blibe? Men olo mo kaaim blimobo, besa aambiobo gesea <sup>40</sup> i aben gihamsiba e nakaia unanga eli baabeneba Ibo alukum tala bib unine genea i tala bib uniba e men olo aaleb kamwal ita dlonea eka ele okok aleyemin nakai asumatna ita dlonea dletnea taniba biino meno aambio tam unaniba <sup>41</sup> Yesuse watnea kwei gow wat wafunea baabonea Talita kumi gesea weng olo mitmakamo inaminobe. Men gwabo neta okebibo obo hananale gesea <sup>42</sup> men gwab olo hebmamsab haananoa mama haamonsoebe. (O bifolo 12 obe.) O inanoa nakaia unangai wateniba dlou unemsiba <sup>43</sup> Yesuse baabeneba Ibo inamin namin olo watemibo weng sango naka maki mo baabenimibe ge baabeneba eka men olo imeno mo dluboiba downoko ge baabenasebe.

## 6

*Nasalet bib seli Yesuse mo gobanim blimobe.*

*(Matyu 13:53-58; Luk 4:16-30)*

<sup>1</sup> Yesuse bib olo deibonea monea ele bibam unang genea unea e okok aleyemin nakai bekeba onsiobe. <sup>2</sup> E inanea monea ele bibam ye bia Gode singkalin am bo-manoo tanea Gode am tam unanea Gode wengo nakaia unangai omkayebeba naka homon unang homoni e wengo wenteniba dlou unaniba baaniba Naka ele weng olo fatda omeb tlene? E tekein kemin sum olole fatda tekein ke tlene? Waneta e titilo omaleta okok sum olo klamene? <sup>3</sup> Naka ele ni tekein kebuobo, e am genalin nakabo, Maliao miin etabo, Yems esa Yosis esa Yudas esa eka Saimon esa i hek etabo, e nengwal isa ele bliobo ge baaniba dobsuananiba e wengo mo wentubaim blim deibasobe. <sup>4</sup> I inahamsiba Yesuse baabeneba Bib mak bib mak seli Gode weng omkeimalin nakai kla gobe bianiba i wengo kla wenteyebib otane ili bibam sel isa eka ili dabua tlemin isa eka ili meletan isa ile i mo gobe bianibta i wengo kla wenteyebibabo ge baabesebe. <sup>5</sup> E bibam seli mo bainobo geim blim kesoa e okok sumo ele bibamo mo klaim blimobe.

E besa nakaia unangai elekiem olokiemi gembib biamo ita kweile tofubenea klaye binebiobe. <sup>6</sup> Nakaia unangai mo bain-obo geim blim blib kesoa e bobolo usan kehabu fumbianea I fatnanibta inabibe ge fumbianea ele bibo deibonea monea bib mak bib mako meb meb ye bio yota haabianea Gode wengo omkayebisebe.

*Yesuse e okok aleyemin nakai 12 i okoko omyensebe.*

*(Matyu 10:5-15; Luk 9:1-6)*

<sup>7</sup> Yesuse e okok aleyemin nakai Dlaia moniba bib mak bib mako haabianiba hob misiami fotebenamine genea nganabenea te misiba hob misiami fotebenamin titilo omyenea baabenea <sup>8</sup> Ibo fong ota tebelet-nibta unine! Eka inamin namin afet osa eka imen osa eka meen osa eka moni osa mo oleb unai! <sup>9</sup> Skil otabbumin ota otabba unine! Eka youmo dlusa unomabib otane mako mo dleb unaiye ge baabenea nakai asuke dlanea bib mak on bib mak on bliba <sup>10</sup> baabenea Ibo moniba bib mako unaniba amo temo tam naibo ming yo olo tem ota bianiba aalande deibo watwat haabianibte! <sup>11</sup> Eka ibo moniba bib mak ye temiba bibam seli mo dleb tamniba am tam daim blim keniba eka ib weng osa mo wentubeim blim keib mole ibo bib olo deiboniba ib skilono dabalo glitaniba deibe uniba i yateniba funaniba Ni kukubo misiamobo ge funaine ge baabenea <sup>12</sup> dlanea i Gode wengo ometniba moniba bib mak bib mako haabianiba naka mak unang maki omkaye bianiba baabeniba Ib bobol temo deskinaniba omoniba Gode omaline ge oye bianiba <sup>13</sup> eka hob misiami fotebenaye bianiba eka gembib biamo naka unangi wel aayo tang kunin ayamo oloniba i gabamon dimo alibeniba klaubeiba ayam an biam bliba okok kebinibbiobe.

*Yone aa fuayemin nakae kaansebe.*

*(Matyu 14:1-12; Luk 3:19-20; 9:7-9)*

<sup>14</sup> Amo yo dimo Yesuse okoko nabeo weng sango bib mak bib mako alukum onon tlanoa balianoa wenteniba tekein ke tlanabiba eka Yudaï komok sume Helot esa wentenanabea naka mak unang maki obianiba Yone aa fuayemin nakae sino anaiba kaanebuo memalo imin hanane kesoa e titil omonea okok sumo sino ni mo watemim blimo klabea ni watemebuobo gesib <sup>15</sup> eka maki baaniba Gode weng omkeimalin nakae Ilaiya eta imin hana tebiebo gesib eka maki baaniba E Gode weng omkeimalin nakabo, e makob sinanggwano Gode wengo omkeima binebio etabo gesib namsiba <sup>16</sup> Helote Yesuse weng sango wentenea baanea Sino ne awa genalin nakae dabaia monea Yone

gabame waisanea kaanebu eta memalo imin hana bianeta okok kebebo ge baasebe.

<sup>17-18</sup> Sino Helote e heke Filibe alelo omeisane kesoa Yone Helote baabanea Kobo keb heke alelo omeisaneb yole hekmel wengo welanobobo ge baabanea Helodiaso Yone dobsuanasoa Helote awa genalin nakai dlanea moniba Yone afuniba klabuto ge debeb moniba klabut am daibbuo <sup>19</sup> Helodiaso dobsuanasoa ananang genamsoa Helote tolobo gesebe. <sup>20</sup> Niminbabe, Helote tekein kenea Yone naka kiningobe. E bobol tem funino ayam kesoa e Yone tolo toliananea tolobo genebua kima bianea e wengo wentenea e bobol asusu fumbianea E wengo fatnamine? gabianea e bobol temo ilum omfubabio otane e Yone wengo kla wentehamonsebe.

<sup>21</sup> Helodiaso Yone deibanobua sinanoa Helote e biemo dobmikinobuo amo tlo kesoa naka sumi e okoko daaha binabib isa eka awa genalin nakai komokwal isa eka Galili seli naka gang isa baabenea Ibo tliba falo ga downonomo ge baabene kesoa Helodiaso funanoa I imeno unalaib dimo Yone anaine ge funanabua <sup>22</sup> i dli tete tlaniba imeno unalib dim ole Helodiaso moonoo tamnoa biin tam unanoa komokwali imen wembibi kin dim ye biin tla blanasoa Helot esa e bekeb isa kla goboniba komok sume Helote unang sou olo baaboneo Obo nimin dlang genebte? Obo inamin namino dlanog gabeb biamo baatnenebta ne doklano ge baabonea <sup>23</sup> e Gode niniino taisanea baabonea Obo baaneba Kobo inamin namino donene genemebo ne doklamabibe. Obo ne baatneneba Kobo inamin namino kima biebo atosino mo waneba kimanano geneb mole waklam-abibo gesea <sup>24</sup> unang sou olo wentenoa tamnoa awok osu tam unanoa baabonoo Ne fatnamin ota mo baabaita doneke? gesoa awoko baabonoo Obo taneba Helote baabaneba Yone aa fuayemin nakae gabam eta waisa ofuteneta obutne tele ge baabosoa moonoo wentenoa hebmamsab imin tamnoa komok sume <sup>25</sup> Helot esu tam unanoa baabonoo Kobo memale Yone gabame waisaneba flet kwame tem daak ofaneba obutne tele ge baabasobe. O funanoa Ne Yone gabame atemnita bain kaanebe genano genota weng olo Helote inanenge baabasobe.

<sup>26</sup> E wentenea e bobolo ilum omfubano otane e Gode niniino taisanea naka maki e temna imeno wembibi i kin dimo baabonea Ne inamin namino doklamabibo ge baabone kesoa e unang sou olo wengo mo ombiabueim blimobe. <sup>27</sup> E wentenea awa genalin naka make baabanea Kobo moneba Yone gabame waisa obeb tele

ge baabanea dabanea monea klabut am unanea Yone gabame waisa obonea <sup>28</sup> flet kwame tem daak ofakanea obeb tenea unang sou olo obuensea eka unang sou osak obeb tamnoa awoko obuensebe. <sup>29</sup> I inaniba Yone gabame waisaiba e okok aleyemin nakai wenteniba teniba dame debeb moniba dofaiibiobe.

*Yesuse naka homoni 5,000 i imeno oyensebe.*

*(Matyu 14:13-21; Luk 9:10-17; Yon 6:1-13)*

<sup>30</sup> Yesuse okok dlasanin nakai dlanea unibbuei imin teniba Yesu esu ele tlaniba i okoko nabianiba Gode wengo nakaia unangai omkayebi tlibo wengo Yesuse baabasiobe. <sup>31</sup> Nakaia unangai homoni unebe tlebe bliba daaye bianea Yesu esa eka e okok aleyemin naka isa i imeno mo downomabibba kesoa Yesuse e okok aleyemin nakai baabeneba Ibo hebkeiba nibo monoba naka blim ibuantem ye unanoba ibo sinaibte ge baabe dletnea <sup>32</sup> i weseme obetniba moniba naka blim ibuantem ye unib <sup>33</sup> otane naka homon unang homoni yatemiba i unib kesoa yatemniba nakaia unangai bib sum sumo blibi alukum dalo obetniba Yesuse mema weseme tem beba ita sin gaisaniba moniba ibuantem ye bebiba <sup>34</sup> Yesuse weseme obeb watnea ken wat obanea daak tlanea temea naka homon unang homoni teniba waisa blib kesoa yatenea kla dohalilanea funanea I makob eil sibsibi i kimanini blim bliba nabinabibi ulabobo genea e Gode weng homono omkaye monsebe. <sup>35</sup> E inayebea afoko dawabbanoo e okok aleyemin nakai teniba baabaniba Betan olo naka blim kesoa afoko dawabbanang gobo <sup>36</sup> kobo nakaia unangai dlaneba moniba bib gwab gwabo meb meb ele buo olo imeno mo walo doweine gesiba <sup>37</sup> Yesuse baabeneba Ibo i mo dlaiba unaihe! Ibmaye imeno oyine gesea e okok aleyemin nakai baaiho Kobo fumbebo ni K200 o fatda olonobta imeno walonobta nakaia unanga eli oyomabione? gesiba <sup>38</sup> Yesuse baabeneba Ib bleto fatnamin olaibbione? Moniba watemine gesea i moniba watemniba baaiho Blet gwabo 5 olanoba eka aningi asu olanobbiobo gesiba <sup>39-40</sup> Yesuse wentenea baabe-neo Ibo nakaia unangai baabeiba teniba bukuban dim ele heba toun heba toun bianiba maki 100 toula maki 50 toula bisibte gesea i baabeiba inaniba toulasiba <sup>41</sup> Yesuse blet gwabo 5 o olonea eka aningi asuei olonanea wafu bianea abilim ut teme bianea Gode gangobo genea blete sin obo hanea e okok aleyemin nakai oyensea oloniba nakaia unangai kikibeib ole eka

aning asu osak olo hanea oya olo kik-ibenasiiba <sup>42</sup> unam biniba matwayensoa <sup>43</sup> atosino olaib kesoa Yesuse okok aleyemin nakai oloniba tlit meeno 12 o tem daak basiobe.

<sup>44</sup> Nakai imeno yo downosibi 5,000 obe. Unanga tena isa imen olo downosib otane i mo kieim blimobe. Naka gangi ilita kieibiobe.

*Yesuse Galili aamuke dang dim wat mama onsebe.*

*(Matyu 14:22-33; Yon 6:15-21)*

<sup>45</sup> Omito Yesuse e okok aleyemin nakai baabeneba Ibo weseme obetniba sin watniba aamuke milim Betsaida bib emwale waitneine ge baabeneba dlanea uniba deibeneba <sup>46</sup> e elekiem bianea nakaia unangai dlane onon tlaiba deibeneba e utnea amgolim ut bianea beten kebea <sup>47</sup> kwinotha Yesuse okok aleyemin naka ile weseme obetniba watniba aamuke isak mimiabe watye bebiba eka Yesu ele elekiem amgolim ut beten kebinea daakenea ninin dim ele mabianea <sup>48</sup> temea e okok aleyemin nakai glole sume tenea fube dletnea alang tla unebea bumolok bianiba walbibiba amo ye bomanang genoa bing geno kesoa yatemnua aalang dim wat mama metnea gaise unang genamsea <sup>49</sup> e okok aleyemin nakai temiba e aalang dim wat mama tla monang genabe kesoa ateniba funaniba Winiminobo geniba kla tosiam bianiba ngansiba <sup>50</sup> Yesuse hebamsab baabeneba Ibo ib bobol temo mo dlou uneyebota tosianimibe! Netabo genea <sup>51</sup> daaknea weseme tem daak tounabea glole desea e okok aleyemin nakai ateniba dlou onsiobe. <sup>52</sup> Niminbabe, i Yesuse bleto 5 o nakaia unangai homoni oya doweibso e titil olo o bobolo mo funaim blimobe. I tobtlim bianibtabe.

*Yesuse ginin gami homoni Genesalet betan ye klaye monsebe.*

*(Matyu 14:34-36)*

<sup>53</sup> I inaniba weseme obetniba aamuke yalaniba watniba Genesalet betan wat unaniba weseme ye obginabiba <sup>54</sup> nakaia unangai hebamsab Yesuse atem tekein keniba <sup>55</sup> nakai blu blu moniba betano yo bib mak bib mako alukum onon tlaniba baaiha Nakaia unangai gembibi glouto gena dletniba tlebianiba naka mak unang maki deib ye biaiho dlo baabeniba Yesuse fab biene? geiba i baaniba E bibo yota biebo genimibo wenteniba dleb motem dleb motem bianiba <sup>56</sup> eka Yesuse monea bib sum osa eka bib gwab osa eka alukum bib mak betan mak yosa haanemeo i gembib naka unangi ge dleb moniba e bibo tlamabe unamabe ye doka bianiba baabaniba Kobo ginin gami deibeneba i kweilo

keb youme ken eta melebaniba i ginino ayamu benoko gesiba e deibenea i inaniba e youme melebaibi ginino alukum ayamu besobe.

## 7

*Gode hekmel wengo faninwali hekmel wengo gaisonobiobe.*

*(Matyu 15:1-9)*

<sup>1</sup> Felisie maki tenabiba eka hekmel weng tekein kemim nakai maki tenaniba Yelusalem bib daniba teniba Yesus esu ye ge dabaniba temiba <sup>2</sup> Yesuse okok aleyemin nakai kweilao mo fubaim blim bianiba kwei niniksa ye imeno wembib kesoa yatemniba <sup>3</sup> Felisie isa eka Yudai mak isa i faninwali hekmel wengo wafu bianiba i kweilono aayo mo fubaim blim biaibo imeno mo downaiba <sup>4</sup> eka i moniba imen wemin baan dimo mo dataibo aayo mo fuelaim blim biaib osa i imeno mo downaibbabe. Eka i faninwali hekmel wengo afet osa wafu bianiba i kab osa eka sosben osa eka dis osa fuba bianiba biin osa fuba biam bianibta imeno unam binabib biotabe. I mo fubaim blim keib mole i mo downaibbabe.

<sup>5</sup> I ina binabib kesoa Felisie isa eka hekmel weng tekein kemim naka isa i yatemniba Yesuse baabaniba Keb okok aleyemin nakai fatnanibta faninwali kukubo mo wafueim blim kenibta kwei niniksa imeno wembibe? gesiba <sup>6</sup> Yesuse baabenea Sinangwano Gode weng omkeimalin nakae Aisaias Gode buk temo dim omin sitalsai weng sango dolanebuo memalo ne tekein kenia Bain ibtabo gioibe. E baanea

Nakaia unanga eli i sital dimo ne niniino nemtoub nomabib otane i bobol temo ne mo omnomabibbabo, <sup>7</sup> i dabalim nakai hekmel weng ota wafu bianiba nakaia unangai aleye bianiba olo Gode hekmel wengobo galomabib kesoa i ne lotu kenemibo ne i wengo mo wentamibabo genebiobo ge baanea dolanebuo

<sup>8</sup> ibo bain inaniba Gode hekmel wengo deiboniba dabalim nakai hekmel weng ota wafu bliobo ge baabenea <sup>9</sup> eka imin baabenea Ibo Gode hekmel wengo omdibiha bianiba ilib faninwali hekmel wengo kukub ota wafu bliob kesoa ibo funaniba Ni naka ayamobo gabiobe.

<sup>10</sup> Mosese Gode buk temo dolanea baanea Ibo ib biem ay kamwali kla gobe bianiba i wengo kla wenteye bianibte gena bianea eka weng mak osa baanea Nakaia unangai wanita i biem ay kamwali weng misiam baabeib mole yenaiba kaaine genebio otane <sup>11</sup> ibo obianiba

Nakaia unangai wanita inamin namina moniao bibebua oloniba i biem ay kamwali daabenamin otane i baaniba Ni inamin namin olo Gode dlalomabbibo genimibo <sup>12</sup> ibo baaniba Ibo biem ay kamwali mo daabenimibe ge oye biam binabiobe.

<sup>13</sup> Ibo kukubo yota nabianiba Gode hekmel wengo omabbubaniba ib faninwali kukubo nabib yota naka mak unang mak isa aleye biam bianiba eka kukub afet afeto homono nabiam bliobo ge baabesebe.

*Inamin namino nakaia unangai misiam naye binabo wengobe.*

*(Matyu 15:10-20)*

<sup>14</sup> Yesuse nakaia unangai imin nganabeneas tesiba baabenea Ibo ne wengo kla wenteniba funaine! <sup>15</sup> Nakae imeno kweilao mo fubaim blim kenea downameo e mo henganemeba otane e inamin namino bobol tem misiamo funaneme ota hengminno henganamabebe. <sup>16</sup> Nakaia unangai ne weng olo kla wentomo gabibi kla funaine ge baabenea <sup>17</sup> e nakaia unangai ye deibenea e okok aleyemin nakai tenaniba moniba ele am ye unaniba e okok aleyemin nakai kil baabaniba Saa weng olo mitmakamo baabenale gesiba <sup>18</sup> e baabenea Ibsa sma tobtlin biobe. Nakae kweil aayo mo fubaim blim bianea inamin namino downameo e mo henganemebabe. <sup>19</sup> Niminbabe, e inamin namin olo downameo e bobol temo mo unamobabe. O downea daaknoa amun tem daak unobua mitdanea alo fanea monamabobe. Ibo olo mo tekein kebibbayo? ge baabesebe. Yesuse weng olo mitmakamo inaminobe. Nakaia unangai omomom imeno downaibo mo henganimibbabo geneta weng olo baabenebiobe.

<sup>20</sup> E imin baanea Inamin namin misiamo nakae bobol temo bibabua fumbianea obiam bie ota hengminobe. <sup>21</sup> Inamin namin kukub misiamo nakae bobol tem wato bio kesoa e inamin namin kukub misiamo nabinabeo makob bobol tem misiam funin osa eka unang taman hengamin kukub osa eka ayok henin kukub osa eka nakai yenanoba kaanamin kukub osa <sup>22</sup> eka alelwali deibenoba unang maki taman deib dleb haanin kukub osa eka bobol wayemin kukub osa eka kukub misiamo afeto namin osa eka dim omin kukub osa eka unang bobol wayemin kukub osa eka fun yatememin kukub osa eka nakaia unangai dim oyemin kukub osa eka weng omdibi bianiba kukub misiamo namin kukub osa eka ili tak ngambianiba ninita ye biobabo galin kukub osa ota <sup>23</sup> nakaia unangai bobol temo bibebiota fumbianiba obiam bianiba hengminno henga binabiobo ge baabesebe.



*Unang mako Islelba otane Yesuse bain-obo gesobe.*

*(Matyu 15:21-28)*

<sup>24</sup> Yesuse bib olo deibonea monea Taia bibo kikib ye unanea tamnea am tam bianea funanea Nakaia unangai ne mo natemomabibbabo, ayok blibo gese otane nakaia unangai e atem tekein kesioibe.

<sup>25</sup> Yesuse inanea bie otane unang mako Yesuse ye biebo gesiba wentenoa o moonoo unang tenobe, hob misiame bekebo bie kesoa hebmamsab tenoa Yesu esu ye dlong dlong golbua daak tounsobe. <sup>26</sup> Unang olo Yudababe. O bib mak unangobe. O gongam bibo Sailo Finisia bib ye biobe. O Yesuse baabanoa Kobo ne moonoo hob misiame fotebebotnenale gesoa <sup>27</sup> Yesuse baabonea Tili naka memei imeno oise downoaiho ayamba kesoa nesa inania Isleli deibenia Islelba ita daabei mole olo misi- amobe. Naka meme ita sin oyenobta eka til ile mit oyomo gesea <sup>28</sup> unang olo baabanoa Sum kobo moton ye baaneb otane tili memei imeno wembiba bolo dilbi daaknoa biin daak unamo wembinabiobe. Keba inaneba Islelba ne nemhalilaneba daatne- nale gesoa <sup>29</sup> eka Yesuse baabonea Obo inangge baaneb yole ob wengo ayamobe. Obo imin moneba ob am one! Hob misiame ob moonoo deibo unebo ge baabosea <sup>30</sup> o monoa olo am unanoa temoa hob misiame moonoo deibo unebua am tam aambua wate- msobe.

*Yesuse naka make klango datenebanoo kwele gebananobua klaubasebo.*

<sup>31</sup> E inanea Taia betano deibonea monea Saidon betan ye helanea monea Dikabolis betan ye helananea imin monea Galili aamu- ke teman onsebe.

<sup>32</sup> E inanea motemea naka make klango datenebanoo eka kwele gebananebua de- beb teniba Yesuse baabaniba Kobo naka ele keb kweile melebaneba daabanale gesiba <sup>33</sup> Yesuse naka ele debetnea nakaia unan- gai deibeniba moniba afet ye unaniba Yesuse kweil mibmilibo naka ele klang milim tofubabananea eka kweile mima tubunea hang wat tofubanea <sup>34</sup> abilimo watmnabea e bobol temo memin bobol omfubaso hengkuk doung genea Efata ge baabasebe. Weng olo mitmakamo in- aminobe. Keb klango welab bebkenoa wentene ge baasebe.

<sup>35</sup> E inabasea e klango welabbebana bianoa eka inamin namino hang deibla waisaboo blimubananoa e wengo klayam webia baanasea <sup>36</sup> Yesuse nakaia unan- gai baabeneba Ibo ne nakae klaubai o weng sango naka maki mo baabenim- ibe! Olo awemobo ge baabene otane nakaia unanga eli naka ele klaubaneo

wengo omeh moniba bib mak bib mako nakaia unangai baabeiba <sup>37</sup> nakaia unan- gai wenteniba dlou unaniba baaniba In- amin namino afeto ayam ye nabe otane e nakai klango datenebenobua klaube- nea welabbebenoa wengo wente biam eka kwelo gebenobua klaubeneba wengo obiam bliib olo e dot ayam nabebo ge omonsioibe.

## 8

*Yesuse nakai 4,000 i imeno oya down- sioibe.*

*(Matyu 15:32-39)*

<sup>1</sup> Am olo dimo naka homon unang homoni imin teniba Yesu esu ele mibian- iba amo asumatna yo dimo i imen blim bianiba imen teb aalan tab tlib kesoa e okok aleyemin nakai nganabeneba tesiba baabeneba <sup>2</sup> Ne nakaia unanga eli dohalim- bibe. I ne beketne bliiba amo asumatna blimano i imen teb bliobe. <sup>3</sup> Maki skeim da tlemin kesoa ne i imen teb ye dlaia unib mole bebianiba deib tamal deibo beit doka bianoa kin bobob ye mabobo gesea <sup>4</sup> e okok aleyemin nakai baaiho Betan olo imeno mebo blim yole fatda ota olonobta nakaia unanga eli oyomabbone? gesiba <sup>5</sup> e baabe- neo lb bleto fatnamine? gesea i baaiho Blet gwabo <sup>7</sup> obo gesiba <sup>6</sup> e nakaia unangai baabeneba Teniba dabalim daak toulaine genea teniba toulasiba bleto <sup>7</sup> olo olonea Gode gangobo genea hanea olonea e okok aleyemin nakai oyensea oloniba nakaia unangai kikibesiba <sup>7</sup> eka aning gwabo asu mak olaibbio kesoa osa olonea imin inanea Gode gangobo genea e okok aleyemin nakai oyenea oloniba nakaia unangai kikibeiba <sup>8</sup> unam biniba matwayensoa atosino olaib kesoa e okok aleyemin nakai oloniba tlit meeno <sup>7</sup> o tem daak basiobe.

<sup>9</sup> Nakai 4,000 obe. I inaniba doweiba <sup>10</sup> e dlanea onon tlaib ole e hebmamsab e okok aleyemin nakai dletnea daakniba weseme tem daak toulaniba waisa obetniba moniba Dalmanuta betan onsiobe.

*Felisiei Yesuse okok sumo mo klanea watemomo ge baasioibe.*

*(Matyu 16:1-4)*

<sup>11</sup> Felisiei teniba Yesuse tenaniba alang weng baase baase biniba i Yesuse naate- momo geniba baabaniba Kobo okok sumo mo klaneba watenobta keb titilo bain abilim da tlobe genomo gesiba <sup>12</sup> Yesuse atliaubasoa hekowanea baabeneba Nakaia unanga ibo memalo dabalim olo bliib ibo nimin kenibta baatnenibta Kobo inamin namin okok sumo mo klanebta katemomo gabibe? Ne moton baabenamabibe, ne mema dim olo okok sumo klaia nakaia unangai watemnamino blimobo ge baabe- nea <sup>13</sup> deibenea imin daaknea weseme tem

daak tounea waisa obetnea walanea Galili aamuke milim sin da onsebe.

*Felisie isa eka Helot esa i bleto sitanamino saa wengobe.*

*(Matyu 16:5-12)*

<sup>14</sup> Yesuse esa e okok aleyemin naka isa inaniba unomabibo e okok aleyemin nakai bleto oleb onamino dokobenoa deibo unibbua elekiem weseme tem daak bia <sup>15</sup> Yesuse e okok aleyemin nakai saa weng mako baabenea Ibo Felisie isa eka Helot esa i bleto sitanamino niniino yiso klaine ge baabeseo e wengo mitmakamo makob Helotwali kukub misiamo naamet naamet bebib ota baabene otane Yesuse okok aleyemin nakai weng olo mitmakamo mo tekein keim blim keniba <sup>16</sup> i sinwalo baasee bianiba teka bianiba baaniba Bleto deibo tlobbio yota baabenebo gabiba <sup>17</sup> Yesuse i bobol tem funino tekein kenea imin baabenea Ibo nimin kenibta ib sinwalo obianibta Nibo bleto blimobo gabibe? Ne wengo mitmakamo afetobe. Ibo ne titilo watemibsuu mo tekein kebibbayo? Ib bobol temo nekek gebe biotio? <sup>18</sup> Ibo kinsa otane mo teme biam eka klangsa otane ibo mo wente biam blibbio? Ibo ne titilo watemibsuu hebmamsab dokobebiobe.

<sup>19</sup> Sino ne nakaia unangai homoni 5,000 i bleto 5 o hania kikibeia unandeniba atosino olaibo ibo tlit meeno fatnamin gwelelonibta baibbione? gesea i baabaniba 12 obo gesiba <sup>20</sup> eka e imin baabenea Nakaia unangai homoni 4,000 i bleto 7 o hania kikibeia unam biniba atosino deibobibo tlit meeno fatnamin gwelelonibta babibe? gesea i baabaniba 7 obo gesiba <sup>21</sup> e baabenea Ibo yo inaia watemibbio yole ibo fatnanibta ne titil olo mo tekein keim blime? ge baabesebe.

*Naka make kino tum gebanobua Yesuse klaubasebe.*

<sup>22</sup> I inaniba watniba Betsaida bib wat temiba nakaia unangai naka make kino tum gebanobua debob teniba Yesuse baabaniba Kobo naka ele kweile melebaneba daabanale gesiba <sup>23</sup> Yesuse kin misiam ele kwei gong wat afu debetnea bibo deiboniba watniba bib asak wat unaniba e mimae kin wat helabanea eka e kweilo kino milim tofubabananea baabane Kobo inamin namino mo watebebebe gesea <sup>24</sup> eka naka ele teme binea baabanea Ne nakai yatemi otane i aso ulab haabliobo gesea <sup>25</sup> Yesuse kweilo imin kin wat tebelubanea ota kla webiabanoa inamin namino kla watemsea <sup>26</sup> dabanea ele bibam unamabea baabanea Kobo Betsaida bibo mo unaebe! Moneba kleb am one ge baabanea onsebe.

*Fitae Yesuse baabanea Kobo Klaist kebtabo ge baabasebe.*

*(Matyu 16:13-20; Luk 9:18-21)*

<sup>27</sup> Yesuse inanea e okok aleyemin nakai dletnea moniba bibo niniino Sisalia Filibai bib ye onsiobe. I deib tamal deibo bebibo Yesuse e okok aleyemin nakai baabenea Nakaia unangai ne wanetabo ge one binabibe? gesea <sup>28</sup> i baabaniba Maki oke bianiba Yon aa fuayemin naka etabo gesib eka mak ile oke bianiba Gode weng omkeimalin nakae Ilaiya etabo gesib eka mak ile oke bianiba Gode weng omkeimalin naka etase makobo ge okebib bliobo gesiba <sup>29</sup> eka e baabenea Ibmalole ne wanetabo gabibe? gesea Fitae baabanea Gode Kemfakamin Naka Klaist kebtabo gesea <sup>30</sup> e baabene Weng olo naka maki mo baabenibta Yesuse Gode Dofakamin Naka Klaist etabo ge baabenimibe ge baabesebe.

*Yesuse baanea Ne kaania imin hananamabibo gesebe.*

*(Matyu 16:21-28; Luk 9:22-27)*

<sup>31</sup> Yesuse inanea aleye bianea baabenea Abilim Da Tlemin Naka ne enin kino watemamabibo, komokwal isa eka Gode amo kimanin nakai komokwal isa eka hekmel weng tekein kemin naka isa i ne mo gotneim blim keniba nanaiba kaania amo asu kenia make dime imin hananamabibo ge baanea <sup>32</sup> saa wengba keim ye inangge baasea Fitae wentenea Yesuse debob tanea sesa tam unanea sbal weng baabanea Kobo inamin wengo imino mo baanemebe gesea <sup>33</sup> eka Yesuse kibi kaba sin deskinanea e okok aleyemin nakai yateme bianea Fitae dobsuananea baabanea Gululam kobo deitne one! Keb bobol tem funin olo Gode bobol tem funinbabe. Nakai bobol tem funin yota fumbianebta obeobo ge baabasebe.

<sup>34</sup> Omito Yesuse e okok aleyemin naka isa eka naka mak unang mak isa nganabene tesiba baabenea Nakaia unangai wanita ne beketne nom gib mole i niniino omabuniba inamin namin kukub misiamo i dimo tam tlemo omnakatouleb bianiba ne kukubo wafunine! <sup>35</sup> Nakaia unangai wanita ili bobol tem funino wafu bianiba dabalim olo inamin namino gobonimibo i amito mo biomabibbabe. Otane nakaia unangai wanita ne bobolo funaniba dabalim olo inamin namin kukubo alukum deiboniba ne kukub ota wafu bianiba ne wengo omkeima binimib nakai afen smiko amit namabobe. <sup>36</sup> Nakaia unangai wanita dabalim olo inamin namino alukum olmina bianiba i mo bainobo geim blim bianiba kaaniba aseinin bib unib mole inamin namin olo fatnanota

daabenamabone? O mo daabenamabob-abe. <sup>37</sup> I inamin namino dloniba i afen smiko amit nino walo omonamino blimobe. <sup>38</sup> Nakaia unangai memalo dabalim olo bianiba Gode kukubo deiboniba hengmin ota hengabiba eka naka mak unang maki i isak temo bliibi ne wengo aleyebi osa ne niniin osa aal genam binib biamo sinanoa Abilim Da Tlemin Naka ne abisel kiningi dlonia eka Ne Aye titilo ayal inamin einobuo omonania dleb tlamio nesak aal gembiania nakaia unanga eli baabeniba Ne ibo mo tekein kebibabo ge baabenamabibo ge baabesebe.

## 9

<sup>1</sup> Yesuse inangge baabenea eka weng mak osa imin baabenea Ne bain baabenamabibo, naka maki memalo dabalim olo bliibi kaanomabib otane sma bliiba Gode nakaia unangai kimanamabeo amo e titil baka floa watenibta kaanomabiobo ge baabesebe.

*Yesuse aalo afet anea atemsiobe.*

*(Matyu 17:1-13; Luk 9:28-36)*

<sup>2</sup> I ye bianiba aalabiba amo asuke asuke asuke nao blimanoa Yesuse Fita esa Yems esa Yon esa dletnea utniba amgolime tekebmine golim ut ilikiem bianiba Yesuse aalo afet anea atemsiobe. <sup>3</sup> E inaseo e youmo ayal inamin tubunoa bomat genoa namanotabe. Dabalim nakai youmo fubanimo mo inanota namanamabobabe. <sup>4</sup> E youmo inanoa namanabua eka omito Yesuse okok aleyemin nakai asumatna eli temiba Mosee Ilayae i dabo abilim daniba daake temniba Yesuse tena mabianiba weng obiba yatemsioe. <sup>5-6</sup> I yateniba kla tosiananiba Fitae wengo fatnangge baanane? ge funane kesoa e Yesuse baabanea Aleyemin naka kobo nibo ele biobo ayam kesoa ni amo asumatna genoba mako kebmi gebke eka mako Moses emi geba eka mako Iliaya emi mako nanomabiobo ge baabasebe. <sup>7</sup> Fitae inangge baanabea ayungo ge dlan ole weng mako ayung tem wat baabenoa Ele ne miinobo, ne e kla goba bliibo ibo e wengo kla wenteha bianibte ge baanabua <sup>8</sup> i hebmamsab temiba naka maki blim Yesuse elekiem bia atemsiobe.

<sup>9</sup> I inaniba amgolimo deiboniba daak bema tebianiba Yesuse i baabenea Ibo inamin namin olo watemibo naka maki mo baabenimibe! Kimik geibbua binia Abilim Da Tlemin Naka ne kaania imin hanaita weng olo baabeine ge baabenea watasea <sup>10</sup> i weng olo wenteniba wafu bianiba i sinwalo baase baase bianiba baaniba E baanea Haam gloutem daak dania imin hana tlamabibo gene yole e weng olo mitmakamo fatnamin weng baanene? geniba

<sup>11</sup> e kil baabaniba Hekmel weng aleyemin nakai nimin kenibta baanibta Ilayae imin sin tleta Gode Dofakamin Nakae abuk tlamabebo ge obinabibe? gesiba <sup>12</sup> Yesuse baabenea Ilaya ele bain sin tenea inamin namino alukum klanang genea tlamabe otane o fatnanota Gode buk tem wengo baanota Abilim Da Tlemin Naka ne enin kino watemebia eka nakaia unangai weng dobo weng onebia nomabiobo genobione? <sup>13</sup> O inangge nobu otane ne baabenamabi ole Ilayae imin sin tlebu otane nakaia unangai ili bobol tem funin ota wafu bianiba i kukub misiam omkaha bianiba makob Gode buk temo baanobio inahabiobo ge baabesebe.

*Yesuse naka tene hob misiame bekebabia fotebebasebe.*

*(Matyu 17:14-21; Luk 9:37-43)*

<sup>14</sup> I inaniba amgolimo deibo daake temiba nakaia unangai homoni teniba Yesuse okok aleyemin nakai maki ge dlabliba hekmel weng tekein kemim nakai maki teniba Yesuse okok aleyemin nakai tenaniba sbal weng baase baase bliib kesoa yatemnabiba <sup>15</sup> eka nakaia unanga eli temiba Yesuse tle kesoa atemniba i dlou unaniba hebmamsab blublu moniba esu unaniba baabaniba Kobo ye tlebo? ge baabasiba <sup>16</sup> eka esak e okok aleyemin nakai baabenea Ibo nimir weng ota i tenanibta alang weng baase baase bliibe? gesea <sup>17</sup> naka make nakaia unangai isak tem ye bie ye baabanea Aleyemin naka kobo ne miine kobom anamin hob misiame bekebatne bia kobom am bieta debeb tlibe.

<sup>18</sup> Am mak bomanomo am mak bomanomo dimo hob misiame men ele afunee dobbianea daaknea dabalim daak blelanea mimao smei mima gabananak inamino heleb tam te sital ken ken olo toubianea eka sit glot sit glot abianea eka kaanea dokobanoa tika de tika de bieta debeb tenia keb okok aleyemin nakai baabenea Ibo fotebebaiba uneko ge baabeia naatemib otane i titilo blim kesoa e mo deiba unim blimobo ge baabasea <sup>19</sup> Yesuse wentenea baabenea Ib bainobo galino blimobe. Ibo makob naka homon unang homoni dabalim ele bliibi ulabobe. Am homono dimo ne ibo amitie bekebe binabi otane ibo ne mo bainobo getneim blim bliobe. Naka tene debeb tline gesea <sup>20</sup> i men ele debeb tetemsiba hob misiame Yesuse atemnea men ele dabasan denea dobbianea daaknea dabalim daak blelanea deski maski bianea mimao makob smei mima gabananak inamino heleb tam tenea sital ken keno toumsea <sup>21</sup> Yesuse e aalebe baabaneo E hob misiame bekeba binabeo bifolo fatnamin blimanobione? <sup>22</sup> gesea

e baabanea E gwab afa hob misiam e bekeba binabebo, e am mak bomanomo bomanomo anaiia kaaneko genea at dabatouna biam eka dobbianea aatem une biam binabebe. Kobo titilsa biebb mole ni dolalilanebta daabanale gesea <sup>23</sup> Yesuse baabanea Kobo fatnanebta baatnanebta Kobo titilsa biebb daabenale geta obebe? Nakae Gode bainobo gabe biamo inamin namino kufiabubanoa klanamabebo ge baabasea <sup>24</sup> naka ten ele aalebe Yesuse baabanea Ne bainobo gabi otane ne bainobo galino menobo, daatnanebta ne bainobo galino sumut nenoko gesea <sup>25</sup> Yesuse temeana naka homon unang homoni teniba mieib kesoa yatemnea hob misiam ele sbal weng baabanea Kobom anamin hob misiam kobo naka men ele deiba one! Imino mo tenebta bekebanemebe gesea <sup>26</sup> hob misiam ele weng sum ngambianea men ele dabasan denea deiba unea men ele dimilanea makob kaanabib inasea naka homon unang homoni baaniba E kaanebo gesib otane <sup>27</sup> Yesuse afunea dofaanea hanamasebe.

<sup>28</sup> Yesuse inanea hob misiam fotebene unea deibanea denea monea ele am onsea e okok aleyemin nakai baabaibo Ni nimin kenobta hob misiam ele mo fotebebaim blime? gesiba <sup>29</sup> Yesuse baabanea Beten ota hob misiam fotebenamabobe. Eka inamin namino afeto naniba hob misiam fotebenamino blimoboge ge baabesebe.

*Yesuse kaanea imin hananamabeo wengo imin baabesebe.*

*(Matyu 17:22-23; Luk 9:43-45)*

<sup>30</sup> I bib olo deiboniba moniba Galili betano isak ye unaniba Yesuse e okok aleyemin nakai aleyemabe kesoa e funanea Ne betan olo biamabio naka maki mo tekein kenibta e ye biebe genimibe ge funasebe.

<sup>31</sup> E inanea e okok aleyemin nakai aleye bianea baabanea I Abilim Da Tlemin Naka ne nemeb moniba naka maki nemyiba nanaiba kaan blia amo asu kenia make dime imin hananamabibo ge baabesea <sup>32</sup> e okok aleyemin nakai e weng olo mitmakamo mo tekein keim blim keib otane i tosanianiba weng olo mitmakamo kil baabanamino debasiobe.

*Waneta Gode kimanin bibo komok anamabene?*

*(Matyu 18:1-5; Luk 9:46-48)*

<sup>33</sup> I teniba Kabaneam bib ele tlaniba tamniba am tam unaniba Yesuse e okok aleyemin nakai kil baabanea Ibo deib tamal deibo tlibo fatnamin weng ota alang weng baasesebi tlibe? gesea <sup>34</sup> i weng blim kesio. Niminbabe, i deib tamal deibo tebibobianiba Nakae waneta naka mak

nibo gaiseneta nib sum anamabene? ge omtlibbiotabe.

<sup>35</sup> Yesuse inanea tounea e okok aleyemin nakai 12 i nganabene tesiba baabanea Nakae waneta komok anea kimanang ge mole e ninino omfufumino deibonea naka maki tabab tem daak bianeta komok aneko ge baabanea <sup>36</sup> e men gwabe make afu debeb tenea ele okok aleyemin naka isu ye dofaanea masea afu debeb te takan tem wat dabasa bianea baabanea <sup>37</sup> Nakae waneta ne hobolo fumbianea men gwab enamine daabane mole kukub olo makob e neta daatnanebta. Eka nakae waneta inanea ne daatnene mole ne nenekiem-babe. E ne Aye nemane tlibu esa ni dum daabenamabebo ge baabesebe.

*Nakai nibo mo makaalabeim blim keib mole i nib nekwalobe.*

*(Luk 9:49-50)*

<sup>38</sup> Yone Yesuse baabanea Aleyemin naka kobo ni naka make atemoba e keb ninino taitkenea hob misiam fotebenayebea atemob otane e nibo mo bekebe haabieba kesoa ni tolobo genobbiobo gesea <sup>39</sup> Yesuse baabanea Ibo mo tolobo genimibe! Nakae ne ninino taitnene okok sumo klane mole e ne weng misiam hebmamsabo mo baatnamabebabe. <sup>40</sup> Niminbabe, nakai nibo mo makaalabeim blim keib mole i nib nekwalobe. <sup>41</sup> Eka naka make ibo yatemnea funanea Naka eli Klaiste bainobo galin naka kesoa ne daabenano genea e aaye ibo obia doweib biamo ne moton baabenamabibe, sinanomo naka ele inamin namin ayamo dlamabebo ge baabesebe.

*Kukub misiam ota nakai bainobo galino watwat daye binabobe.*

*(Matyu 18:6-9; Luk 17:1-2)*

<sup>42</sup> Yesuse imin baabanea Nakai tom beselibe oboniba naka make kwel wat obasa gebaniba dobbiaib watnea aaye sume dang wat blelanea kaanemeo olo misiamobe. Ina otane meme gwabi ne kla bainobo gane binabib kesoa naka ele hengmino hengabea men gwab enamine atenea esak hengmino hengane mole ole dot misiamobe. Niminbabe, e inane biamo Gode atlihamino e dimo tam tlamabobe. <sup>43-44</sup> Keb kweilone kemab manea hengmino henganeb mole watlanale! Keb kweilone elekeim deiba bianeba afen smike doboneba amit neb mole kukub olo ayamobe. Ina otane kobo deibaneba asu tubuna biam bineba aseinin bib unaneba ase kiminaminba amit einine tem wat eineb mole kukub olo misiamobe. <sup>45-46</sup> Keb skile kemab manea hengmino henganeb mole watlanale! Keb skile elekiem deiba bianeba afen smike doboneba amit neb mole kukub olo ayamobe. Ina otane kobo

deiba bianeba asu tamana bianeba aseinin bib uneb mole kukub olo misiamobe. <sup>47</sup>Eka keb kine inamin namino waterneba bobolo wabkenoa henganeb mole utlanale! Keb kine elekiem deiba bianeba moneba Gode kimanin bibo uneb mole kukub olo ayamobe. Ina otane kobo deibaneba asu teme bianeba aseinin bib uneb mole kukub olo misiamobe. <sup>48</sup>Aseinin bib olo bemi nakai yantumunamibo i mo kaanimibbabe. I amit bianiba yantumunam tesomabiobe. Eka as esa mo kimin anemebabe. Amit einamabebe.

<sup>49</sup>Kukub misiam osa enin osa nib dimo tam tlebianoa nib bainobo galino dosbal sambua nib bainobo galino sbal manomabuo makob nakai yalo kulano tubuniba dlaibbua mo klanomoba klayam binabo inanomabbioebe.

<sup>50</sup>Yale ayam otane e game blimanemeo ibo fatnabanibta imin gam ayam anamabene? E klaiba imin gam ayam anamino blimobe. Yale nakaia unangai bobol temo bibebio mitmakamo inaminobe. I bobol ayam bianiba naka mak unang maki daabesese bliobe. Inamin kesoa ibo ib sinwalo bobol temo makob aniba maki daabesese bianiba bobol tem fiab bianibte ge baabesebe.

## 10

*Yesuse alelwali fotebenamin kukubo wengo baasebe.*

*(Matyu 19:1-12; Luk 16:18)*

<sup>1</sup>Yesuse bib olo deibonea monea Yudia betano Yodan aamuke milim sin da wat beba nakaia unangai homoni imin inaniba te misiba makob sino aleye binabe inanea Gode wengo aleye monsebe.

<sup>2</sup>Yesuse inanea aleyebea Felisi maki Yesuse naatemoba e ni wengo klayamo mo yang keim blim kene mole kot kebanomo geniba teniba kil baabaniba Nib hekmel wengo mo baanoa Nakae alelo fotebenang gameo ayamobo genobuo? gesiba <sup>3</sup>Yesuse yang ke baabene Mosese fatnamin hekmel weng ota ibo omyebione? gesea <sup>4</sup>i baaibo Mosese baanea Nakae e alelo fotebenang ge mole alelwali fotebenamin futano dolanea e alelo omweneta fotebene unoko genebiobo gesiba <sup>5</sup>Yesuse baabene Ibo weng omdibi bianiba kukub ayamo mo wafu blihba kesota Mosese inangge baabenebiobe.

<sup>6</sup>Sinanggwano inamin namino mo tam tlim blim bua Gode mikiktem ye kilonea klana bianea eka nakae klanea unango klananea baanea Ne inai kesoa <sup>7</sup>nakae e awok aaleb kamwali deibene alelo oameo <sup>8</sup>ikam i damo makob elekiem anomabiobe. I kamo mo asu animibbabe.

<sup>9</sup>Gode emaye dleb tetenanamabe kesoa naka maki mo danimibe ge baabesebe.

<sup>10</sup>E inangge baabenebua wengo omkayebeo blimanoa i moniba ili am unaniba e okok aleyemin nakai weng olo mitmakamo baabasiba <sup>11</sup>e baabenea Naka make e alelo fotebenea unang afet ome mole e tamano henganamabebe. <sup>12</sup>Eka unang mako imake deibanoa monoa imakwal asit dlo mole o tamano henganamabobo ge baabesebe.

*Nakaia unangai mo meme gwab aim blim keib mole i abilimo mo unomabibbabe. (Matyu 19:13-15; Luk 18:15-17)*

<sup>13</sup>Nakaia unangai funaniba Nibo meme gwabi dleb motemoba Yesuse i yafunea beten kebeneko geniba dleb tetemsiba e okok aleyemin nakai dosuananiba baabeniba De unine ge baabesiba <sup>14</sup>Yesuse yatemnea e okok aleyemin nakai dosuananea baabenea Ibo meme gwabi mo watanimibe! Deibeiba nesu tline! Nakaia unangai ne kla bainobo getneniba meme gwab eli ulab animib ita Gode kimanin bibo unomabiobe. <sup>15</sup>Ne bain baabenamabibe, nakai makob men gwab aniba Gode baabaniba Kobo ni kimanale geim blim kenib mole i mo monibta Gode kimanin bibo unomabibbabo ge baabenea <sup>16</sup>e yafu dotouleba bianea e kweilono gabam oub ut yafunea Gode baabanea Kobo meme eli daabenale ge baabasebe.

*Naka tembale afobeing homonsae weng sangobe.*

*(Matyu 19:16-30; Luk 18:18-30)*

<sup>17</sup>Yesuse bib olo deibonea monea deib tamal ye bebea naka make tenea esu ye dlong dlong golbua daak tounea baabanea Aleyemin Naka Ayam kobo ne kukubo fatnamin ota nanita afen smike dobonita amit namabine? gesea <sup>18</sup>Yesuse baabanea Kobo fatnanebta ne naka ayamobo ge onebebe? Gode elekiem eleta ayamobe. <sup>19</sup>Kobo Gode hekmel wengo tekeim kebeb yotabe. Gode hekmel wengo baanoa Kobo nakai mo yananebta kaanimibe! Eka kobo unang tamano mo henganemebe! Eka kobo ayoko mo henemebe! Eka kobo naka mak unang maki dim wengo mo baabenemebe! Eka naka maki mo dim baabenebta i inamin namino ayoko mo oise une bianemebe! Kobo keb biem ay kamwali wengo kla wente bianebte genobiobo gesea <sup>20</sup>naka ele baabanea Aleyemin Naka kobo Gode hekmel weng obba olo baatnenebo ne sin gwab afa wafu binabibua memalosa sma ye wafu blibo gesea <sup>21</sup>Yesuse naka ele atenea kla gobanea baabanea Kobo ina bieb otane kukubo olokiem ota mo nabebbabo, kobo moneba keb afobeingo

alukum oloneba naka maki waloneba mo-  
nio oloneba nakaia unangai inamin namn  
blimi oyeb biam ota sinanomo abilim uto  
inamin namino homon olamabeobe. Kobo  
moneba inaneba teneba ne beketne nale ge  
baabase<sup>22</sup> otane naka ele inamin namino  
homon kesoa Yesuse weng olo baaba-  
neo wentenea funanea Ne afobeingo mo  
inanita naka maki oyamibabo ge funanea  
bobolo ilum omfubanoa e Yesuse deiba  
onsebe.

<sup>23</sup> Yesuse e okok aleyemin nakai  
yatemem haabianea baabenea Nakaia  
unangai moni osa afobeing osa homon  
bibebino i Gode kimanin bibo unom  
gaibo bumolokobo gesea<sup>24</sup> e okok  
aleyemin nakai wenteniba dlou unemsiba  
imin baabenea Ne meme ibo nakai Gode  
kimanin bibo unom gaibo bumolokobe.  
<sup>25</sup> Til kamele youm bikinamin sile amit  
tem te tam unang gameo bumolok otane  
nakae waneta afobeingo homon bibabua  
Gode kimanin bibo unang gameo olo dot  
bumolokobo gesea<sup>26</sup> e okok aleyemin  
nakai wenteniba i smiko deibe unoa  
i sinwalo baase baase bianiba baaiibo  
Kobo inang geneb yole nakai afobeingo  
homon bibebua i Gode kimanin bibo  
mo unim blim kenimibo nakae waneta  
afen smike doboneta amit namabene? ge  
omsiba<sup>27</sup> Yesuse yateme bianea baabenea  
Dabalim nakai abilimo imalo unom  
gaibo i titil blim otane Gode inamin  
namino bumolok omfubanamino blim  
kesoa emaye nakaia unangai daabenea  
dletnea abilim unomabiobo gesea<sup>28</sup> Fitae  
wentenea baabanea Ni bib osa inamin  
inamin osa alukum deibonoba kobo  
bekebke haabiobobo gesea<sup>29</sup> Yesuse  
baabenea Ne bain baabenamabibe, nakaia  
unangai wanita ne bobolo funaniba ne  
dowan wengo omkeimam haabianiba i  
bib osa eka dabua tlemin isa mikimua  
tlemin isa eka biem ay kamwal isa meme  
isa damib osa deiboniba haabinib biamo  
<sup>30</sup> mema dim olo Gode yang kenea am  
osa dabua tlemin isa mikimua tlemin  
isa eka biem osa ay esa eka meme isa  
damib osa homon doyamabebe. Eka i  
inabib biamo naka maki teniba enino  
i omkaye biam nomabiobe. Sinanoa  
mubiang amo bomanang gamo dimo i  
afen smike doboniba amit nomabiobe.<sup>31</sup> I  
inamomabib otane nakai wanita memalo  
funaniba Ni niniin sumobo ge fumbinimibi  
i niniino men anomabiobe. Eka nakai  
wanita funaniba Ni niniin blimobo ge  
fumbinimibi i niniino sum anomabiobo  
ge baabesebe.

*Yesuse kaanamabeo wengo imin*

*baabesebe.*

*(Matyu 20:17-19; Luk 18:31-34)*

<sup>32</sup> I Yelusalem bib unomo geniba Yesuse  
sin bebea e okok aleyemin nakai abuk  
dobsileb bebianiba tosiam biba eka nakaia  
unangai e bekeba haablib isa tosiam biam  
bliba Yesuse e okok aleyemin nakai ilita  
dleb monea dlabianea inamin namino  
sinanoa tam tlamabo wengo<sup>33</sup> oye bianea  
baabenea Naka maki Abilim Da Tlemin  
Naka ne nemoniba Gode amo kimanin  
nakai komokwal isa eka hekmel weng  
tekein kemin naka isa nemyensiba i  
baaniba Naka ele anaiba kaaneko ge  
baaniba nemoniba Yudaba naka afeti  
nemyiba<sup>34</sup> i ne weng dobo weng one  
bianiba tlane biam bianiba eka mima  
helane biam nane bianiba tek tebelo  
ne biam biniba nanaiba kaania amo asu  
kenia make dime imin hananamabibo ge  
baabesebe.

*Yemse Yone i dabo komokwal anomab-  
biobo ge baasiobe.*

*(Matyu 20:20-28)*

<sup>35</sup> Sebedie memei Yemse e ninge Yone i  
dabo teniba Yesuse baabaniba Aleyemin  
Naka kobo ni weng olo baabkenomobo,  
kobo inamin namino mo inabenale gesiba  
<sup>36</sup> esak baabenea Ibo ne nimin kebeneko  
genibta onebibe? gesea<sup>37</sup> i baabaniba  
Kobo memalo ni dlakanebua sinanoa  
kobo komok sum aneba nakaia unangai  
kimanemeb dimo nisa komokwal anoba  
make keb kweile kweital dae kikib ye  
tounea eka make afan dae kikib ye  
tounanomo gesiba<sup>38</sup> Yesuse baabenea  
Ib dabo weng olo baaiibo o mitmakamo  
klaos mo tekein kebabbabo genea e saa  
weng mako baabenea Ib dabo ne kab aaye  
downomabie ib dabo mo sbal maniba  
downoniba eka ne aaye fuelanamabie mo  
fuelananomabibo? ge baabesebe. Saa  
weng olo mitmakamo e enin kino watenea  
kaanamabeo weng ota baabesebe.

<sup>39</sup> I dabo baabaibo Ae nisa inanomab-  
biobo gesiba Yesuse baabenea Bainobe.  
Kab aay ele ne downomabie ib dab osa  
downomabiobe. Eka ne aay ele fuelanam-  
abi esa ib dabo fuelananomabib otane<sup>40</sup> ne  
nakai mo dlakanea baabeniba Nakae yeta  
komok anea ne kweile kweitale kikib ye  
tounamabebo, eka yeta komok anea kweile  
afane kikib ye tounamabebo genamin  
ole ne okokbabe. Gode emaye nakai  
sin dlakanea ita inanibta toulanomabiobo  
genebiobo ge baabesea<sup>41</sup> e okok aleyemin  
nakai maki 10 i weng olo wenteniba Yemse  
Yone i dabo dosuansiba<sup>42</sup> Yesuse e okok  
aleyemin nakai alukum nganabenea tesiba  
baabenea Ibo tekein kebiobe, Yudaba naka  
afeti i kukubo inaminobe. I komok sum

ile nakaia unangai inamin namin okoko menga dlasam binabiobe. Eka naka sum ile nakaia unangai sbal weng oye bianiba ibo inamin namino yota namine ge oye biam binabib otane <sup>43</sup> ibole kukub olo mo namibe! Nakae ib isak temo waneta komok sum anano gene mole e makob okok nakai ulab anea mak ibo daayemeko! <sup>44</sup> Eka ib isak temo waneta komok anang ge mole e mak ib okok nakanene! <sup>45</sup> Abilim Da Tlemin Naka ne tlibu osa inaminobe. Ne mo tilita Nakaia unangai ne okoko okok kenemine genita tlim blimobe. Ne tenia nakaia unangai daabenia atdimmo kaania nakaia unangai homoni hengmino walubenanano genita tlibiobo ge baabesebe.

*Yesuse naka make kino tum gebanobua klaubasebe.*

*(Matyu 20:29-34; Luk 18:35-43)*

<sup>46</sup> Yesus esa eka e okok aleyemin naka isa eka nakaia unanga isa i teniba Yeliko bib ye tlaniba Yeliko deiboniba moniba deib ye temiba Batimiase Timiase miine kino tum gebanobua deib ken ye toubianea nakaia unangai Monia imenao mo onine ge nganye bianea <sup>47</sup> wentea i baaniba Yesuse Nasalet bib sake tebebo gesiba wentenea ngambianea Yesuso, komok sume Debite molofeit kobo ne nemhalilaneba daatnenale ge nganse <sup>48</sup> nakaia unangai ateniba dobsuananiba baabaniba Kimik genale ge baabaib otane e tem deibene aamdofa ngambianea Debite molofeit kobo ne nemhalilaneba daatnenale ge ngambea <sup>49</sup> Yesuse tebeo mawatananea baabenea Nganabaib tleko gesea i moniba baabaibo Yesuse ngangkebebo kobo bobol ayam funaneba motemale gesiba <sup>50</sup> e hananea youme make gamane daak blelasea deibanea hebmsab tenea Yesus esu ele tetemsea <sup>51</sup> Yesuse baabanea Kobo ne fatnatneneko genebte? gesea naka ele baane Aleyemin Naka kobo ne kino klautneneba webiatnenoko genitabo gesea <sup>52</sup> Yesuse baabanea Kobo funaneba Yesuse bain klautnenea ayam anamabibo geneb kesoa keb kino webiabkenobo, one ge baabanabe hebmsab e kino webiabanoa Yesuse hebeo dobsileb onsebe.

## 11

*Yesuse makob komok sumi ulab anea Yelusalem bib onsebe.*

*(Matyu 21:1-11; Luk 19:28-40; Yon 12:12-19)*

<sup>1</sup> I moniba Yelusalem bibo kikibo bibo niniino Betfasi bib osa eka Betani bib osa o tle tle ye amgolime Olibe tabab ye unaniba Yesuse e okok aleyemin nakai asu baabenea <sup>2</sup> Ib dabo metniba bib meto

temibta til dongki mene bib ye dogbinibua biebo nakai sino e dimo mo tounibta debeb haanin blimobo, ibo atemaibo hebmsab tileisaniba debeb tline! <sup>3</sup> Ibo inabiba naka maka ye te baabeniba Fatnanibta debeb unom genibte? geib mole ibo baabeniba Sume okoksa kesotabo, debeb motemoba e inamin namino naneta imin dababenea tlamabebo ge baabenibta debeb tline gesea <sup>4</sup> i dabo moniba temiba til dongki tembale amit tam unemin ye doggieibua daakenea deib ele bie kesoa atemniba tileisa debeb unom genamsiba <sup>5</sup> naka maki meb ye bliobe, yatemniba baabeibo Ib dabo fatnanom genibta tenibta til dongki mene tileisa debeb unom genibte gesiba <sup>6</sup> asu dabi wengo makob Yesuse ele weng baabenibio inaniba baabesiba wenteniba Ibmaye debeb unine gesiba <sup>7</sup> asu dabi til dongki mene debeb tatniba Yesus esu tab teniba i youmo tibo gemeloniba til dongki mene dim ut donganaiba Yesuse utnea e dim ut tounea <sup>8</sup> nakaia unangai funaniba Yesuse komok sumobo geib kesoa i youmo tibo gamfanabiba eka mak ile moniba damib unaniba flim aan imamino heleb tenaniba Yesuse deib unamabe ye gunubiba Yesuse til dongki mene dim ut toubia debetnea biin tan dimo tama tamanea bebea <sup>9</sup> nakaia unanga eli maki sin bebiba mak ile Yesuse abuk dobsileb nabianiba ngambianiba Nibo Gode niniino dobtouleb nomo! Naka ele Sume niniin dim ota tlebo, Gode daabaneko! <sup>10</sup> Nib fanine Debite kimanin kukubo imin tlobo kimanin kukub olo God kobo daabonale! Nibo Gode niniino dobtouleb nomo ge ngambiba <sup>11</sup> Yesuse monea Yelusalem bibo Gode am sumo daamo tem tam unanea inamin namino Gode am sumo tem tamo buo alukum watem tlanabea amo kwinoa afoko dalang wo kesoa e okok aleyemin nakai dletnea moniba Betani bib onsiobe.

*Yesuse ase ete baabanea Gat anale gesea gat ansebe.*

*(Matyu 21:18-19)*

<sup>12</sup> I inaniba moniba Betani bib ye sibnoma bomanole imin Yelusalem bib tlobo geniba tebianiba Yesuse imen teb anaso <sup>13</sup> temeas ete make skeimsa ye mala bianea aane doombie kesoa atemenea yame mo biameo walo downonite genea motemeta am olo dimo yamo balimin amba kesoa aanob bia atemnea <sup>14</sup> baabanea Sinanomo nakaia unangai keb yamo mo baliebtawelo downonaihbabo gat anale ge baabanea e okok aleyemin nakai wentensiobe.

*Yesuse nakai Gode am sumo tem tamo inamin namino webibo fotebesebe.*

*(Matyu 21:12-17; Luk 19:45-48; Yon 2:13-22)*

<sup>15</sup> I inaniba teniba Yelusalem bib ele tlaniba Yesuse tanea Gode am sumo daam tem tam unanea temeana nakai inamin namino dleb teniba naka maki webianiba monio bokabib kesoa yatemnea fotebenea skila uniba eka mak ile tebolo kikib ye toulala bliba naka maki skeim da tlebibi Lom monio oleb teniba oyeniba Islel monio oise unebibi biin osa eka Gode heitdahamin wani o dimo toubianiba webib biin osa delab mabenea <sup>16</sup> nakaia unangai alukum baabenea Ibo inamin namino mo dleb tanibta Gode am sumo daam tem tamo mo unemibe ge baabenea <sup>17</sup> aleye bianea baabenea Gode e buk temo baanea Ne am sum ole nakaia unangai alukum teniba ne beten kenemin amobo genebu otane ibo am olo misiam omkabiba o makob ayok henin nakai amo ulab anobo ge baabesea <sup>18</sup> Gode amo kimanin nakai komokwal isa eka hekmel weng tekein kemina naka isa i wenteniba funaniba Fatnabanobta ananobta kaaneke? ge funasib otane naka homon unang homoni e wengo wente bianiba seinbib kesoa i e tolo tosonianiba deibasio.

<sup>19</sup> I inaniba deibanabiba kwino kesoa Yesus esa eka e okok aleyemin naka isa i Yelusalem bibo deiboniba onsiobe.

*Bainobo galin nakae beteno titil sabe.*

*(Matyu 21:20-22)*

<sup>20</sup> I inaniba unib sonoma boman tebua imin bebianiba Yesuse as ete gat anale ge baabanesoe atemiba aan osa tung osa alukum gatan daakenea kimkim osa alukum gat ana kesoa atemniba <sup>21</sup> Fitae Yesuse baabanea Aleyemin Naka kobo ele temale! Sintalo ete yame mo balinin blim bia kobo henwaneba baabaneba Gat anale ge baabanebsoe gat anebo gesea <sup>22</sup> Yesuse baabenea Ibo Gode titilo ele nane olo wateniba Gode kla bainobo geine! <sup>23</sup> Ne wengo bain baabenamabibe, nakae waneta e bainobo galino sbal manea e bobol temo asu funino deibonea olokiem deibo bianea amgolim ele baabanea Kobo hananeba daakneba aaye sole dang daak blelanale genemeo e bain inanamabebe. Eka inamin namin afet osa baabonea Obo inanale genemeo o inanamabobe. <sup>24</sup> Ne baabenamabio Ibo Gode baabaniba Ni inamin namin olo doyen ge niba ibo funaniba Gode bain doyamabebo ge funaib mole inamin namin olo ilib dlomo ge fumbib inaniba dlomabiobe. <sup>25-26</sup> Am obba ye bomanomo bomanomo yo dimo ibo amit Gode nganha bianiba naka maki ibo

kukub misiamo omkayemibo kukub misiamo bobolo funino dokobenoa deibueib mole ib Aye abilim ut bie esak ib hengmino omlabenemeo e imino mo funemebabo ge baabesebe.

*I Yesuse baabaniba Waneta kobo titil olo omkakebene? ge baabasiobe.*

*(Matyu 21:23-27; Luk 20:1-8)*

<sup>27</sup> I imin teniba Yelusalem bib ele tlaniba Yesuse tanea Gode am sumo daam tem tam haabia Gode amo kimanin nakai komokwal isa eka hekmel weng tekein kemina naka isa eka komokwal afet isa teniba <sup>28</sup> baabaniba Waneta baabkeneta Okok olo inanale ge baabkeneta kemane tlebhone? Eka waneta kobo titil olo omkakebeta okok olo klabebe? ge baabasiba <sup>29</sup> Yesuse baabeneana Nesak ibo weng mako kil baabenamabibe. Ibo weng olo yang keib mole nesak baabenita Nakae yeta ne titil olo omneneta nemane tenita okok olo klabibo ge baabenano ge baabeneana eka e imin baabeneana <sup>30</sup> Yone nakaia unangai aayo fuaye binebuo waneta e titilo omaneta dabane teneta fuaye binebione? God etia bleka naka itio? gesea <sup>31</sup> i wenteniba i sinwalo obianiba Nibo baanoba God eta e titilo omaleta okok binebiobo genob mole e baabeneana Ibo ninim kenibta e wengo mo bainobo geim blime? ge baabenamabebe. <sup>32</sup> Eka nibo baanoba Nakai titil ota e omkahabibta okok kebinebiobo genob mole nakaia unangai wenteniba dosuananomabiobe. Niminbabe, i obianiba Yone Gode weng omkeimalin nakabo, God eta e titilo omkahabeta okok binebiobo ge obinabiobo ge baaniba <sup>33</sup> i Yesuse dim baabaniba Ni mo tekein kebobababo gesiba Yesus esak baabeneana Nesa mo baabenita Nakae yeta ne titilo omkanebeta okok olo okok kebibo ge baabenimibabo ge baabesebe.

## 12

*Naka misiami waen damibo kima blibo saa wengobe.*

*(Matyu 21:33-46; Luk 20:9-19)*

<sup>1</sup> Yesuse saa weng mako baabeneana Naka make waen dango dikilaneana sano dolinea ituo genea eka waen aaye bikilamomabib alange tome misiketoufaneana klaneana eka nakai amo o tem tam bianiba damibo kimanomabib amo asaalam genaneana damib kimanin nakai baabeneana Ibo damib olo kima bianiba okok kebiba teke yamo bali-noa yamanomo deiloniba atosino ibo oleb une bianiba eka atosino nemi toune biam blibte ge baabeneana e moneana betan mak skeim ye bia <sup>2</sup> sinanoa funaneana Enanoko! Tek yamo bali bianoa yaman toumobo gene kesoa e okok naka make dabaia



monea nakai damibo kima blib isu motemea teko yamo weloniba nemio olutnen-imibo olutne tleko genea dabanea moteme<sup>3</sup> otane naka eli teke yame walubanamino deibaniba afuniba ande dofaiba motemea<sup>4</sup> damibo gosake atemnea eka okok nakae make imin dabane motemea ele gabamon sin ande dofaniiba weng dobo weng oha bianiba kukub misiam omalib kesoa<sup>5</sup> deibanea mak esak imin dabanea motemea ele anaiba kaanea deibanea eka mak ile homon dlanea motemiba isak imin inaniba maki yenaiba kulilaiba eka mak ile wal yemde dlanai b kesoa<sup>6</sup> deibenea mubiang ole ele miine yanmakobe, e kla goba bie damib gosak ele baanea Ne miin ele dabaia mo temameo i e wengo kla wentomabiobo genea dabanea moteme otane<sup>7</sup> damibo kima blib nakai i sinwalo baaniba Nibo e deibanobua e aye kaansea eta afobeingo olamebo nibo ananoba kaanebua sinanoa e aye kaanemeo nibta e afobeingo olomo geniba<sup>8</sup> naka ele afuniba ana dobbiaiba sesa tam unebiobo ge baabenea eka Yesuse imin kil baabenea<sup>9</sup> Damib gosake fatnanamabene? E tenea damib kimanin naka eli yenanea kaaiiba damib olo naka mak ita omya kimanomabiobe.

<sup>10</sup> Gode buk temo damibo gosake miine anaibbuo wengo baanoa

Am genalin nakai sbal as ele misiamobo temdeibanomo geibbu otane komoke baanea Yeye ibo sbal as ele isak amun ayamobo bikieine gesea i inaniba sbal as ele isak amun bikieiba<sup>11</sup> nakaia unangai Sume okok olo naneo waterniba klayamobo gabiobo genobuo

ibo kibinabib otane o mitmakamo mo tekein kebabbabo ge baabesebe. Yesuse saa weng olo oyebeo e bobol temo funanea Damib kimanin naka eli makob Yudai komokwal itabo ge fumbianea<sup>12</sup> inangge baabesea Yudai komokwali Yesuse saa weng olo baabeneo wenteniba tekein keniba Banita baabenebo geniba Afunoba klabuto ge debeb unomo geib otane i nakaia unangai tolo tosiananiba deiba onsiobe.

*Komokwali komok sume Sisae monio olanamino wengo Yesuse baabasiobe.*

*(Matyu 22:15-22; Luk 20:20-26)*

<sup>13</sup> Felisie isa eka Helote meletani mak isa i Monoba Yesuse naatemoba e misiam yang kebene mole niibo kot kebanomo geniba<sup>14</sup> teniba baabaniba Aleyemin Naka kobo ni tekein kebuobe, keb wengo molot ota obianebe eka Gode wengo kla aleye biam binabeobe. Kobo mo fumbianebta

Ele kimanin nakabe, eka elile kimanin nakababe gabinabebbabe. Kobo i wengo makob omkaye binabeb kesoa kobo fatnangge fumbebe? Nib hekmel wengo mo baanoa Nib takis monio Lomo komok sume Sisa eta olaline genobua bleka? Ni olaloma bleka deibanomo? gesiba<sup>15</sup> Yesuse i bobol tem funino tekein kenea baabenea Ibo fatnanibta ne naatemom genibte? Monio mo omeh tiba waternite gesea<sup>16</sup> i monio mako omeh tesiba baabeneo Monio dimo smik osa niniin osa buolo wanemie? gesea i baaibo Komok sume Sisae smik osa e niniin osa ota biobo gesiba<sup>17</sup> Yesuse baabenea Sisa emi biamo ema dlaniba eka God emi biamo ema dla naine ge baabesea wenteniba i smiko deibe onsobe.

*Nakai kaaniba imin hana tlomabibo weng sangobe.*

*(Matyu 22:23-33; Luk 20:27-40)*

<sup>18</sup> Yudai komokwali maki niniino Sadyusiei fumbianiba Nakai afen smiki amit ninba kesoa kaanimibino imino mo hananimibbabo ge fuminabibbuo i teniba<sup>19</sup> Yesuse baabaniba Aleyemin Naka kobo sinanggwanos Mosese hekmel wengo baanea Naka make alelo memei mo dlaim blim bua imake kaane mole e ning esak unang olo omonea memei dlaneko! Meme eli hek sume kaanebue memeobo ge baanebuo<sup>20</sup> nakai dabwal tlemini<sup>7</sup> bianiba hek sume alelo omobie otane o memei mo dlaim blim bua imake kaansea<sup>21</sup> wabman esak omo bian denea kaansea eka omito ibwabman esak imin omo bianea esa kaanea<sup>22</sup> eka nekel isak omo de kan kan bebibo<sup>7</sup> i unang olo omibo memei mo dlaim blim bua i kulilaiba alel osak abuko kaananobua<sup>23</sup> sinanomo kaaibbuei imin hana tlom gaibo am olo dimo unang olo waneta dabamabone? Niminbabe, i dabwalo<sup>7</sup> i alukum unang olo omo binib biamabobo gesiba<sup>24</sup> Yesuse baabenea Gode buk tem weng osa eka e titil osa ibo mo tekein kebibba kesoa ibo tobtlim bianiba wengo afet ye obiobe.<sup>25</sup> Sinanoa nakaia unangai imin hana tlaibo nakai alelwali imino mo dliba eka unang isa imakwali imino mo dlonanimibbabe. I makob abiseli ulab aniba besa nomabiobe.

<sup>26</sup> Ibo nakai kaaibbuo sinanomo imin hana tlomabibo wengo baatneib yo Mosese as gwabe dimo ase eimbea atenabea Gode baabanea Ne Eblaham esa Aisak esa Yekob esa i Sum netabo ge baabanea Mosese weng sang olo dolanebuo ibo kibinabib otane o mitmakamo mo tekein kebabbabe.

<sup>27</sup> God ele nakaia unangai afen smike amit nine blimi kulila binabibi Sumbabe. E nakaia unangai afen smike amit nine bibebiei Sumobe. Niminbabe, Eblaham

esa Aisak esa Yekob esa i sin kaabibu otane i afen smike amit nine bibebia imin hananomabib kesoa e i Sumobe. Ibo wengo unobuo deiboniba afet ye obiobo ge baabesebe.

*Hekmel weng ayam wengobe.*

*(Matyu 22:34-40; Luk 10:25-28)*

<sup>28</sup> I sinwalo baase baase bianiba obiba hekmel weng tekein kemin naka make tenea i wengo wentea i ina bianiba Yesuse i wengo mitmakamo ayam yang keyebe kesoa wentenea e Yesuse baabanea Aleyemin Naka kobo hekmel wengo fatnamin ota hekmel wengo mako gaisonobione? gesea <sup>29</sup> Yesuse baanea Hekmel wengo dot ayam ole enamino. Mosese Gode buk temo dolanebuo baanoa Islel ibo wentine! Nib Sume Gode elekiemobo, <sup>30</sup> kobo keb Sume kla goba bianeba keb bobol tem osa keb afen smik osa keb titil osa keb bobol tem funin osa alukum omoneba keb God Sume omalale gena bianoa <sup>31</sup> eka weng mak ole baanoa Kobo kleb unaalo gobo biebia inaneba naka mak isa gobenale genobiobe. Hekmel wengo asu olota hekmel wengo mako gaisonobiobo gesea <sup>32</sup> hekmel weng tekein kemin naka Yesuse baabanea Aleyemin Naka kobo keb wengo ayam baanebobe. Gode elekiem eleta Sumobe. Sumi imini e ulabi blimobe.

<sup>33</sup> Nibo nib bobol tem funin osa eka nib kukub nabob osa Gode omanoba kla gobanoba makob nibo ninib unaalo gobo biob inanoba naka mak unang maki gobenomo! Nibo kukub olo inamob mole kukub olo nakai kulani yena dleb te funiba Gode dokahamin kukub osa eka inamin namino dokahamin kukub osa ayam otane nakai hekmel wengo asu olo inamib mole kukub olo kukub mako gaisonamabobo gesea <sup>34</sup> Yesuse naka ele wengo wentea e wengo makob tekein kemin nakai weng dikan baase Yesuse baabanea Kobo Gode kimanin bib osu meb biebobobo ge baabasea nakaia unangai imino kil ohamino tosiananiba amit deibasiobe.

*Yesuse Klaiste wengo baabesebe.*

*(Matyu 22:41-46; Luk 20:41-44)*

<sup>35</sup> Yesuse Gode am sumo tem tam bianea nakaia unangai Gode wengo omkaye bianea baabanea Hekmel weng tekein kemin nakai nimin kenibta i baaniba Klaiste komok sume Debite molofeitobo ge omonabibe? <sup>36</sup> Gode Hobe Debite bobol tem funino omalea Debite buk Samo temo baanea

Gode ne Sume baabanea Kobo ne kweile kweitale kikib ele toubianeba inamin namino kima bieba sinanomo ne keb makaai alukum yalia i titilo blimanamabobo genebiobo gena

<sup>37</sup> Debite emaye Gode Dofakamin Naka ne Sumo ge one binebio kesoa Ibo mo baanibta Ne Debite molofeit yetabo ge one-mibe! Ne Debite molofeit eka e Sumo nabo gesea nakaia unangai wenteniba bobol ayam funasiobe.

*Hekmel weng aleyemin nakai kukubobe.*

*(Matyu 23:1-36; Luk 11:37-54; 20:45-47)*

<sup>38</sup> Yesuse Gode wengo nakaia unangai aleye bianea baabanea Ibo hekmel weng aleyemin nakai kukubo klaine! I youm tekeo dlusaniba moniba Imen wemin baan dim ye motemoba nakaia unangai yateniba Naka ayami ye tliobo ge oyemine galin kukub osa <sup>39</sup> eka moniba Gode amo tem tamo nakaia unangai kin dimo biin ayam dimo toulalin kukub osa o kla gobo bianiba eka imen sum unalin am tam osa inaniba komokwali biin ota toulala bianiba <sup>40</sup> eka moniba unangai sosoni dim oye bianiba afoibeing bola olube une biam bianiba i funaniba Nakaia unangai ni yatemniba ni niniino dotouleba nine geniba nakaia unangai kin dimo beteno teke beten kebiam binabib kesoa i enin sumo watemomabiobo ge baabesebe.

*Unang sosono Gode monio olansobe.*

*(Luk 21:1-4)*

<sup>41</sup> Yesuse bokise monio Gode heitdabanimo bubinabibe kikib ye toubianea yatemebea nakaia unangai monio Gode hetdaha bianiba bokis teme bubiba eka monisa naka isa ye teniba moni sumo oleb teniba ye bubiam bliba <sup>42</sup> eka unang mak ole imake kaabonebuo o monio blim otane wan toea ota asu dleb tenoa dlabasoa watemnea <sup>43</sup> e okok aleyemin nakai nganabene tesiba baabanea Ne moton baabenamabibo, unangai soson olo imake kaabonebu otane o moni sumo olanoa naka mak unang maki gaisenobe. <sup>44</sup> Naka mak unang mak ile i moni sumo sma ye bibebiota atosin ota Gode okahabib otane unang olo o monio imino blimobe. Asu yota bua dlabobe. Imino bua dlonoa imeno walonamino blimobe ge baabesebe.

## 13

*Yesuse baanea Gode am sumo watwat danamabobo gesebe.*

*(Matyu 24:1-2; Luk 21:5-6)*

<sup>1</sup> Yesuse Gode am sumo deibonea tanea bib tam bebea e okok aleyemin naka make tenea baabane Aleyemin Naka kobo am olo watemale! Tom olo sum eka am olo ayam nabo gesea <sup>2</sup> Yesuse baabanea Ae am olo alukum ayam otane ne bain baabenamabibe, i sinanoa am olo galanimibo tome

elekieme mo deibaiba make dimo delab banamino blimobe. I alukum galafa dibiaiba unamabobo ge baabesebe.

*Yesuse baanea Bobol tem abilo tam tlamabobo ge baasebe.*

*(Matyu 24:3-14; Luk 21:7-19)*

<sup>3</sup> Yesuse amgolime Olibe golim ut toubianea Gode am sumo omwat da watemebea Fita esa Yems esa Yon esa Endlu esa i teniba baabaniba <sup>4</sup> Fatnamin dim ota kukub olo tam tlamabone? Fatnamin kukub ota tam tlota ni watenobta meb tlota nanobo genomabbione? gesiba <sup>5</sup> Yesuse baabenea Ibo klaine! Naka maki teniba ibo dim wengo oyem tlaibo ibo mo wentaibe! <sup>6</sup> Naka homoni teniba ne niniino taitneniba baabeniba Ni Gode Dofakamin Naka nitabo ge obiba naka homon unang homoni i wengo wenteniba bainobo galomabib otane ibole i wengo mo wentaibe!

<sup>7</sup> Eka ibo wentebiba awao meb meb olo gembiba bil wengo tlem osa eka bib mak bib mako genan haabliba wengo tlem osa ibo mo wentenibta dlou une bianibta tosanimibe! Kukub olo tam tlamabo otane mubiang amo hebmamsabo mo tam tlamobabe. <sup>8</sup> Naka mit maki moniba mit maki teniba awa gembiam eka komok make meletani dleb monea komok make meletani tenaniba awa gembiam eka bib mak bib mako imeno blimana bianoa eka meimeie bib mak bib mako tlebiam namabo olo makob unango memei dlanang genoa enin kino watemamabo inaminobe. Kukub olo inanoa tam tlemabo otane ole besa kilonamabobe. Moton dam ole mitdata tam tlota enin kino sum wate-momabiobe.

<sup>9</sup> Am yo tam tlamo dimo ibo klaine! I ibo yafu dleb moniba i komokwali dimo kot keye bianiba eka ibo Gode amo tem tamo biaibo yebianomabiobe. Niminbabe, ibo ne bainobo gabib kesoa i ibo inayemomabiobe. I funaniba Nibo Yesuse dababbunomo geniba ina bianiba ibo yafu dleb moniba i kiabwal isa eka komok sum isa i dimo kot keye biam nimibo ibo ne dowan wengo i omkayemine! <sup>10</sup> Ibo nakaia unangai alukum ne wengo omyiba wentibta omto mubiang amo tam tloto! <sup>11</sup> Eka i ibo dleb moniba kot kebonom gaibo ibo bobol temo usano mo keyebota fumbianibta Nibo fatnamin weng ota baabenomabbione? gabianibta funimibe! Ibo inamib dimo Gode inamin weng ota omkeimaine genea omyamabe kesoa weng olo omkeimaine! Weng obba ye baabenomabib yo ilib wengbabe. Gode Hobe emaye omkeimanamabebe. <sup>12</sup> Eka mak ole hekwali teniba ningwali dleb

moniba naka maki doyiba yenaiba kulila biam eka ningwali hekwali dleb moniba naka maki doyiba yenaiba kulila biam eka awel isak ili memei makaalaniba dleb moniba naka maki doyiba yenaiba kulila biam eka meme isak ili biem ay kamwali makaalaniba dleb moniba naka maki doyiba yebiba kulila biam nomabiobe. <sup>13</sup> Ibo ne niniino omkeimabib kesoa naka homon unang homoni bib mak bib mak seli ib alo tliyebua inayemomabib otane nakaia unangai wanita sbal maniba i bainobo galino amitie wafu tatniba mubiang amo tam tlamo Gode nakaia unanga eli dleb mo danea amit nomabiobo ge baabesebe.

*Enin kino watemomabib amo tam tlam-abobe.*

*(Matyu 24:15-28; Luk 21:20-24)*

<sup>14</sup> (Nakaia unanga ibo buk olo kinimibo kla funaine!) Yesuse imin baabenea Ibo bliba naka maki inamin namin mako bibamo watwat danamabo omeb teniba Gode biin awemo omfaiba watemaibo nakaia unangai Yudia betano blibo deiboniba hebmamsab skila ulaniba angolim unine! <sup>15</sup> Am olo dimo naka make basal dim tam biameo mo taneta am tamo afobeingo mo olamene! E hebmamsab blublu uneko! <sup>16</sup> Eka nakae waneta damibobie mole imino mo moneta e youm tibe dofane biamoe mo dabamene e hebmamsab gilun uneko! <sup>17</sup> Eka unangi amunsa blib isa eka unangi meme gwabsa isa ayoo! Ne dohalimbibe. I hebmamsabo mo blublu unomabibbabe. <sup>18</sup> Ibo am misiam bomanomo inamin namin misiam olo ib dimo tam tlamo ibo hebmamsabo mo unomabibba kesoa Gode ngaha bianiba baaniba God kobo am misiam bomanomo inamin namin olo mo tam tlamone ge ohamine! Niminbabe, <sup>19</sup> am olo dimo nakaia unangai enin kino sum watemomabiobe. Sinanggwano Gode dabale mema klanebio dim osa eka mema dim olosa inamin enino mo tam tlota nibo watenim blimobe. Eka sinanomosa inamin enino imino mo tam tlamobobabe. <sup>20</sup> Enin olo tam tlanoa amit nomo nakaia unangai alukum blimanabib kesoa Gode nakaia unangai dlakanebuei dohalilanea baanea Enin am olo hebmamsab blimanoko genamabebe.

<sup>21</sup> Eka weng mak ole naka maki teniba baabeniba Ele temine! Gode Dofakamin Nakae imin tlebo genimibo ibo i wengo mo wentaibe! Weng olo dimobe. <sup>22</sup> Naka homoni Gode dlakanebio nakaia unangai bainobo galino misiam omfubenomo geniba teniba dim oye bianiba maki baaniba Ne Gode Dofakamin Naka Klaist netabo gesib eka maki baaniba Ne Gode weng omkeimalin naka netabo gesib

bianiba i inamin namin okok sumo klabianiba funaniba Nakaia unangai ni okok sum olo klamobo watemaibo ni bainobo gebenomabiobo geniba inamomabib<sup>23</sup> otane ne ibo weng olo sin baabeia wentib biamabo kesoa naka eli teniba inamibo ibo i wengo mo wentenibta bainobo genimibe ge baabesebe.

*Sinanomo Abilim Da Tlemin Nakaie tlamabebe.*

*(Matyu 24:29-31; Luk 21:25-28)*

<sup>24</sup> Yesuse imin baabenea Enin sum olo blimanabua o abuko hebmamsab afoko dalbinoa mililana bianoa eka alime dalbinanea<sup>25</sup> awitnino datou tenabua eka abilim uto inamin namino sbalo fiba biam nomo dim ota temibta<sup>26</sup> Abilim Da Tlemin Naka ne ayung tem te tebiania Gode titil osa eka e titilo ayal inamin einobu osa omeb tlia nakaia unangai natemomabiobe.<sup>27</sup> Inana biania ne abiseli dlaia moniba dabale monea dene deneo nakaia unangai Gode dlakanebuei alukum dleb teniba mimanomabiobo ge baabesebe.

*Ibo aso watemaibo funaine!*

*(Matyu 24:32-35; Luk 21:29-33)*

<sup>28</sup> Yesuse imin baabenea Ibo aso watemaibo kla funaine! O keto balinomo wateniba funaniba O yamo balim tlang genota nanobo ge funanabib inaminobe.<sup>29</sup> Inamin kesoa inamin namin olo tam tloa watemaibo ibo tekein keniba Abilim Da Tlemin Nakaie tlang geseta nanobe geine!<sup>30</sup> Ne bain baabenamabibe, nakaia unangai dabalim olo mema ele blib eli molobseli mo kaaim blim blibta inamin namin olo tam tlamabobe.<sup>31</sup> Abila dabalao blimanamabo otane ne wengo mo blimanomobabo, amit namabobo ge baabesebe.

*Naka maki Yesuse tlang gameo amo tekein kenamini blimobe.*

*(Matyu 24:36-44)*

<sup>32</sup> Yesuse imin baabenea Inanamabo otane naka make ne imin tlang gamio amo tekein kenamino blimobe. Abisel isa eka Abilim Da Tlemin Naka nesa ni am olo mo tekein kebobbase. Aye eleta tekein kebebe.

<sup>33</sup> Inamin namino am olo dimo tam tlamabo ibo mo tekein kebibba kesoa ibo klaniba waitne bianiba hembibte!<sup>34</sup> Am olo tam tlamabo inaminobe. Naka make amo deibonea betan mak unama bianea e okok nakai okoko omyenea baabenea Amo kla kimaine ge baabenea eka mak ele baabanea Kobo amito kla kimananale ge baabanamabe inamin kesoa ibo klaniba waisanine!<sup>35</sup> Ibo mo tekein kebibbase, fatnamin dim ota am gosake tlamabene? Kwin tloa tlamene bleka ibanota tlamene bleka ibala ota tlamene bleka bomanang

genabota tlamene makobe. Ibo mo tekein kebibbase.<sup>36</sup> E hebmamsab tlamabe kesoa e teternea ibo sma aala bliba yaterne mole olo misiamobe.<sup>37</sup> Weng olo ibo baabeio nakaia unanga isa alukum baabeio ibo klaine ge baabesebe.

## 14

*Komokwali baaniba Yesuse ananoba kaaneko gesiobe.*

*(Matyu 26:1-5; Luk 22:1-2; Yon 11:45-53)*

<sup>1</sup> Am asuo blimanomo bleto yis blim downamin amo niniino Fasoba amo tlamabo kesoa Gode amo kimanin nakai komokwal isa eka hekmele weng tekein kemina naka isa i baaniba Nibo fatnanobta Yesuse ayok afu debeb monobta ananoba kaaneko? geib otane<sup>2</sup> i funaniba Singkalin amo dim olo inasoba nakaia unangai yateniba dosuan bianiba dleb weng oyemiobo geniba baaniba Nibo debioba singkalin amo blimansota mit afu debeb monobta ananomo gesiobe.

*Unang mako wel aaye Yesuse gabamon dime ibabasobe.*

*(Matyu 26:6-13; Yon 12:1-8)*

<sup>3</sup> Yesus esa e okok aleyemin naka isa Yelusalem bibo deiboniba moniba Betani bib ye unaniba taniba Saimone e yayo kit dibihabinabu otane imin ayamu banobue e am tam bianiba imeno wembiba unang mako wel aaye tang ayame tom botole tem daak iba obeb tenoa Yesuse gabamon dim ute ibabasobe. Nakaia unangai wel aay ele walom gib mole monio sum walonabiobe. O inasoa<sup>4</sup> naka maki ye blibi wateniba omsuananiba i sinwalo obianiba O fatnanota wel aaye besa ye sasalanone?

<sup>5</sup> O wel aay ayam ele obeb monoa naka maki walonoa K300 olonoa nakaia unangai inamin namin blimi daabenamin ole fatnanota besa ye sasalanone? gansiba

<sup>6</sup> Yesuse baabenea Ibo mo baanibta Unang olo misiam nanobo genibta omsuanimibe! O ne ayam natnenobe.<sup>7</sup> Nakaia unangai inamin namin blimi ibo amit ye bekebe bliba daaye binabib otane nele ibo amito mo bekebe biamabibabe.<sup>8</sup> O wel aaye ibatneno olo klayam nanobe. O ne kaanamabio bobolo funano kesoa wel aay ele ibatnenoa ne gloutemo klautnenobe.<sup>9</sup> Ne bain baabenamabibe, nakaia unangai ne down weng ayam omeb moniba bib mak bib mako alukum omkayemom gaibo unang olo natneno biamo bobolo fumbianiba naka mak unang maki omkayemomabiobo ge baabesebe.

*Yudase baanea Ne Yesuse komokwali dobyamabibo gesebe.*

*(Matyu 26:14-16; Luk 22:3-6)*

<sup>10</sup> Omito Yesuse okok aleyemin naka make niniino Yudas Iskeliote monea Gode amo kimanin nakai komokwali baabenea Ne Yesuse dobyamabibo gesea <sup>11</sup> i Yudas Iskeliote wengo wenteniba seimbianaiba isak baabaniba Kobo inanemebo ni monio mo oklomabbiobo gesiba Yudase wente-nea Ne Yesuse fatnabanita debeb monita komokwali dobyamabine? ge funmonsebe.

*Yesus esa e okok aleyemin naka isa i Fasoba imeno downsiobe.*

*(Matyu 26:17-25; Luk 22:7-14,21-23; Yon 13:21-30)*

<sup>12</sup> Gode singkalin am sumo Yudai bleto yis blim unam binabib amo tlamo i eil sib-sib memei yenaniba funiba Gode heitdaha binabibo o niniino Fasoba amo tlang genabo kesoa Yesuse e okok aleyemin nakai baabaniba Sum kobo ni imeno fatda funabobta kobo Fasobao downonale gesiba <sup>13</sup> e nakai asu dlanea unomabiba baabenea Ibo moniba bib sum ye temiba naka make aakete gabamon dim ut ofanea obeb une mole ibo dobsileb bebiba e am tam unameo ibsa taniba am tam unaniba <sup>14</sup> am olo gosake baabaniba Aleyemin Nakae baanea Ne biino fab o tem ota ne okok aleyemin nakai ni sinwalo Fasoba imeno downonomabbione? genebo ge baabaibta <sup>15</sup> e biin beselibo asal ut biobo o temo biin toulalin osa eka tebol osa mikil na kesoa o tem ota alebeneta Fasoba imeno fubiba natlobta downonomo ge baabenea dlane moniba <sup>16</sup> inamin namino makob ele baabenebio ina tlaniba Fasoba imeno funabiba <sup>17</sup> kwinole Yesuse e okok aleyemin nakai maki dletnea teteme ole <sup>18</sup> i touda bianiba imeno wembianaiba Yesuse baanea Ne wengo baabenamabi ole ib isak temo naka make ne nemeb monea komokwali nemia nananomabibe, naka ele ne temna toubianoba imeno wembuobo gesea <sup>19</sup> e okok aleyemin nakai wenteniba i bobol temo yebbabo ge tlaniba nakai elekiem elekiem oha bianiba Netio gesesesiba <sup>20</sup> Yesuse baabenea <sup>12</sup> ib isak temo naka make ne blete halonia dis teme tubun-abia emio ne baka tubunea downaname naka eta ne nemeb moneta komokwali nemyamabebe. <sup>21</sup> Bainobe, Abilim Da Tlemin Naka ne makob sinanggwano Gode buk temo baanobio inania kaanamabi otane nakae ne nemeb monea komokwali nemyamabe nakae ne dohhalimbibe. E ne kukub misiam natnenamabe kesoa Gode einin sumo e omalamabebe. E biemo dofanamino deibano biota mole ayamobo ge baabesebe.

*Yesuse e okok aleyemin nakai blet baka waen aay bakao oya downsiobe.*

*(Matyu 26:26-30; Luk 22:15-20; 1 Kolin 11:23-25)*

<sup>22</sup> I inaniba imeno wembianaiba Yesuse blete obonea Gode gangobo genea hanea e okok aleyemin nakai oyenea baabenea Olo ne damobo, doweine ge baabenea doweib ole <sup>23</sup> eka waen aay esak obonea Gode gangobo genea obya oboniba obubma downon tlaiba <sup>24</sup> e baabenea Ele ne ilemobe. Sinanggwano Gode moton wengo baanea Ne kaania ileme singania nakaia unangai hengmino omlabenamabibo geneubo ne bain inanamabibe. <sup>25</sup> Ne baabenamabi ole waen aay ele dowei biamo imino mo doweim blim bliia sinanoa Gode kimanin bib ut waen aay ele imin downonamabibo ge baabene ole <sup>26</sup> ans mako ngananiba amo deiboniba ulaniba amgolime Olibe golim ut unom geniba onsiobe.

*Yesuse Fitae baabanea Kobo baaneba Ne Yesuse mo tekein kebibabo genamabeobo ge baabesebe.*

*(Matyu 26:31-35; Luk 22:31-34; Yon 13:36-38)*

<sup>27</sup> I inaniba deib tamal deibo bebianiba Yesuse e okok aleyemin nakai baabenea Ibo alukum ne deitneniba skila unomabiobe. Niminbabe, Gode buk temo ne weng sango baanoa Gode eil sibsibi kimanin nakae ananea kaanea eil sibsibi skila onon tlanomabiobo genobu otane <sup>28</sup> ne imin hanania sin monia Galili betan ye bebiba ibo mit natlomabiobo ge baabesea <sup>29</sup> Fitae baabanea Mak iko ye deibkeniba skila unomabib otane ne mo deibke unamibabo gesea <sup>30</sup> Yesuse baabanea Ne bain baabkenamabibe, memalo boman tlamo kakaluke ngananamino mo asu keim blim bieta kobo ne niniino omuatneneba baaneba Ne naka ele mo tekein kebibabo ge namino asumatna kenamabeobo ge baabesea <sup>31</sup> Fitae weng sbal weng baabanea I nib dabo asu keniba dleb moniba yenaiba kaanob mole ne keb niniino mo omuabkenimibabo gesea eka Yesuse okok aleyemin nakai mak isa alukum inangge baa tlasioebe.

*Yesuse Getsemani damib ye biane beten kebisebe.*

*(Matyu 26:36-46; Luk 22:39-46)*

<sup>32</sup> I moniba damibo mako niniino Getsemani ye unaniba Yesuse e okok aleyemin nakai baabenea Ibo ele touda bliitane! Nele tania etale unania beten kenamabibo ge baabenea <sup>33</sup> e Fitae dobonea eka Yemse e ninge Yone i dabo dlonanea dletnea bebianiba Yesuse tosanin obba sumo tam tlubana bianoa eka bobol tem abil sumo tam tlubanasoa <sup>34</sup> Fitawali baabenea Ne

bobol temo ilum omfutnenoa kaanang genamibo ibo ele blibte! Ibo inaniba biaibo mo aala unaibe! Afen bianiba ne daane bianiba bobol tem ayam omkanebibte ge baabenea <sup>35-36</sup> e tanea meb ye unanea dlong dlong golbua daak tounea munung baan bilanea Gode nganha bianea Ay kobo inamin namino nanamino titilsa kesoa kobo Ae geneb mole ne bobol tem abilo omtlatnenale! Ina otane kobo ne bobol tem funino mo wafunebta nanemebe! Kleb bobol tem funin iwat nanale ge oha bianea beten kenea <sup>37</sup> hananea tanea temeaa e okok aleyemin nakai aala blib kesoa yatemea Fitaa baabanea Saimon kobo aambiebo? Ne ele tania beten kebia afok smiko olokiem blimano olo ibo mo afen bianibta ne daanebibbabe. Ibo nimin kenibta hebmanasab aala blibe? <sup>38</sup> Ibo kin wao yemino deiboniba afen bianiba Gode nganhabib mole Gululame dlananemeo sbal manomabiobe. Ib bobol tem funin oko ye inanomo gabib otane naka dam ibta beitalo bliobo ge baabenea <sup>39</sup> e imin monea wengo sino obianea beten ke tlebu ota imin obianea beten kenea <sup>40</sup> imin tetemea e okok aleyemin nakai sma ye kinadububebua aala bliba yatemea i weng blim keib kesoa deibenea imin monea beten kebinea <sup>41-42</sup> imin tenea baabenea Ibo sma ye aala bianiba singkabibo? Etemine! Abilim Da Tlemin Naka ne nemeb monea hengmin nakai nemyamabe nakae tle kesoa ibo hanaiba isu unomo ge baabesebe.

*Makaai teniba Yesuse afu debet onsiobe.*

*(Matyu 26:47-56; Luk 22:47-53; Yon 18:3-12)*

<sup>43</sup> Yesuse weng olo oyebe dim ota e okok aleyemin naka make niniino Yudase Gode amo kimanin nakai komokwal isa eka hekmel weng tekein kemin naka isa eka Yudai komokwal isa naka maki baabeniba Ibo moniba Yesuse afu debet tline ge baabasiba i bainata kwamao tubula binibbua dletnea tetsiobe. <sup>44</sup> Sino Yudase naka eli baabenea Ibo ne natemebiba monia bukbuk gebai mole Yesuse ye bieta nabanamabibo ibo afunibta ge debet unine ge baabenibio kesoa <sup>45</sup> e inanea tenea Yesuse esu ele tlanee Aleyemin Naka kobo ye biebtatlio ge oha bianea bukbuk gan hamsea <sup>46</sup> afu debet unomabib nakai teniba afusiba <sup>47</sup> naka make meb Yesuse esu ye mabiebe bainate tobonea Gode amo kimanin nakai i komok sume e okok nakae ananang genea blelanea klon eta taisanea tesa <sup>48</sup> Yesuse baabenea Ibo nimin kenibta bainat osa kwam osa tubulanibta tlibe? Ne ayok henin nakababe. <sup>49</sup> Am mak bomanomo bomanomo ibtem netem nanoba Gode am sumo tem tamo bianoba aleye

binabi otane ibo nafunamino deitne binabiobe. Ina otane sinanggwano Gode wengo omkeimalin nakai Gode buk temo ne weng sango baaniba Inamin namin mako tam tlamabobo geibbuo bain inanoa tam tlo kesoa weng olo yamo balinobo ge baabesea <sup>50</sup> e okok aleyemin nakai alukum wenteniba deibaniba skila uniba <sup>51</sup> naka tembale make youme dobo genea Yesuse debet bebibo kan bebete <sup>52</sup> afu dobo genomo geniba youm da afusiba genan deniba youme gameisaiba aal keim gilantonsebe.

*I Yesuse debet moniba Yudai naka sumi dim onsiobe.*

*(Matyu 26:57-68; Luk 22:54-55,63-71; Yon 18:13-14,19-24)*

<sup>53</sup> I Yesuse debetniba moniba Gode amo kimanin nakai komok sum esu uniba Gode amo kimanin nakai komokwal isa eka Yudai komokwal afet isa eka hekmel weng tekein kemin naka isa alukum teniba misiobe. <sup>54</sup> I inaniba Yesuse afu debet uniba Fitaa deibosileb bebe otane mebo mo unim blimobe. Skeimsa ye bianea kin ota atemem atememnea monea Gode amo kimanin nakai komok sume amo daam tem tam temnea awa genalin nakai aso tefubibo baka bianea esa aso tefubea <sup>55</sup> Gode amo kimanin nakai komokwal isa eka Yudai naka sum isa Nakaia unangai baabenoba teniba Yesuse kukubo nabinabeo omkeima bianiba misiamo mo nanebua omkeimanimo wentenoba ananoba kaaneko geniba baabeiba tliba hen monsiob otane Yesuse inamin namin misiamo mo nanebiota atemin blimobe. <sup>56</sup> Naka homoni teniba dim ohabib otane i wengo makobo mo baanibta kot kebaim blimobe. Mak imio afet baase afet baase bianiba <sup>57</sup> eka mak ile teniba Yesuse dim oha bianiba baaniba <sup>58</sup> Ni wenteboba e baanea Ne Gode am sumo nakai geibbuo olo galafania amo asumatna kenia afet genimio nakai am olo mo genomabibbabo genebiobo gesib otane <sup>59</sup> i weng olosa makobba kesoa molotbabe. <sup>60</sup> I inamib kesoa Gode amo kimanin nakai komok sume tenea isak daak manea Yesuse baabanea I weng ele okebib olo bain bleka dimo? Kobo nimin kenebta yang kenamino debiebo? ge baabase otane <sup>61</sup> Yesuse Gode amo kimanin nakai komok sume wengo mo yang kebaim blim deibasea e imin baabanea Kobo Gode Kemfakamin Naka Gode miin kining keba bleka? gesea <sup>62</sup> ota Yesuse wengo tilanea baabanea Bain ye baanebobe. Abilim Da Tlemin Naka ne Gode titilsae e kweile kweitale kikib ye toum binia ayung tem te tlia natemomabiobo gesea <sup>63</sup> Gode

amo kimanin nakai komok sume wentenea atliaubasoa ele youmo tububanea baabenea Nibo kot kebanomabib nakai imino mo henomobe! <sup>64</sup> Emaye Gode weng dobo weng baabanea Ibmal osa wentib yotabe. Ibo fatnangge fumbibe? ge baabesea i baabaniba E misiam nane kesoa kaaneko gesiba <sup>65</sup> deibueib ole naka maki mima helaha bianiba eka youme doboniba kin deibo ge waisaniba abiam bianiba tlaha bianiba baabaniba Kobo Gode weng omkeimalin nakae ulab kesoa naka ele waneta kananene? Kobo e niniino baabenale ge oha biam binib ole eka awa genalin naka isak debeb moniba abiam monsiobe.

*Fitae baanea Ne Yesuse mo tekein kebibabo ge baasebe.*

*(Matyu 26:69-75; Luk 22:56-62; Yon 18:15-18,25-27)*

<sup>66</sup> Fitae daam tem daak bia Gode amo kimanin nakai komok sume okok kehamin unango tetemoa <sup>67</sup> Fitae ase tefube kesoa dlo dlo ateme bianoa baabanoa Keba sino Yesuse Nasalet bib sake bekeba binebbiobo gesoa <sup>68</sup> Fitae baabonea Ne mo tekein kebibabo, ne ob wengo obeb yo mo tekein kebibabo ge baabonea daam temo deibo tamnea bib tam bebea kakaluke ngananea <sup>69</sup> unang olo imin atemnoa naka maki meb ye blibi baabenoa Naka elesa Yesuse okok aleyemin naka etabo gesoa <sup>70</sup> Fitae imin baanea Yeye genebua namono dimo naka maki esu meb ye mablib isak baabaniba Bainobo kebsa Galili nakabo, i ninekobo gesiba <sup>71</sup> Fitae Gode niniino taisanea baabenea Ibo naka ele ohabibo ne mo tekein kebibabe. Ne motono mo baabeim blim kei mole Gode nananamabebo ge baabenabea <sup>72</sup> kakaluke imin nganasea Fitae funanea Sino Yesuse baatnenea Kakaluke ngananamino mo asu keim blim bieta kobo ne niniino omuatneneba baaneba Ne naka ele mo tekein kebibabo genamino asumatna kenamabeobo ge baatnenebiobo ge funanea biki dofa memonsebe.

## 15

*Yesuse debeb moniba Failat esu onsiobe.*

*(Matyu 27:1-2,11-14; Luk 23:1-5; Yon 18:28-38)*

<sup>1</sup> Glik genoa Gode amo kimanin nakai komokwal isa eka Yudai naka gang isa eka hekmel weng tekein kemin naka isa eka Yudai naka sum isa i wengo ohabibo blimano kesoa i Yesuse sayo gebaniba debeb moniba Lomo komoke Failat esu dasiba <sup>2</sup> Failate Yesuse baabanea Kobo Yudai komok sum kebtio? gesea Yesuse baabanea Kebmaye baa omkeimanebobo

gesea <sup>3</sup> Gode amo kimanin nakai komokwali dim baabaniba e kukub misiamo nanebiobo gesiba <sup>4</sup> Failate baabanea I baaniba Kobo kukub misiamo naneb biobo ge okebib yole kobo fatnanebta i wengo yang kenamino kimik ge biebe? ge baabane otane <sup>5</sup> Yesuse Failate wengo mo yang ke baabaim blim kene kesoa Failate funanea Yesuse fatnaneta wengo yang kenamino kimik ge biebe? ge funasebe.

*I baaniba Yesuse anaiba kaaneko gesiobe.*

*(Matyu 27:15-26; Luk 23:13-25; Yon 18:39-19:16)*

<sup>6</sup> Yudai kukubo inaminobe. Bifol elekiem elekiem e dime Fasoba imeno downonom gaibo Lomo komoke nakai klabut am bi-aibo Yudai imaye baaniba Nakae yeta tileisaneba uneko genimibo e tileisenea une binabiobe. <sup>7</sup> Am olo dimo naka make niniino Balabase naka maki dletnea monea Lom seli awa genalin nakai tenaniba awa genan deniba naka maki yenaiba kaaibta i klabuto ge dleb te daibta klabut am blibtabe. <sup>8</sup> Nakaia unangai makob sino nabinabib inaniba moniba

Failat esu unaniba baabaniba Kobo klabut nakai mo tileisabenale gesiba <sup>9-10</sup> Failate tekein kenea Yesuse kukub misiamo mo naim blim otane Gode amo kimanin nakai komokwali Yesuse okoko dafao ifananiba ge debeb teniba ne dim baatneniba Naka ele kukub misiamo nabinabebo ge baatneibobo gene kesoa baabenea Ibo fumbibo Ne Yudai komok sum eta tileisai natleko? gesea <sup>11</sup> Gode amo kimanin nakai komokwali nakaia unangai baabeniba Ibo Failate baabaniba Kobo Balabas eta tileisaneba tleko ge baabaine gesiba i inaniba baaniba Kobo Balabas eta tileisaneba tleko gesiba <sup>12</sup> Failate imin baabenea Ibo fumbibo Ne ibo naka ele Yudai komok sumobo ge oha binabib ele fatnabanamabine? gesea <sup>13</sup> i ngambianiba atdimmo dabasaneba silo biki ananeba kaaneko ge ngansiba <sup>14</sup> Failate imin baabenea E hengmino blim yole ne fatnanita inabanane? ge baabese otane i weng sum ngambianiba Atdimmo dabasaneba silo biki ananeba kaaneko ge nganib kesoa <sup>15</sup> Failate funanea Ne deibesia i funaniba E naka misiamobo genimiobo ne ili weng obib inabesia i funaniba E naka ayamobo ge baatneine ge funane kesoa e wentenea e awa genalin nakai baabenea Mak ibo moniba Balabase klabuto tileisaniba dabaiba uneko! Eka mak ibole Yesuse tek dum ande dofaniya omito debeb moniba atdimmo dabasaniba silo biki anaiba kaaneko ge baabesea inasiobe.

*Awa genalin nakai Yesuse debeb moniba tlah monsiobe.*

(Matyu 27:27-31; Yon 19:2-3)

<sup>16</sup> Awa genalin nakai Yesuse debeb taniba Failate kot kemin amo daam tem tam unaniba awa genalin nakai maki nganabeiba tesiba <sup>17</sup> i e youmo gemke toufaniba youm ileme komok sumi youme ulabe tekebe doboniba dobtibilubaniba eka isabuninge waloniba Hasobo geniba goholo geniba gabamone obtab bebananiba <sup>18</sup> hana maniba makob kiabwali tesiba komokwali naniba kweilo tebelubeniba Ibo ye tibo genabib inaniba Yudai komok sum kobo klayam biebo ge oha binib ole <sup>19</sup> deibaniba atdab tebeloniba gabamon sine binaha bianiba eka mimao helaha biam bianiba dlong dlong golbua daak toulaniba weng dobo weng oha bianiba Ni keb niniino kemtouleb biobobo ge oha biam biniba bliman ole <sup>20</sup> deiboniba youm ilem ele gam tlabaniba eka ele youmo imin olo kibaniba debeb moniba atdime dabasaniba silo biki ananom geniba debeb onsiobe.

*I Yesuse atdimo dabasaniba silo bikiba-siobe.*

(Matyu 27:32-44; Luk 23:26-43; Yon 19:17-27)

<sup>21</sup> Naka make niniino Saimone Sailini bib sakobe. Lufas esa eka Aleksanda esa i ay etabe. E Yelusalem bib unang genea tetemea awa genalin nakai Yesuse ase obeisaniba meng meng teniba eta obaliba obeb bia <sup>22</sup> i Yesuse debetniba moniba bibilime niniino Golgota ut onsiobe. Golgota olo Hiblu wengobe. (Nib weng ole Naka Gabamon dikinobe.) <sup>23</sup> I inaniba utniba ye bianiba waen aaye enino watabenamin mala-sine niniino mele yebbaka kweko klaniba obeb teniba obdibasib otane e mo doweim blimobe. <sup>24-25</sup> Kelanoa 9 kilokano keso i Yesuse youmo gemeisaniba doboniba atdime dabasaniba silo bikibaniba obo bikiniba e youmo oisaniba olaniba baaniba Elekieme ke dobo dofa bianoba tomo glim kimino olo tlanha binoba Waneta gaisenemeo debeb on debeb on binoba dleb onon tlanomo ge baaniba inabiniba <sup>26</sup> eka ase dim ute e inamin namino nanebuo weng sango dolaniba baaniba E YUDAI KOMOK SUMOBO ge baaniba dola omginiba <sup>27-28</sup> eka ayok henin nakai asu dloniba make atdimo dabasaniba silo bikibaniba Yesuse kweile kweital dae bikiniba eka mak esak atdimo dabasaniba silo bikibaniba Yesuse kweile afan dae bikinaib-bua ye bliba <sup>29</sup> nakaia unangai teniba Yesuse dob tla uneka tleka bianiba aben gi-habaniba weng dobo weng oha biam bianiba baabaniba Sino kobo baaneba Ne Gode

am sumo galafania amo asumatna kenia genamabibo genebbio keso <sup>30</sup> kebmaye kleb skil daabkenota atdimo deibo daak tele ge ohabiba <sup>31</sup> Gode amo kimanin nakai komokwal isa eka hekmel weng tekein kemin naka isa aben giha bianiba isinwalo weng dobo weng oha bianiba baaniba E naka mak unang maki daaye binabe otane emalo ele skilo mo daabanamabebabe. <sup>32</sup> E Gode Dofakamin Naka Isleli komok sum eta biameo emaye ele skil daabanea atdimo deibo daak tleta ni atemnoba e bain Gode miinobo genomo ge ohabiba eka ayok henin naka asuei atdimo dlasaniba silo bikibeibbue isa inaniba Yesuse weng dobo weng oha biam monsiobe.

*Yesuse kaansebe.*

(Matyu 27:45-56; Luk 23:44-49; Yon 19:28-30)

<sup>33</sup> Kelanoa afoko tenoa isak ewit tleta dabalim olo alukum mililanobio bita afoko delwab manota imin bomasobe. <sup>34</sup> O dimo Yesuse ngananea Eloi! Eloi lama sabaktani ge nganasebe. (Weng olo mitmakamo inaminobe. God kobo nimin kenebta deitne biebe? ge nganasebe.) <sup>35</sup> E inangge nganasea naka maki meb ye blibi wenteniba baaniba Wentine! E Gode weng omkeimalin nakae Ilayae nganhabebo gabiba <sup>36</sup> naka make funanea Yesuse kwele gatu banebo genea blublu monea deibnamtab inaminno omeb tenea waen aaye omabunea dikibasoa omonea atit bilanea omeb utnea Yesuse ombibaia downokone ge baanea inanea baanea Debliba atemnoba! Ilayae tenea silo ule tlabanea daak tlamabese makobo gesea atemebiba <sup>37</sup> Yesuse imin amdofa nganana bianea kaansebe.

<sup>38</sup> O dimo Gode am sumo tem tamo biin awemo youm teke amite dob dounibbue mutum ut danea blulu daakenea belanea balanea milim ononasebe.

<sup>39</sup> Awa genalin nakai komoke meb ye mabia Yesuse inanea kaanseba atemnea baanea Bainobo naka ele moton Gode miinobo ge baanabea <sup>40</sup> eka unang maki skeimsa ye bianiba atemsibi niniino Maliao Magdala bib ulak osa eka Malia afeto Yems afete tembal esa eka Yosis esa i biem osa eka Salomi osa i unang maki bekebe bliptabe. <sup>41</sup> I sino Yesuse Galili betan ye bia daaha bianiba bekeba haabinibbue isa eka unang maki bekebaniba Yelusalem bib tlibbue isa ye bliptabe.

*I Yesuse debeb moniba tom teme dofa-siobe.*

(Matyu 27:57-61; Luk 23:50-55; Yon 19:38-42)

<sup>42</sup> Kwinoa bomanomo singkalin am anamabo keso singkalin imeno fum



haabliba Yosebe Alimatia bib sakobe, esa Yudai komokobe,<sup>43</sup> naka maki fumbianiba Yosebe naka ayamobo ge ohabiba Gode kimanamabe dimo waiso bie kesoa e Failate tolo tosanino deibonea monea esu unanea baabanea Kobo Yesuse dame dobnene gesea<sup>44</sup> Failate e wengo wentenea dlou unanea funanea Yesuse mo kaaim blim biamebo ge funanea awa genalin nakai komoke nganabanea tesea dobo baasea baanea<sup>45</sup> Kaanebo gesea Yosebe baabanea Kaanebo gabebo kebmaye debeb one gesea<sup>46</sup> youm namae walonea dohifanea Yesuse silo uleisanea debeb daake dofanea halbunea tete tlasoa ge debeb monea tom teme klaibbue tem wat dofanea tom kwame beselibe daisa daba daba bia tenea amite dob doubasebe.

<sup>47</sup> Malia Magdala bib ulak osa eka Malia afeto Yosise biem osa ye bianiba Yesuse tom tem wat dofailo atemsiobe.

## 16

*Yesuse imin hanasebe.*

*(Matyu 28:1-8; Luk 24:1-12; Yon 20:1-10)*

<sup>1</sup> Singkalin amo blimano sonoma Malia Magdala bib ulak osa eka Malia afeto Yemse biem osa eka Salomi osa i wel aayo tang kunin ayamo waloniba Yesuse undimo alibanomo geniba<sup>2</sup> Sande boman teboa moniba Yesuse gloutem unom geniba bebianiba obianiba<sup>3</sup> Waneta tome amite datlabenamabene? ge omomniba<sup>4</sup> moniba temiba tome amite dobdou unibbue daisa dabaiba tanea ken tam unebua amito keim bio kesoa watemniba<sup>5</sup> watniba biin wat unaniba temiba naka tembal make youm namae tekebe dubusanea Yesuse kweile kweitale tofa bine dae toubia atemniba dlou unaniba tosanisiba<sup>6</sup> baabenea Ibo mo tosanimibe! Ne tekein kebibe, ibo Yesuse Nasalet bib sake atdimmo dabasaniba silo biki anaibbu eta hen tebib otane e olo mo biebase. E hananea unebe. Ibo teniba e dofa unibbuo biin alango watemine gesea i taniba biino watemsiba<sup>7</sup> baabenea Ibo moniba Fita esa eka e okok aleyemin nakai mak isa baabeniba Yesuse makob sino baabenebio inanea sin monea Galili betan ye unamabebo, ibo monibta Galili betan ota atemine ge baabeine gesea<sup>8</sup> unang eli wenteniba kla tosanianiba moniba naka maki baabenamino kimik gesiobe.

*Malia Magdala bib ulako Yesuse atem-sobe.*

*(Matyu 28:9-10; Yon 20:11-18)*

<sup>9</sup> [Yesuse Sande boman teboa imin hananea mikiktemo monea Malia Magdala bib ulak osu ye motemea atemsobe. Sino o hob misiami<sup>7</sup> bekebo bliha fotebebone

biotabe.<sup>10</sup> Malia Magdala bib ulako inanoa Yesuse atemnoa monoa nakaia unangai sino Yesuse bekeba haabinibbue isu ye motemoa<sup>11</sup> i bobolo misiamu bebua mangglom blibo baabenoa Ne Yesuse imin hana tlea atem tlibo ge baabenoa wentib otane i o wengo mo bainobo gebueim blim deibosiobe.

*Yesuse okok aleyemin nakai asuei Yesuse atemsiobe.*

*(Luk 24:13-35)*

<sup>12</sup> Sinanoa Yesuse okok aleyemin nakai asu keniba Yelusalem bibo deiboniba bebiba Yesuse tlea atemsib otane e kibio afetobe.<sup>13</sup> I inaniba Yesuse atemniba imin moniba e okok aleyemin nakai maki baabesib otane i naka asunai wengo mo wentubenibta bainobo geim blimobe.

*Yesuse e okok aleyemin nakai 11 i atem-siobe.*

*(Matyu 28:16-20; Luk 24:36-49; Yon 20:19-23)*

<sup>14</sup> Sinanoa e okok aleyemin nakai 11 i ye bianiba imeno wembiba Yesuse tete-meia i mo bainobo galin blim kesoa sbal weng baabenea lb bainobo galino blimobo, naka maki obianiba Yesuse hananea ni atemobobo gabib otane ibo mo bainobo gabibbabe.

<sup>15</sup> Ibo moniba nakaia unangai bib mak bib mak olo blihi alukum ne wengo omkayemine!<sup>16</sup> Nakaia unangai wanita ne wengo wenteniba bainobo geniba aaye fuelaib mole Gode daabenea dleb utnea abilim ut danea amit nomabiobe. Otane nakaia unangai ne mo bainobo geim blim keib mole i hengminsa kesoa Gode kot kebenea dlanea moniba aseinin bib unomabiobe.<sup>17</sup> Naka eli bainobo geib mole Gode titilo i ge dlanoa i inamin namin okoko sumo klabianiba eka ne niniino taitneniba nakaia unangai hob misiami bekebe biaibo fotebena yebianiba eka weng afeto i mo tekein kebibbao obianomabiobe.<sup>18</sup> I inab misiami yantanimib osa eka aa misiamo nakai downoniba kaanabib aayo downonaib osa i mo kaanimibbabe. I kweilono nakaia unangai ginin gami melebenimibo i ayam anomabiobo ge baabesebe.

*Gode Yesuse debeb ula abilim onsebe.*

*(Luk 24:50-53; Abosel 1:9-11)*

<sup>19</sup> Sume Yesuse wengo oyebeo blimanoa Gode debeb utnea abilim ut danea e kweile kweitale kikib ye tounea<sup>20</sup> e okok aleyemin nakai deibaniba moniba Gode downan wengo bib mak bib mako omkayem haabliba Sume i okoko daaye bianea i wengo omsbal sambea i okoko sumo klabiba

naka mak unang maki wenteniba bainobo  
geibbiobe.]

## **Luk Dowan Weng Olo Luke Dolanebuotabe. Tekein kemnin wengobe.**

Yesuse atdimo kaanea imin hananea ulanea abilim uneta omi Luke dowan weng olo dolanebiobe. Luke sino dokta bineta omi e dokta okoko deiboneta Fole okoko daaha binebiobe. E Yudababe. E weng olo Glik ten imi dolanebiobe. Glik teni fumbianiba Kukub molot wafunino klayamobo gabib kesoa e Yesuse kukubo nabinebuo weng sango dolaihua weng olo wateniba Yesuse bain kukub molot wafunin nakabo geine geneta dolanebiobe. E nibo alebenea baanea Yesuse nakaia unanga nibo dohalinin nakabo gena bianea eka Yesuse okok dlasanin nakai okoko nabinibbuo weng sango buk mako temo dola nanebiobe.

1:1-4 Mikiktem wengobe.

1:5-2:52 Yone aa fuayemin naka esa eka Yesus esa i ten binibbuo weng sangobe.

3:1-20 Yon aa fuayemin nakae okoko weng sangobe.

3:21-4:13 Yone Yesuse aaye fuela-banebuo weng sang esa eka Gululame Yesuse dabamatemseo weng sang esa otabe.

4:14-9:50 Yesuse Galili betano nakaia unangai daaye binebuo weng sangobe.

9:51-19:27 Yesuse Galili betan ye danea monea Yelusalem bib onseo weng sangobe.

19:28-21:38 Yesuse atdimo dabasa ananomabib amo meb tebua e Yelusalem bib ye bianea okok ke-binebuo weng sangobe.

22:1-24:53 Yesuse kaanebuo weng esa eka e imin hananebuo weng esa otabe.

1-4 Ae komok Tiofilas kobo ne weng sango dola omfubkenang genitabe. Inamin namin kukubo Sume kleana ni aleyebee nakai mikiktemo kukub olo tola watemibi weng sang olo nisa alebeiba naka homoni bain weng olo dolabib otane nele weng olo kla kibiania wentebi kesoa inamin namino mikiktemo tam tlobu esa eka omi tam tlobu esa eka mubiango tam tlobu esa o weng sango ne alukum dola omfubkenang genitabe. Niminbabe, kobo tekein keneba weng olo bainobo genebta kla tekein kenale!

*Gode baanea Lisabeto Yone dofanam-abobo gesebe.*

<sup>5</sup> Sino Yudai komoke niniino Helote dabalim olo bie dimo Gode amo kimanin nakae niniino Sekalaiaie bianea e sino Gode

amo kimanin nakae Abaisae molofeitobe. E alelo niniino Lisabet otabe. Osa Gode amo kimanin nakae Elone molofeitobe. <sup>6</sup> I kamo Gode kin dimo kukub ayamo wafu bianiba Sume hekmel weng esa kla wafuna bianiba i kukub misiam mo namin blim bianiba <sup>7</sup> Lisabeto fioum kesoa i kamo memei blim binabibbuo am olo dimo imake hangkalebmin anabea eka alelo konokmon anaib biotabe. <sup>8-9</sup> Gode amo kimanin nakai kukubo inaminobe. I okoko alango wayen tlaniba am mak bo-manua Sekalaiaie meletani Gode am sumo kimanin okoko klaniba Sekalaiaie dofaib kesoa e tanea Gode am sumo tem tam unanea Gode heitdabanamabeo wel aaye tang ayamo bafunang gena una <sup>10</sup> Yuda nakaia unangai homoni bib tam bianiba Gode nganhabila Sekalaiaie ele Gode am sumo tem tamo wel aaye tang ayame bafunabea <sup>11</sup> Sume abisake tenea wel aaye bafunamin biino kweital sin da ye mabia <sup>12</sup> Sekalaiaie atemnea e smiko deiba unoa tosiensea <sup>13</sup> abisake Sekalaiaie baabanea Kobo mo tosiamebe! Kobo Gode nganhabebo e keb wengo wente kesoa keb alelo Lisabeto amun sanamabobo, sinanomo o miine dofanomo e niniino Yon ge nganabaine! <sup>14</sup> Ib kamwalo e dofanimibo seinhabiba naka mak unang mak isa seinhamomabiobe. <sup>15</sup> Niminbabe, e biemo amun temo biameo Gode Hobe bekeba bia eka dofanomo esa amitie bekeba bia eka waen aay esa aay afeto sbal esa e mo downamabebabo, e Gode kin dimo naka ayamobe. <sup>16</sup> Eka e Gode wengo Islel nakaia unangai omkayebea nakaia unangai homoni e wengo wenteniba bobol temo deskinaniba i Sume Gode omalomabiobe. <sup>17</sup> Makob sinanggwano Gode weng omkeimalin nakae Ilaiyae nanebino inanea Yon esa inanamabebo, Gode Hobe bekeba biamabe kesoa e titilo sumobe. Eka e sin tenea Sume deibo kebanea e weng ayamo omkaye bianea aleyebee nakaia unangai wenteniba i memei tena awa gembibo deiboniba i memei gobeniba eka naka misiam unang misiam isa i bobol temo deskinaniba Gode omaliba Yone nakaia unanga eli klaubenea ayam aniba Sume tlamabeo wasanomabiobo gesea <sup>18</sup> Sekalaiaie abisake baabanea Ne hangkalebmin aia eka ne alelo konokmon ananobbio kesoa ne fatnanita keb wengo bainobo gebkenamabine? gesea <sup>19</sup> abisake Sekalaiaie baabanea Ne Gebliel netabo, ne God esu ye bliia e nemanee tenia kebsu ele tlania dowan weng ayamo baabkei otane <sup>20</sup> kobo ne wengo mo bainobo geim blim kesoa kobo kobom anebbua sinanoa ne wengo yamo balinomo dim ota kobo wengo imin baanamabebo ge baabanabea <sup>21</sup> eka

Yuda nakaia unangai bib tam blibi Sekalaiaie waisa bianiba fumbianiba Nimin kebianeta Gode am tamo bieta afok smiko homono blimanamabone? ge fumbiba <sup>22</sup> e tam tele otane kobom ana kesoa e wengo mo baabeim blimobe. I atemniiba funaniba Sekalaiaie dam deib watemebo gabiba e kweilon ota kinea alebene otane e wengo mo baa'im blimobe. <sup>23</sup> E okoko blimanoa e monea ele bibam bianea e alelo omebbia amunsanoa <sup>24</sup> am tam bua alimo asuke asuke make nao blimanoa baanoa <sup>25</sup> Ne sino fioum blia nakaia unangai natemniiba fumbianiba O misi'amobo ge fumbiba ne aal genam binabi otane mema olo Sume emaye kukub ayamo omnea amunsania aal genalino blimutnenobo gesobe.

*Gode baanea Maliao Yesuse dofanam-abobo ge baasebe.*

<sup>26</sup> Lisabeto amunsabua alimo 6 blimanoa ota Gode abisake niniino Gebliete dabanea monea Galili betano bib gwabo niniino Nasalet bib ye onsebe. <sup>27</sup> Unang souo niniino Maliao Nasalet bib ye bianoa o imake Yosebe dobone ge baabueib otane i kamo makobo mo haanim blim blibtabe. Yosebe Yudai komok sume Debite molofeitobe. <sup>28</sup> Abisake tenea osu ye tlanea baabonea Ayam biebo? Sume gobke bianea kamakanea bekebkenobo obo seinale gesea <sup>29</sup> Maliao e wengo wentenoa bobol hekhek fumbianoa E weng olo mitmakamo fatnamine? ge funsoa <sup>30</sup> abisake imin baabonea Maliao obo mo tosanemebe! Gode katemnea seinkemebo, <sup>31</sup> obo amunsaneba mene dofanemebe e niniino Yesuse ge nganabanale! <sup>32</sup> E damanemeo niniin sum anamabebe. Sume ne miinobo ge ohamabebe. Eka e makob e fanine Debite Yudai komoke ulab kesoa Gode Yesuse dofakanea e nakaia unangai kimanamabebe. <sup>33</sup> Eka e amitie Yekobe molobseli komok anamabebo, e nakaia unangai kimanino mo blimanomobabo ge baabosea <sup>34</sup> Maliao abisake baabanoa Ne imake mo dibim blim bli olole fatnanita ne amunsa namabine? ge baabasoa <sup>35</sup> abisake baabonea Gode Hob eta daabkeneta bekebkenobo, Sume titilo gekemano kesoa ob miine dofane-mebe nakaia unangai oha bianiba E Gode miin kiningobo ge ohamomabiobe. <sup>36</sup> Eka ne weng mako baabkenamabio Ob baabo Lisabeto sino nakaia unangai owe bianiba o fioumobo, memei mo dlanamabobabo ge owe binabibo o konokanobuo otane o amunsa buo alimo 6 blimanobe. <sup>37</sup> Gode titilo sbal kesoa inamin namin okoko sino klam tlebueo mema olosa klabianea olosa inanamabebo gesea <sup>38</sup> Maliao abisake baabanoa Ne Gode okok unangobo, kobo weng

olo baatnenebo Gode emaye inatneneko gesoa abisake deibo onsebe.

*Maliao monoa Lisabeto am onsobe.*

<sup>39</sup> Maliao bianoa mitdanoa monoa beil bibo bib sumo Yuda betan ye unanoa <sup>40</sup> tamnoa Sekalaiaie am tam unanoa Lisabeto baabonoo Ayam biebo? gesoa <sup>41</sup> Lisabeto wentenabua mene amun tem wat doungewasea eka Gode Hobe Lisabeto bekebo bia <sup>42</sup> Lisabeto Maliao weng sum baabonoo Obo Gode daabkene kesoa obo seinamabeobe. Unang maki seinino ob seinino gaisenoa ob mene dofanemebe Gode daabanea seinamabebe. <sup>43</sup> Obo ne Sume dofanamabeb otane teneba niniin blim unang ne am ele tlebobo, <sup>44</sup> ne ob wengo wentena bia ne mene amun tem wat seimbiana doungewanebe. <sup>45</sup> Obo Gode wengo wenteneba e wengo bainobo geneb kesoa Gode daabkenea seinamabeobo ge baabosobe.

*Maliao Gode niniino dobtoulebe bisobe.*

<sup>46</sup> Maliao baanoa Ne Sume niniino dobtoulebe biania <sup>47</sup> Gode ne hengmino temo blio nemtlanamabe nakae bobolo fumbiania seinibe. <sup>48-49</sup> Ne niniin blim besa okok unang otane Gode natemnea ne niniino nemtoulebe biebe. E titilo sum kesoa e inamin namin kukub olo sum omnebo, nakaia unanga isa i molobseli walo unaib isa baaniba Maliao Gode daabonea seinbinobiobo ge onemomabiobe, Gode niniino kiningobe. <sup>50</sup> Sinanggwano nakaia unangai dabalim olo bianiba Gode niniino dobtoulebe binibbio isa eka memalo e niniino dobtoulebe blib isa sinanomowaloniba e niniino dobtoulebe nomabib isa Gode dohalilanea daaye binabebe. <sup>51</sup> E titilsa kesoa e okoko klabianea nakaia unangai ili untak ngambibi dlanea onon tlaniba esu mebo blimaibbiobo, <sup>52</sup> e komok sumi niniino omabbubene eka e nakai niniin blimi i niniin ota omfabenebiobe. <sup>53</sup> Eka nakaia unangai inamin namin blimi e inamin namin ayamo doyebiobe. Eka inamin namino homono bibebio naka ile e inamin namin ayamo mo doyim blimobe. E besa dlane unibbiobe. <sup>54-55</sup> Eblaham esa nib faninwal mak isa Gode baabenea Ne amitie ibsa ib molobseli walo unaib isa dohalim biania daaye binabibo genebueo e weng olo funanea Yuda nibo e okok kebob naka unang nibo daabenebo ge baananoa o wengo blimanole <sup>56</sup> Maliao Lisabeto am ye bekebo bua alimo asumatna blimanoa imin monoa olo bib onsobe.

*Lisabeto Yone aa fuayemin nakae dofasobe.*

<sup>57</sup> Lisabeto miine dofanamabo dimo tloa o miine naka ten dofanoa <sup>58</sup> Gode

omhalilanea men ele dobwene kesoa o bibam sel isa eka o meletan isa wenteniba isa seimbiba <sup>59</sup> amo 8 blimanoa nakaia unanga eli e aalo watlabanomo geniba teniba e niniino aalebe niniin ota imin Sekalaia ge nganabanom genabib otane <sup>60</sup> e awoko baanoa Yeye. E niniino Yon etabo ge baasoa <sup>61</sup> i baaboniba Ob meletani niniino inamini blimobo geniba <sup>62</sup> i Sekalaiae kobom weng baabaniba Keb mine niniino fatnangge nganabanamabebe? gesiba <sup>63</sup> e kobom weng baabeneba Ibo tomo olutneiba dolanano gesea i tomo olubasiba E niniino Yon etabo ge baa dolasea i bobol tem hekhek fumbiba <sup>64</sup> Sekalaiae weng olo dolabe dim ota e wengo hebmamsab webiane baanea Gode niniino dobtouleb nea <sup>65</sup> e bibam seli smiko deibe unoa eka wengo monoa Yudia bib mak bib mako beil bibo onon tlanoa <sup>66</sup> nakaia unangai wenteniba obianiba Naka ten ele sinanomo fatnamin naka namabene? ge funmonsio. Nininbabe, Sume emaye daabanetabe.

### *Sekalaiae wengobe.*

<sup>67</sup> Gode Hobe naka ten ele aalebe Sekalaiae bekeba bie kesoa e Gode wengo omkeimanea baanea <sup>68</sup> Yuda bib sel nibo nib Sume Gode tenea daabeneba nib hengmino walubene kesoa nib dimo enino imino mo tam tlamabobabe. Nibo e niniino dobtouleb nomo! <sup>69</sup> Gode naka sbale dobyebo, e Debite molofeitobo, e nibo hengmino temo biobo dotlanamabebo, <sup>70</sup> sinanggwano Gode e weng omkeimalin nakai weng olo omya dolaibbuo mema olo bain inanobe. <sup>71</sup> Sinanggwano Gode nib faninwali baabeneba Ib wasi naka isa eka nakai ibo mo gobe blibba isa ne ibo i kweiban dimo deiberia dleb unamabibo ge baabenebiobe. <sup>72</sup> Sinanggwano e inanea nib faninwali dohalilanea bain wengo baabeneba Ne amitie daayemabibo, ne weng olo sino baabeibuo mo dokotnenomobabo ge baabeneba <sup>73</sup> Gode bain weng olo nib fanine Eblahame baabanebuo mema olo inanea <sup>74-75</sup> nibo daabeneba nibo wasi nakai kweiban dimo dotlane kesoa nibo e okoko okok kemobo mo tosanomobe! Amitie e okoko okok kebianoba Gode kin dimo nibo kukub ayamo moloto olota wafu unomo ge baanea <sup>76</sup> eka Sekalaiae imin baanea

Ne miino, kobo nakaia unangai nganabkeniba God Sume weng omkeimalin nakabo ge nganabkeib kesoa kobo sin moneba Sume deibo kebanabebta e midtaneta tlamabebo, <sup>77</sup> kobo Gode i hengmino omlabeneba dlamabe weng olo omkayemale! <sup>78</sup> Sume nibo gobeneba daabeneba makob afoko walabbanoa bomat ge

tubunabo inanebe. Gode naka make dofakanea nib hengmino walubene kesoa olo makob nib ayalobe. <sup>79</sup> Nibo sino millilan bio tem tab bianoba kaanom genabob otane memalo e ayale tle kesoa nibo deib ayame alebeneba bobol ayam omyenea nibo deib eleta unomabbioho ge baasebe.

<sup>80</sup> Eka naka ten ele damanea e bobol temo kla funanea e ibuantem ye bie bita Isleli atemomabib dimo tlota motemetata nakaia unangai atemsio.

## 2

### *Maliao Yesuse dobmikisobe.*

*(Matyu 1:18-25)*

<sup>1</sup> Am olo dimo Lom bib seli komok sume niniino Sisa Ogastase baanea Bib mak bib mako alukum nakaia unangai niniino oyemabibo gesebe. <sup>2</sup> I sino kukub olo mo inaim blimobe. Mema olota kukub olo omfanibtabe. Am olo dimo Silia bib seli komoke niniino Sailinia eta kima bia <sup>3</sup> nakaia unangai alukum i bibamo deiboniba moniba faninwali binibbio bib ye motemoba niniino dolabeine geniba unebiba <sup>4</sup> eka Yoseb ele Debite molofeit kesoa e Galili betano bibo Nasalet bib ye danea monea Yudia betano e fanine Debite bibo niniino Betlehem bib ye motemano genea <sup>5</sup> Maliao Yosebe omakabaniba Yosebe alelobo geibbu otane i mo kam keim blimobe. O bekebanoa kam monoba niniino dolabeine geniba onsiobe. Iinasibo Maliao amunsa biotabe. <sup>6</sup> I inaniba moniba Betlehem bib ye bliba mene weme kesoa <sup>7</sup> o miine hek sume naka ten dofanoa o youme meklie dobbubanoa eil blumakau imen bumin bokise tem daak dofabiota. Nininbabe, nakaia unangai homoni Betlehem bib ye bianiba i niniino dola bianiba dait aalamin amo dinib kesoa i eil blumakau am ota aala bianibta mene dobmikisobe.

### *Eil sibsib kimanin nakai weng sangobe.*

<sup>8</sup> Eka am olo dim ota eil sibsib kimanin nakai kwitimid sibsibi bib asak ye kima bliba <sup>9</sup> Sume abisake daak tenabea Sume ayale abilim ut danea bomat ge tubunea i isak daak dlakasea atemniba tosiansiba <sup>10</sup> abisake baabeneba Ibo mo tosianimibe! Ne dowan weng ayamo baabenang genita daak tlibe. Nakaia unangai homoni weng olo wentaibo i seinomabiobo, <sup>11</sup> am olo dimo Debite bibo unang mako Sume Klaiste dofanobe. Klaiste mitmakamo Gode Dofakamin Nakabo, e nakaia unanga ibo hengmino temo bliho dotlanamabebe. <sup>12</sup> E biemo youme meklie dobbubanoa eil blumakau imen bumin bokise tem daak dofanoa aambiebo, ibo moniba ne wengo baabei olo watemniba e wengo bainobo

geine ge baabenabea <sup>13</sup> hebmsab abisel homoni daak teniba abisake mak esu ye daake teniba i Gode niniino dobtoulebianiba baaniba <sup>14</sup> Ni abilim ut bianoba Gode niniino kla dobtoule nomabbiobo, eka dabalim olo naka mak unang maki Gode gobe bie bobol tem ayam omyebo gesiobe.

*Eil sibsib kimanin nakai moniba Yesuse atemsiobe.*

<sup>15</sup> Abiseli inaniba deibeniba abilim uniba eil sibsib kimanin nakai baaniba Nibo monoba Betlehem bib unanoba Sume inamin namino baabene olo watemomogeniba <sup>16</sup> i hebmsab moniba Betlehem bib unaniba Malia osa Yoseb esa yatenniba eka mene eil blumakau imen bumin bokise tem daak biosa atemnasiobe. <sup>17-19</sup> I inaniba mene weng sango Gode abisake baabeneo omkayebiba Maliao weng olo wentenoa amitie fumbianoa bua eka i deibeniba moniba naka mak unang maki weng olo omkayebiba i wente bianiba bobol hekhek funiba <sup>20</sup> eil sibsib kimanin nakai deibeniba imin moniba eil sibsibi kima bianiba Gode weng olo abisake baabene osa eka i moniba Yesuse atem tlib osa fumbianiba Gode gangobo gabianiba e niniino dobtoule monsiobe.

*Simion esa Ana osa i weng sangobe.*

<sup>21</sup> Amo 8 blimanoa i Yesuse aalo watlabaniba e niniino Yesus ge nganabaniba sino awoko mo amunsaim blim bua abisake baabonea Ob miine dofanemebe e niniino Yesus ge nganabanale ge baabonebio kesoa o inanoa e niniino Yesus ge nganabanoa <sup>22</sup> Mosehe hekmel weng baanoa Unango memei dlano mole bua amo 40 blimanota o amun temo niniko klanoko! I hato moniba Gode am unaniba kulani dloniba Gode amo kimanin nakai doyiba Gode amo kimanin nakai yananiba Gode dlaliba e i niniko omltabeneko genobuo am olo tlo kesoa Yoseb esa Malia osa i Yesuse debetniba moniba Yelusalem bib unaniba Gode dabalomo geniba onsiobe. <sup>23</sup> Niminbabe, Gode buk temo baanoa Hek sume sin dofanomo debeb moniba Gode dabaline genoa eka <sup>24</sup> weng mak osa imin baanoa Ibo wan kubiamel ulabi asu yafu dleb moniba Gode amo kimanin nakai doyiba Gode amo kimanin nakai yananiba Gode dlaliba Gode i niniko omltabeneko genobua Yoseb esa Malia osa i weng olo fumbib kesoa i inanomo geniba Yesuse debetniba moniba Yelusalem bib ye temiba <sup>25</sup> naka make niniino Simione naka ayamobe. E Yelusalem bib ye binabebiotabe. E Gode wengo sbalma wafu bianea e Islel nakai bobol ayamo omyamabe nakae waisa bianea hembea

Gode Hobe e bekeba bisebe. <sup>26</sup> Gode Hobe sino Simione baabane Kobo kaanamabeb otane Gode Dofakamin Nakae Klaiste tlea atemnebta mitdata kaanamabeobo ge baabanebua <sup>27</sup> Gode Hobe debeb tamnea Gode am sum tam temnabea eka Yesuse aaleb kamwali Gode hekmel wengo olo baanobio inanomo geniba debeb teniba Gode am sumo tem tam temiba <sup>28</sup> Simione mene atemnea afu dobonea Gode niniino dobtoulebianea baanea <sup>29</sup> Sum kobo sino keb wengo baatnebbio memalo inaneba atemi kesoa ne bobolo ayam funania kaanamabibo, <sup>30-31</sup> kobo naka ele dofakanebbua ni hengmino temo biobo dotlanamabebe. Memalo tlea ne kino atemibe. Eka e sinanomo naka mak unang mak isa atemomabiobe. <sup>32</sup> E Yudabai ayal kesoa tubunea deib ayame alebenea atemniba Yudabai Islel ni niniino dotoule nomabiobo ge baanea Simione mene weng sango <sup>33</sup> aaleb kamwali baabesea wenteniba bobol hekhek fungsiba <sup>34</sup> e Gode baabane I daabenale ge baabane eka Maliao baabonea Gode men ele dofakanebua Islel nakaia unangai mito baka bianiba maki e bainobo geniba sbal maniba eka mak ile e mo bainobo geim blim keniba watwat danomabib kesoa nakaia unangai homoni e weng dobo weng ohamomabiobe. <sup>35</sup> I inaniba i bobol tem funino keim anoa naka mak unang maki watemomabiobo, obsa bobolo ilum omfubkenamabobo gesea <sup>36</sup> eka Gode weng omkeimalin unang mako niniino Anao Gode am sumo tem ye bio o aalebe niniino Fanyuel etabe. O Asae molofeitobe. O imake omonea kam kebliba bifolo 7 blimanoa e kaane kesoa <sup>37</sup> deibanosa besa bua bifolo 84 blimanoa o konokanobiotabe. O amitie Gode am sumo tem tam bianoa kwinomosa tab dim osa o Gode bobolo fumbianoa imeno mo unalin blim besa bianoa beten kebianoa Gode niniino dobtoule binabobua <sup>38</sup> am olo dimo tenoa Gode am sumo tem tamo Yesuse atemnoa Gode gangobo genoa Yelusalem bib seli i wasi nakai kweiban dimo Gode dotlanamabeo waisa hambib naka unangi men ele weng sango omkaye bisobe.

*Yoseb esa e alal hatwal isa moniba Nasalet bib onsiobe.*

<sup>39</sup> Yoseb esa Malia osa i Gode hekmel wengo baanobio inaniba blimanoa i imin moniba ili bibo Galili betano Nasalet bib ye bliba <sup>40</sup> i miine damanea titilo omonea e bobol temo kla funanea Gode kima bia ayam bisebe.

*Yesuse monea Gode am sumo tem tam onsebe.*

<sup>41</sup> Bifole elekiem elekieme Fasoba fal gamin dime amitie Yesuse aaleb kamwali moniba Yesusalem bib une binabib kesoa <sup>42</sup> Yesuse bifolo 12 blimanoa i imin inaniba Yesuse temnaniba moniba Yelusalem bibo <sup>43</sup> Fasoba falo downoniba blimanoa nakaia unangai dli moniba ili bibam unebib otane Yesuse Yelusalem bib ye bia aaleb kamwali mo atemim blim keniba <sup>44</sup> i funaniba Nakaia unangai homoni dlibib kesoa naka mak ita bekebe natlamabebo geniba am olokiemo dimo deiba bebianiba hen heniba moniba aam biin ye waisa bianiba hembiba i nekwali alukum mo temib otane e mo baka tlim blim kesoa <sup>45</sup> i imin kam moniba Yelusalem bib unaniba mene hembiba <sup>46</sup> amo asumatnao blimanoa i taniba Gode am sumo tem tam temiba bia atemsiobe. E aleyemin nakai bekebe bia i wengo ohabiba wente bianea kil baabenemeo i yang kesib eka <sup>47</sup> isak e kil baabasiba yang kese bianiba e tekein kemino ayam kesoa e klayam yang kebea i atemniba smiko deibe unoa <sup>48</sup> eka e aaleb kamwal isa atemniba i smiko deibe unoa e biemo baabanoa Men kobo inabebe aye ni kamo hembianoba e ayam bie bleka misiam bieso gabianoba bobol ilum omkayebobo, ninim kenebta kobo inabebe? ge baabasoa <sup>49</sup> e awok kamwali baabenea Nimin kenibta ibo ne hembibe? Ne Aye am ele bli olole ibo mo tekein kebibbayo? gesea <sup>50</sup> awok kamwali e wengo mitmakamo klaom mo tekein keim blim keniba <sup>51</sup> imin e temnaniba moniba ili bibo Nasalet bib ye bianiba awok kamwali wengo kla wente bianea inamin namino inanale genimibo klabea e biemo e kukub nabeo kla fumbisobe. <sup>52</sup> Yesuse ina bianea damanea e tekein kemino ayam anoa Gode kin dim osa nakaia unangai kin dim osa ayam ansebe.

### 3

*Yone aa fuayemin nakae weng sangobe.  
(Matyu 3:1-12; Mak 1:2-8; Yon 1:19-28)*

<sup>1-2</sup> Taibilias Sisiae Lom bib seli komokam bia bifolo 15 o blimanota Sekalaiaie mine Yone ibuantem ye bia Gode wengo omanseo dimo Fontias Failate Yudia bib seli komok anabea eka Helot ele Galili bib seli komok anabea eka e ninge Filib ele Itulia bib sel isa Tlekonaitis bib sel isa i komok anabea eka Laisenias ele Abilini bib seli komok anabea eka Anas esa Kaiafas esa ile Gode amo kimanin nakai komokwali i sum ana blibtabe. <sup>3</sup> Am olo dimo Yone ibuantemo deibonea monea bib mak bib mako aaye Yodane ken ye haabianea Gode wengo omkaye bianea baabenea Ibo

hengmino deiboniba ib bobol temo dekina omoniba Gode omaliba ne aaye fue-labeia Gode ib hengmino omtlabeneko ge oye bisebe. <sup>4</sup> Sinanggwano Gode weng omkeimalin nakae niniino Aisaiae Gode wengo dolanea baanea

Naka make ibuantem ye bianea ngam-bianea Sume tlamabeo deibo kebaniba klaubaine! <sup>5</sup> Bilo dafamano biamo getitina webianiba eka amgolim osa beil osa taiba daake nganana bianoa Deibo dakal biamo molot deib kena bianiba eka deibo tom tem tem biamo daketoufaniba klaine! <sup>6</sup> Gode naka make nakaia unangai hengmino temo blibo dotlanang genea dabanea daak tlamabe nakaia unangai alukum atemomabiobo ge nganamabebo ge baanea dolanebuo

inanoa <sup>7</sup> naka homon unang homoni funaniba Ni motemoba Yone aaye fue-labeneko geniba dli tetemiba Yone baabenea Inab memei ulab ibo kukub misiam sma wafu bliobe. Gode ib kukub misiam olo yang kenea enin sumo ib dimo tam tlamabobe. Waneta baabeneta Ibo aaye fue-lanimibo Gode ib kukub misiam mo yang kenamabebabo ge baabenebiote? Ne mo baabeim blimobe. <sup>8</sup> Ibo kukub ayam wafueiba ne yatem tekein kenita I hengmino deiboniba i bobol temo deskinaniba Gode omalibbiobo genita aaye fue-labenano! Ibo mo funanibta Ni Eblahame molobselobo, Gode ni hengmino omtlabenamabebo ge funanimibe! Wentine! Ibo hengmino mo deiboniba ib bobol temo deskinaim blim keib mole ibo Eblahame molobselobo gabib olo mo daabenota Gode kin dimo molot anomabibbabe. Gode tom olo baabonea Obo nakanale ge baabone mole o inanoa Eblahame molobsel anamabo kesoa ibo ib hengmino mo deibueim blim kenimibo ibo tomo mo gaisonomabibbabe. <sup>9</sup> Memalo Gode nakaia unangai kukubo klabe kesoa klaine! Makob aso yamo balinim blim biamo nakai teniba aso haniba feboniba kibanabo inaminobe. Ibo ib hengmino mo deibueim blim bliib kesoa ibo makob aso yamo mo balinim blim buo ulabobe. Gode ibo yananamabebo ge baabesea <sup>10</sup> i baabaniba Inanamabe kesoa ni fatnanomabbione? gesiba <sup>11</sup> Yone baabenea Naka make e youmo asu bibabua make youmo blim biameo emi eta dabaleko! Eka naka make imensa bie mole make imen blim biame olaleko ge oyemonsebe. <sup>12</sup> Eka e inabea takis moni bokalin naka isa Yone aaye fue-labeneko geniba teniba Yone baabaniba

Ni fatnanomabbione? Kobo alebenale gesiba <sup>13</sup> e baabenea Ibo nakaia unangai mo dim oye bianibta i monio oise unemibe! Ibo takis monio olota boka bianibte ge baabesea <sup>14</sup> eka awa gernalin naka isa baabaniba Ni fatnanomabbione? gesiba Yone baabenea Ibo nakai mo yebianibta inamin namino ayoko mo henimibe! Eka ibo nakai dim wengo mo oye bianibta i afobeingo oise unemibe! Ibo ib okok monio bokabibo olota fumbianiba seinine ge baabesea <sup>15</sup> Yuda nakaia unangai funaniba Gode Dofakamin Nakae waisa hembinaobob etabo geniba i Yone wengo wenteniba i bobol temo funaniba Gode Dofakamin Naka etaso gesiba <sup>16</sup> Yone baabenea Ne ibo aaye fuayebi otane naka make ne abuk tlamabe eta Gode Hobe dabanea tenea ib bobol temo tlanea makob aso eimbianoa inamin namino kibanoa nemat genabo inanea ib bobol temo as kibain kenea ib hengmino nemat genamabebe. E titilo ne titilo gaitnenamabebe. E sumobe. Ne sumba kesoa ne e mo tenanobta wengo baanomobbabe. <sup>17</sup> E makob naka make difib glitamina wafunea imen tounin biino glitanea imen ayamo olminea eka imen misiam osa aal osa banea oleb monea ase amit eimbinabe tem wat fanamabe inanea Yesus esa nakaia unangai maki dleb monea bib ayam danea eka mak ile dleb monea bib misiam da nanamabebo ge oye bianea <sup>18</sup> eka weng mak osa aleye bianea Gode dowan wengo omkayemonsebe.

*Yone Yesuse aaye fuelabasebe.  
(Matyu 3:13-17; Mak 1:9-11)*

<sup>19-22</sup> Yone nakaia unangai Gode dowan wengo omkaye bianea eka aaye fuaye biam nabianea Yesus esa fuelabasea e Gode nganha bea abile belanea Gode Hobe makob wan kubiamieie ulab daakenea Yesuse dim ele tleta weng mako abilim ut danao baanoa Kobo ne miinobo, ne kla gobke biania seinkebibo ge baabasobe. Yone inanea nakaia unangai Gode dowan wengo omkayebeo dimo Galili komoke niniino Helote e ninge Filibe alelo niniino Helodiaso omeisanea eka okok afet osa misiam nabiam bia Yone baabanea Keb kukubo misiamobo ge baabanebio kesoa Helote Yone klabuto ge debeb onsebe. Helote ele kukub nabe ota Yone baabane otane e deitnenebabo genea klabuto gebase olo dot misiamobe.

*Yesuse faninwali niniinobe.  
(Matyu 1:1-17)*

<sup>23</sup> Yesuse bifolo 30 blimanoa e Gode okoko kilonea okok kebea i funaniba E Yosebe miinobo gesiobe. Eka Yoseb ele Hilaie miinobe. <sup>24</sup> Eka Hilai ele Matate miinobe. Eka Matat ele Libaie miinobe.

Eka Libai ele Melkaie miinobe. Eka Melkai ele Yanaie miinobe. Eka Yanai ele Yosebe miinobe. <sup>25</sup> Eka Yoseb ele Matataiase miinobe. Eka Matataias ele Emose miinobe. Eka Emos ele Neame miinobe. Eka Neam ele Eslaie miinobe. Eka Eslai ele Nagaie miinobe. <sup>26</sup> Eka Nagai ele Meate miinobe. Eka Meat ele Matataiase miinobe. Eka Matataias ele Semene miinobe. Eka Semen ele Yoseke miinobe. Eka Yosek ele Yodaie miinobe. <sup>27</sup> Eka Yoda ele Yoanane miinobe. Eka Yoanan ele Lesae miinobe. Eka Lesa ele Selababele miinobe. Eka Selababel ele Sialtiele miinobe. Eka Sialtiel ele Nelaie miinobe. <sup>28</sup> Eka Nelai ele Melkaie miinobe. Eka Melkai ele Edaie miinobe. Eka Eдай ele Kosame miinobe. Eka Kosam ele Elmedame miinobe. Eka Elmedam ele Eae miinobe. <sup>29</sup> Eka Ea ele Yosuae miinobe. Eka Yosua ele Eliesa e miinobe. Eka Eliesa ele Yolime miinobe. Eka Yolim ele Matate miinobe. Eka Matat ele Libaie miinobe. <sup>30</sup> Eka Libai ele Simione miinobe. Eka Simion ele Yudae miinobe. Eka Yuda ele Yosebe miinobe. Eka Yoseb ele Yoname miinobe. Eka Yonam ele Elaiakime miinobe. <sup>31</sup> Eka Elaiakim ele Melia e miinobe. Eka Melia ele Menaie miinobe. Eka Mena ele Matatae miinobe. Eka Matatae ele Netane miinobe. Eka Netan ele Debite miinobe. <sup>32</sup> Eka Debit ele Yesie miinobe. Eka Yesi ele Obet e miinobe. Eka Obet ele Boase miinobe. Eka Boas ele Salmone miinobe. Eka Salmon ele Nasone miinobe. Eka Nason ele Aminadabe miinobe. <sup>33</sup> Eka Aminadab ele Admine miinobe. Eka Admin ele Anaie miinobe. Eka Anai ele Heslone miinobe. Eka Heslon ele Felese miinobe. Eka Feles ele Yudae miinobe. <sup>34</sup> Eka Yuda ele Yekobe miinobe. Eka Yekob ele Aisake miinobe. Eka Aisak ele Eblahame miinobe. Eka Eblaham ele Telae miinobe. Eka Tela ele Nehoe miinobe. <sup>35</sup> Eka Neho ele Selake miinobe. Eka Selak ele Liyue miinobe. Eka Liyu ele Feleke miinobe. Eka Felek ele Ibae miinobe. Eka Iba ele Silae miinobe. <sup>36</sup> Eka Sila ele Kenane miinobe. Eka Kenan ele Afaksate miinobe. Eka Afaksat ele Sieme miinobe. Eka Siem ele Noae miinobe. Eka Noa ele Lemeke miinobe. <sup>37</sup> Eka Lemek ele Metusalae miinobe. Eka Metusala ele Inoke miinobe. Eka Inok ele Yelete miinobe. Eka Yelet ele Mahalalile miinobe. Eka Mahalalil ele Kenane miinobe. <sup>38</sup> Eka Kenan ele Inose miinobe. Eka Inos ele Sete miinobe. Eka Set ele Adame miinobe. Eka Adam ele Gode miinobe.

## 4

*Gululame Yesuse dabamatemsebe.  
(Matyu 4:1-11; Mak 1:12-13)*



<sup>1</sup> Gode Hobe Yesuse bekeba bianea debetnea Yodane deibanea monea ibuan-tem naka blim ye bia <sup>2</sup> amo 40 ye blimanso Gululame dabama tem dabama tem bise otane Yesuse e wengo mo wentim blimobe. Yesuse inabea amo 40 ye blimanso e imeno mo doweim blim besa bia imen teb ananota <sup>3</sup> Gululame Yesuse baabanea Kobo baaneba Ne Gode miinobo gabeb kesoa kobo tom ele baabaneba imen anea downale gesea <sup>4</sup> Yesuse Gululame baabanea Gode buk temo baanoa Imeno nakae afen smike mo dabalambob-  
abo genobiobo ge baabasea

<sup>5</sup> deibanea eka debeb utnea amgolim ut unanea hebmamsab dabalim olo betano alukum komokwali kima blibo alebanea <sup>6</sup> eka Gululame Yesuse imin baabanea Dabale kimanin titil olosa eka e niniin sum osa alukum kobo omklamabibe. Inamin namin olo alukum nemi anobio kesoa nemiobe. Eka ne baania omkli mole naka maki mo yeye genimibbabe. <sup>7</sup> Kobo ne niniino nemtouben ne mole ne omklam-  
abibo gesea <sup>8</sup> eka Yesuse Gululame baabanea Gode buk temo baanoa Kobo Sume Gode elekiem ele niniin ota dobtouben bianeba ele okok ota okok kemale genobiobo gesea

deibanea <sup>9</sup> eka imin debetnea moniba Yelusalem bib ye unaniba debeb utnea Gode am sumo golim ut unanea baabanea Kobo baaneba Ne Gode miinobo gabeb kesoa gobbia daak one! <sup>10</sup> Mo kananomobabe. Niminbabe, Gode buk temo baanoa Gode abiseli baabanea kimaniba <sup>11</sup> kafu komomabib kesoa tom yango mo bilab kenomobabo genobiobo gesea

<sup>12</sup> Yesuse baabanea Gode buk temo baanoa Keb Sume Gode mo dabama temaebe genobio

kesoa Ne keb wengo wenti mole Gode dabama temamabibo gesea <sup>13</sup> Gululame Yesuse dabamatem dabamatem bio yeb minim kenea funanea Ne deibaibua imino dim ota dabama temano genea deiba onsebe.

*Yesuse okoko mikiktemo Galili betan ye kilosebe.*

*(Matyu 4:12-17; Mak 1:14-15)*

<sup>14</sup> Gode Hobe titilo Yesuse bekeba bio kesoa e monea Galili betan ye unea e weng sango Galili bib mak bib mak osa eka bib afet osa onon tlasobe. <sup>15</sup> Yesuse monea Gode amo tem tam unanea Gode wengo aleyebea nakaia unangai Yesuse niniino dobtouben bisioebe.

*Nasalet bib seli Yesuse wengo omdibiha monsiobe.*

*(Matyu 13:53-58; Mak 6:1-6)*

<sup>16</sup> E monea Nasalet bibo sino e gwabo bib olo bianea damanebio bib ye unanea bib mak mako haabia Gode singkalin amo bomanomo e monea Gode am une binabe kesoa memalosa inanea tanea manea Gode buko weng sango kinano genabea <sup>17</sup> i Gode weng omkeimalin nakae Aisaiae dolanebuo omubasiba bantaba watermnea kibianea weng olo baanoa

<sup>18</sup> Gode Hobe ne beketne bianea nemakanea baatnenea Kobo moneba nakaia unangai imen osa afobeing osa blimi Gode dowan wengo omkayemale! Eka kobo moneba klabut am unaneba nakaia unangai klabut am blibi baabeneba Klabut amo deiboniba unine ge baabenale! Eka nakai kino tum gebenobuei klaubenale! Wasi nakai teniba naka maki enino omkayebib kesoa kobo moneba naka eli baabenale ge baatnenea <sup>19</sup> e imin baatnenea Kobo moneba Sume nakaia unangai kimanamabeo dimo tlamabobo ge baa omkeimanale ge baatnenebo ge baanea dolanebio gesea

e kimino blimanoa <sup>20</sup> e buko kakibinea Gode amo okok nakae omanea e daak tounea Gode wengo baa omyang ge kesoa nakaia unangai Yesuse atembiba <sup>21</sup> e baabeneba Ne Gode buk temo weng sang olo kibia ibo wentibo memalo weng olo bain anoa yamo balinobo gesea <sup>22</sup> i e wengo wenteniba baaniba E wengo bainobobo geniba i smiko deibe unoa baaniba E Yosebe miin otane e nimin keneta weng olo baabenene? gabiba <sup>23</sup> e baabeneba Ibo saa weng olo baatneniba Kingkan kobo kebmaye kleb skil sitaneba ayam aneb mole ni katemnoba Kobo bainobo genom! Kobo Kabaneam bibo bianeba okok sumo klabeba wateme binibbuo ni weng sango wentenobbuo kobo keb damanebbio bib olosa inaneba klaneb mole ni katemnoba Kobo bainobo genomabbiobo ge baatnenom genabiobo ge baabeneba <sup>24</sup> e imin baabeneba Gode weng omkeimalin nakai moniba ili bibam sel isu unaniba wengo omkayebib otane i weng olo bibam seli mo wenteyebibbabe. <sup>25</sup> Ne moton wengo baabenamabibe. Ibo wentine! Sino Gode weng omkeimalin nakae Ilaiyae Islel bib ye bie dimo bifolo asumatnao blimanoa eka alimo asuke asuke asuke nao blimananobio soko mo tlemin blim kesoa imen sano namanoa nakaia unangai imeno blim imen teb blibta Isleli unang sosen homoni Islel bib ye blibo <sup>26</sup> Gode

Ilaiyae mo baabaneta Kobo moneba Islel bib seli soston isu unaneba daabenale ge baabaim blimobe. E baabanea Kobo mon-eba Saidon betano bib mako niniino Salefat bib unango soston Yudaba osu unaneba daabonale ge baabanea dabanea unebiobo ge baabenea eka <sup>27</sup> imin baabenea Sino Gode weng omkeimalin nakae llaisae Islel bib ye bie dimo Islel bib seli naka homoni yaio amit wenyne binabuei mo ayamu benim blim otane Silia bib sake Yudaba nakae Nemanee yaio ayamu banobiobo gesea <sup>28</sup> nakaia unangai alukum Gode am tamo blibi Yesuse wengo wentib kesoa dobsuanasiobe. Niminbabe, e baanea Gode weng omkeimalin nakai ili bibam seli mo daayemin blimobo, i Yudaba ita daaye binibbiobo gene kesoa <sup>29</sup> i haananiba bibo fotebeniba i bibo amgolim kesoa afu debet metniba amgolim aatda met unaniba dobbianoba daaknea ananoko gesib <sup>30</sup> otane Yesuse nakaia unangai glagla temte onsebe.

*Yesuse naka make hob misiambe bekeba bie fotebebasebe.*

*(Mak 1:21-28)*

<sup>31</sup> E daaknea Galili betano bibo niniino Kabaneam bib daak unanea Gode singkalin amo dimo nakaia unangai Gode wengo aleyehea <sup>32</sup> i e wengo wenteniba funaniba E dabalim naka otane e wengo hekmel weng tekein kemins nakai wengo ulabababo, e wengo titilsabo geniba dlou onsiobe. <sup>33</sup> Nakae hob misiambe bekeba bie Gode am tam bianea weng sum ngambianea <sup>34</sup> Yesuso, Nasalet bib sak kobo ni fatnabenamabebe? Kobo teneba ni yenanang genebta tlebo? Kobo ni mo yenanemebe, deibenale! Ne tekein kebibo kobo naka kining Gode miinobo ge nganse <sup>35</sup> Yesuse hob misiam ele sbal weng baabanea Kobo kimik geneba naka ele deiba one gesea hob misiambe naka ele dobbianea tabnea nakaia unangai isak tab blelanea e deibanea onsea e mo misiam nabaim blim kesoa <sup>36</sup> nakaia unangai alukum atem- niba i smiko deibe unoa i sinwalo obianiba E wengo omkeimane yo mitmakamo fatnamine? E wengo makob komokwali wengo ulab kesoa e hob misiami sbal weng baabanea e wengo wenteniba naka ele deiba uniobo gesiba <sup>37</sup> e weng sango monoa Galili betano bib mak bib mak yo onon tlasobe.

*Yesuse Fitae andloko gembua klausebe.*

*(Matyu 8:14-17; Mak 1:29-34)*

<sup>38</sup> Yesuse Gode amo deibonea monea Saimone am tam teme Saimone andloko kweimo webua gembianoa aambio kesoa naka maki baabaibo Kobo daabonamabebo? gesiba <sup>39</sup> e wentenea watnea osu wat manea baabonea Ginino blimubonale gesea blimubonoo o hebmamsab hananoa Yesus esa e meletan isa imeno fubenoa downsiobe.

*Yesuse nakaia unangai homoni klausebe.*

*(Mak 1:35-39)*

<sup>40</sup> Kwinoa afoko dawabbanoa bibo yo seli ginin gami dleb teniba Yesus esu ele tliba e kweilono i gabam dim ut tebelubene-nea ayaman toubiba <sup>41</sup> eka nakaia unangai hob misiami bekebe blib ile hob misiami fotebesea nakaia unangai deibeniba unom gabianiba baabaniba Kobo Gode miin kebtabo ge baabasiobe. I tekein kebianiba Yesuse Gode Dofakamin Nakabo gabib kesoa i e niniino omkeimabanom genamsiba e i sbal weng baabenea Ibo wengo mo omibe! Kimik geine ge baabesea i deibaniba uniba e aansenoma <sup>42</sup> kwitimib hananea bib olo deibonea monea ibuantem ye bebea nakaia unangai Yesuse ikam faniba kan metniba baabaniba Kobo ni mo deibenebta unaebe! Ni bib ele biante ge baabasib <sup>43</sup> otane e baabanea Ne monia bib mak bib mako Gode kimanamin amo tam tlamabo down weng olo omyamabibo, Gode ne okok olo deib ota nemanee daak tlibiobo ge baabenea <sup>44</sup> deibe monea Yudia betano bib mak bib mako Gode amo temo Gode wengo omkaye monsebe.

## 5

*Fitae aning homoni yalosebe.*

*(Matyu 4:18-22; Mak 1:16-20)*

<sup>1</sup> Yesuse am mak bomanoo aamuke niniino Genesalete ken ye mabia nakaia unangai Gode wengo wentom geniba Yesuse ge daba waisasiba <sup>2</sup> e teme wese me gwabo asu aamuke ken ye oginibbio kesoa watemse otane aning yemin nakai wesemeo deiboniba aameno fubabiba <sup>3</sup> Yesuse daaknea Saimone weseme tem daak unanea baabanea Saimon kobo weseme dliba obaneba keno deibo waseinin keneko gesea e inanea obanea wat onsea Yesuse daaknea weseme tem daak tounea nakaia unangai Gode wengo omkayemonsebe.

<sup>4</sup> Yesuse inanea omkayebea blimanoa e Saimone baabanea Weseme obaeba watnea aa dang wat unea ibo aameno omaib daak unoa aningi haaniba mo yaline gesea <sup>5</sup> Saimone Yesuse wengo yang kenea baabanea Aleyemin naka kobo wentene! Kwitimib beselib olo ni bumolok bianoba

aningsi men isa mo yenaim blim besa ye hantesob otane aleyemin naka kobo inangge baaneb mole ni aameno omanoba daak unamabobo gesea <sup>6</sup> i inaniba omailb daaknota aning obba homoni baniba aameno belanang gabua goleb ute daniba <sup>7</sup> i nekwali weseme make tem daak blibo nganabeoba Te daabeine geniba nganabesiba weseme make obeb watesiba aningsi minim klutaniba weseme make tem daak babanaiba wesemeo abil alonoa oleb daak unang go kesoa <sup>8</sup> Saimon Fitae e niniino asube, e watemnea Yesuse skilono kikib ye dlong dlong golbuanea debelon sin aaunanea Yesuse baabanea Sum kobo deitne one! Ne hengmin gamobo gesebe. <sup>9</sup> Niminbabe, e aningsi yalib ota yatemneta inasea eka naka maki e temna blib isa smiko deibe unoa <sup>10</sup> Saimone nekwali Sebedie meleli naka teni asuei niniino Yemse Yone i dab osa inaniba i smiko deibe unoa dlou onasiba Yesuse Saimone baabanea Kobo mo tosiyanemebe! Kobo memalo aning yemin nakabo, sinanomo kobo nakaia unangai dleb te ne mitem tlemin naka namabeobo ge baabasea <sup>11</sup> i inaniba weseme obeb watniba ken wat obaniba i inamin namino alukum ye deiboniba Yesuse bekeba onsiobe.

*Yesuse naka make yayo klaubasebe.  
(Matyu 8:1-4; Mak 1:40-45)*

<sup>12</sup> Yesuse bib sum mak ye bia naka make yayo kitdibiha binabue ye bianea e Yesuse atemnea e kibi kaba sin ye dlong dlong golbuanea debelon sin mesa aaunanea tlabianea baabanea Sum kobo keb titilo sbal kesoa kobo daatnenemebo ne yayo ayamut nenamabobo gesea <sup>13</sup> Yesuse kwei tobbia afunea baabanea Ae ne klaubkeia ayam anamabeobo ge baabanabea hebmamsab e yayo kitdibiha binabuo blimanoa ayamu basoa <sup>14</sup> Yesuse baabanea Kobo naka maki mo baabenemebe! Kobo hebmamsab moneba Gode amo kimanin naka esu unaneba keb aalo alebaneba katemnea keb yayo ayamub kenobo geneko Mosesehemkel wengo baanoa keb yayo ayamub keno mole wani asu dloneba eka eil sibisibe dobo naneba dlebneba moneba Gode amo kimanin naka esu ye temeba katemnea kobo kulan eli dlaleba dloneba Gode dlalea nakaia unangai katemniba keb yayo ayamub kenobo geine genobiobo gesea deibanea unea <sup>15</sup> Yesuse kukubo naneo wengo onon tlano kesoa nakaia unangai funaniba Nibo monoba e wengo wenteboba e nib ginino klaubeneba ayam anomo ge funaniba i moniba Yesus esu une monsib <sup>16</sup> otane e amitie monea ibuantem ye une bianea Gode nganha biseba.

*Yesuse naka make skila kweilao dimilubanobua klaubasebe.*

*(Matyu 9:1-8; Mak 2:1-12)*

<sup>17</sup> Am mak dimo Yesuse nakaia unangai Gode wengo aleyebea Felisie mak isa eka hekmel weng tekein kemin naka isa te toulablibi bibamo maki Galili betan da te eka maki Yudia betan da te maki Yelusalem bib da tenaibbue isa ye bliba eka Sume titilo Yesuse daababia nakaia unangai ginino klayebeta <sup>18</sup> eka naka make skila kweilao dimilubanobua naka maki atge debeb tanoba biin tam Yesuse kikib ye dofanomo geib <sup>19</sup> otane nakaia unangai diniba ginin game debeb tam onamin deibo waiseib kesoa i debeb utniba aman alim ut unaniba amano holo kenaniba nakae glout baka sai da afu dabaiba daaknae Yesuse kibi kaba sin daak temea <sup>20</sup> Yesuse i bainobo galino watemubenea baabanea Neko, ne keb hengmino omlabkeiobo gesea <sup>21</sup> hekmel weng tekein kemin naka isa eka Felisie isa wenteniba obianiba Naka ele fatnamin naka bianeta Ne keb hengmino omlabkeiobo gabene? E weng olo misiamobe. Naka maki hengmino omlabenamino blimobo, Gode elekiem eleta nakai hengmino omketuyemin nakabo ge omsiba <sup>22</sup> Yesuse i bobol tem funino tekein kenea baabanea Ibo nimin kenibta inangge fumbibe? Ib bobol tem funin olo misiamobe. <sup>23</sup> Ne ibo fatnamin weng ota baabeita ibo ne titilo tekein kenomabibe? Ne naka ele baabania Ne keb hengmino omlabkeiobo gei mole ibo tekein keniba E wengo bainobo genomabiba bleka? Yeye kukub olo ibo mo tekein kenomabibbabe. Otane ne baabania Kobo hananeba keb glouto ometneba one genimi ota ibo kukub olo watem tekein keniba E bain titilsabo genomabiobe. <sup>24</sup> Ina otane ne fumbio ibo tekein keine! Abilim Da Tlemin naka ne dabalim olo hengmino omlabenamabio titilsa kesoa omlabenamabibo ge baabenea e skil misiamane baabanea Ne baabkenamabibo, kobo hananeba keb glouto ometneba moneba kleb bibam one gesea <sup>25</sup> e inanea naka homon unang homoni kin dim ye hananea e glouto ge debeb tlibua aambio ometneba monea ele bibam unanea Gode niniino dobtouleb ne kesoa <sup>26</sup> nakaia unangai smiko deibe unoa tosiyaniba kweilono ha wembianiba Gode niniino dobtouleb bianiba baaniba Kukub olo afetmin tam tlotla watemobobo gesiobe.

*Yesuse Libaie nganabasebe.  
(Matyu 9:9-13; Mak 2:13-17)*

<sup>27</sup> Sinanoa Yesuse motemea naka make takis moni bokalin am tam toumbianea monio bokabea atemse e niniino Libai

etabe. Yesuse inanea atenea baabanea Kobo be ketne nale gesea <sup>28</sup> e hananea afobeinga inamin naminao ye deibonea Yesuse bekeba onsebe.

<sup>29</sup> Libaie ele am tam imen homono fune takis moni bokalin naka isa eka naka mak isa eka Yesuse Libaie i dab osa tenaniba imeno wembiba <sup>30</sup> Felisie isa eka hekmel weng tekein kemín nakai Felisie meletan isa Yesuse okok aleyemin nakai baabeniba Ibo nimin kenibta imena aayao takis moni bokalin naka isa eka naka maki hengmin afeto nabib isa imeno baka wembibe? gesiba <sup>31</sup> Yesuse i wengo wentenea saa weng mako baabenea Nakai gembibbai mo moniba dokta isuo mo unaibbabo, gembib ita monibta dokta isuo unaibobe. <sup>32</sup> Ne tlibu osa inaminobo, ne mo tenita naka ayam unang ayam ita daabeita bainobo geine geta tlibiobabo, ne tenia nakaia unangai hengmin gam ita daabeia i bobol temo deskina Gode omaline genita tlibiobo ge baabesebe.

*Sin kukub osa mema kukub osa o weng otabe.*

*(Matyu 9:14-17; Mak 2:18-22)*

<sup>33</sup> Naka maki Yesuse baabaniba Am mak bomanomo bomanomo Yone okok aleyemin nakai Gode niniino dobtoulele nomabib kesoa i imeno mo wembibbabo, i hala bianiba amitie beten kebiba eka Felisie okok aleyemin naka isa inabiam blib otane keb okok aleyemin naka ile inanamino deiboniba Gode nganhamom gaibo imena aayao wembiobo gesiba <sup>34</sup> Yesuse wentenea e atdimmo mo kaaim blim sma e okok aleyemin nakai tena blib kesoa saa weng mako baabenea Naka make alelo omang genea e nekwali baka biameo i imeno halanomabiba bleka? Yeye i seimbiana imeno wembiam biniba <sup>35</sup> sinanoa makaai alelo omang gabe nakae debeb uniba e kibi alang blim keneme o dim ota e nekwali bobolo ilum omfubenoa imeno halanomabiobo ge baabenea <sup>36</sup> eka saa wengo mako imin baabenea Nakai youme meklie mo balonibta sin youme mo dababma bikinimibabe. I inaniba fubanimibo mema youme gogolanea sin youme menga debeb tetenasea sum belanea misiam anamabebe. Eka youme meklie baloniba sin youme dababma bikinimibo youme meklie sin youme kiminbabe. <sup>37</sup> Nakai eil memei aalo gato mo gwelolonibta waen aayo memao mo banimibbabe. Inaib mole waen aayo sitanoa eil aalo banoa waen aayo unamabobe. <sup>38</sup> Nakai eil aalo mema ota waen aayo memao ibaine! I inanimibo eil aale mo belaneta waen aaye mo unamebabe. <sup>39</sup> Eka nakae waen

aaye sin eta downameo e memae mo gobanamabebabe. E baanea Sine dit ayamobo genamabebo ge baabenasebe.

## 6

*Singkalin amo okoko awem omkalin wengobe.*

*(Matyu 12:1-8; Mak 2:23-28)*

<sup>1</sup> Singkalin am bomabua Yesuse e okok aleyemin nakai dletnea wit dang tla bebianiba e okok aleyemin nakai wito yamo mako molaniba kwei tuba kikekaniba blongo gamdibiniba unam bebiba <sup>2</sup> Felisie baabeniba Ibo nimin kenibta inabibe? Ibo nib hekmel wengo welaniba singkalin am otane ibo wit yamo molaniba kikekaniba blongo gamdibibib yole okok kebiobo ge baabesiba <sup>3</sup> Yesuse baabenea Ibo sinanggwano nib fanine Debite nanebuo weng sango buk temo kibinabib otane o mitmakamo mo tekein kebibbabe. Am olo dimo Debit esa e meletan isa imen teb yemsoa <sup>4</sup> e tanea Gode am tam temeaa Gode amo kimanin nakae bleto Gode heitdaha bianiba tobibo olalea downonea eka atosino e meletani oyea downasibo blet olo i awemobe. Nib hekmel wengo baanoa Gode amo kimamin naka ita unaline genobu otane Debitwali downosiobo ge baabenea <sup>5</sup> eka imin baabenea Abilim Da Tlemin Naka ne titilsa kesoa Gode singkalin amo dimo ne baania Okok olo naine eka okok olo mo nanimibe genimio ayamobe. Niminbabe, ne singkalin amo kimaninobo ge baabesebe.

*Gode singkalin amo Yesuse naka make kweilone klaubasebe.*

*(Matyu 12:9-14; Mak 3:1-6)*

<sup>6</sup> Gode singkalin am mako Yesuse tamnea Gode amo tem tam unanea Gode wengo nakaia unangai omkayebaa naka make kweilone kweitasine debelabanebue ye bia <sup>7</sup> hekmel weng tekein kemín naka isa eka Felisie isa ateniba fumbianiba Memalo Gode singkalin am kesoa nibo naka ele atemeboba Yesuse klaubanea atemob mole kot kebanomo ge fumbiba <sup>8</sup> Yesuse i bobol temo funino tekein kenea nakae kweile debelabanebue baabanea Hananeba isak ele manale gesea e hananea masea <sup>9</sup> Yesuse hekmel weng tekein kemín naka isa Felisie isa baabenea Ne kil baabenamabibo, nib hekmel wengo Gode singkalin am bomanomo fatnaine genobione? Kukub misiam namine genobua bleka kukub ayam namine genobuo? Nibo nakaia unangai daabenoba ayam aina bleka yenanoba kaaino? ge baabenea <sup>10</sup> eka e nakaia unangai alukum yateme bianeaa nakae kweil misiam baabanea Keb kweilone tobtalonale gesea e

inanea kweilone tobtalonea ayamu basea<sup>11</sup> i atemniba atliaubesoa obianiba Nibo Yesuse fatnabanome? ge omonsioebe.

*Yesuse e okok dlasanin nakai 12 i dlakasebe.*

*(Matyu 10:1-4; Mak 3:13-19)*

<sup>12</sup> Am olo dimo Yesuse Beten kemano genea monea bibilim ye unanea kwitimib beselibo beten kebea bomanoa<sup>13</sup> e okok aleyemin nakai nganabenea tliba 12 ita dlakanea Ibo ne okok dlasanin nakabo ge baabesebe. Niniin olo mitmakamo makob Yesuse okok dlasanin nakabe.<sup>14</sup> Naka make Saimon otane Yesuse e niniin mako Fita ge nganabasebe. Saimon Fitae e ninge Endlu esa eka Yems esa e ninge Yon esa Filib esa Batolomyu esa<sup>15</sup> Matyu esa Tomas esa Yems afete Alfise miin esa Saimon afete Lom seli kimanin kukubo mo gobe binabea naka esa<sup>16</sup> Yudas afete niniin aseke Yemse miin esa Yudas Iske-liote Yesuse komokwali dobyamabe naka esa itabe.

*Yesuse nakaia unangai klayemonsebe.*

*(Matyu 4:23-25)*

<sup>17</sup> Yesuse inanea e meletani dletnea daakniba dabalim keim ye mahalisiba nakaia unangai Yesuse wengo wentebib isa eka nakaia unangai maki Yudia betan da te maki Yelusalem bib da te nanabiba eka mak ile aa kek bibo niniino Taia bib osa Saidon bib osa blibi te naibbua ye bliba<sup>18</sup> naka homoni hob misiami bekebe blibi bib mak da te bib mak da te binibbua Yesuse hob misiami fotebenea ayam ambiba<sup>19</sup> Yesuse titilo sum kesoa nakaia unangai kweilono melebasiba e titilo monoa nakaia unangai dim unoa ayam an toubisioebe.

*Seinin naka isa simanin naka isa i weng sangobe.*

*(Matyu 5:1-12)*

<sup>20</sup> Yesuse e okok aleyemin nakai yateme bianea baanea Nakai dabalim olo inamin namino blim ibo seinine! Niminbabe, Gode daaye bianea kla kima biebe.<sup>21</sup> Wanibta memalo imen tebo mole ibo seinine! Sinanomo downoiba matwayamabobe. Wanibta memalo mebib mole Gode gangobo geine! E seinye bianea sinanomo ibo bobol ayamo omyamabebo ge baanea<sup>22</sup> eka imin baabenea Sinanomo Abilim Da Tlemin Naka ne bainobo getneniba beketne haaniba naka maki yatemniba atliaubenoa ibo fotebe nabianiba weng dobo weng oye bianiba ib niniino wat-wat dayemibo ibo seinine!<sup>23</sup> Inayemib mole ibo bobol ayam fumbianiba seinine! Ina binib biamo sinanomo Gode abilim uto inamin namin ayamo homon

doyamabebe. Sinanggwano i faninwali Gode weng omkeimalin nakai inaye binib-biota ibsa nayemomabiobe.<sup>24</sup> Nakai inamin naminsai klaine! Sinanomo kukub misiamo tam tlamabo memalo ib inamin namino homon kesoa ibo seimbib otane sinanomo Gode ibo inamin namin ayamo mo omyamabebabe.<sup>25</sup> Memalo downoiba matwayembio naka ibo klaine! Sinanomo kukub misiamo tam weng imen teb sumo yebianamabobe. Naka ibo memalo aben gibib biamo klaine! Sinanomo kukub misiamo tam tlamabo ibo halin bianiba memomabiobe.<sup>26</sup> Nakaia unanga ibo naka mak unang maki ib niniino dotoulebe binib mole ibo klaine! Sinanomo kukub misiamo tam tlamabobe. Sinanggwano i faninwali inaniba Gode weng omkeimalin nakai dim omini niniino dotoulebe binibbio kesoa kukub misiamo tam tlebenobiobe. I molobsel isak ibo inaye momabiobo ge baabesebe.

*Nibo nib makaai gobenomo!*

*(Matyu 5:38-48)*

<sup>27</sup> Yesuse imin baabenea Ne baabenamabibe, nakaia unangai ne wengo wentebib ibo wasi nakai kla gobeine! Naka maki atliyebua ibo wasi dokabib mole ibo kukub ayamo alebeine!<sup>28</sup> Nakai ibo misiam nabenomo gabibi kukub ayamo alebeine! Nakai ibo weng dobo weng oye-bibi Gode nganabaiba daabeneko!<sup>29</sup> Eka naka maki ibo kenengo blelabeib mole deskinaiba keneng milim osak blelabeine! Eka naka maki ibo youm tibo doiseniba eka imin baaniba Youm afet osa imin mo doiyne geib mole ibo mo Yeye genimibe! Doyine!<sup>30</sup> Naka maki baabeniba Ibo inamin namino doiyne geib mole ibo doiyne! Eka naka maki ibo inamin namino doiseib mole ibo mo sbal weng baabenibta Imin doiyne genimibe! Deibeiba dleb unine!<sup>31</sup> Ibo funaniba Naka maki ni kukubo yota nayemine gabib mole ibsak kukub olota i nayemine!

<sup>32</sup> Eka nakai ibo gobe blibi ilita ibsa gobeib mole olo besabe. Inamin kukubo Gode mo seinyemabebabe. Hengmin naka isa inaniba i nakai gobe blibi ilita gobe binabiobe. I ina binabit otane ibole nakai alukum kla gobeine!<sup>33</sup> Ibo ib nekwali kukub ayamo nabianiba ibo daayebibo ibsa inaniba kukub ayamo daabenimibo Gode baabenea Kukub olo besabo genamabebe. Hengmin naka isa kukub olo ina binabiobe.<sup>34</sup> Ibo wasi naka isa inaniba daabeine! Ibo inamin namino naka maki doiyib biamo ibo funaniba Imin yang kebeine genimibo Gode baabenea Kukub olo besabo genamabebe. Hengmin naka isa inamin namino hengmin naka maki doiyib

biamo yano makob olo ulab dlomabiobe.<sup>35</sup> Ina otane ibo wasi nakai gobeniba daabeine! Ib inamin namino i doyaiibo ibo mo funanibta i yang kebeine genimibe! Ibo misim doyib mole Gode abilim ut bie ib kukubo yang kebenea ibo e melel anomabiobe. E nakai goba blibbai daaye bianea eka naka misiami daaye biam biebe.<sup>36</sup> Ib aye naka maki kukub ayamo daayebe kesoa ibsa inaniba naka maki daayemine ge baabesebe.

*Kukubo moton sanin wengobe.  
(Matyu 7:1-5)*

<sup>37</sup> Yesuse imin baabenea Ibo naka maki i kukubo moton sanib mole Gode esa ib kukubo inabenamabe kesoa ibo mo inamibe! Ibo naka make atemniba baaniba Naka misiam etabo ge baabaib mole God esa ibo baabenea Naka misiam ibtabo genamabe kesoa ibo mo inangge baanimibe! Naka maki kukub misiamo nabanimib otane ibo yang kenamino dokobenoa deibueib mole Gode ib hengmino omtlabenamabebe.<sup>38</sup> Ibo inamin namino naka maki doyaiibo God emi osa ibo doyamabebe. Eka kukub mak esa inaminobe. Naka maki i nineki tliba imeno weleleb teniba nini gebeiba unan deniba olanabib inaminobe. God esa inamin namin homono ibo doyamabebe. Ibo naka maki inamin namino doym gaib osa inaminobe. Sum doyaiibo God esa ibo sum doyamabebe. Eka gwab doyaiibo God esa ibo gwab doyamabebo ge baabenea<sup>39</sup> eka saa wengo mako baabenea Naka make kino tum gebano biamo kin misame make deibe alebanamabebo? Yeye i dabo deibe geteisaniba atda unomabiobe.<sup>40</sup> Eka aleyemin nakae naka make alebanea tekein kenemeo e mo sum aneta alebane nakae dababbunemebabe. E alehabea tekein kenea makob alehamin nakae ulab anamabebe.<sup>41</sup> Keb neke difib mamano kin tem wato bibabuo watemehabeb otane atbele keb kin temo bibkebie ye mo fumbabbabe.<sup>42</sup> Kobo keb neke mo baabanebta Neko difib mamano keb kin tem wato bibkebuo omtlabkenamabibo ge baabane-mebe! Atbele keb kin tem i waye bibkebie ye atemale! Kobo inamin kukubo nameb mole dim omin stalsabe. Mikiktemo atbel beselibe keb kin teme bie ye tobtlanebta kino kla teme bianebta keb neke difib mamano omtlabanale ge baabesebe.

*As misiam yame misiam balinamabebe.  
(Matyu 7:17-20; 12:33-35)*

<sup>43</sup> Yesuse saa weng mako imin baabenea Ase ayam damanemeo e yamo misiamo

mo balinemebabe. Eka ase amgumane-meo e yam osa ayamo mo balinanemebabe.<sup>44</sup> Nakai aso dimo watemnibta as ele ayamobe misiamobe genabiobe. Nialio yamo et yamo mo balinota nakai welaibbabe. Eka tetning yam osa waen yamo mo balinota welaibbabe.<sup>45</sup> Naka ayam ele bobol tem funin ayamo e bobol tem amun temo kweki welubanobio kesoa ele kukub ayamo wafu biebe. Eka naka misiam ele bobol tem funin misiamo e bobol tem amun temo bibabio kesoa e kukub misiam ota wafu biebe. Nakae e bobol temo inamin namin bobolo funanemeo weng olo e stalimo tam tloa baanamabebo ge baabesebe.

*Amo asu genalino saa wengobe.  
(Matyu 7:24-27)*

<sup>46</sup> Yesuse imin baabenea Ibo ne niniino Sumo! Sumo ge nganebib otane ibo ne wengo mo wafueim blimobe.<sup>47</sup> Nakaia unangai wanita teniba nesu tlaniba ne wengo wenteniba wafunimibo ne i kukubo kinia alebeia yatem tekein kenomabiobe.<sup>48</sup> Nakaia unanga eli i makob naka make amo genang gameo dabalo haketoufanea amuno olabbanea tom baka dabal bakao basea amuno nekek genoa biino omfanea genamabe ulabobe. E inanea gene biamo soko tlemdenoa aaye tenea dilubone-meo o mo dobo blelanomobabe. Nimbababe, naka ele amo kla genebio kesoa o mo dabamobabe.<sup>49</sup> Eka nakaia unangai wanita ne wengo wentebib otane i mo wafueim blim keib mole i makob nakae amo amuno besa dikanea olabbanea genueba aaye tenea dilubosea dobo blelanamabo ulabobo ge baabesebe.

## 7

*Yesuse awa genalin nakai komok make okok nakae klaubasebe.  
(Matyu 8:5-13)*

<sup>1</sup> Yesuse nakaia unangai weng olo omkayebea blimanole monea Kabaneam bib ye<sup>2</sup> motemea Lom seli awa genalin nakai komok make Kabaneam bib ye bianea e okok nakae goba bie gembianea kaanang genabe kesoa<sup>3</sup> awa genalin nakai komoke wentea Yesuse tenea Kabaneam bib ye tlebo gesiba wentenea e Yudai komokwali maki dlaia moniba baabaiba tenea Ne okok nakae klaubaneke genea<sup>4</sup> dlanea moniba Yesus esu unaniba baabaniba Awa genalin nakai komoke naka ayamobo, kobo moneba daabanale!<sup>5</sup> Yuda nibo gobe bianea e Gode amo am genalin nakai monio walosea genam binabiobo gesiba<sup>6</sup> Yesuse wentenea bekebenea moniba awa genalin nakai komoke amo kikib ye bebiba awa genalin nakai komoke naka maki dlane teniba

baabaniba Awa genalin nakai komoke baanea <sup>7</sup> Sum kobo dim tlaebobo, kobo sumobo, ne sumba kesoa kobo ne arno mo tlaebe! Ne funania Ne naka ayam bianita monita kebsuo natlamiba kesoa kobo besa weng baaneba ne okok nakae ayam aneko! <sup>8</sup> Nesa nakai ne okoko kima blibi i wengo wentebibo eka ne awa genalin naka isa ne wengo wentebibo, naka make baabania Kobo one genimio e unamabebe. Eka make baabania Tele genimio e tlamabebe. Eka ne okok naka esa baabania Okok olo klanale genimio e klanamabebe. Inamin kesoa kebsa inaneba ginin olo baaboneba Obo naka ele deiba one genemebo deiba unoa ayam anamabebo genebo gesiba <sup>9</sup> Yesuse weng olo wentenea dlou unanea smike deiba unea deskinanea nakaia unangai homoni bekeba haablibi baabeneba Ne ibo baabenamabibo, naka ele Yudaba otane e bainobo galino dot sbalobe. Nene meletani Isleli bainobo galino inamini ne mo yatemin blimobo gesea <sup>10</sup> awa genalin nakai komoke nakai dlane tibbuei imin moniba am unaniba okok nakae temiba ayam anea atemsioebe.

*Yesuse naka tembale Nen bib sake do-fasebe.*

<sup>11</sup> Sinan mono dimo Yesuse monea bibo niniino Nen bib ye onseo e okok aleyemin naka isa nakaia unangai homon isa bekebanibtabe. <sup>12</sup> E monea Nen bibo daamo amito kikib ye bebeba bib olo seli nakae kaanebue debeb tetemsioebe. Naka ele awoko memei imini blimobe. Elekiem eleta bianeta kaanebiotabe. O imake sinangwan kaanebiotabe. Nakaia unangai unang olo temna tliba <sup>13</sup> Yesuse unang olo watemnea omhalilanea baaboneba Obo mo memebe ge baaboneba <sup>14</sup> watnea nakai glouto omeb blib isu wat unanea kweile glouto wafunea baabaneba Naka teno hananale gesea <sup>15</sup> nakae kaanebue hana ute tounea weng omsea Yesuse naka ten ele awoko baaboneba Ob miine ayam anebo, debeb one gesea <sup>16</sup> nakaia unangai alukum tosananiiba Gode niniino dobtoulebianiba Gode weng omkeimalin naka sume nib isak temo tebiebo gabianiba weng mako baaniba Gode nakae dabanea tebianeta <sup>17</sup> nakaia unangai daayebobo gesiba Yesuse weng sang olo Yudia betano atosin atosin osa betan mak betan mak yosa alukum onon tlasobe.

*Yone aa fuayemin naka esa Yesus esa i wengobe.*

*(Matyu 11:2-19)*

<sup>18</sup> Yone okok aleyemin nakai Yesuse weng sango wenteniba Yone baabasiba <sup>19</sup> wentenea Ne okok aleyemin nakai mo dlaia moniba baaba wenten tline

genea asu nganabene tliba baabeneba Sinangwano Gode weng omkeimalin nakai baaniba Sinanomo Gode Dofakamin Nakae tlamabebo ge baabibio kesoa ibo unaibo Yesuse kil baabaniba Kobo Gode Dofakamin Naka kehta bleka ni afet waisanomo ge baabaine gesea <sup>20</sup> naka asunai teniba Yesuse baabaniba Yon aa fuayemin naka eta dlaneta tlobobo e baabkenea Kobo Gode Dofakamin Naka kehta bleka ni afet waisanomo? ge baabkenebo gesiba <sup>21</sup> am olo dimo e nakaia unangai ginino afet afet gembibi klaye bianea eka maki hob misiami bekebe blibi fotebenaye bianea maki kino tum bibenobuei bemela ye biam bie kesoa <sup>22</sup> naka asu dabi baabeneba Ibo imin moniba Yon esu unaniba inamin namino wengo wentib olosa eka inamin namino watemib olosa baabaine! Nakai kino tum gebenobuei webiabenoa teme biam eka skil misiami tamana biam eka yayo kitdibiyebuei ayam an touye biam eka klango datenebenobuei imin welabbeno wengo wente biam eka kaaib biamuei imin hana tlebbiam eka ne Gode down weng ayamo omkeimania nakaia unangai inamin namino blimi omkaye biam <sup>23</sup> eka nakaia unangai wanita ne bainobo gabibo mo deibueim blim kenimibi seimbiam bliobo ge baabesea <sup>24</sup> Yone okok aleyemin nakai deiba uniba Yesuse nakaia unangai Yone wengo baabeneba Sino ibuantemo mota nimin watemomo geta unibbue? Nakai bobol temo tekayebua bobol tem homon homon fuminabibi makob glole makalo oleb une tlebbinabe inaminobe. Yone i ulaba? Yeye. <sup>25</sup> Ibo ibuantemo mota nimin watemomo geta unibbue? Ibo moniba naka make youm ayam ayam ota kibeta atemomo geta unibbua? Yeye. Nakai youm ayam kibibi komok sumi am tam bliobe. <sup>26</sup> Ina otane ibo moniba nimin watemomo geta unibbione? Ibo moniba Gode weng omkeimalin nakae atemomo geta unibbua? Bainobe. Ne baabenamabibe, ibo naka ele atemibbuo e Gode weng omkeimalin naka otane e Gode weng omkeimalin naka maki gaisenebio. <sup>27</sup> Sinangwano Gode Yon ele ni dab ni weng sango e buk temo baanea

Wentine! Ne down weng omkeimalin naka ele dabaia sin monea ne wengo omkeimaneba keb deibo klaubkenabeta kobole abuk mo temehta nakaia unangai keb wengo wentine genebio kesoa

<sup>28</sup> ne baabenamabibe, Yone dabalim nakai alukum gaisenebio otane Gode nakaia unangai kimanamabeo dimo nakaia unan-

gai wanita ne bainobo getneniba Gode Hobe i bobol temo bibene mole i Yone gaisanomabiobo ge baabesebe.

<sup>29</sup> Nakaia unanga isa takis moni bokalin naka isa i sino Yone dimo aaye fuelaibbio kesoa i weng olo wenteniba baaniba Bainobo, Gode wengo motonobo gesib otane <sup>30</sup> Felisie isa eka hekmel weng tekein kemin naka isa ile sino Yone dimo aaye mo fue-laim blim kesoa Gode deib ayame alebene abuk walam binibbiobe.

<sup>31</sup> Yesuse imin baabenea Naka homon unang homoni dabalim olo blibi i makob inaminobe. <sup>32</sup> Meme gwabi bib daang ye toulala bianiba ten maki nganabeniba

Ni halinin anso ngambob otane ibo mo mebibbabo, eka ni waso boubob otane ibo anso mo ngambibbabo ge ngambibi ulabobe.

<sup>33</sup> Saa weng olo mitmakamo inaminobe. Yone aa fuayemin nakae tlebuo e Gode niniino dobtouleb namabe kesoa e imen osa waen aay osa halabea naka homon unang homoni oha bianiba Hob misiambe bekeba biebo geniba e kukubo mo gob-anim blim binibbiobe. <sup>34</sup> Abilim Da Tlemin Naka ne tlibuo ne Yone ulabbabe. Ne imeno wembiania waen aayo wembiam nabi otane ibo baaniba Naka ele atemine! E tali uninobo, e imeno homon wembianea waen aayo homon wembiam nabebo, e takis moni bokalin naka isa naka maki hengmin afeto nabib isa i nekobo gabian-iba ibo ne kukub osa mo gotneim blim bliobe. <sup>35</sup> Nakaia unangai Gode wengo tekein kebibi baaniba Naka asu eli kukubo afet afet otane Gode i dabo baabenea I ayamobo gabebo gabiobo ge baabesebe.

*Unang mako hengmin sa bianoa wel aaye Yesuse skilono alibasobe.*

<sup>36</sup> Felisi make e niniino Saimone Yesuse baabanea Kobo tleba ne am tam imeno downomo ge baabasea Yesuse motem-nea Felisie am tam bianiba imeno wem-biba <sup>37</sup> unang mako hengminsabe. Bib ye bianoa wenteboa i baaniba Yesuse Felisie am tam imeno baka downamabebo gesiba wentenoa wel aaye tang ayame tom botole tem daak iba obetnoa <sup>38</sup> monoa Yesuse skilono kikib ye manoa mebua kin aamuko waldibi daaknoa Yesuse skilo dim daak unebua olo gabamano wafu olonoa glitaha bianoa Yesuse skil wat buk buk gaha bianoa wel aaye skilono alihabua <sup>39</sup> Felisie Yesuse nganabane tlea imeno wembibo kukub olo wateme kesoa funanea Naka ele Gode weng omkeimalin

naka biameo unang olo kweile afuno funanea Unang olo hengminsabo ge funane-mebo ge funsea <sup>40</sup> Yesuse baabanea Sai-mono! Ne weng mako baabkenamabibo gesea Saimon esak baabanea Aleyemin naka kobo keb wengo baaneba wentano gesea <sup>41</sup> Yesuse baabanea Naka asunai naka make monio oisanomo geniba make 100 kina oisanea eka mak ele 10 kina oisanaibbu otane <sup>42</sup> i yang kenamin dimo tloa i moni blim kesoa deibaniba misimu banobiobe. I inaibbuo i dabo naka ele goba blib otane waneta kla gobanam-abene? gesea <sup>43</sup> Saimon esak yang ke-nea baabanea Ne funaio Naka ele monio 100 kinao misimu banobiobo gesea Yesuse baabanea Kobo bain ye baanebobo ge baabanea <sup>44</sup> Yesuse deskinaea unang olo wateme biane Saimone baabanea Yuda nib kukubo inaminobe. Ne tenia keb am ele tlio kobo ne skilono aaye mo fubat-neim blim deitne biebo otane unang olo watemale! O mebua kin aamuko waldibi daakenoa skilono fubatnenoa olo gabamano olonoa gito glitutnenobo, <sup>45</sup> eka kobo ne tlibuo mo buk buk getneim blim otane unang olo ne skilono buk buk ganebobe. <sup>46</sup> Kobo wel aaye ne gabamone alitneim blim otane unang olo wel aaye tang ayame skilono aliteno <sup>47</sup> kesoa ne baabkenam-abibe. O gotnenoa kukub ayamo nano kesoa kobo funaneba Gode o hengmino homon omtlabonebo gabeb otane Gode inanea naka make hengmino gwab omtlabane mole naka elesa Gode gwab gob-anamabebo ge baabanea <sup>48</sup> eka Yesuse unang olo baabonea Ne ob hengmino omtlabkeiobo ge baabosea nakai Yesuse temna <sup>49</sup> toulala blibi baaniba Naka ele fatnamin naka bianeta hengmino omtlaiobo gabene? Gode elekiem eleta hengmino omketouye-bebo ge obiba <sup>50</sup> Yesuse unang olo imin baabonea Ob bainobo galino sum kesoa ob hengmino blimubkenobo, obo moneba bobol ayam funale ge baabosebe.

## 8

*Unang maki Yesuse bekeba haamon-siobe.*

<sup>1</sup> Sinanoa Yesuse monea bib sum osa bib gwab gwab osa haabianea Gode nakaia unangai kimanamabe wengo omkayem-onseo e okok aleyemin nakai 12 i ten-anibta haamonsiobe. <sup>2</sup> E inamonseo unang maki sino hob misiami fotebebenea ginino klaubenanebue isa Yesuse bekeba haamonsiobe. Unangi inasibi niniino elitabe. Maliao naka maki o niniino Magdala ge nganwe binabibo sino hob misiami <sup>7</sup> bekebo bliba fotebebonebu osa eka <sup>3</sup> Yudai komoke Helote am kimanin nakae niniino



Susae alelo Yoana osa eka Susana osa eka unang mak isa i Yesuse bekeba haamon-sibo unang eli imaye monia imenao Yesus esa e okok aleyemin naka isa okaye bian-ibtabe.

*Nakaie wit sano damibo dibianebiobe.*  
(Matyu 13:1-9; Mak 4:1-9)

<sup>4</sup> Nakaia unangai homoni bib mak da tete biniba misiba Yesuse saa weng mako baabenea <sup>5</sup> Naka make wit sano kon sano ulabo oleb monea damibo dibim haabi-anea dibia unea wit sano mako dilbi daaknoa deib daak uno ole <sup>6</sup> nakai tama teil-abbuboniba wani teniba doweibbiobe. Eka mako dilbi daaknoa dabalim daak uno ole balbi utlobu otane dabal tem daake tom dim anea aaye gibbu wemin blim kenoa gatanobiobe. <sup>7</sup> Eka mako dilbi daaknoa aliam misiamo ningsao mitem daak uno ole aliam misiam baka balbi utlanoa ge omtebano kesoa o mo damanota yamo mo balinim blimobe. <sup>8</sup> Eka mako dilbi daaknoa dabal ayame dim daak uno ota ayam balbu utlanoa yamo 100 balinobiobo ge baana bianea ngananea Nakaia unangai ne weng olo kla wentomo gabibi kla funaine ge baasebe.

*Yesuse kukubo saa weng ominobe.*  
(Matyu 13:10-17; Mak 4:10-12)

<sup>9</sup> E okok aleyemin nakai weng olo mitmakamo alebenale gesiba <sup>10</sup> baabenea Gode emaye weng ayok olo mitmakamo e kimanin kukubo ibo alebenebe. Otane nakai mo bainobo geim blim ile saa weng olo wenteniba i kino inamin namino wate-mebib otane o mitmakamo i klao mo tekein kebibbabe. Eka i klango wentebib otane o mitmakamo mo tekein kenomabibbabo ge baabesebe.

*Yesuse wit sano saa wengo mitmakamo alebesebe.*

(Matyu 13:18-23; Mak 4:13-20)

<sup>11</sup> Yesuse imin baabenea Saa weng olo mitmakamo inaminobe. Wit san ole Gode weng otabe. <sup>12</sup> Eka wit sano dilbi daaknoa deib daak unobio yole o mitmakamo inaminobe. O makob nakaia unangai Gode wengo wentebib otane <sup>13</sup> Kululame funanea I bainobo gesiba Gode i hengmino temo blibo dotlanemebo genea omketouye binabe otabe. Eka mako dilbi daaknoa tome dabal baka genebue dim daak unobio yole o mitmakamo inaminobe. O makob nakaia unangai Gode wengo wenteniba semibib otane i klao mo funa omabbaim blim keniba mema yota bainobo ge monsaniba inamin namin kukub misiamo i dimo tam tloa watemniba Gode wengo deibonabib otabe. <sup>14</sup> Eka mako dilbi daaknoa dabalim daak unanoa aliamo ningsao yebbaka bela

utlobio yole o mitmakamo inaminobe. O makob nakaia unangai Gode wengo wentebib otane dabalim olo inamin namino talo walin kukub osa monio sum olonite galin kukub osa eka dabalim olo seinin kukub osa tam tenanoa i bobol temo Gode wengo omabbubenoa deibonabib otabe. <sup>15</sup> Eka mako dilbi daaknoa dabal ayame dim daak unobio yole o mitmakamo inaminobe. O makob nakaia unangai Gode wengo wenteniba sbalma wafu blib ita yamo balinobiobo ge baabesebe.

*Ayalo saa wengobe.*  
(Mak 4:21-25)

<sup>16</sup> Yesuse imin baabenea Ibo ayale mo ei ofanibta bakete obonibta obbubaniba eka biino kitem daako mo ofananomabibbabe. Ibo keim ofa bliba dut ge bieta nakaia unangai temem tememnibta tam natlomabiobe. <sup>17</sup> Gode inamin namino ayok bio sinanomo keim anamabobe. Eka inamin namino nakai teilabbubo biaib osa keim anamabobe. <sup>18</sup> Ibo ne wengo wenteniba kla funaine! Nakai ne wengo wenteniba kukub ayamo wafunib mole Gode daabenea i bainobo galino sbal manomabib otane nakai funaniba Ni bainobo galino sbalobo ge funaniba i kukub ayamo mo wafunim blim keib mole Gode i bainobo galino omlabenamabebo ge baabesebe.

*Yesuse biem osa e ningwal isa itabe.*  
(Matyu 12:46-50; Mak 3:31-35)

<sup>19</sup> Am olo dimo Yesuse e biem osa eka e ning wal isa atemomo geniba tetemiba nakaia unangai deibo waiseib kesoa i bib tam bliba <sup>20</sup> naka make Yesus esu ye bianea baabanea Etale temale! Keb biem osa keb ningwal isa teniba bib etale bianiba wengo baabkenom genabiobo gesea <sup>21</sup> Yesuse baabenea Nakaia unangai Gode wengo wente bianiba kukub ayamo wafu blib ita ne biemwal eka ne ningwal nabo ge baabesebe.

*Yesuse glol sume baabanea desebe.*  
(Matyu 8:23-27; Mak 4:35-41)

<sup>22</sup> Am mak bomanoa Yesus esa e okok aleyemin naka isa weseme obetniba Unom gena bianiba Yesuse e okok aleyemin nakai baabenea Nibo Galili aamuke milim sin da unomo ge baabesea bebianiba <sup>23</sup> Yesuse weseme tem daak aambia glol sume tenea aamuk wat yebianea aaye weseme tem daake einea obeb daak unom genamib kesoa <sup>24</sup> i Yesuse dofufu bianiba baabaniba Aleyemin naka kobo memalo aaye weseme tem daak einea obeb daak unom genabuobo ge baabasiba Yesuse hananea glol esa aaye mousi esa Denale ge baabonea desoa <sup>25</sup> Yesuse e okok aleyemin

nakai baabenea Nimin kenibta ibo bain-obo galino men blibe? ge baabesea i tosonianiba smiko deibe unoa baaniba Dowe! Naka ele fatnamin naka bianeta baasete glol esa aaye mousi esa e wengo wentubanone? geniba bobol tem hekhok fun monsiobe.

*Yesuse naka make hob misiami bekeba bliba fotebebasebe.*

*(Matyu 8:28-34; Mak 5:1-20)*

<sup>26</sup> Yesus esa e okok aleyemin naka isa inaniba walaniba Gegesa betan onsiobe. Gegesa betano aamuke Galilie milim wat biota wat onsiobe. <sup>27</sup> Yesuse weseme obeb watnea obanabea naka make betan yo sake hob misiami bekeba bliba tese ele e sino youmo mo gembianeana am osa mo aala biam nin blimobe. E amit ham gloutem ota aala binabe biotabe. <sup>28-29</sup> Am homono dimo hob misiami naka ele kukub misiamo omkahabiba e kimanin nakai sen sayo tebeloniba skilona kweilonao gebanimibo waa dibiyebesa hob misiami debetniba moniba ibuantem ye une binabib-bua Yesuse tesea naka ele Yesuse atemnea amdofa ngansea Yesuse naka ele atemnea hob misiami baabenea Naka ele deiba unine gesea naka ele daaknea Yesuse skil tama bie daak aunungan Yesuse baabanea Yesuso, God Sume miin kobo ne fatnatne namabebe? Ne kobo baakkeiobo, kobo ne enino mo omnaebe ge baabasea <sup>30</sup> Yesuse naka ele baabanea Keb niniino wangkebte? gesea e baabanea Ne niniino Homon netabo ge baabasebe. Niminbabe, hob misiam homoni bekeba bliib kesota e niniin olo baaneta Homon netabo gesebe. <sup>31</sup> E inasea hob misiami Yesuse baabaniba Kobo kwiam bil amit teme tamalaim blim e teme mo dlaneba unaobe ge baabaniba <sup>32</sup> temiba eil ami homoni meb bibilim ye wembib kesoa yatemniba Yesuse baabaniba Kobo dlaneba watnoba eil emwali tem unomo gesiba Yesuse baabenea Ae ibmaye unine gesea <sup>33</sup> i naka ele deibaniba watniba eili tem wat temsiba eili dlindeniba yolyoma daakniba yung dime geteisoniba dleb daaknoa aamuk daak blelaniba aaye downiba kulilafaiba <sup>34</sup> eili kima bliib nakai yatemniba skilaniba dowan omeb moniba bib sum osa eka bib gwab gwabo bib sumo kikib meb meb ye bio yo sel isa alukum baaiiba <sup>35</sup> nakaia unangai Monoba inamin namino tam tlo watemomo geniba teniba Yesus esu ele tlaniba temibta nakae hob misiami bekeba blibo deiba uniba youme dobo genea bobol temo kla funananea Yesuse skile kikib ye toubmie kesoa atemniba tosonianiobe. <sup>36</sup> Yesuse inanea naka ele klubaneo naka maki kukub olo watemniba maki baabeniba

Sino naka ele hob misiami bekeba bin-abib otane memalo ayam anebo gesiba <sup>37</sup> Gegesa betano bib mak bib mak seli tosonianiba Yesuse baabaniba Kobo deibe one gesiba Yesuse weseme obetnea unang gabea <sup>38</sup> hob misiami bekeba bliiba fotebebane naka ele tenea tlabianeana Yesuse baabanea Ne kobo bekebke unamabibo gese otane Yesuse baabanea <sup>39</sup> Kobo moneba keb bibam unaneba Gode inamin namino klubkeneo weng sengo keb bibam seli baabenale ge baabanea dabanea monea ele bib unanea nakaia unangai Yesuse kukubo naneo weng sango omkayemonsebe.

*Yesuse komoke moon osa eka unang mak osa klubesebe.*

*(Matyu 9:18-26; Mak 5:21-43)*

<sup>40</sup> Yesuse imin tetemea nakaia unangai waisa bliibi atemniba seimbianiba <sup>41-42</sup> naka make niniino Yaillase Gode amo komokobe. E moon unang teno olokiemobe. O bifolo 12 bua gembianoa kaanang genabo kesoa aalebe tenea Yesuse skilo kikib ye dlong dlong golbuanea mesa aunungan tlabianeana baabanea Kobo ne am natele gesea Yesuse monea e am unang gabea nakaia unangai deibo waisasiba <sup>43</sup> unang mako olomisa bua bifolo 12 blimano bua naka maki o ginino klubonamino blimobe. <sup>44</sup> Unang olo tenoa Yesuse abuk tam nakaia unangai glagla daak manoa kweil tobbianoa Yesuse youme ken eta melebanoa hebmamsab blimubonoo <sup>45</sup> Yesuse baabenea Waneta meletnenene? gesea nakaia unangai Nikobbabo ge tlasiba Fitae baabaneo Aleyemin naka kobo nakaia unangai homoni gekamaibbi olole gesea <sup>46</sup> Yesuse baanea Ne nakai ginino klubenamini titilo mako blimutneno kesoa ne tekein keiobo, naka maki ne meletneibobo gesea <sup>47</sup> unang olo funanoa Yesuse tekein kenebo geno kesoa o tosonianoo tenoa Yesus esu ele dlong dlong golbua tounoa Yesuse melebanobio mito omkeimanoa baanoa Ne ginino mema yota blimutnenobo gesoa nakaia unangai wentensiba <sup>48</sup> Yesuse baabonea Ne moonoo, obo funaneba Ne Yesuse youm eta melebanimio ne ginino bain blimutnenamabobo geneb kesoa ayamub kenobe. Bobol ayam funaneba moneba bobol ayam nale ge owebea <sup>49</sup> naka make komoke Yaliase am danea tenea baabanea Keb moonoo kaanobo, kobo aleyemin nakae besao mo debeb natlaebe ge ohamsea <sup>50</sup> Yesuse wentenea komoke baabanea Kobo bobol misiamo mo funemebe! Kobo ne bainobo getnenale! Keb moonoo imin hananoa ayam anamabobo ge baabanea <sup>51</sup> moniba komoke am osu unaniba Yesuse nakaia

unangai watanea Ibo ne mo beketne tlaibe ge baabenea e Fita esa Yon esa Yems esa ita dletnea men olo awok aaleb kamwali tenaniba taniba am tam temiba <sup>52</sup> nakaia unangai mangglom blib kesoa Yesuse baabenea Ibo mo mangglom nimibe! O mo kaaim blimobo, besa aambiobo gesea <sup>53</sup> i funaniba O kaanobiobo geniba aben gihabib <sup>54</sup> otane Yesuse unang ten olo kweil gong wat wafunea Meno hananale ge ngansea <sup>55</sup> o smike imin twas unubonea hebmamsab hana utesoa Yesuse nakaia unangai baabenea Imeno mo dlubueiba downoko ge baabesea <sup>56</sup> aaleb kamwali smiko deibe unoa Yesuse baabenea Ib kamo naka maki weng olo mo baabenimibe ge baabesebe.

## 9

*Yesuse okok aleyemin nakai 12 i okoko omyensebe.*

*(Matyu 10:5-15; Mak 6:7-13)*

<sup>1</sup> Yesuse e okok aleyemin nakai 12 i Hob misiami fotebe nabiam eka nakaia unangai ginin gami klayebiam nine genea nganabene tliba titilo omyenea <sup>2</sup> baabenea Ibo moniba nakaia unangai Gode kimanamabe wengo omkaye bianiba ginin gami klaye biam unine ge baabenea <sup>3</sup> eka imin baabenea Ibo inaniba unom gaibo inamin namino fong osa meen osa imen osa moni osa mo oleb unaibe! Youmo dlusa unomabib otane mako mo dleb unaibe! <sup>4</sup> Eka ibo moniba am mako tam unaibo am olo tem ota bianiba aalande deibo watwat haabianibte! <sup>5</sup> Eka ibo moniba bib mak ye temiba bibam seli mo dleb tamniba am tam daim blim keniba eka ib weng osa mo wentubeim blim keib mole ibo bib olo deiboniba ib skilono dabalo glitaniba deibe uniba i yateniba funaniba Ni kukubo misi-amobo ge funaine ge baabenea <sup>6</sup> i moniba bib mak bib mako Gode wengo omkaye bianiba ginin gami klaye biam monsiobe.

*Yudai komoke Helote Yesuse weng sango wentensebe.*

*(Matyu 14:1-2; Mak 6:14-16)*

<sup>7</sup> Yudai komoke Helote Yesuse weng sango wentea naka maki obianiba Yone aay fuayemin nakae sino anaiba kaanebuo memalo imin hananea te biebo gesib <sup>8</sup> eka maki baaniba Gode weng omkeimalin nakae Ilaiyae imin abilim danea te biebo gesib eka maki baaniba Sinanggwano Gode weng omkeimalin naka mak eta hana te biebo gesib nib kesoa Helote bobolo hekhkek funanea <sup>9</sup> baanea Yone gabam eko waisanibu otane naka ele waneta bianeta inamin namin okoko klabene? gene kesoa e funanea Ne naka ele atemano ge funasebe.

*Yesuse nakai 5,000 i imeno oya downosiobe.*

*(Matyu 14:13-21; Mak 6:30-44; Yon 6:1-13)*

<sup>10</sup> Yesuse okok dlasanin nakai imin teniba i okoko okok kem haabi tlibo wengo Yesuse baabasiba wentenea naka afeti temdeibenea e okok dlasanin naka ita dletnea moniba bibo niniino Betsaida bib ye uniba <sup>11</sup> nakaia unangai wentiba naka maki baabeniba Yesuse Betsaida bib unebo gesiba wenteniba kan motemiba Yesuse yatemnea Klayam nata tliobo genea Gode nakaia unangai kimanamabeo wengo omkaye bianea ginin gami klaye biam bia <sup>12</sup> kwinoa e okok dlasanin nakai 12 i baabaniba Bib olo imeno blim amo blim nabo, kobo nakaia unangai dlaneba moniba bib mak onon tlaniba am osa imen osa mo henwaniba aala unine ge baabasiba <sup>13</sup> Yesuse baabenea Ibo i mo dlaiba unaibe! Ibmaye imeno oyine ge baabesea i baabaniba Ni imeno homonbabo, blet gwabo 5 olanoba eka aningi asu olananobiobo, kobo fumblebo Ni monoba nakaia unanga eli imeno walo olube tlomo? gesiba <sup>14</sup> unanga tenai mo kieim blim otane naka gang ita 5,000 obe. Yesuse e okok aleyemin nakai baabenea Ibo baabeniba nakai 50 ye toulala unine gesea <sup>15</sup> e okok aleyemin nakai inaniba alebeiba toulasiba <sup>16</sup> Yesuse blet gwabo 5 o olonea aningi asu olonanea wafu bianea abilim ut teme bianea Gode gangobo genea hanea e okok aleyemin nakai oyensea oloniba nakaia unangai kikibeiba <sup>17</sup> unam biniba matwayensoa atosino olaib kesoa Yesuse okok aleyemin nakai oloniba tlit meeno 12 o tem daak basiobe.

*Fitae Yesuse baabanea Kobo Klaist kebtabo gesebe.*

*(Matyu 16:13-19; Mak 8:27-29)*

<sup>18</sup> Am mak dimo Yesuse beten kebea e okok aleyemin nakai bekeba bliba baabenea Nakaia unangai ne wanetabo ge one binabibe? gesea <sup>19</sup> i baabaniba Maki oke bianiba Yon aa fuayemin naka etabo gesib eka mak ile oke bianiba Gode weng omkeimalin nakae Ilaiya etabo gesib eka mak ile oke bianiba Sinanggwano Gode weng omkeima binebio naka eta hananetabo ge oke biam bliobo gesiba <sup>20</sup> eka e baabenea Ibmalole ne wanetabo gabibe? gesea Fitae baabanea Gode Kemfakamin Naka Klaist kebtabo ge baabasebe.

*Yesuse baanea Ne kaania imin hananamabibo gesebe.*

*(Matyu 16:20-28; Mak 8:30-9:1)*

<sup>21</sup> Yesuse e okok dlasanin nakai sbal weng baabenea Weng olo awemobo, ibo

naka maki mo baabenimibe ge baabene<sup>22</sup> eka imin baabenea Abilim Da Tlemin Naka ne enin kino watemamabibo, komokwal isa Gode amo kimanin nakai komokwal isa hekmel weng tekein kemin naka isa ne mo gotneim blim keniba nanaiba kaania amo asu kenia make dime imin hananamabibo ge baabenea<sup>23</sup> eka e imin baabenea Nakaia unangai wanita ne beketne nom gib mole am obba ye bomanomo bomanomo yo dimo i nini-ino omabbuniba inamin namin kukub misiamo i dimo tam tlemo omnakatouleb bianiba ne kukubo wafu nine!<sup>24</sup> Eka nakaia unangai wanita ili bobol tem funino wafu bianiba dabalim olo inamin namino gobonimibo i amito mo biomabibbabe. Otane nakaia unangai wanita ne bobolo funaniba dabalim olo inamin namino deibonimib nakai afen smiko amit namabobe.<sup>25</sup> Nakaia unangai wanita dabalim olo inamin namino alukum olmina bianiba mo bainobo geim blim bianiba kaaniba aseinin bib unib mole inamin namin olo fatnnota daabenamabone? O mo daabenamabobabe.<sup>26</sup> Eka nakaia unangai wanita ne niniin osa ne wengo aleyebi osa aal genam binib biamo sinanoa Abilim Da Tlemin Naka ne titil osa eka Aye titil osa eka abiseli titil osa ayal inamin einobuo temte tlang gamio nesak aal gembiania nakaia unanga eli baabenia Ne ibo mo tekein kebibabo ge baabenamabibe.<sup>27</sup> Ne moton baabenamabibe, naka maki memalo dabalim olo blibi mo kaaam blim bliba Gode nakaia unangai kimanamabe amo tloa watenibta kaanomabiobo ge baabesebe.

*Yesuse aalo afet anea atemsiobe.*

*(Matyu 17:1-13; Mak 9:2-13)*

<sup>28</sup> Yesuse weng olo aleyem denea bia amo 8 blimanoa e beten kemang genea Fita esa Yon esa Yems esa i dleb utnea amgolim ut beten kebea<sup>29</sup> e kibio afetu banoa youmo namananoa<sup>30</sup> Mosese Ilaiyae i dabo tetem-niba Yesuse tenaniba weng omonsio. <sup>31</sup> I dabo Gode titilo ayal inamin einobuo yeb-baka teniba Yesuse monea Yelusalem bibo kaanamabeo wengo ohabiba<sup>32</sup> Fita esa e bekeba blib naka isa i kina dububesoa aal-abliobe hananiba temiba Yesuse titilo ayal inamin einobua naka asu dabi temna bian-iba weng obib kesoa yatemnabiba<sup>33</sup> Moses esa Ilaiya esa i deiba unom genamib kesoa Fitae Yesuse baabanea Nibo ele biobo ayam kesoa ni amo asumatna genomabbiobe. Mako kebmi gebke eka mako Moses emi geba eka mako Ilaiya emi geba nanomab-biobo ge baabasebe. E inaseo klao mo funaneta weng olo baabaim blimobe.<sup>34</sup> Fitae wengo obe dim ota ayungo hebmamsab ge dlano kesoa i tosiansiba<sup>35</sup> weng mako

ayung tem wat baabenoa Naka ele ne mi-nobobo, ne Dofakamin Nakabo, ibo e wengo kla wente habianibte ge baabenoa wenten-abiba<sup>36</sup> blimanoa ayungo glitanao i temiba Yesuse elekiem mabia atemniba inamin namino tam tloa watemibo am olo dimo i naka maki mo baabeim blimobe.

*Yesuse naka tene hob misiame bekeba bia fotebebasebe.*

*(Matyu 17:14-23; Mak 9:14-32)*

<sup>37</sup> Bomanoa i amgolimo deiboniba daakniba deib daak temiba nakaia unangai homoni tetemiba<sup>38</sup> naka make nakaia unangai isak tem daak mabianea Yesuse baabanea Ne miine elekiem kesoa aleyemin naka kobo daabanale!<sup>39</sup> E hob misiame bekeba bia ngambianea nabea dobdibibea mimao gububsam bianea e aalo manakaha biam nahabe kesoa hebmamsabo mo deibanamabebabe.<sup>40</sup> Ne keb okok aleyemin nakai baabenia Hob misiame fotebebaiba uneko ge baabiesa naatemib otane i titilo blim kesoa e mo deiba unim blimobe ge baabasea<sup>41</sup> Yesuse baabenea Ib bainobo galino blim eka ib bobol tem funin osa molotbabe. Ibo makob memalo naka homon unang homoni dabalim ele blibi ulabobe. Am homono dimo ne ibo amit ye bekebe binabi otane ibo ne mo bainobo getneim blim bliobe. Keb miine debeb tele gesea<sup>42</sup> naka ele miine debeb tebea hob misiame dliba dobbianea daak blilasea ande watwat tebea Yesuse hob misiame baabanea Naka ten ele deiba one gesea deiba unea klaubanea aalebe baabanea Debeb one gesea<sup>43</sup> nakaia unangai Gode titil sbalo watemniba smiko deibe unoa Yesuse okok olo klaneo watemniba bobol tem hekhek fumbiba Yesuse e okok aleyemin nakai baabenea<sup>44</sup> Ne weng olo baabenamabio ibo kla wentemine! I Abilim Da Tlemin Naka ne nemeb moniba komokwali nemyomabiobo ge baabene<sup>45</sup> otane weng olo mitmakamo ayok ano kesoa e okok aleyemin nakai weng olo mitmakamo mo tekein keim blimobe. I weng olo mitmakamo kil baabanomo gabib otane i tosiyaniba deibasiobe.

*Waneta Gode kimanin bibo komok anamabene?*

*(Matyu 18:1-5; Mak 9:33-37)*

<sup>46</sup> Yesuse okok aleyemin nakai i sin-walo dleb weng baasee bianiba Waneta komok anamabene? ge baase baase blib kesoa<sup>47</sup> Yesuse tekein kenea bobol tem funin olo i bobol temo bibebio kesoa men gwabe make debeb tenea esu ele do-fanea masea<sup>48</sup> baabenea Nakae waneta

ne bobolo fumbianea men gwab ele daabane mole kukub olo makob e neta daatnenamabebe. Eka nakae waneta inanea ne daatnene mole ne nenekiembabe. E ne Aye nemane tlibu esa ni dum daabenamabebe. Inanamabe kesoa naka make ib isak temo niniino blim biame naka eta komok anamabebo ge baabesebe.

*Nakai ibo mo makaalabeim blim keib mole i ib nekwalobe.*

*(Mak 9:38-40)*

<sup>49</sup> Yone Yesuse baabanea Aleyemin naka kobo ni naka make atemoba e keb niniino taitkenea hob misiami fotebenayebaa atemob otane e nibo mo bekebe haabieba kesoa ni tolobo genobbio gesea <sup>50</sup> Yesuse baabanea Ibo mo tolobo genimibe! Nakai ibo mo makaalabeim blim keib mole i ib nekwalobo ge baabesebe.

*Samelia naka maki i bibo toloboniba Yesuse fotebesiobe.*

<sup>51</sup> Gode Yesuse debeb ula abilim onamino mebano kesoa Yesuse funanea Ne imin monia Yelusalem bib unano genea <sup>52</sup> naka maki sin dlanea moniba Samelia betano bib mak ye motemniba amo mo omfakatne nabibte genea dlanea unib <sup>53</sup> otane bibo yo seli funaniba Yesuse Yelusalem bib unamabe yole ni Yelusalem bib seli ni afinba kesoa ni amo mo debeb tam unaobbabo geib kesoa <sup>54</sup> Yesuse okok aleyemin nakai Yemse Yone i dabo weng olo wenteniba Yesuse baabaibo Aleyemin naka kobo baaseba Gode nganabasoba abilim ase kikanea tenea nakaia unanga eli kibaine gesiba <sup>55</sup> Yesuse deskinanea i dabo baabenea Weng olo mo baanimibe ge baabenea <sup>56</sup> i moniba bib mak onsiobe.

*Nakaia unangai Yesuse bekebanino wengobe.*

*(Matyu 8:19-22)*

<sup>57</sup> I moniba deib ye temiba naka make Yesuse baabanea Kobo moneba bib mak bib mako haanamabebo ne bekebke haanamabibo gesea <sup>58</sup> Yesuse baabanea Til satili amo deib temo bibebiota aalabiobo eka wan isa deito bibebiota aala biam blib otane Abilim Da Tlemin Naka ne amo aanonamino blimobo, kobo ne beketne haanang geb mole keb am osa blimobe. Kobo bain beketne unang genebtio? Kla funanebte ge baabanea <sup>59</sup> eka naka make imin baabanea Kobo te beketne nale ge baabasea naka ele baanea Sum kobo ne mo deibkenia monia blia ne aye kaanemeo dobbunita teta bekebke haanano? gesea <sup>60</sup> Yesuse baabanea Temdeibanale! Nakai ne wengo wentebib otane mo wafueim blim blibi makob kaanabibi ulabobo, imaye kaanimibi dolbueine! Kobo moneba

Gode kimanamabeo wengo omkeimamale gesea <sup>61</sup> eka mak esak baabaneo Sum kobo ne bekebkenamabi otane mikiktemo ne monia ne meletani heitdabesitane gesea <sup>62</sup> Yesuse baabanea Nakai Gode bobolo fumbib otane imin abuk walaniba Gode bobolo funino deiboniba bobol tem afet funib mole i Gode kimanin bibo mo unomabibbabo ge baabanasebe.

## 10

*Yesuse nakai 72 i dlanea moniba Gode wengo omkeimam onsiobe.*

<sup>1</sup> Sinanoa Sume nakai 72 i dlakanea baabenea Ibo asuke onon nine! Ibo sin moniba bib sum osa bib gwab osa onon tlaibta ne abuk natlano ge baabenea <sup>2</sup> eka e nakaia unangai Gode mitemo mo tlim blimi dim tounea saa weng mako imin baabenea Imen homono damibo damambu otane ula oleb te toumin nakai homonba kesoa ibo damib gosake God eta beten kehajibta e okok nakai mo dlane moniba e damibo imeno ula oleb te mieine ge baabenea <sup>3</sup> eka imin baabenea Wentine! Ne ibo dlaia moniba naka misiam isu unomabib kesoa i funaniba watwat dabenomo ge funanomabibo makob naka make e eil sibsibi dlanea moniba til satil isu uniba satili funaniba Yena downonomo ge funanomabib inaminobe. <sup>4</sup> Ibo kumeno moni bumin osa imen osa skil otabbumin osa mo oleb unaibe! Eka nakaia unangai deib tamalo te hetananimibo ibo mo mabianibta besa wengo mo oyemibe!

<sup>5</sup> Ibo moniba am mako temo tam temaibo Gode baabaniba Nakaia unangai am olo seli bobol ayam omyene ge baabaine! <sup>6</sup> Eka naka make amo yo temo bobol tem fiabe bie mole ibo baabaniba Gode kobo daakenamabebo ge baabaine! Otane inamin nakai blim biaibo ib weng olo mo baanimibe! <sup>7</sup> Okoko goseli okok nakae monio walonamino ayam kesoa ibo amo yo olo tem ota bianiba imena aayao amo yo seli okayemibo wembianibte! Olo ib okoko wemabobe. Ibo mo monibta alukum amo olokiem olokiemo temo mo haanimibe!

<sup>8</sup> Ibo bib mako motemiba nakai dleb taniba i am tam unaib nakai imeno doyaibo downone! <sup>9</sup> Ibo bib olo seli ginin gam ita klaubeniba eka Gode nakaia unangai kimanamabeo ibsu tlang genabo wengo baabeine! <sup>10</sup> Ina otane ibo bib mako motemiba i amo mo dleb tam daim blim kenib mole ibo moniba bib daang ye mabianiba baabeniba <sup>11</sup> Ib bib olo dalalo ni skilon dimo bobuben otane ni gli-tanobobo, ibo yatemniba Ni kukubo misiamobo geine ge baabeine! Ibo inanimibo imin baabeniba Kla funaine! Gode

kimanamabe dimo meb tlo otane ibo abuk wauliobo ge baabeine ge baabene eka<sup>12</sup> imin baabene Sinanggwan Sodom bib seli hengabinibbuo sinanomo Gode nakaia unangai kukubo klanang gameo dimo enino gwab omyamabe. Niminbabe, Sodom bib seli e wengo sino mo wentim blim kesoa enino gwab omyamabe otane bibo yo seli ib wengo ombiabeibbuo mole Gode i enino dot sum omyamabebo ge baabesebe.

*Nakaia unangai mo bainobo geim blimi klaine!*

*(Matyu 11:20-24)*

<sup>13</sup> Ibo ne weng olo wenteniba tosiaine! Ayoo, Kolasin bib sel ibsa Betsaida bib sel ibsa enin sumo tam tlubenamabobe. Ne ib bibamo biania okok sumo klabia ibo watemebib otane ib hengmino mo deibueim blimobe. Sinanggwan naka make Taia bib osa Saidon bib osa inanea makob ne okoko ulab klabea Taia bib sel isa Saidon bib sel isa watemibbiota mole i mebianiba i hengmino deiboniba i bobol temo deskinaniba Gode omalomabib otane i sino mo watemim blim kesoa i hengmino mo deibueim blimobe. <sup>14</sup> Ibo mo inamin blim kesoa sinanomo Gode nakaia unangai kukubo klanang gameo dimo e Taia bib sel isa Saidon bib sel isa enino omyamabe otane ibole enino dot sum omyamabebe. <sup>15</sup> Eka Kabaneam bib sel ibole funaniba Ni abilim ut unomabiobo ge fumbib otane ibo ne wengo wentebibo mo wafueim blim kesoa ibo dabbemaniba aseinin bib unomabiobo ge baane <sup>16</sup> eka e okok aleyemin nakai 72 i imin baabene Nakai ib wengo wentubenimib nakai ne weng osa wentomabiobe. Eka nakai ib wengo omabenimib nakai ne weng osa omatenomabiobe. Eka ne wengo omatenimib nakai ne Aye nemane tlibio nakae weng osa ombiabanomabiobo ge baabene dlanea bib mak bib mako onon tlasioibe.

*Nakai 72 i Gode wengo omkayem unib-  
bio imin tesioibe.*

<sup>17</sup> Sinanoa 72 nakai imin teniba seimbianiba Yesuse baabaniba Sum kobo ni keb niniino taikenoba hob misiami baabesoba wenteniba nakai deibe unebibta omkayebi tlobobo gesiba <sup>18</sup> Yesuse baabene Gululame abilim ut danea timin tilain kenea dobmein tloa atemibo, e titilo blimubanobo, <sup>19</sup> ibo wentine! Ne titilo omyibo ibo inab mesoa esa bem inabi totol isa yantanimibo ibo mo kaanomabibbabe. Ne titilo ib dim wat biobe, Gululame titilo mo gaisnomobabe. <sup>20</sup> Otane ibo mo seimbianibta baanibta Hob misiami ni wengo wentubeibobo

genimibe! Gode abilim ut ib niniino dolayebe ota seinine ge baabesebe.

*Yesuse seimbianea Gode niniino dobtoule bisebe.*

*(Matyu 11:25-27; 13:16-17)*

<sup>21</sup> Am olo dimo Gode Hobe Yesuse bobol temo seinino omansea Yesuse Gode baabene Ay kobo abilimo Sum eka dabalimo Sum na kesoa ne Klayamobo ge baabkenamabibe. Niminbabe, naka maki funaniba Ni tekein kemino sumobo gabibi keb okoko 72 nakai okok kebibo kobo inamin okoko naka eli mo alebeim blimobe. Otane naka maki tekein kemino sumba makob men gwabi bobol temo funino ulab aibi kobo kukub olo mito alebenebobe. Kobo funaneba Ne inanano geneba inaneb kesoa ne klayamobo gabibo ge baane ole <sup>22</sup> eka nakai 72 eli baabene Ne Aye inamin namino alukum ne omnenea kimanale ge baatnenebiobe. Nakai Gode miin ne bobol temo funino mo tekein kebibbabe. Ne Aye elekiem eleta ne bobol temo funino tekein kebebe. Eka nakai Ay Gode bobol temo funino mo tekein kebiba otane ne tekein kebibe. Nakai wanita ne dlakanimie isa Aye bobol temo funino tekein kenomabiobo ge baabene ole <sup>23</sup> eka ele okok aleyemin nakai 12 ile dlabianea baabene Ibo inamin namin sumo klaia watemibo seinine! <sup>24</sup> Ne baabenamabibe, sinanggwan Gode weng omkeimalin naka homon isa eka komokwal homon isa i inamin namino ibo watemebib olo isa watemomo geniba hembinibbu otane i mo watemim blimobe. Eka ibo wengo wentebib olo isa wentomo gabinibbu otane i mo wentim blimobe. Ibo inabib kesoa seinine ge baabesebe.

*Saa weng olo Samelia nakae e wasi nakae dohhallilase otabe.*

<sup>25</sup> Hekmel weng tekein kemin naka make Yesuse naatemang genea baabane Aleyemin naka kobo ne fatnanta afen smike dobonita amit namabine? gesea <sup>26</sup> Yesuse baabane Hekmel weng fatnangge baanobiota kibinabebe? ge baabasea <sup>27</sup> hekmel weng tekein kemin nakae baabane Gode buk temo baanoa Keb Sume Gode kla goba bianeba keb bobol temo osa keb afen smik osa keb titil osa keb bobol temo funin osa alukum omoneba keb God Sume omalale! Eka kobo kleb unalo gobo bieh inaneba naka mak isa gobenale genobiobo gesea <sup>28</sup> Yesuse baabane Kobo moton ye baanebobo, kobo ina bianebta amit nale ge baabasea <sup>29</sup> hekmel weng tekein kemin naka ele funane Naka maki gobenia eka mak ile deibeia Yesuse funane Ne naka ayamobo geneko ge funane kesoa e Yesuse imin baabane Nakae ne neke wanete? gesea

<sup>30</sup> Yesuse saa weng mako baabanea Naka make Yelusalem bibo deibonea daaknea Yeliko deib daak temeaa ayok henin nakai teniba inamin namino oisaniba ana daba unibbua deib ye bianea kaanang genabea <sup>31</sup> Gode amo kimanin naka make deib tla monea ateme kesoa deibanea ken deib unea <sup>32</sup> amo yo olo dim ota Libaie mulubi make imin tenea atemnea esa imin inanea deibanea deib ken deib unea <sup>33</sup> eka Samelia naka ile Yudai wasi otane Samelia nakae tenea Yuda naka elesu ye tle kesoa atemnea kla dohhailanea <sup>34</sup> watnea meb wat unanea ya malasino olonea yaio bebanea dofanea debeb utnea til dongkie dim ut dofanea tounsea debeb monea dait aalamin amo tem tam danea kimanea dofa senoma <sup>35</sup> bomanoa amo gabam sake monio olanea baabanea Kobo naka ele kla kima biebtane imin tenita keb monio enamin walubanebbibe genita ne keb monio yang kenano ge baabanebiobo ge baabanea <sup>36</sup> eka imin baabanea Kobo fatnangge fumbibe? Nakai asumatnai tlib otane waneta ayok henin nakai anaibbio nakae e neke? gesea <sup>37</sup> hekmel weng tekein kemin nakae baabanea Samelia naka eta dohhailata daabanebiobo gesea Yesuse baabanea Keba moneba inamone ge baabasebe.

*Mata osa Malia osa i weng sangobe.*

<sup>38</sup> Yesus esa e okok aleyemin naka isa moniba bib mak ye temiba unang mako niniino Matao tenoa Yesuse baabanoa debeb tamnoa o am tam danao <sup>39</sup> wengo aleyebea o nengo niniino Maliao tenoa Sume skilo kikib ye toumbianoa Sume wengo wentebua <sup>40</sup> eka Mata ole imeno olokiem fubua okoko sumu bosoa funanoa Ne nengo deitnebiota nenekiem fubibo genoa tamnoa Yesuse baabanoa Sum Kobo ne nengo deitnebua ne imeno nenekiem fubibo, kobo baaboneba te daatnenoko gesea <sup>41</sup> Sume Matao baabonea Matao ob bobol temo hekhako mo fumbianehta bobolo ilumo mo omkakemone! <sup>42</sup> Maliao ne wengo wentebobo, ne wengo wentemin kukubo kukub afeto gaisono kesoa ne mo baabonita Deiboneba okok afeto klanale ge baabonimibabo ge baabasebe.

## 11

*Beten kemino kukub otabe.*

*(Matyu 6:9-15; 7:7-11)*

<sup>1</sup> Am mak bomanoa Yesuse betan ato da ye beten kebea beteno blimansoa e okok aleyemin nakai make baabane Sum kobo sino Yone nanea e okok aleyemin nakai alebenebio inaneba nisa beteno alebenale gesea <sup>2</sup> Yesuse baabanea Ibo beten kenom

gaibo enangge baaine! Ni Ay keb niniino kining kesoa ni keb niniino kemtoulebe biobobe. Kobo nakaia unangai kimanin amo omaneb tloko! <sup>3</sup> Ni imeno am obba ye bomanomo bomanomo yo dimo okayemala! <sup>4</sup> Kobo ni hengmino omtlabeneba eka nisak naka maki hengmino omkayebib biamo funino dokobenoa deibenomo! Naka maki teniba menganiba baabeniba Ibo inamin namin kukub olo naine genimibo Kobo ni daabeneba ni hengmino mo henganomobe ge baanibta beten keine ge baabene <sup>5</sup> eka imin baabeneba Naka make ib isak tem daako inanea kwitimb monea e nek esu <sup>6</sup> unanea baabanea Neko kobo imeno asumatna onene! Ne ninek make tle otane ne imen blim kesotabobe gesea <sup>7</sup> naka ele baabanea Amisalo dounia memei dla aaunang genabi kesoa ne mo hananita imeno mo doklamibabo ge baabanamabe inaminobe. <sup>8</sup> Ne baabenamabibe, naka ele mo funaneta Naka ele ne nekobo, imeno dlalano ge funaim blim otane e ngambe bita ngambe bita mitdata hananeta imeno dlamambebe. <sup>9</sup> E inanamabe kesoa ne baabenamabibe Ibsa inanibta Gode nganhbib bita inamin namino doylene gabibo doylene eka ibo inamin namino hambibo watemnanimio. Eka amisal osa gong gong galaibo Gode betelabenamabebe. <sup>10</sup> Nakaia unangai Gode nganhamibi inamin namino dlamabiobe. Eka nakaia unangai wanita inamin namino hambib biam osa wate-momabiobe. Eka nakaia unangai wanita amisalo gong gong geib mole Gode amisalo betelabenamabebe. <sup>11</sup> Eka ib isak tem daako men gwabe aalebe baabanea Ayo! Aninge mo obnene genemeo aalebe inab misiam dabalambabe bleka? Yeye e aninge obalamabebe. <sup>12</sup> Eka e baabanea Ayo! Wan uno mo obnene ge baabanemeo aalebe takum hok ota omalamabebe? Yeye e wan une obalamabebe. <sup>13</sup> Dabalim naka ibo inaniba ib memei inamin namin ayamo dokayebib otane ib Aye abilim ut bie ibo gaisenebiobe. E memei baabaniba Keb Hobe doylene genimibo e bain ye dobyamabebo ge baabasebe.

*Nakaia unangai baaniba Yesuse Bielsebule temna okok kebiobo gesiobe.*

*(Matyu 12:22-30; Mak 3:20-27)*

<sup>14</sup> Naka make hob misiam bekeba bie kesoa e kobom anebua Yesuse fotebebanea naka ele wengo omsea nakaia unangai wenteniba i bobol temo hekhak fumbianiba <sup>15</sup> naka maki baaniba Hob misiami komoke Bielsebule e niniin mako Gululame titil ota Yesuse omkahabeta hob misiami fotebenabebo gabiba eka <sup>16</sup> mak ile Yesuse inaba temomo geniba baabaniba

Kobo Gode nganabaneba e titilo omklea inamin namin okok sumo ni sino mo watemin blimo klanale gesiba <sup>17</sup> Yesuse i bobol tem funino tekein kenea baabeneba Betan mak seli i sinwalo makaalaniba belalananiiba awa genalom gaibo i titil blimanomabiobe. Naka make meletani i sinwalo makaalaniba belalananiiba awa genalom gaibo isa titil blimanomabiobe. <sup>18</sup> Ibo baaniba Bielsebule titil ota e omkahabeta hob misiami fotebenabebo gabib otane Gululam esa e meletan isa i makaalaniba belalananiiba awa genalom gaibo i titil blimanomabiobe. <sup>19</sup> Bielsebule titil ota omkahabeta hob misiami fotebenabebo gabib otane waneta ib meletani daabeneta i hob misiami fotebenayebibe? Bielsebul etia bleka? Yeye ibo weng olo baatneibo ib meletani wentib mole i baaniba ib wengo dim obiobo, Gode Hobe titilobo genomabiobe. <sup>20</sup> Nele Gode titilo omneta hob misiami fotebenabi kesoa ibo watem tekein kenibta Gode nakaia unangai kimanin kukubo tlobo geine! <sup>21</sup> Eka ne saa weng mako baabenamabio inaminobe. Gululame naka sbalobe. E sbal manea ane obonea e amo kimanemeo e afobeingo ayam bibanamabo <sup>22</sup> otane naka make dot sbale tenea e tata kenea naka ele anane mole ana sekua oisanea e afobeingo e meletan ita kikibenamabebe. <sup>23</sup> Nakae waneta ne mo daanemin blim kene mole e ne makaabe. Ne nakai dleb metenia Gode mitem kalin nakabe. Nakae waneta ne mo daanemin blim kene mole e makob naka make nakai fotebene unaniiba Gode deiba unomabib inaminobe.

*Hob misiam e imin de tlamabeo weng sangobe.*

*(Matyu 12:43-45)*

<sup>24</sup> Yesuse saa wengo mako baabeneba Hob misiam naka make bekeba bianea deibanea monea Sinanano genea betan engengo hen haabia blim kesoa baanea Temde monia amo sino bi tibio ye unano genea <sup>25</sup> imin motemea naka ele sangganwan amo glitanea eito kibonanebio kesoa <sup>26</sup> watemnea e imin monea hob misiami maki 7 i kukub misim misiamo namino e titilo gaisaibbuei baabe dletnea moniba naka ele bekebaniba e sino misiam binebuo otane am olo dimo e dot misiam anamabebo ge baabesebe. <sup>27</sup> Yesuse weng olo obe dimo nakaia unangai homoni ye hliba eka unang mako i isak daak bianoa ngananoa unang olo sino kemfanoo moyo kem dibiam nabinobio kesoa o seinoko gesoa <sup>28</sup> Yesuse baabeneba Bain otane nakaia unangai Gode wengo wente bianiba wafu nimib naka unang ita kla seinine ge baabesebe.

*Naka maki Ni okok sumo mo watemalaobobo ge ngambisiobe.*

*(Matyu 12:38-42; Mak 8:12)*

<sup>29</sup> Nakaia unangai homoni te mibliba Yesuse baabeneba Nakaia unanga ibo mema dim olo naka misiam unang misiamobo, ibo funaniiba Kobo inamin namin okok sumo klaneba ni sino mo watemin blimo watem tekein kenoba Kobo Gode titilsabo ge funanomo gabib otane Gode ibo inamin namin okok sumo mo alebenamabebabe. Sinanggwano Gode e weng omkeimalin nakae Yonae okok sumo olokiem alebanebio yota funaine! Yonae aningo amun tem wat bia amo asa blimanoa make dime imin fua dabaso inanea Gode nesa makob inatnenamabebe. Gode inanea klanea ibo watemomabiobe. Okok sumo afeto blimobe. <sup>30</sup> Makob sino Nineba bib seli Gode Yonae okoko omalea e nanea watemniba i funaniiba God eta dabanea tlebiobo ge funasib inania Abilim Da Tlemin Naka nesa okok sumo memalo klaia nakaia unangai watem tekein keniba God eta dabaneta tlebiobo genomabiobe. <sup>31</sup> Sinanggwano Yudai komok sume Solomone tekein kemim ayamo omkeimasea betan mak unango komok sumobe. O afoko melen sin da ye bianoa funanoa E wengo kla wentenite geno kesoa o bibo deibonoo aalan wat aalan wat binoo tenoa e wengo wente binobio otane ne Solomone gaisaioibe. Memam dim olo nakaia unangai ne wengo mo wentebibba kesoa sinanomo Gode nakaia unangai kukubo klanamabebo dimo unang olo baanoa Nakaia unanga ibo ib kukubo misiamobe. Niminbabe, ibo Solomone gaisanamin nakae wengo mo wentim blimobo ge baabenamabobe. <sup>32</sup> Sinanggwano Yonae monea Nineba bib ye unanea Gode wengo Nineba bib seli omkayebae e wengo wenteniba hengmino deibueibbio otane ne Yonae gaisaioibe. Memam dim olo nakaia unanga ibo ne wengo mo wentebibba kesoa sinanomo Gode nakaia unangai kukubo klanamabebo dimo Nineba bib seli baaniba Nakaia unanga ibo ib kukubo misiamobe. Niminbabe, ibo Yonae gaisanamin nakae wengo wentib otane ib hengmino mo deibueim blimobo ge baabenomabiobe.

*Keb kino keb damo ayalobe.*

*(Matyu 5:15; 6:22-23)*

<sup>33</sup> Yesuse imin baabeneba Nakai ayale mo ei oboniba amo kitem daako mo ofaniba eka bakete mo obonibta obbuba nanimibbabe. I keim ofa bliba dukge bieta nakaia unangai am olo temo tam tloom gaibo atenibta tam tloomabiobe. <sup>34</sup> Nakai ayale



oboniba am tam ofaniba tubunea bornatowanamabebe. Ib kino makob damo ayal kesoa ibo inamin namino ayam ota wateme bianiba namib mole ib bobol tem funin osa makob klayam ayal inamin anamabobe. Eka ib kino inamin namin misiam ota wateme bianiba namib mole ib bobol tem osa makob amo millilambio inamin anamabobe.<sup>35</sup> Inamin kesoa kobo kla kimanale! Keb kino misiamub kenomo kobo inamin namin kukub ayamo mo nanamabebbabe.<sup>36</sup> Eka keb bobol tem funino alukum ayalsa bianoa atosino mo millilaim blim biamo keb damo bomat geneba makob ayal tubunin kenamabeobe.

*Felisie isa eka hekmel weng aleyemin naka isa i kukub misiamo wafu binibbiobe.*

*(Matyu 23:1-36; Mak 12:38-40; Luk 20:45-47)*

<sup>37</sup> Yesuse weng olo baabenabea Felisi make Yesuse nganabanea Kobo tleba ne am tam bianoba imeno downonomo ge nganabasea tamnea biin tam temna bianiba<sup>38</sup> imeno dowom gena bianiba Felisie temeo Yesuse kweilono mo fubaim blim bianeta imeno downonang genabe kesoa atemnea e bobol temo hekhek funsea<sup>39</sup> Yesuse baabanea Felisie ibo makob nakai aangketo tibo fubawebib otane amun tem daako mo fubawemin blim deibo binabibo ulabobe. Ibo ib aal tib yota fuba bianiba klabib otane ib bobol tem iwat ole kukub misiam ota kweki welubenobiobe.<sup>40</sup> Ibo bobol tem funin blimobe. Gode inamin namino tib olo klanea bobol tem osa klanebiobe.<sup>41</sup> Otane ibo bobol tem ayam bianiba inamin namino naka maki inamin namin blimi okaye bianiba daayemib mole ib bobol tem funino ayam anamabobe.<sup>42</sup> Felisie ibo kukub misiamo ib dimo tam tlamabo kesoa klaine! Ibo tetan osa kumuk osa unin gwab gwabo mak osa 10 olminiba olokiemo Gode olaniba mako ibma unam binabibo kukub olo ayam kesoa ibo mo deibonimibe! Ibo hekmel weng olo ye wafu bliib otane dot ayamo namine genobuo ibo mo wafu bliibbabe. Kukubo dot ayam olo inaminobe. Kot kemin kukubo afet baka naminba olo unobio iwat namin kukub osa eka Gode gobanin kukub osa otabe.<sup>43</sup> Ibo kukub misiamo ib dimo tam tlamabo klaine! Ibo Gode amo tem tamo nakaia unangai kin dimo toulalino kukub osa eka imen wemin baan dimo motemoba nakaia unangai yateniba naka ayami ye tliobo ge oyemine galin kukub osa ota gobo binabiobe.<sup>44</sup> Ibo kukub misiamo ib dimo tam tlamabo klaine! Ibo makob haam gloutemo haami dolbueibbua naka maki mo tekein kebibba kesoa tama tama unebibo ulabobe. Inanimib nakai Gode

kin dimo ninik gamobe. Ibo inaiba nakaia unangai ibo yatemniba funaniba I naka ayamobo geniba isa ib ulab aib otane Gode kin dimo isa ninik gamobo gesea<sup>45</sup> hekmel weng tekein kemin nakae make Yesuse baabanea Aleyemin naka kobo weng olo ni weng dobo weng baabenebobo gesea<sup>46</sup> Yesuse baabenea Kukub misiamo hekmel weng tekein kemin naka ib dim osa tam tlamabo kesoa ibo klaine! Nakaia unangai Gode kukubo wafu nomo gabibi ibo hekmel weng afeto homono dolaniba doyiba i hekmel weng olo wafu nomo geniba naatemib otane bumolokobe. Ibo mo daaye bibbabe.<sup>47</sup> Ibo kukub misiamo ib dimo tam tlamabo kesoa klaine! Ib faninwali Gode weng omkeimalin nakai yenaiba kaansiba dolbueibbua ibo gloutemo eito kiwe binabiobe.<sup>48</sup> Ibo funaniba Nib faninwali klayam nanibta Gode weng omkeimalin nakai yenaiba kaaibbiobo ge fumbib kesoa ibo i gloutemo eito kiwe binabib otane<sup>49</sup> Gode tekein kemino ayam kesoa baanea Ne weng omkeimalin naka isa ne okok dlasanin naka isa dlai moniba isu temiba nakaia unangai teniba ne weng omkeimalin naka isa eka ne okok dlasanin naka isa maki yanaiba kaaniba eka maki enin sumo omyenanomabiobo genebiobe.<sup>50</sup> Sinanggwano Gode dabale mema klane dim ye kiloniba Gode weng omkeimalin nakai yebiba kulilam tlibbuo memalosa sma ye yebiba kulilabib kesoa Gode yang kenea ina binibbio nakai molobsel ibo enino omyamabebe.<sup>51</sup> Mikiktemo Kene e ninge Ebele ananea kaanabea eka ib faninwali nakai kukub moloto nabibi yem wat yem wat tebiam biniba teniba Sekalaaie Gode am sumo tem tamo Gode heitdahamin biino kikib ye mabia esa ananaibbio kesoa Gode yang kenea i molobsel ibo yenanea enin kino omyamabebe. Ne bain baabeiobe,<sup>52</sup> ibo hekmel weng afeto homon dolaib kesoa Gode nakaia unangai kukub misiamo temo dotlanamabeo mitmakamo mo tekein kebibbabe. Ibo Gode deib ayamo klao mo tekein kebibba kesoa ibo naka mak unang maki tekein kemin deibo waise bliiba i mo wentebibbabo ge baabenea<sup>53-54</sup> deibe tanea bib tam beba hekmel weng tekein kemin naka isa Felisie isa i funaniba Nibo e naatemoba e misiam yang kenea atemob mole kot kebanomo geniba naatem naatem bisiobe.

## 12

*Dim omin kukubo klaine!  
(Matyu 10:26-27)*

<sup>1</sup> Naka homon unang homoni diniba maki dim dotema sesesiba Yesuse e okok aleyemin nakai saa weng mako baabenea

Ibo Felisie dim omin kukubo klaine! I dim omin kukubo makob nakai bleto klanom gaibo yiso bolit temo kekelakaiba sitanoa einabo inaniba Felisie kukub misiam osa inanoa sum anoa nibsuo tlamabo kesoa ibo klaine! <sup>2</sup> Inamin namino nakai teilabbubo biaibo sinanomo keim anamabobe. Eka inamin namino ayam biam osa sinanomo keim anamabobe. <sup>3</sup> Inanomabib kesoa ib weng ayok olo obibo sinanomo nakaia unangai alukum wentomabiobe. Eka am tam bianiba wengo men obib ibo sinanomo taniba bib daang tam unaniba weng sum omkeimalomabiobo ge baabesebe.

*Nibo Gode elekiem e tol ota tosianomo.  
(Matyu 10:28-31)*

<sup>4</sup> Yesuse imin baabenea Nekwalo ne baabenamabibe. Naka maki ibo yenaiba kaanomabib otane ibo naka eli tolo mo tosianimibe! I dam iboko ye yenaiba kaanomabib otane ib afen smiko mo wat-wat dabenomabibbabe. <sup>5</sup> Ne wengo ibo baabenamabibe. Gode titlsa kesoa ibo e tol ota tosianine! E ibo yenanea kaaib-bua sinanomo dobianea aseinin bib unomabiobe. Ne baabenamabibe, ibo e tolo tosianine! <sup>6</sup> Ibo tekein kebib yotabe. Nakai 2 toea gwabo dloniba wan gwabi asuke asuke make nai walomabibo olo moni sumba otane Gode wan gwabi olokiemo mo dokobanota deibonemebabe. E alukum kima biebe. <sup>7</sup> Eka elekiem elekiem kobo keb aye kobo kla tekein kebianea keb gabamano elekiem ke tobo tofa tofa biebe. Wani ayam otane i besa kulanobe. Eka naka kobole afen smiksabe. Keb aye abilim ut bie kobo kla gobke bie kesoa kobo mo tosianemebe! E wani kima bie kesoa e kebsa kla kimanamabebo ge baabesebe.

*Yesuse niniino omkeimalin kukubobe.  
(Matyu 10:19-20,32-33; 12:32)*

<sup>8</sup> Yesuse baabenea Nakae waneta nakaia unangai baabenea Yesuse ne Sumobo ge baabenea ne niniino omkeimatnene bi-amo sinanomo Abilim Da Tlemin Naka nesa abiseli baabenian E nemibo genamabi <sup>9</sup> otane nakae waneta nakaia unangai baabenea Yesuse ne Sumbabo ge baabene biamo sinanomo nesa Gode abiseli baabenian Naka ele nemibabo genamabibe. <sup>10</sup> Eka nakaia unangai Abilim Da Tlemin Naka ne weng dobo weng one bianiba omkeimanimibo Gode i hengmin olo omltabenamabe otane nakaia unangai Gode Hobe weng dobo wengo baabanimibo Gode i hengmin mo omltabenamabebabe.

<sup>11</sup> Eka ibo ne niniino omkeimabibo dafao naka maki ibo dleb moniba Gode amo tem tamo kiabwal isa eka komokwal afet isa isuo unaibo ib bobol temo usano mo keyebota fum bianibta Nibo fatnamin weng ota

baabenomabbue? ge funimibe! <sup>12</sup> Am olo dimo Gode Hobe alebenea Ibo wengo enangge baabeine ge alebenamabebo ge baabesebe.

*Weng olo nakai inamin namin afobeingo bibebuei saa wengobe.*

<sup>13</sup> Naka make naka homon unang homoni isak tem daak bianea utenea Yesuse baabanea Ni aye kaanebua afobeingo aab eta alukum oleb bie kesoa aleyemin naka kobo aabe baabaseba aye afobeingo minim klutanea atosino ne onensete gesea <sup>14</sup> Yesuse baabanea Ne ib kukub klanin nakababe. Eka ne ib afobeing kikimin naka nababo ge baabanea <sup>15</sup> eka imin baabenea Ibo ib bainobo galino kla kimanimibo, inamin namino bobolo mo wayemobabe. Niminbabe, nakai i afen smik ayam inamin namino dumo mo walomabibbabo ge baabenea <sup>16</sup> eka inamin namino bobol wayemin kukub osa o saa weng mako baabenea Inamin naminsa nakae damibo imen homono damanomo, <sup>17</sup> naka ele funanea Ne imen toumin amo blim yole fatnanita ne imeno am temo olanane? ge funane kesoa <sup>18</sup> e baanea Ne imen toumin am gwab olota galafa olonita sum genita alukum inamin namin imeno o tem tam olania <sup>19</sup> ne baania Bifol homono ne afobeing ayam bitnebio kesoa memalo singka biania imena aaya olo wembiania seimbiano gese <sup>20</sup> otane Gode baabanea Kobo naka obba bobol tem funin blim kebtabo, kwitimb olota kaanamabeobe. Eka keb inamin namin ele olminabeb olo waneta olamabene? ge baabanamabe inaminobe. <sup>21</sup> Naka maki inamin namin afobeingo minabib nakai Gode kin dimo i inamin namino blimobo ge baabesebe.

*Bobolo usan keyemino weng sangobe.  
(Matyu 6:25-34)*

<sup>22</sup> Yesuse e okok aleyemin nakai baabenea Inamin kesoa ibo ne wengo wentine! Ibo bobol temo usano mo keyebota bobol tem hekheko mo fumbianibta Ni imeno fatda dlo downome? galaibe! Eka ibo ib damo talo mo wabianibta Ni youmo fatda dlonobta ni aalo dlusa waisonome? galaibe! <sup>23</sup> Imena aaya youmao dot misiambabe, ye ayam otane ib dam ole afen bliib kesoa ole dot ayamobe. Ib imena aaya youmao amit ninbabe. Afen smik ele amit nin kesoa ibo inamin namin olo bobolo mo fumbianibta ib bobolo usano mo keyemone! <sup>24</sup> Ibo wani kukubo funaine! Wani asal eule eim haablibi asiam sano mo doli bianiba eka i imeno mo mina biam nabibbabe. I imeno mo olminiba am tamo mo okabibba otane ib Aye abilim ut bie i imeno okayebebe. Wan ile besa

kulanobe. Gode emaye kima bianea imeno okayebebe. Otane naka ibole afen smiksa kesoa Gode emaye ibo kla kima bianea imeno okayebebe. E inayebe kesoa ibo imena aaya youmao bobolo mo fumbianibta ib bobolo usano mo keyemone! <sup>25</sup> Gode nakai kaanomabib amo omakabenea Yo dim ota kaanomabiobo gene biamo otane naka eli inamin namino bobolo funaniba i bobolo usan keyebua fumbianiba Ni imena youmao fatda dlomabbione galaibo kukub olo daabenoa Gode amo omakabenebuo gaiso meseinibta kaanomabiba? Yeye i mo inanomabibbabe. Gode am olo makob ye omakanebiobe. <sup>26</sup> Ibo inamin namin gwab olo mo inaim blim keib mole ibo inamin namin mak olo bobolo mo fumbianibta bobol ilumo mo omkayemone!

<sup>27</sup> Ibo aketo bobolo funaine! O sesa tam buo nakaba kesoa youmo mo bikina bianota okoko mo okok keboba otane o keto klayam bamtoubobe. Sinanggwano Yudai komok sume Solomone youm ayamo kibinebu otane aket ota Solomone eito gaisanobiobe. <sup>28</sup> Aketo amito mo nomobabe. Mema yota bamtoufa denoa dilbinoa dimo gatanoa nakaia unangai mako heleb moniba aso fakam binabiobe. Gode aket ole besa eit klabe otane naka ibole afen smiksa kesoa aketo gaisoibbiobe. E ina bianea naka ibole kla kima bianea youmo okayebebe. Ibo youmo bobolo fumbianiba ib bobolo usano keyemo mole ib bainobo galino mo sbalma nomabibba kesoa <sup>29</sup> ibo mo funanibta Ni imena aayao fatda dlota downonomabbione? gabianibta funimibe! <sup>30</sup> Nakaia unangai Gode mo bainobo gabibbai inamin namin olo bobolo fumbib otane ibo mo i ulab animibe! Niminbabe, ib Aye abilim ut bie ibo inamin namino blim bibebio tekein kebebe. <sup>31</sup> Ina otane ibo amitie fumbianiba Gode nakaia unangai kimanamabe amo tlamabobo ge funimib ota Gode inamin namin olo ibo oyamabebo ge baabesebe.

*Abilim uto inamin namin ayamo olomabiobe.*

*(Matyu 6:19-21)*

<sup>32</sup> Yesuse imin baabenea Ne kukubo wafu blib naka ibo mo tosanimibe! Nib Aye baanea Ne nakaia unangai kimanang gamio ibsa kimanamabi kesoa ne seinyebibo genebiobe. <sup>33</sup> Ibo afobeingo alukum naka maki waloniba i monio oise oleb moniba inamin namin blimi oyeniba daabeine! Ibo inanimibo inamin namin ayamo abilim uto olomabiobe. Inamin namin olo mo blimanomobabe. Eka abilimo ayok henin kukubo blimobe. Eka bemamina inamin namina i mo bolo downoaihbabe. <sup>34</sup> Inamin kesoa ibo ib bib

mako inamin namin ayamo bibe biamo ibo funaniba Ni bib olo amit nomo ge fumbianiba ib bobol temo omulomabiobo ge baabesebe.

*Okok nakai klabianiba hembibo weng sangobe.*

<sup>35-36</sup> Yesuse imin baabenea Ibo klaniba makob naka make monea naka make alelo omamabeo Imeno baka downita tlamabibo genea unebua e okok nakai youmo geme tlaniba aala onamino deiboniba sma dlusaniba ayalo otana ola bianiba Kimanin nakae tlamabebo ge fumbianiba waisa bliba tenea amisalo gong gong gansea heb-mamsab betelabanomabib inaniba ibsa klaine! <sup>37</sup> Kimanin nakae tetemea e okok nakai mo aala unim blim bianiba waisa hembiba yateme mole naka eli seinine! Ne moton baabenamabibe, kimanin nakae emaye i biino tounomabib wengo baabene a eka emaye imeno oyenanamabe. <sup>38</sup> Eka ibo ibalanomo osa eka meb bomanang genabo biamo osa ibo mo aala unim blim bliba kimanin nakae te yateme mole ibo seinine! <sup>39</sup> Ne saa weng olo baabenamabio kla funaine! Am gosake tekein kenea ayok henin nakae tlamabebo gene mole e mo aa uneta ayok henin nakae teneta amo belaneta afobeingo oisa unamabebabe. <sup>40</sup> Ibsa inaniba klaine! Abilim Da Tlemin Naka ne imin tlamabi amo ibo mo tekein kebibba kesoa klaniba waitne bliitane ge baabesebe.

*Saa weng olo okok nakai ayam esa misiam esa i wengobe.*

*(Matyu 24:45-51)*

<sup>41</sup> Fitae baanea Sum kobo saa weng olo ninita baabeneb bleka alukum nakaia unanga isa baabenebo? gesea <sup>42</sup> Sume baabanea Ne okok naka ayami weng ota baabenamabibe. Nakae bobol tem funin ayam bianea e okoko ayam okok kebe naka ele inanamabebe. E kimanine baabanea Kobo okok naka eli kima bianeba imeno okayebete ge baaba unebua <sup>43</sup> binea imin tetemea okok naka ele makob ele baaba unebio inabea atemameo e seinhamabebe. <sup>44</sup> Ne moton baabenamabibe, inaneme naka ele e kimanine baabanea Ne inamin namino alukum kehta kimanale ge baabanamabebe. <sup>45</sup> Otane okok naka ele funanea Ne kimanin nakae heb-mamsabo mo tlamabebabo genea okoko debianea okok nakaia unangai maki yebianea imeno wembianea aa misiamo wembiam bianea e gabam tol temo mima fuba denabua <sup>46</sup> funanea Ne kimanin nakae memalo mo tlamabebabo ge fumbianea inabea kimanin nakae tenea atemameo ande dofanea dabanea monea nakaia unangai

Yesuse mo bainobo geim blim isu unamabebe.

<sup>47</sup> Eka okok nakae e kimanin nakae bobol tem funino tekein kebe otane e inamin namino klaneta kimanin nakae okoko nanale gabeo mo naim blim kene mole kimanin nakae kla ande dofanamabebe. <sup>48</sup> Otane okok nakae e kimanin nakae bobol tem funino mo tekein keim blim bianea e okoko misiam nabe mole kimanin nakae gwab ande dofanamabebe. Naka maki Gode bobol tem funino klayamo omkayebe nakai e okok sumo klamine! I bobol tem funino klayam wafu blih nakai naka mak unang maki daabeine ge baabesebe.

*Yesuse kukubo nakaia unangai bakalinobe.*

*(Matyu 10:34-36)*

<sup>49</sup> Yesuse imin baabenea Ne tenia dabalim ele tlibuo makob ase obeb daake daia tubuneko genita daak tlibu otane as ele mo tubueim blim bie kesoa ne funania As ele atole hebmamsab tubuneko gabibe. <sup>50</sup> Makob nakai aayo fueilaiba aa gamo watnoa nakai dim wat unamabo inaminobe. Nesa inania enin sumo ne dimo tam tlamabo kesoa memalo ne bobolo ilum omfutnebio otane enino blimutnenomo ne bobolo ayam funanamabibe. <sup>51</sup> Ibo mo funanibta E tenea nakaia unangai dabalim ele blih bobol tem fiab omyang geneta tlebiobo genimibe! Ne baabenamabibe, ne tlibuo naka mak unang maki ne bainobo getnenomabib kesoa naka maki dosuanomabiobe. <sup>52</sup> Memalosa sinanomosa nakaia unangai asuke asuke make nai am olokiemo tem tam blih maki ne bainobo getneiba eka mak ile ne mo bainobo getneim blim kenaniba belaniba mito asuaniba asui teniba asumatnai wasi dlaiba eka asumatna isak asuei wasi dlananiba i sinwalo baase baase bianiba <sup>53</sup> naka maki ne bainobo getneiba eka mak ile ne mo bainobo getneim blim kenaniba aalebe tenea miine wasi dofanea eka miin esak tenea aalebe wasi dofanea eka awoko tenoa moonoo wasi omfanoo eka moonoo tenoa awoko wasi omfanabua eka imake awoko tenoa miin alelo wasi omfanabua miin alelo tenoa imake awoko wasi omfana bianiba i sinwalo alang sanine genita tlibiobo ge baabesebe.

*Inamin namin kukubo tam tlang gamo klulo kinoa watenoba tekein kenamino wengobe.*

*(Matyu 16:2-3)*

<sup>54</sup> Yesuse nakaia unangai baabenea Ibo temebiba ayungo genoa amo mililansoa ibo hebmamsab baaniba Soko tlamabobo ge baanimibo moton ye tenabobe. <sup>55</sup> Eka ibo temebiba am ayam bomanoa glol sume

tlemsea baaniba Ameng unemang genotabo ge baanimibo bain inanoa ameng unemabobe. <sup>56</sup> Ibo dim omin sitalsabe. Ibo klul olo watemniiba moton sambinabib otane inamin namino memalo tam tebu olo watemebibo o mitmakamo mo tekein kebibbabo ge baabesebe.

*Kobo nakai kot kebkenomabib nakai temnaniba wengo klaine!*

*(Matyu 5:25-26)*

<sup>57</sup> Yesuse imin baabenea Ibo nimin kenibta ibmalo klaol mo funanibta kukub olo misiamobe eka kukub olo ayamobe geim blime? <sup>58</sup> Naka make kobo kot kebkenang genabea Kot kenomo geniba bebib biamo hebmamsab klanibta bobol temo makob aine! Ibo inaim blim kenib mole e kemeb monea kot kimanin nakae kemandea eka esak kemonea awa genalin nakae kemalea kemeb monea klabut am tam danamabebe. <sup>59</sup> Ne bain baabenamabibe, kobo klabut am tamo biaebo kot kimanin nakae baabkenea Monio inamin kina walone ge baabkene biamo alukumo mo walim blim keneb mole amitie klabut anamabeobo ge baabesebe.

## 13

*Nakaia unangai bainobo geim blimi kaanomabiobe.*

<sup>1</sup> Am olo dimo naka maki teniba Yesuse baabaniba Galili seli eil blumakau yananiba Gode heitdabamomo gabib otane Failate awa genalin nakai dlanea moniba Galili nakai yenaiba kaaiba naka eli ilem osa eka eil blumakau ilem osa makob daak unobo gesiba <sup>2</sup> Yesuse baabenea Ibo baaniba Kaaib naka eli i hengmino Galili naka maki i hengmino gaiseib kesoa i kaaibobo gabiba? <sup>3</sup> Yeye ib bobol tem funin olo molotbabe. Ne ibo baabenamabibe, ib hengmino mo deiboniba ib bobol temo Gode omalim blim keib mole ibsa kaanomabiobe. <sup>4</sup> Eka ibo funaine! Sino Siloam bibo amo asal am geibbua dobo blelanoa nakai 18 i yaloo kaaibbio ibo fumbibo I hengmino naka maki Yelusalem bib ye blih i hengmino gaiseib kesoa i kaaibbiobo ge fumbiba? <sup>5</sup> Yeye ib bobol tem funin olo molotbabe. Ne ibo baabenamabibe, ib hengmino mo deiboniba ib bobol temo Gode omalim blim keib mole ibsa kaanomabiobo ge baabesebe.

*Asiame ete yamo mo balimim blime saa wengobe.*

<sup>6</sup> Eka Yesuse saa weng mako baabenea Naka make damibo asiame ete sano dolinebua damano kesoa tenea yamo temeaa

blim kesoa <sup>7</sup> e damib kimanin nakae baabanea Bifolo asumatna bliman otane ne tetemia asiame yamo mo balimim blim kesoa kobo namtlanale! Fatnaneta dabal ayame besa sesalanene? gesea <sup>8</sup> eka okok nakae baabanea Sum kobo deibanebua bifol ele blimansete! Ne mit daake dabale hetlania amam fluo heleb te olubanamabibe. <sup>9</sup> Inabaibua sinanoa bifole make dime mo balinemo atemomo eka e mo balinim blim kene mole kobo baatnenebta Ne namtlanano ge baabanamabebo ge baabesebe.

*Gode singkalin amo dimo Yesuse unang mako klaubosebe.*

<sup>10</sup> Gode singkalin am bomabua Gode amo tem tamo Yesuse nakaia unangai Gode wengo omkaye bea <sup>11</sup> eka unang mako hob misiame bekebo bianea ginim omkawebua bifolo 18 blimanoa o gimone hamabonebua o deibo moloto mo tamanam haanim blim binabobua <sup>12</sup> Yesuse waternea nganabone tesoa e kweile gabamon dim ut tofubonea baabonea <sup>13</sup> Ne unango, ob ginino klaubkeiobo ge baabosea o hebamsab ayam tamanoa Gode ninino dobtoulebbu <sup>14</sup> otane Gode singkalin amo Yesuse unang olo klaubone kesoa Gode amo komoke atliaubasoa nakaia unangai baabene Ibo amo asuke asuke asuke na olo dim ota okok kemine! Ibo funaniba Ni mo temoba ginino klaubenebo genib mole okok amo dim ye tetemibta klaubeneko! Eka Gode singkalin amo dimo mo tlaibe ge baabesea <sup>15</sup> Sume baabanea Ibo dim omin sitalsabe! Ibsa Gode singkalin amo alukum moniba eil blumakau am unaniba blumakau isa til hos isa tileise dleb moniba aayo unam binabib <sup>16</sup> otane unang olole Eblahame molofeitobe. O ib blumakau isa til hos isa gaisenobe. Bifolo 18 bli-manobio Gululame ge omfanebio kesoa ne Gode singkalin amo dimo tileisoi otane ibo kukub olo misiamobo gabibo? gesea <sup>17</sup> e wasi nakai aal waisenoa eka naka mak unang maki alukum e wengo wenteniba inamin namin okok sumo tam tloa watemibo kla seinmonsioibe.

*Mastet dab osa yis osa o saa wengobe.*  
(Matyu 13:31-33; Mak 4:30-32)

<sup>18</sup> Yesuse saa weng mako imin baabene Gode kimanin kukubo fatnamine? Ne fatnanita ibo Gode kimanin kukubo alebenita Inaminobo genamabine? <sup>19</sup> O makob asiame niniino mastete dabe ulabobe. Naka make e damibo dolinebua balanea damanea makob aso ulab anea wani e tung dimo toulamomabiobo ge baabene <sup>20</sup> eka imin baabene Ne fatnanita Gode kimanin kukubo alebeita tekein kenomabibe? <sup>21</sup> O makob yiso ulabobe. Unang mako yis ele

kikonoa bolite tem daak kikakanoa daak unea kwekonoa habski habskibua sinanoa sitanamabe inaminobo ge baabesebe.

*Amit gwabo weng sangobe.*  
(Matyu 7:13-14,21-23)

<sup>22</sup> Eka Yesuse monea bib mak bib mako bib sum osa bib gwab osa haabiane Gode wengo omkayem omkayemnea monea Yelusalem bib unang genabea <sup>23</sup> naka make baabanea Aleyemin naka kobo Gode nakaia unangai hengmino temo blibo homoni deibene mak ita elekiem olokiem dotlanamabeo? gesea Yesuse baabene <sup>24</sup> Ibo sbal manibta monibta amit gwabe tam unine! Ne baabenamabibe, naka homon unang homoni amit gwabe tam unomo gabib otane i mo tam unomabibbabe. <sup>25</sup> Sinanomo amo gosake amisalo dounabea ibo teniba bib tam tlaniba amisalo gong gong gabianiba baabaniba Sumo, amisalo betelabenale genimibo e baabene Ibo wanibte? Ne mo tekein kebibabo ge baabesea <sup>26</sup> ibo baabaniba Sino kebtom nitem nanoba imena aayao wembianoba eka kobo ni bib dang ye mabianeba aleye binebbiobo ge baabanabib <sup>27</sup> otane e ibo baabene Ibo ne mo tekein kebibabo, ibo hengmin naka ibtabo, de unine ge baabesea <sup>28</sup> temiba Eblaham esa Aisak esa Yekob esa eka Gode wengo omkeimalin naka mak isa Gode kimanamabe bibo bliba yatemaib otane ibole fotebenea daakniba sesa daak bianiba enin kino sum wateme bianiba eka memino sum mebianomabiobe. <sup>29</sup> Ibo inanimib ole eka nakaia unangai homoni Yudabai bib mak bib mako afok tlebo sin da tlebiame eka afoko unebo sin da tlebiame eka melen milim saut da tlebiame eka melen milim not da tlebiame naniba Gode kimanin bibo toulabianiba imeno unalomabiobe. <sup>30</sup> I inanomabib kesoa nakai memalo funaniba Ni niniin sumobo ge fumbinimibi i niniin men anomabiobe. Eka nakai funaniba Ni niniin blimobo ge fumbinimib ita i niniin sum anomabiobo ge baabesebe.

*Yesuse Yelusalem bib seli dohalilasebe.*  
(Matyu 23:37-39)

<sup>31</sup> Am olo dim ota Felisie maki teniba Yesuse baabaniba Kobo bib olo deiboneba moneba betan mak one! Komoke Helote awa genalin nakai dlane teniba kananomabiobo gesiba <sup>32</sup> Yesuse baabene Ibo moniba Helot obba til satili ulabe baabaniba Yesuse memalosa bomanomosa hob misiami fotebenaye biania ginin gami klaye biam namabibo, eka o bomanomo ota ne okoko alukum klaia blimanamabobo genebo ge baabaine! <sup>33</sup> Otane memalosa bomanomosa yota ne deib temalo

samabibe. Eka o bomanomole monia Yelusalem bib unamabibe. Niminbabe, i Gode weng omkeimalin nakae bib mako mo ananimibba kesoa ne monia Yelusalem bib unamabibe. <sup>34</sup> Ayoo, Yelusalem bib sel ibo ne dohalimbibe. Ibo Gode weng omkeimalin nakai yebiba kulila biam eka Gode dowan weng omkeimalin nakai dlabene tlaibo tom dum yenaiba kulila biam nabinabibo, ne amitie ibo dolmina biana makob kakaluko memei belo tabab tem daako dlanoa kima binabo inania kimanano gabi otane ibo nesuo deitne bliobe. <sup>35</sup> Wentine! Ibo ne wengo mo wentaobbabo geib kesoa Gode ib bibo imino daabenamino deibenamabebe. Ne ibo baabenamabibe, ibo imino ne mo natemomabibbabe. Otane sinanomo ibo baaniba Sume naka ele dabane tle ele niniino dobtouleb nomo genomabibo dim ota ne imin tlita natemomabiobo ge baabesebe.

## 14

*Yesuse naka make skila kweilao sitkahua klaubasebe.*

<sup>1</sup> Gode singkalin am bomanoa Yesuse monea Felisiei komok make am tam teneana imeno wembiba nakaia unangai kla atemebiba <sup>2</sup> eka naka make skila kweilao sitkaha binobua tenea Yesus esu meb ye bia <sup>3</sup> Yesuse atemnea hekmel weng tekein kemini naka isa Felisie isa baabene Ne ginin game Gode singkalin amo klaubanamabio kukub olo ayama bleka? ge baabese otane <sup>4</sup> i wengo kimik geib kesoa Yesuse naka ele afunea klaaubanea dabane unea <sup>5</sup> baabene Naka make ib isak tem daako men gwabe biba bianea Gode singkalin amo dimo aamuke weleb daak unameo e afu dobbianea utlamabebe. Eka eil blumakau ita biba bianiba mako weleb daak unam osa <sup>6</sup> inanea wafu ombianea utlamabobe. Olo bain bleka dim eso ge baabesea i tekein keniba e wengo bain kesoa i mo yang keim blim kesiobe.

*Nakai niniino omabbueine!*

<sup>7</sup> Nakai imeno unalom geniba teniba komokwali biino toulansiba Yesuse yatemnea saa weng mako baabene <sup>8</sup> Naka make baabene Ibo tliba imeno wembianoba ne alelo omano gesea motemom gaibo <sup>9</sup> ibo komokwali biino mo tounimibe! Naka maki niniin oyemini baabene tesiba tenea ibo baabene Biin olo naka eleta omaline gesea ibo aal fotom klaniba moniba abuk tam tounimib kesoa <sup>10</sup> naka make nganabene motemniba imeno dowom gaibo moniba abuk tam toulmbitba naka ele emaye tenea baabene Ibo uteniba biin

toulalin dim ele toulaine ge baabeseta untenba tounine! Ibo inanimib ota nakai alukum ye teniba mibianiba imeno wembib nakai ib niniino dotouleb nomabiobo ge baabene <sup>11</sup> eka imin baabene Nakai i niniino omfufu binimib nakai Gode i niniino omabbubenamabebe. Eka nakai i niniino omabbu binimib nakai Gode i niniino omfabenamabebo ge baabesebe.

*Nakai nganabenoba tliba falo ga downamin kukub otabe.*

<sup>12</sup> Eka Yesuse tetemnea Felisiei komoke dab bianiba imeno wembianiba baabene Kobo fal sumo ganang gaebo kleb nekwal isa dab tleinwal isa eka kleb meletan isa kleb bibam seli monisa isa mo nganabenemebe! Sinanomo i fal osa ganom gaibo nganabkeiba motemneba ga downiba yang kenomabib <sup>13</sup> kesoa kobo fal sumo ganang gaebo nakaia unangai inamin namin blim isa kweil misiam isa skil misiam isa kin misiam isa ita nganabenale! Inabeneb biamo <sup>14</sup> i mo yang kenomabibba kesoa naka ayami ham glutem daak daniba hana tlemomabib dimo Gode keb unin olo yang kebkenamabe kesoa kobo seinale ge baabesebe.

*Fal gamino saa weng otabe.*

*(Matyu 22:1-10)*

<sup>15</sup> Nakai alukum miniba Yesuse tem nabi-aniba imeno wembianiba wentebiba naka make Yesuse baabene Gode kimanin bibo toul bianiba imeno unalomabib nakai seinine gesea <sup>16</sup> Yesuse saa weng mako baabene Naka make fal sumo ganama bianea naka homoni weng omfubenebua <sup>17</sup> falo ganebuo eino kesoa tilanamabibo genea e okok nakae dabane monea sino weng omfubenebio naka eli baabene Ibo natline! Falo einobua tilanamabbiobo ge baabene <sup>18</sup> otane i alukum baaniba Ne mo unamabibabo ge tlaniba make baane Ne damib mako walibuo monia watemamabi kesoa ne mo unamabibabo, kobo moneba keb komoke baabanale gesea <sup>19</sup> eka mak esak baabene Kobo moneba komoke baabanale! Ne eil blumakau <sup>10</sup> i walibuo monia yatemamabi kesoa ne mo unamabibabo genabea <sup>20</sup> eka mak esak baabene Kobo moneba komoke baabanale! Ne alelo memale omobli kesoa ne mo unamabibabo ge baabanasiba <sup>21</sup> naka ele deibene monea komoke weng olo baabene I inangge baaniba desiba deibe tlibo gesea falo kimanin nakae weng olo wentene atliaubasoa okok nakae baabene Inaib yole kobo deibe moneba bib mak bib mak olo bib sum osa bib gwab gwab osa hen haabianeba nakaia unangai inamin namin blim isa kweil misiam isa skil misiam isa kin misiam isa ita dleb tele ge baabene

daabanea monea baabe dleb tetemea biino toulaniiba mako sma deibueib kesoa <sup>22</sup> okok naka ele konoke baabanea Sum kobo ne keb wengo wentenia inai otane biino mako sma deibueibobo gesea <sup>23</sup> komoko baabanea Imin moneba deib deib osa damib osa hen haabianeiba nakaia unangai imin mo baabe dleb tele! Ne funania Am olo dinsibte gabibo ge baabanea eka imin baabanea <sup>24</sup> Ne baabkenamabibo, nakai sino weng omfubeia deibbio naka eli ne imeno mo downonomabibbabo genebiobo ge baabasebe.

*Nakai kla funanibta Yesuse bekeba nine. (Matyu 10:37-38)*

<sup>25</sup> Naka homon unang homoni Yesuse bekeba bebiba deskina baabenea <sup>26</sup> Nakaia unangai wanita ne bainobo getneniba ne okoko okok kemom gib mole e aaleb esa awok osa ael osa meme isa hekwal isa ningwal isa enwal isa nengwal isa eka ili bobol tem funin osa deiboniba ne bobol ota funib mole i ne okok aleyemin nakanomabiobe. <sup>27</sup> Eka nakaia unangai wanita i niniino mo omabbuniba inamin namin misiamo i dimo tam tlemo omnakatouleb bianiba ne kukubo mo wafunin blim kenib mole i ne okok aleyemin nakababo ge baabenea <sup>28</sup> eka Yesuse imin baabenea Ib isak temo naka make Am sumo genano genemeo e kla funanea am olo monio walamabio moni olo mo kinoa walamabi bleka? genea tekanete! <sup>29</sup> E mo inaim blim bianea maa omusane mole monio blimanoa deibonebua naka maki te watemniba tlaha bianiba <sup>30</sup> baabaniba Naka ele amo kla omfanebio otane e monio blimano kesoa e hebmamsabo mo klaim blimobo ge ohamomabiobo ge baabenea <sup>31</sup> eka imin baabenea Komok make mele-tani dleb monea komok make meletani Awao genano genea unang gameo e funanamabebe. Ne awa genalin nakai 10 touseen bliba eka wasi nakai komoko mele-tan ile 20 touseen dleb tlamabe kesoa e funanea Ne mo bingania dolblia unomabib bleka? genea <sup>32</sup> e funa temea e mo sbal manea inanamabeba mole wasi nakai tlim blim bliba e naka maki dlane motemniba baaniba Awao denomo geniba awa wengo blimanoa deibonomabib inaminobe. <sup>33</sup> Eka naka make ib isak temo inanea e inamin namin afobeingo alukum abuk wawenea ne bekebne nim blim kene mole e ne okok aleyemin nakababo ge baabasebe.

*Yale saa wengobe.*

*(Matyu 5:13; Mak 9:50)*

<sup>34</sup> Yale ayam otane game blimanemeo fatnabanobta imin gam ayam anamabene? <sup>35</sup> Yale ele okoko blim kesoa nibo besa

obbianomabbio. Nakaia unangai ne wengo kla wentomo gabibi kla funaine ge baabasebe.

## 15

*Eil sibsibo mako omeb molaibbuo saa wengobe.*

*(Matyu 18:12-14)*

<sup>1</sup> Takis moni bokalin naka isa eka naka maki hengmin afeto hengabib isa Yesuse wengo wentom geniba teniba esu tesiba <sup>2</sup> Felisie isa eka hekmel weng tekein kemim naka isa yatemniba dosuananiba baaniba Naka ele fatnaneta hengmin nakai bobol wat dokabianeia i bakanea imeno wembiam biene? geib kesoa <sup>3</sup> Yesuse saa weng olo baabenea <sup>4</sup> Naka make ib isak temo eil sibsib homoni 100 bibablaba mako omeb molanemeo nimin kenamabene? E 99 i betan atosin ye dlane bianiba tetano wembiba kimanin naka ele deibenea monea mako omeb molanebua hen monea omonea <sup>5</sup> bobol wat omfanea omnakatoulebnea sein seinea monea <sup>6</sup> am unanea e nekwal isa bibam sel isa nganabenea te misiba baabenea Nibo seinomo! Ne sibsibo omeb molaibbuo hembina omibo ge baabenamabe inamin kesoa <sup>7</sup> abilim osa inaminobe. Nakai 99 i i kukubo molot wafu bianiba seimbianaiba blib otane hengmin naka make e hengmino deibonea e bobol temo deskinanea omonea Gode omalameo abilimo seinino dot sum tam tlamabobo ge baabasebe.

*Monio omeb molanamin saa wengobe.*

<sup>8</sup> Eka Yesuse saa weng mako imin baabenea Unang mako monio toeao 10 bibobua mako omeb molanomo ayale eibianoa biino glita bianoa hembinoa omamo <sup>9</sup> nekwal isa bibam sel isa nganabeno te misiba baabenoa Ne monio omeb molaibu otane memalo ne imin omi kesoa nibo seinomo ge baabenamabo inaminobe. <sup>10</sup> Hengmin nakae e hengmino deibonea e bobol temo deskinanea omonea Gode omalameo Gode abiseli kla seinhamomabiobo ge baabasebe.

*Naka tembale make aalebe deiba onseo saa wengobe.*

<sup>11</sup> Eka Yesuse saa weng mako imin baabenea Naka make meme naka teni asu blibbua <sup>12</sup> ning sake aalebe baabanea Ay kobo monia inamin naminao mo oyenseba olonoba aabe atosino oleb unea ne atosino oleb onanano ge baanea mengane kesoa aalebe inamin namino mako dab oyenseba ning sake olone otane <sup>13</sup> e mo bianeta defaim blimobe. E hebie oleb monea betan mak ye bianea kukub misiam wafu bianea monia inamin naminao webiane denea dileb molanea blimansoa <sup>14</sup> bibo yo imeno

namanoa imen teb sumo tam tloa e inamin namino blim kesoa imen teb sumo amoa<sup>15</sup> e denea monea naka make betano yo sake okok ota okok kehabea dabane monea e eili kimaba bia<sup>16</sup> e imen teb sumo abo kesoa e eili asiamo wembib ota esa downano gabise otane naka maki e daabaniba imena inamin naminao dlanamino blimobe.<sup>17</sup> E kla funanea baanea Ne Aye okok nakai kla imen homono wembianiba blibta ne imen teb biana kaanang genabibo,<sup>18</sup> ne monia ay esu unania baabania Ay keb kin dim osa Gode kin dim osa misiam naibio<sup>19</sup> kesoa kobo mo baatneneba Kobo ne minobo genemebe! Kobo baatneneba Kobo ne okok nakabo ge baatnenale genano ge funanea<sup>20</sup> monea skeimsa ye bebea aalebe atemnea dohhallilanea blublu monea afunea buk buk gahamsea<sup>21</sup> miine baabanea Ay kobo ne keb kin dim osa Gode kin dim osa misiam naibio kesoa kobo mo baatneneba Ne miinobo genemebe gese<sup>22</sup> otane aalebe okok nakai baabanea Ibo hebmamsab youmo ayamo dleb teniba dlusubaniba eka kweil obtabbumine obtabbebaniba eka skil otabbumin osa olusubananiba<sup>23</sup> eka eil blumakau meno mema eilo matak yota wananiiba gaibbua einoa downonoba seinomo!<sup>24</sup> Ne funania Ne miin ele kaanebiobo genia deb deb molaibu otane e sma afen biane imin tle kesoa nibo seinomo ge baasea inaniba seinbiba<sup>25</sup> heke damib unebua binea tenea bib asak tlanea i seinin wengo wentenea<sup>26</sup> e okok nakae nganabasea tetemea Seinin weng olo mitnakamo fatnamine? gesea<sup>27</sup> okok nakae baabanea Keb ninge ayam binea imin teteme kesoa keb aye okok nakai baabanea Blumakau meno mema eilo matak wananiiba ga dowoibobo gesea<sup>28</sup> heke weng olo wentenea atliaubasoa e bibo mo unim blim bia aalebe monea baabanea Kobo am tele! Kobo alo mo tlikemone gese<sup>29</sup> otane miin heke aalebe baabanea Ne bifol homono dimo kima biana okoka inamin naminao daake biana keb wengo mo omdibikemin blim keb wengo kla wente biana nabi otane kobo eil meme meno mo omeb tenebta wananebta ganebta nesa ne nekwal isa downobta seinin blim biob otane<sup>30</sup> keb miin ele moni sumo oleb monea bib mak ye biane unangi taman deib dleb haabiane monia inamin naminao dleb molanea imin tesa kobo eil blumakau meno mema eilo matak wananeba gebaeba downoneb gesea<sup>31</sup> aalebe baabanea Kobo amitie dum binabob kesoa ne inamin namino alukum kebmiobe.<sup>32</sup> Ne funania Keb ning ele kaanebiobo genia deb deb molaibu otane e sma afen biane imin tle kesoa klayam nanebo genoba ni seinhabuobo ge baa-

banamabe inaminobo ge baabesebe.

## 16

*Okok nakai okoko misiam nabibo saa wengobe.*

<sup>1</sup> Yesue okok aleyemin nakai baabanea Monisa nakae e monia inamin inaminao kimanin nakae bia naka maki teniba monisa nakae baabaniba Keb okok kimanin nakae inamin namin afobeingo dibikebebo gesiba wentenea<sup>2</sup> e okok kimanin nakae nganabane tesa baabanea Kobo fatnabeta ne weng olo wentine? Kobo inabeb kesoa keb okoko blimubkenobo, moneba ne inamin namin afobeingo kimatne biebo niniino dola omeb wat da omfutneneba watemano gesea<sup>3</sup> okok naka ele funanea E ne okoko nemtlanea ne fatnamabine? gene kesoa e funanea Ne dang dikmin titilo blimano yole ne fatnanane? Ne naka maki imen wengo nganabenamabi otane aal genalibo genea<sup>4</sup> e baanea Ne inanan! Nakai ne komoke inamin namino misim doisaibbio naka ita i nek ania sume ne okoko nemtlaneo naka elita bekebe monia i am ye baka biano genea<sup>5</sup> inanea naka maki e komoke inamin namino misim doisaibbio nakai alukum wengo omfubesea tlebiba make tesa baabanea Kobo ne sume inamin namino fatnamin dleb bione? gesea<sup>6</sup> e baanea Wel keto 100 oliubiobo gesea okok kimanin nakae baabanea Hebmamsab afobeingo olebbio niniin buko biamo omoneba 50 dolaneba atosino alukum mo dolanemebe ge baabanea inanea dolanabea<sup>7</sup> mak esak tesa baabanea Kobo fatnamin dleb bione? gesea naka ele baanea Asiamo wit meeno 100 gwelelibiobo gesea baabanea Afobeingo olo niniin buko biamo omoneba 80 dolaneba atosino alukum mo dolanemebe ge baabanea inanea dolaneba<sup>8</sup> komoke wentenea baanea Ne moni kimanin naka misiam ele tekein kemino sumobo ge baabasebe. Niminbabe, nakaia unangai dabalim okoko gobo blibi dabalimo tekein kemino sumobe. Gode okok nakai dabalimo tekein kemino men kesoa komoke baanea Naka ele tekein kemino sumobo ge baasebo ge baabanea<sup>9</sup> eka imin baabanea Ne baabenamabibe, ibo monia inamin naminao naka mak unang maki okaye bianaiba daayebiba ib nek wal ambik kesoa sinanomo moni osa inamin namin osa blimanang gamo dimo God esak ibo dleb monea e bibo dlanea amit nomabiobe.<sup>10</sup> Eka naka make inamin namin gwabo kla kima bie mole naka ele e inamin namino sum osa kla kimanamabebe. Eka nakae inamin namin gwabo kla mo kimanin blim kebe mole e inamin namin sum osa kla



mo kimanamabebabe. <sup>11</sup> Eka ibo dabalim olo moni osa inamin namin osa klaow mo kimanim blim kebinib biamo Gode abilimo inamin namino mo doyeneta baaneta Inamin namin olo kimaine ge baabenamabebabe. <sup>12</sup> Eka naka maki dabalim olo inamin namino mo kimabeim blim keib mole Gode ibo inamin namino mo doyeneta lbmiobo ge baabenamabebabe. <sup>13</sup> Eka komokwali asu biaibo naka make i okoko asuo mo okok kemebabe. E inanea asu okok keme mole mak eta gobanea make mo gobaim blim kenamabebe. Eka e okoko asu okok keme mole i dab i okoko klaow mo okok kemebabe. Make okok ota kla okok kebianea make okoko deibanamabe inaminobe. Ibo Gode okoko okok kemib mole ibo moni sumo bobolo mo funimibe! Ibo moni bobolo funib mole ibo Gode okoko mo okok kemomabibbabo ge baabesebe.

*Hekmel weng osa Gode kimanamabe weng osa o weng sangobe.*

<sup>14</sup> Felisiei monio gobo blib kesoa i Yesuse wengo baaneow wenteniba weng dobo weng baabasiba <sup>15</sup> Yesuse baabenea Ibo nakai kin dimo Ni ayam biobobo gabib otane Gode ib bobol tem funino watemeyebeo e kin dimo misiamobe. Ibo inamin namino watemniba fumbianiba Ayamobo gabib otane Gode kin dimo inamin namin olo misiamobe. <sup>16</sup> Hekmel weng osa eka Gode weng omkeimalin nakai weng osa omkayem teniba Yone aa fuayemin nakae binebio ye dasiba omiwo Gode dowan wengo alukum bib mak bib mako onon tlanoa nakaia unangai sbal maniba Gode kima bie bib ota unaobobo gabioebe. <sup>17</sup> Sinanomo abila dabalao blimanamabo otane Gode hekmel weng olo weng sumo osa weng gwab osa mo blimanomobabe. O amit namabobo ge baabesebe.

*Yesuse alelwali fotebenamin kukubo wengo baasebe.*

<sup>18</sup> Yesuse imin baabenea Naka make alelo fotebenea unang afet ome mole e tamano henganamabebe. Eka naka make alelo omo binea fotebenebua naka make imin ome mole naka elesa tamano henganamabebo ge baabesebe.

*Moni naka esa Lasalas esa i weng sangobe.*

<sup>19</sup> Yesuse imin baabenea Sinanggwano moni naka make bianea e youmo ayam ayamo sbalo olota webianea am obba ye bomanomo bomanomo amitie kibianea eka imen ayam ayamo wembiam nabea <sup>20</sup> eka naka make inamin namin blime e niniino Lasalas ele yai ota bobola dofanoebua <sup>21</sup> moni nakae imeno wembea

bolo dilbi daatnoa biin daak unebo Lasalase bolafa unalano genea tenea amit tam unemin ele toubmia tili teniba yaio haang daniba antubuhabiba <sup>22</sup> sinanoa inamin namin blim ele kaanea abiseli teniba debob moniba abilim daiba Eblahame inaa bliba eka moni naka esak kaansea dobbueiba <sup>23</sup> e monea aseinin bib bianea enin sumo enhabua bianea kin omeb utnea temea Eblahame ye bia Lasalase temna blib kesoa yatemea <sup>24</sup> nganabaneo Ayo, Eblaham kobo nemhalilaneba Lasalase dabaneb tenea aaye kweilone tubunea ne haange afutnesea enino gilutnesete! As ele eimbio enin sumo enebobo gesea <sup>25</sup> Eblahame nganabanea Ne miino kobo funanale! Sino kobo afen bianea inamin namin ayamo boka bianea unin ayamo wembiam bieba eka Lasalas ele misiam bianea imen aalo kitemo hembieblebio otane memalo e seimbianea bieta kobole enkebobo ge nganabanea <sup>26</sup> eka weng mak ole nganabanea Ib tletle ni tletle daako Gode baletle belanea afet anebio kesoa ni mo watnobta ibsu wat natlobta eka ibsak watenibta nisu olo tenanimibbabo gesea <sup>27</sup> moni nakae nganabanea Inanebio mole kobo Lasalase dabaneba monea ne aye am unanea <sup>28</sup> ne dab tleminwali asuke asuke make nai sbal weng baabeneko! I bib olo mo tlanibta enin kino watemaibe gene otane <sup>29</sup> Eblahame nganabanea Mosese hekmel wengo dolanebu osa eka Gode weng omkeimalin nakai wengo dolaibbu osa biamo kibianiba i weng olota wentemine gesea <sup>30</sup> moni nakae nganea Yeye ay kobo yo mo daabenamabobabo, nakai ham gloutem daak daniba hanamo temsiba yatemaib ota i hengmino deiboniba i bobol temo deskinanibta Gode omalaibobo ge nganasea <sup>31</sup> Eblahame nganabanea I Mosese hekmel wengo dolanebu osa eka Gode weng omkeimalin nakai dolaibbuo weng osa wentemim blim blib mole naka maki ham gloutem daak daniba hana teniba i wengo omyaib osa i mo wentomabibbabo ge nganabanebiobo ge baabesebe.

## 17

*Kukub misiam ota nakai bainobo galino watwat daye binabobe.*

*(Matyu 18:6-7,21-22; Mak 9:42)*

<sup>1</sup> Eka Yesuse e okok aleyemin nakai imin baabenea Inamin namin kukub misiam tam tlebianoa nakaia unangai dlabmanoa hengmino henga binabib otane naka make tenea menganea baanea Nibo inamin namino inanomo gesea wenteniba inaniba henganimibo nakae tenea menganame naka ele klaneko! Sinanomo enin

sumo e dimo tam tlamabobe. <sup>2</sup> Naka ele nakaia unangai ne bobolo fumbibi baabenea menganea Nibo inamin namin kukub misiamo nanomo gesea wenteniba inaniba hengmino henganimibo e kukubo dot misiam kesoa i naka ele sin ye inaniba tom beselibe oboniba kwel wat obasa gebaniba dobbiaib watnea aaye sole dang wat blelanea kaanebua e mo inaim blim kenamabe mole kukub olo ayamobe. Niminbabe, i inabaib biamo Gode atlihamino e dimo mo tam tlamabobabe. <sup>3</sup> Ibo ibmaye klaine! Ib neke hengmino hengane mole ibo baabaniba Keb kukubo misiamobo ge baabaniba dobo klaiba e hengmino deibonea e bobol temo deskina Gode omale mole ibo e hengmino bobolo imino mo funimibe! <sup>4</sup> Eka e amo olokiem dimo kukub misiamo na yem tatnea <sup>7</sup> genea eka kukub olo nake bianea te okemino <sup>7</sup> genane mole ibo e hengmino imino mo funhamibe ge baabesebe.

*Bainobo galino kukubobe.*

<sup>5</sup> Yesuse ele okok dlasanin nakai baabaniba Aleyemin naka kobo ni bainobo galino atomabeneba sumu benoko gesiba <sup>6</sup> Sume baabenea Ibo as mastet dabe keng keng otane dolinimibo belanea beselib damanabe inaniba ib bainobo galino men bibe biam otane ibo funaniba Ni sma Gode daabenamabebo ge funaib mole ibo as ele baabaniba Kobo mit baka ulo obeb watneba aaye sole dang wat malanale ge baabanimibo e ib wengo wentenea inanamabebo ge baabesebe.

*Okok nakai kukubobe.*

<sup>7</sup> Yesuse imin baabenea Naka make ib isak temo e okok nakae dabanea monea damibo dabal hakabene eil sibsib kima biene mak nabinea tenea am tlameo e komoke mo baabaneta Kobo hebmamsab te touneba imeno downale ge baabanamabebabe. <sup>8</sup> E baabanea Keb youmo ayamo dlusaneba ne imene funeba ifa obutne tleba downonia aaye downasita mitdata keb imena aayao downale ge baabasea <sup>9</sup> okok nakae komoke wengo wentenea inanemeo komoke mo baabaneta Ayamobo ge baabanamabebabe. Niminbabe, emaye baabanea Inanale geseta nanamabebe. <sup>10</sup> Gode okok naka ibsa makob inaminobe. Ibo inamin namin okoko Gode omyebuo alukum klaib mole mo funanibta Gode ni ayamobo ge baabeneko ge funimibe! Gode okok olo klaib mole ibo baaniba Ni Gode okok naka unang kesoa e okok olo ni omyebua okok kebinabuobo ge funine ge baabesebe.

*Yesuse nakai 10 i yaio kitdibiye binabobua klaubesebe.*

<sup>11</sup> Yesuse Yelusalem bib unang genea monea Samelia betano tletle Galili betano tletle ye helananea <sup>12</sup> monea bib mak ye temea nakai 10 obe yaio kitdibiye binabobua Yesuse waisa hen tebianiba skeim da atemniba <sup>13</sup> nganabaniba Yesuso, aleyemin naka kobo ni dohalilanale ge nganabasiba <sup>14</sup> e yatemnea baabenea Ibo moniba ib aalo Gode amo kimanin nakai alebeine ge baabesea i inaniba bebiba i yaio ayamu besoa <sup>15</sup> make aalo watemea ayamu bano kesoa imin bebianea Gode ayamobo ge ngan genea monea <sup>16</sup> Yesuse ski tamabie ye tonton golbua tounea Gode niniino dobtouleb bianea ayamobo ge baase naka ele Samelia nakabe. <sup>17</sup> Yesuse naka ele atemnea baanea Ne nakai 10 eli klaubeia ayam aib otane elekiem eta tenea ne gangobo genebe <sup>9</sup> i fab blibe? <sup>18</sup> Nakai amiseli <sup>9</sup> i mo tenibta Gode niniino mo dobtouleb blihbabe. Fetal da tlemin eta teneta <sup>19</sup> Gode niniino dobtouleb biebo genea baabanea Hananeba one! Kleb bainobo galin ota klaubkenota ayam anebobo ge baabanea onsebe.

*Gode nakaia unangai kimanamabeo tlamabobe.*

*(Matyu 24:23-28,37-41)*

<sup>20</sup> Eka Felisie! Yesuse baabaniba Fatnamin dim ota Gode nakaia unangai kimanamabeo tlamabone? gesiba Yesuse baabenea Gode kimanamino tlamabo nakaia unangai keimo mo tola watemomabibbabe. <sup>21</sup> Eka i mo watemnibta baanibta Ele biobo geniba Etale biobo genanimibbabe. Gode kimanin ole ib bobol tem wat biobo ge baabenea <sup>22</sup> eka ele okok aleyemin nakai baabenea Am olo dimo tlamo ibo memin bobol wayensoa baaniba Abilim Da Tlemin Nakae hebmamsab tlea atemomo genomabib otane ne mo tlita natemomabibbabe. <sup>23</sup> Eka naka maki ibo baabeniba Atemine! E etale biebo gesiba maki baaniba ele biebo gesib nimibo ibo i wengo mo wentubenibta bainobo genimibe! <sup>24</sup> Ibo tekein kebib yotabe. Timine tilanea nakaia unangai bib mak bib mak olo alukum atemnabib inaminobe. Abilim Da Tlemin Naka nesa inanita imin tlamabibe. <sup>25</sup> Otane mikiktemo ne dabalim olo nakaia unangai ni sinwal biobi ne abuk wananiba enin sumo onnomabiobe. <sup>26</sup> Makob sinanggwano Noae bie dimo nakaia unangai naib binabo inania Abilim Da Tlemin Naka ne tlang gami osa inanomabiobe. <sup>27</sup> Noae siibe gembeo dimo nakaia unangai dabalim kukubo goboniba Gode wengo Noae omkeimabeo omdibiha bianiba imena aayao wembianiba alelwali boka biam bliba Noae siibe genea tamnea siib tem

tam une dim ole aaye sume ei tenea yalebua <sup>28</sup> Lot esak inanea Sodom bib ye bie dimo nakaia unangai inaniba imen osa aay osa wembianiba eka inamin namino webiam eka inamin namino dleb moniba naka maki webiam eka dang dibbiam am gembiam blib <sup>29</sup> otane Lote Sodom deibo une dim ole abilim ute akile tom baka daakenoa nakaia unangai yalobio <sup>30</sup> inania Abilim Da Tlemin Naka ne imin tlang gami osa inaminobe. Nakaia unangai Gode bobolo dokobenea dabalim olo inamin namino bobol ota fumbibta ne tlamabibe. <sup>31</sup> Am olo dimo naka make basal dim tam biameo mo taneta am tamo afobeingo mo olamene! E hebmamsab blublu uneko! Eka nakae waneta damibo bie mole e imino mo moneta e youm tibe dofane biamoe mo dabamene e hebmamsab gilun uneko! <sup>32</sup> Ibo sinanggwan Lote alelo weng sango funaine! O deib tamal deibo bebo imin deskinanoo abuko temnoa Gode wengo ombiabano kesoa dimilanoa yal inanoa kaanobiobe. <sup>33</sup> Eka nakaia unangai wanita ili bobol tem funino wafu bianiba dabalim olo inamin namino gobonimibo i amito mo biomabibbabe. Otane nakaia unangai wanita ne bobolo funaniba dabalim olo inamin namino deibonimib nakai afen smike amit namabebe. <sup>34</sup> Wentine! Am olo dimo nakai asu keniba heba aambiaibo Gode make debeb unanea make deibanamabebe. <sup>35</sup> Eka unangi asu keniba imeno ninibib biamo Gode mak ota omonea mako deibonamabebe. <sup>36</sup> Eka mak ole nakai asu keniba dango dikbib biamo Gode make dobonea make deibanamabebo ge baabesea <sup>37</sup> i wenteniba baabaibo Aleyemin naka kobo olo fatda tlamabone? gesiba Yesuse baabenea Abilim Da Tlemin Naka ne tlang gami osa makob wan tiami naniba noia wanai kaaibbua fetango kunubesoa downom geniba tenabib inania tlia nakaia unangai natemomabiobo ge baabesebe.

## 18

*Unango kukub klamin nakae nganabanoa daaboseo saa weng otabe.*

<sup>1</sup> Yesuse e okok aleyemin nakai Alebeia i beten kemina kukub olo sbalma wafueine gene kesoa <sup>2</sup> e saa weng olo baabenea Kukub klamin naka make bib mak ye bie e Gode tolo mo tosaniam blim eka nakaia unangai bobolo mo fumbiam nim blim nakabe. <sup>3</sup> Unang sosen mako imake kaabonebua bib ye bianoa tenoa baabanoa Ne wasi nakai kukub misiamo omkanebiobo, kobo daatneseba kot kesite ge baaba onon bio otane <sup>4</sup> e hebmamsabo mo daabueim blim deibo bia amit inabua

binea e funanea Ne Gode tolo mo tosan biania nakai bobolo mo fumbiam bliba otane <sup>5</sup> unang sosen olo imake kaabonebua bumoloko omkaneebo yole daabosia kot kenoo deitnenoko! Deibo blia amit tlenemobo genebiobo ge baabenea <sup>6</sup> eka Sume e okok aleyemin nakai imin baabenea Ibo kukub klamin naka misiam ele wengo funaine! <sup>7</sup> Nakaia unangai Gode dlakanebuei kwinomo bomanomo amitie nganhamibo daabenamino deibenamabeo? E hebmamsab daabenamino deibe tabtab unamabeo? <sup>8</sup> Yeye e hebmamsab daabenamabebe. Inanamabe otane sinanomo Abilim Da Tlemin Naka ne tenia yaternia dabalim olo nakaia unangai bainobo geibbua bleka? genia yatemamabibo ge baabesebe.

*Felisie isa takis moni bokalin naka isa i weng sangobe.*

<sup>9</sup> Naka maki fumbianiba Ni naka ayamobo, naka maki misiamobo gabib kesoa Yesuse saa weng mako baabenea <sup>10</sup> Naka maki asu keniba Felisie etem eka takis moni bokalin nakae temnaniba moniba Gode am sumo tem tam unaniba <sup>11</sup> Felisie hananea enange beten kebianea God kobo ne naka maki ulabbabe. I naniba bobol waye biam ayok hembiam bianiba dim omin kukubo nabianiba alelwal bokalin kukubo waka biam binabibi ulabbabo, eka ne moni bokalin naka ele ulab naba kesoa ne God kobo kla gangobo ge baabkeiobe. <sup>12</sup> Keb singkalin amo olokiem olokiemo dimo am asuo ne keb bobolo fumbiania unino amitie awem omka biania beten keke biania eka ne monia inamin namino dli mole olokiem ke omo omfa omfa binia <sup>10</sup> olania olokiemo kobo okenia eka <sup>9</sup> ole ne oleb unebiam binabibo ge baanea beten kenea eka <sup>13</sup> takis moni bokalin naka ele aal waisasoa nakaia unangai isuo mebo mo unim blim skeim ye manea abilimo mo watememim blim e gabam delab manea beten kebianea baanea God kobo ne hengmin nakabo nemhalilanale ge baabanebiobo ge baabenea <sup>14</sup> eka imin baabenea Wentine! Naka ele beten kenea monea ele am unanea Gode kin dimo e naka ayam anebiobe. Eka Felisie beten weng ole Gode mo wentim blim kesoa e Gode kin dimo naka ayambabe. Nakai i niniino omfufu binimibi Gode i niniino omabbubenamabebe. Eka nakai i niniino omabbu binimibi Gode i niniino omfabenamabebo ge baabesebe.

*Yesuse Meme gwabi nesu tline genebiobe.*

*(Matyu 19:13-15; Mak 10:13-16)*

<sup>15</sup> Nakaia unangai funaniba Nibo meme gwabi dleb motemoba Yesuse i yafunea

beten kebeneko geniba dleb mo temib otane e okok aleyemin nakai dosuananiba baabeniba De unine gesiba <sup>16</sup> Yesuse meme gwabi nganabene tesiba e okok aleyemin nakai baabenea Ibo meme gwabi mo watanimibe! Deibeiba nesu tline! Nakaia unangai ne kla bainobo getneniba meme gwab eli ulab animib ita Gode kimanin bibo unomabiobe. <sup>17</sup> Ne bain baabenamabibe, nakai makob meme gwab aniba Gode baabaniba Kobo ni kimanale geim blim keib mole i mo monibta Gode kimanin bibo unomabibbabo ge baabesebe.

*Nakae afobeing homonsae weng san-gobe.*

*(Matyu 19:16-30; Mak 10:17-31)*

<sup>18</sup> Eka komok make Yesuse baabanea Aleyemin naka ayam kobo ne kukubo fatnamin ota nanita afen smike dobonita amit namabine? gesea <sup>19</sup> Yesuse baabanea Kobo fatnanebta ne naka ayamobo ge onebebe? Gode elekiem eleta ayamobe. <sup>20</sup> Kobo Gode hekmel wengo tekein kebeb yotabe. Kobo unang tamano mo henganemebe! Eka kobo nakai mo yenanebta kaanimibe! Eka kobo ayoko mo henemebe! Eka kobo naka maki dim wengo mo baabene-mebe! Kobo keb biem ay kamwali i wengo kla wente biam bianebte ge baabasea <sup>21</sup> naka elesak baabanea Gode hekmel weng obba olo baatnenebo ne sin gwab afa wafu binabibua memalosa sma ye wafu blibo gesea <sup>22</sup> Yesuse wentenea esk baabanea Otane kobo kukubo olokime ota mo nabebbabo, kobo moneba keb afobeing alukum oloneba naka maki waloneba monio oloneba nakaia unangai inamin namin blimi oyeb biam ota sinanomo abilim uto inamin namino homon olamabeobe. Kobo moneba inaneba teneba ne beketne nale ge baabane <sup>23</sup> otane naka ele inamin namino homon kesoa Yesuse weng olo baabaneo wentenea funanea Ne afobeing mo inanita naka maki oyamibabo ge funanea bobolo ilum omfubanoe e Yesuse deiba onsebe. <sup>24</sup> Inasea Yesuse atemnea baabanea Nakaia unangai moni osa afobeing osa homon bibe binomo i Gode kimanin bibo unom gaibo bumolokobe. <sup>25</sup> Til kamele youm bikinamin sile amit tem te tam unang gameo bumolok otane nakae waneta afobeing homon bibabua Gode kimanin bibo unang gameo olo dot bumolokobe gesea <sup>26</sup> nakaia unangai weng olo wenteniba baaiho Nakai afobeing homon bibebua Gode kimanin bibo mo unin blim kenimibo nakae waneta afen smike doboneta amit namabene? gesiba <sup>27</sup> Yesuse baabanea Dabalim nakai abilimo imalo unom gaibo i titil blim otane Gode inamin namino bumolok omfubanamino

blim kesoa emaye nakaia unangai daabene dletnea abilim unomabiobo gesea <sup>28</sup> Fitae wentenea baabanea Ni bib osa inamin namin osa alukum deibonoba kobo bekebeke haabiobobo gesea <sup>29</sup> Yesuse baabene Ne bain baabenamabibe, nakaia unangai alukum Gode kimanin bibo bobolo funaniba e okoko okok kebianiba i bib osa alelwal isa eka dab tleinwal isa ay esa biem osa meme isa deibe haabinib biamo <sup>30</sup> Gode mema dim olo inamin namin homono yang kebenea eka inamin namino afet osa yang kebenamabebe. Eka sinanoa mubiang amo bomanang gamo dimo i afen smike doboniba amit nomabiobo ge baabesebe.

*Yesuse kaanamabeo wengo imin baabesebe.*

*(Matyu 20:17-19; Mak 10:32-34)*

<sup>31</sup> Yesuse e okok aleyemin nakai 12 i baabenea Ibo wentine! Mema olo nibo Yelusalem bib unomo! Sinanggwano Gode weng omkeimalin nakai Abilim Da Tlein Naka ne wengo dolaniba baaibbuo bain anoa yamo balinobe. <sup>32</sup> I naka maki nemyiba i ne weng dobo weng one bianiba tlane biam bianiba eka mima helane biam nane bianiba <sup>33</sup> eka tek tebelo nebiam biniba nenaiba kaania amo asu kenia make dime imin hananamabibo ge baabese <sup>34</sup> otane e okok aleyemin nakai weng olo mitkamamo ayok ano kesoa i mo tekein keim blim kesiobe.

*Yesuse naka make kino tum gebanobia klaubasebe.*

*(Matyu 20:29-34; Mak 10:46-52)*

<sup>35</sup> Yesuse tenea Yeliko bib ye tetemea naka make kino tum gebanobia deib ken ye toubianea nakaia unangai Monio mo onine ge ngambianea <sup>36</sup> wentea naka homon unang homoni dli tlemsiba naka maki baabenea Wanita tlebibe? gesea <sup>37</sup> i baabaniba Yesus Nasalet bib sak eta tebebo gesiba <sup>38</sup> e wentenea ngambianea Yesus, komok sume Debite molofeit kobo ne nemhalilaneba daatnenale ge nganse <sup>39</sup> nakaia unangai sin tebib wenteniba dobsuananiba baabaniba Kimik genale ge baabaib otane e temdeibeneba amdofa ngambianea Debite molofeit kobo nemhalilaneba daatnenale ge ngambea <sup>40</sup> Yesuse te manea nakaia unangai baabenea Deheb tline gesea deheb tesiba baabanea <sup>41</sup> Kobo ne fatnatneneko genebte? gesea e baabanea Sum kobo ne kino klautnenea webiatnenoko genitabo ge baabasea <sup>42</sup> Yesuse baabanea Kobo funaneba Yesuse bain klautnenea ayam anamabibo geneb kesoa keb kino webiabkenoa temale ge baabanabea <sup>43</sup> hebmamsab e kino webiabanoa Yesuse

dobsible monea Gode niniino dobtouleb ne kesoa nakaia unangai atemniba i Gode niniino dobtouleb monsiobe.

## 19

### *Sakiase weng sangobe.*

<sup>1</sup> Yesuse monea Yeliko bib ye helanea unang genabea <sup>2</sup> monisa nakae niniino Sakiase takis moni bokalin nakai komokobe. <sup>3</sup> E Yesuse atemang genabe otane e mebwengobe. Nakaia unangai deibo waisasiba e mo atemin blim kene kesoa <sup>4</sup> e deibe tekein kebe kesoa e sin hebmsab monea asal daba ut bia <sup>5</sup> Yesuse ye temte tebianea omut da atemnea nganabanea Sakiaso, kobo hebmsab daak tele! Memalo ne keb am tam aanamabibo gesea <sup>6</sup> wentenea sein seinea daak tenea Yesuse debetne monea e am uniba <sup>7</sup> nakaia unangai yatemniba atliaubesoa baaniba Yesuse monea hengmin nakae am tam aanamabebo ge ohabiba <sup>8</sup> eka i bebianiba Sakiase deib ye manea Sume baabanea Sum kobo wentene! Memalo ne inamin namino alukum olminia atosino nakaia unangai inamin namn blimi oyenia eka sino ne naka maki dim baabeniba monio atosino ayok oiseibuo nakai asuke asuke nai oyenia yang kenamabibo gesea <sup>9</sup> Yesuse baabanea Niminbabe, naka elesa Eblahame molofeit kesoa Gode nakaia unangai am olo seli memalo hengmino temo blibo dotlanebe. <sup>10</sup> Abilim Da Tlemin Naka ne tenia nakaia unangai hengmin temo blibi hembiania dotlanang genita tlibiobo ge baabasebe.

*Okok nakai i kimanine monio kikibeseo saa wengobe.*

*(Matyu 25:14-30)*

<sup>11</sup> Yesuse inangge baasea nakaia unangai wentenabiba saa weng mako baabesebe. Niminbabe, Yesuse tenea Yelusalem bibo kikib ye bia nakaia unangai fumbianiba Memalota Gode kimanamin dimo tam tloa nakaia unangai alukum watemiobo galib kesota e saa weng olo baabenea <sup>12</sup> Naka make funanea Ne monia bib mak skeim ye motemia kiabwali komok nemfaiba imin tenia nene bib ele okok kebiania ne bibam seli kimanano genea <sup>13</sup> e okok nakai 10 i nganabene tesiba 20 kina oyen tlanea baabenea Moni olo oloniba inamin namino mo waloniba olabianiba webianiba atosambiba sum anabota tlan ge baabenea deibe unea <sup>14</sup> ele bibam seli dobsuananiba naka maki dlaiba moniba kiabwali baabeniba Ni naka ele mo moneta ni bibamo kimanamebabo geib otane <sup>15</sup> kiabwali i wengo ombiabeniiba dofaiba komok ambinea sinanoa imin tena bibam seli baabenea Sino ne okok

nakai monio oyen unibiobo nganabeiba i blofet monio olib biamo oleb tliba watemano gesea <sup>16</sup> nganabesiba naka make tenea baabanea Sum kobo keb K20 o onen unebbuo webiania blofet monio K200 olibiobo gesea <sup>17</sup> komok sume e okok naka ele seinha bianea baabanea Kobo okok naka ayamobo, monio gwabo kla kima biebb kesoa memalo komok kemfaia bibo 10 olo kimanamabeobo ge baabanabea <sup>18</sup> mak esak tenea baabanea Sum keb K20 o webiania blofet monio K100 olibiobo gesea <sup>19</sup> komoko baabanea Kobole kemfaia bibo asuke asuke make na olo kimanamabeobo ge baabanabea <sup>20</sup> eka mak ele tenea baabanea Sum keb K20 olonia baus tem daak olakania kima blibe. Sma ele biobe. <sup>21</sup> Niminbabe, ne tekein kebibe, kobo naka dleb kesoa naka maki inamin namino klabibio doise tlebianeba eka imen dang osa dolmaib biamo imeno weleise tlebiamb binabeb kesoa ne keb tolo tosiانيا keb monio sma ele olaibua oleb tlibo gesea <sup>22</sup> komok sume baabanea Kobo okok naka misiamobo, kleb weng ota kot kebkenobe. Bainobe neko ye naka dleb biania naka maki inamin namino dlaib biamo doise wembiania eka naka maki imen dango dolmaib biamo weleise wembiam binabibe. <sup>23</sup> Kobo olo tekein kebibe otane nimin kenebta ne monio moni bumin am temo mo olaim blime? Kobo moni bumin am temo olanebbiota mole o okok kebua blofet monio tlak unebota tenita olibo genea <sup>24</sup> e naka maki meb ye mablibi baabenea E K20 o oisaniba nakae K200 oleb bie naka eta olaline gesea <sup>25</sup> i baabaniba Kobo naka ele K200 o bibabiobo ge baasiba <sup>26</sup> komoko baabenea Ne wengo wentine! Ne nakae okoko oman temia e okok olo kla okok keme mole ne naka ele seinha biania e okoko imin mesein kenia omalamabibe. Eka ne nakae okoko gwab oman temia e okok olo mo okok kemin blim kene mole omeisanamabibo ge baabenea <sup>27</sup> eka imin baabenea Ne wasi nakai kiabwali baabeniba Ne mo komok anamene ge baatnenibibo nakai dleb teniba nene kin dim ele yenaiba kaaine ge baabenebiobo ge baabesebe.

*Yesuse komok sumi ulab anea Yelusalem bib onsebe.*

*(Matyu 21:1-11; Mak 11:1-11; Yon 12:12-19)*

<sup>28</sup> Yesuse wengo oyebea blimanoo deibenea Yelusalem bib unang genea <sup>29</sup> e sin monea bibo niniino Betfasi bib osa eka Betani bib osa o tletle ye amgolime Olibe tabab ye unanea e okok aleyemin nakai asuei baabenea <sup>30</sup> Ib dabo metniba bib meto temibta til dongki mene bib

ye dobginibua biebo, nakai sino e dimo mo tounibta debeb haanin blimobo ibo atemaibo hebmamsab tileisaniba debeb tline! <sup>31</sup> Eka naka maka ye bianiba baabeniba Fatnanibta debeb unom genibte? ge baabeib mole ibo baabeniba Sume okoksa kesota dlane tenobta debeb unom genobtabo ge baabenibta debeb tline ge baabenea <sup>32</sup> dlanea moniba ele baabenebio inaniba <sup>33</sup> talo tileisa dobonabiba e goseli baabeibo Ibo fatnanibta debeb unom genibte? gesiba <sup>34</sup> eka asu dabi baabeniba Sume okoksa kesota dlane tenobta debeb unom genobtabo ge baabeniba <sup>35</sup> debeb tatniba Yesus esu tab teniba i youmo tibo gemeloniba til dongki mene dim ut dongananiba Yesuse daabaiba utnea <sup>36</sup> til dongki mene dim ut tounea debeb bebea nakaia unangai funaniba Yesuse komok sumobo geib kesoa youmo deib deib ye toum unibua <sup>37</sup> e tenea amgolime Olibe golim ut tlanea amgolime deibanea delab mabianiba Yelusalem bibo kikib meb tlin kesoa e okok aleyemin nakai e inamin namin okok sumo klanea watemibbuo i funaniba seimbianiba Gode niniino dobtouleb bebianiba <sup>38</sup> ngambianiba Komok Sum ele Sume niniin dim ota tlebo, Gode daabaneko! Gode nibo seinyebebo, niho e niniino dobtouleb nomo ge ngan nganiba bebiba <sup>39</sup> eka Felisiei maki nakaia unangai isak daak bianiba Yesuse baabaniba Aleyemin naka kobo keb okok aleyemin nakai deine ge baabenale ge baabasiba <sup>40</sup> e baabenea I kimik geib mole Gode tomo weng omulea ngambianoa ne niniino nemtouleb namabobo ge baabesebe.

*Yesuse Yelusalem bib seli melabesebe.*

<sup>41</sup> Yesuse inanea monea Yelusalem bibo watemnea nakaia unangai meye bianea <sup>42</sup> baabenea Mema dim olo ibo inamin namino bobol ayam omyamabo tekein kenimibo ayam otane inamin namin olo ayok bio kesoa ibo mo watemnibta tekein kenomabibbabe. <sup>43</sup> Ibo wentine! Sinanomo ib wasi nakai yenanomo geniba teniba deib unemino alukum ge waiseniba kan moniba <sup>44</sup> ibsa ib alalwal isa ib meme isa yafuniba yenaniba bibamo inamin namin osa alukum watwat dabe tlanomabiobe. Niminbabe, ne tenia deib ayame alebei otane ibo ne bobolo mo funaim blim kesota nabenomabiobo ge baabesebe.

*Yesuse nakai Gode am sumo tem tamo inamin namino webibo fotebesebe.*

*(Matyu 21:12-17; Mak 11:15-19; Yon 2:13-22)*

<sup>45</sup> Omito Yesuse tanea Gode am sumo daam tem tam unanea tenea nakai inamin namino dleb teniba naka maki webianiba monio bokabib kesoa yatemnea fotebenea <sup>46</sup> baabenea Gode e buk temo baanea Ne am sum ole ne nganemin amobogenebu otane ibo am olo misiam omkabiba o makob ayok henin nakai amo ulab anobo ge baabesebe. <sup>47</sup> Yesuse inanea ye bianea am obba ye bomanomo bomanomo yo dimo nakaia unangai Gode am sumo tem tam aleyebea Gode amo kimanin nakai komok isa eka hekmel weng tekein kemina naka isa eka besa komokwal afet isa baaniba Ananoba kaaneko gabib otane <sup>48</sup> nakaia unangai e wengo sbal maniba wentemib kesoa komokwali nakaia unangai tolo tosanianiba e mo anaim blim deiba bisiobe.

## 20

*I Yesuse kil baabaniba Waneta kobo titil olo omkakebene? ge baabasiobe.*

*(Matyu 21:23-27; Mak 11:27-33)*

<sup>1</sup> Am mak bomanoa Yesuse nakaia unangai Gode am sumo daam tem tamo wengo omkaye bianea aleyebea Gode amo kimanin nakai komokwal isa eka hekmel weng tekein kemina naka isa naka gang isa teniba <sup>2</sup> baabaniba Waneta baabkeneta Okok olo inanale ge baabkeneta kemane tlebbione? Eka waneta kobo titil olo omkakebeta okok olo klabebe? be baabasiba <sup>3</sup> e baabenea Nesak ibo weng mako kil baabenamabibe. <sup>4</sup> Yone nakaia unangai aayo fuaye binebuo waneta e titilo omaneta dabane teneta fuaye binebione? God eta bleka naka itio? gesea <sup>5</sup> i wenteniba i sinwalo obianiba Niho baanoba God eta e titilo omaleta okok binebiobo genob mole e baabenea Ibo nimin kenibta e wengo mo bainobo geim blime? ge baabenamabebe. <sup>6</sup> Eka niho baanoba Nakai titil ota e omkahabitba okok kebinebiobo genob mole nakaia unangai tomo olo bina yenanomabiobo geniba i funaniba Yone Gode weng omkeimalin nakabo, God eta e titilo omkahabeta okok binebiobo geniba <sup>7</sup> i Yesuse dim baabaniba Ni Yone aa fuayemin nakae kukubo mo tekein kebobbabo gesiba <sup>8</sup> Yesus esak baabenea Nesa mo baabenita Naka yeta ne titilo omkanebeta okok olo okok kebibo ge baabenimibabo ge baabesebe.

*Naka misiami waen damibo kima blibo saa wengobe.*

*(Matyu 21:33-46; Mak 12:1-12)*

<sup>9</sup> Yesuse nakaia unangai saa weng olo baabenea Naka make tek waen dango

dikilanea damib kimanin nakai baabene Ibo damib olo kima bianiba okok kebiba tek waen yamo balinoa yamanomo deiloniba atosino ibo oleb une bianiba eka atosino nemi tounne biam blibte ge baabene e monea betan mak skeim ye binea <sup>10</sup> sinanoa funanea Enanoko! Tek waen yamo bali bianoa yaman toumobo genea e okok naka make dabaia monea nakai damibo kima blib isu motemea teko yamo weloniba nemio olutne nimibo olutne tleko genea dabanea moteme otane damibo kima blib nakai tek waen yamo welubanamino deibaniba afuniba ande dofaniba fotebeiba motemsea <sup>11</sup> eka mak esak dabanea motemea imin inaniba tek waen yame welubanamino deibaniba afuniba ande dofaniba dabaiba mo temnane kesoa <sup>12</sup> mubiango mak esak dabanea motemea ande dofaniba fotebeib kesoa <sup>13</sup> damibo gosake baanea Ne fatnanane? Ne mine kla goba bli eta dabaia motemameo i e wengo wentomabiobo genea dabanea moteme otane <sup>14</sup> nakai damibo kima blib nakai atemniba i sinwalo baaniba Nibo naka ele ananoba kaaneke! Sinanomo naka ele aalebe kaanemeo inamin namin afobeingo eta olamabe kesoa nibo ananoba kaanebua sinanomo e aalebe kaanemeo inamin namino alukum nibta olomo geniba <sup>15</sup> dobbiaib tamnea sesa tam onsea anaiba kaane biamo damib gosake damib kimanin naka eli fatnabenamabene? <sup>16</sup> E tenea okok naka eli yenanea kaaba damib olo naka mak ita omya kimanomabiobo gesea nakaia unangai wenteniba i mo inanomabibbabo gesib <sup>17</sup> otane Yesuse yateme biane baabene Weng olo mitmakamo fatnamin ota Gode buk temo bione? Gode buk temo baanoa

Am genalin nakai sbal as ele misi-amobo temdeibanomo geibbu otane komoke baanea Yeye ibo sbal as ele isak amun ayamobo bikieine gesea i inaniba sbal as ele isak amune bikieibbiobo genobio kesoa

<sup>18</sup> Nakai alukum sbal as ele dime yenano mole wa keng keng manomabiobe. Eka sbal as ele dla daaknea naka make obubane mole tualonea difib maman inanea ananea kaanamabebo ge baabesebe. Weng olo mitmakamo inaminobe. Sbal as ele Yesus etabe. Nakaia unangai e mo bainobo geim blim kenimib ile enin kino wate-momabiobe.

<sup>19</sup> Hekmel weng tekein kemin naka isa Gode amo kimanin nakai komokwal isa i Yesuse saa weng olo baabeneo wenteniba Banita baabenebo geniba Afunoba klabuto ge debeb unomo geib otane i nakaia unangai tolo tolsiananiba deibasiobe.

*Komokwali komok sume Sisae monio olanamino wengo Yesuse baabasiobe.*

*(Matyu 22:15-22; Mak 12:13-17)*

<sup>20</sup> I Yesuse kima bianiba naka maki baabeniba Ibo moniba Yesus esu unaniba e wengo wentebuobo gabianiba kil baabaiba e wengo afet yang kene mole nibo wentenoba afu debeb monoba komok sume dimo kot kebanomo geniba dlaiba moniba <sup>21</sup> baabaniba Aleyemin naka kobo ni tekein kebuobo, kobo weng molot ota obianeba eka Gode wengo kla aleye biam binabeobe. Kobo mo fumbianebta Eli kimanin nakabe eka elile kimanin nakababe gabebbabe. Kobo i wengo makob omkaye binabeb kesoa <sup>22</sup> kobo fatnange fumbebe? Nib hekmel wengo mo baanoa Nib takis monio Lomo komok sume Sisa eta olaline genobua bleka? Ni olaloma bleka deibanomo? gesiba <sup>23</sup> Yesuse i dim omin kukubo tekein kebe kesoa baabene <sup>24</sup> Ibo monio mo orniba watemite gesea omansiba watemnea baabene Monio dimo smik osa niniin osa buolo wanemie? gesea i baaibo Komok sume Sisae e smik osa e niniin osa ota biobo gesiba <sup>25</sup> Yesuse baabene Sisa emi biamo ema dlaniba eka God emi biamo ema dla naine ge baabene <sup>26</sup> eka nakaia unangai kin dim osa weng afeto mo baabeim blim na kesoa i bobol tem hekhek funaniba weng blim keniba afunamino deibasiobe.

*Nakai kaaniba imin hana tlomabibo weng sangobe.*

*(Matyu 22:23-33; Mak 12:18-27)*

<sup>27</sup> Yudai komokwali maki niniino Sadyusiei fumbianiba Nakai afen smiki amit ninba kesoa kaanimibo imino mo hananimibbabo ge fumbinabib kesoa i teniba Yesuse <sup>28</sup> baabaniba Aleyemin naka kobo sinanggwanoo Mosese hekmel wengo baanoa Naka make alelo memei mo dlaim blim bua imake kaane mole e ning esak unang olo omonea memei dlaneko! Meme eli hek sume kaanebue memeebo genebiobe. <sup>29</sup> Eka naka maki dabwal tlemeni 7 bianiba hek sume alelo omo bie otane memei mo dlaim blim bua imake kaanse <sup>30</sup> wabman esak omo bian denea kaanse <sup>31</sup> eka omi to ibwabman esak imin omo biane esa kaane nekel isak omo de kaan kaan bebib otane 7 i unang olo omibo memei mo dlaim blim bua kulilaiba <sup>32</sup> alel osak abuko kaananobua <sup>33</sup> sinanoa kaaibbuei imin hana tlom gaibo am olo dimo unang olo waneta dabamabone? Niminbabe, i dabwalo 7 i alukum unang olo omo binibbiobo gesiba <sup>34</sup> Yesuse baabene Mema dim olo nakaia unangai alelwal bokalin kukubo wafu bianiba bokabib <sup>35</sup> otane sinanoa Gode kimanang game dimo bainobo gabibi Gode dleb utnea

abilim ut unameo alelwal bokalin kukubo mo wafu nimibbabe. <sup>36</sup> I makob abiseli ulab aniba i imino mo kaanimibbabe. I Gode meme anomabiobe. Niminbabe, i Gode imin dohaanea hananibbio kesotabe. <sup>37</sup> Mosee nakai kaaibbua sinanomo imin hana tlomabibo weng sango alebenebuo weng sang olo inaminobe. As gwabe dimo ase eimbiana Sume baanea Nele Eblaham esa Aisak esa Yekob esa i Sum netabo ge baanebiobe. <sup>38</sup> God ele nakaia unangai afen smike amit nine blimi kulila binabibi Sumbabe. Nakaia unangai afen smike amit nine bibebiei Sumobe. I kaaibbio otane i alukum afen bliobo gesea <sup>39</sup> hekmel weng tekein kemin naka maki baaniba Aleyemin naka kobo ayam baanebobo geniba <sup>40</sup> i kil ohamino tosiananiba amit deibasiobe.

*Yesuse Felisiei Klaiste wengo baabesebe.*  
(Matyu 22:41-46; Mak 12:35-37)

<sup>41</sup> Omito Yesuse Felisiei baabenea Nimin kenibta i baaniba Klaiste komok sume Debite molofeitobo ge omonabibe? <sup>42</sup> Buk Samo temo Debite Gode Dofakamin Nakae weng sango baanea

Gode ne Sume baabanea Kobo ne kweile kweitale kikib ele toubianeba inamin namino kimabieba <sup>43</sup> sinanomo ne keb makaai alukum yalia i titilo blimanabiobo ge baabanebiobo ge baanea

<sup>44</sup> Debit emaye Gode Dofakamin Nakae ne Sumo ge one binebiba kesoa ibo mo baanibta Ne Debite molofeit yetabo ge one-mibe! Ne Debite molofeit eka e Sum nabo ge baabesebe.

*Hekmel weng aleyemin nakai kukubobe.*  
(Matyu 23:1-36; Mak 12:38-40; Luk 11:37-54)

<sup>45</sup> Nakaia unangai alukum mibianiba Yesuse wengo wentebiba okok aleyemin nakai baabenea <sup>46</sup> Ibo hekmel weng aleyemin nakai kukubo klaine! I youm tekeo dlusaniba Monoba imen wemin baan dimo motemoba nakaia unangai yateniba Naka ayami ye tliobo ge oyemine galin kukubo gobo bianiba eka moniba Gode amo tem tamo nakaia unangai kin dimo toulalin kukub osa gobo nabianiba eka i imen sum unalin antam osa inaniba komokwali biin ota toulala bianiba <sup>47</sup> eka i moniba unang sasoni dim oye bianiba afobeingo bola olube une bianiba i funaniba Nakaia unangai ni yatemniba Ni niniino dotouleba nine geniba nakaia unangai kin dimo beteno teke beten kebiam binabib kesoa i enin sumo watemomabiobo ge baabesebe.

## 21

*Unang sosono Gode monio dlansobe.*  
(Mak 12:41-44)

<sup>1</sup> Yesuse Gode am sumo tem tam bia nakaia unangai monisai Gode heitdaha bianiba monio bokis tem daak bubib kesoa <sup>2</sup> yateme biana temea unang mako imake kaabonebua o monio blim otane o 1 toeao asu dleb tenoa dlabbasoa <sup>3</sup> watemnea baanea Ne moton baabenamabibo, unang sason olo imake kaabonebu otane o moni sumo olanoa naka mak unang maki gaisenobe. <sup>4</sup> Naka mak unang mak ile i moni sumo sma ye bibe biota atosin ota Gode okahabib otane unang olo monio imino blimobe. Asu yota bua dlalobe. Imino bua olonoa imeno walonamino blimobo ge baabesebe.

*Yesuse baanea Gode am sumo watwat danamabobo ge baabesebe.*  
(Matyu 24:1-2; Mak 13:1-2)

<sup>5</sup> Naka maki Gode am sumo tem tamo obianiba baaibo Nakaia unangai tom eit kimino ayamo oloniba eka inamin namino Gode heitdahabibo olo nanibta Gode am sum olo geibbio kesoa ayamobo ge baasiba <sup>6</sup> Yesuse baanea Inamin namin ayamo watemib olo sinanoa am olo galanimibo tome elekieme mo deibaiba make dimo delab banamino blimobe. I alukum galafa dibiaiba unamabobo ge baabesebe.

*Yesuse baanea Bobol tem abilo tam tlamabobo ge baasebe.*

(Matyu 24:3-14; Mak 13:3-13)

<sup>7</sup> E okok aleyemin nakai Yesuse baabaniba Aleyemin naka kobo fatnamin dim ota kukub olo tam tlamabone? Fatnamin kukub ota sino tam tlota watemnobta meb tlanota nanobo genomabbione? gesiba <sup>8</sup> Yesuse baabenea Ibo klaine! Naka maki teniba dim wengo oyem tlaibo ibo mo wentaibe! Naka homoni teniba ne niniino taitneniba baaniba Ni Gode Dofakamin Naka nitabo ge baabenimibo ibo mo wentaibe! Eka i baaniba Mubiang amo meb tlobiobo genimib osa ibo mo wentenibta bekebe unaibe! <sup>9</sup> Eka bib mak bib mak osa meb meb olosa awao walo genan haabobo galiba wentemib mole ibo mo dlou une bianiba tosianimibe! Kukub olo tam tlamabo otane mubiang amo hebmamsabo mo tam tlamobabo ge baabenea <sup>10</sup> eka e imin baanea Naka mit maki moniba mit maki tenaniba awa gembiam eka komok make meletani dleb monea komok make meletani tenaniba awa gembiam <sup>11</sup> eka meime sume bib mak bib mako tlebiana bib mak bib mako imeno blimana bianoa eka ginin sumo tam tena biam nanomota



temibta abilimo kukub homono tam tlota waternibta tosiananomabiobe.

<sup>12</sup> Inanomabib otane kukub olo tam tlim blim biota wasi nakai ibo yafuniba enino omkaye bianiba eka Gode amo tem tamo kot kebenaran yafu ge dleb mo klabut am toubiam nomabiobe. Niminbabe, ibo ne bainobo gabib kesoa o dafa ota i inaye bianiba i dleb moniba komok sum isa kiabwal isa i dimo kot keyemomabiobe. <sup>13</sup> Inayemib ota ibo ne dowan wengo omkayemine! <sup>14</sup> Inayemib otane ibo mo fumbianibta Fatnamin weng ota baabenome? gabianibta bobol asusu nimibe! <sup>15</sup> Nemaye wengo ib sitalimo omfube nabiania tekein kemino omye nanamabibe. Wasi nakai ib wengo mo ombiabeniabta ne wengo omyamio omabhube nomabibbabe. <sup>16</sup> Ilib aywal isa biemwal isa dabwa tlemin isa nekwai isa imaye mak ibo dleb moniba makaai doyiba yenaiba kulila biam nabiba <sup>17</sup> eka ibo ne ninino omkeimabib kesoa naka homon unang homoni bib mak bib mak seli ib alo tliyebua inayemomabib otane <sup>18</sup> ib afen smiko mo watwat dabenomabibbabe. <sup>19</sup> Ibo sbal manib mole afen smike doboniba amit nomabiobo ge baabesebe.

*Yesuse baanea Yelusalem bibo misiam anamabobo ge baabesebe.*

*(Matyu 24:15-21; Mak 13:14-19)*

<sup>20</sup> Sinanomo ibo temebiba awa genalin nakai teniba Yelusalem bibo amo galafanimib ota tekein keine! Bibo watwat danamino meb tebiota nanomabib kesoa <sup>21</sup> am olo dimo nakaia unangai Yudia betano blibo deiboniba hebmamsab skila ulaniba amgolim unine! Eka nakaia unangai Yelusalem bibo deibo moniba damib am biaibo imino mo monibta bib am temo mo unaihe! <sup>22</sup> Am olo dim ole Gode kukub misiamo yang kenamabe kesoa e buk temo wengo yamo balinamabobe. <sup>23</sup> Unang amunsa biaiba eka unangi meme gwabsa biaiba ibo ayoo, ne dohalimbibe. Niminbabe, ibo memei dlanomobo seinomo gabib otane am olo dimo bobol tem abil sum osa Gode atlihamin osa nakaia unangai dimo tam tlamabobe. <sup>24</sup> Ib wasiei Yudabai teniba ib nineki skem dang dum yan toubiba kulila biam eka maki ge dleb moniba bib mak naka isu ye toubiam bianiba ita Yelusalem bibo kima bliba sinanota Gode naka eli baabeneae Ibo kima blibo bli-manobo ge baabeneae i deibo unomabiobo ge baabesebe.

*Sinanomo Abilim Da Tlemin Nakae tlamabebe.*

*(Matyu 24:29-31; Mak 13:24-27)*

<sup>25</sup> Yesuse imin baabeneae Afoka alima awitninao dimo kukub homono tam tena bianoa eka nakaia unangai dabalim olo

blibi bobol tem amun temo misiamu benoa eka aaye sole mousie haka bianea un tlemsea tosiam bianiba <sup>26</sup> eka abilim uto awitnina inamin naminao fibamsoa waterniba nakaia unangai funaniba Nimin tam tlang genota namone? geniba tosiananabiba i kin osa glagla omfubenamabobe. <sup>27</sup> Olo tam tloa watemalaib dim ota temibta Abilim Da Tlemin Naka ne ayung tem te tebiania Gode titil osa eka e titilo ayal inamin einobu osa omeb tlita nakaia unangai natemomabiobe. <sup>28</sup> Sinanoa kukub olo tam tlamo dimo ibo hambibte Gode ibo dlamabeo meb tlamabobo ge baabesebe.

*Ibo aso watemalaibo funaine!*

*(Matyu 24:32-35; Mak 13:28-31)*

<sup>29</sup> Eka Yesuse e okok aleyemin nakai saa weng mako baabeneae Ibo aso watemalaib <sup>30</sup> keto balinomo waterniba funaniba O yamo balim tlang genota nanobo ge funanabib inaminobe. <sup>31</sup> Inamin kesoa inamin namin olo tam tloa watemalaibo Gode kimanamabe dimo meb tlobiota tam tlobe geine! <sup>32</sup> Ne bain baabenamabibe, nakaia unangai dabalim olo mema ele blib eli molobseli mo kaaim blim bliabta inamin namin olo tam tlamabobe. <sup>33</sup> Abila dabalao ye bli-manamabo otane ne wengo mo bli-manomobabo, o amit namabobo ge baabesebe.

*Yesuse okok aleyemin nakai klaine!*

<sup>34</sup> Yesuse e okok aleyemin nakai baabeneae Ibo klaine! Ibo aa misiamo mo wembianiba eka inamin namin kukubo mo gobona unanibta ne bobolo mo dokobenomone! Inamin namin kukubo ib dimo tam tloa ne bobolo dokobenomo dim ota ne hebmamsab makob ano binaiba hebmamsab monoa kulani mayenabo inanita tlamabibe. <sup>35</sup> Am olo dimo alukum nakaia unangai betan mak mak ele blib isu osa kukub olo tam tlamabobe. <sup>36</sup> Ibo klabianiba Gode nganhabila titilo omkayebeta inamin namin kukubo gaiso gaiso bianibte! Ibo inabila Abilim Da Tlemin Naka ne imin tlia ne kin dimo manimibo ibo aalo mo genalomabibbabo ge baabesebe.

<sup>37</sup> Am homono dimo Yesuse nakaia unangai Gode am sumo tem tamo aleyebise otane kwinomole monea amgolime Olibe golim ut aalabisebe. <sup>38</sup> Eka nakaia unanga ile aalasaibo boman tebua kwitimid hananiba teniba Gode am sumo tem tamo Yesuse wengo wentebisiobe.

## 22

*Komokwali baaniba Yesuse ananoba kaaneko gesiobe.*

(*Matyu 26:1-5; Mak 14:1-2; Yon 11:45-53*)

<sup>1</sup> Singkalin am sumo bleto yis blim unam binabibo amo niniino Fasobao meb tebua <sup>2</sup> Gode amo kimanin nakai komok isa eka hekmel weng tekein kemini naka isa i funaniba Ni fatnanobta Yesuse ayok afu ananobta kaaneke? ge funasiobe. Niminbabe, i keim afunomabib otane i nakaia unangai tolo tosiyanibtabe.

*Yudase baanea Ne Yesuse komokwali dobyamabibo gesebe.*

(*Matyu 26:14-16; Mak 14:10-11*)

<sup>3</sup> Am olo dimo Gululame Yesuse okok aleyemin naka make Yudas Iskaliote bekeba bianea bobol tem funin misiamo omalea <sup>4</sup> e monea Gode amo kimanin nakai komokwal isa eka Gode am sumo awa genalin nakai komokwal isa isu unanea baabene Ne daabeia Yesuse afunomabiobo gesea <sup>5</sup> i wenteniba seimbianiba baabaniba Kobo inanemebo ni monio oklomabiobo gesiba <sup>6</sup> e Ayamobo genea funanea Am mak dimo nakaia unangai Yesuse mo bekebanim blim kenimibo ne fatnabanita debeb monita komokwali dobyamabine? ge funmonsebe.

*Yesus esa e okok aleyemin naka isa i Fasoba imeno downsiobe.*

(*Matyu 26:17-25; Mak 14:12-21; Yon 13:21-30*)

<sup>7</sup> Gode singkalin am sumo Yudai bleto yis blim unam binabib amo tlamo i eil sibsib memei yananiiba funiba Gode heitdaha binabibo niniino Fasoba otabe. Am olo tlang genabo kesoa <sup>8</sup> Yesuse Fitae Yone i dabo baabene Ibo moniba imeno funabibta nibo Fasobao downonomo gesea <sup>9</sup> i baabaniba Sum kobo ni imeno fatda funabobta Kobo Fasobao downonale? gesiba <sup>10</sup> e baabene Ibo moniba bib sum ye temiba naka make aangketi gabamon dim ut ofanea obeh une mole ibo dobsileb bebiba e am tam unameo ibsa taniba am tam unaniba <sup>11</sup> amo gosake baabaniba Aleyemin nakae baanea Ne biino fab o tem ota ne okok aleyemin nakai ni sinwalo Fasoba imeno downonomabbione? genebo ge baabaibta <sup>12</sup> e biin beselib asal ut biobo o temo biin toulalin osa eka tebol osa mikil na kesoa o tem ota alebeneta ibo Fasoba imeno fubiba natlobta downonomo ge baabene <sup>13</sup> dlane moniba inamin namino makob ele baabenebio ina tlaniba Fasoba imeno fusiobe.

*Yesuse e okok aleyemin nakai blet baka waen aay bakao oya downsiobe.*

(*Matyu 26:26-30; Mak 14:22-26; 1 Kolin 11:23-25*)

<sup>14</sup> Fasoba imeno downamin dimo tloa Yesus esa e okok dlasanin naka isa te toulaniba imeno wembianiba <sup>15</sup> e baabene Ne enin sumo watemamabio dimo tlo otane ne funania Mikiktemo nesa ne okok dlasanin naka ibsa Fasoba imeno downobta omite ne enin kino watemnita kaanano ge funai kesoa nibo imeno downonomabbio. <sup>16</sup> Ne moton baabenamabibe, ne dabalim olo mo bianita Fasobao imino mo downomabibabe. Sinanoa ne Gode kimanino keim anomo dim ota Fasobao mitmakamo keim ananota ne imin downomabibo ge baabene <sup>17</sup> e waen aaye obonea Gode gangobo genea i baabene Ibo alukum ele doweine! <sup>18</sup> Ne baabenamabi ole ne waen aay ele dowe biamo imino mo doweim blim bly sinanoa Gode kimanino keim anota waen aay ele imin downomabibo ge baabene <sup>19</sup> eka blete obonea Gode gangobo genea hanea e okok aleyemin nakai oyene baabene Olo ne damobo doweine! Ne ib bobolo fumbi kesoa ne damo ibo oyene daabeibua sinanomo ibsa ina bianiba ne bobolo fumbianiba unaline ge baabene downsiobe. <sup>20</sup> Eka waen aay esak obonea imin inanea obyene baabene Ele ne ilemobe. Sinanggwano Gode moton wengo memao baanea Ne kaania ileme singania nakaia unangai hengmino omlabenamabibo genebuo ne bain inanamabibe. <sup>21</sup> Otane wentine! Nakae ne komokwali nemiamabe nakae e temnanoba imeno wembuobe. <sup>22</sup> Sinanggwano Gode baanea Abilim Da Tlemin Nakae kaanamabebo ge baanebio kesoa Abilim Da Tlemin Naka ne inania kaanamabi otane naka make komokwali nemyamabe nakae ne dohhalimbibe. E kukub misiam natnenamabe kesoa Gode enin sumo e omalamabebo gesea <sup>23</sup> e okok aleyemin nakai i sinwalo obianiba baaniba Waneta inanamabene? ge omonsiobe.

*Yesuse okok aleyemin nakai obianiba Waneta komok anamabene? ge obisiobe.*

<sup>24</sup> Yesuse okok aleyemin nakai i sinwalo obianiba Waneta nib isak tem daako komok sum anamabene? gesiba <sup>25</sup> Yesuse baabene Bib mak seli komokwali naka maki kima bianiba i okoko amit meng meng dlasambiba i okok nakai baaniba Ayam nayebiobo galaibo <sup>26</sup> ibo mo inamibe! Ib isak temo waneta sum anang ge mole e okok naka neko! Eka ib isak temo waneta komok anang ge mole e besa okok naka neko! <sup>27</sup> Waneta komok

sume? Nakae toumbianea imeno wembe etia bleka? Nakae imeno fu oluba tlebe etia? Ne funania Nakae toumbianea imeno wembe etabo gabibe. Ina otane nele okok naka biania ibo daayebibe. <sup>28</sup> Ne naka maki kukub misiam omkanebib otane ibo mo deitneim blimobe. Ibo beketne bliobe. <sup>29</sup> Ne aye sino baatnenea Kobo nakaia unangai kimanale genebio kesoa nesa inania ibo baabenamabibe. <sup>30</sup> Ibsa nakaia unangai kimaine! Ne nakaia unangai kimanamabio dimo ibo ne beketne bianiba aaya imenao wembianiba eka komokwali biino dimo toulba bianiba Islel nakai mito 12 i tliba ibo i wengo wenteniba i kukubo klayemomabiobo ge baabesebe.

*Yesuse Fitae baabanea Kobo baaneba Ne Yesuse mo tekein kebibabo genamabeobo ge baabasebe.*

*(Matyu 26:31-35; Mak 14:27-31; Yon 13:36-38)*

<sup>31</sup> Yesuse Saimone baabanea Saimono, Gululame Gode baabanea Ne naka eli bainobo galino dlamaia makob unangi wit sano baniba olasambiba blongo gamdibi unaoa damob deibonabo inaiba yatenia i bainobo galino sbal bleka? genano gesea Gode baabanea Ae inanale genebu <sup>32</sup> otane ne Gode beten keha biania baabania God kobo Fitae daabaneba e sbal maneko gei kesoa keb bainobo galino deiboneb biamo imin wafunamabeobe. Inanameb ota kobo keb nekwali daabeneba i bainobo galino sbal manomabiobo gesea <sup>33</sup> Fitae baabanea Sum kobo naka maki kemetniba klabat am unom gaibo nesa bekebke unamabibe. Eka i kanaiba kaanang gaebo ne tena kaanomabbio gesea <sup>34</sup> Yesuse baabanea Ne baakkenamabibe, memalo boman tlamo kakaluke mo nganaim blim bieta kobo ne niniino omuatneneba baaneba Ne naka ele mo tekein kebibabo genamino asumatna kenamabeobo ge baabanea <sup>35</sup> eka e okok aleyemin nakai imin baabenea Sino ne wabaenia Ibo moniba bib mak bib mako unom gaibo ib kumeno moni bumini osa meen osa skil otabbumin osa mo oleb unaipe ge baabeia inaibbio ibo imen teb binibbuo? gesea i baaniba Yeye gesiba <sup>36</sup> e imin baabanea Otane memalo naka make kumene moni bumine bie mole goleb uneko! Eka naka make meensa bie mole esa goleb uneko! Eka nakae bainato blim bie mole youmo oleb monea naka make walonea monio oisanea bainato waleko! <sup>37</sup> Sinanggwano Gode weng omkeimalin nakae Aisaiae Gode buk temo dolanea baanea E debeb utniba nakai kukub misiamo wafublib isu ut daiba bekebenamabeobo ge baanea ne weng sango dolanebio kesoa bain anoa

yamo balinamabobo ge baabesea <sup>38</sup> i baabaniba Sum kobo watemale! Ni bainato asu ele bibebiobo gesiba e baabeneba Ne wengo bayotabo ge baabesebe.

*Yesuse amgolime Olibe golim ut bianea beten kebisebe.*

*(Matyu 26:36-46; Mak 14:32-42)*

<sup>39</sup> E bib olo deiboneba sino nabinabe inanea monea amgolime Olibe golim ut unea e okok aleyemin nakai dobsileb motemiba <sup>40</sup> bianiba baabeneba Gululame ibo dlamatemea kukub misiamo nanim-ibo misiam kesoa ibo beten kemine ge baabeneba <sup>41</sup> i deibeneba monea skeimsa ye manea ton ton golbu daak tounea Gode baabanea <sup>42</sup> Ay kobo Ae geneb mole ne bobol tem abilo omlatnenale! Ina otane kobo ne bobol tem funino mo wafunebta nanemebe! Kleb bobol tem funin iwat nanale gesea <sup>43</sup> Gode abisake daak tenea Yesuse dobsbal manea <sup>44</sup> Yesuse bobolo dot ilum omfubano kesoa e beteno dot sum beten kebea e ifao makob ilemo ulab walabuanoa daaknoa dabalim daak unebua <sup>45</sup> beten kebea blimano hananea imin monea e okok aleyemin nakai temea i bobolo ilum omfubenoa aala bliba yatemea <sup>46</sup> baabeneba Ibo aala blibo hananiba Gode nganhamine! Ibo Gode nganhabib mole Gululame dlananemo sbal manomabiobo ge baabesebe.

*Nakai teniba Yesuse afu debeb onsiobe.*

*(Matyu 26:47-56; Mak 14:43-50; Yon 18:3-12)*

<sup>47</sup> Yesuse wengo oyebe dim ota e okok aleyemin naka make niniino Yudase tebea naka homoni dobsileb bliba teniba Yudase Yesuse bukbuk gebanang genabe otane <sup>48</sup> Yesuse baabanea Yudas kobo Abilim Da Tlemin Naka ne bukbuk gahamsia E afunomabib nakai atemniba afueine genebtio? ge baabasea <sup>49</sup> Yesuse bekeba blib nakai funaniba Nakai Yesuse afuei-bobo ge funaib kesoa baabaniba Sum kobo ni bainate tobonoba yenanomabbio ge baaniba <sup>50</sup> naka make bainate tobonea Gode amo kimanin nakai i komok sume e okok nakae ananang genea blelanae klone kweital da eta taisanea tesea <sup>51</sup> Yesuse Awao deine ge baabeneba naka ele klone afunea klaubanea ayam anea <sup>52</sup> Gode amo kimanin nakai komokwal isa eka Gode amo awa genalin nakai komokwal isa naka gang isa teniba Yesuse afunom genamsiba Yesuse baabeneba Ibo nimin kenibta bainat osa kwam osa tubulanihta tlibe? Ne ayok henin nakababe. <sup>53</sup> Am homono dimo ibtem netem nanoba Gode am sumo tem tamo biob otane ibo nafunamino deitne binabiobe. Ina otane memalo

ibo inanomabib amo tam tlo kesoa Gululame ibo titilo omya nafunomabiobo ge baabesebe.

*Fitae baanea Ne Yesuse mo tekein kebibabo ge baasebe.*

*(Matyu 26:57-58,69-75; Mak 14:53-54,66-72; Yon 18:12-18,25-27)*

<sup>54</sup> I Yesuse afu debetniba moniba Gode amo kimanin nakai komok sume am unom geniba bebibo Fitae dobsileb bebe otane mebo mo unim blimobe. Skeimsa ye bianea kinota atemem atememnea monea <sup>55</sup> Gode amo kimanin nakai komok sume amo daam tem tam tenea naka maki ase fablibo e tenaniba ye toulabliba <sup>56</sup> Gode amo kimanin nakai komok sume okok kehamin unango mako tenoa Fita esu ele tetemoa e aso tefube kesoa kla ateme bianoa baanoa Naka elesa Yesuse bekeba binebiobo gesea <sup>57</sup> e Yesuse niniino omwabanea baabonea Ne naka ele mo tekein kebibabo ge baabonebua <sup>58</sup> mitdanea naka mak esak imin tenea atemnea baabanea Kebasa Yesuse okok aleyemin naka kebtabo gesea Fitae baabanea Nekobbabo ge baabanabea <sup>59</sup> afok smiko olokiem blimanoo naka make baanea Ne wengo bain baabenamabibo, naka ele Yesuse okok aleyemin naka etabo, e Yesuse ulab Galili nakabo gesea <sup>60</sup> Fitae baabanea Ne keb weng olo obebo mo tekein kebibabo genabea kakaluke hebamsab nganasea <sup>61</sup> Sume deskinanea Fitae atemnabea Fitae funanea Sino Yesuse baatnenea Kakaluke mo nganaim blim bieta kobo ne niniino omuatneneba baaneba Ne naka ele mo tekein kebibabo genaminno asumatna kenamabeobo ge baatnenebiobo ge funanea <sup>62</sup> daam temo deibo tamnea bib tam unanea bikidofanea mem wat mem wat onsebe.

*Yesuse weng dobo weng ohamonsiobe.*

*(Matyu 26:67-68; Mak 14:65)*

<sup>63</sup> Naka maki Yesuse afuniba weng dobo weng oha bianiba abiam bianiba <sup>64</sup> i youme doboniba kin deibo ge waisaniba imin abianiba tlaha biam bianiba baabaniba Kobo Gode weng omkeimalin nakae ulab kesoa naka ele waneta kananene? E niniino baabenale ge oha bianiba <sup>65</sup> eka weng mak osa oha biam bianiba kukub misiamo omkahamonsiobe.

*Gode amo kimanin nakai komokwali Yesuse kot kehabsiobe.*

*(Matyu 26:59-66; Mak 14:55-64; Yon 18:19-24)*

<sup>66</sup> Glik genoa Isleli naka gang isa eka Gode amo kimanin nakai komokwal isa hekmel weng tekein kemin naka isa miniba Yesuse debetniba Yudaikomokwal

maki isu unaniba Yesuse baabaniba <sup>67</sup> Kobo Gode Kemfakamin Naka kebtabiaebo baabenale gesib otane Yesuse baabeneane Ne ibo baabenimio mo bainobo genomabibbabe. <sup>68</sup> Eka ne weng osa kil baabenimio ibo mo yang kenomabibba <sup>69</sup> otane Gode titilasa kesoa sinanom Abilim Da Tlemin Naka ne utnia e kweile kweitale kikib ye tounamabibo gesea <sup>70</sup> i baabaniba Kobo Gode miin kebtio? gesiba e baabeneane Ae ibo bain baabibobo gesea <sup>71</sup> i sinwalo obianiba Emaye Gode weng dobo wengo oha bianea baanea Ne Gode miinobo gesea Nibo wentob kesoa nibo kot kebanomo! Nibo weng afeto mo henomobe ge baasiobe.

## 23

*I Yesuse debetniba Failat esu onsiobe.*

*(Matyu 27:1-2,11-14; Mak 15:1-5; Yon 18:28-38)*

<sup>1</sup> I alukum Yesuse debetniba Failat esu unaniba <sup>2</sup> baabaniba Naka ele Yuda nakai dim baabeneane i bobolo ilum omyeneane Ibo takis monio Lomo komokwali mo oyaiibe ge baana bianea eka weng mak osa baanea Ne Gode Nemfakamin Naka netabo, ne Yudaikomok sumobo genanebiobo gesiba <sup>3</sup> Failate Yesuse baabaneane Kobo Yudaikomok sum kebtio? gesea Yesuse baabaneane Kebmaye baa omkeimanebobo gesea <sup>4</sup> Failate Gode amo kimanin nakai komokwal isa eka naka mak unang mak isa baabeneane Yesuse misiam naebio ne mo watemim blimobe gesea <sup>5</sup> i sbal weng baabaniba E Galili betano bianea wengo omkayebeba nakai unangai bobolo hekhek fumbiba eka omito e tenea Yudia betano bib mak bib mak olosa ina binebiobe. Eka memalo Yelusalem bib olosa inabebo ge baabasiobe.

*Yesuse debetniba Helot esu onsiobe.*

<sup>6</sup> Failate i wengo wenteneane baabeneane E Galili naka etio? gesea <sup>7</sup> i baabaniba Ae e Galili nakabo gesiba Failate wenteneane e tekein kebebe, Helote Galili seli komok kesoa Ne Yesuse dabaia moneane Helot esu unea eta e wengo wenteko genea dabaneane moneane Helot esu onsebe. Helote amo yo dimo Yelusalem bib ye bietabe.

<sup>8</sup> Helote sino Yesuse weng sango wenteneane funanea Ne Yesuse atemia e inamin namin okok sumo sino ne mo watemim blimo mo klaneane ne atemi mole ayamobo genano ge funanebua e sma ye fumbes kesoa i Yesuse debetniba moniba Helot esu temiba Helote Yesuse atemnea e seimbianeane <sup>9</sup> weng homono kil ohabe otane Yesuse Helote wengo mo yang keim blimobe. <sup>10</sup> Gode amo kimanin nakai

komokwal isa hekmele weng tekein kemina naka isa bianiba sbal wengo baabaniba E misiam nanebiobo gesiba <sup>11</sup> Helot esa eka e awa genalin naka isa Yesuse kukub misi-amo omkaha bianiba eka weng dobo weng oha biam bianiba komokwali youm ayame dubusubaniba Helote Yesuse imin dabaia monea Failat esu uneko genea dabanea onsebe. <sup>12</sup> Sino Failate Helote i dabo makaa otane am olo dimo nekan bianibtabe.

*I baaniba Yesuse anaiba kaaneko gesiobe.*

(Matyu 27:15-26; Mak 15:6-15; Yon 18:39-19:16)

<sup>13</sup> Failate Gode amo kimanin nakai komokwal isa Yudai komokwal isa naka mak unang mak isa nganabenea tliba baabenea <sup>14</sup> Ibo naka ele debeb teniba baatneniba E nakaia unangai dim baabene kesoa i Lom teni tenaniba awa gonom genabiobo ge baatneib otane ne kil ohabia ibo weng olo wentibiotabe. Ne e misiamo mo nanebiota atemim blimobe. <sup>15</sup> Helot esa kil ohabie otane esa e kukub misiamo mo nanebiota watemu baim blim kesoa e imin dabanea tenea nibsu ele tle otane e kukub misiamo mo naim blim kesoa nibsa mo ananoba kaanemebabe. <sup>16</sup> Ne besa ne awa genalin nakai baabeniba Ande dofaine ge baabeia i inaniba ande dofaiiba ne tileisanamabibo ge baabesebe. <sup>17</sup> Bifol homono dimo Fasobao downom gaibo ina binabib kesoa imin inaniba i moniba Failat esu unaniba baabaniba Klabut nakae yeta ni dofakanobobo gesiba Failate naka ele klabuto tileisanea dobo dobyensebe. E baabenea Ne Yesuse tileisanamabibo gene otane <sup>18</sup> i alukum baabaniba Yeye anaeba kaanea Balabas eta tileisanale gesiobe. <sup>19</sup> Sino Balabas esa naka mak isa i moniba Lom seli awa genalin nakai tenaniba awa genan deniba e naka make ananea kaaneta i e klabuto ge debeb te daibta klabut am bietabe.

<sup>20</sup> Failate Yesuse tileisanano genea nakaia unangai imin baabene otane <sup>21</sup> i nganha bianiba Atdimo dabasaneba silo biki ananeba kaaneko ge ngansiba <sup>22</sup> Failate imin baabenea Nimin kenibte? E hengmino fatnamin henganebiote? E hengmino blim kesoa ne mo ananimibabo, ne awa genalin nakai baabeia Ande dofaiiba tileisanamabibo gesea <sup>23</sup> i imin ngambianiba Atdimo dabasaneba silo biki ananeba kaaneko ge ngansiba Failate i wengo wentenea <sup>24</sup> awa genalin nakai baabenea Ae ibo i wengo wenteniba inaine genea <sup>25</sup> klabut naka mak ele awa genalin nakai tenaniba awa gembianiba naka make anane kaanea klabut am bie naka ele niniino Balabase tileisanea unea

i funaniba Yesuse anaiba kaaneko geib kesoa Failate Yesuse awa genalin nakai dobyenea baabenea Inaine gesebe.

*I Yesuse atdimmo dabasaniba silo bikiban-  
siobe.*

(Matyu 27:32-44; Mak 15:21-32; Yon 19:17-27)

<sup>26</sup> I debeb bebiba naka make niniino Saimone e Sailini nakabe tetemea awa genalin nakai atemniba baabaniba Kobo Yesuse ase obnakatoulebneba Yesuse dobsileb nale gesiba inanea <sup>27</sup> nakaia unangai homoni Yesuse dobsileb bebianiba unang maki isak daak blibi memino sum meham bebiba <sup>28</sup> Yesuse deskinanea baabenea Yelusalem bib wanggal ibo ne mo mene-mibe! Ibsa ib meme isa ita meyemine! <sup>29</sup> Kukub misiamo Yelusalem bib olo tlang gamo dimo i baaniba Unangi fioum isa eka meme mo dlaim blim isa eka meme gwabi moyo mo dolibibba meme blim isa blublu unomabib kesoa i seinomabiobo gesiba <sup>30</sup> am olo dimo nakaia unangai baaniba Amgolimo sum osa gwab osa kalo helo tenoa ni bubenoa kaanomobo ayamobo ge baanomabiobo ge baabenea <sup>31</sup> eka imin baabenea Ne makob aso asito ulab otane i ne enin sumo omniobe. Ibo makob aso gato ulab kesoa i ibo enino dot sum omyomabiobo ge baabenasea <sup>32</sup> awa genalin nakai Yesus esa eka nakai asuei ayok henin naka isa Yenano geniba dleb moniba <sup>33</sup> bibilime niniino Naka Gabamon dikin ye bianiba i Yesuse youmo gemeisaniba doboniba atdimmo dabasaniba silo bikibaniba eka ayok henin nakai asue isa inaniba make kweitasin da dabasaniba silo biki baniba eka make afan sin da dabasa silo bikibanasiba <sup>34</sup> Yesuse baanea Ne Ayo, i hengmino omlabenale! I okok olo inabib otane o mitmakam olo mo tekein kebibbabo gesea i e youmo oisaniba olaniba elekiemke dobo dofaniba tomo glim kimino oloniba tlanha bianiba waneta gaisene mole youme ye debeb onse deiba deiba biam binoba kitob bianomo geniba inabiba <sup>35</sup> eka nakaia unangai mabi-aniba atemebiba komokwali weng dobo weng oha bianiba baabaniba E naka mak unang maki daaye binabebo, e Klaist Gode Dofakamin Naka eta bie mole emaye ele skil daabaneta atdimmo deibo daak tleko gesiba <sup>36</sup> awa genalin naka isa weng dobo weng oha bianiba eka waen aaye koke obdi obeb te obaniba <sup>37</sup> baabaniba Kobo Yudai komok bieb mole kebmaye atdimmo deiboneba daak ele ge baabasiobe. <sup>38</sup> Ase dim ute weng mako dolaniba baaniba NAKA ELE YUDAI KOMOK SUMOBO ge baaniba dolaiibbiotabe. <sup>39</sup> Eka ayok henin

nakae make Yesuse weng dobo weng baabanea Kobo Gode Kemfakamin Naka kebta bie bieb mole kebmaye atdimmo deiboneba nisa daabeneba nibo atdimmo deibo daak unomo gesea <sup>40</sup> make baabanea Kobo inamin wengo denale! Kobo Gode tolo tosiambbeb biamo weng olo mo inang ge baanemebbabo, i esa nibsa kukub misi amo yang kenomabiobe. <sup>41</sup> Nib dab ole kukub misi amo wafu biob ota yang keibobe. Otane e kukub misi amo mo naim blimobo ge baabanea <sup>42</sup> eka e Yesuse baabanea Kobo nakaia unangai kimanamabebo tlammo ne bobol osa funanale gesea <sup>43</sup> Yesuse baabanea Ne bain baabkenamabibe, am olo dimo kebte nete nanoba monoba bib ayamo biomabbio bo ge baabasebe.

*Yesuse kaansebe.*

(*Matyu 27:45-56; Mak 15:33-41; Yon 19:28-30*)

<sup>44</sup> Kelanoa afoko tenoa isak ewit tlota dabalim olo alukum mililanobio bita afoko delwab manota imin bomasobe. <sup>45</sup> Eka Gode am sumo tem tamo biino awemo youm teke amite dob dounibbue belanea balanea milim ononanea <sup>46</sup> Yesuse amdofa ngananea Ayo, ne smike dobonia keb kweiban dim dofaio bo ge nganana bianea kaanse <sup>47</sup> awa genalin nakai komoke atemebea Yesuse inanea kaanse atemnea Gode niniino dobtoule biane baanea Bainobo, e naka molotobo gesea <sup>48</sup> nakaia unangai homoni Yesuse kaanameo atemomo geniba tebinibbuei Yesuse inanea kaanea atemniba i bobolo ilum omfubenoa moniba ili bib am onon tlaiba <sup>49</sup> eka nakaia unangai Yesuse bekeba blib isa eka unangi sino Yesuse Galili betano deibonea Yelusalem bib ele tlang genea tlea bekeba tlibbue isa skeimsa ye bianiba inamin namin olo watemsio be.

*I Yesuse debeb moniba tem teme dofaio be.*

(*Matyu 27:57-61; Mak 15:42-47; Yon 19:38-42*)

<sup>50-51</sup> Naka make ye bie e niniino Yoseb etabe. E Yudia betano bibo niniino Alimatia bib sakobe. E naka molotobe. E Gode kimanamabe dimo waiso bianea naka sumi baaniba Yesuse ananoba kaaneko gabib nakai bekebe bie otane e mo Ae geim blimobe. <sup>52</sup> E monea Failat esu unanea baabanea Kobo Yesuse dame dobnene gesea Failate Ae ge baabasea <sup>53</sup> Yosebe Yesuse silo uleisanea debeb daakenea youm mek lie do bifanebue dim ele dofanea halbunea tete tlasoa ge debeb monea tom teme dofasebe. I sino tom tem ele misike tufaniba klanibbu otane hami sino mo dlaim blimobe. <sup>54</sup> Afoko delwab manoa Gode singkalin amo meb tlo kesoa am

olo dim ota i singkalin amo imeno fubiba <sup>55</sup> sino Yesuse Galili betano deibonea Yelusalem bib tlea unangi bekeba tlibbuei Yosebe dobsileb bebiba e Yesuse tom temo dofanea atemniba funaniba Sinanommo tenoba wel aayo tang kunin ayamo Yesuse damo alibanommo geniba <sup>56</sup> i imin moniba am unaniba wel aayo ayamo klabiba Gode singkalin amo tlo kesoa i hekmel wengo baanobio inaniba besa bisio be.

## 24

*Yesuse imin hanasebe.*

(*Matyu 28:1-10; Mak 16:1-8; Yon 20:1-10*)

<sup>1</sup> Gode singkalin amo blimano sonoma Sande boman tebua unangi Monoba gloutem unommo geniba wel aayo tang kunin ayamo kla oletniba <sup>2</sup> motemiba tome amite dobdou unibbue daisa dabaiba tanea ken tam unebua amito keim bua <sup>3</sup> i tam temib otane Sume Yesuse dame blim kesoa <sup>4</sup> i bobolo hekhkek fumbianiba temiba naka asunai youm namao ayalo ulabo dlusanibbua meb ye mablib kesoa <sup>5</sup> unangi yatemniba tosiyaniba dlong dlong golbuaniba daak touniba gabam delab masiba naka asu dabi baabeniba E tom tem olo dofaibbu otane e olo mo biebabbe. E hananea unebo, <sup>6</sup> ibo gloutem olo mo henimibe! E sino Galili ye bianea baabenebio yo funaine! <sup>7</sup> E baabeneba I Abilim Da Tlemin Naka ne hengmin nakai kweiban dimo nemfaiba atdimmo nemasaniba silo biki nanaiba kaania amo asu kenia make dime imin hananamabibo genebio bo ge baabesiba <sup>8</sup> i sino Yesuse weng olo baabenebio be funaniba <sup>9</sup> gloutemo deiboniba imin moniba e okok aleyemin nakai 11 isa naka mak isa inamin namino watemibo wengo baabesio be. <sup>10</sup> Malia Magdala osa eka Yoana osa Malia afeto Yemse biem osa eka unang maki i bekebe haabi tlib isa i weng olo Yesuse okok dlasanin nakai baabesiba <sup>11</sup> Yesuse okok dlasanin nakai funaniba Weng olo bainbabo geniba i mo bainobo geim blim deibeib otane <sup>12</sup> Fita eta monea gloutem unanea delab manea biin wato temea youm bio kesoa watemnea imin monea bib unanea inamin namino tam tloa wateme olo funmonsebe.

*Naka asuei Yesuse Emeas bib deib unemin ye atemsio be.*

(*Mak 16:12-13*)

<sup>13</sup> Am olo dimo olota i isak temo naka maki asu keniba moniba bib gwabo niniino Emeas bib ye onsibo deib ele Yelusalem bib ye daniba moniba Emeas bib olo unom gaibo afok smiko olokiem blimanota mota bib olo onabiobe. <sup>14</sup> I dabo bebianiba

inamin namino tam tlo olo wengo obianiba tekam bebiba <sup>15</sup> Yesuse tenea isu ye tlanea bekebe bebe otane Gode <sup>16</sup> i kin deibo waise bia i atemib otane i mo tekein kenibta Yesus etabo geim blimobe. <sup>17</sup> E baabe-nea Ib dabo ninim weng obibe? gesea i bobol temo abilu bebio kesoa maniba dleban bianiba <sup>18</sup> make niniino Kliobas eta baabaneo Bib mak nakai homoni memalo Yelusalem bib ye mibianiba inamin namino Yelusalem bibo tam tebuo watemebib otane kobole mo tekein keim blim bianebtio? gesea <sup>19</sup> Yesuse baabenea Nimine? gesea i baabaniba Ni Yesuse weng sang ota obuobo, Yesuse Nasalet bib sake Gode weng omkeimalin naka kesoa e okok sbalo okok kebiana weng sbalo Gode kin dim osa eka nakaia unangai kin dim osa omkeimabea <sup>20</sup> Gode amo kimanin nakai komokwal isa eka nib komokwal isa doboniba Lom seli komok sume kweiban dimo dofania baaniba Ananom gesiba e Ae anaine gesea i atdimo dabaniba silo bikiniba anaiba kaanesobe. <sup>21</sup> Yuda ni sino funanoba Naka ele Islel naka ni wasi nakai kweiban dimo dotlanamabebo ge funanobbu otane i anaiba kaanesobe. Weng mak osa memalo e kaanea tom temo dobbunibbuo amo asumatna blimanobe. <sup>22-23</sup> Eka memalo boman tebuo ni isak temo unang maki moniba gloutemo unaniba Yesuse dame mo atemin blim otane i abiseli yatemiba i baabeniba E hananea afen anea unebo ge baabeibta deibe tlobobo gesiba ni wentenoba bobol hekhek funanoba <sup>24</sup> nimalosak naka maki motemib otane i Yesuse mo atemin blimobe. Isa makob unangi watem tlibbiota watemioho gesiba <sup>25</sup> Yesuse baabenea Ib bobol tem funino blimobe. Ibo Gode weng omkeimalin nakai wengo dolaibbuo hebmamsabo mo bainobo gabibbabe. <sup>26</sup> I dolaniba baaniba Gode Dofakamin Nakae Klaiste enin kino waterneta mitdaneta moneta abilimo unamabebo ge baaniba dolaibbiobo ge baabene ole <sup>27</sup> eka Moses esa eka Gode weng omkeimalin naka isa i buk temo ele weng sango dolaibbuo mito alukum oye biana aleye biam bia <sup>28</sup> moniba Bib olo unomo geniba bebibo meb unaniba Yesuse imin ye unang genamsea <sup>29</sup> asu dabi wataniba baabaniba Kobo ni bekebenale! Memalo afoko dawab banobio kesoa namo namo belo ngananamabobo ge baabasiba Yesuse tamnea i am tam unanea i dabo bekebe bia <sup>30</sup> mitdaniba imeno downom genamib kesoa Yesuse i dabo heba tounea blete obo helanea Gode gangobo gonea oya <sup>31</sup> i atemniba tekein keniba Yesus etabo geiba e blimanea i imino mo atemin blim kesioibe. <sup>32</sup> I obianiba Nibo deib tema deibo tebobo e wengo oye biana Gode

buk tem wengo mitmakamo omkeimayem tebea nib bobol temo klayam fun tlobobo ge omomniba <sup>33</sup> am olo dimo olota imin moniba Yelusalem bib ye temniba Yesuse okok aleyemin nakai 11 isa eka alawal mak isa bliho temnaniba mibianiba <sup>34</sup> i naka asu dabi baabeibo Motonobo, Sume imin hananea tlea Saimone atemebo gesiba <sup>35</sup> asu dab isak inamin namino deib tama deibo watem tlibo wengo oye bianiba baabeniba E blete helanea Gode gangobo geneta ni dabo atem tekein ke tlobobo ge baabesiobe.

*Yesuse e okok aleyemin nakai atem-  
siobe.*

*(Matyu 28:16-20; Mak 16:14-18; Yon 20:19-23)*

<sup>36</sup> I weng olo obib dim ota Yesuse isak daak manea baabenea Ib bobol temo ayam bianibte ge baabesea <sup>37</sup> i dlou unaniba tosanianiba fumbianiba Unimine ye atemobobo gansiba <sup>38</sup> Yesuse baabenea Ibo fatnanibta dlou une bianibta bobol temo asusu blibe? <sup>39</sup> Ne skila kweilao nafunibta temine! Netabe. Ne diim osa on osa bitnebiobe. Otane smike diimo blim eka ono blim nabo ge baabenea <sup>40</sup> e skila kweilao alebenea <sup>41</sup> i seimbianaiba Bain etio? gabianiba bobolo hekhek fungsiba Yesuse baabenea Ibo imeno mo bione? gesea <sup>42</sup> i aningo atosin mako funibbuo omansiba <sup>43</sup> omonea unansea atememsiba <sup>44</sup> baabenea Sino ibte nete nabianoba baabeniba Sinanggwano ne weng sango Mosese hekmel wengo tem osa Gode weng omkeimalin nakai buk tem osa eka buk Samo tem osa alukum yamo bali-namabobo ge baabeibiobo ge baabenea <sup>45</sup> e Gode wengo omkeima alebeia i Gode wengo buk temo mitmakamo tekein keine genea i bobol temo funin ayamo omye-nea <sup>46</sup> baabenea Gode buk temo baanoa Gode Dofakamin Nakae enin kino waternea kaanea amo asu kenea make dime imin hana tlea <sup>47</sup> eka naka maki e niniino mikiktemo Yelusalem bib seli sino omyenibta mitdata bib mak bib mak sel isa Gode Dofakamin Nakae Klaiste niniino omkeimaniba omkaye bianiba baabeniba Ib hengmino deiboniba ib bobol temo deskinaniba Gode omaliba e ib hengmino omtlabeneko ge baabenomabiobo genobiobe. <sup>48</sup> Eka ibo inamin namin olo watemibo wengo baabeine! <sup>49</sup> Wentine! Sino Aye baanea Naka ele dobiambibio genebue ne memalo utnia abilim ut unamio dababeia tlamabebe. Ibo bib sum olota blipta dabaia daak tenea titil sumo omyeta mitdanibta bib mak bib mako monibta ne wengo omkeiman haanine ge baabesebe.

*Gode Yesuse debeb ulanea abilim onsebe.*

*(Mak 16:19-20; Abosel 1:9-12)*

<sup>50</sup> E okok aleyemin nakai dleb monea Betani ye unanea kweilono tebelubenea Gode baabanea Daabenale ge baabanabea <sup>51</sup> Gode debeb ulanea abilim unea <sup>52</sup> i e niniino dobtouleb bianiba imin moniba Yelusalem bib unaniba seimbianiba <sup>53</sup> Gode am sumo tem tamo mibianiba Gode niniino dobtouleb monsiobe.



## **Yon Dowan Weng Olo Yone Dolanebuotabe. Tekein kemin wengobe.**

Yesuse daakenea atdimmo kaanea imin hananea ulanea abilim unebua bifolo 60 ese mak blimanota Yone dowan weng olo dolanebiobe. Yon ele Yesuse okok aleyemin naka etabe. E weng olo dolanibua nakaia unanagai kibianiba tekein keniba Yesuse bainobo geniba afen smike amit nine doboniba amit nine geneta dolanebiobe. E Yesuse inamin namin okoko nabinebuo wengo mo dolaim blimobe. E Yesuse wengo baanebu ota dolanebiobe.

1:1-18 Mikiktem wengobe.

1:19-51 Yone aa fuayemin naka esa eka Yesuse okok aleyemin naka mak isa i weng sang otabe.

2:1-12:50 Yesuse Galili betano nakaia unangai daaye binebuo weng sangobe.

13:1-17:26 Yesuse atdimmo dabasa ananomabib amo meb tebua e Yelusalem bib ye bianea okok kebinebuo weng sangobe.

18:1-20:31 Yesuse kaanebuo weng osa eka e imin hananebuo weng osa otabe.

21:1-25 Mubiang wengobe.

*Wengo afen smiksao naka walanebiobe.*

<sup>1</sup> Sinanggwano dabale mo tam tlim blim o dimo wengo Gode temna binobiobe. Weng ele Yesus Klaist etabe. Niniin olo mitmakamo e Gode wengo nakaia unangai keim aleyeminobe. Weng ele emaye Godobe. <sup>2</sup> Yo dimo ete God ete nabinubiobe. <sup>3</sup> Gode titilo Klaiste omaleta eta inamin namino alukum kla tlanebiobe. Inamin namino omalo mo tam tlim blimobe. Klaiste emaye inamin namino alukum kla tlanebiobe. <sup>4</sup> E afen smiko mitobe. E tenea nakaia unangai ayale obyebiobe. <sup>5</sup> Ayale ele amitie mililambio temo eibinabebe. Mililanamino mo gaisanota kimine-mebabe.

<sup>6</sup> Gode e dowan naka make dabanea tese e niniino Yon etabe. <sup>7</sup> E tenea ayale Yesus Klaiste weng sang ota nakaia unangai baabeia i e weng sang olo wenteniba bainobo geine geneta tlebiobe. <sup>8</sup> Yone ayale ekobbabe. E besa tenea ayale weng sango omkeimamang geneta tlebiobe.

*Nakaia unangai Yesuse mo gobanin blimobe.*

<sup>9</sup> Yesus Klaiste Ayale Moton ele funanea Ne ayale nakaia unangai alukum dabalim olo blihi obyambibo geneta tlang gena binebiobe. <sup>10</sup> Gode titilo Klaiste omaleta

eta dabal ele klanebio binea emaye daak tenea dabalim olo binebu otane dabalim sel nakaia unangai e mo tekein keim blimobe.

<sup>11</sup> E tenea ele meletani Yuda isuo ele bibamo klanebu ele tlebu otane i mo gobaniba Klayam nata tlebo geim blimobe.

<sup>12</sup> I inabib otane maki gobaniba Klayam nata tlebo geniba e bainobo gabinibbio kesoa e baabenea Ne titilo ibo omyia ibo ne meme aibobo ge baabenebiobe. <sup>13</sup> Gode meme anamin kukubo enaminobe. I aaleb kamwali imino mo okok kebianibta dlaim blimobe. Eka i dabalim nakai bobol tem funin osa mo dlaim blimobe. Gode emaye ele bobol tem funin ota nakaia unanga eli dlanea i e meme aibbiobe.

*Yesuse Gode kukubo nibo alebenebiobe.*

<sup>14</sup> Weng ele naka nea nibo baka bia nibo e titilo ayale inamin einobuo wate-mubanobiobe. E Gode miin yanmakob kesoa e Aye Gode titilo ayale inamin einobuo olo omalea daayemin kukub osa eka weng moton omin kukub osa e bobol temo sibbebanobiobe. <sup>15</sup> Yone tenea naka ele weng sango omkeimabebua Yesuse tle kesoa atemnea nakaia unangai baabenea Sino ne ibo baabeniba Ne sin tlibu otane ne naka sumbabe. Naka make ne abuk tlamabe e naka sumobe. Niminbabe, dabale mo tam tlim blimo dimo naka ele binebiobo ge baabeibio nakae eletabo ge baabesebe. <sup>16</sup> Daayemin kukubo e bobol temo sibbebanobio kesoa e nibo amit daaye binabebe. E daayemin kukub olo mo blimanomobabe. <sup>17</sup> Gode hekmel wengo Mosese omalea esak nibo omyebu otane daayemin kukub osa eka weng moton omin kukub osa ole God eta Yesus Klaiste omaleta esak nibo omyebiobe. <sup>18</sup> Nakai Gode atemnamino blim otane Gode miine yanmakobe Yesuse e Aye Gode bobol temo makobam bianea eta Gode kukubo nakaia unangai alebenea keim anebiobe.

*Yone aa fuayemin nakae wengobe.*

*(Matyu 3:1-12; Mak 1:2-8; Luk 3:2-18)*

<sup>19</sup> Yudai komokwali Yelusalem bib ye blihi Gode amo kimanin nakai mak isa eka Libaie meletani mak isa dlaiba moniba Yon esu unaniba baabaniba Kobo wangkebe? ge baabasiba <sup>20</sup> Yone hebamsab keim baabenea Ne Gode Dofakamin Nakae Klaist ekobbabo ge baabesea <sup>21</sup> eka i imin kil baabaniba Otane kobo wangkebe? Kobo sinanggwano Gode weng omkeimalin nakae make niniino Ilaiya kebtio? gesiba Yon esak imin yang ke baabenea Ne ekobbabo ge baabesea i imin baabaniba Kobo Gode weng omkeimalin nakae Mosese ulabe tlamabea ni waisabiobe kebtio? gesiba e baabenea Yeye ne ekobbabo gesea <sup>22</sup> i imin baabaniba Kobo

wangkebte? Baabenale! Kobo kebmal ole Ne wanetabo gabebe? Ni keb weng sango omeb monoba nakai ni dlaiba tlobbuei baabenomabbioho gesiba <sup>23</sup> Yone Gode weng omkeimalin nakae Aisaiae wengo baabenea

Naka make ibuantem ye bianea ngambianea Sume deibo kebanabibte ge nganamabebo genebueo

naka ele netabo ge baabesebe.

<sup>24</sup> Felisie i naka eli dlaiba tlibbiobe. <sup>25</sup> I Yone baabaniba Kobo baaneba Ne Gode Dofakamin Naka Klaist ekobbabo, eka ne Ilaiya ekobbabo, eka ne Gode weng omkeimalin nakae waisabiobe ekobbabo geneb yole kobo fatnanebta nakaia unangai aayo fuayebebe? gesiba <sup>26</sup> Yone baabeneae Ae ne nakaia unangai aayo fuayebi otane naka make ibo baka bie ibo mo tekein kebobbabe. <sup>27</sup> E ne abuk tebe otane e sumobe. Ne sumba kesoa ne e mo tenanobta wengo baanomobbabo ge baabesebe. <sup>28</sup> I olo nasib ole afok tlemin sin da aaye Yodane milim wat Betani bib ye bianibta omansiobe. Bibo yo Yone aaye ye fuaye binebiobe.

*Yesus ele Gode eil sibsib menobe.*

<sup>29</sup> Aan sibnoma boman ole Yesuse Yon esu tlang genea tebea Yone atenea Yudai kukubo eil sibsibi yananiiba Gode dokaha binabib kesoa e o dim tounea nakaia unangai baabeneae Etemine! Gode eil sibsib mene tebebe. E nakaia unangai dabalim ele blibi hengmino omlabenamabebe. <sup>30</sup> Sino ne ibo baabeniba Ne sin tlibu otane ne naka sumbabo, naka make ne abuk tlamabe e naka sumobe. Niminbabe, ne biemo mo nemfaim blimo dimo naka ele binebiobo ge baabeibuo naka eletabe. <sup>31</sup> Sino ne Gode eil sibsib men ele niniino mo tekein kenita Inaminiab etabo geim blim otane ne tlibu ole Islel teni tekein keniba e tlamabebo geine genita tenita aaye fuayebibo ge baabesebe.

<sup>32-33</sup> Eka Yone weng mak osa omkeimaneae baabeneae Ne sino mo tekein kenita e Gode Dofakamin Nakabo geim blim otane Gode ne nemaneae tenia nakaia unangai aayo fuayebia e baatneneae Kobo temebeba ne Hobe abilim ut danea makob wan kubiamieie ulab daakeneae naka make dim ut tounea atemeb mole naka eleta ne Hobe nakaia unangai bobol temo dababbeneae makob aso eimbianoa inamin namino kibanoa nemat genabo inanea i bobol temo as kibain keneae i hengmino nemat genamabebo ge baatnenebio kesoa <sup>34</sup> naka ele tleo e dimo bain inanoa atemnita E Gode miinobo ge baabeioho ge baabesebe.

*Yesuse e okok aleyemin naka miki mikiktemo dlakasebe.*

<sup>35</sup> Aan sibnoma boman ole Yon esa e okok aleyemin nakai asue isa ye bliba <sup>36</sup> Yone temeae Yesuse tlanea dotla unang genabe kesoa atenea e okok aleyemin nakai baabeneae Etemine! Gode eil sibsib mene ele mombebo ge baabesea <sup>37</sup> wenteniba i dabo Yesuse dobsileb bebiba <sup>38</sup> e deskina temeae i dabo dobsileb bebib kesoa baaneae Ibo nimin hen tebibe? gesea i baabaniba Aleyemin naka kobo fab aalabebe? gesiba (i wengo aleyemin nakai labai ge oye binabiobe). <sup>39</sup> E baabeneae Ibo ne beketne monibta ne amo aalabio watemine gesea i dabo bekeba moniba e bib unaniba e amo aalabeo watemubaniba e baka bliba kwinsobe. (Kwin tlot 4 kilok ese mak biota inasiobe.) <sup>40</sup> Naka asu dab eli Yone wengo wenteniba Yesuse dobsileb onsibi make niniino Endlue Saimon Fita e ning etabe. <sup>41</sup> Endlue hebmamsab monea e heke Saimone baabaneae Ni Gode Dofakamin Nakae atemobobo ge baabesebe. (Hiblu wengo Klaist olo makob Gode Dofakamin Nakabe.) <sup>42</sup> E Saimone debetneae moniba Yesus esu ye moteniba Yesuse Saimone ateme bianea baabaneae Kobo Yone miin Saimon kebtabe. I kobo Sifas ge ngangkemomabiobo ge baabesebe. (Niniin Sifas olo Alameik wengobe. Eka Fita ole Glik weng nabe. Niniin asu olo mitmakamo makob tom beselibobe.)

*Yesuse Filib esa Nataniel esa i dlakasebe.*

<sup>43</sup> Aan sibnoma boman ole Yesuse walaneae Galili unano genea monea Filibe atenea baabaneae Kobo ne beketneneae unomo ge baabesebe. <sup>44</sup> (Filib esa Endlu esa Fita esa i alukum Betsaida bib selobe.) <sup>45</sup> Filib esak Nataniele henmoneae atenea baabaneae Sinanggwano Mosese hekmel weng osa eka Gode weng omkeimalin naka isa naka make weng sango dolaiabbue atemobobe. Yosebe miine Yesuse Nasalet bib sak etabo ge baabesea <sup>46</sup> Nataniele Filibe baabaneae Ne bobol temo fumbio Nakai naka ele weng sango dolaiabbu ele naka ayamobe. Nasalet bib ole bib misiamobe. Naka ayam ele Nasalet bib dao mo tlamebabo gesea Filibe baabaneae Kebmaye tenebta atemale ge baabesea bebiba <sup>47</sup> Yesuse temeae Nataniele esu tlang genea tebe kesoa Yesuse baaneae Naka ele Islel teni motonobe. E bobol temo dim omin kukubo blimobo gesea <sup>48</sup> Nataniele wenteneae Yesuse baabaneae Kobo fatnanebta ne tekein kebebe? gesea Yesuse baabaneae Filibe mo nganabkeim blim bieta ne sin temia kobo as ete mit ye bieba katemibo ge baabesea <sup>49</sup> Nataniele baabaneae Aleyemin naka kobo Gode miin

Isleli komok sum kebtabo ge baabasea<sup>50</sup> Yesuse baabanea Ne baabkenia Ne sin temia kobo as ete mit ye bieba katemibo ge baabkei yota kobo bainobo gabeobe. Olo ayam otane mitdana inamin namino dot ayamto tam tlota watemamabeobo ge baabanea<sup>51</sup> eka weng mak osa baabenea Ne bain baabenamabibe, ibo mitdaniba temiba abilime belanea Gode abiseli daakeniba Abilim Da Tlemin Naka nesu ele da imin ut abilim utda bianiba usa daaka bliba yatemomabiobo ge baabesebe.

## 2

*Yesuse okok sumo mikiktemo nase otabe.*

<sup>1-2</sup> Amo asu blimanoa Galili temano Kena bib ye naka make alelo omamabe kesoa i Yesus esa e awok osa e okok aleyemin naka isa weng omfubeniba baabeniba Ibo tliba falo ga wembianoba nakae alelo omeko geibbuwa tliba imen baka waen aay bakao wembianiba<sup>3</sup> waen aayo blimano kesoa Yesuse awoko baabanoa Waen aayo blimanobo ge baabasoa<sup>4</sup> e baabonea Ob bobol temo fumbebo E daabeneko ge fumbbeb otane ne titilo nakai unangai alebenamabio amo mo tam tlutneim blim biobo gesea<sup>5</sup> e biemo okok nakai baabenoa E baanea Inamin namino inaine gene mole ibo ele weng baaneme iwat namine ge baabesobe.

<sup>6</sup> Amo gosake tom keto beselibo asuke asuke asuke nao olanea Yudai ili hekmel kukubo wafunom gaibo i kweil aayo fuba bianiba eka fletu fuba biam nine geneta olanebiotabe. Okok nakai aangket olo temo elekiem elekieme aangket gwabo odi oleb teniba ibumino 10 genimib ota utlamabobe. <sup>7</sup> Yesuse okok nakai baabenea Ibo aayo down teniba tom aangket olo ibaboine ge baabesea i inaniba aayo down teniba ibaiba sibbesoa<sup>8</sup> e baabenea Aangket gwabo mo oboniba aay ele obdi obeb moniba falo kima bie nakae obaline gesea i inaniba obdi obeb moniba obansiba<sup>9</sup> down temea aaye deskinanea waen aay anea eka aangket sum otem osa alukum inasobe. Okok naka eli aaye ele down tlibue tekein kebib otane e mo tekein kebeba kesoa e funanea Waen aay ele gam ayamobe. Fatda obdi obeb tlibe? ge funanea<sup>10</sup> nakae alelo omamabe baabanea Nakai alukum waen aayo gam ayamto sin kiki downoniba nakai gabam tol temo mima fubesota waen aayo gam misiamo mit kikita downonibib otane kobole waen aayo gam ayamto deibo bineba Abuk kiki downine gabeobo ge baabesebe. <sup>11</sup> Yesuse e okok sum olo mikiktemo Galili temano

Kena bib ye klanea e titilo alebenea wateniba e okok aleyemin nakai e bainobo gesiobe.

*Yesuse monea Gode am sumo temo temo nakai inamin namino webibi fotebesebe.*

*(Matyu 21:12-13; Mak 11:15-19; Luk 19:45-46)*

<sup>12</sup> Olo inabibo blimanoa Yesus esa e awok osa e ningwal isa eka e okok aleyemin naka isa i moniba Kabaneam bib ye bliba amo milim mak blimansobe. <sup>13</sup> Yudai singkalin am sumo i Fasoba imeno downabib amo dikib tebiota Yesuse ulaneta Yelusalem bib onsebe. <sup>14</sup> E utnea Yelusalem bib ut unanea tanea Gode am sumo daam temo tam unanea temea naka maki am yo temo makob imen wemin baan dim omfa bianiba eil blumakaua eil sibsiba wana i dleb teniba toubiba naka maki teniba walo dleb mo funiba Gode heitdahabiba eka mak ile tebol dim ye toulu bliba naka maki skeim da tlebibi Lom monio oleb teniba oyeniba Islel monio oise une biam blib kesoa yatenea<sup>15</sup> atliaubasoa sayo tebelonea eital dabanea tobonea biou biou yemdenea alukum naka isa eil sibsib isa eil blumakau isa fotebenea uniba eka monio biino delabmabenea monio dilbi daaknoa biin daak unoa<sup>16</sup> eka wani webib nakai baabenea Dleb onon tlane! Ibo ne Aye am olo temo webiba makob imen wemin baan dim ano kesoa deibueine ge baabesebe. <sup>17</sup> E inasea e okok aleyemin nakai ateniba funaniba E weng sango Gode buk temo baanoa

God kobo ne keb amo talowabia i ne nenanom genabiobo genobio

yamo balinobo ge funasiobe. <sup>18</sup> Yudai komokwali e inaneo wateniba baabaniba Kobo waneta baabkeseta naebe? Kobo okoko sumo mo klaneba ni katenoba tekein kenoba waneta baabkeneta inanale geseta naebobe genomo gesiba<sup>19</sup> Yesuse baabenea Ibo Gode am sum olo galafanimibo ne amo asumatna kenita imin genamabibo ge baabesea<sup>20</sup> i baabaniba Nakai Gode am sum olo geibbuei gembiba bifolo 46 blimanota geibbio otane kobo fatnaneba Ne amo asumatna kenita imin genamabibo gabebe? gesib<sup>21</sup> otane Yesuse Gode am sumo weng sango inangge baabese olo Gode am sum okobbabe. Ele dim touneta baasebe. Sinanomo e anaiba kaanea amo asu kenea make dime imin hananamabeo saa weng ota baabesebe. <sup>22</sup> E inangge baanebua sinanoa e atdim anaiba kaanea amo asu kenea make dime imin hana tlea e okok aleyemin nakai funaniba E sino inangge baanebiotabo ge funaniba Gode buk temo weng osa eka Yesuse wengo oye

bine osa bainobo gesiobe. <sup>23</sup> Fasoba imen unalin am bomabua Yesuse Yelusalem bib ye bianea e inamin namin okok sumo klabea nakaia unangai homoni e bainobo gesiobe. <sup>24</sup> Ina otane Yesuse emalole i wengo mo bainobo geim blimobe. Niminbabe, e nakai alukum i kukubo tekein ke-nea i bobol temo klao mo bainobo gabibba kesotabe. <sup>25</sup> Naka maki Yesuse baabaniba Nakai bobol temo inange fumbiobo ge baabanamini blimobe. Niminbabe, e nakai bobol temo sin tekein kebebe.

### 3

*Yesus ete Nikodimas ete naniba weng omonsio.*

<sup>1</sup> Yudai komok make niniino Nikodimas etabe. E Felisie meletanobe. <sup>2</sup> Naka ele kwitimib tenea Yesus esu ele tlanea baabanea Aleyemin naka kobo ni tekein kenoba God eta kobo kemaneta tenebta nakaia unangai aleyeobo gabuobe. Gode naka make mo bekeba nim blim kenemeo e okoko sumo kobo okok kebeb enamino mo klanamabebabo gesea <sup>3</sup> Yesuse baabanea Ne bain baabkenamabibe, Gode naka make imino mo dofaim blim kene mole e mo mema naka neta Gode kimanin bibo mo watemamabebabo ge baabasea <sup>4</sup> Nikodimas esak baabanea Nakae sin damane biamo Gode fatnaneta e imin dofaneta mema naka namabene? E imino mo deskinaneta watneta e awoko amun tem wat uneta dofanamabobabo gesea <sup>5</sup> Yesuse baabanea Ne bain baabkenamabibe, nakae aaye mo fuelanea Gode Hobe e bobol temo mo dababbaim blim kene mole e mo mema naka neta Gode kimanin bibo mo unamabebabe. <sup>6</sup> Nakae dabalim naka kamwali dofaibbue e dabalim kukub ota wafu binabebe. Eka nakae Gode Hobe dofanebu ele Gode kukub ota wafu binabebe. <sup>7</sup> Ne baabkenia Gode ibo imin dlaneko gabi olo kobo mo dlou unemebe! <sup>8</sup> Glole emaye ele bobol tem fuge waletnea monea betan ato unebua bi fuge waletnea betan ato unebua bi binabebe. Kobo unin wengo ye wente binabebe otane kobo mo tekein kenebta inamin sin da ye kiloneta tlaneta Inamin sin da ye unebebe genebta tekein kenabebbabe. Gode Hobe nakaia unangai bobol temo klanea mema naka unang ambib osa makob inamin kesoa kobo mo tekein kebebbabo ge baabasea <sup>9</sup> Nikodimase baabanea Inamin namin olo fatnanota tam tlamabone? gesea <sup>10</sup> Yesuse baabanea Kobo Islel teni aleyemin naka sum otane fatnanebta o mo tekein keim blim biebe? <sup>11</sup> Ne wengo bain baabkenamabibe, nesa ne okok aleyemin naka isa inamin namino tekein kebob osa eka inamin namino watemobbuo weng osa

Yuda ibo baabenomob otane ibo ni wengo mo wentubeim blim weng omdibiye binabiobe. <sup>12</sup> Ne ibo dabalim olo inamin namino wengo baabenimio ibo mo bainobo gabinabibba kesoa ne abilimo inamin namino wengo baabenimio ibo weng olosa mo bainobo genomabibbabe. <sup>13</sup> Naka maki mo utnibta abilim ut danibta imin daak tlim blimobe. Abilim Da Tlemin Naka ne nenekiem neneta abilimo deibonia daak tenia dabalim ele tlania abilim omimio weng sango ibo oyebibe. <sup>14</sup> Sinanggwano ibuantem ye Mosese tom blonso olonea inabe smike klanea ase tekebmene halonea dabasa genea bikinebua nakaia unangai inab motoni yantanimiobo inabe smik ele dobutda ateniba i kaanamino deiboniba sbal sambinibbiobe. Mema dim olosa nakai Abilim Da Tlemin Naka ne inatneniba atdimo nemasaniba silo bikitneniba obo bikinomabiobe. <sup>15</sup> Nakaia unangai nemutda nateme bianiba bainobo getnenimio isa mo kaanimibbabe, amit nomabiobe. <sup>16</sup> Gode dabalim nakaia unangai kla dohalim bianea kla gobe bie kesoa e miin yanmakob ne nemanea tenia atdimo kaania nakaia unangai daabenamabi kesoa nakaia unangai wanita ne bainobo getnenimio mo kaanibta alang namanimibbabe. I afen smike amit nine doboniba amit nomabiobe. <sup>17</sup> Gode e miin ne mo nemane tenita dabalim sel nakaia unangai hengmin gami kot kebenea dlanea aseinin bib unine geneta nemaneta tlim blimobe. E funanea Ne dabaia daaknea dabalim sel nakaia unangai hengmino temo blibo dotlaneko geneta namaneta daak tlibiobe. <sup>18</sup> Nakaia unangai wanita Gode miin ne bainobo getnenimio Gode i mo kot kebeneta dlaneta aseinin bibo mo unomabibbabe. Ina otane nakaia unangai wanita ne mo bainobo ganebibbai Gode sin baanea I aseinin bib unomabiobo genebiobe. Niminbabe, i Gode miin yanmakob ne mo bainobo geim blim kesoa i aseinin bib unomabiobe. <sup>19</sup> I aseinin bib unomabiobo mitmakamo enamino. Ayal ne sin ye daak tenia dabalim ele tlibi otane nakaia unangai ayal ne gotnenamino deitneniba mililanamin ota gobo bliobe. Niminbabe, i kukub misiamo wafu blib kesotabe. <sup>20</sup> Nakai kukub misiamo wafu blibi ayale makaalaniba ayal esuo mo blibbabe. Niminbabe, i funaniba Ni ayal esuo bioba ni kukub misiamo nabobo keim anoa naka mak unang maki watemubenimio genibta ayale makaa dofa bliobe. <sup>21</sup> Otane nakai kukub moloto wafu blib ile ayal esu ye bliiba i kukub nabibo keim anoa naka mak unang maki wateniba tekein keniba Gode kukubo yota naine geneta e titilo omyenseta nabinabiobo genomabiobo ge baabasebe.

Yone Yesuse weng sango baa omkeimanea E okoko inaminobo gesebe.

<sup>22</sup> Yesuse weng olo oyebeo blimanoa omito ete e okok aleyemin naka nite nanoba monoba Yudia betan onsobobe. Ni ye bianoba nakaia unangai aayo fuaye bisobobe. <sup>23</sup> Inon bibo Selim bibo kikib ye biobe. Bib olo aayo homono ye bio kesoa nakaia unangai homoni teniba Yon esu ele tlebiba aayo fuaye monsebe. <sup>24</sup> (Yo dimo Helote Yone klabuto mo ge debeb monea klabut amo mo daim blim bi-etabe.) <sup>25</sup> Yone okok aleyemin naka maki tenabiba eka Yuda naka make tenaniba aa fuayemino wengo obianiba Yone okok aleyemin nakai baaniba Inaminobo gesiba eka Yuda nakae baanea Yeye inaminobo gese bianiba obiniba <sup>26</sup> teniba Yon esu ele tlaniba baabaniba Aleyemin naka kobo sino Yodane milim wato nakae kobo beke-bke bia e weng sango omkeima binebbue bobolo mo fumbebe? Naka ele memalo nakaia unangai aayo fuayebea nakaia unangai alukum kobo deihkeniba moniba esu unebiobo gesiba <sup>27</sup> Yone baabenea Gode abilim ut bie nakai elekiem elekiem i okoko omkayebebe. <sup>28</sup> Ibo tekein ke-biobe, sino ne baania Ne Gode Dofakamin Nakaba otane e ne sin nemanea tlibiobo geibiobe. <sup>29</sup> Nakae alelo omea e nineke weng sango wentameo e kla seinamabebe. Nesa makob nakae alelo ome nakae nineke ulabobe. Ne kla seimbibe. Niminbabe, ne wentia nakaia unangai moniba Yesuse esu unebiobo gabiobe. <sup>30</sup> E niniin ota sum anoa ne niniino men anoko! <sup>31</sup> Nakae abilim da tlebu ele e titilo sum kesoa naka maki titilo gaisenebiobe. Eka nele dabalim naka kesoa ne dabalim omimi ota tekein kebibe. Eka naka elele abilim da tlebio kesoa e abilim osa dabalim osa omimio tekein kebiana ne gaitnenebiobe. <sup>32</sup> E inamin namino watemebu osa eka wentebu osa nakaia unangai o wengo oyebe otane i e wengo mo wentehabibbabe. <sup>33</sup> Nakaia unangai Yesuse wengo wenteniba bainobo gabibi tekein keniba Gode weng osa motonobo gabiobe. <sup>34</sup> Gode nakae dabanea tlebu e Gode wengo kla omkeimabebe. Niminbabe, Gode Hobe e dabalea Hob ele e bobol temo sibbeba biebe. <sup>35</sup> Eka Aalebe e miine Yesuse kla goba biana titilo omanea inamin namino alukum eta olalebu kima biebe. <sup>36</sup> Nakaia unangai Gode miine bainobo gabibi afen smike doboniba amit bliobe. Eka nakaia unangai baaniba Yesuse bain Gode miinbabo ge baai mole i afen smike mo dobonibta amit nomabibbabe. Gode i alo amit tlihabobo ge baabesebe.

Yesuse ete Samelia unang ote naniba weng omonsioibe.

<sup>1-3</sup> Nakaia unangai baaniba Yone nakaia unangai aayo fuayebe otane naka homon unang homoni moniba Yesuse esu unebioba aayo fuayebei homon aniba Yon emiei gaiseibobo geiba Felisie wentiobo gesiba Yesuse wentenea e bobol temo funanea Ne Yudia betano deibonia imin monia Galili unano ge funasebe. (I aayo fuayebib otane Yesuse emalo aayo mo fuayemin blimobe. E okok aleyemin naka nita fuaye mon-sobobe.) <sup>4</sup> Ni Yudia betano deibonoba monoba Galili unomo genoba Yuda ni une binabob deibe deibanoba Samelia deib on-sobobe.

<sup>5</sup> Ni monoba Samelia betano bibo niniino Saika bib ye onsobobe. Bib olo sinanggwano Yuda ni fanine Yekobe e mine Yosebe betano omalebuo skeimbabe, o mebobe. <sup>6-8</sup> Bibo yota Yekobe Aa unine dabale haketoufaneta klanebiotabe. Ni beboba binoa kelano afoko te isak eut tloa Yesuse teng alosoa tenea aaye ken ye toubiana singkabea e okok aleyemin naka ni deibanoba monoba bib yo imeno walonom unobbua Yesuse ye bia Samelia unang mako aaye obdinang genoa tetemoa Yesuse baabonea Aaye mo obditnenea doweite gesea <sup>9</sup> o wentenoa dlou unanoa baabanoa Kobo Yuda nakabo, eka ne Samelia unang na otane kobo nimin kenebta baatnenea Aaye mo obditnenea doweite ge onebebe? ge baabasobe. Niminbabe, Yudai Samelia teni mo gobe bin-abibba kesoa e aa wengo baaboneo o dlou onso. <sup>10</sup> Yesuse baabonea Obo Gode aaye obklea downeba amit namabebe mo tekein kebebbabe. Eka aaye obneba doweite ge okebi naka nesa obo mo tekein kebebbabe. Obo ne weng ele baabkei olo tekein kebeb biamo ne baatnenea aay ele obklia downeba amit namabeb otane obo mo tekein kebebbabo ge baabosea <sup>11</sup> o baabanoa Naka sum kobo aaye dabal tem ele bob daak kesoa keb aangkoto blim yole aaye afen smiksae fatda obdinamabebe? <sup>12</sup> Nib fanine Yekobe dabal ele haketoufanea klaubenebiobe. Aa unine ele klayamobe. Esa e meletan isa e eil blumakau isa weminibbiobe. Ina otane Yekobe aaye dot ayam ele mo obyim blim kesoa kobo Yekobe gaisaneba keb aaye dot ayam ele obiamabebo? gesoa <sup>13</sup> Yesuse baabonea Nakaia unangai aay ele downa-aibo aa tebo imin yemabo <sup>14</sup> otane nakaia unangai wanita ne aaye obiamo gabie downaibo i aa tebo imino mo yemabobabe. Ne aaye obiamabi ele i bobol temo makob aa bantema eibein kenea gang dim tou une biana afen smiko doya amit amit nomabiobo gesea <sup>15</sup> o bobol temo funanoa

Yesuse aay motono weng sang ota onebebo gena o baabanoa Naka sum kobo aaye ye mo obnehta downita ne aa tebo imin nananamino deitnenoa eka ne imin tenia aay ele obdinamin osa denano gesoa <sup>16</sup> e baabonea Obo moneba ob imake baaba debetneba imin tele gesoa <sup>17</sup> o baabanoa Ne imake blimobo gesoa Yesuse baabonea Obo baaneba ne imake blimobo gabebo motonobe. <sup>18</sup> Sino ni faninwali dlobi deibe deibenino asuke asuke make naebbio otane memalo naka ele obtena blib ele ob imakbabe. Ob wengo moton baatnenebobo ge baabosea <sup>19</sup> o baabanoa Naka sum kobo ne mo tekein kebebba otane kobo ne kukubo nabio omkeimatnened kesoa ne tekein kenia kobo Gode weng omkeimalin nakabo geiobe. <sup>20</sup> Ni faninwali Samelia ten iko amgolim ele golim uto Gode lotu keha binabib otane Yuda naka ibo baaniba Nakaia unangai alukum teniba Yelusalem bib ele Gode lotu kehamine ge obinabiobo gesoa <sup>21</sup> Yesuse baabonea Unang obo ne weng olo baabkenimio bainobo genale! Sinanomo nakaia unangai amgolim ele golim ut esa eka Yelusalem bib osa olota Aye Gode mo lotu kehamomabibbabe. I bib mak betan mak osa alukum Gode lotu kehamomabiobe. <sup>22</sup> Samelia ten ibo Gode lotu keha binabib otane ibo e mo tekein kebibbabe. Yuda nita Gode kla tekein kebianoba lotu keha binabuobe. Niminbabe, nakaia unangai hengmino temo blibo dotlanamin kukub ole Gode Yuda ten ita alebeneta isak naka mak unang maki alebenomabiobe. <sup>23</sup> Sinanomosa memalosa nakaia unangai Aye Gode moton lotu kehabib ile i wengo moton obianiba i bobol temo Gode lotu keha binabiobe. Nakaia unangai inaniba Aye Gode lotu kehabib ile e i kukub olo kla gobo biebe. <sup>24</sup> Gode dabalin nakababe. E hobobe. Nakaia unangai Gode lotu kehabib ile i wengo moton obianiba i bobol temo Gode moton lotu kehamine ge baabosebe. <sup>25</sup> O baabanoa Ne tekein kebibe, Gode Dofakamin Nakae i Klaist ge nganhabibe tlemeo e nibo inamin namino alukum alebenamabebo gesoa <sup>26</sup> Yesuse baabonea Ne i naka ele Klaist ge oha binabib naka neta okehibo ge baabesebe.

<sup>27</sup> E inangge owebea e okok aleyemin nakai imin teniba temiba e unango tenaniba weng obiba ateniba dlou onsib otane i nakae elekieme Yesuse mo baabaneta Kobo nimin kenebta unang olo tenanibta weng obibe? O fatnatnenoko genebte? ge baaba naim blimobe. <sup>28</sup> Unang olo aangketi obanoa metnoa bib met unanoa nakaia unangai baabenoa <sup>29</sup> Ibo moniba naka ye atemine! E ne mo tekein kebeba otane e ne sino inamin namin kukubo nabinabio alukum omkeimatnene kesoa e

Gode Dofakamin Nakae Klaiste nibo Lom seli kima blibo dotlanamabe etase makobo gesoa <sup>30</sup> i bibo deiboniba moniba Yesus esu onsiobe.

<sup>31</sup> O inanoa metnoa nakaia unangai bib met blibo baabenam mes unoa Yesuse okok aleyemin nakai baabaniba Aleyemin naka kobo imeno downale gesiba <sup>32</sup> e baabeneba Ne imeno bitnebuo ibo imen olo mo tekein kebibbabo gesoa <sup>33</sup> e okok aleyemin nakai i sinwalo imaye baasese bianiba obianiba Naka maki imeno sin oluba tlibbiota obe bleka? ge omsiba <sup>34</sup> Yesuse baabeneba Ne nakae nemanea tlibue bobol tem ota wafu biana e baatnenemeo ne e weng ota wente biana okok bli kesoa ne okoko okok kebia blimansote genitabe. Imeno ayam otane ne Gode okoko okok kebio kukub olo dot ayamobe. Ne yo inanimi olo makob ne imenobe.

<sup>35</sup> Ibo enangge obianiba Alimo asuke asuke nao blimanomo dim ota wito wakamomabiobo gabib otane ne baabenamabi ole kin omoniba wit damibo watemine! Sanggwan yam anobiobe, welonaminobo ge baabesebe. (Yesuse saa weng ele baabese olo mitmakamo enamino. Samelia teni tebibta yateneta e okok aleyemin nakai baabeneta Naka eli Gode Dofakamin Nakae wengo wentomo geniba tebib eli makob wito yam anoa welomabib inaminobo ge baabesebe.) <sup>36</sup> Yesuse imin baabeneba Nakae ne wengo omkeimabe ele makob nakae wit sano dolibe ulabobe. E inanea ne wengo omkeimabea nakaia unangai wenteniba bainobo geniba afen smike doboniba amit amit nomabibo makob nakai wito yam anoa weleb moniba am olanomabib inaminobe. Nakai asu keniba make wito sano dolibe eka mak ele yamo weleb te toubiam nimibo i dabo kla seimbiana okok olo okok kebiba sinanomo Gode i okoko molo yang kenea inamin namin ayam doyamabebe. <sup>37</sup> Weng olo motonobe. Nakai asu keniba make wit dabo dolibe eka mak ele waa toubianamabebe. <sup>38</sup> Ne ibsa inania dlaia moniba nakaia unangai dleb meteniba ne mitem tlibbi otane sino naka maki bumolok bianiba ne wengo i omkeimaye binibbiobe. Makob nakae mikiktemo wit dabo dolinebua damanoa yamo balinobua yam anomo naka make tenea waa toufanamabe inaminobe. Naka maki mikiktemo ne wengo omeb moniba nakaia unangai baabeibua memalo ne ibo dlaia isu unaniba daabeiba i ne bainobo genomabiobo ge baabesebe.

<sup>39</sup> Eka Samelia nakaia unangai homoni bibo yo seli unang olo wengo wenteniba i Yesuse bainobo gesiobe. Niminbabe, o baanoa E ne sino inamin namin kukubo

nabinabio alukum omkeimatnenebo gesota i wentenihta bainobo gesiobe. <sup>40</sup> O inang geno kesoa Samelia nakaia unangai teniba Yesus esu ele tlaniba baabaniba Kobo deneba ele biant gesiba e wentenea ye baka bia amo asu blimansobe. <sup>41</sup> E dowan wengo omkeimayebea naka homon unang homoni maki imin e bainobo gesiobe. <sup>42</sup> I unang olo baaboniba Ni memalo ob wengo olota mo wentenobta naka ele bainobo gebaim blimobe. Ni nimaye e wengo wente nanobta Naka eleta dabalim nakaia unangai alukum i hengmino temo bliibi dotlanamabebo genobobo ge baabosiobe.

*Yesuse komok make miine klaubasebe.*

<sup>43</sup> Amo asuo blimanoa Yesuse bibo yo deibonea monea Galili onsebe. <sup>44</sup> Sino Yesuse emaye baanea Gode weng omkeimalin nakai ili bibam seli mo gobe bianibta i wengo klaa mo wenteyebibbabo genebiotabe. <sup>45</sup> Bainobe, e meletani Galili teni mo goba blihbta otane sino Fasoba imen unalin am bomabio dimo i moniba Yelusalem bib ye unaniba Yesuse inamin namin okoko nabeo watemibbio kesoa e Galilio motemeo nakaia unangai Klayam nata tlebobo ge baabasiobe.

<sup>46</sup> E imin monea Galili betano Kena bib ye unanea bibo yo aaye deskinanea waen aay ansebe. Komok make ye bie e miine Kabaneam bib daak ghenabea <sup>47</sup> Yesuse Yudia betano deibonea tenea Galili ele tlebo gesiba wentenea tenea Yesus esu ele tlanea baabanea Ne miine Kabaneam bib daak bianea gembianea kaatnenang genabe kesoa kobo ne beketneneba monoba klaubanale gesea <sup>48</sup> Yesuse naka ele bainobo galino naatemanonea genea e naka ele baabanea lbo okok sumo mo watemin blim keib mole ibo ne mo bainobo getnenomabibbabo ge baabasea <sup>49</sup> komoke baabanea Naka sum kobo hebmamsab tleba unono! Ne mene kaatnenemebo gesea <sup>50</sup> Yesuse baabanea Sma daak temehta keb miine ayam anamabebo gesea naka ele funanea Yesuse wengo bain baatnenebo genea deibanea <sup>51</sup> monea tamal aan senoma bomanoa beba e okok nakai teniba deib tamal deib baabaniba Keb miine ayam anebo ge baabasiba <sup>52</sup> e kil baabanea Afok smiko fatnamin dim ota ayam anesone? gesea i baabaniba Sintalo wan kilok ota e kweimo gilubanosobo gesiba <sup>53</sup> e funanea Sintalo afok smiko bayo dim ota Yesuse baatnenea Keb miine ayam anamabebo ge baatnene-sobo ge funanea e Yesuse bainobo genea eka e meletan isa Yesuse bainobo ge nasiobe. <sup>54</sup> Yesuse Yudia betano deibonea monea Galili betan ye unanea okok sumo

asuo nasebe. Mako aaye deskinanea waen aay ansebe. Eka mak ole komoke miine klaubanasebe.

## 5

*Yesuse Betesda aamuk ye naka make ginino klaubasebe.*

<sup>1</sup> Yesuse inabea am mako blimanoa Yudai singkalin am mako dikib tlo kesoa e monea Yelusalem bib onsebe. <sup>2</sup> Aamuk make Yelusalem bib ye einebua Hiblu wengo i Betesda ge oha bianiba bib olo daamo ge tetenaniba aamuke ken ye amit mako ye hatlaibbiotabe. O niniino Eil Sibsibi Amit otabe. Aamuk ele keno mon amo asuke asuke make nao ye genaibbiotabe. <sup>3-4</sup> Naka homon unang homoni mon am olo temo aala binabib biotabe. Maki kino misiam an ye bianoa eka maki skilono misiam an touye bianoa eka maki gilok yalonano biotabe. [Niminbabe, i funaniba Am mak dimo Sume abisake telaaknea aamuk etem daak unea aaye blit blit galameo nibo fue-lanomo genibta waia binibbiobe. Aamuke inanea blit blit galameo naka tab unang tab wanita sin daakniba aan tem daak unaiobo i ginino blimubebe binobiobe.]

<sup>5</sup> Naka make amit ye gembinea bifolo 38 o blimanobua e sma ye gembianeana mon am ye bia <sup>6</sup> Yesuse tenea naka ele atemnea e tekein kenea naka ele gembinabeo bifol homono blimanobiobo gene kesoa e baabanea Kobo fumbbeb ole ne ginino ayamut nenoko gabebo? ge baabasea <sup>7</sup> ginin game baabanea Sum kobo aaye blit blit galameo nakai ne nafu nemeb daakniba aan tem daak nemfakanamin nakai blim kesoa nemaye fiab beteng daak unang ge temita naka maki gaitneniba ita sin daak unaniba i ginino ayam ansib ne de de binabibo gesea <sup>8</sup> Yeuse baabanea Kobo hananeba keb biin asaalo ometneba one ge baabasea <sup>9</sup> hebmamsab e ginin olo ayamu banoa hananea e biin asaalo ometneba onsebe.

E inaseo Gode singkalin am bomabio <sup>10</sup> kesoa Yudai komokwali naka ele baabaniba Memalo Gode singkalin am otane kobo biin asaalo ometneba bebeb yole misiamobe. Nib hekkel wengo baanoa Awemobo genobiobo gesiba <sup>11</sup> e baabanea Ne klautnenea ayam ai naka ele baatnenea Keb biin asaalo ometneba one ge baatnesetabo gesea <sup>12</sup> i baabaniba Wanete? Waneta baabkeneta Keb biin asaalo ometneba one gesete? ge baabasib <sup>13</sup> otane e mo tekein keneta nakae yeta klautnenebe geim blimobe. Niminbabe, nakaia unangai homon aiba Yesuse sanggwan dala unea deibanea <sup>14</sup> e monea Gode am sumo tem tam bia Yesuse tenea imin atenea baabanea Ye temale! Kobo memalo ayam aneb kesoa hengmino imino mo hengamebi!

Kobo inameb mole inamin namin misiam sumo keb dimo tam tlubkenamabobo ge baabasea <sup>15</sup> naka ele monea Yudai komokwali baabenea Ne klautnenea ayam ai nakae Yesus etabo ge baabesebe.

<sup>16</sup> Gode singkalin am bomabua Yesuse naka ele klaubane kesoa Yudai yo dim ota kiloniba Yesuse kukub misiamo omkaha monsiobe. <sup>17</sup> Yesuse i weng olo tekein kene kesoa e baabenea Ne Aye Gode am obba ye bomanomo bomanomo yo dimo amitie okok kebianea eka singkalin am bomanomo dim osa okok kebianea nibo daaye binabe kesoa nesa inania okok kemabibo ge baabesebe. <sup>18</sup> Yesuse weng olo inangge baane kesoa Yudai komokwali funaniba Nibo Yesuse moton ananoba kaaneko ge funasiobe. Niminbabe, i nasisibo e Gode singkalin amo hekmel wengo baanobuo deiboneo olobbabe. E weng mak osa baanea Gode ne Ayobo gene kesoa i funaniba Olo makob e baanea God esa nesa ni makobobo ge baanea e dim obebo ge funasiobe.

*Gode e miine okok kemin titilo omalebiobe.*

<sup>19</sup> Yesuse Yudai komokwali baabenea Ne bain baabenamabibe, Gode miin ne okoko nabio nene bobol tem funino mo okok kebibabe. Ne Aye okoko nabeo olota wate me biania nesa ming inanita okok kebibe. Ne Aye okoko nabeo e miin nesa olota nabibe. <sup>20</sup> Aye Gode e miin ne kla gotne bianea e inamin namino nabeo ne alenebebe. Sinanoa e okok olo ulabba mikiko dot ayamo aletnenamabeo ibo dlou unomabiobe. <sup>21</sup> Aye Gode nakaia unangai kaaib biamo imin dohanea afen smiko omkaye binabe kesoa e miin nesa inania nakaia unangai dlakania afen smiko omkayebibe. <sup>22</sup> Eka Aye nakaia unangai mo kot keye binabebabe. Okok olo e miin neta omnenea baatnenea Kobo nakaia unangai kot keyemale ge baatnenebiobe. <sup>23</sup> Nakaia unangai Aye Gode niniino dobtouleb blib kesoa i e miin ne niniin osa nemtouleb nomabiobe. Nakaia unangai wanita Gode miin ne niniino nemtouleb blibba ile i ne Aye nemanea tlibue niniin osa mo dobtouleb blibbabe.

<sup>24</sup> Ne moton baabenamabibe, nakaia unangai wanita ne wengo wenteniba ne nemanea tlibio nakae bainobo gabib ile afen smike doboniba amit bliobe. Gode i mo kot kebenamabebabe. I kaanamin deibe deibaniba afenin deib eta bebiobe. <sup>25</sup> Ne moton baabenamabibe, nakaia unangai sinanomosa memalosa kaanamin deibe bebibi Gode miin ne wengo wentomabiobe. Eka nakaia unangai wanita ne wengo wentib mole afen smike doboniba amit

nomabiobe. <sup>26</sup> Aye Gode afen smike mitmakamobe. E e miin nesa titilo omnebio kesoa nesa afen smike mitmakamobe. <sup>27</sup> Eka Aye Gode miin ne Abilim Da Tlemin Naka kesoa e namakanea baatnenea Kobo nakaia unangai kot kebenamin okoko okok kemale ge baatnenebiobe. <sup>28</sup> Ibo mo dlou unemibe! Niminbabe, am mak bomanomo dimo ne nganaia nakaia unangai kulila binabibi ham gloutem daako blibi ne wengo wenteniba <sup>29</sup> hana ut tlaniba kukub ayam wafu binib biamo ile afen smike doboniba amitniba eka kukub misiamo wafu binib biamo ile kot keniba omito aseinin bib unomabiobo ge baabesebe.

*Yesuse kukubo omkeimalin wengobe.*

<sup>30</sup> Yesuse Yudai komokwali imin baabenea Ne okoko nabio nene bobol tem funino mo nabibabe. Ne nakaia unangai kot kebenang gamio Gode tekein kemino omneta klayam kot keye binabibe. Niminbabe, ne namane tlibio nakae bobol tem funin ota wafu blibe. Ne nene bobol tem funino mo wafu blibabe. <sup>31</sup> Ibo ne kukubo nemaye baa omkeimanimo ibo ne wengo mo bainobo genomabibbabe. <sup>32</sup> Otane naka make ne kukubo baa omkeimabe ole ne tekein kebibe, e ne weng sango bain ye baa omkeimabe kesoa ibo wentomabiobe. <sup>33</sup> Sino ibo ib okok nakai dlaiba moniba Yone aa fuayemin nakae baabaiba e ne weng sango bain baabenebiobe. <sup>34</sup> Ne mo funanita Nakai ne kukubo baa omkeimamine ge fumbibabe. Otane ne funania I hengmin temo blibo Yone ne weng sango baabenea i wenteniba bainobo geib mole Gode daabenea i hengmin temo blibo dotlanamabebo ge funai kesota ne Yone wengo baabeio. <sup>35</sup> Yone makob ayal inamin einebiobe. Ayalo dutgenomo beualie moniba tubuna binabib inaniba ibo moniba Yone wengo wentib otane ibo amito mo bianibta wentem blimobe. Mema yota wentem tlaniba deibueibbiobe. <sup>36</sup> Ne Aye baatnenea Kobo moneba inamin namin okoko namale ge baanea nemanea tenia okok olo nabi kesoa nakaia unangai waterniba tekein kenimibi funaniba E bain Gode dabanea tlebiobo gabio. Yone ne kukubo wengo omkeimabe otane ne okok olo nabio Yone wengo gaisonoa ne kukubo ibo kla aleyebobe. <sup>37</sup> Eka Ay Gode ne nemanea tlibio naka esa ne kukubo omkeimabebe. Ibo e wengo ele sital dimo mo baaneta wentim blim eka ib kino e mo atemin blim nabe. <sup>38</sup> Eka ibo e weng osa ib bobol temo mo omabbaim blimobe. Niminbabe, eta ne namane tlibu otane ibo ne mo bainobo getneim blimobe. <sup>39</sup> Ibo Gode buk temo afen smike mitmakame hembinaibe. I Gode buk temo ne weng



sango dolaibbu otane ibo sma ye toblim biobe. <sup>40</sup> Ibo teniba ne mit temo tlib mole afen smike doboniba amit nomabib otane ibo nesuo mo tlaobbabo gabiobe.

<sup>41</sup> Ne mo funanita Nakaia unangai ne niniino nemtoulebe nine gabiba <sup>42</sup> otane ne ib kukubo tekein kebibe. Ib bobol tem daako Gode mo goba blibbabe. <sup>43</sup> Ne Aye ele bobol tem ye namane tlibu otane ibo mo baatnenibta Klayam nata tlebobo ge baatneim blimobe. Ibo naka make ele bobol tem tenea baanea Ne Gode Dofakamin Nakabo genea ele niniino omfufume eta ibo Klayam nata tlebobo ge baabanomabiobe. <sup>44</sup> Ibo ib sinwalo ilib tak ngambianiba maki niniino omfabesesenin kukub ota wafu bianiba eka ibo Gode elekiem eleta sumobo, e ni seinyemeko galin kukubo bobolo mo wayebobabe. Ibo inabib kesoa ne mo bainobo getnenomabibbabe. <sup>45</sup> Ibo obianiba Ni Mosese hekmele wengo wafunomobo Gode tenanoba amit nomabbiobo ge obinabib otane kot kenamin dimo tlamo ne Aye mo baabanita I ne wengo omdibine binibbiobo ge baabanamabibabe. Mosese emaye baabanea I ne Yesuse weng sango dolaibbu omdibiha binibbiobo ge baabanamabebe. <sup>46</sup> Gode buk temo Mosese dolanebuo ne weng sang ota dolanebiobe. Ibo e wengo bainobo genimibo ne bainobo getnenomabib <sup>47</sup> otane ibo e wengo klaom mo bainobo geim blim kesoa ibo ne weng osa klaom mo bainobo gabibbabo ge baabesebe.

## 6

*Yesuse naka homoni 5,000 i imeno oye-nea downsiobe.*

*(Matyu 14:13-21; Mak 6:30-44; Luk 9:10-17)*

<sup>1</sup> E inabea sinanole Yesuse etem eka e okok aleyemin naka nitem nanoba monoba Galili aamuke niniin mako Taibiliase yalanoba walanoba milim sin da unoba <sup>2</sup> nakaia unangai homoni sino Yesuse okok sumo nanea ginin gami klaubenea atemibbuei kan na tesiobe. <sup>3-4</sup> Yo dimo Gode singkalin am sumo Yudaib bleto yis blim downabibo o niniino Fasoba fal gamin ge nganwe binabib amo meb tebiotabe. Yesuse monea bibilim ye unea e okok aleyemin naka ni tenanoba toulabisobobe.

<sup>5-6</sup> Ni inanoba toulabianoba Yesuse temea nakaia unangai homoni dli tlebib kesoa yatenea e inamin namino nanamabeo sin tekein kebe otane e Filibe naatemano ge funanea baabanea Nibo imeno fab ota walonobta nakaia unanga eli oyoba downomabibe? gesea <sup>7</sup> Filibe baabanea Nibo monio K200 o olonoba i imeno

walubenomob osa mo kinota doweibta matwayamobabo, men anoa i downitab kenomabiobo gesea <sup>8</sup> Yesuse okok aleyemin nakae make niniino Endlue Saimon Fitae ninge baanea <sup>9</sup> Naka ten ele blet gwabo 5 olanea eka aningi asu olananebu otane olo sumbabo nakaia unangai homonobo gesea <sup>10</sup> Yesuse e okok aleyemin naka ni baabeneane Ibo nakaia unangai baabeiba teniba toulaine ge baabesea ni baabenoba teniba betan olo mulub mulube genea fikalo blelanebio kesoa i alukum o dim ye toulasiba i naka gang ita 5,000 kiniba eka unanga tena ile mo kinim blim deibesioebe.

<sup>11</sup> Yesuse blet olo olonea Gode gangobo genea haanea nakaia unanga eli kikibeneane eka aning osak olonea imin inaneane haanea kikibeneane downoniba <sup>12</sup> matwayoa atosino olasiba Yesuse e okok aleyemin naka ni baabeneane Ibo atosino deibueiobo olmieine! Mo deibonimibe! Sasalanomobo ge baabesea <sup>13</sup> ni nakaia unangai bleto 5 o haa kikibeoba unam biniba atosino deibueiobo olonoba tlit meeno <sup>12</sup> o tem daak basobobe.

<sup>14</sup> Nakaia unanga eli Yesuse okok sum olo klaneo wateniba baaniba Sino Gode buk tem wengo baanoa Sinanomo Gode weng omkeimalin nakae daakeneane dabalim ele tlamabebo genobuo bain naka eleta te biebo gesiobe. <sup>15</sup> I funaniba Yesuse ni komok sum aneko ge funsiba Yesuse i bobol tem funino tekein kenea funanea I ne menganiba Ni komok sum anale ganemib isuo deibe unano genea deibeneane ulanea amgolim onsebe.

*Yesuse aa dang dim wat mama onsebe.*  
*(Matyu 14:22-33; Mak 6:45-52)*

<sup>16</sup> Afoko dawabbanoa Yesuse okok aleyemin naka ni daaknoba weseme obgi tlobbue imin tileisa ofakanoba <sup>17</sup> aamuke yalanoba walanoba Kabaneam bib unomo genoba bebobtabe. Amo mili kikin otane Yesuse nisuo mo tlim blim bietabe. <sup>18</sup> Ni inanoba weseme obetnoba aa dang tla beboba glole sume tlebianeane eka aaye mousie sume haa tlebiam bia walbim walbimnoba <sup>19</sup> watnoba isak wat unanoba temoba Yesuse aalang dim wat mama tenea weseme esu meb tlebio kesoa atenoba tosiansoba <sup>20</sup> e baabeneane Ibo mo tosanimibe! Netabo gesea ni wentenoba <sup>21</sup> bobol ayam funanoba baabanoba Daakeneba weseme tem ele tele gesoba daakeneane tounea debebnoba dim bain kenoba hebmamsab watnoba bib wat onsobobe.

*Nakaia unangai Yesuse hen haamon-siobe.*

<sup>22</sup> Yesuse okok aleyemin naka ni inanoba wala unoba eka nakaia unangai aamuke

milim sin da wat deibe unobi sibnoma bomasoa funaniba Sintalo wesemeo imino blim elekiem eleta bia atemeboba kwinoa obeb unom genabib dimo Yesuse blim e okok aleyemin nakai ilita obeb uniba yate-mobsobe. Yesuse sma bib ele fa biebo? gesiobe. <sup>23</sup> Eka Taibilias bib seli maki Yesuse atemomo geniba wesemeo oletniba teniba Sume imeno Gode gangobo genea haa kikibenea doweibso bib ele tetemniba <sup>24</sup> nakaia unangai maki sma bib yo blibi tenaniba temiba Yesuse esa e okok aleyemin naka nisa ni bib olo blim biob kesoa i dli daakniba wesemeo tem daak unaniba walaniba Kabaneam bibo Yesuse hen on-siobe.

*Yesuse makob afen smik imenobe.*

<sup>25</sup> Nakaia unangai watniba aamuke milim sin da wat temiba Yesuse ye bie kesoa atemniba baabaniba Aleyemin naka kobo sintalo fatnamin dim ota tlebsone? Eka kobo deib ole fab temte tebebe? gesiba <sup>26</sup> Yesuse baabenea Ne bain baabenamabibe, sintalo ne okok sumo naia watemibso ibo mo funanibta E bain Gode miinobo genibta ne hen tebibbabe. Yeye ibo ne imen homono oyia downoniba matob buk geibso yo deib ota tliobe. <sup>27</sup> Ibo imeno klanamabo yo talo mo wabonibta hen haanimibe! Ibo inamin namino amit namabo ota henine! Olo imen motonobe. Ibo imen olo downoibo afen smike doboniba amit nomabiobe. Gode Abilim Da Tlemin Naka ne nemfakanea e okoko omnenea baatnenea Kobo amit nin imen olo oyene ge baatnenebiobo gesea <sup>28</sup> i baabaniba Gode inamin namin okoko naine gabeo ni fatnamin okok ota okok kebobta Gode ni seiyemabene? gesiba <sup>29</sup> Yesuse baabenea Gode okok ole inaminobe. Ibo Gode nemane tlibio naka ne bainobo getneib mole Gode ibo kla seiyemabebo ge baabesea <sup>30-31</sup> i baabaniba Sinanggwano nib faninwali ibuantem ye bianiba imeno niiniino manao unam binibbiobe. Gode buk temo weng mako baanoa Imeno abilim danao tlebua Mosese okayebea unam binibbiobo ge baanobio otane kobole dabalim imen ota oyebta downonobsobe. Kobo fatnamin okok sum ota klaneba ni watem tekein kenoba Gode titilo bain omkleta klanebobe genomabbione? gesiba <sup>32</sup> Yesuse baabenea Ne bain baabenamabibe, sinanggwano Mosese abilim imeno mo oyim blimobe. Ne Ay eta abilim imeno okayebeta unam binibbiobe. Eka mema olole e imen motone obabenea daak tlebiobe. Nakaia unangai imen ele obo wembibi i amit bliobe. <sup>33</sup> Niminbabe, Gode naka make dabanea abilim ut danea daak tebianea

nakaia unangai dabalim olo blibi afen smike dobkayebe naka eta Gode imenobo ge baabesea <sup>34</sup> i baabaniba Naka sum kobo am obba ye bomanomo bomanomo yo imen olota okayemale ge baabasiba <sup>35</sup> Yesuse baabenea Nakaia unangai dabalim olo blibi imena aayao downonib mole i matwayoa i ginino blim klayam nomabiobe. Nesa makob imenobe. Nakaia unangai wanita ne bainobo geib mole i afen smike doboniba klayam bianiba amit nomabiobe. Kukub olo makob i imen teba aan tebao mo yemabobabe. <sup>36</sup> Otane sino ne wengo ibo baabeibuo inaminobe. Sino ne naibio ibo natemibbu otane ibo ne mo bainobo ganebibbabe. <sup>37</sup> Ne Aye nakaia unangai dlakanea baanea I ne miine tenanine genebuei alukum teniba nesu tlaibo ne mo baabenita De unine ge baabenimibabe. <sup>38</sup> Niminbabe, ne abilimo deibonia daakenia dabalim ele tlibuo ne nene bobol tem funin ota namano genita tlibiobabe. Yeye ne tenia ne namane tlibio naka ele bobol tem funin ota namang genita tlibiobe. <sup>39</sup> Ne nemane tlibio nakae ele bobol tem funin ye baatnenea Ne nakaia unangai dlakania Ibo ne miine tenanine ge baabeibuei kobo i alukum kla kima bianeba i bainobo galino omsbal sanyebeba i bainobo galino mo deibonimibe! I bainobo galino sbalma wafu bliba mubiang amo dimo kobo i imin dohaaneba hananiba amit nine ge baatnenebiobe. <sup>40</sup> Ne Aye bobol tem funino inaminobe. E funanea Nakaia unangai alukum ne miine ateme bianiba e bainobo gabibi amit nomabiobo gabe i mubiang amo dimo ne imin dohaaia hananiba amit nomabiobo ge baabesebe.

<sup>41</sup> Yesuse baanea Imeno abilim ut danao tlobuo netabo ge baane kesoa Yudai wenteniba i sinwalo bolaba bianiba <sup>42</sup> baaniba Naka ele dabalim nakae Yosebe miine Yesuse etabe. Ni e ay esa biem osa tekein kebob otane e baanea Ne abilim da tlibiobo gabe yole e kukubo misiamobo gesiba <sup>43</sup> Yesuse baabenea Ibo ne weng ele baabei olo alo mo tliyebota weng heko mo omibe! <sup>44</sup> Naka mak unang maki ili bobol temo mo tenibta nesuo mo tlaibe! Ne Aye nemane tlibue emaye dlebseta tenibta nesuo tlibbiota sinanoa mubiang am bomanomo dimo ne imin dohaaia hananiba amit nine! <sup>45</sup> Sinanggwano Gode weng omkeimalin nakai Gode buk temo dolaibbuei make baanea Gode nakaia unangai alukum aleyemabebo ge baanebiobe. Gode nakaia unangai aleyebei i alukum e wengo wentaibo nesu tlomabiobe. <sup>46</sup> Dabalim nakai Aye Gode atenamini blimobe. God esu ut dania tlibio naka neta nenekiem Aye Gode ateme

binibiobe. <sup>47</sup> Ne bain baabenamabibe, nakaia unangai wanita ne bainobo getneib ile afen smike doboniba amit bliobe. <sup>48</sup> Nakaia unangai afen smike dobyamabo imen ole netabe. <sup>49</sup> Sinanggwano ib faninwali ibuantemo imeno niniino manao wembinibbu otane kulilafaibbiobe. <sup>50</sup> Otane imeno abilim ut danao daak tlobu olole nakaia unangai downaibo mo kaanomabibbabe. <sup>51</sup> Nakaia unangai afen smike dobyamabo imeno abilim da tlobu ole netabe. I imen olo downaibo amit nomabiobe. Imen olo ne diimobe. Nakaia unangai dabalim olo blibi imen olo oyia downaibo amit nomabiobo ge baabeseo weng olo mitmakam ole ele ananomabibo saa weng ota baabesebe.

<sup>52</sup> Yudai wenteniba atliaubesoa i sinwalo baase baase bianiba baaniba Naka ele fataneta e diimo nibo oyeta downomabione? gesiba <sup>53</sup> Yesuse funanea I ne nenaniba kaania nakaia unangai hengmino walubeia i ne bainobo getnenomabiobo ge fumbesoeso e saa weng mako enangge baabenea Ne bain baabenamabibe, ibo Abilim Da Tlemin Naka ne diim osa ilem osa mo doweim blim keib mole ib bobol tem daako afen smike mo bibe bieta amit nomabibbabe. <sup>54</sup> Nakaia unangai wanita ne diim osa eka ne ilem osa unalaibo afen smike dibibbua mubiang amo dimo ne imin dohaaia hananomabiobe. <sup>55</sup> Niminbabe, ne diim ole imen moton eka ne ilem ole aa moton nabe. <sup>56</sup> Nakaia unangai wanita ne diima ne ilemao unalib mole ile ne beketne bliba eka nele i bobol tem wato na blibe. <sup>57</sup> Ay Gode amit afen binabeta ne namane tlibiobe. Nesa e ulab kesoa amit blibe. Eka nakaia unangai wanita ne bainobo gabianiba ne diim osa ne ilem osa unam binimibi amit nomabiobe. <sup>58</sup> Ib faninwali imeno unam binibbuo imeno abilim da tlo olo ulabbabe. Imen olo unam binibbuei kulilafaibbiobe. Otane imeno abilim da tlo olole netabe. Nakaia unangai wanita imen olo unalaibi afen smike doboniba amit nomabiobo ge baabesebe. <sup>59</sup> Yesuse nakaia unangai hengmino temo blibo dotlanamabe wengo Kabaneam bib wato Gode am tam aleye monsebe.

*Yesuse bekeb homoni deiba onsiobe.*

<sup>60</sup> Yesuse e bekeb homoni maki weng olo wenteniba baaniba Weng olo mitmakamo bumolok kesoa ni mo wentomabbiobabo ge obiba <sup>61</sup> Yesuse i wengo mo wentim blim otane e i bobol temo tekein kenea baabenea Ibo weng olo wentibo ib bobol tem daako misiam omfubenoa Denomobobo gabiobe. <sup>62</sup> Abilim Da Tlemin Naka ne imin ulania nene bi tlibio unia natemib mole ibo funaniba E misiam nanebo genomabiba

bleka? <sup>63</sup> Nakaia unangai imalo afen smike mo dobonibta amit blibbabe. Gode Hob eta i afen smike dobye biota amit bliobe. Ne Gode Hobe inamin namin weng ele baabei olo ibo wentib mole afen smike doboniba amit nomabiobe. <sup>64-65</sup> Ina otane mak ibole weng olo mo bainobo gabibba kesoa o mitmakam ota ne sino baabenia Nakaia unangai ili bobol temo nesuo mo tlaibbabo, ne Aye emaye dlebseta tenibta nesuo tlaibobo ge baabeibiobo ge baabesebe. (Sino Yesuse sin tekein kenea Nakai elita ne mo bainobo getnenomabibbabo gena bianea eka Nakae eleta ne nemeb monea komokwali nemiamabebo ge nane biotabe.) <sup>66</sup> Yesuse bekeb homoni maki weng olo wenteniba amit ye deiba uniba <sup>67</sup> Yesuse e okok aleyemin naka 12 ni baabenea Ilsa Deiba unomo gabibo? gesea <sup>68</sup> Saimon Fitae baabanea Sum kobo ni deibkenomobo nakae wanesu unaobbabe. Klebkiem kleb wengo omkayebeb ota ni afen smike dobyua amit nomabiobe. <sup>69</sup> Ni tekein kebuobe, kobo naka kiningobe. God esu danebta tlebbiobo gabuobo gesea <sup>70</sup> Yesuse baabenea Ne ibo 12 dlakaibu otane mak ele Gululame meletanobo ge baabeseo <sup>71</sup> e funanea Ne okok aleyemin nakai 12 otane Saimon Iske liote miine Yudase nemeb monea komokwali nemiamabebo ge funane kesota weng olo baabesebe.

## 7

*Yesus esa e ningwal isa i wengobe.*

<sup>1</sup> Yesuse inabea blimanao e Yelusalem bibo deibonea monea Galili betano bib mak bib mako haamongsebe. E Yudia betano mo haanim blimobe. Niminbabe, Yuda komokwali baaniba Ananomabbiobo geib kesotabe. <sup>2</sup> O dimo Yudai um am temo aala bianiba singka binabib amo dikib tebio kesoa nakaia unangai homoni Yelusalem bib unomo geniba unebibtabe. (v5) Yesuse ningwali e okok sum sumo nabeo mitnakamo tobtlim bianiba i mo tekein kenibta E Gode Dofakamin Nakabo geim blim bianiba <sup>3</sup> baabaniba Kobo betan olo deiboneba moneba Yudia betan ye unaneba inamin namin okoko mo naneba keb bekebi wateniba Ayamobo geine! <sup>4</sup> Nakae funanea Nakaia unangai ne inamin namin okoko naia wateniba Ayamobo geine ge funaneme e ayoko mo nanemebabe. Keim ye nanamabebo. Keba inanebta keb okoko keim ye nabebta nakaia unangai alukum kateniba Ayamobo geine ge baabasiba <sup>5</sup> (-) <sup>6</sup> Yesuse baabenea Ne titilo nakaia unangai alebenamabio amo mo tlim blim bio kesoa ne mo unamabibabe. Otane i ibo mo makaa dlablibba kesoa ilib bobol temobe. Enamin dimo ota unomo genimibo unabiobe. <sup>7</sup> Ibole

nakaia unangai mo makaa dlanomabibbabe. Nele i kukub misiamo nabibo amitie omkeimaye binabi kesoa i ne klao mo gotne blibbabe. <sup>8</sup> Ibmaye moniba singkalin amo singkabib ye motemine! Ne onamin amo mo tlim blim bio kesoa ne memalo mo unamabibabo ge baabenea uniba <sup>9</sup> e Galili teman ye bisebe.

*Yesuse monea Yudai um amo singka binabib amo watemsebe.*

<sup>10</sup> Yesuse inange baasea e ningwali deibaniba moniba Yelusalem bibo Yudai um amo singka binabib amo watemnam uniba eka Yesus esak abuk motemsebe. E onse otane keimo mo unim blimobe. E ayok deib motemsebe. <sup>11</sup> Nakaia unangai Yelusalem bib ye mibianiba singka bianiba falo gamonsiobe. O dimo Yudai komokwali Yesuse hembianiba baaniba E fab biene? ge omsonsiobe. <sup>12</sup> Nakaia unangai ye miblibi i sinwalo ayok baase baase bianiba maki baaniba E naka ayamobo gesib eka maki baaniba E nakaia unangai dim oye binabebo gesib binibbu <sup>13</sup> otane i keimo mo omin blimobe. Niminbabe, i Yudai komokwali tolo tosiananiba ayok omsonsiobe.

<sup>14</sup> I inaniba falo gabianiba aalan metniba isak tem bebibta o dimo Yesuse tanea Gode am sumo daamo tem tam bianea aleyebea <sup>15</sup> Yudai komokwali ateniba e wengo wenteniba dlou unaniba baaniba Dowe! Naka ele Yuda nib hekmel wengo mo alebaim blim otane e fatnareta tekein kebene? gesiba <sup>16</sup> Yesuse baabenea Ne weng ele aleyebi olo nene wengbabe, ne nemane tlibio nakae God eta weng olo omkanebeta aleyebibe. <sup>17</sup> Nakaia unangai Gode wengo wente bianiba ele weng baaneme iwat nabib ile ne weng ele aleyebi olo tekein kebianiba funaniba Bainobe. E ele bobol temo ni mo oyebebabe. Gode bobol tem funin ota omkahabeta omoneta ni aleyebebo ge funomabiobe. <sup>18</sup> Nakaia unangai wanita i wengo ili bobol tem funin ota omkeimaib mole i funaniba Naka mak unang maki ni niniino dotouleb nine genibta nanomabiobe. Otane nakaia unangai dlane tlibbio nakae niniino dobtouleb blib ile naka molot unang molotobe. I bobol tem osa dim omin kukubo blimobe. <sup>19</sup> Mosese hekmel wengo ibo omyebu otane ib isak temo hekmel wengo wafunamin nakai blimobe. Hekmel wengo baanoa Ibo nakai mo yenaiba kaanimibe genobu otane ibo baaniba E Mosese hekmel wengo welanebio kesoa ananoba kaaneko gabioho ge baabesea <sup>20</sup> i baabaniba Nakai kobo kananamini blimobe. Kobo hob misiame bekebke bieta weng misiam obeobo ge baabasiba <sup>21</sup> Yesus esak baabenea Gode singkalin amo dimo ne nakae klaubaia

ayam ane kesoa ibo ateniba dlou unibbiobe. <sup>22-23</sup> Ibo Mosese hekmel wengo wafu bianiba makob ilib faninwali naniba aalo waketou binibbio inaniba ib meme isa waketouye binabiobe. Ibo Gode singkalin amo dimo memei aalo weketouye binabib olo okok otane ibo mo funanibta Olo Gode singkalin am kesoa memei aalo watlabenamin amo ye tlo otane deibenob sakabta bomasota wetlabenomo ge funa nabibbabe. Yeye ibo Gode singkalin amo dimo funaniba Mosese hekmel wengo lo baanobio iwat nanoba memei aalo wetlabenomo geniba waketouye binabibo osa okok kesoa ne naka ele Gode singkalin amo dimo klaubaia ayam aneo ibo mo nemsuanimibe! <sup>24</sup> Ibo nakae okoko nane-meo besa kino mo watenibta baanipta E okok olo misiamobo galaibe! Ibo e okoko mitmakamo tekein kenibta okoko ayam nanebe eka misiam nanebe genibta tekein keine ge baabesebe.

*I baaniba Naka ele Gode Dofakamin Nakabo gesiobe.*

<sup>25</sup> Yelusalem bib seli maki e wengo oboe wenteniba dlou unaniba baaniba Naka ele i Ananomo gabib otane <sup>26</sup> etemine! E nakaia unangai ayoko mo aleyebebabe. E keim ele aleyebebo, nakai e okoko wataniba tolobo genamin nakai blimobe. Nib komokwali funaniba E Gode Dofakamin Nakabo ge fumbib ese mak otane <sup>27</sup> e Gode Dofakamin Nakababe. Niminbabe, naka ele bib amo nibo tekein kebuobe. Gode Dofakamin Nakae tlamabeo e bib amo nakai tekein kenamini blimobo ge ohabiba <sup>28</sup> Yesuse Gode am sumo daamo tem tam bianea aleye bianea weng sum ngananea Ibo ne tekein kebianiba eka ne bib am osa tekein kebib otane ne nene bobol temo mo tlamibabe. Yeye weng moton omin naka eta nemane tlibiobe. Ibo e mo tekein kebibba <sup>29</sup> otane nele etena bianoba nemane tlibio kesoa e kla tekein kebibbo ge baabesea <sup>30</sup> Yudai komokwali wenteniba baaniba Afunoba klabuto ge debeb unomo geib otane i mo inaim blimobe. Niminbabe, e ananamin amo mo tlim blim kesoa deibasioobe. <sup>31</sup> Nakaia unangai homoni e bainobo geib kesoa i baaniba Gode Dofakamin Nakae tenea e okok sumo namabeo makob naka ele okok sumo nabe olo ulab anamabo kesoa ni funanoba Naka ele okok kebe ele Gode Dofakamin Nakabo gabuobo ge baasioobe.

*Yudai komokwali i okok nakai baabeniba Ibo moniba Yesuse klabuto ge debeb tline ge baabesioobe.*

<sup>32</sup> Felisiei nakaia unangai wengo Yesuse ohabibo wenteniba item Gode amo kimanin nakai komokwal ite naniba

baaniba Nibo naka maki mo dlanoba moniba Yesuse afuniba klabuto ge debeh tline geniba dlaiba onsiobe. <sup>33</sup> Yesuse nakaia unangai baabenea Ne ibo amito mo bekebenimibabo, memaloko ye mo bekebe tab unanita yota deibenita imin monia nakae ne nemane tibue esu unamabibe. <sup>34</sup> Inanimio ibo ne henomabib otane mo natemomabibbabe. Eka ne bib olo unamabi osa ibo mo unomabibbabo ge baasea <sup>35</sup> Yudai komokwali i sinwalo baaniba E fab uneta nibo henwa deibanomabbione? E monea nib atuei moniba Glikam ye blib isu unanea Glik teni aleyemang geneta obeso? <sup>36</sup> E baanea Ibo ne henomabib otane ne mo natemomabibbabo, eka ne bib olo unamabi osa ibo mo unomabibbabo gabe yole weng olo mitmakamo ni no tekein kebobbabo ge baasiobe.

*Afen smik aaye wengobe.*

<sup>37</sup> Yudai um amo singka binabib amo blimanamabo dimo dot singkalin am sum bomabua Yesuse hana manea amdofa ngambianea Nakaia unangai wanita aan tebo yebo mole teniba nesu tlaniba aaye doweine! <sup>38</sup> Ne aaye obiamabi ele weng sango Gode buk temo baanoa Nakaia unangai ne bainobo getneib mole afen smik aaye i bobol tem wato biki ut tlanea unemabebo genobiobo ge nganasebe. <sup>39</sup> Afen smik aaye Yesuse baabanebu ele Gode Hob etabe. Nakaia unangai Yesuse bainobo gabibi Hob ele i bobol temo te was unamabebe. Ina otane yo dimo Yesuse mo kaaneta Gode e titilo ayal inamin einobuo omanea debeh ulanea abilimo mo unim blim bie kesoa Gode e Hobe mo dabane tlim blim bietabe.

*Nakaia unangai Yesuse wengo teka bianiba baase baase monsiobe.*

<sup>40</sup> Naka homon unang homoni Yesuse weng olo wenteniba maki baaniba Moton Gode weng omkeimalin nakae Mosese ulabe tlamabea ni waisa binabob etabo gesiba <sup>41</sup> eka maki baaniba Gode Dofakamin Naka etabo gesib eka maki baaniba Yeye Gode Dofakamin Nakae Galili betan dao mo tlamebabe. <sup>42</sup> Gode buk temo baanoa Gode Dofakamin Nakae Debite molofeite Debite bibo Betlehem bib ye dofanomabiobo ge baanobiobo gesib bianiba <sup>43</sup> i bobol temo afet afet funmonsiobe. <sup>44</sup> I ina bianiba maki baaniba Nibo afunoba klabuto ge debeh unomo geib otane i mo afuniba ge debeh unim blimobe.

*Yudai komokwali Yesuse mo bainobo geim blimobe.*

<sup>45</sup> Omito naka eli imin moniba Gode amo kimanin nakai komokwal isa Felisie isa isu ye motemiba i baabeniba Ibo ninin

kenibta e debeh tenamino deiba tibe? gesiba <sup>46</sup> naka eli baabeniba E weng olo ayamobe. Sino nakai inamin wengo mo obinabibbabo gesiba <sup>47</sup> eka Felisie isak baabeniba Ibo e dim omin weng olo mo wentaibe! <sup>48</sup> Komokwal isa eka Felisie nisa ni sinwalo e mo bainobo gabobbabe. <sup>49</sup> Nakaia unangai Mosese hekmel wengo mo tekein kebibba kesoa i Yesuse wengo wentebiobe. Gode i dlanea moniba aseinin bib unomabiobo gesiba <sup>50</sup> Felisi make, e niniino Nikodimase, sino e kwitimib monea Yesus esu unebio nakae baabenea <sup>51</sup> Nib hekmel wengo baanoa Nakai besao mo dleb mo daibta klabut animibe! Mikiktemo i wengo wenteniba temiba hekmel wengo waibbiobe genibta dleb mo daibta klabut aine genobio kesoa mikiktemo nibo Yesuse wengo wentenoba e inamin namin misiamo nanebiobe genobte gesea <sup>52</sup> i baabaniba Keba makob e ulab tobtlinin gam kobo Galili da tlebbua? Keb weng olo makob tobtlinin gam ele wengo ulabobe. Gode buk temo baanoa Gode weng omkeimalin nakai Galili da tenamini blimobo genobiobo, kobo Gode weng buko kineba tekein kenale ge baabasiobe.

*Taman unango weng sangobe.*

<sup>53</sup> [Omito nakaia unangai alukum di moniba ili am onon tlaniba

**8**

<sup>1</sup> eka Yesus ele amgolime Olibe golim ut une sonoma <sup>2</sup> boman tebuwa kwitimib monea Gode am sumo daamo tem tam teme nakaia unangai homoni teniba ge dabasiba e toumbianea aleye monsebe. <sup>3</sup> Hekmel weng aleyemin naka isa eka Felisie isa i unang mako tamano hengasoa wateniba omeb teniba nakaia unangai kin dim ye omfaniba <sup>4</sup> Yesuse baabaniba Aleyemin naka kobo unang olo tamano henganoa ni watemobobe. <sup>5</sup> Mosese hekmel wengo baanoa Tamano henganimib ye ile tom dum inaine genobuo kobo fannange fumbebe? ge baabasiobe. <sup>6</sup> I inasibo i funaniba Nibo Yesuse naatemoba e wengo misiam yang kebene mole atenoba kot kebanomo genibta inai otane Yesuse gabam delabma toumbianea kweil milib milibe tobonea dabalim daak dolabea <sup>7</sup> i amit ye kil ohamonsiba e gabam ofanea baabenea Ib isak temo nakae waneta hengmino blim bie mole eta mikiktemo tome obonea maweseta eka mak ibole abuk olonibta sawem tenibta wanaine ge baabene <sup>8</sup> e imin gabam delab manea dabalim daake imin dolamea <sup>9</sup> i wenteniba i bobol temo alukum funaniba Ni hengmino blimbabo ge funa tlaib kesoa sin heke sin ye unea eka nekel isa inaniba elekiem ke onon tlaniba Yesus esa eka unang olosa ilikiem

deibe uniba <sup>10</sup> Yesuse gabam ofanea temeana unango olokiem mabio kesoa baabonea I fab blibe? Nakai obo kananamin nakai blimo? gesea <sup>11</sup> o baabanoa Naka sum kobo nakai alukum dli uniobo gesoa e baabonea Nesa obo mo kananimbabe. Obo unaebo imino mo hengamebe ge baabonea omanea onso].

*Yesuse ele dabalim olo ayalobe.*

<sup>12</sup> Yesuse nakaia unangai ye miblib yei imin baabenea Nakaia unangai dabalim olo blib ile kukub ayamo mo wafu blibba kesoa i mililambio tem tab bliobe. Ne dabalim olo ayalobe. Nakaia unangai ne kukubo wafueib mole i mililambio temo mo nomabibbabo ge baabesea <sup>13</sup> Felisie i maki ye blibi baabaniba Kobo kleb kukub nabebo weng ota omkeimabeb kesoa ni keb weng olo mo wentubkenobta bainobo genomobbabo gesiba <sup>14</sup> Yesuse baabeneana Ne nene kukubo nabio wengo nemaye omkeimabi mole ne weng olo bainobe. Niminbabe, ne bibo biana tlibu osa eka ne bib olo unamabi osa ne tekein kebibe. Otane ibole ne bib olo biana tlibu olosa eka sinanomo bib olo unamabi osa ibo mo tekein kebibbabe. <sup>15</sup> Ibo dabalim nakai bobol tem funin ota wafu bianiba nakaia unangai kukubo nabio moton sanyebib otane nele dabalim ele blio dimo ne nakaia unangai kukubo mo moton sanyebibabe. <sup>16</sup> Ne i kukubo mo moton sanyebiba otane ne inanang gamio molot nanamabibe. Niminbabe, ne nenekiemo mo bliababe. Ne Aye nemane tlibue tena biob kesoa dum kenoba nakai kukubo moto manomabbio. <sup>17</sup> Ib hekmel wengo baanoa Nakai asu bianiba inamin namino waterniba i wengo makob baaib mole i wengo motonobo genobiobe. <sup>18</sup> Ne nene kukubo nabio wengo nemaye omkeimabia eka ne Aye nemane tlibu esa ne kukubo nabio wengo omkeimabebe. Ni dumo weng olo obob otane ibo mo bainobo gabibbabo ge baabesea <sup>19</sup> i baabaniba Keb Aye fab biene? gesiba Yesuse baabeneana Ibo ne mo tekein kebibba kesoa ne Ay esa mo tekein kebibbabe. Ibo ne tekein keib mole ne Ay esa tekein kenomabiobo ge baabesebe. <sup>20</sup> Yesuse weng olo alaye monseo Gode heitdaha bianiba monio toubinabibo o biino tem tam bianeta aleyebe otane nakai e mo afunibta klabuto ge debeb unim blimobe. Niminbabe, e anamin amo mo tlim blim bio kesoa debasiobe.

*Yesuse baanea Ne bibo unamabio ibo mo unomabibbabo gesebe.*

<sup>21</sup> Yesuse imin baabeneana Ne unamio ibo henomabib otane mo natemomabibbabe. Eka ne bibo unamabi osa ibo

mo unomabibbabe. Ibo hengminsa kaanomabiobo ge baabesea <sup>22</sup> Yudai komokwali baaniba E baanea Ne bibo unamabio ibo mo unomabibbabo gabe yole emaye ele skilanea kaanang geneta obeso? gesiba <sup>23-24</sup> Yesuse baabeneana Ne baania Ibo hengminsa kaanomabiobo ge baabei yole nimbababe, ibole kila ele ninobe. Otane nele abilim ewit ninobe. Eka ibole dabalim olo selobe. Nele dabalim olo sakbabe. Eka ne baabeniana Gode nemane tlibiobo genimio ne weng olo ibo mo bainobo geim blim keib mole ibo hengminsa kaanomabiobo ge baabesea <sup>25</sup> i baabaniba Kobo wankebt? gesiba Yesuse baabeneana Ne sin osa memalosa oye biana Gode nemane tlibiobo ge oyebibe. <sup>26</sup> Ne wengo homonobe. Ibo inamin namin homono nabinabibo ne misiamobo genamabi otane ne mo inang genimibabe. Ina otane ne nemane tlibio nakae weng moton onebea nakaia unangai dabalim ele blibi ne weng olo omkaye binabibo ge baabesebe.

<sup>27</sup> I mo tekein keniba e ele Aye weng sang ota oyebebe geim blim keib kesoa <sup>28</sup> Yesuse baabeneana Sinanoa ibo Abilim Da Tlemin Naka ne nemeb moniba atdimonemasa nananimib o dim ota ibo tekein keniba Gode e dofakanea dabanea tlebiobo, e okoko ele bobol tem funino mo nabebabo, e Aye alebanebu weng ota omkaye binabebo genomabiobe. <sup>29</sup> Eka ne Aye ne nemane tlibue e mo deitnememebabe. Ete nete na biobobe. Niminbabe, ne e okoko kla okok kebi kesoa e seinebebo ge baabesea <sup>30</sup> naka homon unang homoni Yesuse weng olo wenteniba bainobo gesiobe.

*Ibo Yesuse mo bainobo geim blim kenim-ibo hengmino ibo kimanamabobe.*

<sup>31</sup> Yesuse Yudai e bainobo geibbuei baabeneana Ibo ne wengo aleyebi olo wente binabib biota mole ibo ne naka unang motonobe. <sup>32</sup> Ibo inabib mole moton wengo mitmakamo tekein kenomabib kesoa ota ibo hengmino tileisobe namabobo ge baabesea <sup>33</sup> i baabaniba Ni Eblahame molobselobe. Inamin namino ni mo ge dlanobiobe. Kobo nimin kenebta Moton wengo tileisobe namabobo ge oyebebe? gesiba <sup>34</sup> Yesuse baabeneana Ne bain baabenamabibe, nakaia unangai hengmino henga binabib ile hengmino ge dlanobiobe. <sup>35</sup> Eka nakaia unangai hengmino ge dlanobi eli i Gode mo tenanibta amit nomabibbabe. Ina otane e miin neta ete nanobta amit namabibe. <sup>36</sup> Inamin kesoa Gode miin ne ibo hengmino tileisonang gamio kla tileisobenia hengmino imino mo ge dlanomobabe. <sup>37</sup> Ne tekein kebibe, ibo Eblahame molobsel otane ibo ne wengo aleyebio ibo

bobol temo mo was uneyeboba kesoa ibo ne nananom genabiobe. <sup>38</sup> Ne weng ele aleyebi olo ne Aye emaye aletnenebiota ibo omkayebi otane ibo weng olo wentenamino deiboniba ib aye wengo baabene-eme ota nabioo gesea <sup>39</sup> Yudai komokwali baabaniba Ni aye Eblaham etabo gesiba Yesuse baabenea Ibo Eblahame meme bi-aibo ele okok nabinebio inamomabiobe. <sup>40</sup> Ne moton wengo ibo omkayebio alukum ne Aye omkanebe ota ibo omkayebi otane ibo ne nananom genabiobe. Eblahame kukub olo mo namin blimobe. <sup>41</sup> Ibo ilib aye kukub ota wafu bliobe. Eblahame ib aybabe. Ib aalebe afetobo gesea i baabaniba Ni taman memebabe. Ni Aye elekiem God etabo gesiba <sup>42</sup> Yesuse baabenea Ne God esu dania tenia ele bli olo ne nene bobol temo mo tlim blimobe. Ne Aye emaye nemane tlibiobe. Gode bain ib Ay biameo ibo ne gotnenomabib otane ibo ne mo gotne blibba kesoa e ib Aybabe. <sup>43</sup> Ibo ne wengo mitmakamo tekein kebibbabe. Niminbabe, ibo kweimiki E wengo mo wentaobbabo geniba ombidinebiobe. <sup>44</sup> Ibo Gululame memebe. Ib aye baanea Ibo inamin namin okoko naine geneme ota ibo nabinabiobe. Gode dabale mema klane dim ye Gululame naka yemin kukub osa dim omin kukub osa kilonebua wafu binabebe. Niminbabe, e bobol temo bain wengo blimobe. Dim omin kukubo e wengobe. E dim omin naka kesoa e dim omin kukubo ayobe. <sup>45</sup> Ne bain wengo oye binabi otane ibo ne wengo mo bainobo gabibbabe. Niminbabe, ne ib hengmino omkeimayebi kesotabe. <sup>46</sup> Naka make ne baatnenea E henganebo genamino blimobe. Ne bain wengo oye binabi otane ibo ne wengo mo bainobo geim blimobe. <sup>47</sup> Gode meletani e wengo wente binabib otane ibo e meletanba kesoa ibo e wengo wentebibbabo ge baabesebe.

*Eblahame mo dofaim blim o dimo Yesuse binebiobe.*

<sup>48</sup> Yudai komokwali Yesuse weng olo wenteniba inamin wengo deibenebabo ge funaib kesoa isak baabaniba Kobo Samelia naka tobtlinin gam kebtabe. Hob misiamne bain kobo bekebe biebo gesiba <sup>49</sup> Yesuse baabenea Ne hob misiamne mo beketne nim blimobe. Ne Aye baabaniba Keb kukubo ayamobo gabi otane ibo ne baatneniba Keb kukubo misiamobo gabiobe. <sup>50</sup> Ina otane ne nene niniino mo omfufubibabe. Gode funanea I ne miine niniino omfufuhamine gabe kesoa nakaia unangai mo inabibbai e i kukubo moton sanyebebe. <sup>51</sup> Ne bain baabenamabibe, nakaia unangai ne wengo wentebib ile mo kaanimibbabo ge baabesea <sup>52</sup> Yudai komokwali baabaniba

Eblaham esa Gode weng omkeimalin naka isa Gode wengo kla wente biniba i kulilai-bio otane kobo baaneba Nakaia unangai ne wengo wentebib ile mo kaanimibbabo gabeb yole hob misiamne bekebe bieta obeobe. <sup>53</sup> Nib fanine Eblaham esa Gode weng omkeimalin naka isa kulilai-biobe. Kobo fumbabo Ne i komokobo gabebo? gesiba <sup>54</sup> Yesuse baabenea Ne nene niniino omfufubi mole olo besabe. Ne Aye God eta ne niniino omfufunebebe. Ibo baaniba E ni Sumobo gabib otane <sup>55</sup> ibo e mo tekein kebibbabe. Neta e tekein kebiobe. Ne baania Ne e mo tekein kebibabo gei mole ne makob ibo nabinabib inania dim baanamabibe. Otane ne e tekein kebiania e wengo wente biam bliobe. <sup>56</sup> Sinanggwano ib fanine Eblahame ne dabalim ele tlamabio wengo wentenea seimbinebua eka ne dabalim ele tlia nateme osa seimbinebiobe. E am olo waternea bobol ayam fumbinebiobo ge baabesea <sup>57</sup> Yudai komokwali baabaniba Keb bifolo 50 o mo blimubkeim blim bu otane kobo Eblahame atemebbuo? gesiba <sup>58</sup> Yesuse baabenea Ne ibo moton baabenamabibe, sinanggwano Eblahame awoko mo dofanim blim buo dimo ne binibiobo gesea <sup>59</sup> i wenteniba funaniba E wengo inang gene yo mitmakamo makob Ne Gode ulabobo genebo geniba ananom geniba tomo bokaan haa-siba Yesuse ayok denea Gode am sumo deibo onsebe.

## 9

*Naka make kino tum gebanobua Yesuse klaubasebe.*

<sup>1</sup> Am mak bomanoa Yesuse bebianea temea naka make awoko mema dofanoa gongam tem da ye e kino tum gebanobua bia atemnabea <sup>2</sup> e okok aleyemin naka ni baabanoba Aleyemin naka kobo naka ele awoko gongam tem da ye dofana-bua e kino tum gebanobio yole wani hengmin ota e kin olo gebanobione? Ele hengmin ota bleka aaleb kamwali hengmin otaso? gesoba <sup>3</sup> Yesuse baabenea Ele hengmin osa e aaleb kamwali hengmin osa e kino tumo mo gebaim blimobe. E kino tum gebanobu olo mitmakam ole inaminobe. Gode e titilo nakaia unangai alebenamabe kesota e kin olo tum gebanobiobe. <sup>4</sup> Nakaia unangai okoko tab dim okok kebiobe. I kwinomo dimo mo okok kemibbabe. Nibsa inanoba afen biob dim ele ye ne nemane tlibue Gode okoko okok kemomo! Mililanamino tlamu nibo Gode okoko mo okok kemomabbibabe. <sup>5</sup> Ne dabalim olo blio dabalim sel nakaia unangai ayalobo ge baabenea <sup>6</sup> e mimae tabiane daaknea dabalim daak onsea dabal yeb baka afu bikilanea beitalosea oleb utnea e

kino alibanea<sup>7</sup> baabanea Daakneba Siloam aamuke fubanale gesea daakneba fubanea kino webiabanoa tetemsebe. (Siloam olo mitmakamo makob dabanea unebiobe.)<sup>8</sup> E inabasea nakaia unangai ele bibam sel isa eka naka mak unang maki sino e moni wengo ngenyebea ateme binabis isa ateniba i sinwalo baase baase bianiba maki baaniba Naka ele toubianea moni wengo ngemba ateme binabob etaso? gesiba<sup>9</sup> maki baaniba Ae etabo gesiba eka maki baaniba Yeye ekobbabo, naka make e ulab binabebo gesib namsiba naka ele emaye baanea Banetabo gesea<sup>10</sup> i baabaniba Keb kino fatnanebta webiabkenone? gesiba<sup>11</sup> e baabenea Nakae niniino Yesus eta mimae tabiane daakneba dabalim daak onsea dabal baka tubu bikila oleb ut tenea ne kino alitnenea baatnenea Daakneba Siloam aamuke fubanale gesea ne daaknia fubaita ne kino hebamsab webiatnnota temibo gesea<sup>12</sup> i baabaniba E fab niene? gesiba e baabenea Ne mo tekein kebibabo ge baabesea<sup>13</sup> i naka ele debeb moniba Felisie iso onsiobe.

<sup>14</sup> Yesuse mimae tabiane daakneba dabalim daak onsea dabal baka tubu bikila oleb ut tenea naka ele kino alibanea klaubaseo dimo Gode singkalin am bomabiotabe. <sup>15</sup> E inabane kesoa Felisie naka ele baabaniba Fatnasebta keb kino webiab kenone? gesiba e baabenea E dabal beite halonea ne kino alitnenea aaye fubaita ne kino webiatnenobo gesea<sup>16</sup> Felisi maki baaniba Naka ele Gode singkalin amo hekmel wengo welane kesoa e God esuo mo bianeta tlim blimobo gesib eka maki baaniba Nakae hengminsa biameo e inamin okoko mo klanemebabo gesib biniba belalanaib<sup>17</sup> kesoa Felisie naka ele imin baabaniba Keb kino klaubkene naka ele kobo fatnamin nakabo gabebe? gesiba e baabenea E Gode weng omkeimalin nakabo ge baabesebe.

<sup>18</sup> Sino naka ele kino tum gebanobua webiabanoa temebe otane Yudai komokwali sino naka ele mo ateme binibbioba kesoa i mo funanibta Bainobo naka ele kino tum gebanobiota memalo webiabanoa temebebo geim blimobe. I e aaleb kamwali nganabeiba tesiba<sup>19</sup> baabeniba Naka ele ib miino? Ibo baaniba Naka ele awoko mema dobmikinabua gongam tem da ye e kino tum gebanobiobo gabib otane e fatnaneta e kino webiabanoa? gesiba<sup>20</sup> aaleb kamwali baabeniba Ae ele ni miinobe. E awoko mema ye dofanabua e kino gongam tem da ye tum gebanobiobe. Ni olo tekein kebob<sup>21</sup> otane ni mo tekein kenobta e kino fatnaseta webiabanoa? geim blimobe. Eka e kino webiabanoa osa ni mo tekein kenobta

nakae waneta e kino klaubanebe geim blim nabe. E aaleb beselib kesoa emaye baababta baabeneko ge baabesiobe.<sup>22</sup> E aaleb kamwali inangge baasibo niminbabe sino Yudai komokwali baaniba Nakaia unangai wanita baaniba Yesuse Gode Dofakamin Nakabo geib mole i Gode am tamo fotebenomabbio bo geibbio<sup>23</sup> kesoa i Yudai komokwali tolo tosonianibta weng olo baaniba E aaleb beselib kesoa Ne mo tekein baabaine ge baasiobe.<sup>24</sup> Felisie naka ele imin nganabaib tesa baabaniba Ni tekein kebuobe Yesus ele hengmin gam kesoa kobo e niniino mo dobtouleb bianebta baanebta Yesus eta klautnenebo gene-mebe! Kobo Gode niniin ota dobtouleb bianeba baaneba God eta klautnenebo genale gesiba<sup>25</sup> e baabenea Ne mo tekein kenita naka ele hengminsabe gabibabe. Ne kukub olo tekein kebio sino ne kino tum getnenobu otane memalo webiatnenoa tememi olota ne tekein kebibbo ge baabesea<sup>26</sup> i imin baabaniba E dot fatnabkeneta keb kino webiabkenone? gesiba<sup>27</sup> e baabenea Ne sino baabei otane ibo mo wentim blimobe. Fatnanibta ibo Imin baabenale ge onebibe? Ibsa e okok aleyemin naka nom genibtio? gesea<sup>28</sup> i wenteniba atliaubesoa dobsuananiba Kebta e okok aleyemin nakabo, nile Mosese okok aleyemin nakabe.<sup>29</sup> Ni tekein kebuobe, God eta Mosese wengo omalebu otane naka elele titilo fatda omoneta okok kebene? Ni e titil olo mo tekein kebobbabo gesiba<sup>30</sup> naka ele baabenea Baina? Ibo olo mo tekein kebibbayo? E ne kino klautnene otane ibo baaniba E titilo fatda omoneta okok kebene? gabiobe.<sup>31</sup> Nibo tekein kebuobe, Gode nakaia unangai hengmin-sai wengo mo wentebeba otane nakaia unangai kukub moloto wafu blib isa eka Gode baanea Inamin namino naine gene-meo ele weng baaneme iwat nabib isa i weng ole Gode wentebebe.<sup>32</sup> Sinanggwano Gode dabale mema klanebu dim osa eka memale biob dim olosa i mo baaniba Nakae awoko gongam tem da ye dofanoa kino tum gebanobiota naka make teneta klaubaneta webiabanoobiobo ge baaibta nibo wenten-abobbabe.<sup>33</sup> Naka ele God esu dao mo tlim blim biameo e inamin okoko mo nanemebabo ge baabesea<sup>34</sup> i baabaniba Kobole hengmin kukub ota keb biemo kema-fanobua hengmin gam ye bieeb kesoa naka ayam ni mo aleyemebe ge baabaniba i Gode am tamo fotebesiobe.

*Nakai baaniba Ni hengmino blimobo gabibi makob nakai kino tum gebanobuei ulabobe.*

<sup>35</sup> Yesuse wentea i baaniba Yudai komokwali kino tum gebanobua webiabano



nakae Gode am tamo fotebeibobo ge baasiana wentem bianea hen monea hetananea baabanea Kobo Abilim Da Tlemin Nakae bainobo gabebo? gesea <sup>36</sup> e baabanea Naka sum kobo e wanetane? Kobo baatnesebta ne e bainobo ge baanano gesea <sup>37</sup> Yesuse baabanea Kobo natemebobo, wengo okebi naka netabo ge baabasea <sup>38</sup> naka ele Yesu esu ye dlong dlong golbu daak touna baabanea Sum kobo ne bainobo gebkeiobo gesea <sup>39</sup> Yesuse baabanea Ne tenia dabalim olo tlibu ole nakaia unangai afeta tlania maki hengminsa bianiba i Gode mo tekein kebibbai daabeia i bobol temo ne omneniba bainobo geniba makob nakai kino tum gebenobua webiabenoa tememomabib inaiba eka nakaia unangai maki obianiba Ni Gode inamin namino kla watem tekein kebuobo gabib otane i e kukubo mo wafu blibba ile makob nakaia unangai kino tum gebenobuei ulab aniba I Gode mo tekein kenaim blim keine genita daak tlibiobo gesea <sup>40</sup> Felisi maki ye baka bianiba wenteniba baabaniba Kobo inangge obeb yole nisa kino gebenobuei ulabobo ge oyebebo? gesiba <sup>41</sup> Yesuse baabanea Ibo kino tum gebenobua baaniba Ni Gode mo tekein kebobabo geib mole Gode mo baabeneta Ibo hengmin gamobo ge baabenamabeba otane ibo baaniba Ni Gode inamin namino kla watem tekein kebuobo gabib kesoa Gode ib hengmino mo ommlabenamabebabe. Ibo amit hengminsa ye nomabiobo ge baabesebe.

## 10

### *Eil sibsibi daamo saa wengobe.*

<sup>1</sup> Yesuse baanea Ne ibo moton baabenamabibe, ayok henin nakai eil sibsibi daam temo daak unom gaibo i amit tem teo deiboniba daam dim tla daba ulaniba golbia daak unaniba inamin namino ayok oleb unomabiobe. <sup>2</sup> Otane eil sibsib kimanin naka ele amit tem te tam unamabebe. <sup>3</sup> E moton amit deib motemea amisalo kima bie nakae betelabaneta tanea ele eil sibsibi niniino nganabenea i e wengo wenteniba bekebaniba dleb tam bib tam unanea <sup>4</sup> nganabe nganabe haanemeo i e wengo kla wentebib kesoa dobsileb haabinabiobe. <sup>5</sup> I naka afete mo bekeba unaiabbabe. I deibaniba skila unomabiobe. Niminbabe, e wengo afet kesoa i e tolo tosiananiba deiba unomabiobo ge baabesebe. <sup>6</sup> Yesuse saa weng olo Yudai komokwali baabene otane i o mitmakamo mo tekein keim blimobe.

*Yesuse eil sibsib kimanin naka ayamobe.*

<sup>7</sup> I saa weng olo mitmakamo mo tekein keim blim kesoa Yesuse Yudai komokwali imin baabenea Ne moton baabenamabibe, neta amit dikin kesoa eil sibsibi ne tem te tam tlebiobe. <sup>8</sup> Nele memale tlibe, sino nakai elekiem elekiem teniba ibo oye bianiba Ne Gode Nemfakamin Nakabo ge oye binibbio ye ile alukum makob ayok henin nakai ulabobe. Ayok deib teniba nakaia unangai ne bainobo gabibo watwat dabenom genibta tlibbio kesoa ne eil sibsibi i wengo mo wentim blimobe. <sup>9</sup> Makob eil sibsibi naniba taniba daam tem tam daniba imin tam te bib olo tetano downoniba imin taniba daam tem tam da bianiba amit tem te tama tlabinabib inaniba nakaia unanga isa ne tem te tam tlib mole ne i hengmino temo biaibo dotlania kla kimanamabibe. <sup>10</sup> Ayok henin naka ile besao mo tlaibbabe. I teniba inamin namino ayok dleb une bianiba eka naka isa eil sibsib isa yebianiba eka inamin namino watwat dabianom genibta tlomabiobe. Nele tenia nakaia unangai daabenia afen smike dobia i seimbianiba amit nine genita tlibiobe. <sup>11</sup> Ne eil sibsib kimanin naka ayamobe. Eil sibsib kimanin naka ayame e eil sibsibi bobolo fumble kesoa e kaanamino tolo mo tosiambebabe. E funanea Nemaye kaania ne eil sibsibi daabenano gabe inania nesa ne nakaia unangai bobolo fumbibe. <sup>12-13</sup> Nakae funanea Ne eil sibsibi mo kima biania monio bokamano ge funaneme naka ele klao mo kimanamabebabe. E eil sibsibi gosakba kesoa satili tlaibo e eil sibsibi mo dohalilanteta satili kulilane unaiabbabe. E besa moni okok kebe kesoa ilan unanea deibe unea satili teniba eil sibsibi kan haabliba skila onon tlanomabiobe. <sup>14-15</sup> Ne eil sibsib kimanin naka ayamobe. Ay Gode ne tekein kebea eka nesak e tekein kebiam blibe. Inamin kesoa nesa ne eil sibsibi tekein kebia eka isak ne tekein kebiam bliobe. Ne i bobolo fumbi kesoa ne kaanamino tolo mo tosiambibabe. Ne funania Nemaye kaania ne eil sibsibi daabenano gabibe. <sup>16</sup> Ne eil sibsibi maki daam olo temo mo blibba kesoa ne monia isu unania nganabeia i ne wengo wenteniba tliba dleb tenia dolminia alukum nemaye kimanamabibe. <sup>17</sup> Ne Aye kla gotne bie yo niminbabe, ne nene eil sibsibi bobolo fumbiane ne kaanamino tolo mo tosiambiba kesota e gotne biebe. Ne funania Nemaye kaania ne eil sibsibi daabenano gabibe. Ne inania kaanimio imin hananamabibe. <sup>18</sup> Naka maki ne nenanamini blim otane nemaye funania Ne kaanano gei mole ne deibeia nenaiba kaanamabibe. Niminbabe, ne kaanamin osa imin hananamamin osa o titilsabe. Ne Aye nemfakanea baatnenea Kobo okok olo

inanale ge baatnenebiobo ge baabesebe. <sup>19</sup> E inangge baabesea Yudai komokwali wenteniba i sinwalo baase baase bianiba <sup>20</sup> homoni baaniba E hob misiame bekeba bieta weng misim misiam biebo, ibo e wengo mo wentemibe gesib <sup>21</sup> eka maki baaniba Hob misiame bekeba biameo e inamin wengo mo omebabe, naka ele sino nakae kino tum gebanobuo klauba nanebiobe. Nakae hob misiame bekeba biameo e nakai kino tum gebeno biamo mo inaneta klaubenemebabo gesib monsiobe.

*Yudai komokwali Yesuse mo bainobo gebaim blimobe.*

<sup>22</sup> Sinanggwano wasi nakai te bianiba Gode am sumo tem tamo inamin namino watwat dabiba Yudai faninwali teniba fotebeiba uniba i Gode am sumo tem tamo imin lotu kebinibbo kesoa bifol amo dimo Yudai olo bobolo fumbianiba Yelusalem bibo singkamom gaibo dimo gil obba sume tenea yebinabebe. Memalosa imin inaniba singkabiba <sup>23</sup> o dimo Yesuse Gode am sumo tem tamo Solomone basalo dim tla bebea <sup>24</sup> Yudai komokwali maki teniba ge dabaniba baabaniba Kobo fatnamin dim ota keb wengo ni keim baabenamabebe? Kobo Gode Dofakamin Naka kebta biaebo ni moton baabenale gesiba <sup>25</sup> Yesuse baabenea Ne sino baabeibu otane ibo mo bainobo geim blimobe. Aye titil ota ne inamin namin okoko nabia o ibo aleye bianoa E Gode miinobo gabo <sup>26</sup> otane ibo ne mo bainobo gabibbabe. Niminbabe, ibo ne eil sibsibba kesoa ibo ne wengo mo wentebibbabe. <sup>27</sup> Eil sibsib ile amitie i kimanin nakae wengo wente bianiba kla bekeba haabinabiobe. Ne meletan isa inaniba ne wengo kla wentebiba eka nesa i kla tekein kebiam blia i ne beketne haabinabiobe. <sup>28</sup> I mo kaanibta alang namanimibbabe. I afen smike amit nine doboniba amit nomabiobe. I ne beketne blib kesoa nakai i yafu doitnenaminamo blimobe. <sup>29</sup> Nakaia unanga eli Aye nemi donebua e i kla kima bie kesoa nakai i yafu doisanamino blimobe. Niminbabe, ne Aye titilo nakaia unangai titilo gaisonebiobe. <sup>30</sup> Nesa ne Ay esa ni dumo makob elekiemobo ge baabesea <sup>31</sup> Yudai komokwali wenteniba atliaubesoa imin Tomo olo bina ananoba kaaneko geniba tomo bokaan haasiba <sup>32</sup> Yesuse baabenea Ne Aye okok homon ayamo alebeibu fatnamin okok o dafa ota ibo tomo olo bina nananom genibte? gesea <sup>33</sup> Yudai komokwali baabaniba Ni keb okok ayamo nabeb o dafa ota kananomobbabe. Kobo Gode weng dobo weng ohabeb o dafa ota ni tomo olo bina kananom genobtabe. Kobo dabalim

naka otane kobo funaneba Ne Gode ulabobo gabe yotabo gesiba <sup>34</sup> Yesuse i baabeneba Sinanggwano nakai bianiba Gode wengo wente binibbuei i weng sango ib hekmel wengo baanoa Gode i baabeneba Ibo ne ulabobo ge baabenebiobo genobiobe. <sup>35-36</sup> Gode ne nemfakanebua ne daakenia dabalim ele biania baania Ne Gode miinobo gabio ibo one bianiba Kobo Gode weng dobo weng ohabebo ge onebiobe. Gode wengo dim omino blimobe. O baino olobbio. O baanoa Dabalim naka eli Gode ulabobo genobio kesoa ne baania Ne Gode miinobo genimio ibo ne mo baatenibta Kobo Gode weng dobo weng ohabebo ge onemibe! <sup>37</sup> Ne Aye Gode okoko mo okok kemin blim kei mole ibo ne mo bainobo getnenimibe! <sup>38</sup> Otane ne e okoko okok kebo ibo mo bainobo geim blim keib mole ne okok sumo nabi ota watennibta Bainobe, e Ay etem na bliobe geine ge baabesebe.

<sup>39</sup> I e wengo wenteniba imin funaniba Afunoba klubuto genomu gesib otane e dala unea deibasio. <sup>40</sup> Yesuse imin monea aaye Yodane yalanea monea sino Yone aa fuayemin nakae bianea aayo fuaye binebio bib ye bia <sup>41</sup> nakaia unangai homoni teniba esu ye tlaniba i sinwalo obianiba Yone okok sumo mo naim blim otane e naka ele weng sango moton baabenebiobo geniba <sup>42</sup> naka homon unang homoni Yesuse bainobo gebasio.

## 11

*Lasalase kaanebuo weng otabe.*

<sup>1</sup> Betani bib sak make, niniino Lasalase, gembisebe. Betani bibo Malia osa eka o eno Mata osa i dab i bibobe. <sup>2</sup> Malia olo wel aaye tang kunin ayame obonoo Yesuse skilono ibabanoo olo gabamano olonoo wel gamo glitubanamabo unang otabe. O heke Lasalase gembe <sup>3</sup> kesoa e nengwali Yesuse weng omfubaniba baabaniba Sum kobo keb neke kla goba biebe gembebo ge baabasiba <sup>4</sup> Yesuse weng olo wenteneba baanea Ginin olo e mo kaanemebabe. Ginin olo tam tluabanobu inaminobe. Gode funanea Nakaia unangai ne niniino nemtouben nine genetabe. Gode miin ne naka ele daabaia nakaia unangai natemaibo ne niniin osa nemtouben nomabiobo ge baasebe. <sup>5</sup> Yesuse Mata osa eka o nengo Malia osa eka Lasalase esa i kla gobe binabe <sup>6</sup> otane i baaniba Lasalase gembebo geibo e mo unim blimobe. E debianea imin amo asu kenea <sup>7</sup> e okok aleyemin naka ni baabeneba Nibo imin Yudia betan unomo gesea <sup>8</sup> ni baabanoba Aleyemin naka kobo Yudai komokwali memale tomo olo binaniba kananom

genamsiba deibe tebieb yole fatnanebta imin unang genebte? gesoba <sup>9-10</sup> Yesuse baabenea Nakai bomanobua afokalo haabiaibo i mo dlo blela yenanomobabe. Niminbabe, bomanobio kesoa i teme bianiba misiam temo deiboniba ayam ota haanomabiobe. Otane mililanobio temo haanimib ile ayal blim kesoa dlo blela yenanamabobe. Nakai tab okok kemibi klayam okok kemomabiobe. Nesa inania memalo ne okok am kesoa okok kebi olo makob nakai tab dim haablib inaminobe. I ne nenaiba kaanamabi amo mo tlim blim biobo ge baabenea <sup>11-13</sup> eka weng mak osa baabenea Nib neke Lasalase aambio, ne monia dofanamabibo ge baabeseo o mitmakamo inaminobe. Lasalase kaanebo gene otane e okok aleyemin naka ni funanoba E besa aambieta obebo ge funaob kesoa ni baabanoba Sum kobo e aalameo e ginino blimubanoa ayam anamabebo gesoba <sup>14</sup> Yesuse keim baabenea Lasalase kaanebiobo, <sup>15</sup> ne esuo mo nim blim kesoa ne Klayamobo gabibe. Ne ibo daabeia natemniba bainobo getnenomabiobo, ibo tliba esu unomo ge baabesea <sup>16</sup> Tomase, e niniin afeto Didimase, Yesuse okok aleyemin naka mak ni baabenea Nibo motemoba nibtem etemna yenaiiba kaanomomo ge baabenea onsobobe.

*Yesuse baanea Neta nakaia unangai kulilabibi dohaania afen smike amit nine dobyenanamabibo genebiobe.*

<sup>17</sup> Yesuse tenea Betani bib asak ye tete-mea i baabaniba Lasalase kaanea debeb moniba tom temo dofaibbuo amo asuke asuke nao blimanobo ge baabaiba wentensebe. <sup>18</sup> Betani bibo Yelusalem bibo o kikib mebo. Yelusalem bib daneba Betani bib onamino 3 kilomita ese makobe. <sup>19</sup> Mata osa Malia osa i Betani bib ye bianiba ili am ye bliba Yuda nakaia unangai homoni i heke Lasalase kaanebuo teniba kima bianiba mebianiba bliba <sup>20</sup> naka maki teniba Matao baabaniba Yesuse tebebo gesiba wentenoa Waisa unano genoa onso otane Maliao sma am tam biotabe. <sup>21</sup> Matao motemoa Yesuse tebea atemnoa baabanoba Sum kobo ele biebta mole ne aabe mo kaatnebebabe. <sup>22</sup> Otane ne tekein kebibe, kobo Gode baabanemebo e keb wengo wentamabebo gesoa <sup>23</sup> Yesuse baabonea Ob heke imin hananamabebo gesoa <sup>24</sup> o baabanoba Ae ne tekein kebibe, mubiang amo bomanoba nakaia unangai kulila binabibi imin hana tlemib dimo esa imin hananamabebo gesoa <sup>25</sup> Yesuse baabonea Neta nakaia unangai kulila binabibi dohaaia imin hananomabiobe. Eka neta nakaia unangai afen smike amit nine

dobyamabibe. Nakaia unangai ne bainobo getnenimib ile i damo kaanomabib otane i afen smiko mo kaanomobabe. <sup>26</sup> I afen bianiba ne bainobo gabianiba amit nomabiobe. Obo weng olo bainobo gabebo? ge baabosea <sup>27</sup> o baabanoba Ae Sum kobo ne olo bainobo geiobe. Kobo Gode Kemfakamin Naka eka e miin na kebtabe. Sinanggwano e baanea Sinanomomo ne miine dabaia daaknea dabalim daak namabebo genebio kebtabo ge baabasobe.

*Yesuse melasebe.*

<sup>28-30</sup> Matao inangge baabanoa unoa Yesuse hibo mo unim blim sma bib asak wato Matao motemnoa weng obinib wat bia Matao monoa o nengo Maliao ayok baabonoa Aleyemin nakae baanea Obo tele genebo gesoa Maliao wentenoa hebmamsab daak bib daak blelanoa motemnam unoa <sup>31</sup> Yuda nakaia unangai o kima blibi wateniba funaniba O monoa gloutem unanoa memang genotabo geniba kan bebiba <sup>32</sup> Maliao monoa Yesuse atemnoa esu ye dlong dlong golbuo daak tounoa osak imin baabanoba Sum kobo ele biebta mole ne aabe mo kaatnebebabo gesoa <sup>33</sup> Yesuse yatemea osa eka Yuda nakaia unangai o baka tlib isa memsiba e funanea Kaanamim ota nakaia unangai bobol ilumo omkayebobo genea e bobol tem daako Yebbabo ge baanoa bobol ilum omfubasoa <sup>34</sup> baabenea Ibo fab dofaibbione? ge baabesea i baabaniba Sum kobo tenebta atemale gesiba <sup>35</sup> e meme <sup>36</sup> kesoa Yuda nakaia unangai ateniba baaniba Etemine! E naka ele kla bobol wat dofa binabebua kaanebiota mehabebo geib <sup>37</sup> otane mak ile obianiba E sino nakae kino tum gebanobuo klaubanea ayam anebu otane e nimin keneta naka ele mo inaneta klaubaim blim deibaneta kaanebiota mehabebo? ge omonsio.

*Yesuse Lasalase dofaanea imin hanasebe.*

<sup>38</sup> Yesuse bobol ilum omfubasoa e monea gloutem onsebe. Tom tem ele i tom kwame beselibe daleb teniba amite dobdou waisaibbiotabe. <sup>39</sup> Yesuse baabonea Tome datlaine gesoa kaanebio nakae nengo Matao Yesuse baabanoba Sum kobo e kaanea dofanobuo amo asuke asuke nao blimanobio kesoa nibo inanob mole fetange kunamabebo gesoa <sup>40</sup> Yesuse baabonea Ne sino baabkenia Obo ne bainobo getneneb mole Gode titilo wateneba e niniino dobtouleba namabebo ge baabkeibiobo gesoa <sup>41</sup> i tome amite datlasiba Yesuse delubmanea abilim ut teme bianea baanea Ay kobo klayam naneba ne wengo wentutnenebobe. <sup>42</sup> Ne tekein kebibe, kobo ne wengo amitie

wentene binabeb otane ne memalo baania Kobo klayam naneba ne wengo wentutnenebobo gei ole o mitmakamo inaminobe. Nakaia unangai ele blib eli keb titilo wateniba bainobo geniba kebta ne nemaneba tlibiobo geine genita weng ole baabkeiobo ge baabanea <sup>43</sup> eka Lasalase nganabanea Lasalaso! Kobo gloutemo deiboneba tam tele gesea <sup>44</sup> haam ele e skila kweila kibiao youmo genubaibbuo yeb bakasa tam tenea keim ele tesea Yesuse baabenea Ibo e skila kweila kibiao youmo genubaibbuo tila kenubaine gesea i tila kenubasiobe.

*Yudai komokwali baaniba Yesuse ananomo gesiobe.*

*(Matyu 26:1-5; Mak 14:1-2; Luk 22:1-2)*

<sup>45</sup> Yuda nakaia unangai homoni Maliao bekebo blibi Yesuse kukub olo naneo wateniba e bainobo gebaib <sup>46</sup> otane maki moniba Felisie baabeniba Yesuse inaneta atem tlobobo ge baabesiba <sup>47-48</sup> Gode amo kimanin nakai komokwal isa eka Felisie isa i miniba teka bianiba baaniba Naka ele okok sumo nabe olo nibo mo wataim blim kenomobo e amitie nabea nakaia unangai alukum ateniba e bainobo gebaiba e i komok sum anea Lomo komok sume alango dokone mole Lomo komokwali atli-aubenoa i meletani dlaib teniba Gode am sum osa eka nib nakaia unanga isa wat-wat danomabiobo gesiba <sup>49</sup> naka make ye bie, e niniino Kaiafase, bifole ye dime e Gode amo kimanin nakai komok sum am bie kesoa e baabenea Ibo tobtlim biobe. <sup>50</sup> Naka elekiem ele ananoba kaanemo Lom teni Yuda nibo alukum mo yalaib-babe. E ananoba kaanemo nibo alukum daabenea Lom teni nibo mo yalomabibba kesoa kukub olo klayamobo ge baabesebe. <sup>51</sup> Kaiafase weng olo inangge baabeseo e ele bobol temo mo baabeim blimobe. E bifole ye dime Gode amo kimanin nakai komok sum am bie kesoa Gode e bobol tem funino omalea e weng olo baabenebuo mitmakamo inaminobe. Yesuse kaanamabeo Yuda nakaia unangai daabenea ayam nomabiobe. <sup>52</sup> Eka e inanamabeo Yudai ilita mo daabenemebabe. E Yudaba naka afet isa daabenamabebe. E inanea kaanea hananamabe kesoa Gode meletani bib mak bib mak olo blibi alukum makob anomabiobe. <sup>53</sup> Kaiafase weng olo baabene kesoa amo yo dim ota Yudai komokwali Yesuse anamin wengo kiloniba omonsio-be. <sup>54</sup> I ananom genamib kesoa Yesuse Yuda nakaia unanga isuo keimo mo haanin blimobe. E monea Eflaim bib ye bianea e okok aleyemin nakai tena binibbiobe. Bib olo ibuantemo kikib ye biotabe.

<sup>55</sup> Gode singkalin am sumo, niniino Fasobao, Yudai bleto yis blim down-amin amo dikib tlo kesoa nakaia unangai homoni i bib amo deiboniba dli tete bianiba Yelusalem bibo Gode kin dimo ayam anamin kukubo klanoba Gode kin dimo ayam anobta Fasoba imen ole mit downonomo geniba klamonsiobe. <sup>56-57</sup> Gode amo kimanin nakai komokwal isa eka Felisie isa i funaniba Nibo Yesuse atemob mole klabuto ge debeb unomo geib kesoa i nakaia unangai baabeniba Ibo Yesuse atemib mole hebamsab ni baabeine ge baabesiba nakaia unangai i bibo deiboniba teniba Yelusalem bib ye tlaniba Fasoba falo ga downonomo gabibi Yesuse hembianiba taniba Gode am sumo tem tam miniba i sinwalo obianiba maki baaiho Ibo fumbibo Yesuse tenea Fasoba imeno downamabebo ge fumbibo? ge baasese bisio-be.

## 12

*Maliao wel aaye tang kunin ayame obonoa Yesuse skilono ibabasobe.*

*(Matyu 26:6-13; Mak 14:3-9)*

<sup>1</sup> Fasoba singkalin amo tlamabo amo asuke asuke asuke nao mo blimaim blim sma bua Yesuse imin monea Betani bibo Lasalase kaanebuo dofaanebio bib onsebe. <sup>2</sup> E inanea motemea i imeno fubaibbuo einoa Matao ifanoa Yesus etem Lasalas etem eka naka mak item naniba toulu bianiba imeno wembiba <sup>3</sup> Malia ole wel aaye tang ayame tom botole tem daak iba obeb tenoa Yesuse skilon dimo ibabanoa olo gabamano wafu olonoa wel game glitubanoa engubaso e tange amo alukum bukusebe. Nakaia unangai wel aay ele walom gib mole monio sum walonabiobe. <sup>4</sup> O inasoa Yesuse okok aleyemin naka make sinanomo Yesuse debeb monea komokwali dobia anomabib nakae, niniino Yudas Iskeliote, baanea <sup>5</sup> O wel aay ayam ele obeb monoa naka maki walonoa K300 olonoa nakaia unangai inamin namin blimi daabenamin ole fatnnota besa ye sasalanone? ge baasebe. <sup>6</sup> E weng olo baase inaminobe. E nakaia unangai inamin namin blimi bobolo mo funaneta baaim blimobe. E ayok henin nakabe. E funanea Ne moni kimanin naka kesoa o inanoa monio olonoa onensoa atosino ayok oisonano ge funaneta weng olo baasebe. <sup>7</sup> E inangge baasea Yesuse baanea Ibo mo owemibe! Deibueine! O ne kla gotnenoa ne kaiaa tom tem wato nemfanomabibo bobolo funaneta wel aay ele sin alitneno kesoa ne funania O ayam nanobo gabibe. <sup>8</sup> Niminbabe, nakaia unangai inamin namin blimi ibo amitie bekebe

bliba daaye binabib otane nele ibo amito mo bekebe biamabibabo ge baabesebe.

*Gode amo kimanin nakai komokwali baaniba Lasalase ananomo gesiobe.*

<sup>9</sup> Naka homon unang homoni wentiba Yesuse Betani bib ye biebo geiba wentib kesoa i baaniba Nibo monoba esa eka Lasalase sino kaanebua Yesuse dofaanebua bie naka esa yatemomo geniba i Betani bib onsiobe. <sup>10-11</sup> Yuda naka homon unang homoni Yesuse Lasalase nabaneo wengo wenteniba i komokwali wengo wentemino deibeniba i Yesuse bainobo geiba kesoa i komokwali funaniba I inab yole nibo Lasalase ananoba kaaneko ge omonsioibe.

*Yesuse komok sumi ulab anea Yelusalem bib onsebe.*

*(Matyu 21:1-11; Mak 11:1-11; Luk 19:28-40)*

<sup>12</sup> I ina biniba sibnoma bomanoa nakaia unangai Fasoba imeno downonomo geniba teniba Yelusalem bib ye minabibi wentiba Yesuse tebebo gesiba wentensiobe. <sup>13-15</sup> Yesuse til dongki mene make dobonea e dim ut tounea teseo sinanggwano Gode buk temo baanoa Yelusalem bib sel ibo mo tosianimibe! Ib komok sume til dongki mene dim ut toubia debeb tebebo genobuo e bain inanea tebea nakaia unangai flim aan inamino haa oleb moniba esu unaniba ngambianiba Islel ten nibo nib komok sume niniino dobtouleb nomo! E Sume niniin dim ota tlebo, Gode daabaneke ge ngan monsiobe. <sup>16</sup> Yesuse inaseo e okok aleyemin naka ni o mitmakamo mo tekein keim blimobe. Otane sinanoa e kaanea imin hananea ula abilim uneta ota ni Yesuse Yelusalem bib unebuo bobolo funanobta Sinanggwano Gode buk tem wengo baanobuo bain inanota wate-mobbio ge nobbiobe.

<sup>17</sup> Sino Lasalase kaanea tom tem wat dofaibbua Yesuse nganabanea hana tam tlea nakaia unangai atemibbuei o wengo naka mak unang maki oyebiba <sup>18</sup> i Yesuse okok sumo nanebio wengo wenteniba moniba Yesu esu unaniba <sup>19</sup> e niniino dobtouleb nib kesoa Felisie i yateniba obianiba Ye temine! Nakaia unangai alukum esu uniobe. Nibo mo sbal manobta watanomabbibabo ge omonsioibe.

*Glik naka maki teniba baaniba Ni Yesuse atemom genobtabo gesiobe.*

<sup>20</sup> Yuda nakaia unanga isa eka Glik teni mak isa moniba Fasoba imeno wembianoba Gode niniino dobtouleb nomo geniba moniba Yelusalem bib ye bianiba <sup>21</sup> Glik naka eli moniba Yesuse okok aleyemin nakae niniino Filibe, Yelusalem bib ye bie esu unaniba baabaniba Naka

sum kobo ni Yesuse atemomabbio ge baabasioibe. Filibe Betsaida bib sakobe. E Galili betan da tlebiotabe. <sup>22</sup> I inangge baabasiba Filibe monea Endlue baabanea dab moniba Yesuse baabaniba Aleyemin naka kobo Glik nakai teniba kobo katemomabbio gabiobo gesiba <sup>23</sup> Yesuse baabenea Abilim Da Tlemin Naka ne Gode ne niniino nemtoupleb namabeo amo tlobe. <sup>24</sup> Ne bain baabenamabibe, kon sane molmein daaknea dabalim daak uname bala damanea yamo balinamabebe. Otane e dabalim daako mo molmein daak unim blim kene mole e mo bala damaneta yamo mo balinemebabe. Nesa makob kon sane bala damanamabe inania kaania imin hanania nakaia unangai homoni dleb mete Gode mitem danamabibe. <sup>25</sup> Nakaia unangai wanita ili bobol tem funino wafu bianiba dabalim olo inamin namino gobonimibo i amito mo biomabibbabe. Eka nakaia unangai wanita ne bobolo funaniba dabalim olo inamin namino deibonimib nakai afen smiko amit namabobe. <sup>26</sup> Nakaia unangai wanita ne okoko okok kemib mole i nene kukub nabi ota wafueine! I inab mole ne bibo namabio naka elisa itena nomabbioibe. Nakaia unangai ne okoko okok kebibi ne Aye baanea I ayam nabinabio ge baanamabebo ge baabesebe.

*Yesuse e kaanamabeo weng sango baabesebe.*

<sup>27</sup> Yesuse imin baabenea Memalo ne bobol tem daako misiam utneno otane ne Gode mo baabanita Ay kobo ne enin sumo ne dimo tam tlamabo daatnebeba deitnenoko genamabibabe. Yeye ne enin olo deib tlibio kesoa ne mo inanimibabo ge baabenea <sup>28</sup> omito e Gode baabanea Ay kobo ne keb niniino kemtoupleb nano ge baabasea weng mako abilim ut danao baanoa Kobo sino ne niniino nemtoupleb binebbioibe. Eka sinanomosa imin inaneba ne niniino nemtoupleb namabeobo ge baaso <sup>29</sup> nakaia unangai ye blibi weng olo wenteniba maki baaniba Am ngambebo gesiba eka maki baaniba Abisak eta baabanebo gesib blib <sup>30</sup> otane Yesuse baabenea Weng ele baano olo ne mo baatnenota ne bobol temo nemsbal maim blimobe. Weng olo ibta baabenota dosbal manobe. <sup>31</sup> Mema olo Gode dabalimo inamin namin kukubo klanea Eli kukubo misiamobe eka eli kukubo ayamobe genamabebe. E inane-meo e dabalim olo komoke Gululam esa fotebenea onanea <sup>32</sup> i ne nemeb moniba atdimo nemasaniba silo bikitneniba as baka obo bikiniba nemfaiba biania kaania nakaia unangai dleb mete ne mitem danamabibo ge baabesebe. <sup>33</sup> E weng

olo baabeseo e kukubo nanea kaanamabeo weng ota baabesebe. <sup>34</sup>E inangge baabesea nakaia unanga isak baabaniba Nib hek-mel wengo baanoa Gode Dofakamin Nakae mo kaanemebabo, e amit afenamabebo genobi otane kobo baaneba Abilim Da Tlemin Nakae atdimmo dabasaniba silo bikibaniba as baka obo bikieiba bianea kaanamabebo gabeb yole ni mo tekein kenobbabe. Abilim Da Tlemin Naka ele wanete? gesiba <sup>35</sup>Yesuse baabenea Memalo ayal ne ibo bekebe biamabi otane ne ibo mo bekebe blita sinanomobabe. Mema yota bekebe tlania deibe unam-abibe. Ne sma ibte netemna nomabbio kesoa ibo ne okoko okok kem haaine! Ibo inaiB mole sinanomo mililanamino mo tlamabobabe. Mililanamino ib dimo tam tlubeno mole ibo mo teme bianibta okok kem haanomabibbabe. <sup>36</sup>Ayal ne ibo baka biania ibo ne bainobo getneine gabibe. Ibo inanimibo ayalsa nomabiobo ge baabesebe.

*Yudai Yesuse sma ye mo bainobo gebaim blim bisiobe.*

Yesuse inangge baabenea deibe monea ayok ye bisebe. <sup>37</sup>Yesuse inamin namin okok sumo nabeo Yuda nakaia unangai watebib otane i e mo bainobo geim blim kesoa <sup>38</sup>sinanggwano Gode weng omkeimalin nakae, niniino Aisaiae, wengo baanebuo bain inasobe. Aisaiae enangge baanea

Sum kobo ni keb weng ayamo omkeimabob otane i mo bainobo gabibbabe. Eka kobo okok sumo keb titil yeb baka klabeba i watebib otane i kobo mo bainobo gakebibbabo ge baanea dolanebiotabe.

<sup>39</sup>Nakaia unanga eli Yesuse mo bainobo geim blim binibbuo niminbabe, Gode i bainobo galin deibo watabenebiotabe. O mitmakam osa sinanggwano Aisaiae enangge baanea

<sup>40</sup>Gode i kino tum gebenea i bobol tem funino nekek gebobe nane kesoa i kino temebib otane inamin namino mo watebibbabe. Eka i bobol temo inamin namin bobolo fumbib otane o mitmakamo mo tekein keb-bibbabe. I Gode bobolo funaniba esu tlib mole e klaubenea ayam anomabib otane i mo inaim blim kesoa e mo klaubeneta ayam anim blimobo ge baanea dolanebiotabe.

<sup>41</sup>Gode Yesuse titilo ayal inamin einobuo Aisaiae alebaneta e Yesuse weng sango dolanebiobe. <sup>42</sup>Yudai komokwali maki Yesuse bainobo gabib otane i funaniba

Ni bainobo galin olo omkeimasoba Gode amo Felisiei ni fotebenimiobo geniba i Felisiei tolo tosiananiba i bainobo galino ayok omwa binibbiobe. <sup>43</sup>I ina binib-buo niminbabe, i mo funanibta Gode ni niniino omfabeneko ge funaim blimobe. I funin ole Nakai ni niniino dotouleB nine genibta i bainobo galino omkeima namino deiboniba teilabbubo binibbiobe.

*Nakaia unangai Yesuse wengo wentim blimi bib misiam unomabiobe.*

<sup>44</sup>Yesuse ngananea Nakaia unangai wanita ne bainobo geib mole olo makob i ne Aye ne nemane tlibu esa bainobo genomabiobe. <sup>45</sup>Eka nakaia unangai wanita ne natemib mole olo makob i ne Aye ne nemane tlibu esa atemomabiobe. <sup>46</sup>Gode ayal ne daakenia dabalim ele tlibio kesoa nakaia unangai wanita ne bainobo getneib mole mililambio temo mo nomabibbabe. <sup>47</sup>Nakaia unangai ne wengo wentebibbai ne mo baabenita Ibo bib misiam unomabiobo genimibabe. Niminbabe, ne dabalim olo mo tenita nakaia unangai oyebianita inamin ibo bib misiam unomabiobo, eka inamin ibo bib ayam unomabiobo galano genita tlim blimobe. Ne tenia i daabenia hengmin temo bliBo dotlanang genita tlibiobe. <sup>48</sup>Ne weng olo omkeima binabio mubiang am bomanomo dimo nakaia unangai ne weng olo mo wentim blim keibbiamoei baabenita Ibo ne wengo omkayebi otane ibo mo wentim blim binibbio kesoa bib misiam unomabiobo ge baabenamabibe. <sup>49</sup>Niminbabe, ne weng olo omkeima binabio nene bobol tem funino mo omkeima binabibabe. Ne Aye ne nemane tlibu emaye omkanebeta omkeima binabibe. <sup>50</sup>Nakaia unangai wanita Ay Gode weng olo wentib mole i afen smike amit nine doboniba amit nomabib kesoa ne e weng ele omkeimabi olo ne Aye ele weng baanele iwat omkeima binabibo ge baabesebe.

## 13

*Yesuse e okok aleyemin nakai skilono aayo fubabesebe.*

<sup>1</sup>Yudai singkalin am sumo, niniino Faso-bao, meB tloa Yesuse tekein kenea Ne kaania dabalim olo deibonita Ay esu unam-abi amo tlobo ge funasebe. E meletani dabalim ele bliBi sin osa memalosa amitie kla gobe binebiobe. <sup>2</sup>Sino Gululame bobol tem funino Saimone miine, Yudas Iskeliote, omalea e funanea Ne Yesuse debeB mo-nia komokwali dobyamabibo genebiotabe. KwinoA Yesu esa e okok aleyemin naka nisa imeno wembianoba <sup>3</sup>Yesuse e Aalebe titilo omanea inamin namin osa alukum

eta omalebua kima bie osa eka e Gode deibanea daak tlebu osa eka e imin Aalebe God esu unamabe osa e alukum tekein kebe kesoa <sup>4</sup> e makob okok nakai ulab anea e nibo kla gobebie kukubo i alebenano genea imeno deibonea hananea e youme tibe gamtlanea taole teke dobonea kakame gebianea <sup>5</sup> aaye dis tem daak ibane daak onsea obeb bianea e okok aleyemin naka ni skilono elekiem ke fubabanea taole mutume dobo aagito glitubana deiba deiba binea <sup>6</sup> metenea Saimon Fita esu ele tesea e funanea Yesuse ne okok nakababo ge funanea baabanea Sum kobo ne skil aayo mo fubatnenemebe gesea <sup>7</sup> Yesuse baabanea Ne keb skil aayo fubabkenamabio o mito kobo mo tekein kebebba otane mitdanebta tekein kenamabeobo ge baabasea <sup>8</sup> Fitae baabanea Otane kobo ne skil aayo mo fubatnenamabebbabo gesea Yesuse baabanea Ne keb skilono mo fubabkeim blim kenimio kobo ne mo baka okok kemabebbabo gesea <sup>9</sup> Saimon Fitae wentenea e weng olo mitmakamo mo tekein keim blim kene kesoa baabanea Sum kobo inanamabe yole skilono olo tlonno mo fubatnenemebe! Kweilon osa gabam esa alukum fue-latnenale gesea <sup>10</sup> Yesuse baabanea Nakaia unangai i damo aayo sin fuambinibuei imino mo fueanimibbabo, i kining aibbio kesoa i skilono olota fubabeniba kining anomabiobe. Ibole bobol temo memalo alukum kining an blib otane nakae elekiem eta sma hengminsa biebo ge baabesebe. <sup>11</sup> E inangge baabeseo e sin tekein kene nakae e debeb monea komokwali do-bia ananomabib kesota e baabeneta Ib bobol temo alukum kiningo mo blibbabo ge baabesebe.

<sup>12</sup> Yesuse inanea e okok aleyemin naka ni skilono alukum fuba fubenea e youme tibe gamo dofanebue imin dobo dubusanea utnea ele biin ut tounea e okok aleyemin naka ni baabenea Ib ne kukub olo nania ib skilono fubabeio o mitmakamo mo tekein kebibba kesoa ne baabenamabibe. <sup>13-14</sup> Ibo ne Aleyemin Nakao ge one bianiba Sumo ge one biam blibo, olo bainobe. Ne ib Sum eka ib aleyemin naka nabe. Otane ne nene niniino omfufumin kukubo mo wafu binabiba kesota ne ib skilono aayo fubabeio. Ibsa inanibta ib niniino omfufumino deibo bianibta ib sinwalo inaniba maki daabese bianiba eka okok afet osa inaniba dabese nine! <sup>15</sup> Kukub olo alebei ota ibsa wafu bianiba ib sinwalo ming inam tesine! <sup>16</sup> Ne bain baabenamabibe, okok nakae mo sum aneta e kimanin nakae mo dababbunemebabe. Eka nakae dowan wengo omeh haabie naka esa mo sum aneta e kima bianea wengo omanea dabanea haabie

nakae mo dababbunemebabe. Inamin kesoa ibo mo sum anibta ib Sum ne mo nemabbunimibbabe. Otane memalo ne ibo daabei kesoa ibsa inanibta naka mak unang maki daabese nine! <sup>17</sup> Ibo memalo kukub olo mitmakamo tekein keibobe. Ne okok olo naia natemibo ibsa sma inanibta seinomabiobe. <sup>18</sup> Ne weng obba ele baabei olo alukum ibo mo inanomabibbabe. Ne nakai dlakaibuei tekein kebi otane ib isak temo naka make ne kukub misiam omnamabebe. Sinanggwano Gode buk temo i weng mako dolaniba baaniba

Naka ele ne bakanea imeno wembe otane e ne makaa nemfanea nenanamabebo ge baaniba dolaibbuo bain inanamabobe.

<sup>19</sup> Inamin namin olo mo tam tlim blim biota ne weng olo sin baabei biamabobe. Sinanomo o tam tloa ibo watem tekein kenibta E bain Abilim Da Tlemim Nakabo genomabiobe. <sup>20</sup> Ne bain baabenamabibe, nakai wanita ne naka make dabaia motemameo i debeb taniba i am tam daib mole kukub olo makob i nesa nemeb taniba i am tam danomabiobe. Eka nakai wanita ne nemeb taniba i am tam daib mole kukub olo makob i ne Aye nemane tlibu esa debeb taniba i am tam danomabiobo ge baabesebe.

*Yesuse baanea Yudase ne nemeb monea komokwali nemiamabebo ge baabase.*

*(Matyu 26:20-25; Mak 14:17-21; Luk 22:21-23)*

<sup>21</sup> Yesuse weng olo inangge baabe nabea e bobol temo ilum omfubano kesoa e baabenea Ne baabenamabi ole ib isak temo naka make ne nemeb monea komokwali nemia nananomabiobo ge baabesea <sup>22</sup> e okok aleyemin naka ni wentenoba ni sinwalo e ulab dofa atemsese monsob otane ni mo tekein kenobta e nakae yeta baabanebe geim blimobe. <sup>23</sup> Ni inasobo Yon ne Yesuse kla gotne binabe kesoa ni dabo heba toumbianoba imeno wembuobe. <sup>24</sup> Saimon Fitae gabam gotot genea baatnenea Kobo baabaneba Naka ele waneta ohabebe? ge baabanale ge baatnenea <sup>25</sup> ne tam mili watnia Yesu esu wat unania baabania Sum kobo naka ele waneta? ge baabasia <sup>26</sup> Yesuse baatnenea Kobo temebeba ne blete halonia dis teme tubunia omalia downame naka etabo ge baatnenea ne ateme monia e bain inanea blete halonea dis teme tubunea Saimon Iskelioete miine Yudase omalea <sup>27</sup> omeisanabea Gululame Yudase kino men wat ateme bianea kima biaba watnea e bobol tem wat unubasea Yesuse baabanea Kobo inamin namino nanano gabebo hebamsab nanale ge

baabasea <sup>28</sup> Yesuse okok aleyemin naka ni ye toul bianoba imeno wembob ni Yesuse Yudase weng olo baabane o mitmakamo mo tekein keim blimobe. <sup>29</sup> Yesuse okok aleyemin naka ni inamin namin okoko okok keboba naka maki ni webibo ni moni olo Yudase kima binabe kesoa ni funanoba Yesuse baabanea Kobo imeno waleba Fasoba imeno downomo geneta baabane genaboba eka maki funaniba E inamin namino nakaia unangai afobeing blimi oyene geneta baabanebo ge funana nabiba <sup>30</sup> amo mililanoa Yudase imeno hebamsab omo downea mililano tem te ye dala onsebe.

*Hekmel wengo mema otabe.*

<sup>31</sup> Yudase inanea unea Yesuse e okok aleyemin naka ni baabenea Memalo Abilim Da Tlemin Naka ne titilo nakaia unangai alebeia i Gode niniino dobtoule nomabiobe. Eka ne kukubo nanimi osa ne Gode niniino dobtoule namabibe. <sup>32</sup> Ne inania Gode niniino dobtoule ni mole God esak inanea e titilo ayal inamin einobuo omnenea ne niniino nemtoule namabebe. <sup>33</sup> Ne memeo, ne ibo amito mo bekebenamabibabe. Memalota ibtem netem nanobobe. Imino dim ole ne kibio henwanomabiobe. Ne weng mako baabenamabio sino Yudai komokwali baabeibu ota ibsa baabenamabibe. Ne bibo unamabio ibo mo unomabibbabe. <sup>34</sup> Ne hekmel wengo memao baabenamabibe, ne ibo kla gobe bli kesoa ibsa inaniba ib sinwalo kla gobesese nine! <sup>35</sup> Ibo inamib mole naka mak unang maki ibo yatemniba I Yesuse okok aleyemin nakabe genomabiobo ge baabesebe.

*Yesuse Fitae baabanea Kobo baaneba Ne Yesuse mo tekein kebibabo genamabeobo ge baabasebe.*

*(Matyu 26:31-35; Mak 14:27-31; Luk 22:31-34)*

<sup>36</sup> Saimon Fitae Yesuse baabanea Sum kobo fab unamabebe? gesea Yesuse baabanea Ne bibo unamabio kobo memalo mo beketne unamabebabe. Otane sinanomota kobo monebta ne beketne biamabeobo gesea <sup>37</sup> Fitae baabanea Sum kobo ne bekebe unamabibe. Ne inai i nananomo gaib osa imaye nanaine! Ne kaanamino tolo mo tosiambibabo gesea <sup>38</sup> Yesuse baabanea Kobo bain netemna kaanama bianebta obeba? Ne bain baabkenamabibe, kakaluke mo nganaim blim bieta kobo ne niniino omwatneneba baaneba Ne naka ele mo tekein kebibabo genamino asumatna kenamabeobo ge baabasebe.

## 14

*Yesus eta God esu unemin deibobe.*

<sup>1</sup> Yesuse e okok aleyemin naka ni baabene Ib bobol tem daako ilumo mo omfubenomone! Ibo Gode bainobo gena bianiba nesa bainobo getne nabianibte! <sup>2</sup> Sino ne baabenia Ne monia ib amo klaubenamabibe ge baabeibu olo bainobe. Ne Aye bie bib olo amo homon eka bib osa beselib nabe. Bib olo temo ib am osa ye biobe. <sup>3</sup> Ne monia ib amo klaubenimio imin tenia dleb ut daia ibtem netem nanoba bib olo nomabbiobe. <sup>4</sup> Ne bib olo unamabio o deib esa ibo tekein kebiobo ge baabesea <sup>5</sup> Tomase baabanea Kobo bib olo unamabebo ni mo tekein kebobbba kesoa ni bib olo unemin deib esa ni mo tekein kebobbabo gesea <sup>6</sup> Yesuse Tomase ni sinwalo baabenea Gode bib unemin deib ele nenekiem nenetabe. Nakai deib afete moniba ne Ay esuo unamino blimobe. Eka weng bain omino kukub osa eka afenin kukub osa o mitmakamo netabe. <sup>7</sup> Ibo ne kla tekein keib mole ne Ay esa tekein kenomabiobe. Ibo memalo Aye tekein keibobe. Sinanomosa amitie tekein kemomabiobe. Ibo ne natemib kesoa Ay esa atemiobo ge baabesea <sup>8</sup> Filibe baabanea Sum kobo keb Aye ni alebenale! Kobo ni alebeneba atemob mole ni imino mo baabkenobta Alebenale genomobbabo ge baabasea <sup>9</sup> Yesuse Filibe baabanea Am homono dimo ibtem netem na binabob otane kobo ne mo tekein kebebbabe. Nakaia unangai ne natemibbuo olo makob ne Aye God esa atemibbiobe. Kobo ne mo baatnenebta Keb Aye ni alebenale ge baatnemebe! Kobo ne natemebbuo ne Ay esa atemebbiobe. <sup>10</sup> Ne Aye ni dumo ete nete nanoba makob biobobe. Kobo olo bainobo gabeba? Ne weng olo omkaye binabio nene bobol tem funinbabe. Ne Aye Gode ele bobol tem funin ota omkanebta ne omonia ibo omkaye biana e okoko okok kebiobe. <sup>11</sup> Ne baania Ne Aye ni dumo ete nete nanoba makob biobobo gabi olo ibo bainobo geine! Otane ibo olo mo bainobo geim blim keib mole ne okok olo nabinabi ota watem tekein kenibta Bain e Aye i dumo makob bliobe geine! <sup>12</sup> Ne bain baabenamabibe, nakaia unangai wanita ne bainobo getneib mole ne okok olo nabio isa inaniba klamomabiobe. Ne okok sumo okok kebinabi otane ne Ay esu unamio e Hobe dabanea tenea ne bainobo galin nakaia unangai daabenea i okoko dot sum okok kemomabiobe. <sup>13</sup> Ibo ne niniin dimo Gode baabaniba Kobo ni inamin namin olo nabenale genimibo Gode miin ne funania Ne Aye niniino dobtoule nano ge fumbi



kesoa ne inamin namin olo bain inabenamabibe. <sup>14</sup> Ibo ne niniin dimo baaniba Kobo ni inamin namino nabenale geib mole ne nabenamabibo ge baabesebe.

*Yesuse baanea Gode Hobe daak tlamabebo ge baabesebe.*

<sup>15</sup> Yesuse e okok aleyemin naka ni imin baabenea Ibo ne gotneib mole ne hekmel wengo sino baabeibuo kla wafunomabiobe. <sup>16</sup> Ibo inaniba wafueiba ne Aye Gode baabaia e Hobe weng moton omine dabanea daakenea esa makob nene daaye bini biamo ina bianeia ibo amitie bekebenamabebe. <sup>17</sup> Nakaia unangai dabalim kukubo wafu blib ile Hob ele mo atem tekein kebibba kesoa e isuo mo biamabebe. Otane ibole e tekein kebiobe. Niminbabe, etem ibtem nabianiba e ib bobol temo namabebe. <sup>18</sup> Ne ibo mo deibeita ibo aban dikino mo nimibbabe. Ne imin tenia ibsu tlamabibe. <sup>19</sup> Namu namo dimo nakaia unangai dabalim kukubo wafu blibi ne imino mo natemomabibba otane ne imin hananimio ibo natemomabiobe. Ne amitie afen biania Gode bekebanamabi kesoa ibsa inaniba amitie afen bianiba Gode bekebanomabiobe. <sup>20</sup> Ne kaania imin hananimi dim ota ibo natem tekein kenibta E Aye i dumo makob bliba nibsa etem nabibobo genomabiobe. <sup>21</sup> Nakaia unangai wanita ne kla gotneib mole i ne hekmel wengo kla tekein keniba wafu bliba ne Aye i kla gobenea nesa i gobenia keimabeia natemomabiobo ge baabesea <sup>22</sup> Yudas esak Yesuse baabanea Sum kobo ni keim abeneba katemomabbu otane nakaia unangai dabalim kukubo wafu blib ile nimin kenebta i kin dimo keim abenamino deibenamabebe? ge baabasebe. Yudas ele Iskeliot ekobbabe. Yudas afete niniin asok etabe. <sup>23</sup> Yesuse baabenea Nakaia unangai wanita ne kla gotneib mole i ne wengo kla wafueiba ne Aye i kla gobenamabebe. E inanea gobenemeo ni dumo tetemnoaba item nitem nanoba amit nomabiobe. <sup>24</sup> Nakaia unangai ne mo gotne blibba ile ne wengo mo wafu blibbabe. Ibo ne wengo omkaye bia wente binabib olo nene bobol tem funinbabe. Ne Aye ne nemane tlibu eta omkanebeta ibo omkaye binabibe. <sup>25</sup> Ne sma ibtem netem nabianobta weng olo baabeibo. <sup>26</sup> Sinanoa ne deibe unamio Ay Gode e Hob Ayame dabanea teneia ne alango dokonamabe eta inamin namino alukum alebeneta watem nabianiba eka ne sino inamin namino baabei biamo osa e imin oyebea funomabiobe. <sup>27</sup> Ne deibe unanggi kesoa nene bobol tem ayamo omyibe! Nakaia unangai dabalim olo

kukubo wafu blibi bobol ayamo enamino mo omyomabibbabe. Ibo bobol misiamo mo fumbianibta tosianimibe! <sup>28</sup> Ne baabenia Ne deibe uni biamo imin tlamabibo ge baabeia wentib kesoa ibo ne kla gotneib mole ibo funaniba e Ay esu unamabebo ge funaniba seinomabiobe. Niminbabe, ne Aye gaitnene kesoa ibo seinomabiobe. <sup>29</sup> Inamin namin olo mo tam tlim blim biota ne weng olo sin baabeibo. Sinanomo o tam tloa ibo watem tekein kenibta ne bainobo genomabiobe. <sup>30</sup> Dabalim olo kukubo komoke Gululame ne nananang genea meb tlebio kesoa ne dabalim olo amito mo bianita ibo weng homono mo oyemabibabe. E ne kukub misiamo omnenamin titilo blim otane ne e nananamino mo watanimibabe. <sup>31</sup> Niminbabe, nakaia unangai dabalim olo blibi tekein keniba e Aye inamin namino nanale ge baabanemeo ele weng baaneme iwat nabianea e Aye kla goba biebo geine genita oyebi kesoa tliba unomo ge baabesebe.

## 15

*Yesuse baanea Ne tek waen motonobo genebiobe.*

<sup>1</sup> Yesuse e okok aleyemin naka ni imin baabenea Ne tek waen motonobe. Eka ne Ay ele damibo gosakobe. <sup>2</sup> Ne tungo yamo mo balinim blim besa dim touno mole Aye weiso tebe tlanamabebe. Eka tungo atosino yamo balibo ole e kuko haketouwebea daabo imin balbi damam bianoa yamo homon balimabobe. <sup>3</sup> Ne saa weng ele baabei olo mitmakamo inaminobe. Ne wengo ibo omkayebia wente binabibo o makob ibo kining aniba yamo homon baliniba makob ne teke tungo weng sango baabei inabibiobe. <sup>4</sup> Tungo afeta teleb wat danomo yamo mo balinomobabe. Damo dim wat bela tamanomota yamo balinamabobe. Ibsa inaminobe. Ibo ne dim wato mo tamaim blim keib mole ibo mo sbal manibta ne okoko klayamo mo okok kemomabibba kesoa ibo ne dim wat tamaiba eka nesak ib bobol tem wat onanano!

<sup>5</sup> Ne tek waen dimobe. Eka ibole ne tungobe. Ibo ne dim wat temaim mole ib okoko ayam okok kemomabiobe. Otane ibo ne dim wato mo tamaim blim keib mole ibo inamin namino ayamo mo nanomabibbabe. <sup>6</sup> Ibo ne dim wato mo tamaim blim keib mole olo makob nakai as tungo weiso tebelaiibua gatanoa haa oleb moniba aso fanomabib inanea Aye God esa ibo inabenamabebe. <sup>7</sup> Ibo ne dim wat tamaniba ib bobol tem funino ne bobol tem funino ulab aniba ne wengo ib bobol tem wato kla omabba bianiba Gode baabaniba Kobo

inamin namin olo nabonale ge baababaib mole e bain inabenamabebe. <sup>8</sup> Ibo ne okoko ayam okok kemibo nakaia unangai ibo yateniba funaniba I kukub ayam wafu blib kesoa i Yesuse okok aleyemin nakabo geniba ne Aye niniino dobtoulele nomabiobe.

<sup>9</sup> Ne Aye ne kla gotne bie inania nesa ibo kla gobe bli kesoa ibo funaniba E ni kla gobe biebo geniba nene weng baanimi iwat namine! <sup>10</sup> Ibo inaniba nene weng baanimi iwat namib mole ne ibo amitie kla gobenamabibe. Nesa sino inania ne Aye ele weng baaneme iwat ina biania e ne gotne bie kukubo bobolo kla fumbinibiobe. <sup>11</sup> Ne funania Ne kla seimbi kesoa ibsa inaniba kla seinine ge funanita weng olo baabeiobe. <sup>12</sup> Ne hekmel weng mako baabenamabi olo inaminobe. Makob ne ibo kla gobe bli inaniba ibsa ib sinwalo kla gobesese nine! <sup>13</sup> Gobenin kukubo ayam otane naka make e nineki inamin namino nasiba e funanea I yenanomabib yole neta i alango dokonia kaايا e deine ge funanea eta kaanea i deib mole gobenin kukub olo dot ayamobe. <sup>14</sup> Ibo makob nene baabei biamo iwat namib mole ibo ne ninekobe. <sup>15</sup> Okok nakae e kimanin nakae inamin namino nabeo mitmakamo e mo tekein kebeba otane nele ne Aye inamin namin wengo onebeo mitmakamo alukum ibo baabei kesoa ne ibo mo baabenita Ibo ne okok nakabo ge baabenimibabe. Ne ibo nekwalo ge baabeiobe. <sup>16</sup> Ibo nesuo tlibbuo ilib bobol temo mo tlim blimobe. Neta ibo dlakania nganabeia tliba baabena Ibo okok olo okok kemine ge baabeibio kesoa okok olo mo blimanomobe. O amit namabobe. Ibo ne okok ayam olo okok kebianiba ne niniin dimo Aye Gode baabaniba Kobo inamin namino nabonale genimibo e inabenamabebe. <sup>17</sup> Ne baania Ibo ib sinwalo gobesese nine genamabibo ge baabesebe.

*Nakaia unangai dabalim kukubo wafu blib ile Yesuse meletani makaa dlanomabiobe.*

<sup>18</sup> Yesuse e okok aleyemin naka ni imin baabenea Nakaia unangai dabalim kukubo wafu blibi ibo makaa dlaib mole ibo funaniba I sino Yesuse inaha binibbiota nisa nayemiobe geine! <sup>19</sup> Ibo dabalim kukubo wafunib mole i funaniba I nini ninekobo geniba gobenomabib otane ne ibo dlakaia dabalim kukubo deibueibbio kesoa i ibo makaa dlanomabiobe. <sup>20</sup> Ne wengo sino baabeio kla funaine! Okok nakae mo sum aneta e kimanin nakae mo dababunemebabe. Inamin kesoa nakaia unangai ib kimanin naka ne kukub misiamo omkanemib mole i ne okok naka ibsa

kukub misiamo omkayemomabiobe. Eka i ib kimanin naka ne wengo wentib mole i ne okok naka ib weng osa wentomabiobe. <sup>21</sup> Otane i ne nemane tlibio nakae Gode tekein kebibba kesota i kukub misiam olo nayemomabiobe. Niminbabe, ibo ne meletanobe. <sup>22</sup> Ne mo tenita ne weng osa ne Aye weng osa i mo baabeim blim biamio i mo tekein kenibta e Gode miinobe, God eta e dabane tlebiota okok olo okok kebebe genomabibbabe. Ne tenia weng moton olo i aleyebi otane i mo bainobo gabibbabe. I inaniba ne mo bainobo gabibba kesoa i mo baanibta Nakai mo tenibta kukub ayam ni alebeim blim kesoa henganobbibo genimibe! <sup>23</sup> Nakaia unangai ne makaalatne blib ile ne Ay esa makaalaba bliobe. <sup>24</sup> Ne tenia okok homono sino nakai inamin okoko mo nabinabibbao naia i watemibbiobe. Ne inamin okoko mo naim blim biamio i ne mito mo tekein kenibta God eta nemane tlibiobe genomabibbabe. Otane ne okok olo nabio i wateniba i sma ye ne Aye ni dumo makaa dlabliobe. I inabib kesoa ne Aye ni dumo baanoba I hengmin gamobo gabuobe. <sup>25</sup> I kukub olo nabibo ili hekmel weng mako baanoa Ne inamin namin misiamo mo naim blim otane i ne makaa nemfa binibbiobo genobuo i bain inabiobe.

<sup>26</sup> Weng moton omin Hobe Aye Gode deibanea tenea ibo daabenamabe neta dabaita teneta ne weng sango e nakaia unangai omkayemabebe. <sup>27</sup> Ibsa ina bianiba ne weng sango omkeimamine! Niminbabe, ibo ne okoko mema kilonia okok kemi dim ye beketne biam biniba inamin namin okoko watemib kesoa ibsak omkeimamine ge baabesebe.

## 16

<sup>1</sup> Yesuse e okok aleyemin naka ni imin baabenea Ne weng ele baabei olo ne funania Sinanoa inamin namin kukub misiamo ib dimo tam tesoa ib bainobo galino deibonimiobo ge funanita weng olo baabeiobe. <sup>2</sup> Kukub olo inaminobe. Yuda naka maki ibo baabeniba Ibo Gode am temo mo lotu kemibe ge baaniba fotebe nabianiba eka mak ile funaniba Yesuse okok aleyemin nakai yemin kukub olo Gode okokobo geniba i ibo yebiam nomabiobe. <sup>3</sup> I inamomabibo Aye ni dumo i mo tekein kebibba kesota namomabiobe. <sup>4</sup> Sino ne sma bli kesoa ne weng olo ibo mo baabeim blim otane memalo ne deibe unanggi kesoa weng olo baabenamabibe. Sinanoa i inayemibo ibo funanibta Sino Yesuse weng olo babenebiota nayemiobe geine ge baabesebe.

*Gode Hobe okoko inaminobe.*

<sup>5</sup> Yesuse e okok aleyemin naka ni imin baabenea Ne memalo monia ne nemane tlibu esu unang genami otane ibo ne mo baatnenibta Kobo fab unamabebe? ge baatneim blim bliobe. <sup>6</sup> Ne inangge baabesia ib bobol tem daako ilum omfubeno <sup>7</sup> otane ne bain baabenamabibe, ne deibe unamabi olo klayamobe. Niminbabe, ne mo unim blim kei mole Gode Hobe mo teneta ibo daabenamabebabe. Otane ne unami ota e dabaia tenea <sup>8</sup> nakaia unangai dabalim olo blibi aleye biane baabenea Ib bobol tem funino misiamobe. Ibo hengmin kukub osa eka kukub molot wafunin kukub osa eka Gode nakaia unangai kukubo klanamabe osa o mitmakamo klaom tekein kebobbabe. <sup>9</sup> Ibo Yesuse mo bainobo geim blim bliob klab kukub olo ibo hengmin kukubo wafu bliobo gesea i baaniba Ni henganobobo gesiba <sup>10</sup> eka e imin baabenea Yesuse kukub moloto nanea atdimo kaanea ib hengmino walubenea imin hananea ulanea e Ay esu unebuo ibo e imino mo atemomabibbabo ge baabenemeo i funaniba Sino Yesuse weng olo baabenebuo bain inanobe. E kukub moloto nanebo gabiba <sup>11</sup> eka weng mak osa baabenea Gode dabalimo komoke Gululame kukubo klanea baabanea Keb titilo blimubkenoko ge baabanebio kesoa ibo klaine ge baabenea i funaniba E nib kukub osa inanea klanamabe kesoa nibo klanomo genomabiobe. <sup>12</sup> Ne weng homono ye bua baabenamabi otane ibo weng olo mitmakamo alukumo mo tekein kenomabibba kesoa ne memalo weng olo alukumo mo baabenimibabe. <sup>13</sup> Otane Gode Hobe weng moton omin eta teneta bain wengo alukum alebeneta tekein kenomabiobe. E inamabeo ele bobol tem funino mo oyemabebabe. E Aye wengo ohabea wentebe ota oye biane eka inamin namino sinanoa tam tlamabo weng osa oye biam namabebe. <sup>14</sup> E inabea ne inamin namin wengo baabaia wentenea ibo omkayemeo kukub olo e ne ninino nemtouleb namabebe. <sup>15</sup> Ne Aye Gode bobol tem funino alukum tekein kebi kesota ne baabenita Ne weng ota Hobe omkahabita ibo omkayemabebo ge baabeiobo ge baabesebe.

*Yesuse baanea Ib bobolo ilum omfubenamabo otane sinanota imin seinomabiobo geniobe.*

<sup>16</sup> Yesuse e okok aleyemin naka ni imin baabenea Namomo dimo ne deibe unamio ibo ne mo natemin blim tab unanibta yota imin natemomabiobo ge baabesea <sup>17</sup> e okok aleyemin naka maki i sinwalo obianiba E weng olo fatnamin weng baabenene? E baanea Namomo dimo ibo ne mo

natemin blim tab unanibta yota imin natemomabiobo ge nabiane a eka weng mak osa baanea Ne ulania ne Ay esu unamabi kesota weng olo baabeiobo ge nane yole <sup>18</sup> weng olo mitmakamo fatnamine? Ni mo tekein kebobbabo ge omsiba <sup>19</sup> Yesuse i bobol tem funino tekein kenea yate mea i weng olo mitmakamo baabanom genabib kesoa yatemnea baabenea Ne enangge baabenita Namomo dimo ne deibe unamio ibo ne mo natemin blim tab unanibta yota imin natemomabiobo ge baabei olo weng ota ibo baatnenom geniobta obibo? <sup>20</sup> Ne bain baabenamabibe, ne ibo deibe unamabiobo bobol ilum omfubenoa memomabib otane dabalim nakaia unanga ile seinomabiobe. Ib bobol temo ilum omfubenamabo otane sinanoa ne imin hananimio dimo ota ibo imin seinin bobolo wayota seinomabiobe. <sup>21</sup> Ibo makob unango memei dlanang genabo ulabobe. O dlanang gamo enino omubonoa o mo seinomobabe. O enwebua dla yatemnoa enino blimubonoa dokobonoa deibonoa seinamabo <sup>22</sup> inaniba ibsa memalo dimo ibo bobol temo ilum omfubebu otane sinanomo ne imin hana tliba natenibta ibo imin seinomabiobe. Ibo inanimibo naka maki teniba ib seinin omlabenamino bliobe. <sup>23</sup> Inaniba seinimib dimo ibo ne mo baatnenibta Kobo inamin namino nabonale genomabibbabe. Ne bain baabenamabibe, ibo Aye Gode baabaniba Yesuse niniin dimo ota kobo inamin namino nabonale genimibo e bain nabenamabebe. <sup>24</sup> Sin osa mema dim olosa ibo ne Aye mo baabanibta Kobo Yesuse niniin dimo ni inamin namino nabonale ge baabaim bliobe. Ibo Inamin namino nabonale genimibo e nabenea kla seinomabiobo ge baabesebe.

*Yesuse titilo dabalim kukubo gaisoniobiobe.*

<sup>25</sup> Yesuse e okok aleyemin naka ni imin baabenea Ne sino inamin namin weng olo saa weng oye binabi otane sinanomo saa wengo imino mo oyemibabe. Ne Aye weng sango keim oyemabibe. <sup>26</sup> Amoyo dimo ibo ne mo baatnenibta Keb Aye baabaneba ni daabeneko genomabibbabe. Ibmeye ne niniin dimo ne Aye baabaiba e ibo daabenamabebe. <sup>27</sup> Niminbabe, ibo obianiba Yesuse bain God esu ut bianeta daakeneta nisu ele tlebiobo ge obianiba ne gotne bliob kesoa ne Ay esak ibo gobe biane daayebebe. <sup>28</sup> Ne bain Ay esu ut danita daakenita dabalim ele tlibiobe. Memalo ne dabalim olo deibonia imin monia Ay esu unang genabiobo ge baabesea <sup>29</sup> e okok aleyemin naka ni baabanoba Bainobe, memalo kobo weng olo saa wengo

deiboneba keim baabenebobe. <sup>30</sup> Kobo inamin namino alukum tekein kebeobe. Ni inamin namin mako o wengo mo baabkeim blim biob otane kobo sin tekein keneba alebeneb kesoa kobo bain God esu ut bianeba tlebbiobo gesoba <sup>31</sup> Yesuse ni baabenea Ibo funaniba Memalo ni bainobo gabuobo gabib otane <sup>32</sup> namo namo dimo ibo alukum skilaniba ilib bib am onon tlaniba nenekiem deitne unomabiobe. Ibo inanomabib otane ne nenekiemo mo biamabibabe. Ne Aye tena biomabbiobe. <sup>33</sup> Ne funania Ibe nete nanoba nib bobol temo makob anoba ibo tosaniano deiboniba bobol ayam nine ge funanita weng olo baabeioibe. Nakaia unangai dabalim kukubo wafu bliibi ibo kukub misiamo omkayebiba enin kino watememomabib otane ibo mo tosanimibe! Niminbabe, ne dabalim kukubo gaisoibio kesoa ne ibo kimanamabibo ge baabesebe.

## 17

*Yesuse Gode baabanea Kobo ne okok aleyemin nakai kimanale ge baabasebe.*

<sup>1-2</sup> Yesuse weng olo oyebeo blimanao e gabam delubmanea abilim ut teme bianea Gode baabanea Ay kobo keb titilo omneneba nemfaka nebbua ne nakaia unangai alukum kima bliibe, nakaia unangai kobo dlakaneba baabeneba Ibo Yesuse meletan aine ge baabenebbuei ne afen smike amit nine dobia amit nomabib kesoa kobo kukub ayam olo nakaia unangai alebenamabeb amo tlobe. Kobo ne niniino nemtoubleb neba nesak keb niniino kemtoubleb nano! <sup>3</sup> Afen smike amit nin ele mitmakamo inaminobe. Nakaia unangai nemie ile kobo bain kla tekein keniba Ae klebkciem klebta God motonobo geniba eka kobo Yesuse Klaist ne nemaneba tlibio nesa kla tekein kenaine getabe. <sup>4</sup> Kobo ne baatneneba Inamin namin okok olo okok kemale ge baatneneba namaneba daakenia dabalim ele biania okok olo alukum klabinibuo kukub olo ne keb niniino kemtoubleb binibiobe. <sup>5</sup> Sinanggwano dabale mo klaim blimo dimo Ay kebtet netem nanoba dum asu kebianoba kobo ne niniino nemtoubleb binebbio inaneba memalosa ne kebsuo na tlamio ne niniino imin nemtoubleb nale! <sup>6</sup> Kobo dabalim naka maki dlakaneba keb meletan aiba baabeneba Ibo Yesuse meletan aine ge baabenebbuo ne naka eli keb kukub ayamo wengo alebeia i keb wengo kla wentibbiobe. <sup>7</sup> Memalo i tekein keniba Ne inamin namino alukum kebta omnebbiobo geibobe. <sup>8</sup> Keb wengo baatnenebuno ne i baabeia wenteniba baaniba Kobo bain God etem nabianibta e kamaneta

daak tlebbiobo geniba bainobo gabioibe. <sup>9</sup> Ne baabkenamabio kobo nakai dlakaneba baabeneba Ibo Yesuse meletan aine ge baabenebbuei daabenale genita baabkenamabibe. Niminbabe, i kebmibe. Ne mo baabkenita Kobo nakai dabalim kukubo wafu bliib ita daabenale genita okebibabe. <sup>10</sup> Nakai ne meletan animibi makob nib dum nib meletanobe. I kukub ayam wafu bliib kesoa i ne niniino nemtoubleb bliobe. <sup>11</sup> Ne memalo dabalim olo deibonia kebsu natlang genami otane ile sma dabalim ele biomabiobe. Ay kobo hengmin blim kiningobe. Kobo nakai dlakaneba Ibo Yesuse meletan aine ge baabenebbuei keb titilo sino ne omnebbu olota isa omyeneba kimaneba i makob elekiem aniba makob nib dumo nanoba elekiem biob inaine! <sup>12</sup> Sino netem iten nabio dimo ne keb titil olo omnebbuo omania i kima bliia i alukum klayam binibbu otane naka elekiem eta aseinin bib unamabebe. E inanamabeo sinanggwano keb buk tem wengo baanobuo bain anobe. <sup>13</sup> Ne dabalim olo blio memalo deibonia kebsu natlang genami kesoa ne funania Ne seinio i bobol tem daako bibenoko ge funanita weng olo obibe. <sup>14</sup> Ne keb wengo naka eli omia wentiba nakaia unangai dabalim kukubo wafu bliibi i yatemniba makaa dla bliobe. I inayebibo niminbabe, ne dabalim olo sakba kesoa isa inaniba dabalim nakao deiboniba makob ne ulab aib kesota i nayeioibe. <sup>15</sup> Ne mo baabkenita Kobo naka eli nakaia unangai dabalim kukubo wafu bliib isuo deibeneba dleb one ge baabkenimibabe. Ne baabkenamabio Kobo i kla kimaneba Gululame i bainobo galino kwatwaten dabenamino deibeneko genita okebibe. <sup>16</sup> Ne dabalim olo sakba kesoa isa inaniba dabalim nakao deiboniba makob ne ulab aibobe. <sup>17</sup> Keb wengo bainobe. Kobo i dlakaneba i keb wengo wente bianiba keb okoko olota okok kemine! <sup>18</sup> Kobo ne nemaneba tena nakaia unangai dabalim kukubo wafu bliib isu ele tlibio inaniba nesak naka eli dlaia moniba nakaia unanga elisu unibbiobe. <sup>19</sup> Ne keb wengo wente biania kleb okoko olob okok kebibe. Ne funania I ne nateniba isa Gode wengo wenteniba ele okoko olota okok kemine ge funaioibe. <sup>20</sup> Ne weng olo baabkenamabio kobo naka eli ilita daabenale babe. Nakaia unangai naka eli wengo wenteniba ne bainobo getnenomabib isa daabenale genita okebibe. <sup>21</sup> Ne funania Ay kobo i daabeneba elekiem aniba makob nib dumo nanoba elekiem biob inaniba item nibtem nanoba makob elekiem anomo! I inanimibo bainobo galinba nakaia unangai yateniba baaniba Yesuse bain God eta dabane tlebiobo genomabiobo ge fumbibe.

22 Keb titilo omnebbuo titil olo ne i omya ota daabenoa nib dumo elekiem biob inaniba isa elekiem aine! 23 Ni sinwalo elekiem anoba makob nib dumo elekiem biob inanomo! Ne funania I elekiem aib mole nakaia unangai dabalim kukubo wafu blibi yateniba baaniba Gode Yesuse dabane tlebua goba bianea e Yesuse meletan isa inanea gobe biebo genomabiobo gabibe. 24 Ay kobo ne fumbio Naka ele donebbu eli, ne bibo unamabio isa moniba ne baka bianiba ne titilo ayal inamin einoa watemine gabibe. Sinanggwano dabale mo klaim blimo dimo kobo gotnenea titilo ayal inamin einobu olo omnebbiobe. 25 Ay kobo naka molotobe. Nakaia unangai dabalim kukubo wafu blibi kobo mo tekein kebibba otane nele kobo tekein kebibe. Eka naka elisa tekein keniba Kobo bain ne nemaneba tlibiobo gabio. 26 Ne keb kukubo i alebeibiobe. Ne funania Kobo ne gotnenin kukubo i bobol temo bibenoa netem item nanoba elekiem anomo ge fumbi kesoa ne kobo i amitie aleybibo ge baabasebe.

## 18

*Nakai teniba Yesuse afu debeb onsiobe.*

*(Matyu 26:47-56; Mak 14:43-50; Luk 22:47-53)*

1 Yesuse Gode wengo ohabeo blimanao deibonea esa e okok aleyemin naka nisa tanoba aaye niniino Kidlone baaninobe, e daal tam helanoba watnoba as olib san dolimin wat beboba 2-3 Gode amo kimanin nakai komokwal isa eka Felisie isa i Gode amo deib toulalin naka maki baabeniba Ibo moniba Yudase bekeba unine ge baabeniba dlaiba moniba Yudase Yesuse komokwali dobyamabe naka esu ye mo temiba Yudase ni sinwalo Yesuse dletnea monoba damib olo une bianoba tekein kebinabe kesoa e awa genalin naka maki dlonea eka Gode amo deib toulalin naka eli dlonea e ayal osa kwam osa oletniba teniba damib ele tetesiobe. 4 Yesuse inamin namin olo e dimo tam tlamabo e sin tekein kebe kesoa e monea isu meb unanea baabenea Ibo waneta hen tebib? gesea 5 i baabaniba Ni Yesuse Nasalet bib sak eta hen tebuobo gesiba e baabenea Banetabo ge baabasebe. Yudase Yesuse komokwali dobyebio naka esa i baka bietabe. 6 Yesuse baabenea Banetabo ge baanabea i abuk sin nininiba gimon sin dleb daaknoa blam biniba imin hana utesiba 7 Yesuse imin baabenea Ibo waneta hen tebib? gesea isak imin baabaniba Yesuse Nasalet bib sak eta hen tebuobo gesiba 8 Yesuse baabenea Ne sin baabeniba Banetabo gabi ole ibo neta hen tebib biamo ne okok aleyemin naka elile deibeiba unine ge baabasebe. 9 E weng

olo baaseo e sino Gode baabanea Nakai kobo donebbuei ne kima blia i alukum klayam blib otane elekiem eta aseinin bib unamabebo ge baabanebuo weng olo bain ansobe. 10 Saimon Fitae e bainate tobonea Gode amo kimanin nakai i komok sume e okok nakae, e niniino Malkase, ananang genea klone kweital da eta taisanea tesa 11 Yesuse Fitae baabanea Keb bainate toboneba ele mib tem tohtenanale! Ne Aye nemfakanea baatnenea Kobo enin kino watemale genebio kesoa ne inanamabibo, kobo mo tolobo genemebe ge baabasebe.

*Awa genalin nakai Yesuse afu debetniba moniba Anas esu onsiobe.*

12 Yesuse Fitae inanngge baabase awa genalin naka isa eka i kimanin naka esa eka Yudai deib toulalin naka isa i Yesuse afuniba sayo gebaniba 13 debeb moniba komoke Anase Kaiafase molim esu onsiobe. Bifole ye dime Kaiafase Gode amo kimanin nakai komok sum am bietabe. 14 Sino Kaiafas ele e meletani Yudai komokwal maki baabenea Naka elekiem ele ananoba kaanemeo Lom teni Yuda nibo alukumo mo yalaibbabe. E ananoba kaanemeo nibo alukum daabenea klayam nomabbio kesoa kukub olo klayamobo gebanebio naka etabe.

*Fitae baanea Ne Yesuse okok aleyemin nakababo gesebe.*

*(Matyu 26:69-70; Mak 14:66-68; Luk 22:55-57)*

15-16 Saimon Fitae tem eka Yesuse okok aleyemin naka make tem naniba i Yesuse debeb unibo kan moniba Gode amo kimanin nakai komok sume am onsiobe. Yesuse okok aleyemin naka ele Gode amo kimanin nakai komok sume tekein kebe kesoa i Yesuse debeb talaniba daam tem unibo e kan unea eka Fita ele bib tam bia Yesuse okok aleyemin naka ele inanea baka tam danea imin tanea unango amito kimabuo baabonea Ne neke mo debeb tam tlamine? gesea o Ae gesoa e Fitae baaba debetnea dab tamniba daam tem tam bliba 17 unang olo Fitae baabanoa Keba naka ele okok aleyemin nakabo gesoa e baabonea Yeye ne e okok aleyemin nakababo gesea 18 deibanoa okok naka isa eka Gode amo deib toulalin naka isa gil dububeso ase fa tefubibo Fitae ye baka bianea ase tefu monsebe.

*Gode amo kimanin nakai komok sume Yesuse kil oha monsebe.*

*(Matyu 26:59-66; Mak 14:55-64; Luk 22:66-71)*

19 Gode amo kimanin nakai komok sume Yesuse e okok aleyemin nakai wengo kil

baabanea Yesuse yang kesa e imin baabanea Kobo keb wengo nakaia unangai omkaye binabeb weng osa baatnenale ge baabasea <sup>20</sup> Yesuse baabanea Ne wengo nakaia unangai ayoko mo omkaye binabibabe. Ne monia Yudai Gode am temo minabibo keim ye omkeima biana eka Yudai Gode am sumo tem tamo minabib biam osa monia keim ye omkaye biam binabibe. <sup>21</sup> Kobo nimin kenebta ne kil onebebe? Nakaia unangai ne wengo wente binabibi tekein kebiobo, ita baabenebta baabkeine ge baabasea <sup>22</sup> eka Gode am sumo deib toulalin naka make Yesuse wengo wentenea baabanea Kobo Gode amo kimanin nakai komok sume inamin wengo mo ohamebe ge baanea watnea keneng wat biangowabasea <sup>23</sup> Yesuse baabanea Ne weng misiam baanimio kobo baaneba Yo misiam nanebobo genamin otane ne wengo ayamo olota obi yole kobo nimin kenebta nananebe? ge baabane otane naka ele mo yang ke baabaim blimobe. E deibanea <sup>24</sup> Yesuse sayo gebaibubuo sma teksa ye bia Anase dabanea monea Gode amo kimanin nakai komok sume Kaiafas esu onsebe.

*Fitae imin baanea Ne Yesuse okok aleyemin nakababo gesebe.*

*(Matyu 26:71-75; Mak 14:69-72; Luk 22:58-62)*

<sup>25</sup> Saimon Fitae sma aseinin ye mabianea aso tefubea naka maki baabaibo Keba e okok aleyemin naka kebtabo gesiba e baabanea Yeye ne e okok aleyemin nakababo ge baabasea <sup>26</sup> Yesuse afu dobonabib dimo Fitae bainate tobo blelanea Gode amo kimanin nakai komok sume okok nakae klone tabiabanea unibe e ninek make ye biane esa Fitae baabanea Keba damib wato ye bieba katem tlibiobo gesea <sup>27</sup> Fitae imin Yeye genabea weng tosa yota kakaluke nganasebe.

*I Yesuse debeb moniba Lomo komoke Failat esu onsiobe.*

*(Matyu 27:1-2,11-31; Mak 15:1-20; Luk 23:1-5,13-25)*

<sup>28</sup> Yudai Yesuse Kaiafase amo deiboniba debeb moniba Lomo komoke Failate am onsiobe. I inaniba onsiobo amo bomanang genabotabe. Yudai singkalin am sumo tlang genabo kesoa i funaniba Nib hekmel wengo baanoa Fasoba imeno downomabib amo meb tebiamo ibo Yudabai amo mo unaibe! Ibo inanimibo Gode kin dimo misiam anomabiobo genobiobo ge funaniba i amo tam onamino deiboniba bib tam bliba <sup>29</sup> Failate tam tanea baabanea Naka ele fatnane biota kot kebanom genibte? gesea <sup>30</sup> Yudai komokwali baabaniba E kukub misiamo

mo naim blim biameo ni mo debeb tenobta kebsuo mo tlaobbabe. E misiam naseta debeb tlobobo gesiba <sup>31</sup> Failate baabanea Ibmaye debeb moniba ilib hekmel wengo baanobio inaniba kot kebaine gesea i baabaniba Lom sel ib hekmel wengo baanoa Ibo nakai mo yenaiba kaanimibe genobiobo ge baabasiobe. <sup>32</sup> (Sino Yesuse e okok aleyemin naka ni baabanea I ne atdimu nemasaniba silo biki nenaiba kaanamabibo ge baabenebue Lom teni Yesuse inabasib olo e wengo bain ansobe.) <sup>33</sup> I Failate inange baabasiba e deibe tanea am tam unanea Yesuse nganabanea tesea baabanea Kobo Yudai komok sume kebtio? gesea <sup>34</sup> Yesuse baabanea Kobo weng olo kebmaye kleb bobol tem funanebta baaneblek naka mak ita ne weng sango baabkeibbiota baanebo? gesea <sup>35</sup> Failate baabanea Ne keb ninek Yudababe. Kleb ninek isa eka kleb Gode amo kimanin nakai komokwali isa imaye kemeb teniba nesu ele daibobe. Kobo fatnamin kukub misiam nanebbiote? gesea <sup>36</sup> Yesuse baabanea Ne dabalim olo kimanin naka biamio ne meletan item eka nakai ne nafu nemeb tlibbue item naniba awa geniba i ne tolobo geiba klabuto mo getnenomabibbabe. Ne kimanino afet kesota ne meletani Yudai komokwali mo tolobo geim blim deibeibta klabuto ge nemeb tliobo gesea <sup>37</sup> Failate baabanea Kobo baaneba Ne komok sumobo gabebo? gesea Yesuse baabanea Kobo baatneneba Kobo komok sumobo gabebo? ge baatneneb olo bainobe. Gode nemfakanea nemaneta daakenita dabalim olo tlita ne biemo nemfanobiobe. Ne dabalim olo tlibuo weng moton omkeimamano genita daakenita dabalim olo tlibiobe. Nakaia unangai weng motono i bobol tem daako bibebuei ne wengo wente binabiobo ge baabasea <sup>38</sup> Failate baabanea Weng moton ole fatnamine? ge baabanea e imin tanea bib tam unanea Yudai baabanea Ne dobo ohabi otane e misiamo nanebio ne mo watemin blimobe. <sup>39</sup> Otane Yuda ib kukub inaminobe. Bifole elekieme elekieme dime ibo Fasoba imeno downom gaibo Lomo komok ne nakai klabutam biaibo Yuda ibmaye baatneniba Nakae yeta tileisaneba uneko genimibo ne tileisaia onon binabib inania Yuda ib komok sum esa tileisabenano gesea <sup>40</sup> i ngambianiba Yeye kobo naka ele deibaneba Balabas eta tileisaneba teko ge ngan monsiobe. Balabas ele naka maki yemde dlanea afobeingo ayok oiseneta klabuto ge debeb te daibbiotabe.

## 19

<sup>1</sup> Omito Failate Yesuse imin debeb tanea

am tam unanea awa genalin nakai baabe-nea Ibo teke toboniba Yesuse ande do-faine ge baabesea i inabaniba <sup>2</sup> eka is-abuninge waloniba Hasobo geniba go-holo geniba gabamone obtabbenaniba eka e youmo gamketoufabaniba youm ileme komok sumi youme ulabe tekebe doboniba dobtibilubaniba <sup>3</sup> tlahu bianiba baaban-iba Yudai komok sum kobo klayam biebo ge oha bianiba kweifam dum aniba bian-gowa anana inabiba <sup>4</sup> Failate imin monea nakai unangai baabeneu Wentine! Ne debeb tam tenia ibsu tlamabi yole nim-inbabe, ne e inamin namin misiamo mo nanebua atemim blim kesota debeb tam tlamabibo gesea <sup>5</sup> Yesuse tam tenea bib ele tesa atemiba e gabam obtab-umine obtabbenaniba eka youm ileme teke dubusaba naibbua tam tle kesoa atemnabiba Failate Yesuse dohhallaneu baabeneu Etemine! I naka ele ande do-faibbua misiam biebo gesea <sup>6</sup> Gode amo kimanin nakai komokwai isa eka Gode amo deib toulalin naka isa ateniba ngambian-iba Debeb moneba atdimo dabasaneba silo biki ananeba kaaneko ge ngansiba Failate baabeneu Yeye ne e inamin namin misiamo mo nanebua atemin blim kesoa ne mo an-nimibabo, ibmaye debeb moniba atdimo dabasaniba silo biki anaiba kaaneko ge baabesea <sup>7</sup> Yuda eli baabaniba E baaneu Ne Gode miinobo genebio kesoa ni hekmel wengo baanoa Inang genimib nakai yenaiba kaaneu genobiobo gesiba <sup>8</sup> Failate weng olo wenteneu funaneu E bain Gode miin bleka? ge funaneu tosiwaneu <sup>9</sup> e Yesuse imin debeb tanea am tam unanea baabaneu Kobo abilim data tlebbio bleka fab danebta tlebbue? ge baabane otane Yesuse mo yang ke baabaim blim deibaseu <sup>10</sup> Failate baabaneu Kobo nimin kenebta ne wengo yang ketnenamino deitnenebe? Ne komok kesoa titilsabe. Ne baania Tileisaine genimio tileikenomabiobe. Eka ne baania Debeb moniba atdimo dabasaniba silo biki anaiba kaaneko genimio i inaniba kemeb moniba atdimo kamasa silo biki kanaiba kaanamabeb kesoa kobo olo mo tekein ke-bebbayo? gesea <sup>11</sup> Yesuse baabaneu Gode titilo kobo mo omklam blim biameo kobo ne inamin namin kukubo mo omnamabeb-babe. Inamin kesoa kobo ne nananeba kaanimio kukub olo hengmin otane nakae ne nemeb tenea kobo nemklebio nakae e hengmin ota dot sumobo ge baabaseu <sup>12</sup> Failate wenteneu funaneu Ne fatnamin kukub ota nanita e klabuto tileisaia unam-abene? ge funase otane Yudai ngambian-iba Nakae baaneu Ne komok sumobo gene mole e Lom ten ib komok sume makaa dofaneta inamin wengo baanamabe kesoa kobo naka ele tileisaneb mole kebsa

Lom ten ib komok sume makaa dofanebta nanamabeobo ge ngansiba <sup>13</sup> Failate i weng olo wenteneu funaneu Ne Lom ten ni komok sume mo makaa dofanimibabo ge-neu tanea Yesuse debeb tam tenea bib ele dasebe. Kukub klamin nakae e biino tom kwamo da oleb teniba dabalim daake heba ofa ofa bianiba ngananiba o dim uto biin toulalino omfaibbua kukub klamin nakae toulabeu Yudai owe bianiba Gabata ge owe binabibo Failate o dim ut toubi-etabe. <sup>14</sup> E inaseo kelanoa Yudai Fasoba imeno klanomabibo amo tlotabe. Failate inaneu toubianeu Yudai baabeneu Ib komok sume ele biebo, atemine gesea <sup>15</sup> i ngambianiba Debeb moneba atdimo dabasaneba silo biki ananeba kaaneko ge ngansiba Failate baabeneu Ibo fumbibo ne ib komok sume atdimo dabasaneu silo biki anaiba kaaneko gabibo? gesea Gode amo kimanin nakai komokwai baaniba Lom ten ib komok sume Sisae elekim eleta nib komok sumobo ge baasiba <sup>16</sup> Failate i wengo wenteneu baaneu Yesuse atdimo dabasaniba silo biki anaiba kaaneko ge baabesebe.

*I Yesuse atdimo dabasaniba silo biki anaiba kaansebe.*

*(Matyu 27:32-44; Mak 15:21-32; Luk 23:26-43)*

Failate inang gene kesoa awa genalin nakai Yesuse debeb moniba <sup>17</sup> ase e dabasa ananomabib ase obaliba obnakatoulebna Yelusalem bibo deiboniba moniba bibilime niniino Golgota ye onsiobe. Golgota olo Hiblu wengobe. Eka nib weng ole Naka Gabamon dikinobe. <sup>18</sup> I inaniba Yesuse youmo gemetlabaniba atdimo dabasa silo bikibaniba eka naka asu isa inabeniba atdimo dlasa silo bikiniba make obo milim biki biki naniba eka Yesuse ele isak daak biki nasiobe. <sup>19-20</sup> Failate weng mako enangge baa dolaneu YESUS NASALET BIB SAKE YUDAI KOMOK SUMOBO ge baa dolaneu deskineu atosino Hiblu weng dolaneu eka atosino Lom teni ili weng dolaneu eka atosino Glik weng dola naneu omeb ut-neu Yesuse ase dabasaniba silo bikibaibbua ele gabam obeb ut dabie ut omginebua bibilim olo bib asak meb kesoa Yuda nakai unangai homoni weng olo wateme bianiba kimonsiobe. <sup>21</sup> Yudai Gode amo kimanin nakai komokwai weng olo wa-teniba Failate baabaniba Kobo baaneu Yesuse Yudai komok sumobo ge baanebbu olo misiamobe. Kobo weng olo deiboneba baaneu Naka ele baaneu Ne Yudai komok sumobo genebio ge baanebta dolanale gesiba <sup>22</sup> Failate baabeneu Ne dolaibio iwito mo watlanita imino mo dolamibabo, makob sin ye dolania deibueibiobo ge

baabesea <sup>23</sup> awa genalin nakai Yesuse atdimu dabasaniba silo bikibaniba youmo gemeisa olaibbuo nakai asuke asuke na eli olo kikiniba elekiem ke debeb onon tlaniba eka mak ele tananiba debeb tetenaniba dolonamino deiboniba besa unin tlin ye tunum uteniba kwelam ele daniba tanaibbu ele doboniba <sup>24</sup> baaniba Ele mo banomobe! Dofa bianoba tomo glim kimino olonoba tlan habianoba waneta mak nibo gaisene mole eta youm ele debeko ge baaniba inasibo sinanggwano Gode buk temo weng mako dolaniba baaniba I ne youmo oitneniba kikiniba ola bianiba tomo glim kimino olonoba tlan habianiba naka make gaisene youme make debeb unebiobo genobuo awa genalin nakai weng olo baanobuo iwat naib kesoa weng olo bain ansobe.

<sup>25</sup> Unang maki Yesuse ase dabasaniba silo bikibaibbue kiki ye mablibi Yesuse biem osa eka o neng osa eka mako niniino Maliao Klofase alal osa eka mako niniino Maliao Magdala bib ulak osa itabe. <sup>26</sup> Yesuse e biem osa eka e gotne binabe nesa ni esu meb ye mabioba yatemnea e biemo baabonea Biemo naka ele ob miin anebo ge baabonea <sup>27</sup> eka e okok aleyemin naka nesak baatnenea Unang olo keb biem anobo ge baatnenea ne o omeb monia makob nene biemo kima bli inania kima binibiobe.

*Yesuse kaansebe.*

*(Matyu 27:45-56; Mak 15:33-41; Luk 23:44-49)*

<sup>28</sup> Yesuse tekein kenea Ne okoko alukum blimutnenobo gene kesoa e baanea Ne aan teb dubutnenobo ge baaseo e weng sango Gode buk temo baanobuo bain inasobe. <sup>29</sup> I Yesuse aa wengo baaneo wenteniba deibnamtab inamino omoniba ase niniino hisobe tunge toboniba bilaniba omeb daakniba waen aaye tole dis tem daake ibaibbue omabueiba dikibasoa omeb utniba Yesuse omdibasiba wantama <sup>30</sup> notnot ge dowonea baanea Ne okoko ye blimutnenobo ge baanea e smike dabane uea gabam delabmanea kaansebe.

*Awa genalin nakae anate tobonea Yesuse geilam wat bikinea tula temsebe.*

<sup>31</sup> Am olo dimo Yudai Fasoba imeno alukum klaib skabo bomanomo singkalin am sum bomanoa singkalomabib kesoa i funaniba Nib hekmel wengo baanoa Ibo nakaia unangai kaanimibi mo deibeibta singkalin amo mo nimibe genobiobo geniba i Failate baabaniba Kobo keb awa genalin nakai baabeneba i moniba naka eli kumuno ono haubeiba i hebmamsab kaaiba nakai teniba dleb mo dolbueine gesiba <sup>32</sup> Failate Ae ge baabeneba e awa genalin nakai dlanea moniba naka asu nai

Yesuse i sinwal yenanom geniba atdimu dlasaniba silo bikibeibbuei kumuno ono haubeib <sup>33</sup> otane i Yesuse atemiba e dam ye kaanebio kesoa i e kumuno ono haubanamino deibaniba <sup>34</sup> awa genalin naka make anate tobonea Yesuse geilam wat bikinea tulasea ilem esa aay esa singa tesebe.

<sup>35</sup> Weng olo bainobe. Olo ne nemaye nene kino watemi biota weng olo dolanamabi kesoa ibsa amitie bainobo geine! <sup>36</sup> I inaniba Yesuse ono haubanamino deibaniba eka anat eta toboniba bikiniba tulasibo Gode buk temo wengo baanoa I e ono haubanimbababo gena bianoa <sup>37</sup> eka Gode buk temo weng mak osa imin baanoa I naka ele biki tulaiba atemomabiobo genanobuo bain inasobe.

*I Yesuse debeb moniba tom tem wat dobbusiobe.*

*(Matyu 27:57-61; Mak 15:42-47; Luk 23:50-56)*

<sup>38</sup> Naka make, e niniino Yosebe, Alimantia bib sake e Yesuse okok aleyemin naka otane e Yudai komokwali tolo tosananea Ne Yesuse bainobo galin nakabo genamino kimik gebinabe otane yo dimo e monea Failate baabaneba Ne Yesuse mo debeb unamine? gesea Failate Ae kebmaye debeb one gesea e monea Yesuse debeb unang genabea <sup>39</sup> Nikodimase sino kwitimid tetemnea Yesuse temna weng obinibbio nakae wel aayo tang kunin ayamo o abilo 45 kiloglemobe, oletnea tetemnea <sup>40</sup> Yosebe dab keniba makob Yuda ni nini haami dolbunom genoba nanabob inaniba i Yesuse doboniba wel aayo tang kunin ayamo oloniba alibaniba youm tekeo dloniba gebasiobe. <sup>41</sup> Asiam damib mako Yesuse atdimu dabasa anaibbuo kiki ye biotabe. Tome make damib ye bia i misiketoufaibbuo otane i sino haami e temo mo dolbueim blimobe. <sup>42</sup> Tom tem ele meb kesoa i Yesuse debeb moniba e tem ye dobbusiobe. Niminbabe, am olo dimo Fasoba imeno klabib amo blimanoa singkalin amo meb tlang genamo kesota i inasiobe.

## 20

*Yesuse imin hanasebe.*

*(Matyu 28:1-8; Mak 16:1-8; Luk 24:1-12)*

<sup>1</sup> Yesuse dobbunib sonoma bomanoa imin bliba bi kwinoa sibnoma Sande boman tebua klao mo glik geim blim sma mili kiki bua Maliao Magdala bib ulako monoa Yesuse gloutemo temoa tom kwame amite dobdou walibbue daleb taniba ken tam dabaibbio <sup>2</sup> kesoa atemnoa hebmamsab imin tenoa Saimon Fita esa eka Yesuse gotne binebio naka nesa baabenoa I nib



Sume kaanea tom temo dofaibbuo sang-gwan debeb unibbiobe. Ne mo tekein kebibabe, debeb moniba afet yefamak do-faibbiobo ge baabesoa Fitae ni dabsak Gloutem unomo genoba <sup>3-4</sup> dab makob blublu bebob otane ne Fitae gaisania neta sin monia gloutem ye uni <sup>5</sup> otane biin wato onamino deibonia besa delab mania biin wato watemnia eka youm ota watem nanabia <sup>6</sup> Saimon Fitae ne abuk tle eta watnea biin wat unanea youmo watemnea <sup>7</sup> eka youm make Yesuse gabame gebaibbuo esa atem nasebe. Youm ele youm mako i sinwalo makobo mo dlaim blimobe. E halbu geniba afet ye dofaibbuo atem nasea <sup>8</sup> eka sin tlibio nesak watnia inamin namin olo watem tekein kenia Yesuse bain hana unebiobo ge naiobiobe. <sup>9</sup> Ni inanobbuo Gode buk temo baanoa Gode Dofakamin Nakae kaanea Imin hananamabebo genobuo ni kibinabob otane o mitmakamo klaol mo tekein keim blim binabob biotabe.

*Yesuse tetemea Maliao Magdala bib ulako atemsobe.*

*(Mak 16:9-11)*

<sup>10</sup> Yesuse okok aleyemin naka ni inanoba imin nini am unob <sup>11</sup> otane Malia ole imin tenoa gloutem ye bianoa mebianoa gabam delab manoa biin wato temoa <sup>12</sup> abiseli youm namao dlusaniba make Yesuse gabam ofa bine dae tounea eka mak ele skil ola bine dae touna bliba yatemnabua <sup>13</sup> i baaboniba Obo fatnanebta mebebe? ge baabosiba o baabenoa I ne Sume debeb moniba afet dofaibbuo ese makobo, ne mo tekein kebibabo ge baabe nabianoa <sup>14</sup> deskinoa temoa Yesuse melen kabo ele mabia atemo otane o mo tekein kenota Yesus etabo geim blimobe. <sup>15</sup> E baabonea Obo wane dafa mebianebta hembebe? ge baabone otane o funanoa Damib kimanin naka etabo genoa baabanoa Kobo debeb moneba afet dofaneb biamo baatnenale! Ne monia debeb unamabibo gesoa <sup>16</sup> Yesuse baabonea Maliao gesea o e wengo wentenoa dluo unanoa deskinanoa Hiblu wengo baanoa Labonai ge baabasobe. Weng olo mitmakamo aleyemin naka kebtabo genaminobe. <sup>17</sup> Yesuse baabonea Ne Ay esuo mo unim blim bli kesoa obo ne mo nafunemebe! Deitneneba moneba ne nekwali baabeneba Yesuse baanea Ne monia Aye God esu unamabibe. E ibsa ib Ay Godobo genebo ge baabenale ge baabonea <sup>18</sup> Maliao Magdala bib ulako monoa e okok aleyemin naka ni baabenoa Ne Sume atemibo ge baabenoa eka e wengo baabone osa baabenasobe.

*Yesuse tetemea e okok aleyemin naka ni atemsobobe.*

*(Matyu 28:16-20; Mak 16:14-18; Luk 24:36-49)*

<sup>19</sup> Sande kwinoa Yesuse okok aleyemin naka ni dli te minoba funanoba Yudai komokwali nisa yenanomabiobo ge funanoba tosonianob kesoa amisalo neketowanoba amda tam dounoba bioba Yesuse tenea ni isak daak manea baabeneba Ibo mo tosanimibe! Bobol ayam blipte ge baabeneba <sup>20</sup> e kweilo silo bikibaibbuo osa eka anate geilam wate bikiniba tulabaibbuo osa alebesea ni watem tekein kenoba Nib Sume bain hananebo genoba kla seinsoba <sup>21</sup> Yesuse imin baabeneba Ibo mo tosanimibe! Bobol ayam blipte! Ne Aye nemanea tenia e okoko okok kebi inania ibsa dliai moniba e okoko okok kemine ge baabeneba <sup>22</sup> e hobe fugebeneba baabeneba Ne Gode Hobe dobyibo, ibo dibine! <sup>23</sup> Nakaia unangai hengmino henggabibo deibueiba ibo baabeniba Ni ib hengmino o bobolo imino mo funomabbiobabo ge baabeib mole Gode esa inanea i hengmino bobolo imino mo funamabebabe. E omlabenamabebe. Eka nakaia unangai hengmino henggabibo mo deibueim blim keiba ibo baabeniba Ni ib hengmino bobolo funino mo dokobenomobabo ge baabeib mole God esa hengmin olo mo omlabenemebabe. E amitie funamabebo ge baabeneba deibe onsebe.

*Yesuse tetemea Tomase atemsebe.*

<sup>24</sup> Yesuse imin hana tetemea e okok aleyemin naka ni atemsob olo dimo e okok aleyemin naka make Tomase, e niniin afeto Didimase blimobe. Mak nita bioba Yesuse tetemea atemobbua <sup>25</sup> bianoba Tomase baabanoba Ni Sume atemobbiobo gesoba Tomase baabeneba Ne e kweilono sil alango watemnia ne kweile melebonia eka anat alange atemnia ne kweile minia binai wat onsea hatem nanim blim kenimio ne mo bainobo genimibabo ge baabenebua <sup>26</sup> bianoba Sande elekiem kenoba Yesuse okok aleyemin naka ni alukum am tam minoba Tomas etem nanoba amisalo neketowanoba amda tam dounoba bioba Yesuse tenea ni isak daak manea baabeneba Ibo mo tosanimibe! Bobol ayam blipte ge baabeneba <sup>27</sup> e Tomase baabaneba Kobo ne kweilo wateneba sil alango meleboneba eka keb kweile tebeb wat teneba ne anat alange hatem naneba kobo bobol tem hekhek funino deiboneba bainobo genale ge baabasea <sup>28</sup> Tomase baabaneba Kobo God, ne Sumobo gesea <sup>29</sup> Yesuse baabaneba Kobo natemnebta bainobo gabeb otane nakaia

unangai ne mo natemin blim bianiba bainobo gabib ile Gode seinin sumo omyamabebo ge baabasebe.

*Yon ne weng olo mitmakamo inaminobe.*

<sup>30</sup> Yesuse okok sumo mak osa ye klabea e okok aleyemin naka ni watemobbu otane ne o weng sango alukumo mo dolanamabibabe. <sup>31</sup> Ina otane weng ele dolai olele ne funania Nakaia unangai tekein keniba Yesuse Gode Dofakamin Naka eka e Gode miin nabo geniba e bainobo geniba afen smike doboniba amit nine genita weng olo dolanamabibe.

## 21

*Yesuse tetemea e okok aleyemin naka mak ni atemsobobe.*

<sup>1</sup> Sinanoa Yesuse imin tenea Taibilias aamuk ye tetemea e okok aleyemin naka ni atemsobo wengo inaminobe. <sup>2</sup> Saimon Fitae tenabea eka Tomase, e niniin afeto Didimase tenabea eka Nataniele Galili betano bibo niniino Kena bib sake tenabea eka Sebedie melel asu ni tenaboba eka Yesuse okok aleyemin naka mak isa asu tenanoba ye mibianoba <sup>3</sup> Saimon Fitae baane Ne aameno omeh monia aningi haamabibo gesea mak ni baanobo Ni tena unomo ge baanoba daaknoba weseme tem daak tounoba monoba bianoba kwitimib beselib yo dimo aameno omdibi bianoba haabob otane ni aningi dot men isa mo dlim blimobe. <sup>4</sup> Besa ye haabob binoa bomanoa glik genabua Yesuse tenea nininalim ye mabia e okok aleyemin naka ni atemob otane ni mo tekein kenobta Yesus etabo geim blimobe. Ni funanoba Naka afetobo gaboba <sup>5</sup> e nganabenea Ten nakao, ibo aningi mo dlibo? gesea ni baabanoba Yeye gesoba <sup>6</sup> e baabenea Ibo aameno omoniba weseme kene kweital sin da eta ombianibta aningi mo dline gesea ni inanoba aameno ombianoba daak unoa aningi tlakniba sibbesiba omeh ut tlom genoba sitanoba <sup>7</sup> Yesuse gotne binabe ne Fitae baabania Ele Sum etabo gesia Fitae weng olo wentenea e youme gamo dofa bianea aningi haabeo imin dobo dubusanea wala daaknea aantem daak blelanea walanea Yesus esu unea <sup>8</sup> eka Yesuse okok aleyemin naka mak nile weseme obakanoba aningi menga goleb watnoba nininalimo kikib ye onsobo skeimba mebohe, 100 mita ese makobe. <sup>9</sup> Ni weseme ye deibanoba watnoba nininalim wat temoba ase make ye eimbianea akil dlambea aningi maki akgwai dim ye eimbiba eka blet osa ye nabio kesoa watenaboba <sup>10</sup> Yesuse baabeneo Ib aningi mema dlibi mo dleb tline ge baabesea <sup>11</sup> Saimon Fitae watnea weseme tem wato aningi aamen da wafunea menganea gilili gilili goleb

watenea nininalim ele golasea aning eli dot homon eka beselib nabe. 153 be. I dot abil otane aameno mo belaim blimobe. E inanea goleb wat dasea <sup>12</sup> Yesuse baabeneo Ibo teniba unaline ge baabene otane e okok aleyemin naka ni mo baabanobta Wankebte? ge baabaim blimobe. Niminbabe, ni tekein kenoba Sum etabo genoba deiba bioba <sup>13</sup> Yesuse daaknea bleto olonea kikibenea eka aning osa imin inanea kikibenanea downobbiobe. <sup>14</sup> Yesuse hana tlebuo e okok aleyemin naka ni atemnamino asumatna kesobobe.

*Yesuse Fitae wengo baabasebe.*

<sup>15</sup> Ni inanoba imeno downob ole Yesuse Fitae baabanea Saimon, Yone miino, naka eli ne gotne blib otane kobo ne kla gotne biebo? ge baabasea Fitae baanea Ae Sum kobo tekein kebeb yotabo ne gobke blibo ge baabasea Yesuse baabanea Kobo ne eil sibsib memei imeno gibanemale ge baabanea <sup>16</sup> Yesuse imin baabanea Saimon, Yone miino, kobo ne kla gotne biebo? ge baabasea e baabanea Ae Sum kobo tekein kebeb yotabo ne gobke blibo ge baabasea Yesuse baabanea Ne eil sibsibi imeno gibanemale ge baabanea <sup>17</sup> eka Yesuse imin baabanea Saimon, Yone miino, kobo gotne biebo? ge baabasea Fitae bobol ilum omfubasobe. Niminbabe, Yesuse baabanea Kobo ne gotne biebo? ge ohamino asumatna kesetabe. Inabasea e Yesuse baabanea Sum kobo inamin namino alukum tekein kebeobe. Kobo tekein kebeb yotabo ne kobo gobke blibo gesea Yesuse baabanea Ne eil sibsibi imeno gibanemale! <sup>18</sup> Ne kobo bain baabkenamabibe, kobo sino tembal bineb bio dimo kebmeye youmo kineba bib mako inamin bib ota unano genemebo une binebbu otane sinanomo kobo hangkalebmin anemebo keb kweilo asu tebehaneba naka maki youmo olo kibkeniba kemeb moniba kobo bibo mo goboneba Ne bib olo mo unamibabo gabeh ota kemeb mo danomabiobo ge baabasebe. <sup>19</sup> (Yesuse Fitae weng olo baabaseo o mitmakamo inaminobe. Sinanomo Fitae Gode okoko okok kebeo dafao naka maki teniba ananom gaibo e gilani onamino debia anaiba naka maki e bainobo galino watemubaniba Gode niniino dobtouleb nomabih kesota e weng olo baabasebe.) Omito Yesuse Fitae baabanea Kobo ne okoko okok kemale ge baabasebe.

*Yesuse gotne binebio ne weng sangobe.*

<sup>20</sup> Yesus esa Fita esa bebianiba e Fitae baabanea Inamin namini olo tamtlubke namabobo ge baabasea Fitae deskina temea Yesuse gotne binabe naka ne i abuk ye dosi tebi kesoa natemebiobe. Sino ni imeno wembianoba ne tam mili

watnia Yesus esu wat unania baabania Nakae waneta Sum kobo komokwali kernia kananomabibe? ge baabaibio naka netabe. <sup>21</sup> Fitae inanea ne natemnea Yesuse baabanea Sum kobo naka ele fatnabasota kaanamabene? gesea <sup>22</sup> Yesuse baabanea Ne naka ele baabania Kobo amit afen biebta ne imin tlano ge baabai mole olo keb okokbabe. Ne baabkenia Kobo ne kukubo kla wafunale ge baabkenimio yota keb okokobo ge baabasebe. <sup>23</sup> Yesuse Fitae weng olo baabaneo balianoa bainobo galin nakaia unangai wenteniba i sinwalo obianiba Yesuse baanea Yone mo kaanamabebabo ge baanebo ge omonsib otane e mo baaneta Yon ne mo kaanamabibabo ge baaim blimobe. E baanea Ne baabania Kobo amit afen biebta ne imin tlano ge baabai mole olo keb okokbabo ge baanebiotabe.

<sup>24</sup> Yesuse okok aleyemin naka nemaye inamin namin olo nene kino watemnita o weng sango buk tem olo dolaiobe. Nibo olo tekein kebianoba weng olo motonobo galomo! <sup>25</sup> Yesuse inamin namin okoko mak osa ye klabinebu otane ne o weng sango alukumo mo dolaim blimobe. Nakai Yesuse inamin namin olo nabinebuo o weng sango alukum dolaiib mole dabalim olo din tlanoa o olanamin alango hennanomabib ese makobe.

## **Abosel Yesuse okok dlasanin nakai i weng sangobe.**

### **Tekein kemin wengobe.**

Yesuse daakenea atdimo kaanea imin hananea ulanea abilim unebua bifolo 33 ese mak blimanota Luke Yesuse okok dlasanin nakai okoko nabinibbuo weng sango dolanebiobe. E mikiktemo Yesuse down wengo dolaneta omit ole Yesuse okok dlasanin nakai okoko nabinibo weng sang olo dola nanebiobe. Weng olo Gode Hobe Yesuse okok aleyemin nakai daabene moniba Yesuse down wengo bib sumo Yelusalemo omkeima bianiba eka moniba Yudia betan osa Samelia betan osa eka betan mak osa omkeimam haabinibuotabe. Fitae okoko nabinebuo weng sang ole sabta 1-12 o tem ota biobe. Eka Fole okoko nabinebuo weng sang ole sabta 13-28 o tem ota biobe.

*1:1-26 Mikiktem wengobe.*

*a 1:1-14 Yesuse imin ulanea abilim onseo wengobe.*

*b 1:15-26 Yudas Iskeliothe alango naka make imin dofasiobe wengobe.*

*2:1-8:3 Yesuse okok dlasanin nakai Yelusalem bibo binibbuo weng otabe.*

*8:4-12:25 Yesuse okok dlasanin nakai Yudia betan osa Samelia betan osa binibbuo weng otabe.*

*13:1-28:31 Fole okoko weng sangobe.*

*a 13:1-14:28 Fole bib mak bib mako haabianea Yesuse down wengo omkaye binebuo wengobe.*

*b 15:1-35 Bainobo galin nakaia unangai Yelusalem bibo mina bianiba weng obinibbuo weng otabe.*

*c 15:36-18:22 Fole bib mak bib mako haabianea Yesuse down wengo omkaye binebuo wengobe.*

*d 18:23-21:16 Fole bib mak bib mako haabianea Yesuse down wengo omkaye binebuo wengobe.*

*e 21:17-28:31 Fole klauto ge debetniba haa monsibo weng sangobe.*

1-2 Ae Tiofilas ne keb futano dola omfubkenamabibe. Sino Yesuse inamin namin okoko klavianea inamin namino nakaia unangai aleye biam bianea e okok dlasanin nakai dlakanea Gode Hobe titilo e omalea Yesuse titil olo omonea e okok dlasanin nakai inamin namin okoko alukum alebenea Gode imin debeb ulanea abilim onsebe. Ne sino buk mako inangge baania dolaiabiota memalo imin inangge baanita buk olo dolanamabibe.

*Yesuse imin ula abilim onsebe.*

<sup>3</sup> Sino Yesuse enin kino watenea kaanea imin hana bianea e ulanea abilim unamabeo amo 40 o sma ye bio kesoa e bia e okok dlasanin nakai ateme bianiba e bain Gode dofaanebiota biebo gabiba e tenea Gode kimanin kukubo e okok dlasanin nakai aleye biam binebiobe. <sup>4</sup> E inanea i tena bianiba baabenea Ibo Yelusalem bibo mo deibonimibe! Ne sino baabeniba Gode Hobe dohyamabebo ge baabeibue waisa bliba tleta mitdata onon taine! <sup>5</sup> Sino Yone nakaia unangai aaye fuellabenebuo otane ibo Gode Hob ele mo bliba sinanamobabo memalo dabanea daakenea ib bobol temo onon tlanamabebo ge baabesebe. <sup>6</sup> Yesuse e okok dlasanin nakai tena bianiba baabaniba Sum kobo memalota Lom bib seli mo dlabenebuo uniba Islel naka ni nini dabale nimaye imin kimanoba Islel ni niniino sumu benamabuo? gesiba <sup>7</sup> Yesuse baabenebuo Islel ib dabale ibma kimanomabib dimo ibo mo tekein kebibbabe. Ne ay eta am olo omfakanebuo elekiem eleta tekein kebebe. <sup>8</sup> Ina otane Ne Gode Hobe dabai tenea ibo bekebe bianea e titilo omkayebea ibo moniba Yelusalem bib sel isa Yudia betano bib mak bib mak sel isa eka Samelia bib sel isa eka bib mak betan mako blib isa alukum ne wengo omkayemomabiobo ge baabenebuo <sup>9</sup> deibe ulanea abilim unangene bebea atemebiba utnea isak ye une monea ayungo ge waisanoa i mo atemim blim kesioebe. <sup>10</sup> E inanea unea e okok dlasanin nakai abilim uto sma ye teme monsiba abiseli youm namao dlusaibbuei asuke teniba Yesuse okok dlasanin nakai isu ye tlaniba baabeniba <sup>11</sup> Galili naka ibo mo mabianibta abilim uto tememibe! Yesus ele unea atemibo sinanomo tlang game osa makob memale unea atemib inamin ye tlea imin atemomabiobo ge baabesiba <sup>12</sup> i amgolime Olibe golim ut blibo deiboniba moniba Yelusalem bib onsiobe. Amgolim ele meb Yelusalem bibo kikib ye malane biotabe.

*Yudase alango naka make dofasiobe.*

<sup>13</sup> I inaniba moniba Yelusalem bib ye unaniba utniba biino asal uto aala binabibo tem ut onsiobe. Biin olo temo ut onsiobi i niniino elitabe. Fita esa Yon esa Yems esa Endlu esa Filib esa Tomas esa Batolomyu esa Matyu esa Yemse niniin aseke Alfise miin esa Saimone Lom seli kimanin kukubo mo gobe binabeba naka esa Yemse afete miine Yudase niniin aseke esa itabe. I inaniba minabiba <sup>14</sup> Maliao Yesuse biem osa eka unang mak isa eka Yesuse ningwal isa i tetemnaniba mibianiba Gode amitie nganha binibbiobe. <sup>15</sup> Am olo dim ota bainobo galini nakaia unangai 120 ese mak miniba Fitae hana manea baabenebuo

16-17 Nekwal ibo wentine! Yudase ni sinwalo Yesuse dlakanebua nitem Yudas etem nabioaba Yesuse okoko ni aleyebea klabob otane Yudase monea Yesuse komokwali baabenea teniba Yesuse afu debeb moniba klabutam unibbiobe. Sinanggwano Gode Hobe nib fanine Debite weng olo omalea e naka ele weng sango Gode buk temo dolanebuo weng sang olo bain inanoa tam tlobe. <sup>18</sup> Yudase inanea kukub misiam olo nanea Yesuse ananomabib nakai monio olaliba oleb monea dabale walonea mon-sanea ablabu daak blelanea ananoa ale go-biaba tlea kaanebiobe. <sup>19</sup> E inanea kaanea Yelusalem bib seli weng sango wenteniba dabal ye niniino Akeldama ge nganh- iobe. Niniino olo mitmakamo dabal ele ilem dimobe. <sup>20</sup> Sinanggwano nib fanine Debite anso buko Samo temo dolanea baanea E amo besa noko! Nakai o temo mo nimibe gena bianea

eka ans mako tem osa dola baanea  
Naka mak eta e alango dokoneko  
genanebio kesoa

21-22 nibo memalo nakai e alango mo do- fanomo! Nibo inanoba dofanom gaobo bibilib ile mo dlanomobe! Sino Yone aa fuayemin nakae okoko okok kebe dimo ni Yesuse etem nabioaba nakai ni bekebe haabianiba inamin namin okoko Yesuse nabeo watemebiba kaanea ula abilim une naka ita mo dofanoba e tena bianoba Yesuse kaanea imin hana uneo wengo omkeimameko gesea <sup>23</sup> i nakai asu dlaka- siobe. Naka eli dlakasibi make niniino asumatnabe. Mako Yoseb eka mak ole Basabas Yastas etabe. E dofa nabianiba eka mak ele Mataiase dofa nasiobe. <sup>24</sup> I inaniba dlakaniba Gode baabaniba Sum kobo naka eli bobol temo alukum tekein kebeb kesoa kobo funaneba Nakae yeta dofaine gabebe mole alebeneba <sup>25</sup> e Yudase alango dokonea e okoko deiboneo okok ke- meko! Yudase Yesuse okok dlasanin okoko deibonea monea aseinin bib unebo ge oha bianiba beten keniba <sup>26</sup> bianiba tomo olo tlan habianiba wane tom eta molot daake blelane mole dofanomo geniba ina biniba Mataiase tom eta molot daak tle kesoa eta dofaiba Yesuse okok dlasanin nakai <sup>11</sup> i tena haabinibbiobe.

## 2

### *Gode Hobe dabane daak tlebiobe.*

<sup>1</sup> Singkalin am sumo niniino Fentikos am tlo kesoa Yesuse bainobo galin nakai am olokiemo tem tam mina bianiba wen- tiba <sup>2</sup> unine sume abilim ut danea makob ati unin kemsea wentenabiba daakenea am tam osa unin eta dasea deibanabiba

<sup>3</sup> atol inamino halbi tenoa nakaia unan- gai dimo alukum onon tlanea watenabiba <sup>4</sup> Gode Hobe i bobol temo alukum onon tlanea e wengo omyensea i bib mak nakai weng ota afet afet obiba <sup>5</sup> Yuda nakai bib mak bib mako Gode weng sin ota wafu bianiba alukum te Yelusalem bib ye blibi <sup>6</sup> i unine wenteniba mina bian- iba temibta bainobo galin nakaia unangai inaniba wengo afet afet omsiba Yuda naka maki wentibta ba i weng ota obib kesoa wenteniba smiko deibe unoa i bobol temo hekhek omfubeso <sup>7</sup> baaniba naka eli Galili naka otane <sup>8</sup> i namin kenibta bib mak bib mak naka nib wengo wente bianibta obibe? <sup>9</sup> Nibo bib mak bib mako bianoba maki Fatia betan da te maki Midia betan da te maki Ilam betan da te maki Mesobotemia betan da te maki Yudia betan da te maki Kabadosia betan da te maki Fontas betan da te maki Esia betan da te <sup>10</sup> maki Flisia betan da te maki Famfilia betan da te maki Isib betan da te maki meb Sailini betano kikibo Libia betan da te bliiba eka Lom betano biob nisa inanoba Yuda naka ni tenaboba eka nakai Yuda nib kukubo wafu blib nakai tenanoba teboba <sup>11</sup> eka maki Klit betan ye blib isa eka maki Alebia betan ye blib isa tenanoba mi biob otane naka eli Gode okok sumo klanebio weng sango nib weng omkeimaiba wentobobo geniba <sup>12</sup> i smiko deibe unoa bobol temo hekhek fumbianiba i sinwalo baase baase bianiba kukub olo mitmakamo fatnamine? ge omonsib otane <sup>13</sup> naka maki weng dobo weng oye bianiba Naka eli waen aaye homon downibta gabamon temo mimau bebiota nabioho ge oye monsiobe.

### *Fitae wengo omkeima bisebe.*

<sup>14</sup> I inamsiba Fita esa eka Yesuse okok dlasanin nakai mak isa hanamaniba Fi- tae nakaia unangai baabenea Yuda ibsa eka naka mak unang mak ibsa teniba Yelusalem bib ele blib ibo ne weng ele baabenamabio kla wentine! <sup>15</sup> Ib bobol temo fumbibo Naka eli gabamon tol temo mima fube biota weng namin namin bliobo gabib otane i gabam tol temo mo mima fubeim blimobe. Memale afoko tubutubu tebo olo mole aay misiam unalin amba <sup>16</sup> otane bib mak bib mak nakai wengo afet afet obiba ibo wentib yo sinanggwano Gode weng omkeimalin naka e niniino Yoele weng olo Gode buk temo dolanea baanea

<sup>17</sup> Gode baanea Mubiang amo meb tlamo dimo ne Hobe dabaia monea nakaia unangai dimo alukum onon tlanea ib memei alukum unang ten isa naka ten isa i ne wengo omkeimabiba eka ne ib naka tembali inamin

namino daam deib aleye biania eka hangkalebminwali daam moton aleye biam bliá watememomabiobe. <sup>18</sup> Ae, am olo dimo ne Hobe ne okok kemin naka unang isa dohya i ne wengo omkeimaiba wentenabiba <sup>19</sup> ne inania inamin namin afeto dabalim olo alebenamabio ibo sino mo watemim blimobe. Ilem osa as osa atum osa otabe. Eka ibo abilim uto watemiba ne inamin namin afeto alebenia <sup>20</sup> afoko deskinaia mililana bianoa eka alime deskinaia ilem ananeme dim uta Sume tenamino tam tlamabobe. Am olo dim ota nakaia unangai e okoko wateniba e niniino dobtouleb nomabiobe. <sup>21</sup> Am olo dim ota nakaia unangai Sum ne nganatneib mole ne daabeia i ne naka an ne unang an nanomabiobo ge baanea i Yoele dolanebuo memalo e weng olo yamo balinobo ge baabe-

nea <sup>22</sup> eka e imin baabeneá Islel ibo ne wengo kla wentine! Ibo Yesuse Nasalet bib sake tekein kebib yotabe. Sino e dabalim ele bianeá ibo bekebe bie dimo Gode titilo omkahabea inamin namin okok sumo ibo sino mo watemim blimo klabea watem tekein kebib yotabe. E bain God eta dabane tlebiobe. <sup>23</sup> Sinanggwano Gode funanea Sinanomo Ne miine dabaia daaknea dabalim daako unameo i kweiban dimo dofanano ge funanebio kesoa inanea Yesuse ib kweiban dimo dofanea debeb moniba Lom sel isu temiba i Yesuse atdimo dabasa silo bikí anaiba kaane otane <sup>24</sup> i Yesuse imin hananamin deibo mo waisaim blimobe. Gode Yesuse imin dofaanea kaanamin kukubo omakibilaneá hananebiobe. <sup>25</sup> Sinanggwano nib fanine Debite inamin namin olo funanea e Gode buk temo dolanea baanea

Ne Sume atemia e amitie ne beketne bianeá ne kweile kweitale kikib ye bie kesoa ne nakaia unangai tolo mo tosiambibabo, <sup>26</sup> ne bobolo ayam fumbiania e niniino dobtouleb biania kaanimio imin hananamabio genia <sup>27</sup> ne kukub olo tekein kebibe. Ne kaanamabi otane kobo ne afen smike haam gloutemo mo deitnenamabebabo, kobo fumbebo Ne Okok Naka Ayame damo mo klanemebabo gabeb kesoa ne dame mo klanimibabo, <sup>28</sup> kobo afen smik deib ayamo aletnenebbu osa eka kobo beketne bieb osa ne kla seimbibo ge baanea dlanebio kesoa

<sup>29</sup> nekwal ibo ne weng olo ibo baabenam-

abibe. Nib fanine Debite kaanea nakaia unangai tom tem wat dofaibbuo e gloutemo sma bua nibo watemobbuo Debite ele weng sango mo dolaim blimobe. Naka afete weng sang ota e dolanebiobe. <sup>30</sup> Sinanggwano Debite Gode weng omkeimalin nakabe. Gode Debite baabaneá Keb molofeite komok anea makob kleb ulab anea nakaia unangai kimanamabebo gesea Debite funaneo e wengo bainobo ge funasebe. <sup>31</sup> Sinanggwano Debite weng olo tekein kenea funanea Sinanomo Gode Dofakamin Nakae tenea kaanea imin hananamabebo genea e buk temo dolanea baanea Gode e dame gloutemo amito mo deibaneta klanamabebabo genebio

nibo tekein kebuobe. Weng sang olo Klaiste weng sangobo ge baabeneá <sup>32</sup> eka Fitae imin baabeneá Gode Yesuse ele imin dofaanea hananea ni alukum atemobbiota oyebuobe. <sup>33</sup> Memalo naka ele Gode debeb utnea abilim ut danea e kweile kweitale kikib ye toubiebie. Yesuse inanea toubmia sinanggwano Gode baabaneá Ne Hobe dobkklamabibo ge baabanebuo memalo bain inanea dabalea Yesuse debeisa dabaneá daakenea nisu ele tlebe. Ibo inamin namin olo wateniba wengo wentenaib olo Gode Hob eta ni dohyeta atemiobe. <sup>34</sup> Debite weng olo dolanebuo ele dimo mo baaim blimobe. Eka e abilim ut osa mo unim blim na otane e Gode buk temo dolanea baanea Gode ne Sume baabaneá Kobo ne kweile kweitale kikib ye toubianeaba inamin namino kima bieba <sup>35</sup> sinanomo ne keb makaai alukum yalia i titilo blimanamabobo ge baabanebio ge genea

Debite emaye inangge baanea dolanebio kesoa <sup>36</sup> Islel nakaia unanga ibo ne wengo kla wentine! Ibo Yesuse atdimo dabasa anaibbue Gode naka ele baabaneá Kobo ne Kemfakamin Nakaneba komok sum anale genea inanebio ge baabesebe.

*Naka homon unang homoni Yesuse wengo bainobo gesiobe.*

<sup>37</sup> Yuda nakai Fitae wengo wenteniba i bobolo ilum omfubenoa i Fita esa Yesuse okok dlasanin nakai mak isa baabeniba Nekwal ibo ni fatnanomabbione? ge baabesiba <sup>38</sup> Fitae baabeneá Ibo ib hengmino deiboniba ib bobol temo deskinaniba Gode omaniba Yesu Klaiste niniin dimo aaye fuelaniba Gode ib hengmino omtlabeneá e Hobe dohyeko! <sup>39</sup> Sinanggwano God Sume moton wengo baabeneá Ibsa ib molobsel walo unaiib isa bib mak bib mak

sel isa Ib hengmino deiboniba ib bobol temo deskina omoniba ne omnaibo ne Hobe dobyamabibo genebio kesoa nakaia unangai e dlakanebuei inaib mole e Hobe dobyamabebo ge baabenea <sup>40</sup> eka e weng mak osa homon oye biam bianea eka baabenea Ibo nakaia unangai misiami i hengmino kukubo mo wafunimibe! I enin sumo tam tlubenamabobe. Ibo ib bobol temo omoniba Gode omaline gesea <sup>41</sup> naka homon unang homoni Fitae wengo wenteniba bainobo geniba aaye fuelasibi 3,000 obe. I inaniba aaye fuelaniba sin bainobo geibbuei tenaniba mi haabisioebe.

*Yesuse bainobo galin nakai kukubobe.*

<sup>42</sup> Yesuse okok dlasanin nakai inaniba aleyebiba bainobo galin nakaia unangai i wengo wente bianiba i sinwalo mibianiba bainobo galin naka mak unang maki daabesese bianiba Yesuse kaanebio bobolo fumbianiba imeno makob olminiba wembianiba eka Gode nganabanom gaib osa miniba i bobol tem makob omfaniba nganha biam bliba <sup>43</sup> Gode titilo omkayebea Yesuse okok dlasanin nakai inamin namin okok sumo klabiba naka homon unang homoni wateniba dlou unaniba obianiba Dowe! Kukub olo fatnamin kukub tam tlebhone? ge omonsioebe. <sup>44</sup> Yesuse bainobo galin nakaia unangai inaniba mibianiba i afobeing osa oleb te olminiba baaniba Olo alukum bainobo gabob nibmiobo ge obianiba <sup>45</sup> eka inamin namino oleb moniba naka maki waloniba monio oise tlebiana eka i dabal osa naka maki deiheiba waliba monio oise tlebiam bianiba olmina bianiba oloniba bainobo galin naka mak unang maki inamin namin blimi okaye binibbiobe. <sup>46</sup> I ina bianiba am obba ye bomanomo bomanomo yo dimo Yesuse bainobo galin nakaia unangai Gode am sumo temo miniba Gode nganha bianiba eka Yesuse kaanebuo bobolo fumbianiba moniba am mak am mako temo mina bianiba imeno wembianiba i imaye bie bie nin kukubo deiboniba naka maki dohalila daabesese bianiba i bobol ayam fumbianiba <sup>47</sup> Gode niniino dobtoule bliba Yuda naka mak unang maki fumbianiba Bainobo galin nakaia unangai kukubo klayamobo gabiba am obba ye bomanomo bomanomo yo dimo nakaia unangai Yesuse bainobo geniba te watem te watem bianiba homon anibta binibbiobe.

### 3

*Fitae Yone i dabo gilok alobio nakae klaubasiobe.*

<sup>1</sup> Am obba ye bomanomo bomanomo yo dimo afoko delwab manomo nakaia

unangai Gode nganhabibbua am mak bomanoa Fitae Yone i dabo bliba kwintlanoa afoko delwab masoa imin inaniba Monoba Gode am sumo tem unanoba Gode nganhamomo geniba tetemiba <sup>2</sup> naka make awoko mema gongam tem da dobmikinoa gilok alobua am obba ye bomanomo bomanomo yo dimo e bibam seli ge debeb teniba amito niniino amit ayamo kikib ye dobkabiba bianea nakaia unangai tlaniba Gode am sumo temo unom gaibo moni wengo ngenye binabebea olo dim osa imin inaniba debeb te daibbua bia <sup>3</sup> Fitae Yone i dabo teniba Gode am sumo amit ye tetemiba e moni wengo ngenyemsea <sup>4</sup> i dabo dlo dlo ateme bianiba Fitae baabane Kobo ni yatemale gesea <sup>5</sup> gilok alobio nakae inanea deskina yatenea e bobol temo funanea i inamin namino donom genihtabo gamsea <sup>6</sup> Fitae imin baabanea Ne monio blim otane Yesus Klaiste Nasalet bib sake titilo omne kesoa ne daabkenamabibe. Kobo hananeba one ge baabanea watnea <sup>7</sup> e kweilone kweital dae kwei gong wat afunea dofanea hebmamsab e skilon osa kabmukon osa ayamu banoa <sup>8</sup> e hebmamsab hananea sein seinea Fitae Yone i dabo bekebebia taniba Gode am sumo tem tam unaniba e seim bebianea Gode ayam naneta daatnenebo gansea <sup>9</sup> naka homon unang homoni Gode am sumo tem tam blib isa atemibta e biin tla haabianea Gode niniino dobtoule bne kesoa ateniba <sup>10</sup> baaniba Sino naka ele amit ayamo kikib ye toubianea nganye bianea Monio onine ge ngambea ni ateme binabob otane memalo e ayam anebo ge funaniba i smiko deibe unoa <sup>11</sup> e deibenea Fita esa Yon esa i sinwalo kwei naka tem naka tem biniba taniba Gode am sumo basal dim tam onsiobe. Basal olo niniino Solomone basalobe. Nakaia unangai i smiko deibe unoa blublu teniba Fita esa Yon esa gilok alo binobio naka esa isu ele tlemsiba <sup>12</sup> Fitae yatenea baabenea Islel nakaia unanga ibo mo dlou une bianibta ni mo dlo dlo yatememibe! Ibo mo funanibta I titilo sbal bianibta i gilok alo binobio nakae klaubaibobo ge funanimibe! <sup>13</sup> Gode Eblaham esa Aisak esa Yekob esa eka nib faninwali mak isa i kimaninobe. E miine Yesuse daabanea e niniin sumo omalebu otane ibo debeb moniba komokwali dobyiba komoke Failate funaneo E ayamobo, ne tileisanano gene otane ibo baaniba Yeye geibbiobe. <sup>14</sup> Yesuse kintalin naka ayam kining otane ibo e wengo wentenamino deibaniba Failate baabaniba Nakai yenane kaaibbio naka eta tileisaneba uneko gesiba e tileisane unea <sup>15</sup> Yesus ele nib afen smiko deib ayame aleyebea ibo baaniba Anaine ge baaniba doboniba komokwali

dobyiba anaiba kaane otane Gode imin dofaanea hananea ni atemobbio kesoa ni o weng sango baabenomabbio. <sup>16</sup> Ni Yesuse niniino bainobo gabob kesota e titilo gilok alo binobio naka ele klaubanao atemiobe! Bainobo galin olo Yesus eta omyeta o naka ele klaubanao ibo atemiobe. <sup>17</sup> Ne tekein kebibe, ibo mo tekein kenibta Yesuse Gode miinobe geim blim bianibta ib komokwali ib sinwalo Yesuse anaibbiobe. <sup>18</sup> Sinanggwano Gode e weng omkeimalin nakai e wengo omya i nakaia unangai omkaye bianiba baabeniba Ne Dofakamin Nakae tenea enin sumo watemamabebo geibbio ibo Yesuse anaibbuo weng olo bain anobiobe. <sup>19</sup> Ibo inaibbio kesoa ib hengmino deiboniba ib bobol temo deskinaniba Gode omaliba e ib hengmino omtlabeneko! <sup>20</sup> Ibo inanimibo God Sume bobol tem funin ayam osa e titil osa omyenea Yesuse dabanea tenea ibsu tlamabebe. Sinanggwano Gode e miine Yesus Klaiste ibo daabeneko ge baanea dofakane biotabe. <sup>21</sup> Memalo Yesuse abilim ut biebe. Sinanggwano Gode e weng omkeimalin nakai weng olo omyensea i nakaia unangai omkaye bianiba baabeniba Sinanomo Gode inamin namino imin mema klanang gameo Yesuse dabanea imin daakenea dabalim ele tlamabebo geibbio amo yo tlamom dim ota e imin tlamabebe. <sup>22</sup> Sinanggwano Moses Gode buk temo dolanea baanea Ib Sume Gode weng omkeimalin nakae dabanea tlamabebo makob e ne namanea tlibio inanamabebe. E Yuda nakabo makob ibtabo, ibo e wengo kla wentine! <sup>23</sup> Nakaia unangai e wengo mo wentim blim keib mole i Yesuse bainobo galin nakai mo baka nimibe! I Gode yenanea kaanomabiobo ge baanea dolanebua eka <sup>24</sup> Gode weng omkeimalin naka make niniino Samyuel esa eka Gode weng omkeimalin nakai maki Samyuele abuk dleb tlemin isa i alukum kukub ele tam tlebua watemebib olo weng sango oye binibbuo <sup>25</sup> Gode weng omkeimalin naka eli alukum ib faninwalobe. Gode i wengo omyebuo e ibsa memalo inanea weng olo omyebiobe. Gode Eblahame moton wengo baabanea Keb molobseli walaibo bib mak bib mak seli alukum daabeiba ayam anomabiobo genebio kesoa <sup>26</sup> Gode miine dabanea mikikitemo tenea ibo daabenebio kesoa ib hengmino deiboniba ib bobol temo deskina Gode omaniba e meletan aine ge baabesebe.

#### 4

<sup>1-2</sup> Fitae Yone i dabo nakaia unangai baabeniba Yesuse kaanea imin hananebio kesoa dabalim naka isa kaaib biamo sinanomo imin hananomabiobo ge oyemsiba Gode amo kimanin nakai mak isa

Gode am sum deib bornin nakai komok esa Sadyusi nakai mak isa i wengo wenteniba atlaubenoa teniba <sup>3</sup> Fitae Yone i dabo yafu dlo genabiba amo kwinoa mililano kesoa i funaniba deibenob skabo bomasota kot kebenomo ge baaniba dleb taniba klabutam tam dasiobe. <sup>4</sup> Ina bisib olo dimo naka homon unang homoni Fitae wengo wenteniba nakai bainobo genabiba eka sin bainobo gabib nakai tenaniba misibo 5,000 ese makobe.

*Komokwal isa naka gang isa i Fitae Yone i dabo kot kebesiobe.*

<sup>5</sup> Bomanoa Yudai komokwal isa eka naka gang isa hekmel weng tekein kemin naka isa <sup>6</sup> eka Gode amo kimanin nakai i komok sume niniino Anas esa eka Kaiafas esa Yone niniin aseke esa Aleksanda esa eka Gode amo kimanin nakai i komok sume meletani mak isa teniba Yelusalem bib ye miniba <sup>7</sup> i Fitae Yone i dabo baabeniba Ni kibi kaba sin ele maine gesiba i masiba baabeniba Wane titil ota gilok alo binobio nakae klaubanone? Waneta ibo titilo omyeneta Inaine ge baabene biote? ge oyemsiba hebamsab <sup>8</sup> Gode Hobe Fitae daabanea wengo omalea esak baabenea Komokwal ibsa naka gang ibsa <sup>9</sup> ibo ni kil oye bianiba ibo nimin kenibta naka ele klaubaibta ayam anene? ge oyebib olo ne baabenamabiobe. <sup>10</sup> Ibsa eka Islel nakaia unanga isa alukum kla wentine! Ibo alukum Yesus Klaiste Nasalet bib sake atdim dabasa anaiba kaanea Gode imin dofaanea hananebue e titil ota gilok alo binobio nakae klaubanota ibo atemiobe. <sup>11</sup> Ibole makob am genalin nakai ulabobe. Eka Yesus ele makob sbal ase ulabobe. Gode buk temo baanoa

Am genalin nakai sbal as ele misi-amobo temdeibanomo geibbu otane komoke baanea Yeye ibo sbal as ele isak amun ayamobo bikieine gesea i inaniba sbal as ele isak amune bikieibbiobo genobu olo

Yesuse weng sangobe. Kukub olo makob ibo Yesuse baabaniba Ni kobo deiikhenoba kananoba kaanamabeobo geniba anaiba kaane otane Gode imin dofaanea hananea bainobo galin nakaia unangai kima biebe. <sup>12</sup> Gode eleta dabakanea e nib hengmino walubenebio kesoa nibo utnoba abilim uto amit nomabbio. Gode dabalim nakai maki niniino mo baabeneta nakae yeta ib hengmino walubenebio geim blimobe. E Yesuse niniino olota baanea eta ib hengmino walubenebio ge baanebio ge baabesebe. <sup>13</sup> Fitae Yone i dabo inaniba weng olo omkeimabibo i mo tosanim blim,





dlasanin nakai e niniin mako Banabas ge nghanha binibbiobe. Niniin olo mitmakamo daayemin nakabe. <sup>37</sup> Banabas ele dabale naka make walonea monio oleb tenea Yesuse okok dlasanin nakai oyensebe.

## 5

*Ananias esa Sabaila osa i weng san-gobe.*

<sup>1</sup> Inabiba naka make, niniino Ananaiase e alelo Sabailao i kam osa inaniba i dabale naka make waloniba <sup>2</sup> monio oloniba atosino ima kamwal oleb unaniba atosin ota oleb tenea Yesuse okok dlasanin nakai oyenea baabenea Ne monio alukum olonia Gode olalibo ge baabesea <sup>3</sup> Fitae baabanea Kobo Gululame bobol tem funin ota funanebta Gode Hobe dim baabanebobo, keb monio atosino kebma oleb unaneba atosin ota oloneba ni oyeb otane Ne monio alukum Gode olalibo genebobe. <sup>4</sup> Sino i dabal ele mo walim blim blibo keb-mibe eka waloneba monio oleb osa moni olo kebmi otane kobo nimin kebneba ni dim baabenebe? Kobo naka ita dim baabeiobo gabeb otane kobo God eta dim baabanebobo ge baabasea <sup>5</sup> Ananaiase Fitae wengo wentenea glukatobo daak ble-lanea kaanea naka maki weng olo wenteniba tosiاناiba <sup>6</sup> naka tembal ita teniba youme doboniba unalimo ge waisaniba glouto ge debetniba moniba gloutem ye dobbunabiba <sup>7</sup> afok smiko asumatnao bli-manoo ael osak o imake kaanebuo wengo mo wentim blim kesoa tenoa <sup>8</sup> Fita esu ele tetemsoa Fitae baabonea Ib kamwalo dabale walibbuo monio fatnamin olibbione? gesea o baabanoa Ni dabale walobbuo ne imake monio alukum oleb tenea ibo oye-biobo gesea <sup>9</sup> Fitae omsuananea baabonea Nimin kenibta ib kamwalo wengo baa omfanibta Gode Hobe naatemibbue? Nakai ob imake dobbuniba teniba amit etale mabliobo obsa kemeb unomabiobo gesea <sup>10</sup> o wentenoa osak glukatobo daak ble-lanoa kaanoa naka eli tam te wateniba glouto ge ometniba moniba o imake dobbueibe kikib ye ombunaiba <sup>11</sup> bainobo galin naka unang isa eka naka mak unang maki weng olo wentib isa i tosiان moniobe.

*Yesuse okok dlasanin nakai inamin namin okok sumo klabinibbiobe.*

<sup>12</sup> Yesuse okok dlasanin nakai inamin namin okok sumo klabiba naka mak unang maki watemebiba eka am homono dimo bainobo galin nakaia unangai bobol temo makob omfaniba teniba Gode am sumo basalo niniino Solomone basal dim ut minabiba <sup>13</sup> eka nakaia unangai mo bainobo gabibbai fumbianiba Bainobo galin

nakaia unangai ayamobo geniba i niniino dotou binibbu otane i tosiانniba bainobo galin naka isuo mebo mo unemin blimobe. <sup>14</sup> Ina otane nakaia unangai namin ye bainobo ge tawat sin bainobo gabibi tena kweko kweko bliba eka <sup>15</sup> nakaia unangai Yesuse okok dlasanin nakai okok sumo klabibo weng sango wenteniba i funaniba Nibo ginin gami dleb monoba Fitae deib monamabe ye dlanobua tla unang gameo afoko tubunoo e smike watnea ginin gami yafunea ayam aine geniba dleb teniba maki youmo dongananiba o dim ut dlaniba eka mak ile biino gelaniba o dim ut dlanaiibua bliba eka <sup>16</sup> Yelusalem bibo bib gwab gwabo seli alukum teniba Yelusalem bib ye mina bianiba ginin gam isa eka nakai hob misiami bekebe blib isa dleb teniba Yesuse okok dlasanin naka isu tlebiba klayebiba ayam an binibbiobe.

*Abisake Yesuse okok dlasanin nakai klabutam blibo dotlasebe.*

<sup>17-18</sup> Gode amo kimanin nakai komok sum esa e meletani Sadyusie isa Yesuse okok dlasanin nakai okoko nabibo yateniba atliubeso i awa genalin nakai baabeniba Ibo naka eli klabuto ge dleb taniba klabutam tam dlaine gesiba inaniba ge dleb tam daibbua kwinoaa aala bliba <sup>19-20</sup> ibalanoa Gode abisake dabanea daakenea klabutam amisalo betelanea dleb tam bib tam unanea baabenea Ibo moniba Gode am sumo tem tam unaniba nakaia unangai alukum baabeniba Ibo Gode wengo wenteniba bainobo geib mole ibo afen smike doboniba amit nomabiobo ge baabeine ge baabesea <sup>21</sup> Yesuse okok dlasanin nakai abisake wengo wenteniba bebiba afoko walabbanoa tubutubu tloa moniba Gode am sumo tem tam unaniba nakaia unangai Gode wengo omkayebiba eka Gode amo kimanin nakai komok sum esa e meletan isa i te mina bianiba Isleli komok isa naka gang isa nganabeiba tenaniba miniba i awa genalin nakai baabeniba Ibo taniba klabutam tamo naka eli dleb tline gesiba <sup>22</sup> awa genalin nakai taniba klabutam tam unaniba Yesuse okok dlasanin nakai henwaib kesoa imin moniba komokwali baabeniba <sup>23</sup> Ni klabutam tamo tam temoba deib toulalin nakai amisalo neketowa douniba amito kima bliba yatem deibenoba amisalo betela tanoba am tamo temob otane naka eli blimobo gesiba <sup>24</sup> Gode am sumo deib toulalin nakai komok esa eka Gode amo kimanin nakai komokwal isa i wengo wenteniba fumen tananiba I fatnata unibe? gansiba <sup>25</sup> naka make te baabenea Ibo nakai klabutam tam dotama

binibi memalo Gode am sumo tem tam mabianiba Yesus ele wengo omkeimabiobo gesea <sup>26</sup> i wenteniba awa genalin naka isa i komok esa moniba Yesuse okok dlasanin nakai dleb tibbu otane i mo yemde dlaim blimobe. Niminbabe, i funaniba Ni naka eli yenanob mole nakaia unangai tomo olo binaniba ni yenanomabiobo ge funaniba <sup>27</sup> i Yesuse okok dlasanin nakai besa dloniba Isleli komokwal isa naka gang isa i kin dim ye dlaiba masiba Gode amo kimanin nakai komok sume baabene <sup>28</sup> Ni sino baabenoba Ibo Yesuse wengo mo omkemanimibe ge baabenobbu otane ibo ni wengo mo wentim blimobe. Ibo Yelusalem bib seli nakaia unangai alukum weng olo baabeniba Isleli komokwal isa naka gang isa ita Yesuse anaiba kaanebiobo ge oyebiobo gesea <sup>29</sup> Fita esa Yesuse okok dlasanin nakai mak isa baabaniba Ni naka maki wengo mo wentaobbabe. Ni Gode wengo olota wentebuobe. <sup>30</sup> Ibo Yesuse atdimo anaiba kaanea nib faninwali Gode imin dofaanea hananea debeb utnea abilim ut unanea e kweile kweitale kikib ye dofanea tounea <sup>31</sup> Gode baabanea Kobo nakaia unangai komokobo, Isel nakaia unangai hengmino temo biobo dotlaneko ge funaib mole kobo daabeneba i hengmino deiboniba i bobol temo deskina ne omniba ne i hengmino omtlabenano ge baabanebio kesoa <sup>32</sup> nite Gode Hob ete nanoba Gode okok olo watenoba omkeimanoba nakaia unangai Gode wengo wenteniba bainobo geib mole Gode Hobe dobyamabebo gesiba <sup>33</sup> Isleli komokwali Yesuse okok dlasanin nakai wengo wenteniba atliaubenoa i denoba yananomo gesib <sup>34</sup> otane Felisi naka make niniino Gameliele e Mosese hekmel wengo aleyemin nakabe. E ye bia naka maki fumbianiba E naka ayamobo gabinabibbua e hana manea Yesuse okok dlasanin nakai baabene Ni weng mako baanomabbiobo, ibo tala bib unine gesea i tala bib onsiba <sup>35</sup> Yesuse imin hananebuo e mo tekein kebeba otane e komokwali baabene Islel naka ibo naka eli yenanomo gabib otane kla tenibe! <sup>36</sup> Sinanggwano naka make niniino Tiudase naka maki baabene Ne niniin sumobo, ibo beketneine gesea naka homoni 400 nakai bekeba haablib otane awa genalin nakai teniba naka ele anaiba kaanea e bekeba haablib nakai skila moniba ili bibam unibbua <sup>37</sup> omito kiabe nakaia unangai niniino oyebe dimo Galili naka make niniin aseke Yudas esak imin tenea baabene Ne niniin sumobo, ibo beketneine ge baabesea naka homoni imin inaniba bekeba haablib otane awa genalin naka maki imin teniba esa anaiba kaanea e bekeba haablib nakai skila moniba ili

bibam onon tlaibbiobe. <sup>38</sup> I inaibbio kesoa ne memalo baabenamabio Nibo naka eli komoke Yesuse nibo mo tekein kenobta bain dabalim nakabe gabobba kesoa ibo naka eli mo yenanimibe! Deibeiba blihte gabibe. Dabalim naka ita i okoko kima biaibo i okok osa inanoa makob sinanggwano naka eli naibbio inata bli-manomobe! <sup>39</sup> Eka God eta i okok olo kima bie mole ibo watanamino deibo blimobe. Ibo Gode okoko watanimibo ibo makob Gode tenaniba awa gonomabib inaminobo gesea Isleli komokwali Gameliele wengo wenteniba <sup>40</sup> i Yesuse okok dlasanin nakai imin nganabeiba taniba am tam temiba komokwali awa genalin nakai baabeniba Ibo sayo tebeloniba naka eli yemde dlaine ge baabeiba inaniba yemde dlasiba komokwali Yesuse okok dlasanin nakai baabeniba Ibo Yesuse wengo imino mo omkeimanimibe ge baabeniba tileiseniba <sup>41</sup> Yesuse okok dlasanin nakai Isleli komokwal isa naka gang isa deibeniba taniba bib tam unaniba funaniba Ni Yesuse wengo omkayebob o dafa ota i enino omyiba Gode nibo baabene Ib kukubo ayamobo ge baabenebo geniba seinmonsioe. <sup>42</sup> I inaniba bianiba Gode am sumo tem osa eka am afet osa o temo moniba nakaia unangai Yesuse wengo aleye bianiba baabeniba Yesus ele Gode Dofakamin Nakabo ge oye monsiobe.

## 6

*I Yesuse okok dlasanin nakai okok daayemin nakai 7 i imin dlasioe.*

<sup>1</sup> Am olo dim ota Yesuse bainobo galin nakaia unangai homon aniba Glik wengo obibi Hiblu wengo obibi dosuananiba baabeniba Am obba ye bomanomo bomanomo Yesuse okok dlasanin nakai imeno oloniba bainobo galin nakaia unangai imen blimi kikiyemom gaibo Hiblu wanggeli soston ita homon okaye bianiba eka Glik wanggeli soston ile gwab okayebia nabiobo gesiba <sup>2</sup> Yesuse okok dlasanin nakai 12 i wenteniba bainobo galin nakaia unangai nganabeiba tliba baabeniba Ni Gode weng omkeimamin okoko deibonoba imen kikimin okok ota okok kemob yole dot ayambabo, <sup>3</sup> nekwal ibo ib isak tem daako nakai 7 i tekein kemin ayami Gode Hobe i bobol temo bibe bie ita dlanoba imen kikimin okoko kima bianiba kikiyemine! <sup>4</sup> Nile Gode nganha bianoba e wengo omkeimamin okoko olota okok kemomabbiobo gesiba <sup>5</sup> bainobo galin nakai Yesuse okok dlasanin nakai wengo wenteniba funaniba Weng olo ayam ye baaibobo geniba i nakai dlasibi niniino elitabe. Stibene bainobo galino

sbal mabia Gode Hobe e bobol temo biba bie esa eka Filib esa Blokolas esa Naikena esa Taimon esa Famenas esa Nikolase Antiok naka esa ita dlasioebe. Sino Nikolas ele Yudai kukubo watemnea gobo bianea wafu binebiotabe. <sup>6</sup> I inaniba Yesuse okok dlasanin nakai kweilo naka eli gabaman dim ut tebelubeniba Gode baabaniba Kobo naka eli daabeneba i okoko klayam okok kemine ge baabasiobe. <sup>7</sup> Naka homon unang homoni Yesuse wengo wente bianiba bainobo gabiba eka Yelusalem bib sel isa eka Gode amo kimanin nakai komokwal isa Yesuse bainobo gesiobe.

#### *Yudai Stibene kot kebasioebe.*

<sup>8</sup> Eka Gode Stibene daabanea e titilo omale kesoa e inamin namin okok sumo nakaia unangai sino mo watemim blimo klabea tam tlebua watemebiba <sup>9</sup> Yuda naka maki Salini bibo blib isa eka Aleksandlia bibo blib isa eka Silisia betano blib isa eka Esia betano blib isa i Gode amo niniino Flimano tem tam olota mina binabib-bua temniba Stibene temna bianiba e baase i baasib blib otane <sup>10</sup> Gode Hobe Stibene titilo omalea e i wengo omabububene kesoa <sup>11</sup> i naka maki baabeniba Ibo moniba komokwali dim baabeniba Ni Stibene atemeboba Moses esa God esa i weng dobo weng baabeneta atemobiobo ge baabenimibo ni monio oyomabiobo gesiba <sup>12</sup> naka maki wenteniba bain inaniba dim baasiba nakaia unanga isa Yudai naka gang isa hekmel weng tekein kemin naka isa dim weng olo wenteniba al tiaubesoa moniba Stibene dobona bianiba eka nakai dim omin weng olo baaibbuei dlonaniba dleb moniba Yudai naka sum isu ye teniba bianiba kot kebianiba <sup>13</sup> dim omin naka eli baabeniba Naka ele amitie Gode am sum osa eka Mosese hekmel weng osa weng dobo weng owe bianea <sup>14</sup> baanea Yesuse Nasalet bib sake Gode am sum olo watwat dabona bianea eka Mosese hekmel weng nibo omyebu osa afet omfananamabebo genea ni wentobiobo gesiba <sup>15</sup> komokwal isa naka gang isa i Stibene atemiba e kibio makob abisake kibi ota walasanea atemsiobe.

## 7

*Stibene wengo komokwali omkaye monesebe.*

<sup>1</sup> Gode amo kimanin nakai i komok sume Stibene baabanea I weng ele okebib olo baino? gesea <sup>2</sup> Stibene baabanea Ne nekwal ibsa aywal ibsa wentine! Gode titilo sumobe. Sinanggwano nib fanine Eblahame Helan bibo mo unim blim sma Mesobotemia betan ye bieta God ele tenea Eblahame baabanea <sup>3</sup> Keb bibam osa keb

meletan isa deibeneba moneba bib mako alebkenamabi ye one ge baabasea <sup>4</sup> e inanea Kaldia betano deibonea monea Helan bib ye bia e aye kaaneta e Helan bibo deiboneta Gode debetnea tenea Isleli betan ele binebu otane <sup>5</sup> Gode Eblahame dabale men osa mo walalim blimobe. E betan blim bia Gode baabanea Sinanota ne keb betano mo wakli biota keb molobsel isa nomabiobo ge baabase otane am olo dimo Eblahame meme blimobe. <sup>6</sup> Gode Eblahame imin baabanea Bi sinanomo keb molobseli moniba naka maki betan ye temiba ita keb molobseli kima bliba i okoko okok keyemibo monia inamin namino mo okayemin blim deibeniba i besa okok keyebiba naka eli keb meletani kukub misiam osa enin sum osa omkaye bianiba yebiam nomabibo bifolo homono 400 o blimanota <sup>7</sup> ne nakai keb molobseli kima bliba besa okok keyebib nakai enin sumo omyita keb molobseli bibo yo deiboniba imin teniba kleb bibam ele tlaniba ne niniino nemtouleub nomabiobo ge baabanea <sup>8</sup> eka imin baabanea Ne kobo daabkeia keb molobseli walaibo ibo nemiobo, ibo aalo waketoumin kukubo wafuniha ne wengo bainobo geine ge baabanebio kesoa Eblahame Aisake awoko debeb tlobua amo 8 blimanota e aalo watlabanebua eka Aisak esak Yekobe dofanea aalo watlabanebua eka Yekob esak e memei naka teni 12 dlanea aalo waketoufafenasebe. <sup>9</sup> Yekobe meleli i ninge Yosebe kukub ayam namsea aalebe gobasea hekwali atemniba atliaubesoa debeb moniba naka maki waloniba monio oliba naka elita Yosebe debeb moniba Isib betan ye daiba bianea okok homono okok kebe otane i monio mo okahamin blim deiba bliba besa okok kebe otane Gode kima bianea <sup>10</sup> daaha bianea bobol tem funin ayamo omkahabea Isib komok sume Feloe atemnea Yosebe tekein kemino sumobo ge funanea baabanea Kehta komok aneba Isib sel isa eka ne amo okok kebib naka unang isa kimanale ge baabanea inanea kima bia <sup>11</sup> sinanoa Isib betan osa eka Kenan betan osa imeno namanoa nakaia unangai alukum imen teb bliba eka nib faninwal isa inaniba imen teb bliba naka maki om haabianiba baaniba <sup>12</sup> Isib betano imeno mako ye biobo gesiba Yekobe wentenea e memei dlanea Isib betano sino mo unim blim binabibo nena ye moniba imeno walo oleb tlibbua <sup>13</sup> mitdaniba imeno imin walom geniba mo temib otane i Yosebe mo tekein keim blim bliba ema baabanea Ne Yoseb netabo ge baabenabea naka maki wenteniba Feloe baabaniba Yosebe hekwali isa ning esa e ay esa sma bliobo ge baabaiba

wentenea tekein kenabea <sup>14</sup> Yosebe e hekwal isa ning esa baabenea Ibo imin moniba Kenan betan unaniba ne ay esa eka ne meletan isa baabeiba tline ge baabenea moniba baabeiba tlibbuei <sup>75</sup> obe. <sup>15</sup> Yekobe inanea tenea Isib ye biane kaanebua eka nib faninwal isa Isib betan ye bianiba kulilaiba dleb moniba <sup>16</sup> sinanggwan Eblahame Hemoe molobseli Sikem bib seli smeo tola binabuo sino Yekobe kaaneo debeb moniba sme olo temo dofaibbua eka nib faninwal isa kaabo dleb moniba sme olo temo dolaibbiobo ge baabenea <sup>17</sup> eka Stibene imin baabenea Sinanggwan Gode Eblahame baabanea Keb molobseli Isib betano deiboniba moniba Kenan betan ye unomabiobo ge baabanebua am olo meb tola nib faninwali inaniba homon anabiba <sup>18</sup> am olo dim ota naka make Isib seli komok anea e sinanggwan Yosebe kaanebio kesoa Yosebe bobolo funino deibonea <sup>19</sup> komok ele nib faninwali dim baabenea enin sumo omyenea baabenea Ib memei dleb taniba bib tam daiba kaaine ge baabesea i inabiba <sup>20</sup> am olo dimo Mosese biamo e dofanoa temota dot men ayame dofano kesoa aalebe am tam dofa bia alimo asumatna blimanoa <sup>21</sup> awoko debet daaknoa aaye ken daak dofasoa Feloe moono te atemnoa debeb monoa am unanoa baanoa Ne miinobo gesoa dofa bliba damanea <sup>22</sup> Isib nakai kukubo alebaiba Mosese tekein kenea weng sbal obiane eka e okoko makob komok dikin okok kebea <sup>23</sup> bifolo 40 ye blimanoa e meletani Islel nakaia unangai yatemang genea <sup>24</sup> motemea Isib nakae tenea Islel nakae make anasea Mosese yatemnea Islel nakae daabanea Isib nakae ananea kaanea <sup>25</sup> e funanea Ne meletani funaniba Gode Mosese dabanea tenea nibo daabenamabebo genomabiobo gese otane i mo inangge funaim blimobe. <sup>26</sup> E inane sonoma bomanoa imin monea Islel isu ye teme ele bibam seli asu keniba awa gembib kesoa yatemnea watanang genea baabenea Ib dabo awao deine! Ibo nimin kenibta awa gembibe? gese otane <sup>27</sup> nakae naka make watwat dahabe nakae ananang genea watnea Mosese dliba dobbiane baabanea Waneta baabkeneta Kobo ni kukubo klabianeba kimanang genebte? <sup>28</sup> Kobo makob sintalo Isib nakae anabeb inaneba nesa nananang genebto? ge baabasea <sup>29</sup> Mosese wentenea tosiananea wetou monea naka maki betano ninino Milian betan ye biane alelo omonea memei naka teni asusu na dlanebiobo ge baabenea <sup>30</sup> eka Stibene imin baabenea Mosese inanea bia bifolo 40 o blimanota monea ibuantemo amgolime Sainaie kikib ye teme ase asub alut tubunea ein tesa

temea atol ele teme abisake isak wat mabia atenea dlou unanea <sup>31</sup> e smike deiba unea inabe ye de watnia meb wat mania kla atemnite genea watnea meb wat manea atememsea <sup>32</sup> Gode baabanea Ne keb faninwali Sum netabe. Ne Eblaham esa Aisak esa Yekob esa i Sumobo gesea Mosese dlou unanea tosiananea atememino deiba bia <sup>33</sup> Gode imin baabanea Kobo dabal ele dime mabiebo ne bli kesoa dabal ele kiningobo, keb skil otabbumino detlanale! <sup>34</sup> Isib seli ne nakaia unangai Isleli enin sumo omkayebiba kukub olo ne amitie wateme biana ne i memin wengo wente biam nabi kesoa ne daake dabalim ele tlania ne nakaia unangai daabenia dleb monia betan afet ye danamabi kesoa ne kobo kemaia moneba Isib betan unaneba Isleli daabenale ge baabasea <sup>35</sup> Islel nakaia unangai i sino Mosese wengo omdibiha bianiba baabaniba Kobo ni kima bianeba ni kukubo klabebbabo ge baabaibbua yo dimo Gode bobol tem funino omonea abisake atole tem wat mabie omansea abisake weng olo Mosese baabanea wente kesoa Gode emaye Mosese dabanea monea Isib betan unanea Islel nakaia unangai komok anea daabenebiobe. <sup>36</sup> Mosese monea Isib betano inamin namim okok sumo homono klabiane binea Isib betano deibonea Islel nakaia unangai dletnea monea aaye sole ninino Led sie ken ye moniba bianiba Mosese inamin namim okok sumo homono klabiane aaye baabasea welanea Led sio deiboniba moniba ibuantem ye bianiba Mosese inamin namim okok sumo homono klabeo bifolo 40 blimanota <sup>37</sup> Islel nakaia unangai baabenea Gode emaye ne nemanee tlibiota e wengo ibo omkaye binabibo, sinanomo Gode naka make dabanea tenea ib molobseli isak temo tlanee Gode wengo omkayemabe nakae makob ne ulabobo ge baabesebe. <sup>38</sup> Islel nakaia unangai ibuantem ye bliba Mosese bekebe biane utnea amgolim ut temnea abisake te naniba bianiba Gode bobol tem funino abisake omalea abisake omkeimanea Mosese wenten daakenea nib faninwali baabenebua nibo wentenoba wafunob mole afen smike dobonoba amit nomabbu otane <sup>39</sup> nib faninwali Mosese wengo omdibiha bianiba i bobol temo fumbianiba ni imin Isib betan unomo gabianiba <sup>40</sup> Mosese heke Elone baabaniba Mosese Isib betano deibonea nibo dleb tlebue fab unene? Kobo smike mo klaneba nibo unom gaobo smik ele sin bebea nibo abuk dobsileb unomo gesiba <sup>41</sup> am olo dimo Elone inanea i god dim omine smike makob eil blumakaue ulab klanee i eil blumakaui yanania dlaniba baabaniba

Ni kulano imen baka doklob mole kobo daabenale gabianiba funaniba Ni okoko ayamobo gansiba <sup>42</sup> Gode funanea I inamib yole ne deibesia imaye afoka alima awitnina o niniin ota omtouleb nine genea deibenea makob sinanggwano Gode weng omkeimalin nakai Gode wengo dolaniba baaniba

Islel nakaia unanga ibo ibuantem ye bliba bifolo 40 blimanao eil blumakau isa eka eil sibsib isa yenaib otane ne mo donim blim deitneniba <sup>43</sup> god dim omine smik eta klaniba e niniino Molok ge nganha bianiba ibo unom gaibo e sok um am yeb baka dalo obnakatouleb niba haabianiba eka mak ele makob awitnino ulab klaniba e niniino Lefan ge nganabananiba o niniino omtouleb bianiba ne niniino mo nemtouleb nin blim deitneib kesoa ne dlaia moniba Bebilon bibo abuk da tam unomabiobo genebiobo ge baaniba dolaibbiobe.

<sup>44</sup> I ibuantem ye blibo Gode Mosese baabanea Ne smik mako alebkeita ibo ne sok um amo inanibta getneine ge baabasea i wenteniba Gode sok um amo geniba am olo tem tamo Islel nakaia unangai Gode niniino dobtouleb blibta <sup>45</sup> sinanota Yosuae Isleli komok anea Isleli moniba bib mak ye unaniba Gode daabenea bibam olo seli yaliba naka maki skilaniba betan mak uniba Islel nakaia unangai Gode sok um amo dobo obeb teniba bib olo tem ye obabba bliba Debite komok anea <sup>46</sup> Gode Debite kla goba bia Debite Gode baabanea Yekobe Sum kobo ne keb amo gebkenamabibo gesea <sup>47</sup> Gode Yeye gene kesoa deibonebua e miine Solomon eta Gode amo moton genebiobe. <sup>48</sup> Ina otane Gode Sum kesoa e amo nakai gembibo temo mo biebabbe. Gode weng omkeimalin nakae Gode buk temo dolanea baanea

<sup>49</sup> Abilimo ne biin toulalin eka dabalim ole ne skilono olana blibo, ibo ne fatnamin am getnenom genibte? Ne fatda sinanamabine? <sup>50</sup> Inamin namin olo nemaye klaibiobo genebiobo ge baanea dolanebiobe.

<sup>51</sup> Ibo weng omdibimin nakabe. Ib bobol tem funino makob mililambio tem tab blibi bobol tem funino ulabobe. Ibo klango datana bianiba Gode Hobe amitie dobdibi bianiba makob ib faninwali naniba dobdibi binibbio inabiobe. <sup>52</sup> Sinanggwano ib faninwali Gode weng omkeimalin nakai alukum enin kino omkaye bianiba maki baaniba Sinanomo Gode Naka Molote dabanea tlamabebo geib nakai yenaiba

kulilaibbua eka ibsak memalo Gode Naka Molote dabane tle debeb moniba komokwali dobyiba anaiba kaanebiobe. <sup>53</sup> Sino Gode abiseli Gode hekmel wengo omkayebiba wentebib otane ibo i wengo omdibiye biobo ge baabesebe.

#### *I Stibene tom dum anaiba kaansebe.*

<sup>54</sup> Komokwal isa naka gang isa i Stibene wengo wenteniba atliaubesoa kweilono wa unan monsib <sup>55</sup> otane Gode Hobe Stibene bobol temo bie kesoa e delubmanea abilim uto God esa eka e titil sum osa makob ayal inamin ekebia bia Yesuse e kweile kweitale kikib ye mana bia bliba yatene <sup>56</sup> baabenea Ibo wentine! Abilimo amisalo betelabua Abilim Da Tlemin Nakae Gode kweile kweitale kikib ye mabia atemibo gesea <sup>57</sup> komokwali Stibene wengo wenteniba klango datananiba kulek ge nganasebe bianiba blublu teniba alefuniba <sup>58</sup> debetniba moniba bib asak ye unaniba Stibene dim baabaibbio nakai youmo tibo gemeloniba naka tembale niniino Sole skilono kikib ye dlaniba tom bolaniba <sup>59</sup> Stibene salabiba e Sume nganha biane baabanea Yesus Sum kobo ne smike debeitneneba ne natlano ge baabanea <sup>60</sup> ton ton golbunea Sume imin baabanea Sum kobo i ne enin ele omkanebib olo kobo mo yang kenebta i enino mo omyaebe ge baabanea kaanebiobe.

## **8**

<sup>1-2</sup> I inaniba Stibene anaiba kaanseba Sole funanea ayam nata anaibobo gesea naka maki Gode bobolo fumbibi teniba Stibene debeb moniba dobbuniba mehabilia amo yo dim ota naka maki teniba Yesuse bainobo galin nakaia unangai Yelusalem bibo blibi enin kino omkayemiba maki skilaniba Yudia betano bib mak bib mak onon tlaiba eka mak ile skilaniba moniba Samelia betano bib mak bib mako onon tlanasib otane Yesuse okok dlasanin naka ita Yelusalem bib ye bliba <sup>3</sup> Sol esak Yesuse bainobo galin nakai alukum yenanang genea monea am amo alukum hen haabiane Yesuse bainobo galin nakaia unangai dleb monea klabutam tam dlane tam ene monsiobe.

#### *Filibe Samelia betan onsebe.*

<sup>4</sup> Eka bainobo galin nakai skila moniba bib mak bib mak onon tlaibi mo bianiba bibo yo Gode wengo omkeimabiba <sup>5</sup> Filib esa inanea monea Samelia betan ye biane Gode Dofakamin Nakae Klaiste wengo Samelia bib seli omkayebia <sup>6</sup> nakaia unangai Filibe wengo wente bianiba eka inamin namin okoko sumo klabeo wateme bianiba e wengo kla wente monsiobe. <sup>7</sup> Niminbabe,

Filibe Gode wengo omkeimansea hob misi-ami naka maki bekebe bliibi kulekowa ngananiba deibe unebiba eka naka maki maa dot misiam ubenobue isa eka maki gilok yalobio naka isa klaubenea ayam an inamib <sup>8</sup> kesoa Samelia bib seli seimbianaiba e wengo wentebiba <sup>9</sup> eka naka make niniino Saimone kingkanobe. Sino e kingkano sitayebea Samelia bib seli nakaia unangai ateniba smiko deibe unoa e baabene Ne niniinsabo ge oyebea <sup>10</sup> nakaia unangai inamin namin blim isa eka inamin naminsa isa e wengo wente bianiba baaniba Gode titil sbalo naka ele omaleo o niniino Titil Sum otabo ge obianaiba <sup>11</sup> am homono dimo e inamin namin okok homono klanea wateniba dlou unaniba funaniba inamin okok ye klame yole nibo e wengo kla wente bianobte geniba e wengo amitie wenteha binabib naka esa Samelia bib ye bia <sup>12</sup> Filibe inanea te biane Yesus Klaiste wengo omkaye biane baabenea Sinanomo Gode nakaia unangai kimanamabebo gesea Samelia bib seli nakaia unangai Filibe wengo wenteniba Yesuse bainobo geiba e aaye fuelaibenea <sup>13</sup> Saimon elesa inanea Yesuse bainobo genea aaye fuelaibanea Filibe bekeba bieta Filibe inamin namin okoko sumo nakaia unangai sino mo watemin blimo klabea Saimone atemnea dlou onsebe. Inamin namin olo Saimone sino mo watemin blim bieta nena ye tam tlota watemsebe. <sup>14-17</sup> Samelia bib seli nakaia unangai Yesuse wengo wenteniba bainobo geniba Yesuse niniin dimo aaye fuelaibbu otane Gode Hobe i bobol temo mo nim blim kesoa Yesuse okok dlasanin nakai Yelusalem bib ye bliibi wenteniba i Yon esa Fita esa dlaiba moniba Samelia bib ye temniba i Samelia bib seli bainobo gabibi kweilono gabamon dim ut tebelubeniba Gode baabaniba God kobo keb Hobe dabaneba daakenea nakaia unanga elisu tleko geiba Gode Hobe daakenea i bobol temo onon tlanea <sup>18</sup> Yesuse okok dlasanin nakai inaniba i kweilono gabamon dim ut tebelubeiba Gode Hobe daakenea nakaia unangai bobol temo bia Saimone i titulo watemnea monio oleb tenea <sup>19</sup> baabenea lbo kweilono gabamon dim ut tebelubeiba Gode Hobe daakenea nakaia unangai bobol temo onamin titilo omniba ne monio oyano gesea <sup>20</sup> Fitae baabanea Gode titilo misim omkayebebo, kobo funaneba Ne monio titil olo walano geneb mole kebsa keb moni osa aseinin bib unine! <sup>21</sup> Gode keb bobol temo funino watemekebebo misiam kesoa kobo ni okok olo mo klanamabebabe. <sup>22</sup> Keb bobol temo funin misiam olo deiboneba keb bobol temo deskinaneba omoneba Gode omoneba baabaneba Kobo ne hengmino omratnene ge baabanale!

<sup>23</sup> Ni keb bobol temo funino tekein kebuobe. E kobo ni titil olo bobolo wakebua fumbianeba Ne titil olo omonia okok kemia nakaia unangai natemniba ne niniino nemtoulebe nine gabeb kesoa hengmin olo keb bobol temo watwat dakebobo gesea <sup>24</sup> Saimone Fita esa Yon esa baabeneba lbo Gode baabaniba daatnene kukub misiam olo ne dimo mo tam tlamone gesea <sup>25</sup> Fita esa Yon esa Samelia bib seli baabeniba Bain Yesuse Gode Dofakamin Nakabo ge baabeniba Sume wengo omyenaniba deibe tebianiba Samelia bib mak bib mak seli Yesuse wengo omkayem omkayemniba imin teniba Yelusalem bib ele tesiobe.

*Filibe Gode wengo Itiobia nakae omansebe.*

<sup>26</sup> Gode abisake Filibe baabanea Kobo moneba Saut da ye temehta deib make Yelusalem bib daniba ke tlaniba Gesa bib une binabib deibe sine ye biebo gesea <sup>27-28</sup> Filibe wentenea monea deib ele walanea deib tla bebianea Itiobia nakae atemsebe. Naka ele e niniin ohaminobe. E Itiobia seli komok sumo niniino Kandasio monio kimanin nakabe. E monea Yelusalem bib ye biane Gode niniino dobtoulebe binea Imin monia nene bib unano genea kalise temo tam toubia til hosi tekda buba debeb bliiba bebianea Gode weng omkeimalin nakae Aisaiae wengo dolanebuo kim bebea Filibe atenebea <sup>29</sup> Gode Hobe baabanea Kobo moneba kalis esu one ge baabasea <sup>30</sup> Filibe blublu monea naka elesu unanea teme e Gode weng omkeimalin nakae Aisaiae wengo dolanebuo kibe kesoa baabanea Kobo weng olo kibeb o mitmakamo mo tekein kebebo? gesea <sup>31</sup> e baabanea Naka maki o mitmakamo mo aletneim blim kesoa ne o mitmakamo mo tekein kebibabo, kobo teneba ne kalis temo ele touneba aletnenale ge baabasebe. <sup>32</sup> Gode weng olo enangge baanoa

Nakai eil sibsibi yenanom gaibo i wengo mo ngananimibbabe. Eka eil sibsib meme isa dleb moniba aano waketo-ufabenom gaib osa i wengo nganano kimik ge bliiba waketo-ufabenanib inanea naka elesa wengo kimik gebia debeb moniba <sup>33</sup> enin kino omaniba dim baabaniba E hengmino sumobo geniba naka maki mo baaniba E meletani ye bliobo genomabibbabo, e anaiba kaanamabe kesoa e dabalim olo alang namanamabebo ge baanea dolanebuo ota kibetabe.

<sup>34</sup> Itiobia nakae inanea Filibe baabanea utnea kalise dim ut tounsea baabanea

Gode weng omkeimalin nakae weng olo dolanebuo wane weng sang ota e dolanebione? Ema nanama bianeta dolanebio bleka naka afet nanomabibta ele besa weng sang ota dolanebuo? gesea <sup>35</sup> Filibe wentenea dobonea weng olo mitmakamo alebane ole eka omit ole Yesuse weng ayamo alebanane ole <sup>36</sup> i kalise obetniba bebianiba aaye make ye bie kesoa atemniba Itiobia nakae Filibe baabanea Aaye ele biebo, niminsabmin ota ne deibo waitne biota aaye fuelanamino debline? gesea <sup>37</sup> [Filibe baabanea Keb bobol temo Yesuse bainobo gabehe mole ne aaye fuelabkenamabibo gesea Itiobia nakae baaneo Ne Yesus Klaiste bainobo gabibo e Gode Miinobo ge baabasea] <sup>38</sup> e til hosi kimanin nakae baabanea Til hosi mo dleb unaebe, debiebo ge baabanea i kalis tem uto deibo daake bib ele blelaniba moniba aaye ken ye unaniba Filibe Itiobia nakae aaye fuelabanea <sup>39</sup> wate ken ele tenabiba Gode Hobe Filibe debeb unea Itiobia naka ele Filibe imino mo atemim blim kesebe. Filibe inanea unea Itiobia nakae deiba monea ele bibam unanea seimbiana bia <sup>40</sup> Filib ele tenea Asdot betan ye helanea tebianea bib mak bib mako Yesuse weng ayamo omkayem omkayemnea tenea Sisalia bib ele tesebe.

## 9

*Sole hengmino deibonea Yesuse bainobo gesebe.*

<sup>1</sup> Sole amitie obiana Ne Yesuse bainobo galin nakaia unangai yenanitabo ge obiana monea <sup>2</sup> Gode amo kimanin nakai i komok sume baabanea Kobo futano dolatnenale gesea e Yudai Gode amo kimanin nakai Damaskas bib ye blibi futano dolanea baabanea Ibo Yesuse bainobo galin nakaia unangai mo bliba yatemaibo yafu dloniba naka ele dlaliba dletnea Yelusalem bib ele tleko ge baanea dolabasea <sup>3</sup> e ometnea monea Damaskas bib asak ye bebea ayal sume abilim ut danea bomatowanea daakenea Sole ge dofakasea <sup>4</sup> Sole til hose dim ut toubieba gama daaknea dabalim daak blelasea weng mako baanoa Solo, Solo, kobo nimin kenebta ne enino omkanebebe? gesoa <sup>5</sup> Sole baanea Sum kobo wankebte? gesea <sup>6</sup> e Sole baabanea Ne Yesus netabo, kobo enino omkanebeb kesoa memalo hananeba moneba Damaskas bib ye unebta naka make teneta ne okoko omakabebio wengo baabkeneko ge baabasea <sup>7</sup> naka maki e bekeba bebibi dlou unaniba smiko deibe unoa i wengo kimik gebianiba naka dame mo atemim blim otane weng ota wentiba <sup>8</sup> Sole

hananea e kino boma temeta ib inamino gebanoa e mo yatemim blim kene kesoa naka maki kweil gong wat afu debetniba moniba Damaskas bib ye daiba biana <sup>9</sup> amo asumatna kesee e kino sma ye gebabua e imena aaya osa mo unalim blim besa bieta <sup>10</sup> Yesuse bainobo galin nakae niniino Ananaiaase Damaskas bib ye bia Sume tenea baabanea Ananaiaso gesea e baabanea Ae Sum kobo ne ele blibo gesea <sup>11</sup> Sume baabanea Kobo moneba Yudase amo deib unemino niniino Molot ye unaneba taneba Yudase am tam unaneba baabaneba Tasas bib sake niniino Sole fab biene? Ne wengo baabanang genitabo genale! Sole am ye biana God ne ngane biana <sup>12</sup> damo tenea nakae niniino Ananaiaase tenea e kweilo e kin dim wat tebelubasea Sole kino webiabanabua temebo gesea <sup>13</sup> Ananaiaase baabanea Sum kobo naka homon unang homoni baaniba Sole Yesuse bainobo galin nakaia unangai Yelusalem bibo blibi enin kino omkayebea <sup>14</sup> eka keb amo kimanin nakai komokwali baabaniba Kobo moneba Damaskas bib ye unaneba Yesuse bainobo galin nakaia unangai yafu dlet moneba klabutam tam kamale geib kesoa e tenea Damaskas bib ye tlanea inanano gabebo geiba wentibo gesea <sup>15-16</sup> Sume imin baabanea Kobo one! Ne naka ele ne okok naka dofakaia e ne okoko okok kebianea ne wengo omeb monea nakaia unangai Yudaba isa eka bib mak bib mak seli komokwal isa eka Islel ten isa omkaye bianamabebe. Ne Sole baabania Kobo ne niniino omkeimamebo dafao naka maki teniba enin kino omklomabiobo ge baabanamabibo gesea <sup>17</sup> Ananaiaase wentenea monea Yudase niniin aseke amo Sole bie tam unanea e kweilo Sole tebelubanea baabanea Ne nek Sol kobo deib tama deib tebianeba nib Sume Yesuse atemebbue emaye nemaneta tlibo keb kino webiabkenoa Gode Hobe dabanea daakenea keb bobol tem daak unubkeneko gesea <sup>18</sup> Sole kino aning blong inamino kin deib bla waisabuo gemelaba tloa e kino imin webiabanoa temnea hananea Ananaiaase Sole aaye fuelabanea <sup>19</sup> omito imeno downea sbal manea Yesuse bainobo galin nakaia unangai Damaskas bib ye blibi baka biana <sup>20</sup> monea meb meb ye Gode amo tem tamo Gode wengo omkaye biana baabanea Yesuse Gode miinobo ge oyem haasea <sup>21</sup> naka maki wenteniba dlou unaniba baaniba Naka ele sino Yesuse bainobo galin nakaia unangai Yelusalem bibo blibi enin kino omkaye biana tenea Bib olo seli Yesuse bainobo galin nakaia unangai klabuto ge dleb monia Gode amo kimanin nakai i komokwal isu unamabibo



gabinebuo ba etabo gesib <sup>22</sup> otane e Yesuse wengo omkeimamin titilo omo bianea baabenea Yesuse Gode Dofakamin Nakabo gesea Yuda nakai Damaskas bib ye blibi wenteniba funaniba E wengo motonobo geniba i weng blim kesioebe.

*Sole monea Yelusalem bib onsebe.*

<sup>23-25</sup> Sole inabea am homono blimanoo Yuda nakai miniba Sole ananomo ge baaniba kwin tlamo boman tlamo Damaskas bibo tomo smen baka funiba daamo geibbuo amit deibo alukum genha bianiba ni Sole ananobtabo galib kesoa naka make wentenea Sole baabanebuo kwinoa Sole bekeba nin nakai debeb utniba daam dim ut nananiba tlit meene tem daak dababbaniba sai da afu daba daba bliba daaknea kim daak blaneana bib olo deibonea monea <sup>26</sup> Yelusalem bib ye unanea Yesuse bainobo galin nakaia unangai ye blib ita bekebe biang gesea i funaniba E Yesuse bainobo galin nakababo geniba e tolo tosanianiba deibasiba <sup>27</sup> Banabas eta elekime debeb monea Yesuse okok dlasanin naka isu danea baabenea Naka ele Damaskas bib deib unemin ye monea nib Sume atemna bianea e wengo wentenanea monea Damaskas bib ye bio e mo tosaniam blim sbal mabianea Yesuse wengo omkayebe biota debeb tlibo ge baabenea <sup>28</sup> Sole bainobo galin nakaia unangai ye bekebe bianea Yelusalem bib seli Yesuse wengo omkaye monseo e mo tosaniam blimobe. <sup>29</sup> E inabea Yuda nakai Glik weng obibi tetemsiba e Yesuse wengo baabesea i wenteniba halen tlaniba weng ombiabasiba e baase i baasib biniba atliaubeso ananom genamsiba <sup>30</sup> Yesuse bainobo galin nakai wenteniba Sole debeb moniba Sisalia bib ye unaniba dabaiba monea Tasas bib onsebe. <sup>31</sup> Sole inaneana unea Yesuse bainobo galin nakaia unangai Yudia betano blib isa eka Galili betano blib isa Samelia betano blib isa i naka maki enino mo omkayemin blim kesoa i ayam bianiba naka homon unang homoni Yesuse bainobo geiba Gode Hobe daakenea titilo omya i Yesuse bainobo galino sbal masioebe.

*Inias esa Dokas osa i weng sangobe.*

<sup>32</sup> Fitae dalanea bib mak bib mak ye baka wat baka wat binea monea Lida bib ye Yesuse bainobo galin nakaia unangai Lida bibo blibi baka bianea temea <sup>33</sup> naka make niniino Iniase gilok alobua ye binabeo bifolo 8 blimano bua atemnea <sup>34</sup> baabanea Inias kobo Yesus Klaist eta klaubkeneta ayam anebobo, hananeba keb biin tano gemelo ge dlanale gesea <sup>35</sup> e hebmsab hananea Lida bib sel isa Selon bib sel isa atemniba i Yesuse bainobo gesioebe. <sup>36</sup> Yesuse bainobo galin

unango niniino Tabitao Yoba bib ye biota Glik teni o niniino Dokas ge nganwebiba o okoko amitie klayam okok kebianoa nakaia unangai imena moniao blimi misim okaye binabobua <sup>37</sup> amo yo dimo o genandenoa kaanoa unang mak isa eka sosen isa teniba aaye fuelaboniba omeb utniba biin asal ut omfa bliba <sup>38</sup> Lida bibo skeimbabe, meb yotabe. Naka maki baaniba Fitae Lida bib ye baka biebo gesiba Yesuse bainobo galin nakai wenteniba nakai asu dlaib moniba Fitae baabaniba Kobo ni bekebeneba hebmsab Yoba bib unomo gesiba wentenea <sup>39</sup> baka monea Dokaso niniino mako Tabitao am tam unanea utnea biin asal ut tem ut temea sostoni alukum teniba Fita esu ele miniba mebianiba Dokaso youmo bikibenobuo Fitae alebasiba <sup>40</sup> Fitae baabeneana Ibo alukum tala bib unine genea i tala bib onsiba e tonton golbuo daak tounea Gode nganha bianea unang olo kaanobuo baabonea Tabita obo hananale gesea <sup>41</sup> o kino bomanoa Fitae atemnoa hana ute tounsoa e kweilone tobwensea alefunoa omfaanea hana ute masoa deibonea unang sosen isa bainobo galin nakaia unangai mak isa nganabenea imin tam temiba o mo alebeneana ele omfaiobo ge baabenea <sup>42</sup> weng olo Yoba bib seli alukum wenteniba naka homon unang homoni Yesuse bainobo gesioebe. <sup>43</sup> Am homono dimo Fitae Yoba bib ye binebuo Saimone eil blumakau aal klamin nakae am tam aala binebioebe.

## 10

*Koniliase Fitae nganabanea tesebe.*

<sup>1</sup> Naka make niniino Koniliase Lom bibo awa genalin nakai komokobe. E Sisalia bib ye bianea awa genalin naka homoni 100 i kima binabe biotabe. Awa genalin naka eli niniino Itali awa genalinobe. <sup>2</sup> Konilias ele e alelo ikam osa eka e meletan isa i Yuda nakaba otane i Gode bainobo gabianiba e niniino dobtouleba bianiba Yuda nakaia unangai inamin namin blimi daaye bianea monio okaye bianea Gode amitie nganha binabebua <sup>3</sup> am mak bomanoa bia kwin tloa afoko delwab manoa abisake tenea baabanea Koniliaso gesea <sup>4</sup> Koniliase abisake atemnea dlou unanea baabanea Sum kobo namin deib tlebe? gesea abisake baabanea Kobo Gode amitie nganha bianeba eka naka mak unang maki daaye biam nabobo, Gode kukub olo watemub kenea keb bobolo funanea <sup>5-6</sup> naka make niniino asube, Saimon Fita etabe. E Yoba bib ye bianea eil blumakau aalo klamin nakae niniin aseke Saimone bekeba biebo, e amo meb aaye sole ken ye biobo, kobo nakai mo dlaneba moniba Fitae baabaiba tleko ge baabanea

7 abisake unea Koniliase deibanea okok nakai asu nganabene tliba dlona bianea eka awa genalin nakae Gode wengo amitie wente bianea Koniliase bekeba binabe naka esa dobonanea 8 abisake wengo baabane baabenee dlane moniba tamal sibnoma 9 bomanoa moniba Yoba bib asak ye bebiba kelanoa Fitae utnea biin asal ut uneanea Gode nganhabea 10 imen tebo anasobe. Naka maki homonema ye fubiba Fitae inanea imen teb anasoa temeaa 11 abilimo amisalo betelanoa youme sume flanggete ulabe abilim ut danea sayo asuke asuke nao tebe geiebbua sa da e wafu wafu bliba daakesea temeaa 12 inamin namin homoni tila eila wana inaba i youme tem wat bliba yatemnabea 13 weng mako baabanoa Fita kobo hananeba kulan eli yenaneba downonale gesoa 14 Fitae baane Yeye kulan eli ne awemobo, ne mo downamibabo gesea 15 weng olo imin baabanoa Gode baane Uninobo gene mole kobo mo baanebta Awemobo genemebe genoa 16 weng olo ohamino asumatna kenoa wentea youme imin debeb ula abilim unea 17 Fitae funanea Kukub olo mitmakamo fatnamine? gabea Koniliase nakai dlane tebib Saimone amo hente bianiba nakai baabesib alebe dlo dla dla bliba teniba amisalo kikib ye tlaniba 18 Saimon Fitae am olo tem tam aalabeo? ge nganasiba 19 Fitae kukub olo alebano fumbea Gode Hobe baabanea Naka maki asumatna teniba kobo hembio, 20 kobo mo tosiyanabenemebe! Hananeba moneba i baka one! Nemaye dlai tlibo gesea 21 Fitae daakeneba naka eli baabeneba Ibo naka ele hembibe netabo, ibo namin deib tlibe? ge baabesea 22 i baabaniba Awa genalin nakai 100 i komoke niniino Konilias eta ni dlaneta tlobobo, e naka ayamobe. E Gode niniino dobtoulebe bia Yuda nakai alukum fumbianiba E naka ayamobo gabiba Gode e abisake tenea baabaneba Kobo nakai mo dlaneba moniba Fitae debeb tliba e wengo wentemale ge baabaseta Koniliase ni dlane tlobobo gesiba 23 Fitae baabeneba Ibo tam teniba am ele aanine ge baabeneba aan sibnoma bomanoa Fita esa naka elisa Yesuse bainobo galin nakai maki Yoba bib ye blib isa moniba temal sibnoma 24 bomanole teniba Sisalia bib ele tetemiba Koniliase e meletani dolmina bianea eka e nekwal mak isa nganabene tenaniba miniba Fitae waisa bianiba 25 Koniliase tamnea bib tam bia Fitae tesea atemnea tonton golbua daak tounea Fitae niniino dobtoulebe 26 Fitae baabaneba Hananale! Kobo mo inamebe! Ne naka makob kleb ulabobo gesea Koniliase hananeba 27 Fitae Koniliase dab keniba weng omomniba taniba am tam teniba naka homon unang homoni am tam

blibo temna bianiba 28 Fitae nakaia unangai baabeneba Yudai hekmel wengo baanoa Yuda nakaia unangai naka afeti mo baka nimibe! Eka i am osa mo nimibe genobu otane Gode aletnene kesoa ne funania Ne mo baanita Naka maki misiamobo genimibabo genia 29 naka eli moniba baatneniba Kobo ni bekebeneba unomo geibo ne Yeye genamino deibonia tlibe. Ibo namin weng nganatneniba tele geibta tline? gesea 30 Koniliase Fitae baabaneba Ne inamin namin olo tam tloa watemibuo amo aalan tebio asuke imin asuke naiobe. Inamin namin olo tam tloa watemibuo inaminobe. Ne bib ele blia kwin tloa makob memale biob enasoa tania am tam biania Gode nganhabia naka make e youmo makob ayal einin kenobuo dlusaneba tenea meb ele masea atemna bia 31-32 baatneneba Koniliaso keb wengo Gode wentubkeneba Kobo nakai inamin namin blimi monia imenao okaye binabebo memalo daabkenang gebo, kobo nakai mo dlaneba moniba Yoba bib unaniba Saimon Fitae niniin asue debeb tline! E Saimon afete eil blumakauo aal klamin nakae amo tem ye biebo, am olo meb aaye sole ken ye biobo gesea 33 ne wentenita hebamsab naka eli dlaita monibta baabkeibta tlebobe. Kobo inaneba tlebo ni funanoba Klayam nanebta tlebobo gabuobe. Ni Gode kin dimo alukum ne am ele mibiobobe. E Sume kukubo kobo alebkenebuo ni alebenale gesea 34 Fitae baabeneba Ne fumbio memalo Gode nakaia unangai mito mo fumbiane eka nakai niniinsai bobolo mo fumbianba biebabe. 35 Ele nakaia unangai e tolo tosiyan bianiba kukub ayam wafu blib ita e kla gobe biebe. 36 Sino Gode weng olo Islel nakaia unanga ni omyebuo dowan weng ayam olo baanoa Yesus Klaiste nakaia unangai alukum i Sumobo, e bobol tem fiab omyebo genobiobe. 37-38 Ibo tekein kebib yotabo, Yone aa fuayemin naka eta aayo fuaye bianea Gode wengo omkeima biam bianea eta sin okok kebete eka Nasalet bib sak ele e okoko Galili betan ye kilonea Gode Hobe daabaneba dabaneba monea Yudia betan ye unea Gode e Hob esa titil osa omanea daabaneba titilo omananea dabaneba monea Yudia betan mak mako haabiane nakaia unangai daaye bianea eka Gululame titilo ge dlabiamo klaye bianea 39 eka Yelusalem bib sel isa eka Yuda betano bib mak bib mako blib isa daaye bianea klaye biam bia ni atemnoba nisa e dowan weng olo omkayeboba i debeb moniba atdimoo dabasa anaiba kaanea 40 amo asu kenea make dime Gode imin dofaaneba hananeba naka maki atemib otane 41 naka homon unang homoni mo atemim blimobe. Gode dlakanebio naka unang nita

Yesuse imin hananeo atenoba ete nite nabi-anoba imena aayao wembiam bianoba<sup>42</sup> Yesuse ni baabenea Gode ne nem-fakanebio kesoa sinanomo ne nakaia unangai afen blib isa kulilaibbio isa i kukubo klamin naka namabibo, ibo moniba weng olo nakaia unangai alukum baabeine ge baabenebiobe.<sup>43</sup> Sinanggwano Gode weng omkeimalin nakai Yesuse weng olo buk temo dolaniba baaniba Nakaia unangai e bainobo geib mole Gode i hengmino omt-labenamabebo ge baabenibbiobo ge oye-monea<sup>44</sup> weng obe dim wat ye Gode Hobe daakenea nakaia unangai weng olo wente-bibi i bobol temo onon tlanea wengo afet afet obianiba<sup>45-46</sup> Gode niniiino dobtouleb nib kesoa Yuda bib seli Yesuse bainobo galin dobyebo gesiba<sup>47</sup> Fitae baabenea Gode Hobe dabanea tenea Yuda nakaia unanga nib bobol tem osa naka afeti bobol tem osa onon tlane kesoa ne aaye fuelabenam-abibo, naka maki mo baaniba Aaye mo fuelabenemebe genimibe ge baabanea<sup>48</sup> e Konilias esa e meletan isa imin baabenea Ibo Yesuse niniiino taisaniba aaye fuelaine gesea i inaniba aaye fuelaniba Fitae baabaniba Nibo ele binobte ge baabasiobe.

## 11

*Fitae Koniliase weng sango omkeimasebe.*

<sup>1</sup> Yuda nakaba naka afet isa Yesuse weng wenteniba bainobo gabioho ge baasiba Yesuse okok dlasanin naka isa eka bainobo galin naka mak unang maki Yudia betan ye blib isa weng olo wentenabiba<sup>2</sup> Fitae imin tenea Yelusalem bib ele tetemea bainobo galin nakai aalo waketoubibi funaniba Ni Yesuse mele-tanobo, eka aalo waketoubibba ile Yesuse meletanbabo geniba Fitae dobsuananiba<sup>3</sup> baabaniba Kobo nimin kenebta nakai aalo waketoumin blimi amo moneba i imeno baka downon tlebe? gesiba<sup>4</sup> Fitae Koniliase weng sang olo omkaye biance baabenea<sup>5</sup> Ne Yoba bib ye biania Gode nganhabia inamin namin mako dam dikin aletnenoa temia youm sume flanggete ulabe abilim ut danea sayo asuke asuke nao keno tebe gieibbua sa da wafu wafu bliba daakenoa nenesu ele tesoa<sup>6</sup> youme tem wate temia inamin homoni eila tila wana inaba i blib kesoa yatemnabia<sup>7</sup> weng mako baanoa Fita kobo hananeba kulan eli yenaneba downonale! gesoa<sup>8</sup> ne baania Yeye Sum kobo kulan eli ne awemobo, ne mo downamibabo gesia<sup>9</sup> weng

olo imin baatnenoa Gode baanea Uninobo gene mole kobo mo baanebta Awemobo genemebe! ge baatnenoa<sup>10</sup> weng olo baanamino asumatna keno wentia youm ele imin ulanea abilim unea temnabia<sup>11</sup> omito nakai asumatnai Sisalia bib sake Koniliase dlane tebibi teniba ne Saimone am temo bli ye tetemiba<sup>12</sup> Gode Hobe baatnenea Kobo i baka one! Kobo mo tosanemebe! gesea bainobo galin nakai asuke asuke asuke nai ele blib eli ten-anoba monoba Koniliase bib ye temoba<sup>13</sup> e baabenea Ne am ele blia abisake tenea baatnenea Kobo nakai mo dlaneba moniba Yoba bib unaniba Saimon Fitae niniiin asue baabaib tenea<sup>14</sup> ne wengo kebsa nakaia unangai keb amo blib isa omyia wenteniba ibo afen smike doboniba amit nine! ge baatnenebiobo ge baabesea<sup>15</sup> nesak Gode wengo omkayemonia Gode Hobe makob nibo sino mikiktemo daake nabenebio inanea i bobol tem osa onon tlanea<sup>16</sup> sino ni Sume baabenea Sino Yone aaye fuayebe otane aa moton fuayebebo, ibta sinanomo Gode Hobe dabanea daakeneta ib bobol temo onon tlanamabebo ge baabenebuo ne weng olo funabibe.<sup>17</sup> Nibo Yesu Klaiste bainobo gaboba Gode e Hobe dabanea daakenea nib bobol temo onon tlanebuo memalo inanea dabanea daakenea i bobol temo onon tlabes kesoa ne mo baanita Denano genimibabo gesea<sup>18</sup> Yudai bainobo galin nakaia unangai Fitae wengo wenteniba i inamin wengo imino omino deiboniba Gode niniiino dobtou bianiba baabaniba Kobo naka mak unang mak isa i hengmino omtlabeneba i afen smike doboniba amit nine ge baabasiobe.

*Antiok bib seli bainobo galin nakai wengobe.*

<sup>19</sup> Sino Stibene anaiba kaanea eka bainobo galin nakaia unangai enino omkayemib kesoa bainobo galin nakaia unangai skilaniba bib mak bib mak ye onon tlaniba maki Finisia betan uniba eka maki Saiblas aaubil uniba eka maki Antiok bib onaniba bianiba Yesuse wengo Yuda nakaia unangai bibo yo blibi ilita omkayebib<sup>20</sup> otane Saiblas bib sel isa Sailini bib sel isa i bainobo galin nakai maki moniba Antiok bib ye bianiba Yuda isa eka nakaia unangai Yudaba isa Yesu Sume downan weng ayamo omkayebiba<sup>21</sup> Sume titilo i omkayebes naka homon unang homoni i wengo wente bianiba bainobo gabiba<sup>22</sup> bainobo galin nakai Yelusalem bibo blibi weng olo wenteniba i Banabase dabaiba monea Antiok bib ye temea<sup>23</sup> bainobo galin nakaia unangai Antiok bibo blibi Gode daabe bie kesoa Banabase yatemnea seimbiana baabenea

Ibo Sume bainobo galino sbalma wafueine ge baabesebe. <sup>24</sup> Banabase naka ayamobe. E Yesuse bainobo galin osa sbalobe. E bobol temo Gode Hobe amitie bie kesoa naka homon unang homoni e wengo wente bianiba bainobo galiba <sup>25</sup> Banabase deibenea monea Sole Tasas bib ye bio hente debetnea <sup>26</sup> imin moniba Antiok bib ye bianiba bifol olokiemo dimo i Yesuse bainobo galin naka mak unang maki tenaniba mibianiba Sole Banabase i dabo Gode wengo aleye monsiobe. Antiok bib seli bainobo galin nakaia unangai mema niniino dlaniba I Klistenobo ge nganabesiobe. <sup>27</sup> Am olo dim ota Gode weng omkeimalin nakai maki Yelusalem bib ye blihi bib olo deiboniba moniba Antiok bib ye teniba <sup>28</sup> naka make niniino Agabase Gode Hobe bobol tem funino omalea e tenea mabianea baanea Sinanomo dabalim olo imeno alukum blimanamabobo ge baabenea <sup>29</sup> Yesuse bainobo galin nakaia unangai Antiok bib ye blihi Agabase wengo wenteniba funaniba Nibo bainobo galin nakaia unangai Yudia betan ye blihi daabenomo! geniba i monio atosino ima oleb unaniba atosin ota oloniba <sup>30</sup> Banabas esa Sol esa oyiba oleb moniba Yelusalem bib ye unaniba Bainobo galin nakaia unangai komokwali Yelusalem bib ye blihi oyensiobe. I inabiba sinanoa Klodiase Lom bib seli komok ane dimo bib mak bib mako imeno alukum blimansobe.

## 12

*Helote awa genalin nakai Fitae ge debeh moniba klabutam onsiobe.*

<sup>1</sup> Am olo dimo Yudai komok sume Helote bainobo galin naka mak unang maki enino omkaye bianea <sup>2</sup> awa genalin nakai baabenea Ibo bainate tebeb moniba Yone heke Yemse anaiba kaaneko ge baabesea i inaniba moniba Yemse ananiba kaanea <sup>3</sup> Yudai funaniba Helote ayam naneta Yemse ananebo gesiba Helote i bobol tem funino yatemnea funanea Ne Fita esa anaia i imin ne niniino nemtoubleb unine genea awa genalin nakai baabenea Ibo moniba Fitae ge debeh moniba klabutam daine ge baabesea am olo dimo singkalin am sumo bleto yis blim downamin am boma biotabe. <sup>4</sup> Awa genalin nakai inaniba Fitae klabuto ge debeh moniba klabutam daniba Helote funanea Naka homoni Fitae kimanomabib kesoa e mo unamabebabo ge funanea e awa genalin nakai 16 obe, baabenea Ibo Fitae kla kimaib skabo singkalin am sumo niniino Fasobao blimansota debet monia Yuda isu unania kot kebania anaia kaaneko gesea <sup>5</sup> Fitae klabutam

tam bia Gode bainobo galin nakaia unangai Gode nganahiiba <sup>6</sup> amo yo dim ota Helote funanea Bomanomo Fitae debetnia Yuda isu kot kem unano ge funanabea am olo dimo awa genalin nakai milim anononasiba Fitae isak daak anonse sen sayo asu gebaniba aambia amit kimanin nakai amito kima bliha <sup>7</sup> ibalanoa Sume abisake daak tlea ayale sume klabutam tamo tubunabea abisake Fitae melen wat blelabanea Hananale ge baanea dofasea sen sayo kwei gong wat gebaibbuo debianoa tila tebel mein daaknoa kim daak blelanoa <sup>8</sup> abisake Fitae imin baabanea Keb youmo dlusaneba keb skil otabbumino otabbanale gesea inasea baabanea Eka youme tibe imin dobusaneba te nemsileb nale gesea <sup>9</sup> e inanea dobsileb bia tamniba bib tam unaniba Fitae fumbianea Kukub olo dam temebi bleka bain keim eso gabea <sup>10</sup> tala bebib otane amit kimanin nakai mo yatemim blim keiba dotla taniba daamo amisal osa tam temiba omaye betelanobio kesoa omla tam bib tam unaniba bebianiba abisake deiba unea <sup>11</sup> Fitae funanea baanea Ne tekein kebibo, inamin namin olo bainobo, Helot esa Yuda isa nananom gabib kesoa Sume abisake dabanea daakeneta ne klabutam tamo blio nemeb tam te bib ele tlebo ge funanea <sup>12</sup> monea Yon Make niniin asue biemo Maliao am ye temeaa bainobo galin nakaia unangai homoni Maliao am ye mibianiba Gode nganahiiba <sup>13</sup> Fitae amisalo gong gong gansea Maliao okok kewemin unango niniino Loda tenoa Wankebe? gesoa Fitae baanea Netabo gesea <sup>14</sup> o e weng olo wento Fitae weng baane kesoa amisalo betelanamino deibonoo seinseinoa tanoa bainobo galin mak isu tam unanoa baabenoo Fitae tenea amit etale biebo gesoa <sup>15</sup> i baaboniba Sembianeba dim dim wengo omino denale gesiba o baanoa Fitae weng ye baaneta wentibo gesoa i baaiho Dam ekobbabo, e bekel etabo ge omoniba <sup>16</sup> e imin gong gong gansea i amisalo betelaniba temiba bain Fita eta kesoa ateniba i smiko deibe unoa weng hek baasiba <sup>17</sup> Fitae kweile sital wat tofanea kinea enaniba wengo kemik geine gesea kimik gesiba baabenea Ne klabutam tam blio Sume abisake dabanea daakenea nemeb tam tenea bib ele daneta tliho, ibo weng olo Yems esa bainobo galin naka mak isa baabeine ge baabenea e deibenea bib mak une sonoma <sup>18</sup> bomanoa awa genalin nakai Fitae amo henwaniba baaniba Fitae am olo blim bie olele fab unene? gesiba <sup>19</sup> Helote baabenea Kla henwaine gesea hambib otane i mo atemin blim keib kesoa Helote Fitae kima binibbio nakai baabenea Ibo fatnabaibta une bione? gesea i e kima sibnoma biinob bua watemibbuo wengo

kla baabasiba Helote wentenea funanea Dim obiobo genea awa genalin nakai maki baabenea Ibo Fitae kima binibbio naka eli dleb moniba yenaiba kaaine ge baabenea i inaniba dleb mo inaiba Helote Yudia betano deibonea monea Sisalia bib onsebe. Helode inanea bianea <sup>20</sup> Taia bib sel isa Saidon bib sel isa dosuanasea Taia bib sel isa Saidon bib sel isa i betano imeno bli-manobua i moniba Helote betan ota imeno webib kesoa i funaniba Deibanob biamo sinanoa ni monoba imeno imin walom gaobo Helote dosuananea tolobo genamabebo geniba i sinwalo miniba moniba Blastase Helote amo kimanin nakae baabaniba Kobo ni daabeneba monoba Helote baabanoba E atlihamin kukubo deibueko gesiba Blastase i wengo wentenea dleb monea Helot esu unaniba baabaniba Kobo atlikemin kukubo deibonale ge baabasio-be. <sup>21</sup> Helote inanea e amo omakanebuo tlo kesoa e komokwali youme dubusanea tanea komokwali biin tam toubmianea e wengo nakaia unangai omkayebea <sup>22</sup> i e wengo wenteniba am dofa ngambianiba keb weng olo nakai wengbabo, keb wengo makob Gode wengo ulabobo ge nganh-ibo <sup>23</sup> e mo baaneta Yeye ne Godbabo, ne dabalim nakabo ge baanamino deibonea e Gode niniino mo dobtouleb nim blim kene kesoa Gode abisake dabanea tenea Helote ande dofanea kaseli e amun temo waloniba doweiba kaanebiobe. <sup>24</sup> E inanea kaane kesoa nakaia unangai homoni Yesuse wengo wenteniba bainobo gesiobe. <sup>25</sup> Banabase Sole i dabo Antiok bib seli monio Yelusalem bib seli olubeibo oleb moniba oyeniba Yon Make debetniba imin Antiok bib onsiobe.

### 13

*Banabase Sole i dabo Gode wengo omkaye monsiobe.*

<sup>1</sup> Nakai niniino Banabas esa Simione e niniin mako Milil esa eka Lusias Sailini naka esa Isleli komoke Helote ninge Maneyen esa Sol esa itabe. Naka eli maki Gode weng omkeimalin nakabe. Eka mak ile e wengo aleyemin naka nabe. I Yesuse bainobo galin nakaia unangai Antiok bibo blibi bekebe bliba <sup>2</sup> am mak dimo bainobo galin nakaia unangai miniba imeno hala bianiba Gode amitie nganha bianiba e niniino dobtouleb bliba Gode Hobe baabenea Ibo Sole Banabase i dabo dlakaibta ne okoko okok kemine gesea <sup>3</sup> i imeno sma ye hala bianiba Gode imin nganha bianiba naka eli yafuniba kweilo gabamon dim ut tebelubeniba Gode baabaniba Kobo naka eli daabeneba keb okoko okok kemine ge baabaniba dlaiba onsiobe. <sup>4</sup> Gode Hobe inanea Sole Banabase i dabo dlanea moniba Selusia

bib ye unaniba siibe obetniba moniba aabile Saiblas bibo niniino Salamis bib ye onsiobe. <sup>5</sup> I inaniba moniba Salamis bib ye bianiba moniba Yudai Gode amo tem tamo Gode wengo omkeimabiba Yon Mak esa i bekebe monea ye bianea i okoko daayebea biniba Salamis bibo deiboniba watniba <sup>6</sup> Saiblas aabile milim sin da wato bibo niniino Fefos bib wat unaniba bib olo kingkane niniino Ba-Yesuse ye bia Glik teni Elimas ge oha binabibe, e Yuda nakabe, e Saiblas seli komoke Sesias Folase nekobe. E dim baanea Ne Gode weng omkeimalin nakabo gabea <sup>7</sup> Sesias Folase tekein kemin nakabe. E Gode wengo wentano genea naka make dabanea monea Banabase Sole i dabo baabenea Ibo Sesias Folas esu unine gesea mo temiba <sup>8</sup> Elimase funanea Sesias Folase Yesuse bainobo gene mole olo misiamobo gene kesoa e sbal manea Sole Banabase i dab i wengo omabbubesea <sup>9</sup> Gode Hobe Sole, niniin mako Fol etabo, e bobol temo telaak unubasea e Elimase ateme bianea baabanea <sup>10</sup> Gululame miin kobo kukub ayamo omabbuna binabeobo, kobo dim omin nakabe. Inamin namin kukub misiamo nabianeba dim omin kukub ota amitie wafu bianeba Gode wengo baanobuo deiboneba deskinaneba afet obinabeb <sup>11</sup> kesoa memalo Gode kemde kemfanea keb kino bibkenoa afoko mo watemamabebbabo, amitie bibkenobua am homono bliamanabobo ge baabasea hebmamsab ayungo mililo daakenoa e kino tum gebanoa tobtlin halonea tubu tubu motemea naka maki kweil gong wat afuniba deibo alebaiba <sup>12</sup> komoke Sesias Folase atemnea dlou unanea Yesus Sume wengo bainobo genebiobe.

*Folwali Antiok bibo Fisidia betan ye bianibta tesio-be.*

<sup>13</sup> Fol esa eka e bekeb isa i Fefos bibo deiboniba siib tem moniba Famfilia betano bib gwabo niniino Fega bib ye unaniba Yon Make Folwali deibeneba imin Yelusalem bib unea <sup>14</sup> eka Folwal ile Fega bibo deiboniba moniba Fisidia betano bib gwabo niniino Antiok bib ye bliba singkalin am homano kesoa taniba Gode am tam touna bliba <sup>15</sup> Gode amo kimanin nakai Mosese hekmele weng osa Gode weng omkeimalin nakai dolaibbu osa kiniba Folwali isak baabeniba Nekwal ibo Gode weng ayamo aleyeobo mo bio mole nisak alebeine gesiba <sup>16</sup> Fole hananea kweile kiye bianea baabenea Ni nekwali Islel ibsa eka Islelba Gode niniino dobtouleb blib ibsa wentine! <sup>17</sup> Islel nakaia unangai Gode nib faninwali dlakanea kima bia i Isib betan ye bianiba waloniba Gode titilo i kimanoo dletnoa Isib betano

deiboniba moniba <sup>18</sup> ibuantem ye unib osa Gode sma ye kima bia bifolo 40 o blimanoa <sup>19</sup> ibuantemo deiboniba moniba Kenan betan ye uniba Gode baabenea Ibo nakaia unangai bib olo seli yaline gesea i inaniba Kenan bib seli naka mito 7 i yaliba Gode betan olo nib faninwal ita omya bliba <sup>20</sup> bifol homono 450 o blimanota o abuk ota Gode i komokwali dokabea kima de watwat tebibta eka e weng omkeimalin nakae niniino Samyuele dofakanea <sup>21</sup> kimane dimo nib faninwali Gode baabaniba Kobo ni komok sumi mo dofakabenale geibta e komok sume niniino Sole Bensamine molofeite Kise miine dofakaneta kima bia bifolo 40 o blimanota <sup>22</sup> Gode Sole imin dobtlanea Debit eta dofakanea kimasea baanea Ne Yesie miine Debite atemnia ne kla gobaiobo, e ne wengo kla wentemabebo genebiobe. <sup>23</sup> Gode inanea Debite molofeite Yesuse Yuda nakaia unangai hengmino temo blibo dotlaneko genea dofakanea dabanea <sup>24</sup> tlang genabea Yone aay fuayemin nakae Islel nakaia unangai baabenea Ibo ib hengmino deiboniba ib bobol temo deskinaniba Gode omaniba aaye fuelaine ge oye bianea okok kebea <sup>25</sup> blimanang go dimo baabenea Ibo fumbibo Ne fatnamin nakabo gabibe? Nele ibo naka ele waisa blib ekobbabe. Ne sin tlibu otane ne abuk tlamabe nakae titilo ne titilo gaitnenamabebe. E Sumobe. Ne sumba kesoa ne e mo tenanobta wengo baanomobbabo genebiobe. <sup>26</sup> Nekwali Eblahame molobsel isa eka bib mak seli Gode ninino dobtouleib blib ibsa kla wentine! Gode weng olo baabenoa Ibo Yesuse bainobo geib mole e ibo hengmino temo blibo dotlanamabebo ge baabenobuo Gode weng olo nibo omyebiobe. <sup>27</sup> Yesuse daak tenea nib hengmino walubene otane Yelusalem bib sel isa eka i komokwal isa i mo funanibta Yesuse Gode miinobo geim blimobe. I singkalin amo tlang gamo dimo Gode weng omkeimalin nakai Gode wengo dolaibbuo kibib otane i o mitmakamo mo tekein keim blimobe. Weng olo dolaniba baaniba I Gode Dofakamin Nakae kukubo wataniba baaniba Anaine genomabiobo geibbuo i bain inaniba anaibbiobe. <sup>28-29</sup> I tekein kebiobe, Yesuse kukub misiamo mo naim blim otane Gode weng omkeimalin nakai baaniba I Gode Dofakamin Nakae anomabiobo ge baaniba dolaibbio inaniba i Failate baabaniba Kobo Yesuse ananeba kaaneko gesiba e inanea atdimmo dabasa silo biki ananea kaanea imin silo uleisaniba debeb moniba tom teme nakai mo kaanimibo dolbunomo geniba klaibbue tem wat dofaib otane Gode imin dofaanea hananebiobe. <sup>30-31</sup> Nakaia unangai homoni Gallili betano deiboniba

moniba Yesuse bekebaniba Yelusalem bib unibbuei am homono dimo i Yesuse kaanea imin hananeo atemibbio kesoa i weng sang olo Isleli omkayebibbua <sup>32-33</sup> nisa inanoba memalo ibo dowan weng ayam olo omyomabbio. Inamin namin olo sinanggwano Gode nib faninwali moton wengo baabenea Sinanomo ne inamin namin olo doyamabibo genebua memalo e molofeitwal nibo bain inanea dobyebiobe. E inanea e miine Yesuse imin dofaanea hananea e wengo bain anobiobe. Gode buk temo Sam 2 o temo Gode baanea Kobo ne miinobo, eka nesa keb ay aiobo genobiobe.

<sup>34</sup> Gode Yesuse dofaanea hananebue e imino mo kaaneta klaanemebabe. O weng sango Gode weng omkeimalin nakae Gode buk temo dolanea enangge baanea Gode baanea Ne Debite baabaniba Ne daabkenia bobol tem funin ayam omklamabibo genibuo memalo inamin namin olo ne kobo omklamabibo ge baanebiobo ge baanea dolanebue weng olo Yesuse weng sangobe.

<sup>35</sup> O inanoa weng mak osa baanoa Keb Dofakamin Nakae kaanea klaanameo misiam kesoa kobo imin dofaaneba hananeko genobiobe.

<sup>36</sup> Nibo tekein kebuobe, sinanggwano Debite mo kaaim blim bie dimo e Gode okoko okok kebinea kaanea e meletani debib moniba e faninwali dolbueibbuei kikib ye dobbuniba klaanebu otane <sup>37</sup> naka mak ele e damo mo klaaim blimobe. Gode dofaanea imin hananebiobe. <sup>38-39</sup> E inanebio kesoa ne nekwal ibo kla wentine! Yesuse ib hengmino omtlabenebue weng ota ne baabeibo. Nakaia unangai alukum Yesuse bainobo geib mole e i hengmino omtlabenamabebe. Mosehe hekmel wengo titil blim kesoa o ib hengmino mo omtlabeim blimobe. <sup>40-41</sup> Sinanggwano Gode wengo omkeimalin nakai Gode buk temo dolaibbuo baanoa

Ne wengo tlawe bianiba mo bainobo geim blim ibo kla funaine! Ibo kaanomabiobe. Niminbabe, ibo sma dabalim ele bliba ne inamin namin okoko sumo klaia naka make okok olo weng sango baabene otane ibo mo bainobo genomabibbabo ge baanebiobo ge baaniba

dolaibbio kesoa ibo kla wentine! Ibo Gode wengo tlawe biniba kaaibbuei ulabo mo nimibe ge baabesebe. <sup>42</sup> Fole inangge

baabenea Banabase i dabo Gode amo deiboniba unom genamsiba nakaia unangai baabeniba Gode singkalin amo make dim ele imin tenibta weng olo imin alebeine ge baabeiba <sup>43</sup> taniba bib tam bebiba nakaia unanga isa Gode amo deiboniba Yuda naka maki tenabiba eka Yudaba naka afeti Yudai kukubo wafu blibi tenaniba Fole Banabase i dabo bekebe bebiba Fole Banabase i dabo naka eli baabeniba Gode ibo daabenea e wengo kla wente bianiba e kukubo sbalma wafueine ge baabeibua <sup>44</sup> Gode singkalin amo make dime bib olo seli alukum te miniba Gode wengo wentom genabiba <sup>45</sup> Yuda naka maki yateniba Folwali okoko dafao ifananiba nisa inamin okoko mo okok kebobbabo ge funaib kesoa i atli-aubesoia Fole weng dobo weng oha bianiba baaniba Fole wengo dim obebo gesib otane <sup>46</sup> Fole Banabase i dabo Yuda nakaia unangai tolo mo tosiainim blimobe. I aalob olaketou bianiba baabeniba Yuda ibo Gode meletan kesoa ni dabo Gode wengo ibo sin omyenobte gabob otane ibo weng olo mo wentaobbabo gabiobe. Ibo bainobo genimibo Gode bibo amit nomabib otane ibo mo bainobo genomobbabo gabib kesoa ni memalo ibo deibenoba monoba Yudaba ita Gode wengo omyomabbioe. <sup>47</sup> Sume ni baabenea

Ne ibo dlakaia ayal einin keniba nakaia unangai Yudabai ne deibe alebeniba baabeniba Ibo bainobo genimibo Gode ibo hengmino temo blibo dotlanamabebo ge baabeine genebio

kesoa ni inanomabbioe gesiba <sup>48</sup> nakaia unangai Yudabai Folwali wengo wenteniba funaniba God Sume wengo ayamobo geniba seimbianiba nakaia unangai Gode sin dlakanea naka eli afen smike doboniba amit nomabiobo genebuei bainobo geiba <sup>49</sup> Gode wengo Fisidia betano bib mak bib mako alukum onon tlanoa Yudabai Sume wengo alukum wentib otane <sup>50</sup> Yudai bainobo geim blimi dim baasiba nakaia unangai niniin oyemini Gode niniino dobtoulebe blibi dim weng olo wenteniba baaniba Ibo Folwala Banabaswalai enino omyine geiba i inaniba Folwali enino omyeniba ibo bib olo mo nimibe ge baaniba kulilasiba <sup>51</sup> Folwali deibe onoma bianiba funaniba Nib skilo dabal baka difib maman bakao dilbinoba bib olo seli kukub olo wateniba funaniba Ni kukubo misiamobo ge funaine geniba inaniba deibo moniba Aikoniam bib unaniba <sup>52</sup> bainobo galin nakaia unangai Antiok bibo blibi deibe uniba i seiniba Gode Hobe i bobol temo bibe binebioe.

### *Folwali Aikoniam bib ye binibbioe.*

<sup>1</sup> Fole Banabase i dabo Aikoniam bib ye bianiba moniba Yudai Gode amo tem tam unaniba Gode wengo kla omkeima bianiba Yuda isa eka Yudaba isa wente bianiba bainobo gabib otane <sup>2</sup> Yudai maki bainobo gabibbai dim wengo omsiba Yudabai dim weng olo wenteniba i Fole Banabase i dab i wengo mo wentubeim blim deibesioe. <sup>3</sup> Fole Banabase i dabo am homono dimo Aikoniam bib ye bianiba Sume wengo omkeimabibo i mo tosiainim blimobe. I sbal maniba omkeimabiba Sume i daabenea inamin namin okok sumo nakaia unangai sino mo watemin blimo klabiba tam tlebua bib yo seli watem tekein kebiba Sume daayebe otane <sup>4</sup> i bobol tem funino asu omfaniba belalananiba maki baaniba Yudai weng ota motonobo gesib eka maki baaniba Yesuse okok dlasanin nakai weng ota motonobo gesib monsiobe. <sup>5</sup> I inabiba sinanoa Yudai tenabiba eka komokwali tenabiba eka Yudabai tenaniba i sinwalo baa omfaniba Nibo Folwali tom olo bina yenanomo gesiba <sup>6</sup> Folwali weng olo wenteniba wetou moniba Likionia betano bibo niniino Listla bib osa eka Debi bib osa eka bib mak mak osa bib olo kikib ye bioe. I moniba ye bianiba <sup>7</sup> Yesuse dowan wengo omkeima monsiobe.

### *Folwali Listla bib osa Debi bib osa ota binibbioe.*

<sup>8</sup> Folwali inabiba naka make awoko gongam tem da dobmikinoa gilok alobua ye binabebua <sup>9</sup> Fole wengo obo wentenea e bobol tem daako fumbianea Gode titilo klautnenoa ayam anamabibo ge fumbua Fole e bobol tem funino atem tekein kenea dlo dlo ateme bianea <sup>10</sup> baabanea Kobo hananale gesea e hebmamsab hanamanea tama tama onsea <sup>11</sup> nakaia unangai Fole okok sum olo klaneo wateniba Listla bib seli Likionia ili weng ngambianiba god asuei nakaniba daak teniba ni bib ele tliobo ge ngambianiba <sup>12</sup> Banabase mema niniino dabaniba Sus ge nganabaniba eka Fol ele weng omin nakob geniba Hemis ge nganabanianiba <sup>13</sup> god dim omino niniino Suso amo bib olo daamo kikib ye bua Suso amo kimanin nakae eil blumakau imakwali dlonea eka aket osa haananea oletnea tenea bib olo daamo geibbuo amit ye tetemea nakaia unangai tenaniba funaniba Folwala Banabaswalai god kesoa nibo eil blumakau dleb monoba yenanoba funoba i niniino dotoulebe nomo gesiba <sup>14</sup> Folwala Banabaswalai wenteniba inamin kukubo deibueibbabo ge funaniba i youmo baa dibianiba blublu teniba nakaia unangai isak daak maniba baabeniba <sup>15</sup> Ibo mo inanimibe! Ni naka makob ib ulabobe. Ni tenoba

Gode downan weng ayamo omyoba ibo kukub misiam olo deibo moniba Gode afen smiksa esu unine genobta tlobbiobe. E abil esa dabal esa klanea eka aaye sol esa eka inamin namino e temo bu osa klananebio kesoa ib bobol temo deskinaniba Gode omaline! <sup>16</sup> Sinanggwano nakaia unangai Gode deibenea imaye ili kukub ota wafu binibbu <sup>17</sup> otane e kukub ayamo aleyebea ibo watem tekein kebiobe. Gode abilim ut bianea soko omame tenoa damibo inamin namin sano dokabibo gibbuwebua eka e imen homon osa okaye bianea bobol ayamo omkayebebo ge baabesiba <sup>18</sup> nakaia unangai wenteniba Ibmeye obibte ge oye bianiba eil blumakaui doyom genabiba Fole Banabase i dabo melek bianiba wata biniba wata nabiba <sup>19</sup> eka Yuda nakaia unangai mo bainobo gabibbai Antiok bib osa Aikoniam bib osa blihi teniba Listla bib olo seli dim baabeniba Folwala Banabaswalai misiam nabioo gesiba Listla bib seli wenteniba bainobo geniba tom obo binaniba Fole anaiba kaanea debetniba bib olo daam temo deibo tam bib tam unaniba kaanebo ge funaib otane <sup>20</sup> bainobo galin nakai teniba ge dabasiba imin hana utlanea monea bib une sonoma bomanole Banabase temnaniba moniba Debi bib onsiobe. <sup>21</sup> I dabo inaniba moniba Debi bib ye bianiba Gode wengo omkeimabiba naka homon unang homoni Yesuse downan weng ayamo wenteniba bainobo geiba Folwali Debi bibo deiboniba imin moniba Listla bib osa Aikoniam bib osa Antiok bib osa haabianiba <sup>22</sup> Yesuse bainobo galin naka mak unang maki aleye bianiba i bainobo galino ombal sanye bianiba baabeniba Ib bainobo galino sbalma wafueine! Naka maki niho enin sumo omkayemomabib otane sinanomo nibo monoba Gode kimanin bibo amit nomabbioho ge oye bianiba <sup>23</sup> bainobo galin nakaia unangai Listla biba Aikoniam biba Antiok bibao blihi i komokwali maki dlakaniba imeno hala bianiba Gode nganha bianiba baabaniba God kobo naka eli bainobo galino sbal maib kesoa kobo daabenale ge baabaniba dlaiba i bainobo galino sbalma wafueibbiobe.

*Fole Banabase i dabo imin moniba Silia betano Antiok bib onsiobe.*

<sup>24</sup> Folwali inaniba Fisidia betano Antiok bibo deiboniba moniba Famfilia betano bibo niniino Fega bib ye bianiba <sup>25</sup> Gode wengo omkayem deib ole bib olo deiboniba moniba Atelia bib ye unib ole <sup>26</sup> siib tem moniba Silia betano bib mako niniino Antiok bib ye onsiobe. Sino Folwali Gode wengo omkayem unom genabib dimo bib olo seli Gode baabaniba Naka eli keb okok deibo unom giobo kobo daabenale ge

baabaniba dlaiba unibbiotabe. <sup>27</sup> Folwali inaniba okok olo okok kem haablibo bli-manoo moniba Antiok bib ye unaniba bainobo galin nakaia unangai alukum dolminiba Gode i dabo inamin namino alebenea watem tliho wengo oye bianiba baabeniba Nakaia unangai Yudabai Gode deibe alebenea Yesuse bainobo geibobo ge baabeiba wentib ole <sup>28</sup> am homono dimo i dabo bainobo galin nakaia unangai Antiok bibo blihi bekebe binibbiobe.

## 15

*Yesuse bainobo galin nakai Yelusalem bib ye mina binibbiobe.*

<sup>1</sup> Bainobo galin nakaia unangai Yudia betano blihi maki teniba Antiok bib ele tlaniba bainobo galin nakaia unangai Antiok bibo blihi baabeniba Ibo Mosese hekmel wengo deiboniba ib aalo mo wetlaim blim keib mole ibo Gode meletanbabo gesiba <sup>2</sup> Fole Banabase i dabo wenteniba dosuanasiba i sinwalo baase baase biniba bainobo galin nakaia unangai Fole Banabase i dabo dlona bianiba eka bainobo galin naka maki dlonaniba Dlanoba moniba Yelusalem bib ye unaniba Yesuse okok dlasanin naka isa eka bainobo galin nakaia unangai komokwal isa biaibo baabe wenteniba Yudabai aalo waketoumin kukub osa wafuein bleka deibueino? geiba i Yeye genimib Ae genimibo wenten tline geniba dlaiba moniba <sup>3</sup> Finisia betano tle tle Samelia betano tle tle ye unaniba Finisia bib seli bainobo galin isa eka Samelia bib seli bainobo galin isa baabeniba Yudabai Yesuse bainobo gabiobo gesiba bainobo galin nakaia unangai bib asu yo blihi wenteniba seiniba Folwali deibeniba moniba <sup>4</sup> Yelusalem bib ye temiba bainobo galin naka mak unang mak isa eka Yesuse okok dlasanin naka isa eka bainobo galin nakaia unangai komokwal isa yatenniba Klayam nata tliho ge baabesiba eka Fole Banabase i dabsak Gode inamin namino i dimo klabea tam tlebua okok haabi tliho wengo baabeib otane <sup>5</sup> Felisiei maki bainobo gabibi uteniba baaibo Niho Yudabai bainobo gabibi baabenoba Ibo Mosese hekmel wengo baanobio inaniba ib aalo weketoumine ge baabenomo gesiba <sup>6</sup> Yesuse okok dlasanin nakai tenaniba eka bainobo galin nakaia unangai komokwali tenaniba baase baase bianiba <sup>7</sup> Fitae baabene Nekwal ibo tekein kebib yotabe, sino Gode okoko nibo omkaye bianea nele nemakanea baatnenea Kobo moneba Yudabai ne wengo omyeba isa ne wengo wenteniba bainobo geine ge baanea omnena bianea <sup>8</sup> Gode nakaia unanga nib bobol tem



funino yatemnea e Hobe dabanea daake-  
nea nib bobol temo onon tlanebio inanea  
nakaia unangai Yudabai bobol tem osa  
Gode Hobe onon tlane kesoa isa moniba  
Gode bibo amit nomabiobe. <sup>9</sup> Gode mo  
funaneta Yudai naka afeti gaiseibobo ge  
fumbababe. E bobol temo fumbeo Yuda  
isa Yudaba isa makobobo ge fumbe kesoa  
Yudabai Yesuse bainobo gabibi hengmino  
omtlabenamabebe. <sup>10</sup> Ibo Yudabai bibo mo  
monibta baabenibta Ibo Yesuse bainobo  
genimibo Mosese hekmel weng osa alukum  
wafueine ge oyemibe! Ibo ninim kenibta  
Gode naatemomo genibte? Sinanggwano  
nib faninwali Mosese hekmel wengo wa-  
funamino i titil blim kesoa i kakubu we-  
binibbua nibs inanoba kakubu webuobe.  
<sup>11</sup> Ina otane nibo Sume Yesuse bainobo  
genomobo e daabenea nibo hengmin temo  
biobo dotlanamabebe. Eka Yudaba isa  
Yesuse bainobo geib mole e i hengmin temo  
blib osa dotlanamabebo ge baabesebe.

<sup>12</sup> Nakaia unangai ye mibianiba weng  
obib yei wenteniba weng blim kesioibe.  
Fitae wengo inanea baabene ole eka Fole  
Banabase i dabsak Gode titilo omkayebea i  
inamin namin okok sumo klabianiba Yud-  
abai aleyebi tlibbuo weng sango obibabi  
bliman ole <sup>13</sup> eka Yems esak utenea baabe-  
nea Nekwal ibo ne wengo kla wentemine!  
<sup>14</sup> Saimon Fitae weng ele baabene wentib  
olo sino Gode mikiktemo tenea Yudaba  
isu ota tlanea dlakanea e meletan aibbuo  
weng ota baabeneta wentiobe. <sup>15</sup> Gode  
weng omkeimalin nakai Gode buk temo  
dolaibbuo

<sup>16</sup> Sume baanea Debite molobseli makob  
amo dobo blelanobio inaibbiota  
sinanomo ne tenita klaubeita ayam  
anomabiobe. <sup>17</sup> Ne inania nakaia  
unangai Yudaba isa dlakaaia i  
alukum nemi aniba Sum ne henen  
teniba nesu tlomabiobo genebua  
<sup>18</sup> memalosa imin inangge baanebo  
ge baaniba dolaibbio

<sup>19</sup> kesoa ne funania Yudabai Gode bainobo  
geib mole nibo weng afeto mo oye bianobta  
bumoloko mo omkayemobe ge funaiobe.  
<sup>20</sup> Ina otane nibo futano dola omfubenoba  
baabenoba Naka maki god dim omino o  
doul kulana imena o oyib mole ibo mo  
downaibe! Eka taman osa mo hengamibe!  
Eka nakai kulani yafuniba kwelo bikilafa  
yenanimib isa mo downaibe! Eka kulani  
ilem osa mo downanimibe! Inamin  
namin ele baabonob olo alukum awemobo  
ge baabenomo! <sup>21</sup> Nibo tekein kebuobe,  
i sinangwanosa eka memalosa Gode  
singkalin am bomanomo bomanomo naka  
maki Gode amo temo taniba Mosese  
hekmel wengo kibiba wentebiobe. Eka

singkalin am bomanomo naka maki  
moniba bib mak bib mako Mosese hekmel  
weng olo omkaye biam bliobo gesea  
<sup>22</sup> Yesuse okok dlasanin naka isa eka  
bainobo galin nakaia unangai komokwal  
isa eka bainobo galin nakaia unangai  
Yelusalem bibo blib isa i Yemse weng olo  
wenteniba funaniba Nibo Fole Banabase  
i dabo Antiok bib unomabibo nakai mo  
dlab bekebenobta dletnibta unine geniba  
Yudase niniino asube, mako Basabas  
etabe, e doboniba eka Sailase dobonaniba  
dlakaniba i dabo bainobo galin naka ayam  
kesoa <sup>23</sup> futano dolaniba enange baaniba  
Ae ni nekwal Yudabai bainobo gabib ibo  
Antiok bib osa Silia betan osa eka Sisalia  
betan osa blib ibo ni Yesuse okok dlasanin  
naka nisa eka bainobo galin nakaia  
unangai komokwal nisa nita ib futan olo  
dola omfubenomabiobe. <sup>24</sup> Ni wentebobo  
naka maki ni isak temo blibi moniba ibsuo  
natle bianiba omomom wengo oyebiba  
ibo wente bianiba ib bobol temo ilum  
omfubebiobo geiba wentob kesoa ni futan  
olo dola omfubenomabiobe. Ni inamin  
naka eli mo dlanobta natlim blimobe. I  
imaye ili bobol tem ye natlibbiobe. <sup>25</sup> Ni  
alukum inanomo ge baanobta naka asu  
eli ulelonobta ni nekwal Fole Banabase  
i dabo dlab bekebenobta natlomabiobe.  
<sup>26</sup> Banabase Fole i dabo Sume Yesuse  
okoko okok kebib o dafa ota naka maki  
funaniba Nibo i yananoba kaaine gabibo i  
mo tosiambibba kesoa <sup>27</sup> ni funanoba Nibo  
Yudase Sailase i dabo dlanoba moniba ita  
weng olo baabeine ge baanobta dlanoba  
natlomabiobe. <sup>28</sup> Ni ibo hekmel wengo  
homono mo oyemobba otane Gode Hobe ni  
bobol tem funino omye kesoa ni funanoba  
baabenomabbuo <sup>29</sup> ibo naka maki god dim  
omino o doul kulana imena oyaib osa  
eka kulani ilem osa eka nakai eili yafuniba  
kwelo bikila yenanimib isa mo downaibe  
gena bianoba eka taman osa mo henga  
bianiba kukub misiam olo mo namibe!  
Ni wengo bayotabo ge baaniba dolaniba  
<sup>30</sup> naka eli omyeniba dlaiba moniba Antiok  
bib ye unaniba bainobo galin nakaia  
unangai baabeiba dli te misiba futan olo  
omyiba <sup>31</sup> bainobo galin nakaia unangai  
kiniba watemib ole seimbianiba bliba  
<sup>32</sup> Yudase Sailase i dabo am homono dimo  
ye baka bianiba Gode weng omkeimalin  
naka kesoa Yesuse downan wengo bainobo  
galin nakaia unanga eli aleyebiba i bainobo  
galino sbalma wafueib ole <sup>33</sup> i dabo deibe  
unom genabiba bainobo galin nakaia  
unangai baabeniba Klayam unine ge  
baabeniba dlaiba imin Yelusalem bib tlom  
genam unaniba <sup>34</sup> [Sailas ele funanea Ne  
denia ele nomo gene kesoa deibanea Yudas  
eta tlea Sailas ele ye bekebe bianebiobe.] <sup>35</sup> I

inaiba eka Fole Banabase i dab ole Antiok bib ye hliba bib yo seli mak isa daabeniba i sinwalo Gode wengo omkeima bianiba aleye binibbiobe.

*Fole Banabase i dabo alang weng baase baase monsiobe.*

<sup>36</sup> Folwali inaniba bianiba aleyebiba sinanoa Fole Banabase baabane Nibo bib mak bib mako Gode wengo sino aleye binobbuo imin monoba bainobo galin nakaia unangai ayam biaib misiam biaibo imin yatemem haanomo gesea <sup>37</sup> Banabase baane Ayamobo nibo inanomabbio yole Yon Make debebnobta unomo gesea <sup>38</sup> Fole baane Yeye sino nibo Famfilia betan onsoho e bekebe mo danea imin detlaanea e okoko deibo tlebio kesoa nibo e imino mo debeb unaobbabo ge baanea tolobo gesea <sup>39</sup> i dabo baase baase biniba afet aniba Banabase Make i dabo siib tem dalaniba Saiblas aaubil uniba <sup>40</sup> eka Fol ele Sailase debetnea unang genabea bainobo galin nakaia unangai baabaniba Klayam Gode kimaneta one ge baabaiba monea <sup>41</sup> Silia betana Silisia betanao haabianea Gode wengo omkeima bianea nakaia unangai bainobo galino dosbal sambinebiobe.

## 16

*Timotie Folwala Sailaswalai bekebe onsebe.*

<sup>1</sup> Bainobo galin naka make niniino Timotie Listla bib ye bia e biemo Yudabe, o Yesuse bainobo galin unangobe. Eka aaleb ele Glik minobe. Fole Sailase i dabo moniba Debi bibo omtlaniba moniba Listla bib ye temiba <sup>2</sup> Timotie ye bia bainobo galin nakaia unangai Listla bibo blib isa eka Aikoniam bibo blib isa e kukubo nabeo ateme bianiba E naka ayamobo ge ohabib kesoa <sup>3</sup> Fole atemnea debeb unama bianea e aalo watlabasebe. Niminbabe, Timotie aalebe Yudaba kesoa Fole funanea Ni bib mak bib mako unomabbuo Yuda nakaia unangai bib amo yo bliibi funaniba Timotie aalebe Yudaba kesoa e aale mo watlaim blim yole e Gode meletanbabo ge baaniba e Gode wengo omkayemeo wentenamino deibanimio ge funanea e aalo wetlabane ole <sup>4</sup> i Yesuse okok dlasanin naka isa eka bainobo galin nakaia unangai komokwali Yelusalem bibo blib isa i futano dolaniba Antiok bib seli omfubeibbuo imin ometniba moniba bib mak bib mako haabianiba aleye bianiba baabeniba Weng olo baanoa Ibo kukub olo inamine genobiobo ge oyem haabiniba alebesiba <sup>5</sup> bainobo galin nakaia unangai wenteniba i bainobo galino sbal maniba naka mak unang maki imin bainobo ge te watem te watem bianiba homon ansiobe.

*Fole damo temsebe.*

<sup>6</sup> Gode Hobe Fol esa e meletan isa baabene Ibo mo moniba Esia betano mo unaniba betan yo seli ne wengo mo omyaibe gene kesoa i deiboniba moniba Flisia betan osa Galesia betan osa o tle tle ye unaniba <sup>7</sup> moniba Misia betano tle tle Bitinia betano tle tle ye bliba Yesuse Hobe imin tolobo gene kesoa i Bitinia betano unom genabibo deiboniba <sup>8</sup> Misia betan deib moniba Tloas bib ye bebiba kwino kesoa aala bianiba <sup>9</sup> Fole damo temebea Masedonia mine tenea nganabanea Fol kobo aaye sole yala wateneba Masedonia betan ele tlaneba ni daabenale ge nganhabea atemna bianea teme kesoa <sup>10</sup> Luk ne futan olo dolabi naka nesa eka Fole Sailase i dab osa ni funanoba Gode Hobe baabene yole nibo monoba Masedonia betan ota Yesuse dowan wengo omkeimamomo genoba ni afobeingo beilob ole <sup>11</sup> Tloas bibo deibonoba siibe obetnoba monoba Samotles bib ye unob sonoma bomanole siibe imin dletnea monoba Niabolis bib ye danea sobnoma bomanole <sup>12</sup> siibe ye deibanoba kim deib monoba Masedonia betano bib sumo niniino Filibai bib ye tenoba bib olo sino Lom ten ita tenibta bibam olo genaib biotabe. Ni ye baka biobta <sup>13</sup> Gode singkalin amo tlo kesoa ni funanoba Yuda nakaia unangai aaye ken ye mina bianiba Sume nganhamabiobo genoba bib olo deibonoba monoba aaye ken ye temoba unang ita blib kesoa yatemnoba isu ye bianoba Gode wengo omkeimaboba <sup>14</sup> unang mako niniino Lidiao Taiatalla bib da tlobuo ni Gode wengo omkeimabobo wentenoa Yesuse bainobo gesobe. O youm ilemo moni sum ota walo oleb tlebianoa naka maki webinabo biotabe. O Yudaba otane o Gode niniino dobtoulebinabo kesoa Gode bobol tem funin ayamomwene Fole Yesuse dowan wengo omkayebeo kla wentenoa <sup>15</sup> aaye fuelanao eka o meletan isa bainobo geniba fuelanaib ole Lidiao ni baabenoa Ibo funaniba O moton bainobo genobo ge funaib mole teniba ne am ele tline ge baanoa mengano kesoa ni o wengo wentubonoba o am ye aala binobbiobe.

*Folwala Sailaswalai Filibai bib ye klubutam bisiobe.*

<sup>16</sup> Ni inanoba baka bioba am mak bomanoa monoba Gode ngahamin baan dim ye unomo genoba beboba unang mako moni okokba besa okok kemim unango tebo nanoba tetenanoba hetananoba unang olo hob misiame bekebo bianea inamin namin kukubo sinanoa tam tlamabo wengo omkawebea wente bianoa omkeimabua

naka mak unang maki o weng olo wentom gaibo monio oleb teniba unang olo goseli webianiba wente binabibbua<sup>17</sup> Ni inanoba hetananobbua unang olo Fol ni dabwalo amitie dosileb haabianoa ngambianoa Naka eli God Sume okok nakabe. I Gode nibo hengmino temo biobo dotlanamabe wengo alebenomabiobo ge ngambianoa<sup>18</sup> dosileb haabibi biobua imin inanoa dosileb bianoa ngan tebo binoa Fole tengo alosoa omhalilanea deskinanea hob misiam ele baabanea Ne Yesus Klaiste niniin dim ota baabkenamabibo, kobo unang olo deibo one gesea e hebmamsab deibo unea<sup>19</sup> unang olo goseli temibta wengo omkawebea inamin namin kukubo sinanoa tam tlamabo wengo omkeimabua naka mak unang maki teniba webianiba wentebiba i monio bokam binabibo blimubono kesoa wateniba i atliaubesoa Fole Sailase i dabo klubuto ge dleb moniba komokwali imen wemin baan dim ye blibo temniba komokwali tenaniba dleb moniba<sup>20</sup> Lom komokwali dim unaniba baabeniba Naka eli Yudabo, i nib bibam ele te bianiba kukub misiamo nabianiba<sup>21</sup> kukub mako Lom ten ibo awem omfa binabobo i afet deib omfaniba aleyebiobo genabiba eka<sup>22</sup> nakaia unanga isa makob olota baanasiba komokwali wenteniba Fole Sailase i dab i youmo gemet tlabeniba Lom teni awa genalin nakai baabeniba Ibo atdab tebeloniba naka eli yemde dlaine gesiba awa genalin nakai inaniba<sup>23</sup> i yemde dlaib ole dleb taniba klubutam tam dasiba komokwali klubut kimanin nakae baabaniba Kobo naka eli kla kimanale ge baabasiba<sup>24</sup> e dleb tanea isak biin tam dlanea aso tebelonea i skilo abalan dae tofa dang dae tofa nanea sen saye tobonea neketowa dleb tetenanea dlakibila gebenea<sup>25</sup> aala bliiba ibalanoa Fole Sailase i dabo Gode nganha bianiba e niniin dobtouleb nin anso ngambiba klubut naka maki biin mak mak ye aala bliib isa wenten tlanabiba<sup>26</sup> meimei sume hebmamsab tenea yebiane amo omasanea klubutam amisalo alukum betano betana bianoa eka klubut nakai sen sayo genaubeibbua aala bliibo tlafubenasoa<sup>27</sup> klubut kimanin nakae aambieba hana temeta klubutam amisalo alukum betano kesoa watemnea funanea klubuti skila unibbiobo genea ele skil bainate tobo Tulania kaanano genea inanang genamsea<sup>28</sup> Fole nganabanea Yeye ni mo skila unim blimobo, ni alukum sma ele biobobo, kobo kleb skilo mo tulanebta kaanemebe gesea<sup>29</sup> klubut kimanin nakae wentenea e klubut kimanin naka make nganabanea ayale eiba tenea e tosiananea tanea klubutam tam unanea Fole Sailase i dab i skilonon

kikib ye tonton golbua daak toumbine ole<sup>30</sup> Folwala Sailaswalai dletnea taniba bib tam unaniba baabenea Ne fatnanita afen smike dobonita amit nane? gesea<sup>31</sup> i baabaniba Kobo Sume Yesuse bainobo genemeb ota afen smike dobonebta amit namabeobo, eka keb meletan isa inaniba Yesuse bainobo geib mole isa afen smike doboniba amit nomabiobo ge baabanaib ole<sup>32</sup> i dabo God Sume wengo klubut kimanin naka elesa eka e meletan isa omkayebiba<sup>33</sup> kwitimib yo olo dim ota esak i yebinibbuo yayo aayo fuba fubene ole eka Fole Sailase i dabsak klubut kimanin naka elesa eka e meletan isa i aaye fuelabenaib ole<sup>34</sup> e Folwali dleb tanea e am tam unanea imeno oyia doweib ole naka ele e meletani i sinwalo Yesuse bainobo geniba seinmonsioe.<sup>35</sup> I inabiba amo boman ole Lom komokwali awa genalin nakai dlaiba moniba klubut kimanin nakae baabaniba Kobo naka eli tileisenale gesiba<sup>36</sup> klubut kimanin naka esak Fole baabanea Lom komokwali ne weng omfutneniba kobo Folwali klubuto tileiseneba dlaneba unine ge baatneibobo ibo klubutam deiboniba tla unine gesea<sup>37</sup> Fole klubut kimanin nakai baabenea Ni Lom ten otane Lom komokwali ni koto klanibta bain naibbiobe geta yemde dlanamino deiboniba i besa ye awa genalin nakai baabeniba Atdab tebeloniba naka eli yemde dlaine gesiba i inaniba nakaia unangai kin dim ye yemde dlaniba ge dlet teniba klubutam ele daibbio otane i baaniba Ibo unine geib yole ni mo unanobbabe. Imaye teniba ni tileise dleb taniba bib tam dasibta unaobobo gesea<sup>38</sup> awa genalin nakai wenteniba imin moniba Lom komokwali baabeniba Fole Sailase i dabo Lom tenobo i baaniba komokwali ibmaye tenibta tileisesibta unaobobo geibobo gesiba Lom komokwali wenteniba funaniba Bainobo i Lom ten otane ni i koto klanamino deibonoba besa ye yemde dlanobbio yole misiam nanobbio geniba tosiananiba moniba<sup>39</sup> Folwal isu unaniba baabeniba Ni misiam nabenobsobo ge baabeniba dleb taniba bib tam unaniba baabeniba Ni bib olo deibo unine gesiba<sup>40</sup> Fole Sailase i dabo klubutam deiboniba moniba Lidiao am ye temiba bainobo galin nakaia unangai maki ye bliib kesoa yatemniba Gode wengo omyeniba i bainobo galino dosbal maniba deibe onsiobe.

## 17

*Fole Tesalonaike bib ye binebiobe.*

<sup>1</sup> Fole Sailase i dabo inaniba moniba Amfibolis bibo omtlaib ole ye dala moniba

Abolonia bibo omtlanaib ole moniba Tesalonaika bib ye bianiba Yudai Gode amo ye bio kesoa <sup>2</sup> Fole sino nabinabe inanea yo dim osa Gode singkalin amo asumatna yo dimo imin ina bianea Gode buk temo aleye bianea <sup>3</sup> baabenea Gode buk temo baanoa Gode Dofakamin Nakae enin kino watemnea kaanea Gode imin dofaanea hananamabebo genobiota ne Yesuse weng olo omkayebibo e Gode Dofakamin Nakabo gesea <sup>4</sup> Yuda naka mak isa eka Glik nakai maki Gode niniino dobtouleb binabib isa eka Glik wanggeli niniin oyemin isa i Fole wengo wenteniba bainobo geib otane <sup>5</sup> Yuda mak ile temibta naka homon unang homoni Folwali wengo wente bianiba bekebe haab kesoa yatemniba atliaube-soa weng omoniba naka misiami nganabeiba te misiba baabeniba Fole Sailase i dabo Yesone am tam aalabiobo nibo monoba yafu dleb monoba nakaia unanga isu unomo gesiba bebianiba naka misiami Fole Sailase i dabo weng misiam nganiem nganiem bliba moniba Yesone amo amit deiba waiseniba temibta <sup>6</sup> i blim blib kesoa deibeniba Yeson eta dobona bianiba eka bainobo galin naka maki Yesone am tam blib ita dlonaniba dleb moniba Tesalonaika bib seli komokwali baabeniba Naka asu eli bib mak betan mak olo haabianiba okok misiamo klabinabibbuwa mema dim olo teniba ni bib ele tetemiba <sup>7</sup> Yeson ele dleb tanea e am tam danea aala bianiba i nib komok sume Sisae e hekmel wengo deiboniba naka asu eli baaniba Komok sume make niniino Yesus etabo gabioho gesiba <sup>8</sup> nakaia unanga isa eka komokwal isa wenteniba dlou unib kesoa <sup>9</sup> komokwali Yeson esa eka bainobo galin nakai mak isa baabeniba Ibo kot monio waloniba ilib bibam uniba eka Fole Sailase i dab osa ili bibam onaine gesiba i inasiobe.

*Fole Sailase i dabo Belia bib onsiobe.*

<sup>10</sup> Amo yo olo dim ota kwinoa bainobo galin nakai Fole Sailase i dabo dlaiiba moniba Belia bib ye unaniba taniba Yudai Gode amo tem tam onsiobe. <sup>11</sup> Folwali inaniba Belia bib ye bliba bib yo seli Fole wengo wenteniba seimbianiba i kukubo ayamo nabibo Tesalonaika bib seli gais-esiobe. I inaniba bianiba am obba ye bomanomo bomanomo yo dimo i amitie Gode buko kibianiba wateme bianiba Fole inamin wengo baabeneo bain buk temo bio mole bainobe gabianiba eka blim bio mole dim obe gabiam bianiba moton sambiba <sup>12</sup> eka Yuda naka homon unang homoni Belia bib ye blibi imin bainobo genabiba eka Glik ten isa naka homon unang homoni niniin oyemini Yesuse bainobo genasiobe. <sup>13</sup> I inaniba naka mak unang maki omha

bianiba baaniba Fole Belia bib ye bianea Gode wengo omkeimabebo gesiba Yudai bainobo gabibbai Tesalonaika bibo blibi wenteniba moniba nakaia unangai Belia bib yo blibi baabeniba Naka elile misi-amobo gesiba nakaia unangai bainobo gabibbai bib yo blibi wenteniba atliaubeno kesoa <sup>14</sup> bainobo galin nakai wenteniba i hebmamsab Fole dabaiba monea aaye sole ken ye aaunea eka Sailase Timoti i dab ole Belia bib ye aana sibnoma bomanoa <sup>15</sup> naka maki Fole imin debeb moniba Atens bib ye daniba imin deiba nom genamisiba baabenea Ibo unaiho Sailase Timotie i dabo hebmamsab dlaiba tline ge baabenea deibaniba imin Belia bib onsiobe.

*Fole Atens bib ye bisebe.*

<sup>16</sup> Fole Atens bib ye Sailase Timotie i dabo waise bianea god dim omini smik homono Atens bib yo buo watemnea e bobolo ilum omfubano <sup>17</sup> kesoa deibo monea Yudai Gode am ye temnea Yudai mak isa eka Glik nakai maki Gode niniino dobtouleb binabib isa ye blib kesoa i tena bianiba god dim omini weng osa eka Yesuse niniino weng osa omsonsiobe. Fole ina bianea am obba ye bomanomo bomanomo yo dimo monea minamin baan dim ye une bianea naka maki teniba minamin baan dim ye tlebibi tenaniba god dim omini weng osa eka Yesuse niniino weng sang osa obi obi monsiobe. <sup>18</sup> Ebikuliaan teni maki tenabiba eka Stoik teni maki tenaniba Fole tenaniba weng obianiba baase baase monsiobe. I Gode mo bainobo gabibba otane i dabalim olo inamin namino tekein kemino sumobe. I inaniba tetemiba dleb weng baase baase bianiba maki baaniba Besa weng ota melekla omin naka ele niminobo gabene? gesiba eka mak ile Fole Yesuse dowan weng osa eka Yesuse kaanea imin hananebuo weng osa omkeima binabe kesoa baaniba Bib mak seli god dim omini weng ota omkeimabebo gesib monsiobe. <sup>19</sup> Ebikuliaan ten isa eka Stoik ten isa i Fole debetniba moniba bibilime make niniino Aliobagas ye minabibo moteniba bianiba baabaniba Ni keb wengo mema wengo nakaia unangai omkayem haabieb wengo ni wentobo <sup>20</sup> weng olo mema weng kesoa kobo ni imin alebeneba ni o mitmakamo tekein kenomo gabuobo ge baabasiobe. <sup>21</sup> Atens bib sel isa eka bib mak seli teniba Atens bibo blib isa i amitie ina bianiba am obba ye bomanomo bomanomo yo teniba minamin baan dim olo mina bianiba mema wengo wentib biam osa eka weng afeto fumbib biam osa kil obianiba o mitmakamo tekein kebinabib kesoa olosa Fole inabasiba <sup>22</sup> Fole hana manea nakaia unangai Aliobagas ye minabibi baabenea

Atens bib sel ibo wentine! Ne yatemebio ibo amitie lotu kebianiba ib godo niniino omtouleb bliba <sup>23</sup> ne tenia ib bib ele tlania haabiania ib godo smiko watemeyem haabianeana make atemia tome dim utu niniino dolaniba baaniba God ele ni mo tekein kebobbabo ge baaniba dolaibbua atemnabio ibo God ele mo atemebibbabe. Ibo besa e niniino dobtouleb binabibe, e weng ota ne memalo omyamabihe. <sup>24</sup> God ele dabale klanea eka inamin namino dabal ele dimo buosa klananebue abilimo sum eka dabalimo sum na kesoa e nakai amo kweilo tubuniba gembibo temo mo biebabe. <sup>25</sup> God ele emaye nakaia unangai afen smike dobye nabianeana bobol tem funino omyenanebua eka inamin namin olosa dokayebebe. E inamin namino mo men anoa blimubanota nakai mo dlalaibbabe. <sup>26</sup> Sinanggwano Gode nakae elekiem klaneta eka naka eleta yomaneta nakaia unangai homoni walib ole Gode i betano wayeneana dla tlanea eka i kaanamin amo kinea omakabenanebuo <sup>27</sup> e funanea nakaia unangai ne henimibo maki ne nate-momabiobo gene kesoa e skeimo nino deibonea meb ele biehe. <sup>28</sup> Ib bibam seli tekein kemin nakai buk mako dolaniba baaniba Eta nib afen smiko omyena bianea eka titilo omyenanebiota nibo haabianobta inamin namino nabuobo gena bianiba eka weng mak osa imin dolaniba baaniba Nibo e memebe ge baaniba dolaibbiobe. <sup>29</sup> Olo bainobe. Nibo Gode meme kesoa ibo mo funanibta Gode makob tom silba osa gol osa tom afet osa o ulabobo naka ita smik klaibbiobo ge funanimibe! <sup>30</sup> Sinanggwano nakaia unangai e inamin namino mo tekein kebibba kesoa i kukub nabibo Gode oyemino deibenebuo otane memalo e bib mak bib mak seli alukum baabeneana Ibo ib hengmino deiboniba ib bobol temo deskina ne omnine ge baabenebiobe. <sup>31</sup> E amo omakanebuo tlamoe e Dofakamin Nakae nakaia unangai kukubo alukum klanamabebe. Inanamabe naka ele sino kaanea Gode imin dofaanea hananebio kesoa nakaia unangai tekein kebiobo Gode bain inanamabebo gesea <sup>32</sup> naka maki nakae kaanea imin hana tlebio weng olo wenteniba maki Fole weng dobo weng oha bianiba tlahamonsib otane mak ile baabaniba Sinanomo imin teneba weng olo imin mo baabeneba wentomo ge baabasiba <sup>33</sup> Fole deibeneana uea <sup>34</sup> naka maki bekeba bebianiba Yesuse bainobo gesibi make niniino Daionisias etabe. E Aliobagas ye minabibi mak etabe. Eka maki bainobo gesibi unango niniino Damalis otabe. O tenabua eka naka mak unang mak isa tenanibta Yesuse bainobo gesiobe.

## 18

### *Fole Kolin bib ye bisebe.*

<sup>1</sup> Fole inabene ole Athens bibo deiboneana monea Kolin bib ye temea <sup>2</sup> Yuda naka make niniino Akwilae Kolin bib ye bia atemsebe. E awoko Fontas bib ye dobmikino biotabe. E alelo niniino Flisilao i kam i betano Itali otabe. E sino Itali ye binabe otane Lom seli komoke make niniino Klodiase baanea Yuda nakaia unanga ibo alukum Lom bibo deibo unine gene kesoa e alelo Flisilao i kam i betano Italio deiboniba kam teniba Kolin bib ye bliba Fole inaneana monea i am tam temsebe. <sup>3</sup> I kamwali okoko makob e okoko okok kebinabe ota isa inamin okok kebinabib kesoa e inaneana motemnea bianiba sok umo klabibo daayebea klabianiba <sup>4</sup> Yudai Gode singkalin am bomanomo bomanomo monea Gode am temo une bianea naka mak unang maki tenaniba wengo omde omdenib kesoa e funanea Yuda isa Glik isa i Yesuse bainobo geine ge funane kesoa Yesuse wengo omkayebeta <sup>5</sup> Sailase Timotie i dabo Masedoniao deiboniba tetemib ole bianiba Fole Gode wengo amitie omkeima bianea Yudai oye bianea Yesuse Gode Dofakamin Nakabo ge oyebe <sup>6</sup> otane Yudai e wengo omdibiha bianiba weng dobo weng oha bianiba tlahamib kesoa e youmo difibo boubou genea dilbineana baabeneana Ibo aseinin bibo unib mole ilib sanobo, ne sanbabo, ne memalo ibo deibenia monia Yudaba isu unamabibo ge baabeneana <sup>7</sup> deibe monea Tisias Yastase am ye temsebe. Tisias Yastase Yudaba otane e Gode niniino dobtouleb nin nakabe. E amo Yudai Gode amo kikib ye biotabe. <sup>8</sup> Gode amo komoke niniino Klisbas esa eka e alel melel isa i Fole wengo wenteniba Yesuse bainobo genabiba eka Kolin bib seli mak isa bainobo genasiba Fole aaye fuelabesebe. <sup>9</sup> Fole ina bianea am mako dimo kwinoa aambianeana damo temea Yesuse baabaneana Kobo mo tosiam bianebta kimik genemebe! Ne wengo sbalma omkeimamale! <sup>10</sup> Ne kobo bekebe bli kesoa naka maki kobo mo kananimibbabo, ne bainobo galin naka homon unang homoni bib ele nabliobo ge ohabea teme bine kesoa <sup>11</sup> e Kolin bib ye bianea Gode wengo aleye bianea bifolo olokiem kenea eka alimo asuke eka imin asuke eka imin asuke nanabeta <sup>12</sup> Galioe Glik teni komok anea Yudai miniba baaniba Nibo Fole kot kebanomo ge baaniba afu debeb moniba Galio esu unaniba <sup>13</sup> dim baabaniba Naka ele ni bibam seli baabeneana Yuda nib hekmel kukubo deiboniba mema kukubo ne Gode niniino dobtouleb bianea aleye biota wafueine ge oyebebo gesiba <sup>14</sup> Fol esak

baabenang genamsea Galio eta dobtlanea baabenea Yuda ibo wentine! Naka ele hengmin henga bianea kukub misiamo nabiam biameo ne ib wengo wentamabi otane <sup>15</sup> ibo ilib weng osa eka ilib niniin osa ilib hekmel weng osa ota obib yole ne mo wentenita klanimibabo, ibmaye klaine ge baanea <sup>16</sup> e kot am tamo kulilasea <sup>17</sup> i atliaubesoa isak Yudai Gode amo komoke Sostenise afu debeb taniba kot amo amgegen ye dofaniba abiba Galioe wentebe otane e mo daabaneta wataim blimobe, deibasebe.

*Fole imin monea Antiok bib onsebe.*

<sup>18-19</sup> Am homono dimo Fole Kolin bib ye bine ole bainobo galin nakaia unangai Kolin bibo blibi deibenea unang genamsea Akwilae Flisilao i kamo temnaniba moniba Senklia bib ye bianiba Fole Yudai ili kukubo nabinabib inanea e gabamane deilasebe. Niminbabe, e Gode moton wengo baabane kesoa e inanea gabamane deilane ole i Silia betan unomo geniba siibe obetniba moniba Efesas bib ye unaniba Akwila kamwali deibenea Fol ele tanea Yudai Gode amo tem tam temnea weng obianiba <sup>20</sup> baabaibo Nibo ele binoba sinansota one gesiba e Yeye ge baabenea <sup>21</sup> deibe unama bianea baabenea Memalole deibe unibua sinanoa Gode baabaia baanea Ae one genebe genita imin tlano ge baabenea Efesas bibo deibonea tanea siib tem tam tounea monea Sisalia bib ye une sonoma <sup>22</sup> bomanole siibe Sisalia bib ye deibanea kim deib monea Yelusalem bib ye une ole bainobo galin nakaia unangai Klayam blibta tlio? ge baabene ole e haabianea Gode okoko okok haabi tleo wengo omkaye bine sonoma bomanole Yelusalem bibo deibonea monea Antiok bib ye bia <sup>23</sup> am homono blimanole Antiok bibo deibonea monea Galesia betano bib mak bib mak osa eka Flisia betano bib mak bib mak osa haabianea bainobo galin nakaia unangai biaibo Gode wengo omkayebea i bainobo galino sbal sambisiobe.

*Abolose Efesas biba Kolin biba ye bisebe.*

<sup>24</sup> Am yo dim ota Yuda naka make niniino Abolose monea Efesas bib ye onsebe. E gongamo awoko Aleksandlia bib ye dobmikinobiobe. E tekein kemim nakabe. E Gode weng buko tekein kebe kesoa <sup>25</sup> naka maki Yesus Sume wengo alebaiba tekein kenea sbalma bianea Yesuse wengo kla omkaye bianea okok kebe otane e Yesuse bainobo galin kukubo kla mo tekein keim blimobe. E Yone aa fuayemin kukubo olota tekein kebebiotabe. <sup>26</sup> E ina bianea monea Yudai Gode amo temo une bianea Yesuse wengo sbalma omkeimabea Akwila kamwali e wengo wentemib kesoa

debeb taniba i am tam unaniba Yesuse wengo mako e mo tekein kebebaio alebaiba tekein kenea <sup>27</sup> dalanea Glik betan unang genamsea Efesas bib seli bainobo galin nakaia unangai Klayam one ge baabaniba futano dolaniba baaniba Bainobo galin nakaia unangai Akaia betano blib ibo Abolose natlameo daabaine ge baaniba dola omfubeiba e ometnea monea Glik betan ye bianea nakaia unangai Gode daabe bia e bainobo gabibi daaye binebiobe. <sup>28</sup> Abolose inabea Yuda nakaia unangai maki tetemniba mibianiba baase biniba e tata kenea i wengo omabbubenea Gode buk temo kinea baabenea Buk olo kla alebenoa baanoa Yesuse Gode Dofakamin Nakabo genobiobo ge baabesebe.

## 19

*Fole Efesas bib ye bisebe.*

<sup>1</sup> Abolase Kolin bib ye bia Fole kim deib monea Efesas bib ye temeain bainobo galin naka maki blib kesoa yatemnea <sup>2</sup> baabenea Ibo nana bainobo geibbuo dimo Gode Hobe ib bobol temo onon tlanebuo? gesea i baabaniba Ni wente binabobo Hobe mo biebo geiba wentenabobba kesoa ni mo tekein kebobbbabe. Hob ele wanete? gesiba <sup>3</sup> eka e baabenea Ibo aaye fuelaibbuo fatnanibta fuelaibbione? gesea i baabaniba Yone aaye fuaye binebio inanobta fuelanobbio geiba <sup>4</sup> Fole baabenea Yone aaye fuaye binebuo mitmakamo inaminobo, Yone nakaia unangai baabenea Ibo hengmino deiboniba ib bobol temo deskina omoniba Gode omaline! Naka make ne abuk tlamabe e niniino Yesus etabo, ibo eta bainobo geine ge baabenebiobo gesea <sup>5</sup> i Fole wengo wenteniba bainobo geniba Yesus Sume niniino dimo aaye imin fuelaiba <sup>6</sup> Fole kweile i gabam oubut yafunea Gode Hobe daakenea nakaia unanga eli bobol temo onon tlanea wengo afet afet obianiba Gode wengo omkeima monsiobe. <sup>7</sup> Naka eli <sup>12</sup> ese mak bianibta aaye fuelasiobe. <sup>8</sup> Fole ina bianea Yudai Gode amo tem tam unanea Gode nakaia unangai kimanin kukubo wengo sbal manea omkayebea alimo asumatna blimanso otane <sup>9</sup> naka maki amitie halengkaba tlebianiba Weng olo bainbabo ge obianiba moniba minamin baan dim ye unaniba obianiba Yesuse kukubo misiamobo galib kesoa Fole deibenea e bekebi bainobo galini dlebnea moniba Tilanase aleyemin am tam bianiba am obba ye bomanomo bomanomo yo dimo Gode wengo aleyebea <sup>10</sup> bifolo asu blimansobe. Bifol asu yo dimo Fole Yuda isa Glik isa Esia betano blibi Sume Yesuse wengo omkaye binebiobe.

*Sibae meleli weng sangobe.*

<sup>11</sup> Gode titilo Fole omkahabea inamin namin okok sumo klabea <sup>12</sup> nakaia unangai i ninek maki gembib isa eka hob misiami bekebe blib isa blib mole deibeniba ifa glitmino niniino henkisib osa eka youm afet osa biamo dleb teniba Fole melebaniba dleb moniba ginin gam isa eka hob misiami bekebe blib isa melebeiba ayam an bianiba nakai hob misiami bekebe blibi deibe une biam bisioibe. <sup>13</sup> Fole ina bianea okok kebea eka Yudai maki i hob misiami kulilaiba unemin okoko okok kem haabianiba maki i sinwalo baaniba Nibo Sume Yesuse niniino taisanoba hob misiami kulilanoba unine geniba hob misiami baabeniba Fole Yesuse wengo omkeimabeo niniin ota taisonoba baabenomabbioibo ibo naka eli deibe unine ge baabesioibe. <sup>14</sup> Ina bisib naka eli Yuda Gode amo kimanin nakai komok sume niniino Sibae melel itabe. I sebenobe. <sup>15</sup> I inamsiba hob misiami baabene Ne Yesus esa Fol esa kla tekein kebibo ibole wanibta tenibta inam tlibe? ge baabesea <sup>16</sup> nakae hob misiami bekeba bie nakae gobbia watnea naka eli yafunea yemdena aalo manafubenea youmo baubenea beit dlanea skilasioibe. <sup>17</sup> Inasiba Yuda isa Glik isa Efesas bibo blibi alukum wenteniba tosonianiba Sume Yesuse niniino dobtoulebliba <sup>18</sup> eka maki sin bainobo geibbue ile hengmino omkeimanasiba <sup>19</sup> eka kingkan homoni wenteniba moniba i kingkan buku oleb teniba aso faiba bibam seli alukum watemsioibe. I kingkan buk olo walom gaibo o monio makob K50,000 olota walonaminobe. <sup>20</sup> I inamsiba naka homon unang homoni bib mak bib mako blibi Sume wengo bainobo geniba o titilo watemsioibe.

*Efesas bibo dleb wengo baasese bisioibe.*

<sup>21</sup> Fole inabea Gode Hobe bobol tem funino omalea e funanea Ne monia Masedonia betan osa eka Glik betan osa omlta tlania monia Yelusalem bib ye biam binita Lom bib ole mit unano ge funane kesoa <sup>22</sup> e daahamin nakai Timotie Ilastase i dabo dlanea moniba Masedonia betan uniba Fol ele sma Asia betan ye bia <sup>23</sup> am olo dim ota naka maki Yesuse bainobo galin kukubo wengo baase baase monsiobe. <sup>24</sup> Efesas bibo god dim omino niniino Atemiso niniino omtoulebliba binabibbua naka make niniino Dimitliase Efesas bib ye bianea tom ayamo niniino silbao olonea smik awemo Atemiso klabe kesoa e okok nakai dlobianea kima bia klabiba naka maki teniba moni sumo waloniba oleb unebiba i moni olo bokabibbua <sup>25</sup> e Fole weng sango wente kesoa e okok nakai smik awemo klabinabib isa eka okok afet okok kebinabib isa alukum nganabene te misiba baabene

Nibo smiko klaboba naka maki moni sumo oleb teniba webianiba oleb unebib otane <sup>26</sup> nibo wenteboba Fole baanea God olo nakai kweilo tubuniba klabib ole bainbabo ge baasea naka homoni Asia betano blib isa eka Efesas bibo blib isa Fole wengo bainobo geibbio kesoa <sup>27</sup> ne funania Fole wengo nib okoko misiam omfubenea nakaia unangai baaniba Atemiso amo awembabo besabo genomabiobe. Asia sel isa eka bib mak bib mak sel isa i Atemiso niniino omtoulebliba binabib otane Fole inangge baane kesoa nakaia unangai baaniba Atemiso god motonbabo ge baaniba o niniino omtoulebliba nino deibonomabiobo ge funaiobo ge baasea <sup>28</sup> i Dimitliase wengo wenteniba atliaubesoa ngambianiba Atemiso Efesas bib seli sumobo ge ngansiba <sup>29</sup> eka Efesas bib seli naka mak unang mak isa weng sum ngambiam bliba Gaiase Alistakase i dabo Masedonia bib selobe. Fole bekeba tlibbua ye bliba nakaia unangai atliyebuei yatemniba yafu dleb taniba weng omin am tam dasioibe. <sup>30</sup> Fole baanea Ne monia nakaia unangai atliyebue isu unania wengo baabenamabibo gene otane bainobo galin nakai wataiba desebe. <sup>31</sup> Komokwal maki Asia betano kima blibi Fole nekwalobe. I futano dola omfubianiba baabaniba Kobo weng omin amo mo tam unaebe ge baabasioibe. <sup>32</sup> Nakaia unanga eli am dofania maki imaye Inaminobo ge ngambib eka mak isa imaye Inaminobo ge ngambe bliba nakaia unangai maki tlebe tlebe blibi kukub olo mitmakamo mo tekein kebiba otane tebian temiba bibam seli inabib kesoa yatem te watem te watem bianiba ngansiba <sup>33</sup> Yuda maki Aleksandae baabaniba Kobo Efesas bib seli baabeneba Olo Yuda sanbabo ge baabenale ge baabaniba dliba dabaiba watnea go wat manea kweile taubeia nateniba wengo ngambibo kimik geine genea inane otane <sup>34</sup> nakaia unangai ateniba e Yuda nakabo ge funaniba am dofa ngambianiba Atemiso! Efesas bib seli sumobo ge ngambiba afok smiko asu blimanoa <sup>35</sup> Efesas bib seli komok make Ibo kimik geine ge nganasea i kimik gesiba baabene Efesas bib sel ivo wentemine! Nib godo Atemiso am osa eka tom awemo abilim ut danao daak tlobua kima binabobo nakai alukum tekein kebiobe. <sup>36</sup> Naka make baanea Efesas bib seli Atemiso mo kima blibbabo genamino blim kesoa ibo alo mo tliyebota kukub misiamo hebmamsabo mo namibe! Fiab nabianibte! <sup>37</sup> Eka ibo naka asu dab eli yafuniba ge dlablib otane i nib godo amo inamin namino ayoko mo dloniba eka i weng dobo wengo mo baabonaim blimobe. <sup>38</sup> Eka weng mak ole Dimitliase daabaniba smiko klabinabib

nakai i sinwal i wengo baanom gib mole debliba kot kemin amo tola kot kemom gaib dim ota kukub klamin nakai dimo baaine! <sup>39</sup> Eka Weng afeta ye bua baanomo ge fumbib mole wengo omom gaib dim yota baaine! <sup>40</sup> Ibo inamomabib otane ibo wengo mitmakam blimo ngambib yole kimanin nakai Lom seli teniba yatemaibo ib kukubo misiamobo genomabiobe. Eka ibo nimin kebianibta dleb wengo baasese blibe? genimib osa nibo fatnanobta yang ke baabenomabbione? Ne funania Nibo weng blim kenomabbioho ge fumbibe. <sup>41</sup> Ne wengo bayotabo, ibmaye onon tlaïne ge baabenea onon tlasioebe.

## 20

*Fole monea Masedonia betano omlanea monea Glikam onsebe.*

<sup>1</sup> I ina bianiba wengo ngambibo blimano kesoa Fole bainobo galin nakaia unangai baabenea Te mieine genea te misiba bainobo galino sbal manamin wengo omye-nea dosbal mane ole deibenea Masedonia deib bebianea <sup>2</sup> nakaia unangai betano yo blibi bainobo galino sbal manamin wengo omkaye bianea dosbal san sanea monea Glik betan onsebe. <sup>3</sup> Fole inanea monea Glik betano bia alimo asumatna blimanoa siib tem monea Silia betan unang genabe otane Yudai maki obianiba Fole ananomo ge obiba wente kesoa funanea Ne siib temo deibonia imin denia Masedonia deib unano ge funasebe.

*Fole mubiang dimo Tloas bib ye bisebe.*

<sup>4-6</sup> Luk ne Fole ni dabo Glik betano deibonoba monoba Filibai bib ye bioba Yudai singkalin am sumo niniino bleto yis blim downamin amo bliman ole siib tem beboba amo asuke asuke make nao blimanota watnoba Tloas bib wat temsobobe. Naka maki Fole bekeba haabinabibi niniino Sofatae, Filase Belia bib sake miine tenabea eka Tesalonaika bib seli asube, Alistakase Sekandase i dab kenabiba eka Gaiase Debi bib sake tenabea eka Timotie tenabea eka Asia seli Tikikase Tlofimase i dab kenaniba sin watniba waise bliba ni inanoba watemob ole Tloas bib ye bioba amo sebeneo blimanole <sup>7</sup> Salele dime kwinoa bainobo galin nakaia unangai maki tenabiba ni tenanoba Yesuse kaanebuo bobolo fumbianoba Imeno downomo genoba dli utnoba am ut unanoba Fole funanea Bomanomo ne deibe unamabibo gene kesoa Gode wengo omkayebea afoko tenoa isak ewit tola <sup>8</sup> ni amo mibiobo tem ut ayalo homono tubu biota <sup>9</sup> naka tene niniino Yutikase gil deibo amito hatlaibbio ut toubia Fole wengo omkayebe binoa Yutikase kina dububasoa dumun denea

dala daaknea kim daak anaoa kaanea naka maki hebmamsab daakniiba afu dobo nabiba <sup>10</sup> Fol esak daaknea melmel golbua daak tounea Yutikase afu temnea baabene-nea Ibo mo memibe! E mo kaaim blim sma afen biebo ge baabenea <sup>11</sup> imin utenea biin ele tle ole Yesuse kaanebio bobolo fumbianoba imeno hanea kiki downob ole Fole wengo imin oyebea bomanoa deibe unea <sup>12</sup> Yutikase mo kaaim blim bie kesoa nakaia unangai debeb taniba ele am tam unaniba bobol ayam funasioebe.

*I Tloas bibo deiboniba Mailitas bib onsiobe.*

<sup>13</sup> Fole baabenea Ne kim deib monia Asos bib ye natlamabibo, ibo moniba Asos bib ye waitnenabibte gene kesoa ni deibanoba siibe obetnoba watnoba <sup>14</sup> Asos bib wat wasanaboba wat natle ole siib tem debetnoba monoba Mitilini bib ye aan sobnoma <sup>15-16</sup> bomanoa Mitilini bibo deibonoba siibe obetnoba bebianoba Fole baabenea Fentikos singkalin am sumo tlamone ne Yelusalem bib wat biamabi kesoa nibo Asia betano Efesas bib deibo mo unomabob- boba, nibo molot monoba Yelusalem bib unomo genea inanoba monoba aaubile Kaiose kikib ye aan sobnoma bomanoa imin teboba kwinoa tenoba Semos bib wat sobnoma boman ole tenoba Mailitas bib ele tetemsobobe.

*Fole Efesas bib seli bainobo galini komokwali Ayam libte ge baabesebe.*

<sup>17</sup> Fole Mailitas bib ye bianea weng omfanea Efesas bib seli bainobo galin nakaia unangai komokwali tline genea <sup>18</sup> tememiba baabenea Mikiktemo ne tenia Asia betan ye tlia bianoba ne kukubo nabio ibo kla nateme binibbiobe. <sup>19</sup> Am homono dimo Yudai nesa eka ne okok osa misiam natnenom gabiba ne bobolo ilum omfutneno otane ne Gode okoko okok kebi kesoa ne nene niniino mo omfaim blimobe. <sup>20</sup> Ne minamin baan dim osa ilib am tam osa wengo omkeima biania daayemin wengo alukum aleye binibiobe. <sup>21</sup> Am homono dimo ne Yuda isa Yudaba isa baabeniba Ib hengmino deiboniba ib bobol temo deskinaniba Gode omniba Yesus Sume bainobo geine ge oye binibiobe. <sup>22</sup> Ne ina binibuo memalo Gode Hobe baatnenea Kobo Yelusalem bib one ge baatnenea kesoa ne wentenia Yelusalem bib unamabi otane inamin namin olo ne dimo tam tlamabo ne mo tekein kebibabe. <sup>23</sup> Ne bib mak bib mako haablio Gode Hobe baatnenea Naka maki teniba klabuto ge kemeb moniba klabutam unaniba kukub misiamo omkakemomabiobo ge onebe otane <sup>24</sup> ne kaanamin kukub osa afenin kukub osa ne mo tekein kebibabe. Ne kaanang gami



afen biang gami osa ayamobe. Yesus Sume emaye e okok olo omnebua Gode wengo nakaia unangai omkayebia Gode i kla daabe bie kesoa ne okok olo bobolo wanebua makob okok blia blimanoko gabibe. <sup>25</sup> Ne sino ibsu ele biania Gode kimanin wengo omkaye binibu otane memalo ne tekein kebibe, ibo imino ne mo natemomabibbabe. Mubiango ele natemib kesoa <sup>26</sup> ne weng olo baabenamabio naka maki deib ayame geteisaniba deib misiam eta unib mole ole ne sanbabe, ilib sanobe. <sup>27</sup> Niminbata, ne Gode wengo makob omkeimanita ato hatunubibabe. Ne alukum omkeima binibiobe. <sup>28</sup> Gode Hob eta nakaia unanga eli ibo doyebio kesoa kla kima bianiba ibmal osa kla biam bianibte! Gode e miine ilem eta oloneta nakaia unanga eli hengmino walubenea Nemibo genebiobe. Ibo makob eil sibsib kimanin nakai ulab kesoa nakaia unanga eli kla kimaibe! <sup>29</sup> Ne deibe unia naka maki teniba ibo baka bianiba inamin namin misiamo aleyemomabibo, makob eil sibsibi bib ele bliba til satili teniba yenanomabib inaniba naka elisa ibo inayemomabiobe. <sup>30</sup> Naka maki ilib isak temo blibi imaye men weng men weng oye bianiba bainobo galin kukubo misiamobo, deibueine gansibta ibo Baine genibta ib bainobo galino deibonomabib kesoa <sup>31</sup> ibo klaine! Bifolo asumatnao blimano dimo ne teng wengo mo omin blimobe. Ne amitie sbalma biania tab dim osa eka kwinomo dim osa dohalim biania aleyem tlibio kesoa ibo funaniba klaine! <sup>32</sup> Ne memalo ibo dlonia Gode kweiban dim dlaiobe. Eta ibo kimanamabe kesoa ibo e wengo kla wente bianiba ib bainobo galino sbal maine! E nakaia unangai e bainobo gabibi daayebeo ibsa inanea daabenamabebe. <sup>33</sup> Ne naka maki youma monia o bobolo mo wanebobabe. <sup>34-35</sup> Ibo tekein kebiobe, ne nemaye okok kebiania monia youma imena inamin naminao boka biania mako olonia ne bekebi kikiye biania eka atosin ole nemalo boka biam bli kesoa ne funania Ne kukub olo inania bainobo galin naka maki beitalo blibi daabei mole ne naka mak unang maki daayemin kukubo ibo alebenamabibo gabia Yesus Sume baanea Naka maki inamin namino doklaibo kobo seinamabeb otane kebmio i dokayebib ota Gode seinin sumo omklamabebo ge baatnenebiobo ge baabesebe. <sup>36</sup> Fole wengo omkayebeo ye blimano kesoa bainobo galin nakai komokwali tenabiba Fole tenaniba dlong dlong golbua daak toulaniba beten keib ole <sup>37</sup> i Fole afuniba meha bianiba keneng wat bukuk gaha biam bianiba baabaniba Klayam one ge oha biam bianiba <sup>38</sup> sino e baabenea

Mubiango ele natemomabiobo imino ne mo natemomabibbabo ge baabenebio kesoa i weng olo funaniba i bobolo ilum omfubenoa debeb moniba siib esu dasiobe.

## 21

*Fole siib tem monea Yelusalem bib unang monsebe.*

<sup>1</sup> Ni Maillitas bibo deibonoba siibe obetnoba molot watnoba Kos bib wat sobnoma boman ole imin beboba kwinoa watnoba Los bib wat aan sobnoma boman ole imin beboba kwinoa watnoba Batala bib wat unanoba <sup>2</sup> ni siibe e tem bebobe, ye deibanoba siibe make Finisia betan unang genabe e tem bebianoba <sup>3</sup> aaubile Saiblase afan da ewale biebe atememde naob ole watnoba Silia betano kikib da wat unob ole kikibubonoba monoba Finisia betano bibo niniino Taia bib wat ye unanoba siibe okok kemin nakai afobeingo ye oketoumib kesoa ni deibanoba bib yo seli <sup>4</sup> bainobo galin nakai hen te yatemnoba baka bioba Gode Hobe bobol tem funino i omyensea Fole baabaniba Kobo Yelusalem bibo mo unaebe ge baabaib ole <sup>5</sup> ye bioba amo sebeno blimanoa bainobo galin nakaia unangai alukum bibob deiboniba meme baka dalo obeb bliba daaknoba aaye sole ninin alim daak unanoba dlong dlong golbua daak tounoba beten kenob ole <sup>6-7</sup> bibam seli Klayam blibte ge baabenaboba eka isak ibo Klayam unine ge baabenaib ole i imin ula bib uniba nile deibe tanoba siib tem tam toulanoba Taia bibo deibonoba monoba Tolemes bib ye temnoba bainobo galin nakaia unangai bliib kesoa yatemnoba Klayam blibta ni tlobo ge baabenoba i baka sobnoma <sup>8</sup> boman ole deibenoba siibe imin obetnoba monoba Sisalia bib ye unanoba siibe ye deibanoba monoba Gode dowan weng omkeimalin nakae Filibe am tam tenoba ye baka aauobbio. E sino Yelusalem bibo bainobo galin nakaia unangai imeno kikiyemine geniba nakai sebeni dlakaibbuei mak etabe. <sup>9</sup> Filibe meme unang teni asuke asuke nai imakwali mo dlim blimobe. Isa Gode weng omkeimalin wanggelobe. <sup>10</sup> Ni Sisalia bib ye bioba am homono bli-manabota Gode weng omkeimalin nakae niniino Agabase Yudia betan danea tenea <sup>11</sup> Fole hale tila tebeisanea ele skil skila kweilao gebanea baabenea Gode Hobe ne baatnenea Yelusalem bibo Yudai hal ele gosake enabaniba ge debeb moniba Yudabai dobyomabiobo ge baatnenebo ge baabesea <sup>12</sup> ni wentenoba ni tenaboba bibo yo seli tenanoba Fole tolobo genoba Kobo Yelusalem bibo mo unaebe ge baabasob otane <sup>13</sup> e baabenea Ibo ne dafao mo

mebianibta ne bobol tem abilo mo omkane-mibe! Ne Yesus Sume niniino dobtouleb bli kesoa o dafa ota Yelusalem bib seli ne saye ge nemeb moniba nenaiba kaai mole olosa ayamobo, ne sin ye klaibiobo ge baanea <sup>14</sup> ni wengo ombiabene kesoa ni imino ohamino deibanoba baabanoba Sume baabkenea Inanale genebo kebmaye inanale ge baabasobobe.

*Fole Yelusalem bib onsebe.*

<sup>15</sup> Ni inaboba am mako ye bliman ole afobeingo kla oletnoba Yelusalem bib unom genamsoba <sup>16-17</sup> Sisalia bib seli bainobo galin naka maki kimaib ole monoba Yelusalem bib ye unob ole monoba bainobo galin nakae niniino Nesone Saiblas bib sakobe, e sin bainobo galin nakabe. E am tam temoba bainobo galin nakai mak isa ye bliobe, i ni yatemniba seinye bianiba Klayam nanibta tliobo ge baabeib ole Nesone baabenea Ibo ne am tam bianibte gesea ni e am ye sobnoma <sup>18</sup> boman ole Fole ni sinwalo Yemse hen motemobta bainobo galin nakaia unangai komokwali alukum Yemse tena blib kesoa yatenoba <sup>19</sup> Fole heitdabe tlane ole baabenea Ne Yudabai baka blio Gode daatne bia e wengo omkeima bia nakaia unangai homoni wenteniba bainobo geibbiobo ge baabene ole eka e Gode okoko okok kem haabi tleo weng osak oyemsea <sup>20</sup> i wenteniba Gode niniino dobtouleb bianiba isak Fole baabaniba Nek kobo tekein kebeobe, Yuda naka homon unang homoni Yesuse bainobo gabianiba eka Mosese hekmel wengo kla gobo nablil otane <sup>21</sup> Yuda naka maki baabeniba Fole baanea Yudai moniba Yudabai baka blib mole Mosese hekmel wengo deibueine! Eka ib memei aal osa mo waketouyemibe! Eka Yuda nib faninwali kukub osa mo wafunimibe gabebo ge oyebiba <sup>22</sup> wentebib biota kobo tleb kesoa ni wengo baabkenomob ota wenteneba inanale! <sup>23</sup> Nakai asuke asuke nai baaniba Nibo Gode kin dimo ayam anamin kukubo nanamino inamin namino klanomabbio ni Gode moton baabanobobo gabib kesoa <sup>24</sup> keb tena moniba Gode kin dimo ayam anamin kukubo klaniba kebta ib inamin namin olo nanomabibo monio imi osa kebmi osa alukum waleba blimanota i Gode kin dimo ayam aniba i gabamano alukum deilaniba hebiabeine! Kobo inaneba Mosese hekmel wengo wafuneba nakaia unangai katemniba baaniba Ni wengo sino wentebobo bainabobo, Fole Mosese hekmel wengo kla gobo biebo ge baanomabiobe. <sup>25</sup> Ni Yudabai bainobo galini weng mako mo baabenomabbioabe. Sino ni futano dola omfubenoba baabenoba Naka maki god dim omini

doul kulana imenao oyib mole ibo mo downaibe! Eka taman osa mo hengamibe! Eka nakai kulani yafuniba kwelo bikila fa yenanimib isa mo downaibe! Eka kulani ilem osa mo downanimibe! Inamin namin ele baabonob olo alukum awemobo ge dola omfubenobbiobo ge baabanaib ole sibnoma <sup>26</sup> bomanoa Fole nakai asuke asuke nai dletnea moniba Mosese hekmel wengo Gode kin dimo ayam anamin kukubo klaib ole e tanea Gode am sumo tem tam unanea nakaia unangai baabeneba Ni Mosese hekmel wengo Gode kin dimo ayam anamin kukubo klanobobo bioba amo sebene blimanomo ota okoko yo klabob naka ni eili elemi ye dleb dleb binomob ole tenoba Gode amo kimanin nakai doyoba dloniba Gode heitdabaiba ni Gode kin dimo ayam anomabbio ge baabesebe.

*Yuda nakai Fole Gode am sumo tem tam afusiobe.*

<sup>27</sup> Amo sebene blimanang genabua Fole tenea Gode am sumo tem tam teme Yuda nakai maki Esia betan da tlebibi atemniba afuniba weng sum ngansiba nakaia unangai Fole dobsuambiba <sup>28</sup> Yudai ngambianiba Nekwal Isel ibo ni daabeine! Naka ele Yudabai aleye bianea baabenea Yuda isa i hekmel weng osa Gode am sumo osa misiamobo gabianea eka Yudaba isa dleb tanea Gode am sumo tem tam une bianea Gode am sumo wat wat dabinabebo ge ngambisiobe. <sup>29</sup> I weng olo inange baasibo inaminobe. Sino Efesa bib sake niniino Tlofimase tlebua Fole dab keniba Yelusalem bib ye bliba yatembibio kesoa i funaniba Fole Tlofimase debeb tanea Gode am sumo tem tam unebiobo ge funanibta weng olo nganmonsioibe.

*Lom teni awa genalin nakai komoke Fole debeb onsebe.*

<sup>30</sup> Inamsiba Yelusalem bib seli alukum wenteniba dlou unaniba taniba Gode am sumo tem tamo Fole afu menga debeb tam teniba bib ele tlaniba Gode am sumo amisalo hebmamsab douboniba <sup>31</sup> Fole ananom gabiba naka maki omha bianiba Lom teni awa genalin nakai komoke baabaniba Yelusalem bib seli weng sum ngambianiba awa gembio ge siba wenteneba <sup>32</sup> e awa genalin nakai hebmamsab dletnea mo teme nakaia unangai yatemniba Fole ananom gabibo deibasiba <sup>33</sup> komoke Fole afuneba awa genalin nakai baabeneba Naka ele sen sayo asu tebeloniba gebaine genea inabaiba eka nakaia unanga ile baabeneba Naka ele niniino wanete? E nimin kenebiote? ge baabesea <sup>34</sup> i yang keib otane maki imaye Inaminobo ge ngambe ngambe bliba mitmakamo homon anoa e i wengo

mitmakamo mo tekein keim blim kene kesoa awa genalin nakai baabenea Debeb moniba ilib am unine genea <sup>35-36</sup> i debeb bebiba nakaia unangai al obba sumo tliyebua dosileb bianiba ngambianiba Anaine! Anaine ge ngambiba awa genalin nakai debeb utniba basalo kikib ut unaniba afu dobtouleb utniba basal dim ut dofakaniba debeb tala <sup>37</sup> am unom genamsiba e awa genalin nakai komoke Glik weng baabanea Ne wengo baabkenano? gesea komok esak baabaneo Kobo Glik wengo tekein kebeba? <sup>38</sup> Sino Isib naka make kikalin nakabo e komokwali yenanang genea naka yebinabib nakai 4,000 i dletnea monea ibuantem ye unibbuo kebtio? gesea <sup>39</sup> Fole baabanea Yeye nekobbabo, ne Yuda nakabo, ne Silisia betano bibo niniino Tasas bib sak netabo, ne bibo bib sum ayamobo, ne nakaia unangai wengo mo baabenano gesea <sup>40</sup> komoke baabanea Kebmaye baabenale gesea Fole basal dim ut mabianea nakaia unangai weng homon ngambib kesoa yatemnea e kweile tofanea atemniba kimik gesiba e Hiblu weng baabesebe.

## 22

<sup>1</sup> E enangge baabenea Aiwala aabwala ibo wentemine! Ne inamin namino nabio wengmo baabenamabibo gesea <sup>2</sup> wentemsiba e Hibluei ili weng oyemsea wenteniba men osa baanamino kimik gebli <sup>3</sup> baabenea Ne moton Yuda nakabe. Ne gongam bibo niniino nemfanobu ole Silisia betano bibo niniino Tasas bib wat nemeb tlobiobe. Gongam ota inanota Tasas bibo nemikinobiobe. Eka damanamin ole ne biem ay kamwali Yelusalem bib ele nemfa blibta damaibiobe. Ne nib faninwali hekmel wengo Gameliele aletnenea ne Gode wengo kla wente binibuo ibsa inaniba memalo Gode wengo kla wentebiobe. <sup>4</sup> Ne sino nakaia unangai mema wengo wentebibi enino omkaye biania eka maki yantou biania maki klabut gengka biam binibiobe. <sup>5</sup> Ne ina bia Gode amo kimanin nakai komok sum esa eka Yuda naka sum isa i ne kukubo natemniba i Yudai Damaskas bibo blibi futano dolaniba omneniba baatneniba Kobo ometneba Damaskas bib one gesiba ne funania Ne monia mema wengo wentebib naka unangai yatemi mole yafunia sen saye gebenia dletnia imin tenia Yelusalem bib ele tlania yenanano ge funania <sup>6</sup> bebia kelanoa monia Damaskas bib asak ye bebiba abilim ute ayale hebmamsab bomat ge tubunea ne isak daak nemfakasea <sup>7</sup> til hose dim ut toum blio deibonia gama daaknia dabalim daak blelasia weng mako baatnenoa Solo, Solo, kobo nimin kenebta ne enino omkanebebe? ge baatnesoa <sup>8</sup> nesak yang

kenea Sum kobo wankebtane? gesia e baatnenea Ne Yesus Nasalet bib sak neta kobo enino omkanebeobo ge baatnesea <sup>9</sup> ne bekebi dleb bebiei ayale atemibbu otane i wengo mo wentim blimobe. <sup>10</sup> Ne baania Sum kobo ne fatnanamabine? gesia e baatnenea Hananeba moneba Damaskas bib ye biehta naka mak eta ne inamin namin okoko omklio wengo baabkeneko ge baatnenabea <sup>11</sup> ayale ne kin dimo bomatowanea ne kino tum getneno kesoa ne bekebi kweigong wat nafu nemetniba monoba Damaskas bib ye biobta <sup>12</sup> naka make e niniino Ananaisea hekmel weng tekein kemin naka ayamobe. E Damaskas bib ye bia Yuda nakai alukum E naka ayamobo ge oha binabiobe. <sup>13</sup> Tenea baatnenea Ne dab tlemn Sol kobo keb kino webiabkenoko ge baatnesea hebmamsab ne kino bomatnenoa atemna bia <sup>14</sup> baatnenea Kobo nib faninwali Sume God eta kemfakanebo, kobo e bobol tem funino olota tekein keneba eka e okok Naka Ayame niniino Yesuse atemneba e wengo kla wentene! <sup>15</sup> Niminbabe, kobo inamin namino watemeb osa eka wenteb osa nakaia unangai alukum baa omkayemabeobe. <sup>16</sup> Kobo mo biaebe, hananeba Yesuse niniino taisaneba e keb hengmino omlabkenea aaye fuelanale ge baatnenebiobe.

*Sume Fole baabanea Kobo Yudabai ne wengo alebenale ge baabasebe.*

<sup>17</sup> E inangge baatnenebua ne imin tenia Yelusalem bib olo Gode am sumo tem tam unania beten kebiania Sume atemnabia <sup>18</sup> baatnenea Kobo hebmamsab Yelusalem bibo deibo one! Bib olo seli ne wengo omkayemebo i mo wentomabibbabo gesea <sup>19</sup> ne baabania Sum kobo ne sino keb bainobo galin nakaia unangai keb am tam blibi klabuto gengka biania yebia nabita <sup>20</sup> keb wengo omkayemin nakae niniino Stibene ananom genamibo ne baabania Ae anaine ge baabania nemaye e ananomabib nakai youmo gemelutneiba wafube blita anaibbio kesoa i ne kukubo tekein kebiobo gesia <sup>21</sup> Sume baatnenea Ne kobo Yudabai skeim ye blib ita kemfubenamabibo ge baatnenebiobo ge baabesea <sup>22</sup> Yudai Fole wengo wentib otane mubiang weng olo wenteniba ngambianiba Naka ele debeb monoba ananom! Inamin naka ye mo deibanobta nemene kaaneko ge ngambianiba <sup>23</sup> al obba sumo tliyebua youmo mako gemelo dlasam bianiba ibalo waa dibi biam nib kesoa <sup>24</sup> awa genalin nakai komoke awa genalin nakai baabeneba Ibo debetniba ilib am tam unine genea i debeb unom genabib otane e funanea Bib olo seli nimin dafa dobbian-

ibta dobsuambibe? ge funane kesoa awa genalin nakai imin baabenea Ibo debeb tam unaibo sayo tebeloniba ande dofasipta tosiananeta e kukub misiamo nane biamo baa omkeimaneko gesea <sup>25</sup> awa genalin nakai sayo tebeloniba genhabiba eka awa genalin nakai komoke mak ele Fole kikib ye mabia Fole baabanea Ne Lom nakabo, ibo kot ketneim blim otane besa nemde nemfanomabiobo, ib hekmel wengo baanoa Kukub olo ayamobo genobuo? gesea <sup>26</sup> komok ele wentenea monea awa genalin nakai komok sume baabanea Naka ele Lom nakabo, ibo nimin kenibta ananom genabibe? ge baabasea <sup>27</sup> komok sum esak monea Fol esu unanea baabanea Kobo Lom naka moton biaebo baatnenale gesea Fole baabanea Ae ne Lom nakabo gesea <sup>28</sup> komok esak Fole baabanea Ne moni sumo walonita Lom nakai biobo gesea Fol esak yang kenea baabanea Ne aye Lom naka kesoa nesa Lom nakabo ge baabasea <sup>29</sup> Fole ananom gabib nakai wenteniba hebmamsab deibaiba awa genalin nakai komok esa funanea Fole Lom naka otane ne Saye geine ge baabesia gebaib yole misiam naiobo ge funanea tosianasebe. <sup>30</sup> Awa genalin nakai komoke funanea Yuda ni min kenibta Fole misiam nabego ge ohabibe? ge funane sonoma bomasoa e funanea Ne Fole wengo wentano genea awa genalin nakai baabenea Ibo Fole saye tileisaine ge baabesea i tileisasi ba komoke Gode amo kimanin nakai komokwal isa eka Yuda naka sum isa nganabenea te misiba Fole debeb daaknea Yuda naka isu daak dofasebe.

## 23

<sup>1</sup> Inabesea Fole Yuda naka sumi kin dam tol wat yateme biane baabenea Nekwal ibo ne Gode nateme binabebe. Ne amit ele haabinabio inamin namin misiamo mo naibiota baanita Inabiobo genimibabo gesea <sup>2</sup> naka maki Fol esu ye bli bi Gode amo kimanin nakai i komok sume nini-ino Ananaiase baabenea Sital wat biango wabaine gesea inabasiba <sup>3</sup> Fol esak baabanea Gode kananamabebo, kobo aso ulab kebtabo, nakai keb aantibo kateniba Ayamobo gabib otane keb amun temo klabkenobiobe. Kobo ele bianeba Ne hekmel wengo wafunin nakabo gabianeba ne kot ketnenang gabeb otane kobo baaneba Biango wabaine gabeb yole hekmel wengo omdibibeobo ge baabasea <sup>4</sup> naka maki Fol esu ye mablibi baaniba Kobo Gode amo kimanin nakai komok sume weng misiam ohabeobo ge baabasiba <sup>5</sup> Fole baabenea Gode amo kimanin nakai komok sum etio? Ne mo tekein kebibabo, ne tekein kebi mole inamin wengo mo baabanimbabe.

Niminbabe, Gode buk temo baanoa Ib kimanin nakae weng misiamo mo baabanimbabe genobiobo ge oye bianea <sup>6</sup> temea Naka eli maki Sadyusi eka maki Felisi na kesoa baabenea Nekwal ibo ne aye Felisi kesoa nesa Felisi nabo, ne nakaia unangai kaanimibo Gode imin dohaanea hananomabibo wengo bainobo gabiania o wengo omkeimabi o dafa ota ibo kot ketnenom genabiobo ge baabesea <sup>7</sup> Felisiei tenabiba eka Sadyusiei tenaniba i sinwalo dleb weng baase baase bianiba i bobol tem osa afet afet funasese bianiba maki wengo ombiabese monsiobe. <sup>8</sup> Niminbabe, Sadyusiei fumbianiba Abisel isa hob isa blihbabo, nakai kaanimibo Gode imino mo dohaanea afen animibbabo ge fumbiba eka Felisie ile obianiba Abisel isa hob isa bliobo, eka nakaia unangai kaanimibi Gode dohaanea imin hananiba afen anomabiobo ge obiam binabib kesoa <sup>9</sup> i inaniba alukum weng sum ngambiba eka Felisiei maki hekmel wengo tekein kebib ile hana maniba baaniba Ni naka ele wengo wentebobo, e hengmino blimobo, hob ese abisak ese mak ohabibta obese makobo, ni mo tekein kebobbabo gesib bianiba <sup>10</sup> wengo sum anang genamo kesoa awa genalin nakai komoke tosiananea temea Felisiei tenabiba eka Sadyusiei tenaniba Fole afu menga ngananiba telaniba anaiba kaanang genome kesoa e awa genalin nakai baabenea Ibo watniba nakai isak wat unaniba Fole afu debeise debeb moniba ilib am daine ge baabenea inaniba debeb mo daib sonoma bomanole <sup>11</sup> bia kwinoa Sume tenea esu ele mane baabanea Fol kobo mo tosianemebe! Sbal manale! Kobo Yelusalem bib ele bianeba ne wengo omkaye binebta Lom bib ole mit monebta ne wengo omkayemale ge baabasebe.

### *Yudai baaniba Fole ananomo gesiobe.*

<sup>12</sup> Inane sonoma bomanoa Yudai maki i sinwalo miniba baaniba Moton abilim ewitobo, nibo Fole dam ye ananoba kaaneko! E sma afen biameo nibo imena aayao mo downomabbibo ge baasiobe. <sup>13-14</sup> Nakai baaniba Moton abilim ewitobo, ni Fole ananomabbibo ge baasibi 40 obe. I inangge baaniba moniba Gode amo kimanin nakai komokwal isa eka naka gang isa baabeniba Ni moton ye Fole ananoba kaanamabebo, e sma afen biameo ni imena aayao mo downomabboba kesoa ananomabbibo. <sup>15</sup> Ib sinwalo Lom teni awa genalin nakai komoke dim baabaniba Ni Fole inamin namino nanebuo wengo imin baabanomabbibo, kobo debeb na tele ge baabasiba e Fole debetnea natesa ni deib tounoba ananoba kaaneko ge oyebiba <sup>16</sup> Fole ele unang miine wentenea

tanea awa genalin nakai am tamo aainse bio baabanea <sup>17</sup> wentenea esak awa genalin nakai komok make nganabane tesea baabanea Naka tembal ele keb komoke weng mako baabanamabibo gabebo, debeb one gesea <sup>18</sup> e debeb monea awa genalin nakai komok sum esu unanea baabanea Klabut nakae Fole baatnenea Naka tembal ele debeb moneba keb komok esu daneba e wengo baabaneko ge baatneseta debeb tibo gesea <sup>19</sup> komoke naka tembal ele kweigong wat afu debetnea naka maki blibo deibe moniba afet ye unaniba baabanea Nimin wenge? ge baabasea <sup>20</sup> naka tembal ele baabanea Bomanomo Yudai kobo dim baakkeniba Ni Fole inamin namino nanebuo wengo imin baaba wentomabbiobo, debeb tele ge baakkenimibo <sup>21</sup> kobo i wengo mo wentaebe! Nakai 40 yei baaniba Moton abilim ewitobo, nibo Fole ayok waisanoba ananoba kaaneko! E sma afen biameo ni imena aayao mo downomabbiobabo ge baaniba waisa bliobe. Kobo debeb mo temaebo ananomabiobo ge baabasea <sup>22</sup> wentenea komok esak naka tembale baabanea Kobo weng olo naka maki mo baabenemebe ge baabanea dabanea onsebe.

*Awa genalin nakai komoke Fole dabanea Filiks esu onsebe.*

<sup>23-24</sup> Komok sume awa genalin nakai komokwali asu nganabanea tesiba baabeneba Ibo awa genalin nakai 200 dloniba eka til hosi dim toulalin naka ile 70 dloniba eka fusau wafunamin naka ile 200 dlonaniba Fole debetniba unine! Ibo inaniba unom gaibo tabo mo unaiibe, klabiba mililan-sota til hosi Fole mo dabaliba e dime touneme ole debetnibta moniba Sisalia bibo komoke Filiks esu unine ge baabeneba <sup>25</sup> eka futano dolanea Filikse omfubanea baabanea <sup>26</sup> Ae Filiks kobo Klodias Lisias neta keb futano dola omfubkenamabibe. Kobo kimanin naka ayamobe. <sup>27</sup> Yudai naka ele afuniba Ananoba kaaneko gabib otane ne awa genalin nakai dletnia tenoba naka ele dobo temoba e Lom naka kesoa dobo tolobo genoba <sup>28</sup> ne e kukub misiamo nanebuo wentenite genia debeb daaknia Yudai komokwal isa naka gang isa isu daak unania baabei otane <sup>29</sup> i baaniba E Yuda ni hekmel wengo mo wafunim blim bietabo gesiba ne funania E inamin namino mo naim blim yole ni besao mo ananoba kaanea eka klabut osa mo genanomobe ge funana biana <sup>30</sup> weng mako wentia i baaniba Ni ayok waisanoba ananoba kaanamabebo ge baaiba wenti kesoa ne hebmamsab dofubkenia e kot kehajib nakai baabania Ibo moniba Fole

kukub misiamo nanebuo wengo Filikse baabaine ge baabenia dlaia natlomabiobe. Ne wengo bayotabe. Kobo klayam biebite ge baanea dolanea <sup>31</sup> awa genalin naka isa eka til hosi dleb haanin naka isa omye ole wengo baabene wentena nabiba mililan ole Fole debetniba moniba Antibatlis bib wat aan sibnoma <sup>32</sup> bomanoa awa genalin nakai imin deibeniba bib tliba eka til hosi dleb haanin naka ita Fole debeb moniba <sup>33</sup> komoke Filikse Sisalia bib ye bio moteniba futano omubana bianiba Fole debeb te dabanasiba <sup>34</sup> komoke futano kinea wateme ole Fole baabanea Kobo betano fab bianebta tlebbue? gesea Fole baanea Ne Silisia betan danita tlibiobo gesea <sup>35</sup> komoke baabanea Keb kot kekebib nakai tesitba ne keb wengo wentano ge baabanea e okok nakai baabeneba Naka ele debeb taniba Helote am tam daniba kla kima blibte ge baabesebe.

## 24

*Yudai baaniba Fole kukub misiamo nabebo gesiobe.*

<sup>1</sup> Amo asuke asuke make nao blimanoo Gode amo kimanin nakai komok sume niniino Ananias esa eka naka gang isa Lom teni hekmel weng tekein kemin nakae niniino Tetalas esa i daakniba Sisalia bib daako kimanin nakae niniino Filikse Fole inamin namino nabebo wengo baabasiba <sup>2</sup> Filikse Fole nganabane tetemeba Tetalase Fole wengo Filikse baabanea Komok sum kobo klayam kima bieba ni inamin namin kukub misiamo namino deibonoba klayam biob kesoa <sup>3</sup> nisa bib mak bib mak naka isa ni alukum amitie seinkebob kesota ni gangobo gebkenomabbiobe. <sup>4</sup> Ne weng gwab mako baabkenamabio kobo mo wentamabeb bleka ne wengo teke okemibabe, gwab olota baabkenang genitabe. <sup>5</sup> Naka ele kikalin nakabe. E bib mak bib mako haabianea Yudai kikalin kukubo aleye binabebe. E Nasalet bib sake bainobo galin nakai komokobe. <sup>6</sup> E Gode am sumo inamin namin awemo watwat dabonang genabe kesota ni afunoba klabuto genoba [Yuda nini hekmel wengo baanobio inanoba e kukubo klanomo gabob otane <sup>7</sup> awa genalin nakai komoke Lisias te-neba menga debeiseneba <sup>8</sup> Fole kot kehabor naka ni baabeneba Ibo Filiks esu unine ge baabeseta tlobobe.] Kebmaye naka ele baabanebta Ni kot kehabor wengo baabkeneta mito kla tekein kenale ge baabasea <sup>9</sup> Yuda maki ye blib isa baaniba Bainobo gasasiba <sup>10</sup> komoke Fole sital muk ge baabanea Keb weng osak baanale ge baabasea Fol esak baanea Ne tekein kebibo, bifol homono blimano kobo nakaia unanga eli klayam

kima binabeb kesoa ne bobol ayam funania ne keb wengo yang ke baabkenamabibe. <sup>11</sup> Kebrmaye naka maki kil baabenebta isak ne monia Yelusalem bibo lotu kebia amo 12 o blimambo wengo baabkeine! <sup>12</sup> Ne Gode am sumo temo weng alang wengo mo baaita Yudai natemim blimobe. Eka Gode am tam osa bib tam osa nakai unangai awao genaline galin weng osa mo baabeim blimobe. <sup>13</sup> Eka Yudai baabkeniba Fole hengabebo gabib otane i weng olo mito mo alebkenomabibbabe. Otane ne weng mako baabkenamabi ole <sup>14</sup> i baaniba Fole Yesuse bainobo gabebo gabib ole bainobe. Ne e bainobo gabiania ni faninwali Sume Gode niniino dobtoule biania eka Mosese hekmel weng osa Gode weng omkeimalin nakai wengo dolaiibu osa bainobo gabibe. <sup>15</sup> Nesa Yuda mak isa ni tekein kebuobe. Sinanomo nakai unangai alukum ayam isa misiam isa kulila binabibi Gode imin dohaanea hananomabiobe. <sup>16</sup> Ne olo tekein kebi kesoa Gode kin dim osa eka nakai unangai kin dim osa ne amitie kukub ayam nabia natemebib kesoa ne aalo ginino blimobe. <sup>17</sup> Ne bib mak bib mako haabilia bifol homono blimanota imin tenia Yelusalem bibo Gode heitdabania Yudai maki monio oyananita tlibiobe. <sup>18</sup> I ne natemibbio dimo ne Mosese hekmel wengo Gode kin dimo ayam anamin kukubo klania ayam ania Gode am sumo tem tamo binibuo naka homon unang homoni ne mo beketne bianibta weng sum ngambiam nin blimobe. <sup>19</sup> Otane Yuda maki Esia betan da teniba nafueibbuei blib mole ita tenibta ne kukub misiamo naia natemib biamo baabkeine! I mo baabkeim blim keib mole <sup>20</sup> sino komokwal isa naka gang isa i kot ketneibbueita ne hengmino mo bua watem utneibbio mole maki ele bliobo isak baabkeine! <sup>21</sup> Ne kukubo nasia natemniba kot ketneibbuo baabkenamabi ole inaminobe. Ne baabenia Nakaia unangai kulila binabibi Gode imin dohaanea hananomabibo wengo bainobo gabiania o wengo omkeimabi o dafa ota ibo kot ketnenom gabioobo ge baabeibiobo ge baabasea <sup>22</sup> Filikse wentenea e Yesuse bainobo galin nakai kukubo tekein kebe kesoa baabenea Debliba sinanoa awa genalin nakai komoke Lisiasa teseta ib wengo klanano ge baabenea <sup>23</sup> eka e awa genalin nakai komok make baabanea Fole klabutam tam dofaneba kla kimanamabeb otane sayo mo gebanemebe! Eka e nekwali inamin namino dluba tlaib osa kobo mo watanemebe ge baabanasebe.

*Filikse Dlusilao i kamo Fole wengo wente bisiobe.*

<sup>24</sup> Filikse Fole inabanebua sinanoa am mako blimansoa e alelo niniino Dlusilao Yuda unangobe, ometnea kam teniba Fole nganabane tesea baabanea Kobo Yesus Klaiste bainobo galin kukubo baatnenale gesea <sup>25</sup> Fole esak utenea kukub ayamo wafunino weng osa eka nakae bobol temo kla kimanin kukubo weng osa eka Gode nakai unangai kukubo klanamabeo weng osa ohabinea baabasea Filikse wentenea tosianea baabanea Kobo unebua sinansota imin nganabkei tlebita wengo imin baanomo ge baabanea <sup>26</sup> Filikse bobol temo fumbianea Fole monio onamabeo ge fumbe kesoa e amitie nganabane tlebea wengo obi obi monsib otane Fole monio Filikse mo olalim blimobe. <sup>27</sup> Bifolo asu blimanoo Filikse Sisalia bibo deibo unang gena biane funanea Ne Fole klabutam tam deiba unia Yudai seinemias gene kesoa deiba unea e alango Fosias Festas esak tenea Sisalia bib ele tesebe.

## 25

*Fole baanea Ne motemia Lom teni komok sume Sisa eta ne wengo wentamebo ge baasebe.*

<sup>1</sup> Festase te bia amo asumatna blimanoa Sisalia bibo deibonea monea Yelusalem bib ye teme <sup>2</sup> Gode amo kimanin nakai komokwal isa eka Yudai komokwal isa teniba Festas esu ele tlaniba Fole wengo imin baabaniba <sup>3</sup> Festas kobo ni daabeneba Fole nganabaneba tenea Yelusalem bib ele tleko ge baabasioibe. I funaniba Baabanoba nganabane tesea deib waisanoba ananomo ge funaniba inangge baabasiba <sup>4</sup> Festase baabenea Yeye Fole Sisalia bib ye biete! Ne hebamsab monia ye temamabibo, <sup>5</sup> Fole inamin namin misiamo nanebio mole ib komokwal maki ne beketneiba monobta Sisalia bib ye kot kebaine ge baabenea <sup>6</sup> Yelusalem bib ye bia amo 10 o blimanoa e imin Sisalia bib une sonoma bomanoa tanea kot kemn am tam tounea awa genalin nakai baabenea Fole debeb tline ge baabenea moniba Fole <sup>7</sup> debeb tetemiba Yudai Yelusalem bib da tlibi kot keha bianiba Festase baabaniba Fole inamin namin kukub misiam homono nabinebiobo ge ohabib otane i weng olo mitmakamo blimobe. Besa ye ohabisiba <sup>8</sup> Fol esak baanea Ne kukub misiamo mo namin blimobe. Yudai hekmel weng osa Gode am sum osa Sisa esa ne misiamo mo nabeim blimobo ge baane otane <sup>9</sup> Festase funanea Ne Yudai bobol ayamo omyensia ne gotneine ge funanea e Fole baabanea Kobo Yelusalem bib unamabebo, ne keb weng olo Yelusalem bib wat klanamabibo ge baabasea <sup>10</sup> Fole baabanea Kobo tekein kebeobe, ne Yudai kukub misiamo mo

nayemin blim kesoa Kobo Lom teni hekmel wengo baanobuo kla funanebta ne wengo wentene! <sup>11</sup> Ne moton hengaihua ibo baaniba Ananomo genimibo ayam otane ne mo hengaim blim kesoa ibo mo nemeb moniba Yudai mo nemyaibe! Ne Lom teni komok sume Sisa eta ne wengo baabanam-abibo ge baabasea <sup>12</sup> Festase wentenea naka gangi tena wengo baaniba Festase imin Fole baabanea Kobo funaneba Ne mo temia Lom teni komok sum eta ne wengo wenteko geneb mole kebmaye mo temebta eta klaneko ge baabasebe.

*Agliba esa Benaisi osa i teniba Festas esu ele tesiobe.*

<sup>13</sup> Am mako blimanoa komok sume e niniino Aglibae e nengo Benaisio i mikimo teniba Festas esu ele tlaniba Kobo ye hiebtta tlobo ge baabaniba <sup>14</sup> e baka bliba am homono blimanoa Festase Fole wengo komok Aglibae baabanea Filikse naka make e niniino Fole klabuto ge debeb tanea klabutam tam danea deiba unebiobe. <sup>15</sup> Sino ne Yelusalem bib ye blia Gode amo kimanin nakai komokwal isa eka naka gang isa i naka ele wengo baatneniba Fole inamin namin kukub misiamo nanebio kesoa kobo awa genalin nakai dlabmaneba anaiba kaaneko ge baatneib otane <sup>16</sup> ne baabeniba Lom ten ni kukubo inaminobo, naka make kukub misiamo wafu biebo geib mole ni besao mo dohyaobbabo, mikiktemo e kot kebaibbio naka ite naniba wengo klabsitabo ge baabe tliisonoma <sup>17</sup> isak tliba sobnoma bomanoa tanoba kot kemin am tam unanoba Fole debeb tline ge baabesia debeb tliba <sup>18</sup> ne funania E inamin namino moton nane atemibbuu baanomabiobo gabi otane <sup>19</sup> i kot wengo mitmakamo mo biota baaim blim besa ili hekmel wengo wafunamino weng ota obianiba eka Fole weng mako baanea Nakae niniino Yesuse kaanea imin hanane biobo gabe yota wenteniba dobsuam bianibta nabib kesoa yatemnina <sup>20</sup> ne kot weng olo mitmakamo kla mo tekein keim blim kei kesoa baabaniba Nibo monoba Yelusalem bib unanobta ne keb wengo imin klanano ge baabai otane <sup>21</sup> Fole baanea Yeye deitneiba klabutam blia sinanota monia Lom teni komok sum esu temita eta ne nomo klaneko gesea ne awa genalin nakai baabania Naka ele kla kima bliba sinanota ne dabaia Lom teni komok sum esu uneko ge baabeibiobo ge baabasea <sup>22</sup> Aglibae wentenea esak Festase baabanea Nesak naka ele wengo wentamabibo gesea Festase baabanea Ae bomanomo wentamabeobo ge baabane sonoma <sup>23</sup> boman ole Aglibae e nengo Benaisio i mikimo eit homono kiniba

tenabiba eka awa genalin nakai komokwali te eka niniin oyemin nakai tenaniba taniba weng omin am tam unaniba Festase awa genalin nakai baabanea Fole debeb tline gesea moniba debeb tetemiba <sup>24</sup> Festase baabanea Komok sum Agliba kebsa eka naka mak ibsa naka ele atememine! Yudai bib olo blib isa eka Yelusalem bibo blib isa baatneniba Naka ele ananoba kaaneko ge baatneib otane <sup>25</sup> ne e hengmino hembio e hengmin sumo blim kesoa ne mo ananimibabo ge baania deibasias emaye baanea Lom teni komok sum eta ne wengo klaneko gene kesoa ne Lom teni komok sume dofubanamabi otane <sup>26-27</sup> ne funania Ne klabut naka ele besa dabaia une mole kukub olo misiam kesoa ne e kukubo nanebio wengo wentenia futan temo dolanita naka dam yebbaka dlaita unaibobo genia deiba bli kesota debeb tlia komok sum Agliba kebsa eka naka mak ibsa e wengo wenteniba futano daatneiba dolanomo genita debeb tlibo ge baabesebe.

## 26

*Fole wengo Aglibae baabasebe.*

<sup>1</sup> Aglibae Fole baabanea Keb wengo baanale ge baabasea Fole baabanea <sup>2-3</sup> Komok sum Agliba kobo Yudai baaniba Fole inamin namin misiamo nabebo geibbuo, kobo Yuda ni kukub osa ni hekmel weng osa kla tekein kebeb kesoa ne memalo seimbiana inamin namino naibio wengo baabkenamabiibe. Kobo ne wengo tengo mo kemone! Kla wentene! <sup>4</sup> Sino ne gwab binibuo dim osa eka damania Yelusalem bibo binibuo dim osa Yudai ne kukubo kla natem tekein kebiobe. <sup>5</sup> Yuda ni Felisi ge oyeibibi kukubo dot bumolokobe. Kukub olo Yuda ni kukub afeto gaisonobi otane ne wafu binibiobe. Yudai kukub olo watemibbio kesoa baabkenom gib mole baabkeine! <sup>6-7</sup> Sinanggwano Gode Yuda ni faninwali moton wengo baabanea Sinanom ne inamin namin mako nanamabibo ge baabenebuu Ni faninwali <sup>12</sup> i bainobo gabianiba kwinomo dim osa tab dim osa amitie lotu kebianiba am olo waiso binibbuu eka molobsel isa memalo i inabibo nesa inania bainobo gabi o dafa ota i kot ketneibiobe. <sup>8</sup> Yuda ibo nimin kenibta Gode kulila binabibi dohaanamabeo bainobo genamino debinabi? <sup>9</sup> Nesa sino Nasalet bib sake Yesuse okoko watwat dabanano ge funai kesoa <sup>10</sup> inania Yelusalem bibo Gode amo kimanin nakai komokwali baatneniba Kobo Yesuse bainobo galin nakaia unangai klabuto gengkalale geibo ne inania Yesuse bainobo galin homoni ge dleb monia klabutam

tam kabia Yudai baaniba Yenonomo genimibo nesa baania Yenonomo genasia yebinibbiobe.

*Fole nena bainobo genebuo wengo omkeimasebe.*

<sup>11</sup> Ne ina biania Gode amo tem tam osa ne awa genalin nakai dlabmaia bainobo galin nakaia unangai yebinibbuo ne bainobo galini baabeniba Ibo Yesuse bainbabo geine ge baabeia inabiba ne Yesuse bainobo gabibi alo tlinebua kan haabilia skilaniba bib mak skeim ye unaiB osa kan monia yafunia enino omkayebibua <sup>12</sup> imin inania unang genamsia Gode amo kimanin nakai komokwali weng omneniba kobo Damaskas bib one gesiba bebia kelanoa monia Damaskas bib asak ye bebia <sup>13</sup> abilim ute ayale bomat ge tubunea ne bekeb isa ge dlakanea atembuio afoko tubunabo ulabbabe. E inanea ge dlakasea <sup>14</sup> ni til hosi dim ut toulabiobo gemela daaknoba dabalim daak blelasoba weng mako Hiblu weng baatnenoa Solo, Solo, kobo nimin kenebta ne enino omkanebebe? Kobo makob ane isabia naka make ateme otane kweimiki skilone tatgenea bilabanamabe inaneba enino kleb skila beobo ge baatnesoa <sup>15</sup> nesak baania Sum kobo wankebtane? gesia Sume baatnenea Ne Yesus netabo, kobo enino omkanebeb otane <sup>16</sup> hanamanale! Ne tenia kemakaia kobo ne okoko okok kebianeba inamin namino watemeb osa eka sinanoa alebkeia watemamabeb osa naka mak unang maki aleyemale genita tliibe. <sup>17</sup> Ne kobo kimanamabi kesoa Yuda isa eka Yudaba isa kobo mo kananomabibbabe. Ne kemaia moneba isu unaneba <sup>18</sup> i bobol temo mililanabo inabebua Gululame titilo ge dlabuei ne kukubo alebeneba i ne bainobo geniba Gode titilo ge dlanoa i bobol temo makob ayal einin keniba ne i hengmino omlabeia i nakaia unangai Gode dlakaebuei tena nine genita tliBo ge baatnenebiobe.

*Fole e okoko wengo baasebe.*

<sup>19</sup> Komok sum Agliba kobo ne abilim dao wengo baatneno mo ombiaim blimobe. <sup>20</sup> Ne wentenia Gode wengo mikiktemo watnia Damaskas bib wat biania omkaye bini ole deibenia monia Yelusalem bibo omkaye binai ole omito monia Yudia betano haabiania omkaye biania eka monia Yudaba isa Gode wengo omkaye biania baabeniba Ib hengmino deiboniba ib bobol temo deskinaniba Gode omaniba e okoko okok kebiba nakaia unangai yateniba funaniba Ib hengmino deibueibobo ge funaine ge oye biam <sup>21</sup> nabi o dafa ota Yuda teniba ne Gode am sumo tem tam blio nafuniba baaniba Ananoba kaaneko

gabib otane <sup>22-23</sup> Gode ne amitie daatne bie kesoa nakai alukum niniin oyemin isa eka niniin oyeminba isa Gode wengo omkayebibe. Sinanggwano Moses esa eka Gode weng omkeimalin naka isa i inamin namino tam tlamabo wengo omkeima bianiba baabeniba Gode Dofakamin Nakae enin kino watenea kaanea kulila binabibi imin hana tlemino eta sin hananea Yuda isa eka Yudaba isa e bainobo galin kukubo omkeimabenamabebo ge baaniba dolaibbuo nesa olota omkeimabibo gesea <sup>24</sup> Festase nganabanea Fol kobo klangmikinobo, kobo skul kebianeba tekein kemim homono tekein keneba klangmikin anebbiobo ge baabasea <sup>25</sup> Fol esak Festase baabanea Yeye ne klangmikinbabe, motonobe. Ne bobol temo ayam fumbiania bain baabkeiobe. <sup>26</sup> Komok sume Aglibae inamin namim olo tekein kebe kesoa ne wengo e baabanamabio mo tosiambibabe. Ne inamin namino nabio ayoko mo naim blim kesoa e kla tekein kebebo ge baabanea <sup>27</sup> eka Fole imin Aglibae baabanea Komok sum kobo Gode weng omkeimalin nakai wengo bainobo gabeba? Ne tekein kebibe, kobo bainobo gabebo ge baabasea <sup>28</sup> Agliba esak Fole baabanea Kobo memale obeb olota e hebamsab Yesuse bainobo galin kukubo wafuneko ge fumbbebo? ge baabasea <sup>29</sup> Fol esak baabanea Memale bainobo genemebo ayamobe. Eka sinanoa bainobo genemebo osa ayam nabe. Ne kebasa eka naka maki ne wengo wentebib isa ibo beten keye biania i ne Yesuse bainobo gabi inaniba bainobo genomabib otane sen sayo mo gebenimibe gabibe. Ne funania Ibo Yesuse bainobo geniba ne naibio inaine gabibo ge baabesea <sup>30</sup> komok sum esa eka kimanin naka esa Benaisi osa eka i bekeb isa hana tamniba <sup>31</sup> bib tam unaniba obianiba Naka ele mo hengaim blimobo, i e klabuto mo geniba eka anananimibe ge omonsioe. <sup>32</sup> Aglibae Festase baabanea Nibo klabuto tileisanomabbio otane e baanea Lom teni komok sum eta ne wengo klaneko gabe kesoa deibanomo ge baabasebe.

## 27

*Fole siib tem monea Lom bib onsebe.*

<sup>1</sup> Festase baanea Fole Itali betano Lom bib uneko ge baasea i Fol esa eka klabut nakai mak isa dleb moniba klabuti kimanin nakae Yuliase dlansioe. Awa genalin nakai komok ele Lom teni komok sume e awa genalin naka etabe. <sup>2</sup> Luk ne tena bia i tenanoba Sisalia bib ye bioba siib make Adlamitiam bib danea tlanea Esia betan unang ge kesoa ni bib olo deibonoba siib ele tem unom genaboba



Masedonia nakae niniino Alistakase Tesalonaike bib danea tetemea etem nanoba beboba kwinoa aala bioba siibe dleb be-bea <sup>3</sup> bomanoa monoba Saidon bib ye unanoba Yuliase Fole weng ayam baabanea Kobo moneba keb nekwali yateneba inamin namino dokliba dleb tlang gaeb osa ayamobo ge baabasea Fole inanea mo danea imin tle ole <sup>4</sup> Saidon bibo deibonoba Itali betan unemin deib unom genaboba glol sume tleme kesoa ye deibo deibonoba aabile Saiblase abuk sin da ota glole mensa omkabe kesoa ye deib monoba <sup>5</sup> Silisia betano tle tle Famflia betano tle tleo omtla nanoba monoba Lisia betano bibo ninino Maila bib wat sobnoma bomasoa <sup>6</sup> Yuliase temeas siibe make Aleksandria bib danea glole tlebianea Itali betan unang genabe kesoa atenea dletnea watnoba siib ele tem wat unanoba <sup>7</sup> fiab beteng beboba am homono blimanoa monoba Naidas bibo kikib ye beboba glole tlebianea deibo walea ni deibo onamino tobtlin halob kesoa deibonoba aabile Klit da ota glole mensa kesoa ye tem te monoba Salmoni bibo omtlanoba <sup>8</sup> ken tla bebianoba bumolok wat wat binoba watnoba Lasia bibo kikib wato aaye ulam omfanea tlamanebio wat unanoba aay ele niniino Ulam Ayam etabe. <sup>9</sup> Ye bioba am homono blimanabua Yudai hengmin omketouyemin amo blimanole glol sume tlebianea aaye mousie haa tlebianea siibe unang gameo watwat danamabe kesoa Fole baabenea <sup>10</sup> Naka iho ne wengo wentine! Ne bobol temo fumbio aay ele deibanoba unob mole siib esa afobeing osa naka nibsa misiam nanomabbio kesoa nibo ele biomo ge funaiobo ge baabene otane <sup>11</sup> awa genalin nakai kimanin nakae Fole wengo mo wentim blimobe. E siibe kimanin naka esa eka siib gosak esa i weng ota wentenea <sup>12</sup> eka naka homoni siib tem ye tana blib ile baaniba Glol sume tlemang gabea nibo aa dang ele biob yole ayambabo, aa dang olo deibonoba monoba Finiks bib ye bioba tlebianea blimanseta unomo ge baasiobe. Finiks bibo aabile Klite tem biotabe. Bib olo glol sume mo tlebinabebabe. O glol blim bib ayamobe.

*Glol sume tlebianea aaye mousie haa tlemonsebe.*

<sup>13</sup> I inangge baanabiba glole Saut dae gwabsa tleme kesoa i funaniba Glol ele mensa kesoa aamun sume ayam unomabiobioge funaniba siibe skilo deisoniba daaknoa tamanobuo imin wafueiba utloa aamun ele deibanoba aabile Klit da eta kikibanoba ken tla ye beboba <sup>14</sup> glole sume niniino Taleo e Klit da tlebianea <sup>15</sup> siibe onamin deibo waisanea fuba obetnea monoba <sup>16</sup> aabil gwabe e niniino Ko-

dae mukam deib bebianoba aaye mousie sumo mo haa tlemin blim bie kesoa weseme gwabe siibe abuk da tab obgieibue melekla binoba obginoba buba <sup>17</sup> obeb utnoba siibe dame dim ut obasa genoba i funaniba Glole siibe fuba obeb monea Afelika betano ninin aalim wat delabbane-mebo geniba siibe glole fuba obeb haanin youme gamtlananiba siibe fiab beteng obki bebianea <sup>18</sup> obubma obabma bebea bomanoa i funaniba Siibe misiam anamabebo geniba i afobeingo mako dibiaiba daaknoa aan tem daak unoa deibonoba beboba <sup>19</sup> bomanoa i siibe glole fuba obeb haanin youmo mak osa eka sai osa eka inamin namin afet osa imin dibiaiba aan tem daak blela kiki unoa deibonoba beboba <sup>20-21</sup> am homono blimanso soko tlebianoa ayungo neketowa genoa abil ete dabal ete nanea kaki binea ni afok osa awitnin osa mo watemin blimobe. Eka imen osa mo doweim blim nabioaba glol sume sma ye tlebea ni bobol temo fumbianoba Siibe misiam anea obeb daak unomabbio ge fumboba Fole nakai isak daak hana manea baabenea Ibo ne wengo wentutneiba Klit aabil ye biobta mole inamin namin misiamo mo tam tlobabe. <sup>22</sup> Eka ne weng mako baabenamabi ole Siibe misiam anamabe otane naka nib ole elekieme mo kaanomabiobabe. Nibo alukum sma biomabbio. Ibo bobol ayam fumbibte! <sup>23</sup> Ne God Sume niniino dobtoule binabibua sintalo kwinoa Gode abisek tenea baatneea <sup>24</sup> Fol kobo mo tosanemebe! I kemetniba Lom teni komok sum esu unamabeobo, Gode kla gobke bie kesoa keb bekeb isa mo kaanomabiobabo ge baatnesobe. <sup>25</sup> Ibo bobol ayam funine! Gode wengo baatne-neo bain inanamabebe. Ne Gode weng olo baatne-neo bainoba geiobe. <sup>26</sup> Aaye sma dleb monea aabile make ken ye dlanamabebo ge baabesebe.

*Siibe misiam ansebe.*

<sup>27</sup> Ni inam beboba amo 14 o bliman ole 14 olo kwinota glole siibe fuba obetnea aaye sole niniino Edliae dang tla beboba ibalanoa afoko tenoa isak ewit tloa siibe okok kemin nakai funaniba ken ele tlobbu ese makobo geniba <sup>28</sup> aamune saye ki temiba 36 mita yeb minim kesoa deiba bebianiba eka imin ki temiba 27 mita yeb minim kene kesoa <sup>29</sup> i funaniba Siibe tom dimo wambianemeo helanamabebo ge funaniba siibe skilo asuke asuke nao kakam sino olaiba daaknoa bikisoa funaniba Amo hebmamsab bomanoko ge funaniba <sup>30</sup> siibe okok kemin nakai funaniba Siibe deibanoba weseme gwabe tem unomo geniba i weseme oboniba aalang daak

ofakaniba maki dim baabeniba Ni metnoba siibe gabam met unanoba siibe skilo mako olanob daaknoa bikinamabobo ge baabesiba <sup>31</sup> Fole i bobol tem funino tekein kenea awa genalin naka isa eka i komok esa baabenea Naka eli siibe deiba unib mole ibo yalowa kulilanomabiobo ge baabesea <sup>32</sup> awa genalin nakai weseme saye waisaiba obkileb uea <sup>33</sup> amo bomanang genamo kesoa Fole nakai alukum baabenea Amo 14 o blimano dimo ibo bobol misiam fumbianiba imen osa mo doweim blim tebib kesoa <sup>34</sup> ibo memalo imeno downoniba sbal maine! Inamin namin misiamo nib dimo mo tam tlubenomobabo ge baabene <sup>35</sup> e imeno olonea Gode heitdabanea hanea unansea naka maki atemniba <sup>36</sup> i bobol ayam funaniba imi osa olo downosiobe. <sup>37</sup> Nakai siib ele tem tame bisobi homoni 276 obe. <sup>38</sup> Ni inanoba imeno downonoba matwayensoa siibe abil alobiebo geniba asiamo niniino wito dibiaiba aantem daak blela kiki unoa deibonaboba <sup>39</sup> afoko tubunoa i ninin alimo watemib otane i betan olo mo tekein kebibbabe. I inaniba wateme bianiba temiba aaye ulomfanea aamune dikilanea ninine obbia utlebio kesoa ateniba i funaniba Nibo siibe obeb utnoba ninin alim ut unomo geniba <sup>40</sup> i siibe skilo sayo weisoiba oleb daak unoa siibe stiae afu obeb haanin ase tileisaniba eka siibe glole fuba obeb haanin youme doboniba gabam dae imin dobbuniba glole fuba obeb watnea ninine kikib wat une otane <sup>41</sup> aaye isak wate daal omfanebua siibe watnea delab banea aaye mousie haa tlebiana siibe kakam dae helane kesoa <sup>42</sup> awa genalin nakai funaniba Klabuti skilaniba aaye wa onon tlanimiobo yenanomo gesiba <sup>43</sup> komoke funanea I Fole mo ananimibe ge funane kesoa awa genalin nakai watanea e nakai alukum baabenea Aawamin naka ibo wa moniba ken unine! <sup>44</sup> Eka aawaminba kweifum ibole siibe klutanea hanota olakaniba wafu liblta dleb monoa ken danoko ge baabesea ni alukum inanoba watnoba ken was onon tlasobobe.

## 28

### *Fole Molta bib ye bisebe.*

<sup>1</sup> Ni inanoba alukum klayam watnoba ninin alim wat temoba naka maki baabeniba aaubil ele niniino Molta etabo gesiba wentenaboba <sup>2</sup> betan olo seli teniba heitdabeniba kima dlasiba bioba soko tlebiana gildububeno kesoa i ase febeiba tefuboba <sup>3</sup> Fole imin anggameyo bola oleb te fakansia inabe as amun tem iwat biana ulanea wat tenea Fole kweil wat antamasea <sup>4</sup> betano yo seli atemiba inabe e kweil wat antama bie kesoa i sinwalo obianiba Naka ele naka yemin nakabo, aantem daako mo

kaaim blim otane memalo kukub klamin gode make baanea E kaaneko gene kesoa inabe antamabiebo gesib otane <sup>5</sup> Fole kweilone halele genea dabianea akil tem wat una deibanea klayam bia <sup>6</sup> betano yo seli bianiba fumbianiba Situbanea kaanamabebo ge fumbiba e inamin namino mo omubaim blim kesoa i imin funaniba E godobo ge funasiobe. <sup>7</sup> Betano yo komoke niniino Fabliase ni dletnea tanoba e am tam aalaboba e kla kima bia amo asumatna blimanso dimo <sup>8</sup> Fabliase aye kweimo abua alo bela biam bia Fole atemnea kweile gabamon ut afunea beten kebanea ayam ane kesoa <sup>9</sup> nakaia unangai ginin gami maki wenteniba tlebiba klaye bisebe.

### *Fole monea Lom bib onsebe.*

<sup>10-11</sup> Siib make smik mako asu klaniba god dim omine Suse meme naka ten itabo geniba siib ele mukung mete dlasa geibbue Aleksandlia bib danea tetemea glole tleme kesoa denea Molta ye binabebua ni inaboba alimo asumatna blimano kesoa Deibe unomo genoba tanoba siib ele tem tam unom genaboba Fole ginin gami klayebei inamin namin homono oleb teniba ni oyib ole deibenoba <sup>12</sup> monoba Sailakyus bib ye bioba amo asumatna bli-man ole <sup>13</sup> monoba Lisiam bib ye sobnoma bomanoa glole melen milim Saut da tenea fube dletnea beboba kwinoa siib tem wat aalabioba glole fuba obeb beba bomanoa monoba Byutiolai bib ye unanoba siibe ye deibanoba <sup>14</sup> bibo yo seli nakaia unangai maki Yesuse bainobo gabibi ni baabeniba Ibo ni baka binibte gesiba baka bioba amo sebena bliman ole deibenoba monoba Lom bibo kikib ye beboba <sup>15</sup> Lom bib seli maki Yesuse bainobo gabibi Folwali tebiobo gesiba wenteniba teniba maki Abiase imen wemin baan dimo waiseiba eka mak ile Stuamo Asumatnao baan dimo waisena bliha Fole monea yatemnea e Gode heitdabanea bobol ayam funane ole <sup>16</sup> ni monoba Lom bib ye temoba awa genalin nakai Fole klabutamo mo dabaib tam unim blim besa deibaniba baabaniba Am afet tam biebt ge baabaiba awa genalin nakae make kima bia <sup>17</sup> amo asumatnao bliman ole Fole baanea Yudai komokwali Lom bibo libi tline gesea dli te misiba baabenea Nekwal ibo ne Yuda nib inamin namino kukub misiamo mo nabueim blimobe. Eka ne nib faninwali kukub osa mo ombiaim blim na otane Yelusalem bib seli klabuto besa ge nemeb teniba Lom bib sel isu ele daib-bua <sup>18</sup> Lom teni ne inamin namin kukub misiamo nane biamobo geniba hembibo ne kukub misiamo mo naibiota natemin

blim kesoa i baaniba Naka ele kukub misi-amo mo naim blimobo, e mo kaanemene! Tileisanoba uneko geib otane <sup>19</sup> ninib atoi Yudai Yeye geniba i Lom teni wengo ombiabeib kesoa ne baabeniba Ibo nemetniba monoba Lom teni komok sum esu temobta eta ne kukubo klaneko ge baabeibiobe. Ne inaibu otane nib atoi mo kot kebenim-ibabe. <sup>20</sup> Yo weng ota baabenano genita nganabeita teta wentiobe. Isel nakaia unangai Gode Dofakamin Nakae waisa blibo nele e tlebiobo gabi o dafa ota ne kweile sai ye getneibbiobo ge baabesea <sup>21</sup> i baabaniba Yudia seli keb kukub nabebo wengo futan temo ni mo baabeibta wentim blimobe. Eka Yudai naka maki mo tenibta baabeniba Fole kukub misiamo nabebo geibta ni mo wentim blimobo, <sup>22</sup> naka mak unang maki bib mak bib mak olo blibi obianiba Yesuse bainobo galin kukubo misiamobo gabib otane kobo keb bobol temo fumbobo ni baabenale ge baabaniba <sup>23</sup> am mako omakabaniba yo dim ota Gode wengo alebenale ge baabaib-bua am olo tlamo tlebiba Gode nakaia unangai kimanamabe weng osa eka Yesuse bainobo galin kukubo Mosese buk temo dolanebu osa eka Gode weng omkeimalin nakai dolaibbu osa sbal manea aleyebea i Yesuse bainobo geine genea aleye bia bo-man tebo tlib biamo aleyebea bi kwin kwin bio otane <sup>24</sup> mak ita bainobo gabiba mak ile mo bainobo geim blimobe. <sup>25</sup> I bobol temo afet afet fumbianiba Fole deiba unom genamsiba Fole baabenea Gode Hobe Gode weng omkeimalin nakae niniino Aisaiae bain baabanea eka Aisaiae nib faninwali weng olo omkeimanea baabenea Gode Hobe baatnenea

<sup>26</sup> Kobo moneba Yuda nakaia unanga isu unaneba baabeneba Ibo wengo ye wentemomabib otane o mitmakamo mo tekein kenomabibbabe. Ibo kino tememomabib otane inamin namino mo watemomabibbabe. <sup>27</sup> Niminbabe, nakaia unanga eli bobol temo agoko mo yemin blimobe. Eka i klango kweimiki datananiba i kino bina bliobe. I kino inamin namino watemniba eka i klango wengo mo wenteniba eka i bobol temo weng olo mitmakamo funaniba nesu tlib mole ne klaubeia ayam anomabib otane i mo inaim blim kesoa ne mo klaubeita ayam anim blimobo ge baanea dolanebiobo ge baabesebe.

<sup>28</sup> Fole inanea imin baabenea Ibo tekein keine! Gode nibo hengmino temo biobo dotlanamino wengo Yudaba ita omfubenebio kesoa wentomabiobo ge

baabesea <sup>29</sup> [Yudai i sinwalo alang weng baasese biniba Fole deiba onsiobe.] <sup>30</sup> Bifol asuo blimanso dimo Fole am mako temo aala bianea am olokiem olokiem dimo emaye imeno webianea oleb te toubiam bia nakaia unangai teniba e am tam tlebiba Klayam nata tlibo? ge oye bianea bobol ayam bianea <sup>31</sup> Gode wengo sbal manea omkeima bianea Gode nakaia unangai kimanin kukub osa eka Sume Yesus Klaiste downan weng osa aleye monseo naka maki watanamino blimobe. E sbal manea omkaye monsebe.

## LOM

### Fole Lom teni bainobo galini futano dola omfubesebe. Tekein kemin wengobe.

Yesuse atdimmo kaanea imin hananea ulanea abilim unebua bifolo 27 ese mak blimanota Fole bib sumo niniino Kolin bib ye bianeta futan olo dolaneta unang mako niniino Fibio omuleta omeb monota Yesuse bainobo galin nakaia unangai Lom bib ye blibi omyobiobe. Lom ole Itali betano bib sumobe. Fole funanea Ne monia Lom bib unania Gode okoko okok kebiania Yesuse bainobo galin nakaia unangai daabenano gene kesota e Futan olo dola omfubeia i tekein keniba klanabibta motemano geneta dolanebiobe. Fole futan olo nakaia unangai alukum Yuda isa Yudaba isa Yesuse bainobo gabib ita dola omfubenebiobe.

Futan olo temo Fole enangge baanea Nakaia unangai alukum Yuda isa Yudaba isa hengmino tem wat bliobo, nakaia unangai Yesuse bainobo geniba Gode ele weng baaneme iwat nabib ita Gode baanea I ne kin dimo naka molot unang molotobo gabebe. Gode Hobe nakaia unanga eli hengmino temo blibo dotlana dleb tenea Yesuse esu ele danea afen smike doboniba amit nomabiobo genebiobe.

1:1-17 Mikiktemo wengobe.

1:18-3:20 Nakaia unangai hengmino temo blibo wengobe.

3:21-4:25 Gode nakaia unangai hengmino temo blibo dotlanamin wengobe.

5:1-8:39 Nakaia unangai Klaiste bainobo geniba mema naka unang ambibi wengobe.

9:1-11:36 Gode Isleli inamin namino nabenamabeo wengobe.

12:1-15:13 Yesuse bainobo galin nakaia unangai kukubo namino wengobe.

15:14-16:27 Mubiang wengobe.

<sup>1</sup> Ne Fol neta bainobo galin nakaia unangai Lom bibo blib ibo futan olo dola omfubenamabibe. Ne Yesus Klaiste okok naka netabe. Gode ne nemfakanea baatnenea Kobo ne okok kamasanin naka kemfai kesoa kobo ne dowan weng ayam nakaia unangai omkayemale ge baatnenebiobe.

<sup>2</sup> Sinanggwano Gode e weng omkeimalin nakai moton wengo baabeneba Ne ne miine dowan weng ayam omyamabibe. Weng olo bain wengobe. Ibo weng olo ometniba moniba nakaia unangai omkayemine genea i weng olo Gode buk temo dolaibbiobe. <sup>3</sup> Dowan weng ayam olo e miine nib Sume Yesus Klaiste weng sang ota

baabenebiobe. E tenea dabalim unango amun tem tlea dofanoa e makob dabalim nakai ulab anea komok sume nib fanine Debite molofeit ansebe. <sup>4</sup> Eka e kaane otane Gode titilo sbal kesoa o Yesuse imin dofanoa hananebuo nibo tekein kebuobe, e Gode miinobe. E bobol tem funino kining makob Gode bobol tem funino ulabobe. <sup>5</sup> Gode Yesus Klaiste baabanea Kobo Fole daabaneba bobol tem funin ayamo omaleba e ne okok dabasanin nakaneko genea Yesus Klaiste inanea ne daatnene kesoa ne e okok namasanin nakabe. E inanea ne nemfakanebio kesoa ne funania Ne e dowan wengo ometnia monia bib mak bib mako Yudabai alukum omkayebia i e wengo wenteniba kla wafuniba e niniino dobtouleba nine gabibe. <sup>6</sup> Gode Lom ten ibsa dlakane kesoa ibo e wengo wenteniba bainobo geniba Yesus Klaiste meletan aibbiobe.

<sup>7</sup> Lom teni Gode kla gobenea dlakanea e meletan aibbue ibo Fol neta ib futan olo dola omfubenamabibe. Nib Aye Gode esa eka Sume Yesus Klaist esa i dumo daaye bianiba bobol ayamo omkayemine!

#### *Fole Lom bib unamo gambisebe.*

<sup>8</sup> Mikiktemo ne weng olo enangge baabenamabibe. Ibo Yesus Klaiste bainobo gabibo o weng sango alukum balianoa bib mak bib mak seli wentebib kesoa ne alukum ib bobolo funania Yesus Klaiste niniin dimo God Sume gangobo geiobe. <sup>9</sup> Ne Gode bobolo amitie fumbiania e okoko amitie okok kebiania e miine dowan weng ayam nakaia unangai omkaye binabibe. Ne Gode amitie oha biania Kobo Lom teni kla kimanale ge oha bia Gode tekein kebebe, ne weng olo bainobe. <sup>10</sup> Eka ne sino ib bibo mo natlim blim bli kesoa ne Gode baabania God kobo ne Lom bib unamo gabi kesoa deibo ketneneba unano gabibe. E Ae gene mole ne ibsu natlamabibe. <sup>11</sup> Ne bobol temo funania Ne monia ibsu natlania Gode wengo ibo omkaye bia Gode Hobe bobol tem funin ayam omyeneba dosbal manea ib bainobo galino sbalma wafueine gabibe. <sup>12</sup> Ne weng olo enaminobe, ibo Gode bobolo kla fumbianiba ne daatneniba Gode wengo omkanebiba Gode ne bobol tem funin ayam omkanebisa nesak Gode bobolo kla fumbiania ibo daabania Gode wengo omkayebia kesoa e ibo bobol tem funin ayam omyamabebe. Nibo inanomabbio kesoa nibo bobol ayam fumbianoba nib bainobo galino sbalma wafunomo!

<sup>13</sup> Ne bobol temo fumbio Ne nekwai ibo ne weng olo baabenimio ibo kla funaine gabibe. Am mak bomanomo am mak bomanomo ne fumbiania Ne Lom bib unano

gabi otane inamin namino ne deibo waitnesoa deblibe. Ne bib mak bib mako monia Yudabai Yesus Klaiste wengo omkaye bia i wenteniba bainobo geniba Gode meme ambib kesoa ne ibsu osa natlania Gode wengo omkaye bia naka mak unang maki ib isak temo blib isa inaniba bib mak seli nabib inaine gabibe. <sup>14</sup> Gode ne daatnenea baatnenea Kobo nakaia unangai bib sumo blib isa eka sesa naka isa eka tekein kemini nakaia unanga isa eka mo tekein kebibba nakaia unanga isa i alukum Yesus Klaiste wengo omkayemale ge baatnenebio kesoa nesak yang kenia naka mak unang maki daabenamabibe. <sup>15</sup> E inangge baatnenebio kesoa ne funania Ne monia Lom ten isa Yesuse wengo omyano gabibe.

*Yesuse dowan weng ayamo titilsabe.*

<sup>16</sup> Ne Yesus Klaiste dowan wengo bobolo fumbiania Bainobo, Yesus Klaiste weng olo baanebio inanamabebo ge funania ne weng olo nakaia unangai omkayemano gabibe. Niminbabe, Gode titilo sum kesoa nakaia unangai hengmino hengabibi dosambe otane nakaia unangai wanita bainobo geib mole dosuanino deibenea i hengmino temo blibo dotlanamabebe. Yuda nakaia unanga ni Yesus Klaiste weng olo sin wentobta eka Yudaba nakaia unanga ibole mit wentibbiobe. <sup>17</sup> Gode Yesus Klaiste weng sango baanea Nakaia unangai Yesus Klaiste bainobo geib mole ne kin dimo naka molot unang molotobo genebuo memalo e kukub olo nibo aleyebebe. Nakaia unangai funaniba Ni Gode kin dimo naka molot unang molot anomo geib mole i Yesus Klaiste bainobo geine! Gode baanea I naka molot unang molotobo gabeo deib afeto blimobe. Gode buk tem wengo enangge baanoa

Nakaia unangai Gode wengo bainobo geib mole Gode baanea Nakaia unanga eli ne kin dimo naka molot unang molotobo genea i afen smike doboniba amit nomabiobo genobiobe.

*Nakaia unangai Gode kukubo deibueibi weng sangobe.*

<sup>18</sup> Nibo weng olo tekein kebuobe, Gode abilim ut bianea inamin namini kukub misiam nakaia unangai nabibo mo gobueim blim kenea e alo sum tliaubanoa e nakaia unangai kukub olo nabibo yang kenamabebo e bobol tem funin olo nibo aleyebebe. Nakaia unanga eli Gode kukubo deiboniba inamin namini kukub misiam ota nabianiba i Gode wengo deibo waiso bianiba Gode bain wengo mo tekein kebibbabe. <sup>19</sup> Gode e kukubo nakaia unangai alukum keim alebenebio kesoa wanita E kukubo tekein kenomo geib mole tekein kenomabiobe. <sup>20</sup> Niminbabe, sinanggwano

Gode abil esa dabal esa eka inamin namini osa klanebuo nakaia unangai wateniba kla tekein keniba Gode komok sum kintalin titilsabo geine! I Gode mo atemin blim otane i mo baanibta Ni mo tekein kebianobta Gode biebo gabobbabo genimibe!

<sup>21</sup> I e kukub olo tekein kebib otane i mo baanibta Gode ni sumobo, elekiem eleta ni Godobo genibta e niniino dobtouleb bianibta gangobo geim blimobe. I e inamin namini ayamo klanebuo bobolo kla mo funaim blim kesoa i bobol tem funino blim bianiba i bobol temo makob nakai millanobua deibo geteiso kwalo binabib inabiobe. <sup>22</sup> I baaniba Ni tekein kemino dot sumobo gabib otane i bobol tem funino blimobe. <sup>23</sup> I Gode amit nine niniino dobtouleb nino deibaniba nakai kintalinbai smik osa eka wani smik osa eka eili smik osa tili smik osa inabi smik osa nakai klaibbuo niniin ota omtouleb binabiobe.

<sup>24</sup> Inamib kesoa Gode deibenea i taman bobolo olota fumbianiba i sinwal i dimo kukub misiam nabesese binabiobe. <sup>25</sup> I Gode moton wengo omdibiha bianiba dim omin weng ota wente bianiba Gode inamin namini klanebue niniino mo dobtouleb nim blimobe. I inamin namini Gode klanebuo niniin ota omtouleb binabib otane Gode emaye inamin namini olo klanebio kesoa nibo amitie e niniin ota dobtouleb nomo! Bainobe.

<sup>26</sup> I ina bianiba Gode abuk walalib kesoa esak i deibenea ili bobol tem funin misiam ota wafu bianiba kukub misiam nabiba eka unang isa ili imakwali mo dleb haanim blim deibenebia unang maki i sinwal ili skil tlanhabiba <sup>27</sup> eka naka isa kukub ayamo i alelwali tena tlanhamino deiboniba i bobol temo funaniba naka maki tenanoba tlanhamomo geniba i bobol tem daako kalamo yemsoa moniba naka maki tenaniba tlanha bianiba kukub misiam wafu blib kesoa Gode yang kenea enino omkayebebe. Sino Gode baanea Ibo kukub misiam olo wafunib mole ne yang kenia enino omyamabibo genebiobe.

<sup>28</sup> I Gode wengo tekein kebib otane ina bianiba funaniba Ni Gode bobolo mo funomobbabo ge funaniba Gode deiba blib kesoa esak i deibenea ili bobol tem funin misiam ota wafu bianiba kukub misiam nabibo. <sup>29-31</sup> I bobol tem misiam olota fumbianiba inamin namini kukub misiam nabianiba naka maki afobeingo bobol waye bianoa eka naka mak unang maki misiam doka bianiba eka bobol tem misiam funyateme bianiba naka maki yebianiba eka dleb weng obianiba awa gembianiba naka maki dim oye biam bianiba i amitie kukub misiam ota nabianiba naka mak unang maki kukubo inabiobo

geniba ayok oye biam blib kesoa i Gode makaabe. I naka mak unang maki sbal weng oye bianiba i ili niniino omfufu bianiba i kukub misiamo kla gobonib kesoa i kukub misiamo sino nakaia unangai mo namin blimo imaye asitem funaniba nabianiba awok aaloki wengo omdibiye biam bianiba i kukub ayamo tekein kenamino blimobe. I baaniba Nibo inanomo genimib otane i motono mo nabibbabe. Eka i naka mak unang maki mo dohalilanibta daayebibbabe. <sup>32</sup> I tekein kebiobe, Gode hekmel wengo baanoa Nakaia unangai kukub misiam olo wafunib mole Gode i kukub misiam olo yang kenea i kaanimibo God esuo mo unomabibbabo genobu otane i amitie kukub misiam olo nabib kesoa kukub olo misiamobe. Eka naka mak unang mak isa kukub misiam olo naiba nakaia unanga eli yatemaibo baaniba Ayam naibobo gabiam blib kesoa i kukubo dot misiamobe.

## 2

*Gode nakaia unangai kukubo molot klanamabebe.*

<sup>1</sup> Nakaia unanga ibo obianiba Naka mak unang maki amitie kukub misiamo wafu bliobo, sinanomo Gode i kukub misiam olo yang kebenamabebo ge oyemib mole kukub olo misiamobe. Ibo naka mak unang maki inange oyemib mole ilib da ye unemomabiobe. Niminbabe, ibsa kukub misiam olo wafu binabiobe. <sup>2</sup> Nibo tekein kebuobe, Gode nakaia unangai kukub misiamo wafu blibi i kukub misiam olo yang kenamabebe. E inanamabeo e kukub olo ayamobe. <sup>3</sup> Ibo wentine! Ibo obianiba Naka mak unang maki kukub misiamo nabib kesoa Gode yang kenamabebo gabib otane ibsa kukub misiam olo nabioobe. Ibo funaniba Gode nib kukub misiamo nabobo mo yang kenamabebabo gabiba? Yeye Gode ib kukub misiamo nabib osa yang kenamabebe. <sup>4</sup> Ibo tekein kebiobe, Gode ib dohalim bianea daayebebe. E mo funaneta Ne i kukub misiamo nabibo hebmamsab yang kenano gabeba kesoa ibo mo funanibta Kukub olo besabo genimibe! Gode funanea I hengmino deiboniba bobol temo deskinaniba ne omnine ge fumbe kesoa e ib kukub misiamo hebmamsabo mo yang kenemebabe. E ibo waise biebe. <sup>5</sup> Ib bobol tem funino misiamobe. Ibo bobol tem misiamo amitie fumbib kesoa Gode ib alo tlihabua ibo dosuambebeo sum ano kesoa sinanomo e nakaia unangai kukubo nabibo yatenea klanea ayam yang kenang game dimo e ib alo sum tliaubanoa kukub misiamo sum yang kenamabebe. Gode nakaia unangai kukubo nabinimibo klanamabeo dimo e

wengo baanea nakaia unangai wentaibo baaniba E kukubo klamin okoko molotobo genomabiobe. <sup>6</sup> Gode inanea nakaia unangai kukubo nabinibo elekiem olok-kiem yang kenea kukub ayamo nabinimibi kukub ayam omyenea eka kukub misiamo nabinimibi kukub misiam omyenanamabebe. <sup>7</sup> Naka mak unang maki kukub ayamo sbalma wafuniba i bobol temo funaniba Gode e titilo ayal inamin einobu osa eka e afen smik esa ni doyenea amit bioba e ni baabenea Ibo naka ayam unang ayam kesoa ib niniino sumobo geneko geniba amitie kukub ayamo sbalma wafu binimibo Gode nakaia unanga eli dletnea moniba e bib unaniba amit nomabiobe. <sup>8</sup> Ina otane nakaia unangai wanita ili bobol tem funin misiam ota wafu bianiba kin alaak hembianiba i Gode wengo baanebio omdibiha bianiba kukub misiamo nabinimibo Gode nakaia unanga eli alo sum tliaubanoa i kukub misiamo nabinimibo molo yang kenea enin sumo omyamabebe. <sup>9</sup> Gode nakaia unangai kukubo nabibo klanang gameo dimo nakaia unangai kukub misiamo nabibi i kukub olo alukum yang kenea enino omya i bobolo ilum omfubenamabebe. Gode Yuda nakaia unangai kukub misiamo wafu blibi enin sumo sin omyenea eka Yudaba nakaia unangai kukub misiamo wafu blib isa enino omye nanamabebe. <sup>10</sup> Otane nakaia unangai kukub ayam wafu blib ile Gode e ayal esa e bobol tem ayam osa omyenea baanea Ibo naka ayam unang ayam kesoa ib niniino sumobo genamabebe. E Yuda nakaia unangai kukub ayamo wafu blibi kukub ayam olo sin omyenea eka Yudaba nakaia unangai kukub ayamo wafu blib isa kukub ayamo omye nanamabebe. <sup>11</sup> Niminbabe, Gode nakaia unangai kukubo nabinimibo klanang gameo e makob kimin klanamabe kesoa e Yuda isa Yudaba isa i kukubo makob yang kenamabebe.

<sup>12</sup> Nakaia unangai Yudabai Gode hekmel wengo Mosese dolanebuo mo tekein kebibbai hengmino henga binib biamo Gode i dlanea aseinin bib unom gaibo e mo baabeneta Ibo Mosese hekmel wengo mo wafu binibbioba kesoa ne ibo dlaiaseinin bib unomabiobo ge baabenemebabe. Niminbabe, i Mosese hekmel wengo mo tekein keim blim kesoa e baabenea Ibo henga binibbioba kesoa o mitmakam ota ne dlaiaseinin bib unomabiobo ge baabenamabebe. Eka Yuda nakaia unanga ile Mosese hekmel wengo tekein kebib otane deiboniba kukub misiamo nabib kesoa Gode baabenea Ibo ne hekmel wengo Mosese omalibuo tekein kebib otane ibo mo wafueim blim blib kesoa o mitmakam ota ne dlaiaseinin bib unomabiobo ge baabenea



ota wafu bianiba bobol tem funin misiamo mo deibueim blim keib mole i moton Yuda nakaba kesoa i Gode memebabe. Gode meme ile e niniino dobtoule blio. Ibo ibmalo Gode niniino mo dobtoule blio. Gode Hob eta ibo daayebeta ibo e niniino dobtoule blio.

### 3

*Kukub misiamo kukub ayamo omabbu namino blimobe.*

<sup>1</sup> Inamin kesoa naka mak unang maki ne weng olo baao baatneniba Fatnamin kukub ota Yuda ibo daabenota Gode tekein kebibo ib tekein kemino olo naka mak unang maki i tekein kemino gaiseibe? I aalo wake-toubibo kukub olo besa bleka? ge baatnenomabiobe. <sup>2</sup> Inamin namin homono Yuda ni daayebobe. Gode e wengo mikik-temo Yuda ni faninwali omyenea baabenea Ibo ne weng ele omyi olo kla kima bianiba naka mak unang maki omkayemine ge baabenebio kesoa <sup>3</sup> ibo fumbibo Yuda naka mak unang maki Gode wengo klao mo wafuniba naka mak unang maki mo aleyemin blim keib mole God esak e moton wengo baanebuo deibonea e nisa mo daabenamabebabo ge fumbiba bleka? <sup>4</sup> Ibo inamin bobolo mo funimibe! Nakaia unangai alukum dim weng ota obianiba Gode wengo deibueib menga Gode sma e moton wengo baanebio inanea nibo daabenamabebe. Debite henganea Gode kukubo nabane bobolo funanea weng olo Gode buk temo dolanea baanea

I God keb wengo baaneba wentib mole i tekein keniba Keb weng olo motonobo geiba kobo i kukubo klaneba i tekein keniba keb kukubo ayamobo geine genebiobe.

<sup>5</sup> Ina otane Yuda nakaia unangai wanita baaniba Nibo kukub misiamo nanomobo olo ayamobo, nibo kukub misiamo naboba Gode nibo daabenea e kukub ayamo nabeo keim anoko geniba namib mole ni fatnange baabenomabbione? Ni i baabenoba Gode nib kukub misiamo nabobo yang kene kesoa e kukubo misiamobo ge baabenoma? Ne weng olo baao, ne bobol tem funinbabe. Ne dabalim nakai bobol tem funin ota wafu bianita baaiobe. <sup>6</sup> Weng olo bainbabe. Gode naka ayamobe. Gode kukub ayamo mo naim blim kene mole nakaia unangai dabalim ele blihi kukubo nabibo mo klanamabebabe. <sup>7</sup> Nakaia unangai maki obianiba Ni Gode wengo omdibihabob otane Gode e moton wengo baanebio inanea daabene kesoa naka mak unang maki ateniba Elekiem eleta ayamobo gabianiba e niniino dobtoule nib mole e fatnaneta ni kukub misiamo yang kenea

ni enin kino omyamabene? ge obiobe. <sup>8</sup> Inangge obibi weng olo bain bua nisa baanoba Ni hengmino hengamomo! Ni inamoba naka mak unang maki nibo yatem tekein keniba I misiamobo Gode elekiem eleta ayamobo gabianiba Gode niniino dobtoule nine genob mole ni weng olo bain bleka dim eso? Yeye weng olo misiamobe. Nakaia unangai maki dim baaniba Weng olo Fol eta baanebio gabib kesoa sinanota Gode i kukub misiam olo yang kenea enino omyamabebe. E kukub olo ayamobe.

*Nakae elekieme Gode kin dimo molote blimobe.*

<sup>9</sup> Inamin kesoa Yuda naka unang nita ayam eka Yudaba naka unang ibo misiam bleka? Yeye ne sino baabeniba Yuda nakaia unanga nisa eka Yudaba naka unang ibsa nibo alukum hengmino ge dlanobiobo ge baabeibiobe. <sup>10</sup> Gode buk temo enangge baanoa

Nakae elekieme Gode kin dimo molote blimobe. <sup>11</sup> Eka nakaia unangai Gode kukubo kla tekein keniba wafu blih isa eka nakaia unangai Gode ni bobol temo bibeneko gabib isa blimobe. <sup>12</sup> Nakaia unangai alukum Gode bobolo funino deibaniba kukub misiam ota nabinibbiobe. Nakaia unangai kukub ayamo namini blimobe.

<sup>13</sup> I wengo makob nakai kaaniba dolbueibbua klambiba dikubeiba fetango kumbinabibinaniba i wengo obib osa misiamobe. I wengo dim sital obianiba i sitalo wengo nakaia unangai watwat dayebibo makob inab misiami nakai yantamaniba kaanabib inaye binabiobe. <sup>14</sup> I bobol tem misiam fumbianiba naka mak unang maki dosuam bianiba dolbianiba <sup>15</sup> hebmamsab moniba naka mak unang maki yenaiba kulila binabiobe. <sup>16</sup> I ina bianiba bib mak bib mako haabianiba naka mak unang maki kukub misiamo omkaye bianiba i bobolo ilum omkaye binabiobe. <sup>17</sup> I inabibo naka mak unang maki mo daayebibta ayamo mo blibbabe. <sup>18</sup> Eka i mo funanibta Gode sumobo genibta e tolo tosiambibbabo genobiobe.

<sup>19</sup> Inamin kesoa nibo tekein kebuobe, Gode e hekmele wengo Yuda nakaia unanga ni omkayebea ni kukub misiamo nabobo aleyebo kesoa Gode Yuda nisa eka Yudaba ibsa nib sinwalo baabenea Ibo ne hekmele wengo Mosese omalibuo tekein kebib otane mo wafu binibbiobabo ge baanea nakaia unangai elekiem olokiem



nib kukubo nabinob biamo klanang game dimo nibo wengo mo tila baanobta Sino ni mo tekein kenobta ni kukubo nabobo misiamobo geim blimobo ge baanomab-biobabe. <sup>20</sup> Niminbabe, nakaia unanga nibo Gode hekmel wengo alukumo mo wafu biobbabe. Nakaia unangai kukub ayamo wafu bliba sinanomo Gode yatemnea baabenea Ibo ne kin dimo naka molot unang molotobo ge baabenamini blimobe. Gode hekmel wengo okoko inaminobe. Nib kukub misiamo nabobo o aleyebobe.

*Nakaia unangai Yesus Klaiste bainobo geib mole i Gode kin dimo naka molot unang molotobe.*

<sup>21</sup> Gode memalo nakaia unangai e kin dimo molot anamino kukubo aleyebe kesoa nibo Mosese hekmel wengo wafunomobo Gode mo baabeneta Ne kin dimo ibo naka molot unang molotobo ge baabenemebabe. Ina otane Moses esa Gode weng omkeimalin naka isa i wengo dolaniba enange baaniba <sup>22</sup> Sinanomo Gode e miine dabanea daak tlea nakaia unangai e bainobo genimibo i naka molot unang molotobo ge baaniba dolaibbiobe. Yuda nisa eka Yudaba ibsa nibo naka molot unang molotba otane nibo Yesus Klaiste bainobo genomobo nibo Gode kin dimo nibo naka molot unang molotobe. Yuda nisa Yudaba ibsa nib bobol temo makobobe. Gode mo funaneta Naka eli Yuda kesoa ne kin dimo i naka ayamobo, eka naka elile Yudaba kesoa i naka molotbabo ge fumbababe. E fumbe ole I Yesus Klaiste bainobo genimib ota i naka molot unang molotobo ge fumbabe. <sup>23</sup> Dabalim nakaia unanga nibo alukum hengmino henganobbio kesoa nibo Gode hengmino blim ayam esuo mo biobbabe. <sup>24</sup> Nibo naka ayam unang ayamba otane Gode nibo dohalilanea daabenano genea Yesus Klaiste dabanea tenea atdimo kaanea e ilemo nakaia unanga nib hengmino alukum walubenebio kesoa nibo Yesuse bainobo genomobo Gode funanea Ne kin dimo i hengmino blimobo ge funanamabebe. Nibo inanomobo mo yang kenomobbabe. E besa daabenebiobe. <sup>25</sup> Eka Gode Yesus Klaiste dabanea daakenea atdimo kaanea Gode atenea funanea Yesuse ele ilem ota nakaia unangai hengmino walubenebio genea e nakaia unangai hengmino omlabenea i alo tlihamino deibonebiobe. Nakaia unangai Yesus Klaiste bainobo geib mole e i hengmino omlabenamabebe. Gode inanebio kesoa e kukub ayamo nabeo nakaia unangai aleyebebe. Sinanggwano nakaia unangai hengmino hengabib otane Gode hebmamsabo mo yang keim blimobe.

Niminbabe, e funanea Ne Yesus Klaiste dabaia daaknea atdimo kaanea i hengmino walubenebio geneta deibenebiobe. <sup>26</sup> Ina otane memalo Gode Yesuse dabanea daakenea atdimo kaanea nib hengmino walubenebio kukub olo makob Gode e kukub ayamo nibo alebenebiobe. Nakaia unangai Yesus Klaiste bainobo gabibi i hengmino Gode omlabenea baanea I ne kin dimo hengmino blimobo ge oye binabebe.

<sup>27</sup> Inamin kesoa Yuda ni nini niniino omfufu bianoba baanoba Ni Mosese hekmel wengo kla wafu biob kesoa nibo Gode kin dimo naka molot unang molotobo genomabbua bleka? Yeye ni Mosese hekmel wengo kla mo wafueim blim kesoa ni nini niniino mo omfufumobbabe. Ina otane nibo Yesuse bainobo genoba e nib hengmino omlabenebio kesoa Gode baanea I ne kin dimo naka molot unang molotobo gabebe. <sup>28</sup> Inamin kesoa nibo tekein kebuobe, Gode mo obianeta I Mosese hekmel wengo wafu blib kesoa i ne kin dimo hengmino blimobo gabebabe. Otane nibo Yesus Klaiste bainobo genomobo e baanea I ne kin dimo hengmino blimobo genamabebe.

<sup>29</sup> Gode Yudai ilikiem imibabe. E alukum Yuda nisa Yudaba ibsa nib Godobe. <sup>30</sup> Niminbabe, Gode elekiem eleta God motonobe. Yuda nakaia unanga ni Yesuse bainobo genomobo Gode baanea Ne kin dimo ibo hengmino blimobo genamabebe. Eka nakaia unangai Yudabai Yesuse bainobo genimib osa Gode baanea Ne kin dimo ibo hengmino blimobo genamabebe.

<sup>31</sup> Inanamabe kesoa Yesuse bainobo gabob nibo Mosese hekmel wengo deibonomabbua bleka? Yeye nibo Yesus Klaiste bainobo gabob kesoa nibo tekein kebuobe, Mosese hekmel wengo ayamobe.

## 4

*Gode baanea Eblahame naka molotobo gesebe.*

<sup>1</sup> Nibo Yuda ni fanine Eblahame weng sango funanom! Nibo baanoba Eblahame kukub ayam nabe ota Gode baanea E naka molotobo ge baabanebiobo genoma bleka? <sup>2</sup> Yeye Eblahame kukub ayam nabe ota Gode baabanea Kobo Ne kin dimo hengmino blimobo ge baabanemeo Eblahame ele niniino omfufu bianea baanea Ne naka ayamobo genamabe otane Gode Eblahame kukubo nabeo mo ateneta baabaneta Kobo ne kin dimo hengmino blimobo ge baabaim blimobe. <sup>3</sup> Gode buk temo baanoa Eblahame Gode wengo bainobo gabe ota Gode baabanea Kobo ne kin dimo naka molotobo ge baabanebiobo genobiobe. <sup>4</sup> Nakae

naka make okoko okok kehabea e naka ele okoko molo yang kenea monio olalameo nibo mo baanobta E monio misim olalebo genomabbibabe. Nibo baanoba E okoko mol ota yang keneta moni olo olalebo genomabbioe. <sup>5</sup> Olo nakai kukubobe. Eka Gode kukub ole afetobe. Nakaia unangai sbal maniba kukub ayamo wafu blibi funaniba Gode ni kukub ayamo yang kenea baabenea Ibo ne kin dimo naka molot unang molotobo geneko ge funanimib naka unangi Gode mo baabeneta I ne kin dimo naka molot unang molotobo gabebabe. E baanea Nakaia unanga ibo hengmin gam otane ne ib hengmino omtlabeia ibo ne wengo wenteniba bainobo genimibo ne baabeneta Ibo ne kin dimo naka molot unang molotobo ge baabenamabibo genebiobe. <sup>6</sup> Gode nakaia unangai kukub ayamo nabibi mo baabeneta Ibo ne kin dimo naka molot unang molotobo genebeba otane e i bainobo galino watemubeneba baanea Ibo ne kin dimo naka molot unang molotobo ge oyebebe. Sinanggwano komok sume Debite baanea Inanimib naka unangi seinomabiobo ge baanebiobe. E i weng sango Gode buk temo dolanea enangge baanea

<sup>7</sup> Nakaia unangai i hengmino hengabibo Gode omtlabenea imino funanamino dokobanoa deibeneme naka unangi seinine! <sup>8</sup> Eka Gode nakaia unangai baabenea Ib hengmino hengabibo ne omtlabei kesoa ne ib hengmino nabibo mo yang keneta enino omyamabibabo ge baabeneme naka unangi seinine genebiobe.

<sup>9</sup> Gode seinin weng olo Debite omalea dolanebuo inaminobe. Gode mo baaneta Ne Yudai hengmin olo omtlabeia seinine ge baaim blimobe. E weng olo Yuda nisa Yudaba ibsa nibo alukum baabenebiobe. Niminbabe, ni sino Gode buk tem wengo ibo baabenoba Eblahame Gode wengo bainobo gabe kesoa Gode baabanea Kobo ne kin dimo naka molotobo ge baabanebiobo ge baabenobbio kesoa ni weng olo imin inangge baa dolanobobe. <sup>10</sup> Eblahame aalo sin watlaneta Gode baabaneta Kobo ne kin dimo naka molotobo ge baabanebua bleka? Yeye e aalo mo watlaim blim bieta Gode sin baabanea Kobo ne kin dimo naka molotobo ge baabanebiobe. <sup>11</sup> E aalo mo watlaim blim bianea Gode wengo bainobo gene kesoa Gode baabanea Ne kin dimo kobo naka molotobo ge ohabeta omito i e aalo watlabaib kesoa nakaia unangai kukub olo wateniba tekein keniba Bainobo, Gode Eblahame baabanea E ne kin dimo naka molotobo genebo gesiobe. E sino inanebio kesoa nakai aalo mo watlaim

blim bianiba Gode bainobo gabibi Gode baabenea I ne kin dimo naka molotobo ge oyebebe. Inangge oyebe naka ile Eblahame molobselobe. <sup>12</sup> Eka aalo waketoubob naka nisa Eblahame molobselobe. I besa aalo olota waketoubib biamo i Eblahame molobselbabe. Eblahame sino e aalo mo watlaim blim bianea Gode wengo bainobo genea omito i e aalo watlabaibbio inaniba naka mak isa sin bainobo geiba i aalo wetlabenimib ita Eblahame molobselobe. Inamin kesoa ne sino wengo olo Yuda isa Yudaba ibsa baabeneta Gode wengo bainobo genomob nibo e nib hengmino omtlabenamabe kesoa nibo seinomo ge baabeibu weng olo motonobe.

*Gode nakaia unangai e bainobo gabibi moton wengo baabenebiobe.*

<sup>13</sup> Gode Eblahame moton wengo baabanea Keba keb molobsel isa ita nakaia unangai alukum dabalim olo blibi kimanomabiobo ge baabanebio Eblahame hekmel wengo mo wafu bieta Gode weng olo baabaim blimobe. E Gode wengo bainobo genea Gode baabanea Kobo ne kin dimo naka molotobo ge baabaneta e moton weng olo baabanebiobe. <sup>14</sup> Mosese hekmel wengo nakaia unangai daabenoa i Gode kin dimo naka molot unang molot aniba inamin namino alukum kimanomabib biamo Gode bainobo galin kukub osa eka e moton weng osa mitmakam blimanamabo otane Mosese hekmel wengo mo inanota nakaia unangai mo daabeim blim kesoa i Gode moton wengo wente bianiba i bainobo galino sbal maine! <sup>15</sup> Hekmel weng olo blim biamo nibo naka mak unang maki inamin namin kukub misiamo nanimibo nibo mo baanobta I hekmel wengo ombiaibobo genomabbibabe. Otane hekmel weng olo bianoa aleyebo kesoa nakai unangai wanita hekmel weng olo ombiaib mole Gode i alo tliaubanoa i kukub misiam olo nanimibo yang kenamabebe. <sup>16</sup> Eblahame Gode wengo bainobo gabe kesoa Gode Eblaham esa eka e molobsel isa moton wengo baabenebuo e i kukub ayamo wafu blibo mo yatemneta baabeim blimobe. E ele bobol tem ye daabenebiobe. E moton weng olo baabenebuo Yuda ni Mosese hekmel wengo wafu bianoba bainobo gabob ni ninikiemo mo baabeim blimobe. E Yudaba nakaia unanga ibo makob Eblahame nanea Gode wengo bainobo gabinebio inaniba Gode moton wengo bainobo gabib ibsa nibo alukum baabenebiobe. Gode inanebio kesoa Eblahame alukum bainobo galin nakaia unanga nib faninobe. <sup>17</sup> Gode buk temo Eblahame weng sango enangge baanoa

Gode baanea Ne kobo Yudaba naka afet isa i fanin kemfaiobo ge baabanebiobo genobiobe.

Eblahame Gode wengo bainobo gabinebio kesoa Gode wengo bainobo gabob naka unang nibo Gode kin dimo nibo Eblahame molobselobe. Gode kaaib biamo nakaia unangai imin dofufu bianeana eka inamin namino blim bu osa baabonea Inamin namin obo, tam tele ge owebea tam tlebohe. Eblahame Gode bainobo gebasebe.

<sup>18</sup> Sinanggwano Gode Eblahame oha bianeana Keb molobsel homoni walo unomabibi makob awitnin inanomabiobo ge ohabe kesoa Eblahame e wengo wente bianeana fumbianeana Ne memei blimobo gabe otane e Gode moton wengo mo deibueim blimobe. E kla bainobo gabianeana waiso binebua e molobsel homoni waloniba bib mak bib mako onon tlaib kesoa e i faninobe. <sup>19</sup> E tekein kebebe, e bifolo 100 blimanang genabua e hangkalebmin aneana titilo blimumabanabua eka e alelo Sela osa fioum binoa konokmon ananobio otane Eblahame mo funaneta Gode baatnenea Keb molobsel homoni walomabiobo ge onebe yo motono mo inanibta walomabibababo ge funaim blimobe. E Gode wengo bainobo genea sbalma wafu binebiobe. <sup>20-21</sup> Gode Eblahame baabaneana Kobo miine dofanamabeobo ge baabaneana Eblahame mo baaneta Ne hangkalebmin aia eka Selao konokmon ananobio kesoa ni mene mo dofanomabibababo ge funaim blimobe. E funanea Gode moton wengo baatnenea bainobo, e titilsa kesoa e wengo baaneana bain inanamabebo genea e Gode niniino dobtouleba bia Gode Eblahame bainobo galino omsbal mabasebe. <sup>22</sup> E Gode weng olo wentenea bainobo gabe kesoa Gode baabaneana Ne kin dimo kobo naka molotobo ge baabanebiobe.

<sup>23-24</sup> Gode Eblahame weng olo baabanebua nakai weng olo Gode buk temo dolaibbiobe. Nib Sume Yesuse kaaneana Gode imin dofanebiobe. Nibo e bainobo genomabbio kesoa e nib bobol osa fumbianeana Eblahame baabaneana Ne kin dimo kobo naka molotobo ge oha binebu olo makob e nibo baabaneana Ibo ne kin dimo naka molot unang molotobo genebiobe. <sup>25</sup> Sino nibo Gode hekmel wengo omdibihabob kesoa Gode Yesuse doboneana komokwali kweiban dimo dofanana i anaiba kaaneana nib hengmino walubeneana Gode e imin dofaaneana hananebio kesoa memalo nibo Gode kin dimo naka molot unang molotobe.

## 5

*Nibo Gode kin dimo naka molot unang molotobe.*

<sup>1</sup> Inamin kesoa nib Sume Yesuse Klaiste nib hengmino walubenebua nibo bainobo gabobo Gode kin dimo nibo hengmino blim kesoa memalo nibo Gode makaababe. E nib hengmino omtlabeneana bobol tem ayamo omyebiobe. <sup>2</sup> Yesuse Klaiste nibo daabeneana nibo bainobo genoba e dleb metnea God esu met danebio kesoa nibo e kin dimo naka molot unang molotobe. Sinanomo nibsa kining anoba makob e kining binabe inanomabbio kesoa nibo seimbianoana am olo tlamabo waiso biobobe. <sup>3</sup> Eka weng mak ole enino nib dimo tam tlemo osa seinwebuobe. Nibo tekein kebuobe, enino nib dimo tam tlamodo bal manoa nibo kukub ayamo sbalma wafunomabbio. <sup>4</sup> Eka enino inanoana nib dimo tam tlemo nibo anoba makob e sbalma wafunob mole Gode nibo yateneana baaneana Ib kukubo ayamobo genamabebe. E nibo inangge oyeme mole nibo kining anoba makob Gode ulab anomabbu waiso bianoana seinomabbio. <sup>5</sup> Nibo am olo waiso biobo am olo bain tlamabo kesoa nibo bobol ilumo mo omfubenamabobabe. Niminbabe, Gode e Hobe dabaneana tenea nib bobol temo bibe bianeana Gode nibo kla gobe bie kukubo nib bobol tem wato omabbu nayebebe.

<sup>6</sup> Sino nibo hengmino deibonamin titilo blim biohta Gode amo omakanebua tola Yesuse tenea atdimona kaaneana hengmin gam naka unang nibo daabenebiobe. <sup>7</sup> Naka maki kaaniba nakai hekmel wengo wafu bliiba daabenamin nakai blimobe. Kukub olo bumolokobe. Nakai elekiem elekiemi funaniba Ni kaanoba nakai naka maki daayemin kukubo wafu bliiba daabenomona geniba kaanomabib ese mak otane ne mo tekein kebibabe. <sup>8</sup> Ina otane hengmin gam naka unang nibo sino hengminsa biohta Gode Yesuse dabaneana daakeneana atdimona kaaneta nibo daabenebiobe. E inanebio kesoa kukub olo Gode nibo kla gobe bianeana aleyebebe. <sup>9</sup> Sino nibo hengminsa biohta Klaiste ilemoga sineana nib hengmino walubeneana Gode funaneana I ne kin dimo naka molot unang molotobo genebio kesoa memalo nibo kla tekein kebuobe, Klaiste titilsa kesoa e nibo Gode atlihamino temo dotlaneana Gode nib hengmino molo kukub misiamo mo yang kebenemebabe. <sup>10</sup> Sino nibo hengmino henga bianoana Gode makaa bioh otane Klaiste atdimona kaaneana Gode atlihamino blimanobio kesoa memalo nibo Gode nekwalobe. E inanebua nibo kla tekein kebuobe, e dletneana abilim nomabbio. Niminbabe, e

imin hananea afen bianea nibo daayebe kesoa okok olo dot sumobe. Inamin kesoa sinanomo nibo kining anoba makob Gode ulab anomabbuo waiso biobo, o bain tlamabo kesoa nibo bobol ilumo mo omfubenamabobabe.

<sup>11</sup> Nibo weng mak osa tekein kebuobe, Gode nib Sume Yesus Klaiste baabanea Kobo i daabeneba ne nekwai aine gene kesoa nib Sume Yesus Klaiste inanea nibo daabenea Gode nekwai anobbiobe. Sinanomo e dletnea abilim ut unomabbio kesoa memalo nibo Gode seinha bianoba e niniino dobtoulebiobobe.

*Adam esa Klaiste esa i weng sangobe.*

<sup>12</sup> Nibo tekein kebuobe, naka elekiem eta hengmino henganeta kaanebiobe. E inanebio kesoa nakaia unanga isa e nanebuo kibianiba i alukum kulila binabiobe. Niminbabe, nakaia unanga nibo alukum hengmino henganobbiobe. <sup>13</sup> Sinanggwano Mosese hekmel wengo mo tlim blim bio dimo nakaia unangai hengmino henga binibbiobe. I ina binibbu otane yo dimo Mosese hekmel wengo blim kesoa Gode mo baabeneta I ne hekmel wengo omdibine bianiba hengabiobo ge baabeim blimobe. <sup>14</sup> Ina otane kulilamin kukubo Adame bie dim ye kiloniba kulilam tlibbua biniba teniba Mosese binebio dim osa kulila binibbiobe. Nakaia unangai Gode wengo mo ombianibta makob Adame nanebio inaim blim otane isa henga bianiba kulila binabiobe. Adam ele nakaie abuk tlamabe klul ota kinebiobe. E hengmino hengane kesoa kulilamin kukubo kilonebiobe. Eka Abuk Tle Naka ele kukub ayamo nanea mema kukub ayamo kilonanebiobe.

<sup>15</sup> I inaibbu otane i kukubo makobbabe. Gode nibo daayebe kukub osa eka Adame Gode hekmel wengo ombiabanebio kukub osa o makobbabe. Afet afetobe. Naka elekieme Gode hekmel wengo ombiabanea hengmino henganebio kesoa nakaia unangai alukum kulila binabiobe. Ina binabib otane Gode nibo daabenea naka elekieme Yesus Klaiste dabanea daakenea atdimo kaanea naka homon unang homon nibo daabenebiobe. E nib kukub ayamo nabobo mo yateneta daabeim blimobe. E besa nibo daabenebio kesoa nibo mo yang kenomobbabe. <sup>16</sup> Eka Gode nakaia unangai daaye binabe osa eka naka elekieme hengmino henganea kaanamin kukubo tam tlobu osa makobbabe. Afet afetobe. Nakaie elekieme hengmino henganea omioto Gode naka homon unang homoni baabenea Ibo hengmino hengaib kesoa ibo kaanomabiobo ge baabenebu otane sinanoa e Yesuse dabanea daakenea

atdimo kaane kesoa Gode nakaia unangai hekmel weng homono omdibihabi daabenea i hengmino omtlabenea baabeneba Ne kin dimo ibo hengmino blimobo genebiobe. <sup>17</sup> Nibo tekein kebuobe naka elekiem eta hengmino hengane kesoa nakaia unanga nibo alukum kulila binabuobe. Otane naka elekieme Yesus Klaiste kukub ota Adame kukubo gaisonobiobe. Gode Yesuse dabanea daakenea atdimo kaanea nib hengmino walubene kesoa Gode nibo kla daabenea hengmino omtlabenea baabeneba Ibo ne kin dimo naka molot unang molotobo ge baabenebiobe. Inangge baabenebio naka unang nibo e afen smik ayame nibo dobyenea Yesus Klaiste nibo daabenebio kesoa nibo seimbianoa amit nomabbiobe.

<sup>18</sup> Inamin kesoa ne weng olo mitmakamo enaminobe. Naka elekieme Gode hekmel wengo ombiane kesoa Gode baanea Alukum nakaia unanga i kukubo misi-amobo, i kaanomabiobo genebiobe. Eka naka mak ele e kukubo klayam nane kesoa nakaia unangai e bainobo gabibi Gode baabenea I alukum naka molot unang molotobo ge oyebebe. I memalosa sinanomosa seimbianoa amit nomabiobe. <sup>19</sup> Niminbabe, naka elekieme Gode hekmel wengo ombiabane kesoa Gode naka homon unang homoni baabeneba Ibo hengmin gamobo ge baabenebiobe. Eka naka mak ele Gode wengo kla wenteha bine kesoa Gode naka homon unang homoni e bainobo genimiibi baabeneba Ibo ne kin dimo naka molot unang molotobo genamabebe.

<sup>20</sup> Gode funanea Nakaia unangai tekein keniba Ni hengmino hengabuobo geine ge funanea e hekmel weng Mosese omalea Mosese buk temo dolanebu hekmel weng olo nakaia unangai i hengmino hengabibo aleye binabo kesoa okok olo o okokobe. Sino nakaia unangai Mosese hekmel wengo mo wentim blim blibo dimo i hengmino henga bianiba hekmel wengo wenteniba tekein keib otane i hengmino imin sum henga binibbiobe. Ina otane Gode daayemin kukubo nakaia unangai omkayebe titilo hengmin kukubo titilo gaisonobiobe. <sup>21</sup> Adame inanebio kesoa nakaia unangai hengmino henganimibo i kaanomabiobe. Ina otane Gode nibo daabenea nib Sume Yesus Klaiste dabanea daakenea dabalim ele bianea kukub ayamo nanea daabenebu e bainobo gabob naka unang nibo Gode baabeneba Ibo ne kin dimo naka molot unang molotobo ge oyebe kesoa nibo memalosa sinanomosa seimbianoa amit nomabbiobe.

## 6

*Nibo Klaiste tena kaanobbio.*

<sup>1</sup> Ibo fumbubo Gode ni baabenea Ibo ne kin dimo naka molot unang molotobo gabeo fatnangge baanomabibe? Ibo baaniba Nibo hengmino amitie hengabobta Gode amitie daaye biane hengmino omketouyemeko genomabiba bleka? <sup>2</sup> Yeye bobol tem funin olo misiamobe. Nibo makob kaanabibi ulab anoba hengmin kukubo deibonobbio kesoa nibo hengmino imino mo hengamobe! <sup>3</sup> Ibo mo tekein kebabbayo? Nibo alukum aaye fuelanoba Yesuse tenanoba nib bobol tem funin osa Yesuse bobol tem funin osa makob anoba kukub olo makob nibo Yesus Klaiste tenanoba kaanobbio. <sup>4</sup> Sino Yesus Klaiste kaanea dobbueibua Gode titilsae imin dofaanea hananebuo kukub olo makob nib tena hananobbio. Nib bobol tem funin osa Yesuse bobol tem funin osa makob anob kesoa kukub olo makob nibo Yesuse temna kaanoba dolbueibua Gode imin dohaanea Yesuse temnanoba hana tlobbio kesoa memalo nib bobol temo mema kukubo bobolo funin ota fumbianoba kukub ayam ota wafunomo!

*Nibo Yesuse tenanoba amit nomabbio.*

<sup>5</sup> Nibo Yesuse tenanoba nib bobol tem funin osa e bobol tem funin osa makob anoba e kaanebuo kukub olo makob nib tena kaanobbio kesoa nibo kla tekein kebuobe, e kaanea imin hananebio inanoba nibsa imin hananoba e tena biomabbio. <sup>6</sup> Nibo tekein kebuobe, nibo Klaiste tenanoba nib bobol tem funin osa e bobol tem funin osa makob anob kesoa sino e atdimmo kaanebuo kukub olo makob nib temnanoba atdimmo kaanoba nib hengmin osa kaanobbio. Sino nibo hengmin kukub ota wafu binobbu otane memalo nibte Yesus ete nanoba atdimmo kaanoba nib hengmin kukub olo wandakibilanobbio kesoa memalo hengmin kukub olo titilo blimanobbio. Nibo inanobbio kesoa nibo makob okok naka make kaanea e kimanin nakai okoko imino okok kehamino deibanamabe inanoba nibsa kaanoba hengmino titilo wandakibilanobbio kesoa nibo hengmino imino mo hengamomabbio. <sup>7</sup> Nibo makob nakai kaaniba alang namaniba imin hengamino deibonabibi ulab kesoa nibo Klaiste tenanoba nib bobol tem funin osa e bobol tem funin osa makob anobbio. E kaanebuo kukub olo makob nib tena kaanobbio kesoa nib bobol temo hengmino titilo blimobe. <sup>8</sup> Nibo tekein kebuobe, nibo Klaiste kaanebio inanoba kaanobbio kesoa nibo afen smike amit nine dobonoba Klaiste tena biobobe. <sup>9</sup> Sino Klaiste

kaanea imin hana tlebio kesoa e imino mo kaanamabebabe. Kaanamin titilo blim kesoa e imino mo kaanamabebabe. E inanebio kesoa nibo tekein kebuobe, nibo afen smike amit nine dobonoba Klaiste tena biobobe. <sup>10</sup> Nakai unanga nibo hengmino henga binabob kesoa Yesuse nib hengmino walubenea atdimmo kaanebio. E deib makob kaanea Gode titilo imin dofaanoa hananebio kesoa afen bia Gode titilo daahabea e amit afen biebe.

<sup>11</sup> E inanebio kesoa ibo fumbianiba Nibo makob kaabibuei ulab anoba hengmino titilo blimubenoa Gode afen smike doyyebio kesoa nibo Yesus Klaiste tenanoba e bobol tem funin osa nib bobol tem funin osa makob anoba afen biobobo ge funine! <sup>12</sup> Ibo inaibbio kesoa bobol tem misiammo mo fumbianibta kukub misiam olo bobolo mo wayebota namibe! <sup>13</sup> Eka ibo ib skila kweila sitala kina bobol tema klangao kla kimaine! Ibo bobol tem misiammo mo fumbianibta ib skila kweila sitala kina klanga bobol temao mo omonibta kukub misiammo namibe! Ib skila kweila sitala kina klanga bobol temao omoniba Gode omaniba e kukub ayam ota namine! Ibo makob nakai kaaniba imin hananabib inaniba memalo ibo afen bliba Gode bobol tem funin ayam ibo omkayebe kesoa ibo inamin namin olo omoniba Gode omaniba e kukub ayam ota namine! <sup>14</sup> Gode hekmel wengo Mosese omalea esak ibo omyebu otane ibo o klao mo wafunim blimobe. Niminbabe, hekmel weng olo ibo klao mo daabenota ibo hengmino mo deibueim blim blib kesoa memalo Gode ibo daayebebe. Ibo inaniba hekmel wengo deibueiba Gode daayebe kesoa hengmino titil blimanoa ibo mo kimabiobabe.

*Nibo Gode okok naka unangobe.*

<sup>15</sup> Inamin kesoa nibo fatnanomabbio? Memalo Mosese hekmel wengo nibo mo kimabioba otane Gode nibo daabenea nib hengmino omlabenebio kesoa nibo fatnangge baanomabbio? Nibo hengmino hengabob otane mo tekamobe, Gode daayebebo genomabbua bleka? Yeye bobol tem funin olo misiamobe. <sup>16</sup> Ibo naka make okok ota okok kebianiba e wengo wente biam bianiba wafunimibo ibo e okok nakaiba eka ele ib sum ananamabebe. Ibo inaniba hengmin bobolo fumbianiba wafunib mole ibo hengmino okok nakaiba eka ole ib sum anabua kaanimibo God esuo mo unomabibbabe. Otane ibo Gode wengo wente bianiba wafunimibo e okok nakaiba eka ele ib Sum anea baabenea Ne kin dimo ibo naka molot unang molotobo genamabe kesoa ibo olo mo tekein kebabbayo? <sup>17</sup> Sino ibo ilib bobol tem

funin misiam ota wafu bianiba hengmino okok naka binibbu otane naka maki Yesus Klaiste wengo ibo omkayebiba ibo i weng olo wente bianiba bainobo gabianiba kla wafu bliobe. Ibo inabib kesoa nibo Gode gangobo genomo! <sup>18</sup> Gode ibo hengmino sai inamin gebenobua tilesenebio kesoa e ibo daabenea ibo e okok naka unang aniba kukub molot ota nabioebe.

<sup>19</sup> Ne dabalim okok nakai saa wengo baabeio niminbabe, ibo dabalim kukub ota kla tekein kebianiba eka Gode kukub ole kla mo tekein kebibba kesota ne weng olo baabeioebe. Sino ibo bobol tem misiam fumbianiba ib skila kweila sitala kina klanga bobol temao omoniba kukub misiam ota omwem bianiba nabinibbu otane memalo ibo ib skila kweila sitala kina klanga bobol temao omoniba Gode omaniba amitie Gode bobolo fumbianiba Gode kukub molot ota namine! <sup>20</sup> Sino ibo hengmino okok naka unang bianiba kukub misiamo wafu bliib dimo ibo kukubo moloto mo wafu bianibta ib bobol tem funino mo kimaim blimobe. <sup>21</sup> Ibo inamin namin kukub misiamo wafu binibbio kukub olo ibo daabenoa ayam binibbua bleka? Yeye ibo baaniba Nibo kukub olo wafunob mole nibo kla seinomabbio ge obinibbu otane ibo mo seinim blimobe. Memalo ibo kukub olo bobolo fumbianiba aal gembiobe. Kukub olo ibo dletnoa aseinin bib unomabiobe. <sup>22</sup> Ina otane Gode ibo hengmino sai inamin gebenobua tilesenebio kesoa memalo ibo e okok nakabe. E inanebio kesoa memalo ibo naka molot unang molot ambianiba kukub ayam ota nabianiba Gode tena bliobe. Sinanomosa inaniba Gode tenaniba amit nomabiobe. <sup>23</sup> Ne wengo baabeio mitmakamo enaminobe. Nakaia unangai hengmino hengabib mole Gode i hengmin kukubo molo yang kenea i kaanimibo God esuo mo nomabibbabe. Ina otane nakaia unanga ibo nib Sume Yesus Klaiste tenaniba ib bobol tem funino makob aib mole Gode afen smike amit nine misim dobyamabebe. E afen smik ele dobyameo ibo mo yang kenimibbabe, besa doboniba amit nomabiobe.

## 7

*Nibo mema bobol temo okok ota okok kemomo!*

<sup>1</sup> Ne nekwai ibo hekmel wengo tekein kebiobe, nakai afen bliib hekmel wengo kimabi otane i kaanimibo hekmel weng olo i mo kimanomobabe. <sup>2</sup> Ne wengo enaminoebe. Hekmel wengo baanoa Unango imake mo kaaim blim bie mole o e tena bianiba e kimaneko! Eka e kaanea o

imakwal afet dlang gamo ayamobo genobiobe. <sup>3</sup> Inamin kesoa unango imake sma bia deibanoa naka asit dobo mole hekmel wengo baanoa O imakwal bokalin kukubo wanamabobo, o kukub olo taman kukubobo genobiobe. Ina otane o imake kaanea imak afet dabamo o imakwal bokalin kukubo mo welanomobabe. Hekmel wengo mo baanota Kukub olo taman kukubobo geim blimobe.

<sup>4</sup> Inamin kesoa ne nekwai ibo hekmel wengo makob nakae e alelo kima bie inanoa ibo kima binobu otane memalo Yesus Klaiste tenaniba ib bobol tem funino makob am bliib kesoa e kaanebio kukub olo makob ib temna kaaniba hekmel wengo titilo ibo kimabuo blimanobiobe. Eka Yesuse imin hananebio kukub olosa makob ib temna hanaibbua e memalo makob ib mema imak dikin anea ibo kima biebe. E ina bie kesoa nibo alukum Gode kukub ayam wafunomo! <sup>5</sup> Niminbabe, sino nib bobol tem funin misiam ota nib damo kimabua hekmel wengo baabenoa Ibo inamin namin kukub misiamo mo namibe ge baabenobuo wentebob otane nibo deibonoba kukub misiam olo bobolo wayebua nib skila kweila sitala kina klanga bobol temao omonoba hengmin olo nabinnobiobe. Nibo ina binobbio kesoa God esak yang ke baanea Ibo kaanimibo nesuo mo tlomabibbabo genobiobe. <sup>6</sup> Ina otane memalo nibo Yesuse tena kaanobbio kesoa hekmel wengo nibo mo kima biobabe. Sino nibo funanoba Nibo Gode okoko okok kemomo genob kesoa nibo e hekmel wengo wafunin kukubo naaternobbu otane motono mo naim blimobe. Ina otane memalo Gode Hobe nibo dobyebio kesoa nibo e okok nakabe. Nibo mema kukub ota wafu bianoba e okoko okok kebuobe.

*Hengmino nibo watwat dabenobiobe.*

<sup>7</sup> Hekmel wengo nibo imino mo kima bioba kesoa nibo fatnangge baanomabione? Mosese hekmel wengo misiamobo genoma bleka? Yeye Mosese hekmel wengo kukub misiamo ne mo aletneim blim kenomole ne kukub misiamo mo tekein kenamabibabe. Hekmel wengo mo baanoa Ibo naka mak unang maki inamin namino bobolo mo waye bianoa eka naka maki alelwala eka unang maki imakwala i bobolo mo wayebota ayok doise hanomo ge funimibe geim blim kenobio mole ne mo tekein kenita Kukub olo hengminobo genimibabe. Mosese hekmel wengo omaye baanoa Kukub olo hengminobo genobiobe. <sup>8</sup> Mosese hekmel wengo baanoa Ibo naka maki inamin namino bobolo mo wayemone genobuo ne bain inania inamin namino bobolo wanebua Ne yo inanitabo,

inanitabo gabiania fumbinibiobe. Hekmel wengo blim biamo nibo inamin namin kukubo nabobo hengminbabe. Otane hekmel wengo omaye baanoa Inamin namin kukubo hengminobo genobio kesoa nibo nabianoba henga binabuobe. <sup>9</sup> Sino ne Mosese hekmel wengo mo tekein keim blim bli dimo Ne naka molotobo ge fumbinibiobe. Otane omito ne hekmel weng olo watem tekein kenia Ne hengmino hengabi kesoa sinanoa ne kaanimio God esuo mo unamabibabo ge funaibiobe.

<sup>10</sup> Inaibio kesoa ne tekein kebibe, sinangwano Gode funanea Ne hekmel wengo nakaia unangai omkaye bia kla wafu namib mole i afen nomabiobo ge funanea omyebu otane hekmel weng olo ne alet-tenoa tekein kenia Ne hengmin gam kesoa kaanimio God esuo mo unamabibabo geibiobe. <sup>11</sup> Mosese hekmel wengo baanoa Ibo naka maki inamin namino bobolo mo wayemone genobu otane ne bobol tem daako hengmino bitnebuo dim baatnesoa hekmel wengo ombiania ne kukub olo wafu biania bib misiam bib deib unemin eta binibiobe.

<sup>12</sup> Ne inaibio kesoa hekmel wengo Mosese buk temo dolanebuo bain wengobe. Gode weng olo Mosese omalebio kesoa o weng molot ayamobe. Ne kukub misiamo namin nakabe.

<sup>13</sup> Inamin kesoa hekmel weng ayam olota ne bib misiam bib deib unemine nemfanota binibua bleka? Yeye ne nene bobol tem funin misiam ota baatnenota Kobo Gode hekmel wengo mo wafunemebe ge baatnenoa nemabmanoa bib misiam bib deib unemine binibiobe. Ibo bobolo mo wayemone galin weng olo God eta Mosese omalea dolanebio kesoa nibo tekein kebuobe, Gode hengmino omsuam bianea klaa mo gobo biebase.

*Hengmino nib bobol temo bibebu ota dlabmanota nibo hengmino henga binabuobe.*

<sup>14</sup> Nibo tekein kebuobe, hekmel weng olo Gode Hob eta nibo omyebio kesoa e nib bobol tem funino daabenang gabe otane ne bobol tem funino hengmino bitnebio kesoa ne bobol temo Hobe bobol temo fumbao mo fumbibabe. Ne hengmino okok naka kesoa ne amitie henga binabibe. <sup>15</sup> Ne kukub misiamo mo namine gabi ota nabiania eka kukub ayamo namano gabi ole namino deibo binabibe. Ne fatnanita inamino nabinabine? Ne mo tekein kebibe, hekmel wengo ayamobe. Niminbabe, kukubo ne mo gobo blihao nabio ne bobol temo baatnenoa Yo misiamobo ge onebobe.

<sup>17</sup> Inangge onebo kesoa ne nemalo hengmin kukub olo mo nabibabe. Yeye hengmino ne bobol temo bitnebu ota nemabmanota hengmino hengabibe. <sup>18</sup> Ne tekein kebibe, ne bobol temo kukub ayamo mo bitnebiobabe. Ne nene bobol tem misiamo fumbi ota ne skila kweila sitala kina klanga bobol temao ge omano kesoa ne kukub misiam ota nabibe. Ne kukub ayamo namano gabi otane ne mo nabinabibabe. <sup>19</sup> Ne kukub ayamo namano gabio deibonia eka kukub misiamo ne mo namibabo gabi ota amitie nabinabibe. <sup>20</sup> Ne kukubo ne mo namibabo gabi ota nabibe. Ne inabio nemalo mo nabibabe. Hengmino ne bobol temo bitnebu ota nemasambota hengmino hengabibe.

<sup>21</sup> Ne ina binabi kesoa ne funania Ne kukub ayam ota namano gabi otane hengmino ne bobol temo bitnebio kesoa ne kukub misiam ota nabinabibe. <sup>22</sup> Niminbabe, ne Gode hekmel weng kla wafunin kukubo bobolo wanebobe. <sup>23</sup> Otane titil afeto ne bobol temo bitnebiobe. Titil olota Gode hekmel weng olo ne bobol temo bitnebuo tenanoa awa gembianoa hengmino titilo tata kenoa ne nemetnoa monia hengmino henga binabibe. <sup>24-25</sup> Ayoo! Ne watwat daibio nakabe. Hengmino ne bobol temo bitnebu ota ne skila kweila sitala kina klanga bobol temao daabonoo kukub misiamo nabinabi kesoa ne deib misiam eta monia bib misiam unamabibe. Inanamabi kesoa ne bobol temo funania Ne Gode hekmel weng ota wafunano gabi otane nene bobol tem funin misiamo ne skila kweila sitala kina klanga bobol temao daabono kesoa ne hengmin okok ota okok binabibe. Waneta ne daatneneta ne hengmino deibonita deib misiamenamamine? God eta ne daanebebe. E nib Sume Yesus Klaiste dabanea daak tenea nib hengmino temo dotlanebio kesoa ne Gode gangobo gabibe.

## 8

*Yesuse nib hengmino omtlabenea e Hobe nibo dobyebiobe.*

<sup>1</sup> Inamin kesoa memalo nakaia unanga nibo Yesus Klaiste bainobo genoba e tenanoba bobol tem funino makob am biob nibo Gode mo baabeneta Ib kukubo misiam kesoa ne o molo yang kenamabibo ge baabenamabebabe. <sup>2</sup> Niminbabe, Yesus Klaiste bainobo gabob nibo daabenea Gode Hobe dabanea daak tenea nibo kima bie kesoa nibo Yesus Klaiste em nanoba nib bobol tem funino makob anoba afen biobobe. Sino nibo hengmino makob sa gein kenoa kima bianoa dletnoa aseinin bib

unom genabob otane Gode Hobe hengmin olo tila omlabenea nibo hengmino temo deibonobbioe. <sup>3</sup> Nibo hengmin gam kesoa Mosese hekmel wengo klao mo wafu binabobbabe. Hekmel weng olo nibo mo daabeim blim otane Gode funanea Ne i hengmin kukub olo yang kenano genea e miine makob nakai hengminsai ulab dabanea daak tenea atdimmo kaanebiobe. Gode inanea nib kukub misiamo yang kenano gabeo omonea Yesuse dimanea eta nib alango dokonea atdimmo kaanea nibo denobbioe. <sup>4</sup> E inanebio kesoa memalo hengmino nib bobol temo bibebu nibo damo mo kimanota skila kweila sitala kina klanga bobol temao mo wafu biobabe. Memalo Gode Hobe nib bobol temo bibe bie kesoa e titilo nibo daabenea nibo e hekmel weng ayamo kla wafubuobe. <sup>5</sup> Nakaia unangai bobol tem funin misiamo wafu blibi bobol tem misiam olo gobo bianiba amitie inamomo gabinabiobe. Ina otane nakaia unangai Gode Hobe kukubo wafu blib ile Gode Hobe kukubo gobo bie ota amitie namomo gabinabiobe. <sup>6</sup> I bobol tem funin misiamo amitie wafu blib mole i makob kaanabibi ulab blib kesoa i kaanimibo God esuo mo unomabibbabe. Ina otane i Gode Hobe bobol temo fumbe ota isa funib mole i sma afen bliba Gode bobol tem ayamo omkayemabebe. <sup>7</sup> I bobol tem funin misiamo wafu bianiba i damo kukub misiamo nanomo galib mole i Gode makaabe. I funaniba Ni bobol tem funin misiam ota wafunomo gabib kesoa i Gode hekmel wengo mo wafu blibbabe. I titil blim kesoa i Gode hekmel wengo mo wafu blibbabe. <sup>8</sup> Inabib naka unang ile bobol tem funin misiam ota wafu blib kesoa Gode mo seinyebababe.

<sup>9</sup> Ina otane ibo bobol tem funin misiam olo mo wafu blibbabe. Niminbabe, Gode Hobe ib bobol temo bie kesoa ibo e bobol temo fumbe ota ibsa fumbiobe. Eka Klaiste Hobe ib bobol temo mo bieba mole ibo Klaist emibabe. <sup>10</sup> Ibo hengmino hengabib kesoa ib damo kaanomabib otane Klaiste ib bobol temo bibe bie kesoa Gode ib hengmino omlanea baabenea Ibo naka molot unang molotobo gabe kesoa ib afen smiki Gode temna bliobe. <sup>11</sup> Eka Gode Yesuse imin dofaanebue e Hobe ib bobol temo bibe biebe. E Yesuse imin dofaanebio kesoa ibo tekein kebiobe, ib damo kaanomabib otane Gode, e Hobe ib bobol temo bibe bie baabanea Kobo i daabenale genea e ibo daabenea ib damo imin dohaanea hananiba afenomabiobe.

*Gode Hob eta nibo daabeneta nibo e meme anobbioe.*

<sup>12</sup> Inamin kesoa ne nekwal ibo nibo bobol tem funin misiam olo mo wafu bianobta kukub misiamo mo namobe! Gode Hobe Ibo kukub ayam ota namine ge oye bianea daayebe kesoa nibo e bobol temo fumbe ota nibsa fumbianoba wafu nomo! <sup>13</sup> Niminbabe, nakaia unangai memalo bobol tem misiam fumbibi kaanimibo God esuo mo unomabibbabe. Ina otane nakaia unangai Hobe baabaniba Ni titil blim kesoa ni kukub misiam osa bobol tem funin misiam osa mo deibonomabbiobabo, kobo ni daabeneba keb titilo omyeba ni kukub misiam osa bobol tem funin misiam osa deibonomo genimibi Gode afen smike i dohya amit nomabiobe. <sup>14</sup> Nakaia unangai Gode Hobe wengo wentehabib ita Gode memebe. <sup>15</sup> Sino tosonian kukub ota ibo kima binobi otane memalo Gode Hobe ib bobol temo bibe bie kesoa tosonian kukubo ibo imino mo kima biobabe. Hobe nib bobol temo bie ele nibo daabenea Gode meme anoba E ayo ge ohabuobe. <sup>16</sup> Gode Hobe emaye nibo baabenea Ibo Gode memebo gabea nib bobol temo fumbianoba E weng olo bainobo ge fumbuobe. <sup>17</sup> Eka nibo e meme anob mole e inamin namin ayamo dlomabbioe. Inamin namin olo Yesus Klaiste dlamabe ota nibsa dlomabbioe. Nibo e kukub ayamo wafu biob o dafa ota naka maki teniba makob sino i Yesuse enino omalibbio inaniba nibsa enino omkayebiobe. Nibo inanoba Klaiste tenanoba enin kino watemob mole nibte ete nanoba abilim utu bianoba seinomabbioe.

*Sinanomo nibo naka molot unang molot anoba makob Klaiste ulab anomabbioe.*

<sup>18</sup> Ne tekein kebibe, nib enin kino wate-mebobo gwabobe. Ina otane sinano nibo naka molot unang molot anoba makob Klaiste ulab anomabbio kukub olo dot ayam kesoa nibo enin kino wate-mebobo bobolo mo funomobe! <sup>19</sup> Gode meme nibo naka molot unang molot anoba makob Klaiste ulab anomabbuo dimo inamin namino Gode klanebu dabal esa abil esa inamin namino dabalimo bu osa eka inamin namino abilim ut bu osa Yatemano genoa waise biobe. <sup>20-21</sup> Niminbabe, inamin namin olo Gode klanebu klaanamabo otane omalo mo funanota Ne klaanamabibo gabobabe. Gode emaye baanea Ne inamin namino klaibuo amito mo nomobabo klaanamabobo genebio kesoa inamin namin olo klaambobe. Ina otane Gode meme nibo naka molot unang molot anoba makob Klaiste ulab anomabbio dimo inamin namino Gode klanebu osa mo klaanamobabe. Inamin namin olo te



Gode meme nibo te nanoba ayam nomab-biobe. Inamin namino Gode klanebuo am olo waiso biobe.

<sup>22</sup> Nibo tekein kebuobe, inamin namin olo Gode klanebuo sinosa memalosa o makob unango memei dlanang genoa enin kino wateme bianoa memei dlanamino waise binabo inanoa osa enin kino wateme bianoa Gode meme nibo naka molot unang molot anoba makob Klaiste ulab anomobo yatenite genoa waise biobe. <sup>23</sup> Inamin namino Gode klanebuo olobbabe. E meme nibsa enin kino watemebuobe. Hengmino nib dam osa sa gein kebua enin kino watemebob otane sinanomo Gode tileisenea enin olo blimubenoa e nib damo mema omya e meme anoba Klaiste ulab anomab-biobe. E Hobe sin dobyebio kesoa nibo tekein kebuobe, e weng olo baanebuo bain ele baanebio iwat nanamabe kesoa nibo am olo hebmamsab tloko ge fumbianoba waiso biobobe. <sup>24</sup> Niminbabe, Gode nibo hengmino temo biobo dotlanebio dimo e baabenea Sinanomo ne imin tlia ibo Klaiste ulab anomabiobo genebio kesoa nibo am olo waiso biobobe. Ina otane inamin namin olo nibo waiso biobo tloa watemaobo imino mo waiso nomabbiob-abe. Niminbabe, nakae inamin namino waiso bianea watemameo e imino mo waiso namabeba inaminobe. <sup>25</sup> Ina otane Gode inamin namin olo mo naneta nibo mo watemin blim kesoa nibo obianoba E bain inanamabebo genoba sbalma bianoba waiso biobobe.

<sup>26</sup> Eka nibo titil blim kesoa Gode Hob eta daayebebe. Nibo Gode nganaba nomabbu otane nibo Gode bobol tem funino klao mo tekein kebobba kesoa nibo fatnanobta Gode inamin namin wengo nganaba nomabbione? Nibo weng blim kesoa deiba biob otane Hob eta nibo daabe-nea nib alango dokonea Gode nganhabe-be. <sup>27</sup> Aye nakaia unangai bobol temo kla watemeye bianea eka e Hobe bobol tem funin osa tekein kebebe. Gode Hobe God ele bobol tem funin ota wafu bianea oha bianea Kobo nib bainobo galin nakaia unangai daabenale ge ohabebe.

<sup>28</sup> Eka Gode ele bobol tem funin ye nibo dlakanebua nibo e kla goba biobobe. Inanebio kesoa nibo tekein kebuobe, inamin namino ayam osa misiam osa alukum nib dimo tam tlebo olo Gode nibo baabenea Ne kukub olo ibo omkaye biania dosbal sambu kesoa ibo sbal manomabiobo genebiobe. <sup>29</sup> Niminbabe, Gode sinanggwanoo dabal esa inamin namin osa mo klaim blim biane nakaia unangai dlakanea baanea Ne nakaia unanga eli kla gobe bli kesoa i naka molot unang molot aniba makob ne miine

ulab aniba e ningwal an e nengwal an naniba homon aiba e nakaia unanga eli hek sum anamabebo genebiobe. <sup>30</sup> Eka sinanggwanoo e nakaia unangai dlakanea baanea I ne miine ulab aine genebuei memalo nganabenea tibbiobe. Nakaia unanga ele nganabenea tibbu eli e oye biane Ibo ne kin dimo hengmino blimobo ge oyebebe. E nakaia unangai oye biane Ne dimo ib hengmino blimobo ge oyebe eli afen smik ayam eta dobyebiobe. Inanebio kesoa nibo tekein kebuobe, nibo Yesuse ulab anomabbiobe.

*Gode nibo gobenino mo deibenemebabe.*

<sup>31</sup> Gode inanea nibo daaye biane gobe bie kesoa e inamin namino nabenebio olo nibo fatnangge baanomabbione? Gode nibo daabene kesoa waneta kukub misiamo nibo omyeneta gaisenamabene? Inamin nakai blimobe. <sup>32</sup> Gode e miine dobyebuo e mo funaneta I ne miine mo anaiba kaanemene ge funaim blimobe. E e miine dobonea komokwali kweiban dimo dofanea anaiba kaanea nibo alukum daabenebiobe. E inanebuo nibo tekein kebuobe, e inamin namino mak osa nibo daaye bianoa nib bainobo galino dosbal sambo kesoa sinanoa nibo naka molot unang molot anomabbiobe. Nibo inanomabbuo e inamin namin ayamo dokayebe otane nibo mo yang kenomobbabe. E besa misim dokayebebe.

<sup>33</sup> Gode dlakanebio naka unang nibo waneta baabeneta Ibo hengmin gamobo ge baabenamabene? Inangege baanamin nakai blimobe. Gode emaye nibo oye biane Ibo ne kin dimo hengmino blimobo ge oyebebe. <sup>34</sup> Waneta Gode nakaia unanga nibo baabeneta Ibo kukub misiam nabib kesoa ne ib kukub olo yang keia enin kino watemomabiobo ge baabenamabene? Inangege baabenamin nakai blimobe. Yesu Klaiste kaanea imin hananebue nib komok anea Gode kweile kweitale kikib ye toumbiane Gode ohabiane Ne i hengmino walubeibio kesoa i ne kin dimo naka molot unang molotobo ge ohabebe.

<sup>35</sup> Fatnamin kukub ota Klaiste nibo kla gobe bio temo biobo dotlanamabone? Inamin namin kukub misiamo nib dimo tam tlebo osa eka nibo enin kino watemaob osa eka nakai nibo kukub misiam omyaib osa eka nibo imen teb nomob osa eka nibo youm blim nomob osa eka inamin namin kukub misiamo tenoa nib dimo unamo osa eka wasi nakai teniba nibo yenanom gaib osa kukub olo inanoa nib dimo tam tlamoo nibo Klaiste gobe bio temo biobo dotlanamabua bleka? Yeye. Kukub olo nibo Klaiste kla gobe bio temo biobo dotlanamino blimobe.

<sup>36</sup> Inamin namin olo nib dimo tam tlamabo Gode buk temo baanoa

Ni keb meletan kesoa am obba ye bomanomo bomanomo yo dimo naka mak unang maki ni yebianiba funaniba Bainobo Galin nakaia unangai makob eil sibsib memei inanabob inanoba inanomo ge fumbiobo genobiobe.

<sup>37</sup> Kukub misiam olo nib dimo tam tleomo mole nibo funanoba Klaiste nibo gobene kesoa kaanea nib hengmino walubenobiobo ge funanomabbio kesoa kukub misiam olo nibo e gobanin kukubo mo gaisonomabbibababe. Yeye nibo e sma goba bioba nibo e gobanin kukubo sum anamabobe. <sup>38-39</sup> Ne kla tekein kebibe, inamin namino nibo Gode gobe bio temo biobo dotlanamino blimobe. Kaanomob osa afen biaob osa eka abisel isa hob misiam isa eka dabalim olo komokwal isa eka inamin namino memalo bu osa eka inamin namino sinanomo tam tlamabo osa eka inamin namino abilim ut bu osa eka inamin namino dabal tem daak bu osa eka inamin namin mako Gode klanebu osa inamin namin kukub olo nibo Gode gobe bio temo biobo dotlanamino blimobe. Nibo nib Sume Yesus Klaiste bainobo gabob kesoa e nibo amitie gobe biebe.

## 9

*Fole e nekwali Isleli bobolo funanea e bobolo ilum omfutubisobe.*

<sup>1</sup> Ne Klaist emi kesoa ne wengo bain baabenamabibe, ne dimo mo baabenimibabe. Ne bobol temo funania weng olo bainobo gabia eka Gode Hobe ne bobol temo bitne bie esa baanea Weng olo bainobo gabebe. <sup>2</sup> Ne nekwali Isleli Yesuse mo bainobo gabibba kesoa ne bobol temo dot ilum omfutnebiobe. <sup>3</sup> Isleli Yesuse mo bainobo gabibba otane ne funania I bainobo geine ge fumbi kesoa Yesuse ne baatnenea Kobo i alango dokoneba ne i kukub misiam nabibo yang kenia kobo kemaia aseinin bibo uneba i aseinin bibo onamino deine ge baatnene mole ne bobol ayam funamabi otane e mo inangge baatneim blimobe. <sup>4</sup> Gode Isleli dlakanebio kesoa i e memebe. Gode e titulo ayal inamin einobuo i alebenebiobe. Gode i moton wengo baabeneba Ne ibo daabeia ayam anomabiobo genea lotu kemin kukubo i alebeneba eka e hekmel weng osa moton weng osa omyenanea baabeneba Ne Dofakamin Nakae dabaia ibsu tlamabebo ge baabenebiobe. <sup>5</sup> I faninwali Eblaham esa Aisak esa Yekob esa itabe. Eka Gode Dofakamin Nakae dabalim ele binebue

i molofeitobe. Gode Dofakamin Nakae elekiem eleta Godobe. E nakaia unanga isa eka inamin namin osa i Sumobe. Nibo amitie e niniino dobtouleba nomo! Bainobe.

*Nakaia unanga eli God emi dlakanebiobe.*

<sup>6</sup> Ne nekwali ibo Isleli Yesuse mo bainobo gabibbao wengo ne baabeio ne mo baanita Gode wengo Islel ni fanine Eblahame baabanebio e memalo mo inanemebabo ge baabenimibabe. Eblahame molofeite Islele molobseli homon walibbu otane maki Gode mo bainobo geim blim kesoa i Islel motonbabe. Yesuse bainobo gabib ita Islele molobsel motonobe. <sup>7</sup> Eblahame molobseli alukum Gode meletanbabe. E molobseli atosin ita Gode meletanobe. Sinanggwano Gode Eblahame moton wengo baabaneba Keb miine Aisake meletani nemi anomabiobo genebio Hegao miine hek sume dofanoe Gode e bobolo mo funaim blimobe. Selao miine dofanoe Aisak esa eka e molobsel isa i bobol ota fumbinebiobe. <sup>8</sup> Ne weng olo mitmakamo enaminobe. Nibo mo baanobta Eblahame molobseli alukum Gode meletanobo genomobbabe. Gode Eblahame molobseli atosin ita moton wengo baabanebio kesoa moton wengo baabenebue ita e meletanobe. <sup>9</sup> Sinanggwano Gode Eblahame moton wengo enangge baabaneba Bifolo olokiem blimanota Selao mene naka ten dofanota ne imin tenita atemamabibo ge baabanebua Selao bain inanoa Aisake dofasobe. <sup>10</sup> Weng mak osa inaminobe. Lebeka esa inanoa amun temo memei asu dlabbanoa binobuo aalebe ni fanine Aisake elekiem etabe. <sup>11-12</sup> Eka i dabo i awoko mo dlanoa i kukub ayam osa kukub misiam osa mo naim blim bliba Gode Lebeka baabonea Afan eta komok anea kweitale kimanamabebo ge baabosebe. Gode ele bobol tem funaneta inanebiobe. E inanebio kesoa nibo tekein kebuobe, e nakaia unangai dlakanang gameo i kukub ayam mo yateneta dlakanemebabe. E ele bobol tem funin dlakanabe naka unang ita e meletanobe. <sup>13</sup> Olo makob Gode e buk temo baanea Afane Yekob esa e melel isa ita ne kla gobe bliibo, eka kweitale Iso esa e melel isa ne mo gobe bliibabo genebio <sup>14</sup> kesoa nibo fatnangge baanomabbione? Nibo baanoba Gode am mak dimo kukubo afet nanebua eka am mak dim osa kukub afet nabinabebo genoma bleka? Yeye e kukubo makob nabe olota amitie nabinabebe. <sup>15</sup> Sinanggwano e Mosese baabaneba Ne nene bobol tem funino funania Ne naka ele dohhallilania daabanano ge funai mole ne nene bobol tem funin olo wafu biania naka ele daabanamabibo ge

baabanebiobe. <sup>16</sup> E inangge baabanebio kesoa nibo tekein kebuobe, Gode nakaia unangai bobolo ayam fumbianiba kukub ayam nabibo mo wateneta dohalila daaye binabebabe. E emaye ele bobol tem funaneta naka mak unang maki dohalila daayebebe. <sup>17</sup> Weng mak olosa funaine! Gode buk temo baanoa Gode Isib teni komoke Feloe baabanea Ne kobo kemfakaia komok anebobe. Ne inamin namin kukub misiamo omkakemia nakaia unangai bib mak betan mako blibi ne titilo wateniba ne niniino nemtoubleb nomabiobo ge baabanebiobo genobiobe. Feloe Gode nakaia unangai kukub misiam omkayebe otane Gode titilo gaisanoa nakaia unangai wateniba i alukum Gode niniino dobtoubleb binibbiobe. <sup>18</sup> E inanebio kesoa nibo tekein kebuobe, Gode ele bobol tem funanea Nakaia unangai dohalila daabenang ge mole dohalila daabenamabebabe. Eka e Nakaia unanga eli ne wengo omdibinimine genemeo emaye i bobol tem funino neket gebenea i e wengo omdibihomomabiobe. Kukub olo Feloe kukubobe.

*Gode nakaia unangai maki dosuam biane eka mak ile dohalim biane daayebebe.*

<sup>19</sup> Ne funania Naka maki ib isak temo bianiba baatneniba Gode naka make ne wengo omdibinemeko genea naka ele bain inanea ombiabanemeo Gode mo baaneta E misiam nanebo genemebabe. Nimbabe, Gode emaye naka ele dabab manea Kobo inamale gabe kesoa e inabebo ge baatnenomabib ese makobo ge funaiobe. <sup>20</sup> Wentine! Dabalim naka ibo nimin kenibta Gode sbal weng baabanomabibe? Ibo kukub olo deibueine! Nakae dabal sosbeno klanebuo mo baabanota Kobo fatnanebta ne enanebta klanebione? ge baabanamabobabe. <sup>21</sup> Sosben klamin nakae dabale halonea sosbeno asu klanang ge mole e emaye ele bobol tem funanea Ne inanita klaneme geneta klanamabebabe. E sosbene make sbal ayam klanea eit kimin ofanea eka mak ele besa eil imen bumin klanane mole ele bobol temobe.

<sup>22</sup> Gode makob dabal sosben klamin nakae nabinabe inane mole ibo e mo dobsuanimibe! E nakaia unangai klanebio otane maki e wengoomdibihabib kesoa e dosuananea watwat daabenamabebabe. Ina otane Gode i dohalimbe kesoa e heb-mamsabo mo watwat dabenamabebabe. I makob eil imen bumin sosbene ulabobe. Sinanota e i watwat dabeneta naka mak unang maki e titil osa e atlihamin osa watemomabiobe. <sup>23</sup> Gode inanamabe kesoa e titilo ayal inamin einobuo naka mak unang maki alebenano genea e nibo dohalilanea

dlakanea alebene biobe. <sup>24</sup> E dlakanebio nibo Yuda nakaia unanga nisa eka Yudaba nakaia unanga ibsa nibtabe. Nibo makob sosben sbal ayame ulabobe. <sup>25</sup> Gode weng omkeimalin nakae niniino Hosea esa Gode buk temo Gode Yudabai dlakanamabei weng sango dolanea enangge baanea Gode baanea Nakaia unangai sino ne meletanbai ne dlakania baabeniba Ibo ne meletanobo ge baabeniba eka nakaia unangai sino ne mo gobe blibai ne dlakania baabeniba Ibo ne gobe bli naka unangobo ge baabenamabibo genebo gena biane

<sup>26</sup> eka weng mak osa imin dolanea baanea Sino bibam olo seli Gode baanea Ibo ne meletanbabo genebio memalo naka mak unang maki bib olo seli baabeniba Ibo God kintaline meletanobo ge baabenomabiobo ge baanea dolananebiobe.

<sup>27</sup> Eka Gode weng omkeimalin nakae Aisaiiae Isleli weng sango baanea

Isleli naka homon unang homoni waloniba makob ninin inanomabib otane Gode milim mak ye ita i hengmino temo blibo dotlanamabebabe. <sup>28</sup> Sume nakaia unangai alukum i kukubo nabibo klanang gameo e heb-mamsab tenea i kukub ayam nabib osa kukub misiamo nabib osa watenea i kukubo nabinimibo molo yang kenamabebobe genebiobe.

<sup>29</sup> Sinanggwano Aisaiiae Gode Isleli dohalilanamabei weng sango enangge baanea

Sume bib mak bib mak sel isa abisel isa i komoke nib faninwali Isleli alukum yalone mole nibo makob Sodom bib osa Gomola bib osa o nanao alukum watwat danao eka nakaia unangai bib olo blibi alukum blimaibbio inanomabbu otane e Islel nib faninwali alukumo mo yalim blimobo, atosini deibenebiota nibo biobobo genebiobe.

*Islel teni Yesuse mo bainobo geim blimobe.*

<sup>30</sup> Gode inanebio kesoa ne wengo mitmakamo inaminobe. Yudaba nakaia unangai mo funanibta Gode ni baabenea Ibo ne kin dimo naka molot unang molotobo ge baabeneko ge funaim blim otane i Yesuse bainobo gabib kesoa Gode i baabeneba Ibo ne kin dimo naka molot unang molotobo ge baabenebiobe. <sup>31</sup> Eka Islel nakaia unanga ile sbal maniba funaniba Nibo hekmel wengo kla wafunob mole Gode baabenea Ne kin dimo ibo naka molot

unang molotobo geneko geniba i okoko sbalma okok kebib otane i Gode hekmel wengo kla mo wafunim blim kesoa i Gode kin dimo naka molot unang molotbabe. <sup>32</sup> Niminbabe, i mo funanibta Gode ni titilo omyenea daabene kesoa nibo e hekmel wengo wafunomo genibta e mo bainobo geim blimobe. I funaniba Nibmaye okoko sbalma bianoba Gode hekmel wengo wafunomo gabioobe. I Yesuse mo bainobo gabibba kesoa i makob nakai blublu moniba tom ele dimo bangbanganiba dlo blela inanabo inaminobe. <sup>33</sup> Ibo tekein kebiobe, Gode buk temo saa weng mako Yesuse makob tomobo genoa enangge baanoa

Wentine! Ne tome Isleli bib sumo niniino Yelusalem bib ye ofaibua nakaia unangai tom ele dimo bangbanganiba dlo blela yenanamabobe. Eka nakaia unangai e bainobo gabib mole i bobol ilumo mo omfubenamabobabo genobiobe.

## 10

<sup>1</sup> Ne nekwai ibo wentine! Ne nemaye Islel teni bobolo fumbiania Gode nganha biania God kobo ne meletani Isleli hengmino temo dotlanale ge ohabibe. <sup>2</sup> Ne i kukubo yatemebi kesoa baanamabibe. I Gode okoko sbalma bianiba okok kebib otane i Gode bobol tem funino mo tekein kebibba kesoa i Gode okoko moloto mo okok kemin blimobe. <sup>3</sup> Niminbabe, i Gode kukubo nanea nakaia unangai baabenea Ibo naka molot unang molotobo ge oyebeo i mo tekein keim blimobe. I funaniba Nimaye okok ayamo okok kebianoba Gode kin dimo nibo naka molot unang molot anomo ge funaniba i okoko sbalma okok blib otane i e kin dimo mo molot aim blimobe. Sino Gode baanea Ibo ne bainobo geib mole ne kin dimo naka molot unang molot anomabiobo genebuo i ele weng baanebio iwato mo naim blimobe. I ili bobol tem funin ota nabinibbiobe. <sup>4</sup> Nakaia unangai funaniba Nibo hekmel weng olo kla wafunob mole Gode kin dimo nibo naka molot unang molotobo ge fuminibbu otane olo bainbabe, dimobe. Bobol tem funin olo Klaiste atdimmo kaane kesoa blimanobiobe. E inanebio kesoa nakaia unangai Yesuse bainobo geib mole Gode kin dimo i naka molot unang molot anomabiobe.

*Gode nakaia unangai hengmino temo blibi dotlanamabebe.*

<sup>5</sup> Nakaia unangai Gode hekmel wengo wafuniba Gode kin dimo naka molot unang molot anamin kukubo wengo Mosese Gode buk temo dolanea baanea

Nakaia unangai hekmel wengo alukum kla wafu blibi afen smike doboniba amit nomabiobo genebiobe.

<sup>6-7</sup> Ina otane nakaia unangai Klaiste bainobo gabibi Gode baabenea Ibo ne kin dimo naka molot unang molotobo gabebe. Inamin kesoa ibo sinanggwano Mosese wengo Gode buk temo dolanea baanea Waneta utneta abilim ut unamabene? Eka waneta daakneta ham gloutem daak unamabene? genebuo

o bobolo mo funimibe! Weng olo mitmakamo inaminobe. Nakai utniba Klaiste abilim ut bio debeb daak teniba dabalim ele tenamino blimobe. Niminbabe, Klaiste dabalim ele biebe. Eka nakai moniba ham gloutem unaniba Klaiste debeb ut tenamin osa blimobe. Niminbabe, Klaiste sino imin hananebiobe.

<sup>8</sup> Ina otane Mosese weng olo baanea Gode dowan wengo meb ibsu ye buo ib sital dim osa ib bobol tem osa ye bibebiobo genebiobe. Yesuse bainobo galin weng olo ni ibo omkayebuobe. <sup>9</sup> Ibo Yesuse niniino omkeimaniba baaniba Yesuse Sum kesoa e nakaia unanga nisa eka inamin namin osa alukum kima biebo ge baana bianiba eka ib bobol tem osa funaniba Bainobo, Yesuse kaane otane Gode imin dofaanea hananebio geib mole Gode ibo hengmino temo blibo dotlanamabebe. <sup>10</sup> Niminbabe, nib bobol tem bainobo gabobo Gode nibo baabenea Ibo ne kin dimo hengmino blimobo gabebe. Eka nibo nib bainobo galino omkeimabob mole Gode nibo hengmino temo biobo dotlanamabebe. <sup>11</sup> Gode buk tem wengo enangge baanoa

Nakaia unangai e bainobo genimibi e bain ele weng baanebio inanamabe kesoa i bobol ilumo mo omfubenomobabo genobiobe.

<sup>12</sup> Yuda nisa eka Yudaba ibsa nibo afet afetbabe, makobobe. Niminbabe, nib Sume elekiemobe. Nakaia unangai wanita e nganha bianiba Sum kobo ni daabenale gabibi e i wengo kla wentenea yang kebianea daayebebe. <sup>13</sup> Niminbabe, Gode buk temo baanoa

Nakaia unangai Sume nganha bianiba Kobo ni daabeneba dlobe gabibi e i alukum daabenea i hengmino temo blibo dotlanamabebo genobiobe.

<sup>14</sup> Nakaia unangai Yesuse mo bainobo geim blim keib mole i e mo nganhamomabibbabe. Eka i e wengo mo wentim blim keib mole e mo bainobo genomabibbabe. Eka naka mak unang maki e weng sango mo omkayemin

blim keib mole i e weng sango mo wentomabibbabe. <sup>15</sup> Eka Gode nakai Yesuse wengo omkeimamomabibi mo dlanea unim blim keib mole i mo monibta Yesuse wengo omkeimamomabibbabe. Gode buk temo enangge baanoa Nakai Gode down wengo omeb tlaibi kukub olo dot ayamobo genobiobe.

*Isleli Yesuse moton wengo mo bainobo geim blimobe.*

<sup>16</sup> Ina otane Yuda nakai mo alukumata Yesuse down weng olo bainobo geim blimobe, elekiem olokiemi ita wente binibiobe. Sinanggwano Aisaiae kukub olo funanea Gode buk temo dolanea baanea Sum kobo sino ni keb wengo nakaia unangai omkayebobo nakaia unangai elekiem olokiemi wenteniba bainobo geibbiobo genebiobe.

<sup>17</sup> Inamin kesoa nakaia unangai moniba Klaiste wengo omkeimamibo nakaia unangai maki wente bianiba bainobo galomabiobe. <sup>18</sup> Ina otane ne wengo baanamabi ole Yudai Klaiste down weng olo mo wente binibbioba bleka? Yeye i wente binibbu otane i mo bainobo geim blimobe. Gode buk temo weng mako enangge baanoa Gode weng omkeimalin nakai Gode wengo omkayebibo alukum bib mak bib mako onon tlanoa nakaia unangai alukum Gode wengo wentebib otane i mo bainobo geim blimobo genobiobe. <sup>19</sup> Eka ne imin baanamabibe, ibo mo funanibta Isleli mo tekein kenibta Ni Gode down wengo mo wentim blim kenomobo e omeisenea Yudaba ita omyamabebo geim blimobo genimibe! Yeye, i tekein kebinibbiobe. Sino Mosese Gode buk temo dolanea baanea

God neta nakaia unangai Yudabai kukub ayamo nabenamabi kesoa Yuda nakaia unanga ibo ne kukub ayamo Yudabai nabenimio yateniba bobol wayebua dolnomabiobe. Eka ne nakaia unangai tekein kemin blimi dlonia kukub ayamo omyamabi kesoa Yuda nakaia unanga ibo atliyebua i dolnomabiobo ge baanebo ge baanea dolanebiobe.

<sup>20</sup> Eka Gode weng omkeimalin nakae Aisaiae Gode wengo omkeimaneba dolanebuo e Yudai tolo mo tosiainim blimobe. E Yudabai Yesuse bainobo genomabibi weng sango dolanea baanea Gode enangge baanea

Nakaia unangai ne mo hembinibbiobai memalo ne bainobo gabiobe. Eka ne tenia nakaia unangai naka mak unang maki mo baabenibta Gode

kukubo fatnamine? geim blim isu ye tlania keim aia nateniba ne kukubo kla tekein keibobo ge baana bianea

<sup>21</sup> eka e Isleli weng sang osa baanea Ne amitie Isleli nganyebi otane i ne wengo omdibine bianiba weng misiam onebiobo ge baanebo ge baanea dolanebiobe.

## 11

*Isleli milim ita Gode dohalilanea daabenebiobe.*

<sup>1</sup> Inaibbio kesoa ne baania Gode meletani Isleli fotebenebiobo genana bleka? Yeye e mo fotebeim blimobe. Nesa Isleli nakabe. Ne Eblahame molofeit eka Bensamine mulub nabe. Ne Yudabe, Gode ne mo fotebeim blimobe. <sup>2</sup> Sinanggwano Gode dabale mo klaim blim bianea e meletani Yudai dlakanebuei e mo fotebeim blimobe. Ibo llaiae weng sango Gode buk temo dolanebuo tekein kebiobe. E Isleli kukub misiamo nabibo yatenea Gode baabanea

<sup>3</sup> Sum kobo i keb weng omkeimalin nakai yenaiba kulila bianiba eka keb heitdakemin biin osa dakake binabiobe. Eka ne nenekiem neta keb niniino kemtouleblia i ne nenanom genibakan haabliobo gesa

<sup>4</sup> Gode yang kenea baabanea Ne naka homoni 7,000 i sma yafu bli kesoa i ne wengo kla wafu bliobe. I god dim omine Bale niniino mo dobtouleblibbabo ge baabanebiobe.

<sup>5</sup> Memalosa inaniba Isleli nakaia unangai alukum Gode mo abuk walalim blimobe. Milimi Gode dlakanebuei e daayebe kesoa i e meletanobe. <sup>6</sup> Gode i mo yateneta funaneta I kukubo ayam nabib kesoa ne i daabenamabibo geneta dlakaim blimobe. E ele bobol tem funanea Nakaia unanga eli kukubo misiam nabib otane ne i daabenamabibo ge funanea i dlakanebiobe. Gode nakaia unangai kukubo ayam nabiba yatemnea funanea Ne daabenano gene mole e kukub olo daayemin kukubbabe, olo yang kemin kukubobe.

<sup>7</sup> E ina binabe kesoa nibo tekein kebuobe, Isleli Gode kin dimo naka molot unang molot anamin kukubo hembib otane i mo watemim blimobe. Ina otane Gode nakaia unangai dlakanebuei e kin dimo naka molot unang molotobe. Naka mak unang maki Gode mo dlakaim blimi Gode i klango datenebeneba e wengo mo wentim blimobe. <sup>8</sup> Weng olo makob Gode buk tem wengo baanoa

Gode funanea i kina bobol temao klao mo funaim blim keine gene kesoa i kino mo watemim blim eka i klango mo wentim blim nabe. Memalosa i makob min inamin ye bliobo genobiobe.

<sup>9</sup> Eka Isleli komok sume Debite baanea

God kobo nakaia unanga eli keb bobolo funino dokobenoa deibkeniba singka bianiba imen ayamo wembib kesoa imen olo makob imikobe, i yafunoa yananamabobe. Kobo yananeba i kukub misiamo yang kenale! <sup>10</sup> I makob nakai kino tum gebenoa inamin namino klao mo watemebibbai ulab aine! Eka i amitie inamin namin kukub misiamo i dimo tam tlemo omnakatouleb bianiba makob unangi afobeing abilo oleb bebianiba gimono taka taka onabib inamine genebiobe.

Nakaia unanga eli makob nakaia unangai Mosesek hemkel wengo wafu blib otane i Yesus Klaiste wengo mo wentaobbabo geniba omdibihabibi ulabobe. Gode kin dimo i mo molot aim blimobe.

*Gode Yudaba nakaia unangai hengmino temo blibo dotlanebiobe.*

<sup>11</sup> I inaibbio kesoa ne imin baabenamabibe, Gode Yuda nakaia unangai i daayemino halit deibenea watwat dabenebua bleka? Yeye i Yesuse wengo omdibihabib kesoa o mitmakam ota Gode i daabenamino deibenea Yudaba nakaia unanga ita daabenea i hengmino temo blibo dotlanebiobe. Gode funanea Yudai kukub misiam olo wafu blib kesoa ne deibenia Yudaba ita daabeia Yudai funaniba E Yudaba ita gobenea daabenea nibo daabenamino deibenebo, nibo Yesuse bainobo gesoba nibsa inanea daabeneko ge funaine geneta i daabenamino deibenebiobe. <sup>12</sup> Yudai Gode dobdibibib kesoa e i daabenamino deibenea Yudaba nakaia unanga ita daabenea kukub ayamo omkaye binebiobe. E inanebio kesoa Yudai imin teniba God esu ele tlaniba moton Gode meletan animibo dimo Gode bib mak bib mak seli kukubo dot ayamo omyamabebe.

<sup>13</sup> Yudaba ibo wentine! Gode ne nemfakanea baatnenea Kobo moneba Yudaba nakaia unanga isu unaneba ne wengo omkayemale ge baatnenebiobe. E inangge baatnenebio kesoa ne seimbiania okok olo sbalma biania okok kebiania <sup>14</sup> ne bobolo funania Ne meletani Yudai Gode Yudabai daabeneo ateniba funaniba E nisa inanea

daabeneko ge funaniba atosini Gode baabaniba Nisa daabeneba ni hengmino temo biobo dotlanale ge baabaine ge fumbibe. <sup>15</sup> Niminbabe, Gode Yudai fotebenebua dimo e Yudabai dlonea baabenea Ibo ne nekwalobo genebiobe. E inanebio kesoa e Yudai imin dlameo kukub olo makob e kulilalib biamoi imin dohaanea hananomabib inaminobe. <sup>16</sup> Eka nakai Yuda ni kukubo omeiseniba blete mikik-temo halo omfanimibo Gode omalib mole blete ye alukum God emiobe. Eka nakai ase kimkime haloniba Gode tabalib mole e tung osa alukum God emiobe. Inamin kesoa Yudai fanine Eblahame God emi kesoa e meletan isa alukum God emiobe.

<sup>17</sup> Ina otane Yuda nakaia unangai makob as make damib ye dolieiba damane e niniino olibe ulabobe. Eka Yudaba ibole makob sesa olibe ulabobe. Yudai maki Gode wengo omdibihabib kesoa Gode i fotebenea Yudaba nakaia unanga ita daabenea e meletan aibbuo kukub olo makob nakae olibe kweitlume tungo haketoufaneanea eka sesa olibe tunge halo teheb tenea kweitlume tungo hetlaneo dimo imin atomabanamabe inabenebiobe. E inanebio kesoa ibo olibe kweitlume kimkim ota unggamo ibo dokayebobe. Weng olo mitmakamo inaminobe. As ele kimkim ele makob Yudai faninwal itabe. Sinanggwano Gode Yudai baabenea Ne ibo daabenamabibo genebio e inanea ibsa daabenamabebe. <sup>18</sup> E inanamabe olo ibo mo baanibta Ni naka ayam unang ayam kesoa Yudai gaisenobbibo, Gode Yudai makob atunga kenea haketoufanebiobo genimibe! Ibo inangge baab mole kla funaine! Ibo kimkimo titilo mo omwilim blimobe. Kimkim ota ibo titilo omkayebobe. Yudai faninwali makob akimkim inamin kesoa ibo titilo omkayebobe. <sup>19</sup> Ne funania Ibo baaniba Gode Yuda nakaia unangai e wengo omdibihabibi fotebenea makob nakae as olibe kweitlume tungo haketoufanamabe inabenea Yudaba nita dlanea Yuda nakaia unangai fotebenei alango dokonobobo genomabib ese makobo ge funaine! <sup>20</sup> Weng olo bain otane ibo kla funaine! I Yesus Klaiste mo bainobo geim blim keib kesoa Gode i atunga kenea heketoufanebiobe. Eka ibole Yesus Klaiste bainobo gabib kesoa sma bliobe. Ibo mo funanibta Ni ayam bianobta Yudai gaisenobbibo ge funanimibe! Ibo Gode tolo tosiam bianiba e bobolo kla funaine! <sup>21</sup> Niminbabe, Gode Yuda nakaia unangai e wengo omdibihabibi mo dohalilaim blim kenea fotebenebiobe. Yudai makob as olib otane ibole makob sesa as kesoa ibsa e wengo mo wafueim blim keib

mole e ibsa dohalilanamino deibenea fotebenamabebe.

<sup>22</sup> E inanamabe kesoa nibo tekein kebuobe, e nakaia unangai maki dohalilanea daaye bianea eka mak ile i alo tlihabua dolbiebe. Nakaia unangai e wengo omdibiha bianiba kukub misiam ota wafu blib ile dosuambebe. Eka ibo e wengo kla wente bianiba e bobolo funimibo e daayemabebe. Eka ibo e wengo kla mo wente bianiba e bobolo mo funim blim keib mole e ibsa fotebenea makob nakae atungo haketofufanamabe inabenamabebe. <sup>23</sup> Eka Yuda nakaia unangai Yesus Klaiste imin bainobo geib mole Gode i imin dleb tenea atunga kenea imin atomanamabebe. Niminbabe, e titilsa kesoa atungo helo olanea gatanobio otane e imin tebelonea atomabonea damanamabobe. <sup>24</sup> Ibo tekein kebiobe, Yudaba nakaia unanga ibo makob sesa ase olibe tungobe. Gode ibo daabenea ibo e meletan aibbuo kukub olo makob nakae sesa olibe tungo welonea kweitlume tungo dimo atomanamabe inabenebio kesoa kukub olo bumolokobe. Otane Yuda nakaia unanga ile makob olibe kweitlume tungobe. Gode i daabenea i imin e meletan animibo olo makob nakae olib tungo imin tebelonea ele tungo ele skil atomabonamabe inamin kesoa kukub olo bumolokbabe.

*Gode Islel nakaia unangai daabenea i hengmino temo blibo dotlanamabebe.*

<sup>25-26</sup> Sino Gode wengo atosino ayok bu otane memalo Gode e weng olo ne aletnene kesoa ne funania Weng olo ne nekwil isa baabeia wenteniba i bobol temo fumbianiba Ni tekein kemino sumobo galin bobol temo funino deibueine ge funai kesoa ne weng ayok olo ibo baabenamabibe. Memalo Yudai milimi Yesus Klaiste wengo mo bainobo geim blim bliobe. Ina otane Gode Yudaba nakaia unangai maki e dlakanebuei alukum Yesus Klaiste bainobo genimib dim ota Yuda nakaia unangai alukum Yesuse bainobo geiba Gode i hengmino temo blibo dotlanamabebe. Gode buk temo enangge baanoa

Nakaia unangai i hengmino temo blibo dotlanamabe nakae Yudai bib sumo niniino Yelusalem bib da tlamabebe. E tenea Yekobe molobseli daabenamabe kesoa i Gode wengo imino mo omdibihomomabibbabe. <sup>27</sup> Ne i hengmino temo blibo dotlanamabio dimo sinanggwano ne moton wengo Yekobe baabaibuo bain inanamabobo genobiobe.

<sup>28</sup> Yuda nakaia unangai Yesus Klaiste wengo omdibiha bianiba Gode makaa dofa blib kesoa Yudaba nakaia unanga

ibta Yesuse wengo wenteniba God esu tlomabiobe. Ina otane Gode Yuda nakaia unangai faninwali dlakanea moton wengo baabenea Ne ibsa ib molobsel isa daabenamabibo ge baabenebio kesoa e Yuda nakaia unangai sma gobe biebe. <sup>29</sup> Niminbabe, sinanggwano Gode Yudai faninwali baabenea Ibo ne meletan kesoa ne ibo daabenamabibo genebio kesoa e weng olo mo tobmanomabobe. E moton inanamabebe. <sup>30</sup> Sino Yudaba ibo Gode wengo omdibiha binibbu otane memalo Yudai e wengo omdibihamib kesoa i deibenea Yudaba ibta dohalilanea daabenebe. <sup>31</sup> E inane kesoa Yuda nakaia unangai maki Yudaba nakaia unanga ibo Gode dohalilanea daabenebio kukubo wateniba funaniba Gode nisa daabeneko ge funaniba e wengo wentemib kesoa e isa dohalilanea daabenamabebe. <sup>32</sup> Sinanggwano Gode funanea Ne nakaia unangai alukum dohalilania daabenamabibo gene kesoa e hengmino deibonea nakaia unangai alukum ge dlabio bita sinanota e alukum dohalilaneta daabenebioe.

*Nibo Gode niniino dobtouleb nomo!*

<sup>33</sup> Gode titilsa kesoa e inamin namin afet osa o Sumobe. E bobol tem funin osa e tekein kemin osa dot sumobe. Waneta Gode inamin namino nanano gabeo Gode bobol tem funin olo tekein kenamabene? Eka nakae waneta Gode inamin namino nabeo e inaneta nabebe geneta o mitmakamo tekein kenamabene? Inamin nakai blimobe. <sup>34</sup> Gode buk temo baanoa Waneta Sume Gode bobol tem funino tekein kebene? Waneta Gode baabaneta Kobo okoko enanebta okok kemale geneta baabanamabene? <sup>35</sup> Inamin namino Gode emi kesoa nakae waneta inamin namino dloneta Gode dleta Gode naka ele yang kebanamabene? Inamin nakai blimobo genobiobe.

<sup>36</sup> Gode ele bobol tem funanea Ne inamin namino alukum klanano gene kesoa e inamin namino weng baanea tam te te tlanobiobe. Gode Sumobe. E inamin namino alukum kima bie kesoa o e niniino dobtouleb biobe. Nibsa e niniino amitie dobtouleb nomo! Bainobe.

## 12

*Nibo nib dam osa nib bobol tem funin osa Gode omalomo!*

<sup>1</sup> Inamin kesoa ne nekwil ibo wentine! Gode nibo dohalilanea daabenebio kesoa ne ibo sbal weng baabenamabibe. Ib dam osa ib bobol tem funin osa Gode omaniba makob nakaia unangai eil sibsibi yananiba

funiba Gode heitdabanabib inaniba ib dam osa bobol tem funin osa Gode omaniba Gode kukub ayam ota namine! Ibo in-aib mole Gode niniino moton dobtouleb nomabiobe. Gode inamin kukubo kla gobo biebe. <sup>2</sup> Eka ibo dabalim nakaia unangai kukubo amito mo wafu nimibe! Gode bobol tem funino mema osa mema kukub osa ibo omkayebe kesoa ibo amitie e bobol tem funin ota wafu bianiba e kukub ota namine! Ibo kukub olo inamib mole Gode kukubo ibo namine gabeo tekein kenomabiobe. Eka okok ayamo nakaia unangai daayemin okok osa eka okok mako okok kemibo Gode seinyemabe osa eka okoko ibo daabenoa naka molot unang molot anomabib osa tekein kenomabiobe.

*Gode titilo nibo omyebu ota omonobta okok kemomo!*

<sup>3</sup> Gode ne daatnenea e okok olo omnebio kesoa elekiem olokiem ibo ne weng olo baabenamabibe. Ibo untako mo ngambianibta Ni naka sumobo ge funimibe! Ib bobol temo fumbianiba Ne Yesuse bainobo gabi ota Gode titilo ne omnebu ota omonita okok kebibo, ne nene titilo mo okok kebibabo ge funine! <sup>4</sup> Nibo tekein kebuobe, nib damo olokiem otane o atosino homonobe. O okoko makobbabe, afet afetobe. <sup>5</sup> Inaminobe, Klaiste bainobo galin nakaia unanga nibo homon otane nibo Yesuse tenanoba nib bobol tem funino makob am biob kesoa nib makob e dam olokiemobe. Eka bainobo galin nakaia unanga nibo nib sinwalo daabesese biobo nib daayemin kukubo afet afet kesoa kukub olo makob nib damo atosino afet afeto ulabobe. <sup>6</sup> Gode elekiem olokiem nibo daayebao afet afet kesoa nib okoko titil osa afet afet omkayebebe. Nibo okoko Gode omyebio yota okok kemomo! Nakaia unangai wanita Gode Hobe wengo omye mole i kla motomaniba Weng olo Gode buk tem osa inang genobiobe genibta naka mak unang mak isa omyine! Eka temiba Gode buk temo inamin wengo blim bio mole weng olo naka mak unang maki mo omyaibe! <sup>7</sup> Eka Gode naka make nakaia unangai daayemin okoko omale mole e nakaia unangai kla daayemeko! Eka Gode naka make aleyemin okok omale mole e aleyemin okoko kla okok kemeko! <sup>8</sup> Eka Gode e okoko naka make omanea Kobo naka mak unang maki bobol tem funin ayam omyemabe gene mole e okok olo kla okok kemeko! Eka Gode naka make okoko omanea Kobo inamin namino dloneba nakaia unangai inamin namino blimi dokayemale gene mole e okok olo kla okok kebianea nakaia unangai inamin namino homon dokayemeko! Eka Gode

naka make okoko omanea Kobo naka mak unang maki kimanale gene mole e okok olo olota okok kemeko! Eka Gode naka make baabanea Keb nekwali dohalim bianeba daayemale ge baabane mole e seimbiana daayemeko!

*Ibo ib nekwali bain gobe nine!*

<sup>9</sup> Ibo Ni bobol temo ni nekwali omyenoba gobenomo geib mole bain omyeniba gob-eine! Ibo mo omyobobo genibta dim ba-nimibe! Ibo kukub misiamo ib nekwali omkayemin kukubo deibueine, o mo gobo nimibe! Ibo kukub olo deiboniba kukub ayam osa eka daayemin kukub osa ota kla wafueine! <sup>10</sup> Ibo ib bobol temo bain-obo galin naka mak unang maki omyeniba gobenomabibo makob nakae e bobol temo e dab tleinwali omyenea gobe bie in-aine! Ibo naka mak unang maki mo baabenibta Ne naka ayamobo, ne okok osa ayamobo galaibe! Ibo hebmamsab naka mak unang maki niniin ota omfasese nine! <sup>11</sup> Ibo Gode okoko okok kebibo tengo mo yemone! Gode Hobe ibo bekebe bianea daayebe kesoa ibte ete naniba Sume Gode okoko sbalma okok kemine! <sup>12</sup> Gode ibo baabeneas Yesus Klaiste imin tenea ibo dlet-nea moniba ne bibam ye unaniba amit nomabiobo genebio kesoa ibo e weng olo kla fumbianiba seinine! Enino ibo dimo tam tlam olo ibo sbal maniba amitie Gode ngan-hamine! <sup>13</sup> Ibo ib nekwali bainobo gabibi maki afobeingo blim blibi daayemine! Eka bib mak naka teniba ibo bibamo tlaibo dleb taniba ib am tam daniba imeno doyine!

<sup>14</sup> Naka maki ibo kukub misiamo omyib mole ibo Gode baabaniba Naka eli daabenale ge baabaine! Ibo Gode mo baabanibta Naka eli yananeba kaaine ge baabanimibe! <sup>15</sup> Eka nakaia unangai seimbib mole ib tena seinine! Naka mak unang maki kukub misiamo i dimo tam tloa memib mole ib tena memine! <sup>16</sup> Bainobo galin nakaia unanga ibo ib bobol tem funino makob aine! Ibo ilib untako mo ngambianibta Ni niniin sumobo galaibe! Ibo nakai niniin sumbai tenaniba makob haaine! Ibo mo funanibta Ni tekein kemino sumobo ge funimibe!

<sup>17</sup> Eka naka maki ibo kukub misiamo omyib mole ibo mo yang kenibta i kukub misiamo omyaibe! Ibo bobol temo kla fumbianiba nakaia unangai kin dimo okoko klayam ota okok kemine! <sup>18</sup> Ibo awa genalin bobolo mo funimibe! Ibo besa gil bianiba fumbianiba Ni mo monobta naka maki mo tenanobta awao mo genaobe ge funine! <sup>19</sup> Ne kla gobe bli nakaia unanga ibo kla wentine! Naka maki ibo kukub misiamo nabanimibo ibo ibmalo mo yang



kenimibe! Deibeibta Gode atlihamin ota yang kenoko! Sume e buk temo baanea Yang kemin kukubo ne okokobo, nemale yang kenita enino omyam-abibo genebiobe.

<sup>20</sup> Eka Gode buk temo weng mak osa imin baanoa Ib wasi nakai imen tebo yebo mole imeno oyiba downone! Eka i aan tebo yebo mole aayo oyiba doweine! Ibo kukub olo inabeib mole i kukub misiamo ibo omkayebibo aal waisenamabobo ge baanobiobe. <sup>21</sup> Ibo kukub misiamo mo wafu blipta o ibo mo ge dlanomone! Ibo kukub ayam ota nabiba ib kukub ayam kukub misiamo wandakibilanoko!

### 13

*Nibo komokwali wengo kla wente bianoba inamomo!*

<sup>1</sup> Nakaia unangai alukum gabmanwali wengo kla wente bianiba ili weng baan-imb iwat inamine! Nibo tekein kebuobe, gabmanwali imalo mo tam tlim blimobe. Gode emaye gabmanwal eli dlanea baanea Ibo nakaia unangai komok aine genebiobe. Gabmanwal eli Gode emaye sin dlakanebiota kima bliobe. <sup>2</sup> Inanebio kesoa nakaia unangai gabmanwali wengo ombiabeib mole i Gode weng osa ombiabanomabiobe. Eka nakaia unangai wanita gabmanwali wengo omdibiyemib mole i kukub misiam olo yang keniba enin kino omyiba watemaibo Gode yatenea baanea Ayamobo genamabebe. <sup>3</sup> Gabmanwal ile nakaia unangai kukub ayam wafu blihi tosanino mo omkayebibbabe. I nakaia unangai kukub misiamo wafu blih ita tosanino omkayebiobe. Ibo funaniba Ni gabmanwali tolo mo tosanomobbabo ge funaib mole ibo kukub ayam ota wafunine! Ibo inanimibo gabmanwali baabeniba Ib kukubo ayamobo ge oyemomabiobe. <sup>4</sup> Niminbabe, gabmanwal ile Gode okok nakabe. God eta i dlanea tlibbua ibo daayebib kesoa ibo kukubo ayam ota wafunomabiobe. Ina otane ibo amitie kukub misiam ota wafu blih mole ibo tosi-  
nine! Niminbabe, Gode nakaia unangai kukub misiamo nabibi yatenea atlihabua dosuambebe. Gabmanwal eli Gode okok naka kesoa e titilo omkayebia i nakaia unangai kukub misiamo nabibi enino omkayebiobe. <sup>5</sup> E inayebe kesoa nibo nib gabmanwali wengo kla wenteye bianoba ili weng baanimib iwat namomo! Niminbabe, nibo i wengo mo wenteyemin blim kemob mole i nibo kukub misiamo nabobo yang keniba enino omyomabiobe. Eka weng mak ole nib bobol temo fumbianoba kukub olo ayamobo gabob kesoa nibo gabmanwali wengo wentemomo!

<sup>6</sup> Nibo inangge fumbob kesoa takis monio gabmanwali okayemomo! Niminbabe, i Gode okok naka bianiba i moni olota olonibta okok kebianibta ibo kima bliobe. <sup>7</sup> Gabmanwali ibo Inamin namino ni oyine genimibo oyine! Gabmanwali ibo baabeniba Ibo ni inamin namin okoko takis monio okayemine geib mole ibo okayemine! Eka ibo gabmanwali wengo omibo wente bianiba ili weng baanimib iwat nabianiba i niniino dotoulele nine!

*Nakai naka maki kla gobe blih ile hekmel wengo kla wafu bliobe.*

<sup>8</sup> Ibo naka maki baabeniba Ib monio ni oyib biota sinanota nisak yang kenomo ge baabeniba oiseibbio mole ibo hebmamsab yang keine! Gode nibo kla gobe bie kesoa nibsak yang kenoba naka mak unang maki gobesese nomo! Niminbabe, nakai naka mak unang maki kla gobe blih ile hekmel wengo kla wafu bliobe. <sup>9</sup> Nibo tekein kebuobe, Gode hekmel wengo baanoa Ibo alalwala imakwalai mo deibenibta tamano mo hengamibe! Eka ibo naka mak unang maki mo yenaibta kaanimibe! Eka ibo inamin namino ayoko mo dlaibe! Ibo naka mak unang maki inamin namino watemaibo bobolo mo wayemone genobiobe. Hekmel weng olosa eka hekmel wengo afet osa o mitmakamo makobobe. Alukum hekmel weng olo mitmakamo inaminobe. Ibo ilib unaalo gobo blih inaniba naka mak unang maki ibo baka blih isa kla gobe nine genobiobe. <sup>10</sup> Nakae naka maki kla gobe biameo e naka eli kukub misiamo mo omyamebabe. Inamin kesoa nakae naka mak unang maki e baka blih kla gobe bie naka ele Gode hekmel wengo kla wafu biebe.

*Nibo kukub ayam ota wafunomo!*

<sup>11</sup> Ibo inamin namin kukub olo ne baabei yota namine! Niminbabe, nibo mema bainobo genob dimo Gode nibo dlamabe amo meb an binobu otane memalo am olo dot meb ano kesoa ibo aalanino deiboniba hananiba klaniba waiso nine! Ibo olo tekein kebiobe. <sup>12</sup> Mema dim olo makob kwinoa mililanobiobe. Yesuse tlame dim ole makob bomanamabobe. Mema dim olo kwinamino unoa bomanamino tenamino meb anobio kesoa nibo inamin namin kukub misiamo mililambua ayok nabobo deibonoba inamin namin kukub ayam tab dim kukubo nakaia unangai watemomabib ota nabianoba kukub misiamo tenanoba awa genalomo! <sup>13</sup> Nibo kukub ayam namomabbuo makob nakaia unangai tab dim haablilo ulab ota namomo! Nibo aa misiamo mo downobta kukub misiamo mo namobe! Eka taman osa mo hengamobe! Nibo dleb wengo mo obianoba

eka naka maki inamin namino bobolo mo waye biam nomone! <sup>14</sup> Ibo Sume Yesus Klaiste deibaiba eta ibo inamin namino nabibo kimaneko! Ibo ilib bobol tem funin misiamo mo wafu nimibe!

## 14

*Ibo ib nekwali kukubo mo klamibe!*

<sup>1</sup> Eka naka mak unang maki bainobo gabib otane i Klaiste kukubo klaom mo tekein keim blim bianiba i bainobo galino mo sbal maim blim blibi ibo baka lotu kemom gaibo ibo mo tolobo genimibe! Tline ge baabeniba dleb te daiba ibo baka lotu kemine! Ibo inaniba dleb te danimibo ibo i inamin namino mo tekein kebibbao weng sango mo obianibta inaminobo gesese nimibe! <sup>2</sup> Inaminobe, naka maki bainobo galino sbalma blib ile funaniba Ni omomom imena kulanao wembobo kukub olo ayamobo gabib otane naka mak ile i bainobo galino mo sbal maim blim kesoa i kulano mo wembibbabe. <sup>3</sup> Eka nakai inamin namino alukum wembibi mo funanibta Kulano wembibbai i bainobo galino mo sbal maim blimobo galaibe! Eka kulani mo wembibbai mo funanibta Nakaia unangai inamin namino alukum wembibi kukubo hengminobo ge funanimibe! Niminbabe, Gode i alukum baabene Ibo ne meletan eka ne okok naka nabo genebiobe. <sup>4</sup> Nakae waneta nakai kulani mo wembibbai baabeneta Ibo Klaiste okok kemini nakai kukubo klaine genebiote? Dlo klamin okok olo ib okokbabe. Olo Sume okokobe. Sume emaye i kukubo klaneta I kukubo misiamobe ayamobe genamabebe. Sume emaye i kimanin naka kesoa emaye kima bianea daaye bianea i bainobo galino omsbal sanye bianea I ayamobo gabinabebe.

<sup>5</sup> Naka maki funaniba Am mako dimo Gode amobo, eka am mak dim ole Gode ambabo gabib otane mak ile funaniba Gode kin dimo amo alukum makobobo gabiam nabiobe. Nakaia unangai elekiem olokiemi i bobol temo kla funaniba tekein keine! <sup>6</sup> Nakaia unangai wanita funaniba Am mak dim ole Gode funanea Am olo dim ota nakaia unangai ne niniino nemtoupleb nine genebiobo genimibi inaniba Gode niniino dobtoupleb binabiobe. Eka mak ile inamin namino downom gaibo Sume bobolo fumbianibta weminabiobe. I inaniba inamin namino downom gaibo Gode gangobo genibta weminabiobe. Eka nakaia unangai maki kulani Awemobo geniba deiboniba besa imenob weminabib isa Sume bobolo fumbianiba gangobo gabianibta weminabiobe. <sup>7</sup> Niminbabe, bainobo galin nakaia unanga nibo afen biaoobo nib kukubo ninib bobol temo

nanamino blimobe. Eka ninib bobol tem kaanamini osa blimobe. <sup>8</sup> Nibo afen biaoobo Gode bobol tem funin ota wafu bianobta okok kebinabuobe. Eka nibo kaanom genabob biam osa Gode bobolo fumbinobta kaanabuobe. Nibo ina binabob kesoa nibo afen biaoob osa kaanomob osa nibo God emiobe. <sup>9</sup> Yesus Klaiste kaanea Gode imin dofaanea hananebio kesoa eta nakaia unangai afen blib isa kaaibbue isa i Sum an biebe.

<sup>10</sup> Ina bie kesoa kulani wembibba ibo ib nekwali kukubo nabibo mo moton-sam bianibta I kukubo nabibo hengabiobo galaibe! Eka kulani wembib ibo ib nekwali kukubo nabibo mo yatenibta funanibta I bainobo galino sbal maim blimobo genanimibe! Niminbabe, sinanoa Gode nib kukubo klanang gameo dim ota nibo alukum Gode biin toulalino kibi kaba sin ye manobta dlo klanamabebe. <sup>11</sup> Gode buk temo enange baanoa

Sume baanea Ne amit afen binabi neta moton weng olo baabenamabibe. Nakaia unangai alukum ne kibi kaba sin ye dlong dlong golbuaniba daak toulaniba ne niniino nemtoupleb bianiba baaniba Kobo Godobo ge onemomabiobo genebiobo genobiobe.

<sup>12</sup> Inanamabe kesoa am olo tam tlamoo dim ota Gode nibo elekiem olokiem baabene Ibo kukub olo fatnanibta nabinibione? ge baabenemeo nibo e weng olo yang kenomabbiobe.

*Nibo nib nekwali bainobo galino watwat dayemin kukubo mo namobe!*

<sup>13</sup> Gode inanamabe kesoa nibo nib kukubo mo watenobta naka maki mo baabenobta Ib kukubo misiamobo ge baabesese nomobe! Otane ibo ilib kukubo nabib ota wateniba funaniba Ni kukub olo nabob ota ni nekwali yatenibta i hengmin kukubo nabib bleka? geniba temiba bain ano mole kukubo yo deibueine! <sup>14</sup> Ne Sume Yesus Klaiste bainobo genia e bobolo fumbi kesoa ne tekein kebibe, omomom imeno omalo awemo blimobe. Ina otane naka make funanea Imen olo awemobo gene mole o e awem kesoa e mo downamene! <sup>15</sup> Eka ib neke Imen olo awemobo gabea ibo unansiba e yatenea esak imen olo wembianea funanea Ne kukub olo naio hengaiobo genea bobolo ilum omfubano mole ib kukub olo ib nekwali gobenin kukubbabe. Ibo ib imeno wembibo bobolo mo fumbianibta Klaiste kaanea ib neke hengmino walubanebua bainobo gabeo mo waubanibibe! <sup>16</sup> Ibo tekein keniba Ni kukubo nabobo ayamobo gabib otane

naka mak unang maki baaniba Bainoba galin nakaia unanga eli kukubo nabibo misiamobo geniba Gode weng dobo weng ohamib kesoa ib kukub ayamo nabib olo deibueine! <sup>17</sup> Niminbabe, Gode nibo kima bio nib imen unalin kukub osa aa unalin kukub osa e mo funaneta misiamobo ayamobo gabebabe. Gode kimanin kukub ole enaminobe. E Hobe dabanea daakenea nibo daayebe kesoa nibo inamin namin kukub ayamo wafu biobobe. E nibo bobol tem ayam osa eka seinin bobol tem osa omkayebebe. <sup>18</sup> Nibo tekein kebuobe, nakaia unangai Klaiste wengo wente bianiba ele weng baanebio iwat nabinabib ile Gode seinyebee eka naka mak unanga mak isa i oye bianiba I naka ayam unang ayamobo ge oye binabiobe.

<sup>19</sup> Inamin kesoa nibo sbal manoba naka maki bainobo galino daabesese bianoba nib bobol temo makob anoba nib bainobo galino omsbal sanomo! <sup>20</sup> Ibo mo funanibta Ni kulani downonomo genibta wembianibta Gode okoko mo wakahamibe! Imena kulanao alukum ayamobe. Gode mo baaneta Awemobo geim blim otane ibo imen olo doweiba bainobo galin naka mak unang maki fumbianiba Kulani awemobo gabibi yateniba isa downoniba hengaib mole ib kukub olo misiamobe. <sup>21</sup> Ibo funaniba Nibo kulan isa waen aay osa naka maki awemobo gabibo mo downonaobe! Eka inamin namin kukubo naka maki awemobo gabib osa mo nanomobe! Nibo inasoba naka maki Yo awemobo gabibi yateniba isa doweib mole henganomabib kesoa nibo mo downonaobe geniba deibueib mole ib kukub olo ayamobe.

<sup>22</sup> Ibo funaniba Inamin namin kukub olo ayamobo geniba inamomabib otane naka maki funaniba Kukub olo misiamobo gabibi weng olo mo baabenimibe! Ibo weng olo God eta oha bianibte! Nakai funaniba Inamin namin olo ayamobo geniba inanimibo i bobol temo mo funanibta Ne kukub olo naio misiamobo ge funaim blim kenimib nakai seinomabiobe. <sup>23</sup> Nakaia unangai bobol temo tekabesoa funaniba Ni kulani downonob mole kukub olo misiam bleka ayam eso geniba tekanimib otane i unalib mole kukub olo hengminobe. Niminbabe, i bobol temo mo funanibta Gode kin dimo kukub olo bain ayamobo geim blim bianibta downonomabib kesoa i kukub olo hengminobe. Nibo inamin namin mako nanom gaobo nib bobol tem daako mo funanobta Kukub olo bain Gode kin dimo ayamobo geim blim kenomob otane nibo kukub olo nanob mole olosa hengminobe.

*Nibo Klaiste bobol tem funin ota nibsa funomo!*

<sup>1</sup> Bainobo galino sbalma biob naka unang nibo mo funanobta Ninita ye biobobo gabi-anobta imena kulanao alukum mo unalaobe! Nakaia unangai bainobo galino mo sbal maim blim bliibi funaniba Kulan maki awemobo ge fumbib kesoa nibo i bobolo funanoba kulan eli downonamino denomo! <sup>2</sup> Nibo alukum bainobo galin naka mak unang maki nibsuo biaibi i bobolo funomo! I funaniba Kulan unalin kukub osa eka inamin namin kukubo afet osa misiamobo gabib mole nibsa inanoba kukub olo deibonoba i daayeboba ayam aniba i bainobo galino sbal maine! <sup>3</sup> Nibo tekein kebuobe, Klaist esa ele bobol tem funino mo namin blimobe. E Gode kukubo gobobie ota e nabinabebe. Gode buk temo kukub misiamo Klaiste dimo tam tlemabo wengo baanoa

Nakaia unangai God kobo weng dobo weng okemibo kebobbabo neta onemomabiobo genobiobe.

Inamin kesoa e Gode bobol tem funin ota wafu biane nakaia unangai deibene a i e weng dobo weng ohabinibbiobe. <sup>4</sup> Sinanggwano Gode buk temo wengo dolaibbuo nibta baabenibta dolaibbiobe. Weng olo alukum nib bobol temo omsbal sanyebua nib bainobo galino amitie sbal mabianoba Klaist esu unomabbio amo waiso biobobe.

<sup>5</sup> Gode nib bobol temo omsbal sambiane daayebe kesoa nib bainobo galino amitie sbal mabiobobe. Gode daabenea ibo Yesus Klaiste tenaniba ib bobol temo makob aine! <sup>6</sup> Ibo inanimibo ib bobol tem osa ib sital osa makob aniba Gode niniino dobtouleb nomabiobe. E nib Sume Yesus Klaiste Ayobe.

*Yesus Klaiste Yuda isa eka Yudaba isa daabenebiobe.*

<sup>7</sup> Bainobo galino sbalma bliib ibsa eka bainobo galino mo sbal maim blim ibsa ib sinwalo alukum nekwal kesoa ib bobol temo makob omfaniba makob sino Klaiste ibo baabenea Ibo ne meletan kesoa nibo makob anomo genebio inaniba makob aine! Ibo inanimibo nakaia unangai dabalim olo bliibi Gode niniino dobtouleb nomabiobe. <sup>8</sup> Niminbabe, Gode e miine Yesus Klaiste dabanea daakenea dabalim ele tlanea ni alebenea makob sino Gode ni faninwali moton wengo baabenebio inanea Yudai daabenebiobe. <sup>9</sup> Eka kukub mak osa Klaiste tenea Yudaba nakaia unangai dohalilanea daabenebio kesoa i o bobolo fumbianiba Gode niniino dobtouleb

nine! Weng olo makob Debite Gode buk temo dolanebuo baanoa

E inanebio kesoa ne keb niniino Yudaba nakaia unangai kin dimo omkeimana baabenia Gode niniino dot Sumobo ge baabenia eka ne keb niniino kemtouple nin anso nganamabibo gena bianoa

<sup>10</sup> eka mak ole enange baanoa

Yudaba nakaia unanga ibo Gode meletani temnaniba seinine gena bianoa

<sup>11</sup> eka weng mak osa imin baanoa

Yudaba nakaia unanga ibo alukum Sume niniino dobtouple nine! Eka nakaia unangai alukum bib mak betan mako blib ibsa e niniino dobtouple nine genanobiobe.

<sup>12</sup> Eka Gode weng omkeimalin nakae niniino Aisaiae Gode wengo buk temo dolanebuo osa baanoa

Yesie meletani isak temo naka make tena Yudaba nakaia unangai komok anea i e bainobo gebaniba e inamin namin kukub ayamo i omyamabeo waisonomabiobo genanobiobe.

<sup>13</sup> Gode baabenea Ne ibo dletnia ne bibam unomo genebio kesoa ibo e waisa bliobe. Ne Gode baabania I kobo bainobo gabib kesoa kobo seinin sum osa bobol tem ayam osa omyene! Kobo i sino Hobe titilo omyebbua daayebo kesoa i Yesuse imin tlameo dletnea moniba keb bibam unomabibo waiso blibo seinine ge ohabibe.

*Fole monea Yudaba nakaia unangai Gode wengo omkaye bisebe.*

<sup>14</sup> Ne nekwali ibo ne tekein kebio ibo kukub ayamo amitie wafu bliobe. Ibo Gode wengo kla tekein kebib kesoa ibo ib sinwalo alebesese blibo ne funania Ib aleyemin kukub olo ayamobo gabibe. <sup>15</sup> Ne funania Gode wengo atosino imin alebeia funaine gabi kesoa ne olo mo tosonianita deibonimibabe. Ne sbal weng baania dola omfubenamabibe. Niminbabe, Gode emaye daatnenea <sup>16</sup> nemfakanea Kobo Yesus Klaiste dowan wengo omeb moneba Yudaba nakaia unangai omkayemale ge baatnenebio kesoa ne inania omkayebibe. Ne ina biania nakaia unangai Gode Hobe i daayebea hengmino deiboniba i bobol temo deskina omoniba Gode omkahabiba e i baabenea Ibo ne meletanobo ge oyebei dleb tenia Gode dokaha biania makob Gode amo kimanin nakai eil sihsibi ina dleb te funiba Gode dlanabib inaye bia Gode seinyebebe. Gode kobo inamale ge baanea nemfakanebio kesoa ne sbal weng olo ibo dola omfubenamabibe.

<sup>17</sup> Ne Yesus Klaiste ni dab ni bobol temo funino makob an bianoba Gode okok olo okok kebi kesoa ne okok olo seinwe biania weng olo ibo dola omfubenamabibe. <sup>18-19</sup> Klaiste titilo ne omnenea daatnene kesoa ne Yudaba nakaia unangai Gode wengo omkaye biania daaye bia eka Gode Hob esak e titilo omnenea daatnenane kesoa ne okoko sumo sino i mo watemin blimo klabia i Gode wengo wente bianiba ele weng baanebio iwat inabiobe. Weng olo ne okoko Klaiste daatne bia okok kebio weng sango olota ibo baabenamabibe. Ne weng afeto mo baabenimibabe. Ne Klaiste weng olo inania okok kem unibuo Yelusalem bibo sin omkeimai ole deibonia monia bib mak bib mako weng olo omkeimam wat watnia monia llikam betan ye biania omkeima binibiobe. <sup>20</sup> Ne bib mak bib mako monia Yesus Klaiste niniino nakaia unangai sino mo wentim blimi omkayemang genitabe. Ne mo monita nakaia unangai sino naka maki Gode wengo i omkaye binibuei imino mo omkayemibabe. Kukub olo makob naka maki amo sin geibbua ne amo o dim ut genamabi inamin kesoa ne mo inanimibabe. <sup>21</sup> Nakaia unangai Klaiste niniino mo tekein keim blimi weng sango Gode buk temo baanoa

Nakaia unangai sino e weng sango mo wentim blimi wenteniba kla tekein kenomabiobo genobio kesoa

ne monia nakaia unangai Klaiste wengo mo tekein kebibba isu unania weng olo omkayemabibe.

*Fole funanea Ne Lom bib unamo gesebe.*

<sup>22-23</sup> Bifol homono dimo ne amitie fumbiania Ne monia bainobo galin nakaia unangai Lom bibo blibi yatemamo gabinabi otane ne okok olo amitie watanebo kesoa ne mo tenita ibo yatenabibabe. Ina otane betan olo seli nakaia unangai alukum Klaiste wengo wentib kesoa ne okok osa blimanobe. <sup>24</sup> Ne inai kesoa funania Ne monia Sben betan unano gei otane mikiktemo monia ibsu natlania yatenia ye baka biania bobol temo ayamut nenoa ibo inamin namin ayamu doneniba daatneibta monita Sben betan unamabibe. <sup>25</sup> Ne inanamabi otane memalo monio oletnia monia Yelusalem bib unania bainobo galin nakaia unangai inamin namino blimi oyano gabibe. <sup>26</sup> Niminbabe, bainobo galin nakaia unangai Masedonia betan ye blib isa eka Akaia betan ye blib isa funaniba Ni nekwali bainobo galin naka mak unang maki Yelusalem bib ye blibi inamin namino blim kesoa ni inamin namin olo i daabenomo geniba i

sinwalo monio olminib kesoa ne oletnia Yelusalem bib unamabibe. <sup>27</sup> I ili bobol tem funaniba monio olminiba Yelusalem bib seli olubenomabib kesoa kukub olo ayamobe. Sino Yudai bainobo galin nakaia unangai Yudaba nakaia unangai Yesuse wengo omkayebiba i Yesuse wengo wente bianiba isa Yesuse bainobo geniba e meletan aibbio kesoa i kukub olo yang keniba monio olminiba Yuda nakaia unangai bainobo gabibi Yelusalem bib ye blihi olubenomabiobe. <sup>28</sup> I inaib kesoa ne moni olo oletnia monia bainobo galin nakaia unangai Yelusalem bib ye blihi oyamabibe. Ne inania omito ne Yelusalem bibo deibonia monia Shen betan unang gamio tenia ibsu ye tlania yatenita omit ota monita Shen betan unamabibe. <sup>29</sup> Ne tekein kebibe, ne ibsuo natlang gamio Klaiste bobol tem funin ayamo telaar unutnenota monita ibsu natlita ib bobol tem osa ayamu benamabobe.

<sup>30</sup> Ne nekwali ibo nib Sume Yesus Klaiste goba bliha Gode Hobe ibo daayebea bainobo galin naka mak unang maki kla gobe blih kesoa ne weng mako baabenamabibe. Ihte nete nanoba sbalma bianoba Gode nganhamomo! <sup>31</sup> Ibo Gode baabaniba God kobo Fole daabaneba e monea Yudia betano unamabeo nakaia unangai Yesuse mo bainobo gabibbai e mo ananimibe! Eka e monea bainobo galin nakaia unangai inamin namino blihi Yelusalem bib ye blihi monio oyang gameo bobol tem ayam bianiba oisaine ge baabaine! <sup>32</sup> Ibo inabiba Gode baanea One gene mole ne sein seinia monia ibsu natlita bobol ayam nomabbiobe. <sup>33</sup> Gode bobol ayamo omkaye binabe nakae ibo bekebe neko! Bainobe.

## 16

*Fole nakaia unangai homoni Klayam blihte ge baabesebe.*

<sup>1</sup> Ne Fibio weng sango ibo baabenamabibe, Fibi osa Yesuse bainobo galin unang kesoa o makob nib nengobe. O bainobo galin nakaia unangai Senklia bibo blihi daaye binabobe. <sup>2</sup> Ne ibo baabenamabibe, Fibio ib sinwalo ibo Sume bainobo gabib kesoa o monoa ibsuo natlamo ibo baaboniba Obo ye tlebo ge baaboniba omeh taniba ib am tam daine! Inanimibo kukub olo bainobo galin nakaia unanga nib kukubobe. Eka o inamin namino blih biamo ibmio douline! Niminbabe, o bainobo galin nakaia unangai homoni daaye bianoa nesa daane binabobe.

<sup>3</sup> Ibo Flisila osa eka o imake Akwila esa baabeniba Fole baanea Ibo ayam blihte ge baabenebo ge baabeine! Ite nete nanoba Yesus Klaiste okoko okok kebinabuobe. <sup>4</sup> Wasi nakai ne nenanom gabibo i kamo

mo funanibta Ni Fole daabanob mole i nisa yenanomabiobo geim blimobe. I ne daatneib kesoa i ne mo nenaibta kaaim blimobe. I ne inatneibbio kesoa ne i kamo Gangobo gabinabio nenekiembabe, Yudaba nakaia unangai bib mak bib mako mina bianiba lotu kebinabib isa i kamo Gangobo ge oye binabiobe. <sup>5</sup> Eka ibo bainobo galin nakaia unangai i kam i amo miniba lotu kebinabib isa baabeniba Fole ibo Klayam blihte ge baabenebo ge baabeine! Eka ne neke Esia nakae Efnitase ne kla goba blihe e Yesuse sin bainobo genea eka Esia ten nakaia unangai mak isa mit bainobo genaibbio naka esa <sup>6</sup> eka Maliao sbal mabianoa ibo daaye binabo unang osa <sup>7</sup> eka ne meletani Andlonikase Yuniase i dab osa i baabeniba Fole Klayam blihte ge baabenebo ge baabeine! Andlonikase Yuniase i dabo Yesuse okoko okok kebib kesoa ni dabwalo klabuto makob ge dleb mo daiba klabutam binobbiobe. Yesuse okok dlasanin nakai i dabo baabeniba I Yesuse okok naka ayamobo ge oyebiobe. I sin Yesus Klaiste bainobo geibbiota nele mit bainobo geibiobe.

<sup>8</sup> Eka Amflietase ni dabo Sume bainobo gabob kesoa ne e kla goba bli esa <sup>9</sup> eka Ebane etem nitem nanoba Yesus Klaiste okoko okok kebob esa eka ne neke kla goba blihe Stekis esa i baabeniba Fole Klayam blihte ge baabenebo ge baabeine!

<sup>10</sup> Afelise Klaiste bainobo galino sbal mabie naka esa eka nakaia unangai Alistobyulase amo blih isa <sup>11</sup> eka ne meletane make Helotian esa eka nakaia unangai Yesuse bainobo gabibi Nasisase amo blih isa <sup>12</sup> eka Tlaifnao Tlaifosao i dab osa baabeniba Fole Klayam blihte ge baabenebo ge baabeine! Unang asu eli Sume okoko sbalma okok bliobe. Eka ne neko kla gobo blihe Fesiso Sume okoko sbalma okok bio osa <sup>13</sup> eka Lufase Sume kukubo kla wafu bie naka esa eka e biem osa makob ne biem na kesoa ibo baabeniba Fole baanea Klayam blihte ge baabenebo ge baabeine!

<sup>14</sup> Eka ibo Asinklitas esa eka Fligon esa eka Hemis esa eka Fatlobas esa eka Hemas esa eka i nekwali bainobo galini i baka blih isa <sup>15</sup> eka Filologas esa eka Yulia osa eka Neliase e unango i mikim osa eka Olimfas esa eka Gode bainobo galin nakaia unangai i baka blih isa alukum baabeniba Fole ibo Klayam blihte ge baabenebo ge baabeine!

<sup>16</sup> Gode nakaia unanga ibo ib sinwalo heitdabesese nine! Klaiste bainobo galin nakaia unangai bib mak bib mako mina bianiba lotu kebinabibi alukum ibo Ayam blihte ge baabeibobe.

*Bainobo galinbai dim omin wengo klaine!*

<sup>17</sup> Ne nekwai ibo ne weng mako baabenamabibe, naka maki mo bainobo gabibbai ib isak temo blibi Yesus Klaiste wengo deiboniba weng afet ota nakaia unangai omkayebiba Yesuse bainobo galin nakaia unangai maki funaniba I wengo bainobo gabiba eka mak ile I wengo dimobo Gode weng ota bainobo gabiam nabianiba bainobo galin nakaia unangai isak temo niniino misiam omkabiobe. Nakaia unanga eli amitie bainobo galin nakaia unangai i bainobo galino watwat daye binabiobe. Ibo nakaia unanga elisuo afetu beine! <sup>18</sup> Ina binabib naka unang ile nib Sume Klaiste okoko mo okok kebabbabe. I imeno bobol ota fumbinabiobe. I weng ayam ayamob obianiba ibo baabeniba Imen olo uninobo doweine! Eka imen olole awemobo mo downaibe ge oye biam binabiobe. I ina bianiba nakaia unangai men weng men weng oye biam bliba nakaia unangai bobol temo klao mo fumbibbai i weng olo wenteniba funaniba I weng olo klayamobo gabinabiobe. <sup>19</sup> Ibo Gode wengo wafu blibo weng sango nakaia unangai alukum wentebib kesoa ne ibo seinyebibe. Ibo ina blib kesoa ne bobol temo funania Ibo kukub ayamo olota tekein keniba nabianiba kukub misiam ole amitie deibueine gabibe. <sup>20</sup> God ele bobol ayamo mitmakamobe. E bobol ayamo ibo omyebua Gululame ib skilo tabab tem daak dobtamanea e titil blimanamabeo amo meb anobe. Nib Sume Yesus Klaiste ibo daayemeko!

*Naka maki Lom bib seli Klayam blibte ge baabesiobe.*

<sup>21</sup> Timotie ni dabo Klaiste okoko okok kebob naka esa ibo Ayam blibte ge baabenebe. Eka ne meletani Yudai maki Lusias esa Yeson esa eka Sosifata esa i Ayam blibte ge baabeibobe.

<sup>22</sup> Futan olo Fole besa weng obeta Tetias neta futan olo dolaita ibo omfubenamabebe. Tetias ne Sume niniino taisania Ayam blibte ge baabeio. Ne weng gwabo bayotabe.

<sup>23</sup> Eka Gaias esa Ayam blibte ge baabenebe. Fol ne e am ele blibe. Yesuse bainobo galin nakaia unangai teniba e am ele mina bianiba lotu kebinabiobe. Eka Elastase bibam olo monio kima binabe naka esa eka nib neke Kwotas esa Ayam blibte ge baabeibobe.

<sup>24</sup> [Nib Sume Yesus Klaiste ibo alukum daayemeko! Bainobe.]

<sup>25</sup> Nibo Gode niniino dobtouleb nomo! Ne Yesus Klaiste down wengo naka mak unang maki omkayebio ne baabenia Yesuse ib bainobo galino omsbal mabenamabebo ge baabeio e bain titilsa kesoa e ib bainobo galin osa omsbal mabenamabebe. Sinanggwano Yesus Klaiste weng olo amitie ayok binabo <sup>26</sup> otane memalo Gode omkeimanebiobe. Sinanggwano God kintaline e bobol temo funanea Bib mak bib mak seli Yuda isa eka Yudaba isa weng olo wenteniba bainobo geine geneta weng olo e weng omkeimalin nakai baabeneta buk temo dolaibbiobe. <sup>27</sup> Gode elekiem eleta inamin namino alukum tekein kebebe. E Yesus Klaiste dabanea tenea atdimu kaanea nibo dleb metenea God esu ele danebio kesoa nibo Gode niniino dobtouleb nomo! Bainobe. Ne wengo bayotabe. Fol neta ib futano dola omfubenamabibe.

*Nibo Gode niniino dobtouleb nomo!*

## 1 Kolin Fole Kolin bib seli futano mikiktemo dola omfubesebe. Tekein kemin wengobe.

Yesuse daakenea atdimmo kaanea imin hananea ulanea abilimonebua bifolo 24 ese mak blimanota Fole bib sumo niniino Efesas ye bianeta futan olo dolaneta Yesuse bainobo galin nakaia unangai Kolin bibo blibi omfubenebiobe. Kolin bibo Glik betan ye biobe. Yuda nakaia unangai maki ye Glik teni baka binibbiobe. Nakaia unangai Kolin bib olo blibi i isak temo naka homon unang homoni hengmino nabibta i isak temo bainobo galin naka maki Fole futano dola omfubasipta esak yang keneta i futan olo dola omfubenebiobe.

1:1-9 Mikiktem wengobe.

1:10-4:21 Bainobo galin nakaia unangai bakalin wengobe.

5:1-7:40 Yesuse bainobo galin nakaia unangai kukubo namino wengobe.

8:1-11:1 Bainobo gabib isa eka bainobo gabibba isa i kukubo wengobe.

11:2-14:40 Lotu kemin kukubo wengobe.

15:1-58 Klaiste hananebio kesoa e bainobo gabib isa hana tlomabib i wengobe.

16:1-4 Bainobo galin nakaia unangai monio olmina bianiba bainobo galini naka mak unang maki daayemin wengobe.

16:5-24 Mubiang wengobe.

<sup>1</sup> Gode Fol ne nemfakanea baatnenea Kobo Yesus Klaiste okoko okok kemale ge baatnenebio kesoa ne Yesus Klaiste okok namananin nakabe. Sostenise ne beketne biebe. E Yesus Klaiste bainobo galin naka kesoa e ne nekobe. <sup>2</sup> Ae Gode meletani Yesuse bainobo galin nakaia unangai Kolin bibo blib ibo ne Sostenise ni dabta ib futan olo dola omfubenomabbiobe. Sino Gode ibo dlakanea baabenea Ibo Yesus Klaiste wengo wenteniba bainobo geniba kukub misiamo deiboniba kukub ayam ota wafuniba nemi aine ge baabenebiobe. Bib mak bib mak seli naka homon unang homoni Nib Sume Yesus Klaiste niniino sumobo ge baaniba e niniino dobtouleblibi ib sinwalo emibe. Yesus Klaiste nib Sumobe. <sup>3</sup> Nib Aye God esa nib Sume Yesus Klaiste esa i dumo ibo daaye bianiba bobol ayam omkayemine!

*Fole Gode gangobo gesebe.*

<sup>4</sup> Ibo Yesus Klaiste naka unang kesoa Gode ibo daaye binabeo ne o bobolo amitie fumbianiba Gode gangobo gabinabi. <sup>5-6</sup> Ni Yesus Klaiste weng ayam ibo

omkayeboba weng olo wenteniba bainobo geibbua memalo ib bainobo galino sbalma wafu bianiba Yesus Klaiste tena blib kesoa Gode e bobol tem funin ayam ibo omkayebea ibo e weng ayam kla tekein kebianiba weng ayam ota obiobe. <sup>7</sup> Gode Hobe e bobol tem funin ayam alukum ibo omyebu olo bainobe. E inanebio kesoa ibo nib Sume Yesus Klaiste imin tlea nakaia unangai atemomabib amo waiso bianiba ayam bliobe. <sup>8</sup> Yesus Klaiste ibo daaye bianea ib bainobo galino omsbal sanyebe kesoa ibo ib bainobo galino amitie sbalma wafu biam biniba kaanomabiobe. Ibo ina bliba nib Sume Yesus Klaiste imin tlemeo naka mak unang maki ibo baabeniba Ibo hengmin gamobo genamino blimobe. <sup>9</sup> Gode ibo dlakanea baabenea Ibo ne miine Yesus Klaiste tena bianiba ib bobol temo makob aniba makob ib Sume Yesus Klaiste bobol tem funino ulab aine ge baabenebiobe. Sino Gode ibo baabenea Ne ibo daaye biania ib bainobo galino omsbal sanyebe kesoa ib bainobo galino amitie sbalma wafunomabiobo genebio kesoa e bain inanamabebe.

*Bainobo galini bobol temo afet afet funmonsio.*

<sup>10</sup> Ne nekwal ibo ne nib Sume Yesus Klaiste niniin dimo ne enangge baabenamabiobe. Ibo ib sinwalo mo afetasese bianibta alang wengo mo omibe! Ib weng osa ib bobol tem funin osa ib okok osa makob olokiem wafueine! <sup>11</sup> Ne nekwal ibo ne weng mako wentia Klowitz meletan maki baatneniba Kolin bib seli bainobo galin nakaia unangai i sinwalo alang weng obiobo ge baatneibbiobe. Bainobo galin nakaia unanga ibo ib bobol temo makob kesoa ibo ib sinwalo alang wengo mo baasese nimibe! <sup>12</sup> Ib alang weng olo inaminobe. Ib sinwalo alukum weng afet baase baase bianiba maki baaniba Ni Fole meletanobo gesib eka maki baaniba Ni Abolose meletanobo gesib eka maki baaniba Ni Fitae meletanobo gesib eka maki baaniba Ni Klaiste meletanobo gesib blib otane <sup>13</sup> Klaiste wengo olokiemobe. Ibo ib sinwalo alang wengo obiobo kukub olo makob ibo funaniba Klaiste wengo ni aleyebu afet afetobo ge fumbiobe. Mak ibo baaniba Ni Fole meletanobo gabib otane nimeni kenibta ibo inangge obiobe? Ne atdimmo mo kaanita ib hengmino walubeim blimobe. Klaiste eta atdimmo kaaneta ib hengmino walubenebiobe. Ibo ne niniino mo taitnenibta aaye fuelaim blimobe. Klaiste niniino dim ota ibo aaye fuelaibbiobe. Ibo inaibbuo ne okok nakao mo nim blimobe. Ibo Klaiste okok nakaibbiobe. <sup>14-15</sup> Ne aayo ibo homono mo fu-

elabeim blimobe. Ne Klisbas esa Gaias esa i dabo asu ye ita fuelabeibio kesoa naka maki baaniba Fole ni aayo fuelabene kesoa ni e okok nakabo genamino blimobe. Ne olo bobolo fumbiania Gode gangobo gabibe. <sup>16</sup> Ne dokotne biotabe. Stefanis kamwal isa eka i meme isa fuelabei biobe. Naka mak esa fuelabaibione? Makobe. <sup>17</sup> Klaiste ne mo baatnena Kobo naka homon unang homoni aayo fuayemale ge baatneim blimobe. E baatnenea Kobo ne wengo ometneba haabianeba nakaia unangai omkayemale ge baatnenebiobe. Ne Klaiste weng olo ibo omkayebio naka maki dabalim olo inamin namin homono tekein kebianiba inamin namin olo weng sango nakaia unangai oyebibo ulabbabe. Ne i wengo ulab omkeimami mole nakaia unangai ne baatneniba Fole wengo dot ayamobo ge one bianiba ne niniino nemtoubel nomabib otane ne mo inangge baanimbabe. Ne inanimio ibo funaniba Klaiste atdimmo kaanebuo e titilo blimobo ge baaniba e niniino mo dobtoubel nomabibbabe.

*Gode titilo Klaiste nibo alebenebiobe.*

<sup>18</sup> Nakaia unangai nibo hengmino temo biobo dotlanebio nakae Yesuse mo bainobo gabibbai obianiba Yesuse atdimmo kaanebio weng ole weng obba afano ye obiobo ge oyebib naka unang ile kaanimibo alang namanomabiobe. Otane Yesuse nibo hengmino temo biobo dotlanebuo sinanomo dletnea abilimo onomabbio naka unang nib ole obianoba Yesus Klaiste atdimmo kaanebio weng olo weng ayamobo, e atdimmo kaanea Gode titilo nibo alebenebiobo gabuobe. <sup>19</sup> Nibo tekein kebuobe, weng olo bainobe. Niminbabe, Gode e buk tem wengo enangge baanea

Nakaia unangai dabalimo inamin namino alukum tekein kebuobo gabibi i tekein kemino watwat daabena biania eka nakaia unangai funaniba Ni hekmel wengo mitmakamo alukum tekein kebuobo gabib isa i tekein kemini olo omlabenanamabibio genebiobe.

<sup>20</sup> Nakai Gode mo bainobo gabibbai obianiba Ni tekein kemini nakabo, ni hekmel wengo mitmakamo alukum tekein kebianoba weng ayam obiam biobobo gabibi Gode oye bianea I tekein kemini mitmakam blimobo ge oyebebe.

<sup>21</sup> Gode tekein keminsa kesoa e funanea Nakai baaniba Ni tekein kemini nakabo gabibi i bobol tem funino ne alebenoa tekein kenamino blim kesoa i ne mo bainobo geitnenomabibbabo ge funanea e weng olo nibo omkayebaa nibo

e dowan weng olo naka mak unang maki omkayeboba tekein kemini naka eli oye bianiba I weng obba halebo ye obiobo ge oyebib otane naka mak unang mak ile e weng olo wente bianiba bainobo gabib kesoa e i hengmino temo blibo dotlanebuo amit nomabiobe. <sup>22</sup> Yuda item Yudaba item naniba obianiba Ibo weng obba halebo ye obiobo ge oyebiobe. I ina bianiba Yuda naka maki baaniba Gode okok sumo sino e mo klanea ni watemim blimo klanea watemob mole ni tekein kenoba Yesuse bain Gode Dofakamin Nakabio genobta bainobo genomobobo gabibe. Eka Yudaba isa maki obianiba Nibo weng olo tekein kenoba O mitmakamsabo genob mole weng olo wentenoba bainobo genomabiobo gesib bliobe. <sup>23</sup> I inangge obib otane ni Yesuse atdimmo kaanebio wengo nakaia unangai omkayebobo Yuda ile baaniba Gode Dofakamin Nakae Klaiste atdimmo mo kaanemebabo, naka misiam ita atdimmo kaanabib kesoa ni weng olo mo gobo biobabo gesib eka Yudaba ile obianiba I weng obba halebo ye obiobo ge baasib bliobe. <sup>24</sup> I inabib otane Gode Yuda nisa eka naka mak unang maki Yudaba isa dlakanebuo ni e bainobo gabianoba funanoba Klaiste atdimmo kaanebuo e Gode okok osa e titil osa nibo alebenebiobo genoba gobo biobobe. <sup>25</sup> Niminbabe, nakaia unangai mo bianobo gabibbai obianiba Gode bobol tem funini blimobo ge ohabib otane Gode e bobol tem funino nakaia unangai i bobol tem funino alukum gaisenobiobe. Eka i obianiba Gode titilo blimobo gabib otane e titilo i titilo gaisenobiobe.

<sup>26</sup> Ne nekwai ibo ib kukubo sino nabinibbuo bobolo imini funaniba tekein keine! Sino Gode ibo dlakanea bainobo geibbuo dimo fatnamin naka unang binibbione? Ibo alukum tekein kemini nakababe. Eka ibo alukum titilsababe. Eka ibo alukum niniini oyeminbabe. Elekiem olokiemi ib isak temo blib ita maki tekein kebibi blib eka maki titilsa blib eka maki niniini oyemini blib nabe. <sup>27</sup> Naka mak unang maki ibo oye bianiba I tekein kemini blimobo ge oye binabib otane Gode ibo dlakane kesoa e bainobo geibbiobe. Nakaia unangai dabalim olo inamin namino tekein kebibi Gode mo dlakaim blimobe. Gode funanea Nakai ni tekein keminsabo gabib ile tekein keniba Ni bobol tem funino misiamobo geine ge funane kesoa e nakai tekein kemini blim ita dlakanebiobe. Eka naka mak unang maki ibo oye bianiba I titilo blimobo ge oyebib otane Gode ibo dlakanea e bainobo geibbiobe. Gode nakaia unangai titilsai mo dlakaim blimobe. E funanea Nakai Ni titilsabo gabib ile tekein keniba Ni bobol tem funino misiamobo ge fu-



naine gene kesoa e nakaia unangai titil blim ita dlakanebiobe. <sup>28</sup> Nakaia unangai bainobo gabibbai bainobo galin nakaia unangai oye bianiba I niniin blimo besa naka unangobo, i bobol tem funin osa blim kesoa ni i wengo mo wentaobbabo gabib otane Gode i dlakanea bainobo geibbiobe. Nakaia unangai funaniba Ni niniino sumobo gabib ile Gode i mo dlakaim blim kesoa i mo baanibta Ni niniino sumobo genimibe! E oye bianea I niniino blim besa naka unangobo ge oyebebe. <sup>29</sup> Dabalim nakaia unangai teniba Gode ele bobol tem dlakanebuei oye bianiba I tekein kemino blimobo ge oyebib otane naka eli Gode emaye dlakanebiobe. E inanebio kesoa naka make e niniino omfanea Gode kin dimo baanea Ne tekein kemino sumobo genamino blimobe. <sup>30</sup> Gode ibo daabenea Ibo Yesus Klaiste bainobo geniba ete ibte nabliobe. Klaiste e bobol tem funino nibo omkayebeba nibo Gode e okok osa e kukub osa kla tekein kebob kesoa Gode nibo yateanea baabenea Ibo naka molot unang molot kesoa ne naka unangobo ge oyebebe. Sino nibo hengminsa biob otane Klaiste kaanea nib hengmino walubenebua memalo nibo kukub ayamo wafu biobobe. <sup>31</sup> Klaiste inanebueo Gode buk temo baanoa

Nakaia unangai ili niniino mo omfufumibe! I obianiba Gode okoko ayam natlanebiobo ge obianiba ele niniin ota dobtouleb nine! genobiobe.

## 2

*Fole Yesus Klaiste atdimu kaanebueo weng omkeima binebiobe.*

<sup>1</sup> Ne nekwal ibo ne sino ibsuo monia Gode bain wengo omkaye binibueo ne mo funanita Ne inamin namin homono wengo makob tekein kemim nakai wengo ulab omkaye bia nakaia unangai wenteniba bainobo geniba ne niniino nemtouleb nine geim blimobe. <sup>2</sup> Niminbabe, ne sino Kolin bibo natlio ne mo funanita Inamin namin weng sango afet afeto omkayemano ge funaim blimobe. Ne Yesus Klaiste bobolo olota fumbiania ne funania Yesus Klaiste atdimu kaanebueo weng olota omkayemano ge funaibiobe. <sup>3</sup> Ne sino monia ibsuo natlania bekebe binibueo dimo ne tekein kemim osa ne bobol tem funin osa dot sumba kesoa ne funania Ne Yesus Klaiste okoko klao mo okok kemim blim kenimio kukub olo misiamobo ge funania tosiam biania bobolo ilum omfutne binobiobe. <sup>4</sup> Ne sino weng olo ibo omkaye binibueo dimo ne mo funanita Ne i men weng men weng oye bia i funaniba E wengo tekein kemim nakai wengo ulabobo geniba ne niniino nemtouleb nine genita omkayemim blimobe.

Otane Gode Hobe ne daatnenea titilo omnea ne Gode wengo omkeima bia ibo wenteniba baaniba Weng olo bain Gode wengobo gabiniibiobe. <sup>5</sup> Ne inabueo ibo dabalim nakai tekein kemino mo daabeneota Gode bainobo geim blimobe. Ibo Gode ele titil ota daabeneta bainobo geibbiobe.

*Gode Hobe nibo bobol tem funin ayamo omkayebebe.*

<sup>6</sup> Ne tekein kemim nakai wengo ulabo ibo mo omkayemim blimobe. Otane ne Gode wengo naka mak unang maki e wengo kla wentebib ita e tekein kemim weng olo omkayebibe. Ne Gode wengo i omkayebi kesoa i Gode wengo kla tekein kenomabiobe. Ne weng olo tekein kemim nakai dabalim olo blib isa eka dabalim olo komokwal isa i wengo ulabbabe. Naka eli sinanomo kaaiba nakaia unangai i wengo amito mo wentemomabibbabe. <sup>7</sup> Gode tekein kemim weng olo sino ayok binobu ota ne omkeimabibe. Sino Gode weng olo ayok bio kesoa nakaia unangai bainobo gabibbai mo wentemim blimobe. Sinangwano Gode dabal ele mo klaim blim bie dimo e baanea Sinanomo nakaia unangai ne bainobo getnenimibi weng ayok olo kla tekein keniba bobol ayam fumbianiba amit ayam nomabiobo genebiobe. <sup>8</sup> Komokwali dabalim olo blibi Gode weng ayok olo mo tekein keim blimobe. I weng olo tekein kebib biamo nib Sume Gode miine atdimu mo dabanania silo biki ananimibbabe. Otane i weng olo mo tekein keim blim kenibta anaibbiobe. <sup>9</sup> Ina otane nakaia unangai Gode goba blib ita e wengo wentebiobe. Gode buk temo enange baanoa

Gode inamin namin ayamo klanea baanea Nakaia unangai ne wengo gobo blibi inamin namin ayam olo doyamabibo, eka nakaia unangai dabalim olo blibi inamin namin ayam olo waterniba o wengo wentenanamino blimobe, eka nakai inamin namin olo bobolo funanamin osa blim nabo genebiobo genobiobe.

<sup>10</sup> Inamin namin olo ayok bu otane Gode e Hobe baabanea Kobo ne weng ayok olo ne bainobo galin nakaia unangai aleyemale ge baabanea e Hobe e weng ayok olo nibo alebenebiobe. Gode Hobe inamin namino alukum tekein kebianea Gode bobol tem funin osa eka e wengo sino ayok binobu osa e alukum tekein kebebe.

<sup>11</sup> Nakae naka make bobol tem funino tekein kenamino blimobe. Naka ele emaye ele bobol tem funino tekein kebebe. Eka nakai Gode bobol tem funino tekein kenamino blimobe. Gode Hob eta Gode bobol tem funino tekein kebebe. <sup>12</sup> Nib

bobol tem funino dabalim nakai bobol tem funino ulabbabe. Gode e Hobe nibo dobyebue e nib bobol temo bianea Gode inamin namino nibo daayebeo aleyebe kesoa nibo Gode daayemin kukubo kla tekein kenomabbio. <sup>13</sup> Gode bobol tem funin olo ni omkayebeo wafu bianoba weng olo ibo omkayebuobe. Ni inabobo dabalim nakai bobol tem funino mo omkeimabob-babe. I Gode Hobe wengo omkayebe ota omkeimabuobe. Ni Gode Hobe wengo wente bianoba weng olo Gode Hobe nakaia unangai i bobol temo bibe bie ita omkaye buobe.

<sup>14</sup> Nakaia unangai Gode e Hobe i bobol temo mo bibe bieba ile Gode Hobe wengo mo wentebibbabe. I funaniba Weng obba halebo ye obiobo gabianiba i weng olo mitmakamo mo tekein kebobbabe. Gode Hobe nib bobol temo bibe bie naka unang nibta e wengo aleyebeo tekein kebuobe. <sup>15</sup> Nakaia unangai Gode Hobe i bobol temo bibe bie ile tekein kebianiba inamin namin olo ayamobe, misiambobe, gabianiba tekein kebib otane nakaia unangai Gode Hobe i bobol temo mo bibe bieba ile Gode Hobe bibe bie naka unang nib bobol temo i mo tekein kebobbabe. <sup>16</sup> Niminbabe, Gode buk temo baanoa

Nakaia unangai nib Sume e bobol tem funino mo tekein keniba eka e okoko mo alebana nomabibbabo genobiobe.

Ina otane Klaiste bobol tem funino Gode Hobe nibo omyebio kesoa nakaia unangai Gode Hobe i bobol temo mo bibe biebai nib bobol tem funino mo tekein kenomabib-babe.

### 3

#### *Gode okok nakai wengobe.*

<sup>1</sup> Ne nekwal ibo sino ne ibo bekebe biana Gode wengo omkaye binibio dimo Ne wengo makob memalo Gode Hobe nakaia unangai i bobol temo bibe bie nania omkayebi inamin wengo ibo mo omyim blimobe. Nakaia unangai mema bainobo genimib ile makob meme gwabi ulabobe. Sino ne Gode wengo ibo omkaye binibio dimo ibsa makob meme gwabi ulab bianiba Gode Hobe wengo mo sbalma wafueim blim binibbio. Ibo ina bliiba makob ne nania nakaia unangai Gode Hobe i bobol temo mo bibe biebai wengo fiab omkayebio weng ota ibsa omkaye binibio. <sup>2</sup> Ib bobol tem funino makob meme gwabi bobol tem funino ulab kesoa ibo Gode weng sbalo mo wentim blimobe. Ne wengo ibo omkaye binibuo makob meme gwabi moio wembibo ulabobe. Ne weng olo naka gang unang gangi imeno wembibo ulabo

mo oyim blimobe. Memalosa ibo sma ib bobol tem funino makob meme gwabi ulab blib kesoa ne meme gwabi imen ota imin oyamabibe. <sup>3</sup> Ibo sin kukubo amitie wafu bianiba kukub misiamo sma ye nabiobe. Ibo ina bianiba ib nekwal maki bainobo gabibi dosuambiba ib sinwalo dleb weng obib kesoa ne tekein kebibe, ibo sin kukubo sma ye nabianiba nakaia unangai bainobo gabibbai kukub ota ibo wafu bliobe. <sup>4</sup> Ibo ina bianiba maki baaniba Ni Fole meletanobo gesib eka maki baaniba Ni Abolose meletanobo gesib bianiba kukub misiamo sma ye wafu bliobe. Ib kukub olo nabibo makob bainobo galinbai kukubo ulabobe.

<sup>5</sup> Ibo kla funaine! Ibo nimin kenibta baka bianiba mak Ni Abolose meletanobo gese maki baaniba Ni Fole meletanobo gese blibe? Ni dabo besa Gode okok nakabe. Sume emaye ni okoko afet afet omkayebe kesoa ni e okoko okok kebianoba e wengo ibo omkayeboba wenteniba bainobo geib-bio. <sup>6</sup> Ni okoko makob nakai dango dikilanabib inaminobe. Ne Gode okoko omnebuo okok kebiania Gode wengo ibo sin omyibio. Ne okok olo inaubuo makob imen sano dolmaibio. Eka Abolose ele ne abuk tenea okok kebianea Gode wengo ibo aleye binebio kesoa kukub olo makob e damib olo aliamo betelanebio. Ni okok olo inanoba okok kebob otane Gode emaye e bobol tem funin ayamo ibo omkayebea ibo e wengo kla wente bianiba bainobo geniba bobol ayam fuminibbuo kukub olo makob Gode emaye imen olo daabonea ayam utlanoa damo damanobio. <sup>7</sup> Nakae imen sano dosan binabe naka esa eka aliamo betawe binabe naka esa i niniin blimobe. God eta imen olo klabea damam binabo kesoa e niniin ota sumobe. <sup>8</sup> Ni dab ni okoko makob naka asu dabi naniba make imen sano dosambea eka make aliamo beta biam nomabib inanoba ne Gode wengo ibo sin omyena bia eka Abolose ele ne abuk tenea ibo daabonea Gode wengo omyena dosbalma nanebio. Ni dab ni okoko makobobe. Sinanomo ni dab ni okok olo nabobo Gode klanea okok olo kinea o molo yang kenamabebe. <sup>9</sup> Abolose ni dabo Gode e okoko omye kesoa ni dabo asu kebianoba Gode okoko okok kebuobe. Ni inabobo ibo makob Gode damibo ulab kesoa ni dabo dang olo klabuobe. Eka ibo makob Gode amo ulab kesoa ni am olosa gembiam biobobe.

*Bainobo gabib nakai makob nakai amo genabib inaminobe.*

<sup>10</sup> Ne makob naka maki amo genom gaibo maki sin teniba amuno hakena olabba onsiba eka maki teniba biino omfa

onsiba eka maki teniba molongo tebelaniba waao baniba genabib inania ne sin tlia Gode daatnenea ibo Gode wengo omkayebi onsia eka naka make ne abuk tle ele tenea Gode wengo imin meseinea omkayebebe. Nakaia unangai amo genom gaibo kla funaniba Inabonomobobe geniba klanabib inaniba ibsa Gode okoko kla okok kemine! <sup>11</sup> Nibo tekein kebuobe, Gode Yesus Klaiste baabanea Kobo makob sbal amuno isak daako bikieibbua geiowanao am damo sbalma binabo ulabobo ge baabanebio kesoa naka maki sbal amune afete haleb teniba bikinamino blimobe. Olo makob inaminobe. Ne Yesus Klaiste wengo ibo sin omia wentibbio kesoa naka maki imin teniba naka afeti wengo ibo imin omkayemib mole ibo weng olo mo wentaibe! <sup>12</sup> Nakaia unangai Gode bainobo gabibi makob am genalin nakai ulabobe. Maki okoko ayam okok kebib ile makob nakai amo genoma bianiba sbal aso amit namabo heleb te bikinabibo ulabobe. Eka maki okoko ayam okok kebibba ile makob nakai amo genoma bianiba amuno beit aso heleb te bikinibbua hebmamsab aluanabo ulabobe. <sup>13</sup> Sinanoa Gode nakaia unangai okoko klanamabe amo tlamo inamin namino makob atol inamino tenoa nakaia unangai i okoko nabinibbuo alebenamabobe. Ibo sbal as osa beit as osa o bobolo funaine! Amun olo inanao aso tubu einomo sbal amun olo mo kibanomobabe. Ina otane beit amun ole alukum kibanoa nibo watem tekein kenoba as olo misiamobe genomabbiobe. Gode nakaia unangai okoko klanamabe amo tlamo inamin namino makob atol inamino tenoa bainobo galin nakaia unanga nibo okoko nabinob biamo alebenoa nib sinwalo watem tekein kenoba okok olo ayamobe misiamobe genomabbiobe. <sup>14</sup> Nakaia unangai i okoko ayam okok kebinib biamo Gode okok olo molo yang kenea inamin namin ayamoyamabebe. <sup>15</sup> Eka nakaia unangai okoko misiam okok kebinib biamo ile i okoko misimu benoa makob nakai am tam bliiba am aso tubunoo amit deibla waisesoa afobeingo alukum am tam deiboniba naka ita gilana moniba embianoo afobeingo alukum kibabenoa deiboniba afobeingo blim binabib inaniba nakaia unanga elisa abilimo utniba amit nomabib otane i okoko molo misimu benoa deiboniba inamin namino blim besa nomabiobe.

*Bainobo galin nakaia unanga nibole makob Gode amobe.*

<sup>16</sup> Nakaia unangai Gode bainobo gabib ibo alukum makob Gode amobe. Gode Hobe ib bobol temo bibe bie kesoa ibo olo mo dokobenomone! <sup>17</sup> Nakai wanita ibo

watwat dabeib mole olo makob i Gode amo watwat dabonomabiobe. Eka i Gode amo watwat dabueib mole Gode naka elisa watwat dabenamabebe. Niminbabe, Gode am ole dot ayamobe. Eka bainobo galin nakaia unanga ibole alukum Gode am ayamobe. <sup>18</sup> (-)

*Nibo Gode niniino olota dobtouleb nomo!*

<sup>19</sup> Nakaia unangai dabalim olo inamin namin homono tekein kebib ile Gode oye biana I tekein kemino blimobo ge oyebebe. Gode buk temo baanoa

Nakaia unangai bainobo gabibbai obianiba Ni tekein keminsa kesoa inamin namin olo nanomabbiobo gabib otane Gode baabenea Ibo inamin namin olo mo nanomabibbabo ge baanea i watwat dabenamabebo genobiobe.

<sup>20</sup> Weng mak osa Gode buk temo imin baanoa

Nakaia unangai dabalim olo inamin namino alukum tekein kebib Gode i bobol tem funino watemnea baanea I tekein kemino blimobo gabebo genobiobe.

(v18) Inamin kesoa ibo ne weng olo baabenamabio wentine! Ibo ib bobol temo dim bobolo mo funimibe! Naka maki ib isak temo bliiba ili untak ngambianiba baaniba Ni tekein kemina nakabo, inamin namino dabalim olo buo ni alukum tekein kebuobo ge baabib mole i bobol tem funin olo ayambabe. Eka nakaia unanga eli i tekein kemino alukum deibueiba naka mak unang maki yateniba baabeniba I tekein kemina blimobe ge baabeib mole Gode e bobol tem funin osa e tekein kemina osa nakaia unang eli omya i bobol tem funin osa tekein kemina osa ayam anomabiobe. <sup>21</sup> Ibo weng olo bobolo funaine! Ibo nakai niniino mo dotouleb bianibta obianibta I tekein kemino sumobo ge oyemibe! Ibo Gode elekiem ele niniin ota dobtouleb nine! E naka elisa inamin namin osa alukum ibo doyebua i ibo daayebiobe. Gode naka elisa inamin namin osa ibo dokayebe kesoa i alukum ibmiobe. <sup>22</sup> Abolos esa Fita esa Fol nesa ni ibmi kesoa ni ibo daayebuobe. Gode ibo baabenea Afenomabiobo gene meo ibo afenomabiobe. Eka e baanea kaanomabiobo gene mole ibo bain inaniba kaanomabiobe. Inamin namino dabalim olo bu osa eka inamin namino ib dimo memalo tam tlebo osa eka inamin namino sinanoa ib dimo tam tlamabo osa Gode

alukum ibni omyebiobe. <sup>23</sup>Eka ibole Klaist emiobe. Eka Klaist ele God emiobe.

#### 4

*Sum eta nakaia unangai okoko nabibo klanamabebe.*

<sup>1</sup> Ibo ni bobolo funaniba oye bianiba I Klaiste okok nakabo, sino Gode wengo ayok binabo e i omyenea baabenea Ibo ne weng olo omeb moniba nakaia unangai omkayemine ge baabenebio kesoa i weng olo ni omkayebiobo ge oyemine! <sup>2</sup> Gode bobol tem funino inaminobe. Makob kimanin nakai funaniba Ni okok nakai ni wengo kla wente bianiba ni okoko kla okok kemine ge funanabib inanea God esa ni bobolo funanea Ne okok dlasanin nakai ne wengo kla wente bianiba ne okoko kla okok kemine ge fumbebe. <sup>3</sup> Ibsa naka mak unang mak isa wanita ne okoko nabio watemutneniba Misiam nabeobo genim-ibo ne bobolo ilumo mo omfutnenomobabe. Eka ne nene okoko nabio mo watenita baanita Ne okok olo misiamobo genanimibabe. <sup>4</sup> Ne funania Sino ne ibo bekebe biania okoko nabinibuo ne okok olo ayam okok kebinibiobo ge fumbi otane ne funin olo baine dime makobe. Otane nib Sume elekiem eleta olo tekein kebebe. Emaye ne okoko nabinabio watemutneneta Ayam nabinebbiobe, misiam nabinebbiobe genamabebe. <sup>5</sup> Nib Sume mo tlim blim bie dim olo ibo nakaia unangai okoko nabibo mo waternibta oye bianibta I okoko misiamobe, ayamobe galaibe! Ibo Sume tlamabe ota waisanine! E tenea inamin namin okok olo i ayok fumbianiba nabibo omkeimanea nakaia unangai alukum watemomabiobe. Am olo dimo Sume emaye nakaia unanga nib okoko nabinob biamo watenea nib okoko ayam biamo baabenea Ib okok olo nabinibbuo ayamobo ge baabenamabebe.

*Kolin bib seli ili tak ngambinibbiobe.*

<sup>6</sup> Ibo ib kimanin nakai niniino dotouleb blib kesoa kukub olo ne Abolose ni dab ni niniino dolania alebenamabibe. Ne inanamabio ibo ib kimanin nakai bobolo kla funaine! Ibo ni weng olo wentaibo Gode wengo e buk temo buo kla funaine! Ibo ib sinwalo ib niniino mo omfufu bianibta Ni kimanin nakai ib kimanin nakai gaiseibobo gese gese nimibe! <sup>7</sup> Niminbabe, ib isak temo naka make niniin sum anea mak ibo kimanamino blimobe. Ibo alukum makobobe. Ibo mo obianibta Ni niniin sumobo galaibe! Ib inamin namin olo God eta omkayebe kesoa ibo mo obianibta Ni nini titil ota inamin namin okoko nabuobo gabianibta ib niniino mo omfufumibe!

<sup>8</sup> Ibo fumbianiba Ni Gode wengo tobtlin halonamino blimobo, ni o mitmakamo alukum tekein kebuobo ge fumbianiba eka mak osa enangge funaniba Ni Gode kin dimo e wengo alukum tekein kebianoba niniin sum anobobe. Folwal ile mo inanibta Gode kin dimo e wengo alukumo mo tekein keim blimobo ge fumbiam blib otane ibo bain inaniba Gode kin dimo e wengo alukum tekein kebib mole ne kla seinamabibe. Niminbabe, ibo memalo bain inaniba Gode kin dimo e wengo alukum tekein kenimibo nisa inanoba Gode kin dimo e wengo alukum tekein kenomabbu otane memalo nibo mo inaim blim biobobe. <sup>9</sup> Ne funania Gode e okok dlasanin naka ni baabenea Ibo besa nakabo ge baabenebio kesoa ni makob sino naka maki inamin namino nasiba kiabwali dleb moniba komoke dimo kot keiba komoke baanea Yenaine genea i yenaiba nakaia unanga isa abisel isa yatembuei ulabobo ge funaiobe. <sup>10</sup> Ni Klaiste wengo omkayebob kesoa naka mak unang maki baabeniba Ibo weng obba halebo ye obiobo ge oyebiobe. Eka ibole fumbianiba Ni Klaiste meletan kesoa ni tekein kemino sumobo ge fumbiam blib otane ibo tekein kemim blimobe. Nakaia unanga eli ni yateniba baabeniba I titilo blim eka i niniin osa sum nababo ge oyebibo ibo fumbianiba Ni titilo sbalobo, naka mak unang maki ni baabeniba I niniin sumobo ge baabeine ge fumbib otane ibo titilo blim eka ib niniin osa blimobe. <sup>11</sup> Sino ni Gode okoko okok kebobo naka mak unang maki ni mo daabenibta inamin namino mo dokayemin blimobe. Ni memalosa imin inanoba imen teb aa teb bianoba okok kebuobe. Ni youm ayam osa blimobe. Ni inaboba naka mak unang maki teniba yebiam bliba misiam biobobe. Ni bib mak bib mako haabiob osa amo blimobe. <sup>12</sup> Ni nimaye okok kebianoba monio boka bianobta imeno walo wembianoba youmo walo kibiam bianobta okok kem haabiobobe. Ni inabobo naka mak unang maki teniba ni weng dobo wengo oyemib osa ni Gode baabanoba Kobo nakaia unanga eli daabenale ge ohabuobe. I ina bianiba ni enino omkayebib otane ni mo yang kebobbbabe. <sup>13</sup> I weng misiam oyemibo ni weng ayam oyebuobe. Ni inabobo nakaia unangai mo bainobo gabibbai fumbianiba I besa nakabo makob ni inamin namin misiamo dibianabobo ulab kesoa ni i wengo mo wentubenomobabo ge fumbiobe. I bobol tem funin olo sino inangge fumbinabib biota memalosa imin inangge fumbiobe.

*Kolin bib sel isa makob Fole okok kebe inamine!*

<sup>14</sup> Ne weng olo ibo dola omfubenamabio ne mo funanita I ne weng olo wenteniba aal waisenoko genita dola omfubenanobabe. Ibo makob ne meme dikin kesoa ne ibo kla gobe blibe. Ne weng olo ibo dola omfubeniio kla wenteniba ni niniino omfufumin kukub osa kukub misiamo afet osa alukum deibueine! <sup>15</sup> Naka homoni Gode wengo ibo aleyebib kesoa kukub olo ayamobe. Ina otane ib aywal ile homonbabe. Nenekiem netabe. Nemaye sino Yesus Klaiste wengo ibo omkaye bia ibo e weng olo wenteniba bainobo geibbio kesoa ne makob ib ayobe. <sup>16</sup> Ne makob ib ay kesoa ne weng olo baabenimio ibo kla wenteniba makob nene nania Yesus Klaiste kukubo wafubli inaniba ibsa wafueine ge funai <sup>17</sup> kesoa ne Timotie baabania Kobo moneba Kolin bib sel isu one ge baabania dabaia natlebe. Timotie sino ne Gode wengo omalia e wentenea bainobo genebio kesoa e makob nene miin dikinobe. Ne e kla goba blibe. E Sume okoko kla okok kebinabebe. E ibsuo natlamabeo makob ne nania monia bib mak bib mako Yesus Klaiste wengo nakaia unangai omkaye binabi inanea esa ibo Gode wengo omyamabebe. E ne okoko nabinabio weng sango ibo baabenemeo ibo kla wenteniba makob ne nania Yesus Klaiste kukubo wafu binabi inaniba ibsa wafueine!

<sup>18</sup> Ib isak temo naka maki ili niniino omfufu bianiba baaniba Fole tosiamabe kesoa e nisuo mo tlamabebabo ge one bianiba ne wengo omdibinebiobe. <sup>19</sup> Nib Sume ne baatnenea Kobo hebmsamsab moneba Kolin bib sel isu one gene mole ne natlamabibe. Ne natlamio nakai ili niniino omfufubib eli wengo wentenia i okok osa watemala ayam nabib mole i bain Gode Hobe titil ota omkayebeta nabioebe genamabibe. Eka i afet nabib mole olo Gode Hobe titilbabe ge funanita tekein kenamabibe. <sup>20</sup> Niminbabe, nakaia unangai Gode kima bie i besao mo bianibta wengo obibbabe. Gode Hobe titilo i omkayebe kesoa i e titilo wafu bianiba e okoko kla okok kemomabiobe. Inamin kesoa nesa naka eli okoko nabib ota yatenita i kukubo tekein kenamabibe. <sup>21</sup> Ibo ne wengo wentaibo fatnangge funanomabibe? Ibo funaniba Nibo Fole wengo wentob yole kukub misiamo deibonoba kukub ayam ota wafu bioba Fole tenea yatenea bobol ayam funanea seinye bianea weng ayamo omkayemeko ge funanomabiba bleka ibo funaniba Nibo kukub misiam ota wafu biobta Fole tenea dosuananeko ge funanom gaib osa ilib sanobe.

## 5

*Bainobo galin nakaia unangai Kolin*

*bibo blibi taman kukubo wafu binibbiobe.*

<sup>1</sup> Ne weng mako wentia nakaia unangai obianiba Kolin bib seli bainobo galin nakaia unangai isak temo taman kukubo naniba naka make tenea e aalebe alelo sbilo omeisa unebo gena wenti kesota futan olo dola omfubenamabibe. E kukub olo dot misiam nanebe. Bainobo galinba nakaia unanga isa kukub olo mo nanabibbabe. <sup>2</sup> Ibo ilib tak ngambianiba baaniba Ni Yesus Klaiste bainobo genobio kesoa ni naka ayam unang ayamobo ge obib otane naka make hengmino hengabe ib isak temo bie kesoa ibo ilib untako mo ngambianibta seinimibe! Bobolo ilum omfubenoko! Ibo nakae ibsuo bianea kukub misiamo nabe mo deibaibta bianeta kukub misiamo amito mo namene, fotebeiba uneko! <sup>3</sup> Ne nib sinwalo mo biobbabe. Ne skeim ele bli otane ne ib bobolo funania nib Sume Yesus Klaiste niniin dimo ne ibo baabenamabio Naka ele kukubo misiamobo genamabibe. Ne ibtem nabiaob osa ne inangge baanamabibe. <sup>4</sup> Bainobo galin nakaia unanga ibo mina bianiba wengo omom gaib dimo ne ib bobolo fumbia nib Sume Yesus Klaiste ibo bekebe bie kesoa ibo Sume Yesuse niniin dimo <sup>5</sup> naka misiam ele baabaniba Kobo nisuo deibeneba moneba Gululam esu uneba e enin kino omleko ge baabaine! Ibo inabaiba Gululame e enino omalea e enin kino watenea funanea Ne kukubo nabio misiamobo ge funanea e kukub olo deiboneko! E inanea kukub misiam olo deibone biomo sinanomo nib Sume imin tlameo e naka ele debeb utnea Gode bib ut danea amit namabebe.

*Kolin bib seli bainobo galini kukub ayam ota wafueine!*

<sup>6</sup> Ibo obianiba Ni Gode wengo kla wente bianoba kukub ayamo wafu biobobo ge obianiba ib niniino omfufubib kesoa ib kukubo misiamobe. Ibo funaine! E kukub misiamo nabe olo makob nakai kulani mana bianiba mato welabbe bosiba mat gamo daatnoa damo tem daak unanoa dikibanoo mat gam eta weitam dibianabe inanoa e kukub misiam olo nabeo sum anoa naka mak unang mak ib bobol tem osa alukum watwat dabenamabobe. <sup>7</sup> Ne kukub olo bobolo funanita weng olo baabenamabibe. Kukub misiam olo nabe nakae makob kulani mato welabbanomo tlaknoa damo temo alukum weitam dibianabo inanea naka ele bainobo galin naka mak unang mak ibo ib bobol temo watwat dabenamabe kesoa ibo naka ele baabaniba Kobo nisuo de one ge baabaine! Kukub misiam olo ib isak temo mo nim blim keno mole Gode ibo baabenea Ne kin dimo ibo

naka molot unang molotobo ge baabenamabebe. Sinanggwan Isib betano Yudai eil sibsibi mema eili yenaniba ilemo deloniba amito alieibbuwa abisake tenea ilemo watenea deibenea Isib ten ita yalebiobe. Yudai olo bobolo fumbianiba singka binibuo singkalin am olo niniino Fasoba otabe. Klaiste makob eil sibsib mene ulab anaiba kaanea e ileme singanea nib hengmino omlabenebio kesoa Gode nibo oye bianea Ibo ne kin dimo naka molot unang molotobo ge oyebebe. Klaiste inanea nib hengmino omlabenebio kesoa ibo kukub misi-amo nabe naka baabaniba Kobo nisuo de one ge baabaine! <sup>8</sup> Ibo inaniba nibo Klaiste bobolo funanoba makob sino Yudai naniba Fasoba imeno downom gaibo sin imeno deiboniba mema imen ota downabib inanoba nibo sin weng osa sin kukub osa deibonoba mema weng ota obianoba mema kukub ota wafunanomo!

<sup>9</sup> Ne futano sino dola omfubeibuo baabeniba Bainobo galin nakaia unangai tamano hengabibi ibo mo deibenibta i tena nimibe ge baabeibiobe. <sup>10</sup> Ne weng olo ibo baabeibio dimo ne nakaia unangai bainobo gabibbai bobolo mo funaim blimobe. Nakaia unangai bainobo geim blimi i kukubo inaminobe. Maki tamano hengabibi blib eka maki naka mak unang maki inamin namino bobolo wayebuei blib eka maki naka mak unang maki afobeingo ayok oise unebibi blib eka maki god dim omini niniino dotouleblibli blib na otane ne ibo mo baabenita Ibo nakaia unanga eli mo tena nimibe ge baabenimibabe. Niminbabe, inabib naka unangi bib mak bib mako alukum blib kesoa ibo deibe onamino blimobe. <sup>11</sup> Ina otane ne wengo sino enang genita baabeibiobe. Nakai wanita Ni bainobo gabuobo gabib otane i tamano henga bianiba i inamin namino imaye bobolsa kebianiba god dim omini niniino dotouleblibli naka mak unang maki inabiobo geniba dim oye bianiba eka aa misiamo homon downoniba gabam tol temo mima fubenoa weng namin namin bianiba eka naka mak unang maki afobeingo ayok oise une biam blib nakai ib sinwalo makobo mo bianibta i mo temna haabianiba eka imeno dait osa mo unalaibe geta baabeibiobe. <sup>12-13</sup> Ne sino baabeibuo Nakaia unangai bainobo geim blimi bobolo mo funanita ibo baabeim blimobe. Niminbabe, ne i kukubo mo klamibabe. Olo ne okokbabe. Gode emaye i kukubo klanamabebe. Ina otane nele nakaia unangai bainobo gabianiba kukub misiamo nabibi i bobol ota funanita ibo weng olo baabeibiobe. Bainobo galin naka mak unang maki kukub misiamo nanimibo dlo klamin kukub olo nib okokobe. Gode

buk temo baanoa

Bainobo galin nakaia unanga ibo mibianiba ib isak temo naka mak unang maki kukub misiamo amitie namib mole fotebeiba unine genobio

kesoa ibsa inaniba kukub misiamo nabe naka ele baabaniba Kobo nisuo deibe one ge baabaine!

## 6

*Bainobo galin nakaia unanga ibo ib sinwalo maki mo kot kebenimibe!*

<sup>1</sup> Bainobo galin nakaia unanga ibo bainobo galin naka maki inamin namin misi-amo nabesiba dleb moniba kiabwali bainobo gabibbai baabeniba Ibo naka eli ni sinwal ni kukubo klaine ge baabeib mole kukub olo misiamobe. Otane ibo moniba bainobo galin naka mak unang mak isu unaniba baabeniba Ibo naka eli ni sinwalo dlo klaine ge baabeib mole kukub olo ayamobe. <sup>2</sup> Ibo tekein kebiobe, sinanomo Gode bainobo gabob naka unang nibo bainobo gabibba naka unangi i kukubo klanomabbio kesoa ibo okok gwabo kla okok kebianiba ib sinwal ib dimo klamine! Ibo okok gwab olo mo klaim blim deibo binib biamo sinanomo fatnanibta okok sum olo klanomabibe? <sup>3</sup> Ibo mo funanibta Ni kukubo memalo nabobo mo klanomabbio babo ge funimibe! Niminbabe, sinanomo bainobo gabob nibo abiseli kukubo sum ota ye klanomabbio kesoa nibo nib kukub gwab gwabo memalo nabob ole klanom gaobo sma klanomabiobe. <sup>4</sup> Inamin kesoa bainobo galin naka mak unang maki ibo kukub misi-amo omkayebiba ibo funaniba Ni i kot kebenobtabo ge funaib mole ibmaye i kukub olo klamine! Ibo mo monibta naka maki bainobo gabibbai mo baabenibta Ibo naka eli ni sinwalo dlo klaine ge baabenimibe! <sup>5</sup> Ne weng olo ibo baabeia wenteniba aalo waisenoa inamin kukubo deibueine genita baabenamabibe. Ibo fumbibo Ni isak temo nakai bobol tem ayami ni kukubo klanamini blimobo ge fumbianibta nabiba? Yeye ibo inamin bobolo mo funimibe! Nakai bobol tem funin ayami ib isak temo ye bliobe. <sup>6</sup> Ibo inaminamo deiboniba bainobo galin naka maki ibo inamin namino nabanimibo dleb moniba kiabwali bainobo gabibbai baabeniba Ni kukub olo klaine ge oyeib kesoa ib kukub olo misiamobe.

<sup>7</sup> Ibo ib sinwalo inabib kesoa ne tekein kebiobe, ibo Gode bobol tem funino mo wafu nim blim bianibta kukub olo nabioibe. Ib sinwalo ina bianiba naka maki ibo kukub misiamo omkayebiba eka mak ile

ib afobeingo ayok oise une biam nib-  
ibo ibo moniba kiabwali bainobo gabib-  
bai baabeniba Ibo ni kukubo klaine ge  
baabenamino deibonib mole ib kukub olo  
ayam <sup>8</sup> otane ibo inanamino deiboniba  
naka maki dleb moniba kiabwali dimo kot  
keyebib kesoa kukub olo makob ibmaye  
kukub misiamo bainobo galin naka mak  
unang maki omkaye bianiba i afobeing osa  
ayok oise unebiobe.

<sup>9</sup> Ibo mo funanibta Bainobo galinbai  
kukub misiamo nabinabibi moniba Gode  
kimanim bibo unomabiobo ge funimibe!  
Bobol tem funin olo dim kesoa ibo mo fu-  
nimibe! Nakaia unangai tamano hengamin  
kukubo wafu blib isa eka god dim omini  
niniino dotouleb nin kukubo wafu blib  
isa eka nakai naka maki alelwali taman  
deib doise haanin kukubo wafu blib isa  
eka unangi unang maki imakwali taman  
deib doise haanin kukubo wafu blib isa  
eka nakai ili skil naka maki taman deib  
dleb haanin kukubo wafu blib isa <sup>10</sup> eka  
nakaia unangai naka maki afobeingo ayok  
oise unemin kukubo wafu blib isa eka  
nakaia unangai naka maki inamin namino  
bobolo wayemin kukubo wafu blib isa  
eka nakaia unangai aa misiamo homon  
downoba gabam tol temo mima fubenoa  
weng namin namin nin kukubo wafu blib  
isa eka nakaia unangai naka mak unang  
maki dim oyemin kukubo wafu blib isa  
eka nakaia unangai naka mak unang maki  
yananiba i afobeingo ayok oise unemin  
kukubo wafu blib isa i mo monibta Gode  
kimanin bibo unomabibbabe. <sup>11</sup> Sino ib  
isak temo naka maki kukub olo wafu  
binibbu otane ibo nib Sume Yesus Klaiste  
bainobo geniba Gode ib hengmino omt-  
labenea bobol tem funin ayam ibo omye-  
nea baabenea Ibo nemioobo ge baabenea  
e Hobe ibo dohyenea e ib bobol tem  
daako bia etem nib Sume Yesus Klaiste  
tenaniba ibo daayebiba Gode baanea Ne  
kin dimo ibo naka molot unang molotobo  
ge baabenebiobe.

*Bainobo gabob nib damo makob Gode  
amo ulab kesoa kla kimanomo!*

<sup>12</sup> Naka maki ib isak temo blibi obianiba  
Yesus Klaiste kukub homono mo wataim  
blim kesoa ni kukub olo nanomobo mo  
henganomobbabo gabib otane ne  
baabenamio Ibo kukubo naiba o mo  
daabeim blim keno mole ibo kukub olo  
deibueine! Nibo kukubo mo daabenam-  
abobao namob mole nibo kukub olo bobolo  
amitie fumbianoba Gode bobolo funino  
dokobenamabo kesoa nibo kukub olo mo  
wafunomobe! <sup>13</sup> Naka maki ib isak temo  
blibi obianiba Gode nib alo klaubenebua  
nibo imeno downaoba daaknoa al olo

tem daak une binabobe. E inanea imen  
olo alo daabonoko genea klanebiobo ge  
obianiba eka weng mak osa baaniba  
Taman kukub osa nib damo daabenoko  
geneta Gode klanebiobo ge obiam binabib  
otane ne weng olo baabenimio nakai ib  
isak temo bianiba kukub olo nabibi kla  
funaine! Imen osa al osa o mitmakam  
blimobe. Sinanomo Gode baanea Obo  
blimanale genea blimanamabobe. Otane  
ib dam ole mit afetobe. Gode nib damo  
klaneo e mo baaneta Ibo taman kukubo  
wafueine ge baabeim blimobe. E nib damo  
klane dimo e baabenea Ibo ne wengo  
kla wente bianiba ib Sume Yesus Klaiste  
okoko kla okok kebiba e ibo kimaneko ge  
baabenebiobe. Gode inang genebio kesoa  
nibo tamano mo hengamobe! <sup>14</sup> Nib Sume  
Yesus Klaiste kaanea Gode imin dofaanea  
hananebio kesoa nibsa kaanomobo Gode  
imin dohaanea hananoba nib damo  
memao omyia amit nomabbiobe. Nibo  
inanomabbio kesoa tamano hengamino  
deibonomo!

<sup>15</sup> Ibo tekein kebiobe, ibo Sum emi kesoa  
ibo makob e skilon ole eka e kweilon ole  
eka e kin nabe. Ibo makob e dam kesoa  
ibo moniba unangi tamano henga binabibi  
dleb haaib mole kukub olo makob nib  
Sume Yesuse dam atosino unang olo taman  
deib omeb haabianea e dam osa unang  
olo dam osa i makob anomabib inaminobe.  
Kukub olo ayama? Yeye kukub olo dot  
misiam kesoa ibo mo namine! <sup>16</sup> Ibo tekein  
kebiobe, nakae unango tamano henga bin-  
abo omeb haane mole e dam osa eka o dam  
osa i makob anomabiobe. Gode buk temo  
enange baanoa  
Nakae unango omeb haane mole i damo  
makob anomabiobo genobiobe.

Inamin kesoa unangi tamano henga bin-  
abibi mo dleb haanimibe! <sup>17</sup> Ibo nib Sume  
Yesus Klaiste bainobo gebaniba ibtem etem  
nanib mole ib bobol tem funino makob  
anomabiobe. <sup>18</sup> Ibo bliba nakaia unangai te  
baabeniba Nibo tamano henganomo geib  
mole ibo i wengo mo wentenibta inamibe!  
Deibeine! Naka mak unang maki kukub  
misiamo afeto namibo kukub olo i damo  
mo watwat dabenamabobabe. I tamano  
henganimib ota i damo watwat dabenam-  
abobe. <sup>19-20</sup> Ib dimo kukub misiamo mo  
namibe! Niminbabe, ib dam ole Gode  
amobe. Gode Hobe ibo dohyebua ib bobol  
tem osa ib dam osa bibe biebe. Gode  
ibo dohalilanea e miine dabanea daakenea  
atdimo kaanea ibo hengmino temo blibo  
walebio kesoa ibo God emiobe. E inanebio  
kesoa ibo ib damo ibmalo mo kima blii-  
babe. God eta ib damo kima biebe. Ibo  
mo baanibta Ni nini bobol tem funin ota

wafu nomabbio bo ge obianiba eka unangi tamano henga binabibi taman deibo mo dleb haananimibe! Niminbabe, Klaiste ib hengmino walubenebio kesoa ibo e kukub osa e okok osa kla okok kebianiba e niniino dobtoule b nine!

## 7

*Nakai alelwali dlonamin kukubo wengobe.*

<sup>1</sup> Ne ib futan olo omfutneibbuo ne ib weng olo yang kebenamabibe. Nakai wanita alelwali dlonamino deiboniba besa kakat nimibo ayamobe. <sup>2</sup> Ina otane ibo alukum kakat bianiba maki tamano henganimib kesoa naka ibo alelwali bolaiiba eka unangi imakwali bolananiba kamwal keine! Naka kobo unango omo biaebo bayota omo bianebte! Kobo unang maki taman deibo mo dleb haanemebe! Eka unang obsa imake dobo biaebo bayeta dobo bianebte! Obo mo deibanebta naka maki taman deibo mo dleb haanemebe! <sup>3-4</sup> Alel obo ob damo obmalo mo kima biebbabe. Imak eta ob damo kima biebe. Eka imak keb damo osa inaminobe. Keb damo kebmalo mo kima biebbabe. Alel ota keb damo kima bio kesoa alelo imak kobo baabkenoa Kobo ne nemet nale geno mole imak kobo o wengo mo ombiabone-mebe! Wentubonale! Eka alel obsak imake baabkenea Mo kemeb binite gene mole alel obo mo tolobo genemebe! E wengo wentubanale! <sup>5</sup> Ib kamo alel ob damo imake mo tolobo geseb eka imake damo alel obo mo tolobo gese nimibe! Otane ib kamo ib bobol temo makob aniba funaniba Nibo amitie beten kebianoba besa binoba amo asu eka asu matnaia mak kenobte ge funaib mole inaine! Ibo inabiba am olo blimano mole imin kam tetenaniba heba aalamine! Ibo mo inaim blim keib mole Gululame dlamasea imake monea unang afeti dleb denabea eka alel osak motemoa naka maki omeb denanomabiobe. <sup>6</sup> Ne mo menganita Ibo inamine ge baabenimibabe. Ne besa baabenamabibe. Ibmeye weng olo wenteniba unangi imakwali dliba eka nakai alelwali dlonanom gaibo ayamobe. <sup>7</sup> Ne alelwal blim kakat kesoa ne funania Nakaia unangai souwal tembal blibi nakai alelwali dlonamino deiboniba besaniba eka unang isak imakwali dlonamino deibonaniba besa ne ulab nib mole kukub olo ayamobo ge fumbibe. Ina otane nakaia unanga nibo Gode e titilo afet afet omyebio kesoa nibo kukub afet afet wafu buobe. E nakaia unangai maki baabeneba Naka kobo alelo omone! Eka unang obo imake dobone genemeo i inanomabiobe. Eka e baanea Nakao inamin kobole alelwali mo dlaebe! Eka unang obo inamin obole imakwali mo

dlaebe ge baabeneba e titilo omyameo i bain inaniba besa kakat nomabiobe.

<sup>8</sup> Ne baabenamabio tembali alelwali blim kakat blib isa eka nakai alelwali dlo bliba kaabeibbuo isa eka unangi souwal isa eka unangi imakwali sino dlo bliba kaabeibbuo sosen blib isa ibo makob ne ulab kakat nom gib mole olo ayamobe. <sup>9</sup> Ina otane naka ibo fumbianiba Ni unangi mo dleb nomobobo ge funib mole i alelwali dline! Eka unang ibsak inaniba wanita fumbianiba Ni nakai mo dleb nimio bo ge funaib mole ibsa imakwali dline! Ibo inaniba nakai alelwali dliba eka unang isak imakwali dlonai b mole olo ayamobe. Ibo inanamino deiboniba besa bianiba inamin bobol temo amitie funib mole bobol tem funin olo sumu benoa ibo tamano henganomabiobe.

<sup>10</sup> Eka bainobo galin nakaia unangai imakwalsa alelwalsa ibo ne weng olo baabenamabio weng olo ne wengbabe. Nib Sume wengobe. Unangi imakwalsa ibo ib imakwali mo deibenimibe! <sup>11</sup> Otane unango o imake deibanomo o mo monota naka afeti mo dlamone! O besa noko! O inanoa besa biam bino a imin motenoa imake tenaniba imin kam keib mole kukub olo ayamobe. Eka naka esa alelo mo baaboneta Ne mo kamamabibabo, obo nesuo de one ge baaboneta fotebene unamone!

<sup>12</sup> Eka weng mak ole inaminobe. Weng olo nib Sume mo baatneim blim otane Gode Hobe ne bobol temo funino onne kesoa ne weng olo ibo baabenamabibe. Nakaia unangai wanita kamwal keniba tetena bianiba imake bainobo gene otane e alelo Yesuse mo bainobo geim blim bianoa o naka ele goba bianoa Ne imak kobo mo deibkenimibabo gabo mole e mo fotebenemene! <sup>13</sup> Eka alel osa inanoa o Yesuse bainobo geno otane imake mo bainobo geim blim bianea e unang olo gobo bianea Ne alel obo mo deibkenimibabo gabe mole o mo deibanomone! <sup>14</sup> Niminbabe, alelo Yesuse bainobo genoa eka o imake mo bainobo geim blim biameo Gode kin dimo i makob elekiemobe. Eka imak esak inanea e Yesuse bainobo genea eka e alelo mo bainobo geim blim biamo osa Gode kin dimo i kamo makob elekiemobe. I Gode kin dimo mo elekiem aim blim biaibo i memei makob bainobo galinba nakaia unangai memei ulabobe. Ina otane Gode kin dimo i kamo elekiem kesoa i memei makob bainobo gabibi memebe. <sup>15</sup> Ina otane alelo bainobo genoa eka imak ele mo bainobo geim blim bianea deibo unang gameo alelo mo watanomone! Deibanoo uneko! Eka imak esa inanea e bainobo genea eka alelo mo bainobo geim blim bianoa deiba unang gamo imake mo watanemene!



Deibonea unoko! Ibo watanimibo alang wengo baasese nomabib kesoa deibeiba unine! Gode fumbianea Nakaia unangai ne bainobo gabibi i alo mo tliaubenota alang wengo mo omibe gabebe. <sup>16</sup> Inamin kesoa unangi bainobo gabib ibo kla funaine! Ib imakwali mo bainobo geim blim bianiba i hengmino deiboniba i bobol temo deskina omoniba Gode omalomabibo ibo mo tekein kebibbabe. Eka naka ibsak bainobo gabiba ib alelwali mo bainobo geim blim bianiba i hengmino deiboniba i bobol temo deskina omoniba Gode omalomabibo ibo mo tekein kebibba kesoa nakae bainobo gabe e alelo hebmsamsabo mo fotebenemene! Eka unang osa bainobo gabo o imake hebmsamsabo mo deibanomone!

*Nib okoko Gode ele weng baaneme iwat namomo!*

<sup>17</sup> Gode ibo dlakanea bainobo geniba e titilo ibo elekiem olokiem omyen tlanea Ibo inamin kukub ota namine genebio kesoa e ibo Inaine gene biamo min yota namine! Weng olo bainobo gabibi bib mak bib mako blib isa ne inangge oye binabibe. <sup>18</sup> Naka make Yudai kukubo wafu bianea e aalo watlanebua sinanoa e Gode bainobo gene mole e mo funaneta Naka maki ne aalo imin omabmatneine ge funanemene! Eka nakae waneta e aalo mo watlaim blim bianea Gode bainobo gene mole e mo funaneta Ne aalo watlanano ge funanemene! <sup>19</sup> Aalo waketoumin osa eka aalo mo wetlaim blim osa kukub olo Gode kin dimo besabe. Otane Gode wengo kla wente bianiba e wengo kla wafu nin kukub ota mitmakamsabe. <sup>20</sup> Gode nakaia unanga ibo dlakanea bainobo geniba ibo alelwala imakwalai dlib biamo ibo mo funanibta Ni imakwala alelwalai deibenoba imin tembal anoba souwala nanomo ge funanimibe! Eka ibo aalo wetlaib biamo mo baanibta Ni aalo imin dlabmabeine genimibe! Eka ibo aalo mo wetlaim blim biaibo mo baanibta Ni aalo wetlabeine genimibe! Ibo kukub olo nam tlibbuo amit yota wafu bianiba Gode okoko okok kemine! <sup>21</sup> Ib isak temo nakae naka maki moni okokba besa okok keyeaba Gode dofakanea bainobo genebio mole e mo baaneta Ne okok olo moni okokba besa okok kebibo genetia e bobol temo ilumu mo omfubanomone! Otane okoko gabamsake emaye baanea Okoko blimubkenobo genene geta yota deibaneta uneko! <sup>22</sup> Nakaia unangai naka maki ge dleb mo daibbua bianiba moni okokba besa okoko okok keyebib ibo bobol ilumu mo omfubenomone! Niminbabe, sino ibo kukub misiama nabibo ge dlabu otane Sume Gode dlakanea ibo e wengo wenteniba bainobo geib dimo e ibo hengmino

temo blibo dotlanebio kesoa kukub olo ibo imino mo ge dlanomobabe. Eka nakai inamin namino ibmaye kima bianiba okok kebib naka ibsa Gode dlakanea ibo Klaiste wengo wenteniba bainobo geniba e okoko okok kebib kesoa ibo makob Klaiste okoko besa okok kehamin nakabe. <sup>23</sup> Gode e miine dabane daakenea atdimu kaanea ib hengmino walubenea ibo emi aibbio kesoa ibo naka maki okoko okok kebib biamo Gode bobolo mo dokobenota deibanimibe! E bobolo kla fumbianibte! <sup>24</sup> Ne nekwal ibo ne weng olo ibo baabenimio kla wentine! Gode nakaia unanga ibo dlakanea bainobo geniba ib kukubo nam tlibbuo mo deibonimibe, amitie namine! Ibo inanimibo Gode seinyemabebe.

*Unangi souwal isa eka nakai tembal isa i wengobe.*

<sup>25</sup> Souwal tembal ibo ib wengo nib Sume ne mo baatneim blim otane ne weng olo nene bobol tem baabenamabibe. Gode ne nemhalim bianea daanebea ne bobol temo kla fumbianea eka weng osa ayam obiam binabi kesoa ibo ne weng olo wentaibo baaniba E Gode okok dabasanin naka kesoa nibo e wengo kla wentomo ge baanomabiobe. <sup>26</sup> Memalo naka mak unang maki bainobo galin naka unang nibo enino omkayemib kesoa ibo makob memalo blib inamin ye nib mole ayamobe. <sup>27</sup> Naka ibo wanita alelwali dlo blib mole i mo funanibta Ni alelwali deibenomo ge funanimibe! Eka nakai wanita i alelwali mo dlim blim blib mole i mo funanibta Ni alelwali dlomo ge funanimibe! <sup>28</sup> Otane ibo alelwali dlaibo olo hengminbabe. Eka unang souwal ibsa imakwali dlaibo olosa hengminbabe. Otane nakaia unangai alelwala imakwala ile inamin namin kukub homono i dimo tam tlebianoa i bobol temo ilum omkayebo kesoa ne ibo alelwali dlosiba inamin kukubo ib dimo tam tlamobo genia ibo mo dlaibe ge baabenamabibe.

<sup>29</sup> Ne nekwal ibo ne wengo baabenamabio mitmakamo inaminobe. Ibo Gode okoko okok kebibo mubiang amo meb ano kesoa ibo e okoko kla okok kebianiba eka e okoko bobolo amitie fumbiam bianiba makob nakai alelwal blimi naniba i okoko afeto dowo yafunamino blim kesoa i Yesus Klaiste okoko bobolo olota fumbianiba okok kebinabib inamine! <sup>30</sup> Nakaia unangai inamin namino i dimo tam tloa i bobolo ilum omfubenoa mebib o bobolo amito mo fumbianibta memibe! I bobol tem sum ole Yesus Klaiste okoko bobol ota fumbianiba e okoko okok kemine! Eka nakaia unangai seinimibo i bobol temo seinino mo omulaibe! I bobol tem sum ole

Yesus Klaiste okoko bobol ota fumbianiba okok kemine! Eka nakaia unangai inamin namino webibo o bobolo sumo mo funimibe! I bobol tem sum ole Yesus Klaiste okoko bobol ota fumbianiba e okoko okok kemine! <sup>31</sup> Eka nakaia unangai dabalim olo inamin namino klamibo i bobol temo mo omulaibe! I bobol tem sum ole Yesus Klaiste okoko bobol ota fumbianiba okok kemine! Nibo tekein kebuobe, sinanomo inamin namino dabalim olo buo alukum blimanoa asitem tam tlamabobe.

<sup>32</sup> Ne funania Kolin bib sel ibo inamin namin afeto bobolo funino deiboniba Sume okoko bobolo olota funine ge funaiobe. Nakai alelwal blim ile Sume bobolo olob fumbianiba Ni Sume okok olo okok keboba e ni seinyemeko geniba inabiobe. <sup>33</sup> Ina otane alelwalsa ile funaniba Ni inamin namin ayamo nanoba ni alelwali yatemniba ni gobeine ge fumbianiba dabalim okoko omasa Gode okoko omasananiba asu okok kebiobe. <sup>34</sup> Inabib nakai bobolo asu fumbiobe. Mako Sume bobolo ye fumbianiba eka mak ole Ni alel melesi inamin namino nabenobtabo galin bobol temo ye fumbiam bliobe. Eka unangi imakwal blim ile funaniba Nibo Sume okoko ayam okok kebianoba bobol temo kla fumbiam bioba Sume nibo seinyemeko ge fumbianiba e okoko olota okok kebiobe. Otane unangi imakwalsa ile funaniba Ni inamin namin ayamo nanoba ni imakwali seinyemine ge fumbianiba dabalimo okoko omasa eka Gode okoko omasananiba asu okok kebiobe. Unangi inabib ile i bobolo asu fumbiobe. Mako Sume bobolo ye fumbianiba eka mak ole Ni imakwali inamin namino nabenobtabo galin bobol temo ye fumbiam bliobe. <sup>35</sup> Ne ibo daabenita weng olo baabenamabibe. Ne mo baabenita Ibo dlonamino deibeine genimibabe. Ina otane ne funania I kukub ayam wafu bianiba i bobol tem funino makob Gode bobol tem funino ulab aniba i bobol temo Gode okoko bobolo olota fumbianiba okok kemine ge funai kesota weng olo baabenamabibe.

<sup>36</sup> Naka make e alelo omakabaibbu otane naka esa unang esa i funaniba Nibo Sume bobolo amitie fumbianoba kam kenamino deibonoba naka ne besa tembal ye nia eka unang obsak besa sou ye nanomo ge funaniba ina biaib otane e unang olo bobolo wabanoa funanea Ne unang olo deibo blia bobol wanebo olo misiame kesoa unang olo de omano ge funanea omameo kukub olo ayamobe. E inanemeo olo hengminbabe. <sup>37</sup> Otane naka make funanea I unang olo ne omakatneibbuo ne mo omamibabo, ne deibonia besa tembal biania Sume bobol ota funano ge funanea e sbal manea o omon-

amino deibone mole kukub olo ayamobe. <sup>38</sup> Inamin kesoa nakae e alelo omakabaibbuo omameo e kukub olo ayamobe. Eka nakae e alelo omakabaibbuo omonamino deibonea besa tembal ne mole olosa dot ayamobe.

<sup>39</sup> Eka unango o imake mo kaaam blim biameo mo deibanota naka asiti mo dlamone! Otane e kaane mole ota deibanota monota naka asiti dloko! O inanang gamo nakai bainobo gabibbai mo dlamone! Bainobo gabib ita dloko! <sup>40</sup> Ne weng olo baabenamabio nene wengobe. Ne funania Unang sonesoni imakwal asiti dlib mole i seinomabib otane i mo dlim blim keib mole dot kla seinomabiobo ge funaiobe. Gode Hobe ne bobol temo bitne bie kesoa ne funania Ne bobol tem funino makob Gode bobol tem funino ulabobo ge funanita weng olo baabenamabibe.

## 8

### *Smiko doual kulani wengobe.*

<sup>1</sup> Eka weng mak esa naka maki funaniba Ni nakai kulani yaleb teniba funiba nakai as esa tom gol esa nakai smiki kla olaibbuo doyobobo geniba dlo wembiba ni baka wembobo ayamobo gabibo ne weng sang olo baabenamabio kla funaine! Bainobe, nibo bobol temsa otane nib tekein kemino olo naka mak unang maki mo daayebobabe. Nakai inamin bobol temo fumbibi ili tak ngambianiba i niniino omfufubib otane i naka mak unang maki gobeniba daayemibo kukub olo bainobo galin nakaia unangai dosbal manamabobe. <sup>2</sup> Nakai funaniba Ni inamin namino kla tekein kebuobo ge fumbib ile i bobol tem funin olo ayambabe. I tekein kemino mito klao mo tekein kebobbabe. <sup>3</sup> Otane nakaia unangai Gode goba blib ile i bobol tem funino ayamobe. Nakaia unanga eli Gode oye bianea I nemi kesoa ne i tekein kebibo ge oyebebe. <sup>4</sup> Inamin kesoa ne naka maki smiki kla olanibbuo kulani yaleb teniba funiba Doyobobo geniba dlo wembibi weng sango baabenamabibe. Bainobo galin nakaia unangai kulan eli wembibo ayam bleka? Nibo tekein kebuobe, smiki nakai klabibo o naka motonba kesoa o nibo mo kimanomobabe, olo besa asobe. Naka ita klabiobe. Nib kimanin nakai homonbabe. Gode elekiem eleta nibo kima biebe. <sup>5</sup> Naka homon unang homoni obianiba Inamin namino abilim uto bu esa eka dabalim olo bu esa ota ni kima biobo ge obib <sup>6</sup> otane nibo tekein kebuobe, nib kimanin nakae Gode elekiem eletabe. E nib Ayobe. Eta inamin namino alukum klanebua nibo emi kesoa e okoko okok kebuobe. Eka nib Sum esa elekiemobe. E Yesus Klaist etabe. Gode

e baabanea Kobo inamin namin olo klanale ge baabanea e inanea klanebua nibo e bainobo gabianoba ayam biobobe. Inamin kesoa smiki nakai klabibi o besa asobe. O nibo mo kima biobabe.

<sup>7</sup> Ina otane bainobo galin naka mak unang maki mo tekein kebianibta nakai kulani yaleb te funiba smiki dokayemin kukubo besabe gabibbabe. Sino i Yesuse mo bainobo geim blim blib dimo i smiki kla olaibbua kulani yaleb te funiba Doyobobo geniba wembianiba funaniba Smik eli titilsabo i ni kima blib kesoa ni godobo ge fumbinibbiobe. Mema dim olo i Yesuse bainobo gabib otane i bainobo galino sbalbabe. I nakai kulani yaleb te funiba smiki Doyobobo gabibi downaibo i funaniba Kukub olo misiamobo ge fumbiobe. <sup>8</sup> Nibo fatnamin kukub ota nanobta Gode kin dimo naka molot unang molot anomabbue? Nibo nakai kulani yena dleb te funiba smiki doyobobo gabibi downaob ota Gode baabeneta Ibo naka molot unang molotobo genamabea bleka? Nibo nakai kulani yena dleb te funiba smiki doyobobo gabibi mo doweim blim kenomob ota e baabeneta Ibo naka molot unang molotobo genamabea? Yeye nibo downaob osa eka mo doweim blim kenomob osa Gode nibo mo baabeneta Ibo naka molot unang molotobo genemebabe. Nibo downaob osa doweim blim biaob osa olo mitmakam blim besabe. <sup>9-10</sup> Ina otane ibo nakai kulani yena dleb te funiba smiki dokayebibo besabo ge baaniba dowom gib mole kla funanibte! Ibo inasiba bainobo galin naka mak unang maki i bainobo galino kla mo sbal maim blim blibi fumbianiba Ni nakai kulani yena dleb te funiba smiki dokayebibo downaobo kukub olo misiam kesoa ni halanomo ge fumbib otane tekein kebib ibo baaniba Nakai kulani yena dleb te funiba smiki dokayebibo unalin kukubo mitmakam blim besabo ge baaniba doweiba i yateniba isa inaniba doweib mole kukub olo misiamobe. Niminbabe, i funaniba kukub olo misiamobo ge fumbib otane i downomabib kesoa kukub misiam olo ib sanobe. <sup>11</sup> Inanimib kesoa ibo kulan eli mo downaibe! Nakaia unanga eli Klaiste kaanea i hengmino walubenebio kesoa isa Yesuse bainobo gabiobe. Tekein kebib naka unang ibo funaniba Nakai kulani yena dleb te funiba smiki doyobobo gabibi mitmakam blim besabo gabib ibo nakaia unanga eli bobolo funaine! Ibo nakai kulani yena dleb te funiba smiki doyobobo gabibi doweiba i yatemniba isa doweib mole ibmaye nanibta alebenomabib kesoa ibmaye i bainobo galino watwat dabennomabiobe. Inamin kesoa ibo inamin

kulani mo downaibe! <sup>12</sup> Nakaia unanga eli i bainobo galino mo sbal maim blim blib kesoa ibo inaniba i bainobo galino watwat dabeib mole ibmaye i misiam nabena bianiba eka Klaist esa misiam nabananomabiobe. <sup>13</sup> Inamin kesoa ne funania Nibo kulan eli downsoba bainobo galin naka mak unang maki yateniba isa inaniba kukub misiam olo nanimiobo ge funai kesoa nibo mo downaobe! Nibo tekein kebuobe, nibo nakai kulani yena dleb te funiba smiki doyobobo gabibi downaobo kukub olo mitmakam blim besa otane nibo kukub olo mo nanomobe! Nibo bainobo galin naka mak unang maki i bobolo fumbianoba kla gobenomo! Nibo mo inaim blim kenob mole i kulan eli downiba hengmino henganimib kesoa nibo kulan eli mo unalaobe!

## 9

*Fole Yesuse okok dlasanin okoko okok kebeo e kla seimbinebiobe.*

<sup>1</sup> Naka maki obianiba Ni Fole wengo mo wentaobbabo ge onebib otane ibole ne weng olo wentine! Ne Yesuse okok namasanin naka kesoa ne inamin namino nemaye kima biania okok kebibe. Naka maki ne baatneniba Kobo inanalae genamino blimobe. Ne nib Sume Yesus Klaiste atemia e wengo ibo omia wenteniba bainobo geibbio kesoa ibo tekein kebiobe, ne weng olo bain wengobe. <sup>2</sup> Naka mak unang maki ne one bianiba Fole Yesus Klaiste okok dabanin nakababo ge onebib otane ibole tekein kebiobe, ne bain Yesuse okok namasanin nakabe. Ne sino Sume wengo ibo omia wenteniba bainobo geniba Sume kukubo wafueibbio kesoa nakaia unangai ibo yatem tekein keniba E bain Yesuse okok dabanin nakabo gabiobe.

<sup>3</sup> Naka mak unang maki ne one bianiba Fole wengo bainbabo ge onebibi ne weng olo baabenamabibe. <sup>4</sup> Ne naka maki ne tena biobi ni sinwalo nib Sume Yesus Klaiste okoko okok kebob kesoa nakaia unangai wanita ni daabeniba okok olo molo yang keniba imen osa aay osa oyib mole kukub olo ayam otane ibo mo inabibbabe. <sup>5</sup> Fita esa eka Yesuse okok dlasanin nakai mak isa eka Sume Yesuse ningwal isa i unangi bainobo gabibi dlona bianiba eka ili alelwal dlonaniba dletniba bib mak bib mako haabianiba Yesuse okoko okok kemha blib kesoa nakai ni sinwal biobi ni sinwal osa inanoba bainobo galin wanggeli dlo bianoba dletnoba bib mak bib mako haabianoba Gode okoko okok kebob naka mak unang maki ni imena aayao okayemib mole kukub olosa ayamobe. <sup>6</sup> Banabase ni dabo Yesuse wengo naka mak unang maki omkayebob otane i mo yang kenibta

ni imena aayao mo okayebibbabe. Ni dabo nimaye moni okoko okok kebianoba monio boka bianoba imena aayao walo wembianobta Gode okoko okok kebuobe. Ni inabob otane naka mak ile mo inabibbabe. Ile Yesuse okoko okok kebibu naka mak unang maki okok olo molo yang keniba imena aayao okayebiba wembianibta okok kebiobe. I ni dab osa inaniba okayemib mole kukub olo ayamobe. Ibo ni dabo mo baabenibta Ib kukubo misiamobo genimibe! <sup>7</sup> Ne weng mako ibo baabenamabio wentine! Awa genalin nakai i imeno imalo mo walo wembibbabe. I kimanin nakai kima bianiba i imeno weyebiba wembianibta i okoko okok kebiobe. Eka kukub mak osa inaminobe. Nakai imen dango dolmaiba damanomo besao mo deibonimibbabe. Ulelo wembiobe. Eka nakai eili gibabib isa besao mo gibabibbabe. I gibabiniba sinanomo yena wembinabiobe. I okok olo nabibo molo yang keniba imena aayao wembianibta okok kebib otane ni fatnanobta ni dabo Gode okoko okok kebobo naka mak unang maki ni imena aayao mo okayemin blime?

<sup>8</sup> Ne weng ele baabenamabi olo nakai bobol tem funinbabe. Gode hekmel wengo Mosese omalebu osa inangge baanoa

<sup>9</sup> Ibo wit dango klabiba Eil blumakau daaye bianiba okok kemibo ibo i sitalo mibo mo dlab bebenimibe! Deibeiba wit sano wembianibte genobiobe.

Gode eil blumakau ili bobol ota funaneta Mosese weng olo omalebua bleka? <sup>10</sup> Yeye e nib bobol ota funaneta weng olo omalebiobe. Nakai imen dango kim daako dikbianiba eka imen sano dosam biam nimibo fumbianiba Ni imen dang olo dolmanob biamo damo ulelo downomabbuabo ge fumbianibta okok kebiobe. Gode okok osa inaminobe. Nakai wanita e wengo okayebib mole nakaia unangai weng olo wentebibi yang keniba inamin namino dokayemine! <sup>11</sup> Banabase ni dab osa inaminobe. Ni Yesus Klaiste okoko okok kebianoba e wengo ibo okayebobo wente bianiba bainobo gabib kesoa ibo yang keniba ni imeno okayemib mole kukub olo ayamobe. <sup>12</sup> Sino Banabase ni dabo ibo Gode wengo okayem denobbua naka maki ni abuk teniba Gode wengo omyibo ibo yang keniba imeno oyibbuo kukub olo ayam otane ibo fatnanibta ni sin tenoba kla daabenobo imeno oyenamino deibeibione? Ibo nisa oyib biota mole kukub olo dot ayamobe.

Ina otane ni funanoba Ni i imeno okayemine gesoba i funaniba I Yesus Klaiste wengo nibo okayebibo nibo okok

olo molo webianoba imeno okayemob yole kukub olo misiam kesoa nibo i Yesus Klaiste wengo omkayemibo nibo wentemino deibonomo genimiobo ge funanoba ni ibo mo baabenobta Ibo ni imeno okayemine ge baabeim blimobe. Ni okoko nimaye bumolok bianoba okok kebianoba inamin namino dlo wembianoba eka am mak dimo besa imen teb bi inabob otane ni ibo mo baabenobta Ibo ni imeno oyine ge oyemin blimobe. <sup>13</sup> Ibo tekein kebiobe, nakaia unangai imeno oleb taniba Gode amo kimanin nakai okayebibo Gode amo kimanin nakai imen olo atosino wembinabiobe. Eka nakai kulani dleb teniba Gode dlalomabib nakai doyaib osa i atosino wembinabiobe. I ina binabibo i kukub olo ayamobe. <sup>14</sup> I ina binabibo Sume baanea Nakaia unangai ne okoko okok kebianiba ne dowan wengo nakaia unangai omkayemibo isak yang keniba imeno okayemine genebu nibo tekein kebob kesoa ni ibo baabenoba Ni Sume wengo ibo omkayebobo ibo ni okok olo molo yang keniba imeno okayemine genob mole kukub olo ayamobe. <sup>15</sup> Ina otane ne sino ibo mo inangge baabeim blimobe. Ne sino Yesus Klaiste wengo ibo omkayebi dimo ne mo baabenita Ibo imeno okanemine ge baabeim blimobe. Eka memalo ne futan olo dola omfubenamabi dim osa ne mo funanita I imeno online genimibabe. Ne ibo imeno donine genamino deibe biania imen tebo kaanang gamio ne ibo mo baabenita Imeno donine genimibabe. Ne naka mak unang maki baabenita Kolin bib seli ne imeno mo okanebibbabo ge oyebia ibo imeno onaibo nakaia unangai wengo baabeibuei funaniba E dim baabenebiobo genomabib kesoa ne ibo mo baabenita Ibo imeno online genimibabe. <sup>16</sup> Gode emaye nemab manea Kobo Yesus Klaiste dowan wengo nakaia unangai omkayemale ge baatnenea okok olo omnebiota okok kebi kesoa ne mo baanita Ne naka ayam bianita okok olo okok kebiho genimibabe. Gode okok olo ne omnebuo mo okok kemim blim kei mole e kukub misiamo ne omnamabebe. <sup>17</sup> Ne okok olo okok kebio nene bobol tem funin ota okok kebi mole ne baania I ne okok olo molo yang keniba monio okanemine genamabi otane ne okok olo nene bobol tem funino mo okok kebibabe. Gode emaye okok olo omnebuo ne e wengo wente biania okok kebi kesoa ne mo baanita Ibo monio okanemine genimibabe. <sup>18</sup> Ne okoko okok kebio molo nimin dlamabine? Ne okoko okok kebio o molo dlamabio inaminobe. Ne Klaiste dowan wengo nakaia unangai misim omkayebio kukub olota ne okoko yan kesoa ne nakaia unangai Klaiste wengo omkayebio ne mo

baabenita lbo imen osa moni osa okanem-ine genimibabe.

*Fole makob okok nakai ulab anea nakaia unangai daaye binebiobe.*

<sup>19</sup> Ne naka make mo kima bieta e okoko besao mo okok kehabibabe. Ne inamin namin okoko nemaye kima biania okok kebibe. Ina otane ne funania Ne makob nakae naka make kima bia e naka ele okoko besa okok kehabe inania nesa nakaia unangai daaye bia i Yesus Klaiste wengo wenteniba bainobo geine ge funania inabibe. <sup>20</sup> Ne Yudai bekebe biania ina biania Yesus Klaiste okoko okok kebio ne funania Ne inania i kukub wafunimio i Yesus Klaiste wengo wenteniba bainobo genomabiobo ge funai kesoa ne kukub olo wafu blibe. Ne Yesus Klaiste hekmel wengo wafu bli kesoa ne Gode kin dimo naka molotobe. Otane ne funania Mosese hekmel wengo wafu blib naka ita bekebe biania nete nanoba Mosese hekmel wengo kla wafu bianoba nesak Yesus Klaiste wengo omkaye bia isak weng olo wenteniba Bainobo geine ge fumbibe. <sup>21</sup> Eka weng mak osa ne funania Ne Yudabai Mosese hekmel wengo mo wentebibba ita bekebe biania i kukubo nabibo ne temna nabianoba nesak Yesus Klaiste wengo i omkayemia wenteniba Yesus Klaiste bainobo genimiobo ge funai kesota ne i kukub olo wafu blibe. Ne inabio Gode hekmel wengo Mosese omalebuo mo deibueim blimobe. Ne Klaiste hekmel weng osa Gode hekmel wengo Mosese omalebuo osa asu ye wafu blibe. <sup>22</sup> Ne nakaia unangai bainobo galino klao mo sbal maim blim blibi bekebe biami osa ina binabibe. Ne kukub mako naia i wateniba baaniba Keb kukub olo misiamobo geib mole o deibo deibo binabibe. Niminbabe, ne funania I kukub olo mo gobo blibba kesoa ne kukub olo amitie nami mole isa kukub olo wafuniba nabianiba Yesus Klaiste wengo deibonomabib kesoa ne kukub olo deibonia i kukub nabib ota nesa wafu blia i Klaiste wengo wente bianiba i bainobo galino sbal sambibte genia inabibe. Ne funania Nakaia unangai bib mak bib mak seli alukum Yesus Klaiste wengo wenteniba bainobo geib mole e i hengmino temo blibo dotlanabebo ge funai kesoa nesa makob i kukubo nabib ota baka nabiania Yesus Klaiste wengo i omkayebibe. <sup>23</sup> Ne funania Ne ina biania Yesus Klaiste down wengo nakaia unangai omkaye bia maki weng olo wenteniba bainobo geiba Gode inamin namin ayamo ni sinwalo doyeko ge funanita okok olo okok kebibe.

*Nibo Gode okoko kla okok kemobo e yang kenamabebe.*

<sup>24</sup> Ibo tekein kebiobe, nakai gigi unom gaibo i funaniba Nibo gigi une bianoba nakae waneta mak nibo gaisene mole eta inamin namino dleko geniba i alukum aniba ye gigi unebib biam otane mak eta sin monea maki gaisenea inamin namin ayamo dlamabe inaniba Gode okoko sbal mabianiba okok kebiba Gode baabenea lbo ne kin dimo naka molot unang molotobo ge baabenea inamin namin ayamo doyeko! <sup>25</sup> Nakai funaniba Ni sbal manoba gigi monoba naka maki gaisenoba inamin namin ayamo dlomo ge funanimiobo abilo deiboniba hang fleleng aniba gigi unaibo naka maki gaisenibta inamin namin ayamo dlomabiobe. I inaniba inamin namin ayam olo dlomabib otane o amito mo nomobabe. O un kesoa imin blimanamabobe. Otane nibo Gode okoko sbal manoba okok kebinob biamo e inamin namin ayamo blimanaminba amit nino doyamabebe. <sup>26</sup> Nakai gigi unom gaibo i mo deskinibta milim tem milim tem nimibbabe. I makob bebib sino olota temem temem nibta monibta naka maki gaisenibta inamin namin ayamo dlomabiobe. Nesa inania okok afeto bobolo mo fumbibabe. Ne Gode okok olo bobolo olota fumbiania okok kebibe. Makob nakai aatem daako aningi yenanom gaibo i geimo tebeleb met tebeleb tabo deiboniba molot tebelubeniba biki yenanabib inania nesa Gode okoko okok kebio kla fumbiania inaneme inaneme gabianita okok kebibe. <sup>27</sup> Ne funania Gode ne baatnenea Kobo ne wengo nakaia unangai omkayebaba wente bianiba bainobo gabib otane kebmalole ne mo nanemebe gabio nabianebe ne wengo omdibinebeb kesoa ne inamin namin ayamo mo doklamibabo ge baatnemebe ge fumbi kesoa ne Gode okoko okok kebio ne inamin namin kukub misiamo bobolo wanemino deibonia Gode ele bobol tem funin ota wafu bianita okok kebibe.

## 10

*Ibo kukub misiamo mo wafu nimibe!*

<sup>1</sup> Ne nekwal ibo Yuda ni faninwali kukubo nabinibbuo kla funaine! Sinangwano Yuda ni faninwali alukum Mosese bekeba moniba ibuantem ye onsibo Gode ayungo baabonea I unaibo obo asaluto sin ye genan genan bebeba i abuk kemsileb haaine ge baabonea o inanoa genan beba i kim daako haabinibbuo Gode ayung olo tem wat bianea kima bieta haabinibiobe. I alukum inam inamniba moniba aaye sole niniino Led sie ken ye uniba aay esa wela met wela tab kenea dalob deibonea dli wala onsiobe. <sup>2</sup> I alukum inaniba Mosese temnaniba ayung temte motemiba aaye inanea wela met wela tab

kenea dli wala onsibo i bobol tem osa eka Mosese bobol tem osa makob omfaib kesoa kukub olo makob Gode i aaye fuelabenea i Mosese meletan aibbiobe. <sup>3-4</sup> I ibuan-temo binibbuo aayo mebo blim eka imen osa blim na kesoa Gode i aaya imenaokayebea wembinibbiobe. I ina binibbuo aayo omaye tom tem wat danao biki wat tlota wembinibbiobe. Imena aaya olo Yesus Klaist eta okayebeta wembinibbiobe. E ina bianea emaye tom anea aayo e temte biki wat tlebua wembiba e i bekebe haabianea daaye bianea i bobol tem funin ayamo omkaye binebiobe. <sup>5</sup> Gode ina bianea i inamin namin ayamo alukum dokayebe otane naka homon unang homoni Gode wengo omdibiha bianiba kukub misiamo wafueib kesoa Gode mo seinyemin blim kenea yalea ibuan-tem ye kulilaibbiobe.

<sup>6</sup> Ibo ni faninwali kukub misiam olo nabinibbuo o bobolo funaine! I kukub misiam olo bobolo wayebua wafu binibbuo ibo mo inanibta kukub misiam olo mo wafu nimibe! <sup>7</sup> Ni faninwal eli ina bianiba maki tomo oloniba god dim omine smike klaniba e niniino dobtoule biam binibbuo o weng sango Gode buk temo baanoa Nakaia unangai daak toulaniba imena aayao downoniba imin hananiba blan haabianiba eka nakai tomo oloniba god dim omine smike klaibbuo niniino dobtoule nabliobo genobio kesoa

ibo mo i nabinibbuo inanibta smiko nakai ima klabiobo niniino mo omtoule nimibe! <sup>8</sup> Ibo tamano mo henganimibe! Sinanggwano ni faninwali inaniba maki tamano henganimibe kesoa am olokiemo dim ota Gode tamano henganimibe naka unangi 23,000 ye yalea kulilaibbuo kesoa ibo taman kukubo mo wafu bianibta tamano henganimibe! <sup>9</sup> I ina bianiba naka mak unang mak ile Gode oha bianiba Gode ni kla o mo kima biebabo ge ohamib kesoa e inabi dlanea teniba yantemaiba kulila biam binibbuo kesoa ibo inamin kukubo mo wafu bianibta Gode mo inahamibe! <sup>10</sup> Eka mak ile funaniba Gode kukubo nabeo ayambabo ge funaniba e alo tiyemo kesoa Gode abisake naka yemine dabanea daakenea yalea kulilaibbuo kesoa ibo mo inanibta i kukubo nabinibbuo mo wafu bianibta Gode alo mo tiyemone!

<sup>11</sup> Ni faninwali inaniba kukub olo nabiba kukub misiam olo i dimo tam tlemo kesoa Gode funanea I molobseli walo unaibo inamin kukubo imino mo namibe ge funanea e weng olo naka maki omya i Gode buk temo dolaibbuo kesoa nibo weng olo kla kibianoba eka bobol tem osa kla fumbiam bianoba Yuda ni faninwali kukub misiam olo nabinibbuo nibo deibonomo! Memalo

nibo dabalim olo biobo Klaiste tlamabe amo meb ano kesoa nibo weng olo funanomo! <sup>12</sup> Nakaia unangai fumbianiba Ni bainobo galino sbal kesoa ni kukub misiamo mo nanomabbiobabo gabib ibo klaine! Ibo imba inangge omananiba henganimo henganomabiobe. <sup>13</sup> Inamin namin kukub misiamo ib dimo tam tlemabo afetbabe. Makob sino naka mak unang maki dimo tam tlebinobio yota ib dim osa tam tlemabobe. Gode moton wengo baanea Kukub misiamo ib dimo tam tlang go mole ne mo deibueita ibo mo kimanomobabo genebuo e bain inanea kukub misiamo ib dimo tlang gamo e daabenea titilo omyenea sbal manomabiobe.

*Gode kukubo wafu biob nibo hob misiame kukubo mo wafunomobe!*

<sup>14</sup> Ne nekwal ibo ne ni faninwali kukubo nabinibbuo weng sango baabeibo ibo mo dokobenoa deibonibta ibsa inamibe! Ibo inamib mole kukub olo misiam kesoa ibo smiki nakai klabiobo ninino mo dotoule nimibe! <sup>15</sup> Ibo bobol tem funina kesoa ne weng olo kla funaniba ayam biamo misiam biamo tekein keine! <sup>16</sup> Nibo Yesus Klaiste kaanea nib henganimo walubenebuo o bobolo funanoba nib bobol temo omanoba mina bianoba waen aayo olonoba Gode gangobo genoba baanoba Olo Yesuse ilemoba genoba wembianoba eka imen osak olonoba Gode gangobo genoba haanoba baanoba Olole Yesuse damobo ge baanoba wembinabuobe. <sup>17</sup> Nibo inanoba nib bobol temo Klaiste omanoba nib bobol temo makob anoba imene elekiem otane obonoba haanoba homon anoa downabobo kukub olo makob nibo naka homon unang homon otane nib dam osa Klaiste dam osa elekiemobe.

<sup>18</sup> Ibo Yudai kukubo sino nabinibbuo funaine! I kulani yenaniba Gode heitdahanin biino dimo dlaniba Gode dokaha binibbiobe. I inaniba kulan eli atosino downaibo i bobol tem funino makob Gode bobol tem funino ulab aniba makob elekiem an binibbiobe. <sup>19</sup> Ne weng olo mitmakamo inaminobe. Nakai kulani yena dleb te funiba smiki doybobo gabib kulan olosa eka smik dam isa o titil blimobe. <sup>20</sup> Ina otane nakaia unangai Yesuse mo bainobo gabibbai i smiki kla olaibbuo kulani yena dleb te funiba dokayebibo kukub olo makob i kulani yena dleb teniba hob misiami dokayebiobe. I Gode mo dlalaibbabe. Nakaia unangai kulan eli wembibi i bobol tem funino makob hob misiami bobol tem funino ulab aniba i makob elekiem an binabib kesoa ne funania Ib bobol tem funino makob hob misiami bobol tem funino ulab aib mole

kukub olo misiamobo ge funai kesoa ibo nakai smiki kla olaibbua kulani yena dleb te funiba dokayebib kulani mo downaibe! <sup>21</sup> Ibo Sume bobolo funaniba mina bianiba imen osa waen aay osa wembibo ib bobol tem funin osa Sume bobol tem funin osa makobobe. Ibo inabib otane nimin kenibta ib bobol tem funino hob misiami omyeniba makob an bianibta nakai smiki klaibbua kulani yena dleb te funiba dokayebib kulani wembibe? Kukub olo misiam kesoa ibo mo inanibta Gode kukubo omo eka hob misiami kukubo omo nanibta asuke omasa wafu nimibe! <sup>22</sup> Nibo hob misiami kukubo mo omonoba eka Sume kukubo mo omonanobta asu dlasa wafunobta Sume atlihamino mo omalaobe! Nibo kulani yena dleb tenoba smiki doyob mole kukub olo makob nibo funanoba Ni titilo Gode titilo gaisonobo ge funanomabbio kesoa nibo inamin kukubo deibonomo!

*Nibo Gode niniino amitie dobtoulebr nomo!*

<sup>23</sup> Ib isak temo naka maki obianiba Inamin namino Klaiste mo baaneta Kukub olo misiamobo, ibo mo namibe geim blimo nibo namob mole kukub olo ayamobo ge obib otane ne baabenamabio kukub homon olo ibo mo daabenota ib bainobo galino sbal manomabibba kesoa ibo kukub olo mo namibe ge baabenamabibe. <sup>24</sup> Ibo mo funanibta Ninita ye biobobo genimibe! Ibo funaniba Ni kukub olo nanomobo naka mak unang maki daabenamabobe? ge funanibta naine!

<sup>25</sup> Nakai smiki klaibbua kulani yena dleb teniba doyobobo geniba imin dleb moniba imen wemin baan dimo dokabiba ibo moniba imeno webianiba kulani elisa walom gaibo ibo mo baabenibta Kulani eli nakai smiki klaibbua yena dleb te funiba doyobobo geniba wembib kulan bleka besa kulan afeto? genimibe! Ibo besa walo doweine! Eka ibo kulan eli downaibo mo funanibta Ni kukub olo nanobo misiam naob ese makobo ge fumbianibta bobol asusuo mo nimibe! Kulani alukum God emi kesoa ib bobol temo hekheko mo fumbianibta kilo mo omibe! Besa halit walo unaline! <sup>26</sup> Niminbabe, Gode buk temo baanoa

Dabal esa eka inamin namino dabalimo buosa o alukum Sum emiobo genobiobe.

<sup>27</sup> Naka make Yesuse mo bainobo geim blim bianea ibo baabeneana Ibo teniba ne am ele tliba imeno downonomo genea ibo mo teniba imena kulanao fubeo unalom gaibo ibo mo baabanibta Kulani olo nakai smiki klaibbua kulani yena dleb te funiba

dokayebib ota bleka besa kulan afeto? genimibe! Ibo besa doweine! Ibo inaniba kulani eli downaibo mo funanibta Ni kukub olo nanobo misiam naob ese makobo genimibe! <sup>28</sup> Otane ibo kulan eli dowom genabiba naka make baanea Kulani olo nakai smiki klaibbua kulani yena dleb te funiba doyobobo geniba wembibo kulanobo gene mole ibo kulan olo mo downaibe! Ibo doweib mole naka ele yatenea e funanea I smiki kulani downoniba smik eli niniino dotoulebr nib kesoa i kukub olo misiamobo ge funanea e bobol tem funino misiam omfaneme kesoa ibo kulan eli mo downaibe! <sup>29</sup> Nakaia unangai maki ib isak temo blibi funaniba Smiki kulani downaminamo misiambabo geiba eka maki funaniba Kukub olo misiamobo, ni mo downaobabbobo genanomabib kesoa nakai ne kulani donaibo ne mo kil baanita Kulani eli smiki kulan bleka kulan afeto? genabibabe. Ne imblia wembinabibe. <sup>30</sup> Ne imen osa kulan osa downang gamio ne Gode gangobo gebaia e titilo daatneona downamabi kesoa ne kukub olo ayamobe. Ne inania naka make baatneana Keb kukub olo misiamobo ge baatnene mole e bobol tem funin olo misiamobe. <sup>31</sup> Ibo imena aayao downonom gaibo ibo naka mak unang maki bobolo funaine! Ibo imbliao mo unalaibe! Kla watemniba Ni kukub olo nanomobo Gode nibo seinyemea naka mak unang mak isa Gode niniino dobtoulebr nomabiobe genibta doweine! Eka ibo temiba ibo unin olo downaibo Gode nibo mo seinyemin blim kenea i Gode niniino mo dobtoulebr nomabibba keno mole mo downaibe! <sup>32</sup> Ibo Yudai Yesuse mo bainobo gabibba isa eka Yudaba isa eka Gode meletani Yesuse bainobo gabib isa i bobolo funaine! Ibo ib kukubo nanom gaibo kla watemnibte! Ibo kukubo watemiba Ni kukub olo nanomobo isa inaniba hengmino henganomabiobo ge funaib mole kukub olo mo nanimibe! <sup>33</sup> Nesa ina binabibe. Kukubo ne watemia Ne kukub olo nanimio nakaia unangai seinemomabiobo genimi ota nabinabibe. Eka kukubo watemia kukub olo nanimio nakaia unangai mo seinemomabibba keno mole ne mo nabinabibabe. Ne mo funanita Ne kukub olo namio o ne daatnenamabo kesoa ne kukub olo namano ge fumbibabe. Ne funin ole Ne kukub olo nabia naka homon unang homoni daabenoa i Yesus Klaiste bainobo geiba Gode i hengmino temo blibo dotlanea dletnea moniba e bibo amit nine ge funanita ne kukub olo nabinabibe.

## 11

<sup>1</sup> Ne kukubo nabinabio makob Klaiste

kukubo ulab kesoa ibo ne kukub olo waterniba ibsak inamine!

*Unango Gode nganabanang gamo o gabam otabbumine otabbannote!*

<sup>2</sup> Ne Yesus Klaiste wengo ibo omkayebio kla wente bianiba wafu blib kesoa kukub olo ayamobe. <sup>3</sup> Ne weng mako baabenamabio ibo kla wentine! Naka maki obianiba Gode elekiem eleta nib kimaninobo, eka naka mak ile nibo mo kima blibba kesoa nibo nib gabam otabbumino detlanomobo naka mak unang maki yatem tekein keniba naka make i mo kima biebabo, Gode elekiem eleta i kima biebo genomabiobo ge obianiba i Gode wengo naka mak unang maki omkayemom gaibo i gabam otabbumino detla bianiba omkayebib kesoa i kukubo ayamobe. Imakwali inabibo i alelwal isa obianiba Nib imakwali nib kimanin kesoa nibo gabam otabbumino otabbannomobo naka mak unang maki yateniba funaniba Nakai nib kimani-nobo genomabiobo ge obianiba i Gode nini-no dobtouleb nom gaibo i gabam otabbumino otabbanniba e niniino dobtouleb bliobe. Naka homon unang homoni kukub olo wafu blibo kukub olo ayamobe. God ele Yesus Klaiste kimaninobe. Eka Yesus Klaist ele nakai kimaninobe. Eka naka ile unangi kimaninobe. <sup>4</sup> Inamin kesoa nakai gabam otabbumino lotu am tamo otabba bianiba Gode nganha bianiba e wengo omkeimamib mole kukub olo misi-amobe. I inanimibo kukub olo makob i baaniba Gode ni kimanin nakababo genomabiobe. <sup>5</sup> Unangi lotu am tamo bianiba Gode nganha bianiba e wengo omkeimanom gaibo i gabam otabbumino detlaib mole kukub olo misiamobe. Kukub olo makob gabamano alukum deilaniba hebianomabib inaminobe. Inamin kesoa unangi lotu am tamo bianiba Gode nganha bianiba e wengo omkeimanom gib mole i gabam otabbumino otabbaine! I mo inaim blim keib mole kukub olo makob i imakwali i kimanin kukubo o bobolo klao mo funaim blim kenibta i gabam otabbumino detlanomabib kesoa <sup>6</sup> i makob taman wanggeli ulabobe. I kimanin nakai blim kesoa i gabamano hebiaiba naka mak unang maki yateniba aalo waisenabo inaminobe. Unangi lotu am tamo bianiba i gabam otabbumino detlaib mole isa aalo waisenamabo kesoa i gabam otabbumino otabbaine! <sup>7</sup> Nakai lotu am tamo bianiba Gode nganha bianiba e wengo omkeimamom gib mole i gabam otabbumino detlaine! Niminbabe, Gode inamin namino alukum kimanin nakabe. E nakae klane dimo baabanea Kebta inamin namin olo alukum kimaneba makob ne kima bli inanale ge

baabanebio kesoa nakai inamin namino alukum kimanin nakabe. I lotu am tamo bianiba Gode nganha bianiba e wengo omkeimamom gaibo i gabam otabbumino detlaiba naka mak unang maki yateniba funaniba Gode elekiem eleta i kimaninobo ge funaine! Otane unang ile naka ita i kima blib kesoa i lotu am tamo bianiba Gode nganha bianiba e wengo omkeimamom gaibo i gabam otabbumino otabbaine!

<sup>8</sup> Niminbabe, sinanggwanoo Gode unango sino mo klaneta o melebole taisoneta nakae mo klaim blimobe. Naka eta sino klanea e melebole taisaneta unang olo abuk klanebiobe. <sup>9</sup> Eka e unango bobolo mo funaneta Ne nakae klaia daaboneko geim blimobe. E nakae bobolo funaneta Ne unango klaia e daabanoko geneta unang olo klanebiobe. <sup>10</sup> Inamin kesoa unangi lotu am tamo bianiba Gode nganha bianiba e wengo omkeimamom gaibo i funaniba Nakai ni kima bliobo geniba i gabam otabbumino otabbaine! I inaib mole abiseli yateniba baabeniba I kukubo ayamobo genomabiobe. <sup>11</sup> Ina otane Sume Yesus Klaiste bainobo gabianoba e temna biob nibo makobobe. Nakae funanea Unango ne okoko daatnenoko gabea eka unang osak Nakae ne okoko daatnenoko gabiam bio kesoa inaniba daabesese bianiba dait dait okok kebianibte! <sup>12</sup> Sinanggwanoo Gode nakae sin klanea e melebole taisanea unango abuk klanebu otane memalole unang ita nakai doka binabiobe. Otane naka nibsaa unang isa inamin namin osa nibo alukum God eta klanebiobe.

<sup>13</sup> Ibo olo funaine! Unango gabam otabbumino blim bianoa lotu am tamo Gode nganabanang gamo kukub olo ayam bleka? Nibo tekein kebuobe, kukub olo misi-amobe. <sup>14</sup> Nakaia unanga nib kukubo inaminobe. Nakae e gabamano dlabane mole kukub olo misiamobe. <sup>15</sup> Otane unango gabamane dlabone mole olo ayamobe. Niminbabe, Gode emaye o gabaman olo klaubonea o gabam aale deibe waisonebio kesoa o lotu am tamo bianoa Gode nganabanang gamo o gabam otabbumine otabbannoko! <sup>16</sup> Otane naka maki ib isak temo blibi weng olo wenteniba i mo gobonim blim kenimib nakai kla wentine! Yesuse okok dlasanin naka nisa eka Gode meletani Yesuse bainobo galin nakaia unangai bib mak bib mak olo blib isa ni alukum kukub olo inabuobe.

*Kolin bib seli komoniono downom gaibo kukub misi-am wafu binibbiobe.*

<sup>17</sup> Ne memalo ibo sbal weng baabenamabibe. Ibo lotu am tamo taniba miniba Gode wengo wentom gaibo ibo kukub misi-am nabinabib kesoa ne mo baabenita Ib



kukubo ayamobo genimibabe. Ib kukubo dot misiamobe. <sup>18</sup> Ne wengo mikik-temo inaminobe. Ne wentia naka maki baatneniba Kolin bib seli lotu am tam unaniba Gode wengo wentom gaibo i bobol temo makob omfaniba Gode wengo wentenamino deiboniba i bobol temo imaye afet afet fumbianibta lotu kebiobo gesiba wentenia ne funania Weng olo atosino motonobo ge funaibio. <sup>19</sup> Ibo ib bobol temo makob omfanamino deiboniba maki imaye bobol tem afet fumbe fumbe blib kesoa ibo watemibta wani weng ota bain ano mole tekein keine! Ibo inanimibo kukub olo ayamobe. Ibo inaniba funaniba Nakai wani weng ota bainobo geib mole ib bobol tem osa makob omfaine! <sup>20</sup> Ne wentebio ibo mina bianiba Gode niniino dobtouleb bianiba imen osa waen aay osa downonom gaibo ibo nib Sume Yesus Klaiste kaanea nib hengmino walubenebio nakae e bobolo mo fumbibbabo ge baaiba wentibe. <sup>21</sup> Ibo inaniba imen osa waen aay osa oleb moniba olminimibo naka mak unang maki inamin namin blimi i bobolo funa doyenamino deiboniba ilibta ye blib keniba imeno alukum doweiba maki hennaniba imen teb kla unehiba eka mak ile waen aayo tali downoniba gabam tol temo mima fubenoa weng namin namin nabliobe. <sup>22</sup> Ibo kukub olo inabibo bainobo galin naka mak unang maki kukub misiam nayebiobe. Ibo naka mak unang maki imen blimi i bobolo funanamino deiboniba inabibo kukub olo makob ibo i oye bianiba Ibo naka ayambabo ge oyebiba i aal gembiobe. Ne ib kukub olo nabibo baabania Ib kukub olo ayamobo genamabia bleka? Ne mo inang genimibabe. Ne baabenamabio ib kukub olo misiamobe. Ibo inaniba imeno tali unalom gib mole ilib am ye downonibta eka lotu am ole besa unine!

*Yesuse e okok aleyemin nakai komoniono oya downosiobe.*

<sup>23</sup> Ibo nib Sume Yesus Klaiste bobolo klaow mo funaim blim bianibta kukub misiam olo nabib kesoa ne weng olo kla wentine! Nib Sume e wengo ne omnea ibo baabeibu otane dokobenobio kesoa imin baabenamabibe. Yudase Yesuse komokwali dobyamabe dimo kwinoa Yesuse imene obonea <sup>24</sup> Gode gangobo genea hanea e okok aleyemin nakai kikibeneba baabeneba Olo ne damobe. Ne ib bobolo fumbi kesoa ne damo ibo oyenia daabeibua sinanomo ibsa ina bianiba ne bobolo fumbianiba unaline ge baabeneba downosiobe. <sup>25</sup> Eka waen aay esak obonea Gode gangobo genea imin baabeneba Waen aay ele Gode mema wengo alebenebo, ne ileme singania ibo tekein keniba Gode weng olo baane biamo bain

inanamabebo gabianiba ibsak sinanomo inaniba ne bobolo fumbianiba waen aay ele unaline ge baabeneba obia doweibbiobe. E weng olo baabenebuo inaminobe. E atdimmo kaanea ileme singanamabe kesota weng olo inangge baabenebiobe. <sup>26</sup> E inanebio kesoa ibo e bobolo fumbianiba imen osa waen aay osa ina bianiba wembiba naka mak unang maki yatem tekein keniba Nib Sume atdimmo kaanea nib hengmino walubenebio gabiba ibo nib Sume tlamabe amo waeso bianiba am mak dimo ibo imen osa waen aay osa downonom gaibo Yesuse bobolo funine!

*Nakaia unangai komoniono downonom gaibo klanibta doweine!*

<sup>27</sup> Ne baabenamabio Nakaia unangai kukub misiam nabianiba eka nib Sume Yesus Klaiste kaanebuo o bobol osa eka e bainobo galin naka mak unang maki gobenin bobol osa mo funin blim bianiba e imen osa waen aay osa wembibo kukub olo makob i obianiba Yesuse e dam osa e ilem osa mitmakam blim besabo ge obib kesoa i kukub olo misiamobe. <sup>28</sup> Inamin kesoa ibo imen osa waen aay osa downonom gaibo kla funaniba Ni inamin namin kukub misiamo ni dimo blimobe genibta doweine! Eka temiba inamin namin kukub misiamo ib dimo bio mole o sin omoniba Sume dim anibta e imen baka e waen aay bakao mit doweine! <sup>29</sup> Nakaia unangai nib Sume Yesus Klaiste atdimmo kaanea nib hengmino walubenebuo o bobolo mo funaim blim bianiba e imen baka waen aay bakao downoniba baaniba Imen baka waen aay baka olo mitmakamo blimobe, besa imenobo ge baaniba doweib mole kukub olo misiamobe. Sinanomo Gode i kukub misiam olo yang kenamabebe. <sup>30</sup> Ib sinwalo ina bianiba nib Sume Yesus Klaiste kaanea nib hengmino walubenebuo o bobolo mo funaim blim bianiba e imen baka waen aay bakao wembib yota maki gembianiba uno mokongan touyebua titil blim bliiba eka mak ile kulila biam bliobe. <sup>31</sup> Ibo imen osa waen aay osa downonom gaibo kla funaniba Ni inamin namin kukub misiamo ni dimo blimobe genibta doweine! Ibo inaniba kukub misiamo ib dimo buo omoniba Sume dim aniba e imen baka waen aay bakao downonibo klayam nanomabib kesoa Gode ibo enino mo omyamabebabe. <sup>32</sup> Memalo nib Sume Gode nib kukub misiamo nabobo yatemeanea funanea Ne i kukub misiamo nabibio alebeia tosanianiba deibueine ge baanea dlo klabe kesoa nibo kukub misiamo deibonob biamo sinanomo e naka mak unang maki kukub misiamo nabibo yang keanea dlanea moniba aseinin bib unomabib

otane nibole e mo dlaneta monobta aseinin bibo mo unomabbio babe. <sup>33</sup> Inamin kesoa ne nekwal ibo Yesus Klaiste bobolo funaniba miniba imen osa waen aay osa downom gaibo ibo naka mak unang maki mo deibenibta mak ita unalalibe! Waise bliba i tenasiba ibo alukum minibta down down bianibte! <sup>34</sup> Eka wanibta imen tebo yebo mole ilib am ye downibta tline! Ibo mo de te blihta imen tebo mo yebota bobol asusu nimibe! Ibo down tebianiba Sume bobolo kla fumbianiba naka mak unang maki waise bliba i alukum te misibta Sume imen baka e waen aay bakao wembianibte! Ibo mo inamin blim kernib mole ibo kukub misiam ota namiba Gode yang kenea ibo enino omyamabebe. Ne weng mako ye bu otane ne futan temo mo baabenimibabe. Deibueibua sinanota monita weng keim baabenano!

## 12

*Gode Hobe e titilo nibo afet afet omkayebeta okok kebuobe.*

<sup>1</sup> Ne nekwal ibo ne weng olo baabenamabio kla wentine! Gode Hobe e titilo nibo afet afet omkayebeta nibsa e okoko afet afet okok kebuobe. Ne funania Ibo Gode Hobe e titilo nibo omkayebe olo mitmakamo kla tekein keine ge funanita weng olo baabenamabibe. <sup>2</sup> Ibo tekein kebiobe, sino ibo Yesus Klaiste bainobo geim blim blib dimo Gululame ibo nganabenea teniba nakai aso weloniba smiko klaibbuo weng ominba o niniin ota omtoulebinibbio. <sup>3</sup> Inamin kesoa ne funania Ne weng olo i baabenimio o mitmakamo kla tekein keine ge funaiobe. Naka mak unang maki obianiba Gode Hobe e wengo ni omyebua ni weng olo nakaia unangai omkayebuobo ge obib otane nibo fatnanobta weng olo tekein kenobta i weng olo dimobe bainobe genomabbione? Nibo tekein kebuobe, nakaia unangai obianiba Yesuse naka ayamba kesoa Gode dabanea monea aseinin bib unamabebo ge obibi Gode Hobe i bobol temo blim kesota i weng olo obiobe. Otane nakaia unangai obianiba Yesus Klaiste nib Sumobo ge omib mole nibo tekein kenoba Naka elita Gode Hobe i bobol temo bibe bieta weng olo obiobe genomo! <sup>4</sup> Gode Hobe elekiemobe. Ina otane e titilo nibo afet afet omkayebeta nibo Gode okoko okok kebuobe. <sup>5</sup> Sume elekiem otane e okok ota afet afet omkayebeta okok kebuobe. <sup>6</sup> Gode elekiem otane e titilo nibo afet afet omkayebeta e okok osa afet afet okok kebuobe. <sup>7</sup> Gode Hobe nib bobol temo bibe bianea e funanea Ne titilo ne bainobo galin nakaia unangai omia i klayam bianiba i sinwalo maki daabesese nine geneta e titilo

nibo alukum elekiem olokiem omkayebe kesoa Gode bainobo galin naka unang nibo titil olo omonoba naka mak unang maki daabesese nomo! <sup>8</sup> Gode Hobe e titilo nibo alukum afet afet omnye biobe. Maki Gode wengo naka mak unang maki kla omkayemin titilo omkaye bianea eka mak ile Gode wengo mitmakamo naka mak unang maki alebeiba tekein kenamin titil omkaye bianea <sup>9</sup> eka mak ile Gode bainobo geniba e okoko sbalma okok kemin titilo omkaye bianea eka mak ile nakaia unangai gembib biamo klaubeiba ayam anamin titilo omkaye bianea <sup>10</sup> eka mak ile Sume okok sumo sino nibo mo watemim blimo klamin titilo omkaye bianea eka mak ile Gode wengo omkeimamin titilo omkaye bianea eka mak ile i naka mak unang maki okoko watemeye bianiba i bain Gode Hobe titil ota omkayebeta okok olo okok kebiobe, eka elile hob misiame titil ota omkayebeta okok kebiobe gabianiba moton sanin titil omkaye bianea eka mak ile wengo dabalim nakaia unangai inamin wengo sino mo obibta wentim blimo omin titil omkaye bianea eka mak ile weng olo sino mo wentim blim otane olo dimo wenteniba deskin kabianiba naka mak unang maki omkayemin titilo omkaye biam biebe. <sup>11</sup> Gode bainobo galin naka unang nibo inabobo Gode Hobe elekiem eleta nibo titilo omkayebeta okok kebuobe. E ele bobol tem ye fumbianea e titilo nakaai elekiem elekiemi afet afet omkayebete.

*Bainobo galin nakaia unanga ile makob Yesuse damobe.*

<sup>12</sup> Gode Hobe e titilo nibo afet afet omkayebe otane nib bobol tem funin ole makobobe. Bainobo galin nakaia unanga nibo elekiemobe. Makob nakai damo olokiem otane skila kweilao homon ta okayem tlobio inanoba bainobo galin naka unang nibsa makob Klaiste dam otane nib okoko afet afetobe. <sup>13</sup> Yuda nisa eka Yudaba ibsa eka nakaia unangai naka maki kima bliba i okoko moni okokba besa okok kebib isa eka nakaia unangai inamin namin okoko imaye kima bianiba okok kebib isa nibo alukum nib bobol tem funino makob anoba Klaiste elekiem ele niniin dim ota aaye fuelanobbio. Gode Hob esa elekiem otane e nib bobol temo alukum bibe bie kesoa nibo makob Klaiste dam elekiemobe. <sup>14</sup> Nibo tekein kebuobe, nib damo alukum kinbabe. Skalo ye delasube nabianoa eka kweilo ye welasube nabianoa eka kino ye ulabe nabianoa eka mukunge ye halasube nanebu otane dam ele elekiemobe. <sup>15</sup> Skila kweilao o okoko makobbabe. O okoko afet afet kesoa skilono nakanoa baanoa Ne kweilonbabe. Ne okoko sumba kesoa

ne dam olo o atobabo geno mole o weng olo bainbabe. Osa o okoko sumobe. Osa damo atosinobe. <sup>16</sup> Eka klang osa kin osa o okok osa makobbabe. O okoko afet afet kesoa klango nakanoa baanoa Ne kinbabe. Ne okok osa sumba kesoa ne dam olo atobabo geno mole o weng olo bainbabe. Osa o okoko sumobe. Osa damo atosinobe. Bainobo galin nakaia unanga nibsa makob inaminobe. Nib okoko afet afetobe. Makob skila kweila klanga mukunga kina o ulabobe. O homon otane o damo olokiemo bio inanoba Yesuse bainobo galin nakaia unanga nib okok osa afet afet otane nibo makob Klaiste dam kesoa nibo mo baanobta Bainobo galin naka mak unang mak ib okoko afet kesoa ni ib atobabo genomobbabe. Bainobo galin naka unang nib damo makob elekiemobe. <sup>17</sup> Inaminobe, kino olota ulabenoa klango ulabenamino deibeno biamo wengo mo wentomabbobabe. Eka klang olota ulabenoa mitdifeno mo ulabeim blim deibeno biamo inamin namin tango mo kunkayemabobabe. <sup>18</sup> Gode nibo klaneo klango mo deiboneta kino olota ulabeim blimobe. E ele bobol tem funin ye funanea ne inaneme genea skil osa kweil osa kin osa klang osa mukung esa klanebiobe. <sup>19</sup> Gode nib damo klanebio dimo e kin olota klane biamo o mo dam moton anamabobabe. O besa kinanamabobe. <sup>20</sup> Gode nib damo klanebio dimo e kino olokiemo mo klaim blimobe. E skilon osa kweilon osa klang osa mukung esa klananebu otane o damo elekiemobe. <sup>21</sup> Kino nakano mole kweilono mo baabonota Obo blim biaebo ne nemaye namabibo genomobbabe. Eka gabam esa skilono mo baaboneta Obo mo nim blim biaeb osa ne nemaye namabibo genanamabebabe. Kin osa kweilon osa gabam esa skilon osa o okoko alukum afet afet otane o dam olo temo bio mole dam olo ayam namabobe. Bainobo galin nakaia unanga nibsa inanoba makob anomo! Nibo bainobo galin naka mak unang maki mo oye bianobta Ib okok osa ni okok osa o makobba kesoa nimaye Yesuse okoko okok kemomabbibo, ibo de unine genomobe! Nibo inamino deibonoba nib bobol temo alukum makob omfanoba Yesuse okoko okok kemob mole nibo sbal manoba e okoko kla okok kemomabbibo. <sup>22</sup> Nibo nib damo atosino owe bianoba Olo sbalbabo ge owebob otane o nib damo dimo mo nim blim biamo nibo mo sbal manobta ayam nomabbobabe. <sup>23</sup> Eka nib damo atosino mako owe bianoba Olo besabo gabob kesoa o eito kiwe bianoba eka atosin ole funanoba Naka mak unang maki ni damo atosin olo watemubenimibo misiamobo ge funanoba nibo aal gembianoba youmo dlu-

sanoba o deibo waiso biobobe. <sup>24</sup> Otane nib damo atosino owe bianoba Olo ayam kesoa naka mak unang maki ni damo atosin olo watemalaibo ni aalo mo genalomabbobabo gabob ole nibo youmo ge waisonamino deibonobbua naka mak unang maki watemeyebiobe. Eka nib damo atosino owe bianoba Olo kla ayambabo ge owebob olo Gode o olminea o okoko sum omulebiobe. <sup>25</sup> Gode nibo klanebuo e o mo afet aneta skilo omaye kla eka kweilo omaye kla eka kino omaye kla eka mukunge emaye kla naim blimobe. E makob elekiem klanea e atosino tetauba tlanebua o makob kesoa nibo ayam biobobe. Nibsa inanoba makob nib damo atosin mako kla kimabio inanoba nibsa bainobo galin naka mak unang maki kla kimanoba nib sinwal nib bobol temo makob omfanoba ayam nomo! <sup>26</sup> Nib damo atosino enyemo mole atosino besao mo nomobabe. Alukum enyemabobe. Nibsa inaminobe. Bainobo galin naka mak unang maki enino i dimo tam tlammo nib dim osa alukum tam tlamabobe. Eka nakaia unangai bainobo galin naka make oha bianiba E naka ayamobo gabob osa nibo seimbuobe.

<sup>27</sup> Bainobo galin naka unang nibo alukum makob Klaiste damobe. Eka elekiem olokiemo nibo makob Klaiste damo atosinobe. <sup>28</sup> Gode titilo inanea ibo afet afet omyebio kesoa ibo e okok osa inaniba afet afet okok kebiobe. E okok olo inanebuo Gode titilo naka maki Yesuse okok dlasanin okoko omkayebea okok kebiob okok olo okok afeto gaisono kesoa o namba wanobe. Eka e titilo naka maki omkayebea Gode weng omkeimalin okoko okok kebib ole namba tube. Eka Gode titilo naka maki omkayebea Klaiste wengo aleyemin okoko okok kebib ole namba tibe. Eka maki okok sumo sino nibo mo watemim blimo klamin titil omkaye bianea eka mak ile nakaia unangai gembib biamo klaubeiba ayam anamin titilo omkaye bianea eka mak ile naka mak unang maki dohalim bianiba daayemin titil omkaye bianea eka mak ile inamin namin okoko kimanin titilo omkaye bianea eka mak ile weng afeto o mitmakamo i mo wente bianiba tekein kebibbao baanamin titilo omkaye biam binebio kesoa okok olole okoko asumatna olo kitem daak biobe. <sup>29</sup> Bainobo gabob naka unang nibo alukum Yesuse okok dlasanin nakababe. Eka nibo alukum Gode weng omkeimalin nakababe. Eka nibo alukum Klaiste wengo aleyemin nakababe. Eka nibo alukum okok sumo sino nakaia unangai mo watemim blimo klamin nakababe. <sup>30</sup> Eka nibo alukum nakaia unangai gembibi klaubenoba ayam anamin nakababe. Eka nibo alukum weng afeto o mitmakamo nibo mo wente

bianoba tekein kebobbao omin nakababe. Eka nibo alukum weng olo deskinoaba naka mak unang maki omkayemin nakababe. Nibo inamin namin okok olo alukumo mo okok kebobbabe. <sup>31</sup> Gode emaye nibo e titilo afet afet omyebio kesoa nib okok osa inanoba maki imaye afet ye okok kebib okok kebebobiobe. Titil olo alukum ayam otane mako dot ayam kesoa mako gaisonobiobe. Ibo funaniba Gode titilo dot ayamo ni omyeko ge funaib mole kukub olo ayamobe. Otane memalo ne kukubo dot ayamo ibo baabenamabio ibo wafueib mole dot ayamobe.

### 13

*Nibo naka mak unang maki gobenomo!*

<sup>1</sup> Gode Hobe e titilo nibo omkayebea nibo weng afeto o mitmakamo nibo mo wente bianoba tekein kebobbao nib sital dimo tam tlebua obianoba eka abiseli weng osa nibo o mitmakamo mo tekein kebobbao obiam biob otane nibo naka mak unang maki kla mo gobenoba daayemin blim kenob mole nib weng olosa bainbabe, o mitmakam blimobe. O makob naka maki belo mitmakam blim ye olana bianiba eka nakai waso mitmakam blim ye boubiam binabib inamin anamabobe. <sup>2</sup> Gode Hobe e titilo nibo omkayebea nibo Gode wengo naka mak unang maki omkaye bianoba eka e wengo sino ayok binabo osa eka e weng mak osa o mitmakamo alukum tekein ke-biam bianoba nib bainobo galino sbalma biob kesoa nibo amgolim mako baabonoba Obo betan olo deiboneba moneba betan afet mawenale genomobo o bain inanoa nibo inamin namin olo bain inanomabbu otane nibo naka mak unang maki kla mo gobenoba daayemin blim kenob mole Gode kin dimo nib okok olo mitmakam blim besabe. Ina otane nibo naka mak unang maki kla gobenoba daaye bianoba inamin namin okok olo okok kemob ota Gode kin dimo okok olo mitmakamsabe. <sup>3</sup> Nibo nib inamin namino alukum naka mak unang maki inamin namin blimi dokaye bianoba eka Gode wengo omkaye biam bioba o dafao naka mak unang maki mo bainobo gabibbai teniba nibo dleb moniba atdimo dlasa geniba aso febeiba kibanoba kulila biam bianoba nibo inamin namin olo alukum inamob otane nibo naka mak unang maki kla mo gob-enoba daayemin blim kenob mole Gode mo seinyemabebabe. Otane nibo naka mak unang maki gobe bianoba daaye bianoba inamin namin okok olo namob ota Gode kla seinyemabebe.

<sup>4</sup> Nibo naka mak unang maki kla gob-enob mole amitie daayemomo! Nibo i

mo dosuan bianoba eka i inamin namino bobolo mo waye biam biota naka mak unang maki mo oye bianobta Ni kukubo ayamobo ge oye bianobta nib niniino mo omfufumobe! <sup>5</sup> Nibo naka mak unang maki mo dlabbunoba nibta ewit bianobta ninita ye biobabo gabianoba eka naka mak unang maki nibo inamin namino nabenimibo alo mo tliye bianoa eka naka mak unang maki nibo kukub misiamo omkayemibo bobolo mo fumbiam nomobe! <sup>6</sup> Nibo naka mak unang maki kla gobe bioba i kukub misiamo naib mole nib bobol tem daako ilum omfubenamabobe. Ina otane i kukub misiamo deiboniba kukub ayam ota namib mole nibo bobol ayam funanoba kla seinomabbiobe. <sup>7</sup> Nibo naka mak unang maki gobe bioba i kukub misiamo nibo omkayemib mole nibo mo deibenomobe! Amitie gobe bianoba i bobolo fumbianoba I kukub misiamo nabib olo amito mo namomabibbabo, sinanomo i kukub misiam olo deibonomabib kesoa nibo i daayemobo i kukub misiam olo bobolo mo funyemobe ge fumbianoba gob-enomo!

<sup>8</sup> Nibo nakaia unangai gobe biobo kukub olo mo blimanomobabe. Amit namabobe. Sinanomo Gode Hobe e titil olo nakaia unangai omkayebea i e wengo naka mak unang maki omkayebib osa eka weng afeto o mitmakamo i mo tekein kebibbao i sital dimo tam tlebua obib osa eka nakaia unangai tekein kemim homono tekein kebib osa o alukum blimanamabobe. <sup>9</sup> Nibo Gode wengo alukumo mo tekein kebobbabe. Atosin ota tekein kebianobta naka mak unang maki omkayebuobe. <sup>10</sup> Sinanomo inamin namino dot ayamo tloa eka inamin namino memalo bu ole alukum blimanamabobe. Am olo dimo Gode Hobe e titilo nibo omkayebea inamin namino nabobo alukum blimanamabo otane naka mak unang maki gobenin kukub ole mo blimanomobabe. O amit namabobe. <sup>11</sup> Sino ne gwab binibio dimo ne wengo makob meme gwabi weng ota obiania eka ne bobol tem funino makob meme gwabi bobol tem funin ota fumbiam biania eka ne funania Ne inanema genimi osa makob meme gwabi bobol tem funin ota fumbiania ina binibu otane memalo damania sino ne gwab biania kukubo nabinibu osa eka bobol temo fumbinibu osa deibueibiobe. <sup>12</sup> Memalo nibo meme gwabi nabinabib inanoba inamin namino alukumo mo tekein kebobbabe. Besa ato ota tekein kebuobe. Makob nibo tenoba aayo eino biamo kikib ye mabianoba aa kikito dokamobo nib kibio kla mo watenabobba inanoba nibo Gode kukub osa alukumo mo tekein kebobbabe.

Memalo nibo inanoba atosin ota tekein kebuobe. Sinanomo nibo Gode kibio atem nabianoba eka makob e nanea nib kukubo kla tekein kebe inanoba nibsa e kukubo kla tekein kenomabbio. Am olo dimo inamabbuo nakai Gode weng naka mak unang maki omkayebibo imino mo omyena bianiba eka nakaia unangai weng afeto o mitmakamo i mo tekein kebibbao imino mo obianiba eka nakaia unangai tekein kemin homono tekein kebibo imino mo tekein kenanomabibbabe. Am olo dimo inamin namin olo alukum blimanamabo <sup>13</sup> otane kukubo asumatna ota mo blimanomobabe. O amitie bua nibo amitie nam tesomabbio. Nibo kukub olo namomabbuo inaminobe. Nibo Gode amitie bainobo gabianoba eka mak ole fumbianoba E kukubo ayamo amitie omkayebibo ge fumbianoba eka mak ole naka mak unang maki amitie gobenanomabbio. Kukubo asumatna olo alukum ayam otane naka mak unang maki gobenin kukub ota dot ayamobe. O kukub asuo gaisonobiobe.

## 14

*Gode wengo naka mak unang maki omkayemin titilo dot ayamobe.*

<sup>1</sup> Ibo ne weng olo wenteniba naka mak unang maki kla gobeine! Naka mak unang maki gobenin kukub olo dot ayamobe. Ne weng mako baabenamabio inaminobe. Gode Hobe e titilo ibo afet afet omkayebe kesoa ibo fumbianiba Gode titilo ni alukum omyeko ge funine! Gode wengo naka mak unang maki ili wengo omkayemin titilo dot ayam kesoa ibo o bobolo kla wayemoko! <sup>2</sup> Ibo fumbianiba Gode Hobe ni wengo dabalim nakaia unangai mo obinabibbao ni sital dimo tam tleyebua omin titilo omyeko gabib otane ibo ib sital dimo weng olo tam tleyebua omibo o naka mak unang maki mo daabenota tekein kenomabibbabe. Nakaia unangai weng olo i sital dimo tam tleyebua obibi naka mak unang maki mo oyebibbabe. Niminbabe, naka mak unang maki i weng olo mo tekein kebibbabe. Eka nakaia unangai weng olo i sital dimo tam tlebua obib isa imalo mo tekein kebibba kesoa i weng olo God eta ohabiobe. Gode Hobe emaye weng ayok olo omkayebeta obiobe. <sup>3</sup> Ina otane nakai Gode wengo ili weng omkeimaniba naka mak unang maki omyaibo weng olo ili weng kesoa i o kla wenteniba tekein keniba i bainobo galino sbal manomabiobe. I inaniba Gode wengo ili weng omkeimaiba naka mak unang maki weng olo wentaibo bobol ayam funaniba i Gode okoko tosiaino deiboniba sbalma okok kemomabiobe.

<sup>4</sup> Nakaia unangai wengo dabalim nakaia unangai mo obinabibbao obib weng olo nakai weng olo obib nakai ili bobol tem funin ota daaye bianoa i bainobo galino dosbal sambobe. Otane nakai Gode wengo ili weng omkeima bianiba naka mak unang maki omkayebib ole weng olo ili weng kesoa bainobo galin nakaia unangai alukum i kla wentebiba weng olo i bobol tem funino daayebua i Gode kukubo kla tekein kebibo. <sup>5</sup> Ne enangge funania Ibo wengo dabalim nakaia unangai mo obinabibbao ibo alukum omib mole kukub olo ayamobe ge funai otane ibo Gode wengo ilib weng omkeimaniba nakaia unangai omyaib ota dot ayamobe. Nakaia unangai Gode wengo ili weng wentaibo weng olo i bobol tem funino daabenamabobe. Ina otane nakaia unangai wengo dabalim nakaia unangai mo obinabibbao omkeimanimo weng olo baanimib nakai ili bobol tem funin ota daabenamabobe. Eka naka mak unang maki weng olo wentaib ile o mitmakamo mo tekein kenomabibba kesoa weng olo i bobol temo mo daabenota i bainobo galino mo dosbal manamobabe. Otane Gode e titilo naka make omalea e wengo dabalim nakaia unangai mo obinabibbao mitmakamo tekein kenea e weng olo ele weng deskinanea naka mak unang mak ibo omyame ota ibo weng olo tekein keniba o ib bobol tem funino daabenamabo kesoa kukub olo ayamobe. <sup>6</sup> Ne nekwai ibo wentine! Sinanoe ne ibsuo natlamabio wengo dabalim nakaia unangai mo obinabibbao baabei mole ibo o mitmakamo mo tekein kenibta o ib bobol tem funino mo daabenamobabe. Otane ne Gode wengo ninib weng omkeimania omyami ota ibo kla wentenibta o ib bobol tem funino daabenamabobe. Ne Gode wengo e inamin namino nanamabeo wengo ninib weng omkeima biana ibo aleyemi ota ibo kla wentenibta weng olo ib bobol tem funino daabenamabobe.

*Nibo Gode wengo ninib weng omkeimamomo!*

<sup>7</sup> Inamin namino afen smik blim osa makob inaminobe. Nakai wasa dlamao boubib biamo o wengo klao mo nganaim blim besa kling klang no mole nibo fatnanobta o wengo ngambo tekein kenomabione? <sup>8</sup> Nakai eili boniba naka maki nganabenom gaibo i wengo webianiba sum nganasibta naka maki wenteniba tetemribta monibta genomabiobe. Otane i wengo klao mo webia nganaim blim keib mole naka maki mo wenteniba tibta monibta genomabibbabe. <sup>9</sup> Ibsa inaniba wengo dabalim nakaia unangai mo obinabibbao obianiba Gode wengo naka mak

unang maki omkayemib mole i weng olo klao mo wentomabibbabe. Ib weng olo tib deib unamabobe. O nakaia unangai bobol temo mo unota i weng olo mitmakamo mo tekein kenomabibbabe.<sup>10</sup> Nakaia unangai dabalim olo blibi i wengo afet afet obib otane i weng olo alukum mitmakamsabe. I weng olo obibo ili weng kesoa o mitmakamo tekein kebiobe.<sup>11</sup> Inamin kesoa nibo minoba Gode wengo omkeimabob biamo naka make wengo dabalim nakaia unangai mo obinabibbao baanemeo nibo e wengo mo tekein keim blim kenomobo funanoba E bib mak nakabo genomabibiobe. Eka nibsa wengo baanomobo naka ele nib wengo mo tekein keim blim kenea e funanea I bib mak nakabo genanamabe kesoa e nib bobol tem funino mo daabeneta eka nibsak e bobol tem funino mo daaba nanomabbiobabe.<sup>12</sup> Inamin kesoa ibo funaniba Gode bainobo galin naka mak unang maki i bobol tem funino daayemin titilo ni omyia e okoko okok kemomo ge fumbianibte!

<sup>13</sup> Ibo lotu kenom geniba mina bianiba naka make e sital dimo wengo dabalim nakaia unangai mo obinabibbao tam tlubanoa baanang ge mole e Gode baabanea God kobo weng olo mitmakamo ne tekein kenia deskina nene weng baanamin titilo omnene ge baabanea e omaleta e weng olo mitmakamo ele weng deskinaneta naka mak unang maki omyeko!<sup>14</sup> Ne weng olo ibo baabenamabio kla funaine! Gode Hobe e titilo nibo omye-nea nibo wengo dabalim nakaia unangai mo obinabibbao obianoba Gode nganhamobo nibo o mitmakamo mo tekein kenomabbiobabe. Besa sital ota ye nganhamomabbu otane Gode emaye weng olo mitmakamo tekein kenamabebe.<sup>15</sup> Inamin kesoa ne fatnamabine? Ne kukub olota nanamabibe. Ne lotu kenang genia tenia lotu amo tlamio Gode titilo ne omnamabe kesoa ne wengo dabalim nakaia unangai mo obinabibbao obiania Gode nganhamang gamio e titilo ne omnea weng olo mitmakamo tekein kenia deskiania nene weng omkeima biania eka mak ole Gode Hobe titilo omkanebea ne wengo dabalim nakaia unangai mo obinabibbao anso ngambiam blia e titilo omkanebea ne ans olo mitmakamo tekein kenia deskiania nene weng ans ngambiam namabibe.<sup>16</sup> Ibsa mo inaim blim keib mole naka mak unang maki ib wengo mo wentomabibbabe. Ibo wengo dabalim nakaia unangai mo obinabibbao obianiba Gode niniino dobtoulele nimibo naka mak unang maki ib weng olo mo wentenibta bainobo genomabibbabe. Ibo inamibo i ib weng olo tobtlin haloniba weng olo ni

wengba yole i fatnange obibe? gabianiba tobtlinomabiobe.<sup>17</sup> Ibo wengo dabalim nakaia unangai mo obinabibbao omibo ibo Gode niniino kla dobtoulele nomabib otane naka mak unang maki weng olo mitmakamo mo tekein kebibba kesoa weng olo i mo daabenomobabe.<sup>18</sup> Ne mo baanita Ibo wengo dabalim nakaia unangai mo obinabibbao mo omibe ge baabenimibabe. Nema! osa Gode Hobe e titilo ne omkanebea am homono dimo ne nemaye nenekiem biania wengo dabalim nakaia unangai mo obinabibbao obiania Gode nganha binabibe. E titil olo ne omkanebe ota ibo omkayebeo gaisonobiobe. Ne titil olo bobolo funania Gode gangobo gabibe.<sup>19</sup> Ina otane bainobo galin nakaia unangai mina bianiba lotu kebibba ne baka lotu kenang gamio ne kukub olo deibonia Gode wengo ili weng omkaye bia nakaia unangai weng olo wente bianiba i Gode kukubo kla tekein kebib kesoa ne kukub olo ayamobe. Ne funania Ne wengo dabalim nakaia unangai mo obinabibbao omi mole i ne weng olo mitmakamo mo tekein kenomabibba kesoa i wengo tekein kebib ota wengo i mo tekein kebibbao gaisonobiobo ge funaiobe. Nibo Gode wengo ili weng omkeimabobo i o mitmakamo tekein kebib kesoa o i bainobo galino daaye binabobe.

<sup>20</sup> Ne nekwal ibo ne weng olo kla wentine! Ibo mo meme gwabi ulab anibta wengo dabalim nakaia unangai mo obinabibbao obianibta o bobolo mo funimibe! Meme gwabi mo tekein kenibta kukubo yo nanomob ota nakaia unangai daabenamabobe gabibbabe. Otane naka gang ile bobol temo kla fumbianiba Kukubo yo nanomob ota nakaia unangai daabenamabobe eka yole i mo daabenamabobabe gabib kesoa ibo meme gwabi funino deiboniba naka gangi bobol temsaine! Inanomabib otane ib bobol temo kukub misiam namino o bobolo dokobenoa deiboniba makob meme gwabi bobol tem fumbib inaine!<sup>21</sup> Ibo wentine! Sinanggwanano Gode e wengo e weng omkeimalin nakai omkayebea i weng olo Yudai ili weng obianiba Yuda nakaia unangai omkayebib otane i weng olo omdibimib kesoa Sume bib mak nakai dlanea teniba i betan mak seli weng ota Yudai omkayebiba i weng olo wentemim blim binibbiobe. I ina binibbuo Gode buk temo baanoa

Sume baanea Ne bib mak nakai weng afet omini dlai teniba Yudai kima bianiba Gode wengo ili weng omkayebiba Yudai weng olo mitmakamo mo tekein kenibta bainobo genomabibbabo genebiobo genobiobe.

<sup>22</sup> Inamin kesoa nibo weng olo tekein kebuobe. Gode funanea Ne titil olo nakaia unangai omkayemio wengo dabalim nakaia unangai mo obinabibbao omibo bainobo galin naka mak unang maki kukub olo mo aleyemomabibba otane nakaia unangai mo bainobo gabibba ile weng olo wenteniba funaniba Gode ni dosuan bianeta weng olo omkayebebo ge funaine geneta e weng olo omin titilo bainobo galin naka mak unang maki omkayebebe. Ni Gode weng omkeimalin titil olo bainobo galin nakaia unangai omkayeboba i Gode wengo ili weng obianiba naka mak unang maki omkayebibo bainobo galin nakaia unangai weng olo wenteniba fumbianiba Weng olo bain Gode wengobo o nibo daayemabobo gabib otane nakaia unangai mo bainobo gabibba ile weng olo mitmakamo mo tekein kebibbabe.

<sup>23</sup> Bainobo galin nakaia unanga ibo lotu damibo te mina bianiba wengo dabalim nakaia unangai mo obinabibbao ibo alukum obiba naka mak unang maki kukub olo mo tekein kebianibta bainobo gabibbai teniba weng olo wentaibo i fatnange funanomabibe? I funaniba Nakaia unanga eli bobol tem funin blim bianibta wengo misiam ye obiobo genomabiobe. <sup>24-25</sup> Otane ibo lotuo kimanom gaibo Gode wengo ilib weng omkeima bianiba nakaia unangai omkayemio nakaia unangai mo bainobo gabibbai teniba weng olo wentaibo i kukub misiamo nabib osa eka bobol tem misiamo fumbib osa funaniba Ni kukub olo nabobo misiamobo, i weng ota bainobo, ni Gode kukubo mo wafu biobabo ge funaniba i Gode niniino dobtoulebianiba baaniba Bainobo, Gode ibo bekebe biebo genomabiobe.

*Bainobo galini Gode niniino moton dobtoulebianiba nine!*

<sup>26</sup> Ne nekwal ibo wentine! Ibo miniba Gode niniino dobtoulebianiba okoko namom gaibo kukub olota namine! Make anso kimanea eka make Gode kukubo alebenea eka mak ele Gode wengo e omalameo omkeimanea eka mak ele wengo dabalim nakaia unangai mo obinabibbao oeba eka mak ele e weng olo deskinamin titilo Gode omalameo ili weng deskinea nakaia unangai omkaye biam nine! Ibo kukub olota ina bianiba bainobo galin naka mak unang maki i bainobo galino omsbal sanyemine! Ibo inamibo kukubo watemiba bainobo galin naka mak unang maki mo daabenamaboba bio mole kukub olo deibueine! <sup>27</sup> Naka mak unang maki wengo dabalim nakaia unangai mo obinabibbao baanamin titilo

Gode omya baanom gaibo naka homoni mo omibe! Asua asumatnaea mak ita baa tlaiba eka bib sak ele i weng olo deskinanea ili weng baa omkeimaneko! <sup>28</sup> Otane bibam olo sake Gode titilo omalea e weng olo deskinamin nakae blimbie mole wengo dabalim nakaia unangai mo obinabibbao obib nakai weng olo mo baanimibe! I deiboniba imaye bianiba God eta weng olo ohamine! <sup>29</sup> Nakai asua asumatnaea mak ita Gode wengo omkeimamib ole eka mak ibole i weng olo moton sam bianiba Olo bain Gode wengobe eka olole Gode wengbabe gabianiba moton sam bianibte! <sup>30</sup> Naka make Gode wengo omkeimabea eka naka make Gode bobol tem funino omalea esak weng olo omkeimanang ge mole sino mabianea omkeimabe nakae denabanea esak omkeimaneko! <sup>31</sup> Ibo ina bianiba Gode wengo baa omkeimasese bianiba bainobo galin naka mak unang maki omkayebiba i weng olo wente bianiba i bainobo galino sbal maine! <sup>32-33</sup> Ibo lotu kebianiba Gode niniino dobtoulebianiba e fumbianea I mo alukum manibta ne wengo omkeimamibe! Elekiem elekiem ita omkeimabiba mak ile dongke toulala bianiba weng olo wenteniba kla funaine ge fumbie kesoa nakae Gode wengo omkeimanang gameo funanea Amo yo dim ota omkeimaneme eka yo dim ole deiboneme gabianeta omkeimameko! <sup>34</sup> Ibo lotu kebianiba Gode ninino dobtoulebianiba nom gaibo unang ile weng olo omibe! I kimik geniba makob bib mak bib mak seli naniba i lotu damibo unangi wengo kimik gebinabib inamine! Gode buk temo baanoa

Unangi imakwali kitem daak nine genomabiobe.

<sup>35</sup> I inabiba nakai Gode wengo omkeimaiba wenteniba o mitmakamo klao mo tekein keim blim kenimibo i heke blib temo mo baanimibe! Deibueibbua am unaniba ili imakwal ita baabeibta alebeine! Unangi lotu damibo unangi wengo baaib mole kukub olo misiamobe. <sup>36</sup> Ibo fatnanibta ne wengo wentenamino deibonibta kukub afeto nabibe? Ib kukub olo misiamobe. Gode e wengo sino ibo mo omyim blimobe. E naka mak unang mak ita sino omyeneta ibole mit omyebiobe. Gode e wengo ilibkiemo mo omyim blimobe. E naka mak unang mak isa alukum omyebiobe. Inamin kesoa ibo ne wengo mo omdibine bianibta ilib bobol tem funino mo namibe!

<sup>37</sup> Naka maki ib isak temo blibi funaniba Ni Gode weng omkeimalin naka kesoa Gode Hobe e titilo ni omkayebea ni e okoko okok kebuobo ge fumbib ibo ne weng

ele dola omfubenamabi olo tekein keniba weng olo nib Sum eta Fole omaleta dola omfubenebe geine! <sup>38</sup> Ib isak temo naka maki obianiba Fole weng olo nib Sume wengba kesoa ni e wengo mo wentaobbabo gabib nakai weng olo ibo baabenimibo ibo i wengo mo wentaibe! <sup>39</sup> Ne nekwal ibo miniba lotu kemom gaibo Gode enangge baabaine! God kobo keb titilo ni omyeba ni keb wengo nini weng omkeimanomo ge baabaine! Ibo inaniba Gode wengo ilib weng omkeimanimibo kukub olo dot ayamobe. Eka naka make wengo dabalim nakaia unangai mo obinabibbaa baanang game osa ibo mo watanibta tolobo genimibe! <sup>40</sup> Ina otane ibo Gode wengo ilib weng omkeimamib osa eka wengo dabalim nakaia unangai mo obinabibbaa obianiba Gode niniino dobtouleba nimib osa ilib bobol tem funino mo omasanibta namibe! Makob olo unobio iwat nabianiba elekiem ke ute baa omkeimase omkeimase nine!

## 15

### *Klaiste kaanea imin hananebiobe.*

<sup>1</sup> Ne nekwal ibo wentine! Sino ne Yesus Klaiste dowan wengo ibo omkayebia wenteniba bainobo geibbuo memalo ibo ib bainobo galino sbalma wafu bliobe. Ne funania Ne ibo weng olo imin baabeia funaine ge funania weng olo baabenamabibe. <sup>2</sup> Sino ibo hengmino temo bliba Gode dotlanebio kesoa ibo Klaiste dowan weng olo amitie kla wafu blib mole Gode kukub ayamo omyia ibo amit nomabiobe. Eka ibo weng olo klao mo bainobo geim blim blib mole ibo amito mo nomabibbabe. <sup>3</sup> Ne sino Yesus Klaiste wengo wente biana ne weng olo ibsa omkaye binibiobe. Ne weng olo ibo omkaye binibio, weng olo sbalobe. Weng olo enaminoobe. Klaiste atidimo kaanea nib hengmino walubenebuo makob sino Gode weng omkeimalin nakai Gode buk temo dolaibbio inanea Klaiste tenea atidimo kaanea <sup>4</sup> naka maki debeb moniba tom tem wat dofaibbuo amo asu kenea make dim ele Gode e imin dofaanea hanasebe. Sinanggwano nakai weng olosa Gode buk temo dolaibbio. <sup>5</sup> E imin hananea mikiktemo monea Fita esu ye motemea atemeta omito e monea e okok dlasanin nakai mak isu ye motemea isa atemnaibta <sup>6</sup> omito e monea bainobo galin nakaia unangai homoni 500 i miblib isu ye motemea isa atemibbio. Ne futan ele dolanamabi olo dimo nakaia unanga eli maki kaaibbu otane homoni sma bliobe. <sup>7</sup> Omito e monea e ninge Yems esu ye motemea atemea omito e monea alukum e okok dlasanin naka isu osa motemea i atemnaibta <sup>8</sup> mubiango e tenea nesu ele tleta atemibiobe. Amo yo dimo ne naka

misiam hengmin gam kesoa Yesuse ne tenanimba otane e tenea nesu tleta atenita ne bainobo geibiobe. <sup>9</sup> Yesuse okok dlasanin nakai kukubo misiam otane Fol ne kukub ole dot misiamobe. Sino ne Yesuse mo bainobo geim blim binibio dimo ne Yesus Klaiste bainobo galin nakaia unangai enin kino omkaye binibio kesoa naka maki ne baatneniba E naka ayambabe, e Klaiste bainobo galin nakaia unangai enino omkaye binebio kesoa ni e mo baabanobta E Yesuse okok dlasanin nakabo genomobbabo geib mole i wengo bainobe. <sup>10</sup> Ina otane ne Gode nemhalilanea daatneanea bobol tem funin ayamo omnebio kesoa memalo ne Yesuse okok namasanin nakabe. Gode ne nemhalim biana amitie daanebe kesoa ne besao mo nimibabe. Ne e okoko omkanebeo sbalma biana okok kebibe. Yesuse okok dlasanin nakai maki okoko ye bumolok bianiba okok kebibe otane ne okoko sbalma biana okok kebibe i okoko gaisei biobe. Otane ne nene titilo mo daanebota Yesuse okoko sbalma okok kebibe. Gode ne nemhalim biana daane biana e titilo omkanebe kesoa ne e okoko sbalma okok kebibe. <sup>11</sup> Yesuse okok dlasanin nakai maki ni sinwalo Yesuse okoko okok kebuobe. Ibo ni bobolo mo funbianibta Fole okok ota sbal okok kebe bleka Klaiste okok dlasanin nakai maki okok ota sbal okok kebibe bleka? gabianibta mo funimibe! Ibo ni wengo baabenobbuo bobolo funaine! Ne Yesuse okok dlasanin nakai maki ni sinwal ni wengo alukum makobobe. Ni ibo Yesuse kaanea imin hananebio wengo oyebuobe. Ibo amitie weng olo bobolo funine! Ibo weng olo wenteniba bainobo geibbio.

### *Bainobo galini kaaib biamo imin hana tlomabiobe.*

<sup>12</sup> Ni amitie Yesus Klaiste kaanea Gode imin dofaanea hananebio wengo ibo omkaye binabuobe. Ibo weng olo wentebib otane naka maki ib isak temo blibi baaniba Nakaia unangai kaaibbuei imino mo hananomabibbabo ge obib kesoa i bobol tem funin osa eka i weng olosa misiamobe. <sup>13</sup> I weng olo bain bio mole sino Yesus Klaiste esa kaaneo mo inaneta hana tlamebabe. Otane e hana tlebio kesoa i weng olo dimobe. <sup>14</sup> Ni ibo baabenoba Yesus Klaiste kaanea Gode imin dofaanea hananebio ge oye binabuobe. Ni inangge oye binabob otane e Gode imino mo dofaaim blim kenebio mole ni weng olo dimobe. Eka ibo weng olo wenteniba bainobo geibbu osa Yesuse imino mo hanaim blim kenebio mole ib bainobo galin olo dimobe. <sup>15</sup> Ni ibo baabenoba Klaiste kaanea Gode imin dofaanea hananebio ge oye binabob



otane naka maki ib isak temo blibi baaniba Nakaia unangai kulilaibbuei imino mo hananomabibbabo gabiobe. I weng olota bain obib mole ni wengo Gode dim oha binabuobe. Otane bain ye Gode Klaiste imin dofaanea hananebiobe. <sup>16</sup> Gode sinanomo nakaia unangai kulilaibbuei imin dohaaia hana tlomabiobo genebio weng olo dim bio mole ni sino baabenoba Sino Gode Yesus Klaiste kaaneo imin dofaanea hananebiobo ge baabenobbuo weng olosa dimobe. <sup>17</sup> Yesus Klaiste kaaneo Gode e imino mo dofaaneta hana tlebioba bua ibo Yesuse bainobo gabib mole ib bainobo galino yo mo daabenota Yesuse ibo hengmino temo blibo dotlaneta amit nomabibbabe. <sup>18</sup> Eka nakaia unangai obianiba Gode nakaia unangai kaaibbuei imino mo dohaaneta hananomabibbabo gabibo weng olo bain bio mole sino nakaia unangai Yesus Klaiste bainobo gabianiba kulilaibbuei mo monibta Gode bibo amit nomabibbabe. <sup>19</sup> Nibo Yesus Klaiste wengo bainobo gabianoba sma dabalim ele biobo Gode nibo daaye bianea kima bia nibo klayam biob otane sinanoa nibo kaanomobo dimo Gode nibo mo daabeneta imino mo hana tlim blim kenob mole bainobo galinba nakaia unangai nibo baabeniba Ibo dim weng yota wenteniba bainobo gabib bita ib bainobo galino misimu benobo geniba dohalinomabiobe.

<sup>20</sup> Ina otane sino Yesus Klaiste kaaneo Gode imino mo dofaaneta hanaim blimobo galin weng olo dimobe. Yesuse kaaneo Gode bain ye dofaanea imin hananebiobe. Weng olo bainobe. Sino e imin hananebio kesoa nibo tekein kebuobe, sinanomo Gode nakaia unangai kulilaibbue isa imin dohaanea hana tlomabiobe. <sup>21</sup> Sinanggwanoo Adame kukub misiamo naneo Gode baabanea Kobo inaneb kesoa sinanomo keb molobseli walo unaiibi alukum kulilamomabiobo ge baabanebua sinanoa naka make e niniino Yesus Klaiste kaanea imin hananeo Gode Yesuse baabanea Kobo inaneba imin hananeb kesoa sinanomo nakaia unangai kulilaibbue isa imin hananomabiobo ge baabanebiobe. Sinanomo i bain inanomabiobe. <sup>22</sup> Nibo Adame molobsel kesoa nibsa kukub misiamo nanoba kaanomabbio. Eka bainobo galin nakaia unanga nibo Klaiste tena biob kesoa sinanoa nibo kaanomobo Gode imin dohaanea hananoba e amit bekeba nomabbio. <sup>23</sup> Nibo inanoba imin hananomabbu otane Yesus Klaiste eta sin hananebio kesoa e imin tlameo e bainobo galin nakaia unanga nibo kaanob biamo imin hananomabbio.

<sup>24-26</sup> Sinanoa Yesus Klaiste imin tlameo

dimo dabalim olo inamin namino alukum blimanamabobe. Yesus Klaiste inamin namin olo alukum kima bie bita sinanota Gode baabanea Kobo keb makaai alukum yenaneba gaiseneba kebta i kimanale ge baabanemeo e inanamabebe. Am olo dimo Yesus Klaiste dabalim olo komokwali omomomi e wengo omdibihabib isa eka Gululame meletan isa watwat dabe tlanemeo, o abuk ota e makaa sumo watwat dabonamabebe. Olo kaanamin kukub otobe. E baanea Kaanamin kukubo blimanoko genea blimanamabo kesoa nakaia unangai imino mo kaanomabibbabe. Yesus Klaiste e makaai gaiseneba watwat dabenea e meletan isa inamin namin osa alukum dlonea Gode dlalea e inamin namin olo alukum kla kimanamabebe. <sup>27</sup> Nibo tekein kebuobe, kaanamin kukub osa blimanamabobe. Niminbabe, Gode buk temo Yesus Klaiste weng sango enangge baanoa Gode baabanea Kobo inamin namino alukum gaisoneba inamin namin olo alukum kimanale ge baabanebiobo genobio

kesoa Yesuse inanea nakaia unanga isa eka inamin namin osa alukum kimanamabebe. Ina otane Yesuse Gode mo dabasananeta kimanemebabe. Niminbabe, Gode emaye weng olo baabanebio kesoa e Yesuse kitem daako mo biamabebabe. <sup>28</sup> Sino Gode e miine Yesus Klaiste baabanea Kobo inamin namino alukum kimanale ge baabanebua e miin ele inanea inamin namino alukum kima bieba. Sinanomo e kimanin okoko blimanoa deibonea inamin namino alukum omonea Gode omanea baabanea God kobo ne kimaninobo ge baabanamabe kesoa Gode elekiem eleta Yesus esa nakaia unanga isa eka inamin namin osa alukum kimanamabebe.

<sup>29</sup> Bainobo galin nakaia unangai maki aayo mo fuelaim blim bianiba kaaibbua eka naka mak unang maki afen blibi i bobolo funaniba i bainobo galin nakaia unangai kimanin nakai baabeniba Ibo ni aayo imin fuelabeine! Ni aaye imin fuelabenomabib olo makob ibo bainobo galin naka mak unang maki aayo mo fuelaim blim bianiba kaaibbuei i aayo fuelabenomabiobo ge baabenomabib otane naka mak unang maki fumbianiba Nakaia unangai kaaibbuei Gode i imino mo dohaaneta hananomabibbabo ge fumbinabib kesoa i bobol tem funin olo bain bio mole nakaia unangai kulilaibbu eli bobolo funaniba aaye imin fuelanomabib kukub olo mitmakam blimobe. Ibo kukub olo inabib kesoa nibo tekein kenoba Bain nakaia unangai kaaibbuei imin hananomabiobo gabuobe. <sup>30</sup> Ni monoba bib mak bib mako

haabianoba Gode wengo omkeimabob o dafa ota naka mak unang maki baaniba Nibo i yenanoba kaaaine gabio. I inangge oyebib kesoa ni kaanomobo imino mo hananomabbioa mole ni tosiyananoba ni mo monobta bib mak bib mako haabianobta Gode wengo mo omkeimamobababe. Otane ni kaanomobo bain ye imin hananomabbio kesoa naka mak unang maki baaniba Ni i yenanoba kaaaine ge oyemibo ni i tolo mo tosiambobbabe. Ni Gode wengo sma omkeimamomabbio. <sup>31</sup> Ibo nib Sume Yesus Klaiste bainobo geiba ibte nete Klaist ete nanoba nib bobol temo makob ambiob kesoa ne ibo seinyebibe. Ne weng olo bainobe. Eka ne weng mak osa baabenamabio bainobe. Am obba ye bomanomo bomanomo yo nakaia unangai bobol temo amitie fumbianiba Ni Fole ananoba kaaneko ge fumbio. <sup>32</sup> Naka maki Efesas bib ele blii makob til satili eil halebi yenanabib inaniba ne nananom genabiobe. Nakaia unangai kaanimibo imino mo hananomabibba biamo ne Gode okoko okok kebi olo mitmakam blimobe. Naka maki baaniba Nibo kaanomobo imino mo hananomabbioa kesoa nibo imena aayao tali wembianoba ninib bobol tem namomo! Niminbabe, nibo kaanomobo alang namanomabbioo gabib otane i bobol tem funin olo misiamobe. Nibo mo inamobe!

<sup>33</sup> I weng olo bainbabe. Ibo i weng olo mo wentaibe! Weng mako baanoa Nakaia unangai i bobol tem funino misiam fumbibi naka mak unang maki i baka haanimibo i bobol tem funino watwat dabnomabiobo genobio kesoa weng olo bainobe. Ibo nakaia unanga eli wengo wenteniba bainobo geib mole i weng olo ib bobol tem funino watwat dabnomabib kesoa ibo i weng olo mo wentaibe! <sup>34</sup> Ibo ib bobol tem funino misiam fumbib kesoa ibo ib bobol tem funin misiam olo deiboniba ibo hengmino imino mo hengamibe! Naka mak unang maki ib isak temo blii i Gode mo tekein kebibba kesoa i bobol temo fumbianiba Nakaia unangai kaanimibo Gode i imino mo dohaanamabebabo ge fumbib kesoa ne funania Ibo ib bobol tem funin olo bobolo fumbianiba aal genaline ge baabenamabibe.

*Nakaia unangai kaaniba imin hananimibo i damo afet anamabobe.*

<sup>35</sup> Naka mak unang maki baaniba Folwal ibo obianiba Nakaia unangai kaaib biamo imin hananomabiobo gabibo ib weng olo mitmakam blimobe. Nakaia unangai kaaibbuei fatnanibta imin hananomabibe? I imin hanaib mole i damo fatnamin nanomabibe? ge baanomabiobe. <sup>36</sup> Ibo

inangge baanimibo ne baabenia Ibo bobol tem funin blimobo ge baabenamabibe. Ibo wentine! Ibo kon sano dolinimibo o gatano bio kesoa dabal tem daak bianoa bela utlanoa damanabo inaniba nakaia unanga isa kaanimibo imin hananomabiobe. <sup>37</sup> Ibo kono doliom gaibo damanobuo dimo mo weiso tebeleb tenibta tebel bunomabibbabe. Ibo dabo olob doliniba difingo bela utlanoa ano telo dlanoa damanabobe. <sup>38</sup> Gode ele bobol tem funanea baanea Nakai mil sano dolinimibo mil ye damanoa eka kon sano dolinimib osa makob kon daman anamabobo genebio kesoa nakaia unangai inaniba inamin namino dabo afet afeto sano dolinimibo inamin namino afet afet damanamabo inaniba nakaia unangai kaanimibo imin hananiba i damo afet anomabiobe. <sup>39</sup> Eka inamin namini alukum dabalim olo blii isa i damo afet afetobe. I damo makobbabe. Nakaia unangai dam osa afetobe. Eka eila tila wana aninga i dam osa makobbabe, afet afetobe. <sup>40</sup> Abiseli dam osa eka dabalim nakaia unangai dam osa o makob klayam otane abiseli damo dabalim nakaia unangai damo ulabbabe. Afetobe. <sup>41</sup> Afok osa alim esa awitnin osa alukum ayam otane afoko afet alime afet eka awitnino afet nabe. Awitnino okoko afet afetobe. Mako dukge tubunoa eka mak ole ki kimiin biam binabobe.

<sup>42</sup> Nakaia unangai damo kaanimib isa eka hananimibi dam osa inaniba afet anomabiobe. Nakaia unangai kaanimibo nibo dolbunomobo i damo klanomabib otane sinanoa i imin hananiba i damo memao omomabibo dam olo mo klanomobabe. I dam olo amit namabobe. <sup>43</sup> Nakaia unangai kaaiba nibo dolbunomobo i damo misiamobe. I titil blim nabe. Ina otane i imin hana tlaibo mema damo omoniba ayam aniba titil manomabiobe. <sup>44</sup> Nakaia unangai kaaiba nibo dolbunomobo i dam olo dabalim olo damobe. Otane sinanoa imin hana tlaibo i dam olo abilimo damobe. Memalo nib dam olo dabalim olo damobe. Sinanomo nib dam olo abilimo dam anamabobe. <sup>45</sup> Gode buk temo baanoa Sino Gode Adame klanebio dimo e afen bianea dabalim olo naka binebiobo genobiobe.

Memalo nib damo makob Adame damo ulabobe. Klaiste tenea dabalim olo binebio nakaia unangai oha bianiba E makob mema Adamobo ge oha binibbiobe. E afen smike amit nine nibo dobyebio kesoa nibo amit nomabbio. <sup>46</sup> Sino Gode abilimo damo nibo mo omyim blimobe. Dabalimo dam ota sin omye biobe. Nib dam olo

dabalim olo dam kesoa klaanomabbio. Sinanoa nibo kaanoba imin hananomobo Gode nibo abilim damo omyea amit nomabbio. <sup>47</sup> Sino Gode dabale halonea Adame klanebua eka sinanoa e Adam afete e niniino Yesus Klaiste dabanea abilim danea daak tlebio. <sup>48</sup> Nibo Adame molobsel kesoa dabalim nakaia unanga nibo makob Gode dabale halonea Adame klanebue ulabobe. Yesus Klaiste abilim da tlebio kesoa e abilim nakabe. E bainobo gabob nakaia unanga nibo e meletanobe. <sup>49</sup> Nibo dabalim ele biobo nib damo makob dabalim nakae Adame damo ulab biobobe. Eka sinanoa monoba Gode bibamo unaobo nib damo makob abilim nakae Klaiste damo ulab anomabbio.

<sup>50</sup> Ne nekwai ibo wentine! Nakaia unangai damo dabalim olo blibo klaanamabobe. O mo monota Gode bibamo mo unamabobabe. Nakaia unangai i damo afet animib ita moniba Gode biho nomabiobe. I moniba bibo yo biomabibo inamin namino mo klaanamabobabe. I moniba e biho unaibo e i kla kimanamabebe. <sup>51</sup> Ne nekwai ibo wentine! Ne sino weng mako ayok binobio ibo baabenamabibe. Bainobo galin nakaia unanga nibo maki kaanomabib otane mak nibo sma afen bioba Yesuse imin tlameo nibo alukum kaaib biamo isa eka afen biob nibsa nib damo afet anomabbio. <sup>52</sup> Mubiang am bomanomo dimo abisak make bigule obanea nib damo hebmamsab timin tilain kenoa afet anabua eka Gode kulilaibbio nakaia unangai imin dohaanea hananiba i damo afet ananoa i mema dam olo imino mo kaanomabibbabe. I amit nomabiobe. Eka bainobo galin nakaia unanga nibo sma afen biob nibsa nib damo afet anoba amit nomabbio. <sup>53</sup> Gode nib damo afeto omyameo nib dam olo mo klaanomabbio. Nib damo mema olo God emi kesoa nibo mo kaanomabbio. Amit nomabbio. <sup>54</sup> Nib dam olo ayambabe, o klaanamabobe. Sinanomo nib dam olo deibonoba Gode nib damo afeto omyea dam olo mo klaanomobabe. Amit namabobe. Nibo inanomobo weng olo naka make Gode buk temo dolanea baanea

Kaanamin ole ne makaa kesoa ne titilo o omakibilaia blimanamabobo genebuo bain inanamabobe.

<sup>55</sup> Eka naka mak esa Gode buk temo dolanea baanea

Am olo dimo Gode e makaai alukum gaisenea eka kaanamin kukubo blimanoko genea blimananoa nibo imino mo kaanomabbio kesoa nibo kaanamino tolo imino mo tosianomabbio babo genebio.

<sup>56</sup> Gode hekmel wengo Mosese omalebue baanoa Inamin namin kukub misiamo mo namibe genobuo otane nakaia unangai weng olo mo wafueim blim deiboniba kukub misiam ota wafu binabib kesoa sinanoa i enin kino wateniba kaanomabiobe. <sup>57</sup> Ina otane Gode nib Sume Yesus Klaiste dabanea daakenea atdimmo kaanea nib hengmino walubenea imin hananea kaanamin kukubo watwat dabonea nibo hengmin kukubo deibonobio kesoa nibo kaanamin kukubo tolo imino mo tosianomabbio. Nibo olo bobolo fumbianoba Gode gangobo galomo!

<sup>58</sup> Ne nekwai ibo ne kla gobe blibe. Ibo bainobo galin nakaia unanga nibo kaanoba imin hananomabbuo weng olo bobolo kla fumbianiba ib bainobo galino amitie sbalma wafueine! Ibo nib Sume okoko okok kebibo sbalma okok kemine! Sinanoa ibo kaaniba imin hananimibo Gode ib okok olo molo yang kenea inamin namino ayamo doyamabebe. Weng olo bain inanamabo kesoa ibo sbal maniba e okoko amitie okok kemine!

## 16

*Kolin bib sel ibo monio oloniba inamin namino blimi daabeine!*

<sup>1</sup> Ne weng mako ibo baabenamabibe. Ib monio olminiba Gode bainobo galin nakaia unangai Yelusalem bib ye bliibi oyine getabe. Ne weng olo sino bainobo galin nakaia unangai Galesia betan ye bliibi baabeibio memalo ibsa weng olo baabenimio ibsa inaine! <sup>2</sup> Ibo sande elekiem elekieme dime elekiem olokiem ib monio ilib am ye olminamine! Ib okoko molo ib kimanin nakai monio sum okayebib mole sum olaine! Eka ib okoko molo ib kimanin nakai monio men okayebib mole ibo men olaine! Ibo monio olminabiba ne natlamio imino mo bumolok bianiba henomabibbabe. <sup>3</sup> Ibo monio sin olminabib biamabo kesoa ne natlamio oniba ne futanob dolania baabenia Naka eli Kolin bib sel ita dlabta ibsuo natliobo ge baabeia ibo nakai ibmaye dlakaniba elita unine genimibo i futan baka moni baka olo oleb moniba Yelusalem bib seli bainobo galin nakaia unangai oyine! <sup>4</sup> Nesa Yelusalem bib unamabi ese makobe. Ne funania Ne Yelusalem bib unano geni mole ne i baka unamabibe. Eka ne funania Ne mo unamibabo gei mole deia ita unomabiobe.

*Fole baanea Ne monia Kolin bib unamo genebio.*

<sup>5</sup> Ne monia ibsuo natlamabi otane mikik-temo ne monia Masedonia betan ye unania monia bib mak bib mako Gode wengo omkeima binita omito ne monita ibsuo

natlamabibe. <sup>6-7</sup> Ne monia ibsuo natlamio ye baka blia amo asu blimanota deibe unamine? Eka ye baka binita mitdanita deibe unamabi ese makobe. Ina otane ne bobol temo fumbio Ne ibo hebmmasabo mo deibenita bib mako mo unamabibabe. Ne ibo ye bekebe blia alim homono blimanota deibe unamabibo ge fumbi otane nib Sume baatnenea Ae kobo i bekebe bieba alim olomo blimanote ge baatnene mole ne soko tlebianoa amo misiam anomo dimo ne ibo ye bekebe biamabibe. Ne inania ibo bekebe binia deibenita bib mak unang gamio ibo ne deib tamal deib unamabio daatneiba monia bib mak unania Gode wengo bibo yo sel isa omkayemabibe. <sup>8-9</sup> Ina otane ne sma Efesas bib ele blibe. Bib olo seli nakaia unangai homoni fumbianiba Ni Yesus Klaiste wengo wentaobobo gabib kesoa ne bib olo sma biania Gode wengo omkayebibe. Ne okok olo ina biania okok bli kesoa nakaia unangai homoni Yesus Klaiste wengo wenteniba bainobo geine gabibe. Bib olo seli Yesus Klaiste mo bainobo gabibbai i makob Yesuse makaabe. I ne Gode wengo omkeimabio watabib otane ne i tolo mo tosiambibabe. Ne bobol temo funania Ne nakaia unangai Yesuse bainobo gabibi daabeia i bainobo galino sbal maine ge fumbiania Efesas bib ele blibe. Gode singkalin am sumo niniino Fasoba amo boma binoa blimanomo dim ota ne monita Masedonia betan unamabibe. <sup>10</sup> Timotie Sume okoko okok kebeo makob ne okoko ulab okok kebe kesoa e ibsuo natlameo kla daahabiba ibte ete naniba klayam binibta deibe uneko! <sup>11</sup> E ibo bekebe biameo ib bobol temo mo funanibta E naka gangbabo, tembal kesoa ni e wengo mo wentaobbabo ge funanimibe! Ibo e kla daahabiba binea deibenea monea bib mak bib mako unang game osa e deib tamal deibo unamabeo ibo daahabiba haabinea imin tenea nesu ele tleko! Ne esa eka bainobo galin naka maki Gode okoko okok kebib isa waise biania nesu tesibte gabibe.

<sup>12</sup> Memalo ne Abolose weng osa ibo baabenamabibe. Ne e baabania Kobo tem bainobo galin nakaia unangai mak item naniba moniba Kolin bib unine ge ohabi otane e baatnenea Ne memalo mo unamabibabo ge onebebe. Ina otane mitdanea e funanea Ne hein olota unano genemeo e monea ibsu natlamabebe.

*Weng olo mubiang wengobe.*

<sup>13</sup> Ibo kukub misiamo nanimib kesoa ib bobol temo kla fumbianiba klbianiba ib bainobo galino sbal mabianiba mo tosianimibe! <sup>14</sup> Ibo okoko okok kemomabibo

ib bobol temo nakaia unangai kla gobe bianiba daaye bianibte!

<sup>15</sup> Ne nekwai ibo ne Stefanas esa e alal melal isa i weng sango baabenamabio ibo kla wentine! I Yesuse sin bainobo ge blibta omito Glik seli mak isa i Yesus Klaiste wengo wenteniba bainobo geibbiobe. Stefanas esa e alal melal isa i sin Yesuse bainobo geniba e okoko sbalma okok kebianiba i bainobo galin nakaia unangai maki daayebio. <sup>16</sup> Ibo i wengo baabenimibo kla wente bianiba eka naka mak unang maki i tenaniba Gode okoko okok kebib weng osa ibo baabenimibo kla wentine!

<sup>17</sup> Ne ibo mo yatemim blim biania ne bobolo ilum omfutnebu otane ibo Stefanas esa Fotyunetas esa Akaikas esa i dilaiba teniba nesu ele tlib kesoa ne kla seimbibe. <sup>18</sup> I teniba nesu ele tlaniba ib weng sang ayamo ne baatneniba bobol tem ayam omnibbiobe. Ibo ne weng olo wentaibo ibsa bobol ayam funanomabiobe. I nibo daayebib kesoa ibo i baabeniba I naka ayamobo ge oyemine!

<sup>19</sup> Bainobo galin nakaia unangai Esia betano bib mak bib mak ye blibi Ibo klayam blibte ge baabeibobe. Eka Akwila esa eka e alelo Flisila esa eka bainobo galin nakaia unangai teniba i kamwali am ele mina bianiba lotu kebib isa ibo baabeniba Klayam blibte ge baabeibobe. I ib sinwalo Sume meletan kesoa i ibo gobe bliobe. <sup>20</sup> Bainobo galin nakaia unangai bib olo seli alukum ibo baabeniba Klayam blibte ge baabeibobe. Ibo bainobo galin naka mak unang maki gobe bianiba hetananimibo heitdabeine!

<sup>21</sup> Ne futan olo atosino naka mak eta dolatnene otane weng atosin olole Fol nemaye nene kweilono tubu dolanita ibo omfubenita Klayam blibte ge baabenamabibe.

<sup>22</sup> Nakaia unangai nib Sume Yesus Klaiste kla mo goba blibbai enin kino wate-momabiobe. I e mo baka bianibta amito mo nomabibbabe! Ne bobol temo fumbiania Nib Sume Yesus Klaist kobo heb-mamsab tele ge fumbibe.

<sup>23</sup> Ne bobol temo fumbiania Nib Sume Yesuse ibo daayebea klayam nine ge fumbibe. <sup>24</sup> Nib sinwalo alukum Yesus Klaiste meletan kesoa ne ibo kla gobe blibe. Ne wengo bayotabe. Ne Fol neta ib futan olo dola omfubenamabibe.

## 2 Kolin

### Fole futan olo abuko dolanea Kolin bib seli omfubesebe. Tekein kemim wengobe.

Yesuse atdimo kaanea imin hananea ulanea abilim unebua bifolo 26 ese mak blimanota Fole futan olo dolaneta Yesuse bainobo galin nakaia unangai Kolin bibo bli bi omfubenebiobe. Sino Fole futan mako dolanea i omfubenea watemibbua e monea Masedonia betan ye bie dimo Taitase Kolin bib danea tenea Fole esu tlanea baabanea Nakaia unangai maki keb wengo baabenebbuo wenteniba i hengmino deiboniba i bobol temo deskina omoniba Sume omalib otane mak ile obianiba Fole Yesuse okok dabasanin naka motonbabo ge obiam bliobo gesea wenteneta futan olo dolanebiobe.

1:1-11 Mikiktem wengobe.

1:12-7:16 Fole bainobo galin nakaia unangai Kolin bib seli wengo omkaye binebuotabe.

8:1-9:15 Bainobo galin nakaia unangai monio olmina bianiba bainobo galini naka mak unang maki daayemin wengobe.

10:1-13:10 Fole baanea Ne Yesuse okok namasanin nakabo genebiobe.

13:11-14 Mubiang wengobe.

<sup>1</sup> Fol neta futan olo dolanita Gode mele-tani Yesuse bainobo galin nakaia unanga ibo Kolin bibo bli ibsa eka Yesuse bainobo galini Glik betano bli ibsa omfubenam-abibe. Nib neke Timotie ne beketne bianea daanebebe. Gode ele bobol tem funin ye ne Yesus Klaiste okok nemasanin naka nemakanebiobe. <sup>2</sup> Nib Aye God esa eka Sume Yesus Klaist esa i dumo ibo daaye bianiba bobol ayam omkayemine!

*Fole Gode gangobo genebiobe.*

<sup>3-4</sup> Nibo nib Sume Yesus Klaiste e Aye Gode niniino dobtouleb nomo! Inamin namin kukub misiamo ni dimo tam tloa ni bobol temo misiam omfubenomo e do-halilanea amitie daaye bianea bobol ayam omkaye binabe kesoa nisak inanoba naka mak unang maki inamin namin kukub misiamo i dimo tam tloa i bobol temo misiam omfubenomo daaye bianoba bobol ayam omkaye buobe. <sup>5</sup> Makob naka maki Klaiste kukub misiamo omkahabiba e bobol temo misiamu babinobio inaniba naka mak isa ni kukub misiamo amitie omkayebiba ni bobol temo misiamu bebu otane Klaiste ni sinwalo ni bobol tem funino makob anbiob kesoa Gode makob Klaiste daaha bianea bobol ayam

omkaha binabe inanea nisa amitie daaye bianea bobol ayam omkayebebe. <sup>6</sup> Ni enin kino watemebobo ibsa inaniba enin kin olo watemalaibo ni daabenoba Gode bobol ayam omyenea hengmino temo blibo dotlanamabebe. Eka Gode ni daabene-ba bobol ayam omyameo e ibsa inanea daabenea bobol ayam omyamabebe. Ni enin kino watemebob inaniba ibsa enin kino watememib mole Gode ibo daabenea bobol ayam omyenea sbal manomabiobe. <sup>7</sup> Makob naka maki ni kukub misiamo omkayebiba ni bobol temo misiamu bebio inaniba naka mak isa ibo kukub misiamo omkayebiba ib bobol temo misiamu bebu otane Gode makob ni daaye bianea bobol ayam omkaye binabe inanea ibsa daaye bianea bobol ayam omkayebebe kesoa ni tekein kebuobe, ibo ib bainobo galino sbal manomabiobe.

<sup>8</sup> Ne nekwal ibo ne weng mako baabenamabibe. Ni sino Esia betano binobbio inamin namin kukub misiamo ni dimo tam tlanoa ni bobol temo dot ilum omfubeno kesoa ni funanoba Ni kaanomabbio ge funanobbio. <sup>9</sup> Bainobe, kukub misiamo ni dimo tam tlanoa ni bobol temo ilum omfubeso funanoba Ni kaanomabbio, ni nini skil daabenamin titilo blimobe genobbu otane kukub olo ayamobe. Niminbabe, ni mo funanobta Ni nini skil daabenomo geim blimobe. Gode kulila binabibi imin dohaanamin titilsa kesoa ni ilum olo omonoba e kweiban dim omfanoba e titil ota ni daabene biobe. <sup>10</sup> Ni bain ye inanoba enin obba misiamo omubenoa kaanom genabob otane Gode ni daabenea dotlanebio kesoa ni tekein kenoba E sinanomosa amit ina bianea daayemabebo gabianoba waisa biobobe. <sup>11</sup> Ibsa ni beteno daayemiba Gode ib wengo wente bianea daayebea sinanomosa naka homon unang homoni ni beteno daayebiba Gode i beteno wentebea ohabianiba Kobo Folwali daayebebo, ni gangobo gabuobo ge ohamomabiobe.

*Fole Kolin bib seli mo dim baabeim blimobe.*

<sup>12</sup> Ni bain baabenomabbio, ni naka mak unang maki kukub ayam ye omkaye binobbu otane ibole dot ayam omkaye binobbio kesoa ni seimbuobe. Ni da-balim olo tekein kemino mo omonobta ibo kukub ayam mo omkaye binobbio-abe. Gode emaye ni daaye bianea e kukub ayam osa weng moton omin kukub osa omkayebeta ni omonobta ibo omkaye binobbio. Ni ina binobbio kesoa ni bobol ayam fumbianoba Ni i kukub ayam omkaye binobbio gabuobe. <sup>13</sup> Ni futano

ibo dola dlubebebiobo ayokbabe. Ibo kinimibo o mitmakamo tekein kenomabiobe genobta dola dlubebe biobobe. <sup>14</sup> Ibo ni seinyebib otane ibo ni kukubo klao mo tekein kebibba kesoa ne funania Ibo ni kla tekein keniba I bain Yesuse okok dlasanin nakabo geniba kla seinyemine gabibe. Ibo memalo tekein keniba I bain Yesuse okok dlasanin nakabe geib biamo sinanoa nib Sume Yesuse tlame dimo ni ibo seinyemoba eka ibsak ni seinye biam nomabiobe.

<sup>15-16</sup> Sino ne tekein kenia Ibo ne seinemomabiobo gei kesoa ne funania Ne Kolin bib seli yatenamino asu kenano ge funai biobe. Mikiktemo monia Kolin bib sel ibo yatemami ole deibenia monia Masedonia betan ye dania imin tenia yatemamio ibsak seinino asu keiba deibenia imin Yudia betano tlang gamio imeno doniba dlebnita deib tamal deibo tlamabibo ge funaibu otane ne baino mo inanita tlim blimobe. <sup>17</sup> Ibo mo funanibta Fole tlamabibo genebuo dim baabenebiobo genimibe! Ne dabalim nakai baaniba Ni inamin namino nanomabbiobo genimib otane i bobol temo funaniba Ni mo inanomabbiobabo geniba i baino nanamino denabibi ulabbabe.

<sup>18</sup> Nibole makob Gode baanea Ne inamin namino nanamabibo genemeo bain nabinabe inanoba nibsa Inamin namino nanomo genomobo bain nabinabuobe. <sup>19</sup> Fol nesa eka Sailas esa eka Timoti esa nita sino Gode miine Yesus Klaiste weng sango ibo baa omkeimanobta omyobbiobe. Yesus ele dimo mo baanemebabe. E Inamin namino nanano genemeo bain ina binabebe. <sup>20</sup> Gode moton wengo baanea Ne inamin namino nanamabibo genebuo inamin namin olo alukum bain inanoa Klaiste dimo tam tlebinobio kesoa ni e niniin dim Olo bainobo ge obianoba Gode niniino dobtoulebinabuobe. <sup>21</sup> Gode emaye nib sinwalo daabeneta nibo Klaiste bainobo galino sbal mabiobobe. E inanea bainobo galin nakaia unanga nibo dlakanea <sup>22</sup> baabenea Ibo nemio bo ge baabenebiobe. E sinanomo inamin namin kukub ayamo omyamabe kesoa sino e Hobe nibo dobyenea baanea Ibo tekein keniba Ni God emi kesoa e Hobe ni dobyebiobo, sinanomo e inamin namin ayamo mak osa homon omyamabebo geine genebiobe.

*Fole Kolin bib sel isuo hebmamsabo mo unim blimobe.*

<sup>23</sup> Ne weng ele baabenamabi olo dim biamo Gode omkeimanamabe otane ne weng olo bainobe. Ne Kolin bibo imin natenamino deibeibuo mitmakamo inaminobe.

Ibo kukub misiam naibbio kesoa ne funania Ne isuo imin monia hengmin olo omkeimai mole i bobolo ilum omfubenamabobo ge funai kesota ne ibsuo natenamino deibeibiobe. <sup>24</sup> Ibo Klaiste bainobo geniba ib bainobo galino sbalma bliobe. Ne ib bainobo galino mo kimabe blibabe. Yesus Klaiste emaye ib kimanai naka kesoa ne bobol tem abilo mo omyamibabe. Ne funania Ne i daaye bia ite nete nanoba seinbianobte gabibe.

## 2

<sup>1</sup> Ne inangge fumbi kesoa ne bobol temo funania Ne imino mo monita i hengmino omkeimabenita i bobol tem abilo omyamine ge funaioebe. <sup>2</sup> Ne inania ibo bobol tem abilo omyi mole ib bobol temo misiamu misiam olo klaibbuu ne mo omnibta seimbiamamabibabe. <sup>3</sup> Sino ne futano dola omfubenia Ibo kukub misiam olo deibueine ge baabeibuo ne funania I kukub misiam olo klaibbuu ne motemamio ne bobol temo abilo mo omfutnenomobabe. I sin klaibbuabo genia ne i kla seinyemano ge funanita futano dola omfubeibiobe. Ne tekein kenia Ne monia ibsu natlania seinimio ibsa seinomabiobo geibiobe. <sup>4</sup> Sino ne ib futano dolayebi dimo ne bobol tem daako misiamut nenoa memin bobol wanembua mebianita dola omfubeibiobe. Ne inaibuo ne mo funanita Ne inanimio i bobol tem abil omyamabibo ge funaim blimobe. Ne funania Ne weng olo dola omfubenimio i wateniba tekein keniba Fole ni kla gobe bianeta weng olo baabenebo geine genita dola omfubei biobe.

*Kolin bib seli naka hengmino naneo bobolo amito mo funhamibe!*

<sup>5</sup> Bainobe, naka ele ne bobol temo ilum omnebu otane nenekiembabe. Bainobo galin naka mak unang mak ibsa bobol temo ilum omyebiobe. Ne bobol temo funania Ibo alukum ib bobol temo ilum omfubenobo ge funai otane ne mo menganita baanita Ibo alukumobo genimibabe. <sup>6</sup> Ibo ne wengo sino dola omfubeia wenteniba naka homon unang homon ibo oha bianiba Keb kukubo misiamobo ge oha bianiba e dobo klabibo kukub olo ayam otane memalo inamin wengo imino mo ohamibe! Yebminim keniba deibaine! <sup>7</sup> Memalo ibo e hengmino bobolo funino dokobenoa deiboniba weng fiab omkahamine! Inamin wengo amitie ohamin ole e bobol temo misiamu banoa e bainobo galin bobolo funino dokobanoa deibonamabebe. <sup>8</sup> Inamin kesoa ibo imin dohhalaiba e yatemnea funanea I ne gotneibobo ge funaneko! <sup>9</sup> Sino ne funania Ne

naka ele wengo Kolin bib seli futano dola omfubeita i ne weng olo wentutnenimib deitnenimibo yatemano ge funai kesota futano dola omfubeibiobe. <sup>10</sup> Ibo naka maki hengmino bobolo funino dokobenoa deiboba binabibo nesak inania i hengmino bobolo funino dokotnenoa deibobo binabi kesoa ne funania Ne i daabenamabibo ge funania naka maki kukub misiamo omnibo Klaiste kin dimo ne i hengmino bobolo funino dokotnenoa deiboni mole kukub olo ibo daabenamabobe. <sup>11</sup> Nibo Gululame kukubo tekein kebuobe, e bainobo galin nakaia unangai watwat dabenang gabe kesoa nibo naka mak unang maki hengmino bobolo funino dokobenoa deibonob mole e nibo mo watwat dabenemebabe.

*Taitase Tloas bibo mo nim blimobe.*

<sup>12</sup> Ne Klaiste dowan weng ayamo Tloas bib seli omyang genia tenia Tloas bibo tlibuo inamin namino ne mo wataim blimobe. Sume sin deibo klautnene biotabe. <sup>13</sup> Ne inania tli otane ne neke Taitase mo bianeta ib weng sango baatneim blim kesoa ne funania Inamin yebabo e bianea Kolin bib seli weng sango baatnesetababo genia Tloas bib seli ibo ibmaye blibte ge baabenya deibenya hen tenia Masedonia betan ele tetemia e ele bie kesoa atemia e ib weng sang ayamo baatnenebiobe.

*Klaiste titil ota e okok dlasanin nakai sbalma bianibta Gode okoko okok kebinibiobe.*

<sup>14</sup> Ne inaibu otane ne amitie Gode gango ge oha binabibe. Niminbabe, nite Klaist ete nanoba ni bobol temo makob anbianoba Klaiste titilo Gode ni amitie omkayebea ni kukub misiamo omabbunaboba e titilo dlebnoa monoba bib mak bib mako haabianoba nakaia unangai Yesus Klaiste weng sango omkaye binabuobe. Ni kukub olo nabinabobo makob inamin namin tang ayamo glolo fubonoo walebnoa bib mak bib mako onon tlanabo inaminobe. <sup>15</sup> Klaiste ni bobol temo bibe bio Gode kin dimo kukub olo makob ni tang ayamo ulabobe. Ni monoba Klaiste weng ayamo nakaia unangai hengmin temo bliba Gode doketoube isa eka nakaia unangai aseinin bib deibe bebibi isa omkayebobo kukub olo makob isa tang ayam olo kungkayebobe. <sup>16</sup> Nakaia unangai aseinin bib deibe bebibi Klaiste weng ayamo gobo blibba kesoa i funaniba Klaiste wengo makob fetango ulabobo ge fumbib otane nakaia unangai abilim ut unomabib ile Klaiste weng ayamo gobo blib kesoa i funaniba Klaiste wengo makob tang ayamo ulabobo ge fumbiobe. Nakai ili titilo Klaiste wengo omkeimanamino

blimobe. Nile Gode titil ota omkayebeta omkeimabuobe. <sup>17</sup> Naka homoni fumbianiba Ni Klaiste wengo omkeima bianoba o molo monio boka bianobte gabib otane nile mo inangge fumbobbabe. Ni kukubo inaminobe. Klaiste titilo dimo Gode ni dlanea bib mak bib mako haabianoba Klaiste wengo omkeimabobo Gode tekein kebebe ni kukubo molotobe.

### 3

<sup>1</sup> Ni weng olo baabenomobo ibo imino mo funanibta I ili niniino omfufubiobo ge funanimibe! Gode weng omkeimalin naka maki ibsu natlom gaibo naka maki i futano dolabeniba baaniba Naka eli weng ayam omkeimalin nakabo ge baaniba dolabeniba dletniba moniba ib bib ye bianiba omkaye biniba deibe unom gaibo ibsak futano imin inangge baaniba dolabeiba dletniba wat bib mak bib mak haabinabib otane nile inamin futano mo dleb haabiobbabe. <sup>2</sup> Ibo makob nakai naka maki futano dola dlubesiba kiniba tekein kenabib inaniba naka mak unang mak isa ib kukubo wateniba funaniba Folwali bain Klaiste okok dlasanin nakabo gabibo kukub olo makob ibo ni futanobe. <sup>3</sup> Naka mak unang mak ibo yateniba fumbianiba Klaiste Folwali dlanea teniba e wengo Kolin bib seli omkayebibo i wenteniba bainobo geibbiobo gabib kesoa kukub olo makob Klaiste futano dolanebuo ni omeb haabianoba ibo omkayebuobe. E inanebuo ele kweilo mo tubuta dolaim blimobe. Eka e Mosese nanebuo e mo inaneta tom dim osa mo dolaim blim nabe. Gode amit nine e Hob eta doboneta nakaia unanga ibo dobye biobe.

<sup>4</sup> Ni kla tekein kenoba Klaiste Gode titilo ni omkayebe kesoa ni okoko nabobo weng sango omkeimabuobe. <sup>5</sup> Ni Gode okoko nini titilo mo okok kebobbbabe. Ni nini titilo inamin namino nanamino blimobe. Gode titil ota ni omkayebeta okok kebuobe. <sup>6</sup> Sinanggwano Gode e hekmel wengo emaye tom dimo dolanea oleb tenea Mosese olalebiobe. E inanebuo nakaia unangai bumoloku benoa hekmel weng olo alukumo mo wafueim blim kenibta o mitmakam ota i kulila binibbiobe. I inabiba bifol homono blimanota Klaiste mema wengo omeb tlebua nakaia unangai mema weng olo wafu blibi Gode Hobe i bobol temo bianea daayebe kesoa i mo kaanibta alang namanimibbabe. I amit nomabiobe. Gode emaye e titilo ni omkayebeta ni mema weng olo nakaia unangai omkayebuobe.

<sup>7</sup> Gode makob ayal inamin einebue e hekmel wengo tom dimo dolanea oleb tenea Mosese olanabea e ayal ele watnea Mosese

debelon dim osak tububanebiobe. E debelon dimo makob ayal inamin tubunea datowanebua Islel nakaia unangai e debelon dimo mo watemehamin blim blib bita namdibim namdibim watneta blimu banebiobe. Hekmel wengo sin olo titilsa otane nakaia unangai bumoloku benoa i o alukumo mo wafueim blim kenibta o mitmakam ota i kulila binabiobe. <sup>8</sup>Ina otane Gode Hobe mema weng olo nakaia unangai omkayebeo i afen smike amit nine dibib kesoa e weng olo titilo Mosese hekmel wengo titilo gaisono biobe. <sup>9</sup>Hekmel wengo sin olo titilsa otane bumoloku benoa nakaia unangai o alukumo mo wafueim blim kenibta o mitmakam ota i kulila binabiobe. Ina otane Klaiste mema wengo omeb tlebuo nakaia unangai mema weng olo wafu blibi Gode Hobe i bobol temo was unubeneana i Gode kin dimo naka molot unang molot aibbiobe. Mema weng olo hekmel wengo sino kla gaisono biobe. <sup>10</sup>Hekmel wengo sino titilsa otane mema wengo titilo beselib kesoa sin wengo gaisonoa o titil bli-manobiobe. <sup>11</sup>Hekmel wengo sin olo unobe, makob Mosese debelon dime ayale nanea namdibim namdibim watnea bli-manebio inanoa osa o titilo bli-manobio otane mema weng ole o titilo mo bli-manomobabe. Amit namabo kesoa o titilo sumobe.

<sup>12</sup>Ni tekein kebuobe, mema wengo titilo bli-manaminba o amit nin kesoa ni o wengo omkeimamino mo tosiambobababe. <sup>13</sup>Mosese debelon dimo ayal inamine tububanebua namdibim watnea bli-manang ge kesoa e funanea Islel teni atemeniobo ge funanea youme dobonea debelon deibo ge walo binebiobe. Nile mo inanobta Klaiste mema wengo omwabiobababe, omkeimabuobe. <sup>14</sup>Ina otane Islel teni ile makob Mosese nanea youme dobonea debelon deibo ge walo binebio inaniba i bobol tem funino nekek gebenoa i hekmel wengo kimibo o mitmakamo mo tekein keim blim binibbua memalo blib isa ina biobe. Otane Klaiste e bainobo galin nakaia unangai i bobol tem funin ole som heila kenoa bamtebebeno kesoa i weng olo kibianiba o mitmakamo tekein kebiobe. <sup>15</sup>Inabib ile memalo dim osa i Mosese hekmel wengo Gode buk temo kibib otane i bobol tem funino sma nekek gebe biobe. <sup>16</sup>Eka nakaia unangai kukub misiamo deiboniba moniba Sume mit tem unebib ile i bobol tem funino som heila kenoa bamtubuyebua i hekmel wengo mitmakamo tekein kebiobe. <sup>17</sup>Sum ele emaye Gode Hobobe. E bainobo galin nakaia unangai bobol temo bibe bie kesoa i hekmel weng osa eka hengmin osa mo ge dlabiobabe. <sup>18</sup>Alukum Klaiste bainobo

gabob naka unang nib bobol tem ole inamin namin kukub olo mo gebe bioba kesoa nakaia unangai nibo yateme bianiba i Sume kukubo watem tekein kebiobe. Sume Hobe nib bobol temo bibe bianea daayebe otane nibo hebmanasabo mo e ulab anomobbabe. Daayem bebe bita e ulab anomabbio. Memalo Sume titilo nib bobol temo men bibebio otane sinanomo sumu benamabobe.

#### 4

*Yesuse okok dlasanin naka ni makob dabalo heloniba keto klaibbuo ulabobe.*

<sup>1</sup>Gode inanea dohalilanea okok ayam olo omyenea baabeneana Ibo Klaiste mema wengo omeb tlebuo omkayemine ge baabene kesoa ni okok olo mo tosiambianobta kakubuwebobbabe. <sup>2</sup>Naka maki kukub misiamo ayok nabib otane nile inamin kukub olo aal waisenoa deibonobiobe. Ni mo dim baanobta weng afeto omkeimanobta Olo Gode wengobo ge obobbabe. Ni Gode wengo keim omkeimaboba naka mak unang maki wente bianiba baaniba Weng olo moton Gode wengobo ge obiba eka God esa ni wengo wente bianea yateme biam bie <sup>3</sup>otane nakaia unangai aseinin bib deibe bebib ile obianiba Weng olo ayok kesoa ni o mitmakamo mo tekein kebobababo ge obiobe. Ina otane Klaiste bainobo galin nakaia unanga ile ni weng olo mitmakamo kla tekein keniba obianiba Weng olo motonobo ge obiobe. <sup>4</sup>Klaiste makob Gode ulab kesoa nakaia unangai e wengo wentebibi i bobol tem ole makob ayal inamin ei bliobe. Eka nakaia unangai Klaiste mo bainobo gabibba ile dabal ele komoke Gululame i bobol temo neket gebe bia i sma mililambio tem tab bianiba Klaiste dowan weng ayam olo mitmakamo mo tekein kebibbabe. <sup>5</sup>Ni mo fumbianobta Ni Klaiste wengo omkeimaboba naka mak unang maki yateniba ni niniino dotouleb nine ge funanobta e wengo omkeimabobbabe. Ni fumbianoba Ni Sume Yesus Klaiste inamin namino alukum kima bianea ni daayebe kesoa nisak ibo daayemomo ge fumbianobta weng olo omkeimabuobe. <sup>6</sup>Sinanggwano dabale mo klaim blim o dimo mililanamin ota biota Gode baanea Bomanale geneta bomanobiobe. Eka memalosa God ele imin inanea e ayale ni bobol temo eibe bia ni Klaiste atemnoba tekein kenoba Gode bain titilsabo genoba e niniino dobtouleb biobobe.

<sup>7</sup>Nibo makob dabalo heloniba keto klaibbuo ulab kesoa nibo sbalbabe, unobe. Ina otane Gode emaye e titil sumo ni bobol temo omabbenebio kesoa nakaia



unangai ni yateme bianiba baaniba Naka eli i titilo blim otane Gode e titil ota omkayebebo ge obiobe. <sup>8</sup> Kukub misiamo homono ni dimo ye tam tlebo otane o ni mo watwat dabeim blimobe. Eka ni bobol tem osa hekhek fumbob otane ni mo funanobta Klaiste wengo deibonomo gabobbabe. <sup>9</sup> Eka naka maki ni kukub misiam omkayebiba ni enin kino watemebob otane Gode ni mo deibeim blimobe. E ni kla daayebebe. Eka i ni yena dolbiaib daaknoba dabalim daak blabob otane ni motono mo yenaibta kaaim blimobe. <sup>10</sup> Nakaia unangai sino Yesuse ananoba kaaneko ge oha bianiba enino omkaha binibbio inaniba nisa yenanoba kaaine gabianiba enino omkayebiba ni kaanamino geteiso geteiso binabuobe. Gode funanea Naka mak unang maki Folwali yateme bianiba baaniba Yesuse i bekebe bianea daayebeta i mo kaaim blim afen bliobo ge oyemine ge funane kesoa e enin kukub olo deibonea ni dimo tlebinabobe. <sup>11</sup> Ni Yesuse dowan wengo omkeima binabobo o dafa ota naka maki obianiba Ni Folwali yenanoba kaaine ge obinabib otane naka mak unang maki ni kukubo wateniba obianiba I dabalim naka otane i Yesuse titilsabo ge obinabiobe. <sup>12</sup> Ni Yesuse dowan wengo omkeimabobo o dafa ota naka maki ni yenanomo gabinabib otane ibole ni weng olo omkayebobo wentebib kesoa afen smike doboniba amit nomabiobe.

<sup>13</sup> Sinanggwano naka make Gode buk temo dolanea baanea  
Ne Gode bainobo genia e wengo omkeimabibo genebuo

nisa inanoba Gode bainobo genoba e wengo omkeimabuobe. <sup>14</sup> Ni tekein kebuobe, sinanomo Gode Sume Yesuse kaane imin dofaanea hananebio inanea Yesuse meletan nisa dohaanea hananoba ibtem nitem na dlebnea utnoba Yesus esu ut nomabiobe. <sup>15</sup> Ni ibo daabenomo genoba weng olo omkayebobo o dafa ota enin sumo ni dimo tam tlebinabobe. Inamin kesoa Gode nakaia unangai homoni daaye binabeo isak e gangobo geniba e niniino dobtouleb bina biobe. <sup>16</sup> I inabib kesoa ni okok olo mo tosiam bianobta kakubuwebobbabe. Niko bain ye hekwal anoba ni undimo aaya kenoba ban ban bebob otane ni bobol temo afen smik ole am obba ye boma boma unamo yo dimo amitie mema ye bio mema ye bio bibenamabobe. <sup>17</sup> Memalo ni enin kino watemebob olo unobe. Otane o ni daayebo kesoa sinanomo Gode titilo ayal inamin einobuo ni omya o amit bianoa ni enin kin olo watemebobobo gaisanamabo kesoa

ni baanoba Enin olo menobo gabuobe. <sup>18</sup> Eka nibo inamin namino memalo bua watemebobobo ni o bobolo mo fumbobbabe. Ni nibo inamin namino mo watemebobbao o bobol ota kla fumbuobe. Niminbabe, nibo inamin namino memalo dabalim olo bua watemebob ole amit ninbabe, o unobe. Eka inamin namino abilim ut bua memalo nibo mo watemebobba ota amit namabobe.

## 5

<sup>1</sup> O enaminobe, ni dam olo dabalim olo biobo makob mon am dikinobe. Amit ninbabe, o unobe. Ni kaanoba ni damo klanob mole ni amo abilim ut bibebuo nakai mo geim blimobe. Gode emaye gebenebiobe. Am olo unbabe, amit ninobe. <sup>2</sup> Ni dam olo makob mon am tem inamin kesoa ni mon am olo tem tam bianoba ni am tem amo abilim ut buo bobolo kla wayebua fumbianoba Ni o tem unaobobo gabuobe. <sup>3</sup> Niminbabe, ni am olo tem tam unob mole ni afen smiko am tem unamabobe. O ho mo biamabobabe. <sup>4</sup> Ni dam olo deibonoba ni afen smiko am blim ho biang gomo olo misiam otane Ni mema damo omonoba monoba am tem amo abilim ut buo tem unomo gabuobe. Am olo ni damo gaisono-bio kesoa ni monoba o tem unao bo ni mo kaanomabbobabe, amit nomabbobe. <sup>5</sup> Gode emaye funanea Ne i dleb utnia i amo abilim ut gebeibu tem ut danam-abibo genebiobe. Memalo ni am olo temo mo biobba otane sino Gode e Hobe ni dobyenea baanea Ibo tekein keniba Gode ni dleb utnea abilim ut danamabe kesoa e Hobe ni dobyebiobo, sinanomo e ni dleb utnea ni amo abilim ut gebenebuo tem ut danamabebo geine genebiobe.

<sup>6</sup> Gode e Hobe ni dobyebiobo kesoa ni mo tosiambobbabe. Ni dam olo makob amo ulab kesoa ni sma dabalim ele biobobe. Ni dabalim olo biobo ni Sume Yesuse abilim uto mo tena biobbabe. <sup>7</sup> Inamin namino sinanoa tam tlamabo ni mo watemebobba otane ni Gode wengo bainobo gabob kesoa ni tekein kebuobe, o bain tam tlam-abobe. <sup>8</sup> Ni funanoba Ni kaanoba ni dam olo deibonoba utnoba abilim ut unanoba Sume Yesuse tena nomo gabob kesoa ni kaanamino tolo mo tosiambobbabe. <sup>9</sup> Ni abilim ut biaob eka dabalim ele biaob osa ni funanoba Ni kukub ayam ota wafu bioba e seinyemeko gabuobe. <sup>10</sup> Niminbabe, sinanomo Klaiste nibo alukum kot keben-emeo dimo e elekiem olokiem nib kukubo dabalim olo nabinob biamo klanea maki kukub ayam wafu binib biamo o molo kukub ayam yang kebenea eka maki kukub misiam wafu binib biamo o molo kukub misiam yang kebe nanamabebe.

*God esa nakaia unanga isa i bobol temo makob anamin wengobe.*

<sup>11</sup> Ni tekein kebuobe, Sume Gode inanea nib kukub misiamo yang kebenamabe kesoa ni tosonianoba ni bobol temo fumbianoba Ni nakaia unangai daayeboba i Gode wengo tekein keine genoba ni amitie Gode wengo i aleyeboba bainobo gabiobe. Gode ni kukubo tekein kebebe. Ne funania Kolin bib sel isa ni kukubo tekein keniba baaniba Gode kin dimo Folwali kukubo klayamobo geine gabibe. <sup>12</sup> Ne weng ele baabei olo ne mo funanita I ni niniino dotouleb nine genita baabeim blim kesoa ibo mo baanibta Folwali imin ili niniino omfufu biobo genimibe! Niminbabe, naka mak unang maki nakai kukubo nabibo wateniba moton sambib otane i bobol tem misiamo fumbibo mo watem moton sanyebibbabe. Ne weng ele baabei olo ibo nakaia unanga eli baabeniba Folwali kukubo nabib osa i bobol temo fumbib osa klayamobo ge baabeine genita weng olo baabeiobe. <sup>13</sup> Naka maki baaniba Folwali weng misiam obiobo gabib otane ni mo wentebobbabe. Ni okok olo okok kebianoba Gode niniino dobtouleb nomo genobta okok kebuobe. Eka maki baaniba Folwali bobol tem funino ayamobo geib mole ni baanoba Ni Kolin bib seli daabenom genobta okok olo okok kebuobo genomabbio. <sup>14</sup> Ni tekein kebuobe, Yesus Klaiste nibo kla gobe bianea nib alango dokonea atdimo kaanebio kesoa nibo e okok ota okok kehabuobe. Yesuse elekiem eleta nib alango dokonea atdimo kaanebio kesoa kukub olo makob nakaia unangai alukum ete naniba kaaibbio. Nibo makob nakai kaaniba alang namaniba hengmino imino hengamino denabib inanoba nibo hengmino imino mo hengabobbabe. <sup>15</sup> Yesus Klaiste funanea Nakaia unangai ili bobol tem funino mo wafu nimibe! Ne bobol tem funin ota wafu nine ge funane kesoa e nib alango dokonea at dimo kaanea imin hananebio.

<sup>16</sup> Sino ni makob dabalim nakai nabin-abib inanoba fumbianoba Yesus Klaiste inamin nakabo gabinobbi otane memalo ni mo inangge fumbobbabe. Ni kukubo memalo namomabbu osa eka sinanoa namomabbu osa inaminobe. Ni nakai unaalkin osa i afobeing osa mo watemubenobta funanobta I naka sumobo eka i naka sumbabo galaobbabe. <sup>17</sup> Nakae waneta e bobol temo Yesus Klaist ete naniba i bobol temo makob aibbio mole naka ele sin kukubo deibonea mema kukub ota wafu biebe. E makob mema naka ambiebe. <sup>18</sup> Gode emaye ni mema kukub olo omyebiobe. Sino ni Gode makaa

biob otane e Yesus Klaiste dabanea daak-enea ni dleb tenea God esu danebua ni e bainobo gabianoba nite God ete nanoba ni bobol temo makob anoba Gode nisak baabenea lbsa inaniba naka mak unang maki daabeiba isa Klaiste bainoba geiba ite nete nanoba ni bobol temo makob anomo ge baabenebio. <sup>19</sup> Gode funanea Nete nakaia unanga ite nanoba ni bobol temo makob anomo gene kesoa e ni weng omyia ni nakaia unangai oye bianoba Gode nibo gobe bianea Yesus Klaiste dabanea daakenea atdimo kaanea nib hengmino ommlabenebio kesoa e nib hengmino bobolo imino mo funamabebabe. E inanebio kesoa ibte ete naniba ib bobol temo makob aine ge oyebuobe. <sup>20</sup> Kukub olo inaminobe, Gode ni dlakanea Yesus Klaiste kukubo nabianea wengo omkeima bineo omeisanea ni omyenea dlanea tenoba menganoba ibo oye bianoba Yesus Klaiste ib hengmino walubenebio kesoa ibte God ete naniba ib bobol temo makob aine ge oyeboob weng olo makob Klaiste emaye oyebebe. <sup>21</sup> Yesus Klaiste hengmin blim otane e nib alango dokonea nib hengmino alukum omeisenea Gode kin dimo e hengmin gam ane kesoa Gode nib hengmino molo yang kenea eta enin sumo omalea enin kino watenea atdimo kaanebio kesoa nibo Gode kin dimo naka molot unang molot anobbio.

## 6

*Folwali Gode okoko okok kebiba ilum homono i dimo tam tlebinobiobe.*

<sup>1</sup> Ni okoko God ete na okok kebob kesoa ni weng mako ibo baabenomabbio. Ibo mo funanibta Gode ni daaye binabe kukub olo besabo ge funimibe! Ibo e okoko amitie okok kemine! <sup>2</sup> Gode e buk temo baanea Sino ne amo kinia yo dim ota ib wengo wentamo geibua amo yo tam tloa ib wengo wentiobiobe. Ne ibo hengmino temo bliha dotlaihbuo dim ota ibo daabeibiobo genebio.

Ibo kla wentine! Gode amo kinea baanea Ne yo dim ota ib wengo wentamo genebuo memalotabe. Eka Gode ibo hengmino temo bliho dotlanamabeo am osa memalotabe. <sup>3</sup> Ni inamin namino nanoba naka mak unang maki dlabmanoba hengmino henganamino blim kesoa naka mak unang maki baaniba Gode Folwali okoko omyebu otane i okok olo klao mo okok kebibba kesoa ni mo Klaiste meletan anomobbabo genamini blimobe. <sup>4</sup> Yeye, ni kukubo afetobe. Ni inamin namin kukubo klayam wafu bioba nakaia unangai yateniba baaniba I Gode okoko klayam

okok kebiobo gabiobe. Ni kukubo inaminobe. Inamin namin kukub misiamo ni dimo tam tlebo osa eka inamin namino ni watwat dabenang genabo osa eka inamin namino ni bobol temo ilum omkayebo osa kukub olo ni dimo tam tlebo otane ni sbalma biobobe. <sup>5</sup> Am mak dimo nakai ni yebianiba eka am mak dimo ni klabuto ge dleb moniba klabut am kabianiba eka am mak dim ole ni ngan dikinaye biam binabiobe. Ni okoko bumolok bianoba ni kinwao mo aala bianoba eka imen osa blim kesoa imen teb aala biam nabob otane ni sma okok kebinabuobe. <sup>6</sup> Ni kukubo klayam wafu bianoba Gode wengo mitmakamo tekein kebuobe. Ni alo heb-mamsabo mo tliaube nabobabe. Ni nakaia unangai kla dohalim bianoba daayebuobe. Gode Hobe ni kla kima bia ni naka mak unang maki kla gobe binabuobe. <sup>7</sup> Ni wengo baino olota obinabuobe. Gode titilo ni bobol temo bibe biobe. Ni Gode kukubo moloto wafu biobo makob ni klemo afan sino wafunoba eka fusauo kweita sino wafu nabianoba awa gembuobe. <sup>8</sup> Naka mak unang maki ni niniino omfufuyebiba eka mak ile ni niniino omabbuna yebiam nabioobe. Eka naka mak unang maki baaniba Folwali kukubo misiam nabioobe gabib otane mak ile baaniba I kukubo klayam nabioobe gabiobe. Eka weng mak osa naka mak unang maki baaniba Folwali dim omin nakabo gabib otane ni wengo baino olota omin nakabe. <sup>9</sup> Naka mak unang maki baaniba Folwali besa nakabo gabib otane naka homon unang homoni ni tekein keniba Folwali Gode weng omkeimalin nakabo gabiobe. Am homono dimo kukub misiamo ni dimo tam tlebua ni kaain keke binabob otane ni sma afen biobobe. Gode enino deibonea tenoa ni dimo tlebinabo kukub olo e ni mo yenaneta kaanabobbabe. E kukub olo ni dlo klabinabebe. <sup>10</sup> Am mak dimo ni bobolo ilum omfube binabo otane ni yo talo mo wabinabobbabe. Ni bobol temo amitie seimbinabuobe. Ni afobeingo blim binabob otane ni Gode inamin namin homono nakaia unangai dokaye binabuobe. Eka ni inamin namino blim otane Klaiste ni sinwal ole inamin namin olo alukum o gselobe.

<sup>11</sup> Kolin bib sel ibo ni wengo baabenobobe. Olokiemo mo deibueim blimobe. Ni ibo gobe bianoba daayebob <sup>12</sup> otane ibta ni bobolo funino deibe bliobe. Ni ibo kla gobe biob otane ibo mo inanibta ni mo gobe blibbabe. <sup>13</sup> Ne ibo weng olo oyebio makob aalebe e memei weng omkaye bianea dlo klabe inayebibe. Ni ibo gobe biob kesoa ibsak inaniba ni gobe nine getabe.

### *Nib bobol temo makob Gode amobe.*

<sup>14</sup> Klaiste bainobo gabob nakaia unanga nibsa eka bainobo galinba nakaia unanga isa nib bobol temo makobbabe. Afet afet kesoa ibo bainobo galinba ite naniba ib bobol temo makob aniba dait okok kemini deibo blimobe. Kukub molot osa eka hengmin kukub osa o makobbabe. Afet afetobe. Eka ayal esa mililanamin osa o mo kwekonamabobabe. <sup>15</sup> Klaiste esa Gululam esa i kukubo makobbabe. Inamin kesoa bainobo galinba nakaia unanga isa eka bainobo galinba nakaia unanga isa i kukubo afet afetobe. <sup>16</sup> Ni am kweisamo haleb tenoba Gode am tamofanob mole dot misiam kesoa ni mo inanomabbobabe. Bainobo galinba nakaia unanga nibo makob Gode am kesoa e nib bobol tem wat biebe. Gode e buk temo baanea

Ne watnia nakaia unangai bobol tem wat unania ite nete nabianoba ne i Sum aia eka i ne naka unang ananomabiobo genebiobe.

<sup>17</sup> Inamin kesoa God Sume e buk temo nakaia unangai baabene

Ibo ne meletan kesoa ibo bainobo galinba nakaia unangai kukubo deiboniba kukubo afet wafueine! Ibo Gululame kukub misiamo mo wafunimibe! Ibo Gululame kukubo afetu baib mole ne ibo dleb metenia ne mit tem dania <sup>18</sup> ne ib aaleb aia eka ibo ne meme ananomabiobo genebiobe.

Sume titilsa eta weng olo inangge baanebiobe.

## 7

<sup>1</sup> Ne nekwal ibo ne ibo kla gobe blibe. Gode baabene Ibo ne meme anomabiobo genebuo weng olo bain kesoa nibo Gode tolo tosiam bianoba sbal manoba nib damo hengmino namino deibonoba eka bobol tem misiam funino deibo nanoba Gode kin dimo kining anomo!

*Kolin bib seli hengmin kukubo deibueib kesoa Fole seinye binebiobe.*

<sup>2</sup> Ibo ni kla gobenine! Ni ibo kukub misiamo mo nabenoba eka ibo mo watwat dabenoba eka dim osa mo baabenobta ib monio mo oisenaim blimobe. Ni ibo kukub ayamo olota omkaye binabuobe. <sup>3</sup> Weng ele baabei olo ne mo funanita I kukub misiamo naibbiobo ge funanita baabeim blimobe. Niminbabe, sino ne baabenita Ni ibo kla gobe biobobo ge baabeibio kesoa ibo mo funanibta Folwali ni mo gobe blibbabo genimibe! Ibo kaanom gaibo nitem nanoba kaanomabbioobe. Eka

ibo afenib mole nitem nanoba afenomabbiobe. Inanomabbio kesoa nakaia unangai mo baanibta Folwali Kolin bib seli kukub misiam omyibbiobo genimibe! <sup>4</sup> Ne ibo seinye biania baania Kolin bib seli klayamobo genia inamin namin kukub misiamo ni dimo tam tlebo ne bobol ayam biania kla seimbibe.

<sup>5</sup> Ne ibo seinyebibe. Niminbabe, sino ni monoba Masedonia betan ye binobbio dim osa kukub misiamo ni dimo tam tlemino mo deibeim blimobe. Kukub misiam ota betano yo bukubua nakaia unangai ni weng tem oye biam dleb weng oye biam bianiba yebiam bliiba ni bobol temo ilum omfubenoa tosiam binobbio. <sup>6</sup> Ina otane nakaia unangai bobolo ilum omfube bi-amo Gode daaye biane bobol tem ayam omkaye binabe kesoa memalo biob dim osa imin inanea ni daabenea Taitase dabanea tenea nisu tle kesoa ni bobol ayam funanobbio. <sup>7</sup> Gode Taitase dabanea tenea nisu tleo olota ni bobol temo ayam omyim blimobe. E ib weng sang osa eka ibo daahabibo weng osa omeb tenea ni baabesea wentenoba ne ibo seinye binibiobe. E ni baabenea Kolin bib seli i hengmino nabinibbuo funaniba bobolo ilum omfubenoa Fol keb talo wabianiba baaniba Ni Fole atemaobobo gabioho ge baabene kesoa ne kla seimbinibiobe.

<sup>8</sup> Sino naka ele ib isak temo kukub misiamo nabea ibo mo Tolobo geim blim deiba bliiba ne futano dola omfubeibuo ne funania I futan olo watemaibo i bobolo ilum omfubenamabobo genia nesa bobolo ilum omfutne binobiobe. Ibo ne futano yo kiniba bobolo ilum omfube binobu otane ibo bobol ilum yo amito mo bibenim blimobe. Ne futan yo ibo daabenobio kesoa ne seimbibe. <sup>9</sup> Otane bobol tem ilum ibo dimo tam tlobio yo ne mo seimbibabe. Ne seinin olole bobol tem ilum ibo dimo tam tlanoa daabenoa ibo kukub misiamo deiboniba naka ele dobo klanibbuo ota ne seimbibe. Gode funanea Kolin bib seli naka ele dobo klanamino deiba bianiba isa hengmin olo gobo bliib kesoa aal waisenoa deibueine genea ibo inaibbio kesoa ne sino futano ibo dola omfubeibuo ne kukub misiamo ibo mo omyim blimobe, ne ibo daaye binibiobe. <sup>10</sup> Nakaia unangai hengmino hengaiba Gode daabenea i bobol temo ilum omfubenoa baaniba Ni hengmino temo biobo deibonomobobo geib mole Gode i hengmino temo bliibo doketoubea i amit nomabiobe. I mo baanibta Ni hengmino temo bioba Gode dotlane olo misiam nabenebo genimibbabe. Eka nakaia unangai mak ile i hengmino hengabibo bobolo ilum omfubeno otane bobol ilum olo da-balim olo bobol ilum kesoa i baaniba Ni

hengmino temo biobo mo deibonomabbiobabo gabib kesoa i kaanomabiobe. I amito mo nomabibbabe. <sup>11</sup> Gode ibo hengmino hengabiba daabenea ib bobol temo ilum omfubenoa kukub olo e ibo kla daabenebiobe. Ibo funaniba Nibo hengmino henganobobo geniba ibo hengmino hebmamsab deibueib kesoa nakaia unangai baaniba Memalo i kukub ayam wafu bliibo geibbiobe. Ibo hengmin olo afetu boniba Gode tolo tosiam binibiobe. Ibo ni yatenamin teb yebua funaniba Nibo kukub misiamo nabobo klanoba afetu bonomo geniba nakaie ib isak temo bianea hengabe naka ele ibo sbal weng baabaibbiobe. Kukub olo ne mo baabenita Ibo misiam naibbiobo genimibabe. <sup>12</sup> Ne sino futano ibo dola omfubeibuo dimo ne nakaie tenea aalebe alelo omeisa haabinebio naka esa eka e aaleb esa i bobolo olota mo funaniba futan yo dola omfubeim blimobe. Ne funania Gode kin dimo Kolin bib seli ni kla gobe bliib kesoa ne futano dola omfubeia i funaniba Ni Folwali gobebuobo geine genita futan yo ibo dola omfubeibiobe. <sup>13</sup> Ibo ni gobe bliib kesoa ni bobol ayam fumbuobe.

Eka weng mak ole Taitase monea ibsu natlanea yatemea ibo kukub ayam wafu bliib kesoa e bobol ayam funanea seindabenea imin tenea ni baabene kesoa nisa ibo seinyebuobe. <sup>14</sup> Sino ne Taitase baabania Kolin bib seli kukub ayam bobol wayebobo ge baabaibiobe. Ibo kukub misiam olo mo deibueim blim kenib mole ne aal genalamabi otane e monea ibsu natlanea yatemea ibo bain inaniba kukub misiam olo deiboniba kukub ayam ota wafu bliib kesoa e funanea Fole wengo bain baatnenebiobo ge funanebiobe. Ibo ne aal ginino mo omnim blimobe. <sup>15</sup> Sino Taitase ibo gobe bie otane e monea ibsu natlanea yatemea ibo kukub misiamo namino tolo tosiananiba e baabaniba Klayam nata tlebobobo ge baabaniba e wengo kla wentehabib binea deibe tle kesoa memalo e ibo kla gobe bie. <sup>16</sup> Ne tekein kebibe, ibo memalosa sinanomosa kukub ayam wafunomabib kesoa ne seimbibe.

## 8

*Bainobo galin nakaia unangai i nineki daabesese nin wengobe.*

<sup>1</sup> Ne nekwal ibo ne weng mako baabenamabiobe. Gode bainobo galin nakaia unangai Masedonia betan ye bliibo daayebea isak naka mak unang maki daaye biobe. <sup>2</sup> Kukub olo inaminobe. Inamin namin kukub misiamo i dimo tam tlebinobio i enin kino wateme binibbio otane i bobol temo amitie kla seimbinibbiobe. I monio sumba otane i bainobo galin nakaia unangai maki

dohalilaniba monio olminabiba homon anoa oloniba bainobo galin naka mak unang maki okaye binibbiobe. <sup>3</sup> Ne i kukub ayam olo nabiba yateme binibio weng sango ibo baabenamabibe. I monio olminabiba homon anoa oloniba bainobo galin nakaia unangai maki oyom gaibo atosino i mo deibueibbiota olonibta inamin namino mo walaibbabe. Alukum ita oyeniba i de de binibbiobe. Ni i mo baabenobta Ibo inaine ge baabeim blimobe. I imaye ili bobol tem inaniba <sup>4</sup> i teniba menga bianiba ni baabeniba Ibo ni deibesiba bainobo galin nakaia unangai Yudia betan ye blihi daabenomabbiobe. Ni monio olminomobo ibo oloniba i oyine ge baabeibbiobe. <sup>5</sup> Sino ni funanoba I monio gwab olminiba nakaia unangai oyomabiobo gabob otane i monio homon olminiba oyibbio yo olobbabe. Mikiktemo i bobol tem osa i dam osa alukum omoniba Sume omanibta naibbiobe. I baaniba Ni Gode bobol tem funin ota wafunomabbiobo geniba ni kla gobe bianiba ni wengo kla wenteye binibbiobe.

<sup>6</sup> I kukub ayam olo nabib kesoa ni Taitase baabanoba Sino kobo moneba Kolin bib unaneba i baabeneba i monio oloniba baaniba Ni moni olo olonoba bainobo galin nakaia unangai maki inamin namin blimi oyenoba daabenomabbiobo geibbio otane i moni olo mo oyim blim deibe blib kesoa kobo imin moneba isu unaneba baabeneba i monio oloniba i oyiba blimanoko ge baabanobbiobe. <sup>7</sup> Kolin bib sel ibo inamin namin kukub ayam homon nabinabiobe. Ib bainobo galino sbal maniba Gode wengo mitmakamo kla tekein kebianiba klayam omkeimabiobe. Ibo Gode okoko klayam okok kebianiba ni kla gobe bliobe. Ibo kukub olo klayam wafu blib kesoa ibo nakaia unangai maki daayemin kukub osa wafunib mole kukub olo dot ayamobe.

<sup>8</sup> Ne ibo mo baabenita Ibo nakaia unangai maki monio oyine gabibabe. Ne funania Masedonia seli monio oloniba naka mak unang maki okaye binibbuo weng sango ne Kolin bib seli baabeia isak inaniba monio nakaia unangai inamin namin blimi okayemib mole ne tekein kenia i nakaia unangai gobe biobobo gabibo i besa sitalo mo obibbabo, i bobol temo bain nakaia unangai omyenibta gobe bliobo genano genitabe. <sup>9</sup> Ibo tekein kebiobe, Sume Yesus Klaiste abilim uto inamin namino homon biba binabo otane e ibta dohalilaneta daak teneta dabalim ele tlaneta e afobeing blim binebiobe. E inanea ibo daabenebio kesoa ibo abilim uto inamin namino homon olomabiobe. Ne weng ele baabei olo ne tekein kenia I Yesuse kukubo nanebu olo bain inaniba naka mak unang maki

daabenomabiba bleka? genano genita baabeioibe.

<sup>10-11</sup> Ne memalo ne bobol tem funino ibo baabenamabibe. Bifole blimambe dime ibo baaniba Ni bainobo galin nakaia unangai inamin namin blimi daabenomabbiobo geniba mak ibo monio olmieibbu otane nakaia unangai maki monio mo olmieim blimobe. Sino ibo monio atosino olmieibbio kesoa memalo atosino alukum olminiba oyiba blimanoko getabe. Naka make inamin namino men biba bio mole e men doyeko! Eka naka make inamin namino homon biba bio mole e homon doyeko! <sup>12</sup> Naka mak unang maki teingo kikibib mole Gode funanea Kukub olo klayamobo genamabebe. Nakae inamin namino men biba biamo Gode e mo baabaneta Kobo nakaia unangai inamin namino homon dokayemale genemebabe.

<sup>13</sup> Ne mo baanita Bainobo galin nakaia unangai Yudia betan ye blihi inamin namino homon bokabihta ibole besa nine gabibabe. <sup>14</sup> Ina otane ne baania Memalo ibo inamin namino homon bibe bio kesoa ibo atosino i doyibbio binibta isak inamin namin saib mole yang kenibta atosino ibo doyine gabibe. Ibo inamib mole ib inamin namino makob kimin bibenamabobe. <sup>15</sup> Sinanggwano Islel teni ibuan-tem ye binibbio dimo Gode imeno niniino manao okaye binebiobe. Gode buk temo o weng sango baanoa

Naka maki imeno homon boka binib-  
bue ile i imeno mo homonu beim  
blimobe. Eka maki imeno homonba  
boka binibbue ile i mo al ato hela bia  
nin blimobo genobiobe.

Homon bokabib isa eka homonba bok-  
abib isa i alukum downaibo matwayen  
wayen binobiobe. Inamin kesoa naka  
make inamin namino blim bie mole ibo  
daabaniba ib sinwalo alukum inamin  
namin saine!

*Taitaswali Kolin bib onsibo weng sango-  
gobe.*

<sup>16</sup> Ne ib talo wabiania Ne fatnanita ib bainobo galino daabeita sbal maine gabio Gode Taitase bobol tem daak osa inanea ib tal walin kukubo omabbebanea Ne fatnanita i bainobo galino daabeita sbal maine gabe kesoa ni Gode gangobo gabuobe. <sup>17</sup> Niminbabe, sino Taitase ele bobol tem fumbianea Ne monia Kolin bib unania bainobo galin nakaia unangai daabenano ge fumbea nisa inangge baabanob kesoa e kla seimbinebiobe. <sup>18</sup> Bainobo galin naka mak esa dofakanoba i dab dlanoba moniba ibsu natlomabiobe. Naka ele e Yesus Klaiste dowan wengo

omkeimabeo bainobo galin nakaia unangai bib mak bib mak ye blibi baaniba E kukubo ayamobo gabio. <sup>19</sup> Bainobo galin nakaia unangai Masedonia betan ele blibi naka ele baabaniba Kobo Folwali bakaneba ni monio olminabobo oleb moniba bainobo galin nakaia unangai Yudia betano blibi oyine ge baabaibbiobe. Ni daayemin okok olo inaboba nakaia unangai yateniba baaniba Folwali Sume niniino dobtouleb nomo geniba i seimbianiba moni olo oleb moniba bainobo galin nakaia unangai Yudia betan ye blibi okayebiobo gabio.

<sup>20</sup> Ni monio homon oleb unomabbio kesoa nakaia unangai maki baaniba Folwali moni olo oleb unaibo i klaow mo kikinomabibbabo genimib kesoa naka ele ni baka une mole klayamobo gabuobe. <sup>21</sup> Niminbabe, ni funanoba Ni moni olo oleb unom gaobo ni klanoba Gode kin dim osa nakaia unangai kin dim osa moni olo klayam kimanoba oleb unom gabuobe.

<sup>22</sup> Ni bainobo galin naka mak esa daabanoba Taitaswali baka monea ibsu natlamabebe. Am homono dimo ni naka ele kukubo atemebo kesoa ni baanoba E kukubo klayam wafu biebo genomabbio. E wentebee i baaniba Kolin bib seli monio olminiba Yudia betano blibi bainobo galin nakaia unangai daabenomabiobo gesiba wenteneea e baanea I kukubo klayam nabiobo, ne monia isu unania daabenano genebiobe. <sup>23</sup> Ibo Taitase tekein kebiobe. E ne nekobe. E ni dab okok kebianoba ibo daayebuobe. Naka asu dabi e baka moniba ibsu natlomabibi bainobo galin nakaia unangai bib mak bib mak ye blibi ita naka asu dab eli dlakaihta monibta ibsu natlomabiobe. I kukub ayam wafu bliiba nakaia unangai yateniba Klaiste niniino dobtouleb bliobe. <sup>24</sup> I moniba ib bibam natlaibo ibo baabeniba Klayam nata tliobo ge baabeniba dleb taniba ib am tam daiba i funaniba I ni kla gobe bliobo geine! Bainobo galin nakaia unangai bib mak bib mak ye blibi ibo yatemaibo baaniba Folwali baaniba Kolin bib seli kukub ayam wafu bliobo geibbio i wengo motonobo genomabiobe.

## 9

*Bainobo galin nakaia unangai maki daayemin wengobe.*

<sup>1</sup> Ne mo baabenita Ibo bainobo galin nakaia unangai Yudia betan ye blibi inamin namino blimi monio oyine ge baabenamabiba kesoa ne weng homono ibo mo oyemibabe. <sup>2</sup> Ne tekein kebibe, ibo funaniba Ni i kla daabenomo geibbio kesoa ne nakaia unangai Masedonia betan ele bliki kin dimo ne ib niniino

dotouleb biana baabeniba Bifole blimambe dime Kolin bib seli Glik betan ye blibi inamin namin mako klaniba Bainobo galin nakaia unangai inamin namin blimi daabenomo gabinibbiobo ge baabesia wenteniba naka homon unang homoni funaniba Inamib yole nisa daabenomo gabio. <sup>3</sup> Otane ne bobol temo fumbio Ni ib niniino dotouleb biobo weng olo besa weng anomo kesoa ibo sin klaniba makob ne sino nakaia unangai Masedonia betano blibi baabeniba Kolin bib seli inamin namino sin klanomabiobo ge baabeibio inaniba klanabite genita Taitaswali dlaia moniba ibsu natlomabiobe. <sup>4</sup> Sino ibo baaniba Ni i daabenomabbio geibbuo tekein kebob kesoa ne monia ibsu natlang gamio nakaia unangai Masedonia betan olo blibi maki beketne naiba monoba ibsu natlanoba yatemoba ibo inamin namino mo klaim blim biaibo ni aal geneloba ibsa aal genelomabiobe. <sup>5</sup> Nibo inanoba aal genelino misiam kesoa ne nekwali sin dlaia moniba ibsu natliba ibo yateniba ib monio sin baaniba Oyomabbio geibbuo alukum sin olmieiba blimanabota Ne natlano genita dlaia natlomabiobe. Ibo monio ilib bobol tem olmieine! Ni ibo mo menganobta Ibo monio olminiba i daabeine ge baabenomobbabe.

<sup>6</sup> Ibo saa weng olo kla funaine! Nakae imen dango sum dolmane biamo imeno homon ulelamabebe. Eka nakae imen dango men dolmane biamo imeno homono mo ulelamabebabe. Inamin kesoa ibo naka mak unang maki monio sum okayemibo ibo makob nakae imen dango sum dosam binabe ulab aiba Gode ibo seinye biane daayemabebe. <sup>7</sup> Naka make funanea Ne moni olo oyio nene bobol temo mo oyim blimobo, naka mak ita obibta oyibo ge funanea e mo seinim blim kene mole kukub olo misiamobe. Otane nakaia unangai wanibta ib monio oyom gib mole ibmaye funaniba Inamin oyomo ge funaniba seimbianibta oyine! Gode kukub olo klayamobo gabebe. <sup>8</sup> Ibo inamin namino blim bibe biamo Gode titilsa kesoa e amitie daaye biane wekib meseinea asitem yeb baka dokayebea ibo inamin namino homonu bebua ibsa inaniba nakaia unangai maki inamin namin blimi daayemomabiobe. <sup>9</sup> Kukub olo weng mako Gode buk temo baanao

Gode bainobo galin nakae waneta nakaia unangai inamin namin blimi kla daaye biane inamin namino homon dokayeme mole i amitie oha bianiba E kukubo molot wafu biebo ge ohamomabiobo genobiobe.

<sup>10</sup> Eka ne saa wengo mak osa imin

baabenamabibe. Gode nakaia unangai imen sano dokayebea i dosambiba e daabonea damambua wembinabiobe. Imen olole Gode emaye omkaye binabebe. Inamin kesoa Gode ibo inamin namino doya dloniba nakaia unangai inamin namin blimi doyib mole e imin mesein kenea dot homon dokayebea ibo naka mak unang maki inamin namino amitie dokayemabiobe. <sup>11</sup> Gode moni osa inamin namin osa ibo homon doyameo ibo ni baabeniba Ibo inamin namin olo dleb moniba nakaia unangai inamin namin blimi doyine ge baabeiba ni dleb monoba nakaia unangai doyoba i Gode gangobo genomabiobe. <sup>12</sup> Ibo inaniba bainobo galin nakaia unangai daayemib mole i klayam bianiba inamin namino bibenamabobe. I inanomabibo yo olobbabe. I God esa kla gangobo galomabiobe. <sup>13</sup> Ibo bainobo galin nakaia unangai inamin namin blimi daayemib mole i baaniba Bainobo galin nakaia unangai Kolin bib ye blibi Klaiste dowan weng ayamo kla wente bianiba wafu bianiba bainobo galin naka mak unang maki inamin namin blimi ni sinwalo daayebiobo geniba Gode niniino dobtoulebianiba <sup>14</sup> baaniba Gode bainobo galin nakaia unangai Kolin bib ye blibi kla daayebebo gabianiba ibo kla gobe bianiba beteno daayemomabiobe. <sup>15</sup> Gode okok sumo nanea e miine nibo dobyebio kesoa nibo fatnanobta e kla gangobo genobta e niniino dobtoulebianomabbione? Nibo mo inanomabbioaba otane nibo amitie Gode gangobo galomo!

## 10

*Fole baanea Gode emaye ni e okok dlasanin naka dlakanebiobo genebiobe.*

<sup>1</sup> Nakaia unangai maki baaniba Fole ni baka biameo e ni weng fiab omkaye binabe otane e ni deibenea monea skeim bianea e wengo ni omfubenang gameo sbal weng baanea omfubebe binabe kesoa kukub olo misiamobo gabiobe. I inangge obib otane ne ibo weng fiab oye biania makob Klaiste weng fiab oye binabe inayebebe. <sup>2</sup> Naka maki funaniba Folwali dabalim kukub ota wafu bianiba misiam nabinabiobo gabib kesoa ne monia ibsu natlamio i sbal weng baabenamabibe. Ibo i kukub olo wafu blib mole ne ibsu natlamio ibsa sbal weng baabenamabi kesoa ibo i kukub olo mo wafu nimibe! <sup>3</sup> Bainobe, ni dabalim naka otane ni mo dabalim nakai naniba i makaai tenaniba awa gembinabib inanobta Gode makaai mo tenanobta awao mo gembobbabe. <sup>4</sup> Ina otane ni Gode makaai tenanoba awa gembobo afetobe. Ni awa ginino kwama ana eka klemao

nakai klaibbuo mo olonobta awao gembobbabe. Ni inanoba awa olo gembobo Gode titilo ni omkayebe kesoa ni tata kenoba inamin namin misiamo God esa e weng osa makaa dlabuo kima bie watwat dabanomabbioe. <sup>5</sup> Nakaia unangai funaniba Ni bobol tem funino Gode bobol tem funino gaisonobiobo gabianiba eka mak ile nakaia unangai dim oye bianiba i Gode tekein kenamino wataye biam bliobe. Ni Gode makaa eli okoko watwat dayebuobe. Nib bobol tem funino alukum omonoba Klaiste omaloba eta kimabenoko! <sup>6</sup> Ibo alukum Gode wengo wentemine! Ib isak temo naka maki Gode wengo omdibihabib mole ni tenoba ibo dlo klanomabbioe.

<sup>7</sup> Ibo ne okoko wengo inangge onebibo ibo ne aal tib olota natenibta obiobe. Ne weng mako ibo baabenamabio kla wentemine! Naka make baanea Klaiste titilo ne omnebiobo gene mole olo klayamobe. Gode titilo nisa omyebiobe. Ibo olo mo dokobenomone! <sup>8</sup> Sume ne nemakanea baatnenea Kobo Kolin bib seli bainobo galin nakaia unangai kla kimanale! Kobo i mo watwat dabenebe! I kla daayemale ge baatnenebio kesoa e titilo ne omnebu olo weng sango i amitie omkayebio ne aalo mo gembibabe. Ne olo kla seimbibe. <sup>9</sup> Ibo ne futan ele dola dlubenamabi olo mo funanibta E ni tosanin omyang geneta futan olo dola dlubenebo genimibe! <sup>10</sup> Naka maki baaniba Ibo Fole tolo mo tosanimibe! E futan temo wengo nibo dola dlubenemeo sbal weng oye binabe otane e nibo baka biameo e besa naka titil blimobe. Eka e weng osa nibo titil blim oye binabebo gabiobe. <sup>11</sup> Nakai wanai inangge obib mole i kla funaniba kla tekein keine! Ne skeim biania ibo futano dola dlubebe biania eka ne monia ibo baka biania ne kukubo namio kukub olo makob ne ibo futano dola dlubenabi inaminobe.

<sup>12</sup> Naka maki ili niniino omfufu bianiba baaniba Ni Gode weng omkeimalin naka ayamobo gabiobe. Eka nile? Ni naka eli kukubo mo yatenobta baanobta Nisa Gode weng omkeimalin naka ayamobo gabobbabe. Ibo tekein kebiobe, olo bain otane ni mo inanobta nini niniino omfufubobbabe. Naka eli i sinwalo maki kukubo nabibo yatemsese bianiba baaniba Ne kukubo nabi ota klayamobo gesese blib otane i bobol tem funino blimobe. <sup>13</sup> Ina otane Gode ni baabenea Ibo moniba Kolin bib esa eka bib mak bib mak osa haabianiba ne wengo omkayemine gene kesoa ni bib olo monoba okok kebianoba o weng sango naka mak unang maki omkayebuobe. Ni mo monobta bib afeto unanobta Klaiste wengo omkayebobbabe. <sup>14</sup> Ni ina bianoba monoba ib bib esa Klaiste wengo omkaye

bianoba makob Gode ele baabenebio ina binobbio. <sup>15</sup> Ni weng olo obobo naka maki moniba Gode okoko okok kebinib-buo weng sango ni mo obobbabe. Ni nini okoko Gode omyebua okok kebinob-buo weng sang ota omkeimabuobe. Ni inabob otane ni funanoba Ibo bainobo galin kukubo sbalma wafu niba sbal maiba ni Gode wengo amitie aleyeboba okok olo sum anoko gabuobe. <sup>16</sup> Ib biho Gode wengo sum anoa ni deibenoba monoba bib mak bib mako naka mikik unang mikiki Yesus Klaiste dowan weng ayamo omkayem haanomabbio. Ni mo monobta bib mak bib mako naka maki sino Yesus Klaiste dowan weng ayamo omkaye binibbue isuo mo unanobta baanobta Okok olo nita okok kebinobbio ge baabenomobbabe. <sup>17</sup> Sinanggwano naka make weng mako Gode buk temo dolanea baanea Naka mak unang maki naka make niniino dobtouleb nom gib mole Sume niniino olota dobtouleb nine genebio.

<sup>18</sup> Niminbabe, nakaia unangai maki i okoko nabibo bobolo fumbianiba baaniba Ne naka ayamobo, ne unang ayamobo gabib mole i Gode kin dimo niniin blimobe. Ina otane Sume emaye baanea Kobo naka ayamobo, obo unang ayamobo gabe mole e kin dimo i bain naka ayam unang ayamobe. Inamin kesoa Yesuse okok dlasanin naka ni nini niniino mo omfufubobbabe.

## 11

*Dim omin nakai maki baaniba Ni Yesuse okok dlasanin nakabo geibbio.*

<sup>1</sup> Ne weng mako ibo baabenamabibe, ibo funaniba Fole weng misiam obebo ge fumbib mole ibo ne weng olo oyemio mo tolobo genimibe, besa wentenebibte! <sup>2</sup> Ibo ne saa weng ele baabenamabi olo kla funaine! Unang sou mako aalebe naka mak emi omfakabanea Naka maki teniba omeb haanimiobo ge funanea e kla kima bia binoa nakae omanamin amo tola imake omalea omonea i kamo klayam nomabib inania nesa ibo Klaist emi dlalamabi kesoa ne ibo kla kima blibe. Ne inania ibo kima blia Klaiste dlamabe amo tola tlameo ne ibo dlonia Klaiste dlalia yatenea I kiningobo genamabebe. <sup>3</sup> Sinanggwano Naka Misiam tenea Gululam etem wat onsea tenea Ifo dim baabosea o Gode wengo ombiabanobio kesoa ne funania Ibo bobol ayam bianiba Klaiste goba bianiba kla bainobo geine ge funaiobe. Naka eli teniba ibo dim oye bianiba Nisa Klaiste okok dlasanin naka kesoa nisa makob Folwali ulabobo gabib naka elile Gululame meletanobe. I teniba ibo dim baabeniba ib bainobo galino watwat dabenom genibta nabib

kesoa ne bobol temo misiam utnebioe. <sup>4</sup> Niminbabe, ibo dim omin wengo wentaibo hebmamsab bainobo gabio. Sino ni tenoba Yesuse weng sango omyoba ibo e dowan weng ayamo wenteniba e Hobe ib bobol temo dababbaibbio. Ina otane naka maki teniba Yesuse weng sang osa eka e dowan weng osa afet omkeima bianiba hob afete ibo dohyaibo ibo mo baanibta Weng olo bain Gode weng bleka weng afet eso? gabibbabe. Ibo hebmamsab bainobo gabib kesoa ne ib kukub olo tosi-ambibe. <sup>5</sup> Naka eli baaniba Ni Yesuse okok dlasanin nakabo gesiba ibo funaniba I naka sumobo gabib otane ne funania I ne mo gaineim blimobo gabibe. <sup>6</sup> Ne Gode wengo omkeimabi biamo ne wengo mo bolo dibianita obinabiba otane ne Gode wengo mitmakamo kla tekein kebiobe. Ie wengo kla holo dibianiba omkeima binabib otane i Gode wengo mitmakamo kla mo tekein kebiobe. Ibo ni yatembuo ni kukub osa tekein kebio. Ni amitie Klaiste dowan weng moton ota omkeima binabuobe.

<sup>7</sup> Sino ne funania Ne Kolin bib seli Gode dowan wengo omkaye bia i hengmino temo blibo deiboniba utniba Klaist esu us unine genita omkaye binibio. Ne ina binibuo dimo ne ibo mo baabenita Imena moniao okanemine ge oyemin blimobe. Ne niniino omabbunia nemaye okok biania moni gwabo dlonia imeno walo wembiania Gode weng ibo omkaye binibio. Ne inabio ne hengaihua bleka? <sup>8</sup> Ne ibo daaye biania Gode wengo omkaye binibio ibo monio onibbio mole kukub olo klayam otane ibo mo onim blim kesoa bainobo galin nakaia unangai bib mak sel ita daanebibta ibole ne misim daaye binibio. <sup>9</sup> Sino ne ibo baka biania Gode weng ibo omkaye biania daaye binibio dimo ne imena moniao blim utneno otane ne naka maki mo baabenita Daatneine geim blimobe. Ina otane bainobo galin naka maki Masedonia betan da teniba monio onibbio. Ne sino ibo mo baabenita Monio online ge baabeim blimobe. Sinanomosa ne ibo mo inangge baabenimibabe. <sup>10</sup> Yesus Klaiste moton weng ne bobol temo bitne bio kesoa ne obiania Ne Kolin bib seli bainobo galin nakaia unangai daaye binibi otane ne i mo baabenita Imena moniao online ge baabeim blimobo gabibe. Nakaia unangai Glik betan ye blibi baatneniba Kobo inamin wengo mo baanemebe genimini blimobe. Niminbabe, ne wengo bainobe. <sup>11</sup> Nimin kenita ne ibo mo baabenita Imena moniao online ge baabeim blime? Ib bobol temo funaniba E ni kla mo gobeim blim bianeta daatneine galin weng olo ni mo baabeim blimobo gabiba bleka? Yeye Gode tekein



kebebe, ne ibo kla gobe blibe.

<sup>12</sup> Dim omin naka eli baaniba Ni Yesuse okok dlasanin nakabo, ni okoko makob Fole okoko ulab okok kebuobo gabib otane ne baania I okoko makob ne okoko ulabo mo okok kebobbabo gabibe. Niminbabe, i baaniba Ibo imena moniao ni oyine gabiba ibo okaye binabiobe. Ne mo ina binabibabe. Memalo ne kukub olo nabio amitie inambe bia nakaia unangai nateniba tekein keniba baaniba Naka eli okoko makob Fole okoko ulabo mo okok kebobbabo genomabiobe. <sup>13</sup> Naka eli deskinaniba Yesuse okok dlasanin nakai ulab aniba baaniba Ni Yesuse okok dlasanin nakabe. Ni e okoko klayam okok kebuobo gabib otane i dim obiobe. I e okok dlasanin nakababe. <sup>14</sup> I inamibo ibo mo dluu unemibe! Niminbabe, i komoke Gululam esa dim omin nakabe. E Deskinania abisake ayale tem wat bie ulab aia nakaia unangai nateniba funaniba E Gode abisakobo geine genea ina bianea dim obinabebe. <sup>15</sup> E inanea dim obinabe kesoa e okok naka isa dim obinabiobe. I funaniba Ni deskinanoba Gode okok nakai kukubo molot wafunabibi ulab anomo gabib otane i dim obinabiobe. I memalo ina bianiba kukub misiam wafu bliobe. Sinanomo God esak yang kenea kukub misiam omyamabebe.

*Fole enin kino wateme binebuo weng sangobe.*

<sup>16</sup> Ne weng olo sino baa dolai otane ne imin baanamabibe. Ibo mo funanibta Fole weng misiam obebo genimibe! Naka make tenea ibsu ele tlanea weng misiam oyemeo ibo e mo watabibba kesoa ibo funaniba Fole weng misiam obebo geib mole ibo nesa mo watanimibe! Deitneibta ne kukubo nabio wengo ibo baabenano! <sup>17</sup> Ne weng misiam omin nakai kukub ota omeisenita ne niniino omfanita Ne kukubo klayam nabibo gabibe. Kukub olo Sume ne mo omnin blimobe. <sup>18</sup> Naka homon unang homoni dabalim olo kukub ota wafu bianiba i niniino omfufu bianiba Ni kukubo klayamobo gabib kesoa nesa inania ne niniino omfania baania Ne kukubo klayamobo gabibe. <sup>19</sup> Ibo funaniba Ni tekein kemin nakabo geniba naka eli ibo weng misiam oyebibi mo watabibbabe. Ibo i weng misiamo ibo oyemibo kla wenteyebib otane ibo nimin kenibta ne weng misiam osa klao mo wentenemin blime? <sup>20</sup> Naka eli i okoko ibo dlasam bianiba eka ib imena afobeingao oise unebib otane i mo yang kebobbabe. I ibo dim oye bianiba baabeniba Ni naka sumobo ibo besa nakabo ge oye bianiba kiibi sino biangowa yena yena binabiobe. I ibo inaye binabib otane ibo i mo watabibba kesoa ibo

bobol tem funin blimobe. <sup>21</sup> Ni ibo inamin namin kukub misiam olo mo nabeim blim kesoa ibo baaniba Folwali titil blimobo gabioobe. Ib wengo bain baaibbio mole ne aal genalamabi otane ib wengo bainbabe.

Naka maki baaniba Ni kukubo klayamobo geib mole nesa baania Ne kukubo klayamobo genamabibe. Ne inangge baai mole ne makob weng misiam omin nakai weng dikin baanamabibe. <sup>22</sup> Naka eli ili niniino omfufu bianiba baaniba Ni Hiblu tenobo gabibo nesa Hiblu tenobe. Eka i baaniba Ni Islel esa Eblaham esa i molobselobo gabibo nesa Islel esa Eblaham esa i molofeitobe. Inamin kesoa ibo fatnanibta baanibta Naka eli titilsabo Fole titil blimobo gabibe? <sup>23</sup> I baaniba Ni Klaiste okoko okok kebuobo gabib otane i okoko klao mo okok kebobbabe. Neta Klaiste okoko klayam okok kebibe. (Ne inangge baai olo makob weng misiam omin nakai weng baaiobe. Weng olo misiamobe.) Ne okoko dot bumolok bli otane i mo inabibbabe. Ne Klaiste okoko kla okok kebi kesoa am homono dimo naka maki ne klubuto ge nemetniba moniba klubutam tam daibbuu blia am homono dimo naka maki teniba nebibia binia kaain keke binabibe. Kukub misiam olo ne dimo amitie tam tlene binabo otane naka eli dimo mo tam tleye binabobabe. Niminbabe, neta Klaiste okoko klayam okok kebinabibe. <sup>24</sup> Yudai ne nebinibbuo deib makobo mo nemde nemfaim blimobe. Am mak bomanomo teniba tek tebeloniba nemino 39 getne unibbuu eka am mak bomanomo imin teniba nananamino 39 getne on onino amo 5 ge ge binibbiobe. <sup>25</sup> Eka Lom teni ne nebinibbuo deib makobo mo nemde nemfaim blimobe. Am mak bomanomo teniba atdab tebeloniba nemde nemfaniba unibbuu eka am mak bomanomo imin teniba inaniba nemde nemfa on onino amo asumatna ketne binibbiobe. Eka am mak bomanoa Yudai teniba tom oloniba sane binibbiobe. Eka am mak dimo ne siib tem bebia siibe misiam anea aaye downonia kaain kenamino asumatna kebiobe. Inaibuo asu o dim ota siibe inanea misiam aneo hebmanasab gilun unibi otane olokiemo dim ole sma aalang dim wat wabia amo olokiem blimanobiobe. Niminbabe, ne Klaiste wengo omkeimabio o dafa ota i enin olo omkane binibbiobe. <sup>26</sup> Am homono dimo ne monia bib mak bib mako haabinibuo am mak dimo monia aayo yabia naleb unin ke eka am mak dim ole ayok henin nakai teniba nenaniba ne afobeingo oitne unomo gabiam eka am mak dim ole nene nineki Yudai ne makaa nemfaniba nenanomo gabiam

eka am mak dim ole Yudabai ne makaa nemfaniba nenanomo gabiam eka am mak dim ole monia bib sum ye temia nenanomo geniba nangkikaiba te eka mak ole monia ibuantem ye temia inamin namino tenoa ne undim wat unoa naakin ke eka am mak dim ole siib tem bebia siibe misiam anea aayo downonia kaain ke eka am mak dim ole naka maki ni Yesuse bainobo gabuobo geniba dim obibi teniba ne nangkika inane binibbiobe. <sup>27</sup> Sino ne Yesuse okoko amitie okok biania am mak dimo kwitimib okok kebiania ne mo aa unim blim amitie okok kebia boma boma binobiobe. Am mak dimo ne imen teb nebiam aa teb nebiam binobiobe. Eka am homono dimo ne bumolok biania okok kebi kesoa ne imena aayao mo doweim blimobe. Eka am homono dimo ne youm blim biania gil dubutne binobiobe. <sup>28</sup> Eka weng mak ole ne amitie bainobo galin nakaia unangai bib mak bib mak ye blibi talo wabiania funania I bainobo galino sbalma blib bleka mo sbal maim blim eso? gabiania ne bobolo ilum omfutne binobiobe. Dim omin naka eli inamin bobol temo mo fumbibbabe. <sup>29</sup> Nakaia unangai i bainobo galino mo sbalma blibbai ne dohalimbibe. Naka make tenea bainobo galin naka make men weng men weng baabanea hengmino hengane mole ne Yebbabo genamabibe.

<sup>30</sup> Ne baania Ne kukub ayam wafu blibo gabi otane ne mo baanita Nene titil ota ne kukub ayam wafu blibo genimibabe. Ne baania Ne titil blim otane God eta ne daanebeta kukub ayam wafu blibo genamabibe. <sup>31</sup> Nib Sume Yesuse Aye Gode tekein kebebe, ne dimo mo obibabe. Ni bo e niniino amitie dobtouleb nomo! <sup>32</sup> Sino ne Damaskas bib ye binibuo bib olo sumobe. I bib olo daamo geibbiotabe. Ne inania Damaskas bib ye blia komok sume, niniino Aletase, e okok nakae bib sumo yo kima bie ne klubuto getnenang gena bianea e naka maki baabenea Ibo daamo amito toulala bliba Fole gil anang gameo afuniba ge debeb moniba klubutam daine ge baabenea i inaniba teniba amito getne blib otane <sup>33</sup> bainobo galin nakai maki teniba ne nomoniba tlit mene beselibe haibbue teme nemabbaniba saye toboniba tobginiba nomoniba gil amito hatlaibbio temte nemaiba bebia sa da nafu bianiba nama nama bliba daatnia kim daak blelania unibiobe. Ibo ne inaibio yota funaniba tekein keniba Fole titil blim otane Gode daabanea gil an unebiobo geine!

## 12

*Gode inamin namin homono Fole dam deib alebanebiobe.*

<sup>1</sup> Ne nene niniino omfufumio kukub olo ne mo daatnenamaboba otane ne funania Kolin bib seli tekein keniba Fole Yesuse okok dabasanin nakabo geine genita weng olo baabenamabibe. Deib afeto blimobe. Ne Sume Gode inamin namin kukubo dam deib aletne nabianea eka inamin namino mako sino ayok binobio osa aletnenebio kesoa ne o weng sango ibo baabenamabibe. <sup>2-3</sup> Sino Gode Hobe Klaiste bainobo galin naka ne nemeb utnea abilimo Gode bie ut danea Gode inamin namino aletnenea watem tibuo bifolo 14 o blimanobiobe. Gode ne dam yeb baka nemeb unebiobleka besa afen smik eta debeitne unebu ese makobe. Ne mo tekein kebibabe. God eta tekein kebebe. E inanea ne nemeb utnea Gode bilim ut danebiobe. <sup>4</sup> Ne abilim ut biania inamin namin wengo wentibuo dabalin sel nakaia unangai weng olo mitmakamo deskinaniba inaminobo genamino blimobe. Gode ne baatnenea Kobo weng olo nakaia unangai maki mo baabenemebe ge baatnenebiobe. <sup>5</sup> Ne inamin namino watemibuo bobolo fumbiania baania Olo klayamobo gabibe. Ne mo baanita Ne kukub ayam wafu blibo gabibabe. Ne baania Ne titil blim otane God eta ne daanebeta kukub ayam wafu blibo gabibe. <sup>6</sup> Ne baania Ne kukub ayam wafu binabi kesoa sino Gode nemeb utnea abilim uto inamin namino aletnenebiobo gei mole ne weng olo dimbabe, bainobe. Ne nakai bobol tem funin blimi kukubo ne mo omeisenita weng olo baaiababe. Ina otane ne o weng sango mo baa omkeimanamabibabe. Ne inai mole nakaia unangai funaniba Fole kukub ayam wafu bie kesoa Gode debeb utnea abilim uto inamin namino alebanebiobo genomabib kesoa ne mo inanamabibabe. I ne kukubo nabi osa ne wengo obinabi osa ota watenibta tekein kenibta Fole kukubo inaminobo geine gabibe.

*Fole enin kino wateme binebiobe.*

<sup>7</sup> Ne utnia abilim uto inamin namin homono watenia eka weng ayamo wentenaibu otane ne nene untako mo ngambianita baanita Ne naka sumobo genimibabe. Gode funanea Kobo inameobo genea ne enino omkane bianea kukub olo watanebebe. Gululame okok naka make ne nenanebu enin kino wateme binabi enin olo makob tetningo hetenebenobua silaye binabo inane binabobe. <sup>8</sup> Ne Sume baabania Kobo ne enin olo omtlatnenale ge baabanamino asumatna keibi <sup>9</sup> otane e baatnenea Ne mo omtlabkenimibabe. Kobo titil blim bianeba enin kino watemebebo, ne daake biania ne titilo omkake bia kobo sbal sambeobo ge baatnenebio kesoa ne

memalo titil blim biania seimbiana Klaiste niniino dobtoule biania baania Ne titil blim kesoa Klaiste titilo daanebebo gabibe. <sup>10</sup> Ne enin kino watemebi osa eka nakaia unangai ne weng misiam onebib osa eka inamin namino ne watwat datnenang genabo osa eka naka maki ne nebib osa inamin namin kukub olo ne bobol temo ilum omkanebo otane naka maki Klaiste titilo ne daanebeo natemniba i e niniino dobtoule nomabib kesoa ne seimbibe. Niminbabe, ne titilo blim otane Gode titilo ne daanebea sbalma blibe.

*Fole bainobo galini Kolin bib ye blibi bainobo galino dosbal masebe.*

<sup>11</sup> Naka eli teniba ibsu tlaniba baabeniba Ni Yesuse okok dlasinin nakabo gabianiba Ni naka sumobo gabibe. Ne naka sumba otane i ne mo gaitneim blimobe. Sino ibta baanibta Fole kukub ayam wafu biebo genamin otane ibo mo baaim blim kesoa nemaye nene skil weng olo inangge baaiobe. Ne inaio kukub olo misiam naiobe. <sup>12</sup> Sino ne ibo baka binibuo tengo mo nemin blimobe. Ne Yesuse okok nemasanin naka moton biania e okoko kla okok kebiania inamin namin okok sumo klabia ibo nateme binibbiobe. <sup>13</sup> Ne ibo kukubo mako mo nabeim blimo enamino. Sino ne ibo baka binibio ne ibo mo baabenita Monia imenaokanemine ge oyemin blimobe. Ne monia bib afeto binibu ota bainobo galin nakaia unangai monia imenaokane binibbiobe. Ibo funaniba E ni kukub misiam nabene biobo geib mole ne mo nemsuana nimibe, deitneine!

<sup>14</sup> Sino ne mikiktemo monia ibsu natlia binoba deibe tlibua omi to imin natlia binoba deibe tenaibio memalosa ne imin monia ibsu natlang genabibe. Ne monia ibsu natlamio ibo mo baabenita Imena moniao online ge baabenamabibabe. Ina otane ibo ne kla gotnenib mole ne kla seinamabibe. Ne makob ib ayobe. Eka ibole makob ne meme nabe. Meme gwabi i aaleb kamwali mo kima kibanibta imeno dokayebibbabe. Aaleb kamwal ita memei kima bianibta imeno dokaye binabiobe. <sup>15</sup> Ne ibo kla gobe bli kesoa ne funania Ne i daabenano gabibe. Ib afobeingo blimubeno mole ne afobeing ota ibo oyamabibe. Eka ibo bainobo galino men bibe bio mole ne ibo kla daaye bia ibo bainobo galino sbal maiba ne seinamabibe. Ne ibo kla gobe bli otane ibo ne gotne blib ole men ese makobe. <sup>16</sup> Ib sinwalo maki baaniba Bainobo, Fole ni mo baabeneta Ibo monia imenaokanemine ge baabeim blimobo gabib otane maki baaniba E ni monio oisenang geneta dim oye bianeta men weng men weng oyebebo

gabib <sup>17</sup> kesoa ne ibo baabenamabio Ne mo inaim blimobo genamabibe. Ne nakai dlaia moniba ibsu natlibbuo ne wengo baabeniba Ibo Kolin bib seli baabeniba Fole monio olubaine ge baabeine ge baabeibua bleka? Ibo tekein kebiobe, ne mo inangge baabeim blimobe. <sup>18</sup> Ne Taitas esa bainobo galin naka mak esa i dabo dlaia moniba ibsu natlibbuo Taitase dim baabenea ib monio oisenebua bleka? Yeye e mo inaim blimobe. Ni dab ni bobol tem funin osa kukub osa makobobe.

<sup>19</sup> Ibo mo funanibta Fole funanea Ne kukub ayam wafu biebo geine geneta futan olo dola omfubenebo genimibe! Nesa Klaist esa ni bobol temo makob bianobta Gode kin dimo ne weng olo ibo baabeio. Ne funania Ne nekwal ibo ne wengo ibo oye binabi yo fumbianiba ib bainobo galino sbal maine genita futan olo dola omfubenamabibe. <sup>20</sup> Ne monia ibsu natlania yatemamabio ibo kukub ayam wafu blibta yatemamabia bleka? Malobe. Ne tenia ibo yatemia ibo sma kukub misiam wafu blib mole ne bobolo ilum omfutnenoa ibo sbal weng baabenamabibe. Ne inai mole ibsa bobolo ilum omfubenoa Ni Fole kukub olo gobo biobbabo genomabiobe. Ibo ib sinwalo dleb weng baasese bianiba naka mak unang maki afobeingo bobol waye biambua bleka? Ibo atliyebuga? Ibo inamin namino bobolsa kebianiba naka mak unang maki dim oye bianiba weng dobo weng oye biam bianiba ilib untak ngambianiba Gode wengo omdibihabiba bleka? Ne funania I kukub olo nabibo misiamobo genia aglol dubutnebiobe. <sup>21</sup> Ne funania Ne monia ibsu natlamio ne aal genalamabi ese makobo genia aglol dubutnebiobe. Sino naka homon unang homon ibo hengmino henga binibbiobe. Ne monia ibsu natlania yatemia ibo inamin namin kukub misiamo nabib osa eka tamano hengabib osa mo deibueim blim biaibo ne bobolo ilum omfutnenoa aal genalamabibe.

## 13

*Fole Kolin bib seli sbal weng baabenebiobe.*

<sup>1</sup> Sino ne mikiktemo monia ibsu natlia binoba deibe tlibua omi to imin natlia binoba deibe tenaibio memalosa ne imin monia ibsu natlang genabibe. Sinanggwano naka make Gode buk temo weng mako dolanea baanea

Naka make hengabea naka maki atemib mole i e hengmino omkeima baiba kot kimanin nakae i wengo wentamabebe. E nakae elekieme wengo mo wentamabebabe. Nakai asua

asumatnaia mak i weng ota wentamabebo genebiobe.

Ne monia ibsu natlania temia ibo kukub misiam olo mo deibueim blim sma ye wafu blib mole ne weng olo funania ibo kot kebenamabibe. <sup>2</sup> Sino ne ibo baka binibio hengminio hengaibbio ibsa eka mak besa ibsa alukum baabeniba Ibo inamin namin hengmin olo deibueine ge baabei biobe. Ne weng olo baabeibuo mikiktemo baka binibuo dim okobbabe, omito natlia binobuo dim ota inangge baabeibiobe. Mema dim olo ne ibo mo bekebe bliiba otane ne weng olo imin baabenamabibe. Ne mitdania monia ibsu natlania yatemia ibo hengmin olo sma ye wafu blib mole ne ibo sbal weng baabenamabibe. <sup>3</sup> Ibo baaniba Fole wengo nibo oyebe olo bain Klaiste weng biota oyebe bleka weng olo ele bobol tem fumbianeta oyebeso? ge obiobe. Klaiste titil blimbabe. E titilsa bianeta ibo oye binabebe. Ibo hengmin kukub olo sma wafu blib mole ne monia ibsu natlania sbal weng baabeia ibo tekein keniba baaniba Fole weng ele baabene olo bain ye Klaiste titil yebbaka baabenebo genomabiobe. <sup>4</sup> Sino Yesus Klaiste atdimo kaanebuo e makob nakai titil blimi ulab aneta kaanebu otane e imin hananebuo Gode titilo daahabua biebe. Klaiste meletan ne makob nakai titil blimi ulab otane Gode titilo nesa daatnenea ne ibo sbal weng baabenamabibe.

<sup>5</sup> Ibo ib bobol temo inamin namin kukubo nabibo kla funaine! Ibo ib bainobo galino ibmaye funaniba Ne bain Yesus Klaiste bainobo gabia bleka ne e klao mo bainobo gabiba eso? gabianiba moton sanine! Ibo Yesus Klaiste ib bobol temo bibe bio mo tekein kebibbayo? E ib bobol temo bibe bieba mole ibo moton Yesus Klaiste bainobo galin naka unangbabe. <sup>6</sup> Ibo ib bainobo galino moton maniba tekein keniba Yesus Klaiste ni bobol temo bibe biebo geib mole ibo tekein keniba E Folwali bobol tem osa bibe biebo genomabiobe. <sup>7</sup> Ni funanoba Kolin bib seli kukub misiamo deibueib mole klayamobo gabob ke-soa ni Gode baabanoba Kobo Kolin bib seli bainobo galin nakaia unangai daabeneba i kukub misiamo deibueine ge ohabuobe. Ni mo funanobta Ni Kolin bib seli inangge baabenoba i kukub misiamo deibueiba nakaia unangai funaniba Folwali Yesuse okok dlasanin nakabo geine genobta weng olo oyebobababe. Ibo kukub misiamo deibueiba nakaia unangai baaniba Folwali Yesuse okok dlasanin nakababo geib mole ni mo funanobta Dim obbata i inangge baabeibobo genomobbabe. Ni fumbob ole Ibo kukub ayamo kla wafueine gabobo olotabe. <sup>8</sup> Ni nakaia unan-

gai mo tolobo genobta Ibo Gode moton wengo mo wentemibe gabobbabe. Ni i daabenoba Gode moton wengo kla wentemine gabuobe. <sup>9</sup> Nakaia unangai funaniba Fole titil blimobo geniba ne mo gotneim blim keib mole olo besabe. Ina otane ibo ib bainobo galino sbal maib mole ni seinomabbio. Ni Gode oha bianoba Kobo i daabeneba i bainobo galino sbal maine ge ohabuobe. <sup>10</sup> Sume ne nemakanea baatnenea Kobo Kolin bib seli bainobo galin nakaia unangai kla kimanale! Kobo i bainobo galino mo watwat dabenemebe! Kla daabenebta i bainobo galino sbal maine ge baatnenea e titilo ne omnebiobe. Ne skeim ele bli ele ye futan olo dola omfubenamabibe. Niminbabe, ne monia ibsu natlania ibo sbal weng baabenomo genita ne futan olo ibo sin dola omfubeia ibo hengmin kukubo deibonabibta ne natlano genita futan olo dola omfubenamabibe.

#### *Mubiang wengobe.*

<sup>11</sup> Ne nekwai ibo klayam blibte! Ibo ne wengo kla wenteniba hengmin kukubo deiboniba ib bainobo galino sbal manine! Ib bobol temo makob ambianiba bobol tem fiab nine! Gode ibo kla gobe bianea bobol tem ayam omkayebea ete ibte nanine!

<sup>12</sup> Ibo ib sinwalo heitdaniba kwing omo sese nine! Bainobo galin nakaia unangai ele blibi ibo baabeniba Klayam blibte ge baabeibobe. <sup>13-14</sup> Sume Yesus Klaiste ibo daayemeko! Gode ibo kla gobe bia ibte e Hob ete nanine! Ne wengo bayotabe. Ne Fol neta ib futan olo dola omfubenamabibe.

## **Galesia Fole Galesia seli futano dola omfubesebe. Tekein kemın wengobe.**

Yesuse atdimu kaanea imin hananea ulanea abilim unebua bifolo 24 ese mak bli-manota Fole futan olo dolanea Sume bainobo galin nakaia unangai Galesia betan ye bliibi omfubenebiobe. Sino Fole monea Galesia betano bib sumo niniino Antiok bib osa Aikoniam bib osa Listla bib osa haabianea Gode wengo Yudaba nakaia unangai omkayebea wente bianiba i bobol temo deskinaniba Yesuse omaniba e meletan aibbiotabe. (Abosel 13:14) Yuda maki Fole makaa dofa bliibi i sinwalo miniba moniba Galesia teni baabeniba Ibo Moseshe hekmel wengo sbalma wafunine ge baaniba mengasiba Galesia teni i dim omin weng olo wentubeniba wafu blib kesoa Fole wente-ne futan olo dola omfubeneba baabeneba Nakaia unangai Yesuse bainobo gabib ita Gode kin dimo naka molot unang molotobo ge baabenebiobe.

1:1-10 Mikiktem wengobe.

1:11-2:21 Fole baanea Ne Yesuse okok namasanin nakabo genebiobe.

3:1-4:31 Gode nakaia unangai daayemin wengobe.

5:1-6:10 Yesuse bainobo galin nakaia unangai kukubo namino wengobe.

6:11-18 Mubiang wengobe.

<sup>1</sup> Ae bainobo galin nakaia unangai Galesia betano blib ibo ne Fol neta futan olo dola omfubenamabibe. Nakai ne mo nemfakanibta baatnenibta Kobo Gode wengo naka mak unang maki omkayemale ge baatneim blimobe. Eka Gode naka make mo baabaneta Kobo Fole dofakaneba baabaneba Kobo Gode okok kamasanin nakaneba Gode wengo naka mak unang maki omkayemale ge baabanale ge baabaim blimobe. Yesus Klaist esa eka nib Aye Gode Yesuse kaaneo imin dofaanea hananebio naka esa imaye nemfakaniba baatneniba Kobo ni okok kamasanin nakaneba ni wengo naka mak unang maki omkayemale ge baatneibbiobe. <sup>2</sup> Yesuse bainobo galin nakaia unangai ni sinwalo Yesuse bainobo gabib nakaia unanga ibo Galesia betano bib mak bib mako blib ibo alukum Klayam blibte ge baabenobobe.

<sup>3</sup> Nib Aye God esa eka Sume Yesus Klaist esa i dumo daaye bianiba bobol ayam omkayemine! <sup>4</sup> Klaiste funanea Nakaia unangai ne mo bainobo gabibbai kukub misiamo nabinabiho temo bliibo dotlanano gene kesoa e nib Aye Gode bobol temo funino wafu biance emaye atdimu kaanea

nib hengmino walubenebiobe. <sup>5</sup> Nibo Gode niniino amitie dobtouleub nomo! Bainobe.

*Gode dowan weng ayam olokiemobe.*

<sup>6</sup> Ibo weng afeto wenteniba Gode baabeneba Ibo nesu tline ge baabenebue deibanom genabiho ne weng olo wentenia dlou unibe. Klaiste ibo daabenebio kesoa Gode ibo baabeneba Ibo ne wengo bainobo geib mole ibo amit ayam nomabiho genebi otane ibo weng afeto Klaiste wengbao wenteniba Gode hebmamsab deibaniba funaniba Weng olo ayam kesoa ni daabenamabobo geniba weng olo wafunom genabiobe. <sup>7</sup> Ina otane weng afet olo misiam kesoa o ibo mo daabenomobabe. Klaiste dowan weng ayam olo ne baabeibu olo olota ibo daabenamabobe. Naka maki Klaiste weng ayam deiboniba weng afet ota omeh teniba ibo omkaye bianiba ib bobol temo funino misiam omkayebiba ibo fumbianiba Olota ayam ese, olota misiam ese gabianiba bobol hekhek fumbiobe.

<sup>8</sup> Ibo i weng olo mo wentaibe! Nimaye weng olo omyob biamo eka abisak mak eta abilim ut danea tenea omyame osa sino ni Klaiste dowan wengo omyobbio ulabba afet ano mole ne Gode baabaniba Kobo weng olo omye nakae dabaneba monea aseinin bib uneko ge baabanamabibe. <sup>9</sup> Sino ne weng olo ibo baabeibu otane memalo ne imin baabenamabibe. Naka maki Klaiste dowan weng olo sino ni ibo omyoba wentibbuo deiboniba weng afet ota omkayebib naka eli ne Gode baabaniba Kobo dlaneba moniba aseinin bib unine ge baabanamabibe.

<sup>10</sup> Ne mo funanita Naka maki ne seinemine ge baanita weng olo baabenamabibe. Ne funania Gode ne kukubo watenea seinemeko genita weng olo baabenamabibe. Ne funania Ne okok olo okok kebiba naka mak unang maki seinemine ge funai mole ne Klaiste okok nakababe. Ne funania Klaiste ne seinemeko ge funanita e okok olo okok kebibe.

*Gode Fole dofakanea e Klaiste okok dabasanin nakanebiobe.*

<sup>11</sup> Ne nekwal ibo ne weng mako baabenamabibe. Sino ne Klaiste dowan weng ayam olo ibo omyibuo nakai bobol temo funinbabe. <sup>12</sup> Naka maki weng olo ne mo omnenibta aletneim blimobe. Yesus Klaiste emaye weng olo omneta ibo baabeibiobe. <sup>13</sup> Sino ne Yudai kukubo wafu blio i baaniba Fole kukub misiamo nabebo gabiba ibo wentibbiobe. Ne Klaiste bainobo galin nakaia unangai mo dohalinin blim biania fumbiania Ne Yesuse bainobo galin nakaia unangai watwat dayemano ge fumbiania enin kino omkaye

binibiobe. <sup>14</sup> Ne Yudai kukubo wafu binibuo kla tekein kenia ne tekein kemino olo ne ulabwali tekein kemino gaiseibiobo ge fumbinibiobe. Ne Yuda ni faninwali kukubo wafu binibuo kukub olo kla wafu binibiobe.

<sup>15</sup> Otane sino ne biemo mo nemfaim blim bua Gode funanea E ne okok dabasanin nakaneko ge funanea ne nemfakanebua sinanoa ne biemo nemfanoa damai kesoa e baatnenea Kobo ne okok olo okok kemale genea daatnenea <sup>16</sup> e funanea Ne miine e alebaia e ne miine tekein kenea e Gode miinobo genea Klaiste dowan weng ayamo nakaia unangai Yudabai omkayemeko genea dobkeimanea atembio dimo ne naka maki mo baabenita Ne fatnanita Klaiste okoko okok kemabine? ge baabeim blimobe. <sup>17</sup> Ne Yelusalem bibo mo monita nakai Gode sino dlakanea baabenea Ibo ne okok dlasanin nakabo ge baabenebuei mo baabenita Ne fatnanita Klaiste okoko okok kemabine? ge baabeim blimobe. Ne nemaye monia Alebia betano ibuantem ye biania Gode nganhobia e inamin namino aletneneta omito imin monita Damaskas bib unibiobe.

<sup>18</sup> Ne ina bia bifolo asumatnao blimanao omito monia Yelusalem bib ye tenia Fitae tenanoba wengo baanoba ye bekeba biania Sande asu kenia eka amo olokiem kenai buo <sup>19</sup> ne Gode okok dlasanin nakai alukumo mo yatemim blimobe. Nib Sume ninge Yems esa Fita esa i dabta yatemibiobe. <sup>20</sup> Ne weng olo ibo baabenamabio dimbabe. Gode tekein kebebe, weng olo bainobe.

<sup>21</sup> Ne inania biania Sande asu kenia omito Yelusalem bibo deibonia monia Silia betan osa Silisia betan osa ye unibiobe. <sup>22</sup> Ne ina binibuo dimo Klaiste bainobo galin nakaia unangai Yudia betano blibi ne mo natem tekein keim blimobe. <sup>23</sup> Otane naka maki ne okoko nabio wateniba i nakaia unanga eli baabeniba Naka ele sino ni enino omkaye biane Klaiste weng watwat dabanano gabinebu otane memalo e Klaiste weng ayamo naka mak unang maki omkayebebo ge baabeiba i wentibiobe. <sup>24</sup> I Gode ne inatneno weng wenteniba baaniba Gode Fole daabane kesoa Gode ayamobo ge oha bianiba e niniino dobtouleub binibiobe.

## 2

*Fol esa Gode okok dlasanin nakai mak isa i weng sangobe.*

<sup>1</sup> Sinanoa bifolo 14 o blimanole nete Banabas ete nanoba imin monoba Yelusalem bib unobiobe. Taitas esa ni baka unebiobe. <sup>2</sup> Gode baatnenea Kobo Yelusalem bib one ge baatnene kesota

ne Yelusalem bib unibiobe. Ne Klaiste weng ayamo nakaia unangai Yudabai omkayebi dimo ne inamin namin wengo omkayebio wengo bainobo galin nakaia unangai Yelusalem bib ye blibi kima blib naka isa weng olo baabeia wentibiobe. Ne weng olo nakaia unangai alukumo mo baabeim blimobe. Gode wengo kimanin nakai ilita baabeia wentibiobe. Ne funania I baaniba Fole wengo nakaia unangai omkayebeo ayamobo ge baaine ge funanita weng olo baabeibiobe. Ne funania Gode wengo kimanin naka eli funaniba Fole wengo nakaia unangai omkayebeo misiamobo geib mole ne okoko sin osa mitmakam blim kesoa sinanoa nami osa mitmakam blim besabe genano ge funaibiobe.

<sup>34</sup> Ni Yelusalem bibo bioba naka maki ni bekebe bianiba ni dim baabeniba Nisa Yesus Klaiste wengo wente bianoba wafu biobobo ge baabeibbu otane i dim baabeibiobe. I Klaiste wengo mo wafu nim blimobe. Sino ni Yudai kukubo wafu bioba ni bobolo ilum omkayebo otane ni Yesus Klaiste bainobo genoba bobol ilum olo deibonoba Klaiste kukubo wafu biob kesoa dim omin naka eli funaniba Ni i kukubo nabio watem tekein kenoba watanomo geniba ni baabeniba Ibo Yuda nib kukubo mo deibonimibe! Imin wafueine ge baabeibbiobe. Taitase Yudababe. E Glik nakabe. E beketne tlebuo dim omin naka eli baabaniba Kobo Yudai kukubo nabinabib inaneba keb aalo watlanale ge baabaib otane Gode wengo kimanin nakai ne wengo Yudabai sino omkayebio wenteniba baaniba Weng olo ayamobo gabib kesoa i mo Ae geim blim keiba e aalo mo watlaim blimobe. <sup>5</sup> Ni dim omin naka eli bobol tem funino mo wafunim blimobe. Ni i wengo baabeniba Ibo inaine gabibo ni i wengo alukum yeye genoba ombiabeniobiobe. Niminbabe, ni funanoba Ibo Klaiste dowan weng ayamo olota kla wafueine ge fumbob kesoa ibo ni wengo mo omonibta Yudai kukubo wafueine gabib wengo mo omonata kwekonibta wafu nimibe!

<sup>6</sup> Bainobo galin naka mak unang maki baaniba Gode wengo kimanin nakai niniin sumobo geib otane ne funania I niniin blimobe. Gode funanea Ne kin dimo i makobobo ge fumbobo ge funaibiobe. Ne weng alukum molot kesoa Gode wengo kimanin naka eli weng afeto mo omnenibta baatnenibta Kobo weng olosa nakaia unangai omkayemale ge baatneim blimobe. <sup>7</sup> Otane i tekein kebiobe, Gode Fitae dofakanea baabanea Kobo moneba Yuda nakaia unangai ne wengo omkayemale ge baabanebua eka memalosa e ne nemfakanea baatnenea

Kobo moneba nakaia unangai Yudabai ne wengo omkayemale ge baatnenea Ne monia Yudaba nakaia unangai e wengo omkayebibe. <sup>8</sup> Gode Fitae dofakanea baabanea Kobo ne okok kamasanin naka kemfai kesoa kobo moneba Yuda nakaia unangai ne wengo omkayemale ge baabanea e titilo omalea Fitae monea Yuda nakaia unanga isu unea eka Gode nesak nemfakanea baatnenea Kebsa ne okok kamasanin naka kemfaiobo, kobo moneba nakaia unangai Yudabai ne wengo omkayemale ge baatnenea e titilo omnebio kesoa ne inania monia omkayebibe. <sup>9</sup> Sino bainobo galin nakaia unangai kimanin nakai niniino Yems esa Fita esa Yon esa i tekein keniba Gode Fole dofakanea daabanebua e Klaiste down weng ayamo nakaia unangai Yudabai omkayebe kesoa Fol esa Banabas esa nisa Gode okok olo okok kebuobo geniba i ni heitdabeib ole ni sinwalo weng obianoba ni baanoba Ni monoba nakaia unangai Yudabai Gode weng ayamo omkayemomabbibo ge baabenoba eka Fitawal isak baaniba Nile monoba Yuda nakaia unangai Gode weng ayamo omkayemomabbibo genaibbiobe. <sup>10</sup> Ni inanoba i weng mako ni baabeniba Ibo bainobo galin nakaia unangai inamin namin blimi Yelusalem bibo blibi bobolo fumbianiba daayemine ge baabeibbio ne weng olo amitie fumbiania wafu biania ne okoko sbalma okok kebiania daaye binabibe.

*Fole Fitae kukub misiamo mako nanebuo omkeimabanebiobe.*

<sup>11</sup> Omito ne monia Antiok bib ye blia Fitae tenea kukub misiamo nane kesoa ne baabania Keb kukub olo misiamobo ge baabaia bainobo galin naka mak unang maki ne weng olo wentibbiobe. <sup>12</sup> Fitae kukub misiam olo nanebuo inaminobe. E tenea Antiok bib ele tlanea bainobo galin nakaia unangai Yudabai bekebe biane i imeno baka wembeo kukub olo ayam otane omito Yudai bainobo galin naka maki Yelusalem bibo blibi Yemse dlanea teniba Antiok bib ye tetemiba Fitae funanea Naka eli aalo waketoumin kukub sbalma wafu blib kesoa i ne naka maki aalo mo wetlaim blimi imeno baka wembio natemaibo nemsuananomabiobo genea e tosianeanea Yudaba isuo deibenebiobe. <sup>13</sup> Yuda nakai maki bainobo galini Fitae tena blibi Fitae nakaia unangai Yudabai deibenea kukub olo ateniba i funaniba E kukub olo misiam nanebo ge funaib otane imal osa tosiananiba nakaia unangai Yudabai isuo deibeiba Banabas esa inanea tosianeanea nakaia unangai Yudaba isuo deibenane <sup>14</sup> kesoa ne yatemia i Klaiste weng ayamo

klao mo wafu nim blim bianibta naibobo ge funaibiobe. Ne inania Fita eta kukub olo nane kesoa baabania Kobo Yuda naka otane kobo Yudai kukubo deiboneba Yudabai bakaneba imeno wembinabeobe. Kobo inabebo kukub olo ayam otane naka eli Yelusalem bib da tlib dimo kobo Yudabai isuo deibeneb kesoa i funaniba Nib kukub olo misiam ese makobo, deibonoba nibsa Yudai kukub ota wafunomo geibbio kesoa keb kukub olo misiamobo ge baabaia bainobo galin nakaia unangai alukum ne weng olo wentibbiobe.

*Nakaia unangai Yuda isa Yudaba isa Yesuse bainobo geine!*

<sup>15</sup> Ni biem ay kamwali Yuda kesoa nisa Yudabe. Ni Yudabai ulabbabe. Yuda ni baanoba Nakaia unangai Yudabai Gode wengo mo wafu blibba kesoa i hengmin gamobo ge oye binabuobe. <sup>16</sup> Ina otane Yuda ni tekein kebuobe, nakaia unangai Mosese hekmel wengo wafu blibi Gode mo baabeneta Ne kin dimo ibo hengmino blimobo genamabebabe. Otane nakaia unangai Yesus Klaiste bainobo geib mole Gode baabenea Ibo ne kin dimo hengmino blimobo genamabebe. Inamin kesoa Yuda nisa inanoba Yesus Klaiste bainobo genomobo Gode baabenea Ibo ne kin dimo hengmino blimobo genamabebe. Otane ni Mosese hekmel wengo wafu nomobo Gode baabenea Ibo ne kin dimo hengmin gamobo ge baabenamabebe. Naka make Mosese hekmel wengo wafu biameo Gode baabanea Kobo ne kin dimo hengmino blimobo ge baabanamino blimobe. <sup>17</sup> Sino ni funanoba Ni Yesus Klaiste bainobo genomo! Ni inanomobo Gode baabenea I ne kin dimo hengmino blimobo ge baabenamabebo genoba Mosese hekmel wengo deibonoba Yuda naka maki bainobo gabibbai ni yateniba baaniba I Mosese hekmel wengo wafunino deibueib kesoa i makob Yudabai ulab aniba hengmin gam aibobo ge baabenimibo ni Yudai kukubo deibonoba Klaiste kukubo alebenebu ota wafu nomo genoba wafu binobbuo Klaiste ni hengmin kukubo alebenebua bleka? Yeye e ni hengmin kukubo mo alebeim blimobe. <sup>18</sup> Ne ibo baabenania Mosese hekmel wengo wafu nine ge baabei mole kukub olo misiamobe. Sino ne ibo baabenania Niho Mosese hekmel wengo wafu biobo Gode nibo mo baabeneta Ibo ne kin dimo naka molot unang molotobo ge baabenamabebo ge baabeia ibo wentibbio kesoa memalo ne Klaiste weng olo deibonia weng afet ota baabei mole kukub olo hengminobe. <sup>19-20</sup> Ne sino Mosese hekmel wengo wafu blia weng olo aletnenoa Kobo hengmin gamobo geno kesoa Gode ne hengmin

olo molo yang kenea ne kaanimio God esuo mo unamabibabo gei otane Klaiste ne alango dokonea Gode ne deitnenea Klaist eta atdimmo kaanea ne kukub misiamo walebuo kukub olo makob nemaye atdimmo kaanibio kesoa ne Mosese hekmel wengo imino mo wafu blibabe. Ne Gode weng olota wafu blibe. Ne ina blio memalo ne nene bobol tem funino mo wafu blibabe. Otane Klaiste ne bobol tem wato bitne bie kesoa memalo ne afen ania ele bobol tem funin ota wafu blibe. Gode miine ne gotnenea kaanea daatnenea ne bainobo gei kesoa ne olo amitie fumbiania wafu blibe. <sup>21</sup> Ne Gode daayemin kukubo mo ombianimibabe. Nakaia unangai Mosese hekmel wengo wafu blibi Gode baabenea Ibo ne kin dimo naka molot unang molotobo ge baabene biamo Klaiste atdimmo kaanebue mitmakam blimobe. Otane Gode weng olo mo baabeim blim kesoa Klaiste atdimmo kaanebue mitmakamsabe.

### 3

*Gode kin dimo naka molot unang molot anamino wengobe.*

<sup>1</sup> Galesia nakaia unanga ibo ib bobol tem funino misiamobe. Ibo naka maki i weng afeto ibo omkayebib ota wafuniba Klaiste weng ayamo deibueibobe. Ibo nimin kenibta i weng olo wentebibe? Sino ne wengo ibo keim baabenia Yesus Klaiste atdimmo kaanebiobo ge baabeibiobe. <sup>2</sup> Ne weng mak osa imin baabenamabibe. Ibo Mosese hekmel wengo wafu blib ota Gode yateneta e Hobe dobyebua bleka? Yeye. Ibo Klaiste weng ayamo wenteniba bainobo geniba wafu blib ota Gode yateneta e Hobe dobyebiobe. <sup>3</sup> Ibo nimin kenibta bobol tem funin ayamo deibonibta misiam ota wafu blibe? Sino Gode Hobe ibo daabene Klaiste weng ayamo wafu blib otane memalo ibo nimin kenibta funanibta Ni nini titil ota Mosese hekmel wengo wafu bianoba aalo waketoumobo Gode ni baabene Ibo ne kin dimo naka molot unang molotobo ge baabenamabebo ge fumbibe? <sup>4</sup> Sino inamin namin kukub ayamo Gode omyebio yo mitmakam blima bleka? Yeye inamin namin kukub olo mitmakamsabe. <sup>5</sup> Gode fatnaneta e Hobe dobyebione? Gode fatnaneta daabene biota ibo okok sumo nakaia unangai sino mo watemim blimo klabibe? Ibo Mosese hekmel wengo wafu blib ota e yateneta dobyebua bleka? Yeye. Ibo Klaiste weng ayamo bainobo gabib ota dobyebiobe.

<sup>6</sup> Yuda ni fanine Eblahame weng sang osa makobobe. Ibo Eblahame weng sango funaine! Gode buk temo baanoa Eblahame Gode wengo kla wente bianea bainobo gabe kesoa Gode e bainobo

galino watenea baabanea Kobo ne kin dimo naka molotobo ge baabanebiobo genobiobe.

<sup>7</sup> Ibo ne weng mako baabenamabio funaine! Weng olo inaminobe. Nakaia unangai Gode wengo bainobo genib mole i makob Eblahame molobsel anomabiobe. <sup>8</sup> Sinanggwano nakai Gode weng olo dolaniba baaniba Sinanomo nakaia unangai Yudabai Gode wengo bainobo genimibo Gode baabenea Ibo ne kin dimo hengmino blimobo ge baabenamabebo ge baaibbiobe. Eka sino Gode inamin namin olo mo naim blim bie dimo e down weng ayamo sinanoa nanamabeo wengo omkeimanea Eblahame baabanea Ne kobo kukub ayamo omkakebi kesoa sinanomo nakaia unangai dabalimo blibi alukum kukub ayamo omkayemabibo ge baabanebua i Gode buk temo dolaibbiobe. <sup>9</sup> Inamin kesoa nakaia unangai Gode wengo bainobo gabib ile makob sino e Eblahame nabanebio inanea isa kukub ayamo omkayebebe.

<sup>10</sup> Ina otane nakaia unangai funaniba Ni Mosese hekmel wengo wafu biob kesoa Gode kin dimo nibo naka molot unang molotobo gabib ile Gode dosuananea watwat dabenamabebe. Niminbabe, e buk tem wengo baanoa Nakaia unangai Mosese hekmel wengo wafu nom gib mole alukum wafu nine! Atosino mo deibonibta atosin ota wafu nimibe! I ina nimibo Gode watwat dabenamabebo genobiobe. <sup>11</sup> Nibo alukum tekein kebuobe, naka make Mosese hekmel wengo wafu biameo Gode mo baabaneta Kobo ne kin dimo naka molotobo ge baabanamabebabe. Niminbabe, Gode buk temo baanoa

Nakaia unangai wanita Gode wengo bainobo geiba Gode baabenea Ibo ne kin dimo naka molot unang molotobo ge baabenemei amit nomabiobo genobiobe.

<sup>12</sup> Nakaia unangai Mosese hekmel wengo wafu blib mole i kukub olo Gode bainobo galin kukubo ulabbabe. Mosese hekmel wengo wafunin kukubo afetobe. Gode buk temo enangge baanoa

Nakaia unangai Mosese hekmel wengo atosino mo deibueim blim alukum wafunimibi amit nomabiobo genobi

otane inamin nakai blimobe.

<sup>13</sup> Naka make hekmel wengo mako welanea temiba hekmel wengo baanoa Anaiba kaaneko genobio mole anaiba kaanea debib utniba atdim eut dabasaniba silo bikibaiba nakaia unangai ateniba tekein keniba Gode naka ele dobsuananeta



ananebo geine! Gode buk tem wengo eaange baanoa

Nakae debeh utniba atdim eut dabasaniba silo bikiba nimibo Gode naka ele dobsuananeta e kaanamabebo genobiobe.

Nibsas inanoba hekmel wengo waka binabob kesoa Gode nibo dosuananea kaaine gabe otane Klaiste eta nib alango dokonea Gode atlihamino tenoa e dim wat tloa atdimoo kaanea nib hengmino walubenebiobe. <sup>14</sup> Klaiste inanebio kesoa sinanggwanoo Gode Eblahame baabanea Ne inamin namin ayamo omklamabibo ge baabanebuo nakaia unangai Yudabai Yesus Klaiste bainobo genimib isa dlomabiobe. Klaiste inanea kaanebio kesoa nibo e wengo bainobo genomoboo sino Gode baanea Nakaia unangai Klaiste wengo bainobo genimibi ne Hobe dobyamabiboo genebue dobyamabebe.

*Mosese hekmel wengo Gode moton wengo mo omabbu nomobabe.*

<sup>15</sup> Ne nekwal ibo ne saa weng mako dabalim nakai dim tounia baabenamabibe. Ne weng olo ibo daabenamaboo kesoa ibo funaine! Nakai asu keniba baaniba Nibo weng olo wafu bianoba inamomoo ge baaniba weng olo dolaniba eka i niniin oosa dolaib biamo naka afete tenea weng olo watlanea weng afet dolanamino blimobe. <sup>16</sup> Saa weng olo makob sinanggwanoo Gode Eblahame esa eka e molofeit esa i moton wengo baabeneaa Ne inamin namin ayamo omyamabiboo genebiobe. Eblahame molobseli homon otane Gode buk temoo Eblahame molobseli alukumoo mo baabeim blimobe. E Eblahame molofeite Klaiste elekitem eleta baabanebiobe. <sup>17</sup> Ne saa weng olo mitmakamoo inaminobe. Sinanggwanoo Gode moton wengo Eblahame omanea baabanea Ne weng olo kobo baabkei biamo bain inanamabiboo ge baabanebuo sinanoa bifolo 430 o blimanoa Mosese dofaiba damanea Gode hekmel wengo omalebiobe. Inanebuo otane Mosese hekmel weng olo mo inanota makob naka make wengo dolanebuo naka make tenea e wengo welubanea weng afet dolanamabe inanota sino Gode moton wengo Eblahame baabanebuo mo otlanomobabe. <sup>18</sup> Niminbabe, nakaia unangai Mosese hekmel wengoo wafu bliba Gode moton wengo baanea Ne inamin namino doyamabiboo genebuo dokayeme mole e moton weng olo mitmakam blimanamabobe. Otane Gode mo inaim blim kesoa e moton wengo mitmakamsabe.

<sup>19</sup> Inamin kesoa Gode fatnaneta e hekmel wengo Mosese omalebue? Gode Mosese

hekmel wengo omalebu ole inaminobe. Nibo kukub misiamoo nanomoboo Olo hengminoboo ge baanoa alebenokoo geneta omalebiobe. Mosese hekmel weng olo sma ye binaboboo bita Gode Eblahame baabanea Ne keb molofeite doklamabiboo ge baabanebuo Klaiste tleta o okokoo blimanobiobe. Mosese isak naka kesoa Gode hekmel weng olo abiseli omyeta isak Mosese omalibta eka Moses esak nakaia unangai omyebiobe. <sup>20</sup> Otane Gode moton wengo Eblahame baabanebuo naka make mo bieta baabaneta e weng olo omoneta Eblahame baabaim blimobe. Gode emaye Eblahame moton weng olo baabanea Ne inamin namino doklamabiboo ge baabanebiobe. Inang genebio kesoa moton weng olo Gode Eblahame omalebuo weng olo e Mosese omalebuo gaisonobiobe.

*Mosese hekmel wengo okoko wengobe.*

<sup>21</sup> Mosese hekmel weng olo Gode moton wengo Eblahame baabanebuo omtlanobua bleka? Yeye Mosese hekmel weng olo eka Gode moton wengo Eblahame baabanebuo olo o okoko afet afet kesoa o mo omtlaim blimobe. Nakaia unangai hekmel wengoo wafu blibi Gode baabeneaa Ibo ne kin dimoo naka molot unang molotoboo gene mole nakaia unangai hekmel weng olo wafu blibi amit nomabib otane hekmel weng olo mo inangge baaim blim kesoa o okokbabe. <sup>22</sup> Ina otane Gode buk tem wengoo baanoa Nakaia unangai alukum hengmino ge dlanobioboo genobiobe. Sino Gode baanea Nakaia unangai Yesus Klaiste bainoboo gabibi ne kin dimoo naka molot unang molotoboo ge baabenamabiboo genebio kesoa hengmin naka unang nibo Yesus Klaiste bainoboo genob mole e nibo bain inangge baabenamabebe.

<sup>23</sup> Sino Yesus Klaiste bainoboo galin wengoo mo tlim blim bio dimoo nibo Mosese hekmel wengoo wafu bioba o nibo makob klabut gebein keno biob bita Klaiste teneta bainoboo galin kukuboo nibo alebenebiobe. <sup>24</sup> Inamin kesoa sino Mosese hekmel wengoo makob nib ay sitaminwali ulab anoa kima bianoo nib hengmino aleyeboo bita Yesus Klaiste tenea daabenebio kesoa nibo Yesuse bainoboo genomoboo Gode baabeneaa Ibo ne kin dimoo naka molot unang molotoboo ge baabenamabebe. <sup>25</sup> Memalo nibo Yesus Klaiste bainoboo gebiob kesoa Mosese hekmel wengoo imino mo kimanomobabe. <sup>26</sup> Ibo Yesus Klaiste bainoboo gabib kesoa Gode baabeneaa Ibo ne melelolo ge oyebebe. <sup>27</sup> Niminbabe, ibo Yesus Klaiste bainoboo geniba naka maki e niniino dimoo ibo aaye fuelabeiba ibte Klaiste ete naniba ib bobol tem oosa Klaiste bobol tem oosa makob aniba ibo makob Klaiste ulab aibbio

kesoa Gode fumbianea I makob Klaiste ulabobo ge fumbebe. <sup>28</sup> Yesus Klaiste bainobo gabob nakaia unanga nibo makobobe. Nibo baanoba Ibo Yudabo gese Yudababo gese nin kukub osa eka maki okok nakabo gese maki kimanin nakabo gese nin kukub osa eka maki unangobo gese maki nakabo gese nin kukub osa blimobe. Memalo nibo alukum Yesus Klaiste bainobo gabob kesoa nibo makobobe. <sup>29</sup> Ibo Klaiste emi aib mole ibo Eblahame molobsel moton anomabiobe. Gode Eblahame baabanea Ne inamin namin ayam olo omklamabibo genebuo ibsa omyamabebe.

#### 4

##### *Gode meme itabe.*

<sup>1</sup> Ne wengo sin baabeio mitmakamo makob inaminobe. Naka ten make e aye inamin namino sinanomo eta dlamabe otane e mema damambe biamo afobeing olo mo dlamabebabe. E makob okok nakai ulab kesoa besa biebe. <sup>2</sup> Men ele e aye nakai dlakanea baabenea Ibo ne miin esa eka ne afobeingo sinanoa e dlamabi olosa kimatneine ge baabenea men ele e kimanin naka eli wengo wente bianea binea damanea e afobeing olo kimanamabe amo aalebe kibanebuo tlamo naka eli deibaiba emaye kimanamabebe. <sup>3</sup> Sino nibo makob naka ten ele ulab bioba dabalimo kukub ota nibo kimabua kukub olo wafu bianoba bobol tem funin ayam mo funin blim binobbio. <sup>4</sup> Ina otane Gode am olo omakanebuo tloa e miine dabanea daakenea dabalim unango amun tem unea o dofanoa e nakanea hekmel wengo wafu binebiobe. <sup>5</sup> E inanea atdimo kaanea hekmel wengo wafu biob naka unang nib hengmino walubenebio kesoa nibo Gode meme moton anoba Gode inamin namino doyamabibo genebuo dlomabbio.

<sup>6</sup> Memalo ibo e meme kesoa Hobe e miine bobol temo bie ele dabanea tenea nib bobol tem osa bianea daayebea nibo Gode oha bianoba Ay kobo ni ayobo ge ohabuobe. <sup>7</sup> Inamin kesoa memalo ibo okok nakai ulabbabe. Ibo Gode meme aib kesoa e inamin namino e memei doyamabibo genebuo ibsa doyamabebe.

##### *Fole Galesia seli bobolo fun monsebe.*

<sup>8</sup> Yudaba ibo sino Gode mo tekein keim blim bianiba bekel ita ni kima bliobo gabianiba makob i okok naka binibiobe. Bekeli i god dim ominobe. Otane memalo ibo Gode tekein kebiobe. <sup>9</sup> Ne ibo baabenia Ibo Gode tekein kebiobo ge baabei otane ne misiam baabeiobe. Ina otane ne baabenamabio God eta ibo tekein kenea dlakanea ibo nemiobo ge baabenebio weng olota dot ayamobe. Ibo

emi otane nimin kenibta deibanibta Nibo monoba Mosese hekmel weng ota wafunomo gabibe? Ibo inaib mole kukub olo makob ibo imin moniba dabalim olo kukub ota wafunomabiobe. Dabalim kukub ota ibo kimano mole olo misiamobe. Kukub olo titil blim kesoa ibo mo daabenamabobabe. <sup>10</sup> Ibo Yuda ni faninwali hekmel kukubo nabibo yateniba ibsa wafu bianiba makob sinangwano Gode Mosese baabanea Am mak bomanomo dim osa eka alim mak tam tlame dim esa eka bifol mak afunemebe dim esa ibo okok olo nabianiba singkaline ge baabanebua i ina kinibbuo ibsa kukub olo ina bianiba funaniba Nisa kukub olo wafunoba Gode baabenea Ibo ne kin dimo naka molot unang molotobo ge baabeneko ge fumbiobe. <sup>11</sup> Ne ibo kukub misiam olo nabibo weng sango wentenia funania Ne wengo omkayebio misimut nenamabobo genia bobolo ilum omfutnebiobe.

<sup>12</sup> Ne Mosese hekmel wengo deibueibio kesoa ne nekwat ibsa inaniba Mosese hekmel weng olo deibueine! Sino ibo hekmel weng olo mo wafeim blim kesoa nesa memalo ib ulab aiobe. Sino ne Klaiste weng ayam ibo omyia ibo Klaiste wengo mikiktemo wentib dimo ibo ne wengo mo ombiaim blim kla wentibbio kesoa memalosa mo ombia nimibe! Kla wafueine! <sup>13</sup> Ibo tekein kebiobe, sino ne ib bibo natlio ne gembi kesoa ne ib bib weng ota biana Gode dowan weng ayam omkaye binibiobe. <sup>14</sup> Ne gembio ibo fumbianiba e gembe olo misiamobo ge funaib otane ibo ne tolo mo tosonianibta deitneim blimobe. Ibo makob Gode abisel isa Yesus Klaist esa ibsu tliba kukub ayam omyomabib inaniba nesa kukub ayam omnibbiobe. <sup>15</sup> Ibo inaniba daanebib dimo ne wengo wente bianiba seimbinibbio otane nimin kenibta ib seinino memalo deibueibe? Sino ne ibo bekebe bli dimo ibo ne kla gotne bianiba daane bianiba funaniba Ni Fole daabanoba ni kino welelonoba e kino olabbenanomo ge fumbinibbiobe. <sup>16</sup> Sino ibo ne kla gotne binibbu otane memalo ne weng olo baabeibu ibo ne nemsuambiba bleka?

<sup>17</sup> Naka maki sino ibo baabeniba Mosese hekmel wengo wafueine ge baabeibbuei funaniba Galesia teni ni weng ota wafueine ge fumbib kesoa i ib ninino omfufuye bianiba weng ayam omkayebib otane i bobol tem funin olo misiamobe. Niminbabe, i funaniba Ibo Folwali deibeniba nita gobeniba ni weng ota wafueine genibta inangge baabeibbiobe. <sup>18</sup> Nakaia unangai bobol ayam bianiba naka maki bobolo fumbianiba gobenib mole kukub olo ayamobe. Ne ibo bekebe biami skeim biami osa ibo Nakai daayebibo ayamobo

gabibe. Ina otane naka eli ib niniuno omfufuyebibi ibo mo daayemin blimobe. <sup>19</sup> Ne nekwal ibo ne kla gobe blibe. Ne ib bobolo funania ne bobol tem daako makob unango memei dlanang genoa enin kino watemnabo inania ne bobol tem daako misiamut nebiobe. Sino ibo Yesus Klaiste wengo mo wafueim blim blib dimo ne bobol tem daako misiamut nebinobio kesoa memalo ne imin wentia ibo Yesus Klaiste wengo klao mo wafueim blim bliobo gesiba wentenia ne bobol temo imin misiamut nenoa funania I bobol tem funino makob Yesuse bobol tem funino ulab animibo ne bobol tem misiamo deibonia seinamabibo ge fumbibe. <sup>20</sup> Ne funania Ne Galesia teni bekebe nimio ayamobo ge fumbibe. Ne ibo bekebe bli mole ib bobol tem funino tekein kenia ne inamin weng ota onyita daabenomobe ge funanamabi otane ne skeim bli kesoa ne ibo daabenamin wengo mo tekein kebibabe.

*Hegao Selao i dabi weng sangobe.*

<sup>21</sup> Nakaia unangai ib isak temo blibi fumbianiba Ni Mosese hekmel wengo wafunomo gabib nakai Mosese hekmel wengo mitmakamo klao mo tekein kebibba kesoa ne ibo Mosese hekmel wengo baabenamabibe. <sup>22</sup> Nakae Gode buk temo dolanebu ele baanea Eblahame meme naka teni asu dlanebiobe. Mak ele Selao okok kewemin unango niniuno Hegao miinobo, eka mak ele Eblahame ael motono Selao miin nabo genebiobe. <sup>23</sup> Selao okok kewemin unango o miin ele Eblahame emaye omeh bineta dofanobiobe. Eka Eblahame ael moton ole Gode moton wengo baabonebuo weng olo fumbianea daabone kesoa o memei yomin amo blimubonobu otane o imake omeh bineo amunsanota mene dofanobiobe. <sup>24</sup> Weng sang olo temo saa wengsabe. Unang asu eli inaminobe. I makob weng asu olo Gode Yudai omeyebu otabe. Hega ole makob Gode wengo amgolime Sainai ye golim ute Mosese hekmel wengo omalebu otabe. Nakaia unangai Mosese hekmel wengo wafu blib ile hekmel weng olota i kimabiobe. <sup>25</sup> Amgolime niniuno Sainaie Alebia betan ye bie niniin afeto Hega etabe. Hega ole makob Yelusalem bib osa eka nakaia unangai memalo Yelusalem bib ye blib isa itabe. Yelusalem bibo Yudai betanobe. Hega miin ele okok nakabe makob e biemo ulabobe. E okoko okok kebinebu otane e kimanin nakae inamin namino mo dokahamin blimobe. E besa okok kebinebio kesoa Yelusalem bib seli Mosese hekmel wengo wafu blib isa makob e ulabobe. I funaniba Ni Mosese hekmel wengo wafu biobo, Gode baabonea Ibo ne

kin dimo naka molot unang molotobo ge baabenamabebo ge fumbib otane Gode i mo inangge baabeim blimobe.

<sup>26</sup> Ina otane Sela ole makob Gode moton wengo Eblahame baabanebu otabe. O makob Yelusalem bibo abilim ut bu otabe. Bibo yo seli Mosese hekmel wengo mo wafu blibbabe. I weng olo deibueibbiobe. O makob Gode wengo bainobo galin nakaia unanga nib biem kesoa nibo o memebe. Niminbabe, nibsa Mosese hekmel wengo mo wafu biobbabe. <sup>27</sup> Gode bibo Yelusalem bibo sinanoa tlang gamo dabalim olo bibo Yelusalemo gaisanamabobe. Nibo tekein kebuobe, weng olo bainobe. Niminbabe, Gode buk temo saa wengo enangge baanoa Unang obo fioum bianeba memei mo dlamim blim bieb obo seinale! Obo memei mo dlanebta enin kino watemim blim bieb kesoa obo seimbianeba anso nganale! Obo imake mo dibim blim otane ob memei homoni waloniba imaksao memei gaisonomabiobo genobiobe.

<sup>28</sup> Gode moton wengo Eblahame baabanebuo Kobo mene dofanamabebo ge baabanebuo bain inanea e alelo Selao Aisake dofanobiobe. Ibsa inaniba Gode moton wengo baanea Yudabai ne meme anomabiobo genebio kesoa memalo ne nekwal ibo bain inaniba Gode meme aibiobe. <sup>29</sup> Sinanggwano Hegao Eblahame omeh bineo o miine dofanobue tenea Eblahame alelo damo fioum bua Gode Hobe daabonea o miine dofanobue wasi dofa bianea weng dobo weng oha binebio kesoa memalosa nakaia unangai Mosese hekmel wengo wafu blibi inaniba Klaiste wengo bainobo gabob nibo weng dobo weng oye bianiba makob sinanggwano meme eli naniba sbilo miine tenea damo miine weng dobo weng oha binebio inayebiobe. <sup>30</sup> Ina otane Gode buk tem wengo fatnangge baanobione? O baanoa

Selao okok kewemin unango o miine i hato dlaneba moniba bib mak unine! O miine aalebe afobeingo atosino mo dlamene! Damo miine Gode daabonea dofanobu eta aalebe afobeingo alukum oleko ge baanobiobe.

<sup>31</sup> Ne nekwal ibo nibo Selao okok kewemin unango miine ulabba kesoa nibo Yudai hekmel wengo mo wafu biobbabe. Nibo makob damo miine ulabobe. Nibo Gode wengo bainobo genoba wafu biobobe.

**5**

*Klaiste nibo daabenebio kesoa nibo e*

*weng ota wafunomo!*

<sup>1</sup> Klaiste nibo daabenebio kesoa nibo Mosese hekmel wengo mo wafu biobbabe. Memalo nibo Klaiste weng ayamo wafu biob ota sbalma wafunomo! Naka maki ibo baabeniba Mosese hekmel weng ota wafueine ge baabenimibo ibo i wengo mo wentubenimibe! Niminbabe, ibo i wengo wentubeniba inaib mole ibo makob nakai sino klabutam biniba klabuto blimubenomo otane imin klabut anabib inanomabbio.

<sup>2</sup> Ne Fol neta weng olo baabenamabibe. Ibo kla wentine! Naka mak ibo naka maki ib aalo wetlabenom gaibo Ibo funaniba Ni aalo wetlanomobo Gode baabene Ibo ne kin dimo naka molot unang molotobo ge baabenamabebo ge funaniba deibeiba ib aalo wetlabeib mole ibo kukub olo nanomabibo makob Klaiste dowan weng ayamo mo bainobo geim blim kesoa Klaiste ibo mo daayebeta Gode ibo mo oye bianeta I ne kin dimo naka molot unang molotobo ge oyemebabe. <sup>3</sup> Naka mak ibo naka maki aalo wetlabenom gaibo deibeiba wetlabenomabib ibo ne wengo imin baabenamabibe, ibo funaniba Gode ni baabenea i ne kin dimo naka molot unang molotobo ge baabeneko ge funaniba ib aalo wetlaib mole Mosese hekmel wengo alukum wafueine! Ibo inaniba Mosese hekmel wengo atosino deiboniba atosin ota wafueib mole Gode kin dimo ibo naka molotbabe. <sup>4</sup> Nakaia unangai ib isak temo blibi funaniba Ni Mosese hekmel wengo wafunomobo Gode baabenea Ibo ne kin dimo hengmino blimobo ge baabenamabebo ge funaniba wafu blibi Klaiste wengo omdibi bianiba eka Gode daayemin kukubo omdibi biam blib kesoa memalo e i mo daabenamabebabe. <sup>5</sup> Bainobo galin nakaia unanga nibo Gode Hobe titil ota nibo Gode bainobo genoba seimbianoba Gode nibo naka molot unang molotobo ge baabenamabe amo tlamabo waiso biobobe.

<sup>6</sup> Nib bobol tem funino makob Klaiste bobol tem funino ulab anomobo nibo aalo wetlanomob osa eka mo wetlaim blim kenomob osa besabe. Gode kukub olo watemameo mo funaneta I ne kin dimo naka molot unang molotobo ge funanemebabe. Ina otane nibo Yesus Klaiste bainobo genoba esa naka mak unang mak isa gobe bianoba daayemob mole Gode nibo baabene Ibo ne kin dimo naka molot unang molotobo genamabebe. <sup>7</sup> Sino ibo Klaiste weng moloto sbalma wafu blib otane nimin kenibta Klaiste weng olo deibonibta weng afet ota wentebibe? Ne weng olo wentenia smiko deitne nobe. <sup>8</sup> Gode ibo dlakanea Nesu tline ge baabenebue e mo baaneta

Ibo inamine geim blimobe. <sup>9</sup> Kulani mato gwab otane mana bianoba mabonomobo welabba tlaknoa damo tem daak unanoa dikibanoa kulan gamo misiam anabo inaminobe. Naka eli dim omin weng olo ibo omkayebibo sinanomo o tata kenoa ib kukub ayamo wafu blib olo watwat daabenamabobe. <sup>10</sup> Ne funino inaminobe. Nib sinwal nib bobol tem funino makob nib Sume bobol tem funino ulab kesoa ne weng olo ibo omkayebio ne funania Ibo ne weng olo wafuniba weng misiam olo deibonomabiobo ge fumbibe. Naka make ibo weng misiam olo omkayebio ibo bobol tem misiam fumbib naka ele sinanomo Gode e kukub misiam yang kenea ananamabebe.

<sup>11</sup> Ne nekwai ibo ne weng olo nakaia unangai baabenita Ibo Yudai kukubo wafuniba ib aalo waketoumine ge baabei mole Yuda nakaia unangai ne enino mo omkanemibbabe. Ne weng olo baabei mole ne Yesus Klaiste addimo kaanebuo wengo i omkayemio Yudabai ne mo nemsuanimibbabe. Ina otane ne weng olo nakaia unangai mo baabenita Ibo aalo wetlaine ge baabeim blim kesoa Yudai ne nemsuan bianiba enino omkanebiobe. <sup>12</sup> Ne funania Naka eli ibo aalo waketoumine ge oyebib nakai ibsuo de unine ge funaio.

<sup>13</sup> Ne nekwai ibo Gode dlakanea baabene Mosese hekmel wengo ibo mo kimanomone ge baabenebio kesoa ibo mo funanibta Memalo nibo Mosese hekmel wengo mo wafu biobba kesoa ninib bobol tem funin ota wafu bianoba hengmino henga bianobte ge funanimibe! Ibo kukub ayamo olota wafu bianiba naka mak unang maki bobolo fumbianiba gobe bianiba daayemine! <sup>14</sup> Ne weng ele baabenamabi olo Mosese hekmel wengo alukum weng olo tem wat biobe. Ibmallo naniba ilib aalo kima blib inaniba naka mak unang mak isa gobe bianiba daayemine! <sup>15</sup> Ina otane ibo ib sinwalo alo mo tliaubesese bianibta dleb wengo mo baasese nimibe! Ibo klaine! Ibo inamib mole ilib skil watwat danomabiobe.

*Gode Hobe kukub osa eka nib sin kukub osa o wengobe.*

<sup>16</sup> Ne weng olo mitmakamo inaminobe. Ibo Gode Hobe deibaiba e ibo daabeneba Gode kukub ayamo kla wafueine! Ibo inanimibo e daabeneba ib bobol tem funin misiam olo imino mo wafu bianibta hengmino hengamibbabe. <sup>17</sup> Niminbabe, nib bobol tem funin misiam funanoba Ni inamin namin olo nanomo ge fumbob osa eka Gode Hobe funanea I inamin namin olo naine ge fumbe osa o makobbabe. Afet afet kesoa o tetenanoa awa gembobe. Nib bobol tem funin misiam Gode Hobe makaabe. Inamin kesoa ibo funaniba Ni

kukub ayam olo nanobtabo ge fumbibo mo nanomabibbabe. <sup>18</sup> Ina otane ibo Gode Hobe wengo wenteniba wafunimibo Mosese hekmel wengo ibo mo kimanomobabe.

<sup>19</sup> Ninib bobol tem funin misiamo wafunin kukub olo inaminobe. Nakaia unangai tamano henga bianiba kukub misiam olo namin kukub osa eka bobolo wabenoa inamin namin olo nanomo galin kukub osa eka <sup>20</sup> god dim omini niniino dotouleb nin kukub osa kel walin kukub osa usem genalin kukub osa eka nakaia unangai mo gobenibao kukub osa naka mak unang maki dosuan bianiba dleb weng oyemin kukub osa eka bobol wayemin kukub osa atliyemin kukub osa Ninita ye biobabo galin kukub osa makaalaniba afetubesese nin kukub osa <sup>21</sup> eka naka maki bobol tem misiam fun yatememin kukub osa eka aay misiamo downiba gabam tol temo mima fubenamin kukub osa nabianiba eka kukub misiamo afet afet osa namin kukub osa otabe. Nakaia unangai ili bobol tem funino wafu blibi kukub misiam olo nabinabiobe. Sino ne ibo baabeniba Ibo kukub olo mo wafu nimibe ge baabeibio kesoa ne memalo imin baabenamabibe, ibo kukub olo mo wafu nimibe! Nakaia unangai kukub olo wafu blibi mo monibta Gode kimanin bibo mo nomabibbabe.

<sup>22</sup> Ina otane nakaia unangai Gode Hobe daayebea Gode wengo wafu blibi kukub ole inaminobe. Gode Hobe i daayebe kesoa i God esa naka mak unang mak isa gobe bianiba seimbianiba bobol ayam bianiba naka mak unang maki kukub misiamo omkayemibo i mo yang kebibbabe. I naka mak unang maki daaye bianiba kukub ayamo omkaye bianiba naka mak unang maki baabeniba Ni inamin namino nanomabbiobo ge baabenimib osa bain ina binabiobe. <sup>23</sup> I untak nganin blim bianiba i bobol tem funin misiamo i bobol temo tlak unubenomosa funaniba Ni obo mo nanomabbiobabo ge fumbianiba kukub misiamo wandabbu biobe. Kukub ayam olo namino hekmel wengo baanoa Kukub olo misiamobo genamino blimobe. Nakaia unangai kukub olo wafunimibo ayamobe. <sup>24</sup> Nakaia unangai Yesus Klaiste wengo wafu blib ile sino Klaiste atdimmo kaanebuo makob i tena kaaibbiobe. I inaiibbo kesoa i bobol tem misiam funin kukub olo i bobolo imino mo wayemobabe. I sino hengmin kukub olo wafu binibbu otane memalo ite Yesus ete naniba atdimmo kaaibbiobo kesoa i kukub misiam olo titil blimanabiobe. <sup>25</sup> Gode Hobe nibo daabeneana nib bobol tem funino makob Gode bobol tem funino ulab anobbio kesoa nibo e wengo oyebeo kla wente bianoba ele weng baaneme iwat

namomo! <sup>26</sup> Nibo ninib tako mo ngambianobta Ni naka ayamobo gabianoba nib sinwalo atliyemin kukubo mo omyensese bianobta maki inamin namino bobolo mo wabesese nomone!

## 6

### *Ibo ib sinwalo daabesese nine!*

<sup>1</sup> Ne nekwal ibo bainobo galin naka make ib isak temo bianeana kukub misiamo nanea atemib mole Gode Hobe wengo wente bianiba wafu blib naka ibo weng fiab baabaniba daabaiba e kukub ayamo imin wafuneko! Otane ibo klaine! Inamin namin kukub misiamo ibsa dlabmanoa hengmino hengaib mole kukub olo misiamobe. <sup>2</sup> Ib dimo kukub misiamo tam tloa ib bobol temo misiam ubeno mole ib sinwalo ibmaye daabose daabase nine! Ibo inaiib mole Klaiste wengo baaneana Naka mak unang maki gobe bianiba daayemine genebio wengo wafunomabiobe. <sup>3</sup> Naka maki funaniba Ni naka sumobo, nimaye biobobo, ni naka mak unang maki mo daabenomobbabo ge funaib mole i dim baanomabiobe. I bobol tem funin olo misiamobe. I besa nakabe. <sup>4</sup> Ibo alukum ib kukubo nabibo wateniba funaniba Ne kukubo ayam bleka misiam eso ge funaine! Ibo funaniba Ne kukub olo ayamobo ge funaib mole seinine! Otane ibo naka mak unang maki kukubo mo watemubenibta funanibta Ne kukubo ayam kesoa i kukubo gaiseiobo ge funanimibe! <sup>5</sup> Nininbabe, sinanomo ibo ib kukubo nabibo alukum Gode baabasiba e ib kukub olo klanamabebe.

<sup>6</sup> Naka make ibo Gode wengo omkayebe mole ibsak inamin namino dokaha bianiba daahamine!

<sup>7</sup> Ibo mo funanibta Ni Gode dim omin wengo baabanomobo e tobtlinhalamabebo ge funimibe! Nakai imeno gumo sano dolmaib biamo damo ming gum ye damanoa ulelomabiobe. Eka getao sano dolmaib biam osa binoa damo geta ye damanoa ulelo nanomabib inaminobe. Sinanoa Gode nakaia unangai kukubo klanamabeo tlamo Gode nakaia unangai kukubo yateneana Naka elita kukub ayamo nabinibbiobe, eka elita kukub misiamo nabinibbiobe genea o molo yang kenamabebe. <sup>8</sup> Nakai ili bobol tem funin misiamo wafu bianiba kukub misiamo nabinib biamo sinanomo ili bobol tem funin misiam olota watwat dabenamabobe. Ina otane nakai Gode Hobe wengo wente bianiba wafu bianiba kukub ayamo nabib mole sinanomo Gode Hobe i daabeneana amit nomabiobe. <sup>9</sup> Nibo tenggo mo dubebe biota kukub

ayam namino mo deibonomobe! Nim-inbabe, nibo kukub ayamo amitie nabino biamo sinanomo Gode nakaia unangai kukubo klanamabeo dimo inamin namin ayamo doyamabebe. <sup>10</sup> Inamin kesoa nibo dabalim olo biob dimo nakaia unangai alukum bib mak bib mako blibi kukub ayamo amitie omkayemomabbu otane nib nekwali Yesus Klaiste bainobo gabib ile dot kukub ayam omkayemomo!

*Fole Yesus Klaiste atdimo kaanebuo seinha binebiobe.*

<sup>11</sup> Sin ele dolai olole ne besa weng obita naka mak eta dolane otane olole nemaye kweilo tubunia dolanamabibe. Ibo ne dolamin olo watemine! O sumobe. <sup>12</sup> Nakai funaniba Naka mak unang maki ni baabeniba Ibo naka ayamobo, ibo Gode kukubo kla wafu bliobo geine ge fumbib nakai teniba ibo baabeniba Ibo Yuda ni kukubo wafu bianiba ib aalo wetlaine ge oyebib naka eli funino inaminobe. I Yuda naka mak unang maki tekein keniba ni Yesus Klaiste atdimo kaanea nib hengmino walubenebio wengo bainobo gabio bo geib mole i ni enino omyomabiobo ge funaniba tosanani bta aalo waketoumin weng olo baabenomabib kesoa ibo i wengo mo wentaibe! <sup>13</sup> Nakai aalo waketoubibi Mosese hekmel wengo alukumo mo wafu blibba otane i funaniba Galesia teni ni wengo wenteniba i aalo wetlaib mole ni Yuda naka mak unang maki baabenoba Galesia teni ni wengo wenteniba i aalo wetlaibobo ge baabenoba i ni wengo wenteniba ni niniino omfabeniba funaniba Ib kukub olo ayamobo geine ge funanibta i aalo weketoubiobe. <sup>14</sup> Ina otane ne mo funanita I ne niniino nemtoule b nine ge funanimibabe. Ne Sume Yesus Klaiste niniino olota dobtoule b blibe. Ne e atdimo kaanebuo weng ota naka mak unang maki omkayebibe. E kaanebuo makob nesa kaaibio kesoa ne sino kukub misiamo nabinibuo blimanobiobe. E kaanebio dimo ne kukub misiamo sino nabinibu osa kaanobio kesoa ne imino mo funanita Ne kukub misiam olo wafunano genimibabe. <sup>15</sup> Ibo aalo wetlanimib deibonimib osa kukub olo besabe. Kukub olo nakaia unangai mo daabenomobabe. Gode nibo daabenea bobol tem funin ayamo omyenea kukub ayamo wafu bianoba mema naka unang anobbio kukub olota kukub afeto gaisonobiobe. <sup>16</sup> Nakaia unangai ne weng olo wente bianiba wafu blib ibsa eka Islel naka mak unang maki Gode wengo bainobo gabib isa ibo Gode dohalim bianea bobol ayam omkayemeko!

<sup>17</sup> Ne mubiang weng olo baanamabio inaminobe. Naka mak unang maki ne

wengo mo ombiatnenibta baanibta E Gode mo dofakaim blim kesoa e Yesuse okok dabasanin nakababo ge baatnenimibe! Ne Yesus Klaiste okoko okok kebio o dafa ota i nebianiba ne aalo manafa nemfaibbuo gul menob kibli kesoa ibo nateniba tekein keine! Ne bain Yesuse okok nakabe.

<sup>18</sup> Ne nekwali ibo ne nib Sume Yesus Klaiste baabania Kobo Galesia teni bainobo galin nakaia unangai alukum daabenale ge ohabibe. Bainobe. Ne wengo bayotabe. Fol neta ib futan olo dola omfubenamabibe.

## **Efesas**

### **Fole Efesas bib seli futano dola omfubesebe.**

### **Tekein kemim wengobe.**

Yesuse atdimu kaanea imin hananea ulanea abilim unebua bifolo 32 ese mak blimanota Fole klabutam bianeta futan olo dolaneta naka make niniino Tikikase omaleta omeb moneta Yesuse bainobo galin nakaia unangai bib sumo niniino Efesas bibo blibi omyebiobe. I Fole futan olo kiniba omaiba monoa bib mako meb meb ye bio yosa motemua watem tlaibbiobe. Futan olo Fole dolanea Sume bainobo galin nakaia unangai omfubenea enangge baabenea Nibo makob Yesuse damobe, eka ele nib gabamobe. Nibo e amobe, eka ele makob sbal amunobe. Nibo e alel anoba eka ele nib imak ananebiobo genebiobe.

1:1-2 Mikiktem wengobe.

1:3-3:21 Klaist esa nakaia unangai e bainobo gabib isa i wengobe.

4:1-6:20 Nakaia unangai Klaiste bainobo geniba mema naka unang ambibi wengobe.

6:21-24 Mubiang wengobe.

1 Fol ne Gode nemfakanea baatnenea Kobo Yesus Klaiste okok kamasanin nakabo ge baatnenebio kesoa ne Yesus Klaiste okoko okok kebianita futan olo dolanita Gode nakaia unangai Efesas bibo bianiba Yesus Klaiste wengo kla wafu blib ibo omfubenamabibe. <sup>2</sup> Nib Aye God esa eka Sume Yesus Klaist esa i dumo ibo daaye bianiba bobol ayam omkayemine!

*Gode titilo nibo omyebiobe.*

<sup>3</sup> Nibo Yesus Klaiste bainobo genobbuo dimo Gode nibo inamin namim ayam omyebiobe. Nibte Yesus ete nanoba nib bobol tem funino makob anob kesoa Gode inamin namim ayam esu buo omyebiobe. E inanebio kesoa nibo nib Sume Yesus Klaiste e Aye Gode niniino dobtoule nomo! <sup>4</sup> Sinanggwanu Gode dabale mo klaim blim bianea nibo dlakanea funanea Sinanomo i Klaiste bainobo geniba e meletan animibo ne kin dimo i hengmin blimanomabiobo ge funane kesoa nibo dlakanebiobe. <sup>5</sup> Gode nibo kla gobenea ele bobol tem funin ye dlakanea funanea Sinanoa Yesus Klaiste kaanea i hengminu walubenamabeo dimo i ne meme anomabiobo ge funanebiobe. <sup>6</sup> Gode e miine e kla goba bie dabanea daakenea kaanea nibo hengminu temo biobo dotlanebiobe. Gode inanea nibo daabenebio kesoa e kukub olo dot ayamobe. Nibo e niniino dobtoule nomo!

<sup>7-8</sup> Yesus Klaiste kaanea e ileme singanea nib hengminu walubenebiobe. Gode daayemin kukubo sum kesoa e inanea nibo daabenea nib hengminu omlabenebiobe. Gode bobol tem funino ayam kesoa e nibo inabenebiobe. <sup>9</sup> Gode ele bobol tem funanea Ne sinanomo Klaiste dabaia daaknea kaanea nakaia unangai hengminu walubeneko ge funane biota memalo inaneta nibo watemobbio. Sino e bobol tem funin olo ayok otane memalo keimanobiobe. <sup>10</sup> Gode bobol tem funino enaminobe. E amo omakanebuo tlamo e inamin namino abilim uto bu osa eka dabalim olo bu osa alukum olminea Klaiste kimanamabebe. E bobol tem funin olo sino ayok binobio otane memalo e nibo alebenebiobe.

<sup>11</sup> Gode okok olo klanebuo e halito mo naim blimobe. E sin funanea Ne sinanomo inamin namim olo inaneme ge funaneta omioto e inamin namim olo klanebiobe. Sinanggwanu Gode funanea Sinanoa item Klaist etem naniba i bobol funino makob animibo ne meme anomabiobo ge funanea nibo dlakanebio kesoa nibo e memebe. <sup>12</sup> Yuda ni sino Yesus Klaiste wengo wentenoba bainobo genobbio kesoa ni fumbianoba sinanomo nite Klaist ete nanoba amit nomabbio ge fumbianoba am olo tlamabo waiso bianoba ni Gode niniino dobtoule biobobe. <sup>13</sup> Yudaba nakaia unanga ibsa inaniba Gode down weng ayam wenteniba Yesus Klaiste bainobo gabibo e ibo ib hengminu temo blibo dotlanea Gode baabenea Ibo ne meletanobo ge baabenea e Hobe dobyebiobe. Sinanggwanu Gode baanea Sinanomo nakaia unangai ne wengo bainobo geib mole i ne meletanobo, ne Hobe i dobyamabio genebio e ibsa dobyebio kesoa ibo tekein kebiobe, ibsa e meletanobe. <sup>14</sup> Gode baanea Ne meletani dlebni ne bib unang gamio i kukub misiamo alukum blimubenoa dleb utnia ne bib ut danamabio genebiobe. Nibo hengminu temo biobo e dotlanebi otane memalo nib hengminu alukum mo blimubeim blimobe. Gode e meletan nibo e Hobe amitie bekebe bie kesoa nibo tekein kebuobe, sinanomo Gode bain inanea dleb utnea e bib ut danamabeo nib hengminu alukum blimubenamabo kesoa nibo e niniino dobtoule nomo!

*Fole Gode beten kehabinu wengobe.*

<sup>15-16</sup> Ibo sbalmaniba nib Sume Yesus Klaiste bainobo gabianiba Gode bainobo galin naka mak unang maki gobe blib weng osa ne wentenia ne Gode ninino amitie dobtoule blibe. Ne Gode nganhamang gamio ibsa daaye binabibe. <sup>17</sup> Ne nib

Sume Yesus Klaiste e Aye Gode baabania Kobo Efesas bib seli bainobo gabibi bobol tem funin ayamo omyeba i keb kukubo kla tekein kebianiba eka keb wengo mitmakam osa kla tekein kenaine ge oha binabibe. <sup>18</sup> Gode bainobo gabib ibo dlakanea baabenea Ibo ne meletan kesoa sinanomo ne dleb utnia ne bib ut dania inamin namin ayamo doyamabibo genebiobe. Gode inamin namin olo doyamabibo genebueo ibo waiso bliobe. O dot sum kesoa ne Gode imin baabania Kobo i daabeneba keb kukubo mitmakamo tekein keine ge ohabibe. Ibo e kukubo mitmakamo tekein kenimibo e inamin namino doyamabibo genebu olo tekein kenomabiobe. <sup>19-20</sup> Eka ibo e kukubo tekein kenimibo Yesus Klaiste bainobo gabob naka unang nibo e titil olo omyebuo tekein kenomabbiobe. E titil olo dot sumobe. E titil olo nibo omyebu ota Yesus Klaist esa omalea titil olota e dofaanota hananea utnea e kweile kweitale kikib ye toubmiebe. <sup>21-22</sup> E inanea utnea toubmianea inamin namino abilim utu buo kima biebe. E kimanin okoko komok mak isa eka abiseli komokwal isa i kimanin okoko gaisenebiobe. E niniino naka maki memalo blib isa eka sinanoa walomabib isa i niniino alukum gaisenebiobe. E inanea Gode baabanea Kobo inamin namino alukum kima bianeba eka nakaia unangai ne bainobo gabib isa kimananale ge baabanebiobe. <sup>23</sup> Nakaia unangai Klaiste bainobo gabib ile makob e damobe. Eka ele makob i gabamobe. Bainobo galin nakaia unangai Gode okoko okok kebile olesuse titil ota omkayebeta okok kebiobe. E titil ota inamin namino abilim utu bu osa eka dabalim olo bu osa okok kebobe. Inamin namino omalo nanamino blimobe.

## 2

*Nibo kaanobbu otane Gode imin dohaaneta hananobbiobe.*

<sup>1</sup> Yudaba ibo sino Gode wengo mo tekein keim blim blib dimo Gode wengo omdibiha bianiba kukub misiamo nabinibbuo ibo makob kaanabibi ulab binibbiobe. <sup>2</sup> Ina binibbuo dimo ibo dabalimo kukub misiam osa eka hob misiami komoke kukub osa wafu binibbiobe. Memalo hob misiami komok ele nakaia unangai Gode wengo omdibihabibi kima biebe. <sup>3</sup> Sino nibsa alukum makob naka eli nabib inanoba Gode wengo omdibiha binobbiobe. Yuda nisa sino nini bobol tem funin misiamo wafu bianoba kukub misiamo nabinobbiobe. Nibo inanoba ninib kukub misiamo mo deibueim blim amitie nabinob mole Gode yang kenea makob naka maki kukub

misiamo nabiba enino omyamabe inanea nibsa enino omyamabebe.

<sup>4-5</sup> Sino nibo e wengo omdibiha bianoba makob kaanabibi ulab binobbiobe. Sino nibo hengmino temo biob dimo Gode kla gobenea kla dohalilanea nibo hengmino temo biobo dotlanebiobe. Nibo inanoba makob kaain kenobbu otane Gode inanea Klaiste dabanea daakenea kaanea nibo hengmino temo biobo dotlanea Gode imin dofaana bianea nibsa dohaanea Klaiste tenanoba hananobbiobe. Gode ele bobol tem funin ota wafu bianea nibo daabenea hengmino temo biobo dotlanebiobe. <sup>6</sup> Gode Klaiste dofaanea imin hananea baabanea Kobo utneba abilim ut bianeba inamin namino alukum kimanale ge baabanebu olo nibsa baabenebiobe. Nibo Klaiste tena biob kesoa olo makob nibte Klaiste tenanoba abilim ut bianoba inamin namino kima biobobe. <sup>7</sup> Gode fatneta nibo inabenebue? E Yesus Klaiste dabanea daakenea nibo hengmino temo biobo dotlanebio kesoa nakaia unangai memalo blib isa eka sinanoa walo unomabib isa e kukub olo wateniba funaniba Gode kla gobe bianeta daabenebiobo ge funomabiobe. <sup>8</sup> Nibo Yesus Klaiste bainobo genobbuo Gode e bobol ayamo nibo omyenea daabenea nibo hengmino temo biobo dotlanebiobe. Nibo hengmino temo biobo nib malo mo deibueim blimobe. Gode ele bobol tem funanea nibo bobol ayamo omyenea hengmino temo biobo dotlanebiobo. <sup>9</sup> Gode nib kukub ayamo nabobo mo yateneta nibo hengmino temo biobo dotlaim blim kesoa nibo naka maki mo baabenobta Ni kukub ayam olo nabob ota Gode ni hengmino temo biobo dotlanebiobo ge baabenomobe! Gode emaye ele bobol tem funanea bobol tem ayamo nibo omyenea dotlanebiobe. <sup>10</sup> Sinanggwano Gode nib bobolo funanea baanea Sinanomo nakaia unanga eli Yesus Klaiste bainobo geniba i Klaist ete naniba kukub ayamo ne baabenia Ibo kukub olo naine genimio namomabiobo ge funanea dlakanebiobe.

*Sino nakai mito asu blib otane Klaiste dolminea makob aibbiobe.*

<sup>11</sup> Ibo Yudababe. Yudai alukum aalo waketoubib kesoa i ibo oye bianiba Naka eli i aalo mo waketoubibbabo ge oye-bib ibo sino ibo Yesuse bainobo geim blim bianiba ib kukubo nabinibbuo funaine! <sup>12</sup> Ibo Yesus Klaiste mo bainobo geim blim binibbio dimo ibo Gode meletanbabe. Ibo Gode meletani makaa binibiobe. Gode moton wengo Yuda nakaia unangai baabenea Ne inamin namino doyamabibo ge baabenebio wengo ibo mo wentemin blimobe. Ibo dabalim olo kukub



ota wafu bianiba ibo Gode mo tekein keim blim binibbiobe. Ibo mo funanibta Sinanomo Gode ni daabenea ni hengmino temo biobo dotlanamabebo ge funin blimobe. Ibo inaibbio kesoa ibo makob bib mak naka unangobe. <sup>13</sup> Ina otane Yesus Klaiste kaanea e ilemo singanea ib hengmino walubenebua ibo e bainobo gabib kesoa memalo ibo Gode meletanobe. Memalo ibtem Yuda nitem Klaist etem nanoba alukum bibo olokiemo tem ota mibiobobe. <sup>14</sup> Sino Yuda isa Yudaba isa makaa bianiba makob daam ge afetaisn keibbu otane Yesus kaanea nib hengmino walubenea daam ele belanea ibsa nisa dleb tetenanea dolminea bobol tem fiab omyenea nib bobol temo makob anobbiobe. <sup>15</sup> Yesus inanea kaanea Mosese hekmel wengo ni kimabuo blimanobiobe. E inanea Yuda nisa Yudaba ibsa nibo alukum dolminea afin anobbiobe. <sup>16</sup> E atdimmo kaanebua Yuda isa Yudaba isa wasi kukubo watanea dleb tetenanea dolminea dleb tenea God esu ele danebiobe. <sup>17</sup> Sino Yuda ni God esu meb bioba eka Yudaba ibole Gode skeim binibbiobe. Otane Yesus tenea Yudai God esu meb blib isa eka Yudaba ibo skeim blib ibsa Gode dowan wengo ibo omyebiobe. E inanebua ibo God esa eka Yuda nakaia unanga isa makaa dleb hanea dleb tetenanea afin aibbiobe. <sup>18</sup> Yuda nisa eka Yudaba ibsa nibo hengmino temo biobo Yesus Klaiste dotlanea Gode e Hobe nibo dohyebio kesoa nibo monoba nib Aye Gode motemnoba etem nibtem nabianoba weng obuobe.

<sup>19</sup> Yesus inanea ibo hanea dleb tetenebio kesoa ibo sino Yudai makaa otane memalo ibo mit mak nakababe. Ibo naka makobobe. Memalo ib sinwalo Gode meme kesoa ibo alukum Gode meletanobe. <sup>20</sup> Gode meletan nibo makob Gode amo genebio inaminobe. Yesus okok dlasanin naka nisa eka e weng omkeimalin naka isa ni makob ilam amuno ulabobe. Eka Yesus Klaist ele makob isak amunobe. Eka ibole makob taliba tlakala o ulabobe. <sup>21</sup> Klaiste isak amunobe. E nekek genea amo alukum omakibila bie kesoa o mo dobo blelanomobabe. E nekek genea omakibila bie kesoa Gode am olo tem tam biebe. <sup>22</sup> Yesus Klaiste bainobo galin naka unang ibsa eka bainobo galin naka mak unang mak isa ibo makob am olo tlakala taliba amana o ulab kesoa ibo makob nakai amo genabib inaminobe. Gode Hobe am olo tem tam biebe.

### 3

*Fole Yudaba naka afeti Gode dowan wengo omkayem haabinebiobe.*

<sup>1</sup> Fol ne Yudaba ibo Yesus wengo omkaye biania baabenia Ibsa Yesuse bainobo geniba Gode meletan aine ge oyebio dafa ota naka mak unang maki ne ge nemeb teniba klabutam ele daibbio kesoa ne Gode baabania Kobo Yudabai daabenale ge ohabibe. <sup>2</sup> Ne funania Sino Gode ne baatnenea Kobo moneba Yudaba naka afet isu unaneba baabeneba Gode ibo daabenebio ge baabenale ge baatnenebio weng olo ibo sin wentibbiobo gabibe. <sup>3</sup> Sinanggwano Gode weng olo ayok binabo otane memalo Gode weng olo ne aletnene kesoa ne ibo weng olo gwab baabenamabibe. <sup>4</sup> Ne futan olo ibo kinimiibo Yesus Klaiste weng ayok olo ne aletnenebio ibsa tekein kenomabiobe. <sup>5</sup> Sinanggwano Gode e weng ayok olo nakaia unangai dabalim olo binibbuei mo alebeim blimobe. Otane memalo e Hobe Yesus okok dlasanin naka nisa eka Gode weng omkeimalin naka isa ni alebenebio kesoa ni Gode weng ayok olo tekein kebuobe. <sup>6</sup> Weng ayok olo inaminobe. Sino Gode Yuda nakaia unanga ita daaye binebiobe. Otane memalo Yuda nisa Yudaba ibsa nibo alukum Yesus Klaiste dowan weng ayamo wentenoba bainobo genob mole Yesus Klaiste nibo hengmino temo biobo dotlanamabebe. E inanamabe kesoa Yuda ni bainobo gabob nisa eka Yudaba naka afet ibo bainobo gabib ibsa nibo alukum Gode meletanobe. Sinanggwano Gode Yudai baabenea Ne inamin namin ayamo ibo omyamabibo genebua Yudaba naka afet ibo Yesus Klaiste bainobo gabib ibsa omyamabebe.

<sup>7</sup> Gode ne nemfakanea daatnenea baatnenea Kobo moneba Yudabai ne wengo omkayemale ge baatnenea e titilo ornenebio kesoa ne e weng olo ibo omkaye binabibe. <sup>8</sup> Ne Gode okok dlasanin nakai maki i tabab tem daak bli otane Gode ele bobol tem funin ye nemfakanea baatnenea Kobo Yudabai Yesus Klaiste wengo omkaye bianeba baabeneba E sinanomo inamin namin ayamo dokayemabebo ge baabenale ge baatnenebio. <sup>9</sup> Gode inamin namino alukum klanebue baatnenea Kobo moneba ne weng olo sino ayok binobuo nakaia unangai alukum omkaye bianeba baabeneba Sinanggwano e weng olo ayok binabo otane memalo keimanobo ge baabenale ge baatnenebio. <sup>10</sup> Gode inanebua e funanea Nakaia unangai homoni ne weng olo wenteniba bainobo geniba ne meme aiba abisel isa eka i komokwal isa yateniba funaniba Nakaia unanga eli Gode wengo bainobo geniba e meletan aib kesoa Gode tekein kemino dot sumobo geine ge funaneta inanebio. <sup>11</sup> Sinanggwano Gode funanea

Ne sinanomo Yesus Klaiste dabaia daaknea Yuda isa eka Yudaba isa i hengmino temo blibo dotlaneko ge funanebio kesoa e inanea nib Sume Yesus Klaiste dabanea daaknea nib hengmino temo biobo dotlanebiobe. <sup>12</sup> Nibo nib Sume Yesus Klaiste bainobo genoba e tena biob kesoa nibo monoba God esu unanoba nib wengo e baabanamino mo tosiambobbabe. <sup>13</sup> Inamin kesoa ne ibo daayebio dafa ota naka mak unang maki enino omkanebib kesoa ibo kukub olo tolo mo tosiananibta ib bainobo galino mo deibonimibe! Ne okok ele okok kebi olo ibo daabeno kesoa ibo ib bainobo galino sbalma wafu bianiba seinine!

*Efesas bib seli Gode gobenin kukubo kla tekein keine!*

<sup>14</sup> Nib Aye Gode ne baatnenea Kobo moneba nakaia unangai Yudabai ne wengo omkayemale ge baatnenebio kesoa memalo ne dlong dlong golbua daak tounia e niniino dobtouleblibe. <sup>15</sup> Ne Yesuse nakaia unangai bainobo gabibi abilim uto blib isa eka dabalim olo blib isa i Aye Gode niniino dobtouleblibe. <sup>16</sup> Gode titilo dot sumobe. Ne e baabania Keb Hobe dabaneba monea Efesas bib seli bainobo galin nakaia unangai keb titilo omkaye bianea i bainobo galino omsbal mabeneko ge baabaiobe. <sup>17</sup> Ne funania Ibo Yesus Klaiste bainobo geiba e tlaknea ib bobol tem daak bibeneko ge funania Gode beten kehahibe. Ne funania Ibo Yesus Klaiste bainobo geniba naka mak unang maki gobenimibo ib bainobo galino sbal maniba makob aso kinkimo dabal temo tananoa nekek genoa aso damo sbal manoa mawe binabo inanomabiobo ge funania Gode beten kehahibe. <sup>18-19</sup> Yesus Klaiste nibo kla gobe bie kesoa e gobenin kukub olo sumobe. O binano onon tlanoa ge dlakanobio kesoa ne Gode baabania Kobo bainobo galin nakaia unangai Efesas bib sel isa eka bainobo galin nakaia unangai bib mak bib mako blib isa alukum daabeneba i bainobo galino omsbal mabeneba i Yesus Klaiste kla gobe bie kukubo tekein keine! E gobenin kukubo sum kesoa nakaia unangai o klao mo tekein kenomabibbabo, kobo daabeneba i e gobenin kukubo kla tekein keine! I e gobenin kukubo kla tekein kenimibo i Klaiste kukub osa eka keb kukubo afet osa i alukum kla tekein keniba makob keb ulab aniba naka molot unang molot anomabiobo ge ohabibe.

<sup>20</sup> Gode nibo daayebio e daayemin kukub olo dot sumobe. E inamin namino daayebio nib bobol temo funanoba E inamin namino olo daayemeko ge fumbob

osa eka nibo oha bianoba Kobo ni inamin namin olo daabenale ge ohabob osa e daaye bianea eka nibo inamin namino mo fumbobba osa eka inamin namino nibo mo ohabobba osa e daayebebe. E titil olo nibo omkayebio o nib bobol temo bibe bio kesoa o nibo daayemabobe. <sup>21</sup> Yesus Klaiste nibo daabenebio kesoa e bainobo gabob nibo Gode niniino memalosa sinanomosa amitie dobtouleblibe. Bainobe.

#### 4

*Bainobo galin naka unang nibo makob Klaiste damobe.*

<sup>1</sup> Ne Sume okoko okok kebi o dafa ota naka maki klabuto ge nemeb teniba klabut am ele daibbua bianita weng olo baabenamabi kesoa ibo wentine! Gode ibo dlakanea hengmino temo blibo dotlanea baabeneba Ibo ne kukubo kla wafueine genebio kesoa ibo e wengo kla wenteniba e kukubo wafueine! <sup>2</sup> Ibo ilib tako mo ngambianibta ni niniino sumobo ge funimibe! Ibo naka mak unang maki tenaniba bobol tem fiab bianiba i inamin namin kukub misiamo ibo omyaibo ibo mo yang kenimibe! Ibo ib sinwalo gobesese bianiba daabesese nine! <sup>3</sup> Gode Hobe ib bobol temo makob anamin kukubo omye biota ibo ayam bliobe. E inabenebio kesoa ibo sbal maniba kukub olo wafueine! Ibo ib sinwalo ilib bobol temo funino wafu nin kukubo mo wafu nimibe! <sup>4</sup> Gode nibo dlakanea baabeneba Sinanomo ibo utniba ne biibo amit nomabiobo ge baabenebio bainobo galin naka unang nibo alukum am olo waiso biobobe. Nibo mit olokiemo. Eka Gode Hobe elekiem <sup>5</sup> eka nib Sum esa elekiem nabe. Nibo e bainobo genoba e niniino taisanoba aaye fuelanoba e meletan anobbio kukub osa olokiemo. <sup>6</sup> Gode elekiemobe. Elekiem eleta nib Ay eka nib Sum nabe. E nibo alukum kima bianea e okoko nibo omkayebea okok keboba e nib bobol temo alukum bibe bibe. <sup>7</sup> Ina otane Klaiste okoko nibo alukum elekiem olokiemo omyenea baabeneba Ibo okok olo okok kemine ge baabeneba e titilo nibo omyebio kesoa nibo e okok olo okok kebuobe. <sup>8</sup> Gode buk temo enange baanoa

E abilim ut unebio dimo naka homoni yafu dleb utnea abilim ut danea e okoko e meletani omyenea baabeneba Ibo okok olo okok kemine ge baabeneba i okok olo okok kemomabibo titilo omyebiobo ge baanobiobe.

<sup>9</sup> Eka weng olo baanoa e ulanea abilim ewisa unebiobo genobuo mitmakam ole fatnamine? O mitmakamo inaminobe. Mikiktemo e daaknea dabal tem daakaneta omite utlanea ula abilim unebiobe. <sup>10</sup> Naka

ele sino daaknea dabal tem daakanea utlanea utnea abilim ut bie ele inamin namino dabalim olo bu osa eka abilim utu bu osa alukum kima biebe. <sup>11</sup> E titil ayamo e bainobo galin nakaia unangai i okoko afet afet omkayemonebiobe. Maki Yesuse okok dlasanin okok omkaye bianea eka mak ile Gode weng omkeimalin okok omkaye bianea eka mak ile Gode wengo ometniba moniba bib mak bib mako omkayem haanin okok omkaye bianea eka mak ile Gode bainobo galin nakaia unangai kima bianiba e wengo omkaye bianiba e wengo aleye bia nin okok omye nanebiobe. <sup>12</sup> E titilo bainobo galin nakaia unangai afet afet omkayebea i bainobo galin naka mak unang maki daayebiba isak Gode okoko ayam okok kebiobe. Klaiste bainobo galin nakaia unangai alukum Gode okok olo okok kebianiba i sinwalo daabesese bianiba i bainobo galino omsbal sambio. <sup>13</sup> Inamin kesoa Klaiste bainobo gabob naka unang nibo alukum nib bobol tem funino makob Klaiste bobol tem funino ulab kesoa nibo Gode miine kukubo kla tekein kenomabbio. Nibo Klaiste kukubo kla tekein kenomob dimo nibo naka molot anoba makob Klaiste ulab anomabbio. <sup>14</sup> Nibo Klaiste ulab anomobo nibo meme gwabi kukubo mo wafu nomabbio. Meme gwabi i kukub ayamo kla mo tekein kebibba kesoa i kukub ayam osa misiam osa wafu blib otane nib ole kukub ayamo kla tekein kebob kesoa kukub misiamo mo wafu nomabbio. Nibo inanoba sbalma bioba dim omin nakai funaniba Ni wengo i omkayemobo wenteniba Klaiste wengo deiboniba ni weng ota wafueine ge funaniba teniba dim omin wengo nibo omkayemibo mo wafu nomabbio. <sup>15</sup> I ina binabib otane nibo i kukubo mo omesenobta naka mak unang maki dimo mo oyemobe! Nibo i kla gobe bianoba bain wengo olota oyemomo! Nibo kukub misiamo deibonoba Klaiste kukubo olota wafu bianoba makob Klaiste ele ulab anomo! E nib kimanin nakabe. <sup>16</sup> E kimanin kesoa eta nib okoko afet afet omkayebebe. Nibo e okoko afet afet olo okok kehamobo nibo makob e damobe. E ele bobol tem funin ye funanea e okoko nibo omkayebebe. Nibo makob e dam kesoa nibo e okok olo okok kemob mole e damo ayam namabobe. Nibo e okok olo kla okok kemob mole nib sinwalo gobenoba daabesese bianoba nib bainobo galino omsbal manomabbio.

*Bainobo gabib ibo kukub ayam ota wafueine!*

<sup>17-18</sup> Inamin kesoa ne nib Sume weng olo ibo baabenimio wentine! Ibo nakaia unangai Gode wengo mo wentebibai i kukubo

mo wafu nimibe! I ili bobol tem funin misiamo wafu bliba i bobol temo watwat dayebo kesoa i bobol tem funin ayamo mo fumbibbabe. I bobol tem misiam fumbianiba Ni Gode wengo wentemino denomabbio geib kesoa Gode e afen smike mo dobyim blimobe. <sup>19</sup> I kukub misiamo wafu blibo aalo mo gembibbabe. I kukub ayamo deiboniba kukub misiamo namino o bobol ota wayebua i kukub misiam homono nabinabiobe.

<sup>20</sup> I kukub olo wafu blibo Klaiste kukubabe. I kukub olo nabibo ibo Klaiste wengo wentebibo ulabbabe. <sup>21</sup> Ibo Yesus Klaiste wengo wenteniba funaniba Ni e kukubo wafunomo ge fumbiba ni e bain wengo aleye binobbio. <sup>22</sup> Sino ibo bobol tem misiam fumbianiba kukub misiamo nabianiba ib bobol temo watwat danom gena binib kesoa ibo kukubo ye nabibio yo deibueine! <sup>23</sup> Otane ibo inaniba kukub olo deiboniba bobol tem funin ayamo amitie funimibo ib bobol temo ayam omfubenoa ibo kukub ayam ota wafunomabiobe. <sup>24</sup> Gode kining naka molot kesoa ibo ib bobol tem funino makob e bobol tem funino ulab aine! Ibo inanimibo ib bobol temo amitie ayam fumbianiba kukub ayamo wafunomabiobe.

<sup>25</sup> Ibo makob Klaiste meletan kesoa dim omin wengo deiboniba bain wengo olota omine! <sup>26</sup> Ibo alo tliaubeno mole hebmamsab deibueine! Ibo mo deibueim blim keib mole hengmino henganomabib kesoa deibueine! Ibo alo sma ye tliyebua bi kwinoa afoko dawabbano mole kukub olo misiamobe. <sup>27</sup> Ibo Gululame wengo mo wentaibe! Ibo baabaniba Kobo de one ge baabanimibo e deibe unamabebe. Ina otane ibo e wengo wentubanimibo e ib bobol temo watwat dabenamabebe. <sup>28</sup> Nakai ib isak temo bianiba ayoko hembib mole i ayok henin kukub olo deiboniba besa ayam bianiba moni okoko okok kebianiba monio oloniba atosino naka mak unang maki inamin namino blim biaibi okayemine! <sup>29</sup> Ibo naka maki wengo misiamo mo oyemibe! Ibo weng ayamo olota obianiba naka mak unang maki i bainobo galino dosbal sambiba eka nakaia unangai ib wengo wentebibi bobol ayam fumbianiba kukub ayamo wafueine! Ibo kukub olo inaib mole i daabenomabiobe. <sup>30</sup> Ibo weng misiamo mo obianiba Gode Hobe bobol tem abilo mo omkahamibe! Nibo tekein kebuobe. Gode Hobe nibo amitie bekebe bie kesoa sinanoa Yesuse imin tlameo nibo dleb utnea e bib ut danea amit nomabbio. <sup>31</sup> Ibo fun yatememin kukub osa alo sum tliaubenamin kukub osa eka dosuanin kukub osa dleb weng nganin kukub osa weng dobo weng omin

kukub osa eka kukub misiamo afet osa alukum deiboniba <sup>32</sup> naka mak unang maki gobe bianiba daabesese bianiba kukub ayam ota namine! Klaiste nib hengmino walubenebio kesoa Gode nibo hengmino nabobo bobolo imino mo fumbababe. Ibsa inaniba naka maki kukub misiamo ibo omkayemibo ibo yang kenamino dokobenoa deibueine!

### 5

*Ibo Klaiste kukub ayamo kla wafueine!*

<sup>1</sup> Ibo Gode meme kesoa e ibo kla gobe biebe. E inayebe kesoa ibo e kukubo nabe ota ibsa wafueine! <sup>2</sup> Klaiste nibo kla gobene kesoa e atdimmo kaanea nibo daabenebio. Sinanggwano Yuda ni faninwali kulani yananiba funiba Gode dlaliba e tango kunubanoa baabenea Ib kukub olo ayamobo ge oye binebua Yesus esa inanea atdimmo kaanea nib hengmino walubenea Gode baabanea Keb kukub olo ayamobo ge baabenebio. Klaiste nibo kla gobenebio inaniba ibsa naka mak unang maki kla gobeine!

<sup>3</sup> Ibo tamano hengamin kukub osa eka bobol temo misiam omkalin kukub osa eka bobol wayemin kukub osa mo namibe! Ibo Gode meme kesoa ibo kukub olo alukum deibueine! <sup>4</sup> Ibo kukub misiamo namin weng osa eka weng misiam omin osa eka atliyemin weng osa mo omibe! Kukub olo ibo mo daabenamaboba kesoa ibo deiboniba Gode oha bianiba Kobo ayam kesoa keb kukub nabeb osa ayamobo ge oha bianiba e niniino dobtoulebe nine! <sup>5</sup> Ne weng ele baabenimi olo kla wentine! Nakaia unangai tamano henga bianiba eka i bobol temo kukub misiamo namin bobolo fumbianiba eka naka mak unang maki inamin namino bobolo waye biam bio ile Klaiste Gode i dum i kimanin bibo mo unomabibbabe. Nakaia unangai naka mak unang maki inamin namino bobolo wayemo mole i makob god dim omni niniino dotoulebe nomabib inaminobe.

<sup>6</sup> Naka maki ibo dim baabeniba baaniba Nakaia unangai kukub olo wafu binimibi Gode i kukub olo mo yang keneta yanamabebabo ge baabenimibo ibo i weng olo mo wentubenibta bainobo genimibe! I dim oyebiobe. Nakaia unangai Gode e wengo omdibiha bianiba kukub misiam olo nabinimibi e i alo tiaubanoa i kukub misiam olo yang kenea enino omyamabebe. <sup>7</sup> Inanamabe kesoa ibo nakaia unangai kukub olo nabib isuo mebo mo nimibe! <sup>8</sup> Sino ibo kukub ayamo mo tekein keim blim binibbio dimo ibo makob mililam bio tem tab bianiba ib kukub misiamo nabinibbuo makob naka eli kukub misiamo nabib inaniba ibsa ina

binibbiobe. Otane memalo ibo Sume meme aniba kukub ayamo tekein kebianiba ibo makob ayal dim blib kesoa ibo kukub misiamo deiboniba kukub ayam ota wafueine! <sup>9</sup> Nakaia unangai kukub ayamo tekein kebib ile kukub ayam osa eka kukub molot osa wafu bianiba i wengo baino olota obiobe. <sup>10</sup> Ibo funaniba Inamin kukub ota Gode gobo biebe geniba ibsa kukubo yota wafueine! <sup>11</sup> Nakaia unangai Gode kukub ayamo mo tekein kebibbai i kukub misiamo wafu blib kesoa ibo isuo mebo mo nimibe! Otane ibo ib kukub ayamo i alebeiba i wateniba funaniba Ni kukub olo nabobo misiamobo ge funaine! <sup>12</sup> I kukub misiamo ayok nabibo nibo baabenamabi otane ne aal waitneno kesoa ne ibo mo baabenamabibabe. <sup>13</sup> Nakaia unangai kukub misiamo ayok nabibi bainobo gabob nib kukub ayamo nabobo i watemaibo funaniba Nibo kukub olo nabobo hengminobo ge funanimibo kukub misiam olo deiboniba kukub ayam ota wafunomabiobe. <sup>14</sup> Gode i kukub misiam olo omkeimabene kesoa i kukub olo imino mo ayok anomobabe. Gode buk tem wengo baanoa Naka kobo ambiebo hananale! Eka kaanebbio naka kobo imin hananale! Kobo hananeb mole Klaiste e kukub ayamo kobo alebkenamabebo genobiobe.

<sup>15</sup> Ibo kukub misiamo mo namibe! Ibo bobol ayam fumbianiba kukub ayamo namine! Nakai bobol tem funin blim bianiba kukub misiamo nabibi kukubo ibo mo namibe! <sup>16</sup> Memalo nakaia unangai kukub misiamo homono wafueib kesoa ibo Gode okok ayamo amitie namine! <sup>17</sup> Ibo Gode kukubo mo tobtlinimibe! Ibo Gode okoko gobo bianeana namine gabeo kla tekein kebianiba namine!

<sup>18</sup> Eka ibo aay misiamo mo downoniba ib gabamon temo mimafubenoa weng namin namin nimibe! Ibo inaniba weng namin namin nib mole kukub olo ibo watwat dabenamabobe. Ina otane ib bobol tem wato Gode Hobe dababbaine! <sup>19</sup> Ib bobol tem wato Gode Hobe dababba biaibo ibo ib nekwal tena blib mole Gode niniino dobtoulebe bianiba Gode weng buko niniino Samo tem wato anso dolaibbuo ngambianiba eka Gode niniino dobtoulebe bianiba seinin anso ngambianiba Sume niniino dobtoulebe nine! <sup>20</sup> Gode inamin namino ibo doyebuo bobolo amitie fumbianiba nib Sume Yesus Klaiste niniino dimo nib Aye Gode baabaniba Keb kukubo nabobo ayamobo ge baabaine!

*Nakaia unangai kukub ayamo namino wengobe.*

<sup>21</sup> Ibo Yesus Klaiste kla goba bianiba E ayamobo ge ohabib kesoa ibo ib sinwalo maki wengo kla wentubesese bianibtane! <sup>22</sup> Unang ibo ib imakwali wengo kla wenteye bianiba makob ibo Sume wengo wentebib inaniba kla wenteyemine! <sup>23</sup> Yesus Klaiste bainobo galin nakaia unangai makob e damobe. E atdimu kaanea i hengmino temo blibo dotlanebio kesoa memalo e i kima bie inaniba imakwali alelwali kla kimaine! <sup>24</sup> Inamin kesoa alelwal ibo ib imakwali wengo kla wente bianiba makob bainobo galin naka unang nibo Yesus Klaiste wengo kla wentebob inaine! <sup>25</sup> Imakwal ibo ib alelwali kla gobe bianiba makob Klaiste bainobo gabibi gobenea emaye atdimu kaanea daabenebio inaine! <sup>26</sup> Yesus Klaiste atdimu kaanea e bainobo gabob nibo daabenea nibo hengmino temo biobo dotlanebio kesoa nibo e wengo wentenoba aayo fuelanoba kukub misiamo deibonoba e nibo dleb monea Gode dlalebio kesoa nibo emiobe. <sup>27</sup> E inanea atdimu kaanea nib hengmino walubenebio kesoa bainobo galin nakaia unanga nibo hengmino mo hengamobe! Deibonoba kukub ayam ota amitie naboba e imin tenea yatenea funanea I ayamobo geneko! <sup>28</sup> Klaiste bainobo galin nakaia unangai kima bie inaniba imakwal ibo ib alelwali kla kimaniba makob ilib damo kima blib inaine! Nakai i alelwali gobeib mole i ili damo gobo bliobe. <sup>29-30</sup> Nibo tekein kebuobe, naka make e damo atosino halit deibonea inamin namin misiamo tenoa e dimo tenamino blimobe. E imeno wembianea e damo kla kima bianea makob Klaiste bainobo galin nakaia unangai kima bie inabebe. Bainobo galin nakaia unanga nibo makob Klaiste dam kesoa e nibo kla kima bie inaniba imakwal ibo ib alelwali kla kimaine! <sup>31</sup> Gode buk temo enangge baanoa

Gode baanea Nakae e alelo ome mole e ay esa e biem osa deibenea alelo ikamo makob aine genebiobo ge baanobiobe.

<sup>32</sup> Weng olo mitmakamo sumobe. Ne funania Weng olo Klaist esa eka e bainobo gabib isa ita baabenobiobo ge fumbibe. <sup>33</sup> Otane o nakaia unanga ibo elekiem olokiem baabenobiobe. Imakwal ibo ib alelwali kla gobeniba kimaniba makob ilib damo kima blib inaine! Eka alelwali ibsa ib imakwali wengo kla wente bianiba oye bianiba i naka ayamobo ge oyemine!

## 6

*Meme isa aaleb kamwal isa i wengobe.*

<sup>1</sup> Meme ibo ib biem ay kamwali wengo kla wentemine! Sume baanea Ibo inamine genebio kesoa ibo inamib mole ib kukubo ayamobe. <sup>2</sup> Hekmel wengo mako baanoa Ib biem ay kamwali wengo kla wente bianiba oye bianiba I ayamobo ge oyemine genobiobe. Hekmel weng olo tem wato moton wengo biobe. <sup>3</sup> Moton weng olo inaminobe. Ibo ib biem ay kamwali wengo kla wentemib mole amit bian biniba kla damaniba hangkaleb an konokmon an nanibta kaanomabiobo genobiobe.

<sup>4</sup> Aaleb kamwal ibo ib memei mo dolbianiba dosuan bianiba atliyemino mo omkayemibe! Ibo i kla kima bianiba Sume wengo kla aleyemine!

*Okok naka isa eka kimanin naka isa i wengobe.*

<sup>5</sup> Eka okok naka ibo ib kimanin nakai i tolo tosiam bianiba i wengo wentemine! Ibo i okoko okok kemino tengmo yemone! Ibo i wengo kla wente bianiba i okoko okok kebiam bianiba makob ibo Klaiste okoko okok kebim inamine! <sup>6</sup> I kima biaibo ibo i okoko ayam okok kebiba eka i deibe haaninibo ibo i okoko mo okok kemin blim besa bi nin kukubo ibo mo wafu nimibe! I okoko sbalma okok kemine! Ibo Klaiste okok naka kesoa ib okoko kla okok kemine! Gode baanea Ibo inaine genebio kesoa ibo inamine! <sup>7</sup> Ibo ib kimanin nakai okoko okok kemibo fumbianiba Okok olo nakai okokbabo, Sume okokobo ge funaniba bobol ayam bianibta okok kemine! <sup>8</sup> Ibo funaine! Nib Sume nakai alukum okoko ayam nabibi yang kenea inamin namin ayamo doyamabebe. Okok naka isa eka kimamin naka isa i okok ayamo nabinib biamo Gode yang kenea i inamin namin ayamo doyamabebe.

<sup>9</sup> Kimanin naka ibsa kukub ayamo ib okok nakai omkaye bianiba makob i naniba ib wengo wente bianiba kukub ayam wafu blib inayemine! Ibo kukub misiamo mo naye bianibta tosianino mo omkayemibe! Ibo funaine! Gode abilim ut bie ibsa ib okok naka isa ib Sumobe. Gode nib kukubo klanemeo e mo funaneta Naka ele okok nakabe, eka naka ele kimanin nakabe gabebabe. E funino nibo makobobe.

*Bainobo gabib ile makob awa genalin nakai ulabobe.*

<sup>10</sup> Ne mubiang weng olo ibo enangge baabenamabibe. Nib Sume dot sbalobe. E titilsa kesoa ibo amitie e tena bliba e ibo dosbal manea daabenea ib bainobo galino sbal maine! <sup>11</sup> Ibo Gode awa genalin youmo doyebuo dlusaine! Ibo youm olo dlusaib mole Gululame daabenea

Ibo kukub misiam olo namine ge baaben-emeo ibo Yeye geniba deibanomabiobe. <sup>12</sup> Niminbabe, nibo naka ita nib sinwal awa gembobbabe. Nibo hob misiami abilim ut blibi nib sinwal awa gembuobe. I komokwal isa eka i kima blib isa eka i komokwali sumi dabalim olo blib isa ita nib sinwalo gembuobe. <sup>13</sup> Inabob kesoa Gode awa genalin youmo ibo doyebuo dlusaine! Ibo inanimibo hob misiam isa eka i komokwal isa ib sinwalo awao gembibo i ibo mo gaisenimibbabe. Ib tata keniba i gaiseniba sbal manomabiobe. <sup>14</sup> Ibo inanomabibo awa genalin amo meb tlo kesoa ibo sbal maine! I Gode bain wengo makob hal gein kena bianiba eka e kukub molot ole makob kaba youm dlusain kenaniba ib tub deibo waline! <sup>15</sup> Ibo klaniba Gode dowan wengo nakaia unangai omkayemino makob ilib skil otabbumino olusa blib inaniba otabbaine! <sup>16</sup> Ibo inaniba Yesuse bainobo gabib osa makob klem afuein keine! Ibo klem ele afunimibo Gululame ano aso tebelat dinae binane tlamo klem ele dime wambianamabobe. <sup>17</sup> Gode ibo kukub misiamo temo blibo dotlanebua kima bio kukub olo makob hat kaba obtab bain keine! Eka Gode wengo e buk temo bu ole makob skem bainat afuein keine! Ibo inaniba Gode wengo omkeimanimibo Gode Hobe ibo daabenamabebe. Eka ibo inaniba youm olo dlusaniba hob misiami tenaniba awao genalaibo ib tata keniba i gaisenomabiobe. <sup>18</sup> Ibo inaniba Gode nganhamine! Gode Hobe ibo baabenea Ibo Gode nganhamine ge baabenemeo ibo amitie Gode nganhamine! Ibo sbal maniba inamin namin wengo Gode nganhamine! Ibo tengo mo yemone! Ibo Gode nakaia unangai beten keye bianiba daayemine! <sup>19</sup> Eka ibo nesa beten kene bianiba daanemine! Ibo Gode oha bianiba Kobo Fole daabaneba e keb dowan weng ayamo sino ayok binabo otane e memalo omkeimabe kesoa kobo keb wengo e omaleba e nakaia unangai weng olo omkayemang gameo e tosanino deibonea keim omkayemeko ge ohamine! <sup>20</sup> Ne bib mak bib mako Gode dowan weng omkeimalin naka neta naka maki ge nemeb teniba klabutam ele daibiobe. Ne tosanino deibonia Gode wengo kla omkeimanimio kukub olo ayam kesoa ibo Gode baabaniba Kobo Fole daahamale ge ohamine!

*Mubiang wengobe.*

<sup>21</sup> Ne okoko nabio weng osa eka ne blio weng osa Titikas eta baabenamabebe. E Sume okoko amitie sbal manea okok kebe kesoa e nib nek motonobe. <sup>22</sup> Ne e baabania Kobo moneba Efesas bib seli nibo biobo weng sango baabenale ge baabania

dabaia natlamabebe. Eta teneta ni weng sango baabenemeo wenteniba bobol ayam funanomabiobe.

<sup>23</sup> Nib Aye God esa eka Sume Yesus Klaist esa ne nekwal ibo bobol tem ayam omyeniba daabeniba ib bainobo galino omsbal sanye bianiba eka Yesuse bainobo galin kukub osa naka mak unang maki gobenin kukub osa omkayemine! <sup>24</sup> Gode nakaia unangai Yesus Klaiste amitie goba blibi daayemeko! Ne wengo bayotabe. Ne Fol neta ib futan olo dola omfubenamabibe.

## **Filibai** **Fole futano Filibai bib seli** **dola omfubesebe.** **Tekein kemin wengobe.**

Yesuse atdimo kaanea imin hananea ulanea abilim unebua bifolo 32 ese mak blimanota Fole klabutam bianeta futan olo dolaneta Ebaflodaitase omaleta omeb moneta Yesuse bainobo galin nakaia unangai Filibai bib ye bli bi omyebiobe. Sino Fole monea Filibai bib ye bianea Gode wengo omkeimabea nakaia unangai maki Yesuse bainobo geibbiotabe. (Abosel 16:11-40) Sinanoa Fole klabutam bieta Yesuse bainobo galin nakaia unangai Filibai bibo bli bi monio olminiba Ebaflodaitase olaliba oleb monea Fole olaleta e gangobo geneta futan olo dola omfubenebiobe. Fole klabutam bie dimo e fumbianea Ne Klaiste tena biobabo genea seimbe kesoa e funanea Filibai bib sel isa inangge fumbianiba seinine ge funaneta futan olo dola omfubenebiobe.

1:1-11 Mikiktem wengobe.

1:12-26 Fole kukubo nabinebuo wengobe.

1:27-2:18 Klaiste kukubo nabinebuo wengobe.

2:19-30 Timoti esa Ebaflodaitas esa i weng sangobe.

3:1-4:9 Yesuse bainobo galin nakaia unangai kukubo namino wengobe.

4:10-20 Fole Filibai bib seli Gangobo ge baabenebuo wengobe.

4:21-23 Mubiang wengobe.

<sup>1</sup> Fol nesa Timoti esa ni dabo Yesus Klaiste okok nakabe. Ni Yesus Klaiste bainobo galin nakaia unanga ibsa eka ib kimanin naka isa eka ib komokwal isa Filibai bib ye bli bi ibo ni futan olo dola omfubenomabiobe. <sup>2</sup> Nib Aye God esa eka Sume Yesus Klaist esa i dumo ibo daaye bianiba bobol ayam omkayemine!

*Fole Gode gangobo ge baabasebe.*

<sup>3</sup> Ne ib bobolo funimio Gode gangobo ge oha binabiobe. <sup>4</sup> Ne Gode baabania Kobo i daabenale ge oha biania seinbiobe.

<sup>5</sup> Niminbabe, sino ibo Gode wengo nena wentib dim ye kiloniba ne daanem tlibbuo memalosa sma ye daanebiiba Ne Yesus Klaiste dowan weng ayamo omkeimabiobe. <sup>6</sup> Ne tekein kebiobe, sino Gode ibo daabeneba bainobo geibbi memalosa e sma daaye bianea ib bainobo galino sma ye omsbal sanyebebe. Sinanoa Yesus Klaiste imin daak te dabalim ele tlame dim ota e daayemin kukubo blimanoa deiboneta nibo ayam nomabiobe.

<sup>7</sup> Ne ib bobolo fumbianiba ibo kla gobe bli ayamobe. Niminbabe, ne sino bib mak bib mako haabiania Gode wengo nakaia unangai omkaye biania baabeniba Weng olo bainobo ge oye binibuo dimo daane binibua eka memalo ne klabutam bli olo dim osa ibo ne okok olo daanebib kesoa Gode nib sinwalo daaye bianea kukub ayamo omkayebebe. <sup>8</sup> Ne ibo gobe bli makob Yesus Klaiste nibo kla gobe binabe inania ibo kla gobe bliobe. Gode tekein kebebe.

<sup>9-10</sup> Ne Gode baabania Kobo i daabeneba i naka mak unang maki kla gobesese bianiba eka i keb bobolo fumbianiba kukub ayam osa kukub misiam osa tekein keine! ge ohabiobe. Ibo inaniba kukub misiam osa kukub ayam osa tekein kenimibo kukubo dot ayam ota wafuniba kukub misiamo deibonomabiobe. Ibo inabib biamo Klaiste imin tenea nakaia unangai kukubo klanang game dimo ibo baabeneba Ibo naka molot unang molotobo ge baabenamabebe. <sup>11</sup> Ibo Yesus Klaiste bainobo gabiba e ibo daayebe kesoa ibo inamin namin kukub ayam ota wafunomabiobe. Ibo amitie kukubo ayam ota wafu bli ba nakaia unangai ib kukubo ayamo nabibo yateniba baaniba Gode niniino dot sumobo geniba e niniino dobtouleba nine getabe.

*Fole klabutam bie dimo e Gode weng ayamo omkeima bisebe.*

<sup>12</sup> Ne nekwai ibo olo tekein keine! Inamin namin kukub misiam olo ne dimo tam tlebo otane Gode weng ayamo mo watatneim blimobe. Ne sma Gode wengo omkayebi kesoa nakaia unangai homoni Gode wengo wenteniba bainobo gabibe. <sup>13</sup> I inabib kesoa Lomo komok sume Sisae awa genalin naka isa eka nakaia unangai maki am olo bli bi isa i tekein kebiobe. Ne Klaiste okok naka kesoa nakaia unangai ne klabuto ge nemeb teniba klabutam ele daibbiota bliobe. <sup>14</sup> Ne klabutam bli kesoa Sume bainobo galin naka mak unang maki funaniba Fole klabutam bie otane Sume daahabea e mo tosiambeba kesoa Sume nisa inanea daabenamabebo ge fumbianiba isa mo tosiambibbabe. I sbaal maniba Gode wengo naka mak unang maki aleyebiobe.

<sup>15</sup> Naka maki Klaiste wengo naka mak unang maki omkayebib otane i ne okoko bobolo wabesoa i funaniba Ni Fole dobtlanoba nita bainobo galin nakaia unangai kimanomo gabibe. <sup>16</sup> Otane maki bobol tem ayam bianiba Gode wengo nakaia unangai omkayebib ile tekein kebiobe. Gode ne baatneneba Kobo klabutam bianeba ne wengo omkeimamale gene kesoa ne klabutam biania Klaiste wengo omkeima bia i kla gotne bianiba

isak Klaiste wengo omkeimabiobe. <sup>17</sup> Ina otane naka maki ne okoko bobolo wayebua nemsuambib nakai i Klaiste wengo omkayebib otane i bobol tem funino ayamababe. I funaniba Nakaia unangai ni weng olo wenteniba bainobo geniba ni niniino dotouleb bianiba Fole klabutam bianea e wengo omkeimabeo deibaniba ni weng ota wentemiba e wentenea bobolo ilum omfubanoko ge fumbib kesoa i Klaiste wengo omkeimabiobe.

<sup>18</sup> I inamibo ne bobolo ilumo mo omfutnenomobabe. Ne seinamabibe. Maki Gode bobolo fumbianiba e wengo omkeimabiba eka mak ile ili bobol tem funin ota wafu bianiba Klaiste wengo omkeima biam blib mole nakaia unangai Klaiste weng olo wentomabib kesoa ne seimbibe. <sup>19</sup> Ne amitie seinamabibe. Niminbabe, ibo Gode nganha bianiba Fole daabanale gabiba eka Yesus Klaiste e Hobe ne dobnea daatnenea i ne klabuto tileitnenomabib kesoa ne seimbibe. <sup>20</sup> Sino ne mo tosianim blim sbalma biania Gode wengo omkeima binibuo memalosa ne mo tosianamabibabe. Ne sbalma biania Gode wengo omkeimamabibe. Ne ina bini biamo sinanomo Yesuse tlameo ne aalo mo genalamibabo ge fumbibe. Ne inanamabi kesoa ne afen biami osa eka kaanimi osa nakaia unangai ne nateniba baaniba Klaiste niniino sumobo geine! <sup>21</sup> Ne bobol temo fumbiania Ne afen biania Klaiste okoko okok kemi mole kukub olo ayamobe. Eka ne kaania monia Yesuse bibamo uni mole olo dot ayamobo ge fumbibe. <sup>22</sup> Ne sma afen biania nakaia unangai Gode wengo omkaye bia maki bainobo genib mole kukub olo ayamobe. Eka ne kaanimi osa ayamobe. Ne mo tekein kebibabe. Ne afenang gami ne kaanang gami osa ne klao mo tekein kebibabe. <sup>23</sup> Ne bobol asusu blibe. Ne kaania monia Klaiste tenanob mole olo dot ayamobe. Ne kaanano gabibe. <sup>24</sup> Ina otane ne ibo daayemano ge fumbi kesoa ne afen biania ibo daayemio olo dot ayamobo gabibe. <sup>25</sup> Ne tekein kebibe, ne sma afen biania ibo daaye bia ib bainobo galino sbal manomabiobe. Ibo inaniba ib bainobo galino sbal maib mole ibo seinomabiobe. <sup>26</sup> Ne inanamabi kesoa ne monia ibsuo natlamio ibo seimbianiba funaniba Yesus Klaist eta dabanea tlebo ge fumbiba nibo Yesus Klaiste niniino dobtouleb nomo getabe.

*Filibai bib seli maki Fole tenaniba Gode wengo omkeima binibbiobe.*

<sup>27</sup> Inamin namino ne dimo tam tlebo olo ibo o bobolo mo funimibe! Ibole Yesus Klaiste dowan wengo ne aleyebi ota kla wafueine! Kukub olo kukub

afeto gaisonobiobe. Inanomabib kesoa ne ibsuo imin natlamio ayamobe. Eka ne ibsuo mo natlim blim kenimio naka maka ye te baatneniba Filibai bib seli bainobo galin nakaia unangai i bainobo galino sbal maniba i okoko makob okok kebianiba eka i bobol tem funino makob aniba fumbianiba Naka mak unang maki Yesus Klaiste dowan wengo wenteniba bainobo geine ge fumbianiba aleyebiobe ge baatnenimib nakai weng ota wentamabibe. <sup>28</sup> Ibo Yesuse bainobo gabib kesoa naka mak unang maki kukub misiamo ibo omkayebiobe. Ibo nakaia unanga eli tolo mo tosianimibe! Ibo ib bainobo galino sbal maine! Ibo inanimibo i yateniba funaniba I Gode daabebia i mo tosiambibbabe, i bib ayam bianiba amit nomabiobo, otane nib ole Gode dlanea aseinin bib unomabiobo ge funanomabib kesoa ibo i tolo mo tosianimibe! Gode ibo daabenea amit nomabiobe. <sup>29</sup> Gode ibo dlakanea baabenea Ibo Yesus Klaiste bainobo geine ge baabenea eka weng mak osa baabenea Ibo Yesus Klaiste wengo omkeimamomabibo dafa ota naka maki teniba enino omkayemomabiobo ge baabenebiobe. <sup>30</sup> Sino ne Gode wengo nakaia unangai omkayebi kesoa naka mak unang maki Gode wengo mo bainobo gabibbai ne enino omkane binibua memalosa imin omkanebibo ibo kukub olo tekein kebiobe. Memalo ibsa Gode wengo omkeimabib kesoa i enin olo nib sinwalo omkayebiobe.

## 2

*Ibo ib bobol tem funino makob aine!*

<sup>1</sup> Ibo Yesus Klaiste bainobo gabiba e ibo daabenea sbalma bliba bleka? E ibo daabene sbalma bliobe. E ibo gobe bie kesoa ibo bobol ayam bliobe. Gode Hobe ibo bekebe bia ibo seinbiba bleka? Gode Hobe ibo bekebe bie kesoa ibo seinbiobe. Ibo ib sinwalo dohalila daabesese blib bleka? Ibo inabib kesoa <sup>2</sup> ib bobol tem funino makob aniba ib sinwalo maki gobesese bianiba ib okok osa bobol temo makob aniba dait okok kemine! Ibo inanimibo ne seinamabibe. <sup>3</sup> Ib okoko sbal okok kemibo mo funanibta Ni inanoba sbal okok kemoba naka mak unang maki yateniba ni niniino dotouleb nine ge funanimibe! Eka ib okok ayamo okok kemibo naka mak unang maki mo baabenibta Ni okoko ayam okok kebuobo genimibe! Eka ibo mo funanibta Naka maki ayam otane nita i gaisenobbiobo ge funanimibe! Ib bobol temo fumbianiba naka mak unang maki ni gaiseibbiobo ge funine! <sup>4</sup> Ibo mo funanibta Ninita ye biobabo gabianibta ilib okoko



olota mo okok kemibe! Ibo naka mak unang mak isa dohalim bianiba i okoko daayemine!

*Gode Yesus Klaiste niniino dobtoule binebiobe.*

<sup>5</sup> Ibo ib bobol tem funino makob Yesus Klaiste bobol tem fumbe inamin fumbianibte!

<sup>6</sup> E makob Gode ulab otane e mo funaneta Gode komok sum kesoa nesa komok sumobo ge funaim blimobe. <sup>7</sup> E funanea Ne daaknia unango amun tem wat unia nemfanomo ne mo funanita Ne komok sumobo ge funanimibabo gene kesoa e daakenea unango amun tem wat unea dofanoa damanea makob okok nakai ulab anea naka moton am binebiobe. <sup>8</sup> E nakaneo ele untako mo nganim blimobe. Gode baabanea I kobo kanaiba kaanale gene kesoa e Ae genea i makob naka misiami inaiba kaanabib inaniba e atdimodabasaniba silo bikiniba anaiba kaanebiobe. <sup>9</sup> E inane kesoa Gode baabanea Kobo Sum aneba inamin namin afeto alukum gaisonebobo ge baabanea eka e niniino Sum ge nganabanebuo e niniin olo niniin afeto gaisonobiobe.

<sup>10</sup> E inanebio kesoa abisel isa nakaia unangai abilim ut blib isa dabalim ele blib isa eka nakaia unangai kulilaibbio isa Yesuse niniino wentaibo i dlong dlong golbuaniba e niniino dobtoule bianiba <sup>11</sup> baaniba Yesus Klaiste Sumobo ge baanomabiobe. I inange baanimo naka mak unang maki i wengo wenteniba baaniba Aye God esa e niniino Sumobo geniba e niniino dobtoule nomabiobe.

*Nibo makob ayal inamin einomo!*

<sup>12</sup> Ne nekwai ibo ne sino ibo baka blio ibo ne wengo wenteniba nene weng baanimo iwat ina binibbiobe. Memalo ne skeim bli kesoa ibo ne wengo kla wente bianiba nene weng baanimo iwat ina bianibte! Ibo Gode wengo kla wafu bianiba funaniba Ni Gode wengo deibonomobo misiamobo ge fumbianiba tosiam bianibte! Ibo Gode wengo wente bianiba e okoko sbalma okok kebiba sinanoa Yesuse imin tlameo ibo dletnea ula abilim unine! <sup>13</sup> Gode ibo bekebe bianea bobol tem funino omkayebe kesoa e ibo baabenea Ibo inamin namin yo inaine genemeo ibo e wengo wenteniba goboniba inanomabiobe. Eka e titilo ibo omkayebe kesoa e ibo baabenea Olo naine ge baabenemeo ibo kla inanomabiobe. <sup>14</sup> Ibo okoko okok kebib

biamo weng omdibimina dleb wenga o deibonibta besa okok bianibte! <sup>15-16</sup> Ibo inamib mole Gode meme aniba hengmino blimubenoa kining anomabiobe. Ibo inaib mole God esa eka naka mak unang mak isa ibo mo baabenibta ib kukubo misiamobo ge baabenomabibbabe. Dabalim sel nakaia unangai Gode mo bainobo gabibbai i naka misiam unang misiamobe. I hengminsa kesoa ibo Gode kukub ayamo wafuniba ib kukub ayamo makob ayalo mililam biamo tubunoa bomat genabo inaiba nakaia unangai yatemine! Ibo inabiba Yesuse imin tlameo ne ibo seinyemabibe. Niminbabe, ne tekein kebibe, sino ne ibo baka biania Gode wengo ibo omkaye bia wenteniba bainobo geiba ne okok olo yamo balinobio kesoa sinanomo ne seinamabibe. <sup>17</sup> Ne ibo daabe blia ibo Yesuse wengo wente bianiba e okoko okok kebinibbua memalosa okok kebib kesoa ne seinyebibe. Ne ina binibio kesoa nakaia unangai e ananoba kaaneko gabiobe. I ne nenanimib osa ne ibo sma ye seinyemabibe. <sup>18</sup> Eka ibsa makob ne sein binabi inaniba seinine! Ibo inaib mole makob ibte nete na seinomabio inaminobe.

*Timotie weng sangobe.*

<sup>19</sup> Nib Sume Yesuse Ae gene mole ne Timotie dabaia monea ibsu natlanae yatenea imin tenea ib weng sango ne baatnemeo ne seinamabibe. <sup>20</sup> Elekiem eleta e bobol tem funino makob ne bobol tem funino ulabobe. Ne ibo daayebi kesoa ibo Gode kukubo sbalma wafu nine gabo esa inanea ibo daabenang genabebe. <sup>21</sup> Mak ile ili okoko bobol ota fumbianiba i Yesus Klaiste okoko bobolo mo fumbibbabe. <sup>22</sup> Eka ibo tekein kebiobe, Timotie Yesuse okoko okok bio e okoko klayam okok biebe. E makob miin aaleb dum keniba okok binabib inanea Timoti ete nete nanoba Gode down weng ayamo omkayebuobe. <sup>23</sup> Ne kot wengo baatneniba Inanamabeobo geiba wenti mole ne Timotie hebmamsab dabaia monea ibsu natlamabebe. <sup>24</sup> Eka ne funania Sume daatnenea i ne kluboto tileitneiba monia ibsu natlamabio ge funaioibe.

*Ebaflodaitase weng sangobe.*

<sup>25</sup> Ibo Ebaflodaitase dabaiba ib down wengo ometnea tenea ne baatnenea daatnenebiobe. E nib nekobe. Ete nete nanoba okok kebianoba Gode wengo omkeimabuobe. Ne funania Ebaflodaitase dabaia monea ibsu natle mole olo ayamobo ge funai kesoa ne dabaia monea ibsu natlamabebe. <sup>26</sup> E ibo yatanamin teb abua ibo wengo wentiba gembebo gesiba ibo bobolo ilum omfubenoa esa weng olo wentenea bobolo ilum omfubabiobe. <sup>27</sup> Bainobe, sino e ginino sum gembianea

kaanang genabe otane Gode dohhallilanea daabanea ayam anebuo, olo makob Gode nesa daabenebiobe. Niminbabe, sino ne bobolo ilum omfutneno kesoa Gode funanea Ebaflodaitase kaane mole Fole bobolo dot ilum omfubanamabobo genea e Ebaflodaitase ni dabo dohhallilanea daabene kesoa e mo kaa'im blimobe. E besa ayam anebiobe. <sup>28</sup> E inanea ayam anebio kesoa ne hebamsab dabaia monea ibsu natlea atemaibo ib bobolo ilum omfubebio yo deibueine! Ib bobolo ilum omfubebio yo deibueib mole nesa ne bobol ilum deibonamabibe. <sup>29-30</sup> Ibo meb bianibta ne okok daatnenimibba kesoa ibo Ebaflodaitase dabaiba tenea nesu ele tlanea ne okoko daatnenebiobe. E inanea Yesus Klaiste okoko okok kebianea ginino omonea genam binea kaain kenane kesoa e imin monea ibsu natlameo ibo baabaniba Kobo klayam nanebta Fole okoko daahabi tlebogo ge baabaniba seinhamine! Ete ibte naniba Sume bainobo gabib kesoa ibo makob dab tlemin dikinobe. Naka mak unang maki okoko makob e okoko ulab okok blib isa baabeniba Ib okoko nabib osa ayamobo ge baabeine!

### 3

*Nakaia unangai Klaiste bainobo gabibi naka molot unang molotobe.*

<sup>1</sup> Ne nekwal ibo ne weng mako ibo baabenamabibe. Ibo Sume bainobo gabib kesoa e bobolo fumbianiba seinhamine! Sino ne weng olo ibo baabeibio otane ne ibo imin dola omfubenamino tengo mo dubutnebioba kesoa weng olo imin dola omfubenamabibe. Ibo weng olo imin wentaibo ayamobe. O ibo daabenamabobe. <sup>2</sup> Ibo klaine! Naka maki ibo dim baabeniba Ib aalo waketuofanimibo ibo Gode meletan anomabiobo ge baabeib mole ibo naka eli wengo mo wentaibe! I kukubo misiamobe. I makob til satili ulabobe. <sup>3</sup> Gode Hobe nibo bekebe biane daayebe kesoa nibo Gode niniino dobtoulebiobobe. E inanea nibo daayebe kesoa nibo tekein kebuobe. Nibo Gode meletanobe. Nibo baanoba Yesus Klaiste naka ayamobo ge oha bianoba e wengo wafu bianoba Gode meletan anobbio kesoa nibo seimbuobe. Nibo mo funanobta Nibo nib aalo waketoumoko kukub olota nibo daabenota Gode meletan anomabbiobo ge funomobbabe. <sup>4</sup> Nakai dim omin bobol temo fumbianiba maki funaniba Ni faninwali Gode meletan kesoa nisa Gode meletanobo ge fumbib eka maki fumbianiba Ni okoko klayam okok kebob kesoa ni Gode meletanobo ge fumbiam blib mole i ne kukubo funaine! Ne i gaiseibiobe. <sup>5</sup> Ne biemo nemikinobua

Sande elekiem blimanea i ne aalo watlatneib kesoa nakaia unangai funaniba E God emiobo geibbiobe. Ne Islel esa e miine Bensamin esa i molofeitobe. Ne faninwali Hiblu ten kesoa nesa Hiblu tenobe. Ne Yudai hekmel wengo alukum wentina kla wafu bli kesoa ne Felisi nakabe. <sup>6</sup> Sino ne Yudai kukubo kla wafu biana fumbiania Ne Yesuse bainobo galin nakaia unangai inai mole Gode ne seinemabebo ge fumbiania monia bib mak bib mako bainobo galin nakaia unangai yebiniobiobe. Ne Mosese hekmel wengo kla wafu biana inabi kesoa naka mak unang maki baaniba Fole Mosese hekmel wengo kla wafu biebo ge one binibbiobe. <sup>7</sup> Ne sino funania Kukub olo ayamobo ge fumbiania ina binibi otane memalo ne funania Kukub olo besabo ge fumbibe. Niminbabe, ne Klaiste bainobo gabiania funania Ne Yesus Klaiste okok ota okok kemano gabi kesoa ne kukubo afet olo deibonia Yesus Klaiste okoko olota okok kebinabibe. <sup>8</sup> Inamin namin weng olo ibo baabei osa eka inamin namino ne sino fumbiania Kukub olo ayamobo ge fumbinibi osa memalo ne funania Kukub olo nibo mo daabenomobabo ge fumbibe. Niminbabe, ne Sume Yesus Klaiste tekein kebio kukub olo dot ayamobe. Kukub olo kukub afeto gaisonobiobe. Ne Yesus Klaiste bainobo genia e bobol tem funin ota wafu bli kesoa inamin namin kukub olo ne sino funania Ayamobo ge fumbinibio ne abuk wawenblibe. Ne Yesus Klaiste bainobo genia e bobol tem funin osa <sup>9</sup> ne bobol tem funin osa makob anob mole ne funania Kukub olo dot molotobo genamabibe. Ne mo funanita Ne Mosese hekmel wengo wafu blia Gode natemnea funanea E naka molotobo geneko ge funim blimobe. Ina otane memalo ne Yesus Klaiste bainobo gabia eka Gode ne natemnea baanea E naka molotobo gabebe. <sup>10</sup> Ne funania Ne Yesus Klaiste kukubo kla tekein kenia nesa makob e ulab ania Gode titil sumo Klaiste imin dofaanea hananebu olo nesa omeisania eka e enin kino watemebuo nesa inania enin kino watemano gabibe. Ne ina biana funania Ne bobol tem funino makob Yesuse kaanang genea e bobol temo nabanoa kaanebio inatnenoko gabi <sup>11</sup> kesoa ne kaanimio Gode ne imin nemfaanea hanania amit namabibe.

*Fole baanea Ibo kukub ayamo sbalma wafunine genebiobe.*

<sup>12</sup> Ne mo baanita Memalo ne Klaiste kukubo alukum tekein kebi kesoa ne hengmino blimobo, ne naka ayamobo genimibabe. Ina otane Yesus Klaiste ne hengmino temo blio nemtlanea ne emi aibio kesoa ne e wengo wafu biana makob Yesus Klaiste

ulab anano genita Klaiste okoko okok kebibe. <sup>13</sup> Ne nekwal ibo wentine! Ne mo baanita Ne e wengo kla wentebi kesoa ne naka ayamobo genimiba otane ne okoko okok bli olole ne inamin namin okoko sino okok binibi osa eka inamin namino bobolo fumbinibu osa abuk wawenia ne bobol temo omonia inamin namino ne dimo tam tlamabo yota omuli kesoa ne yo okok ota kla okok blibe. <sup>14</sup> Ne dabalim ele biania ne okoko nabia ne kukubo nabia o makob nakaia unangai tlan hamom gaibo dimo naka mak unanga maki Blublu monoba inamin namino gaisonoba inamin namino dlomo geniba blublu moniba gaisoniba inamin namino dlonabib inabibe. Ne kukub olo nabio mitmakamo inaminobe. Yesus Klaiste atdimmo kaanea nib hengmino walubenebio kesoa ne Gode okoko sbalma wafu blia sinanomo Gode nemeb utnea e bib ayam ut nemfanea nano genita o okok ota sbalma okok kebibe.

<sup>15</sup> Bainobo galino sbalma blib naka unang ibo ne weng ele baai olo kla wenteniba ib bobol temo makob ne bobol tem funino ulab aine! Ina otane mak ibo ib bobol temo afet fumbib mole God eta ibo bobol tem funin ayamo omyeko! <sup>16</sup> Eka Gode bobol tem funin ayamo ibo omyebio kesoa e wengo aleyebe osa eka e bobol tem funino omkayebe osa ibo kla wafueine!

<sup>17</sup> Ne nekwal ibo ib kukubo makob ne kukubo nabi inaniba ibsa kukubo yota wafueine! Naka mak unang maki kukubo makob ne kukubo nabio ulab wafu bianiba nabib ota ibsa yateniba kukubo yota wafueine! <sup>18</sup> Naka homon unang homoni i kukubo nabio Klaiste bainobo galin nakaia unangai kukubo ulabbabe. I kukubo yo nabibo makob i Yesus Klaiste atdimmo kaanebuo weng dobo weng ohabiobe. Inabib naka unang eli Yesuse makaabe. Sino am mak bomanomo am mak bomanomo weng olo ne ibo amit inangge oye binabi kesoa memalosa imin baabenang genia melaiobe. <sup>19</sup> Nakaia unanga eli Gode bobol tem funino mo wafu blibbabe. Ili bobol tem funin misiame ota wafu bianiba kukub misiame nabioobe. Inamin namin kukub olo naka mak unang maki nanimibo i aalo waisenabo otane kukub olo nabib ile kla seinwebiobe. I dabalimo inamin namino bobol ota fumbiobe. I inabib kesoa Gode inabib nakaia unanga eli dlanea aseinin bib unomabiobe. <sup>20</sup> Otane abilim ole Gode bainobo gabob naka unang nib bibobe. Nibo Sume Yesus Klaiste nib hengmino temo biobo dotlanebio nakae abilimo deibonea daakenea nibo dletnea monoba Gode bibamo unomabbuo dimo waisa biobobe. <sup>21</sup> Nib damo klanamabo otane Yesus Klaiste kaanea imin hananea

e damo afet anebio kesoa e damo amit namabebe. E imin tlameo nib damo afet anoba makob e damo ulab anomabbioobe. E titilo sbal kesoa nakaia unanga isa inamin namin afet osa kimanea e titil olo nibo omyea nib damo afet anoba amit nomabiobe.

#### 4

*Ibo ib bobol tem funino makob aniba ayam fumbianiba seinine!*

<sup>1</sup> Ne nekwal ibo ib Sume bainobo galino sbalma bianiba sino ne weng olo baabeibu mo deibonimibe! Ne ibo kla gobe biania ibo yatenamin teb nebobe. Ne Gode wengo ibo omkaye bia ibo wenteniba bainobo geibbio kesoa ne tekein kenia ne okok olo yamo balinobiobo genia seinyebibe.

<sup>2</sup> Ne nengwal ibo Yuodia Sintiki dab ibo wentine! Ibo Sume bainobo gabianiba ibo makob dab tlemin am blib kesoa dleb weng baasesenino deiboniba ib bobol tem funino makob aine! <sup>3</sup> Eka ne nek kobo keb okoko okok kebebo makob ne okoko okok kebio ulab okok kebeb kesoa kobo unang asu eli daabeneba i bobol tem funino makob aine! Unang asu elita Klemen ete naka mak unang mak ite nete nanoba sbalma bianoba Gode wengo naka mak unang maki omkaye binobbioobe. Gode nakaia unangai bainobo gabibi i niniino e buk temo dolabenebioobe. Nakaia unanga eli ne daanebibi i niniino buk olo temo bio kesoa i moniba Gode bibo amit nomabiobe.

<sup>4</sup> Sume ibo amitie bekebe bie kesoa ibo amitie seinine! Ne ibo imin baabenianib Seinine ge baabeibu.

<sup>5</sup> Sume imin tlamabeo dimo meb tlo kesoa ibo naka mak unang maki kukubo fiab omkayemine! <sup>6</sup> Ibo inamin namino talo mo wamibe! Ibo funaniba Ni inamin namino dlomo geib mole God eta baabaine! Eka ibo funaniba Ni inamin namin olo mo tekein kebobbabo geib mole osa God eta baabaibta alebeneko! Ibo inanimibo gangobo geine! <sup>7</sup> Gode ibo bobol ayam omkayebe kesoa ibo inamin namin olo talo mo wamomabibbabe. Naka mak unang maki ibo yateniba funaniba I nimin kenibta yo talo mo wamin blime? ge funanomabib otane i kukub olo mitmakamo kla mo tekein kenomabibbabe. Ibo Yesus Klaiste bainobo galin naka unang kesoa Gode e bobol tem funino ibo omyea ib bobol tem funino molot anomabiobe.

<sup>8</sup> Ne nekwal ibo ne weng mako imin baabenamabiobe. Kukubo bain osa kukubo ayam osa kukubo molot osa kukubo kining osa kukub ayamo Gode kin dim osa naka unangi kin dim osa namin ota amitie funine! <sup>9</sup> Inamin namin kukubo ne

aleyebi osa eka ne nabia natemebib osa yota namine! Ibo inamib mole Gode bobol ayamo nibo omkayebe nakae ibo bekebe namabebe.

*Filibai bib seli inamin namino Fole dlaliba e gangobo gesebe.*

<sup>10</sup> Ibo memalo ne bobolo imin funaniba daatneib kesoa ne seimbiania Sume niniino dobtouleb blibe. Ne tekein kebibe, sino ibo ne bobolo fumbianiba daatnenomo gabib otane ib deibo blim kesoa deitneibiota memalo daatneibobe. <sup>11</sup> Ne ibo mo baabenita Ne inamin namino blimutenobobo genimibabe. Ne amitie bobol ayamobe. Ne inamin namino blim utnenomo dim osa eka bitne biamo dim osa ne amitie seimbinabibe. <sup>12</sup> Ne inamin namino am mak dimo besa bi eka am mak dimo tam tloa bokabi nin kukub olo tekein kebibe. Otane Gode ne amitie daanebe kesoa ne seimbinabibe. Ne inamin namino blim biami bitne biam osa ne seimbibe. Eka ne imen teb nimi eka unalami osa ne amitie seimbinabibe. <sup>13</sup> Yesus Klaiste titilo ne omkanebe kesoa ne titilsa biania inamin namin okoko Gode baatnenea Klanale genemeo klabinabibe.

<sup>14</sup> Ina otane memalo ne inamin namino blim blia ibo daatneib kesoa ib kukubo ayamobe. <sup>15</sup> Bainobo galin nakaia unangai Filibai bib ye blib ibo olo tekein kebibe. Sino ne Masedonia betano deibonia monia bib mak bib mako haabiania Gode wengo nakaia unangai omkaye binibio dimo Gode bainobo galin nakaia unangai maki mo inanibta daatnenibta monio onim blimobe. Ina otane ibta inaniba ne daatneibobe. <sup>16</sup> Eka ne Tesalonaika bib ye blio ne inamin namino blim blia ibo ne inamin namino dokane bianiba daane binibbiobe. <sup>17</sup> Ne mo funanita I inamin namino donine ge funanimiba otane ne funania Ibo inamin namin kukubo ayamo nabibo yamo balinamabobo ge fumbibe. Ibo ne kukub ayam natneib kesoa Gode kukub ayamo ibsa omyamabebe. <sup>18</sup> Ibo inamin namin homono dlutneiba Ebaflodaitase dleb tenea donebio kesoa ib kukub olo ayamobe. Memalo ne inamin namino homonobe. Ibo Gode kla goba blib kesoa ibo ne daatneibbiobe. Eka God esa ib kukub olo watenea funanea Ib kukub olo ayamobo ge funanea seinyebebe. <sup>19</sup> Eka Gode inamin namino homon kesoa ibo Yesus Klaiste bainobo geniba e okoko okok kemib mole ibo inamin namino blim bibe biamo Gode doyamabebe. <sup>20</sup> Nibo amitie nib Aye Gode oha bianoba Keb niniino Sumobo ge ohamomo! Bainobe.

<sup>21</sup> Eka ne Yesus Klaiste bainobo galin nakaia unanga ibo alukum baabenia

Klayam blibte ge baabeibobe. Eka bainobo galin nakai ne beketne blib isa ibo baabeniba Klayam blibte ge baabeibobe. <sup>22</sup> Eka Gode bainobo galin nakaia unangai bib ele blib isa alukum ibo baabeniba Klayam blibte ge baabeibobe. Eka Gode bainobo galin nakaia unangai Lom bibo komok sume Sisae e okok kemin naka unang isa ibo baabeniba Klayam blibte ge baabeibobe.

<sup>23</sup> Sume Yesus Klaiste ibo daaye bianea bekebeneko! Ne wengo bayotabe. Ne Fol neta ib futan olo dola omfubenamabibe.

## **Kolosi** **Fole futan olo dolanea Kolosi** **bib seli omfubesebe.** **Tekein kemim wengobe.**

Yesuse atdimo kaanea imin hananea ulanea abilim unebua bifolo 32 ese mak bli-manota Fole Lom bib ye klabutam bianeta futan olo dolaneta Tikikase Onisimase i dabo omyeta omeb monibta Yesuse bainobo galin nakaia unangai Kolosi bibo bli-bi omyibbiobe. Fole futan olo dola omfubenebuo mitmakamo inaminobe. E Gode wengo omkeimabe o dafa ota klabutam bi-eta Ebaflase monea esu unanea baabanea Naka maki Gode wengo omkayebuobo geniba dim oyebiobo ge baabasea wenteneta futan olo dola omfubenebiobe. I dim omin wengo omkeimalino enaminobe. I baaniba Nibo Gode elekiem ele nini-ino olota mo dobtouleb nomobe, abiseli niniin osa dotouleb nomo ge obianiba eka mak ole obianiba Yesuse Gode ulabbabo, e abiseli ulabobo ge obiam bianiba eka mak ole Imena kulanao mako awemobo hala bianoba aalo waketou biam bianobte ge obiam nabibta Fole wenteneta futan olo dola omfubeneta i dim omin wengo omkeimabibo omkeimabenebiobe.

1:1-8 Mikiktem wengobe.

1:9-2:19 Klaiste kukubo nabinebuo wengobe.

2:20-4:6 Nakaia unangai Klaiste bainobo geniba mema naka unang ambibi wengobe.

4:7-18 Mubiang wengobe.

1-2 Ae bainobo galin nakaia unangai Kolosi bibo bli-bi ibo Pol ne nib neke Timotie ni dum bianobta ne futan olo ibo dola omfubenamabibe. Bainobo galin nakaia unangai Kolosi bib ye bli-bi ibo ibte Yesus Klaiste ete naniba ib bobol temo makob aniba ib bainobo galino sbalma bli-bi kesoia ibo emibe. Gode ne nemfakanea baatne-nea Kobo Yesus Klaiste okok kamasanin naka nale ge baatnenebio kesoia ne Yesus Klaiste okok namasanin nakabe. Nib Aye Gode ibo daaye bianea bobol ayam omkayemeko!

*Fole Gode gangobo gesebe.*

<sup>3</sup> Ni ibo beteno daayemobo nib Sume Yesus Klaiste Aye Gode Gangobo ge ohabuobe. <sup>4</sup> Niminbabe, ni wentoba naka maki baabeniba Bainobo galin nakaia unangai Kolosi bibo bli-bi Yesus Klaiste bainobo gabianiba bainobo galin naka mak unang maki alukum kla gobesese bli-bi gesiba wentenobta inabuobe. <sup>5-7</sup> Ebaflase Timotie ni dum ni nek ayamobe. E okok

osa ni okok osa makobobe. E Klaiste okoko mo deibueim bli-biobe. E amitie okok kebebe. Sino ni ibsuo mo natlomab- bioba kesoia Ebaflase ni alango dokonea monea ibsu natlanea Gode daayebe wengo ibo omkayebea ibo wente bianiba bainobo geibbiobe. Gode daayebe weng olo bain-obe. O enaminobe. Gode baanea Yesus Klaiste sinanomo ibo dletnea utniba ne bib am uto amit nomabiobo genebio ibo waiso bli-bi kesoia ib bainobo galino sbal maniba naka mak unang maki kla gobe bianiba daayebiobe. Bib mak bib mako nakaia unangai Klaiste dowan wengo wente bian-iba bainobo geniba kukub ayamo wafu bli-bi Kolosi bibo bli-bi ibsa inaniba Gode daayebe wengo mikiktemo wenteniba o mitmakamo tekein keib dimo ibo bain-obo geniba kukub ayamo wafu tlibbiobe. <sup>8</sup> Gode Hobe ibo kla gobe bianea daayebea eka ibsak naka mak unang maki kla gobe bianiba daayebiobe. Ebaflase ib weng sang olo ni baabenebio kesoia ni Gode baab- anoba Kobo gang nanebta i daayebeobo ge ohabuobe.

*Fole Gode oha bianea Kobo Kolosi bib seli daabendale ge oha binebiobe.*

<sup>9</sup> Ni ib weng sang olo wentob dim ye kilo- noba Gode amitie nganha bianoba Kobo Kolosi bib sel eli daabeneba i keb wengo oye bianeba Ibo kukubo olota namine gabebo i kla tekein keine ge oha binabuobe. Gode tekein kemino dot sumobe. E tekein kemino dabalim sel nakaia unangai tekein kemino ulabbabe. Ni Gode baabanoba Keb Hobe i daaye bianea keb bobol tem funino i alebenea i tekein kemim osa makob kleb tekein kemino ulab aine ge ohab- uobe. <sup>10</sup> Ibo inanimibo Sume ibo baabe- nea Kukub olota namine gabe wengo kla wente bianiba e kukubo kla wafu bli-ba e ibo seinyemabebe. Ibo inanimibo in- amin namin kukub ayamo nabianiba Gode bobol tem funino tekein kenaniba ib tekein kemino sum anamabobe. <sup>11</sup> Gode titilo dot sumobe. Ni Gode baabanoba Keb titil olo i omyeba i bainobo galino sbal maniba inamin namin kukub misiamo i dimo tam tlemo i bainobo galino mo deibonimibe! I bobol temo seimbianiba sbal maine ge ohabuobe. <sup>12</sup> Ibo amitie Aye Gode nganha bianiba Kobo gang nanebta ni hengmino temo biobo dotlanebiobe ge oha bian- ibte! Sino Gode baanea Ne sinanomo bainobo galin nakaia unangai dleb monia ne bibo daia amit nomabiobo genebua binea e inanea ibo hengmino temo bli-bi dotlanebio kesoia e bainobo galin nakaia unanga ibo e kin dimo naka molot unang molotobe. Sinanomo e ibo dlonea eka bain-obo galin naka mak unang maki alukum

dlonanea dleb monea e bib ayam ye danea amit nomabib kesoa ibo E gangobo ge oha bianiba seinine! <sup>13</sup> Nibo hengmino tem tab bioba Gululame nibo kima bie otane Gode nibo Gululam esuo dotlanea dlonea e miine Yesus Klaiste kla goba bie nakae dlalebua e nibo kima biebe. <sup>14</sup> Yesus Klaiste e ileme singanea nib hengmino walubene kesoa Gode nib hengmino omtlabenebiobe. Sinanomo Gode nib hengmino molo mo yang kenea dlaneta aseinin bibo mo unaob-babe.

*Klaiste kukub osa eka e okok osa otabe.*

<sup>15</sup> Nakaia unanga nibo Gode mo atemin blimobe. Yesus Klaiste makob Gode ula-bobe. Nakaia unangai maki Yesus Klaiste atemibbua e weng sango nibo baabeibbio kesoa nibo Gode tekein kebuobe. Sinangg-wano Gode abil esa dabal esa eka inamin namino dabalim olo buosa eka inamin namino abilim uto buosa e mo klaim blim bie dimo Klaiste bianea inamin namin olo alukum kima binebiobe. <sup>16</sup> Niminbabe, sinanggwan Gode Yesuse baabanea Kobo inamin namino klanale ge baabanea e klanebiobe. Inamin namino dabalim olo buosa eka inamin namino abilim uto bu-osa eka inamin namino nakaia unan-gai watemebib osa eka inamin namino nakaia unangai mo watemebibba osa eka abisel isa i komokwal isa eka inamin namin hob isa i komokwal isa i alukum i dumta klaibbiobe. Gode funanea Inamin namino alukum Yesuse niniino dobtouleb noko ge funane kesoa e okok olo oma-lea klanebiobe. <sup>17</sup> Dabal esa eka inamin namino dabal ele dimo buosa eka abil esa eka inamin namino abilim uto bu-osa o mo tam tlim blim buo dimo Klaiste binebiobe. E inamin namino alukum da-balim olo buosa abilim uto buosa klanebua kla kima bie kesoa o klayam, olo alang ye biobe. <sup>18</sup> Bainobo galin nakaia unanga ibo makob e damobe. Eka ele makob ib gabam kesoa e ibo kima biebe. E nibo afen smike dobonoba amit nomabbuo mitobe. E kaanea Gode sin dofaanea hananebio kesoa sinanomo esa inanea nakaia unanga nibo dohaanea hananomabbio. E inanea inamin namin afet osa nakaia unanga isa alukum gaisenebiobe. <sup>19</sup> Gode baanea Klaiste makob nene ulab kesoa e afet-babe. E kukub nabe osa e bobol tem fumbe osa makob nemio ulab kesoa ne seinhabibo genebiobe. <sup>20</sup> Sino inamin namino dabalim olo buosa abilim uto bu-osa Gode makaa bio kesoa Gode funanea Ni afin anomo genea e Yesus Klaiste da-banea daakenea atdimmo kaanea e ileme singanea nib hengmino walubenea God

esa nakaia unanga isa inamin namino da-balim olo buosa abilim uto buosa o makaa bu otane e hanea dleb tetenanea baanea I Gode afin aibobo genebiobe. <sup>21</sup> Ibole sino bobol tem misiam fumbianiba kukub misiam wafuna bib kesoa ibo Gode mo gobanim blimobe. Ibo makaa binibbio otane <sup>22</sup> memalo Gode e miine dabanea daakenea atdimmo kaanea nib hengmino walubenebio kesoa Gode ibo imino mo makaalabenemebabe. Yesuse inanebio ke-soa sinanomo e ibo dleb utnea Gode bib ayam ut danea Gode kin dimo ibo kining aniba hengmin blimanomabiobe. Yesuse inabenemeo Gode ibo mo baabeneta Ib kukubo misiamobo genamabebabe. <sup>23</sup> Ibo ib bainobo galino sbalma blib mole Klaiste inabenamabe. Gode dowan weng ayamo baanoa Ibo Yesus Klaiste bainobo geib mole e dletnea moniba Gode bib ayam amit nomabiobo genobio waisanomabiobe. Ibo sino weng olo wenteniba funaniba Bain-obo, Gode inabenebio geniba bainobo geibbio kesoa ib bainobo galino sbalma bianiba inamin namin kukub misiamo ib dimo tam tlamo ib tosanino deiboniba ib bainobo galino sbal maine! Bain-obo galin nakaia unangai homoni moniba bib mak bib mako alukum Gode dowan wengo nakaia unangai omkayebiba Gode Fol nesa nemanea monia e dowan wengo nakaia unangai bib mak bib mako blibi omkayebibe.

*Fole Kolosi bib seli bainobo galin nakaia unangai daaye binebiobe.*

<sup>24</sup> Yesus Klaiste nakaia unangai e bain-obo gabibi daayebe o dafa ota e enin kino watemebiobe. Ibo makob Yesuse damo ulabobe. Nesa inania Klaiste okoko okok kebiania ibo daayebe o dafa ota ne enin kino watemebi kesoa ne seim-bibe. Naka mak unang mak isa inaniba Klaiste okoko okok kebiania e bain-obo galin nakaia unangai daayebiba eka naka mak unang maki teniba i enino omkayemomabib otane sinanomo enin olo blimanamabobe. <sup>25</sup> Gode ne baatne-nea Kobo ne bainobo galin nakaia unan-gai daaye bianeba ne wengo i alukum omkayemale ge baatnenebio kesoa ne e wengo alukum ibo omkayebibe. <sup>26</sup> Sino Gode wengo atosino ayok bua nakaia unan-gai alukum e weng olo mo wentim blim binibbi otane memalo e weng olo alukum keim anoa e bainobo galin nakaia unan-gai e weng olo wentebiobe. <sup>27</sup> Gode fu-nanea Ne bainobo galin nakaia unangai ne ayok wengo alebenano ge funanea e weng olo i omkeimabenea baabenea Yud-aba nakaia unangai ne wengo wenteniba ne naka unang aine ge baabenebiobe.

Gode weng ayok olo enaminobe. Yudaba nakaia unanga ibo Klaiste ib bobol tem wat biebe. Sinanomo e nakaia unangai dletnea monea Gode bib ye danea nomabib kesoa ibo am olo waiso bianiba seimbio. <sup>28</sup> Ni Klaiste wengo nakaia unangai bib mak bib mako blibi omkayebob kesoa Gode bobol tem funin ayamo ni omkayebea ni e wengo nakaia unangai omkaye bianoba i kukub misiamo nabibo aleye bianoba baabenoba Ibo Klaiste wengo bainobo genimibo e ib kukub misiamo omlabenamabebo ge oye-buobe. Ni funanoba Ni i dleb monoba God esu danoba e yatenea funanea I Klaiste wengo tekein keniba i bainobo galino sbal maniba ite Klaist ete naniba makob aibobo ge funaneke genobta Yesus Klaiste wengo i omkayebuobe. <sup>29</sup> Nesa inangge funanita ne okoko sbalma biania okok kebibe. Ne nene titilo okok olo mo okok kebibabe. Klaiste emaye e titil beselibo omkanebeta ne e okok olo okok kebibe.

## 2

*Ibo dim wengo tlemo mo wentemibe!*

<sup>1</sup> Ne funania Ne weng olo ibo baabenimio kla tekein keine geiobe. Ne okoko sbalma biania ibsa eka Leodisia bib seli bainobo galin nakaia unanga isa eka bainobo galin nakaia unangai bib mak bib mako blibi i sino ne mo natemim blim isa daayebibe. <sup>2</sup> Ne okoko inania sbalma biania ibo daayebi kesoa ibo sbal maniba bobol ayam fumbianiba ib sinwalo ib bobol temo makob aniba maki gobeniba daabesese bianiba Gode wengo sino ayok binobio weng olo kla wenteniba tekein keine ge fumbibe. Weng ayok olo Yesus Klaist emaye ele weng sangobe. <sup>3</sup> Nakaia unangai imalo Gode wengo mitmakamo mo tekein kebimba otane Yesus Klaiste elekiem eleta inamin namino alukum tekein kebe kesoa ibo e bainobo geniba e doboniba ib bobol temo dababbaib mole e ibo Gode wengo mitmakamo kla alebenea tekein kenomabiobe. <sup>4</sup> Ne ibo baabeniba Gode tekein kemino Klaiste elekiem eleta tekein kebebo ge baabeibio kesoa naka mak unang maki men weng men wengo baabenimibo ibo i wengo mo wentenibta Gode wengo mo deibonimibe! <sup>5</sup> Ne ib-suo mo bliba otane ne ib bobolo amitie fumbibe. Ibo Yesus Klaiste bainobo galino sbal maniba ib sinwalo ib bobol temo funino makob am blib kesoa ne seinyebibe.

*Ibo Klaist emi kesoa ibo e kukubo amitie wafunine!*

<sup>6</sup> Ibo sino Yesus Klaiste wengo wenteniba baaniba Bainobo Yesus Klaiste nib Sumobo geibbio kesoa ibte ete naniba ib bobol temo funino makob aniba ibo e kukub ota kla

wafueine! <sup>7</sup> Sino Ebaflase Yesus Klaiste wengo ibo alebenebio kesoa ibo makob ase kimkimo dabal tem daak unanoa nekek genoa geigebio inaniba ibo Yesus Klaiste wengo kla wafuniba sbal maine! Ibo Yesus Klaiste wengo kla wente bianiba ele weng baaneme iwat inamine! Ibo inamib mole ib bainobo galino sbal manomabiobe. Ibo amitie Gode gangobo ge oha bianibte! <sup>8</sup> Naka maki bobol temo funaniba I Yesus Klaiste wengo deibueine ge fumbib kesoa i dim omin wengo mitmakam blim ota ibo omkayebiobe. I weng olo dabalim nakai wengobe. O Gode wengbabe. I ili faninwali hekmel weng osa eka bekeli hekmel weng osa ota ibo omkaye bianibta baabenibta Ibo weng olota wafu nine ge oyebiobe. Weng olo ili wengobe. Olo Yesus Klaiste wengba kesoa ibo i weng olo mo wenteyemibe! <sup>9</sup> Klaiste nakane dimo Gode e titil osa e bobol temo funin osa e omalea i dumo makob aibbio kesoa Klaiste wengo olota bainobe. <sup>10</sup> Klaiste abiseli komokwal isa hob misiami komokwal isa alukum gaisenebiobe. Ibo ibte Klaist ete naniba ib bobol temo makob am blib kesoa ibo Gode kukub ota wafu bianiba naka molot unang molot an bliobe. <sup>11</sup> Yuda ni memei naka teni aalo wetlabenomobo baanoba Memalo i God emiobo gabinabob otane kukub olo besabe. I aalo olo bobol ota fumbianiba i aalo waketoubiobe. Otane ibole Klaiste tenaniba makob an blib kesoa ibo aalo bobolo mo fumbibbabe. Ibole Sume ib bobol temo hengmino omlabenebuo bobol ota fumbib kesoa ni tekein kebuobe. Ibo God emiobe. <sup>12</sup> Ibo Yesus Klaiste atdimmo kaanea Gode titilo e imin dofaanea hana tlebuo bainobo geiba aayo fuelabeibbu olo makob ibo kaaniba Yesus Klaiste tena dol-bueibbiobe. Eka mak osa ibo aayo fuelabeibbu olo makob ibo Klaiste tenaniba imin hana tibbiobe. Ibo inaib kesoa Gode bobol temo funino ayam ota ibo omyebua memalo ibo e bobol temo funin ayam olo amitie wafu bliobe. <sup>13</sup> Sino ibo bobol temo misiam fumbianiba hengmino amitie henga binibbiobe. Ina otane Gode amo yo dimo ib hengmino omlabenea bobol temo funin ayamo omye kesoa ibo Klaist ete naniba ib bobol temo funino makob aniba makob nakai kaaniba imin hana tenabib inaibbiobe. <sup>14</sup> E inanea nib hengmino omlabenebiobe. Sino ibo Gode hekmel wengo mo wafueim blim blib dimo ibo hengmino henga binibbiobe. Gode ibo hengmino hengabibo watenea e buk temo dolanebua denea Klaiste atdimmo kaanamabe dimo, olo makob Gode nib hengmino hengabob olo weng sango dolanebuo omonea Yesus yebbaka atdimmo dlasanea silo biki wananea kaanobiobe. Kukub olo





i kukub misiam olo nabibo molo yang kenea enino omyamabebe. <sup>7</sup> Ibo sino Yesus Klaiste mo bainobo geim blim binibbio dimo ibsa kukub misiam olo wafu binibbiobe.

<sup>8</sup> Ina otane memalo ibo Yesus Klaiste bainobo gabib kesoa ibo naka mak unang maki dosuanin kukub osa atliyemin kukub osa eka funyatememin kukub osa eka weng dobo weng omin kukub osa eka weng misiam omin kukub osa alukum deibueine! <sup>9-10</sup> Ibo ib sinwalo maki dimo mo baabesese nimibe! Memalo ibo bobol tem misiamo sino fumbinibbuo deiboniba ib bobol tem funino mema kukub ota wafu blib kesoa ibo kukub misiam olo mo wafu nimibe! Gode ibo klanebio nakae bobol tem funino memao ibo omyenea daaye bianea am obba ye bomanomo bomanomo yo dimo Klaiste kukubo ibo amatie aleyebe kesoa ibo makob Gode ele ulab bianiba e bobol tem funino tekein kebiobe. <sup>11</sup> Inamin kesoa Yesus Klaiste bainobo galin nakaia unanga nibo makobobe. Nibo obianoba ibo Yudabo gese eka Ibo Yudababo gese nin kukub osa eka mak ibo aalo waketoubiobo gese eka mak ibo aalo mo waketoubibbabo gesenin kukub osa eka mak ibo weng afe-tobo gese eka mak ibo sesa nakabo gese nin kukub osa eka mak ibo okok nakabo gese eka mak ibo kimanin nakabo gese nin kukub osa mo wafunomobe! Niminbabe, Yesus Klaiste nakaia unanga nib bobol temo alukum bibe bie kesoa nibte ete nanoba nib bobol temo makob ambiobobe.

<sup>12</sup> Gode ibo dlakanea Nemiobo genebio kesoa ibo emibe. E ibo kla gobe bie kesoa ibsa inaniba naka mak unang maki dohalim bianiba daaye bianiba weng fiab omkaye bianibte! Ibo ilib tako mo ngam bianibta Ni niniin sumobo galaibe! Eka kukub misiamo ib dimo tam tlamoo osa ibo alo mo tliaubenomone! <sup>13</sup> Ib isak temo nakae waneta naka make e dimo kukub misiamo nabane mole e mo yang kenemene! E deibanea e neke kukub olo nabaneo bobolo funino dokobanoa deibaneko! Sum esa inanea nibo kukub misiamo nabobo bobolo funino dokobanoa deibenebio kesoa ibsa inaniba naka mak unang maki hengmino bobolo funino dokobenoa deibueine! <sup>14</sup> Ibo kukub ayam olo alukum nabianiba naka mak unang mak isa kla gobe bianiba daayemine! Naka mak unang maki gobesesenin kukub olo dot ayamobe. Kukub olo kukub afeto gaisonobiobe. Ibo naka mak unang maki kla gobe nib mole ib sinwal ib bobol temo makob anomabiobe. Ibo inaib mole ib sinwalo mo dosuanasese nomabibbabe. <sup>15</sup> Klaiste ibo bobol tem fiab omkayebe kesoa ibo Klaiste bobol tem fiab omkayebe

olo deibueiba ibo kimanoko! Niminbabe, Gode ibo dlakanea baabenea Ibo nemi kesoa ne bobol tem fiab omyamabibo, ibo bobol tem fiab bianiba ib sinwalo mo dosuanasese nimibe, ib bobol tem funino makob aine genebio kesoa ibo e weng olo wente bianiba Gode gangobo ge ohamine! <sup>16</sup> Ibo Klaiste wengo kla wente bianiba ib bobol tem daako omabba bianiba fumbianibte! Ibo inamib mole e wengo kla tekein keniba ib sinwalo alebesese bianiba dlo klasese nomabiobe. Ibo e wengo kla fumbianiba Gode gangobo gabianiba komok sumo Debite Gode buk temo anso dolanebu osa eka lotu kemin ans osa eka Gode Hobe anso ibo omkayebe osa ngambiam nine! <sup>17</sup> Ibo ilib bobol tem funino mo wafu bianibta okok osa weng osa ilib bobol temo mo namibe! Ibo weng osa okok osa namibo ibo Yesus Sume bobolo fumbianibta namine! Yesuse ibo daabenebio kesoa ibo ib Aye Gode baabaniba Kobo gang nanebta Yesuse dobyehta atdimoo kaaneta ni daabenebiobo ge ohamine!

*Awok aaleb kamwal isa eka i meme isa i wengobe.*

<sup>18</sup> Alelwal ibo nib Sume Yesus Klaiste bainobo geibbio kesoa ibo ib imakwali wengo kla wenteye bianiba ili weng baanimib iwat namine! Ibo inamibo Sume kin dimo ib kukub olo nabibo ayamobe. <sup>19</sup> Eka imakwal ibsak ib alelwali dleb wengo mo oye bianibta dosuanimibe! Kla gobe bianiba kima nine!

<sup>20</sup> Meme ibsa ibo Yesus Klaiste bainobo gabib kesoa ibo ib biem ay kamwali wengo kla wenteye bianiba ili weng baanimib iwat namine! Ibo inamib mole Sume ib kukubo yatenea seinyemabebe. <sup>21</sup> Aaleb kamwal ibo ib memei mo dolbianibta dosuan bianibta atliyemino mo omkayemibe! Ibo inayemib mole i bobol tem abilo wafu bianiba i kukub ayamoo mo wafunomabibbabe.

*Okok naka isa i kimanin naka isa i wengobe.*

<sup>22</sup> Eka okok naka ibo ib kimanin nakai wengo kla wenteye bianiba ili weng baanimib iwat nabianiba okoko sbalma okok kemine! Ibo okoko tengo mo yebota fumbianibta Ni kimanin nakai kin dimo sbalma okok keboba i ni seinyemine gabianiba okok kebiba kimanin nakai deibe haanimibo okoko deiboniba besa bliba kimanin nakai imin tesiba yateniba yota okok kebuobo galin kukubo mo wafu nimibe! Ibo Sume Yesus Klaiste kla goba bianiba ib kimanin nakai okoko sbalma okok kemine! Ibo inamib mole Sume ib kukub olo watenea seinyemabebe. <sup>23</sup> Ibo

inamin namin okoko okok kemibo ibo mo funanibta Ni okok olo naboba naka mak unang maki ni yateniba seinyemine galin bobol temo mo funimibe! Ib bobol tem olo Sume ni okoko watenea seinyemeko galin bobol tem ota fumbianiba ib bobol temo klayam bianiba okoko sbalma okok kemine! <sup>24</sup> Ibo Sume Yesus Klaiste bobolo fumbianiba okok kebib kesoa ibo tekein kebiobe, sino e baanea Sinanomo ne inamin namin ayamo ne bainobo galin nakaia unangai doyamabibo genebio kesoa e bain inanea ibo okoko ayam okok kebinib biamo molo yang kenea doyamabebe. <sup>25</sup> Eka nakaia unangai kukub misiamo nabib ile Gode i kukub misiamo yang kenea enin kino omyamabebe. Gode nib kukubo klanang gameo e mo funaneta Ne kimanin naka ele e kukub misiamo molo yang kenamino deibania okok naka eta e kukub misiamo molo yang kenano ge funanemebabe. E funanea I makob kesoa ne i kukub misiamo molo makob yang kenano ge funanamabebe.

#### 4

<sup>1</sup> Kimanin naka ibo ib kimanin nakae abilim ut bianea ib kukubo nabibo wate-meyebe kesoa ibsak inaniba ib okok nakai kla kima bianiba kukub ayam omkayemine!

*Ibo Gode amit nganha bianibte!*

<sup>2</sup> Ibo amitie Gode nganha bianibte! Ibo Gode nganhamibo bobol tem afeto mo funimibe! Gode bobolo olota fumbianiba gangobo ge ohamine! <sup>3</sup> Ibo Gode nganhamibo ni bobol osa fumbianiba Gode baabaniba Kobo Folwali daaye bianeba i deibo klaubeneba moniba bib mak bib mak haabianiba Yesus Klaiste wengo sino ayok binabo otane memalo kobo alebenedbuo, weng olo nakaia unangai omkayemine ge ohamine! Ne sino Yesus Klaiste wengo nakaia unangai omkayebio dafa ota nakaia unangai teniba ne ge nemeb teniba klabutam ele daibbiobe. <sup>4</sup> Gode baatneanea Kobo ne weng olo nakaia unangai kla omkayemale ge baatnebio kesoa ibo Gode baabaniba Kobo Fole daahabebe e keb wengo omkeimabebe nakaia unangai weng olo kla tekein keine ge ohamine! <sup>5</sup> Ibo amitie bainobo galinba nakaia unangai kukub ayamo nayemine! Ibo i inayemib mole isa bainobo genomabiobe. Ibo tengmo mo yebota i kukub ayamo nayemino deibenimibe! <sup>6</sup> Nakaia unanga ib sital dimo wengo klayamo olota obiba naka mak unang maki Gode tal walin wengo kil baabenimibo ibo i wengo ayam yang kebeine!

*Fole Tikikas esa Onisimas esa i dlanea moniba Kolosi bib onsiobe.*

<sup>7</sup> Ne nib neke Tikikase ne kla goba bli kesoa ne dabaia monea ibsu natlanea ne okok osa eka ne bli osa o weng sango baabenamabebe. E Sume okok naka ayam kesoa ete nite nanoba Sume okoko okok kebuobe. <sup>8</sup> Ne e baabania Kobo moneba Kolosi bib seli nibo biobo weng sango baabeneba i nib weng sango wenteniba bobol ayam funaine ge baabania dabaia natlamabebe. <sup>9</sup> Tikikase natlamabeo ib bibam sake Onisimas esa baka natlamabebe. Esa nib Sume okoko amitie okok kebe kesoa esa nib nekobe. Nibo e kla goba biobobe. Esa Tikikase i dabo teniba ni okok osa eka ni biob osa o weng sango ibo baabenomabiobe.

*Folwali Kolosi bib seli Klayam blibte ge baabesiobe.*

<sup>10</sup> Alistakase ne bakanea klabutam bie esa eka Banabase ninge Mak esa i dabo ibo Klayam blibte ge baabeibobe. Sino ne ibo futano dola omfubenia baabania Make tenea ibsu tlameo ibo e kukub ayam omaline ge baabeibio kesoa e tlameo inabaine! <sup>11</sup> Eka naka make niniino Yesus Yastas esa Klayam blibte ge baabenebe. Naka asumatna eli Yuda nakabe. I Yesuse bainobo gabiba ite nete nanoba Gode wengo nakaia unangai omkaye bianoba baabenoba Ibo Yesuse bainobo geiba Gode ibo kimaneko ge oye binabuobe. Yudai bainobo galin nakaia unangai maki mo inanibta ne mo daanebibbabe. Yudai asumatna elita kla daanebibta Gode wengo naka mak unang maki omkaye binabuobe. <sup>12</sup> Ilib bibam sake Ebafas esa Ibo klayam blibte ge baabenebe. Esa Yesus Klaiste okoko okok kebebe. E Gode amitie nganha bianea God kobo Kolosi bib seli bainobo galin nakaia unangai daayebeba i bainobo galino sbalma bianiba keb wengo kla wente bianiba kleb weng baanemeb iwat namine ge oha binabebe. <sup>13</sup> Ne Ebafase okoko nabeo tekein kebi kesoa baabenamabibe, e okoko sbal okok kebianea ibsa Leodisia bib sel isa Hilabolis bib sel isa daaye binabebe. <sup>14</sup> Dokta Luke ni goba biob nakae Dimase i dabo Ibo klayam blibte ge baabeibobe. <sup>15</sup> Ibo Leodisia bib seli bainobo galin nakaia unanga isa eka Nimfa osa eka bainobo galin nakaia unangai teniba o amo mina bianiba Gode niniino dobtoulebb lib isa baabeniba Fole baanea Ibo klayam blibte genebo ge baabeine!

<sup>16</sup> Ibo ne weng olo kiniba wentaibo Leodisia bib seli bainobo galin nakaia unanga isa omfubeiba kiniba tekein keine! Eka ne futano Leodisia bib seli bainobo galin

nakaia unangai dola omfubeibuo ibsak omfubeiba kiniba tekein keine!

<sup>17</sup> Ibo Akibase baabaniba Kobo Sume okoko omklebio mo deibonemebe, alukum klaneba blimanoko ge baabaine!

<sup>18</sup> Ne wengo sin ewile om daake dai olole ne besa weng obita naka mak eta dolam daakelane otane Klayam blibte genamin weng olole nemaye nene kweilo tubunita dolanamabibe. Ne inania dola omfubeia ibo wateniba tekein keniba Bainobo Fol eta futan olo dola omfubenebo geine genitabe. Ibo ne klabutam ele blio ne bobolo mo dokobenomone! Gode ibo daayemeko! Ne wengo bayotabe. Fol neta ib futan olo dola omfubenamabibe.

## **1 Tesalonaika** **Fole Tesalonaika bib seli** **futano mikiktemo dola** **omfubenebiobe.** **Tekein kemim wengobe.**

Yesuse atdimmo kaanea imin hananea ulanea abilim unebua bifolo 20 ese mak blimanota Fole Kolin bib ye bianeta futan olo dolaneta Yesuse bainobo galin nakaia unangai Tesalonaika bibo bliibi omfubenebiobe. Sino Fole monea Tesalonaika bib ye bianea Yesuse wengo omkeimabea nakaia unangai maki Yesuse bainobo geiba o dafa ota Yuda naka maki bainobo galin nakaia unanga eli kukub misiam omkayemib kesoa Fole deibenea bebianea okok kem wat okok kem wat binea monea Kolin bib ye bieta Timotie monea esu unanea Yudai teniba Yesuse bainobo galin nakaia unanga eli kukub misiam omkayebibo weng sango baabasea wenteneta i futan olo dola omfubenea dosbal mana bianeta eka Yesuse imin tlamabeo weng sang osa baabe nanebiobe.

1:1 Mikiktem wengobe.

1:2-3:13 Gode gangobo galin osa eka e niniino dobtouleh nin osa o wengobe.

4:1-12 Yesuse bainobo galin nakaia unangai namino wengobe.

4:13-5:11 Klaiste imin tlamabeo wengobe.

5:12-22 Yesuse bainobo galin nakaia unangai namino wengobe.

5:23-28 Mubiang wengobe.

<sup>1</sup> Ae bainobo galin nakaia unangai Tesalonaika bib ye bliib ibo Fol nesa Sailas esa Timoti esa nita ib futan olo dola omfubenomabbioebe. Ibo nib Aye God esa nib Sume Yesus Klaist esa i meletanobe. Gode ibo daabenea bobol tem ayamo omyeko!

*Tesalonaika bib seli bainobo galino sbalma binibbiobe.*

<sup>2</sup> Ni amitie Gode nganha bianoba God kobo bainobo galin nakaia unangai Tesalonaika bib seli daabeneba i bainobo galino sbal maine ge oha bianoba Gode gangobo gabuobe. <sup>3</sup> Ni amitie Aye Gode oha bianoba Tesalonaika bib seli bainobo galino sbal maniba Yesus esa eka nakaia unangai e bainobo gabib isa gobe bianiba bainobo galin naka mak unang maki daaye bianiba i bobol temo fumbianiba Sume Yesus Klaiste imin tlamabeo ge fumbianiba waisa bliobo ge ohabuobe. <sup>4-5</sup> Nekwal ibo ni Yesuse dowan weng ayamo ibo omkaye binobbuo weng olo besababe. Weng olo titilsa kesoa ibo kla wentibbiobe. Gode Hob

eta weng olo ib bobol temo omabbebeneta ibo baaniba Weng olo motonobo geibbiobe. Ibo inaibbuo nibo tekein kebuobe, Gode ibo gobenea funanea I ne meletan aine ge baanea dlakanebiobe. Ibo tekein kebiobe, ni okok olo nabianoba ibo daayebobo watemibbiobe.

<sup>6</sup> Ibo ni Sume kukubo nabobo yateniba ibsa makob nini nabob inabiobe. Ibo Gode wengo wenteniba Yesuse bainobo gabib o dafa ota naka maki tenibta ibo enin sumo omkaye binabib otane ibo Gode wengo wentebib kesoa Gode Hobe daabene seinin bobol temo omkayebebe. <sup>7</sup> Ibo ina bianiba Yesuse bainobo galin nakaia unangai Masedonia betan ye bliib isa eka Glik betan ye bliib isa kukub ayamo al-eye bianiba <sup>8</sup> eka Gode wengo omkaye biam bliiba i wentiba eka bib mak betan mako bliib isa i alukum ibo Yesuse bainobo gabibo weng sango alukum wentibbio kesoa ni ib bainobo galino wengo imino mo baabenomabbioebe. <sup>9</sup> Niminbabe, sino ni ib hibamo biob dimo ni kukub ayam nabeiba nakaia unanga eli wateniba baaniba Bainobo galin nakaia unangai Tesalonaika bibo bliibi i god dim omino deiboniba i bobol temo Gode oman bianiba Gode okoko klabianiba Gode moton amit ninobo gabianiba <sup>10</sup> e miine abilim danea imin tlamabeo waisa binabiobo gabiba ni wentebuobe. Gode miine Yesuse kaanea e imin dofaanea hananebue nibo daabene sinanomo Gode nakaia unangai kukub misiamo wafu binib biamuei dosuananea enin sumo omyamabe otane nibo mo dosuananamabebabe. Niminbabe, Yesuse nibo daayebebe.

## **2**

*Fole Tesalonaika bib ye okok kebisebe.*

<sup>1</sup> Ni nekwal ibo tekein kebiobe, sino ni monoba ibsu ye bianoba daaye bianoba Gode wengo omkayeboba ibo Yesuse bainobo geibbio kesoa ni okok olo yamo bali-nobiobe. <sup>2</sup> Ibo tekein kebib yotabe, sino ni Filibai bib ye biobo Filibai bib seli enin sum osa dim omin weng osa omkayebiba ni Filibai bibo deibonoba tenoba Tesalonaika bib ye tlanoba Gode wengo omkeimabobo, Gode titilo omkayebea ni mo tosianim blim sbalma bianoba Gode dowan weng ayamo omkayeboba naka mak unang maki Gode wengo gobueim blim keibi ni enino omkayebib otane ni mo tosiainin blimobe. Ni sbalma bianoba Gode wengo omkeima binobbioebe. <sup>3</sup> Ni weng olo ibo omkayebobo bain wengobe. Ni dim weng osa bobol wayemin weng osa mo oye bianoba eka kukub misiam osa mo naye biam biob-babe. <sup>4</sup> Gode funanea Naka eli bobol tem

funino ayamobo, i ne wengo naka mak unang maki kla omkayemine gene kesoa e ni dlakanea e dowan wengo ayamo omyebua weng olo ni omkaye binabuobe. Ni weng olo omkayebobo ni mo funanobta Nakaia unangai funaniba I ayamobo geine ge funanomobbabe. Ni funanoba Gode funanea I ayamobo geneko ge fumboba Gode emaye ni bobol tem funino tekein kebebe. <sup>5</sup> Ibo tekein kebiobe, sino ni ibsu tlobo ni ibo men weng men wengo mo oye bianoba eka ib inamin namino bobolo mo waye biam nim blimobe. Ni ibo mo baabenobta Ib inamin namino ni mo do yine ge baabenaim blimobe. Gode tekein kebebe, ni wengo bainobe. <sup>6</sup> Ni ibo mo baabenobta Ibsa naka mak isa ni niniino dotouleb nine galin weng osa mo baabeim blimobe. <sup>7</sup> Ni Yesuse okok dlasanin naka kesoa ni baabenoba Ibo ni daabeine ge baabenomob osa ayam otane ni inamin wengo mo baabeim blimobe. Ni ibo bekebe biobo ni kukubo fiab bianoba makob unangi meme gwabi fiab beteng kima binabib inaye binobbio. <sup>8</sup> Ni inanoba ibo kla gobe bianoba Gode dowan weng ayamo ibo omkaye bianoba daaye binobbuo ni fumbianoba Ni tenggo mo yemone ge fumbinobbio.

<sup>9</sup> Nekwal ibo tekein kebiobe, sino ni ibo bekebe bianoba Gode dowan weng ayamo omkaye binobbuo dimo ni funanoba Ib imeno do yine genamin wengo mo baanomobe ge funanoba ni okoko sbalma bianoba kwin tebo boman tebo dimo ni amitie okok kebianoba ninimi ye dlo wembinobbio.

<sup>10</sup> Ibsa God esa tekein kebiobe, ni sino bainobo galin nakaia unanga ibo bekebe bianoba ni kukubo nabinobbuo hengmino blim ayam molotobe. Ibsa Gode esa ni kukubo wateniba tekein kebiobe, ni kukubo ayamobe. <sup>11</sup> Ibo tekein kebiobe, sino ni makob naka make e mine kimanamabe inanoba elekiem olokiem ibo kima bianoba <sup>12</sup> am mak bomanomo am mak bomanomo ni weng ayamo sbalma omkaye bianoba baabenoba Ibo kukubo ayam wafueiba Gode yatenea seinye biane bobol ayamomyeko! Gode ibo dlakanea baabene Ibo ne wengo wentemibo ne dleb monia ne bib daia ayam aniba makob ne ulab anomabiobo genebio kesoa ibo e wengo sbalma wente bianibte ge oye binabuobe.

*I bainobo galino sbalma binibbiobe.*

<sup>13</sup> Eka ni Gode weng olo inanoba ibo omkayebobo ibo wenteniba funaniba Weng olo nakai wengbabo bain Gode wengobo geibbio kesoa ib bobol tem funino molotobe. Ibo inaniba bainobo geiba Gode

weng olo ibo daabenoa ib bainobo galino omsbal mabenoa ni ib kukub olo naibo fumbianoba Am mak bomanomo am mak bomanomo Gode oha bianoba i kukub olo ayam kesoa ni seinyebuobo ge oha binobbio. <sup>14</sup> Nekwal ibo makob Yesus Klaiste bainobo galin naka unangi Yudia betan ye bliibi ulabobe. Ib bibam seli ibo enin sumo omkayebibo makob Yuda nakai Yesuse bainobo galini enin sumo omkaye binibbio inayebiobe. <sup>15</sup> Sinanggwano Yuda nakai Gode weng omkeimalin nakai yebinibbia i molobsel isa inaniba Yesus Sume ananibbuo memalo i ni enin sumo omkayebibo Gode i kukubo mo gobo biebabe. I naka maki alukum i makaabe. <sup>16</sup> Niminbabe, ni Gode wengo bib mak bib mak seli omkaye bianoba baabenoba Ibo Yesuse wengo wentib mole Gode ibo hengmino temo bliibo dotlanamabebo gabob wengo watanomo gabib otane i mo inaim blimobe. Ina otane i amitie hengmino hengabiba i hengmino sum anoa memalo Gode atlihamino i dimo tam tebiobe.

<sup>17</sup> Yudai ni kululaiba monoba bib mak ye bianoba ib kibio ni mo yatemin blim biob otane ni ib tebo imen teb keyebua yatemomo gabianoba ni amitie ib bobolo fumbuobe. <sup>18</sup> Ni imin monoba ibsu natlomo gabianoba am mak bomanomo am mak bomanomo ne natlang gabi otane Gululame wata binabebe. <sup>19</sup> Sinanoa nib Sume Yesuse imin tlea ni tenoba e kibi kaba sin ye manomobo ni nimin dlomabbione? Ni inamin namino fatnamin ota dlonobta seinomabbione? Ni inamin namino dlo alebanomabbu olo itabe. <sup>20</sup> Ni ibo dlonoba Yesuse alebanoba baabanoba Ni okoko olota nanobbio ge baabanomabbio kesoa ni seinbuobe.

### 3

*Timotie Tesalonaika bib seli bainobo galino dosbal masebe.*

<sup>1</sup> Ni inabob kesoa Sailase ni dabo ib bobolo funanoba Ni i wengo wentomo geob kesoa ni dabo Atens bib ye bianoba Timotie eta dabanoba monea Tesalonaika bib unanea i wengo wenteko genoba dabanoba natlebiobe. <sup>2</sup> Timotie ni ningobe. Ete nite nanoba Gode okoko klabianoba Klaiste wengo omkeima binabuobe. Ni dabo e dabanoba monea ibsu natlanea Gode wengo ibo omyenea ib bainobo galino omsbal mabenebiobe. <sup>3</sup> Ibo Yesuse wengo wenteniba bainobo gabib o dafa ota nakai Yesuse wengo mo gobo bliibbai ibo enin sumo omkayemib kesoa ni Timotie dabanoba monea ib bainobo galino omsbal manebua ibo Yesuse wengo mo deibueim

blim sbalma wafu bliobe. Ibo tekein kebiobe, Gode emaye nibo dlakanea funanea I Yesuse bainobo gabib o dafa ota naka maki enin sumo omkayebiobo genebiobe. <sup>4</sup> Sino ni ibo bekebe biob dimo baabenoba Sinanomo naka maki ibo enin sumo omyomabiobo ge baabenobbuo kukub olo tam tlebua ibo tekein kebiobe. <sup>5</sup> Ne ib bobolo fumbiania ne bobol tem daako tekanebua I Yesuse bainobo geibbuo memalo i bainobo galino sma wafu blib bleka? Gululame i men weng men weng oyemsea i e wengo wenteniba Yesuse wengo deibueibbuo gabianea tekabibe. Sino ni ibo bekebe biobo ni bumolok bianoba Yesuse dowan weng ayamo omkeimaboba ibo wente binibbuo memalo ibo weng olo sma wafu bliba bleka deibueibbuo? Ne mo tekein kebibabe, ne ib wengo mo wentim blimobe. Ne ib bobolo funai kesoa ne Timotie dabaia monea imin daabeneko genia dabaia ibsu natlebiobe.

*Fole Tesalonaika bib seli wengo wentene seinye binebiobe.*

<sup>6</sup> Memalo Timotie ibo deibenea ib dowan weng ayam olo ometnea imin tenea baabene I Yesuse bainobo galino sma ye sbal maniba nakaia unangai gobe bianiba ib dab ib bobolo sma fumbianiba ib dabo yatemomo gabibo makob ib dabo naniba I yatemomo gabib inaniba isa ibo yatenamin teb yebobo gesea <sup>7</sup> ni dabo wentenoba seinyebuobe. Naka maki teniba kukub misiam osa enin sum osa ni omkayebib otane ni mo simambobbabe. Niminbabe, ibo Yesuse wengo sma wafu blib kesoa ni seinyebuobe. <sup>8</sup> Ibo inaniba amitie Yesuse bainobo galino sbalma blib mole ni seinye bianoba ni bobolo ayam funomabbio. <sup>9</sup> Ni ib bainobo galino fumbianoba Gode nganha bianoba I Yesuse bainobo galino sbalma wafu bliba ni seinyebobo, ayamobo gabuobe. <sup>10</sup> Ni kwinomo bomanomo dimo amitie Gode oha bianoba Kobo ni dletneba monoba Tesalonaika bib seli yatenoba eka i bainobo galino menube biamo imin omsbal mabenanomo ge ohabuobe.

*Fole Gode baabanea Kobo nemetneba Tesalonaika bib seli isu unano gambisebe.*

<sup>11</sup> Nib Aye God esa eka nib Sume Yesus esa i ni deibo klaubeiba ni imin ibsu natlomo! <sup>12</sup> Sume ibo daabenea bainobo galin nakaia unangai gobeniba eka naka mak unang mak isa kla gobe naniba ib gobenin kukubo sum anoa makob ni ibo gobe biob inaine! <sup>13</sup> Aye Gode inanea ib bobol tem funino omsbal mabenebua sinanomo Yesus Sum esa e meletan isa tlaibo ibo e kibi kaba sin ye maniba e yatemnea baanea Naka eli kining ayamobo geneko!

## 4

*Gode kukubo enamin ota gobo biebe.*

<sup>1</sup> Nekwal ibo ni weng mako baabenomabbio. Sino ni ibo bekebe biob dimo ni kukub ayam olo alebenoba baabenoba Ibo kukub olo wafueib mole Gode seinyemabebo genoba ibo wenteniba kukub ayam olo wafu bliobe. Memalo Yesuse wengo ni omye kesoa ni weng olo baabenoba Ibo kukub ayam olo sbalma wafueine ge baabenoba wafu blib olo kla wafueine!

<sup>2</sup> Yesus Sume ni sbal wengo omya ni e okoko klabianoba weng olo baabenobiobe. <sup>3</sup> Gode ibo baabenea Ibo amitie kukub ayam ota wafuniba taman kukub olo mo wafunimibe gabebe. <sup>4-5</sup> Ib isak temo nakai wanibta alelwali dlom gib mole ib bobol tem funino ayam fumbianiba alelwali dliba Gode ibo yatemnea funanea I kukubo ayamobo geneko! Ibo unangi bobolo mo wayebota makob nakai Gode wengo mo wafunim blimi naniba unangi bobolo wayebo inamibe! <sup>6</sup> Ibo ib nekwali kukub misiamo mo omyaibe! Ibo i alelwali taman deibo mo dlet nimibe! Sino ni sbal wengo ibo baabenoba Ibo kukub misiam olo wafunib mole Gode ibo yemde danamabebo ge baabenobbio. <sup>7</sup> Gode nibo dlakanebue e mo baabeneta Ibo taman kukubo wafueine geim blimobe. E baabene Ibo kukub ayam ota wafueine ge baabenobiobe. <sup>8</sup> Ni weng olo omkayebobo naka maki baaniba Weng olo motonbabo geib mole i weng olo naka ita baabenobobo genomabib otane i weng olo Gode e Hobe ibo dohyebu eta baabanomabiobe.

<sup>9</sup> Ne ibo bainobo galin naka mak unang maki gobeine genamin wengo imino mo baanita dolanimibabe. Niminbabe, ibo tekein kebiobe, Gode emaye inangge baabenobiobe. <sup>10</sup> Ibo Yesuse bainobo galin nakaia unangai Masedonia betan ye blibi gobe blibo memalo ni ibo baabenomabbuo Ib gobenin kukubo sbalma bliobo genomabbio. <sup>11</sup> Ibo ib imen wemin okoko ibmaye okok kebianibte! Ibo naka maki mo baabenibta Ib okoko inaine inaine gabianibta oyemibe! Ibo kimanin kukubo mo wafunimibe! Ilib okoko bobolob fumbianiba makob sino ni baabenobbio inaniba ilib okoko olob okok kebianibte! Ibo mo ina bianibta kikamin kukubo mo wafunimibe! <sup>12</sup> Ibo inaniba ibmaye imen wemin okoko klamib mole bainobo galin nakabai yateniba funaniba Naka eli ayamobo genomabiobe. Eka ibo ib nekwali mo baabenibta Ni imeno mo oyine genimibe!

*Sume imin te dletnea abilim unomabiobe.*

<sup>13</sup> Ne nekwal ibo ni funanoba Ib isak temo bainobo galin naka mak unang maki kulilabiba ib bobol tem daako ilum omkayebua halin bianiba makob nakaia unangai Gode bainobo galinbai naniba i nekwali kaanimibo i funaniba I amitie kaaniba alang namaibobo geniba mebinabib yo ibo mo inamibe ge fumbuobe. <sup>14</sup> Niminbabe, sino Yesuse kaanea Gode imin dofaanea hananebio kesoa nibo tekein kebuobe, sinanoa Yesuse imin tlang gameo dimo bainobo galin nakaia unangai kulila binabibi Gode imin dohaanea hananiba Yesus etem na tломabiobe.

<sup>15</sup> Yesus Sume e wengo ni alebenebue ibo baabenomabbioe. Sinanoa Yesuse imin tlang gameo afen bianoba e bainobo gabob naka unang nibo bainobo galin nakaia unangai kulilabibi mo gaisenobta abilimo sino nibo mo unomabbioabe. <sup>16</sup> Am olo dimo Sume abilim ut danea tebianea weng sumo ngananabea eka abiseli komok mak esa weng sum ngananabea Gode bigule obana bianea Gode bainobo galin nakaia unangai kulila binabibi sin dohaanea hana tlibta eka <sup>17</sup> omit ole sma afen bianoba bainobo gabob nibo tem nanoba beboba Sume tebe nanoba ayung tem ut tete-nanoba minoba utnoba abilim uto amit nomabbioe. <sup>18</sup> Nibo inanomabbio kesoa ibo weng olo ib nekwali omkayebiba i wente bianiba bobol ayam fumbibte getabe.

## 5

*Nibo sin klanoba Sume tlamabeo waisa bianoba hembobte!*

<sup>1</sup> Nekwal ibo wentine! Amo fatnamin dim ota Yesuse imin tlamabene? Yesuse tlamabe amo e mo baaim blim kesoa ne weng olo mo dolanamabibabe. Niminbabe, ibo tekein kebiobe, <sup>2</sup> Sume tlang gameo makob ibalanoa ayok henin nakae inamin namino ayok dlang gameo nakaia unangai mo tekein keim blim keiba dlonabe inaminobe. <sup>3</sup> Sume tlang gameo nakaia unangai bainobo gabibbai obianiba Memalo am ayam dim kesoa ni ayam biobobo gan monibta inamin namin misiamo hebmamsab i dimo makob unango amunsa bu otane o mene dofanamabo amo o mo tekein keim blim biam binoa dofanang gamo dimo hebmamsab enin kino watenoa dofanoba inaniba i enin sumo hebmamsab i dimo tam tloa enin kino watemomabiobe. <sup>4</sup> Nekwal ibo ib bobol temo mo mililanabo inaim blim keblib kesoa Sume tenamin amo tloa hebmamsab tlamao ibo mo dlou unanibta makob ayok henin nakae tanea naka make am tam

temsea amo gosake atemnea dlou unamabe inanomabibbabe. <sup>5</sup> Yesuse bainobo galin nakaia unanga ibo ib bobol tem funino makob ayal inamin kesoa ibo Sume tlamabeo waisa bliobe. Nibo nib bobol tem funino mo mililanabo inanomobe! <sup>6</sup> Nibo mo aala unanobta makob bainobo galinba naka unangi naniba aala blib inanomobe! Nibo Yesuse tlamabe amo bobolo fumbianoba e deibo waisa henomo! <sup>7</sup> Nibo tekein kebuobe, nakai aala unom gaibo kwinota aala binabiobe. Eka nakai aay misiamo dowom gaib osa kwinota downibta gabam tol temo mima fubenota weng namin namin binabiobe. I ina binabib otane nibo mo inanomobe! <sup>8</sup> I ina binabib otane nib bobol tem funin ole makob ayalo ulabobe. Nibo bobol tem ayam ota fumbianoba makob nakai awao genom gaibo klemo wafuniba hat kabao otabbana bliba makaai ano binaiba tenoa o dim wandibina binabo inanomo! Yesuse bainobo gabob nibo bainobo galin naka mak unang maki gobe bianoba Gode nibo hengmin temo biobo dotlanea dletnea abilim unomabbio amo waiso bioba Gululame kukub misiamo omkayemeo nibo gobenin kukub osa eka Gode tlamabe amo waisonin kukub osa makob awa genalin nakai naniba klemo wafuniba hat kabao otabbana bliba ano binaib tenoa wandi bina binabo inanoba kukub olo wafunomo! <sup>9</sup> Gode nibo dlakanebue e mo funaneta Ne dlakania yemano geneta dlakaim blimobe. E funanea Ne dlakaia i hengmin temo liblo Sume Yesus Klaiste dotlaneko ge baaneta dlakanebio kesoa nibo amit nomabbioe. <sup>10</sup> Yesus Sume atdimmo kaanea nibo daabenebio kesoa sinanomo e imin tlang gameo afen biob nibte eka kulila binabib item eka Yesus etem nanoba ulanoba abilim unomabbioe. <sup>11</sup> Inanomabbio kesoa ib sinwalo weng olo obianiba daabesese bianiba ib bainobo galino omsal sambianiba makob memalo nabib inamine!

*Mubiang wengobe.*

<sup>12</sup> Ni weng olo ibo baabenomabbuo inaminobe. Nakai Sume dlakanebue ile ib komokwalobe. I ibo bekebe bianiba Gode wengo ibo omkaye bianiba aleyebib kesoa ibo naka eli daaye bianiba <sup>13</sup> ibo ib komokwali okok ayam olo watemaibo obianiba Naka eli ayamobo ge oye bianiba gobe bianibtane! Bainobo galin naka unang ibo ib sinwalo mo dosuanasese nimibe! Ibo ib bobol tem funino makob aine!

<sup>14</sup> Ni weng mako ibo baabenomabbioe. Ibo nakai okoko deiboniba bisiab bliibi baabeniba Ibo okok kemine ge baabeine! Eka tosiainin naka isa weng ayamomo omkaye

bianiba daayemine! Eka nakai bobol tem funino ayamo mo sbalma wafueim blim blib isa daayemine! Ibo inamibo nakaia unangai i mo dosuanimibe!

<sup>15</sup> Ibo inabiba naka maki kukub misiamo ibo omyib mole ibo i kukub misiamo mo yang kenimibe! Ibo amitie ib sinwalo gobese bianiba kukub ayam wafu bianiba eka naka mak unang maki alukum daaye bianiba kukub ayam ota aleyemine!

<sup>16</sup> Ibo amitie seimbiana <sup>17</sup> amitie Gode nganhamine! <sup>18</sup> Yesus Klaiste ibo daabenea e meletan aibbio kesoa kukub misiam osa kukub ayam osa ib dimo tam tlamu osa eka i kukub misiamo ibo omyaib osa ibo amitie Gode baabaniba Keb kimanin kukubo ayamobo gabiba Gode ibo seinyemeko!

<sup>19</sup> Gode Hobe okoko klameo ibo mo watamibe! <sup>20</sup> Eka Gode weng omkeimalin nakai i wengo omkeimamibo ibo weng dobo wengo mo oyemibe! <sup>21</sup> Naka maki ibo aleyemibo ibo kla fumbiana Wengo yo misiamobe eka yota ayamobe gabianibte! Ibo ina bianiba temiba wengo ayam ano mole yota wafu bianiba namine! <sup>22</sup> Ibo weng misiam osa kukub misiam osa mo namibe!

<sup>23</sup> Gode bobol tem ayamo nibo omkaye binabe nakae emaye daabenea ib bobol tem funin osa afen smik osa dam osa alukum ayam aniba kining anabiba Sume Yesuse imin tlameo yatemnea baabenea Naka eli nemiobo geneko <sup>24</sup> Gode ibo dlakanea ibo e meletan aibbuo e kukubo molot kesoa e daabenea ayam anomabiobe.

<sup>25</sup> Nekwal ibo ni beten keye bianiba daaye bianiba <sup>26</sup> ibo Yesuse bainobo galin naka mak unang maki tlaibo heitdayemine!

<sup>27</sup> Ne Nib Sume kin dimo weng olo baabenamabio, ibo ni futan olo kla kieiba Yesuse bainobo galin nakaia unangai alukum wentine!

<sup>28</sup> Sume Yesus Klaiste ibo daayemeko! Ne wengo bayotabe. Fol neta ib futano dola omfubenamabibe.



## **2 Tesalonaika** **Fole Tesalonaika bib seli** **futano mubiango imin dola** **omfubesebe.** **Tekein kemim wengobe.**

Yesuse atdimmo kaanea imin hananea ulanea abilim unebua bifolo 20 ese mak blimanota Fole Kolin bib ye bianeta futan olo dolaneta Yesuse bainobo galin nakaia unangai Tesalonaika bib seli omfubenebiobe. E wentea naka maki obianiba Tesalonaika bib seli Ni Yesuse tlamabeo mo tekein kebobbabo ge obianiba bobol tem hekhkek fumbiobo gesiba wenteneta futan olo dolaneta Yesuse imin daakenea i dletnea abilim unamabeo wengo alenebiobe.

1:1-2 Mikiktem wengobe.

1:3-12 Fole Tesalonaika bib seli Ib kukubo ayamobo ge baabeseo wengobe.

2:1-17 Klaiste imin tlamabeo wengobe.

3:1-15 Yesuse bainobo galin nakaia unangai namino wengobe.

3:16-18 Mubiango wengobe.

<sup>1</sup> Ae bainobo galin nakaia unangai Tesalonaika bib seli ye blib ibo Fol nesa Sailas esa Timoti esa nita ib futan olo dola omfubemabbio. Ibo nib Aye God esa nib Sume Yesus Klaist esa i meletanobe. <sup>2</sup> Nib Aye God esa eka Sume Yesus Klaist esa i dumo ibo daabeniba bobol ayam omkayemine!

*Fole Gode gangobo gesebe.*

<sup>3</sup> Am mak bomanomo am mak bomanomo ni Gode baabanoba Kobo Tesalonaika bib seli bainobo galin nakaia unangai daayebaba i bainobo galino sbalma blib kesoa God kobo ayamobo gabobo, kukub olo ayamobe. Niminbabe, ibo bainobo galino sbal maniba naka mak unang maki kla gobe blib kesoa ib gobenin kukub olo sum anyebobe. <sup>4</sup> Ibo inabilib kesoa ni bainobo galin nakaia unangai bib mak bib mako blibi ib kukubo nabibo weng sango oye bianoba ib niniino omfufu yebianoba baabenoba Tesalonaika bib seli kukubo inaminobo, naka maki teniba enin sumo omkayebib otane i bainobo galino sbal mabianiba i bobolo ayam fumbiobo ge oye-ubobe.

*Gode nib kukubo klanamabebe.*

<sup>5</sup> Naka mak unang maki ibo enin kino omkayebib otane ib bainobo galino sbal mablib kesoa naka mak unang maki ib kukubo yateniba baaniba Gode i bekebe biebo ge oye biobe. Gode nakaia unangai

kukubo klabeo molot kesoa e ibo baabeneba Ibo ne okoko okok kebib o dafa ota naka maki tenibta enin kino omkayebib otane sinanomo ne dletnia utnoba ne bib ut unanoba kimaia amit nomabiobo genebiobe. <sup>6</sup> E inang genebuo e ibo kla kima bie kesoa e meletan ibo enin kino omkayebib nakai e yang kenea enin sumo omyenea <sup>7</sup> eka ib enin sumo omtlabenea enin sumo blimubenamabobe. Yesus Sum esa eka abiseli titilsa isa i abilim ut daniba tlaibo Gode inanamabebe. <sup>8</sup> I ayal tem te daak tiiba nakaia unangai yatenabiba Gode nakaia unangai e wengo mo wafueim blim blib isa eka nakaia unangai Sume Yesuse dowan wengo omdibihabib isa kukub misiamo omyenea <sup>9-10</sup> dlanea moniba bib mak unomabiobe. Yesuse imin tlameo dim ota Gode inanea dlanea moniba bib mak unomabiobe. I inaniba moniba skeim ye unaniba e titilo ayal inamin osa mo watemomabibbabe. I alukum sasalanomabiobe. Yesuse imin tlea Gode meletani tenabiba eka e bainobo gabib nakaia unangai tenaniba e niniino dobtouleba bianiba seinom gaibo ibsa i bakaniba seinomabiobe. Niminbabe, ni Gode wengo ibo omkayeboba wente bianiba bainobo geibbio kesota ibo inanomabiobe.

*Fole Tesalonaika bib seli beteno daayebisebe.*

<sup>11</sup> Ibo inanomabib kesoa am mak bomanomo am mak bomanomo ni Gode oha bianoba Kobo Tesalonaika bib seli Ne kukub ayam wafueine ge baaneba dlakanebbuei daabeneba i keb bobolo funine I funaniba Ni bainobo genoba kukubo ayam wafunoba bobol ayam funomo gabib kesoa daabeneba keb titilo omyeba i amitie inamine ge ohabuobe. <sup>12</sup> Inamin kesoa ibo nib Sume Yesus Klaiste niniino dobtouleba niba esak ib niniino dotouleba naneko! Niminbabe, nib Sume Yesus Klaiste Gode i dumo ibo daabeibbio kesoa ayam bliobe.

## **2**

*Dim omin nakai wengobe.*

<sup>1</sup> Ni nekwal ibo wentine! Yesuse imin tlea ete nibtem nanoba minomabbuo wengo ne baabenamabiobe. <sup>2</sup> Naka maki baaniba Yesuse imin tlamabeo amo tlobo genim-ibo ibo i wengo mo wentenibta tosian bianibta bobol tem hekheko mo funimibe! Weng olo Gode Hobe weng biamo eka nakai ili bobol tem funanibta baanimib eka naka maki baaniba Folwal ita futan tem dola omfubeibobo genimib osa ibo mitmakam blim ye om haablib weng yo mo wentenibta dlou unemibe! <sup>3</sup> Naka mak unang maki dim wengo oyemibo ibo mo

wentenibta bainobo galaibe! Yesuse tlang gameo besa yo mo tlamebabe. E tlang gameo dimo tlamona unangai ili bobol tem funin ota wafuniba Gode deibanomabiobe. Sinanoa Yesuse imin tlang gameo dimo hekmel wengo omdibimin nakaie tlamabebe. Gode naka ele dabanea monea aseinin bib unanea enin kino watememabebe. <sup>4</sup> E God esa god dim omin osa weng dobo weng owe bianea baanea Ne olo alukum gaisoibiobo ge obianea monea Gode am tamo unanea osa oye bianea Ne God netabo ge oye biam namabebe. Inamin kukub olo tam te da unamo dim ota Yesuse imin tlamabe kesoa ibo mitmakam blim ye om haablib weng yo mo wentenibta bainobo galaibe!

<sup>5</sup> Sino ne ibo bekebe biana weng olo baabeibuo mo dokobenomone! <sup>6</sup> Memalo titil olo hekmel weng omdibimin naka ele Hengmino henganano ge fumbe deibo waisabiobe. Ibo titil olo tekein kebiobe. Amo Gode omfakanebuo tlamome hekmel weng omdibimin naka ele tlea nakaia unangai atemomabiobe. <sup>7</sup> Ina otane ibo tekein kebiobe, memalo nakaia unangai hengmino ayok hengabiobe. I inaniba hengmino ayok hengabiobe hengmin deibo waiso bie nakaie uneta e abuk ota nakaia unangai hengmin sumo hengabioba <sup>8</sup> hekmel weng omdibimin nakaie tlea naka mak unang maki atemnabioba omite Yesuse Sume titilo makob ayal inamin eibebu tebianea hobe fu genea hekmel weng omdibimin nakaie ananea kaaneta e okoko blimu banamabobe. <sup>9</sup> Hekmel weng omdibimin nakaie Gululame titilo ometnea tenea dim obianea inamin namin okok sumo nakaia unangai sino mo watemim blimo klanea nakaia unangai watemomabiobe. <sup>10</sup> E inanea dim obianea okok misiamo klabea nakaia unangai Gode wengo omdibihabioba sasalabenomabib nakai e wengo wentemomabiobe. Naka eli Yesuse hengmino walubenebio nakaie wengo wentemibo Gode i hengmino temo blibo dotlabenamabe otane i e wengo omdibihabiobe. <sup>11</sup> I inabib kesoa Gode dim omin wengo omabene tloa wenteniba baaniba Weng olo bainobo geiba <sup>12</sup> Gode baabeneba Ibo kukubo misiam kesoa ne kukub misiam yang kenia enino omyamabiobo ge baabenamabebe. Niminbabe, i Gode bain wengo bainobo genamino deiboniba hengmin ota gobo bianiba nabib kesoa Gode i kukub misiam olo yang kenia enino omyamabebe.

*Gode ibo dlakanea Ne imin dlamabiobe genebiobe.*

<sup>13</sup> Nekwal ibo Gode gobe bie kesoa ni am mak bomanomo am mak bomanomo ni ib bobolo fumbianoba Gode gangobo galomo!

Niminbabe, sinanggwanome e ibo dlakanea Sinanomome i hengmino temo blibo ne miine dotlanamabebo genebuo e Hobe daabeneba ibo e moton wengo bainobo geniba e meletan aibbiobe. <sup>14</sup> Sinanggwanome Gode inanea ibo dlakanebio kesoa ni Gode dowan weng ayamo ibo omyoba wenteniba bainobo geibbiobe. Sinanomome ibo titil sumo omoniba makob Sume Yesuse Klaiste titilo ayal inamin einobio inanomabiobe. <sup>15</sup> Nekwal ibo Yesuse bainobo galino sbalma wafuniba ni wengo ibo omkaye binobbu osa eka ni wengo futan temo dola omfubenobbu osa kla wafueine!

<sup>16</sup> Nib Sume Yesuse Klaiste nib Aye Gode i dumo nibo gobeniba daabeniba nib bobol tem funino omsbal mabeibbio kesoa nibo Yesuse tlamabebo waisabuobe. <sup>17</sup> I ib bobol tem funino omsbal mabeniba daabeniba titilo omyiba ibo kukubo ayam wafu bianiba naka mak unang maki weng ayamo omkayemine!

### 3

*Tesalonaika bib seli Folwali betenome daaye binibbiobe.*

<sup>1</sup> Nekwal ibo ni weng mako baabenomabuo inaminobe. Ibo Gode oha bianiba Kobo Folwali daabeneba i keb wengo naka mak unang maki omkayebiba naka homon unang homoni wenteniba baaniba Weng olo ayam molotobo geniba makob ni sino baabenobbio inane ge ohamine gabuobe. <sup>2</sup> Naka homon unang homoni Gode wengo mo bainobo geim blim kesoa ibo Gode baabaniba Kobo Folwali daabeneba i hengmin nakaia unangai kukub misiamo omkayebibo watabenale ge ohamine!

<sup>3</sup> Sume kukub ole motono olota namin kesoa e bain inanea dosbal manea kimanamabebe. E inanea kimanameo Gululame ibo mo dlabmaneta kukub misiamo nanimibbabe. <sup>4</sup> Ni nib Sume bobol tem funino omya ni ib kukubo nabibo yatam motomanoba baabenoba Ibo kukubo yota namine genobbuo ibo sma wafu blib kesoa ni funanoba Sinanomosa i amitie wafunomabiobo gabuobe.

<sup>5</sup> Ni Sume oha bianoba Kobo Tesalonaika bib seli daabeneba i kobo kla gobke bianiba i bobol tem funino sbal maniba makob sino i Klaiste enin sumo omkahabioba e bobol tem funino sbal mabinebio inaniba sbal maine ge ohabuobe.

*Nakai alukum okok kebianibte!*

<sup>6</sup> Nib Sume Yesuse Klaiste wengo ni omye kesoa ibo baabenomabiobe. Bainobo galin naka mak unang maki baaniba Ni okok kemino denomabiobo geib mole ibo

mo bekebe biaibe! Sino ni wengo i al-eye binobbuo i mo wafueim blim bian-ibta namomabiobe. <sup>7-8</sup> Sino ni ibo bekebe bianoba kukub ayamo wafu binobbuo ibo tekein kebib kesoa ibsa kukubo yota namine! Ni kwin tlamo boman tlamo ni amitie okok kebianoba monio boka bianoba imeno walo unam binobbio. Ne besao mo bianobta ibta imena youma monia oyine ge oyemin blimobe. Ni ni-maye okok bianoba monio bokaboba ibo imena youmao oyaibo webianoba bokam binobbio inaniba ibsa okok bianiba monio boka bianiba imena youmao webianibte! <sup>9</sup> Gode wengo baanoa Nakai ne wengo omkayemib mole nakai i wengo wentebib nakai imena monia o misim okayemine genobio otane ni ibo bekebe bianoba Gode wengo omkayebob dimo ni ibo mo baabenobta ibo imena ama moniao misim okayemine ge baabeim blimobe. Ni funanoba Ibo ni kukubo nabobo yatemniba ibsa inamine genobta ni ina binobbio.

<sup>10</sup> Sino ni ibo bekebe binobbio dimo baabenoba Nakae waneta teng abua okoko deibonea bisiabane mole ib imeno mo dokahamibe ge baabenobbio. <sup>11</sup> Ni wentebobo naka maki baabeniba Ib isak temo naka maki okoko teng yebua deiboniba besa bianiba eka okok amo naka maki okok kebib biamo i moniba isu ye bianiba i okoko wakaye bianiba weng homon obiam bliobo gesiba wentob kesota baabenomabbio. <sup>12</sup> Nib Sume Yesus Klaiste emaye weng olo omye kesoa ni naka eli baabenomabbuo i imaye okok kebianiba unino ilimi dlou unaline gabuobe. <sup>13</sup> Bainobo galin naka unang ibo okoko teng mo yemone! Sbal maniba ib okoko ayam okok kebianibte!

<sup>14</sup> Ni weng olo baabenomabbuo nakae waneta weng olo mo wentim blim kene mole e ibo mo bekebenea eka ibsak esuo mebo mo nanimibe! Ib sinwalo baatlaniba afetu basibta yatemneta ne kukubo misiam biota natneibobo ge funanea aalo waisanota kukub misiamo deiboneko! <sup>15</sup> Ina otane ibo e mo makaalanimibe! Ib bobol temo fumbianiba naka ele ni nek kesoa ni kukub ayam osa bobol tem funin ayam osa alebanomo ge fumbianibte!

*Mubiang wengobe.*

<sup>16</sup> Nib Sume nibo bobol ayam omkaye binabe nakae ibo amitie bobol ayam omkaye bianea daayemeko! Kukub ayam osa misiam osa ib dimo tam tlemo e ibo alukum bobol ayam omkaye bianea bekebe neko! <sup>17</sup> Ne wengo sin ewile om daakelai olole ne besa weng obita naka mak eta dolam daake dane otane klayam blibte genamin weng olole nemaye nene kweilo

tubunita dolanamabibe. Ne weng olo dolanamabio inaminobe. Ne weng olo dolaia ibo dolamin olo tekein keniba futan olo bain Fol eta dolanebiobe geine genita dolabibe. <sup>18</sup> Sume Yesus Klaiste ibo alukum daabeneko! Ne wengo bayotabe. Ne Fol neta futan olo dola omfubenamabibe.

**1 Timoti**  
**Fole futano mikiktemo**  
**dolanea Timotie**  
**omfubasebe.**  
**Tekein kemın wengobe.**

Yesuse atdimo kaanea imin hananea ulanea abilim unebua bifolo 35 ese mak blimanota Fole Timotie futan olo dola omfubanebiobe. Timotie awoko Yuda unan-gobe, eka e aaleb ele Glikobe. Yo dimo e Yesuse bainobo galin nakaia unangai Efe-sas bibo blihi kima bie kesota Fole futan olo dola omfubaneta Kukub misiamo tam tlebo yo inanebta bainobo galin nakaia unangai kimanale ge baabanebiobe.

1:1-2 Mikiktem wengobe.

1:3-3:16 Yesuse bainobo galin nakaia unangai kukubo namin osa eka i ki-manin nakai kukubo namin osa o wen-gobe.

4:1-6:21 Fole Timotie baabanea Kobo Sume okoko inanebta okok kemale ge baabaseo wengobe.

1-2 Ae Timoti kobo Ne Yesus Klaiste wengo kobo aleke bia tekein keneba bain-obo gabeb kesoa kobo makob ne miin motonobe. Ne Fol neta futan olo dola omfubkenamabibe. Ne Yesus Klaiste okok namasanin naka netabe. Niminbabe, Gode nibo hengmino temo biobo dotlanebio esa eka Yesus Klaiste imin tlamabe waisa biob naka esa i baatneniba Ni kobo kemanoba moneba bib mak bib mako haabianeba ni wengo omkeimamale ge baatneibbio naka neta keb futan olo dola omfubkenam-abibe. Nib Aye God esa eka nib Sume Yesus Klaist esa i dumo kobo kemhalilaniba daabkeniba bobol ayam omkakemine!

*Dim omin nakai teniba ibo dim oyemibo i wengo mo wentaibe!*

<sup>3</sup> Weng olo ne sino tenia Masedonia bib ele tlang genia tebiania baabke tlibio yota imin dola omfubkenang genitabe. Ne bobol temo fumbio Kobo imin Efesas bib ye bianeba naka maki nakaia unangai dim omin wengo oyebibi baabeneba Ibo naka mak unang maki dim wengo mo oyemibe ge oyemale! <sup>4</sup> Kobo i baabeneba Ibo i faninwali weng sang afeto mo obianibta i inaminobo gabianibta i ninino mo dotouleb nimibe ge baabeneale! I faninwali wengo wentaibo baase baase binabib otane weng olo i bobol temo mo daabenota i Gode bainobo genomabibbabe. Olo besa wengobe. <sup>5</sup> Ina otane ne funania I kukubo afet ota nabianiba i bobol temo kining aniba fiab bianiba Gode bobolo fumbianiba bain-obo geine! I inamib mole i Gode goba

bianiba eka i nakaia unanga isa gobeniba daayemomabiobo ge funaiobe. <sup>6</sup> Eka mak ile kukub ayam olo ne kobo baabkeibio dei-boniba besa weng ota wafu bianiba obiobe. <sup>7</sup> I Gode hekmel wengo Mosese dolanebuo aleyemin naka nomo gabianiba baaniba Ni wengo motonobo gabib otane i Gode weng osa ili weng osa mitmakamo klao mo tekein kebianibta obibbabe.

<sup>8</sup> Nibo tekein kebuobe, Gode hekmel wengo Mosese dolanebuo nakaia unan-gai tekein keniba kla wafueib mole hekmel weng olo ayamobe. <sup>9</sup> Gode hekmel wengo naka ayam unang ayami mo omkayemebabe. E nakaia unangai enamin kukubo wafu blih ita omkayebebe. I e hekmel wengo omdibi bianiba eka e wengo mo wente biam blibbabe. I Gode kukubo mo wafueim blim bianiba heng-mino henga bianiba e weng dobo weng oha bianiba eka e wengo aben giwe biam bliobe. I awok aalok isa eka naka mak unang mak isa yenaiba kulila biam bliobe. <sup>10</sup> I unang taman henga bianiba eka naka maki teniba naka maki taman henga biam eka bib mak seli moniba bib mak seli naka maki ayok doise moniba naka maki waloniba monio boka biam eka dim wengo obiam bliobe. I kukub olo ina bianiba eka kukub misiamo afet osa nabianiba Gode weng ayamo mo wafu nim blim blih kesota Gode hekmel wengo nakaia unanga eli omkayebebe. <sup>11</sup> Gode hekmel weng olosa eka Klaiste dowan weng ayamo Gode dot naka ayame ne omnea omonia nakaia unangai omkayebi osa o mitmakamo makobobe. Weng olo nibo kukub ayamo aleyebo kesoa nibo ayam anoba makob Gode ulab anomo! Weng olo dot ayamobe.

*Gode Fole daabane kesoa e Gode gan-gobo gesebe.*

<sup>12</sup> Ne nib Sume Yesus Klaiste titilo omnenea ne e okoko okok kebibe. E funanea Fole okok olo sbal manea kla okok kemabebo gene kesoa e ne nemfakanea okok olo omnebio kesoa ne gangobo gabibe. <sup>13</sup> Sino ne Yesuse ninino weng dobo weng owe biania eka bainobo galin nakaia unangai kukub misiam omkaye biam biania weng omdibi binibu otane Gode nemhalilanea daatnenebiobe. Niminbabe, o dimo ne Gode kukubo tobtlin bianea Klaiste mo bainobo geim blim biania funania Ne Gode okoko okok kebibo gabi kesota o mitmakam ota Gode nemhalilanea daatnenebiobe. <sup>14</sup> Eka Sume Yesus Klaiste kukub ayamo omnenea daatnene kesoa ne e bainobo genia e kla gobania ne bobol temo omam blibe.

<sup>15</sup> Yesus Klaiste funanea Ne daatnia nakaia unangai hengmin tem tab blibo dotlanano ge funaneta daak tlebiobe. Weng olo bainobe. Nakaia unangai weng olo wenteniba bainobo geine! Ne hengmino henga binibuo kukub olo naka mak unang maki hengamin kukubo gaisenobiobe. <sup>16</sup> Yesus Klaiste funanea Nakaia unangai kukub misiamo deibueine ge funanea dohalilanea daabenebio kesoa e hengmin homono henga binabi naka ne nemhalilanea daatnenea ne e kukubo wafu blii naka mak unang maki nateniba funaniba Sino Fole naka misiam binebio otane memalo Klaiste daabanea e naka ayam biebo, Klaiste makob e Fole daabenebio inanea nisa daabenea ni hengmin osa omlabenamabebo genomabiobe. I inaniba e wengo wente bianiba e bainobo genib mole i afen smike doboniba amit nomabiobe. <sup>17</sup> E ina binabe kesoa nibo Gode niniino amitie dobtouleb nomo! E komok sum amit ninobe. Nakaia unangai i kino e mo atemin blim otane e kintalinobe. Elekiem eleta God motonobe. Nibo amitie obianoba E ayam, nib Sumobo ge ohamomo! Bainobe.

*Fole Timotie baabanea Kobo okoko kla okok kemale ge baabasebe.*

<sup>18</sup> Ne miin Timoti kobo ne weng mako baabkenamabibe. Sino Gode e wengo naka maki omkayebea i kobo baabkeniba Timotie Gode okoko kla okok kemabebo ge baabkeibbiobe. Nesa inangge baabkenamabibe. Kobo weng olo fumbianeba Gode okoko sbalma okok kemale! <sup>19</sup> Kobo ina bianeba keb bainobo galino sbalma bianeba Gode bobolo funale! Naka mak unang mak ile Gode bobolo mo fumbibababe. I kukub ayam olo abuk wawem blib kesoa i bainobo galino watwat dabebiobe. <sup>20</sup> Haimenias esa Aleksanda esa i inaniba kukub misiam olo nabib kesoa ne Klaiste baabaia Gululame baabanea e i enino omyenea tekein keniba Ni Gode niniino weng dobo weng ohamin olo kukub misiamobo geine genia baabaibbiobe.

## 2

*Gode beten kehamin kukubobe.*

<sup>1-2</sup> Ne wengo mikiktemo kobo baabkenamabi ole kobo naka mak unang maki baabeneba i nakaia unangai alukum beteno daaye bianiba Gode baabaniba Kobo nakaia unanga isa komok sum isa eka komokwali mak isa alukum daayemale ge oha bianiba Gode gangobo galine! Nibo inamob mole ayam bianoba Gode kukubo wafu bioba naka mak unang maki nib kukubo yateniba funaniba i kukubo ayamobo ge funanomabiobe.

<sup>3</sup> Ibo Gode nibo hengmino temo biobo dotlanebio nakae inangge ohamibo e seimbiana funanea Kukub olo ayamobo ge funamabebe. <sup>4</sup> E bobol temo fumbleo Nakaia unangai hengmino temo blibo ne alukum dotlaia i ne weng moton ota wente bianiba kla tekein keine ge fumblebe. <sup>5</sup> Niminbabe, Gode elekiem eleta binabebe. Nakaia unangai hengmino hengabib kesoa Gode makaa blib otane naka make elekiem eleta God esa nakaia unanga isa i isak daak manea baabenea Ibo teniba God esu tline ge baabenea dleb tetenanebiobe. Inanebio nakae niniino Yesus Klaist etabe. <sup>6</sup> Amo Gode omfakanea baanea Amo yo dim ota Yesuse dabalimo daak unamabebo genebuo tlo kesoa Yesuse daakenea atdim kaanea nakaia unangai alukum hengmino walubenebiobe. Nibo Yesuse kukubo nanebu kukub olo watenoba tekein kenomo! Gode bobol temo fumbleo Nakaia unangai hengmino deibueiba ne i hengmino omlabeia i nemi aine ge fumblebe. <sup>7</sup> E inangge fumble kesoa ne baatnenea Kobo moneba bib mak bib mak olo nakaia unangai Yudabai ne weng olo omkayemale ge baatnenebiobe. Ne weng olo dimbabe, bainobe. E ne nemanea monia naka mak unang maki Yudabai e moton wengo aleye bia i e weng ayam olo wenteniba bainobo genomabiobe.

<sup>8</sup> Ne bobol temo fumbio bib mak bib mak seli nakai alukum i kweilono tebehaniba beten kebianiba Gode bobolo fumbianiba kining bianiba atliyemina dleb wenga o deiboniba klayam bianiba beten kemine gabibe.

<sup>9</sup> Ne unang ibsa baabenamabi ole ibo youm ayamo waloniba kimibo bayota kibianibe! Ibo mo funanibta Ninita ye biob ese genibta gabamano eito mo kiwe bianiba eka gol osa bukubsan osa ayam ayamo mo kibianiba eka youm ayam ayamo moni sumo homono mo walo kibiam namibe! <sup>10</sup> Ina otane unangi Ni Gode wengo wafu biobobo gabib mole okoko ayam okok bianiba naka mak unang maki daabeine! Kukub ayam olo i makob youm ayamo kimomabiobe.

<sup>11-12</sup> Ne unang ibo oye biania Ibo Gode wengo nakai mo aleye bianibta omkayemibe ge oyebibe. Ibo kimik gebianiba nakai Gode wengo ibo omkayebibo wente bianiba weng olo kla funine! <sup>13</sup> Niminbabe, Gode Adame sin klaneta Ifo mit klananebio kesotabe. <sup>14</sup> Eka Gululame Adame dim omin wengo mo baabaneta bainobo geim blimobe. E Adame alel ota dim omin wengo baabonea o bainobo genota Gode wengo welanobiobe. <sup>15</sup> Otane unang ile meme ita yomiobe. I ina bianiba Gode bainobo gabaniba naka mak unang

maki gobe bianiba daaye bianiba i bobol temo kining aniba kukubo fiab nimibo Gode i daayemabebe.

### 3

*Bainobo galin nakaia unangai kimanin nakai weng sangobe.*

<sup>1</sup> Weng olo bainobe. Nakai bobol temo funaniba Ni Gode bainobo galin nakaia unangai kimanomo gabibo okok olo dot ayamobe. <sup>2</sup> Bainobo galin nakaia unangai kimanin nakae e amitie kukub ayam namea nakaia unangai e kukubo nabeo wateniba funaniba E kukubo ayamobo geine! Eka e alelo olokiem omo bianea e bobol temo klayam fumbianea e kukubo klayam wafu bianetane! Eka bib mak nakai tlaibo e dleb tanea e am tam danea imeno dokaye biam nabianea e aleyemin naka ayam bianete! <sup>3</sup> E aay misiamomo downeta weng namin namin nemene! E alo mo tliaubanomone! E naka fiab bianete! Eka e naka maki weng alang wengo mo oyemene! E monio bobolo sumo mo fumbianeta gobonemene! <sup>4</sup> E alel osa meme isa i kla kima bianea eka meimei kukub ayam aleyebea meimei e wengo kla wafuniba funaniba Ni Aye naka ayamobo ge funine! <sup>5</sup> Nakae e alel osa e meme isa kla mo kimain blim kene mole naka ele Gode bainobo galin nakaia unangai kla mo kimanamabebabe. <sup>6</sup> Eka nakae Gode mema bainobo geneme e Gode bainobo galin nakaia unangai mo kimanemene! E inane mole e untak ngambianea funanea Ne kimanin naka sumobo genea Gode wengo omdibihamsea Gode baanea E kukubo misiamobo genamabeo makob sino Gululame e bobol temo funanea Ne niniino sum anano gansea Gode baanea Keb kukubo misiamobo genebio inabanamabebe. <sup>7</sup> Bainobo galin nakaia unangai kimanin nakae kukub ayam wafu bia naka mak unang maki bainobo gabibbai ateniba e kukubo ayamobo geine! Eka e mo inaim blim kene mole i funaniba E naka misiamobo, e kukub osa misiamobo ge ohabiba e kukub misiamo nabea Gululame naka ele bobol temo funino watwat dabanamabebe.

*Bainobo galin nakaia unangai i komokwali wengobe.*

<sup>8</sup> Yesuse bainobo gabibi komokwal isa i kukubo makob bainobo galin nakaia unangai kimanin nakai kukubo nabib ina bianiba i bobol ayam fumbiam nabiba nakaia unangai yateniba I kukubo ayamobo gabibte! I dim omin weng osa mo omibe! I aay misiamomo downibta gabam tol temo mimafubenota weng namin namin nimibe! I mo funanibta

Ni Gode okoko okok kebob kesoa naka maki monio menganoba oisenomo ge funanimibe! <sup>9</sup> Eka i Gode weng ayamo kla fumbianiba funaniba Weng olo bainobo ge funaniba sbal maniba wafueine! <sup>10</sup> Mikikitemo ibo i kukub osa i okok osa yatemiba i okoko ayam okok kemib mole ita bainobo galin nakaia unangai komokwal aine! Eka yatemiba i okoko misiam okok kemib mole i mo dlanimibe! <sup>11</sup> Eka i alelwal isa kukub ayam wafu bliba naka mak unang maki yateniba I kukubo ayamobo geine! Eka i naka mak unang maki aal asito mo boyemibe! Eka i bobol temo klayam fumbianiba i kukubo klayam wafu bianibane! I amitie okok ayam okok kemine! <sup>12</sup> Bainobo galin nakaia unangai komoke e alelo olokiem omo bianea e alel osa e meme isa eka e okok naka isa kla kimaneko! <sup>13</sup> Nakai bainobo galin nakaia unangai komokwal an bianiba okok ayam okok kebib ile naka mak unang maki oye bianiba I kukubo ayamobo ge oye binabiobe. I Yesus Klaiste dowan wengo nakaia unangai omkayemom gaibo i mo tsiambibbabe. Sbal maniba omkayebiobe.

*Gode wengo mitmakam otabe.*

<sup>14</sup> Ne bobol temo fumbiania Ne hebmamsab monia kebsu natlano gabi otane ne futan olo dola omfubkenamabibe. <sup>15</sup> Inanamabi kesoa ne hebmamsabo mo tlim blim keni mole kobo weng olo wateneba Gode meletani kimanin kukubo inaminobe genale genita futan olo dola omfubkenamabibe. Gode meletan ile Gode afen smik sae e bainobo galin naka unangobe. I makob sbal amuno geigebua amo sbalma binabo inaniba i Gode weng motono wafu binabiobe. <sup>16</sup> Ne Gode weng olo sbal weng baabkenamabibe. Gode Klaiste wengo nibo omyebua nibo wafu biobo sino weng olo ayok otane Yesuse tenea omkeimanebio weng olo sum kesota ne weng olo baabkenamabibe.

Gode e dabanea daakenea dabalim ele tlanea naka moton aneta nakaia unangai atemibbiobe. Gode Hobe Yesuse dofaanea imin hananea Gode nakaia unangai e alebenea i funaniba Bainobo, e Gode miinobo geibbiobe. Abisel isa atemibbiobe. Eka bainobo galin nakaia unangai moniba bib mak bib mak seli Gode wengo omkayebiba eka Gode wengo monoa nakaia unangai dabale monea dene dene isu osa onon tlanoa nakaia unangai mak isa Gode weng olo wenteniba bainobo gabiniibbiobe. Gode Yesuse debeb

utnea abilim ut danea bianea inamin namino alukum kima biebe.

#### 4

*Dim omin nakai wengobe.*

<sup>1</sup> Gode Hobe baanea Sinanomo nakaia unangai maki Yesuse kukubo deiboniba naka mak unang maki dim wengo omkeima bianiba eka hob misiami wengo omkeima biam blibo wenteniba yota wafu nomabiobo genebiobe. <sup>2</sup> Dim omin nakaia unanga eli dim omin kukubo nabianiba eka dim omin weng olo omkeima biam binabiobe. I amitie dim omin kukub ota wafu bianiba i bobol temo dim omin bobol tem ota fumbianiba i bobol temo dim baaniba Ni kukub olo nabobo hengminbabo geniba i hengmino hengabibo aalo mo waiseim blimobe. <sup>3</sup> Dim omin nakaia unanga eli alelwal bokalino awem omka bianiba eka imen mak osa awem omka biam binabib otane Gode omomom imeno omfube tlanea baanea Nakaia unangai imen olo dlo unaline genebio kesoa nibo Gode weng ayam tekein kenoba bainobo gabob nibo omomom imeno dlo downom gaobo Gode gangobo gabianoba unalomo! <sup>4</sup> Nibo tekein kebob yotabe. Gode inamin namino alukum ayam kla tlanebio kesoa nibo mo baanobta Misiamobo geta deibonomobbabe. Nibo Gode baabanoba Kobo klayam naneba imen olo omyebobo ge baabanoba dlo unalomo! <sup>5</sup> Niminbabe, Gode wengo baanoa Inamin namin imeno ayamobo genobua eka nibo imeno downom gaobo Gode gangobo ge baabanomabbio kesoa Gode kin dimo inamin namin imen olo ayamobe.

*Timoti kobo Yesus Klaiste okok naka ayam bianebte!*

<sup>6</sup> Kobo weng olo Gode bainobo galin nakaia unangai baabeneb mole kobo Yesus Klaiste okok naka ayamobe. Eka Gode weng ayam kobo wentebebo fumbianeba kla wafu bieba weng olo kobo daabkenoa keb bainobo galino omsbal mabkenamabo makob kobo imeno dowoneba titil manabeb inabkenamabobe. <sup>7</sup> Kobo faninwali weng sango mo funemebe! Weng olo Gode wengbabe, besa wengobe. Kobo Gode kukubo kla tekein keneba olota wafunale! <sup>8</sup> Kobo tekein kebeb yotabe. Kobo imen dang okok osa eka okok afet osa sbal maneba okok kemeb mole keb on osa keb dam osa sbal manamabeobe. Kukub olo ayam otane kobo Gode weng osa eka e kukub osa keb bobol temo omabbaneba wafu nemebo kukub olo dot ayamobe. Kukub olo memalo kobo kla daabkenobua

sinanomo kobo Gode bibo biamabebo dim osa daabkenamabobe.

<sup>9</sup> Ne weng olo baabkenamabio bainobe. Nakaia unangai wentaibo kla funaniba bainobo geine! <sup>10</sup> Nibo Gode okoko sbalma okok kebob, o mitmakamo makob Gode afen smiksae imin tenea bainobo gabib nakaia unangai dlamabeo waisa biobobe. E Nakaia unangai alukum hengmino temo blibo dotlanano gabe otane nakaia unangai maki e wengo mo wentim blim kesoa mo dlamabebabe. Otane nakaia unangai e wengo wente bianiba bainobo gabibi sinanomo dletnea e bib unamabebe.

<sup>11</sup> Kobo nakaia unangai weng olo omyeneba baabeneba Ibo weng olo wafu nine ge baabenale! <sup>12</sup> Kobo tembal kesoa naka mak unang maki baabkeniba E tembal kesoa e bobol tem funino ayambabo geniba weng dobo weng okemibo kobo kukub olo tolobo genale! Ina otane kobo weng ayam obianebe eka kukub ayam nabianebe naka mak unang maki gobe bianeba daaye bianeba keb Gode bainobo galino sbal maneba kobo bobol ayam fumbianeba Gode kukubo kla wafu nale! Kobo inameba nakaia unangai kateniba baaniba E kukub ayam nabebo geniba isa keb kukub ayam olo wafueine! <sup>13</sup> Memalo kobo ne waitne biamabebo dimo kobo sbal maneba Gode wengo kineba nakaia unangai wentiba omkeimaneba kukub ayam aleyemale! <sup>14</sup> Sino Gode wengo kimanin nakai i kweilono keb gabamon dim ut tebelubkeniba Gode wengo baabkeiba Gode titilo kobo omklea e okoko okok kebinebbio kesoa e okoko klabebo titil olo mo deibonemebe! Kobo titil olo bobolo kla fumbianeba wafunale!

<sup>15</sup> Kobo titil olo wafu bianeba Gode okok olo omklebuo am mak bomanomo am mak bomanomo amitie okok olo okok kebeba nakaia unangai katemniba baaniba E okoko sino ayam ye okok kebinebu otane memalo e okoko dot ayam okok kebebo ge okemine! <sup>16</sup> Keb kukub nabeb osa eka nakaia unangai aleyebob osa kla kimanale! Kobo inamebo keb kukub olo daabkenoa eka nakaia unangai keb wengo wentomabib isa daabenanobua Gode imin tlameo ibo e baka bianiba ayam anomabiobe.

#### 5

*Bainobo galini kimanin kukubo weng sangobe.*

<sup>1</sup> Kobo hangkalebwali mo dosuanemebe! Kobo weng fiab oye bianeba daaye bianeba makob keb aye daahabeb ina bianeba eka tembal isa weng fiab oye bianiba daaye bianeba makob kleb ningwali daayebeb

inayemale! <sup>2</sup> Eka kobo konokmonwal isa daaye bianeba makob keb biemo daawebeb inaye bianebte! Kobo souwal isa daaye bianeba makob kleb nengwali daayebeb inaye bianeba keb bobol temo ayam fumbianebte! Keb bobol temo taman bobolo mo funemebe!

<sup>3</sup> Unang maki bainobo gabibi imakwali kaabeibbua ilikiem blib mole bainobo galin nakaia unangai i daaye bianiba kla kimaine! <sup>4</sup> Ina otane unangi i meme isa i molobsel isa blib mole i unang eli bobolo kla funaine! I okoko mikik-temo nanomabib ole i aaleb kamwal isa faninsak kamwal isa kla kima bianiba i sino gwab bliba i kima binibbuo gabamo kibeine! Gode kukub olo kla gobo biebe. <sup>5</sup> Unangi imakwali kaabeibbua i meme isa molobsel isa eka mikimwal tlemin isa dabwal tlemin isa blim imaye tla tla bianiba blibi i Gode bainobo geniba tab dim osa kwinomo dim osa amitie Gode nganhabila daayebebe. <sup>6</sup> Otane unangi imakwali kaabeibbua ili bobol tem funin ota wafu bianiba Ni inamin namino dlonoba seinomo ge funaniba ili bobol tem funin ota wafu blib mole i afen smiksa otane i makob kaanabibi ulabobe. I Gode kukubo abuk wawem bliobe. <sup>7</sup> Kobo bainobo galin nakaia unangai Gode weng olo omkayemebe i kukub ayamo namiba naka mak unang maki i kukubo yatemaibo i mo funaniba i kukubo misiamobo ge funanimibe! <sup>8</sup> Bainobo galin nakae e meletani klao mo kimaim blim kenemeo e kukubo misiamobe. Eka nakae e aaleb kamwali mo kimaim blim kene mole e kukubo dot misiamobe. E kukub misiam olo bainobo galinba nakaia unangai kukub misiam osa gaisenamabebe.

<sup>9-10</sup> Kobo unang sasoni daayemang gaebo i niniino homono mo dolabenebta daayemebe! Unangi bifolo homono 60 o blimubenobuei i niniin ota dolabeneba daabenale! I imakwali makob ilita dlo bliba naka mak unang maki baaniba I kukubo ayam nabiobo gabiba i memei kla kima bianiba eka bib mak nakaia unangai imeno okaye bianiba eka bainobo galin nakaia unangai bib mak da tlaibi i skilono fubaye bianiba daaye bianiba eka nakaia unangai gembib biamuei daaye bianiba kukub afet osa ayam nabiba i imakwali kaabeib biamuei niniin ota dolabeneba daabenale!

<sup>11-12</sup> Otane unangi souwali i imakwali kaabeibbuei niniino mo dolabenebta daayemebe! I baaniba Ni besa bianoba Yesus Klaiste okoko amitie okok kemomabbiobo gabib otane sinanomo i funaniba ni imakwali imin dlomo ge funaniba i weng olo baabbbuo deiboniba imakwali

imin dlaibo naka mak unang maki baaniba I kukub olo misiamobo genomabiobe.

<sup>13</sup> Eka i kukub mak osa inabiobe. I bisiabalaniba moniba am mak am mako haabianiba weng misiamo nakaia unangai mo obibba osa eka naka mak unang maki kukub misiamo nanimibo wengo wentaib osa i naka mak unang maki weng olo oye biam nabib kesoa kobo i niniino mo dolabenebta daabenemebe! <sup>14</sup> I inamomabib kesoa ne funania Unang souwali imakwali kaabeibbue ile imakwali imin dloniba memei yobianiba i am osa meme isa kla kimanine gabibe. I inab mole bainobo galinba nakaia unangai nibo mo baabenibta Bainobo galin nakaia unangai kukubo misiam nabiobo ge baabenomabibbabe. <sup>15</sup> Unang sasoni maki Yesuse kukub ayamo deiboniba Gululame kukub misiam ota wafu bliobe.

<sup>16</sup> Inamin kesoa Yesuse bainobo gabib nakaia unangai maki i meletan maki konokwal aibbua imakwali kulilubeib mole imaye unang eli kimanine! I mo deibenibta bainobo galin nakaia unangai bumoloko mo omyaibe! I imaye kimaniba eka bainobo galin ile konokwali ninek blim ita kimaine!

*Bainobo galin nakaia unangai kimanin nakai wengobe.*

<sup>17</sup> Bainobo galin nakaia unanga ibo ib kimanin nakai okoko ayam okok kebib biamo monio sum oyine! Eka ib kimanin nakai Gode wengo nakaia unangai omkaye bianiba aleyebib naka ile i monio dot sum oyine! <sup>18</sup> Niminbabe, Gode buk temo baanoa

Eil blumakau i bo wit dango klabiba i daaye bianiba okok kemibo ibo i sitalo mibo mo dlab bebenimibe! Deibeiba wit sano wembianibte gen-  
abianoa

eka weng mak osa baanoa

Nakai okok kebib mole i okoko molo yang keniba monio oyine genanobio

kesoa bainobo galin nakaia unangai kimanin nakai Gode wengo omkeimabibi ibo i okoko molo yang keniba monio oyine! <sup>19</sup> Naka make baanea Bainobo galin nakai kimanin nakae kukubo misiam nabebo gene mole kobo e weng olo mo wentaebe! Ina otane nakai asu eka asumatna i baab mole i weng ota wentene! <sup>20</sup> Bainobo galin nakai kimanin naka make hengane mole alukum bainobo galin nakaia unangai kin dim ye kobo dobo klaneba ateniba tosiananiba kukub misiamo namino deibueine!



<sup>21</sup> God esa Yesus Klaist esa abisel isa i kin dimo ne wengo moton baabke-namabibe. Kobo weng olo watemaebo inanale! Kobo keb nineki kla daabeneba eka keb ninekba klao mo daabeim blim kenamin kukubo mo wafunemebe! Kobo daabenang gaebo alukum makob kimin daabenale! <sup>22</sup> Kobo naka make heb-mamsabo mo dobonebta bainobo galin nakaia unangai kimanin nakao mo dofane-mebe! Mikiktemo e kukubo ateneba e kukubo misiamobe ayamobe genebte! E kukub misiamo nabea kobo dofaneb mole kebsa e kukub misiamo nanamabeb keso kobo klanale! Kobo kukub ayamobe amitie namale!

<sup>23</sup> Kobo aa motono amito mo unalaebe! Kobo am mak bomanomo am mak bomanomo amitie gembab keso kobo waen aaye gwab ibanaba aa baka wembaba daabkenoa ginino fotebnamebote!

<sup>24</sup> Nakaia unangai hengmino inaminobe. Mak ile keim nabiba naka mak unang maki yatemiba nibo dlo klanabob otane maki hengmin ole ayok nabibe. Sinanoa mubiang amo dim ota keimanota Gode dlo klanamabebe. <sup>25</sup> Eka nakaia unangai kukub ayam namin osa inaminobe. Maki kukub ayam keim nabiba naka mak unang maki watemeyebiobe. Eka maki kukub ayam ole ayok nabib otane o amito mo ayok bibenomobabe, keim anamabobe.

## 6

### *Okok nakai wengobe.*

<sup>1</sup> Okok nakai fumbianiba Ni kimanin nakae ayamobo ge funine! I inamiba naka mak unang maki i wengo wenteniba Gode niniin osa eka Gode wengo ni ibo aleyebob osa weng dobo wengo mo baabonimibe! <sup>2</sup> Okok nakai bainobo gabiba eka i kimanin naka isa bainobo gabib biamo i mo funanibta E ni dab tlemin yetabo, ni e wengo omdibiha bianobte genibta mo funanimibe! I funaniba E bainobo gabe keso ni e goba bianoba e okoko klayam okok kehamomo ge funine! Kobo nakaia unangai kukub ole aleyebeba i kukub olota namine!

### *Inamin namino homon bokalino wengobe.*

<sup>3-4</sup> Nib Sume Yesus Klaiste wengo ayamobe. Nibo weng olo wentebobo o nibo daayebo keso nibo Gode kukubo kla wafunomabbibe. Otane naka make Yesus Klaiste weng ayam olo deiboneba weng afet ota alebena mole naka ele untak nganin nakabe. E tekein kemin osa bobol tem funin osa blimobe. E besa wengo alang weng omin kukub ota gobo biebe. E naka mak unang maki kukub ole aleyebeba i

e weng olo wente bianiba i naka maki kukubo dafao ifam bianiba eka naka maki dosuan bianiba eka awa gembianiba naka maki fun yateme biam bliobe. <sup>5</sup> I amitie dleb weng obianiba Gode bain wengo mo wentebibba keso i bobol tem funino misiamobe. Eka i funaniba Nibo Gode kukubo wengo wafu gioba e moni sumo misim okayemeko gabibe. Bobol tem funin olo ayambabe.

<sup>6</sup> Ina otane nakaia unangai funaniba Ni inamin namin ayamobe ba ele bibe bio keso asitemo bobolo mo wayebobabo geniba i inamin namino bibebu seinwe bianiba i Gode bobol ota amitie funib mole i bobol tem funin olo ayamobe. I seinomabiobe. <sup>7</sup> Niminbabe, sino biemwali nibo domikiebbuo dimo nibo afobeingo mo oleb tlim blimobe. Sinanomo nibo kaanomabbu osa afobeingo mo oleb unomabbibabe. Inanomabbuo keso afobeingo nibo daabenamabua bleka? Yeye o mo daabenamababe. <sup>8</sup> Nibo imen osa youm osa bibe bio mole nibo funanoba Nimio baye bibe biobo genom! Nibo inamin namin afeto bobolo mo fumbianobta o bobolo mo wayemone! <sup>9</sup> Ina otane nakai funaniba Ni afobeing osa moni osa homon boka bianobte ge fumbib ile makob eil halebi imeno wembiba imiko dolibeibbua i imeno bobolo funaniba blublu teniba imik tem te gluluowa onsiba yafunabo inaminobe. Naka eli ili bobol tem funin misiam olo fumbib ota sumu benoa ili skil watwat dabenamabobe. <sup>10</sup> Monio gobonin kukub ole omomom hengmino mitobe. Naka mak ile i bobol temo monio bokalin bobol tem ota fumbianiba i Yesus kukubo deiboniba ili skil watwat daniba i bobol temo misiam omkabiobe.

### *Nibo kukub ayamobe sbalma wafunomo!*

<sup>11</sup> Ina otane Gode naka kobole kukub misiam olo mo wafunemebe! Kobole kukub molot osa eka Gode kukub osa ota wafunale! Kobo Gode bainobo gabianebe eka naka mak unang maki gobeniba daaye biam nale! Kobo kukub ayam olo mo deibonemebe! Kobo sbal maneba Nakai daabeneba weng fiab omkayemale! <sup>12</sup> Kobo Yesus Klaiste bainobo genemebo kobo makob nakai sbal maniba naka maki gaisenoba nita inamin namin ayam dlo mo geniba gigi moniba maki gaisenabib inaneba kebsa sbal maneba kukub misiamo deiboneba kukub ayam ota wafuneba afen smike amit nine dobone! Sino Gode kobo kemfakanea baabkenea Kobo afen smike amit nine doboneba amit namabebo ge baabkenea kobo naka mak unang maki baabeneba Ne Gode wengo wafu namabibo genebbio keso kobo Gode

kukubo mo deibonemebe! <sup>13</sup> Gode inamin namino alukum klanebu esa eka Yesus Klaiste komoke Fontias Failate Gode wengo omkeimabanebu esa i kin dimo ne wengo kobo baabkenamabi ole <sup>14</sup> kobo Gode wengo deibonemebe! Kla wafunale! Kobo inameb mole naka maki mo baanibta Gode wengo misiamobo genimibabe. Kobo weng olo sbalma wafu bieba Yesus Klaiste imin tleko! <sup>15</sup> Yesuse imin tlamabeo amo Gode omakabanebiobe. Am olo dimo Gode Yesus Klaiste imin dabanea tlamabebe. Gode elekiem eleta amit ayam binabebe. Elekiem eleta titilsabe. Elekiem eleta Sum eka komokwali komok sum nabe. <sup>16</sup> Nakaia unangai kaanomabib otane e mo kaanemebabe. E bibamo binabeo ayale sume tubu bie kesoa nibo esuo mebo mo monobta e bibamo unanobta ayale atenabobbabe. Sinanggwano nakaia unangai elekiem olokiem isa mo atemim blimobe. Eka memalosa naka mak unang maki e atenamini blimobe. E niniin sum osa e titil sum osa amit nin kesoa nibo e niniino dobtouleba nomo! Bainobe.

*Nakai afobeing homoni wengobe.*

<sup>17</sup> Nakaia unangai inamin namin afobeing homono bibebuei baabeneba Ibo mo untak ngam bianibta funanibta Ni niniino sumobo ge funimibe! Ibo mo funanibta Afobeing olo nibo daabenoa amit nomabbiobo genimibe! Afobeing olo blimanamabobo, ibo God eta bainobo gebaine! Elekiem eleta nibo daabeneta amit nomabbiobo, elekiem eleta inamin namin ayamo omkayebea seimbuobo ge baabenale! <sup>18</sup> Eka weng mak osa imin baabeneba Ibo okoko klayam okok bianiba naka mak unang maki amitie daaye bianiba eka naka mak unang maki afobeing blimi daaye bianiba inamin namino dokayemine! <sup>19</sup> Ibo inamib mole kukub olo makob inamin namino ayamo olminibbua sinanomo olota daabenamabobe. Kukub olo ayamobe. Makob amuno geigenoa amo sbal mabinabo inanoa memalo ibo daabenoa ayam biam biniba sinanomosa Gode tenaniba ayam nomabiobo ge baabenanale!

*Keb okoko kla okok kemale!*

<sup>20</sup> Timoti kobo Gode okok ele omklebu olo kla kima bianeba okok kemale! Besa wengo Gode wengba osa eka naka maki dim omin wengo baaniba Ibo ni wengo wentemib mole ibo kla tekein kenomabiobo gabib weng osa deibonale! <sup>21</sup> Naka maki dim weng olo wenteniba baaniba Ni tekein keminsabo geniba Gode bain wengo deibueibbiobe. Gode kobo daabkeneko! Ne wengo bayotabe. Fol neta keb futano dola omfubkenamabibe.

## 2 Timoti

### Fole Timotie futano imin dola omfubasebe.

### Tekein kemim wengobe.

Yesuse atdimo kaanea imin hananea ulanea abilim unebua bifolo 36 ese mak blimanota Fole imin klabutam bianeta futan olo dolaneta Timotie omfubanebiobe. Yo dimo Fole tekein kenea e kaanamabeo meb tubano kesoa e futan olo dolanea Timotie omfubanea bainobo galin nakaia unangai kimanin kukubo hekmel wengo omanea kla inanebta Yesuse bainobo galin nakaia unangai Efesas bibo blihi kimanale ge baabanebiobe.

1:1-2 Mikiktem wengobe.

1:3-2:13 Fole Timotie baabanea Keb kukubo ayamobo ge baabaseo wengobe.

2:14-4:5 Fole Timotie tekein kemim wengo baabasebe.

4:6-18 Fole bainobo galin kukubo nabinebuo wengobe.

4:19-22 Mubiang wengobe.

1-2 Ae ne miin Timoti kobo ne Fol neta kobo kla gobke bianita futan olo dola omfubkenamabibe. Ne Yesus Klaiste okok namananin naka netabe. Gode ne nemfakanea namanea haabiania Yesus Klaiste down wengo nakaia unangai omkayebibe. Gode moton wengo baanea lbo ib bobol tem funin osa makob Yesus Klaiste bobol tem funino ulab animibo amit nomabiobo genebuo wengo ne nakaia unangai omkayebibe. Nib Aye God esa eka nib Sume Yesus Klaist esa i dumo kobo kemhalilaniba daake bianiba bobol ayam omkakemine!

*Nibo Gode wengo aalo mo genaloabe!*

<sup>3</sup> Ne faninwali Gode kukubo wafu binibio kesoa nesa wafu blibe. Ne funania Kukub olo nabio molotobo gabibe. Ne kwin tebo dim osa boman tebo dim osa Gode amitie beten keha biania Kobo Timotie daabanale ge ohabibe. Ne keb bobolo fumbi kesoa Gode gangobo gabibe. <sup>4</sup> Ne kobo mebinebbuo bobolo funania ne kobo katemnamin teb nebua Ne e atemamo gabi kesoa ne monia katemamio seinamabibe. <sup>5</sup> Ne funania Keb bainobo galino dimbabo, motonobo gabibe. Sino keb afoko Lois osa eka keb biemo Yunis osa i hato Yesuse bainobo geniba sbalma binibbio kesoa kebna inaneba Yesuse bainobo gabianeba sbal mabiebo ne olo tekein kebibe. <sup>6</sup> Inamin kesoa ne keb bobol tem funin ayam omfabkeia kobo Gode titilo omkakebeo bobolo funanale! Sino ne kweilo keb

gabamon dim ut kafunia beten kebkeibuo dimo Gode e okok osa e titil osa kobo omklebiobe. Kobo Gode titil olo omklebuo sbalma wafu bianeba e okoko okok kemale! <sup>7</sup> Niminbabe, Gode e Hobe nibo dobyebue e nibo tosiainin kukubo mo omkayebibabe. E nibo daayebe kesoa nibo sbalma bianoba naka mak unang maki gobe bianoba daaye bianoba nib kukub nabobo nibmaye kla kima biobobe.

<sup>8</sup> Gode Hobe inanebio kesoa kobo nib Sume wengo naka mak unang maki omkayebibe mo tosiyanemebe! Ne Gode wengo naka mak unang maki omkayebi o dafa ota i klabuto ge nemeb teniba klabutam ele daibbio kesoa kobo mo funanebta E klabutam bie yotabo gabianebta tosiyanemebe! Kobo nakaia unangai Yesuse down weng ayam omkayebiba naka mak unang maki teniba kobo enino omkakemibo kobo i kukub misiam olo tolo mo tosiyanemebe! Gode titilo kobo omkakebe kesoa Yesuse down weng ayam nakaia unangai omkayemale! <sup>9</sup> Gode nibo hengmino temo biobo dotlanea funanea I ne naka unang aine genea nganabenebiobe. E nibo nganabenebuo nib kukub nabobo mo kibianeta nganabeim blimobe. Yeye. E ele bobol tem funin ota wafu bianea nibo daabeneba kukub ayam omyebiobe. Sinanggwan Gode dabale mo klaim blim bie dimo e funanea Sinanomo Yesus Klaiste dabaia daaknea dabalim daak una nakaia unangai daabena kukub ayam omyamabibo genebiotabe. <sup>10</sup> Gode weng olo baanebuo memalo bain inanebio kesoa nibo tekein kebuobe. Yesus Klaiste nibo hengmino temo dotlanebio nakae tlebua nibo daaye binabebe. Klaiste kaanea imin hananebio kesoa nibo kaanamino tolo mo tosiambobbabe. E kaanamino titilo omabbunebio kesoa nibo Klaiste down weng ayam wentenoba bainobo genomobo afen smike dobonoba amit nomabbibe.

<sup>11</sup> Eka Gode ne baatnenea Kobo ne down weng ayam olo nakaia unangai omkaye bianeba weng olo mitmakamo aleyemale ge baatnenea nemanee tenia <sup>12</sup> Yesuse down weng ayam nakaia unangai omkayebi o dafa ota naka mak unang maki teniba ne enino omnibbu otane ne olo mo tosiambibabe. Ne naka ele bainobo geba blie kla tekein kebi kesoa ne mo tosiambibabe. E okok olo ne omneanea baatnenea Okok olo kla okok kemale ge baatnenebua e daatne bia okok kebi olo sinanoa e imin tlameo baatnenea Keb okok olo ayamobo ge baatnenamabebe. <sup>13</sup> Kobo ne weng molot olo alebkeio kla fumbianeba nakaia unangai aleyemale!

Kobo weng olo kla funaneba sbal maneba Yesus Klaiste bainobo geneba esa naka mak isa gobenale! <sup>14</sup> Gode e weng moloto kobo omklameo kla kimanale! Gode Hobe nib bobol temo bie daabkenea Gode weng moloto kla kimanale!

<sup>15</sup> Kobo tekein kebeobe, Fiselas esa eka Hemosenis esa eka Esia betano bib mak bib mak sel isa i alukum ne daatne-namino deitne bliobe. <sup>16</sup> I ina blib otane Onesifolas ele mo funaneta Fole klabutam biebo geneta tosianim blimobe. E tenea daatnenebio kesoa ne seinhabibe. Ne Gode baabania Kobo Onesifolase mele-tani dohalilaneba daabenale ge ohabibe. <sup>17-18</sup> Kobo tekein kebeobe, sino ne Efesas bibo binibu o dimo Onesifolase tenea kla daatnenebio. Eka ne tenia Lom bib ele klabutam blio dim osa e imin hen wat hen wat tenea natemnea daatnenebio kesoa ne Sume baabania Kobo mubiang amo dimo Onesifolase dohalilaneba daabanale ge ohabibe.

## 2

*Kobo Yesuse bainobo galino sbal man-ale!*

<sup>1</sup> Ne miin Timoti kobo Yesus Klaiste daakebe kesoa sbal manale! <sup>2</sup> Ne nakaia unangai kin dimo kobo weng olo alebkeio kobo nakai bainobo galino sbalma blib ita weng olo alebeneba tekein keniba isak weng olo naka mak unang maki aleyemine!

<sup>3</sup> Awa genalin nakai ayami enino tolo mo tosiambibbabe. Kobo Yesus Klaiste okoko okok kebeb kesoa naka maki teniba enino omkakemib mole kobo sbal maneba makob awa genalin nakai ulab aneba Yesus Klaiste okoko okok kemale! Kobo enino tolo mo tosianemebe! <sup>4</sup> Awa genalin nakae funanea Ne okoko sbal maia ne komoke natemnea gotneneko genemeo e okoko sbalma bianea okok afeto bobolo mo fumbababe. <sup>5</sup> Nakae gigi unang ge mole e gigi haanin kukubo wafu neko! E mo inaim blim kene mole e mo gigi moneta gaisenamin baan dimo mo unaneta inamin namino mo dlamabebabe. <sup>6</sup> Naka make bumolok bianea dangi dikilanea dolmanebua damanomo emaye mikiktemo sin uleleb te fu downeta imin ota weleleb te funeta naka mak unang maki oyeta downomabiobe. <sup>7</sup> Ne saa weng ele baabkei olo kla funanale! Sma Sume daabkenea kobo ne weng olo mitmakamo alukum tekein kenamabeobe.

<sup>8</sup> Kobo Yesus Klaiste bobolo funanale! Yesus Klaiste Debite molofeitobe. E kaanea imin hana tlebiobe. Ne Yesus Klaiste dowan weng olo nakaia unangai omkayebi kesoa kobo wenteneba funanale! <sup>9</sup> Ne dowan weng olo omkeimabi o dafa ota

naka maki teniba enino omneniba makob nakai naka misiami sen sayo gebeniba dleb moniba klabutam danabib inaniba nesa nemeb teniba klabutam ele daibbiotabe. I ne sen saye getneib otane i Gode wengo sen sayo mo gebueim blimobe. <sup>10</sup> Naka mak unang maki ne enino omkanebib otane ne bainobo galino sbalma blibe. Niminbabe, ne funania Ne Gode nakaia unangai emi dlakanebuei daaye bia i Yesus Klaiste dowan wengo wenteniba bainobo gabiba Gode i hengmin temo blibo dotlanea dleb utnea e bib ut danea amit nine ge fumbiania i daayebibe. <sup>11</sup> Ne weng olo baabkenamabio bainobe.

Nibo Klaiste temna kaanobbio kesoa sinanomo etem nibtem nanoba amit nomabbiobe. <sup>12</sup> Naka mak unang maki enino nibo omkayemibo nibo nib bainobo galino sbal manob mole nibo makob Yesus Klaiste nanea komok ambie inanoba nibsa komokwal anomabbiobe. Nibo baanoba Ni Yesuse mo tekein kebobabbio genob biamo sinanomo Yesus esa baanea Ne i mo tekein kebibabo genamabebe. <sup>13</sup> Eka nibo baanoba Yesuse dobsileb nomo genomobo nibo mo dobsileb biob-babe. Otane e baanea Ne inamin namino nanamabibo genemeo e bain inanamabebe. E wengo baane biamo mo misimub anomobabe.

*Okok naka ayame Gode kin dimo molo-tobe.*

<sup>14</sup> Kobo ne weng ele okebi olo nakaia unangai amitie omkayemale! Eka kobo Gode kin dimo baabeneba Ibo inamin namin wengo baanimibo o wengo mo obianibta baase baase nimibe ge baabenale! Inamin kukubo nakaia unangai mo daabenomobabe. Nakai weng olo wentebib ile i kukub ayamo watwat daayebobe. <sup>15</sup> Kobo Gode okoko sbal maneba okok kemeba e keb okoko watemnea baabkenea Keb okoko molotobo ge baabkeneko! Kobo okok olo inamebo Gode kin dimo aalo genalino blimobe. Eka kobo Gode bain wengo mitmakamo kla tekein kebianeba naka mak unang maki omkayemale! <sup>16</sup> Kobo Gode wengba weng afeto nakaia unangai omibo mo wenteneba baka omebe! Niminbabe, nakaia unangai weng olo obib ile Gode weng motono deibueiba weng olo dletnoa God esuo mebo deiboniba dot skeim ye unomabiobe. <sup>17</sup> Nakaia unangai weng olo obib ile makob nakai yaio wise bianoa welo tam tam binoa sum anoa klolabenabo inanao weng olo i watwat dabenamabobe. Haimenias esa eka Failitas esa i dabo

inamin wengo aleye binabiobe. <sup>18</sup> I weng moloto deiboniba dim weng ota obianiba baaniba Bainobo galin nakaia unangai sin kaaniba imin hana tlibbio kesoa imino mo kaanibta hana tlomabibbabo ge obinabiobe. I inamin wengo obiba naka mak unang maki wentebibo weng olo i bainobo galino watwat daayebobe. <sup>19</sup> Ina otane Gode moton weng ole sbalobe. Makob sbal amuno nakai tebeloniba gibiba daak unanoa geiowanoa amo fibamino sbal manabo inanoa Gode weng osa sbal mabiobe. Gode weng olo dolanebio baanoa Sume e nakaia unangai tekein kebebo ge baanoa

eka imin baanoa

Nakaia unangai obianiba Ni Sume bainobo gabuobo gabibi kukub misiamo deiboniba kukub ayamo amit wafueine genobiobe.

<sup>20</sup> Am sumo mako buo o tem tamo dis mako walo oleb teniba olaibbiobe. Diso gol klaibbu osa eka silba klaibbu osa ole monio sum waloniba eka diso aso klaibbu osa eka dabalo klaibbu osa ole o monio men walonaniba oleb teniba am olo tem tam olaibbiobe. Diso monio men walibbu ole o okoko menobe. Eka diso monio sum walibbu ota o okoko dot sumobe. <sup>21</sup> Nakaia unangai

kukub misiamo deibonimib ile makob diso monio sum walibbuo ulabobe. Nib Sume nakaia unanga eli dlakanea baabeneba Ibo kukub ayam wafuniba ne naka an ne unang an naniba ne okoko ayamo olota amitie okok kemine ge baabenamabebe. <sup>22</sup> Kobo tembali bobol tem misiamo i bobol temo tlak oneyebua fumbinabibo kukub olo deiboneba kukub ayam ota wafunale! Kobo Gode weng ayamo kla wafu bianeba naka mak unang maki gobe bianeba weng fiabo omkayemale! Naka mak unang maki bobol tem funino ayam bianiba Sume baaniba Ni daabenale ge ohabib naka unang ita kobo bekebe nale! <sup>23</sup> Kobo nakaia unangai bobol tem funin ayamo blim bianiba weng misiam osa dleb weng osa ota obibi mo baka bianebta i wengo mo baka omebe! Kobo tekein kebeobe, i weng olota obianibta atliyemin kukubo omeb tam te kabioobe. <sup>24</sup> Eka Sume okok nakae alo mo tliaubanomone! E nakai alukum weng fiab omkaye bianete! E nakaia unangai Sume wengo kla aleyemeko! E naka mak unang maki kukub misiamo omkahamibo e alo mo tliaubanota yang kenemene! <sup>25-26</sup> E nakaia unangai e wengo omdibimibi weng fiab omkaye bianea funanea Gululame nakaia unanga eli makob eil halebi imiko

yafunabo inanea yafu bie kesoa i e okok ota okok kebib otane Gode daabenemeo i hengmino deiboniba i bobol temo de-skiniba omoniba Gode omaniba imaye Gululame kweiban dimo deibaniba meteniba Gode weng motono wentemomabiobo ge fumbianea nakaia unanga eli Gode wengo fiab aleyemeko!

### 3

*Mubiang amo wengobe.*

<sup>1</sup> Memalo mubiang am bomabio kesoa kukub misiam homono nakaia unangai dimo tam tlamabobe. Kobo weng olo kla fumbianebte! <sup>2</sup> Am olo dimo tlamo naka maki funaniba Ninita ye biobabo gabianiba moni osa gobo bianiba ili tak ngambianiba ili niniino omfufu bianiba God esa naka mak unang mak isa i weng dobo weng oye biam bianiba i biem ay kamwali weng osa omdibiye biam nomabiobe. I inamibo naka mak unang maki naka eli daayemomabib otane i naka mak unang maki mo gangobo genibta Gode niniino dobtoule b nomabibbabe. <sup>3</sup> I naka mak unang maki mo dohalim bianibta daayemomabibbabe. I naka mak unang maki dim oye bianiba imalo kukub ayamo mo namomabibbabe. I alo hebmamsab tliyebua naka mak unang maki dosuan bianiba yemomabiobe. I kukub ayamo mo gobonomabibbabe. <sup>4</sup> I nekwali dloniba wasi nakai kweiban dimo doka bianiba i bobol tem funin misiamo wafu bianiba funaniba Ni niniino sumobo gabianiba ili kukub nabib ota seinwe bianiba i Gode bobolo mo funomabibbabe. <sup>5</sup> I nakaia unangai kin dimo Gode kukubo wafunomabib otane i bobol temo funaniba Gode titilo sumba kesoa e ni mo daabenam-abebabo ge funomabiobe. Kobo i bekebe nino deibenale! <sup>6</sup> Inamomabib naka eli kukubo inaminobe. Maki moniba naka maki alelwali amo deibe unib biamo isu ye unaniba dim baabesiba unangi bobol tem funin ayamo blimi naka eli wengo wenteniba wafu nabinabiobe. Unangi in-abibi hengmin homono hengabib kesoa i bobol tem funino ayamo blimobe. I omomom kukub misiamo bobolo wayebobe. <sup>7</sup> Unang eli omomom wengo wentebib otane i Gode wengo kla mo wentebibbabe. <sup>8</sup> Makob sinanggwano Yanise Yamb-lise i dabo naniba Mosese wengo omdibiha binibbio inaniba naka elisa Gode weng baino omdibihabiobe. I bobol tem funino misiamobe. I baaniba Ni Gode kukubo wafu biobobo geniba dim obiobe. <sup>9</sup> Otane i kukub misiam olo mo biota sinanomobabe. Sinanomo nakai alukum i kukub misiamo watemubenomabiobe. Makob

sinanggwano nakai Yanise Yamblise i dabo naniba i kukub misiamo nabiba wate-mubeibbio inaniba naka eli kukub osa wate-mubenomabiobe.

*Fole Timotie baabanea Kobo Gode kukubo sbalma wafunale ge baabasebe.*

<sup>10-11</sup> Ina otane sino kobo ne baka haabianeba ne wengo nakaia unangai omkayebio wentebbiobe. Kobo ne kukubo tekein kebeobe. Ne amitie kukub ayamo wafu biana Gode okoko ayam okok ke-biania ne bainobo galin osa sbalma biana bainobo gabibe. Kobo ne kukubo tekein kebeobe. Ne atlinemin nakababe. Ne naka mak unang maki gobe biana daaye bia eka naka mak unang maki teniba ne enino omkanebiba ne enin kino wate-mebi otane ne sbal mablibe. Ne sino Antiok bib osa Aikoniam bib osa Listla bib osa blio bib olo seli enin sumo omkane binibbiobe. I ne enin sumo omkane binibbuo dimo nib Sume daatnenea nemsbal manea ne mo kaaim blimobe. <sup>12</sup> Nakaia unangai alukum Yesus Klaiste bobolo funaniba Gode kukubo kla wafu nimib isa wasi nakai teniba enino omkayemomabiobe. <sup>13</sup> Naka misiamo isa eka nakai dim omin wengo isa i nakaia unangai dim weng olo alebeiba i wenteniba bainobo genomabiobe. Eka Gululam esak e dim omin wengo omeb tenea dim omin wengo aleyebib naka eli baabesea i wenteniba bainobo gebenomabiobe. Memalo i kukub misiamo nabib otane sinanomota i kukub misiamo dot sum namomabiobe. <sup>14</sup> Otane kobo sino Gode bain wengo wenteneba bainobo genebbio amitie wafunale! Niminbabe, kobo nakaia unangai weng olo alebkeibbuei kukubo tekein kebeobe. <sup>15</sup> Eka sinanggwano kobo gwab biebo dimo Gode buk tem wengo wente bineba damaneba eka damaneb dim osa memalo dim olosa Gode buk tem wengo sma ye wentebeobe. Weng olo kobo daabkenoa keb bobol tem funin ayamo omkenoa Yesus Klaiste bainobo genebbuo Gode kobo hengmin temo biebo kemtlanebiobe. <sup>16</sup> Nakai weng olo alukum Gode buk temo dolaibbuo Gode Hob eta weng olo omkayebeta dolaibbiobe. Weng olo nakaia unangai alukum daayebobe. Weng olo nakaia unangai daaye bianoa aleyebua i weng moloto tekein kebiobe. Eka o inanoa ili hengmino nabib osa aleyebua i hengmino deiboniba kukub ayamo tekein kenimibo wafunomabiobe. <sup>17</sup> Weng olo inanamabo kesoa Gode okok naka nibo e weng olo amitie kibianoba e okoko ayam okok keboba weng olo nibo daaye bianoa titilo omkayebua e okoko klayam okok kemomo!

## 4

*Timoti kobo Gode weng baino omkeima-male!*

<sup>1</sup> Yesus Klaiste imin tlameo nakaia unangai afen blib isa eka kaaibbue isa i kukubo klanea nakaia unangai kimanamabebe. Yesus esa God esa i kin dimo ne kobo sbal weng baabkenamabibe. <sup>2</sup> Kobo Gode wengo nakaia unangai amitie omkayemale! I kobo seinkemib osa eka i mo seinkemin blim kenimib osa kobo Gode wengo amitie omkayemale! Kobo Gode wengo keim aleyemeba i tekein keniba bainobo geine! Eka nakaia unangai hengmino henganimibo kobo i hengmin kukubo alebeneba i hengmin kukub olo deiboniba Gode kukubo kla wafueine! Eka kobo i amitie weng fiab omkaye bianeba weng olo kla omkayemale! <sup>3</sup> Niminbabe, sinanomo nakaia unangai weng motono mo wentomabibbabe. I weng afeto Gode wengbao kla gobo blibo bobolo fumbianiba nakaia unangai weng olo aleyebibi baabeniba Ibo teniba nisu ele tlaniba ib weng olo alebeine ge oyemomabiobe. <sup>4</sup> I Gode bain wengo deiboniba faninwali awem wengo oyebib ota wenteniba bainobo genomabiobe. <sup>5</sup> Ina otane kobo i kukub misiamo olo mo bakanebta namebe! Kobo keb kukub ayam olota namale! Eka nakaia unangai kobo enino omkakemibo kobo sbal maneba Gode kukubo kla wafunale! Kobo Gode wengo amitie omkeima bianeba nakaia unangai omkaye bianeba Gode okok olo omklebuo amitie okok kemale!

<sup>6</sup> Memalo i ne nenaiba kaanamabio amo mebanobe. Ne dabalim olo deibonia Yesus esu unamabio am osa meb tlobe. <sup>7</sup> Ne Gode okok olo omnebuo amitie okok kebinabibe. Ne okok olo kla okok kebinabio memalo ye blimanobe. Ne Yesuse okoko mo deibueim blimobe. Ne e kukubo amitie nekek ge wafu binabibe. <sup>8</sup> Ne okok olo kla okok kebio blimano kesoa inamin namino dlonamino waiso blibe. Inamin namino dlonamino mitmakamo inaminobe. Sume nibo baabenea Ibo naka molot unang molotobo ge baabenamabebe. E naka molotobe. Sinanomo mubiang amo dimo e nakaia unangai kukubo klanang genea tlameo ne inamin namino donenea baatnenea Kobo naka molotobo ge baatnenamabebe. Eka e inanamabeo ne nenekiemo mo donamebabe. Nakaia unangai alukum Yesuse imin tlamabebo geniba waisa blib isa inamin namin olo doyeneya baabenea Ibo naka molot unang molotobo ge baabenamabebe.

*Fole wengo mubiang Timotie baabasebe.*

<sup>9</sup> Timoti kobo hebmamsab nesu tele!  
<sup>10</sup> Dimas ele dabalim okoko gobonea ne deitnenea monea Tesalonaika bib unebe. Eka Klesens ele monea Galesia bib unea eka Taitas ele monea Dalnesia bib onaiba  
<sup>11</sup> Luk eta elekiem ne beketne biebe. Kobo Make hebmamsab debetneba dab tline! E ayam nanea ne okoko daane binabebe.  
<sup>12</sup> Eka Tikikas ele ne dabaia monea Efesus bib unebe. <sup>13</sup> Kobo tlang gaebo utneba Tloas bib uto ne youm teke Kafase am tam daba tlibue dubutnena bianeba eka buk osa oleb na tele! Kobo buko eil aalo klaniba o dimo wengo dolaibbuo mo dokobkenomone! Kla fumbianeba omeh tele!

<sup>14</sup> Aleksandae ain klamin naka ele ne misiam natnenebe. E kukub misiam olo ne nane bine biamo sinanomo Sume yang kenamabebe. <sup>15</sup> Keba naka ele klanale! E nib weng olo nakaia unangai omkayebobo weng dobo weng owebebe. <sup>16</sup> Ne koto mikiktemo kot keibuo dimo nakai ne mo beketne bianibta daatneim blimobe. I alukum deitneiba nenekiem bianita kot keibiobe. Ne Gode baabania Kobo i kukub misiam olo mo yang kenebta yenanemebe ge baabaibiobe. <sup>17</sup> Otane Sume ne daatnenea nemsbal mane kesoa ne Yesus Klaiste wengo alukum nakaia unangai Yudabai omkaye bia i e weng olo wentibbiobe. Eka i funaniba Fole ananoba kaaneko ge fumbib otane Sume ne daatnene kesoa i ne mo nenaim blimobe. <sup>18</sup> I kukub misiamo nanemibo Sume ne daatnenea nemeb utnea e kimanin bib ut danamabebe. Nibo amitie e niniino dobtouleb nomo! Bainobe.

<sup>19</sup> Kobo Flisila osa Akwila esa eka Onesifolas esa e meletan isa Ayam blibte ge baabenale! <sup>20</sup> Ilastas ele sma Kolin bib wat biebe. Eka Tlofimas ele genansea Mailitas bib wat deiba tlibiobe. <sup>21</sup> Glol sume tlemabe kesoa kobo mo nemebe! Hebmamsab tele! Yubyulas esa Byudens esa eka Lainas esa eka Klodias esa eka nekwat mak isa alukum Klayam bieberte ge baabkeibobe.

<sup>22</sup> Sume keb bobol temo bianea daakemeko! Ne wengo bayotabe. Fol neta keb futan olo dola omfubkenamabibe.

**Taitas**  
**Fole futan olo dolanea**  
**Taitase omfubasebe.**  
**Tekein kemín wengobe.**

Yesuse atdimó kaanea imín hananea ulanea abilim unebua bifolo 35 ese mak blimanota Fole futan olo dolaneta Taitase omfubanebiobe. Taitas ele Glikobe. Am mak dimo e Fole bekeba haabinabe otane yo dimo e aa ubile niniino Klit ye bianea Yesuse bainobo galin nakaia unangai kima bieta Fole futan olo dolanea Taitase omfubanea bainobo galin nakaia unangai kimanin kukubo hekmel wengo omanea Kla inanebta kimanale ge baabanebiobe. Weng olo makob 1 Timotio ulabobe.

1:1-4 Mikiktem wengobe.

1:5-16 Bainobo galin nakaia unangai kimanin nakai wengobe.

2:1-15 Yesuse bainobo galin nakaia unangai kukubo namino wengobe.

3:1-11 Fole Taitase tekein kemín wengo baabasebe.

3:12-15 Mubiang wengobe.

1-4 Ae Taitas kobo ne Fol neta keb futan olo dola omfubkenamabibe. Nib dabo Yesus Klaiste bainobo gabuobe. Sino ne Yesus Klaiste wengo kobo omkake bia bainobo genebbio kesoa kobo makob ne minobe. Ne keb futan olo dola omfubkenamabibe. Ne Gode okok naka eka Klaiste okok namasanin naka na netabe. Ne Yesus Klaiste wengo nakaia unangai omkayebi kesoa nakaia unangai Gode dlakanebuei e weng olo wente bianiba bainobo geniba Gode moton wengo kla tekein keniba sbalma wafunomabiobe. Sinanggwano Gode dabal ele mo klaim blim bio dimo e moton wengo baanea Ne nakaia unangai ne bainobo genimibi dleb ut daya amit nomabiobo genebio e wengo dimbabe. E wengo amitie bain weng obinabebe. Ne weng olo nakaia unangai aleyebi kesoa i weng olo tekein keniba Yesuse imín tenea dleb utnea abilim ut danea amit nomabibo waiso bliobe. Sinanggwano Gode amo kinea yo dim ota ne moton wengo omyano genebuo amo yo tlo kesoa yo dimo e moton wengo naka maki omkayebea i omeb moniba naka mak unang maki omkayebiba wente binibiobe. Eka Gode nibo hengmino temo biobo dotlanebio nakae e weng olo nesa omnenea baatnenea Kobo ne weng olo naka mak unang maki omkayemale ge baatnene biobe. Nib Aye God esa eka nibo hengmino temo biobo dotlanebio nakae Yesus Klaist esa kobo daake bianiba bobol ayam omkakemine!

*Taitase Klit bib ye bianea Gode okoko okok kebisebe.*

<sup>5</sup> Ne weng olo kobo baabkenamabio sino ne baabkenia Kobo Klit bib ele bianeba bainobo galin nakaia unangai bib olo seli daaye bianeba Gode kukub ayam aleye bianeba eka ne okoko okok kemdenia atosino deibo unamabio klana bianeba eka bainobo galin nakaia unangai Klit betano bib mak bib mako blibi i kimanin nakai dlakaneba i bainobo galin nakaia unangai kima tlaine ge baabke tlibio weng ota ne imín baabkenamabibe. Kobo ne weng olo kla fumbianeba bainobo galin nakaia unangai kimanin nakai dlanale! <sup>6</sup> Bainobo galin nakaia unangai kimanin nakae kukubo inaminobe. E kukub ayam wafu bib nakaia unangai e kukubo ateniba funaniba E kukubo ayamobo ge funaine! Eka e alelwali asuo mo dlamene, olokiem olota omeko! E meme isa Yesus Klaiste bainobo geine! E memei kukub ayam kla wafu bianibte! I ili bobol tem funino mo wafu bianibta i awok aloki wengo mo omdibiyemibe! Kobo nakai kukub ayam wafu blib ita dlanebta bainobo galin nakaia unangai maki kimaine! <sup>7</sup> Nakai Gode okoko okok kebianiba Gode bainobo galin nakaia unangai kimanib mole i kukub ayam wafu bliba kukub ayamogai i kukubo yateniba baaniba I kukubo ayamobo gabibte! I mo funanibta Ni nakaia unangai kimanin naka sumobo ge funimibe! Eka i alo mo tliaubenomone! I aay misiamo mo downonibta gabam tol temo mima fubenota weng namin namin nimibe! Eka i awao mo genalaibe! Eka i monio bobolo mo fumbianibta Naka mak unang maki dim baabenoba Monio oisenomo ge funimibe! <sup>8</sup> Naka mak unang maki i bibo tlib mole i imeno doyine! I bobol temo klayam fumbianiba kukub ayam ota wafueine! I Gode hekmel wengo kla wafu bianiba okok kebianiba kukub misiamo i bobol temo funaib mole baaniba Yeye, ni kukub olo mo gobo biobbabo geniba kukub ayam ota wafueine! <sup>9</sup> Ni Yesuse weng moloto i omkaye binobbio i nekek ge wafu bianiba isak weng molot olo naka mak unang maki aleyebiba bain weng olo nakaia unangai bobol temo daabenoko! Eka i weng molot olo naka mak unang maki weng moloto mo wentaobbabo geniba weng omdibibibi omkayebiba i wenteniba tekein keniba Ni kukubo misiamobo geine!

*Nakaia unangai homoni Klit betan ye blibi dim omin wengo obinibiobe.*

<sup>10</sup> Ibo nakaia unangai weng moloto alebeine! Niminbabe, naka homon unang homoni Gode wengo omdibi bianiba maki baaniba Nakai Yesuse okoko okok kebibe



mole i aalo waketoumine ge obianiba i Gode wengo wentemino deiboniba wengo mitmakam blim ota obianiba eka dim weng ota obiam bliba naka mak unang maki i dim omin weng olo wente bianiba bainobo gabiobe. <sup>11</sup> I Monio oisenomo ge fumbib kesoa i naka mak unang maki dim omin wengo aleyebiobe. I weng misiam olo aleyebiba naka mak unang mak isa i meletan isa i weng misiam olo wenteniba isa bobol tem misiam fumbiobe. Kobo dim omin naka eli baabeneba Weng olo deibueine ge baabenale! <sup>12</sup> Sinanggwano Klit naka make Klit betan ye bia nakaia unangai oha bianiba E naka gang kesoa e wengo motonobo ge ohabiba e baanea Klit teni amitie dim omin weng ota obianiba eka bobol tem misiam fumbiam bianiba kukub misiamo makob eil halebi kukub ota wafu bianiba okoko deiboniba bisibabala bianiba imen homono wemiobobogenebiobe. <sup>13</sup> E weng olo bainobe. Kobo Klit teni sbal weng oye bianeba weng misiam olo deibueine ge oyebeba i bobol tem ayam ota fumbianiba Yesus Klaiste bainobo geine! <sup>14</sup> Eka i Yudai faninwali dim omin weng sango imaye ili bobol tem funaniba obib osa eka naka maki Gode wengo omdibi bianiba baaniba Ibo ni kukub olota namine gabib osa deibueine! <sup>15</sup> Naka maki i bobol tem funino ayam bianiba Gode bobolo fumbibi baaniba Inamin namino dabalim olo buo alukum ayamobo, o awembabo gabiobe. Eka maki Yesuse mo bainobo gabibbai i bobol tem funino misiam kesoa i baaniba Inamin namino alukum misiamobo gabib kesoa i bobol tem funino misiamobe. I hengmino hengabibo mo tekein kebibbabe. <sup>16</sup> Naka misiam eli baaniba Ni Gode wengo wafu biobobo gabib otane i Gode kukubo mo wafu blibba kesoa nibo yatenoba tekein kebuobe. I wengo dim obiobe. I Gode wengo mo wafu blibbabe. I Gode wengo omdibihabib kesoa e i kukubo mo gobo biebababe. Naka eli Gode wengo mo wentim blim kesoa i kukub ayam mo wafunomabibbabe.

## 2

### *Weng ayam ota amitie wafu nine!*

<sup>1</sup> Ina otane kobole ni Gode weng ayam alebkenobbuo weng ota naka mak unang maki aleyemale! <sup>2</sup> Kobo hangkalebminwali baabeneba Ibo aay misiamo mo downibta weng namin namin nimibe! Ibo kukub ayam ota wafu bliba naka mak unang maki yateniba baaniba I naka ayamobo ge oyebiba ibo bobol tem funin ayam osa kukub ayam osa kla wafu bianiba ibo bainobo galino sbal maniba naka mak unang maki gobe bliba eka naka mak unang maki

teniba ibo enino omkayemibo ibo bainobo galino sbal maine ge baabenale!

<sup>3</sup> Eka konokmonwal isa baabeneba Ibo Gode bobolo fumbianiba e kukubo kla wafueine! Ibo naka mak unang maki weng dobo wengo mo oye bianiba eka aay misiamo mo wembiam nimibe! Ibo unang maki kukub ayam ota aleyemine ge baabeneba <sup>4</sup> eka isak unangi souwali imaksai baabeniba Ibo ibo imakwal isa meme isa kla gobe bianiba <sup>5</sup> ibo bobol tem funin ayam osa kukub ayam osa kla wafueine! Ibo bobol tem misiamo mo funaniba Ni imakwali deibenoba naka elita taman deb dletnine ge fumbianibta mo inamibe! Ibo ibo amo okoko kla okok kebianiba eka naka mak unang maki daaye bianiba ibo imakwali wengo kla wente biam bliba naka mak unang maki ibo kukubo nabibo yateniba Gode weng dobo wengo ohamino deibueine ge baabeine!

<sup>6</sup> Eka kobo naka tembali baabeneba Ibo bobol tem funin osa ibo kukub osa kla kimateine ge baabenale! <sup>7</sup> Eka Taitas kobole kukub ayam sbalma wafu bieba i keb kukub nabebo kataniba isa kukub ayam yota wafueine! Kobo Gode kukubo i aleyemabebo bain weng ota i aleyemale! Dim wengo mo oyemebe! <sup>8</sup> Kobo bain wengo naka mak unang maki omkayebebo amitie oyemale! Kobo inamebo naka mak unang maki oke bianibta E weng olo misiamobo ge okemomabibbabe. Kobo inameb mole nakaia unangai keb weng olo omkayebebo weng dobo weng okebibi aalo waisenamabobe. Niminbabe, i tekein keniba nib wengo molot kesoa i weng misiamo imino mo baabenomabibbabe.

<sup>9</sup> Kobo nakai moni okokba besa okok keyemin nakai baabeneba Ibo ibo kimanin nakai wengo kla wenteye bianiba okoko kla okok kebiba i ibo seinyemine! Ibo ibo kimanini weng misiamo mo oye bianiba <sup>10</sup> i afobeingo ayoko mo henye biam nimibe! Ibo ibo kimanini okoko amitie kla okok kebiba i ibo oye bianiba I naka molotobo, i Gode wengo wente bianiba okoko kla okok kebiba kesoa nibo hengmino temo dotlanebio nakae Gode wengo ayamobo ge omine ge baabenale!

<sup>11</sup> Gode nakaia unangai daabenano gene kesoa e miine Yesus Klaiste dabanea daakenea dabalim ele tlanea at dimo kaanea nibo hengmin temo blibo dotlabenebio kesoa nibo amit nomabbiobe. Nibo yo tekein kebuobe. <sup>12</sup> Sino nibo Gode wengo omdibi bianoba dabalim olo kukub misiam ota wafu biob otane memalo Gode nibo daabeneba kukub ayam alebene kesoa nibo kukub misiam olo deibonobiobe. Memalo nibo bobol temo funin ayam osa kukub ayam osa ota

wafu bianoba Gode bobolo fumbianoba e wengo wafu biobobe. <sup>13</sup> Nibo ina bianoba nib Sume Gode tlamabeo waisa biobobe. Am olo dim ota nib hengmino temo dotlanebio nakae Yesus Klaiste e titilo ayal inamin tubuein kenebua tlea nakaia unangai atemomabiobe. <sup>14</sup> Sino e abilim ut bie dimo e funanea Ne daatnia atdimoo kaania nakaia unangai hengmino walubenano genea daakenea atdimoo kaanea nib hengmino walubenebio kesoa nibo kukub misiamo deibonoba bobol ayam fumbianoba e naka an e unang an nabianoba E kukub ayamo kla wafunomo gabuobe.

<sup>15</sup> Kobo weng olo nakaia unangai omkayemale! Kobo bainobo galin nakaia unangai kimanin naka kesoa i sbal weng oye bianeba Ibo kukub misiamo deiboniba kukub ayam ota wafunine! Ibo ne weng olo mo omdibimibe ge baabenale!

### 3

#### *Bainobo galini kukubo wengobe.*

<sup>1</sup> Kobo bainobo galin nakaia unangai keb bibo blibi weng olo imin baabeneba Ibo ib kiabwal isa eka bib mak bib mako komokwal isa i wengo kla wenteye bianiba wafu bianiba ib okoko ayam okok kebianiba i daayemine! <sup>2</sup> Ibo naka mak unang maki weng dobo wengo mo oye bianiba eka dleb weng osa mo oye biam nimibe! Ibo nakaia unangai alukum weng fiab omkaye bianiba daaye biam bianiba kukub ayam ota omkayemine ge baabenale!

<sup>3</sup> Sino nibo Yesus Klaiste wengo mo wente bianoba wafu nim blim binobio dimo nibo bobol tem misiam fumbinobbiobe. Nibo inaboba kukub misiam ota nibo yafubua Gode wengo omdibiha bianoba dim omin weng ota wente bianoba ninib bobol tem funin misiam ota wafu bianoba kukub misiam ota nabinobbiobe. Nibo naka mak unang maki kukub misiam omkayemomo gabianoba i inamin namino bobolo wayebua nibo i mo gobenim blim kenoba eka isak nibo mo gobenim blim kesib binobbiobe. <sup>4</sup> Ina otane nibo hengmino temo biobo dotlanebio nakae Gode nibo gobenea dohalilanea nibo hengmino temo biobo dotlanebio. <sup>5</sup> E nibo kukub ayam wafu biobta yateneta nibo hengmino temo biobo dotlanebio bleka? Yeye. E ele bobol tem ye dohalilana nibo hengmino temo biobo dotlanebio. E nibo daaye bianea bobol tem funin ayamo omyeneane eka e Hobe bobol tem funin ayamo memao omyenanebio kesoa nibo kukub ayam wafu binabuobe. <sup>6</sup> Yesus Klaiste nibo daabeneba nibo hengmino temo biobo dotlaneba Gode Hobe nibo dobyebio kesoa

e nibo kla daaye binabebe. <sup>7</sup> Yesus Klaiste nibo daabeneba nibo hengmino temo biobo dotlanebio kesoa nibo Gode yateneba baabeneba Ne kin dimo ibo hengmino blimobo, ibo ne baka bianiba amit nomabiobo ge baabenamabe amo waiso biobobe.

<sup>8</sup> Ne weng ele baabei olo bain baabeio. Ne bobol temo fumbio Kobo weng olo nakaia unangai sbal weng oyemale gabi kesoa kobo weng olo Gode bainobo galin nakaia unangai oyebeba i weng olo wente bianiba i bobol temo ayam ota fumbianiba okoko ayam ota okok kemine! Ne weng olo kobo baabkenamabio ayamobe. Nakaia unangai weng olo wentemib olo i daayemabobe.

<sup>9</sup> Kobo naka mak unang maki wengo mitmakam blimo mo oye bianebta dleb wengo mo oyemebe! Eka kobo Yuda ni faninwali besa weng sango mo wafu nemebe! Kobo Yuda nakai hekmel wengo dleb wengo mo oyemebe! Weng olo nakaia unangai mo daabenomobabe. O i bobol tem funino watwat dabenamabobe. <sup>10</sup> Naka make tenea bainobo galin nakaia unangai wengo omkayemsea wenteniba belalananiba maki e wengo bainobo gesib eka maki baaniba E wengo misiamobo gesib bianiba i sbal weng baase baase nib mole kobo naka ele baabaneba Kobo weng olo deibonale ge baabanale! E keb wengo mo wentim blim kene mole kobo imin baabaneba Weng olo deibonale ge baabanale! Kobo imin inaneba baabaneba osa mo wentim blim kene mole kobo temdeibanale! <sup>11</sup> Niminbabe, kobo tekein kebeobe, naka ele bobol tem funin ayamo deibonea bobol tem funin misiam ota fumbianeta kukub misiam ota wafu biebe. Kobo e kukubo atem tekein kebianeba E kukubo misiamobo gabeobe.

#### *Mubiang wengobe.*

<sup>12</sup> Ne Atemas etia Tikikas etia mak dabaia monea kebsu natlameo dimo kobo hebimansab teneba Nikobolas bib ele tele! Glol sume tlebianea aaye mouse ha tlemabe kesoa ne Nikobolas bib ele biamabibe. <sup>13</sup> Kobo hekmel weng tekein kemin nakae Sinas esa eka Abolos esa i bib mak unomabib kesoa kobo daabeneba imeno oyebta oletnibta unine! <sup>14</sup> Ne bobol temo fumbio Yesuse bainobo galin nakaia unangai alukum naka mak unang maki daaye bianiba okoko klayam okok kebianiba i naka mak unang maki inamin namino blim bibe biamo i dokaye biam bianiba okok kebianibte! I besao mo nimibe ge fumbibe.

<sup>15</sup> Nakaia unangai alukum ne baka blibi kobo baabkeniba Ayam biebtte ge baabkeibobe. Bainobo galin nakaia unangai kobo baka bianiba ni gobe blibi baabeneba

Klayam blibte ge baabenale! Gode ibo  
alukum daabeneko! Ne wengo bayotabe.  
Ne Fol neta keb futan olo dola omfubke-  
namabibe.

## **Failimon Fole Failimone futano dola omfubasebe. Tekein kemin wengobe.**

Yesuse atdimo kaanea imin hananea ulanea abilim unebua bifolo 32 ese mak blimanota Fole Lom bib ye klabutam bianeta futan olo dolaneta Failimone omfubanebiobe. Failimon ele inamin naminsa nakabe. E Kolosi bib ye bia bainobo galin nakaia unangai teniba e am ye mina binabibbiotabe. Fole futan olo dolanea Failimone omfubaseo mitmakam ole enaminobe. Failimone besa okok kehamin nakae niniino Onisimase Failimone inamin namin mako ayok doisa dletnea gilam monea Lom bib ye bianea Fole hetananea Fole Yesuse wengo omkeimabeo wentenea e bobol temo deskinanea Yesuse bainobo gene kesota Fole Onisimase imin dabanea unamabeta e Failimone tekein kemin wengo baabaneta Kobo Onisimase hengmino bobolo funino dokobkenoa deibanale ge baabaneta futano omanea dabane motemsebe.

1-3 Mikiktem wengobe.

4-7 Fole Failimone baabanea Keb kukubo ayamobo ge baabaseo wengobe.

8-22 Fole Onisimase wengo Failimone baabasebe.

23-25 Mubiang wengobe.

<sup>1</sup> Ae Failimon kobo Fol neta keb futan olo dola omfubkenamabibe. Ne klabutam ele bianitabe. Niminbabe, ne Yesus Klaiste dowan wengo omkayebi o dafa ota ne klabuto getneib biotabe. Nib neke Timotie ne bekebne bianea daanebebe. Ni nek Failimon kobo keb okoko makob ni dab ni okoko ulabobe. Ni kla gobke biobobe. <sup>2</sup> Ni dabo keb miine Akibas esa keb alelo Abia osa Yesus Klaiste bainobo galin nakaia unangai keb am tam minabib isa Klayam nabiobo ge baabenobobe. Abiao ni unang dikinobe. Eka Akibase okoko ni okoko ulab okok kebianea Yesus Klaiste dowan wengo nakaia unangai sbalma omkaye binabebe. <sup>3</sup> Ni nib Aye God esa nib Sume Yesus Klaiste esa baabenoba Ibo Failimon esa e meletan isa daabeniba bobol tem ayamomkayemine ge baabenobobe.

*Failimone Sume goba binebiobe.*

<sup>4-5</sup> Naka maki baaniba Failimone Yesus Sume gobanea bainobo genea e Yesuse bainobo galin naka unangi gobe biebo gesiba ne wentenia Gode gangobo genia keb bobolo amitie fumbiania Gode

nganha biania God kobo Failimone daahamale ge ohabibe. <sup>6</sup> Ne Gode imin baabania Failimone keb wengo nakaia unangai omkayemeo kobo inamin namin ayamomkayebese ge baabaibe. <sup>7</sup> Keb bobol temo ne omneneba eka Yesuse bainobo galin naka unang isa keb bobol temo omyeneba Gode wengo omkayebese i bainobo galino sbal sam bianiba seimbib kesoa ne bobolo ayam fumbiania seinkebiobe.

*Fole Failimone baabanea Kobo Onisimase dab tlemin anale ge baabasebe.*

<sup>8-10</sup> Kobo nakaia unangai kukub ayamomkayebese ne seinkebi kesoa ne baabkenia Kobo Onisimas esa inabanale ge baabkenamabibe. E makob ne miinobe. Eka nele e ay dikinobe. Niminbabe, ne klabutam ele biania Yesus Klaiste wengo omkahabia e bainobo genebiobe. Hangkalebmin ne Yesus Klaiste wengo omkeimabi o dafa ota i ne klabuto getneibbiobe. Klaiste nemfakanea e titilo omnebio kesoa ne baabkenia Kobo Onisimase kukub ayam omkahamale ge baabkei mole olo ayam otane ne mo menganimibabe. Nib dabo bobol temo makob biob kesoa ne inamin kukubo deibonia weng fiab baabkenamabibe. <sup>11</sup> E niniino mitmakamo Ayam Okok Kemin Nakabe. Sino e keb okoko klayamo mo naim blim otane memalo e nib dab nib okok naka ayam anebe.

<sup>12-14</sup> Ne Yesus Klaiste dowan wengo omkayebi o dafa ota klabutam blibe. Ne ele blio kobo mo daatnenamabebha otane ne keb okok nakae Onisimase kla goba blia e ele bianea keb alango dokonea ne daanemeko gabi otane ne kobo mo baabkeim blim kesoa ne e mo watanamabibabe. Ne naka ele gobania futan olo omania dabaia monea kebsu natlamabebe. Ne kobo mo baabkenita Onisimase dobneba daatneneko genimibabe. Kobo Ae genemeb Yeye genemebo kleb bobol temobe. <sup>15</sup> Onisimase kobo deibkenea wetou tlebuo ne mo tekein kebiba otane ne funania Gode kweimiki deibaia monea bib afet ye unanea Yesus Klaiste wengo wenteko geneta watanamino deibanea tlebu ese makobo ge funaiobe. Otane e amito mo nemebabe. E besa un te biebe. Memalo e Yesus Klaiste bainobo gene kesoa imin natlea dab keniba amit nomabiobe. <sup>16</sup> E nib Sume bainobo galin naka kesoa e ne ningobe. Ne e goba biania seinhabibe. Sino e okoko besa okok kemin naka otane memalo e Sume Yesus Klaiste bainobo gene kesoa e okoko besa okok kemin naka eka e keb ning na kesoa e natlameo kobo seinha bianeba kla gobanamabeobe.

<sup>17</sup> Kobo funaneba Fole Klaiste okok naka makob ne ulabobo geneb mole ne natlia nemeb taneba keb am tam danamabeb inaneba Onisimase debeb tam danale! <sup>18</sup> E kukubo misiam nabianeana inamin namino ayok doikenebio mole ne weng omfutnenebta neta inamin namino yang ke doklano! <sup>19</sup> Weng olo Fol neta dolaiobe. Ne dolania Neta yang ke doklano gei otane ne mo baanita Sino ne Yesuse kukubo alebkeia bainobo geneba afen smike doboneba amit namabeb yo yang kenale genimibabe. <sup>20</sup> Ae ne nek kobo Sume Yesus Klaiste bainobo galin naka kesoa daatnenale! Nib dabo Klaist emi kesoa kobo Onisimase imin natlea dab keniba ib bobol temo makob aib mole ne bobol ayam funania seinamabibe. <sup>21</sup> Ne wengo dola omfubkenamabi olo ne tekein kebibe, kobo ne wengo wenteneba inaneba inamin namin kukub ayamo afet osa omalamabeobe.

<sup>22</sup> Kobo Onisimase kukub ayam omaneba gobanale! Eka ne weng mako baabkenamabio kebsa bainobo galin nakaia unangai keb am tam minabib isa ibo Gode nganha bianiba Fole klabuto tileisaneba tleko gabibo ne funania Gode ib wengo wenteneana inanamabebo ge funai kesoa kobo biino mo deitnenabebte!

*Weng mako klayam blibte ganamin wengobe.*

<sup>23</sup> Ebaflas esa Yesus Klaiste dowan wengo omkayebe o dafa ota klabuto gebaib biota e tena bianobta e Kobo klayam biebte ge baabkenebe. <sup>24</sup> Eka nakai ni dabwal okok biobi Mak esa Alistakas esa Dimas esa Luk esa i Kobo klayam biebte ge baabkeibobe. <sup>25</sup> Yesus Klaist Sume ibo daayemeko! Ne wengo bayotabe. Fol neta futan olo dola omfubkenamabibe.

## Hiblu

### Naka make futan olo dolanea Hiblu teni omfubenebiobe. Tekein kemim wengobe.

Yesuse atdimmo kaanea imin hananea ulanea abilim unebua bifolo 37 ese mak blimanota naka make futan olo dolaneta Hiblu teni Yesuse bainobo gabibi omfubenebiobe. Nibo futan olo dolanebio nakae mo tekein kebobbase. Naka maki teniba Hiblu teni Yesuse bainobo galin nakaia unangai dim omin wengo omkayebiba i Bain ese dim ese gabianiba maki bainobo galino deibonom genamib kesota naka ele futan olo dolaneta omfubenebiobe. E i alebenea baanea Klaiste okok osa e niniin osa ota Mosese okok osa e niniin osa gaisonobiobo ge baabenebiobe.

1:1-3 Gode Klaiste dabane tlea e kukubo nakaia unangai alebenebuo wengobe.

1:4-2:18 Klaiste abiseli gaisenebiobe.

3:1-4:13 Klaiste Mosese Yosuae i dabo gaisenebiobe.

4:14-7:28 Klaiste okoko Gode amo kimanin nakai okoko gaisenebiobe.

8:1-9:28 Klaiste wengo Gode hekmel wengo sino gaisonobiobe.

10:1-39 Klaiste kaanea e ileme singanea nakaia unangai hengmino temo blibo dotlanebuo wengobe.

11:1-12:29 Bainobo galin wengobe.

13:1-25 Mubiang wengobe.

*Gode miine wengo nibo omyebiobe.*

<sup>1</sup> Sinanggwano am homono dimo Gode e weng omkeimalin nakai e wengo omkaye bianea eka kukub homono aleye biam bia isak nib faninwali weng olo omkaye binibiobe. <sup>2</sup> Otane memalo mubiang amo bo-mano dim olo e miine e wengo omalea eka esak weng olo nibo omyebe. Sinanggwano Gode e miine baabanea Kobo abil esa dabal esa inamin namin osa alukum klanale ge baabanea e klanebiobe. Gode e dofakanea Ne inamin namin olo doklamabibo genebio kesoa e dlamabebe. <sup>3</sup> Gode titilo ayal inamin eibie inanea e miin esa e titilo ayal inamin eibie. E miine makob aalebe Gode ulabobe. E wengo titilsa kesoa inamin namino abilim uto bu osa eka dabalim olo bu osa owebea alukum klayam biobe. E inamin namin olo alukum kima biebe. Sino e atdimmo kaanea nib hengmino omlabenea imin hana utnea abilim ut unanea Gode titilo inamin namino alukum gaisonea kima bie nakae kweile kweitale kikib ye toubianea inamin namin olo kima biebe.

*Gode e miine niniino dobtouleb biebe.*

<sup>4</sup> Yesuse ina bie kesoa e abiseli gaisenebiobe. Gode Yesuse niniino dobtouleb bie otane e abiseli niniino mo dotouleb biebase. <sup>5</sup> Sinanggwano Gode e buk temo baanea

Kobo ne miinobo, eka nesa memalo keb ay aiobo ge baabanebio

kesoa e Yesuse niniin ota dobtouleb binebiobe. E abiseli niniino mo dotouleb nin blimobe. Eka e imin baanea

Ne keb ay eka kebsak ne miin nabo ge baabanebiobe.

E weng olo abiseli mo baabeim blimobe. Ele miin eta baabanebiobe. <sup>6</sup> Eka sino Gode e miine hek sume dabanea daakenea dabalim ele tlang genabe dimo Gode abiseli baabenea

Ne abisel ibo alukum ne miine niniino dobtouleb nine ge baabenebiobe.

<sup>7</sup> E abiseli weng sango baanea

Ne abiseli baabeniba Ibo makob glole hebmamsab kikim binabe inaniba ne okoko hebmamsab okok kebianiba ib titilo makob atolo ulab aine gabibo ge baanebiobe.

<sup>8</sup> Ina otane Gode e miine weng sango baanea

God kobo inamin namin olo kimaneba keb kimanin kukub olo amit namabobe. Kobo inamin namin olo kima bieba keb kimanin kukub olo amitie molot namabobe. <sup>9</sup> Kobo kukub molot ota gobo biebo. Kobo hengmino mo gobo biebbabe. Kobo inabeb kesoa Sum kobo ne keb God neta kemfakaibua kobo sum aneba seineba keb seinino naka mak unang maki seinino gaisenobo ge baabanea

<sup>10</sup> eka imin baabanea

Sum kobo sinanggwano dabal ele klaneba eka abil esa klananeba inamin namino abilim ut bu osa kehta klanebiobe. <sup>11</sup> Sinanommo dabal esa abil esa blimanamabo otane kobo amit namabeobe. Abil esa dabal esa ole makob youmo aluanoa banabo inanoa blimanamabobe. Kobo dabal esa abil esa halbuneba <sup>12</sup> makob nakaia unangai youmo halbugenabib inabonamabeobe. Makob nakai sin youmo dibianiba mema youmo dloniba dluanabib inaneba kobo dabal esa abil esa olbianeba eka dabale mema esa eka abile mema esa ota klanamabeobe. Inanamabeob otane kobole

sinanggwano ming inamin ye binabebbua memalosa ming inamin ye biebobe. Sinanomosa ming inamin ye namabeobe. Kobo afet anamino blimobe. Kobo kaanamin osa blimobo ge baabanebiobe.

<sup>13</sup> Gode imin baabanea  
Kobo ne kweile kweitale kikib ele toubianeba inamin namino kima bieba sinanomo ne keb makaai alukum yalia i titilo blimanamabobo ge baabanebiobe.

E weng olo abiseli mo baabeim blimobe. Ele miin eta weng olo baabanebiobe.

<sup>14</sup> Abiseli fatnamine? I smiki ulab kesoa i Gode okoko okok kebiobe. I Gode dlanea moniba nakaia unangai hengmino temo bliba Gode dotlanebuei sinanomo dleb utnea e bibam ut danea nomabib isu ye moniba daayebiobe.

## 2

*Gode nibo daabenea dleb utnea e bibam ut danea amit nomabbuo okok olo sumobe.*

<sup>1</sup> Gode miine Yesuse inanea abiseli gaisenebio kesoa nibo e wengo wentobbuo sbalma wafunomo! Nibo inanomobo weng olo mo deibonomabbibobe. <sup>2</sup> Sinanggwano Gode hekmel wengo abiseli omyenea dlanea moniba nakaia unanga isu unaniba e wengo omkaye binibbuo amitie weng olo bain kesoa nibo tekein kebuobe, weng olo bainobe. Eka nakaia unangai weng olo deiboniba kukub misiam ota wafu blib ile Gode i kukub misiamo yang kenea enin sumo omyebiobe. <sup>3</sup> Gode nakaia unanga eli inabenebio kesoa e weng ayamo nibo hengmin temo bioba Yesuse dotlanebio weng olo deibonoba mo bainobo geim blim kenob mole nibo amit nomabbua bleka? Yeye Gode nib kukub misiamo yang kenea enin sumo omyenea watwat dabenamabebe. Bainobe. Sino nib Sume Klaiste nakaia unangai Gode nibo hengmino temo biobo dotlanamabeo weng olo omye biota eka naka mak unang maki weng olo wentibbuo isak nibo baabeniba weng olo bainobo ge baabeibbiobe. <sup>4</sup> I inabiba Gode i daayebua okok sumo klabinibbuo okok olo naka mak unang maki sino mo watemim blimobe. Gode inanebio kesoa nibo tekein kebuobe, Gode baanea Ne ibo hengmino temo dotlanamabio weng olo bainobo genebiobe. Eka e Hobe dabanea monea nakaia unanga isu unanea Gode bobol tem funino wafu bianea e titilo elekiem olokiem i afet afet omyen tlanebua i Gode okoko okok kebiobe. I inabib kesoa nibo

watem tekein kebianoba Weng olo bainobo gabuobe.

*Yesuse nakanebio kesoa nibo daabenea nib hengmino temo biobo dotlanamabebe.*

<sup>5</sup> Nibo mema dabale nakaia unangai Yesuse mema kukubo wafunomabibo wengo obobo, Gode abiseli mo baabeneta Ibo ne dabal ele klanimio kimaine ge baabeim blimobe. E miin eta dabal ele kimanamabebe. <sup>6</sup> Gode buk tem wengo baanoa

Nakai titilo sumba i besa otane God kobo i amitie kima bianeba kla gobe binabeobe. <sup>7</sup> Kobo nakaia unangai baabeneba Mema dim yota abiseli niniinsaiba ibo niniin blim tab unine namo namole ne titilo ayal inamin einobuo omonia eka niniin sumo omonania omya ibo abiseli gaiseniba <sup>8</sup> inamin namino ibta sbal maniba alukum kimaine ge baabenebbio kesoa i inamin namino alukum kima bliobo genobiobe.

Gode nakaia unangai baabenea Ibo sbal maniba inamin namino alukum kimanomabiobo ge baabenebiobe. E inamin namin mako deibonamino blimobe. Gode i inangge baabenebi otane nibo tekein kebuobe, memalo nakaia unangai mo sbal maniba inamin namino alukumo mo kima blibbabe. <sup>9</sup> Ina otane memalo nibo Abilim Da Tlemin Nakae Yesuse tekein kebuobe, Gode nibo daabenea Yesuse dabanea daakenea dabalim ele tlanea makob okok nakai ulab anea Gode e baabanea Abiseli kobo gaikenomabiobo ge baabanea mema dim yota abiseli Yesuse gaisaiba e addimo kaanea nibo hengmino temo biobo dotlanea Gode imin dofaanea hananea e titilo ayal inamin einobuo omanea baabanea Kobo sbal maneba komok sum aneba inamin namin olo kimanale ge baabanebua e memalo inanea kima biebe. <sup>10</sup> Gode inamin namino alukum klanea kima bianea funanea Yesuse naka homon unang homoni hengmino temo blibo dotlanea i moniba ne titilo ayal inamin eibio bibo unine ge funanea e Yesuse enin sumo omalea e enin kino watembio kesoa Gode nibo hengmin temo biobo dotlanebio kukub olo ayamobe. Nib aab sum ele nibo hengmino temo biobo dotlanebio kesoa nibo e meletan anoba monoba Gode titilo ayal inamin eibio bibo unomabbio.

<sup>11</sup> Yesuse nib hengmino omketouye binabe kesoa nibo emiobe. Yesus esa eka e hengmino omketouye binabe naka unang nibsa nib aye elekiemobe. Inamin kesoa Yesuse nibo baabenea Ibo ne ningwal eka ne nengwal nabo ge baabenang gameo e

aalo mo genalamebabe. <sup>12</sup> Sinanggwano Yesuse weng mako baanea Gode buk temo dolaibbuo inaminobe.

God kobo ne keb niniino ne ningwala nengwalai oye biana eka keb bainobo galin nakaia unangai minamibo ne keb niniino kemtoupleb namabibo genebiobe.

<sup>13</sup> Gode buk temo weng mako dolaibbuo asa inaminobe. E baanea

Ne Gode bainobo gebania e kukub ota wafunamabibo genebiobe.

Eka weng mak osa e imin baanea Netem eka Gode memei donebuei tenanoba ele biobobo genanebiobe.

*Yesuse makob naka moton nib ulab aneta nakaia unanga nibo daabenebiobe.*

<sup>14</sup> Nakaia unanga nibo Yesuse baabeneana Ibo ne melelobo ge baabenebio nibo naka moton kesoa esa makob naka moton nib ulab anebiobe. Gululame kaanamin titilo kima bie kesoa Yesuse funanea Ne Gululam esa e titil osa watwat dabenano genea deskinanea makob naka nib ulab aneta kaanebiobe. <sup>15</sup> E inanebuo nakaia unanga nibo sino kaanamino tolo amitie tosiambob otane e funanea I kaanamino tolo mo tosianimibe ge funanea daabenebio kesoa nibo mo tosiambobbabe. <sup>16</sup> Nibo tekein kebuobe, e abiseli mo daabeim blimobe. Nakaia unanga nibo Eblahame meletan nibta daabenebiobe. <sup>17</sup> Gode funanea Ne miine okoko makob ne amo kimanin nakai komok sume okoko ulab okok kebianea nakaia unangai dohalilanea daabeneana i hengmino walubeneko ge funane kesoa Yesuse makob e ningwala nengwala nib ulab anea naka moton anebiobe. <sup>18</sup> Yesuse daak te dabalim ele bie dimo Gululame te nea baabanea Kobo ne wengo wentene ge oha biana dabama temebise otane Yesuse e wengo mo wenteneta kukub misiamo mo naim blimobe. E besa bobol ilum ota wafu binebua nakaia unanga nibsa Gululame baabeneana Ibo ne wengo wenteniba inamine gabeo Yesuse e kukub olo tekein kebe kesoa e nibo daayebebe.

### 3

*Yesuse Mosese gaisanebiobe.*

<sup>1</sup> Yesuse ina biana daaye binabe kesoa ne nekwal ibo Gode dlakanebua e wengo wafu blib ibo Yesuse bobolo funine! Gode e dabanea daakenea Gode wengo omkaye biana e okoko makob Gode amo kimanin nakai komok sume okoko ulab okok kebinebua nibo e wengo wafu bianoba e weng olo nakaia unangai omkayebuobe. <sup>2</sup> Gode Yesu Klaiste dofakanea baabanea

Kobo ne okoko kla okok kemale ge baabanea e Gode okoko kla okok kebianea makob sinanggwano Mosese Islel nakaia unangai daaye biana Gode okoko kla okok kebinebio ina binebiobe. <sup>3</sup> Gode Yesuse niniino omfabanamabe otane e Mosese niniino mo omfabanamabebabe. Kukub olo makob naka make amo ayam gene meo nakaia unangai watemubaniba baabaniba E okoko ayamobo geniba e niniino dobtoupleb blib otane i e amo niniino mo omtoupleb nim blim deibonomabib inaminobe. <sup>4</sup> Amo omalo mo genota am anomobabe. Naka ita amo genam binabiobe. I ina binabib otane God eta inamin namino alukum klanebiobe. <sup>5</sup> Mosese Gode okok naka kesoa e Gode nakaia unangai daaye binebio dimo e Gode okoko kla okok kebianea eka sinanomo Gode e mele-tani wengo omkayemabe weng osa nakaia unangai omkaye binebiobe. <sup>6</sup> Ina otane Gode Dofakamin Nakae Klaiste ele Gode miin kesoa emaye Gode okoko kla okok kebianea Gode nakaia unangai kima biebe. Eka nibsa sbalma bianoba seimbianaoba Gode nibo dletnea monoba e bibo unomabio amo waisonob mole nibo Gode naka an e unang an nanomabbioebe.

*Nakai unangai Gode wengo omdibihabibi ayamo mo nomabibbabe.*

<sup>7-8</sup> Nibo nib bainobo galino sbal manomobo Gode meletan anomabbio kesoa nibo Gode Hobe wengo kla wentemomo! Sinanggwano e weng olo Gode weng omkeimalin nakai omya Gode buk temo dolaibbuo baanoa

Memalo ibo Gode wengo wentaibo mo ombiabanipta deibonimibe! Ibo mo sinanggwano ib faninwali ibuantem ye bianiba i Gode wengo omdibiha bianiba enino omkaha binibbio inamibe! <sup>9</sup> Ib faninwali bibo yo bliba Gode daayebeo bifolo 40 blimanoa watemib otane i e wengo mo wafueim blimobe. I e wengo omdibiha bianiba bobol ilum omkaha binibbio. <sup>10</sup> I inamib kesoa e nakaia unanga eli dosuananea baabeneana Ibo ne kukub ayamo deiboniba kukub misiam ota amitie wafu bianiba ne wengo mo wenteniba wafunim blim keibobo ge baabenebiobe. <sup>11</sup> E i alo tliaubano kesoa e sbal weng baanea Nakaia unangai ne wengo omdibinebibi ne mo beketne bianipta singkalomabibbabo ge baabenebiobo genobiobe.

*Nibo Gode wengo mo omdibihamobe!*

<sup>12</sup> Ne nekwal ibo klaine! Ibo bobol tem funin misiamo mo fumbianipta Gode



bainobo galino mo deibonimibe! Ibo inaiib mole ibo Gode amit afen binabe deibanomabiobe. Kukub olo misiam kesoa ibo klaine! <sup>13</sup> Mema dim olo am obba ye bomanomo bomanomo yo dimo ibo ib sinwalo maki baabeniba Nibo Gode wengo mo omdibihamobe ge oye bianiba daabesese nine! Ib isak temo naka make bobol temo hengmino tlak unubasoa funanea kukub olo klayamobo ge funanea Gode wengo ombiabaneme kesoa <sup>14</sup> ibo ib sinwalo daabesese nine! Niminbabe, nibo sino Klaiste wengo wentenoba bainobo genobbuo mema dim olosa amitie sbal manoba wafu biam binoba kaanom gaob dim osa amitie wafu bianoba kaanomobo nib tem Klaiste tem nanoba amit nomabiobe. <sup>15</sup> Makob Gode buk tem wengo baanoa

Memalo ibo Gode wengo wentaibo mo ombiabanibta deibonimibe! Ibo mo sinanggwano ib faninwali Gode wengo omdibiha binibbio ina bianibta omdibihamibe genobiobe

<sup>16</sup> Wanita Gode wengo wentaibo wafunamino deibonibta omdibiha binibbione? Nakaia unangai alukum Mosese dletnea Isib betano deiboniba moniba bib mak ye onsib ita Gode wengo wentaibo omdibi binibbiobe. <sup>17</sup> Bifolo 40 o blimanobuo dimo Gode wani al ota tliha binobione? Nakaia unangai hengmino henganiba ibuantem ye bianiba kulila bianiba namaibbuei al ota tliha binobiobe. <sup>18</sup> Eka Gode wanita baabeneta Ibo ne bibo mo utnibta singkalomabibbabo ge baabenebione? Nakaia unangai e wengo mo wenteniba wafunim blim kebinibbue ita baabenebiobe. <sup>19</sup> I inaiibbuo nibo tekein kebuobe, i Gode wengo mo bainobo geim blim kesoa i e singkalin bibo mo unim blimobe.

#### 4

*Bainobo galin nakaia unanga nibo Gode bekeba bianoba singkalomabbiobe.*

<sup>1</sup> Sinanggwano Gode moton wengo baanea Ne bainobo galin nakaia unanga ibo moniba ne bibo beketne bianiba singkalomabiobo genebiobe. Memalosa e sma ye inangge oyebebe. Ibo Gode mo bainobo gebaim blim keib biamo sinanomo Gode ibo baabenea Ibo ne bibo mo monibta beketne bianibta singkalomabibbabo ge baabenamabebe. E inangge baabenamino misiam kesoa ibo klabianiba e weng olo tolo tosanine! <sup>2</sup> Nakaia unangai Gode weng ayamo nibo omkayebiba wentebobo makob sinanggwano Gode weng omkeimalin nakai naniba nib faninwali Gode weng ayamo omkayebiba wente binibbio inayebiobe. Ina otane nib

faninwali Gode weng olo wentebobo mo bainobo geim blim kesoa weng olo i mo daabeim blimobe. <sup>3</sup> Otane Yesuse bainobo galin nakaia unanga nibole Gode bekeba bianoba singkalomabbiobe. Gode buk tem wengo enangge baanoa

Ne alo tliautmeno kesoa sbal weng baania Nakaia unangai ne wengo omdibinebibi ne mo beketne bianibta singkalomabibbabo ge baaiobo genobiobe.

Sinanggwano Gode abil esa dabal esa klanea blimano dimo e nakaia unangai e bainobo gebaniba ete nabi-aniba singkalomabibi waise binabebua memalosa sma ye waise biebe. <sup>4</sup> Gode buk temo weng mako enangge baanoa

Amo sikiso dim ota Gode inamin namin okoko alukum klanea eka sebene dim ele sinanebiobo genobiobe.

<sup>5</sup> Gode buk tem weng olo imin baanoa I ne mo beketne bianibta singkalomabibbabo genobiobe.

<sup>6</sup> Sinanggwano nakaia unangai Gode dowan weng ayamo wentib otane i e wengo mo wafunibta bainobo gebaim blim kesoa i e mo bekeba bianibta singkalim blimobe. Ina otane Gode buk tem weng olo sma ye bio kesoa nibo tekein kebuobe, naka mak unang maki Gode bekeba bianiba singkalomabiobe. <sup>7</sup> I mo bainobo genibta Gode mo bekeba bianibta singkalim blim kesoa Gode nakaia unangai bekeba bianiba singkalomabib am mako omakanea baanea Am olo memalotoba ge owebebe. Sinanggwano i Gode mo bainobo geim blim bliiba bifol homono blimanota Isleli komok sume Debite Gode weng omalea e Gode buk temo weng olo dolanea baanea

Memalo ibo Gode wengo wentaibo mo ombiabanibta deibonimibe ge baanea dolanebiobe.

<sup>8</sup> Eka weng mak osa sinanggwano Yosuae Mosese alango dokonea nakaia unangai dletnea moniba bibo unibbio yo Gode singkalin bib bua i moniba ye unaniba sinaibbiota mole Gode singkalin am mako mo omfakanemebabe. Otane i sino mo monibta sinaim blim kesoa <sup>9</sup> nibo tekein kebuobe, singkalim am olo mo tlim blim sma ye biobe. Am olo dimo Gode meletani e bekeba bianiba singkalomabibo makob sinanggwano Gode e okoko klanea blimanoa deibonea sinanebio inaniba singkalomabiobe. <sup>10</sup> Makob sinanggwano Gode e okoko klanea blimanoa sinanebio inaniba Gode nakaia unanga isa i okoko blimanoa deiboniba Gode bekeba bianiba singkalomabiobe. <sup>11</sup> Inanomabib kesoa

nibo Gode bekeba bianoba singkalomab-  
buo bobolo fumbianoba e wengo kla  
wente bianoba nib bainobo galino sbal  
manomo! Sinanggwano nib faninwali  
Gode wengo omdibiha bianiba e mo  
bekebanibta singkalim blim binibbio  
kesoa nibo klanomo! Nibo i kukubo mo  
wafunomobe!

<sup>12</sup> Niminbabe, Gode weng olo besa weng-  
babe, e weng olo titilsa kesoa klaine! E  
wengo makob seku yango ulabobe. Sekuo  
yang otane Gode wengo dot yangobe.  
Eka weng olo monoa nakaia unanga nib  
bobol temo unanoa inamin namin kukubo  
nib bobol temo bibebuo aleyebua nakaia  
unanga nibo inamin namino dlomo gabob  
osa eka bobol tem afet osa fumbobo aleye  
bianoa Olo misiamobo olo ayamobo gabi-  
anoa aleyebobe. <sup>13</sup> Gode inamin namino  
klanebuo e alukum watemebebe. E in-  
amin namino ayok anoa mo watememin  
blim kenamino blimobe. Inamin namino  
alukum Gode wateme bianea tekein ke-  
bebe. Eka sinanomo Gode nakaia unan-  
gai kukubo klanang game dimo nibo nib  
kukub nabobo wengo baabanomo!

*Yesuse Gode amo kimanin nakai komok  
sume ulabobe.*

<sup>14</sup> Naka ele Gode amo kimanin nakai  
komok sume ulabobe. E utnea Gode bib  
ut tenea Gode tena bliobe. Naka ele Gode  
miine Yesus etabe. E ina bie kesoa e  
wengo nibo nakaia unangai omkayebobo  
bainobo genoba sbalma wafunomo! <sup>15</sup> Nib  
bobol temo funanoba Inamin namin kukub  
misiamo nanomo ge funanomobo nibmalo  
mo baanobta Yeye genomabbibobabe. Baye  
nanomabbi otane Gode amo kimanin nakai  
komok sum ele nibo dohalilanea daaye  
binabebe. Niminbabe, sino kukub misiam  
olo e dabamanoa inamin namin kukub  
misiam olo nanale ge baabano otane e mo  
wenteneta naim blimobe. E inanebio kesoa  
nibo dohalim bianea daaye binabebe. <sup>16</sup> E  
inanea nibo daaye binabe kesoa nibo Gode  
baabanoba Ni daabenale ge baabanamino  
tolo mo tosianomobe, sbal manoba Gode  
nganhamomo! Nibo beten kebianoba Gode  
baabanoba Daabenale ge ohamomo! Nibo  
inanomobo Gode dohalilanea daabenea  
kukub misiamo nibo dlatematang gamo  
Yeye genoba ombianomabbibobe.

## 5

*Gode amo kimanin nakai komok sume  
Yesuse nibo hengmino temo biobo dot-  
lanebiobe.*

<sup>1</sup> Gode Yuda nib isak temo e amo kimanin  
nakai komok sumi dokam binabeo in-  
aminobe. E naka make dofakanemeo baa-  
banea Kobo ni isak daak bianeba nakaia

unangai wengo baanimibo omeb teneba  
ne one bianeba eka ne wengo baabken-  
imio omeb moneba i oye biam bianeba  
eka i hengmino henganimibo kulan isa  
inamin namin osa dleb teniba kobo dok-  
liba doiseneba dloneba ne heitdanemin  
biino dim ut funeba ne i hengmino omt-  
labenano ge oye binabebe. <sup>2</sup> Gode amo  
kimanin nakai komok sume dabalim naka  
kesoa e kukub ayamo amitie mo wafu  
biebabe. Am mak dimo kukub misiamo  
dabamanomo hengmin kukubo wafunabe  
kesoa e nakaia unanga nibo bobol tem  
funino blim bianoba kukub misiamo wa-  
funabob nibo dohalim bianea daaye bin-  
abebe. <sup>3</sup> E inanea inamin namino dlonea  
Gode biino dim uto funia dlalia e i heng-  
mino omltabeneko gabe otane esa heng-  
minsa kesoa emal osa inamin namino dlo-  
nia Gode biino dim uto fuia e ne hengmino  
omlatneneko genea ina binabebe. <sup>4</sup> Gode  
amo kimanin nakai komok sume okoko  
sum okok kebebe. E niniino sumobe. Otane  
e okok olo emalo mo omfakaneta ne okok  
olota okok kemano geneta okok kebebe.  
God eta e dofakanea baabanea Kobo ne  
amo kimanin nakai komok sume okoko  
okok kemale ge baabane biota okok ke-  
bebe. Sinanggwano e amo kimanin nakai  
komok sume ninino Elone dofakanea baa-  
banea Kobo ne amo kimanin nakai komok  
sum anale ge baabanebiobe. Makob sino  
Gode Elone dofakanea e Gode amo kimanin  
okoko okok kebinebio inanea e naka mak  
isa dlakanea i e amo kimanin okoko okok  
kebiobe.

<sup>5</sup> Gode ina binabe kesoa Klaist esa emalo  
Gode amo kimanin nakai komok sum okok  
olo mo omfakaneta ne okoko olota okok  
kemano geneta okok kebinabebebe. Gode  
emaye dofakanea baabanea Kobo ne mi-  
inobo, eka nesa memalo keb ay aiobo ge  
baabanebiobe. <sup>6</sup> Gode buk temo Yesuse  
weng sango imin baanoa  
Kobo amit ninobe. Ne kobo kemfakaia  
makob Melkisedeke Gode amo ki-  
manin nakae ulab aneba ne amo  
amitie kimanamabeobo genobiobe.

<sup>7</sup> Sino Yesuse dabalim ele bie dimo e  
kaanamin bobolo funanea Gode sbal weng  
nganha bianea mebiama bianea e funanea  
Ne Aye daatnenamabebo ge funane kesoa  
Gode e wengo wentenea daabanebiobe.

<sup>8</sup> Yesuse Gode miin otane e enin kino wa-  
temsebe. E enin kino watemnabea kukub  
olo e daabanoa Gode baabanea Kobo ne  
okok olo okok kemale ge baabanea Yesuse  
Gode weng olo kla wentenea wafunebiobe.  
<sup>9</sup> E e Aye bobol tem funino kla wafu bie  
kesoa nibo tekein kebuobe, e bobol tem  
misiamo funino blimobe. E amitie ayam  
binabe kesoa nakaia unangai hengmino

temo blibo dotlanebiobe. Eka nakaia unangai e wengo wente bianiba wafu blib ile e i hengmino temo blibo dotlanea amit nomabiobe. <sup>10</sup> Eka Gode Yesuse dofakanea baabanea Kobo Gode amo kimanin nakai komok sumobo, kobo makob sinangwano Gode amo kimanin nakai komok sume Melkisedeke ulabobo ge baabanebiobe.

*Nibo meme gwabi ulabo mo nomobe!*

<sup>11</sup> Klaist esa eka Melkisedek esa i weng homono ye bua ne baabenamabi otane weng olo mitmakamo ibo baabenamino bumolokobe. Niminbabe, ibo ib bobol tem funino nekek gebebuu ne wengo klao mo fumbibba kesoa ne wengo imino mo baabenamabibabe. <sup>12</sup> Ibo Yesuse bainobo gabibo bifol homono blimanobio kesoa ibo naka mak unang maki alebeib mole klayamobe. Ina otane ibo Gode wengo mito mo tekein kebibba kesoa naka maki teniba ibo Gode wengo mito imin alebeine! Meme gwabi sbal imeno mo wembibbabe. I moyo olota wembioobe. Gode wengo mitmakamo tekein kenamino bumolok bu ele makob sbal imeno ulabobe. Ibo imen olo mo wembibbabe. <sup>13</sup> Nakaia unangai Gode wengo klao mo tekein kebibba ile makob meme gwabi moo wembibi ulabobe. I kukub misiam osa kukub ayam osa mo moton sambianibta tekein kebibbabe. <sup>14</sup> Ina otane nakaia unangai Gode wengo kla wente bianiba wafu blib ile makob gangi sbal imeno wembibi ulabobe. I kukub misiam osa kukub ayam osa tekein kebianiba Olo misiamobe, olo ayamobe gabiobe.

## 6

*Nibo klanoba Gode wengo kla wafunomo!*

<sup>1</sup> Inamin kesoa nibo Klaiste wengo sino wentobbuo imino mo baanomobe! Memalo nibo e wengo bumolok ota omomo! Nibo e wengo sino wentobbuo olota mo funomobe! Weng olo inaminobe. Nibo nib bobol temo deskinanoba omonoba Gode omalomo galin weng osa eka Gode bainobo genamin weng osa <sup>2</sup> eka nibo nakaia unangai aayo fuayemin wengo nakai nibo aleyebib osa eka nakai kweilono naka maki gabamon dim ut tebelubeniba baabeniba Ibo Gode okoko okok kehamine ge baabenomabib weng osa eka nibo kaanoba Gode imin dohaanea hananomabbuo weng osa eka Gode nakaia unangai bainobo geim blimi kukubo klanea dlanea moniba aseinin bib unomabibo weng osa nibo sino wentobbio kesoa weng olo ye funomob otane nibo weng olo olota mo funomobe! Niminbabe, weng olo keim kesoa deibonoba wengo bumolok ota funomo! <sup>3</sup> Gode Ae gene mole

nibo bain inanoba e wengo bumolok buo tekein kenomabbioobe.

<sup>4</sup> Naka mak unang maki Gode wengo wente bianiba wafu bliba Gode i inamin namn ayamo dokaye bianea eka e Hob esa dohyebua Gode Hob ele i bekebebio otane i Gode abuk walalib mole i hengmino imin deiboniba i bobol temo deskinaniba omoniba Gode omalomabiba? Yeye i hengmino imino deiboniba i bobol temo deskinaniba omoniba Gode omanamino blimobe. <sup>5</sup> Sino i Gode wengo wafu blibo dimo i fumbianiba Weng olo ayamobe ge fumbianiba eka Gode okok sumo mubiang amo bomanamabo klabe osa watemibbioobe. <sup>6</sup> I sino ye watemibbu otane i Gode abuk walalib mole nibo mo daabenobta i hengmino deiboniba i bobol temo deskinaniba Gode imino mo omalomabibbabe. Niminbabe, nakaia unangai inab mole kukub olo makob i Yesuse imin atdimo dabasaniba silo biki anaiba kaanea naka mak unang maki i kukub olo yateniba Yesuse weng dobo weng oha bianiba baaniba Yesuse atdimo kaanebu olo besabo, e atdimo kaanebu olo nibo mo daabeim blimobo genomabib inaminobe.

<sup>7</sup> Nakaia unangai Gode wengo wentebib ile makob amengo une bianoa dabale glalanebua soko imin membianoa dabale gibbanea beitanea nakai imen sano dolmaiba klayam utlanoa damanabo inamin kesoa Gode baanea Dabal ele ayamobe, ne kima biania daahabibo gabebe. <sup>8</sup> Ina otane nakaia unangai Gode wengo deiboniba abuk waulaibo i makob glalimo imen sano dolmanomobo wabunoa kalbisob balbinabo inamin kesoa Gode baanea Dabal ele misiamobo, ne mo kima biania daahamabiba ese makobo ge baanea nakaia unanga eli dlanea aseinin bib unomabiobe.

<sup>9</sup> Nekwal ibo ne weng olo baabenamabio ne mo funanita Ibo makob dabale glalim ele ulab anomabiobo ge fumbibabe. Ne funania Gode ibo hengmino temo blibo dotlanebua daayebe kesoa ibo e kukubo kla wafunomabiobo gabibe. <sup>10</sup> Gode kukubo misiamba kesoa e ib kukub ayam nabibo mo dokobanomobabe. E kukubo ayamobe. E ib kukub ayam nabibo bobolo fumbibe. Ibo sino Yesuse nakaia unangai gobe bianiba daaye binibbu osa eka memalo gobe bianiba daayebib osa Gode tekein kebianea olo bobolo fumbibe. <sup>11</sup> Ne funania Nakaia unanga ibo e kukubo kla wafuniba makob sino wafu binibbio inaniba memalosa eka sinanoa ibo kaanom gaibo dim osa kla wafueine ge fumbibe. Nibo inanob mole e kukub ayam nibo omyamabeo waisobiobo, omyamabebe. <sup>12</sup> Ne funania Ibo tengo mo yemone gabibe. Ibo nakaia unangai Gode kukubo kla wafu blibi sino Gode

baanea Ne inamin namin kukub ayamo omyamabibo genebue waiso blibi yateniba ibsa i kukub olota wafunine ge funaioibe.

*Nibo sbal manoba Gode wengo bainobo genom!*

<sup>13</sup> Sinanggwano Gode Eblahame moton wengo baabanea Ne inamin namin olo bain inanamabibo ge baabanebue Gode ele niniin dim ota baabanebiotabe. Niminbabe, e titilsabe. Naka maki titilsai Gode ulabi blimobe. <sup>14</sup> E Eblahame baabanea Ne bain baabkenamabibe, sinanomo kobo daabkeia keb molobseli homon walomabiobo ge baabanebiobe. <sup>15</sup> Gode Eblahame baabanea Ne kobo daabkenamabibo ge baabanebue e waisa bina daabanebiobe.

<sup>16</sup> Dabalim nakai titil blim kesoa i funaniba Nakaia unangai ni wengo bainobo geine geib mole i Gode titilsae niniino taisaniba baaiba i wenteniba I wengo bainobo genomabiobe. <sup>17</sup> Gode inamin namino nanamabe olo wengo baanebue e funanea Nakaia unangai ne weng olo wentaibo funaniba Gode bobolo afet funameo e inamin namin olo mo nanamabebabo ge funaib mole olo misiamobo ge funane kesoa e ele niniino taisonea baabanea God ne bain inamin namin olo nanamabibo genebue nibo tekein kebuobe, e weng olo moton kesoa e bain inanamabebe. <sup>18</sup> Gode kukub asuo nanebu olo nibo watenoba tekein kenoba e wengo bainobo gabuobe. Kukub asu olo inaminobe. E ele niniino taisonea eka moton wengo baabenanebio kesoa nibo tekein kebuobe, e ne inamin namino nanamabibo genebue bain inanamabebe. E dim omin wengo mo obinabebabe. Gode nibo hengmino temo biobo dotlanebua kima bie kesoa nibo e inamin namino nanamabibo genebue waiso bianoba seimbuobe. <sup>19</sup> Nibo tekein kebuobe, Gode weng olo baanea Inanamabibo genebue alukum bain inanamabe kesoa bobol tem funin olo nib bobol temo dosbal manoa makob aso kimkimo dabal temo binano onon tlanoa nekek genoa aso damo sbal mabinabo inaminobe. Nibo Gode weng olo kla wafu bianoba inamin namin olo waiso biob kesoa olo makob nibo Gode amit tem te tanoba Gode biin awemo tem tam biobobe. <sup>20</sup> Yesue sin monea biin awemo tem tam unebiobe. E isak naka kesoa nibo daayebebe. E makob Melkisedeke Gode amo kimanin nakai komok sume ulab anea Gode amo amitie kima binabebe.

## 7

*Gode amo kimanin nakai komok sume Melkisedeke weng sangobe.*

<sup>1</sup> Melkisedeke sinanggwano Selem bib seli komok sum binebiobe. E Gode abilim ut bie e amo kimanin nakai komok sumobe. Sinanggwano Eblahame esa eka e awa genalin naka isa moniba makaai komokwal isa eka i awa genalin naka isa isu ye mo tenaniba gembianiba Eblahame esa e awa genalin naka isa i tata keniba makaai komokwal isa i awa genalin naka isa yaloniba tebiba eka Melkisedeke tebenaniba deib ye tetenaniba Melkisedeke Eblahame baabanea Gode kobo kla kimanea daabkeneko ge baabanea <sup>2</sup> eka Eblahame makaai yaloniba inamin namino doise dleb tleo miola miola binea 10 olminea Melkisedeke olokiemo oleana Eblahame 9 o oleb unebiobe. Niniin Melkisedek olo mitmakamo inaminobe. E kukub molot wafunino komok sumobe. Eka e Selem bib seli komok sum kesoa e niniin mako mitmakamo inaminobe. E nakaia unangai bobol tem fiab omkayemin komokobe. <sup>3</sup> Sinanggwano nakai Melkisedeke biem osa e ay esa e faninwal isa i niniino mo dolaim blimobe. E awoko dofanobuo amo dim osa eka e kaanebue dim osa nibo mo tekein kebobabe. Niminbabe, i buk temo mo dolaim blimobe. E amitie Gode amo kimanin nakai komok sum kesoa e makob Gode miine ulabobe.

<sup>4</sup> Sinanggwano e dot komok sum binebio kesoa ibo e bobolo funaine! Nib fanine Eblahame funanea Melkisedeke komok sumobe. E ne gaitnenebo ge funane kesoa i makaai yaloniba inamin namino doise dleb tleo miola miola binea 10 olminea Melkisedeke olokiemo oleana e 9 o oleb unebiobe. <sup>5</sup> Eblahame molofeite make niniino Libaie molobsel ita Gode amo kimanin okoko okok kebinabiobe. Gode hekmel wengo baanoa Islel teni inamin namino dlaibo miola miola biniba 10 olmisiba Gode amo kimanin nakai teniba olokiemo oise unaniba 9 ole goseli deiboeine genobiobe. Islel teni alukum Eblahame molobselobe. Libaie molobseli Gode amo kimanin naka isa Islel tenobe. Libaie molobsel eli Islel kesota i tenibta Islel teni inamin namin olo doise unibiobe. Gode hekmel wengo baanoa Kukub olo ayamoge genobiobe. <sup>6</sup> Melkisedeke Libaie molofeitba otane e fatnaneta Eblahame inamin namino doisa unebiobe? E Libaie molofeitba otane e Eblahame makaai yaloniba inamin namino oise tene olmineo olokiemo oisanea e Eblahame weng ayamo baabanea Gode kobo kla kimanea daabkeneko ge baabanebiobe. Sino Gode Eblahame eta moton wengo baabanea Ne inamin namino bain ye doklamabibo ge baabanebu otane Melkisedeke Ebla-

hame baabanea Gode kobo kla kimanea daabkeneko ge baabanebio kesoa <sup>7</sup> nibo tekein kebuobe, nakae naka make baabanea Gode kobo kla kimanea daabkeneko ge ohabe naka eleta e e wengo wentebe naka ele gaisanebiobe. I inaibbio kesoa nibo tekein kebuobe, Melkisedeke Eblahame sumobe. <sup>8</sup> Gode amo kimanin naka eli teniba Islel teni inamin namino doise une binibbio naka eli mo blibbabe. I kaaibbiobe. Ina otane Melkisedeke Eblahame inamin namino doisa unebio nakae mo kaanemebabe. E amit afenamabebe. Gode buk tem wengo baanoa  
E afen biebo genobiobe.

<sup>9</sup> Eblahame molofeite Libaie Gode amo kimanin naka kesoa e Isleli inamin namino doise unebu olo ne ibo baabenamabibe. Eblahame inamin namino Melkisedeke dlalebio dimo makob e molofeite Libaie inamin namin osa Melkisedeke dlalebiobe. Ne funania Weng olo bainobo gabibe. <sup>10</sup> Eblahame tebea Melkisedeke tebe naniba hetenaibbio dimo Libaie e biemo mo dofaim blim yole fatnanaeta e inamin namino Melkisedeke dlalebione? Eblahame inanea tebea Melkisedeke tebe naniba hetenaibbio dimo Eblahame molofeite Libaie blim bie kesoa Eblahame inamin namino Melkisedeke dlalebu olo makob Libai esa e inamin namino Melkisedeke dlalebiobe. Libaie inanebio kesoa Melkisedeke Libaie gaisanebiobe.

*Yesuse makob Melkisedeke ulabobe.*

<sup>11</sup> Sinanggwano Gode e hekmel wengo Mosese omaleta eka Moses esas Islel teni omkaye binebiobe. Gode buk temo baanoa Libaie molobseli Gode amo kimanin okoko okok kemine! I inabiba nakaia unangai inamin namino dloniba funaniba Ni Gode inamin namin olo dlalomo geib mole i Gode amo kimanin nakai doyiba eka Gode amo kimanin nakai dloniba Gode dlaline genobiobe. I inamin namino olo Gode dokaha binibbio nib hengmino omtlabeno biamo Gode Klaiste mo dofakaneta baabanea Kobo ne amo kimanin nakai komok sum anale ge baabanemebabe. Yeye, i inamin namin olo Gode dokaha binibbio nib hengmino mo omtlabeim blim kesoa Gode Dofakamin Nakae tlebiobe. E tlebuo e okoko Libai esa Elon esa i Gode amo kimanin okoko ulabbabe. E makob Melkisedeke Gode amo kimanin okoko ulabobe. <sup>12</sup> Gode e amo kimanin nakae afet dabane tenea e amo sino kimanin nakai alango dokonebio kesoa hekmel wengo sino Gode Mosese omalebu osa blimanao Gode hekmel wengo mema ota omyebiobe. <sup>13</sup> Weng olo naka ele baabanobue Libaie

molofeitbabe. E fanine afetobe. E fanine molobseli Gode amo kimanin okoko okok kemin blimobe. I Gode biino dim uto inamin namino mo funibta Gode dlalim blimobe. Olo i okokbabe. <sup>14</sup> Nibo tekein kebuobe, nib Sume Yesuse biemo Yudaie molofeit ota dofanobio kesoa esa Yudaie molofeitobe. Eka Mosese mo baaneta Yudaie molobseli Gode amo kimanin okoko okok kemine ge baaim blimobe. Okok olo Libaie molobseli okokobe.

<sup>15</sup> Inamin kesoa memalo nibo kla tekein kebuobe, Gode amo kimanin naka make tlebuo e Libaie molofeitbabe. E makob Melkisedeke Gode amo amitie kima binabe ulabobe. <sup>16</sup> Gode e dofakanebuo dimo e mo funaneta Mosese hekmel wengo baanea Libaie molobsel ita Gode amo kimanin okoko okok kemine! Eka naka afeti molobseli okok olo mo okok kemibe genebio wengo mo funaim blimobe. E tekein ke-nea naka ele amit ninobo, e mo kaanama-abebabo gene kesoa dofakanea baabanea Kobo ne amo kimanin nakai komok sum anale ge baabanebiobe. <sup>17</sup> Gode buk temo e weng sango enangge baanoa

Kobo amit ninobe. Ne kobo kemfakaia makob Melkisedeke Gode amo kimanin nakae ulab aneba ne amo amitie kimanamabeobo genobiobe.

<sup>18</sup> Gode hekmel wengo sino Mosese omalebuo baanoa Libaie molobsel ita Gode amo kimanin okoko okok kemine genobuo kukub olo nibo mo daabenota nib hengmino mo omtlabeim blim kesoa nibo Gode bibo mo monobta amit nomabbio-abe. Inamin kesoa Gode hekmel weng olo e sino Mosese omalebuo deibonebiobe. <sup>19</sup> Gode hekmel wengo sino Mosese omalebuo nibo mo daabenota nib hengmino omtlabeim blim kesoa nibo Gode bib amo mo monobta amit nomabbio-abe. Memalo Klaiste mema weng ayamo Gode nibo omyebiobe. Mosese hekmel weng ole titil blimobe. Okobbabe, hekmel wengo mema ota titilsabe. Nibo weng olo wafu biobo daayebo kesoa nibo memalo Gode baka biobobe. Eka sinanomosa amit nomabbio-abe.

<sup>20</sup> Gode Yesuse dofakanea baabanea Kobo ne amo kimanin nakai komok sum anale ge baabanebio dimo e ele niniino taisonea baabanea God ne baabkenamabio kobo ne amo kimanin amit namabeobo ge baabanebiobe. Sino naka maki Gode amo kimanin okoko kiloniba okok kebinibbio Gode ele niniino mo taisoneta dlakaim blimobe. <sup>21</sup> Otane e Yesuse dofakanebio dimo ele niniino taisonea baabanea

Sum ne nene niniino taisonía kemfakania baania Kobo moton ye ne amo amitie kimanale ge baabkeiobe. Sinanomo ne weng olo mo deibonita bobol tem afeto mo funanimibabo ge baabanebiobe.

Sinanggwano naka make weng olo Gode buk temo dolanebiobe. <sup>22</sup> Gode ele niniino taisonía Yesuse weng olo baabanebuo weng olo dot ayamobe. Yesuse Gode bekeba bianea e amo amitie kima binabe kesoa nibo tekein kebuobe, weng olo sinanggwano Gode wengo Mosese baabanebuo Isleli obianiba Nibo weng olo wafunomo gabinibbio weng olo gaisonobiobe.

<sup>23</sup> Ne weng mako baabenamabio inaminobe. Sinanggwano nakai Gode amo kima bianiba kaanimibo naka mak isak i alango doko doko tlibbuo i dot homonobe. Eka naka make amit bianea Gode amo kimanino blimobe. <sup>24</sup> Otane Yesus ele amit ninobe. E Gode amo kimanin okoko amitie okok kemabebe. E kaanamino blim kesoa nakai e alango dokonamino blimobe. <sup>25</sup> Yesuse isak naka kesoa e amitie Gode bekeba bianea nib wengo wentameo omeb monea Gode oha binabebe. Nakaia unangai Yesuse bainobo geniba e wengo wafu blibi e i hengmino temo blibo dotlanebio kesoa e i dletnea moniba Gode bibamo amit nomabiobe.

<sup>26</sup> Yesuse Gode amo kimanin nakai komok sumobe. E nibo daayebebe. E bobol tem funino makob Gode bobol tem funino ulab kesoa e bobol tem funin olota wafu biebe. E bobol tem funino misiamo blimobe. E hengmin osa mo hengabebabe. E hengmin gam naka unang nibo dabalim olo biobo deibenea utnea Gode bib ut biebe. <sup>27</sup> E sinanggwano Gode amo kimanin nakai komok sumi Gode amo kima binibbuei i ulabbabe. Am obba ye bomanomo bomanomo yo i inamin namino dloniba Gode biino dim ut funiba Gode dlaniba baabaniba Kobo nakaia unangai hengmino omtlabenale ge oha binibbi otane mikiktemo ili hengmino bobolo funaniba inamin namino dlo funiba Gode dlaliba i hengmino omtlabeneta omito i naka mak unang maki hengmino bobolo fumbianibta inamin namino dlonibta Gode biino dimo funibta Gode dlalibta e i hengmino omketouye binebiobe. I amobba ye bomanomo bomanomo yo ina binibbu otane Yesuse kukub olo mo inaim blimobe. E deib makob atdimmo kaanea e damo Gode omanea nakaia unangai nib hengmino walubenebiobe. E kukub olo ayam nanea nibo hengmino temo biobo dotlanebiobe. E imino mo kaaneta nib hengmino imino

mo walubenemebabe. <sup>28</sup> Sinanggwano Gode hekmel wengo Mosese omalebuo baanoa Naka elita Gode amo kimanin nakai komok sumi Gode amo kimanin okoko okok kemomabiobo genobuo otane naka eli naka ayamabe. I hengmin gam otane Yesuse elekiem eleta naka ayamobe. Gode ele niniino taisonía e miine dofakanea moton wengo baabanea Kobo ne amo kimanin nakai komok sumobo ge baabanebiobe. E hengmino blimobe. Sinanggwano e amitie ayam binabebua memalosa sma ye ayam biebe. Sinanomosa e amitie ayam namabebe.

## 8

*Yesuse Gode bib uto e amo kimanin nakai komok sumobe.*

<sup>1</sup> Ne weng olo baabenamabio mitmakamo inaminobe. Yesuse Gode amo kimanin nakai komok sum kesoa e nibo daayebebe. Gode titilo inamin namino alukum gaisonea kima bianea e komok sumi biino dimo toubmbia Yesuse e kweile kweitale kikib ye toubmbie. <sup>2</sup> E monea Gode am tamo biin awemo tem tam bianea Gode amo kimanin nakai komok sum okoko okok kebebe. Sume emaye abilim uto Gode am moton olo genebiota Yesuse am olo tem tamo okok kebebe. Nakai am olo mo geim blimobe. Gode emaye genebiobe.

<sup>3</sup> Sinanggwano Gode Mosese baabanea Ne amo kimanin nakai okoko inaminobo, nakaia unangai inamin namino osa kulan isa dloniba ne donong gaibo i ne amo kimanin nakai doybiba eka ne amo kimanin nakai dloniba ne biino dim ut funiba ne donine ge baabanebio kesoa nib Sume Yesuse Gode amo kimanin nakai komok sum esa inanea Gode inamin namino omaleko genobio kesoa e ele dam ota omoneta Gode omalebiobe. <sup>4</sup> Yesuse dabalim ele bie mole e Gode amo kimanin nakai komok sum okoko mo okok kemabebebe. Niminbabe, naka maki Gode amo kimanin nakai komok sum okoko okok kebianiba i Mosese hekmel wengo wafu bianiba inamin namino dloniba Gode dokahabib kesoa Yesuse okok olo okok keme mole i tolobo geniba baabaniba Keb okokbabo ge baabanomabiobe. <sup>5</sup> Yesuse abilim uto Gode amo kimanin nakai komok sumobe. Dabalim nakai Gode amo kimanin nakai komok sume okoko Yesuse okoko ulabbabe. I okok osa eka Gode sok um amo dabalim olo bu osa o abilim uto buo klulo kinobiobe. Inamin kesoa sinanggwano Mosese sok um amo klanang gabea Gode baabanea Sino ne amo abilim uto buo klulo kobo amgolim ut alebkeibio kesoa kobo ne weng olota

omonebta amo o ulabo dabalim olo genale ge baabanebiobe. <sup>6</sup> Gode Yesuse dofakanea baabanea Kobo ne amo kimanale ge baabanebiobe. Yesuse Gode amo kimanin okoko okoko kebeo e okoko Gode amo kimanin naka maki okoko gaisenebiobe. Eka Gode wengo isak nakae Yesuse baabanea Nakaia unangai ne weng olo wafunine ge baabanea Yesuse weng olo nakaia unangai omkaye binebue weng olota sinanggwano Gode nib faninwali baabanea Ibo weng olo wafunine ge baabanebiobe weng olo gaisonobiobe. Niminbabe, sinanggwano nib faninwali wengo wafu binibbue mo baanota Naka make ib hengmino omtlabenamabebo geim blim kesoa Yesuse baanea Ne ib hengmino omtlabenamabibo genebue weng olota nib faninwali wengo wafu binibbue gaisonobiobe.

*Mema wengo sin wengo gaisonobiobe.*

<sup>7</sup> Hekmel wengo sino Gode Mosese baabanebue wengo nibo kla daabenoa ayam anob biamo Gode weng afeto mo baabenamabeba otane weng olo nibo kla mo daabenoa ayam aim blim kesoa Gode weng afeto imin omyebiobe. <sup>8</sup> Sume e nakaia unangai hengmino hengabibo bobolo funanea baanea

Sinanoa ne Islel ten isa eka Yuda meletan isa i mema wengo afeto baabeia i baatneniba Ae ni weng olo wafunomabbiobo ge baatnenomabiobe. <sup>9</sup> Sinanggwano ne i faninwali Isibo bliba ne dohalilania dlaia Isibo deiboniba betan afet unibbio dimo ne wengo i baabeibiobe. Ne wengo mema wengo sin weng olo ulabbabe. I ne sin weng olo kla mo wafunin blim kesoa ne i bobolo funino dokotnenoa deibeibiobe. Ne wengo mema wengo afetobo genebiobe.

<sup>10</sup> Nib Sume imin baanea

Am olo blimanoa omito ne weng mako Islel nakaia unangai omiyenia Ibo ne weng olo wafueine ge baabena weng olo i bobol temo omabbebeia i amitie weng olo fumbianiba ne baatneniba God kobo ni sumobo genabiba eka nesak i baabena Ibo nemiobo genanamabibe. <sup>11</sup> Nakaia unangai niniinsa isa niniin blim isa i alukum ne kla tekein kenomabiobe. Nakai ne mo tekein keim blim blibi biaib nomta i mo alebeniba eka Ibo Sume kukubo kla tekein keine ge baabenanimibbabe. Niminbabe, i ne alukum tekein kenomabiobe.

<sup>12</sup> Ne dohalilania i hengmino omtlabenamabibe. Ne inanimio i hengmino bobolo imino mo fumbianita dosuanimibabo genebiobe.

Sinanggwano naka make weng olo Gode buk temo dolanebiobe.

<sup>13</sup> Gode baanea Ne Islel nakaia unangai mema weng olo omyamabibo genebue dimo weng olo e sin wengo Mosese baabanebue selanobiobe. Eka inamin namino selanoa blimanamabo makob nakai youmo hamilanoa banoa dibianabib inaminobe.

**9**

*Yesuse utnea abilim uto Gode biin awemo tem tam biebe.*

<sup>1</sup> Nibo weng olo funanomo! Sinanggwano Gode Islel nib faninwali e niniino dobtouleb nin kukubo hekmel wengo alebenebiobe. Am olo dimo Gode niniino dobtouleb nin amo gebinibbiobe. <sup>2</sup> Am olo sok um amobe. Sok um am olo biino asube. Amit da olo biino niniino biin kinging. Biin olo tem ota ayal osa eka tebol osa binobiobe. Nakai bleto oloniba Gode okaha binibbue tebol olo dim ut oka binibbiobe. <sup>3</sup> Eka biin mako tem tam ole youme amite dobdou walibbio kesoa nakaia unangai biin olo temo mo tam unemin blimobe. Biin olo niniino biin awemobe. <sup>4</sup> Biin olo tem tamo tebol Gode heitdahamin biino tom gol klaibbua nakae wel aayo tang ayamo o dimo fubinabe osa eka bokise klaniba tib ele gol fubanaibbu esa ota biin olo temo binobiobe. Bokis ele niniino Gode wengo Isleli omiyenea i baabaniba Ae ni keb weng olo wafunomabbiobo geibbu otabe. Bokis ele temo inamin namin olo buo dise tom gol klaibbu eta bokis ele temo binebiobe. Eka dis ele temo Gode nakaia unangai ibuantem ye bliba imeno oye binabo atosin osa dis ele temo olabba binibiobe. Eka sino Elone fonge tebeb haabia Gode fong ele baabanea Dabe balbinale genea balbinebu esa eka tom asuo dimo Gode e hekmel wengo dolanebu osa ota bokis ele tem daak binobiobe. <sup>5</sup> Bokis ele biin olo tem tam binebiobe. Eka bokis ele dim uto abisel asuei smiki klaniba dlaibbua binibbiobe. I smik eli yateniba funaniba Gode titilo ayal inamin einobue ele biobo ge fumbinibbiobe. Gode biino kulani ilemo ibaiba hengmino omketouye binebue smik eli belo tabab tem daak biota i biin olo kima binibbiobe. Ina otane ne memalo inamin namin olo mitmakamo ibo mo baabenamabibabe.

<sup>6</sup> Islel ita inamin namin olo kla tlaibbua am homono dimo Gode amo kimanin nakai taniba amit da olo biin tam bianiba i okoko

okok kebinibbu <sup>7</sup> otane biin awemo temo mo tam unemin blimobe. Gode amo kimanin nakai komok sum eta elekiem bifole elekiem elekieme dime kulani yenaninibi ilemo deise oletnea deib makob tanea Gode biin awemo tem tam unanea Gode olanea baabanea Nesa naka mak unang mak isa ni hengmino hengabobo ni mo tekein kebobbba kesoa omtlabenale ge oha binebiobe. <sup>8</sup> Mosese wengo baanoa Nakaia unanga ibo Gode biin awemo tem tamo mo unaibe genobiobe. Inamin kesoa Gode Hobe nibo aleye bianea baanea Nakaia unangai Mosese hekmel wengo sma wafu blibi God esuo mo unomabibbabo gabebe. <sup>9</sup> Mosese weng olo baanoa Nakaia unanga ibo Gode biin awemo tem tamo mo unaibe genobuo weng olo inaminobe. O nakaia unanga nibo dabalim ele bianoba inamin namino dlona bianoba eka kulani yenaninoba Gode dokahabobo Kukub olo ibo mo daabenota ib hengmino mo omtlabenota ib bobol temo mo kining anib biota God esuo mo unomabibbabo genobiobe. <sup>10</sup> Weng olo baanoa Ibo imena aayao olo unalomabib otane imena aayao mak olole mo unalaibe genobiobe. Eka weng mak ole baanoa lb undimo ninik aib mole aaye fuelanibta tanibta Gode am tamo unine genobiobe. Olole besa dabalim nakaia unanga nib dam olo hekmel wengobe. Weng olota nib kukubo kimabio bita omioto Klaiste teneta nibo mema hekmel wengo omyebiobe.

*Klaiste kaanea e damo Gode omanea nib hengmino walubenebiobe.*

<sup>11</sup> Ina otane Klaiste tenea atdimmo kaanea utnea abilim ut unanea Gode amo kimanin nakai komok sume ulab anea inamin namin kukubo ayamo ele tlobu olo nibo omyebiobe. E monea Gode bib ye bianea Gode amo kimanin okoko okok kebebe. Klaiste am olo temo okok kebeo am olo sino Gode sok um amo dabalim olo binobuo gaisonobiobe. Gode am olo nakai mo geim blimobe. O dabalim olosa blimobe. O Gode ele bib ye biobe. <sup>12</sup> Klaiste atdimmo kaanea monea Gode biin awemo tem tam unebuo dimo til gout isa eka eil blumakau meme isa i ilemo mo deleb moneta Gode olaneta e am tamo unim blimobe. E ele ilem ota singanea deleb monea Gode olonea nib hengmino walubenebio kesoa nibo e bibo monoba amit nomabbiobe. E ilemo deib makob oleb tanea Gode biin awemo tem tam unanea Gode olalebiobe. <sup>13</sup> Til gouti ilem osa eka eil blumakau imakwali ilem osa naka mak unang maki daaye binobuo kukub olo inaminobe. Gode baanea Olo ninik gamobo genebua nakaia unangai melebosiba e baabanea Ibo ne kin

dimmo kiningbabo genebiobe. I inanimibo Gode amo kimanin nakai komok sume til gouti ilem osa eka eil blumakau imakwali ilem osa o olona bianea eka eil blumakau akgitwali yenaniba aso faiba kibaniba kwetab ansiba kwetab olo weloniba aa baka klaibbuo olonea delo halele gesea waldibi watnoa nakaia unangai undimo ninika blib eli melebesoa Gode baabene Memalo ib undimo ilem osa kwetab osa daabeno kesoa imin kining aibobo ge baabebe binebiobe. Kulani ilemo besa aal tib olota fubayebua niniko blim kining binibbiobe. <sup>14</sup> Til gouta eil blumakau besa kulanobe. I ilem osa kwetab osa o titil blimobe. Okobbabe. Klaist eta naka ayam hengmino blimobe. Gode Hobe e daabanea atdimmo kaanea e ilemo singanea Gode olonea ilem olo nakaia unanga nib bobol tem funino daabonea nib hengmino omtlabenebio kesoa nibo Gode kintaline wengo wafunomabbiobe.

<sup>15</sup> Yesus Klaiste isak nakabe. Gode mema wengo e nakaia unangai omkayebeo Yesuse weng olo daabonebio kesoa nakaia unangai Gode dlakanea baabenea Ibo ne meletanobo ge baabenebue item etem naniba amit nomabiobe. Inanomabib olo makob Gode sino moton wengo baanea Ibo teniba ne bib ele bianiba amit nomabiobo genebio kesota i inanibta amit nomabiobe. Yesuse weng olo daabonebua inaminobe. E atdimmo kaanea nakaia unangai Gode wengo sino wafu bianiba hengmino henga binibbu ota e hengmin olo walubenebiobe.

<sup>16-17</sup> Ne saa weng mako baabenamabibe. Nakae mo kaaim blim afen bie dim ye funanea Sinanoa ne kaanimio ne memei ye ita ne afobeingo inamino dlaibobo ge funanea i niniino dola fubenebua naka ele kaanemeo memei weng olo wateniba aye inange baanebiobo ge baanibta kikinomabiobe. Otane aalebe mo kaaim blim sma bie mole i mo kikinomabibbabe. Kaanseta kikinomabiobe. <sup>18</sup> Inamin kesoa Gode hekmel wengo Mosese omale dimo e baabanea Ibo ne weng olo wafunib mole ne ib Sum aia ibo ne meletan anomabiobo ge baabanea i yo dim ota kiloniba kulani yenaiba kaaniba ilemo sengelaiba i tekein keniba baaniba Bainobo, Gode wengo baane yo bain inam unamabebo geibbiobe. Kulani mo kaanim blim keib mole nakaia unangai mo baanibta Gode weng olo bainobo genimibbabe. <sup>19</sup> Gode hekmel wengo Mosese omale eka Moses esak weng olo omonea Islel nakaia unangai alukum omynseoo dimo e eil blumakau memei ilem osa aay osa dis tem daak ibanea atung gwabe aan baka talonea eil sibsibi dimo ilemo olonea atunge dime olasa genea tobonea dise ileme ibanebue tem daak



tababunea tobonea halele gesea ilemo waldibi monoa Gode hekmel weng buko dim osa eka nakaia unangai dim osa une binobiobe. <sup>20</sup> Sinanggwano Mosese nakaia unangai kulani ilemo ibabenea baabenea Ne kulani ilem ele ibabei olole inabeia ibo funaniba Ni Gode hekmel wengo sbalma wafunomo ge funaine genita nabeio bo ge baabesebe. <sup>21</sup> Eka Mosese Gode sok um am osa eka inamin namino am olo tem tamo bu osa kulani ilemo aliwe binebiobe. <sup>22</sup> Mosese hekmel wengo baanoa I ilem ele inamin namini olo senge watoubueib mole inamin namino kining anamabobe. Eka ilem ele i mo senge watoubeim blim keib mole Gode i hengmino mo omtlabenamabebabo genobiobe.

*Klaiste kaanea e ilemo singanea Gode omalea e nib hengmino omtlabenebiobe.*

<sup>23-24</sup> Gode amo dabalim olo bu osa eka inamin namino o tem tamo bu osa o makob Gode am sumo abilim uto bu osa eka inamin namino o tem tamo bu osa o klul ota kinobiobe. Niminbabe, inamin namini olo abilim uto buo dot ayamobe. Nakaia unangai dabalim olo blibi kulani ilem ota Gode olaniba oloniba halele geiba walbi monoa Gode am olosa eka inamin namino o tem tamo bu osa melebonoa kining anobiobe. I ina binibbu otane Yesus ele, ele ilemo singanea Gode olalebio kesoa Gode amo abilim uto bu osa eka inamin namino o tem tam bu osa kining anobiobe. E kukub olo dabalim nakai kukubo Gode omkaha binabibo gaisenebiobe. Eka Yesus Klaiste Gode am sumo dabalim olo nakai geibbuo temo mo tam unaneta taneta biin awemo tem tamo mo unim blimobe. E utnea abilim uto Gode tena bianiba nibo daaye binabebe. <sup>25</sup> Bifole elekieme dime Gode amo kimanin nakai komok sume deib makob tanea Gode biin awemo tem tam unanea kulani ilemo olonea Gode okaha binebiobe. Otane Klaiste amito mo ina bianeta am homono dimo e ilemo sengela bianeta Gode okahamin blimobe. <sup>26</sup> E amit iname mole e makob Gode dabale mikiktemo klanebio yeb minim kenea enin kinu wate me bianea atdimo kaan kaan binea tenea mema dim olosa sma ye kaan kaan namabe otane e mo inaim blimobe. Otane memalo mubiang amo homabio kesoa e tenea atdimo deib makob kaanea ileme singanea Gode olanea nakaia unanga nib hengmino walubenebiobe. <sup>27</sup> Nakaia unanga nibsa alukum deib makob kaan kaan biob bita sinanomo Gode nib kukubo klanamabebe. <sup>28</sup> Inamin kesoa Klaiste deib makob kaanea e ilemo singanea Gode olanea naka homon unang homoni hengmino walubenebiobe.

E inanebio kesoa sinanoa e imin tlameo imino mo inanamabebabe. E tenea nakaia unanga nibo e wengo wafu bianoba e tlamabeo waisa biob nibo dletnea monoba Gode bib unomabbiobe.

## 10

*Klaiste deib makob kaanea nib hengmino walubenebiobe.*

<sup>1</sup> Mosese hekmel wengo inamin namini kukub ayamo Klaiste omeh tlamabeo nibo klao mo alebeim blimobe. Mosese hekmel wengo inamin namini olo klulo kinobiobe. Bifole elekiem elekieme dime nakaia unangai kulani amitie dleb moniba Gode amo kimanin nakai komok sume dokahabiba e yebianea ilemo deisenea Gode okaha binebue o i mo daabenota kining am binib biobabe. <sup>2</sup> Mosese hekmel weng olo nakaia unangai wafu blibi daabenoa kining animibo i bobol temo Ni hengaobobo galino deibonomabib kesoa i inamin namino Gode imino mo dokahamibbabe. <sup>3</sup> Ina otane kukub olo i hengmino mo omtlabaim blim keno kesoa bifole elekiem elekieme dime nakaia unangai inamin namino Gode dlalom gaibo i hengmino hengaibbuo bobolo imin fumbinibbiobe. <sup>4</sup> Niminbabe, eil blumakau imakwali ilem osa til gouti ilem osa o nakaia unangai hengmino motono mo omtlabenamabobabe.

<sup>5</sup> Inamin kesoa Klaiste dabalim olo tlang genabe dimo e Gode enange baabanea Kobo nakaia unangai kulani yaniniba funiba Kobo dokakemin kukubo mo gobo biebbba kesoa kobo ne damo klautne biebo. <sup>6</sup> Nakaia unangai kulani keb biino dim uto funiba i ilemo oloniba kobo okeniba funaniba Gode ni hengmino hengabobo omtlabenamabebo ge fumbibo kobo kukub olo mo seinwebebbabe. <sup>7</sup> Inamin kesoa ne kobo baabkenamabibe, God kobo ne natemale! Ne ele blibo, kobo funaneba E ne okok olo okok kemeko ge fumbibo okok olo ne okok kemabibe. Sinanggwano nakai ne wengo keb buk temo dolaibbuo ne makob ili baaibbio inanamabibo genebiobe. Sinanggwano naka make weng olo Gode buk temo dolanebiobe. <sup>8</sup> Klaiste sino baanea Nakaia unangai kulani inaniba i ilemo kobo oklaibo kobo mo seinwebebbabe. I kulani keb biino dim uto funiba dokeniba funaniba E ni hengmino omtlabenamabebo ge fumbib osa kukub olo kobo mo seinwebebbabo genebiobe. Otane Mosese hekmel wengo baanoa Nakaia unangai kukub olo namine genobiobe. <sup>9</sup> Omito Yesuse Gode baabanea Ay kobo ne natemale! Ne ele blibo, kobo funaneba E ne okok olo okok kemeko ge fumbibo okok olo ne okok kemabibo

genebiobe. E inangge baanebio kesoa nibo tekein kebuobe, e sino kukubo inamin namini Gode dokahamin kukubo omtlanea eta o alango dokonebiobe.<sup>10</sup> Gode funanea Ne miine ne okok olo okok kemeko ge fumbe kesoa Yesu Klaiste Gode bobol tem fumbe inanea deib makob kaanea e damo Gode omanea nib hengmino omtlabenea nibo kining anobbiobe.

<sup>11</sup> Am obba ye bomano bomano yo dimo Gode amo kimanin nakai amitie mabi-aniba i okok olo okok kebianiba inamin namino dloniba Gode dokaha binibbiobe. I ina binibbu otane inamin namin olo nakaia unanga nib hengmino mo omtlabenomobabe.<sup>12</sup> Ina otane Klaiste deib makob e damo Gode omanea nib hengmino omtlabenebiobe. Yesuse kaanebu ota e nib hengmino amitie omtlabenebiobe. E inanea e damo Gode omanea e okoko blimanoa e utnea Gode kweile kweitale kikib ye toubiebe.<sup>13</sup> E Gode tenaniba toubianiba Gode e makaai yalea i titil blimanomabib amo tlamabo waiso biebe.<sup>14</sup> Nibo tekein kebuobe, Yesuse deib makob kaanea e damo Gode omanea nakaia unangai e hengmino omtlabene eli daabenebio kesoa i amit kining bianam tesomabiobe.

<sup>15-16</sup> Gode Hob esa nibo enangge baabene-

nea  
Sume baanea Am olo blimanoa ne weng mako nakaia unangai omyenia Ibo ne weng olo wafunine ge baabe-nia weng olo i bobol temo omabbe-beia i amitie weng olo funomabiobo genebiobo ge baabenea

<sup>17</sup> eka Hobe Sume weng mako imin baanea Ne i bobol tem funin misi-am olo hengmin olo o bobolo imino mo funimibabo genebiobo ge baanebiobe.

Sinanggwano naka make weng asu olo Gode buk temo dolanebiobe.

<sup>18</sup> Gode nib hengmino alukum omtlabenebio kesoa nibo kulani imino mo yenanobta Gode dlalomabbiobabe. Niminbabe, kukub olo blimanobiobe.

*Nibo Yesuse bainobo genoba God esu unomo!*

<sup>19</sup> Ne nekwal ibo wentine! Yesuse kaanea e ileme singanea nib hengmino omtlabenebio kesoa nibo Gode beten kehabobo kukub olo makob nibo tanoba Gode biin awemo e bie tam unebobo, nibo mo tosiambobbabe.<sup>20</sup> E kaanebuo kukub olo inaminobe. E damo makob Gode biin awemo amite youme dobdou walibbue ulabobe. Eka e kaanebuo olo makob youm ele belanea Gode biin awemo keim anoa deibo

kebenea nibo tanoba Gode biin awemo tem tam unobbiobe. Niminbabe, e kaanea imin hana utnea Gode tena bliobe.<sup>21</sup> Gode amo kimanin nakai komok sume nibo kimabi ele e Gode amo kimanin nakai komok sumi maki gaisene kesoa e Gode tena bianiba inamin namino Gode bib uto bu osa eka nakaia unanga nibo e bainobo gabob nibsa kima biebe.<sup>22</sup> Weng asu olo bain kesoa nibo God esu unomo! Yesuse kaanea e ilemo singanea nib bobol temo hengmino fubabenebio kesoa hengmino nib bobol temo blimobe. Nib bobol temo kining bioba i aay ayamo eito fuelabeibbio kesoa nibo nib bobol temo dim omin kukubo deibonoba nib bainobo galino sbal manoba monoba God esu unomo!

<sup>23</sup> Sinanggwano Gode baanea Ne inamin namino ibo omyamabibo ge baanebuo e bain inanea omyamabebe. Nibo weng olo bainobo genoba sbalma wafunomo!

<sup>24</sup> Nibo Yesuse bainobo galin naka mak unang maki bobolo fumbianoba daayemoba eka isak inaniba naka mak unang maki daaye biamniba nib sinwalo gobesese bianoba kukub ayam nabesese nomo!<sup>25</sup> Nibo naka mak unang maki tenanoba minoba Gode niniino dobtouleb nin kukubo mo deibonomobe! Naka mak unang maki kukub olo deibueib kesoa nibo i kukub olo mo wafunomobe! Sume imin tlamabeo amo meb ano kesoa nib sinwalo daabesese bioba nib bobol tem funino ayam bibebiote!

*Nibo Gode miine mo abuk walalabe!*

<sup>26</sup> Yesuse kaanea nib hengmino omtlabenebuo kukub olo nibo tekein kebob otane nibo ninib bobol tem funin ota wafu bianoba hengmino kweimiki hengamob mole naka make kaanea ilemo singanea Gode omalea nib hengmino omtlabenamino blimobe.<sup>27</sup> Nibo kukub olo inabob mole Gode nakaia unangai kukubo klanang gameo dimo nibo tosianomabbiobe. Am olo tlamo dimo nakaia unangai Gode abuk walam blibi dlanea moniba aseinin bib unaniba ase einomabiobe.<sup>28</sup> Nibo tekein kebuobe, i sino ina binibbiobe. Naka make Mosesese hekmel wengo welanea hengmino henganea nakai asu eka asumatna i ateniba e hengmino omkeimabaib mole nakaia unangai i weng olo wentaibi naka ele mo dohhalianibta deibaim blimobe. I yenaiba kaan kaan binibbiobe.<sup>29</sup> I ina binibbio kesoa nakai Gode miine abuk walam binib biamo Gode fatnabenamabene? E i enin sumo omyenea watwat dabenamabebe. Yesuse kaanea e ilemo singanebuo olo makob Gode nibo moton wengo memao omyenea ibo wafunine genebio kesoa

Yesuse ilem olo nibo daabenoa hengmino fubabenoa emi anobbiobe. Gode miine abuk walanamin kukub olo inaminobe. Naka maki obianiba Yesuse atdimo kaanea ilemo singanebu olo besabo gabianiba Gode Hobe nibo kukub ayam naye binabe esa abuk walam bliobe. I Gode miine abuk walam binib biamo i kukub olo dot misiam nabinib biamabo kesoa Gode i enin sumo omyenea watwat dabenamabebe. <sup>30</sup> Gode e weng olo e bobol temo funanea e buk temo baanea Nemaye i kukub misiamo yang kenamabibo genebiobe. Nibo naka ele tekein kebuobe, e dimo mo baaim blimobe, e bain baanebiobe. E imin baanea Sum nemaye ne nakaia unangai kukubo nabibo klanamabibo genebiobe. <sup>31</sup> Gode amit ninobe. Nakaia unangai e abuk walalaibo e yang kenea enino sum omyamabe kesoa ibo tosiam bianiba Nibo e mo abuk walalaobe ge funine!

*Nib bainobo galino sbal manomo!*

<sup>32</sup> Sino ibo Gode wengo nena wenteniba bainobo geibbuo bobolo funaine! Ibo mema bainobo ge blib dimo naka maki teniba enin kino omkayebib otane ibo Gode kukubo mo deibueim blim amitie nekek ge wafu binibbuo bobolo funaine! <sup>33</sup> Am mak bomanomo am mak bomanomo nakaia unangai ibo dleb moniba nakaia unangai miblib ye dlaniba weng dobo weng oye bianiba eka yebiam binabiobe. Eka am mak dim ole i bainobo galin nakaia unangai maki yebiba ibo yatemaibo bainobo galin nakaia unanga eli bekebe bianiba daayebiba i bainobo galino sbalsam binabiobe. <sup>34</sup> Naka mak unang maki bainobo gabib o dafa ota bainobo galinba nakai teniba ge dleb moniba klabutamo dokabibo ibo nakaia unanga eli dohalim bianiba moniba daaye binibbiobe. Naka maki ib afobeingo ayok oise unebibo ibo alo mo tliyemin blimobe. Ibo funaniba Gode inamin namin ayamo omfubenebuo afobeing olo gaisanobio kesoa ni afobeing olo bobolo mo fumbobbabo, Gode inamin namin olo doyeibuo amit namabobo ge fumbianiba seimbiniobbiobe. <sup>35</sup> Sino ibo sbal mabianiba Gode kukubo nekek ge wafu binibbio kesoa memalo kukub misiamo ib dimo tam tlam o tolo mo tosiam bianiba ib kukub ayam mo deibonimibe! Niminbabe, ibo Gode kukub ayam nekek ge wafueib mole e ib kukub ayam olo molo yang kenea inamin namin ayam doyamabebe. <sup>36</sup> Sinanggwano Gode baanea Nakaia unangai ne wengo wafu blibi inamin namin ayamo doyamabibo genebuo memalo ibo baabene Ne okok olota okok kemine ge baabene olo kla wenteniba ina bianiba sbal maine! Ibo inail

mole e inamin namin ayam olo doyamabibo genebuo doyamabebe. <sup>37</sup> Ibo sbal maine! Niminbabe, defamonamo dimo Yesuse tlamabebe. Gode e buk temo Yesuse weng sango enangge baanea

Defamonamo dimo e tlamabebe. E amitomo bieta sinanomobabe. <sup>38</sup> Ina otane nakaia unangai ne bainobo geniba ne kukubo wafu libiba ne baabenia Ibo ne kin dimo naka molot unang molotobo ge baabeibuei amit nomabiobe. Niminbabe, i ne bainobo gane binabiobe. Otane i ne abuk wanib mole ne i mo seinyemabibabo genebiobe.

<sup>39</sup> Ina otane nibo nakaia unangai Gode abuk walalibbuo watwat dabenamabei ulabbabe. Yesuse nibo hengmino temo biobo dotlanebio kesoa nibo e bainobo genoba e kukubo wafu bianoba ayam biobobe.

## 11

*Bainobo galin kukubo inaminobe.*

<sup>1</sup> Bainobo galin kukubo inaminobe. Bainobo galin nakaia unangai Gode baanea Sinanomo ne inamin namin olo inanamabibo genebio weng olo i baaniba Bainobo, e inanamabebo gabianiba waiso bliobe. I inamin namin olo mo watemim blim otane i funaniba Bainobo, Gode baanea Inanamabibo genebio kesoa e bain inamabebo ge fumbianiba waiso bliobe. <sup>2</sup> Sinanggwano nib faninwali maki Gode bainobo geib kesoa Gode baabene Ibo ne kin dimo naka molot unang molotobo ge baabenebiobe.

<sup>3</sup> Gode wengo bainobo gabob nibo tekein kenoba Gode besa weng baaneta dabal esa abil esa tam tlobiobo gabuobe. Gode inamin namino nibo mo watemebobbao dloneta inamin namino ele bu olo klanebiota watemebuobe.

*Ebel esa Inok esa Noa esa i weng sango.*

<sup>4</sup> Sinanggwano nakae niniino Ebele Gode wengo bainobo genea kulan maki yenanea Gode dalebueo e kukub olo e heke Kene inamin namino Gode dokahamin kukubo gaisanebiobe. Ebele inane kesoa Gode baabanea Kobo ne wengo bainobo geneba keb inamin namin olo donebo ayam kesoa kobo ne kin dimo naka molotobo ge baabanebiobe. Ebele sinangwan kaane bianabo otane e Gode bainobo galino sbalma binebio kesoa e kukub olo weng sango Gode buk temo dolaibbi ota nibo kibianoba Gode bainobo galin kukub ayam aleye binabobe.

<sup>5</sup> Eka naka make niniino Inoke Gode bainobo gene kesoa e mo kaaim blim bia

Gode afen debeb unea e bibam seli henha bisib otane e mo atemim blimobe. Niminbabe, Gode e debeb ulanea e bib unebiobe. Gode buk tem wengo baanoa Gode e mo debeb unim blim bie dimo e kukub ayamo nabea Gode e seinha binebiobo genobiobe. <sup>6</sup> Eka nakaia unangai mo bainobo gabibba ile i kukub ayamo wafu blibo Gode wate-nea funanea I kukub ayamo ye wafu blib otane ne mo seinyebibabe. Niminbabe, i ne mo bainobo gabibba kesoa i naka molot unang molotbabo gabebe. Nakaia unan-gai God esu unomo geib mole i fumbian-iba Bainobo, Gode bain ye bianea inamin namin ayamo nakaia unangai e bainobo gabibi omyamabebo ge funaine!

<sup>7</sup> Nakae niniino Noae Gode bainobo gabea Gode baabanea Sinanomo ne soko omaia tlamabobo ge baabanea Noae sino soko mo tlota watemim blim otane e funanea Gode weng ele baatnene olo e bain inanamabebo genea e siib sume genea e alelo omonea eka e memei dlonea i alelwali dlonanea dletnea taniba siib tem tam uniba sok sumo tlebianoa dabalim olo aaye alukum einse otane i mo ei dolbaneta aaye mo downibta kaaim blimobe. Niminbabe, i siib tem tam blib kesotabe. Noae Gode wengo bainobo gabe otane naka mak unang mak ile Gode wengo mo bainobo geim blim kesoa Gode baabanea Ib kukubo misiamobo ge baabanea watwat dabenebiobe. Gode Noae baabanea Kobo ne wengo bainobo gabeb kesoa kobo ne kin dimo naka molotobo genebiobe.

#### *Eblahame weng sangobe.*

<sup>8</sup> Gode e wengo Eblahame omalea eka Eblahame Gode weng olo bainobo genea wafu bia Gode baabanea Kobo moneba mema bibo ne omklamabi yota one ge baabane kesoa Eblahame Gode wengo wente-nea e bib olo deibonea onsebe. Eblahame bib olo unamabeo e mo tekein kebeba otane e Gode wengo bainobo genea onsebe. <sup>9</sup> E Gode weng olo bainobo genea monea Gode bibo omklamabibo genebio bib ye onsebe. E monea bib olo um am temo binebua makob fetal dikin binebiobe. E inanebio kesoa e miine Aisak esa eka e molofeite Yekob esa i inaniba um am tem binibbiobe. Isa Gode inamin namin ayamo omyamabibo ge oyebeo wenteniba bainobo gabianiba am olo tlamabo waiso binibbiobe. <sup>10</sup> Eblahame um am tem binebiobe. Niminbabe, Gode emaye e bibam temo klaubanebio kesoa Eblahame sinanomo monea bib olo unamabeo bobolo fumbiane a waiso binebiobe. E bib olo bobolo fumbinebua amit ninobe.

<sup>11</sup> Gode Eblaham esa e alelo Sela esa baabenea Ne ib molobseli homon doyam-abibo ge baabesebe. Selao e wengo wente-nea baanoa Bainobo, e inanamabebo gesobe. O konokanobu otane o Gode wengo bainobo geno kesoa e daabonea mene naka ten dofaso. <sup>12</sup> Eka Eblaham esa hangkaleb anebua kaanang genabe otane Gode daabanea e miine naka ten dofanea e molobseli homon waloniba makob awitnin inana bianiba eka makob ninin inananiba walo bliobe. Nakai kinamino blimobe.

<sup>13</sup> Sinanggwano Eblahamwali inaniba Gode wengo bainobo gabiniba kaanom genabib dim esa i bainobo galino sbalma wafu bianibta kaaibbiobe. I dabalim olo sma afen blib dimo Gode inamin namin ayamo doyamabibo genebue e mo doyeta i mo watemim blimobe. Gode inamin namino sinanoa inanamabeo dlonea al-eye bianea baabenea Sinanomo ne olo doyamabibo ge oyebea i wateme bianiba funaniba E inamin namin olo bain inanamabebo geniba seimbiniobiobe. I obianiba Dabalim olo nib bibambabo, un biobobo gabiniobiobe. <sup>14</sup> Nibo tekein kebuobe, weng olo baaibbio nakaia unanga eli bibam temo amit nomabibo waiso hembinibbiobe. <sup>15</sup> I mo fumbianibta Ni imin de monoba nini sin bibam tem unomo geim blimobe. I inangge fumbiniobiota mole i imin de moniba sin bibam tem onsiobe. <sup>16</sup> Ina otane i mo inangge funaim blimobe. I funaniba Ni bibam temo abilim ut biobo, bib olo dabalim olo bibo gaisonobio kesoa ni monoba ye unomabbiobo ge fumbian-iba bib olo bobolo waye binobiobe. I inangge fumbianiba Gode baabaniba Kobo ni Godobo ge oha binibbua Gode i weng olo aalo mo genalim blimobe. I e wengo bainobo gabib kesoa e funanea Ne i bib ayamo klaubeibua uteniba nine ge baanea klaubenebiobe.

<sup>17-19</sup> Sinanggwano Gode Eblahame baabanea Sinanoa keb molobseli walaibo Aisake meme ita keb molobsel motonobe. Eka sbil keneba dofanebe e meme ile keb molobselbabo ge baabanebiobe. E inangge baabanebua sinanoa funanea Ne Eblahame naatemea e miine ananea dobnane deitnemeo atemano genea baabanea Keb miine Aisake ananeba dobnene ge baabanea naatemsebe. Eblahame Gode wengo wentene inanea e miine ananama bianea e Gode moton wengo bobolo funanea Ne anai kaanemeo Gode imin dofaanea hananamabebo ge funane kesoa e Gode weng olo bainobo ge fumbae Gode Aisake imin dobonea Eblahame dabalebiobe.

*Aisak esa Yekob esa Yoseb esa i weng*

*sangobe.*

<sup>20</sup> Aisake Gode sino moton wengo baabanebuo funanea E bain inanamabebo genea bainobo gebiam binea hangkalebmin anea kaanang gena bianea e memei Yekob esa Iso esa i inamin namin ayamo sinanoa tlamabo wengo baabenebiobe.

<sup>21</sup> E inanebua eka e miine Yekob esak inanea Gode wengo bainobo gebiam binea hangkalebmin anea kaanang genabe dimo e miine Yosebe memei asue inamin namin ayamo sinanoa tam tlamabo wengo baabenebiobe. E fonge bikinea afunea mabianea gabam delabmanea Gode niniino dobtouleb binebiobe. <sup>22</sup> Aaleb dumwali inaihbua eka miine Yoseb esak inanea Gode bainobo gebiam binea hangkaleb anea kaanama bianea e meleli baabenea lb molobseli Isleli Isibo deiboniba moniba bib mak unomabibo dimo ne ono oleb moniba i bibo nomabib ye olbunomabiobo ge baabenebiobe.

*Mosese weng sangobe.*

<sup>23</sup> Mosese aaleb kamwali funaniba Gode bain nibo daabenamabebo geniba i Gode bainobo gebianiba Mosese dofania ateniba baaniba Men obba dot ayame dofanoobo gesiobe. Sino Isib seli komoke baanea Isel wanggal memei naka teni dlanimibi yemine genebi otane Mosese aaleb kamwali komoke wengo tolo mo tosiananiba anaim blimobe. I Gode bainobo geniba alimo asumatnao dimo e ayok dofaiba binebiobe.

<sup>24</sup> Sino Mosese gwab bie dimo Isib komoke moonoo debeb monoa baabenoa Ele ne miinobo ge baabesobe. O inaso otane Mosese damanea sum ane dimo e funanea Gode ne daatneea ne meletani Isleli daabenamabibo ge funanea e Gode bainobo genea baanea Ne Feloe moonoo miinbabo ge baasebe. <sup>25</sup> E funanea Ne Isib komok ania i kukub misiamo wafu bli mole ne amito mo bianita seinamabibabo ge funane kesoa e mo komok aim blimobe. E funanea Ne nene meletani Gode nakaia unangai Isleli tena bioba Isib seli enino Isleli omkayemom gaibo nesa omkanemine ge funasebe. <sup>26</sup> Mosese Gode Dofakamin Nakae kukubo wafu bie kesoa nakaia unangai ateniba kukub misiam omkaha binibbu otane e funanea Ne Isibo inamin namino bobolo mo wanebobabo, ne Gode inamin namin ayamo donamabeo bobol ota funano genea e kukub ayamo sbalma wafu binebiobe.

<sup>27</sup> Isib komoke Mosese dobsuanase otane Mosese e tolo mo tosianim blimobe. E Gode bainobo genea Isibo deibonea monea bib afet onsebe. E inanebuo e Gode bainobo gabianea sbal manebiobe. Niminbabe,

Mosese tekein kenea Gode nakaia unangai mo atemim blime ne beketne bianea daatnenamabebo ge funasebe. <sup>28</sup> Gode Mosese baabanea Ibo eil sibsib memei yenaniba ilemo oloniba amit tam unernino wa dimo aliboniba eka ewit dao amit gatgat temo alibonaibbi ota abisake tenea Isib seli meme hekwal sumi yalubenang gameo ib amito ilemo watenea tanea ib meme hekwal yanubenamino deibeneko ge baabanea Mosese Gode weng olo bainobo genea inanea singkalin amo Fasobao kilonebiobe.

*Isel homoni maki bainobo gabinibiobe.*

<sup>29</sup> Isleli Isibo deiboniba moniba aaye sole niniino Led Sie yala unom gena bianiba funaniba Gode ni daabenamabebo ge funaniba e bainobo geiba aaye Led Sie baanea walanea mes on tab on nanea aaye ebine daake makob ninin sbalo dim inaneta wat onsiobe. I inaihb otane Isib seli Isleli kan motemiba aaye Led Sie inanea walane mes on tab on nanea was unib kesoa isak alukum keno deiboniba dli watniba isak wat unemoniba aaye imin teteanea einea yalebiobe.

<sup>30</sup> Isel nakai funaniba Gode nibo daabeneea Yeliko bib seli yalomabbiobo ge funaniba i Gode bainobo geniba moniba Yeliko bibo daamo haa omkande tete blib binoamo 7 blimanoa Gode daabeneea daamo isak belanoa gamfa onon tlanoa Isleli taniba Yeliko bib seli yalibiobe. <sup>31</sup> Yeliko bibo taman unango niniino Lehabo funanoa Gode Isleli daabeneea i Yeliko teni yalomabiobo genoa Gode bainobo gabua Islel nakai asu keniba teniba Yeliko teni yatem motomanoba enamino ge noba motenoba tenoba yalomo geniba tlibi daabenotibo kesoa Isleli teniba Yeliko teni Gode bainobo geim blimi yalom geniba tlibo i nakaia unangai alukum yalosib otane Lehab osa o meletan isa ile deibesio.

<sup>32</sup> Bainobo galin nakai weng sango ne alukumo mo baabenamabibabe. Gode bainobo galin nakai niniino Gidion esa Balak esa Samson esa Yefta esa Debit esa Samyuel esa eka Gode weng omkeimalin naka isa i weng sango ne alukum baabei mole weng olo teke anamabobe. <sup>33</sup> Nakai niniino baabei eli Gode bainobo gabib kesoa elekiem elekiemi moniba awao gonom gaibo i tata keniba makaai gaise gaise binibiobe. I kukub ayam wafu binib kesoa Gode inamin namin ayamo doyamabibo genebuo dlibbiobe. I inaniba i bainobo galino sbalma bliba naka maki Gode mo bainobo gabibbai teniba bainobo galin naka eli maki dleb moniba til laioni daam

tem daak daoba til laioni ina doweine geniba inabenimib osa til laioni naka eli mo ina unalin blim deibebe binibbiobe. <sup>34</sup> Eka bainobo galinbai teniba bainobo galin naka maki dleb moniba as beselibo eimbo biamo temo dlatounimib osa i mo ulanibta kulila biam nim blimobe. I inabiba naka maki seku inamino tebeleb teniba naka eli yenanom gaib osa i gilan dala uniba deibena ina binibbiobe. I titil blim otane Gode daabenea titilsaniba moniba makaai tenaniba awao genalom gaibo i tata keniba makaai dlab bueiba skila une binibbiobe. <sup>35</sup> Eka unang mak ile i imakwal isa meme isa kaabenimibo i Gode bainobo geniba i imin hana tlebinibbiobe.

Naka maki teniba bainobo galin nakaia unangai ge dleb moniba yemde dlaniba enin sumo omyeniba baabeniba Ibo Gode bobolo funino deibonimibo ni tileise nomabbio genimib osa bainobo galin nakaia unanga eli funaniba Ni kaanomobo imin hananoba Gode tenanomabbio geniba i wengo wentubeniba Gode bobolo funino deibonamino blim, i Gode bobolo amitie funib kesoa i bainobo galin nakaia unanga eli yenaiba kulila binibbiobe. <sup>36</sup> Eka naka maki Gode bainobo galin naka unang eli weng dobo weng oye bianiba sayo tebeloniba yebiam bianiba maki dleb moniba klabutam kabianiba <sup>37</sup> eka mak ile tom dum bainobo galin nakaia unangai yebiba kulila binibbiobe. I ina bianiba mak isa inaniba soo dloniba bainobo galin naka mak unang maki waiba akeb dao on eka gabam dao onaniba kulila binibbiobe. Eka mak ile seku inamino tebeloniba bainobo galin naka mak unang maki yebiam bliba kulila binibbiobe. I Gode bainobo galin nakaia unangai enin sumo omkayebiba misiam bianiba i monio youmo walonamino blim kesoa i youm misiamo eil sibsibi aal osa eka til gouti aal osa ota gemeloniba kibinibbiobe. <sup>38</sup> I ina bianiba Ayok unomo geniba moniba angolom osa eka naka blim ibuantem osa eka deib tem osa sme tem osa ye aala binibbiobe. I naka ayam eka unang ayam nabe. I naka mak unang maki gaise binibbiobe otane i inamin namino blimobe.

<sup>39</sup> Nakaia unanga eli Gode bainobo gabib kesoa Gode baabenea Ibo naka molot unang molotobo ge oyebe otane e Inamin namino doyamabibo ge baabenebuo mo doyim blimobe. <sup>40</sup> Niminbabe, Gode bobol tem funa omfanea debliba sinanota bainobo galin nakaia unangai i abuk tlomabibi tenasibta inamin namin ayam olo doyono geneta deibenebiobe. E inanea deibenebio kesoa sinanomo e inamin namin dot ayam olo nakaia unangai sin bainobo gabinibbu elitem nibtem nanea

doyenea baabenea Ibo naka molot unang molotobo ge baabenamabebe.

## 12

*Nibo Yesuse kukubo nabeo atemnoba nibsa inamomo!*

<sup>1</sup> Ne sino naka eli wengo ibo baabeibuei dot homonobe. I Gode bainobo geniba sbalma binibbio kesoa nibo i kukubo mo dokobenomone! Nibo i bainobo galin kukubo nabinibbuo fumbianoba kla wafu biante! Nibo inamin namino nib bobol tem funino watwat dayebo osa eka hengmin kukubo nibo o bobolo funanoba seinwe bianoba namomo ge fumbob osa kukub olo deihonomo! Nibo tengo mo yemone, sbal manoba Gode kukub ayam kla wafunomo! <sup>2</sup> Nibo Yesuse mema bainobo genobbio dimo emaye daabenea nibo e bainobo genobbio. E memalo nibo daayebea nib bainobo galino sbal mabiobobe. Eka sinanomosa daayebea nib bainobo galino sbal manomabbio kesoa nibo e kukubo watenoba e bobolo amitie funomo! I Yesuse atdimmo dabaniba silo biki anaibbuo dimo e funanea Sinanomo ne kla seinamabibo ge funane kesoa e atdimmo kaanebiobe. E mo funaneta Ne nakaia unangai kin dimo atdimmo kaanimo misiamobo geneta aalo mo genalim blimobe. E atdimmo aaleing kaanea monea Gode bib unanea Gode kweile kweitale kikib ye toubiebe.

*Nibo kukub misiamo nanomobo Gode enino omyenea dlo klabinabebe.*

<sup>3</sup> Naka misiami teniba Yesuse dobsuan bianiba enino omkaha binibbuo dimo e sbal manea Gode kukubo kla wafu binebio kesoa ibo e kukub olo funaine! Ibo e kukub olo bobolo fumbianiba inamin namin kukub misiamo ib dimo tam tlemo ibo tengo mo yebota Gode kukubo mo deibonimibe! Ibo Gode kukubo sbal maniba kla wafueine! <sup>4</sup> Hengmino ibo dlama teme binabo olo makob inaminobe. Naka misiami teniba ibo kukub misiamo omkaye binibbuo ib bainobo galino sbal mabinibbiobe. Ibo sbal maniba kukub ayam wafu bliba naka maki teniba ibo enino omkaye binibbu otane ib dimo ilemo mo tlota kaaim blimobe. <sup>5-6</sup> Gode ib bainobo galino ombal mabenamin wengo naka make Gode buk tem dolanebuo dokobenoa deibueiba bleka? Ne weng olo imin baabenamabibe, e weng olo dolanebuo enange baanoa

Gode e memei baabenea Ne meme ibo kukub misiamo nabibo ib Sum ne yang kenia yenaia tekein kenomabibo inaminobe. Makob naka make e miine inamin namin

kukub misiamo nasea ananea tekein kenea inamin kukubo deibonamabe inania e ande dofanamabibe. Nakaia unangai ne baabenya Ibo ne memebo ge baabeibuei kukub misiamo nanimibo ne i yemde dlania alebeia tekein keniba funaniba Ni kukubo misiam nabobtabo geniba deibueine genia inaye binabi kesoa ne ibo inabenimio ibo mo funanibta Gode ni mo gobeim blim keneta nayebebo ge funanimibe! Ne inania ibo yemde dlanimo ibo kukub olo funaniba Ni kukub olo misiam nabobta Gode alebenebo, kukub misiam olo deibonomo ge funaniba deibueine genita nabenamabibo geniobo genobiobe.

<sup>7</sup> Gode funanea I ne meme kesoa i kukub misiamo namibo ne i yemde dlania alebeia tekein keniba funaniba Ni kukub misiam nabobtabo geniba kukub misiam olo deibueine genea inayemabeo makob nakae e miine kukub misiamo nasea ande dofanea kukubo alebanamabe inabenamabe kesoa ibo kukub olo mo watenibta Gode ni misiam nabenebo genibta dobsuanimibe! Men gwabe kukub misiamo nanemeo aalebe dobo klanamabea bleka? Ae e dobo klanamabebe. <sup>8</sup> Gode memei kukub misiamo nanimibo e alukum yemde dlania dlo klanamabebe. Ibo kukub misiamo namibo Gode ibo mo yemde dlania kukubo alebenea dlo klaim blim kene mole ibo e meme motonbabe. Ibo taman memebe. <sup>9</sup> Sino nibo gwab biob kukub misiamo nanomobo nib aywali yenaniba tekein kemino omkaye binibbuo nibo funanoba I naka ayamobo gabinobiobe. Ina otane Aye Gode nib aywal eli gaisenebiobe. E inanebio kesoa nibo kukub misiamo nanomobo e nibo yemde dlania nib kukub misiamo nanomobo dlo klanang gameo nibo mo funanobta Gode kukub olo misiamobo ge funanomobe! Nibo e bobol tem funino kla wafu bianoba e kukubo namine gabe ota namomo! Nibo inamobo amit nomabbiobe. <sup>10</sup> Nibo gwab biob dimo nib aywali ili bobol tem funino wafu bianiba nibo kukub misiamo nanomobo yenaniba tekein kemino omkaye bianiba aleye binibbu otane Gode nibo kukub misiamo nanomobo yemde dlania e kukubo alebenea dlo klanamabeo e kukub ayamo olob alebenea kining anoba makob ele ulab anomabbiobe. <sup>11</sup> Nibo kukub misiamo nanoba Gode yemde dlania dlo klaname dimo nib bobol tem daako ilum omfubenamabo otane omiito nibo tekein kenoba Kukub olo ni daabenobo genomabbio kesoa o nib bobol temo ayam omfubenoa

nibo molot anoba Gode ulab anomabbiobe.

*Nibo Gode abuk walanamino misiam kesoa nibo klamomo!*

<sup>12</sup> Naka maki ib isak temo blibi Yesus Klaiste wengo wafunin kukubo teng dububebua makob nakaia unangai bib mak skeim ye unom geniba amit ye bebib binoa skilo dlanoa haanino deibo blimubenabo ina biobe. Kukub misiamo ib dimo tam tlamabo bobolo amito mo fumbianibta tengo mo yemone! Ibo ne wengo sino baabeibuo kla fumbianiba sbal maniba Klaiste wengo kla wafunine! <sup>13</sup> Ibo Klaiste wengo klaao mo wafueim blim keib mole naka mak unang maki i bainobo galino sbalbai ibo yateniba funaniba I bainobo galino sbal otane i kukub misiam olo nabib kesoa nisa kukub olo nanomobo ayamobo geniba inamibo i Yesuse bainobo galino deibonomabiobe. Kukub olo misiam kesoa ibo Klaiste bainobo galino sbalma bianiba kukub ayam ota wafu bliba i yateniba funaniba I Klaiste bainobo galino sbalma blib kesoa nisa inanoba Klaiste bainobo galino sbalma wafunomo ge funaniba inamine!

<sup>14</sup> Ibo ib bobol temo fiab bianiba naka mak unang maki gobenin kukubo sbalma wafu bianiba eka kining anamin kukub osa kla sbalma wafunine! Nakae mo kining aim blim kene mole e mo moneta Sume God esuo mo unamabebabe. <sup>15</sup> Gode ibo daaye binabe kukubo ibo abuk waulib mole kukub olo misiam kesoa ibo klaniba ib sinwalo daabesese bianiba ib bainobo galino sbalma wafunine! Naka make ib isak temo bianea Klaiste wengo deibonea weng afet osa kukub misiam osa ota aleyebea naka homon unang homoni ib isak temo blibi e wengo wenteniba i bainobo galino deibonimibo kukub olo misiamobe. Makob nakai kulani mana bianiba mato welabbebonimibo mat game weitam dibianea kulani misiam anabib inanea e kukub misiam olo nabeo naka mak unang maki bainobo galino watwat dabenamabe kesoa ibo klaniba naka make ib isak temo bianea kukub misiam olo name mole ibo Yeye kobo kukub misiam olo mo inamebe ge baabaine! <sup>16</sup> Nakaia unanga ibo tamano hengabib mole kukub olo misiam kesoa ibo klaine! Eka ibo Gode inamin namin ayamo doyamabeo abuk waulib mole kukub oloso misiam kesoa klaine! Sinanggwano nakae niniino Isoe nanea e imen teb ananoa tete-me e ninge imeno fube kesoa baabanea Kobo imen olo oneba doweibiota sinanoa aye kaanemeo Gode inamin namin ayamo hek sum ne donamabeo kebta dlone ge baabanebiobe. E funanea Imen olo Gode

inamin namin ayamo gaisonobiobo ge funaneta e Gode inamin namin ayam olo abukwaulebiobe. <sup>17</sup> Isoe inanebua sinanea funanea Gode inamin namino aye dlalebuo dlamabibo gabe otane sino e inamin namin nibo mo gobueim blim kenea e ning eta omalebio kesoa e aye baabanea Yeye kobo mo dlamabebbabo gesea Isoe mebianea omamabibo gabe otane Gode baabanea Yeye kobo mo dlamabebbabo gene kesoa e deibasebe. Ibsa inaniba Gode inamin namin ayamo abuk waulib mole kukub olo misiam kesoa klaine!

*Nibo utenoba amgolim ayame Saione golim ele tlobbiobe.*

<sup>18</sup> Sinanggwano Isleli inamin namino wateniba o wengo wentenaibbuo ibo Gode mema bainobo geib dimo o mo wateniba eka o wengo mo wentenaim blimobe. I moniba amgolime niniino Sainaie tebab ye bianiba temiba amgolim ele golim ute ase sume eimbe kesoa atem nabianiba eka ayungo milil osa eka glol sum esa waternaiibbuo <sup>19</sup> i nakae mabianea bigule obabeo mo atemim blimobe. I besa bigul weng ota wentena bianiba eka e weng obe osa i wentib otane i naka dame mo atemim blimobe. I weng olo wenteniba tosonianiba Mosese baabaniba Ni weng olo wentenoba tosonianob kesoa kobo e baabaneba Kobo i imino mo baabene-mebe! Kobo neta baatnenebta eka neta keb weng e baabenano ge baabanale ge baabasioe. <sup>20</sup> Gode weng olo enangge baasete wentenibtabe. E baanea Naka isa unang isa meme isa til isa eil isa kulan mak isa teniba amgolim ele golimo haabian-iba melebaiba yatemib mole tom oloniba blelaniba yenaiba kaaine gesea wentib kesota i tosonianibta Mosese baabaniba Kobo baabaneba e weng afeto imino mo baabenemebe ge baabanale ge baabaibbiobe. <sup>21</sup> Nakaia unangai inamin namin olo waterniba o tolo tosiam binibbuo Moses esa nakaia unangai baabenea Nesa weng olo wentenia tosiam biania namasambobo ge baabenebiobe.

<sup>22</sup> Ina otane nakaia unangai memalo Yesuse bainobo gabib ibo amgolim elesuo mo unim blimobe. Ibole teniba Gode amit afen bie e bibo amgolime niniino Saione golim ele tlobbiobe. Bib olo niniino Yelusalem otabe. O abilim bibobe. Abiseli dot homoni bib olo bliobe. I kinamino blimobe. <sup>23</sup> Ibo teniba Gode bainobo galin nakaia unangai mak isu ele tetena bianiba seimbioe. Sino i niniino Gode buko abilim ut buo temo dolabenebiobe. Ibo teniba nakaia unangai kukubo klamin nakae God esa eka nakaia unangai Gode baabenea Ibo naka molot unang molotobo ge baabenea

kaaibbuei smiki Gode bib ele blib isa isu ele tlobbiobe. Gode kin dimo i kining aibbiobe. <sup>24</sup> Ibo teniba isak nakae Yesus esu ele tlibbiobe. E Gode hekmele wengo memao omalea e nibo omyenea daabenebua wafu biob nibo Gode baka biobobe. E kaanea ileme singanebua sinanggwano nakae niniino Ebele kaanea e ileme singanebu otane Yesuse ilemo Ebele ilemo gaisanobiobe. Gode Ebele ilemo watenea e Kene dobsuananea funanea Ne Kene kukub olo yang kenia esak kukub misiamo omalamabibo genebiobe. Ina otane Gode Klaiste ilemo watenea nibo dohalilanea nib hengmino omlabenebiobe.

*Nibo klanoba Gode kukubo wafunomo!*

<sup>25</sup> Nibo klamomo! Gode wengo nibo omkayebeo mo omdibihamobe! Sinanggwano Mosese dabalim olo binebuo Gode wengo nakaia unangai omkayebe otane maki e weng olo omdibihamib kesoa Gode i watwat dabenebuo i mo skila unibta deibeim blimobe. I alukum watwat daabenebiobe. E inanebua memalo abilim ut biane wengo omkayebe kesoa nibo e wengo omdibihamobo e nib kukub misiamo yang kenang gameo nibo gilang unoba deibenamabea bleka? Yeye nibo gilang onamino blimobe. E alukum enin sumo omyenea watwat dabenamabebe. <sup>26</sup> Sinanggwano Gode amgolime Sainaie golim ut biane e wengo nakaia unangai omkaye monseo dabal ele fibamonsebe. Eka memalosa e baanea Ne dabale imin obamaia fibanamabebe. Inanamabio dabale eleobbabo, abil esa dabamaia fibanamabebo genebiobe. <sup>27</sup> Weng olo baanoa Imin inanamabibo genobuo inaminobe. Sinanggwano Gode inamin namino klanebu alukum fiba fana bianoa blimanamabobe. Eka inamin namino mo fibaim blim kenamabo ole sma ye biamabobe.

<sup>28-29</sup> Gode inamin namino imin omyamabeo e kimanin bib ut buo o mo fibanamaboba kesoa nibo seinomo! Nib Gode makob as beselibo eimbianoa inamin namino kibanoa nemat genabo inanea inamin namino e mo gobo biebao nemat genea blimanamabobe. E inanamabe kesoa nibo tosonianoba e kukubo gobonea namine gabe ota wafu bianoba e gangobo ge oha bianoba e niniino dobtoulebo nomo!

## 13

*Nibo nib nekwali kla gobenomo!*

<sup>1</sup> Klaiste bainobo galin nakaia unanga ibo ib sinwalo kla gobesese nine! <sup>2</sup> Eka bib mak nakai ibo mo yatemebibbai tlib mole baabeniba Ibo ye tlibo ge baabeniba imeno doayne! Sino naka mak isa inaniba



Gode abiseli tlaibo i mo tekein kenibta i abiselobo geim blim otane i baabeniba Ibo ye tlibo ge baabeniba dleb taniba i am tam unaniba imeno dokaye binibbio kesoa ibsa inaniba bib mak nakai tlaibo dleb taniba ib am tam unaniba imeno do yine! <sup>3</sup> Ibo nakaia unangai klabutam blibi bobolo funaniba daabeniba makob ibtena klabut ain keine! Eka ibo nakaia unangai naka mak unang maki teniba enino omkayebibi bobolo funaniba Ni i dohalimbobo makob i kinin kino watemebib inanoba nisa enin kinin watememomo ge fumbianiba daayemine! <sup>4</sup> Nakai alelwali dlonamin kukub osa eka unangi imakwali dlonamin kukub osa ayamobe. Inamin kesoa ibo imakwal alelwal bokalin kukubo mo debianibta tamano mo hengamibe! Nakae naka make alelo taman deib omeisa haane mole kukub olo misiamobe. Eka unang osa naka make alesa otane o taman deib debeh haano mole olosa misiamobe. Nakaia unangai kukub olo ina binibbio mole sinanomo Gode i kukub misiam olo yang kenea yenanamabebe.

<sup>5</sup> Ibo monio bobolo mo fumbianibta Ni monio sum bokalomo galaibe! Makob ye dlaib yota dlabianiba baye dlobobo gabianiba seinine! Niminbabe, Gode e buk temo baanea  
Ne ibo mo deibenita abuk wayamibabo, ne daabenamabibo genebiobe.

<sup>6</sup> Inamin kesoa nibo bobol ayam fumbianoba baanoba  
Sume ni daayemin naka kesoa naka mak unang maki teniba ni enino omyom gaibo ni i tolo mo tosonianomobababo genom!

Sinanggwano naka make weng olo Gode buk temo dolanebiobe.

*Nibo sino kimanin nakai kukub ayamo nabinibbio yota nibsana nomo!*

<sup>7</sup> Bainobo galin nakaia unanga ibo ib kimanin nakai sino Gode wengo omkeima binibbuei bobolo funaine! I kukub ayamo nabaniba Gode wengo kla wafu binibbio kesoa ibo i kukubo bobolo fumbianiba kukub olo kla wafunine! <sup>8</sup> Yesus Klaiste afet anamino blimobe. E sinangwanosa memalosa sinanomosa makob inaminobe. E weng osa afet anamino blimobe. <sup>9</sup> Naka maki weng afeto omkayemibo ibo i wengo mo wentaibe! Ibo i weng olo wenteniba Yesus Klaiste weng ayamo abuk waulib mole kukub olo misiam kesoa ibo i wengo mo wentaibe! Gode nibo daaye binabe olo nib bobol temo dosbalsam binabo kesoa nibo Gode kukubo kla wafunomo! Naka maki baabeniba Ibo imen olota doweine,

eka imen mak olo mo downaibe! Ibo in-aib mole ayam anomabiobo ge baabeibbio weng olo besabe. Ibo weng olo wenteniba in-aib mole kukub olo Gode wengo kla wafunin kukubo mo daabenamabobabe.

*Nibo Gode niniino dobtouleb nomo!*

<sup>10</sup> Yesuse atdimmo kaanea e ileme singanea nibo daabenebuo, olo makob i kulani dlo yenaniba Gode heitdahamin biino dim ut funiba Gode heitdaha binabibo ulabobe. Ina otane nakaia unangai sma kulani yenaniba Gode heitdahamin biino dim ut funiba Gode ni hengmino omlabeneko gabibo kukub olo makob i baaniba Yesuse atdimmo kaanebu olo ni hengmino mo omlabeim blimobe genibta inabib kesoa Yesuse i mo daabeneta i hengmino mo omlabenamabebabe. <sup>11</sup> Gode amo kimanin nakai komok sume eil sib-sib isa eil blumakau isa inanea ilemo deise oleb tanea Gode biin awemo tem tam unanea Gode olanea baabanea Kobo i hengmino omlabenale ge baabanea olalea eka kulani dam ile daam tem tamo deiboniba dleb taniba bib tam aso faniba dlatdieiba kiba binabiobe. <sup>12</sup> I ina binabibbua Yesus esa inanea daam tem tamo deibonea bib tam kaanea e ileme singanea nakaia unanga nibo hengmino omlabenebio kesoa nibo emiobe. <sup>13</sup> E inanebio kesoa nibsana daam tem tamo deibonoba tanoba Yesus esu tam unomo! Kukub olo mitmakamo inaminobe. Nibo nakaia unangai Mosese hekmel wengo wafu binibbio kukubo deibonoba Yesus Klaiste kukub ota wafunomo! Nakaia unangai Mosese wengo wafu blibi Yesus Klaiste enino omaniba anaibbio kesoa i nibsana enino omyomabib otane nibo enin olo bobolo funino deibonoba Yesuse wengo kla wafunomo! <sup>14</sup> Nibo Mosese wengo deibonoba Klaiste wengo kla wafunomo! Niminbabe, nibo dabalim olo biobo nib bibo amit bibo blimobe. Nibo Gode bib ayamo klanea nibo dletnea monoba amit nomabbio amo tlamabo waisonomo! <sup>15</sup> Klaiste kaanea nibo hengmino temo biobo dotlanebio kesoa nibo amitie seimbianoba Klaiste wengo naka mak unang maki omkaye bianoba baabenoba Gode ayamobo ge oye bianoba e niniino dobtouleb nomo! Nibo Gode niniino dobtouleb nin kukub olo makob nibo kulan ayami yenanoba Gode dlalombio inaminobe. <sup>16</sup> Ibo naka mak unang maki bobolo amitie fumbianiba daayemine! I inamin namino blim blim mole ibmio do yine! Ibo inamib mole kukub olosa makob ibo kulan ayami yenaniba Gode dlalomabib inamin kesoa e seinyemabebe.

<sup>17</sup> Bainobo galin nakaia unanga ibo ib kimanin nakai wengo wentine! I ibo kima

bianiba daayebiobe. Sinanomo i Gode baabaniba Ni nakaia unanga eli inanobta kima binobbio bo ge baabanomabib kesoa ibo i wengo wente bianiba wafunine! Ibo i wengo wentemib mole i seimbianiba i okoko kla okok kemomabiobe. Ina otane ibo i wengo mo wentemin blim keib mole i bobolo ilum omfubenoa i ibo kla mo daayemin blim keiba ibo Klaiste bobolo kla mo funomabibbabe.

*Ibo ni daaye bianiba Gode beten kehamine!*

<sup>18</sup> Ibo amitie ni beten keye bianiba Gode baabaniba Kobo naka eli daabenale ge ohamine! Ni funanoba Ni okok olo nabobo klayam nabuobo ge fumbianoba ni kukub ayamo wafu bioba naka mak unang maki ni kukub ayamo yateniba funaniba I naka ayamobo ge funaine gabuobe. <sup>19</sup> Ne ibo baabenamabio Ibo ne beteno daanebiba Gode hebmamsab nemanea natlano gabibe.

<sup>20-21</sup> Nib Sume Yesuse kaanea Gode imin dofaanea hananebiobe. E kaanea ileme singanea Gode weng ayamo nibo omyenea baanea Ne inamin namin ayamo omyamabibo genebio weng olo omsbal manebio kesoa Gode inamin namin olo nibo doyamabebe. E weng olo amit nino. Makob eil sibsib kimanin nakae eil sibsibi kima bie inanea nib Sume Yesuse e bainobo galin nakaia unanga nibo kima biebe. Gode nakaia unanga nibo bobol tem ayam omkayemin naka kesoa e ibo amitie daayebea ibo e wengo kla wafunine! Yesus Klaiste sino nibo daabenebio kesoa Gode ele fumbe inanea kukub ayamo nib bobol temo omabbeneko! Nibo Klaiste niniino amitie dobtoulebo nomo!

*Mubiang wengobe.*

<sup>22</sup> Ne nekwai ibo ne weng ele baabei olo homonba kesoa ibo kla wenteniba funa omabbaine! Ne funania Ne weng olo baabenimio i bobol tem funino daabenamabobo ge funaio. <sup>23</sup> Nib neke Timotie klabut tam bio i tileisaib kesoa e hebmasab tle mole etena natlomabbio.

<sup>24</sup> Ibo ib kimanin naka isa eka Gode bainobo galin naka mak unang maki ibo bekebe blib isa Klayam blibte ge baabeine! Itali teni Gode bainobo galin nakaia unangai Ibo klayam blibte ge baabeibobe. <sup>25</sup> Gode ibo daabeneko! Ne wengo bayotabe.

## **Yems Futan olo Yems eta dolanebiobe. Tekein kemín wengobe.**

Yesuse atdimó kaanea imin hananea ulanea abilim unebua bifolo 20 e 30 e mak blimanota Yesuse ninge Yemse futan olo dolanebiobe. E Yelusalem bibo Yesuse bainobo galin nakaia unangai kima bianeta Yesuse bainobo galin nakaia unangai skilaniba bib mak bib mako onon tlaibuei kukub ayamo wafunino weng sango baabenebiobe.

1:1 Mikiktem wengobe.

1:2-8 Nakaia unangai bobol tem funin ayamo blim biaibo Gode nganabaiba omyenamino wengobe.

1:9-11 Nakaia unangai inamin namin blim isa eka inamin naminsa isa i wengobe.

1:12-18 Bainobo galino naatememin wengobe.

1:19-27 Gode wengo wente bianiba e kukubo namin wengobe.

2:1-13 Nakaia unangai kukubo makob kimin omyenamín wengobe.

2:14-26 Nakaia unangai bainobo geniba kukub ayamo wafunino wengobe.

3:1-18 Bainobo galin nakaia unangai sital dimo weng misiamo klaine!

4:1-5:6 Yesuse bainobo galin nakaia unangai kukubo namino wengobe.

5:7-20 Tekein kemín wengobe.

<sup>1</sup> Ae Yuda nakai mito 12 i bib mak bib mak ye blib ibo Yems ne God esa Yesus Klaist Sum esa i okok naka neta ib futano dola omfubenamabibe.

*Kukub misiamo ibsu ye tam tlamó ib bainobo galino sbal maine!*

<sup>2</sup> Ne nekwál ibo wentine! Inamin namin kukub misiamo ibsu tam tlamabuo ibo ye seimbibte! <sup>3</sup> Niminbabe, ibo tekein kebiobe, kukub misiamo ibsu ye tam tlanó ib bainobo galino dlamanamabo dimo ibo bainobo galino sbalma wafueib mole ibo sbal manomabiobe. <sup>4</sup> Ibo sbal maniba Gode bainobo galino amitie wafueib mole ib bainobo galino sum anoa Gode kukub ayamo amit bibenamabobe.

*Nakai bobol funino ayamo blimubenang go mole Gode nganabaine!*

<sup>5</sup> Elekiem olokiem ibo ib bobol tem funin ayamo blimubeno mole Gode baabaniba Keb bobol tem funin ayamo ni omyene ge baabaine! E daayemin naka kesoa e mo dosuananemebabe. E omyamabebe. <sup>6</sup> Ibo inangge baabaib mole funaniba Gode bobol tem funin ayamo omyamabebo ge

funaine! Ibo mo funanibta Gode bain omyamabe bleka deibenamabeso ge funanimibe! Ibo bobol tem asuo mo funanimibe! Ibo bobol tem asuo funaib mole ibo makob aso glole olasambea oleb une tlebua ulabobe. <sup>7-8</sup> Inamin naka ibo mo funanibta Gode ni inamin namin ayamo doyamabebo ge funanimibe! Niminbabe, ib bobol temo amitie asusu fumbib kesoa Gode inamin namin ayamo mo doyamababe.

*Nakai afobeing blim isa afobeingsa isa seinine!*

<sup>9</sup> Ne nekwál afobeingo blim ibo Gode kla gobe bianea ib niniino dotoule bie kesoa ibo kla seinine! <sup>10-11</sup> Eka ne nekwál ibo afobeing homono bibebio ibo Gode ibsa kla gobenea ib niniino omabbubenamabe kesoa ibsa seinine! Ibo makob aketo ulabobe. Aketo hamtoufanomo afoko tubunoa glole tlebiana gatanó ayamo blimanabo inaniba nakai afobeing homoni kaaniba i afobeingo blimubenamabobe.

*Omomom kukub misiamo ibsuo tlamabó wengobe.*

<sup>12</sup> Eka omomom kukub misiamo ibsuo tloa ibo Gode kukubo sbalma wafueib mole ibo seinomabiobe. Sino Gode e goba biob naka nibo moton wengo baabenea Omomom kukub misiamo ibsuo tlamó ibo sbal maniba ne bobolo funib mole afen smike doboniba amit nomabiobo genebuo ibo inaniba afen smike doboniba amit nomabib kesoa ibo seinine! <sup>13</sup> Kukub misiamo ib bobol temo tlak unubenoa hengmino hengaib mole ibo mo baanibta God eta nemab maneta hengaibo genimibe! Hengmino Gode mo dababmanomababe. Eka God esa nakai mo dlabmaneta hengmino henganimibbabe. <sup>14</sup> Ina otane elekiem olokiem nibo bobol tem misiamo funanoba Ni kukub olo nanobtabo ge fumbob ota dlabmanota hengmino hengabuobe. <sup>15</sup> Nib bobol temo kukub misiamo tlaak unubenoa omomom kukub misiamo nabobo, kukub olo beselibu benobua sinanoa nibo kaanomobo Gode bibo mo unomabbibabe.

<sup>16</sup> Ne nekwál ibo mo funanibta God eta inabenebo ge funanimibe! Ibo inangge funaib mole ib bobol tem funin olo misiamobe. <sup>17</sup> Nibo inamin namin ayamo bokabob osa eka inamin namin ayamo afet osa o abilim da ta tlebobe. Gode abilimo ayalo klanebu eta nibo omabeneta daak tlebobe. Gode amit ninobe. E afet anamino blimobe. E makob inamin ye biebe. <sup>18</sup> Gode emaye ele bobol temo funanea Ne weng ayamo i bobol temo omabbebeia i bainobo geine ge funanea inanea nibo e melel

ananobbuo makob imen sano dolmanobua mikiktemo elekiem elekiem damanoa omito alukum damanabo inaminobe. Nibo sin e bainobo genobta mitdata naka mak unang mak isak bainobo genomabiobe.

*Ibo ne weng olo kla wenteniba funaine!*

<sup>19</sup> Ne nekwai ibo ne kla gobe blibe. Ibo ne weng olo kla wenteniba funaine! Ibo weng ole hebmamsab wentine! Otane weng ole hebmamsabo mo baaniba eka alo hebmamsabo mo tliaubenanomone! <sup>20</sup> Nakae atliaubano mole e kukubo Gode kin dimo molotbabe. E Gode bobol tem funino mo wafueim blim keneta nanamabebe. <sup>21</sup> Ibo bobol tem funin misiam osa kukub misiam osa deibueine! Ibo ilib bobol tem funino mo wafunimibe! Ibo Gode weng ota wente bianiba bainobo galine! E weng olo nibo hengmin temo biobo dotlanamabe kukubo alebenamabobe.

<sup>22</sup> Ibo weng olo wentaibo mo dokobenota deibonimibe! Ibo wengo wenteniba dokobenota deiboniba ib bobol temo funaniba Ne ayamobo geib mole ib bobol tem funin olo molotbabe. Ibo Gode ele wengo baabeneme iwat namine! <sup>23-24</sup> Ibo Gode wengo wenteniba mo wafueim blim keib mole ibo makob ib kibio aakikite dofaniba kibio wateniba ni kibio inaminobe gebiam deniba aakikite deiba haanimibo hebmamsab dokobenota ni kibio fatnamin eso? ge funanabib inaniba Gode bobolo funino hebmamsab dokobenamabobe. <sup>25</sup> Ina otane Gode weng ayamoo nakaia unangai daabenoa titilo omkayebuo ibo weng olo wente bianiba ibo mo dokobenomoba amitie fumbianiba inamib mole Gode daabenea ibo bobol tem funin ayamoo omyamabebe.

<sup>26</sup> Ibo amitie teniba lotu kebianiba Gode niniino dobtouleb biobobo gabib otane weng misiamo omino ib sitalo klaoo mo kimaim blim keib mole ib bobol tem funino molotba kesoa ibo Gode niniino dobtouleb blib osa molotbabe. <sup>27</sup> Nibo kukub ayamoo nanoba niib Aye Gode funanea I kukubo ayamobo genamabeo inaminobe. Nibo meme maki awok aaloki kulilubeibbua aban biaib isa eka unangi imakwali kaabeibbua sosen biaib isa kla kima bianoba kukub misiamo takabonoba Gode niniino dobtouleb nomob ota Gode funaneta Ib kukubo molotobo genamabebe.

## 2

*Ibo nakai afobeing blim isa eka afobeingsa isa alukum gobeine!*

<sup>1</sup> Ne nekwai ibo Sume Yesus Klaiste bainobo gebaibbue e Sumobe. E titilo ayal inamin einebio kesoa ibo naka maki

unaal kino mo yatenibta baanibta Nakae inamine ayamobo, eka inamin ele misiamobo genimibe! <sup>2</sup> Naka maki asu keniba make youmo ayam kinea e kweile gole obtabba nanabea eka inamin namim blim ele youmo misiam aluota kinaniba teniba ib lotu am ele tesiba yateniba <sup>3</sup> youm ayam ki tle baabaniba Kobo teneba ni biin toulalino dim ele tounale ge baabaniba eka youm aluo ki tle naka ele baabaniba Kobo watneba ewale manemeba eka teneba ni skilo tabab tem ibbitin dim ele tounemeba mak nanale ge baabanab mole kukub olo misiamobe. <sup>4</sup> Ibo inaib mole ibo makob kukub klamin nakae ulabobe. Ib bobol tem funin olo misiamobe. Ibo nakai unaal kino mo yatenibta funanibta Inamin nakae ayamobo, eka inamin nakae misiamobo galaibe!

<sup>5</sup> Ne nekwai ibo wenteniba funaine! Naka maki nakai inamin namino blimi yatemniba funaniba I inamin naminsababo, i besa nakabo ge fumbib otane Gode naka eli dlakanebua e daayebua bainobo gabianiba i bainobo galino sbalma blib kesoa sinanomo i e kimanin bibo unomabiobe. Makob sinanggwano e moton wengo baanea Nakae ne bobolo fumbianea ne bainobo gabe mole e ne kimanin bibo unamabebo genebio inanomabiobe. <sup>6</sup> Ibo fumbianiba Nakaia unangai inamin namino blimi misiamobo gabib otane ibo funaine! Wanita ibo bobol ilumo omkaye bianibta ge dleb monibta klabutam kabibe? Nakai inamin namino blim ikobbabe. Nakai inamin naminsa ita ibo bobol ilumo omkayebiobe. <sup>7</sup> Ibo Yesuse bainobo gabibo inamin naminsa naka eli nib Sume Yesuse niniin ayamoo weng dobo weng owe bianiba ibo bobolo ilumo omkayebiobe.

<sup>8</sup> Sinanggwano Gode hekmel wengo e buk temo dolanea baanea Ibo ilib unaalo gobo blib inaniba naka mak unang maki ibo baka blib isa gobeine ge baanea dolanebuo ibo wenteniba inaib mole kukub olo ayamobe. <sup>9</sup> Ina otane ibo naka mak unang maki unaal kino yateniba ib bobol temo funaniba Naka eli ayamobo, naka maki misiamobo geib mole kukub olo hengmin kesoa Gode hekmel wengo baanoa Ibo Gode hekmel wengo wakalin nakabo genobiobe. <sup>10</sup> Ibo Gode hekmel wengo alukum wafunimib otane olokiemo deibonib mole ibo Gode hekmel weng omdibimin nakabe. <sup>11</sup> Gode baanea Ibo alelwali mo blipta deibenibta unang maki taman deibo mo dleb haanimibe gena bianea eka weng mak osa baabenea Ibo naka maki mo yenaiba kaanimibe genanebio kesoa ibo alelwali deibeniba unang maki taman deibo dleb

haanin kukubo mo naim blim otane naka maki yenaiba kaaib mole hekmel wengo ombianomabiobe. <sup>12</sup> Gode hekmel wengo memao omuya o nib hengmino bolonoa tileisenobio kesoa sinanomo Gode nib kukubo klanea elita ne hekmel wengo memao wafu bliobe, eka elita ne hekmel wengo memao mo wafu blibbabe genamabe kesoa ibo ib kukub nabib osa eka ib weng obib osa kla funaine! <sup>13</sup> Ibo naka mak unang maki mo dohalilaniba daabeim blim keibbio mole sinanomo God esa ibo mo dohalilanemebabe. Otane ibo naka mak unang maki dohalilaniba daabeibbio mole sinanomo God esa inanea ibo dohalilanea daabenea ibo e nakaia unangai kukubo klanang game dimo ibo mo tosianimibbabe.

*Bainobo galino wengobe.*

<sup>14</sup> Nekwal ibo funaine! Naka make baanea Ne bainobo gabibo geneme otane e kukubo ayamo mo naim blim kene mole e bainobo galino dim kesoa kukub olo e hengmino temo bio mo dobtlanomobabe. <sup>15-16</sup> Bainobo galin naka mak unang maki imena youma moniao blim bibebua ibo baabeniba Ibo youmo dluaniba mimin tenaniba eka imeno downiba matwayenanoa Gode bobol tem funin ayamo omyeko ge baabenimib otane ibo mo daabenibta monia imena youmao mo oyim blim keib mole ib kukub olo misiamobe. Ibo besa weng ota nabibi weng atab obiobe.

<sup>17</sup> Bainobo galin kukubo inaminobe. Ibo baaniba Ni bainobo gabuobo gabib otane ibo Gode weng osa kukub ayam osa mo wafueim blim keib mole ib bainobo galino blimobe. <sup>18</sup> Naka make baanea Naka ele Sume bainobo gabea eka nele kukub ayamo wafu blibo gabe otane ne baanambio Nakae kukub ayamo mo wafueim blim kene mole ibo mo tekein keniba e bainobo galin nakabe genomabibbabe. Eka ne kukub ayamo wafuei mole ibo natem tekein keniba e bainobo galin nakabo genomabiobe. <sup>19</sup> Ibo Gode elekiem biebo geniba bainobo gabibo ayam otane ib bainobo galino menobe. Hob misiam isa Gode elekiem biebo geniba bainobo gabib otane i tekein keniba i aseinin bib unomabib kesoa i tosiambiobe. Inamin kesoa ibo baaniba Ni bainobo gabuobo gabib mole ibo kukub ayamo wafueine! <sup>20</sup> Nakai bobol tem funin blim ibo wentine! Ib bobol temo funaniba Ni bainobo gabuobo genimib otane ibo kukubo ayamo mo wafueim blim keib mole ib bainobo galino blimobe. Ibo mo tekein keibba kesoa ne alebenamabibe.

<sup>21</sup> Ibo nib fanine Eblahame nanebuo bobolo funaine! E Gode wengo kla wemel bianea e miine debeb utnea tom dim ut dofanea ananea Gode heitdabanang genabea Gode e kukub olo watenea funanea Eblahame naka ayamobo gesebe. <sup>22</sup> Ibo tekein kebiobe, Eblahame Gode bainobo genea kukub ayam wafu bianea e bainobo galino sbalma binebio kesoa nibo e weng sango wentenoba tekein kenoba e bainobo galin nakabe genom! <sup>23</sup> Gode buk temo baanoa Eblahame Gode bainobo gabe kesoa Gode funanea Eblahame naka molotobo genebiobo ge baanobuo Eblahame inanea Aisake Gode dabaleo dimo weng olo keim anoa nakaia unangai baaniba Eblahame Gode nekobo geibbiobe. <sup>24</sup> E inanebio kesoa ibo funaine! Nakae waneta Gode bainobo genea kukubo ayam wafuneme naka eta Gode funanea E ne kin dimo hengmino blimobo genamabebe. Eka naka make baanea Ne Gode bainobo gabibo geneme otane e kukubo klayamo mo wafueim blim kene mole Gode mo funanea E ne kin dimo hengmino blimobo genamabebe.

<sup>25</sup> Sinanggwano Yudai komoko Yosuae Nakai dlaia moniba taman unango niniino Lehabo bibam seli yatem tliba monoba yalomo genea nakai asu dlanea moniba o bibam ye temiba o Yuda nakai wengo wentenoba o bibam seli Yuda naka eli yenanom genabibo daabenoa i unibbio deibe deibanoba afet deib eta dlanoa imin moniba ili bibam uniba Gode o kukubo watenea O unang molotobo gesebe. <sup>26</sup> Nibo tekein kebuobe, nakae e smike deiba une mole e kaanamabebe. Inamin kesoa naka make baanea Ne Gode bainobo gabibo geneme otane e kukubo ayamo mo wafueim blim kene mole e bainobo galino blimobe. E makob kaanabibi ulabobe.

### 3

*Nibo nib sitalo kimanomo!*

<sup>1</sup> Ne nekwal ibo mo alukumata aleyemin naka nimibe! Aleyemin naka nibo misiam aleye binob biamo sinanoa Gode nib kukubo klanang gameo dimo aleyemin naka nibo bobolo dot ilum omyeneta eka naka mak ile i bobol ilumo gwab omyamabebe. <sup>2</sup> Naka nib kukubo alukum ina binabuobe. Am mak bomanomo dimo kukubo ayam wafu binomob ile eka am mak bomanomo dimo kukub misiam wafu bi binabob kesoa nakae waneta weng misiam deibonea weng ayamo olota ome mole e dot naka ayamobe. E kukubo kla kimanamabebe.

<sup>3</sup> Makob nibo ain gwabo helonoba til hosi sitalo dimo filili tebelanoba sayo o dimo milim tob gigi nanobbua til hosi sum otane nibo ain gwab olo dum menganoba

Afan sin da unine, kweital sin da unine gabinaob inaminobe. <sup>4</sup> Eka weseme esa sumobe. Aayo menganoa obki unamabo otane nakai ful gwabo dloniba weseme bebe biamo aaye afan sin da waisa kweital sin da waisa bianiba weseme mukunge molot ofa ofa blibta une binabebe. <sup>5</sup> Nib sital osa inaminobe. Nib damo sum otane sital gwabo titilo sumobe. Nib sitalo titilsa kesoa nib kukub nabobo kima biobe.

Atgwal osa men otane aso beselib ein tlanoa aso homono kibanamabobe. <sup>6</sup> Nib sital osa makob aso ulabobe. Kukub misiam nib sitalo tem wat data tlebobe. Kukub misiam olo inanoa nib sital tem wat danao tlebo makob aso gwab otane o tubunomo beselib anoa as homono kibanoba inanoa kukub misiam olo nib sital tem wat ye kilonoba beselib anota nibo kukub misiam nabuobe. Kukub olo inabo aseinin bib data tlebobe. <sup>7</sup> Nakai eila kobola wana inaba isa eka inamin namini aaye sole tem daak blib isa kima blib otane <sup>8</sup> nakai i sitalo klao mo kima blibbabe. I sitalo dot misiamobe. I sitalo makob inab misiam nakai yantamanea kaanabibi ulabobe. <sup>9</sup> Nib sitalo nib Aye Gode niniino dobtoulebinabobo, kukub olo ayamobe. Otane nib sitalo dimo nakai Gode ele ulab klanebuei weng dobo weng oye binabobo, kukub olo misiamobe. <sup>10</sup> Nib sitalo olokiem otane weng omin ole asube. Am mak dimo weng ayam obianoba Gode niniino dobtoulebinomob ole eka am mak dimo weng misiam obianoba kukub misiam wafubi ina binabuobe. Nekwal ibo wentine! Inamin kukub olo dot misiamobe. <sup>11</sup> Bantem aayo welabba utlang gamo aaye sole yebbakao mo utlamobabe. <sup>12</sup> Ne nekwai ibo funaine! Ase fike yame olibo mo balinabea eka teke waene yame fike mo balinanomobabe. Eka aaye ayame sole mo dikibanamabebabe. Inamin kesoa nib sitalo dimo weng ayam osa weng misiam osa baanob mole kukub olo misiamobe.

*Bobol tem funin ayam God esu data tlebobe.*

<sup>13</sup> Ib isak temo nakai wanita i bobol tem funinsa tekein kemin ayami blib mole ibo mo funanibta Ne naka gang kesoa ne tekein kemino sumobo ge funanimibe! Ibo kukub ayam wafu blibta naka maki yatem tekein kenibta i naka ayamobo, i tekein kemin nakabo geine! <sup>14</sup> Ibo ninita ye biobabo gabianiba naka maki mo gobeim blim keniba fun yatememib mole ibo mo baanibta Ni naka ayam tekein keminsabo genimibe! Ibo inangge baaib mole ibo untak nganin nakabe. Ib weng osa dimobe. <sup>15</sup> Ib bobol tem funin olo abilim data tlebobabe. O dabalim olo bobol

tem funinobe. O Gululam esu data tlebobe. <sup>16</sup> Ibo naka maki dosuam bianiba ib bobol temo funaniba Ninita ye biobabo gabiam nib mole ib bobol tem daako kukub ayam blimu benoa ibo kukub misiam olo namomabiobe. <sup>17</sup> Ina otane nakai Gode bobol tem funino wafu blib ile naka ayamobe. I difib sanino deiboniba gilana bianiba naka maki gobe bianiba dohalim biobe. I mo funanibta Ni naka misiam deibenoba ayam ita daabenomo genimibbabe. I nakai alukum gobe bianiba daaye bianiba kukub ayam wafu bianiba i dim wengo mo obiam blibbabe. <sup>18</sup> Nakai wanita naka maki oye bianiba Ibo aalo mo tliyemone ge oyebib naka eli i naka ayamobe. I kukubo asiama kenoa yamo balinamabobe. Yam olo makob naka mak isa inaniba kukub ayam wafunomabiobe.

#### 4

*Nakai dabalim okoko bobolo funib mole i Gode makaa dofanomabiobe.*

<sup>1</sup> Ibo nimita dafa ota naka maki dosuam bianibta alang wengo oyebiobe? Ibo inamin namino waterniba ib bobolo wayebua ib bobol temo hekkeh fumbianiba atliyebo. <sup>2</sup> Ibo inamin namin ayam waterniba bobolo wayebu otane ibo mo dlim blim kesoa atliyebo naka maki yenanoba kaaine gabio. Ib bobolo sum wayebu otane ibo mo dlim blim kesoa ibo atliyebo weng alang weng obiobe. Ibo Gode mo baabanibta Kobo inamin namino ni doylene geim blim kesoa Gode inamin namino mo doyamabebabe. <sup>3</sup> Eka ibo Gode nganha bianiba baaniba Ni inamin namin ayam olo doylene ge baanimib osa ibo mo dloabibbabe. Nimitababe, ib bobol tem funin olo Gode kin dimo molotbabe. Ibo funaniba Ni inamin namin ayam olo dlonoba seinomo gabib kesoa e inamin namin ayam mo doyamabebabe. <sup>4</sup> Ibo makob unango o imake deibanoa naka make taman deib debeb unamabo inaniba ibo Gode bobol funino deiboniba ib bobol temo afet fumbiobe. Ibo yo mo tekein kebibbayo? Naka make dabalim kukubo bobol ota fune mole e Gode makaa dofanamabebabe. Inamin kesoa ibo dabalimo kukub ota wafu bianiba gobueib mole ibo Gode makaabe. <sup>5</sup> Weng olo dim biamo Gode buk tem wengo mo baanota Gode e Hobe doyebeue e nib bobol temo bianea fumbianea I nemi kesoa i ne mo deitnenibta dabalim okoko bobolo mo funimibe ge fumbubo genomababe. Ibo funaine! Weng olo besa wengbabe. <sup>6</sup> Ina otane Gode daayemin kukubo titilsa kesoa nibo daabenebiobe. Gode buk tem wengo baanoa Naka make funanea Ne

naka ayamobo gabianea eletak ngane mole Gode e mo daabanemebabe. Nakae eletak nganino deiboneme eta Gode daabanamabebo genobio kesoa <sup>7</sup> ibo Gode wengo wente bianiba inaniba Kululame sbal weng oha bianiba Yeye ni keb wengo mo wentaobbabo ge ohamib mole e hebmamsab deibe unamabebe.

<sup>8</sup> Ibo Gode bobolo amitie fumbianiba nganhamib mole e ib wengo wentenea daabenamabebe. Hengmin gam ibo kukubo asu wafu bianiba hengabib kesoa hengmin kukubo deiboniba kukub ayam ota wafueine! <sup>9</sup> Ibo hengmino hengabib kesoa ib bobolo ilum omfubenoa memine! Sino ibo hengmino henga bianiba aben gibiam blib otane memalo ibo memine! Sino ibo seinbib otane memalo ib bobolo ilum omfubenoko! <sup>10</sup> Gode nibo yatemebe kesoa nib hengmino aalo waisenoa hengmino deibonoba Gode daabenea nibo ayam anomo!

*Ne nekwal ibo ib nekwali weng misiamo mo baabenimibe!*

<sup>11</sup> Ne nekwal ibo ib nekwali weng misiamo mo baabenimibe! Ibo ib nekwali weng misiam oye bianiba dim oye biam bianiba i kukubo klamib mole ibo makob Gode hekmel wengo klamomabib inaminobe. Nakai Gode hekmel wengo klamib mole i e weng olo mo wenteniba wafunomabibbabe. Ibo Gode kukubo klamin nakabe. Kukub olo misiamobe. <sup>12</sup> God eleta hekmel wengo omkaye bianea kukubo klabiam biebe. Elekiem eleta afen smiko omyenea eka eleta kaanamino omyenanamabebe. Ibo naka maki kukubo mo klayemibe! Olo ib okokbabe.

*Nibo Gode wengo wentenoba inanomo!*

<sup>13</sup> Naka mak ibo baaniba Memalo tia bomanomo tia mak monoba bib mak unanoba okok kebianoba moni sumo bokan tatnoba bifolo olokiem blimanota tlomo gabib mole ne wengo wentine! <sup>14</sup> Bomanomo ibo nimin kenomabibe? Eka fatnamin dim ota ibo kaanomabibe? Ibo mo tekein kebibbabe. Ibo makob ayungo ulabobe. Ayungo genomo otane hebmamsab blimanabo inaniba ibo dabalim ele blibo inaniba hebmamsab kaanomabiobe. <sup>15</sup> Ibo ilib bobol tem funino mo wafu nimibe! Otane ibo baaniba Gode nibo baabenea Ae inaine gene mole nibo afen bianoba okok olo klanomo geine! <sup>16</sup> Ina otane ibo mo inangge fumbibbabe. Ibo amitie ilib bobol tem funin ota wafu bianiba ilib tak ngambib kesoa ib kukub olo misiamobe. <sup>17</sup> Ibo funaniba Gode baabenea Kukub olo ayamobo ibo namine gabebo ge funanimib otane ibo mo naim blim keib mole kukub olosa hengminobe.

## 5

*Nakai inamin naminsai weng sangobe.*

<sup>1</sup> Nakai inamin namin homono bibe bio ibo kla wentine! Bobol ilum ibo dimo tam tlamabo kesoa ibo mebibte! <sup>2</sup> Ibo inamin namino olminabibo aluanoa eka youm ole slubi bolo downubenaibobe. <sup>3</sup> Eka ib monio olminabib osa ngawal genoa misiam anoa naka maki watemubeniba funaniba Ib kukubo misiamobo genomabiobe. Ibo teing kikimin nakaba kesoa ib monio olminabibo ngawal gembianoa makob aso ulaniba enye binabo inabobe. Ibsa inaniba mubiang amo dimo ibo aso ulaniba enin kino watemomabiobe. <sup>4</sup> Ibo ib okok nakai memin wengo wentine! I okok monio atosino ibma oleb uye bianiba atosin ota okayebiba i moni dafao mebibbo abiseli Sume Gode i memin wengo wentebe kesoa sinanomo e yang kenea ibo enin kino watemomabiobe. <sup>5</sup> Ibo dabalim ele blibo inamin namino homon bibe bio kesoa ibo seimbianiba ilib bobol tem funin ota wafu bliobe. Ibo makob eil amiei imeno homon wembianiba matak aiba nakai yenanabib inaibbiobe. Ibo yenanomabib amo tam tlamabobe. <sup>6</sup> Ibo naka moloti kukub misiamo mo nabibba otane ibo dim baaniba kot keyebibo i dao mo yang keim blim bliba ib data yenaiba kaaibbiobe.

*Nibo Sume tlamabe dimo waisanomo!*

<sup>7</sup> Nekwal ibo bobol tem abilo ibo dimo tam tlemo ibo amitie sbal maniba kukub ayam wafu bianiba makob naka make damibo dikilanea imen sano dolmanea watemebeba soko tlebianoa afoko wafuna biam bua utlanoa damanomo ulelano genea wate-memabe inaniba Sume tlamabeo waisanine! <sup>8</sup> Ib bobol temo fiab bianiba bobol tem funin ayam sbalma wafu bianiba Sume tlamabeo waisa henine! Am olo meb anobe.

<sup>9</sup> Ibo ib nekwali wengo mo omdibiye bianibta weng dobo weng oye biam nimibe! Ibo inanimibo Sume baabenea Ib kukubo misiamobo ge baabenamabebe. Nib kukub klamin nakae tlamabeo mebanobe. <sup>10</sup> Nekwal ibo sinanggwano Gode weng omkeimalin nakai Gode wengo omkaye binibbuei i kukubo funaniba kukub olo wafueine! I wasi nakai enin sumo okayebib otane i kukub ayam sbalma wafu binibbio kesoa <sup>11</sup> nibo baabenoba Naka eli ayamobo ge oyebuobe. Ibo naka make niniino Yobe weng sango wentebib yotabe. E enin sumo wateme otane e kukub ayam sbalma wafu bia Gode e kukubo atemnea goba bianea daabaseo ibo tekein kebiobe. Gode nibo dohalim bianea daayebibe.

<sup>12</sup> Ne nekwal ibo ne weng olo kla wentine! Abile niniin osa dabale niniin osa inamin namin afeto niniin osa mo taisonibta baanibta Bain ye Gode tekein kebebo ne wengo motonobo genimibe! Ibo baaniba Ae genimibo bain inamine! Eka ibo Yeye genimibo bain yota inamine! Ibo inamibo Gode mo baabeneta Ib kukubo misiamobo ge baabenemebabe.

*Naka moloti wengo Gode wentamabebe.*

<sup>13</sup> Ib isak temo nakae waneta e bobolo ilum omfubano mole e Gode baabaneko! Eka naka make ayam bianea seimbe mole e anso ngambianea Gode niniino dobtouleb neko! <sup>14</sup> Eka naka make gembe mole Gode komokwali nganabenea teniba Sume niniino taisaniba baaniba Sum keb niniin dim ota naka ele wel aaye alibanoba ayam aneko ge baaniba alibaniba Gode nganabaiba daabaneko! <sup>15</sup> I inaniba funaniba Gode bain bie kesoa naka ele klaubanamabebo ge funaib mole Gode ginin game klaubanea ayam anea eka hengmino hengane biamo omlaba nanamabebe. <sup>16</sup> Inamin kesoa ibo ib nekwali gembiba daabenom gib mole ib sinwal ib hengmino nabibo omkeima tlanibta eka ginin gam ile mit dlanibta Gode nganabaibta klaubeneta ayam aine! Naka moloti Gode nganhamibo i wengo titilsa kesoa Gode wentenea klaubenamabebe. <sup>17</sup> Ilaiyae naka makob nib ulab otane e sbal manea Gode nganha bianea baabanea Soko mo tlamone genea soko mo tlemin blim ameng unebu bifolo asumatna blimanoa alimo asuke asuke asuke nao blimananoa <sup>18</sup> eka e imin Gode nganabanea Soko tloko genea Gode soko omanea daakenoa dabalim ele tlanoa dabale gibbanea imeno imin damansobe.

<sup>19</sup> Ne nekwal ibo wentine! Gode e deib ayame alebenedue bainobo galin naka make deib ayame deibanea hengmino henganea eka bainobo galin naka make naka ele daabanea imin debeb metenea God esu dane mole e kukubo ayamobe. <sup>20</sup> Ibo weng olo funaine! Nakae hengmino henganea naka make imin debeb tenea God esu tlame naka ele hengmin nakae daabanea e afen smike mo kaanemebabe. Niminbabe, Gode e hengmino omlabanamabebe. Ne wengo bayotabe. Yems neta weng olo dola omfubenamabibe.



## 1 Fita Fitae futan olo mikiktemo dolanebuotabe. Tekein kemim wengobe.

Yesuse atdimo kaanea imin hananea ulanea abilim unebua bifolo 34 ese mak blimanota Fitae futan olo dolaneta Yesuse bainobo galin nakaia unangai bib mak bib mako bli bi omfubenebiobe. Fita ele Yesuse okok aleyemin nakabe. Naka maki teniba bainobo galin nakaia unangai weng misiam oye bianiba kukub misiamo omkayebib kesota Fitae funanea I enin kino watememib yole Yesuse atdimo kaanea imin hananea unebua imin tlamabebo ge fumbianiba bainobo gabibo deibonimiobo, ne futan olo dola omfubenia Yesus Klaiste dowan wengo i bobol temo omfabeia i bainobo galino sbalma wafueine geneta futan olo dola omfubenebiobe.

1:1-2 Mikiktem wengobe.

1:3-12 Gode nakaia unangai hengmino temo blibo dotlanamin wengobe.

1:13-2:10 Yesuse bainobo galin nakaia unangai kukubo namino wengobe.

2:11-4:19 Bainobo galin nakaia unangai dimo enino tam tloa sbal manamin wengobe.

5:1-11 Bainobo galin nakaia unangai ili tak nganin kukubo deiboniba kukub ayam wafunamin wengobe.

5:12-14 Mubiang wengobe.

1 Fita ne Gode okok namasanin naka neta futan olo dolania bainobo galin nakaia unangai wasi nakai teniba kukub misiamo omkayemiba ib bibamo deiboniba moniba Fontas betan osa Galesia betan osa Kabadosia betan osa Esia betan osa Bitinia betan osa ye unibbio ibo omfubenanabibe.

<sup>2</sup> Sinanggwano Ay Gode ibo dlakanea funanea I ne meme aine genebio kesoa e Hobe ibo daabenea ibo Yesus Klaiste wengo wente bianiba wafu bliiba eka e ilemo ibo fubabenoa kining aibbiobe. Gode ibo daaye bianea bobol ayam omkayemeko!

*Nibo Gode bibo monoba amit nomabbuo waisonomo!*

<sup>3</sup> Nibo nib Sume Yesus Klaiste e Aye Gode niniino dobtouleb nomo! E nibo dohalilanea daabenano gene kesoa e Yesus Klaiste dabane tenea atdimo kaanea imin hana tlanea nibo daabenea mema naka unang anobbuo bobolo funomo! Yesuse imin hananebuo nibo tekein kebuobe, sinanomo nibsa imin hananoba monoba Gode bib unanoba amit nomabbuo kesoa nibo am olo bobolo funanoba waisonomo!

<sup>4</sup> Am olo dimo inamin inamino Gode bainobo galin nakaia unanga nibo omyamabeo mo aluanota watwat danamabobabe. Inamin namin olo amit ninobe. O Gode bib ye bua sinanota e nibo omyamabebe.

<sup>5</sup> Ibo Gode bainobo galino sbalma blib kesoa e titilo ibo kla kima bia sinanomo dleb utnea abilim ut danea amit ayam nomabiobe. Memalo ibo abilimo mo watemim blim otane sinanoa Yesuse imin tlamemo dim ota watemomabiobe.

<sup>6</sup> Ibo inanomabib yo tekein kebib kesoa seinine! Memalo ibo dabalim ele blibo enino ibo dimo tam tlebianoa bobol ilumo omkayebo otane enino olo mo biota sinanamaboba kesoa ibo seinine!

<sup>7</sup> Enin olo fatnanota nibo dimo tam tlamabone? Niminbabe, Gode nib bainobo galino naatenea i ne bainobo gabibo bain bleka dim onebib eso genano geneta enin olo deibonea nibo dimo tam tlamabo kesoa nibo nib bainobo galino sbal manomo!

Inanamabe olo makob nakai tom golo as beselibe teme olatouniba kibanoa aay anoa difib maman baka dabal bakao afet anoa heleb mo dibianiba golo ayamob deibonabib inanea Gode nibo enin osa bobol ilum osa omyene

nea eka nib kukub misiamo omtlabenea nib bainobo galino ayam ota deibobenabebibe. Nib bainobo galino golo gaisonobiobe. Sinanomo golo blimanamabo otane nib bainobo galino amit namabobe. Nibo bainobo galino sbalma wafu biob mole Yesus Klaiste imin tlamemo ninino sumo nibo omyene baabenea Ib kukubo ayamobo genea seinyemabebibe.

<sup>8</sup> Sino ibo Yesuse mo atemin blim otane ibo kla goba binibbua eka memalosa ibo mo atemin blim otane ibo sma ye bainobo gaha bianiba kla seinhabibiobe. Ib seinino beselib kesoa ib seinino baa omkeimaniba Ni seinino inaminobo genamino blimobe.

<sup>9</sup> Niminbabe, ibo e bainobo gabib kesoa e dleb monea e bib ye danea amit nomabiobe.

<sup>10</sup> Gode weng omkeimalin nakai weng olo dolaniba baaniba Gode ibo kla gobe bianea daayebe kesoa dleb utnea abilim ut danea amit nomabiobo ge baa dolaniba eka i kukub olo amitie fumbianiba Ni inamin namin kukubo Gode sinanoa nanamabeo o mitmakamo tekein kenanomo geniba mitmakam olo hembinibbiobe.

<sup>11</sup> Sinanggwano Klaiste mo daake dabalim olo tlim blim bio dimo Klaiste Hobe e wengo i omkayebibe e weng olo i dolaniba baaniba Klaiste tenea enin kino watenea kaanea omito nib Sum anamabebo ge baa dolaniba i funaniba Olo fatnamin dim ota tam tlamabone? Klaiste wanete? gabianiba hembiba

<sup>12</sup> Gode i bobol tem funino omyene i funaniba Inamin namin kukub olo weng

sango nibo dolaobo mo watemomabobba otane sinanomo naka mak unang maki nib abuk walo unaib ita inamin namin olo watemibta daabe nanamabobo ge funaibbuo nakaia unangai abuk walo unomabib ile ibtabe. Gode e Hobe dabanea daakenea naka mak isu tlanea Gode dowan weng olo i omkayebebe. E inayebe kesoa i wengo ibo omyibbio makob sino Hobe nanea e dowan weng olo nakaia unangai omyebio inabeibbiobe. Gode abisel isa funaniba Nisa dowan weng olo mitmakamo tekein kenomo geib otane i mo tekein keim blimobe.

*Nakaia unanga ibo kining aine!*

<sup>13</sup> Nibo Yesuse kukubo tekein kebob kesoa ibo kla funaniba aalalino hananiba angkikiniba makob nakai wasi nakai tenaniba awao genom gaibo sin klaniba waise binabib inaine! Sinanomo Yesus Klaiste imin tlamabeo dimo Gode ibo daabenamabe kesoa ibo o bobolo fumbianiba waisanine! <sup>14</sup> Ibo Gode meme kesoa e wengo kla wentemine! Sino ibo Gode wengo klaom wentim blim keniba ilib bobol temo funin misiam ota wafu bianiba kukub misiam wafu binibbio otane memalo ibo Gode wengo wentebib kesoa ib kukub misiamo nabinibbuo imino mo namibe! <sup>15</sup> Otane Gode ibo dlakanebue e kining kesoa ibsa kining aniba kukub ayam ota wafueine! <sup>16</sup> Gode buk temo baanoa Ne bobol temo kining kesoa ibsa ib bobol temo kining aine genobiobe.

<sup>17</sup> Gode nakaia unangai kukubo nabibo kla tekein kebebe. Sinanomo i kukub nabibo molo yang kenamabe kesoa ibo beten keha bianiba Ayo ge ohabib ibo e tolo tosanine! Ibo dabalim olo mo blibta sinanomoba kesoa ibo sma afen blib dim ye Gode tolo tosiam bianiba kukub ayam ota wafunine! <sup>18</sup> Sinanggwan ibo faninwali kukubo mo daabenamaboba ota nabinibbua eka ibsa i kukub ota wafu bianiba nabib otane Gode ib kukub misiam olo molo walubenebiobe. E ib kukub misiamo moni molo mo walim blimobe. Monio sinanomo blimanamabobe. <sup>19</sup> Gode ib kukub misiamo Klaiste ilem ayam ota oloneta walubenebiobe. Yesuse ilemo inamin namin afeto gaisonobiobe. Yesuse atidimo kaanea Gode baanea E nakaia unangai hengmino walubene yo ayam nanebo ge baasebe. Yesuse hengmino blimobe. Eka e kukub misiam osa mo naim blim kesoa e makob eil sibsib meimei yaia yagula osa blimi yaniba funiba Gode heitdaha binibbue ulabobe. <sup>20</sup> Sinanggwan Gode dabal esa abil esa inamin namin osa mo klaim blim bianea e Yesuse sin dofakanea funanea Sinanomo e dabaia

daaknea nakaia unangai daabeneko ge funanebua memalo mubiang amo meb tebio kesoa e tlea nakaia unangai atemibbue ibo daayebae <sup>21</sup> ibo Gode bainobo gabioebe. E kaane otane Gode imin dofaanea hananea Gode niniin sumo Yesuse omalebio yo ibo Gode bainobo gebaniba funaniba Bainobe, Gode inanebio kesoa inamin namin olo e baanea Ne inanamabibo genemeo e bain inanamabebo ge fumbianiba e ibo dleb utnea abilim ut danea amit nomabibo waiso bliobe.

<sup>22</sup> Ibo Gode bain wengo wenteniba bainobo geniba ib bobol temo kining am blib kesoa ibo bainobo galin naka maki besa sitalo mo baabenibta ni ibo gobe biobobo genimibe! Ibo ib bobol temo bain omyenibta kla gobeine! <sup>23</sup> Ib aywal isa biemwal isa ibo dlabibbuo dimo i tekein keniba Sinanomo ni meme eli kaanomabiobo geibbiobe. Ina otane Gode afen smiko memao omymebo ibo mo kaanimibbabe. Amit nomabiobe. E wengo ayam kesoa mo blimanomobabe. Amit namabobe. Ibo e wengo bainobo gabibo e afen smike memae ibo dobyebio kesoa amit nomabiobe. <sup>24</sup> Gode buk temo baanoa

Nakaia unangai makob bukubano ulab eka i tekein keminiin osa niniin sum osa makob aketo ulab nabe. Bukubano gatanoa eka aketo fofolanoa dilbi daak onanabo inaniba nakaia unanga isa kaaniba i tekein keminiin osa niniin sum osa blimanamabobe. <sup>25</sup> O inanamabo otane Sume weng ole amit namabobo ge baanobuo

ni weng olo sino ibo omkaye binobbiobe.

## 2

<sup>1</sup> Sume wengo inanoa amit namabo kesoa ibo kukub misiamo deibueine! Eka dim omin weng osa mo omibe! Ib sital dimo baaniba Ni naka ayamobo ge obib mole kukub misiamo mo nabianibta naka maki afobeingo bobolo mo waye biam biota naka maki weng misiamo mo oyemibe! <sup>2</sup> Ibo meme gwabi awokwali moo dafao meye binabib inaniba ibsa Gode wengo bobolo wayebua kibianiba Gode nib hengmino temo biobo dotlanebio kukubo kla tekein keine! <sup>3</sup> Niminbabe, e ibo daabeneo ibo hengmino temo libo dotlanebio kesoa ibo olo tekein kebiobe, Sume ayamobe. <sup>4</sup> Ibo teniba Yesus esu ele tline! E makob sbal amun e ulabobe. E afen smiksabe. Nakaia unangai sbal amun ele mo goba blibba otane Gode e dofakanea baanea E nemiobo genebiobe. <sup>5</sup> Ibsa makob sbal amune ulabobe. Gode dleb utnea am ayamo genamabebe. Ibo makob sinanggwan Gode amo kimanin nakai kining

kesoa eil sibsibi yenaniba Gode amo heit-dahamin biino dim ut dlaniba funiba Gode dokaha binibbio inaniba ib dam osa ib bobol tem funin osa Gode omaline! Niminbabe, Yesus Klaiste atdimo kaanea nib hengmino walubenebio kesoa Gode obianea Nakaia unangai hengmino deiboniba i bobol tem funin osa i dam osa ne omnem blib kesoa i kukub olo ayamobo gabinabebe. <sup>6</sup> Gode buk temo baanoa

Ne naka make dofakania e makob amun ayame ulab kesoa ne teheb monia Isleli bib sumo niniino Yelusalem bib ye amo geiobo, nakaia unangai e bainobo genimibo i bobol ilummo mo omfubenamabobabo genobiobe.

<sup>7</sup> Yesuse bainobo gabib nakaia unanga ibo funaniba E dot ayamobo gabib otane nakaia unangai Yesuse mo bainobo gabibbai Gode buk temo baanoa

Am genalin nakai sbal as ele misi-amobo temdeibanomo geibbu otane komoke baanea Yeye ibo sbal as ele isak amun ayamobo bikieine gesea i inaniba sbal as ele isak amune bikieibbiobo genobiobe.

<sup>8</sup> Eka Gode buk temo weng mak osa imin baanoa

Gode Dofakamin Nakae makob sbal ase ulabobe. Nakaia unangai sbal as ele dime bang bang aniba yenanamabobo genobiobe.

Niminbabe, i Gode wengo mo wenteniba bainobo geim blim kesota o mitmakam ota i sbal as ele dime bang bang aniba dlo blela yenanamabobe. Sinanggwan Gode baanea I inanomabiobo genebiobe.

*Ibo Gode naka unangobe.*

<sup>9</sup> Gode nakaia unanga ibo dlakanebio kesoa ibo emibe. Ibo komok sume Gode amo kimanin naka kiningobe. Ibo Gode naka unangobe. Sino ibo mililambio tem tab blib otane Gode ibo nganabenea dleb metenea tan dim keim ele danebio kesoa ibo e niniino dobtouleb bianiba e inamin namin ayammo nabeo wengo omkeimamine! <sup>10</sup> Sino ibo Gode naka unangba otane memalo ibo Gode naka unangobe. Sino Gode ibo mo dohalinim blim otane e memalo ibo kla dohalimbebe.

*Nibo Gode okok naka nomo!*

<sup>11</sup> Ne nekwali ibo dabalim olo ib bibam tembabe. Abilim ota ib bibam tem kesoa ne weng olo baabenamabio ibo dabalim olo bobol tem misiam funino mo wafu bianibta ib skila kweila kina klanga sitala bobol temao kukub misiam olo bobolo mo wayemone! Ib bobol tem funin misiam otem ayam otem nanao awa gembo kesoa ibo ib bobol tem funin

misiam olo deiboniba bobol tem funin ayam ota wafueine! <sup>12</sup> Ibo nakaia unangai Yesuse mo bainobo gabibbai tenaniba kweko bianiba ibo kukub ayammo nabibo nakaia unangai mo bainobo gabibbai ib kukubo yateniba obianiba Bainobo galin nakaia unangai kukubo misiamobo ge oye binib biamo sinanoa Yesuse imin tlang gameo dimo nakaia unanga eli ib kukub ayammo nabib olo bobolo funaniba Gode niniino dobtouleb bianiba baaniba Bainobo galin nakaia unangai kukubo ayam nabinibbiobo genomabiobe.

<sup>13</sup> Ibo Sume bobolo kla fumbianiba eka dabalim olo kimanin nakai wengo kla wente biam bianiba wafu nine! Eka nib komoke gabmane weng osa kla wente bianiba wafunine! <sup>14</sup> Eka kiabwali weng osa wente bianiba wafunine! Gabmane emaye kiabwali dlanea teniba ibo kima bianiba nakaia unangai kukub misiammo namibi enino omyeniba dlo klabianiba eka kukub ayammo namibi gobe bianiba daaye biam binabib kesoa ibo i wengo kla wenteye bianibte! <sup>15</sup> Gode ibo baabenea Amitie kukub ayam olo wafunine! Ibo kukub ayammo wafunib mole nakaia unangai bobol tem funin blimi ib kukubo yatemaibo mo baabenibta I kukubo misiamobo genomabibbabo genebiobe.

<sup>16</sup> Nakaia unanga ibo ib bobol temo kla kima bliba kukub misiammo ib bobol temo mo kimaim blim bio kesoa ibo mo funanimibe! <sup>17</sup> Ibo nakaia unangai alukum weng ayammo oye bianiba eka ib nekwali bainobo gabibi kla gobe bianiba Gode tolo tosiyam biam bianiba eka ib bibamo waneta komok sum anea kima biameo weng ayam oha biam bianibte!

*Nibo Gode Dofakamin Nakae kukub nabe ota wafu nomo!*

<sup>18</sup> Okok naka ibo ib kimanin nakai wengo kla wenteye bianiba ili weng baanimib iwat nabianibte! Eka ibo weng misiammo omyemibe! Nakai wanibta ib kimanin nakai daaye bianiba weng fiab omkayemib mole ibo i wengo kla wenteyemine! Eka nakai wanibta ib kimanin nakai dosuanib mole i weng osa kla wenteye bianibte! <sup>19</sup> Ibo kukub misiammo mo nabibba otane i kukub misiammo ibo nayebib yo ibo sbal maine! Ibo mo yang kenibta i kukub misiammo mo omyaibe! Ibo Gode bobolo kla funine! Ibo kukub olo wafu biaibo Gode ib kukub olo gobe bianea seinyemabebe. <sup>20</sup> Ibo kukub misiammo nabiba i yemde dlaiba ibo mo yang keim blim kenimibo Gode ibo mo baabeneta ib kukub olo

ayamobo genamabebabe. Otane ibo kukub ayamo nabiba i yemde dlaiiba ibo mo yang keim blim kenimibo Gode baabenea ib kukub olo ayamobo genamabebe. <sup>21</sup> Gode ibo dlakanea baabenea Ibo kukubo olota namine genebiobe. Niminbabe, Gode Dofakamin Nakae ib bobolo funanea enin kino watenea kaanea daabenea e kukub olo ibo alebenedio kesoa ibo kukubo yota namine!

<sup>22</sup> Gode Dofakamin Nakae kukub misi-amo mo nabianeta eka dim omin weng osa mo obinabebabe. <sup>23</sup> I weng dobo weng ohabib otane e mo yang keim blimobe. Eka i e abiba enin kino watemebe otane e mo baabeneta Ne yang kenia ibo yanenam-abibo ge baabeim blimobe. E funanea Gode inamin namin kukubo molot klamin nakabo, sinanoa emaye ne kla kimanam-abebo ge fumbisebe. <sup>24</sup> Gode Dofakamin Nakae emaye nib hengmino gokileb utnea atdimo kaanebio kesoa nibo dabalim ele biomabbuo kukub misi-amo nibo imino mo dlananamabobabe. Nibo makob nakai kaaniba smiki unaniba umo deibo unaiibo o sbal manoa tanoa inamin namino den-abo inanoba nibsa kukub misi-amo dei-bonoba Gode kukubo namine gabe ota namomo! E kaanea nibo daabenedio kesoa nibo klayam bianoba kukub molot ota wafu biobobe. <sup>25</sup> Ibo makob eil sib-sibi naniba i kimanin nakai blim biaibo deibo tobtlin binabib inaniba ibsa sino deib ayame deibaib otane memalo ibo Klaiste bainobo gabib kesoa e ib afen smiko kima bianea makob eil sib-sibi i kimanin nakai kima bianiba deibo aleye binabib inanea esa ib deib ayam aleyebebe.

### 3

*Nakaia unangai kukubo olota namine!*

<sup>1</sup> Unang ibo ib imakwali wengo kla wenteye bianiba ili weng baanimib iwat namine! Ib imakwali Gode mo bainobo geim blim bliib mole ib kukub ayam namsibta yatemnibta isak Gode bainobo geine! Ibo weng homono mo oyemomabibba otane ibo kukub ayam ota nabibta yatenibta Gode bainobo geine! <sup>2</sup> Alelwal ibo kukub ayam wafu bianiba Gode bobolo funsibta ib imakwali yatenibta isak bainobo genimiobe. <sup>3</sup> Unang ibo eit ayam ayam ib gabaman dimo mo kibianiba eka bukubsan osa youm ayam ayam osa homono mo kimibe! <sup>4</sup> Ib bobol tem funino fiab bianibte! Ibo alo tlaubenamin kukubo mo wafunimibe! Ibo fiab bianiba weng fiab obiam nimibo ib kukub olo ayamobe. Gode baanea Ib kukubo ayam olo namomabibo makob ib bobol temo eit ayam kiwemomabiobo

genebiobe. Ib kukub olo namomabibo makob eit ayam ulab kesoa o mo misiam anomobabe. <sup>5</sup> Sinanggwano unangi Gode wengo kla wenteha bianiba bainobo gabinibbuei inaniba kukub ayam olo wafu bianiba imakwali wengo kla wenteye bianiba ili weng baanimib iwat nabinibbiobe. <sup>6</sup> Sela osa inanoa o imake Eblahame wengo kla wenteha bianoa ele weng baaneme iwat nabianoa E ne kimanin nakabo ge oha binobio kesoa ibsa inaniba kukub ayam olo nabianiba inamin namino tolo mo tosiam biam nimibe! Ibo inaiib mole ibo makob Selao meme anomabiobe. <sup>7</sup> Eka imakwal ibsa ibo tekein kebiobe, ibo unangi titilo gaiseibbio kesoa ib alelwali kla kima bianiba daaye bianiba weng ayam oye biam bianiba funaniba Sinanomo Gode ni kamwalo afen smiko omya amit nomabbiobo ge funine! Ibo kukub ayam olo mo naim blim bianiba beten kemibo Gode ib beten olo mo wentamabebabe.

*Bainobo galin naka unang nibo nib bobol temo makob anomo!*

<sup>8</sup> Ne weng mako baabenamabibe, ibo alukum ib bobol temo makob bianiba ib sinwalo dohalilasese nine! Ibo untak nganin kukubo mo wafu nimibe! Ib nek-wali bainobo gabibi kla gobeniba daaye bianibte! <sup>9</sup> Eka naka maki ibo kukub misi-amo omkayemib mole ibo mo yang kenibta kukub misi-amo mo omyaibe! Eka i weng dobo weng oyemib osa ibo mo yang kenibta baabenimibe! Ibo Gode baabaniba Naka eli daabenale ge baabaine! Nimin-babe, Gode ibo dlakanea baabenea Ne ibo daabenia inamin namin ayam omyam-abibo genebiobe. <sup>10</sup> Gode buk tem wengo baanoa

Nakaia unangai funaniba Ni afen smik ayame dobonoba seinomo ge funaib mole i weng misiam osa dim omin weng osa mo omibe! <sup>11</sup> I kukub misi-amo alukum deiboniba kukub ayam olota namine! Eka i bobol temo naka mak unang maki omyeniba baabeniba Ibo bobol tem fiab bianibte ge baabeine! <sup>12</sup> Niminbabe, Sume nakai kukub moloto nabibi yateme bianea eka i beten wengo amitie wente bianea daaye biam biehe. Otane nakai kukub misi-amo nabibi Sume dosuam bianea e mo daayebababo genebiobe.

<sup>13</sup> Ibo sbal maniba kukub ayam namibo naka maki ibo kukub misi-amo mo omyomabibbabe. <sup>14</sup> Ina otane ibo kukub ayam nabiba naka maki ib kukub olo dafao enino omyib mole ibo seinine! Ibo

i tolo mo tosiyam bianibta ib bobol temo usano mo keyemone! <sup>15</sup> Ibo Klaiste ib bobol tem daako dababbaniba kla gobaniba e ni Sumobo ge ohamine! Naka maki ibo baabeniba Ibo fatnanibta Ni amitie ayam nomabbiobo gabibe? ge baabeib mole ibsak yang keniba Yesuse dowan wengo baabeniba Niko inanomabbio kesota ni baanobta Ni amit ayam nomabbiobo ge obuobo ge baabeine! Ina otane ibo i wengo yang ke baabenom gaibo sbal wengo mo baabenimibe! <sup>16</sup> Weng fiab baabeniba kukub ayam alebeine! Ibo kukub ayam wafuniba ib bobol tem osa fiab omfaniba Yesuse kukubo wafusibta naka maki ibo weng dobo weng oye-bibi ib kukub ayam namibo yatemniba aal waisenoko! <sup>17</sup> Ibo kukub misiam nabiba naka maki teniba enino omyom gabiba Gode i watanamino deibenea omyib mole olo ilib sanobe. Ninimbabe, ibmaye kukub misiamo nabibta nabenomabib kesoa ayamobe. Otane ibo kukub ayam nabiba nakai maki teniba enino omyom gabiba Gode i watanamino deibenea omyib mole olo Gode ele bobol tem funin kesoa o dot ayamobe. <sup>18</sup> Nibo Klaiste kukubo nanebuo bobolo funanomo! E kukub misiamo mo naim blim otane e atdimo kaanea nib kukub misiamo nabobo omlabenebiobe. E naka molot otane e naka misiam nib alango dokonea dleb metene a God esu ele danebiobe. E nib hengmino bobolo funanea atdimo deib makob kaanebiobe. E imino mo kaanemebabe. E naka moton anea anaiba kaanea imin hananebuo e smike mo kaanemebabe. E amit afen biebe. <sup>19</sup> Smik ele monea smik maki kaanamin bibo blibi Gode wengo omyebiobe. <sup>20</sup> Smik eli sinanggwano Noae binebuo dimo Gode wengo ombiabaibue itabe. I Gode wengo ombiabaib otane Gode hebmamsabo mo watwat dabeim blimobe. E fiab deibe bianea Noae atemebea e siibe genea nakai 8 ita taniba siib ele tem tam unibta omioto Gode aaye dabanea tenea nakaia unangai yalose otane nakaia unangai 8 i klayam siibe tem tam bisioibe. <sup>21</sup> Aay ele mitmakamo makob nakai bainobo geiba fuelabenabib aayo ulabobe. Aa fuayemin olo ninik fubaminbabe. O mitmakamo inaminobe. Nakaia unangai Gode baabaniba Ni kukub misiamo nabob otane Yesuse atdimo kaanea ni hengmino temo biobo dotlanebio kesoa kobo ni kukub misiam olo nabobo omlabeneale ge baalb mole Gode i hengmino omlabeneale i bobolo ayam funomabiobe. Yesus Klaiste atdimo kaanea imin hananea nibo daabeneale nibo kining anobbiobe. <sup>22</sup> E utnea abilim ut unanea Gode kweile kweitale kikib ye tounbebe. E abisel isa eka abiseli komok-

wal isa eka inamin namino abilim ut buo o komokwal isa i kimanin nakabe.

#### 4

##### *Ibo Gode wengo kla wafueine!*

<sup>1</sup> Klaiste enin kino watemebio kesoa ibo e kukubo nanebio yota ibsa funaniba inaine! Ibo inaib mole sbal manomabiobe. Nakai i dimo enino tam tloa watemib mole i hengmino deibonomabiobe. <sup>2</sup> Inamin kesoa i dabalim ele bialibo dabalimo kukub misiamo mo nanimibbabe. I Gode bobol tem fumbe ota wafu bianiba kukubo e namine gabe ota nabiobe. <sup>3</sup> Sino ibo mo bainobo geim blim blib dimo bainobo galinba naka maki kukub misiamo nabibo ibsa kukub misiam olo nabinibbiobe. Kukub olo inaminobe. Unang taman osa eka inamin namn kukub misiamo watenoba nib bobolo wabenamin kukub osa eka aay misiam unalin kukub osa eka fal suma ye ganoma bianiba nakaia unangai te miniba gabiba isak tem daako naka maki aay misiamo oleb te wembianiba weng namn namn kukub osa eka Gode wengo omdibiha bianoba god dim omini ninino dotouleb nin kukub osa wafu binibbu otane memalo ibo bainobo geniba kukub misiam olo deibueibbiobe. <sup>4</sup> Memalo ibo bainobo gabibbai kukub misiamo nabibo ibo mo tena namn blim kesoa i dlo unaniba dosuananiba weng misiam oyebiobe. <sup>5</sup> I inayebib otane sinanomo i kukub misiam olo nabinib biamo imaye Gode baabaiba e i kukubo molo yang kenea yananamabebe. E kukubo klamin naka kesoa e nakai sma afen blib isa kaaibbue isa i kukubo nabinib biamo motomanee klanamabebe. <sup>6</sup> E inanamabe kesota nakai Yesuse dowan weng ayam nakaia unangai memalo kulilabib isa omyibbiobe. Sino i dabalim ele bianiba i kukubo nabibo Gode klanea i damo kaaibbi otane nakai Klaiste dowan wengo naka eli omyiba i Yesuse bainobo geibbio kesoa i smiki mo kaaim blimobe. I smiki afen bianiba makob Gode afen bie ina bliobe.

##### *Ibo bainobo galin maki gobe bianiba daayemine!*

<sup>7</sup> Mubiang amo meb tebio kesoa ibo bobol temo klayam fumbianiba kukub ayam nabiam bianibte! Ibo inanimibo Gode kla beten kehamomabiobe. <sup>8</sup> Ibo ib sinwalo kla gobesese bianibte! Gobenin kukub olo kukub afeto alukum gaisoniobiobe. Ibo inaniba i gobenimibo i kukub misiamo ibo omkaye binibbuo bobolo imino mo fumbianibta atliyemabobabe. <sup>9</sup> Ibo ib nekwali bainobo gabibi teniba ib am ele tlaibo ibo mo kibiasibe nimibe! Ibo kla gobeniba seinye bianiba imeno doiyne!

<sup>10</sup> Gode titilo ibo afet afet omkayemonebio kesoa ibo okok olo kla kima bianiba ibsak naka mak unang maki daabeine!  
<sup>11</sup> Gode inanebio kesoa naka make wengo omkeimanang ge mole ele bobol tem funino mo omkeimaneme! E Gode wengo olota omkeimaneko! Eka naka naka maki daabenang ge mole e Gode titilo omkahabe ota omoneta daabeneko! Ibo inabiba naka mak unang maki ib okoko nabibo wateniba funaniba I Yesus Klaiste bainobo gabib kesoa Gode titilo i omyen bi-eta nabiobo geniba Gode niniino dobtouleb nine! E titilo amit namabo kesoa nibo e niniino amitie dobtouleb nomo! Bainobe.

*Bainobo galin nakai enin kino wate-  
 mino weng sangobe.*

<sup>12</sup> Ne nekwal ibo ne ibo kla gobe blibe. Enino ib dimo tam tlebo yo ibo mo dlou unemibe! Gode ib bainobo galino naate-mang geneta enin sum olo deibonea tenoa ib dimo tam tlamabo kesoa ibo mo dlou unanibta funanibta Enin olo mema tam tubenobo, sino enamin enino mo tam tubeim blimobo ge funanimibe! <sup>13</sup> Sino enin olo Klaiste dim osa tam tubanobiobe. E enin kino watemebio kesoa Klaiste bain-obo gabib naka unang ibsa inaniba i enino ibo omyomabiobe. I ibo inayemibo seinine! Ibo inaib mole Klaiste imin tlea e titilo keimanomo dimo ibo dot seinin sumo seinomabiobe. <sup>14</sup> Ibo Yesus Klaiste bainobo gabib kesoa naka mak unang maki ibo weng misiam oyemibo ibo seinine! Niminbabe, Gode Hobe titil sumo bibabue nibo bekebe biebe. <sup>15</sup> Ibo naka maki mo yenaiba kaanimibe! Eka ibo naka maki inamin namino ayoko mo doisenimibe! Eka kukub misiamo afet osa mo namibe! Eka ibo awao mo kikamibe! Ibo kukub misiam olo nabib biamo kukub klanin nakai teniba ib kukub misiamo yang keniba ibo enino omyomabib kesoa ibo mo inamibe! <sup>16</sup> Otane ibo Klaiste bainobo galin naka kesoa naka maki teniba ibo kukub misiamo omyiba enin kino wate-mib mole ibo aalo mo genalaibe! Naka mak unang maki ibo oye bianiba I Klaiste bainobo galin naka unangobo ge oyebib kesoa ibo Gode nini-ino dobtouleb nine! <sup>17</sup> Niminbabe, Gode nakaia unangai kukubo klanamabeo amo meb anobe. Am olo tlamo nakaia unangai e bainobo gabibi kukubo sin klaneta eka nakaia unangai e wengo omdibihabib ile i kukubo mit klanea enin sumo omyamabebe. <sup>18</sup> Gode buk temo baanoa

Nakaia unangai kukub ayam wafu blibi Gode i hengmino temo biaibo dot-lanamabe otane okok olo dot bu-molokobe. E inabe olo bumolok kesoa nakaia unangai Gode kukubo

mo wafueim blim deiboniba kukub misiam ota wafu blibi ile e enin sumo i omyamabebo genobiobe.

<sup>19</sup> E inabenamabe kesoa bainobo galin nakaia unanga ibo Gode enin sumo omane tenoa ib dimo tam tlam olo sbal maine! Gode ibo klanebio kesoa ibo e bainobo gabianiba kukub ayamo namine! Sino e baanea Ibo sinanomo amit ayam nomabiobo genebuo e bain ele weng baanebio iwat inabenamabe kesoa ibo e wengo kla fumbianiba e wengo bainobo gabianiba kukub ayamo namine!

## 5

*Bainobo galini kimanin naka ibo bain-  
 obo galini kla kimaine!*

<sup>1</sup> Bainobo galin nakaia unangai kimanin naka ibo ne weng mako baabenamabibe. Nesa bainobo galin nakaia unangai kima bli kesoa ne makob ib ulabobe. Nene kin dim ye Klaiste enin kino wate-mea atemibiobe. Sinanoa e titilo ayal inamin einobuo keim anomo dimo ete nete nanoba amit nomabbiobe. <sup>2</sup> Ne weng mako ibo baabenamabio inaminobe. Gode bainobo galin naka mak unang maki makob eil sib-sibi ulab kesoa ibo i kla kimaine! Ibo mo funanibta Ni denomabbiota naka maki mengani-ba Okok olo naine gabioibo ge fumbian-ibta okok kemibe! Gode baanea Ibo okok olo namine genebio kesoa ibo sbalma okok bianiba seinine! Ibo mo funanibta Ni okok olo okok kebianoba monio boka bianobte ge fumbianibta okok kemibe! Ibo Gode wengo kla goboniba wafu bianiba okok kemine! <sup>3</sup> Bainobo galini kimanin naka ibo bainobo galin nakaia unangai kima biaibo sbal wengo mo baabenibta Kukub ayam olota namine ge oyemibe! Ibo ibmaye kukub ayam wafu blibta i ib kukub ayam namibo yatenibta isak wafueine! <sup>4</sup> Ibo inaib mole bainobo galin nakaia unanga nib Kimanin Naka Sume tenoa e inamin namin ayam ayamo ibo omyamabeo o mo blimanomobabe. Amit namabobe.

*Nib bobol tem funino amitie ayam  
 funomo!*

<sup>5</sup> Temb albsa naka gangi wengo kla wenteye bianiba ili weng baanimib iwat namine! Eka bainobo galin nakaia unanga ibo alukum untak nganin kukubo deiboniba naka mak unang maki daabesese nine! Niminbabe, Gode buk temo baanoa Gode untak nganin nakai wengo omdibiyebe otane nakaia unangai untak nganin blim ile kla daabenamabebo genobiobe.

<sup>6</sup> Inamin kesoa ib bobol tem funino omabbuniba Gode oha bianiba Kobo ni

daabeneba kla kimanale ge ohamine! Sinanoa Gode am olo omfakanebuo tlamo e niniin sum ibo omyamabebe. <sup>7</sup> Emaye ibo kla kima bie kesoa ib bobol tem abilo omoniba e dimaniba baabaniba Ni daabenale geine! Niminbabe, e bain ibo daayebebe. <sup>8</sup> Ibo kla funaniba aalalino dei-boniba hananiba angkikinine! Ib makaae Gululame til laione ulabobe. Til laione eili bum haabianea ina downonite genea hen haabie inanea Gululame bainobo galin nakaia unangai bainobo galino watwat dabenang genea hen haabiebe. <sup>9</sup> Ibo ib bainobo galino sbal maniba Gululame tolobo geniba dobbiaine! Niminbabe, ibo tekein kebib yotabe. Bainobo galin nakaia unangai bib mak bib mako enin kino watemebib yota ibsa inanibta enin kino watemebiobe.

<sup>10</sup> Gode ibo dlakanea baanea Sinanoa ne inamin namino ayamo ibo omyia ibte Klaist ete naniba amit nomabiobo genebiobe. Memalo ibo enin kino watememomabib otane o amito mo nomobabe. Gode daayemin kukubo mit kesoa e sinanomo kukub ayamo imin omyenea daabenea ibo dosbal manea titil sbalo omyamabebe. <sup>11</sup> E titil sum olo amit namabobe. Bainobe.

*Mubiang wengobe.*

<sup>12</sup> Ne futan olo ne ninge Sailas eta weng omkaha bita dolanebe. E amitie Klaiste wengo wente bianea ele weng baaneme iwat nabinabebe. Ne weng gwab ele baabei olo Gode bain wengobe. E ibo kla daayebe kesoa ibo weng olo wente bianiba ib bainobo galino sbal maine! <sup>13</sup> Bib olo nakaia unangai homoni kukub misiamo nabibo makob Babilon bib seli nabib inabiobe. Bainobo galin nakaia unangai bib ele blib isa ibo baabeniba Klayam blibte ge baabeibobe. Gode isa dlakanebiobe. Eka ne miine Mak esa klayam blibte ge baabenebe. <sup>14</sup> Ibo ib nekwali bainobo gabibi kla gobeniba ni nekwalo Klayam blibo ge baaniba heitd-abesese bianibte! Klaiste nakaia unanga ibo bobol ayam bianibte! Ne wengo bayotabe. Fita neta ib futan olo dola omfubenamabebe.

## 2 Fita Fitae futan olo mubiango dolanebuotabe. Tekein kemin wengobe.

Fitae futan olo dolanea Yesuse bainobo galin nakaia unangai omfubenebiobe. Naka maki teniba i dim wengo oyebib kesota Fitae i dosbal manamin wengo baabeneta Ibo ni sino Yesuse titil sumo watemobbuo bobolo funaine ge baaneta futan olo dola omfubeneteta dosbal manebiobe.

1:1-2 Mikiktem wengobe.

1:3-21 Yesuse bainobo galin nakaia unangai kukubo namino wengobe.

2:1-22 Dim wengo aleyemin nakai wengobe.

3:1-18 Mubiango wengobe.

<sup>1</sup> Saimon Fita ne Yesus Klaiste okok naka eka e okok namasanin naka na neta futan olo dolania bainobo galin nakaia unanga ibo omfubenamabibe. Nib God esa eka nibo hengmino temo biobo dotlanebio nakae Yesus Klaiste esa i ibo daabeniba bainobo galino omyiba ibo Yesuse bainobo gabib kesoa ib bainobo galino dot ayam makob ni bainobo galino ulabobe. I inamin namin kukubo nabibo dot molotobe. <sup>2</sup> Ibo God esa nib Sume Yesus Klaiste esa kla tekein kebib kesoa i dumo ibo daaye bianiba bobol ayam omkayemine!

*Gode nibo baabenea Ibo ne naka unanogobenebiobe.*

<sup>3</sup> Gode titilo sum eka e kukub osa ayam nabe. E nibo dlakanea nibo e bainobo genoba e tekein kenobbio. E funanea I makob Yesus Klaiste kukub ayam wafune inaniba isa kukub ayam wafueine gene kesoa e titil sumo nibo omyebuo titil olo nibo daayebua nibo Klaiste kukub ayam kla wafu biobobe. <sup>4</sup> E bain wengo dot ayam nibo baabenea Dabalim nakai ili bobol tem funin misiam ota wafu bliba i kukub misiam olo watwat dayebu otane ne ibo inamin namin ayam omyenia daabei kesoa ibo dabalim olo kukub misiamo deiboniba kining aniba makob ne ulab aine genebue e wengo bainobe. E inanea nibo daabenebio kesoa nibo dabalim olo kukub misiamo deibonoba kining anoba makob Gode ulab anomabbio.

<sup>5</sup> Ibo Gode inanea daabenebu olo bobolo fumbianiba Yesuse bainobo galino sbalma wafueine! Ibo ina bianiba kukubo afet olosa wafunine! Kukub olo inaminobe. Kukub ayam wafunin kukub osa eka Gode inamin namin kukubo tekein kenamin kukub osa <sup>6</sup> eka kukub misiamo nanom gabo ib bobol temo baanoa Yeye gesoa

deibonamin kukub osa eka ibo inamin namino kukub misiamo tlemo ib bainobo galino sbal manamin kukub osa eka Gode kukub ayam namin kukub osa eka <sup>7</sup> ib nekwali dohalila daayemin kukub osa eka gobenin kukub osa otabe. <sup>8</sup> Ibo inaniba kukub olo kla wafueib mole nib Sume Yesus Klaiste kukubo kla tekein kenomabiobe. Ibo Yesus Klaiste kukubo kla tekein kenimibo e wengo kla wente bianiba ele weng baaneme iwat namomabiobe. <sup>9</sup> Ina otane nakaia unangai kukub olo mo naim blim blihi ile makob nakai kino tum gebenobua i inamin namino kla mo watemebibbai ulabobe. Eka i sino hengmino hengabiba Gode i hengmin olo omtlabenebu bobolo dokobenebiobe.

<sup>10</sup> Ne nekwal ibo Gode dlakanea ibo bainobo geibbiobe. Gode inanebua ibo Gode bobolo amitie fumbib kesoa ibo tekein keniba Gode ni moton dlakanebio kesoa nibo emiobo geine! Ibo inamib mole e kukubo mo deibonomabibbabe. <sup>11</sup> Ibo kukub olo nabinib biamo sinanomo Gode ibo baabenea Tline genea ibo ulaniba e kimanin bib unomabiobe. Nib Sume Yesus Klaiste bib olo kimanin nakabe. E ibo hengmino temo blibo dotlanebio naka nabe. <sup>12</sup> Ibo e baka bianiba amit nomabiobe. Ne weng olo ibo oyebio ibo tekein keniba weng moton olo sbalma wafu bliobe. Ne weng olo amitie oyemabio o mitnakamo inaminobe. Ibo o bobolo funine genita oyemabibe. <sup>13-14</sup> Nib Sume Yesus Klaiste baatnenea Kobo amito mo biebta sinanomobabo, hebmamsab kaanamabeobo ge baatnene kesoa memalo ne afen bli dim ye ibo weng olo baabenia ib bobol tem funino omsbal manamabibe. Ne funania Kukub olo ayamobo ge funaiobe. <sup>15</sup> Ne weng olo dolai kesoa sinanoa ne kaanimio ibo weng olo amitie kibianiba funine!

*Ni Yesuse titil sbalo watemobbio.*

<sup>16</sup> Ni nib Sume Yesus Klaiste titil osa eka e imin tlamabeo weng osa baabenobbuo weng olo dim wengbabe, bain wengobe. Ni besa wengo nini bobol tem funino mo baabenobbio. E titil sumo nini kino watemobbio kesota weng olo baabenobbio. <sup>17-18</sup> Sino nite Yesus ete nanoba utnoba angolim ut bioba Gode abilim ut danea baanea Ele ne minnobo! Ne e kla goba biana seinhabibo ge baanea wentobbio. Aye Gode Yesuse ninino dobtouleub biane titil sumo ayal inamin einobuo omale kesoa e ninin sum anea ni atemobbuo weng olosa ibo baabenobbio.

<sup>19</sup> Ni inamin namin olo watemob kesoa ni Gode weng omkeimalin nakai wengo dolaibbuo bainobo genobbio. Weng olo



bainobe. Ibsa inaniba i wengo dolaibbu olo kibianiba kla funine! Niminbabe, Gode weng omkeimalin nakai weng ele dolaibbu olo makob millambio temo ayale einoa nibo inamin namino watemnabobo ulab kesoa weng olo nibo daabenoa Gode kukubo tekein kenomabiobe. Ibo Yesuse bainobo geniba ib bobol temo e dababbanimibo e makob boman tebusa awitnino mawenoa bomat genoa ayal einin kenabo inanamabebe. Memalo Gode weng omkeimalin nakai wengo dolaibbuota nibo daabebio bita Yesuse imin tlamabebe.<sup>20-21</sup> Ibo kla wentine! Nibo tekein kebob yotabe. Gode weng omkeimalin nakai wengo dolaibbuo ili bobol tem funino mo dolaim blimobe. Gode emaye baabenea Ibo ne weng olo dolaine geseta e Hobe weng olo omyeta dolaibbiobe.

## 2

*Gode weng omkeimalin nakabo geniba dim omin nakai weng sangobe.*

<sup>1</sup> Sinanggwanu naka maki Gode nakaia unangai baka bianiba baaniba Nisa Gode weng omkeimalin nakabo ge baaibbio inaniba sinanomo naka maki ib isak temo bliibi baaniba Nisa Gode wengo aleyemin nakabo ge baanomabiobe. Naka eli nakaia unanga ibo baabeniba Yesuse nib hengmino mo walubeim blimobo ge oye bianiba Sume i hengmino walubenebue e wengo omdibihomabiobe. I ina bianiba ibo dim oye biam bianiba baaniba Weng olosa Gode wengobo ge oyemomabiobe. Nakaia unangai wanita i wengo wentib mole weng olo i bainobo galino watwat dabenamabobe. I inanomabib kesoa Gode i hengmino hebmasab yang kenea watwat dabenamabebe. <sup>2</sup> Naka eli bainobo galin naka mak unang maki kukub misiamo aleye bianiba baabeniba Kukub olo misiambabo, ayamobo ge oyebiba naka homon unang homoni i wengo wentubeniba isa kukub misiam olo namomabiobe. I inamibo bainobo galinba nakaia unangai bainobo galin nakaia unangai kukub olo nabibo yateniba Gode kukubo weng dobo weng owemomabiobe. <sup>3</sup> Dim omin naka eli bobol temo funaniba Bainobo galin nakai monio oyine ge funanomabib kesoa i ibo dim oye bianiba ib monio oise unemomabiobe. Sinanggwanu i kukub klamin nakae Gode baanea Sinanoa naka eli teniba nesuo tlaibo i kukub misiamo yang kenia dlaia aseinin bib unomabiobo genebio kesoa sinanomo i bain enin kino watemomabiobe.

<sup>4</sup> Sinanggwanu abiseli mak isa inaniba hengaibo Gode i mo deibeim blimobe. E dlanea moniba aseinin bib unibbiobe.

Memalo i dabale millanea holo unebue tem daak bianiba Gode i kukubo klanamabeo amo waiso bliobe. <sup>5</sup> Sinanggwanu nakaia unangai kukub misiamo nabibo Gode mo deibeim blimobe. E aaye dabane tenea yalebiobe. Otane Noa ele kukub moloto wafu bianea Gode wengo omkeimabe kesoa esa eka naka mak unang maki 7 isa i Gode kla kima bia klayam bisioibe. <sup>6</sup> Sodom bib sel isa Gomola bib sel isa i kukub misiamo nabibo Gode yatenea akile gamanea tenea bib asu olo kibaiibbiobe. E inanebio kesoa nakaia unangai kukub misiamo nabib mole funaniba Sinanomo Gode nisa inabenamabebo ge funaniba tosianine! <sup>7</sup> Eka Lot ele naka molot kesoa Gode e mo watwat dabaim blimobe. Lote bib olo seli taman kukubo wafu blibo yatenea e bobolo ilum omfubabiotabe. <sup>8</sup> Lote naka molot kesoa bib olo baka bianea i kukub misiamo nabibo watemeye bianea eka am homono weng misiamo obiba wente biam bianea bobolo ilum omfuba binobiobe. <sup>9</sup> Gode bib olo seli watwat dabene otane e Lote mo watwat dabaim blimobe. E dobtlanebio kesoa naka mak unang maki Sume wengo kla wente bianiba kukubo e namine gabe ota nabinimibi e daabenea kukub misiamo i dimo tam tlamo dotlanamabebe. Eka nakaia unangai kukub misiamo nabib naka unang ile e tekein kebe kesoa e mo daabenebabe. E deibenebua sinanoa mubiang amo bomanoa e nakaia unangai kukubo klanamabeo dim ota e i kukub misiamo yang kenea watwat dabenamabebe. <sup>10</sup> Dim omin naka eli Gode wengo omdibiha binib biamo molo yang kenea enin kino watemomabiobe. Naka eli bobol temo funaniba Gode wengo besabo geniba weng omdibiha bianiba ili bobol tem funin ota wafu bianiba unang tamano hengabiobe.

I untak nganin naka kesoa i abiseli weng dobo weng oyemino mo tosiambibbabe. <sup>11</sup> Abiseli dim omin naka eli gaiseibbiobe. I titilo sunobe. Otane abiseli Sume kin dimo naka eli weng dobo wengo mo oye bianiba eka mo baanibta I naka misiamobo ge oye biam blibbabe. <sup>12</sup> Ina otane dim omin naka eli inamin namino mo tekein kebibbao weng dobo weng owe binabiobe. I bobol tem funino makob eil halebi bobol tem funino ulabobe. Gode naka eli makob nakai eil halebi bumoniha yenaiba kaanabib inanea yenanea kaanomabiobe.

<sup>13</sup> Eka i kukub misiamo naka mak unang maki omkaye binib biamo Gode i kukub misiamo yang kenea enin kino watemomabiobe. Naka eli funaniba Kukub misiamo tab dim namino ayamobo geniba seinwe bianiba tab dim ye nabiba naka mak unang maki i kukub

misiamo watemeye binabiobe. Naka eli inaniba kukub misiam olo nabibo seinwe bianiba ib imeno baka wembiam bliba naka mak unang maki mo bainobo gabibbai i kukubo yateniba baaniba Bainobo galin nakaia unangai kukubo misiamobo genomabiobe. <sup>14</sup> I unangi yatemaibo amitie bobol wayebua ni obi dleb denobtabo ge fumbiam bianiba i kukub misiamo mo deibueim blim amitie omeb tam te kabiobe. I naka mak unang maki bainobo galino mo sbal maim blimi men weng men weng baabeniba dlabmaiba hengmino hengabiobe. I amitie naka mak unang maki inamin namino bobolo waye binabobe. I ina binabib kesoa Gode i kukub misiamo yang kenea watwat dabenamabebe. <sup>15</sup> I kukub ayamo deiboniba kukub misiam ota wafu blibo i makob Beoe miine Belame ulabobe. Sinanggwano Belame monio kla gobo biane fumbianea Ne kukub misiamo nanimio naka maki ne kukub misiamo waloniba monio onine ge fumbianea ina binebiobe. <sup>16</sup> E inabea til dongkiei nakai wengo mo obinabibba otane e kukub misiamo iname kesoa ele til dongkiei nakai weng delabbanea baabanea Keb kukubo misiamobo ge baabanea wentenea e kukub misiamo imino namino tosiana deibosebe.

<sup>17</sup> Dim omin naka eli makob dabal misiamo imeno mo damaim blim kenabo inaniba i naka maki mo daabeim blimobe. I makob abilim uto ayungo eing tomong genoa abil aamuke einea soko tenoa dabale daabanang genabua glole tenea fubonea iibo wa oleb onon tlanea soko tenamino denabo inaniba isa nakaia unangai mo daabeim blimobe. Gode baanea Sinanomo naka eli moniba mililanobio bib ye nomabiobo genebiobe. <sup>18</sup> I ili untak ngambianiba wengo mitmakam blimo obiam bianiba taman kukub osa kukub misiamo afet osa o bobolo fumbianiba nakaia unangai kukub misiamo deibueibuei men weng men weng oye bianiba kukub olo misiambabo, nibo namomo ge oye biam bliobe. <sup>19</sup> Dim omin naka eli obianiba Ibo ni wengo wenteniba inamib mole hekmel wengo ibo mo kimanomobabo, inamin namino ilib bobol tem funin ye namomabiobo ge oyebib otane i ili bobol tem funino mo nabibbabe. Ili hengmin kukubo nabib ota i bobol tem funino kima biobe. Niminbabe, nakai kukubo wafu blibo kukub olota i kima biobe. <sup>20</sup> Nakai nib Sume Yesus Klaiste nibo hengmino temo biobo dotlanebio nakae wengo wenteniba kukub misiamo deibo biaib otane i imin kukub misiamo naib mole i dot misiam aniba i sino hengmino wafu binibbio gaisonomabiobe. <sup>21</sup> Nakai Yesuse

kukub moloto mo tekein keim blim binib biamoi enin kino watemomabib otane ole mensabe. Otane nakai Yesuse hekmel wengo moloto tekein kebianiba omdibi binib biamo ile i enin kino dot sum watemomabiobe. <sup>22</sup> Sinanggwano faninwali moton wengo baaniba Tili usano fua unib biamo imin teniba downomabiobo, eka eil isak nakai aayo fuelabenimibo imin moniba eil buldakamo dakdeko fofou binabiobo geibbio inaminobe. Nakaia unangai Yesuse wengo wenteniba hengmino deibueibbu otane i imin hengmino hengaib mole i makob tila eila eli ulabobe.

### 3

#### *Sume imin tlamabebe.*

<sup>1</sup> Ne nekwal ibo ne sino ibo futano dola omfubeibuo memalo imin dola omfubenamabibe. Futano asu olo temo ne baabeniba Ibo weng ayamo wente bianiba ib bobol temo bobol tem ayam funine ge baabeibiobe. <sup>2</sup> Ibo sino Gode weng omkeimalin nakai wengo baaibbio imin fumbianiba eka nib Sume Yesus Klaiste nibo hengmino temo biobo dotlanebio nakae wengo e okok dlasanin nakai ibo oyebib weng osa fumbiam nine!

<sup>3</sup> Ibo olo tekein keine! Mubiang amo bomanang gamo dimo weng dobo weng omin naka eli teniba ili bobol tem funin misiamo wafu bianiba <sup>4</sup> baabeniba Yesuse baanea Ne imin tlamabibo genebuo otane e mo tlim blim bie yole e fatnabene? Sinanggwano nib faninwali kaaibbuo dim osa eka memale biob dim olosa inamin namin olo mo afetaim blim makob sino Gode klane binabo olota ye biobo ge omomabiobe. <sup>5</sup> I Gode inamin namin olo nanebuo kweimiki deibo bliobe. I mo funanibta Sinanggwano abil esa dabal esa blim biota Gode baanea Tam tele geneta abile tam tleta eka dabal ele aaye sole tem daak danea kelanea obbia utlebio bita <sup>6</sup> sinanota Gode imin baaneta aaye ei tenea nakaia unangai yenanea kaaibbiobo ge fumbiam blihbabe. <sup>7</sup> Gode baanea Abil esa dabal esa o as olatounia watwat dabonamabibo genebio amo waiso biebe. E baanea Ne nakaia unangai kukubo klanamabi amo tlamo nakaia unangai kukub misiamo nabinib biamuei ne alukum watwat dabena biania eka abil esa dabal esa o ase olatounamabibo genebuo otane i inamin namin olo bobolo mo fumbibbabe.

<sup>8</sup> Sume bobol tem fumbeo Am olokiemo dimo makob bifol homono 1,000 obe. Eka bifol homono 1,000 o dimo ole makob am olokiemo ge fumbe kesoa e am osa bifol osa kimino kukubo nib kimino ulabbabe. Ne nekwal ibo Gode kukub olo bobolo mo dokobenomone! <sup>9</sup> Nakaia unangai maki

funaniba Sume moton wengo baanea Ne Yesuse imin dabaia tlamabebo genebuo e inamin namino fiab nabianea e Yesuse mo dabanea tlim blim biebo gabib otane e bain inanamabebe. E ibo dohalinin naka kesoa e funanea Nakaia unangai moniba aseinin bib unaniba kaaniba alang namanamino, misiamobo debliia i hengmino deiboniba i bobol temo deskinaniba omoniba ne omnensiba dlano geneta debiebe.

*Dabal esa abil esa blimanamabobe.*

<sup>10</sup> Sume Yesuse tlamabeo makob nakaia unangai inamin namino ayok henin nakai teniba doisenomabibo i mo tekein keim blim keniba dlanabib inaniba Sume imin tlamabeo amo i mo tekein kebibbabe. Am olo dimo unine sume tlebianea eka abile blimaneia eka afok osa alim esa awitnin osa alukum aso kibanoa blimanamabobe. Eka dabal elesa eka inamin namino alukum dabal ele dimo bu osa aso kibanamabobe.

<sup>11</sup> Inamin namin olo inanoa blimanamabobo kesoa ibo kukub ayamo kla wafu bianiba namine! Ibo kukub misiamo mo wafunimibe! Amitie Gode kukub ota wafunine! <sup>12</sup> Ibo Yesuse imin tlamabeo amo bobolo fumbianiba E hebmsabsab tleko ge fumbianiba waisa nine! Am olo dimo abile kibanea blimaneia eka afok osa alim esa awitnin osa kibanoa makob aay anamabobe. <sup>13</sup> Gode sino baanea Ne imin tlamio abile mekli klania eka dabale mekli klania nakaia unangai kukub molot ota e dimo nanomabiobo, i kukub misiamo yo dimo mo namomabibbabo genebio kesoa nibo am olo waisonomo!

*Nibo klanoba Sume waisonomo!*

<sup>14</sup> Ne nekwal ibo am olo waiso blib kesoa ibo sbal maniba kining bianiba inamin namin kukub misiamo takaboniba besa bianiba ib bobol temo Gode tenaniba makob aibbua sinanomo Sume imin tlameo ibo seinyemeko! <sup>15</sup> Wentine! Nib Sume nakaia unangai hebmsabsabo mo watwat dabenamabebabe. E funanea Nakaia unangai i kukub misiamo nabibo deiboniba i bobol temo deskiniba omoniba ne omnib mole ne i hengmino temo blibo dotlanamabibo genea waise biebe. Nib neke Fole inangge baanea dolanebiobe. Gode e bobol tem funin ayamo omale kesoa e ib futano inangge baanea dola omfubenebiobe. <sup>16</sup> Ne weng olo dolaio inaminobe. Yesuse imin tlamabe kesoa ibo kukub misiamo deiboniba Gode kukub ota wafueine ge baanita weng olo dolaio. Fol esa weng olo e futan temo alukum inangge baanea dola fanebiobe. Wengo atosino e futan olo temo nibo o mitmakamo tekein kenamino bumolok bianobta tekein kebuobe. Nakaia unangai bainobo galino

sbal maim blim blib isa eka maki bobol tem funin blim isa Fole Gode weng olo dolanebu osa eka Gode wengo mak osa i afet deskinaniba dim baaniba Weng olo mitmakamo inaminobo ge obinabib kesoa i watwat danomabiobe.

<sup>17</sup> Ne nekwal ibo tekein kebiobe. Dim omin naka eli ne baabei tloabib kesoa ibo klaniba Gode wengo kla funine! Ibo Gode hekmel wengo omdibihabib naka eli wengo mo wentaibe! Ibo i wengo wenteniba Gode wengo deibueib mole kukub olo misiamobe. Ibo Yesu Klaiste wengo mo deibueim blim ib bobol temo kla funib mole ibo ayam nomabiobe. <sup>18</sup> Ibo Sume Yesu Klaiste nibo hengmino temo biobo dotlanebio nakae tekein kebiokesoa ib tekein kemino sum anoko! E ibo daaye binebio kesoa ibo e kukubo bobol ota amitie funine! Ibo amitie memalosa sinanomosa E niniino sumobo ge ohamine! Bainobe. Ne wengo bayotabe. Fita neta ib futan olo dola omfubenamabibe.

## 1 Yon Yone futan olo mikiktemo dolanebuotabe. Tekein kemim wengobe.

Yesuse atdimo kaanea imin hananea ulanea abilim unebua bifolo 60 ese mak blimanota Yone futan olo dolaneta Yesuse bainobo galin nakaia unangai omfubenebiobe. Yon ele Yesuse okok aleyemin naka etabe. E nakaia unangai baabenea Ibo Gode kla goba blib inaniba naka mak unang maki kla gobe nine ge baabenea eka weng mak ole naka maki obianiba Dabalim naka ile hengmin gam kesoa Yesuse mo dabalim naka moton aim blimobo ge obiam blib kesota Yone bainobo galin nakaia unanga eli baabeneta I weng olo dim obiobo ge baabe nanebiobe.

1:1-4 Mikiktemo wengobe.

1:5-2:29 Ayal esa mililanamin osa o wengobe.

3:1-24 Gode meme isa eka Gululame meme isa i wengobe.

4:1-6 Gode Hob esa hob misiam isa i wengobe.

4:7-21 Gode gobenin kukubo mitmakamobe.

5:1-21 Kukub misiamo gaisonamin wengobe.

*Yone futan olo dolanea Yesuse bainobo galin nakaia unangai bib mak bib mak ye blibi omfubesebe.*

<sup>1</sup> Sinanggwano dabale mo klaim blimo dimo Klaiste binebiobe. E niniin afeto Afen Smik Omkayemin Wengobe. Ni e wengo kla wentenoba eka nini kino atanobbio. Ae, ni e kla ateme bianoba eka ni kweilono melebananobbio kesoa ni e weng sango ibo dola omfubenomabbio. <sup>2</sup> Naka ele afen smiko mitmakamobe. E Aye Gode tena binabibbua tlea ni atemobbio kesoa ni e afen smiko amit nino weng sango ibo baabenomabbio. <sup>3</sup> Ni inamin namino wateme binobbu osa eka wente binobbu osa o weng sango memalo ibo baabenomabbio. Nisa eka Aye God esa eka e miine Yesus Klaist esa ni bobol temo makob ambiob kesoa ibsa inaniba ib bobol temo makob aine getabe. <sup>4</sup> Ni weng olo ibo dola omfubenomabbio kesoa nib seinino sum anoko!

*Nibo ayale dim nomo!*

<sup>5</sup> Gode ayalobe. Esuo mililanamino blimobe. Weng olo Gode miine ni baabenebua eka nisak ibo baabenomabbio. <sup>6</sup> Nibo kukub misiam wafunob mole nibo makob mililambio tem tab biob inaminobe. Eka nibo kukub ayam

wafunob mole nibo makob ayale dim biob inaminobe. Nibo baanoba Nite God ete nanoba ni bobol temo makob ambiobobo genomob otane nibo sma mililambio tem tab nob mole nib wengo dimobe. Nibo kukubo moloto mo wafubiobbabe. <sup>7</sup> Ina otane Gode ayal dim bie inanoba nibsa ayal dim nob mole nibtem bainobo galin nakaia unangai mak item nanoba nib bobol temo makob anoba e miine Yesuse ilemo nib hengmino fubabenoa omlabenoa nibo kining anomabbio.

<sup>8</sup> Nibo baanoba Ni hengmino blimobo genob mole ninib bobol tem funin ota dim obuobe. Weng motono nib bobol temo blimobe. <sup>9</sup> Eka nibo nib hengmino omkeimanob mole Gode weng moton omin kesoa e kukub moloto nanea nib hengmin osa eka nib kukub misiam osa alukum omlabenea kining klayam anomabbio. <sup>10</sup> Gode baanea Nakaia unangai alukum hengmin gamobo genebio kesoa nibo baanoba Ni hengmino blimobo genob mole weng olo mitmakamo makob nibo baanoba Gode dim omin nakabo ge baabanomabbio kesoa e wengo nib bobol temo mo bibe biobabe.

## 2

*Klaiste nib daayemin nakabe.*

<sup>1</sup> Ne meme ibo ne futan olo dola omfubenamabio Ibo hengmino mo hengamibe genita dolanamabibe. Otane naka make hengane mole naka molote Yesus Klaist eta naka ele daabanea e Aye Gode baabanea Ne naka ele hengmino walubaibio kesoa kobo e hengmino omlabananale ge baabanamabebe. <sup>2</sup> Nakaia unanga nibo alukum hengmino hengabob kesoa Gode nibo dosuambe otane Yesus Klaiste funanea Ne i hengmino omlabenanano genea tenea atdimo kaanea e ileme singanea nib hengmino omlabene kesoa Gode yatenea e mo dosuambababe. E inanebuo ninibkiem ninib hengmin ota omlabenanano geneta tlim blimobe. E alukum dabalim sel nakaia unanga nib hengmino omlabenanano geneta daak tlebiobe.

<sup>3</sup> Nibo Gode heklm wengo wafu biob mole nibo tekein kenoba ni bain Gode meletanobo genomabbio. <sup>4</sup> Naka make baanea Ne Yesuse tekein kebibo geneme otane e Gode heklm wengo mo wafunim blim kene mole e dim omin nakabe. E Gode moton wengo e bobol temo blimobe. <sup>5-6</sup> Ina otane nakae Gode wengo wafu bie naka ele e Gode kla goba biebe. Eka nakae waneta baanea Nete God ete nanoba bobol temo makob biobobo gene mole e kukub ayamo wafunamabeo makob Yesus Klaiste kukub ayamo wafu binebio inaneta wafuneko! Nibo inanob mole nibsa e meletanobe.

*Nakae bainobo galin nakaia unangai gobe bie mole e ayale dim wat biebe.*

<sup>7</sup> Ne nekwal ibo ne hekmel weng olo ibo dola omfubenamabio mema weng-babe. Ibo sino Klaiste mema bainobo geib dimo hekmel weng olo wenteniba tekein keibbiobe. <sup>8</sup> Ina otane mema wengo o isak temo bu olo inaminobe. Ib sinwalo gobesese nine getabe. Klaiste ib sinwalo gobesese nin kukubo wafu blibo nakaia unangai yateme bianiba tekein kebiobe. Niminbabe, mililanamino bliman bliman bebianoa ayal motone tubu tubu bebebe.

<sup>9</sup> Naka make baanea Ne ayal dim blibo geneme otane e bainobo galin naka mak unang maki mo gobeim blim kene mole e sma mililambio tem tab biebe. <sup>10</sup> Naka make bainobo galin naka mak unang maki gobe bie mole e ayale dim bia inamin namino dababmanoa hengmino henganamino blimobe. <sup>11</sup> Otane naka make bainobo galin naka mak unang maki mo gobeim blim kene mole e sma mililambio tem tab haabianea deibo klao mo wate-mebebe. Niminbabe, e mililambio tem tab bia e kino mililubabua mo temebebe. <sup>12</sup> Gode Yesuse nanebuo bobolo funanea o yan ota e ib hengmino omflabenebio kesoa e ib hengmino bobolo imino mo funeme-babe. E inanebio kesoa ne meme ibo ne futan olo ibo dola omfubenamabibe. <sup>13</sup> Aywal ibo Klaiste dabale mo klaim blimo dimo binebue tekein kebib kesoa ne futan olo ibo dola omfubenamabibe. Naka tembal ibo Naka Misiame titilo gaisaibbio kesoa ne futan olo dola omfubenamabibe.

<sup>14</sup> Ne meme ibo Aye kla tekein kebib kesoa ne futan olo ibo dola omfubenamabibe. Aywal ibo Klaiste dabale mo klaim blimo dimo binebue tekein kebib kesoa ne futan olo dola omfubenamabibe. Naka tembal ibo sbal mabliba Gode wengo ib bobol temo bibebua ibo Naka Misiame titilo gaisaibbio kesoa ne futan olo ibo dola omfubenamabibe.

*Ibo dabalim olo inamin namino mo gobo nimibe!*

<sup>15</sup> Ibo dabalim olo inamin namin kukub misiam osa eka inamin namino afet osa o bobolo mo wayemone! Ibo dabalim olo inamin namino bobolo wayebo mole ib bobol temo Aye Gode gobanin kukubo blimobe. <sup>16</sup> Dabalim olo kukubo enaminobe. Inamin namin kukub misiamo bobol wayemin osa eka inamin namino kino watenoba bobol wayemin kukub osa eka nakai Ni inamin namino homonobo geniba untak nganin kukub osa kukub olo Aye mo omkayebe-babe. Dabalim omiobe. <sup>17</sup> Dabal esa eka inamin namino dabal ele dimo bua nakaia unangai bobolo wayebo osa blimanamabo

otane Gode naka make baabanea Kobo inamin namino nanale genea nabinabe naka eta amit namabebe.

*Gode Dofakamin Naka Dim Omine weng sangobe.*

<sup>18</sup> Ne meme ibo dabale blimanamabeo amo meb tobe. Ibo wentebiba i baaniba Naka make Ne Gode Nempfakamin Nakabo ge obianea dim obinabe nakae tlamabebo geibbuo ibo tekein kebiobe. Sino dim omin nakai homoni teniba baaniba Ni Gode Dlakamin Nakabo geibbio kesoa nibo tekein kebuobe dabale blimanamabeo amo meb tobe. <sup>19</sup> Naka eli Gode Dofakamin Nakae afin am binibbio mole i e bainobo galin naka unang nibo baka biomabib otane i nibo deibe unibbio kesoa nibo tekein kebuobe i Gode Dofakamin Nakae meletanbabe.

<sup>20</sup> Ina otane Klaiste Gode Hobe ibo dobyebio kesoa ibo alukum Gode bain wengo tekein kebiobe. <sup>21</sup> Ne futan olo ibo dola omfubenamabio ne mo baanita Ibo Klaiste moton wengo mo tekein kebibbabo genimibabe. Ibo Klaiste moton wengo tekein kebiobe. Moton wengo mo deskinanota dim weng anomoba kesoa ne futan olo ibo dola omfubenamabibe.

<sup>22</sup> Dim omin naka ele wanete? Nakae baanea Yesuse Gode Dofakamin Nakababo geneme naka eta dim omin nakabe. E Gode miine mo bainobo gabeba kesoa e Aye God esa mo bainobo gabebabe. Naka ele Ne Gode Nempfakamin Nakabo ge obianea dim obinabetabe. <sup>23</sup> Nakae waneta baanea Gode miine bainbabo gabe naka ele e Aye Gode mo tekein kebebabe. Eka nakae waneta Gode miine bainobo gabe naka ele e Aye God esa tekein kebebe.

*Gode Hob eta bain wengo nibo aleyebebe.*

<sup>24</sup> Ibo sino Gode wengo wentibbio weng olo mo baleiso nimibe! Kla wafueine! Ibo sino Gode wengo wentibbio amitie wafunib mole ibte Aye God etem e miin etem naniba ib bobol temo amitie makob nomabiobe. <sup>25</sup> Sino Klaiste emaye bain wengo baanea Ne afen smike amit nine dobyamabibo genebiobe.

<sup>26</sup> Naka eli ibo dim baabeniba ib bainobo galino watwat dabenom genabib kesoa ne i weng sango ibo futan olo dola omfubenamabibe. <sup>27</sup> Ina otane ibole Klaiste Gode Hobe dobyebua e ibo baka bianea aleyebe kesoa ibo naka maki alebeine genamino blimobe. Niminbabe, Gode Hobe ibo inamin namino alukum aleyebe dimbabe, bainobe. Ibo e wengo wente bianiba Klaist ete naniba bobol temo makob bianibte!

<sup>28</sup> Ae, ne meme ibo ibte Klaist ete naniba bobol temo makob bianibte! Ibo inabib

mole Klaiste abilim da tlea nibo atemaobo aalo mo genalomabbibabe. Nibo funanoba Ni kukubo klayamobo genomabbibe. <sup>29</sup> Ibo tekein kebiobe, Yesuse naka molotobe. Inamin kesoa nakaia unangai kukubo moloto wafu binabib ile Gode melelobe.

### 3

#### *Nibo Gode melelobe.*

<sup>1</sup> Dowe! Aye Gode nibo kla gobe bie kesoa e baanea Ibo ne melelobe gabebe. E nibo inangge oyebe kesoa nibo bain e melelobe. Dabalim nakaia unangai Gode mo tekein kebibba kesoa i Gode meyel nibsa mo tekein kebibbabe. <sup>2</sup> Ne nekwali ibo memalo nibo Gode meyel otane sinanomo nibo fatnamin nomabbione? Malobe. Ina otane sinanoa Klaiste imin tlameo nibo e kla atenoba deskinanoba makob e ulab anomabbibe. <sup>3</sup> Nakaia unangai Yesuse tlamabeo waisa blib naka unangi baaniba Yesuse bain ye tlea ni atemomabbibo geniba i kukub misiamo deiboniba makob Yesuse kukub ayam wafu binabe inaniba isa kukub ayam ota wafu bliobe.

<sup>4</sup> Nakae waneta hengmino hengabe mole e Gode hekmel wengo omdibibebe. Niminbabe, hengmin ole Gode hekmel wengo omdibiminobe. <sup>5</sup> Ibo tekein kebiobe, Klaiste hengmin blime nakaia unangai hengmino omtlabenang geneta daak tlebiobe. <sup>6</sup> Nakaia unangai wanita ite Klaist ete naniba i bobol temo makob biaibi i hengmino mo henga binabibba otane nakae waneta hengmino hengabe naka ele e Klaiste mo tekein kebianea e kukubo mo wafu nabiebabe.

<sup>7</sup> Ne meme ibo naka make tenea ibsu ye tlanea e bobol temo funanea Ne i dim baabeia i kukub ayam deibueine genea e dim omin wengo baabene mole ibo e wengo mo wentaibe! Nakae waneta kukubo moloto wafu bie mole e naka molotobe. E makob Klaiste ulabobe. <sup>8</sup> Sinanggwanosa memalosa Gululame amit ye hengabe kesoa nakae waneta hengmino amit hengabe mole e Gululame meletanobe. Gululame ina binabe kesota Gode miine daak tenea dabalim ele tlanea Naka Misiam ele okoko alukum watwat dabanang geneta daak tlebiobe. <sup>9</sup> Nakae waneta Gode miin am bie naka ele hengmino mo hengabebabe. Niminbabe, e Aye Gode mit deib unaneta e hengmino deibo biebe. <sup>10</sup> Nibo nakaia unangai kukubo yatemnoba Eli Gode meletanobe eka elile Gululame meletanobe genom gob mole i kukub nabib ota yatemomo! Nakaia unangai wanita kukub ayam mo wafunamino deibo nabianiba bainobo galin naka mak

unang maki mo gobenim blim kenaib mole i Gode meletanbabe.

#### *Nibo Yesuse bainobo galin nakaia unangai gobesese nomo!*

<sup>11</sup> Ibo Yesuse nena bainobo geniba weng olo wentem tlibbuo inaminobe. Nibo bainobo galin nakaia unangai gobesese nomo! <sup>12</sup> Kene nanebio yo nibo mo inamobe! E Naka Misiam meletan aneta ele ninge ananea kaanebiobe. E nimin keneta e ninge ananeta kaanebue? Niminbabe, e kukubo nabeo misiam anoa eka e ninge kukub ota molot ano kesoa e watemnea atliaubasota ananeta kaanebiobe.

<sup>13</sup> Bainobo galinba nakaia unangai bainobo galin ibo mo gobenim blim keib mole ibo mo bobol hekhke funimibe! <sup>14</sup> Nibo nib nekwali bainobo galin nakaia unangai kla gobe biob mole nibo tekein kenoba ni aseinin bib unemin deibe deibanoba afen smik bib deib eta bebuobe genom! Eka nakae waneta bainobo galin nakaia unangai maki mo gobeim blim kene mole e kaanamin smike sma e bobol temo biba bie kesoa aseinin bib deib eta bebebe. <sup>15</sup> Nakae waneta bainobo galin nakaia unangai maki mo gobenim blim kene mole e bobol temo makob naka yemin nakae bobol temsabe. Ibo tekein kebiobe, naka yemin nakae bobol temo afen smike amit nine blimobe. <sup>16</sup> Gobenin kukubo inaminobe, Klaiste nib alango dokonea atidimo kaanebio kesoa nibo tekein kebuobe, kukub olo gobenin kukubobe. Nibsa inanoba bainobo galin naka mak unang maki gobe bianoba enino i dimo tlang gamo nibo tosanino deibonoba i alango dokonoba kaanom! <sup>17</sup> Naka make inamin namino homon otane e bainobo galin naka make inamin namino blime mo dohalila daabaim blim keneme naka ele e Gode mo goba biebabbe. <sup>18</sup> Ne meme ibo nibo nib nekwali kla gobe bianoba daayemino mo deibonoba besa sital ota obianobta ni gobe biobobot galaobe! Nibo kla gobe bianoba daayemomo!

<sup>19</sup> Nibo tekein kebuobe, nibo inanomobo Gode moton wengo wente bianoba ete nabianoba bobol tem ayam nomabbibe. <sup>20</sup> Otane nibo inamin namino nanobbuo bobolo funanoba bobol ilumo omfubeno mole nibo enangge fumbianoba ni bobol temo tekein kemino men otane Gode tekein kemino sumobo ge fumbianoba bobol ayam nomo! Niminbabe, e inamin namino alukum tekein kebebe. <sup>21</sup> Ne nekwali ibo nibo inamin namino nanobbuo bobolo funanomobo nib bobolo ilumo mo omfubeim blim keno mole nibo tekein kebuobe, Gode nib bobol temo kla watemeyebe kesoa nibo funanoba Ni kukubo klayamobo ge

funanomabbio. <sup>22</sup> Nibo Gode wengo wente bianoba e bobol tem funino wafu biob kesoa nibo baabanoba Kobo ni inamin namino mo daabenale genomobo e daaye binabebe. <sup>23</sup> Gode nibo oye bianea Ibo ne miine Yesus Klaiste bainobo gabianiba eka Klaiste baanea Ibo bainobo galin nakaia unangai gobesese nine genebuo ina bianiba gobesese nine ge oyebebe. <sup>24</sup> Nakai wanita Gode wengo wentebib ile item God etem naniba i bobol temo makob bliobe. Gode e Hobe nibo dobyebio kesoa nibo tekein kebuobe, God etem nibtem nanoba bobol temo makob biobobe.

#### 4

*Gode Hob esa hob misiam isa i weng sangobe.*

<sup>1</sup> Ne nekwal ibo hobe weng omkeimalin nakai homoni moniba bib mak bib mako haabianiba nakaia unangai baabeniba Hobe ni bekebe biebo gabianiba inamin namin wengo oyemibo ibo weng olo hebamsabo mo bainobo genimibe! Ibo i wengo naateniba tekein keniba weng olo bain Gode Hobe weng bleka dim omin hobe weng eso geniba moton manibe! <sup>2</sup> Gode Hob esa eka dim omin hob isa naatememin kukubo enaminobe. Nakae waneta baanea Yesuse Gode Dofakamin Nakabe, e daak tenea dabalim olo naka nebiobo gene mole eta bain Gode Hobe e bobol temo biba bieta baanamabebe. Weng olo wenteniba tekein keine! <sup>3</sup> Ina otane nakae baanea Yesuse Gode Dofakamin Nakababo, e mo daak tenea dabalim olo naka nebiobabo gene mole e hob ele Gode Hobbabe. Hob ele nakae Ne Gode Nemfakamin Nakabo ge obianea dim obinabe hobbabe. Sino i baaniba Naka make Ne Gode Nemfakamin Nakabo ge obianea dim obinabe nakae tlamabebo ge baaba weng wentibbu memalo dimo hob ele tenea dabalim ele biebe.

<sup>4</sup> Ne meme ibo Gode meletan kesoa ibo dim weng omkeimalin nakai wengo omabbubeibbio. Niminbabe, Hobe ib bobol temo bibe bie e tata kenea hob afete dabalim nakaia unangai bekebe bie gaisanebiobe. <sup>5</sup> Dim weng omkeimalin naka eli dabalim olo inamin namino weng sang ota obiba dabalim nakaia unangai i wengo wentebiobe. Niminbabe, i dabalim olo kukub ota wafu bliobe. <sup>6</sup> Otane nibole Gode meletanobe. Nakaia unangai Gode tekein kebibi nib wengo wentebib otane nakaia unangai Gode tekein kebiba ile nib wengo mo wentebibbabe. I inabib kesoa nibo tekein kebianoba Ele Hob Moton etabe, eka elele dim omin hob etabe gabianoba tekein kebuobe.

*God eta gobenin kukubo mitmakamobe.*

<sup>7</sup> Ne nekwal ibo wentine! Gobenin kukubo mit ole God etabe. Inamin kesoa Nibo bainobo galin nakaia unangai gobesese nomo getabe. Nakae waneta naka mak unang maki gobe bie mole e Gode miinobe. E Gode tekein kebebe. <sup>8</sup> Nakae waneta naka mak unang maki mo gobeim blim bie mole e God esa mo tekein kebebabe. Niminbabe, God ele gobenin kukubo mitmakamobe. <sup>9</sup> Gode funanea Ne nakaia unangai gobenin kukubo alebenano genea e miine yanmakobe dabanea daakenea dabalim ele daak tlebio kesoa nibo e niniin dimo afen smike amit nine dobomabbio.

<sup>10</sup> Nibo Gode goba biob ota gobenin kukubo mitmakama bleka? Yeye gobenin kukubo mitmakamo enaminobe. Gode emaye nibo kla gobe bie kesoa e miine dabanea daak tenea dabalim ele tlebiobe. Nibo alukum hengmino hengabob kesoa Gode nibo dosuambe otane e miine Yesuse funanea Ne i hengmino omlabenano genea tenea atdimo kaanea e ileme singanea nib hengmino omlabeneana Gode Yesuse naneo wateme kesoa e mo dosuambababe.

<sup>11</sup> Ne nekwal ibo Gode inanebua nibo kla gobe bie kesoa nibsa inanoba naka mak unang maki gobesese nomo getabe. <sup>12</sup> Nakaia unangai Gode atemnamin blimobe. Nibo naka mak unang maki gobesese biob mole God etem nibtem nanoba bobol temo makob bioba e gobenino nib bobol temo sibbebenamabobe.

<sup>13</sup> Gode Hobe nibo dobyebio kesoa nibo tekein kebuobe, God etem nibtem nanoba bobol tem makob biobobe. <sup>14</sup> Eka Aye Gode e miine dabane tlebu ole e Nakaia unangai hengmino temo blibo alukum dotlanano genetana dabane daak teneta dabalim ele tlebiobe. Nibo Gode inanea Yesuse dabanea daak tlea atemobbio kesoa naka mak unang maki o wengo omkayebuobe. <sup>15</sup> Nakae waneta baanea Yesuse Gode miinobo geneme nakae etem God etem naniba i bobol temo makob bliobe. <sup>16</sup> I ina blib kesoa nibo tekein kenoba obianoba Bain Gode nibo kla gobe biebo gabuobe.

God eta gobenin kukubo mitmakamobe. Nakae waneta gobenin kukubo wafu bie mole etem God etem naniba i bobol temo makob bliobe. <sup>17</sup> Nibo Gode gobenin kukubo nib bobol temo sibbenobio mole sinanoa Gode nakaia unangai kukubo klanang game dimo nibo Gode kin dimo biaobo funanoba Ni kukubo klayamobo ge funomabbio. Niminbabe, nibo dabalim olo bianoba nib kukubo nabobo makob Klaiste kukubo ulab wafu biobobe. <sup>18</sup> Nib bobol temo Gode gobenin kukubo sibbebebio mole tosanin kukubo kululabenoa unoa tosanin kukubo blimanamabobe. Tosianin kukubo mitmakamo

enaminobe. Naka make henganea e hengmino molo enin kino watemamabeo bobolo funananea tosiambe mole Gode gobenin kukubo e bobol temo blimobe.

<sup>19</sup> Sino Gode nibo gobe binebio kesoa nibsak ina bianoba naka mak unang maki gobe biobobe. <sup>20</sup> Naka make baanea Ne Gode goba blibo geneme otane e bainobo galin nakaia unangai mo gobeim blim kene mole e dim obebe. Niminbabe, e bainobo galin nakaia unangai yatemebei mo gob-eim blim kesoa e Gode mo atemin blim esa mo goba biebae. <sup>21</sup> Klaiste hekmel weng olo nibo baabenea Nakae waneta Gode goba bie mole e bainobo galin nakaia unangai mak isa gobeneko genebiobe.

## 5

*Dabalim olo kukub misiamo gaison-amin wengobe.*

<sup>1</sup> Nake waneta baanea Yesuse bain Gode Dofakamin Nakabo gabe mole e Gode miinobe. Eka waneta aalebe goba bie mole e melel nibsa gobe biebe. <sup>2</sup> Inamin kesoa nibo Gode goba bianoba e hekmel wengo wafu biob mole nibo tekein kebuobe, nibo Gode melel isa gobe biobobe. <sup>3-4</sup> Nibo Gode goba biob mole nibo e hekmel wengo wafunomabbiobe. Gode melel nibo alukum titilsa kesoa nib bainobo galino sbal manoba dabalim olo inamin namin kukub misiamo deibonoba gaisonobbiobe. Inanobbio kesoa nibo Gode hekmel wengo wafu biobo bumolokbabe. <sup>5</sup> Nakae baanea Yesuse bain Gode miinobo gabe nakae dabalim olo inamin namin kukub misiamo gaiso gaiso biebe.

*Yesus Klaiste Gode miinobo galin wengobe.*

<sup>6</sup> Yesus Klaiste abilim ut danea daak tenea aaye fuelanea eka atdimo kaanea ileme singa nanebua nibo kukubo asu olo watenoba tekein kenoba E bain Gode miinobo gabuobe. E mo daak teneta Aaye eleta fuelanano geneta daak tlim blimobe. E Daak tenia aaye fuelania eka atdimo kaania ileme singananano geneta daak tlebiobe. Eka Hob esa obianea Olo motonobo ge obinabebe. Niminbabe, e moton weng omin Hobobe. <sup>7</sup> Nibo kukubo asumatna yo watenoba tekein kebianoba Yesuse bain Gode miinobo gabuobe. Kukub olo enaminobe. <sup>8</sup> Hobe kukub esa eka Yesuse aaye fuelanebuo kukub esa eka atdimo kaanea ileme singanebuo kukub esa mito asumatna yo nibo alebenoa tekein kebianoba Yesuse bain Gode miinobo gabuobe. <sup>9</sup> Nibo nakai wengo wentebuobe. Gode wengo nakai wengo gaisonobio kesoa e e miine weng sango baabenebuo olota wentemomo! <sup>10</sup> Nakae waneta

Gode e miine weng sango baabenebio wente bianea baanea Weng olo motonobo geneme nakae e kla tekein kebianea Yesuse bain Gode miinobo gabebe. Ina otane naka make Gode e miine weng sango baabenebio wentenea e mo bainobo geim blim kene mole kukub olo makob e baanea Gode dim omin nakabo genamabebe. <sup>11</sup> Weng olo enaminobe. Gode afen smike amit nine nibo dobyebuo o mitmakam ole e miin etabe. <sup>12</sup> Nakae waneta Gode miine e bobol temo biba bie mole e afen smike amit nine debebiobe. Eka nakae waneta Gode miine e bobol temo mo biba bieba mole e bobol temo afen smike amit nine blimobe.

*Afen smike amit nine wengobe.*

<sup>13</sup> Ne futan olo dolania nakaia unangai Gode miine niniin dimo bainobo gabib ibo omfubenamabio inaminobe. Ne funania Ibo tekein keniba ni afen smike amit nine dobobbiobo geine genita futan olo dola omfubenamabibe. <sup>14</sup> Nibo Gode baabanoba Kobo ni inamin namin kukubo daabenano gabebe daabenale genomobo e nib wengo wentenea bain inanea daabenamabebe. <sup>15</sup> Nibo tekein kebuobe, nib wengo Gode ohabobo wentebe kesoa nibo oha bianoba Kobo ni inamin namin kukubo daabenale gabobo e bain inanea daaye binabebe.

<sup>16</sup> Nakae waneta bainobo galin naka make atemebea e hengmino mako henganeme otane hengmin olo e mo ananota kaanomabebe mole e naka ele beteno daahabea Gode e daabanea afen smike dabaleko! Ne weng ele baabei olo nakaia unangai hengmino hengabib otane o mo yenanoa kaanomabibba o weng ota baabeiobe. Ina otane nakai hengmino olokiemo nanimib ota nakai yenanoa kaanomabiobe. Ne mo baanita hengmino yo hengabib biamo e beteno daayemeko geim blimobe. <sup>17</sup> Kukub misiam namino alukum hengmin otane hengmino mako nakai mo yenanota kaanimibbabe.

<sup>18</sup> Nibo tekein kebuobe, Gode memei hengmino amito mo hengabibbabe. Niminbabe, Gode miine i kla kima bie kesoa Naka Misiame i kukub misiamo mo omyamebabe.

<sup>19</sup> Nibo tekein kebuobe, nibo Gode meletan otane Naka Misiame nakaia unangai Gode mo bainobo gabibbai alukum kima biebe.

<sup>20</sup> Eka nibo weng mak esa tekein kebuobe, Gode miine tenea nibo tekein kemino omye kesoa nibo obianoba Gode motonobo gabuobe. Eka nibo afen smike amit nine mitmakame God esa e miine Yesus Klaist esa i baka biobobe.



<sup>21</sup> Ne meme ibo inamin namin kukubo tenoa Gode ib bobol temo bibe bie doblang kebenomo kesoa ibo kukub olo namino deibueine! Ne wengo bayotabe. Ne Yon neta ib futan olo dola omfubenam-abibe.

## 2 Yon Yone futan olo omito dolanebuotabe. Tekein kemın wengobe.

Yesuse atdimmo kaanea imin hananea ulanea abilim unebua bifolo 60 ese mak blimanota Yone futan olo dolaneta Yesuse bainobo galin nakaia unangai omfubenebiobe. Naka maki funaniba Yone futan olo dolanea unang mak ota omfubonebiobo ge obinabib otane naka homon ile funaniba E futan olo Yesuse bainobo galin nakaia unangai bib olokiemo blib ita omfubenebiobo ge obinabiobe. Yone enangge baabeneba Ibo naka mak unang maki gobesese bianiba dim omin wengo aleyemin nakai kukubo klaine! Ibo i wengo mo wentubenimibe ge baabenebiobe.

1-3 Mikiktem wengobe.

4-6 Gobenin kukubo wengobe.

7-11 Dim omin wengo mo wentaibe!

12-13 Mubiang wengobe.

<sup>1</sup> Ae unang obo God emi kemfakanebio obsa eka ob meme isa ibo ne bainobo galin nakaia unangai kimanin naka neta futan olo dola omfubenamabibe. Ne ibo kla gobe blio nenekiembabe. Nakaia unangai alukum Gode moton wengo tekein kebib isa ibo kla gobe bliobe. <sup>2</sup> Niminbabe, Gode moton wengo nib bobol temo bibe bio amitie bibenamabobe. <sup>3</sup> Aye God esa eka e miine Yesus Klaist esa i bain ye nibo gobeniba dohalila daabeniba bobol tem ayamo omyine getabe.

*Nibo gobenin kukub ota wafunomo!*

<sup>4</sup> Ne sino wentia i baaniba Ob memei maki Aye baanea Ne moton wengo kla wafueine genebio i kla wafu bliobo gesiba wentenia ne kla seimbiniobiobe. <sup>5</sup> Ne unang obo ne weng mako baabkenamabio obo mo funanebta E hekmel weng olo mema weng baatnenebo ge funanemebe! Yeye nibo Klaiste mema bainobo gebanob dimo weng olo tekein kenobbiobe. Weng olo inaminobe. Nibo gobesese nomo getabe. <sup>6</sup> Gobenin kukubo mitmakamo enaminobe. Nibo Gode hekmel wengo kla wafunomo! Eka ibo Gode hekmel weng olo sino wente binibbu osa memalo wentebib osa o enaminobe. Ibo naka maka unang maki gobeine getabe.

*Ibo dim omin wengo mo wentaibe!*

<sup>7</sup> Dim omin nakaia unangai homoni moniba bib mak bib mak olo unebibi nakaia unangai mo oye bianibta Yesus Klaiste daak tenea dabalim olo naka nebiobo galin wengo mo omkayebibba

kesoa naka eli Ni Gode dlakamin Nakabo ge obianiba dim obib itabe. <sup>8</sup> I inabib kesoa ibo klaine! Ibo melek klabiam binibta sinanota inamin namin ayamo dlom gaibo alukum dline! Ibo dim omin naka eli weng ota wenteye biniba sinanoa ibo inamin namin ayam olo dlomabibo deibonimiobe. <sup>9</sup> Nakae waneta nakai wengo wentenea Klaiste wengo deiboneme naka ele Gode e bobol temo mo biba biebase. Otane nakae waneta Klaiste aleyeboo wengo kla wafu bie mole Aye God esa e miin esa i e bobol temo biba bliobe. <sup>10</sup> Naka make Klaiste aleyeboo wengo mo wafueim blim bianea ibo aleyemang genea tenea ib am ele tle mole ibo mo baabanibta Kobo ye tlebo genibta debeb tam ta ib am tamo mo danimibe! <sup>11</sup> Ibo inabib mole e okok misiam olo daabanomabiobe.

*Mubiang wengobe.*

<sup>12</sup> Ne wengo homono ye bua baabenamabi otane memalo ne futan temo mo dola omfubenimibabe. Ne funania Ne monia ibsu na tlia toulu bianoba weng obianoba baabeia wentibta kla seinomo gabibe. <sup>13</sup> Ob dab tlemino God emi omfakanebio o memei Obo klayam biebtte ge baabkeiobe. Ne wengo bayotabe. Yon neta ib futan olo dola omfubenamabibe.

### 3 Yon Yone futan olo mubiango dolanebuotabe. Tekein kemin wengobe.

Yesuse atdimo kaanea imin hananea ulanea abilim unebua bifolo 60 ese mak blimanota Yone futan gwab olo dolaneta naka make niniino Gaiase omfubanebiobe. Yone Gaiase kukub ayamo nabeo seinha biane baabanea Kobo Daiotlefise kukub misiamo nabe yo klanale ge baabanebiobe.

1-4 Mikiktem wengobe.

5-8 Fole baanea Gaiase kukubo ayamobo genebiobe.

9-10 Fole baanea Daitlofise kukubo misi- amobo genebiobe.

11-12 Fole baanea Demetliase kukubo klayamobo genebiobe.

13-15 Mubiang wengobe.

<sup>1</sup> Ae ne nek Gaias kobo ne bainobo galin nakaia unangai kimanin naka neta keb futan olo dola omfubkenamabibe. Ne kobo kla gobke blibe.

<sup>2</sup> Ne nek kobo ne beteno daake biana Gode baabania Kobo Gaiase bainobo galino sbalma bie kesoa kobo e aal dimo kimaba bieba ginina inamin nami- nao klayam bianete ge ohabibe. <sup>3</sup> Sino bainobo galin naka maki teniba ne baat- neniba Gaiase Gode moton wengo wente biane kukub ayamo wafu binabebo gesiba wentenia kla seimbiniobe. <sup>4</sup> Naka maki teniba baatneniba Keb memei Gode moton wengo kla wente bianiba kukub ayamo wafu bliobo ge baatnesiba wentenia ne kla seimbibe. Ne seinin olo seinin afeto gaisonobe.

*Gaiase kukub ayam wafu biebe.*

<sup>5</sup> Ne nek kobo nakai Gode wengo omet- niba bib mak bib mako aleyem haablib nakai teniba keb bibo tlaibo kobo i sino mo tekein kebebba otane kobo i kla daaye binabeb kesoa keb kukub olo klayamobe. <sup>6</sup> Naka eli maki teniba ne bib ele tlaniba bainobo galin nakaia unangai ele blihi baabeniba Gaiase ni kla gobe biane daayebe bita deiba tlobobo ge baabei- bobe. Kobo inabeba Gode kla seineko! <sup>7</sup> Niminbabe, i moniba bib mak bib mako Klaiste okoko daayebib otane nakaia unan- gai bainobo gabibbai i inamin namino mo yang kebibbabe. <sup>8</sup> Inamin kesoa bainobo gabob nakaia unanga nibo Gode wengo aleyem haablib naka eli daaye bianoba ite nibtem nanoba Gode weng motono okoko okok kemomo!

*Daiotlefise wengobe.*

<sup>9</sup> Ne futano dolania bainobo galin nakaia unangai omfubei otane Daiotlefis ele ne weng olo omdibine biane mo wente- bebabe. E untak ngambiane funanea Ne bainobo galin nakaia unangai komok anano ge fumbebe. <sup>10</sup> E inamin namin kukub misiamo homono nabiane eka ni weng misiam oye biane dim oye biam biebe. Eka mak ole nakai Gode wengo bib mak bib mako aleyem haablib nakai teniba e bib ele tlaibo e mo dleb taneta e am tam daneta unino mo dokaye biam nabebabe. Eka naka mak isa naka eli daabenom gaibo e tolobo genea daabenom genabib naka eli fotebena biam biane baabenea Ibo lotuo mo lotu kemibe gabin- abebe. E inabe kesoa ne tenia e bib ele tlamio e inamin namin kukub olo nabeo wengo omkeimanamabibe.

<sup>11</sup> Ne nek kobo naka maki kukub misi- amo namibo kobo mo yatenebta kebsa in- amebe! Kukub ayamo namib ota yatenebta kebsa namale! Nakae waneta kukub ayamo wafu bie mole e Gode meletanobe. Eka nakae waneta kukub misiam wafu bie mole e Gode mo tekein kebebabe. <sup>12</sup> Nakaia unangai homoni obianiba Demitliase naka ayamobo gabinabib olo bainobe. E bain ye kukub ayam wafu binabebe. Nisa obianoba E kukub ayam wafu binabebo gabobo ibo tekein kebiobe, ni weng olo motonobe.

*Mubiang wengobe.*

<sup>13</sup> Ne wengo homono ye bua baabkenam- abi otane memalo ne futan temo mo dola omfubkenamabibabe. <sup>14</sup> Ne funania Ne monia kebsu na tlita toulu bianobta weng obianobta baabkenano gabibe.

<sup>15</sup> Kobo bobol tem ayam biehte! Keb nek- wali alukum ele blihi baaniba Kobo klayam biehte ge baabkeibobe. Kebsa ni nekwali kebsu blihi elekiem olikiem klayam blihte ge baabenale! Ne wengo bayotabe. Ne Yon neta keb futan olo dola omfubkenamabibe.

**Yut  
Futan olo Yut eta  
dolanebiobe.  
Tekein kemim wengobe.**

Yesuse atdimu kaanea imin hananea ulanea abilim unebua bifolo 50 ese mak blimanota Yesus esa Yems esa i ninge Yute futan olo dolanea Yesuse bainobo galin nakaia unangai omfubenebiobe. E funanea Ne futan olo dola omfubeia wateniba i bainobo galino sbal maniba dim omin wengo aleyemin nakai kukubo klamine geneta dola omfubenebiobe.

1-2 Mikiktem wengobe.

3-16 Gode wengo omdibihamin nakai wengobe.

17-23 Bainobo galino sbalma wafu-  
namin wengobe.

24-25 Gode niniino dobtouleb nin wengobe.

1 Ne Yut Yemse ning Yesus Klaiste okok naka neta futan olo dolania Gode dlakanebio naka unang ibo omfubenamabibe. Nib Aye Gode ibo kla gobe bia Yesus Klaiste ibo kima biebe.

2 Ne Gode baabania Kobo i dohalilaneba bobol ayamo omyeneba kla gobeneba isak naka mak unang maki gobenaniba i gobesese nin kukub olo sum anoko ge baabaioibe.

*Gode wengo omdibihamin nakai weng sango.*

3 Ne nekwal ibo ne kla gobe blibe. Ne sino fumbiania Ne futano ibo dola omfubenia Gode okok sumo nanea nibo alukum hengmino temo biobo dotlanebio wengo baabenano gabi otane memalo ne weng afet mako funai kesoa dim omin nakai ib isak temo blibi i weng sango futan temo dola omfubenamabibe. Weng olo inaminobe. Gode sino e bainobo galin wengo e nakaia unanga ni omyebuo weng afeto imino mo omyamabebabe. Ibo weng olo wenteniba bainobo geniba sbal maniba kla wafueine! Ibo dim omin naka mak unang maki weng afeto oyebibi baabeniba Weng olo bainobo ge baabeine! 4 Naka maki Gode wengo omdibihabit otane i dim baaniba Ni naka ayamobo geniba teniba Gode bainobo gabib naka unang ib isak temo bliobe. I naka mak unang maki dim baabeniba Gode nibo daabene kesoa nibo taman kukubo namob mole e mo dosuanamabebabo geniba kukub misiam olo amitie nabinabiobe. Ina binabib naka unang eli nib Sume wengo omdibihabiobe. I bobol tem funin olo misiamobe. Yesus Klaiste elekiem eleta nib komok eka nib

Sum nabe. Sinanggwano Gode buk tem wengo baanoa Ne nakaia unangai inabib ile ne i kukub misiamo nabibo yang kenia dlaia aseinin bib unomabiobo genobiobe.

5 Sinanggwano Islel nakaia unangai Isib betan ye bliba Isib teni Islel teni enino omkayebiba Sume Isleli dletnea Isibo deiboniba bib mak onsib otane sinanoa naka mak unang maki e mo bainobo geim blim keib kesoa e yalebiobe. Ibo welo tekein kebib otane ne imin ib bobol tem funino omsbal mabeia weng olo imin funine genitabe. Makob Gode Islel nakaia unangai e wengo omdibihabi watwat dabenea inanebio inanea e dim omin nakai ib isak temo blib elisa watwat dabenamabebe. 6 Sinanggwano abisel mak isa inaniba Gode okok ayamo omye otane i e wengo ombiabaniba i bibamo deiboniba ili bobol tem funin ota wafu bianiba hengamib kesoa Gode sen saye gebenebua mililambio tem tabo amit ye bliobe. I ye bianiba Gode nakaia unangai kukubo klanamabe am sumo tlamabo waiso bliobe. Am olo tlamo dim ota Gode abisel eli kukub misiamo naibbuo yang kenea dlanea aseinin bib unomabib kesoa ibo weng sang olo mo dokobenomone! Gode dim omin nakai ib isak temo blib elisa watwat dabenamabebe. 7 Ibo sinanggwano Gode Sodom bib osa eka Gomola bib osa nabonebuo funaine! Sodom bib sel isa Gomola bib sel isa eka bib mako meb meb yo sel isa i kukubo makob abisel eli kukubo ulab wafu bianiba tamano henga bianiba eka mak ole nakaia unangai deibeniba naka maki tenaniba tlan misiam habiam nabib kesoa Gode i kukub misiamo yang kenea akile kikanea daakenea bibo yo seli alukum kibaibbio kesoa naka mak unang maki tekein keniba Gode naka misiam unang misiami inanea i kukub misiamo yang kenea aso dlatounea amit eintesomabiobo gabiobe.

8 Dim omin nakai ib isak temo blib elisa inaniba kukub misiamo yota nabaniba i kukubo nabib olo makob Islel nakaia unangai Gode wengo omdibiha binibbio ina biam bianiba eka abisel misiami nabinibbio ina biam bianiba eka Sodom bib sela Gomola bib sela i nabinibbio ina biam blib kesoa Gode isa inanea aso dlatounea amit eintesomabiobe. I dam misiamo temaibo i bobolo wabesoa i kukub misiamo nabaniba nib Sume wengo omdibiha bianiba eka abiseli weng dobo weng oye biam binabiobe. 9 I abiseli weng dobo weng oyebib kukub olo dot misiamobe. Sinanggwano abiseli komoke Maikel ete Gululam ete naniba weng alang weng obianiba Waneta Moseses dame debeb unamabene? ge baase baase blib otane Maikela Gululame weng dobo wengo mo baabaim

blimobe. E Gululame baabanea Sume emaye kemsuananeke ge baabanebiobe. <sup>10</sup> Ina otane dim omin naka eli inamin namino o mitmakamo i mo tekein kebibbao weng dobo weng owe binabiobe. I makob eila tilai bobol tem funin blimi ulabobe. I bobol temo tekein kebianiba Inamin namin kukubo misiamobo gabib otane kweimiki nabib kesoa o i bobol temo watwat dabenamabobe. <sup>11</sup> I enin kino watemomabib kesoa klaine! I kukubo makob sinanggwano Kene Gode wengo omdibiha bianea e ninge ananebio naka esa eka Belame baanea Naka om ibo monio onib mole ne Isel nakaia unangai kukub misiamo aleyemabibo ge baanebio naka esa eka Kola esa i kukubo ulabobe. Kolae e komoke Mosese wengo omdibihabe kesoa Gode ananea kaanebiobe. Eka dim omin naka elisa Gode wengo omdibihabib kesoa Gode isa watwat dabenamabebe.

<sup>12</sup> Ibo ib nekwal tenaniba imeno wembianiba Gode bobolo funom gaibo dim omin naka elisa teniba ib imeno baka wembianibo ge fumbibbabe. I inaniba ib imeno baka wembianiba kukub misiamo nabianiba aay misiam wembiam bianiba gabamon temo mimau bebua Gode weng dobo weng ohabib kesoa naka mak unang maki ibo yateniba baabeniba Bainobo galini kukubo misiamobo gabio. Naka maki imeno blim bibe biam otane dim omin naka eli i bobolo mo funanibta daabenibbabe. I deibeniba imeno imaye mifin wembianibo. I makob abilim uto ayungo eing tomong genoa abil aamuke einea soko tenoa dabale daabanang genabua glole tenea fubonea iibo wa oleb onon tlanea soko tenamino denabo inaniba isa nakaia unangai mo daayebibbabe. I makob iwato hoon ansoa kimanino deibueibbua halal genoa mit baka gemelo blelanoa gatanoa abianabo inaniba i makob hami ulab kesoa i naka mak unang maki mo daayebibbabe. <sup>13</sup> Dim omin naka eli kukub misiamo keim anoa nakaia unangai watemebibo makob aaye tlebua binea banea aasiksiko get danea nakaia unangai waternabib inaminobe. Eka i Gode kukubo deiboniba kukub afet ota wafu blibo makob awitnino abilim uto o alango deibonoa dela monoa afet mawenabo inaminobe. Gode naka eli bibo mililambio tem ye klaubenebiobe. I ye bianiba amit nomabiobe.

<sup>14-15</sup> Sinanggwano Gode e wengo Adame molofeite Inoke omalea e tekein kenea ib isak temo dim omin nakai maki tam tlamabiobo gene kesoa e baanea Sume nakaia unangai kukubo klanang genea abisel homon homoni dletnea tlamabebe. Nakaia unangai e wengo mo wafu blib-

bai i kukub misiamo nabibo yang kenea enin kino watemomabiobe. Hengmin naka unangi Gode wengo omdibihabib kesoa Gode nakaia unanga eli weng misiam ohabibo molo yang kenea i enin kino sum watemomabiobo genebiobe.

<sup>16</sup> Dim omin nakai ib isak temo blibi baaniba Naka maki kukub misiamo ni omkayebib kesoa i kukubo misiamobo gabianiba weng dobo weng oye bianiba eka i inamin namino wateniba bobolo wabeno mole ili bobol tem ye dlo dlo binabiobe. I ili untak ngam bianiba naka mak unang maki afobeingo bobolo wayebua dim oye bianiba oise une biam binabiobe.

*Nibo nib bainobo galino sbalma wafunomo!*

<sup>17</sup> Otane ne nekwal ibo dim omin naka eli kukubo mo wafunimibe! Ibo sino nib Sume Yesus Klaiste okok dlasanin nakai wengo omkeima binibbuo bobolo kla funine! <sup>18</sup> I sino ibo enangge baabeniba Mubiang amo bomanang gamo dimo naka mak unang maki bainobo gabibbai teniba Gode ib sinwalo tlaye bianiba aben giye biam bianiba Gode wengo omdibiha bianiba ili bobol tem funin misiam ota wafu bianiba kukub misiam olo namobiobo ge baabeibbiobe. <sup>19</sup> Nakai inabib ile bainobo galin nakaia unanga ibo dim oyebiba ibo bobol tem hehkek fumbianiba maki bainobo gesib eka maki dimobo gesib bianiba weng alang weng baase baase nomabiobe. I dabalim nakai bobol tem funin ota wafu bianibtabe. Inabib naka eli Gode Hobe i bobol temo blimobe. <sup>20</sup> Ina otane ne nekwal ibo i wengo mo wentaibe! Ibo Gode wengo bainobo geibbio kesoa ib bainobo galino sbal maniba ib sinwalo daabese bianiba Gode Hobe e titilo ibo daayebua Gode nganhamine! <sup>21</sup> Gode ibo kla gobe bio bobolo mo dokobenomone! Ibo olo amitie fumbianiba nib Sume Yesus Klaiste imin tlamabeo wasanine! E ibo dohalimbe kesoa e imin tlameo ibo kukub ayamo omya ibo afen smike doboniba amit nomabiobe. <sup>22</sup> Ibo naka mak unang maki i bainobo galino klao mo sbal maim blim bianiba dim ese bain ese gabibi dohalilaniba daabeine! <sup>23</sup> Eka mak ile makob imeno aso ulabua nakai hebmsab otlanabib inaniba i hebmsab Gode wengo omyeniba daabeiba i aseinin bibo mo nauibe! Eka mak ile dohalilaniba daabenomabib otane i kukub misiamo ibo omyaib kesoa ibo klaine! I kukub misiam olo makob youmo ninikanobio inabenobio kesoa ibo kukub olo takabonibte!

*Gode niniino dobtouleb nin wengobe.*

<sup>24-25</sup> Nibo Gode niniino dobtouleb nomo!  
Elekiem eleta nib Sume Yesus Klaiste da-  
bane daakenea atdimo kaanea nibo heng-  
mino temo biobo dotlanebiobe. Komok  
Sum ele e titilo ayal inamin einea in-  
amin namino alukum kima biebe. E  
titilo dot beselib kesoa nibo e niniino  
amitie dobtouleb nomo! E sinanggwano  
binabebua memalosa biebe. Sinanomosa  
biamabebe. E ibo kla kimanea hengmino  
mo henganimibbabe. E dleb utnea e bib  
ut danea ibo hengmino blimubenoa kining  
aniba seinomabiobe. Bainobe. Ne wengo  
bayotabe. Yut neta ib futan olo dola om-  
fubenamabibe.

## **Lebelesen Gode Dofakamin Nakae mubiang amo wengo Yone haabasebe. Tekein kemim wengobe.**

Yesuse atdimu kaanea imin hananea ulanea abilim unebua bifolo 60 e 65 e mak blimanota Yone futan olo Yesuse bainobo galin nakaia unanga imi dolabenebiobe. Yone Nakae unangai Sume Yesuse bainobo gabib o dafao enin kino watemebib kesota e futan olo dola omfubenet dosbal mananebiobe. E aabile niniino Fatmos ye klabutam bieta Gode inamin namino sinanoa tam tlamabo dam deib alebanea Ne miine e makaai titil osa Gululame titil osa omabbubenebio kesoa nakaia unangai wanita e bainobo geib mole i abilim osa eka mema dabale dim esa klayam nomabiobo geseta Yone wateneta futan olo dolanebiobe.

1:1-8 Mikiktem wengobe.

1:9-3:22 Yone weng mako dolanea bainobo galin nakai mito 7 i omfubenebu otabe.

4:1-8:1 Yone buk mako geibbua wate-mebu otabe.

8:2-11:19 Abiseli bigulo olanomabibo wengobe.

12:1-13:18 Inab esa kulan haleb isa i wengobe.

14:1-15:8 Inamin namino Yone wate-mebu o wengobe.

16:1-21 Diso 7 o tem daako Gode atlihamino sibbenobiobe.

17:1-20:10 Bebilon bib osa kulan haleb esa dim weng omkeimalin naka esa Gululam esa i watwat danomabibo weng sangobe.

20:11-15 Kot sumo wengobe.

21:1-22:5 Abile mema esa eka dabale mema esa eka Yelusalem bibo mema osa o weng sangobe.

22:6-21 Mubiang wengobe.

<sup>1</sup> Sino weng olo ayok binabo bieta Yesus Klaiste omkeimanebe. Gode Olo Yesuse alebaia e inamin namin olo e okok nakai hebmamsab alebenea tam tloko genea alebanea Yesus esak e abisake alebanea dabane tenea e okok naka Yon nesu ele tlanea wengo omnenea <sup>2</sup> ne inamin namin olo watem nabia eka Gode bain wengo baane osa eka Yesus Klaiste wengo aletnene osa ne watemnanita ibo baabenamabibe.

<sup>3</sup> Nakai ne Gode weng olo inamin namino mitda tam tlamabo wengo dolai biamo kiniba naka maki wenteniba wafu binimib nakai seinine! Niminbabe, Gode baanea

Inamin namin olo nanamabibo genebue amo meb tlamo inanamabebe.

*Yone weng olo dolanea bainobo galin nakai mito 7 i omfubesebe.*

<sup>4</sup> Yon neta weng olo dolanita bainobo galin nakai mito 7 ibo Esia betan ye blib ibo omfubenamabibe. Gode memalosa sinang-gwanosa binabebe. Sinanomosa biamabebe. E amit ninobe. Eta daabeneta bobol tem ayam omyeko! Eka Gode Hobe titilo 7 o bibabue Gode biino kibi kaba sin da ye bie esa daabeneta bobol tem ayamo omyeko! <sup>5</sup> Yesus Klaiste Gode wengo alukum molot omkeimalin nakabe. E sin kaanea hana tlebio kesoa nibsaa kaanomobo imin hana tlomabbio. E alukum komokwali dabalim olo blibi Sum na kesoa esa ibo daabeneba bobol tem ayamo omyeko!

E bobol temo nibo omylenea kaanea ileme singanea nib hengmino omlabeneba <sup>6</sup> dleb monea e kimanin bib ye danebio kesoa memalo nibo e Aye Gode okoko klabinoba makob sinanggwanu Gode amo kimanin nakai Gode niniino dobtouleb bianiba nabinibbio inamomo! Nakai Yesus Klaiste niniino amitie dobtouleb nine! E titilo sum eka e amit nin nabe. Bainobe.

<sup>7</sup> Wentine! E hebmamsab ayung tem te tlea nakai dabalim olo blibi alukum atemnabiba eka nakai an osa sil osa bilbuha binibbio isa atem nanomabiobe. Eka dabalim nakai alukum Yesuse atemniba i bobol temo misiamu benoa memomabiobe. Ae ne weng olo baai biamo bain tam tlamabobe.

<sup>8</sup> God Sume baanea Ne sinanggwanu binabibua eka sinanomosa biamabibo genebue wengo bainobe. Sinanggwanu e binabebua memalosa biebe. Eka sinanomosa biamabebe. E amit ninobe. E alukum inamin namino titilsabe.

*Yone Gode Dofakamin Nakae atemsebe.*

<sup>9</sup> Ne Yon ib nek netabe. Nib dabwalo Yesus emibe. Nibo Gode kimanino tem wat biob kesoa nibo Yesus emibe. O dafa ota nakai Gode wasi dofa blibi nibo bobol tem abil osa enin osa omkayebiobe. I inayebib otane nibo alukum sbal mabuobe. Ne Gode wengo omkeima biania eka Yesuse down wengo omkeima biam bli o dafa ota klabuto ge nemeb teniba aa ubile niniino Fatmos ele daib biotabe. <sup>10</sup> Sume singkalin am bomanoa Gode Hobe ne beketnesea ne gimon kabi etale weng mako ngambua wenti olo sumobe, makob bigul wengo ulabobe. <sup>11</sup> Weng olo baanoa Inamin namin olo watemalaeb dolaneba bainobo galin nakai mito 7 i omfubenal! Bib olo niniino Efesas osa Smena osa Pegamam osa Taiatalla osa Sadis osa Filadelfia osa Leodisia osa o blibi omfubenale gesoa wentenia <sup>12</sup> ne Nakae

wengo onebe ele atemano genia deskina temia tom gol ayalo 7 bua watem nabiania temia <sup>13</sup> naka make ayal olo isak daak bia atemie makob nakai ulabobe. E youm teke dubusanea daaknea skilon daak unea eka gol hale tobonea takale tubusanebua <sup>14</sup> e gabamano nama makob eil sibsibi dim inamin eka makob ayungo dot nama inaminobe. Eka e kin osa makob atol embo inaminobe. <sup>15</sup> Eka e skilono bining genobu ole makob nakai tom blaso as beselibo tem wat olatousiba kibanoa bining genabo inaminobe. Ne wentia e wengo makob aayo dito sumo tebe bia tlebianoa umbinabo ina bianea <sup>16</sup> e kweile kweita sine awitnino 7 wafunee eka e skem dange kene minime yanga eka minime yanga nanebue sitalim ele bianea wate tib ele tlebua e kibio bomat genea makob afoko tubunabo inasea <sup>17</sup> ne atemnia tosoniania makob nakai kaanabib inania e skil tama bie ye kaai otane naka ele kweile kweita sine nafunee baatnenea Kobo mo tosiamebe! Ne sinanggwano binabibo eka sinanomosa biamabibo, <sup>18</sup> ne afen blibe. Sino ne kaania imin hana tlibua amit afen biania kaanamin deib osa kaanamin bib osa neta kima bli kesoa <sup>19</sup> kobo inamin namino watemeb osa eka inamin namino memalo buosa eka sinanoa tam tlamabo osa o wengo dolanale! <sup>20</sup> Kobo awitnino 7 o ne kweile kweitale dim ele bua watemeb osa eka ayalo 7 olosa o mitmakamo inaminobe. Awitnino 7 ole bainobo galin nakai mito 7 o blii kimanin naka itabe. Eka ayalo 7 ole bainobo galin nakaia unangai mito 7 o blii itabo ge baatnenebe. Nakae wengo baatnenea wenti ele Yesus etabe.

## 2

*Yesuse wengo bainobo galini Efesas bib seli baabesebe.*

<sup>1</sup> Yesuse imin baatnenea Kobo weng mako bainobo galini Efesas bibo blii kima bie nakae weng olo dola omfubaneba enangge baabaneba Awitnino 7 o ne kweile kweitale wafunia eka ayal golo 7 o tem wat haabianita weng olo baabkenamabibe.

<sup>2</sup> Ne ib kukub nabibo yatem tekein keiobe. Ibo okok sumo klabibo mo deibueim blim kesoa ne yatemibe. Ibo inamin namino ib dimo tlebo sbalma blibo ne tekein kebibe. Eka ne tekein kebio ibo naka misiamu mo gobe blibbabe. I baabeniba Nisa Yesuse okok dlasanin nakabo gabib otane i Yesuse okok dlasanin nakababe. Eka ibo i wengo kla moton sambianiba i kukub nabibo mitmakamo tekein kebiam nabio. I dim omin nakabe. <sup>3</sup> Naka maki yatemiba ibo ne kukubo wafu blii kesoa i kukub misiamu omkayebib otane ibo sbal maniba ne mo deitneim blimobe.

<sup>4</sup> Otane ne weng mako baabenamabio ib okoko olokiem ota misiamobe. Sino ibo mema bainobo genib dimo ib bobol temo omneniba gotne blii otane memalo ibo ne klaom mo gotne blibbabe. <sup>5</sup> Sino ibo kukub ayam nabib otane memalo deibonib kesoa sino nabinibbuo imin funaniba ib bobol temo deskinaniba ne omneniba makob mikiktemo nabinibbio inaine! Eka mo inaim blim kenib mole ne tenia ibsu tlania ayal ele obeisenamabibe. <sup>6</sup> Ina otane kukub ayam olo ib dimo sma ye bibebua ibo Nikolase meletani kukub misiamu ibo mo gobueim blim kesoa ib kukub olo ayamobe. Nesa i kukub misiamu olo mo gobo blibabe.

<sup>7</sup> Nakaia unangai wanita Gode Hobe wengo bainobo galin nakaia unangai baabene olo wentib mole kla funa omabbaine! Nakai wanita kukub misiamu Yeye geniba ombiaib mole ne Ae ge baabeia asiame nakai downaibo i afen smike amit nine dobyenamin asiame downomabiobe. As ele Gode damib biebe. Ne wengo bayotabo ge baa dolanale ge baatnenea kesoa ne futan olo dolania Efesas bib seli ibo omfubenamabibe.

*Yesuse wengo bainobo galini Smena bib seli baabesebe.*

<sup>8</sup> Yesuse imin baatnenea Kobo weng mako bainobo galini Smena bibo blii kima bie nakae weng olo dola omfubaneba enangge baabaneba Ne sinanggwano binabibe eka sinanomosa biamabibe. Sino ne kaai otane imin hanaibua memalo afen bianita weng olo baabenamabibe.

<sup>9</sup> Bobol tem abil osa enin osa ib dimo tlebo ne tekein kebibe. Eka ibo monia inamin naminao blim otane Gode abilimo inamin namin ayam afen smik osa bobol tem funin ayam asa omkayebeo homonobe. Naka maki ibo weng dobo weng oyebibo ne tekein kebibe. Naka eli baaniba Ni Yuda naka kesoa ni Gode meletanobo gabib otane i Gode meletanababe. I Gululame meletanobe. <sup>10</sup> Namo namo ibo enin sumo watemomabib otane ibo mo tosiangmibe! Wentine! Gululame ibo naatemang genea ib isak temo klabuto gengkamabebe. Eka amo 10 o blimanamabo dimo ibo enin kino watemomabib otane ibo bainobo galino sbalma wafunib mole ne afen smike amit nine dobyamabibe.

<sup>11</sup> Nakaia unangai wanita Gode Hobe wengo bainobo galin nakaia unangai baabene olo wentib mole kla funa omabbaine! Nakai wanita kukub misiamu Yeye geniba ombianibbua kaanib mole i imino mo kaanomabibbabe. Ne wengo bayotabo ge baa dolanale ge baatnenea



kesoa ne futan olo dolania Smena bib sel ibo omfubenamabibe.

*Yesuse wengo bainobo galini Fegamam bib seli baabesebe.*

<sup>12</sup> Yesuse imin baatnenea Kobo weng mako bainobo galin nakai Fegamam bibo bliibi kima bie nakae weng olo dola omfubaneba enangge baabaneba Ne skem dang teke kene minime yanga eka minime yanga nanebue afu bli naka neta weng olo baabkenamabibe.

<sup>13</sup> Ne ib bibo tekein kebibe. Gululame ib bib olo komok ambia ibo bib olo seli kukub misiamo watemib otane ibo sbal maniba ne niniino nemtouleb bianiba bainobo gabianiba ib bainobo galin olo mo deibueim blimobe. Sino ne inamin namino nabio wengo omkeimalin nakae niniino Antifase ib tem nabianiba e ne okoko sbalma wafu bia o dafao bib olo seli anaiba kaanebio dimo ibo yatemib otane ne niniino mo omwatneim blimobe.

<sup>14</sup> Otane ne weng mako baabenamabio ib okoko olokiemo misiamobe. Naka maki ib isak tem ye bliibi nakae niniino Belame kukub misiamo sbalma wafu bliobe. Belame kukubo inaminobe. E sinanggwano e dim omin kukubo naka make niniino Belake alebanea baabaneba Kobo kukub olo Isleli alebenae gesea e inanea hengmin mako alebenea i kulani god dim omin heitdabeniba downiba eka taman kukubo wafuna binibbio inabiobe. <sup>15</sup> Eka naka maki ib isak temo bliibi Nikolase meletani kukub misiamo sbalma wafu bliib kesoa <sup>16</sup> ibo i baabeniba Ib hengmino deiboniba ib bobol temo deskinaire ge baabeine! Eka i mo inaim blim kenib mole namo namo dimo ne wengo baabenimio makob bainat tobo binain kenia naka eli yananamabibe.

<sup>17</sup> Nakaia unangai wanita Gode Hobe wengo bainobo galin nakaia unangai baabene olo wentib mole kla funa omabbaine! Nakai wanita kukub misiamo Yeye geniba ombiaib mole ne abilim imeno memalo ayok buo oyena biania eka tom namao oyenanamabibe. Tom olo oyamabi nakai mema niniino tom olo dim wat dolanita oyamabibe. Tom olo oyamabi nakai imaye i niniin olo tekein kenomabiobe. Naka maki niniin olo mo tekein kenimibbabe. Ne wengo bayotabo ge baa dolanale ge baatnene kesoa ne futan olo dolania Fegamam bib sel ibo omfubenamabibe.

*Yesuse wengo bainobo galini Taiaitaila bib seli baabesebe.*

<sup>18</sup> Yesuse imin baatnenea Kobo weng mako bainobo galin nakai Taiaitaila bibo

bliibi kima bie nakae weng olo dola omfubaneba enangge baabaneba Ne Gode minobe. Ne kino makob atol eimbo inaminobe. Eka ne skilono makob tom blaso as beselibo tem wat olatousiba kibanoa bining genabo inabio neta weng olo baabkenamabibe.

<sup>19</sup> Ne ib okoko nabibo tekein kebibe. Ib bobol temo naka maki omyeniba ne bainobo galino sbal maniba naka maki daayebibo ne tekein kebibe. Ibo inamin namino ib dimo tam tlebo sbalma bliib osa ne tekein kebibe. Ib okoko sino nam tlibbuo ayam otane mema nabio sino gaisonobe. <sup>20</sup> Ne ib kukubo olokiemo mo gobo bliababe. Unang mako ibsu ye bio yo sinanggwano unango niniino Yesebelo kukubo nabinobuo, osa wafu bianoa baanoa Ne Gode weng omkeimalin unangobo gabianoa dim obo otane ibo mo tolobo geim blimobe. Eka unang olo ne okok nakai taman deib haanin kukub ota aleye bianoa eka kulani god dim omin heitdaye bianiba unalin kukubo aleye biam biobe. <sup>21</sup> Ne funania O bobol temo deskinoko genia deibo biambi temita o mo bainobo genota taman deib haanin kukubo mo deibueim blim keno kesoa <sup>22</sup> wentine! Ne o enin sum osa ginin sum osa omulamabibe. Eka nakai o taman deib omeb haablib nakai i hengmino mo deiboniba i bobol temo mo deskina omnim blim keib mole isa enin sum osa eka bobol tem abil osa omyena biania <sup>23</sup> eka o meletan isa yanaia kaaniba bainobo galin nakai tekein kenomabiobe. Ne nakai bobol tem funino kla tekein kebi kesoa motomania ib isak temo nakai elekiem olokiem i kukubo nabibo molo yang kenamabibe.

<sup>24</sup> Otane Taiaitaila bib sel mak ibo kukub misiam olo mo nabibbabe. Ibo o weng olo aleyebo mo wafunim blim bianiba eka Gululame weng ayok osa mo tekein kebiba kesoa ne kukubo afeto mo omyamibabe. Weng olo baabenimio <sup>25</sup> ibo ib bainobo galino sbalma wafu bliiba ne imin tlano! <sup>26</sup> Nakai wanita kukub misiamo Yeye geniba ombianiba ne kukubo wafu biam biniba kaanib mole ne titilo omyia nakaia unangai dabalim olo bliibi kimaniba <sup>27</sup> makob ne Aye titilo omnebua nakaia unangai kima bli inaniba isa titilo omoniba Gode meletanbai kima bianiba kukub sbalo omkaye bianiba yebiba kulliamomabiobe. <sup>28</sup> I inamiba ne boman tebuo awitnir osa omyamabibe.

<sup>29</sup> Nakaia unangai wanita Gode Hobe wengo bainobo galin nakaia unangai baabene olo wentib mole kla funa omabbaine! Ne wengo bayotabo ge baa dolanale ge baatnene kesoa ne

futan olo dolania Taiataila bib sel ibo omfubenamabibe.

### 3

*Yesuse wengo bainobo galini Sadis bib seli baabesebe.*

<sup>1</sup> Yesuse imin baatnenea Kobo weng mako bainobo galin nakai Sadis bibo blibi kima bie nakae weng olo dola omfubaneba enangge baabaneba Ne Gode Hobe e titilo 7 o bitnebuwa awitnino 7 olosa kima bli naka neta weng olo baabkenamabibe.

Ne ib okoko nabibo alukum tekein kebibe. I oye bianiba Bainobo galin naka eli afen smiksabo gabib otane ne baabenamabio ibo kaanabibi ulabobe. <sup>2</sup> Ibo denino deiboniba klaine! Ib kukub ayamo sma ye bianoa blimanang genabo yo funaniba klaubueine! Niminbabe, ib kukub nabibo ne funania Gode kin dimo molotbabo gei kesoa hananiba kukub ayamo namine!

<sup>3</sup> Sino ibo dowan weng olo wenteniba bainobo genibbio kesoa imin funaniba sbalma wafu bianiba hengmino deiboniba ib bobol temo deskinaniba bainobo geine! Eka ibo denino deiboniba klaine! Eka ibo ne mo waitneim blim keib mole ne ibsuo makob ayok henin nakai ulab tlamabi kesoa ibo ne tlamabio dimo mo tekein kebibbabe.

<sup>4</sup> Otane naka maki ib isak tem ye blibi ayamobe. I kukub misiamo mo naim blim kesoa i makob nakai youmo ninik gamo mo kibibbai ulabobe. Inabib naka eli youmo nama ota kiniba ne beketnenomabiobe. I naka ayam kesoa ne i mo deibenimibabe.

<sup>5</sup> Nakai wanita kukub misiamo Yeye geniba ombiaib mole ne i youm namao dlusubenia ne i niniino afen smik buko temo mo glitaubenimibabe. Ne Aye kin dim osa eka abiseli kin dim osa baabeniba I nemiobo ge baabenamabibe.

<sup>6</sup> Nakaia unangai wanita Gode Hobe wengo bainobo galin nakaia unangai baabene olo wentib mole kla funa omabbaine! Ne wengo bayotabo ge baa dolanale ge baatnene kesoa ne futan olo dolania Sadis bib sel ibo omfubenamabibe.

*Yesuse wengo bainobo galini Filadelfia bib seli baabesebe.*

<sup>7</sup> Yesuse imin baatnenea Kobo weng mako bainobo galin nakaia unangai Filadelfia bibo blibi kima bie nakae weng olo dola omfubaneba enangge baabaneba Ne kining eka naka molot nabe. Ne titilo makob komok sume Debite titil sbalo ulab kesoa ne baania Gode bibamo amisalo betelanoko ge baanimo naka maki imin dounamino blimobe. Eka ne baania Amisal olo dounoko ge baanimo naka maki imin betelanamino blim na kesota ne baabkenamabibe.

<sup>8</sup> Ne ib kukub nabibo tekein kebi kesoa ibo wentine! Ib titilo sbalba otane ibo ne wengo bainobo geniba wafu bianiba ne niniino nemtouleblibi mo deitneim blim na kesoa ne amisalo betelabeia ibo taniba am tam unaibo naka make watanea imin dounamino blimobe. <sup>9</sup> Ibo Gululame meletani tekein kebibe, i baaniba Ni Yuda naka kesoa ni Gode meletanobo, ni kukub ayamo wafu biobobo gabib otane i Gode meletanbabe. I dim omin naka kesoa wentine! Ne naka eli dlaia teniba ib skilo kikib ye mesa aala unaniba ib niniino dotouleblibi bianiba ibo baabeniba Gode bobol temo ibo omyem biebo ge baabenomabiobe. <sup>10</sup> Ne ibo baabeniba Enin sum osa bobol tem abil osa tam tlo mole ib bainobo galino sbalma wafueine gabio ibo ne wengo wenteniba wafu blib kesoa dabalim nakaia unangai enin sum osa bobol tem abil osa i dimo tam tlanoo dlananang gamo dimo ibole ne kimaia ib dimo mo tam tlamabobabe.

<sup>11</sup> Ne hebmamsab tlamabi kesoa ib bainobo galino wafu blibi nekek ge wafueine! Ibo bainobo galino sbalma wafunib mole ayam nomabiobe. Ibo inanimo naka maki mo baabeniba Ibo aseinin bib unine ge baabeibta ibo aseinin bibo mo unaibbabe. <sup>12</sup> Nakai wanita kukub misiamo Yeye geniba ombiaib mole ne dlanamabi kesoa i Gode amo mo deibo unomabibbabe. I amit God esu ye nomabiobe. Ne inaneme nakae dimo Gode niniino dolabania eka ne niniino mema niniin osa eka Gode bibo niniin osa dolabana namabibe. Bib olo niniino Yelusalem otabe. Mema Yelusalem bib olo abilimo deibonoo daak tlamabobe.

<sup>13</sup> Nakaia unangai wanita Gode Hobe wengo bainobo galin nakaia unangai baabene olo wentib mole kla funa omabbaine! Ne wengo bayotabo ge baa dolanale ge baatnene kesoa ne futan olo dolania Filadelfia bib sel ibo omfubenamabibe.

*Yesuse wengo bainobo galini Leodisia bib seli baabesebe.*

<sup>14</sup> Yesuse imin baatnenea Kobo weng mako bainobo galin nakai Leodisia bibo blibi kima bie nakae weng olo dola omfubaneba enangge baabaneba Ne naka molotobe. Eka ne Gode wengo bain ota omin nabe. Ne amitie Gode wengo bain ota obiania eka sinanggwano Gode baatnenea Kobo abil esa dabal esa klanale gabea ne inamin namin olo klaibio naka neta weng olo baabkenamabibe.

<sup>15-16</sup> Ne ib kukub nabibo tekein kebibe. Ibo sbal maniba ne bobolo funib mole ne klayamobo genamabibe. Eka ibo mo bainobo geim blim kenimib osa ayamobe.

Niminbabe, ne daabeia ib hengmino dei-  
noniba ib bobol temo deskinaniba Gode  
omaniba bainobo genomabiobe. Ina otane  
ib kukubo nabibo ne mo gobo blihbabe.  
Ibo obianiba Ni bainobo galino sbalma  
wafu biobobo gabib otane kla mo wafu  
blihbabe. Kakubuwebiba asa kenoa akil  
dlanino deibonoa kiminin kebio kesoa ne  
ibo fotebenamabibe. <sup>17</sup> Ibo baaniba Ni  
moni osa inamin namin osa homono biben-  
abio kesoa ni tekanamino blimobo gabib  
otane ib bobol temo funino molotbabe. Ibo  
kla mo tekein kebibbabe. Ibo makob  
nakaia unangai inamin namin blimi kino  
tum gebenobua aal keim haablibi ulabobe.  
Ibo naka ayam unang ayambabe. <sup>18</sup> Eka  
ne weng mako baabenamabibe. Ibo fun-  
aniba Ni bobol temo Gode kin dimo ayam  
anomo ge funaniba teniba nesu tlaniba  
baatnenimibo ne inamin namin ayam  
doyamabibe. Ne tom gol ayame ase obat-  
diniiba kibanea ayam anebue ohyamabibe.  
Kukub olo makob sino ibo inamin namino  
blim blih otane memalo inamin namin  
sanomabiobe. Eka youm nama esa dohya  
ibo dubusaniba kukub olo makob sino  
ibo aal keim bianiba aal gembib otane  
memalo youm nama ele dubusaniba aal  
deibo walomabiobe. Eka kin malasin  
ayam esa obya ib kino baniba sino ib kino  
tumo gebenobu otane memalo webiabenoa  
temomabiobe.

<sup>19</sup> Ne naka maki gobe blia i kukub  
misiamo wafueib mole ne yenania i  
kukub misiamo nanimibo dlo klaia  
tekein kenomabib kesoa ibo kukub olo  
kla funaniba ib bobol temo deskinaine!  
<sup>20</sup> Ibo ne wengo wentine! Ne nakaia  
unangai bobol temo nano gabio kukub olo  
makob ne amit ele mabiania amisalo gong  
gong gabi kesoa nakai wanita ne wengo  
wenteniba amisalo betelatnenib mole ne  
tania i am tam tenia item netem nabianoba  
imeno wembianoba nomabbioibe.

<sup>21</sup> Nakai wanita kukub misiamo Yeye  
geniba ombiaib biamo ne nakaia unangai  
kimanamabi dimo baabeniba Ibo ne biin  
dim ele touniba makob sino ne kukub  
misiamo Yeye ge ombiania Aye biin dimo  
tombli inaine ge baabenamabibe.

<sup>22</sup> Nakaia unangai wanita Gode Hobe  
wengo bainobo galin nakaia unangai  
baabene olo wentib mole kla funa  
omabbaine! Ne wengo bayotabo ge  
baa dolanale ge baaatnene kesoa ne  
futan olo dolania Leodisia bib sel ibo  
omfubenamabibe.

#### 4

*Nakaia unangai abilim ut blihi Gode  
niniino dobtouleb bliha yatemiobiobe.*

<sup>1</sup> Weng olo onebo blimanoa omi to ne  
temia abilimo amisalo betelanoa eka weng  
mako sino bigul weng dikine obabiba wen-  
tibuo baanoa Kobo ute asal ele tleba ne  
inamin namino mitdanoa tam tlamabo ale-  
bkenano gesoa wentena bia <sup>2</sup> hebmamsab  
Hobe nemeb utnea abilim ut dasea temia  
komokwali biino dimo naka make toubia  
atemie <sup>3</sup> e kibio makob tomo moni sumo  
yasba esa eka tom ilemo konilian osa o  
undim inamin dat genebua kwese komok-  
wali biino ge omfakanebua watemibe.  
Kwese ele itanasitobe. Makob tome niniino  
emelale undim inaminobe. <sup>4</sup> Biino 24 o  
komoke biino kwese ge omfakabio haleb  
wat danao watenoa tib ele geke bino  
ge dofakabua komokwali biin olo dimo  
toula blihi youmo namabe. Eka i gaba-  
mono komokwali has golo otabbaiobiobe.  
<sup>5</sup> Komoke biin toubie wato timine balala  
genea ame ngambianea ayalo <sup>7</sup> o komoke  
biin olo kibi kaba sin ye bomat ge tububua  
watemio ayalo <sup>7</sup> olo Gode Hobe titilo <sup>7</sup> o  
bibabu etabe. <sup>6</sup> Komoke biino kibi kaba  
sin dao aamuk beselibe mousia inamin  
naminao blim makob aakikit inamine bin-  
ing genebiotabe. Eka inamin namin maki  
asuke asuke na ele blih eli afen smiksabe.

I komoke biin olo ge omfakanibua  
yatemi eli kino homonobe. Kibi kaba sin  
da osa abuk da osa alukum kino unabuau  
benobiotabe. <sup>7</sup> Mak ele makob til laione  
ulabobe. Eka mak ele makob eil blumakau  
imake ulabobe. Eka mak ele makob nakai  
kibisabe. Eka mak ele makob wan filfil  
dlobumin sume ei unang genea belo tebe-  
talonabe ulabobe. <sup>8</sup> Elekiem elekiem i belo  
6 obe. Eka i bel osa kinsabe. I belo dang da  
osa ablan da osa kino unabuau benobiobe.  
I tab dim osa kwinomo dim osa amitie anso  
ngambianiba

God Sume inamin namino titilsabo,  
elekiem eleta kiningobo, elekiem  
eleta kiningobo, elekiem eleta  
kingingobo, sino binabebua eka  
memalosa biebo, sinanomosa  
biamabebo ge ngambianiba

<sup>9</sup> Gode biin dimo toubie niniino  
dobtouleb bianiba obianiba Ayamobo, e  
naka sbalobo, e amit ninobo ge ohabiba  
<sup>10</sup> eka komokwali 24 i e biin dimo toubio  
kikib ele aala unaniba kintalin nakae biin  
dimo toubie ele niniino dobtouleb bianiba  
i has golo gabam otabbumino deloniba  
komoke biino kikib ye olasiba yatemia  
tekein kenia I titil olo God esu data tlobo  
geibiobe. I inaniba anso ngambianiba

<sup>11</sup> Kobo God ni Sumobo, keb kukubo  
ayamobo, ni keb niniino kentouleb  
nob mole ayamobe. Ni oke bianoba  
Kobo naka sbalobo ge okemob osa

ayamobe. Eka ni oke bianoba Kobo Sumobo ge okemob osa ayamobe. Niminbabe, kobo inamin namino abilim uto bu osa eka dabalim olo bu osa klanebbiobe. Kleb bobol tem funin ye funaneba Ne inamin namin olo klanano geneb kesoa inaneba klanebbiobo ge ngambibta yatemibe.

## 5

*Yone buk mako geibbua watemsebe.*

<sup>1</sup> Nakae komoke biin dimo toubi ele kweile kweita sine buk mako wafu bia watemio i buk olo temo tib olosa amun tem osa dolaniba goholo geniba eka halo 7 tebeloniba buk olo keno basalabonibbiotabe. <sup>2</sup> Eka ne abisake make atemie e naka sbalobe. E weng sum ngambianea baanea Naka molote waneta hal olo waaneta buko bamtabanamabene? ge ngambea atemio <sup>3</sup> Nakai abilim osa eka dabalim osa eka dabal tem osa bliib buk olo bamtabaniba kinamino blimobe. <sup>4</sup> Naka molote biane buko olo bamtabanea amun temo watenamin nakai blim kesoa ne yatemnia amitie mebia <sup>5</sup> eka komok make baatnenea Kobo mo memebe! Yudae molofeit make bi ele e titilo makob til laioni titilo ulabobe. E komok sume Debite molofeitobe. E Gulume gaisanebio kesoa buk olo bamtabanea halo 7 o geibbi olo waanamabebo ge baatnenebe.

*Yone eil sibsib mene Yesuse atemsebe.*

<sup>6</sup> Eka ne eil sibsib mene makob sino i anaiba kaanebue e ulab mabia atemia e komoke biin osa eka inamin namini afen smiksai asuke asuke na isa eka komokwal isa i isak tem daak mabia atemie e gemo 7 eka e kino 7 nabe. Olo makob Gode Hobe titilo 7 otabe. E omane monoa dabalim olo alukum onon tlanoa watemna bia <sup>7</sup> komoke biin dimo toubi ele buko e kweile kweita sine wafu bia eil sibsib mene omeisasea <sup>8</sup> inamin namini afen smiksai asuke asuke na elisa eka komokwali 24 isa eil sibsib mene kikib ele mesa aala unaniba e niniino dobtouleb bianiba komokwal eli alukum elekiem elekiem i gita osa eka dis gol osa wafu otouleb bliib olo temo bolit inamino kika baniba aso otanaibbua eimbianoa tang ayame kumbe dis olo temo sibbenobua watemi olo makob bainobo galin nakaia unangai beten kehabiba i wengo ulanoa God esu unebinabo otabe. <sup>9</sup> Eka i mema ans mako enangge ngambianiba

Kobo naka molot kesoa inaneba buk olo omoneba halo 7 olo waanamabeobe. Niminbabe, i kanaiba kaaneba keb ilem ota nakaia unangai dabalim

olo bliib alukum naka mit afet isa eka weng afet isa eka aal afet isa eka bib mak bib mak sel isa alukum walubeneba i God emi aibbiobe. <sup>10</sup> Kobo inaneba walubenebua kima bieb kesoa i Gode niniino dobtouleb bianiba e okoko klabianiba eka nakaia unangai maki dabalimo bliib kimanomabiobo ge ngambiba wentibe.

*Eil sibsib mene niniino dobtouleb binibiobe.*

<sup>11</sup> Eka abiseli dot homoni kiminbai teniba komoke biin osa eka komokwali 24 isa eka inamin namini afen smiksa elisa ge dlakasiba yatemna bia <sup>12</sup> i weng sum ngambianiba

Eil sibsib mene anaibbu ele sumobe. E titilsabe. Eka e inamin namin ayam osa biba biobo, eka e tekein kemino ayam eka titilo sbal nabe. Inamin kesoa nakaia unangai e niniino dobtouleb bianiba eka e seinha bianiba E ayamobo ge oha bianomabiobo ge ngambiba wentena bia

<sup>13</sup> eka inamin namini Gode klanebuei abilim ut bliib isa eka dabalim olo bliib isa eka dabal tem daako bliib isa eka aaye sole dang daak bliib isa baaniba

Ni komoke biin dimo toubie elesa eil sibsib men esa i niniino ni amitie dobtouleb biobobe. I sum eka ayam nabe. I titilo sumobe. I kukub ayamo mo blimubenamabobabe. I kukubo amit ninobo ge obiba

<sup>14</sup> eka inamin namini asuke asuke nai afen smiksa isa baaniba Bainobo genabiiba eka komokwali dlong dlong golbua toulaniba i dum i niniino dotouleb na bliiba yatemibe.

## 6

*Eil sibsib mene buko halo 7 o waanebiobe.*

<sup>1</sup> Eka ne temia eil sibsib mene buko halo 7 geibbuo wafu omonea hale wane waisasea ne wentia inamin namini afen smiksai asuke asuke na eli make weng sumo makob am nganain kenea baanea Kobo tele gesea

<sup>2</sup> temia til hos namae dim uto nakae ane afunea toubia debeb tesea atemna bia e gabam otabbumine makob komokwali gabam otabbumino ulabe obaliba obtabaneba monea nakai awao gembiane e tata kenea atemie.

<sup>3</sup> Eka eil sibsib mene buko hale tue waisasea ne wentia inamin namini afen smiksai mak esak baanea Kobo tele gesea <sup>4</sup> eka hos make tlea atemie ilemobe. I nakae hos ele dime toubie bainat teke tabaniba

titilo omanasiba e monea nakaia unangai awao mo gembibbai isu ye unanea dlabmanea i sinwalo awa gembianiba yenaseseniba yatemibe.

<sup>5</sup> Eka eil sibsib mene hale tlie waisasea ne wentia inamin namini afen smiksai mak esak baanea Kobo tele gesea temia til hos milile dim uto nakae e kweile skele afunea toubia debeb tesea atemna biana <sup>6</sup> wentia weng mako inamin namini asuke asuke nai afen smiksa eli isak tem wato baanoa Imeno blimano kesoa ibo blete elekieme walom gaibo e monio sum omfaniba makob am olokiemo okok moni ota kinibta waline! Eka imeno asumatna walom gaib osa o monio makob am olokiemo okok moni ota kinibta waline! Ibo inanomabib otane wel aayo imen baka fumin osa eka waen aay osa o moni sumo mo walaibe! O damo asiam homono sma bio kesoa o monio men waline gesoa wentibe.

<sup>7</sup> Eka eil sibsib mene buko hale foe waisasea ne wentia inamin namini asuke asuke nai afen smiksa eli mak esak baanea Kobo tele gesea <sup>8</sup> temia til hos ngameine dim uto nakae toubia debeb tle ele e niniino Nakai Yenanea Kaanomabib etabe. Eka e tebea naka make e niniino Bib Misiamе dobsileb bia tesiba yatemna bia asu dab eli nakaia unangai dolmina bianiba mito asuke asuke na dla tlaniba mito olokiemi yaloniba eka mit asumatnai deibe deibe bliba yatemna bia Gode i dabo nakaia unangai yemomabibo titilo afet omyenea i titil olo omoniba maki bainat dum yantoubiba kulilabiba eka mak ile imaye imen teb sumo yaloa kulilabiba eka mak ile ginin sumo omubenoa kulilabiba eka mak ile eil halebi teniba yalo wembiam nabiba yatemibe.

<sup>9</sup> Eka eil sibsib mene buko hale faibe waisasea ne temia kulila binabibi smiki Gode heitdahamin biin sumo tabab tem daak bianiba sino naka eli Gode wengo sbal maniba wafu bianiba omkayebiba o dafa ota wasi nakai yebinihbio kesoa <sup>10</sup> smik eli ngambianiba Sum kobo inamin namino komok sumobo kobo kiningobe. Eka keb kukubo molotobo, amo fatnamin bli-manota nakaia unangai dabalim olo bianiba ni yebinihbuei yananeba ni gabamo kibenamabebe? ge ngansiba <sup>11</sup> yatemna bia e youm teke namao elekiem elekiem dobyen tlanea baabenea Ibo sinanabihte! Ne bainobo galin nakaia unangai makob ib okok olo ulab okok kebibi dlakania ibo ne wengo sbal maniba omkayemibo inamin ita wasi nakai teniba yenaiba kaanomabiobo geibu eli alukum yenaiba kaanimib dim ota ne wasi naka eli yananita

ib gabamo kibenamabibo ge baabenea yatemibe.

<sup>12</sup> Eka eil sibsib mene buko hale sikise waisasea ne imin temia meimei sume dabalim olo tlebianea eka afoko mililanoa makob am gwam gwam tem inanoa eka alim ele ilem ananea watemna bia <sup>13</sup> eka abilim uto awitnino dalbi daak te dabalim ele tloa watemio makob asiamo balinobua mo yamaim blim bua glole tenea dilubosea nanabo inanota watemibe. <sup>14</sup> Abil esa makob biin tan mato gemelo genabib inanea unea eka amgolim osa aaubil osa o alango deibonoa debel onon tlanoa watemna bia <sup>15</sup> dabalim olo komokwal isa eka nakai niniin sum isa eka awa genalin nakai kimanin naka isa eka monisa naka isa eka naka sbal isa eka nakai naka maki kima bliba i kima blib nakai okoko okok keyemin naka isa eka nakai inamin namino imaye kima bianiba ili bobol tem okok kemim naka isa i amitie tom tem osa eka smeo amgolimo tabab tababo o tem osa ayok toulu bianiba ngambianiba <sup>16</sup> Amgolim obo hela teneba ni olububeneba komoke biin dimo toubianea temebe deibo waisaneba eka eil sibsib mene ni alo tlihabo deib osa waisananale! <sup>17</sup> Niminbabe, i ni alo tliaubenoa ni kukub misiamo yang kenomabib amo tlo kesoa ni mo gaisonomabobbabo ge ngambiba yatemibe.

## 7

*Islel nakai 144,000 ita Gode niniino omeisaibobe.*

<sup>1</sup> Inamin namim olo blimanoa omi to ne temia abiseli asuke asuke naniba dabale kene asuke asuke nae bikinebio ye maniba glole deibo waisaniba e dabalim olo mo tlim blim eka aaye sole dang dim osa mo tlim blim eka aso dim osa mo tlemin blim kenasea atemna bia <sup>2</sup> eka abisake make tenea afoko tlebo sin da ye tlanea e kweile kweitale God kintaline niniino wafunea abiseli asuke asuke na eli dabal esa eka aaye sol esa watwat dabonamino titilsa kesoa nganye bianea <sup>3</sup> Ibo dabal esa aaye sol esa as osa hebmamsabo mo watwat dabonimibe, debliba ni Gode niniino e okok nakai debelon dimo dolabenoba e naka eli kimaseta omi to ibo dabal esa aaye sol esa as osa o tlon watwat dabueine ge nganse <sup>4</sup> eka Islel nakaia unangai isak temo Gode niniino i debelon dimo dolabeibbu eli kinamino makob 144,000 obo ge baanibta wentibe. Nakaia unanga eli Isleli mito <sup>12</sup> i isak temo blib itabe. <sup>5</sup> Gode niniino i debelon dimo dolaibbuei Yudaе meletani 12,000 isa eka Lubene meletani 12,000 isa eka Gate meletani 12,000 isa <sup>6</sup> eka Asae meletani

12,000 isa eka Naftalaie meletani 12,000 isa eka Manasae meletani 12,000 isa <sup>7</sup> eka Simione meletani 12,000 isa eka Libaie meletani 12,000 isa eka Isakae meletani 12,000 isa <sup>8</sup> eka Sebyulane meletani 12,000 isa eka Yosebe meletani 12,000 isa eka Bensamine meletani 12,000 isa ita Gode niniino i debelon dimo dolaibbiota ne yatemibe.

*Yone naka homon unang homoni Gode niniino dobtouleb blibta yatemebiobe.*

<sup>9</sup> Olo blimanao omoto ne imin temia naka homon unang homoni mibliba yatemie ki-naminamo blimobe. Nakaia unangai dabalim olo bib mak bib mako blib isa eka naka mit afet isa eka aal afet isa eka weng afet isa i youm teke namao dlusaniba komoke biin osa eka eil sibsib men esa i kibi kaba sin ye maniba seinye bianiba afok dabo aano wafu otouleb bianiba olasam bianiba <sup>10</sup> anso enangge ngambianiba

Nib Sume Gode komoke biin dimo toubi esa eka eil sibsib men esa i dumo nibo hengmino temo biobo dotlanib-bua memalo nibo klayam biobobo ge ngambiba yatemibe.

<sup>11</sup> Eka abiseli alukum maniba komoke biin osa eka komokwal isa eka inamin namini asuke asuke nai afen smiksa isa ge dla waiseniba komoke biino kibi kaba sin ye mesa aala unaniba Gode niniino dobtouleb bianiba <sup>12</sup> baaniba

Bainobo, nib Gode kla seinha bianobte!  
E titilo sumobo, e bobol tem funino ayam kesoa nibo ayamobo ge baanoba e niniino dobtouleb nomo! Titil sbalo e dim wat biobo, olo alukum elemi amit ninobo ge ngambiba yatemibe.

*Naka eli enino blimanobe.*

<sup>13</sup> Eka komok make baatnenea Nakai youm teke namao dlusa blib eli wanite? I fatda tlibbue? gesea <sup>14</sup> ne baabania Sum kobo ne mo tekein kebibabo, kebmaye tekein kebeobo gesia e baatnenea Wasi nakai naka eli enina kukub misiamao omkayebib otane i sbal maniba eil sibsib mene ilemo i youmo fubaiba namanobio kesoa <sup>15</sup> tab dim osa kwinomo dim osa i Gode biino kibi kaba sin da ye mabianiba Gode am sumo temo amitie Gode niniino dobtouleb blib kesoa nakae komoke biin dimo toubi eleta i kimanamabebe. <sup>16</sup> E inanea kimanamabeo i imena aayao tebo mo yebianoa eka afoko mo ula bianiba mimino mo yebiam nomobabe. <sup>17</sup> Niminbabe, eil sibsib mene komoke biino kibi kaba sin ye bianea i kimanamabebe. E makob eil sibsib kimanin nakae ulab anea dleb monea afen smik aay esu ye

danea doweiba Gode i memin osa omtlabenea i imino mo memomabibbabo ge baatnenebe.

## 8

*Eil sibsib mene buko hale sebene waisas-ebe.*

<sup>1</sup> Eka omoto eil sibsib mene buko hale sebene waisanamabe dimo abilim uto inamin namino unino blim eka wengo blim nabua afok smiko olokiemo atosin ese mak blimanao <sup>2</sup> omoto ne imin temia abiseli <sup>7</sup> i Gode kibi kaba sin da ye mabinabibi bigulo <sup>7</sup> o oloniba elekiem ke afu afu tlaniba yatemna bia <sup>3</sup> eka abisak mak ele Gode heitdahamin biin sumo osu ye manea dis gole afu bia eka Gode heitdahamin biin sumo dim uto ase eimbe kesoa i bolit inamine tang kunin ayame obaliba obonea as ele tem wat obatounea atum tang ayamo utnoa Gode kunubanoa watemi olo makob bainobo galin nakaia unangai Gode beten kehabela i wengo utnoa God esu us unebo otabe. <sup>4</sup> Eka bolit inamine tang kunin ele atum esa eka bainobo galino nakaia unangai beten weng osa alukum abisak esuo deibanooa fot ge utnoa God esu ut temoa <sup>5</sup> eka omoto abisak ele dise dobonea Gode heitdahamin biin sumo dim uto akgwale dalonea dise tem daak obabbanea obbiane daaknea dabalim daak blelanea am sume ngambianea bil wenge umbianea timine tilana bianea eka dabale fiba biam namea watemibe.

*Abiseli bigulo olanom genabiobe.*

<sup>6</sup> Eka abiseli <sup>7</sup> i bigulo <sup>7</sup> o wafuniba oleb watniba sital dim wat ola bianiba <sup>7</sup> wan emie obasea aiso makob tom uning gwabo ulab osa eka as osa ilem baka kwekonooa ditou daaknoa dabalim daak blelanoa dabal esa as osa mito asumatnan tlanooa watemna bia dabale atosine kibanea mit asu ota deibonea eka as osak atosino kibanoa mito asu yota deibonanoa eka bukuban ole alukum kibanoa watemna bia

<sup>8</sup> eka abisake tu esak e bigule obanea amgolimo ulabo aso eimbo as yeb baka hela watnoa aaye sole dang wat blelanoa oleb daak unooa aaye sole mito asumatnanea make deskinea ilem anea <sup>9</sup> inamin namini aaye sole tem daak blibi mito asumatnaniba mit mak ile kaaiiba eka siibo aaye sole dang bu osa mito asumatnanea make misiam anea atemna bia

<sup>10-11</sup> eka abisake tli esak e bigule obanea aayo ayamo unino mito asumatnanea awitnin sumo o niniino Koko aso ulanoa makob atol inanoa abilimo deibonooa omein daak tlanooa banoa aaye make deskinea kok anea naka homoni aay ele downoiba yananea kulilafaiba yatemna bia

<sup>12</sup> eka abisake fo esak e bigule obanea afoko kla tubunamino denoa kiminoa sismik anoa eka alima awitnina osa inanoa kla einamino deibonoa sismik ano kesoa tab dimo afoko klao mo tubueim blim kena bianoa eka kwinomo dimo osa alima awitnina osa klao mo einim blim kenoa mililanoa watemna biana

<sup>13</sup> eka imin temia wan fifil dlobumin sume abilim ut eim haabianea ngambianea Ayoo! Ayoo! Ayoo! Nakaia unangai dabalim daak blibi ne dohalimbibe. Abiseli asumatnai bigulo olanom genabibo olanimibo kukub misiamio ib dimo tam tlamabobo ge ngambiam nabea watemibe.

## 9

### *Abisake faibe bigule obanebiobe.*

<sup>1</sup> Eka abisake faibe bigule obasea ne imin temia awitnin mako sino abilimo deibonoa dala daakenoa dabalim ele tlobinabo nakabe. E kwiam bil amit teme tamalaim blim amit holo uebue amisalo kie e tabaliba <sup>2</sup> amisal olo betelanea atume makob as beselibo eim bianoa atumo nabinabo inanoa atum eleta afoko ge waisonea mililanoa <sup>3</sup> eka bemamini homoni makob kwengi ulabi atum ele deibaniba daakniba dabalim daak unaniba i titilo makob takum hoki titilo ulabobe. <sup>4</sup> I weng mako baabenoa Ibo bukuban osa as osa eka inamin namino damibo damambo osa mo watwat dabonimibe! Eka nakaia unangai Gode niniino i debelon dimo bibe bio isa mo yantumu namibe! Ibo nakaia unangai Gode niniino i debelon dimo blim ita yantumu namine! <sup>5</sup> Ibo naka eli enino omkayemomabibo alimo asuke asuke make nao blimanamabobo, otane mo yenaibta kaanimibe, besa enin ota omkayemine gesoa kweng eli nakai enino omkayebiba yatemio makob takum hoki nakai yantamaniba enye binabo inayebibta yatemibe. <sup>6</sup> Am olo tamo nakai funaniba Enino inayebo yole ni kaanamino omubesoa kaanoba de unomo genomabib otane i kaanamino mo omubenota kaanomabibbabe. I sma afen bianiba enin kino watememomabiobe.

<sup>7</sup> Ne kweng eli yatemio i makob til hos kimanin nakai awa genom geniba til hosi eito kibeniba has golo otabbebenabib inaniba eka i kibio makob nakai kibio ulab aniba <sup>8</sup> eka i gabaman osa tekebe, makob unang makai gabamansabe. I sitono makob til laioni sitono ulabobe. <sup>9</sup> I tubo makob youm kaba inaminobe. Eka i bel weng ole makob til hosi kimanin nakai awa genalom geniba kaliso til hosi ogibesiba bubo oleb bebiba nikit neket binabo inaminobe. <sup>10</sup> I atongo makob takum hoki atongo ulabobe.

I nakaia unangai atong dum yantumu nabianiba enino omkayemomabibo alimo asuke asuke make nao blimanamabobe.

<sup>11</sup> I komok esa biebe. Kwiam bil amite tamalaim blim amit holo uebue kima bie nakae i komokobe. Hiblu wengo e niniino dabaniba Abadon ge oha binabiobe. Eka Glik ile dabaniba Abolion ge ohabiam binabiobe. E niniino olo mitnakaamo makob inamin namino watwat dabonamin nakabe.

<sup>12</sup> Wentine! Kukub misiamio mako bli-man otane asuo sma biobe. Imin tam tlamabobe.

### *Abisake sikise e bigule obanebiobe.*

<sup>13</sup> Eka abisake sikise e bigule obasea ne wentia Gode heitdahamin biin sumo gol klaibbua Gode kibi kaba sin ye buo o ulamo asuke asuke nao gemsabe, o tem wato <sup>14</sup> weng mako abisake sikise bigule obtou bie baabanoa Abiseli asuke asuke nai aay sume niniino Yufletis teman ye klabutam blibo kobo tileisenale gesoa wentena bia <sup>15</sup> Gode i amo kibenea afok smik osa am osa alim osa bifol osa yo dimo tlamota yenaine genebua blibo am olo tlo kesoa abiseli asuke asuke na eli tileisenea baabene Ibo nakaia unangai dabalim olo blibi alukum mito asumatna dlaniba mit maki yenaine ge baabesea <sup>16</sup> eka weng mako baanoa Awa genalin nakai til hosi dim ut toula blibi kinamino makob 200 milionobo ge nanao wentibe. <sup>17-18</sup> Eka nakai til hosi dim ut toula bliba yatemie i tubo kesa youmo dlusanib biotabe. Maki ilem dlusaniba eka maki mokim dlusaniba eka maki ngamein dlusa naibbiotabe. Eka til hosi gabam ole til laioni gabamo ulabobe. Atol osa atum osa eka tomo kibanoa gwaliang genobu osa i anang tem wat danao fotowa monoa nakaia unangai mit asumatnai dabalim olo blibi mit maki yaloo kulilaiba mit asu ita deibenoa yatemibe. <sup>19</sup> Til hos eli titil ole mako anang tem watnoa eka mako unsano dim tab nabiobe. I unsano mutum meto inabi gabamo ulabobe. I olo dum ota nakai yantumu nabibta yatemibe.

<sup>20</sup> Inamin namin misiam olo nakaia unangai dimo tam tloa maki kulilaib otane maki sma blib ile i bobol temo mo deskinanibta inamin namino ima kweilo tubu klabibo mo debueim blimobe. I hob misiami gwamikilamin kukub osa eka god dim omino tom gol osa silba osa blas osa eka tom afet osa as osa o kin blim klang blim eka o mo haaninbao imaye klaibbuo niniino omtouleb nin kukub osa sma ye wafu bianiba <sup>21</sup> naka maki yebiba kulila biam eka kel wabiam eka tamano henga biam eka ayoko hembiam bianiba i kukub olo nabibo i bobol temo mo deskinanibta abuk waulibta yatemim blimobe.

## 10

*Abisake Yone buko omalea downsebe.*

<sup>1</sup> Omito abisake sbale abilim ut danea tlea ne atemio ayungo ge dabakanoa eka kwese e gabam oub dim uto gebane biotabe. E kibio bomat genoa makob afok tubunabo inanoa eka e skila afuna kumunao makob atolo blit blita binabo inaminobe. <sup>2</sup> E buk gwabo bamtabanobua wafunea e skile kweita sine aaye sole dang wat tamanea eka afan sin ele dabalim ele tama nanea atemna bia <sup>3</sup> e weng sumo makob til laioni weng ngambinabib inanea ngananabea eka am sumo <sup>7</sup> ngambianoa <sup>4</sup> wengo obiam namsoa ne dolanamabi otane weng mako abilim ut danao baanoa Yeye, kobo weng olo mo dolanemebe, besa funale ge baatnesoa wentena bia <sup>5</sup> eka abisake sino e skilono make aaye sole dang dim wat tamanea eka milim sine dabalim ele tama nabia atemie kweile kweita sine tofanea <sup>6</sup> Gode kintaline abil esa inamin namino abilimo bu osa eka dabal esa inamin namino dabalimo bu osa eka aaye sol esa inamin namino e dang dimo bu osa klanebu ele niniino taisanea baanea Am olo tlang gamo hebmsansab tlamabobo gesea atemibe. <sup>7</sup> Sinanggwano Gode kukub ayoko wengo e weng omkeimalin naka ita omkaye binebu otane am olo dimo abisake sebene e bigule obanang game dimo kukub olo bain inanoa tam tlamabobe.

<sup>8</sup> Eka sino weng mako abilim ut danao baatnenoa wentio imin baatnenoa Kobo moneba abisake aaye sol esa eka dabal esa o dim wat mabie e kweilon dimo buk gwabo bamtabanobuo e wafu om-toubiebo, omone ge baatneno kesoa <sup>9</sup> ne monia abisak esu unania baabania Kobo buk gwab olo omnene gesia e baatnenea Omoneba downale o downang gaebo mema omatdanemebo kin gam dikin otane dukgeneba unamota kokobo ge baatnenea <sup>10</sup> omesania kin gam inamin dowei otane anang tem daako koke tamatnenea <sup>11</sup> weng mako baatnenoa Kobo Gode weng olo imin omkeimaneba inamin namin kukubo naka homon unang homoni bib mak bib mak ye blib isa eka weng afet isa eka komok sum isa i dimo tam tlamabo wengo baabenale genoa wentibe.

## 11

*Naka asunai wengo omkeimaibbiobe.*

<sup>1</sup> Abisake as kimine makob fongo ulabe tobnenea eka Gode wengo enangge baabanea omeh tleo ne baatnenea Gode baanea Kobo hananeba ne am sum osa eka ne heitdanemin biin osa kineba eka nakaia unangai ne niniino nemtoulebbinabibi kinanale! <sup>2</sup> Kobo inanemebo ne

am sumo daam temo bib da tammo mo kinemebe! O deibonale! Bib olo bainobo galinbai bibobe. I Yelusalem bibo watwat dawemomabibo alimo <sup>42</sup> blimanota <sup>3</sup> ne titilo naka asu dabi ne wengo omkeimabibi omyita i nakaia unangai kukub misiama yateniba i bobolo ilum omfubenoa dohalinin youmo dlusaniba ne wengo omkeimabibta amo <sup>1,260</sup> blim anamabobo genebo ge baatnenea wentibe.

<sup>4</sup> I dabo makob as olibo asuke nabua eka ayalo asuke nanao dabal ele sume kibi kaba sin ye mabio ulabobe. <sup>5</sup> Nakai naka asu dab eli yenanom gaibo i sital dimo akil sume tam tlea wasi naka eli ulaniba kaanomabiobe. <sup>6</sup> Eka i Gode wengo omkeimamomabibo i titilsa kesoa abile watanimibo soko mo tlamabobabe. Eka i aay osa ilem anoko genimibo ilem anamabobe. Eka i nakaia unangai dabalim ele blibi inamin namin ginino omkaye bianiba watwat dayemino titilsabe. I dabo inamin namin kukub afeto nayemom gaib osa amitie inayemomabiobe.

<sup>7</sup> I Gode wengo omkeimabibo bli-manoo kulan halebe kwiam bil amit teme tamalaim blim holo unebue bie deibanea utlanea asu dabi tem naniba awa genan deniba e tata kenea yenanea kaanomabiobe. <sup>8</sup> I dabi damo bib sumo bib dang ye biamabobe. Nibo o niniino saa wengo owe bianoba Sodom osa Isib osa otabo ge owe binabuobe. Bib olota i Sume atdimoo kaanebiobe. <sup>9</sup> Nakaia unangai aalo afet isa eka naka mit mak afet isa eka bib mak bib mak sel isa eka weng afet isa alukum naka eli kaaibbuo yatememomabibo amo asumatna keniba mak ole atosin ota blimanamabobe. I inanomabibo naka maki asu dabi dleb moniba dolbunom gaibo i tolobo geiba deibenomabiobe. <sup>10</sup> Eka nakaia unangai asu dabi kanketa kaaibobo geniba seinye bianiba i nekwali inamin namino doymabiobe. Niminbabe, Gode weng omkeimalin naka eli nakaia unangai dabalim ele blibi bobol tem abilo omkaye binib kesoa i inanomabiobe.

<sup>11</sup> Amo asumatna keniba mak ole atosin ota bliman ole Gode hobo fugene monoo asu dabi amun temo unoo hana masiba nakaia unangai yatemniba tosiansiba yatamna bia <sup>12</sup> weng mako abilim ut danao nganabenoa Ib dabo ele utline ge nganabeso ayung temte ulaniba abilim uniba wasi nakai yatemebiba <sup>13</sup> eka am olo olo dim ota meimee sume tlemsea nakaia unangai <sup>7,000</sup> i kulilafaiba eka bib olo temo naka mit homoni blibo mit maki bibo watwat danea mit maki bib ota <sup>9</sup> deibo nanea eka nakaia unangai mak ile sma



bianiba kla tosiam bianiba Gode abilim uto bie niniino dobtoulebliba yatemiibe.

<sup>14</sup>Wentine! Kukub misiamo asuo bliman otane olokiemo sma tam tlamabobe.

*Abisake sebene e bigule obanebiobe.*

<sup>15</sup>Abisake sebene e bigule obasea naka homoni abilimo blibi ngambianiba Sino Gululame dabal e kima bianiba otane memalo e kimanano blimanobe. Nib Sum esa eka e Dofakamin Naka esa i Gululame gaisaniba i amit ye dabalim olo komok aniba kimanomabiobo ge ngansiba wentena bia <sup>16</sup> eka komokwali 24 i komokwali biino Gode kibi kaba sin ye touda blibi Gode kibi kaba sin ye aala unaniba e niniino dobtoulebliba <sup>17</sup> baaniba God Sum kobo alukum inamin namino titilsabo, kobo sino amitie binabebua memalosa amitie biamabeobe. Kobo titilsa kesoa memalo nakaia unanga eli kimanamabebo ni gangobo gabuobe. <sup>18</sup> Dabalim nakai sino keb alo tliyebo otane memalo keb atlikemino gaisenobe. Memalo kulila binabibi kot kenamin amo tobe. Memalo keb okok nakai keb wengo omkeimabib isa eka nakaia unangai kobo bainobo gabib isa eka nakaia unangai niniin sum isa niniin men isa keb niniino kemtoulebliba isa inamin namin ayamo alukum doyamabebo otane nakaia unangai dabalim olo inamin namino watwat dabib ile kebsak i watwat dabenamabeobo gesiba wentena bia <sup>19</sup> omito Gode am sumo abilim ut buo amisalo betelanoa Gode bain wengo omyebuoto olo bokiso watemna bia eka timine tila bianea bil weng mako umbianoa eka ame ngambianea eka dabale fiba bianea eka sok sumo tlebianoa aiso tom uning inamino ditou tlebian namota watemibe.

## 12

*Unang osa inab esa itabe.*

<sup>1</sup> Eka abilimo klul mako sumo tam tloa watemio inaminobe. Unang mako afokoyoum gein kenoa eka alim ele o skilono tabab tem daak nabia eka awitnino 12 o o gabamon dim uto makob komokwali gabam otabbumino ulabe obtabbanabua watemio <sup>2</sup> o amunsabe. O mene dofanang genabua enin sumo enwebua ngambota watemibe.

<sup>3</sup> Eka abilimo klul mako imin tam tloa watemi ole inaminobe. Inab beselibe ilemobe. E gabame 7 eka gem ole 10 nabe. Komokwali gabam otabbumino 7 o e gabamon dimo bibabua atemna bia <sup>4</sup> e unsane awitnino atosino glita dibianea dabalim daak unoa mito asuo ota deibonea e funanea Unang olosu ele blia mene dofanomo ana downano genea bia atemiibe. <sup>5</sup> Eka unang olo inanoa mene naka ten

dofanoa Gode hebamsab debeb utnea esu ut danea e biin dimo tounea atemio sinanomo men ele nakaia unangai dabalim olo blibi alukum i komok anea kimanamabebe. E kimanano sbalobe. <sup>6</sup> Gode unang olo bibo ibuantem ye klaubonea o tenoa bib ele bua i kima bianiba imeno dokawebiba amo 1,260 o blimanoko genea klaubonebua o wetou monoa bib olo unoa watemibe.

<sup>7</sup> Omito abilimo Gode bie uto abiseli komoke niniino Maikel esa e meletan isa item nabiba eka inab esa e meletan isa item naniba awa sumo gembib <sup>8</sup> otane Maiklele meletan ita sbal maniba i tata keniba inabe meletani gaiseib kesoa i abilimo fotebeiba deiboniba skilasiba yatemio <sup>9</sup> inab ele sinanggwan inabobe. E Kulan Misiam Gululam etabe. E nakaia unangai dim wengo oyebea i bainobo gabinabib nakabe. Gode abiseli inab ele dobbiaiba daabbemanea dabalim anea e meletan isa dibiaib daak tenaiba yatemiibe.

<sup>10</sup> Omito weng mako abilim ut danao ngambianoa Memalo nib Sume Gode dabalim nakaia unanga ibo Gululame kweiban dimo blibo doisanee olo ni tekein kebuobe, e nib sum anea komok anea kima biebe. Eka e Dofakamin Nakae titilo sum osa keim ananoa watemobebo. Niminbabe, sino naka ele kwinomosa bomanomosa amitie bainobo galin nakaia unanga eli weng sango Gode kin dimo dim oye binabe otane memalo i klayam naniba dobbiaiba daabbema unebe. <sup>11</sup> Eil sibsib mene kaanea ileme singanea e titilo nib nekwali bainobo galini omyenea eka i e wengo omkeimabibo i kaanamino tolo mo tosianim blim kesoa kukub olo i Gululame gaisaibbiobe. <sup>12</sup> Inaibbio kesoa abilimo biob nibo seinomo! Otane dabalimo blib ibsa eka aaye sole tem daak blib ibsa ibo klaine! Ni dohalimbuobe. Niminbabe, Gululame ibsu daak natlanea e funanea Gode ne kukub misiamo yang ketnenamabe dimo meb tlo kesoa ne hebamsab nakaia unangai enin sumo omkayemano ge funanea e alo sumo tlihabua e enin sumo ibo omkayemabebo gesoa wentibe.

<sup>13</sup> Inab ele funanea I nembiaib daakenia dabalim ele tli yole unango mene dofanobu olo wananano genea kan haasea <sup>14</sup> Gode wan fifil sume belo dowensea ei monoa olo bibo ibuantemo e sino klaubonebio ye unanoa inabe deiba uno kesoa i kla kima bianiba imeno dokawemomabibo bifolo asumatna blimanoo eka mak ole alimo atosin ota blimanamabobe. (Amo makob 1,260 be.) <sup>15</sup> Eka inab ele aa usane funanea beselib ei bebianea unang olo kan bebea e funanea Aaye waleb uneko gene <sup>16</sup> otane

dabale daabonea hawabanean usan aay ele ye tem te daabbemanea dabal tem unea <sup>17</sup> eka inabe unang olo alo sumo tli-  
aubanoa monea o memei mak ita yemano  
genea unea atemio nakaia unanga eli Gode  
hekmel weng wafu bianiba Yesuse baino-  
obo gabianiba e wengo omkeimabib itabe.  
<sup>18</sup> Eka inab ele aaye sole ken ye mabia  
atemibe.

### 13

*Kulan halebe aaye sole tem daakanea  
utlebiobe.*

<sup>1</sup> Eka ne imin temia kulan haleb make  
aaye sole tem daak bianea tlea atemi  
ele e gemo 10 eka gabamo 7 nabe. E  
gem olo dim uto komokwali gabam otab-  
bumino 10 otabbanebua e gabam olo  
dimo niniin mako bio niniin olo mit-  
makamo Gode Weng Dobo Weng Ohamin  
Weng otabo genobua watemibe. <sup>2</sup> Ne  
kulan halebe atemi ele tili niniino lebatu  
ulab tleta atemibe. E skilo eil beai  
skilo ulabobe. Eka e sital ole til laioni  
sitalo ulabobe. Eka inabe titil ota kulan  
haleb ele omanea baabanea Ne nakaia  
unangai kima bli nakai kebsa kimanale  
ge baabanebiotabe. <sup>3</sup> Naka make kul-  
an halebe gabamon make belubanebua  
kaanang genabe otane ayamu bane kesoa  
nakaia unangai alukum ateniba dlou  
unaniba bekeba haabliba <sup>4</sup> inab eta kul-  
an haleb ele titilo omalebio kesoa nakaia  
unangai inab ele niniino dobtouleb bianiba  
eka kulan haleb ele niniin osa dobtouleb  
biam nabianiba baaniba Waneta kulan  
haleb ele ulab anamabene? E ulab anamin  
nakai blimobo, eka waneta e gaisanam-  
abene? E gaisanamin nakae blimobo ge  
obiba yatemibe.

<sup>5</sup> Gode kulan haleb ele deiba bia e  
obianea Ne Sumobo ge obianea eka Gode  
weng dobo weng oha biam bianea e kukub  
olosa eka kimanin kukub osa wafu bia  
alimo 42 blimanamabobe. (Am osa makob  
1,260 be.) <sup>6</sup> Eka e God esa e niniin  
osa e bib osa eka e bibam sel isa weng  
dobo weng oyebea <sup>7</sup> Gode kulan haleb  
ele sma ye deiba bia e titilsa kesoa baino-  
obo galin nakaia unangai temnaniba awa  
genan deniba eta gaisenea alukum bib  
mak bib mak sel isa eka mit mak afet  
isa eka weng afet isa eka aal afet isa i  
komok anea atemibe. <sup>8</sup> Nakaia unangai  
dabalimo blibi i niniino Gode dabale mo  
klaim blim bianea buko klanebuo temo  
mo bibebiobai kulan haleb ele niniino  
dobtouleb nomabiobe. Buk olo eil sibsib  
mene i anaiba kaanebue bukobe. Nakaia  
unangai i niniino buk olo temo bibebue  
ita amit nomabiobe. I kulan halebe nini-  
ino mo dobtouleb nomabibbabe. <sup>9</sup> Nakaia

unangai wanita weng olo wentib mole kla  
funa omabbaine! <sup>10</sup> Inaminobe, Gode fu-  
nanea Naka ele klabut aneko ge funane  
mole e monea klabut aneko! Eka e funanea  
Naka make skem dang dum biki anaine  
gene mole skem dang dum biki anaine!  
Yesuse bainobo galin nakaia unanga ib  
dimo kukub olo tam tlubeno mole mo tosia-  
nimibe! Ib bainobo galino sbalma wafu  
blibte!

*Kulan halebe make dabal tem daakanea  
utlebiobe.*

<sup>11</sup> Eka kulan halebe make dabal tem  
daakanea utlea atemie e gemo asube.  
Makob eil sibsib memei gemo ulabobe. Eka  
e weng ole inab sum ele wengo ulabobe.  
<sup>12</sup> Kulan halebe mema tle e titilo makob  
sin tlebue titilo ulabobe. E nakaia unan-  
gai kimanamabeo makob sin tlebue nakaia  
unangai kima bie ulabobe. Eka e nakaia  
unangai dabalim ele blibi baabanea Ibo sin  
tlebue niniino dobtouleb nine! E gabamon  
make belubaibbua kaanang genabe otane  
ayamu banebio kesoa e niniino dobtouleb  
nine gesea atemna bia <sup>13</sup> kulan halebe  
mema tle inanea okok sumo nakaia unan-  
gai sino mo watemim blimo klabianea eka  
kukub mak ole ase abilim uto menganea  
daak te dabalim ele tlea nakaia unangai  
ateme biam nabiba <sup>14</sup> Gode kulan halebe  
abuk tle esa imin inanea deiba bia okok  
homono kulan halebe sin tlebue kin dimo  
klabea nakaia unangai dim omin kukub olo  
wataniba bainobo gabiba baabanea Ibo asa  
inamin namino dloniba kulan halebe sin  
tlebue smike klaniba e niniino dobtouleb  
nine! Sino i skem dang dum anaibbu otane  
e mo kaaim blimobe. Sma afen biebo ge  
oyebea yatemibe. <sup>15</sup> Gode kulan halebe  
mema tlebue deiba bia e hobo kulan halebe  
sin tlebue smike nakai klaibe omalea smik  
ele wengo omea atemibe. Nakai wanita  
smik ele niniino mo dobtouleb nim blim  
keib mole e yenanea kaanomabiobe.

<sup>16</sup> Kulan halebe mema tlebue baanea  
Nakaia unangai alukum niniin gwab ibsa  
eka niniin sum ibsa eka monisa naka ibsa  
moni blim ibsa eka nakai inamin namino  
imaye kima bianiba ili bobol tem okok  
kemim naka ibsa eka nakai naka maki  
kima bliba i okoko okok keyemin naka ibsa  
naka maki ib kweilo kweita sino glimo  
kibobeine! Eka i ib kweilo kweita sino  
glimo mo kibobeim blim keib mole i ib  
debelon dim ota glimo kibobeine gesea  
<sup>17</sup> inab kesoa nakai glimo blimi inamin  
namino mo walibta yatemim blimobe. Glim  
olo kulan halebe sin tlebue e niniin osa eka  
e namba osa otabe. Namba olole makob e  
niniin otabe.

<sup>18</sup> Nibo olo kla funanomo! Nakae waneta tekein keminsa bie mole kukub olo tam tlamu tekein kenea namba olo kulan halebe nambabe geneko! Namba olo naka make nambabe. Eka e namba ole 666 obe.

## 14

*Nakai 144,000 i mema anso ngambinib-biobe.*

<sup>1</sup> Ne imin temia eil sibsib mene amgolime niniino Saione Yelusalem bib ye bie golim ut mabia nakai 144,000 i tena mablaba yatemie eil sibsib mene niniin osa eka e Aye niniin osa i debelon dimo dolaibbue itabe. <sup>2</sup> Eka unin ayamo abilim da tloa wentio o wengo makob aalit dimo tebe bia tlebianoa umbinabo inaminobe. Eka makob amo ngambinabo inabua wentio o wengo makob nakai gitao boubiba umbinabo inaminobe. <sup>3</sup> I mema ans mako komoke biino Gode toumbio kin dim osa eka inamin namini asuke asuke nai afen smiksai kin dim osa eka komokwali kin dim osa ngambiba yatemio Gode dabalim nakai bib mak bib mako blibi walebuei 144,000 ita ans olo tekein kebiobe. Eka naka maki olo mo tekein kebobbabe. <sup>4</sup> Naka eli alelwali mo dlim blim eka i unangi taman osa mo dlebnim blimobe. I naka ayamobe. I eil sibsib mene wengo kla wentebiba e monea betan ato da unang gameo i bekeba haablib itabe. Naka eli sino dabalim nakaia unangai isak tem ele blibta Gode i hengmino walubenea dleb utnea abilim ut danebua i Gode okok osa eka eil sibsib mene okok osa klabib kesoa i makob Gode meme hekwalobe. <sup>5</sup> I sino dabalim ele binibbuo dim wengo mo obianiba eka kukub misiam osa mo nabia nim blim nabe.

*Abiseli asumatnai wengo omkaye binib-biobe.*

<sup>6</sup> Eka abisak make ei tenea abile isak ut tlanea Gode dowan wengo amit nino nakaia unangai dabalim ele blibi mit mak afet isa eka weng afet isa eka aal afet isa alukum omkayemang gena biane <sup>7</sup> weng sbal ngambiane Gode nakaia unangai dolminea i kukubo klanamabeo meb tlo kesoa ibo e tolo tosiananiba e bobolo fumbianiba e niniino dobtouleb nine! E abil esa dabal esa eka aaye sol esa eka baantem aayo unalin osa klanebiobo ge ngansea atemna bia

<sup>8</sup> Eka mak esak imin e abuko tenea baanea Bib sumo Bebilono alukum wat-wat danobo, bib olo sel ita taman kukubo wafu bianiba bib mak bib mak seli alukum aleyebiba i kukub misiam olo wafunabibo kukub olo makob Bebilon seli waen aayo

sbalo okayebiba wembioobo gesea atemna nabia

<sup>9</sup> Eka i abuko abisake make imin tenea ngambiane Nakaia unangai i debelon dim osa kweilono dim osa kulan halebe glimo bibebua e niniin osa e smike niniin osa dobtouleb blibi <sup>10</sup> Gode i alo sum tli-aubanoa enin sumo omya nakaia unanga eli ase sume tom baka eimbiane atole blit blit gabe tem daak bianiba i amitie abisel kiningi kin dim osa eka eil sibsib mene kin dim osa enin kino wateme bianiba <sup>11</sup> eka as ele teme atumo tlebianoa enino omkayebu olo utnoa genoa amit namabobo, naka eli kulan haleb esa e smik esa i niniino dotouleb bianiba eka e niniino i aal dimo dolaibbui nakai kwinomo dim osa bomanomo dim osa amitie enin kino watememomabiobo gesea atemibe.

<sup>12</sup> Nakaia unangai Gode hekmel wengo wafu bianiba Yesuse bainobo genimib ib dimo kukub olo tam tluveno mole mo tosianimibe! Ibo Gode wengo sbalma wafueine! <sup>13</sup> Ne imin wentia abilim uto weng mako baanoa Kobo weng olo dolanale! Nakaia unangai Sume bainobo gebaniba kullilaibi amitie memalosa sinanomosa i seinine gesoa wentena bia Hob esa baanea Bainobo, i kla seinomabiobe. I kaanimibo bumoloko blimobe. I singkamomabiobe. Niminbabe, sino i dabalimo binibbuo kukub ayamo nabinibbio kesoa Gode watemubenea yang kenamabebe. Kukub ayam olota dletnota monibta Gode bibo unomabiobo gesea wentibe.

*Dabalim olo imeno bokalin dimobe.*

<sup>14</sup> Ne imin temia ayung namao dim uto naka make toumbia atemie makob nakai ulabobe. E gabam obtabbumine gole obtabbanea eka kweil ole seku yange tobtouleb nabia atemna bia <sup>15</sup> eka abisak make Gode am sumo tem tam danea tam te bib ele tlanea nakae ayungo dim uto toumbie nganha biane Keb sekue toboneba damibo unino waanale! Dabalimo unino alukum sanyam dobio kesoa memalo unin olo bokalin amobo, kobo moneba waaneba olminale gesea <sup>16</sup> nakae ayungo dim uto toumbie sekue afu tobtoulebnea daaknea dabalim daak unanea inamin namin unino diimo walbanmsea atemna bia eka <sup>17</sup> abisake make Gode am sumo abilim uto tem tam danea esa seku yange afu tobtoulebnea tam tenabea <sup>18</sup> eka abisake mak esa Gode heitdabanamin biino deibo daak tle ase kimanino titilsabe. E abisake make sekue yange afubie nganha biane Keb sekue toboneba dabalimo waen yamo diimo walbuneba mi olanale! O yamo alukum yamanobiobo gesea <sup>19</sup> eka

abisak ele sekue afu tobonea dabalim daak tobbianea waen yamo diimo walbua oleb monea dise sume tem wat banea skilon dum tama bikilanea waen game dise aleng daak hawabbanebio tem te ei daaknea dise make kila daake tem daak unebea atemio olo makob nakaia unangai bainobo geim blimi Gode i aalo tliaubano kesoa tema teilab bubenamabe otabe. <sup>20</sup> Eka dis ele bib sumo ken tam bia waeno teilab bubueiba ileme dise tem daakanea ei unea atemie makob aamuko ulabobe. Aamuk ele einamino 300 kilomita dot tekebe. Eka einea usonamine teke ele makob nakai kwel wat tleta atemibe.

## 15

*Abiseli 7 i inamin namin misiamo 7 otouleb binibbiobe.*

<sup>1</sup> Omito ne abilimo smik sumo tam tloa waternia bobol tem hek hek fumbiania temia abiseli 7 i inamin namin misiamo nakai watwat dabenamino 7 wafu otouleb bliba yatemio inamin namin misiam olo blimano biamo sinanomo imino tam tenamino blimobe. Inamin namin misiamo 7 olo blimana bianoa Gode atlihamin osa blimanoa waternibe.

<sup>2</sup> Eka ne inamin namino mako aay sume sole ulab waternio o undimo makob aakikit inaminobe. Ase sume aaye sole tem daak biebe. Nakai kulan halebe esa eka e smik esa eka e niniin osa gaisoib nakai aaye sole undimo aakikit inamine ken ye masiba Gode gitao oyenea wafueiba yatemna bia <sup>3</sup> i Gode okok nakae Mosese ans osa eka eil sibsib mene ans osa ngambiba yatemio ans olo inaminobe.

God sum kobo inamin namino titilsabo, keb okoko nabebo sum kesoa ni waternoba bobol tem hekhek fumbuobo, keb wengo bain eka keb kukubo molot nabo, kobo nakaia unangai alukum i komok sumobe. <sup>4</sup> Sum kobo klebkiem klebta kining kesoa nakaia unangai alukum keb tolo tosonianiba keb niniino kemtoupleb nomabiobe. Bib mak bib mak seli alukum teniba keb niniino kemtoupleb nomabiobe. Niminbabe, keb kukub ayamo keim anobo ge ngambiba yatemibe.

<sup>5</sup> Eka omito ne imin temia abilimo Gode am sumo temo Gode biin amo binabeo keim anoa waternibe. <sup>6</sup> Eka abiseli 7 i inamin namin misiamo nakaia unangai watwat dayemino 7 otouleb blibo am sum olo tem tam deibonibta tam tliobe. I youm ayamo kiningo kiniba eka gol halo sbalo tebeloniba tubo hewatibila gesiba <sup>7</sup> eka inamin namini asuke asuke nai afen smiksa blibi make dis golo 7 dlonea abiseli 7 i

doyensea atemio Gode amit nine e atlihamin sumo diso 7 olo tem daako sibbenobiotabe. <sup>8</sup> Omito Gode titil osa ayal osa o atumo utnoa Gode am sumo sibbenoa nakai am sumo olo temo mo unibta yatemim blimobe. I debliba abiseli 7 i inamin namin misiamo 7 o klaiba blimanota i o temo tam unomabiobe.

## 16

*Diso 7 o tem daako Gode atlihamino sibbenobiobe.*

<sup>1</sup> Eka ne wentia weng mako Gode am sumo tem tam danoa abiseli 7 i nganye bianoa Ibo moniba diso 7 o Gode atlihamino delabmaiba dabalim daak unoko gesoa

<sup>2</sup> Abisake wane monea e dise dabalim daake dlabmasea yai homono monoa nakaia unangai kulan halebe niniino i aal dimo bibebue isa eka e smike niniino dobtoupleb binibbue isa i dimo onon tlanoa

<sup>3</sup> Eka abisake tue dise aaye sole dang wat dlabmanea aaye ilem anea makob nakai kaaibbuei ilem inanea inamin namini aaye sole dang daako blibi alukum kulilaiba

<sup>4</sup> Eka abisake tlie dis ele aay afeto unino temo dlabmanea ele alukum deskina ilem ansea <sup>5</sup> eka abisake aaye kima bie baanea God kobo sinanggwan binabebua memalosa biebob, kobo kiningobo, keb kukub klamin okoko molotobe. <sup>6</sup> Niminbabe, nakaia unanga eli keb bainobo galin nakaia unanga isa eka keb weng omkeimalin naka isa yeke binibbio kesoa kobo i ilemo naka misiam eli oyeba doweine! Kobo i kukub misiamo molo yang keneb olo ayamobo, keb kukubo molotobo ge baasea wentena bia <sup>7</sup> eka weng mako Gode heitdahamin biino tem ut danoa ngambianoa Bainobo, God sum kobo keb titilo inamin namin titilo alukum gaisoneb binabobe. Kobo nakai kukub klamin okoko molot ayamobo ge ngansoa wentena nabia

<sup>8</sup> Eka abisake foe dis ele afoko singatoubonea mimiowanoa nakai kibabuaniba <sup>9</sup> nakai afoko mimiabo tem daak blibi ase eimbianiba Gode inamin namin misiam olo klanebue niniino weng dobo weng owe bianiba E inamin namin misiam olo klanebio kesoa e misiamobo ge oha bianiba i hengmino mo deibonibta i bobol temo mo deskinanibta Gode omanibta e niniino mo dobtoupleb nim blimobe.

<sup>10</sup> Eka abisake faibe dis ele kulan halebe biino singatoubonea mililanamino tenoa nakai kulan halebe daam temo blibi ge dlanoa i enino dot sumo omubesoa i delubma delabma bianiba <sup>11</sup> i enin osa yai osa o bobolo funaniba Gode weng dobo weng oha bianiba Kobo enin sum osa yai

osa omyeb kesoa keb kukub olo misiamoba ge ohabiba yatemibe. I inabib otane i kukub misiamo nabibo mo deibonibta i bobol temo mo deskinanibta Gode omalim blimobe.

<sup>12</sup> Eka abisake sikise dis ele aay sume Yufletise singatoubanea e alukum baanea komokwali afoko tlebo da tломabibi deibo klaubene kesoa i tломabiobe. <sup>13</sup> Eka ne temia hob misiami asumatnai makob maabi ulabi inab sume anang tem osa eka kulan halebe anang tem osa eka dim omin wengo omkayemin naka anang tem osa welaniba watliba yatemi <sup>14</sup> eli hob misiamobe. I okok sumo sino nakaia unangai inamin okoko mo watemim blimo klabianiba Monoba dabalimo komokwal isu unanoba dolminoba God Sume tlameo awa genomo geniba uniba yatemibe.

<sup>15</sup> Yesuse baanea Wentine! Ne ibsuo tlam gamio makob ayok henin nakai tlong gaibo naka maki mo tekein kenabibba inanita tlamabi kesoa nakaia unangai mo aa unim blim bianiba kukub ayamō wafu bianiba ne waitne blib nakaia unangai seinine! Ne tlang gamio nakaia unanga eli kukub ayamō wafu blib kesoa aalo mo genalomabibbabo gesea wentibe.

<sup>16</sup> Eka hob misiami komokwali betan olo dolminiba yatemio betan olo niniino Hiblu wengo Amagedon ge owe binabib otabe.

<sup>17</sup> Eka abisake sebene dise glole singatoubanea Gode am sumo tem tamo komoke biin dimo weng mako ngananoa Blimanobo genabua <sup>18</sup> timine tila biane bil wenge umbianea eka ame ngambianea meimei sume tlebian namsea atemio meimei ele sinanggwano mo tleta nakai mo atemim blimobe. E dot sumobe. <sup>19</sup> Bib sum olo niniino Bebilono belanoa mito asumatnanao eka bib mak bib mako amo alukum doa blelanoa eka Gode Bebilon bib seli kukub misiamo wafu binabibo bobolo funanea alo sum tliaubanoa enin sumo omyenea i kukub misiamo nabinabibo yang kenea yatemio <sup>20</sup> aaubilo da oleb onon tlanoa amgolimo blimanoa <sup>21</sup> sok sumo tlebianoa ais beselibo makob tom uning inamino o abilo makob lais beko abilo ulabo abilim ut danao olmein daak tenoa nakai dim ele bena bianoa misiam nayemo kesoa Gode weng misiam ohabiba yatemibe.

## 17

### *Taman unango weng sangobe.*

<sup>1</sup> Abiseli 7 i diso 7 dotouleblibli make tenea baatnenea Kobo tele! Taman unango aaye sume dang wat toubianoa kukub misiamo wafubio kesoa Gode enin sumo omulamabeo ne alebkenamabibe.

<sup>2</sup> Dabalim olo komokwali unang olo taman deib omeh haabliba eka naka maki dabalim olo blib isa unang olo taman deib omeh haabianiba makob nakai aa misiamo downoiba gabam tol temo mimafubenabo inaibbiobo ge baatnenea wentena bia <sup>3</sup> eka Gode Hobe beketnenea abisake nemetnea monoba naka blim ibuantem ye unanoba temia unang olo kulan halebe ileme un dim ut toubabua watemibe. Kulan haleb ele niniin homono e aal dimo bibabiotabe. Eka niniin olo alukum inamin namino Gode weng dobo weng ohamin otabe. Eka kulan haleb ele gabamo <sup>7</sup> eka gemo 10 nabe. <sup>4</sup> Unang olo youm ilemo dlusanoa eka eit homono mako tom gol osa eka bukubsano moni sum osa eka tom mako olo ulaniba klaibbuo moni sum osa kinoa o kweile kab gole afu obtoulebbua watemio kab ele tem daake kukub misiamo sibbenobiotabe. Kukub olo makob o taman kukub otabe. <sup>5</sup> Saa weng mako o debelon dimo buo niniin olo inaminobe. Bebilon bib sumo alukum taman wanggel isa eka nakaia unangai dabalimo kukub misiamo wafu blib isa i biemobe. <sup>6</sup> Unang olo Yesuse bainobo galin nakaia unanga isa eka Yesuse bainobo geniba e wengo omkeimabiba o dafao yebiba kulila binabib isa i ilemo downoiba makob nakai aa misiam downoiba gabam tol temo mimafubenabo inanobua waternia dlou unania bobol tem hekhek funsia <sup>7</sup> abisake baatnenea Kobo fatnanebta bobol tem hekhek fumbebe? Ne o wengo mitmakamo ayok osa eka kulan halebe gabame <sup>7</sup> eka gemo 10 nae unang olo omouleb uno mito alebkenamabibo, <sup>8</sup> kobo kulan halebe atemeb ele sinanggwano binabe otane memalo blimobe. Sinanomo kwiam bil amite tamalaim blim amit holo unebue teme deiba utlea Gode dabanea monea bib misiam unanea watwat danamabebe. Nakaia unangai dabalimo blibli i niniino Gode dabale mo klaim blim biane afen smik buk olo klanebuo temo mo dolabeim blimi kulan haleb ele atemniba bobol tem hekhek funomabiobe. Sinanggwano kulan haleb ele binabe otane memalo e blimanebe. Sinanomo e imin tlea i smiko deibe unamabobe.

<sup>9-10</sup> Nakae tekein keminsa bie mole inamin namin olo kla funaneko! Gabamo <sup>7</sup> olo makob amgolimo <sup>7</sup> osa eka komokwali <sup>7</sup> isa itabe. Amgolimo <sup>7</sup> olo golim utu unang olo toumbiobe. Eka komokwali <sup>5</sup> i alukum watwat daib otane asuei mo watwat danim blimobe. Make memalo komok ambiebe. Eka mak ele mo komok aim blimobe. Sinanoa komok anemeo mema yota kima tabdanamabebe. <sup>11</sup> Eka kulan haleb ele sino binabe otane memalo blim

bie esa komokobe. E okok osa makob komokwali 7 eli okoko ulab kesoa esa Gode dabanea monea bib misiam unanea watwat danamabebe.

<sup>12</sup>Eka gemo 10 o watemeb ole komokwali 10 itabe. I mo komokwal aim blim bliobe. I kulan halebe i sinwalo titilo omoniba komokwal anomabibo afok smiko olokiem blimanota i kimanin okoko blimanamabobe. <sup>13</sup>Eka komokwal eli titilsa otane i bobol temo makob omfaniba baaniba Nibo kimanin okok osa eka nib titil osa kulan halebe omaloba elekiem eleta kimaneko ge baaniba <sup>14</sup>i eil sibsib mene temnaniba awa genalaibo eil sibsib men esa eka e bekeba blib isa i tata keniba komokwali gaisenomabiobe. Niminbabe, e naka sum isa eka komok sum isa i Sumobe. Eka e bekeba blib naka ile sinanggwan e dlakanebua i e wengo kla wente binabiobo ge baatnenea <sup>15</sup>eka imin baatnenea Taman unango aaye dang wat toubua watemeb yo aay ele mitmakam ole nakaia unanga itabe. Nakaia unanga eli mit mak mit mak afet isa eka aal afet isa weng afet isa itabe. <sup>16</sup>Eka gemo 10 o watemeb ole komokwal itabe. Item eka kulan haleb etem naniba taman unango wasi omfaniba watwat daboniba youmo alukum gamfa dibiaboniba eka o diimo alukum downuboniba ase omatouniba kibanamabobe. <sup>17</sup>Gode i bobol tem funino omya i bobol temo makob omfaniba baaniba Nibo kimanin okok osa eka nib titil osa alukum kulan haleb eta omalomo ge baaniba omalomabiobe. I kukub olo in-amtatniba Gode wengo baanebuo alukum tam tlamota kukub olo blimanamabobe. <sup>18</sup>Unang ele watemeb olole bib sumo Be-bilon otabe. Bib sum olo komok eta komok sumi dabalim olo blibi alukum kima biebo ge baatnenebe.

## 18

### *Bebilon bibo watwat danamabobe.*

<sup>1</sup>Abisake wengo onebeo blimanao ne imin temia abisake make abilimo deibonea daak te dabalim ele tlang genea tebea atemie e titilo sumobe. E ayal inamin tubune kesoa dabale bomat genea <sup>2</sup>ngambianea

Bib sumo Bebilono alukum watwat danamabobe. Gululame meletani hob misiam isa eka wan misiam isa ita o temo biomabiobe. <sup>3</sup>Niminbabe, naka mit mak mit maki alukum bib olo seli i taman kukubo watemubeniba isa tamano hengabiba eka dabalim olo komok sum isa bib olo seli taman kukubo watemubeniba isa kukub olo wafu bliobe. Eka o

inamin namino webo kesoa nakai inamin namino webib nakai moni homono bokabiobo ge ngambea

wentena bia <sup>4</sup>eka weng mako abilim ut danoa baanoa

Ne nakaia unanga ibo bib olo deiboniba tam te sesa ele tline! Ibo bianiba o hengmino daawemiobe, ne bib olo seli enin sumo omyamabi kesoa ibo bib olo biaibo ibsa enin kino watemomabiobe. <sup>5</sup>Niminbabe, bib olo seli hengmino nabibo homon anoa makob angolim inanoa ute abilim ele tlobio kesoa Gode bib olo kukub misiamo alukum funanebo, <sup>6</sup>bib olo seli ibo kukub misiamo nayebib kesoa ibsak ming inamin kukub ota nayemine! I naka homon unang homoni kukub misiamo dot sumo omkayebib kesoa ibo wekib sum yang keine! <sup>7</sup>Bib olo seli untak ngambianiba baaniba Ni ayamobo, ni niniino sumobo gabib kesoa ibo enin homono omyiba i memine! I fumbianiba Ni komok sum kesoa ni niniino sumobe. Niko unangi imakwali kaabenibua sosen binabibi ulab nomta bobol tem abilo ni dimo tlebota memobhobo gabib kesoa yenaiba memine! <sup>8</sup>I inabib kesoa am olokiemo dimo inamin namin misiamo i dimo tam tlamabobe. Ginin sumo tam tlamona naka homon unang homoni kulila bianiba maki mangglomniba eka imen teb sumo tam tena nabianoa aso Bebilon bib olo tubunota kibanamabobe. God Sume i kukub misiamo watemubenea yang kenamabebo, e sbalobo ge ngambua wentibe.

<sup>9</sup>Dabalim olo bib mak bib mako komokwali alukum kukub misiamo wafu bianiba makob Bebilon bib seli nabinabib inaniba i kukub ayamo deiboniba kukub misiam ota wafu blib kesoa i Bebilon bibo aso kibanomo atumo komokwal eli watemniba mewemomabiobe. <sup>10</sup>I bib olo inamin namin misiamo tam tlo wateniba tosiyananiba skeim ye mabianiba baaniba Ayoo! Bebilono bib sum eka bib sbal na otane afok smiko olokiemo dim ota bib olo seli hengmino yang kenamino tam tlubeno ge baanomabiobe.

<sup>11</sup>Eka nakai dabalim olo blibi inamin namino dleb moniba bib olo seli webib isa mebianiba bobol temo ilum omfubenamabobe. Niminbabe, i afobeingo oleb moniba nakai webibi blimaib kesotabe. <sup>12</sup>Afobeing olo niniino mako tom gol osa eka mako tom silba osa eka mako tom ayam osa eka mako kukub sano moni sum

osa eka youm nama ayam osa eka youm ilem osa eka youm ayam osa eka as mako tang kunin ayam osa eka inamin namino eil elefani sitono klaibbu osa eka sbal aso klaibbuo moni sum osa eka tom blas osa eka tom ain osa eka tom mako moni sum osa <sup>13</sup> eka mako walaka aal osa eka kumuk osa eka bolit inamino tang ayam osa eka atdeno nama osa eka atden afeto tang ayam osa eka waen aay osa eka welo niniino olib osa eka bolit ayam osa eka wit osa eka eil blumakau isa eka eil sibsib isa eka til hos isa eka kalo ulabo niniino kalis osa eka besa okok kemin naka isa itabe. I besa okok kemin naka eli dleb moniba naka maki doyeniba monio oise tlebinibbiobe. <sup>14</sup> Nakai inamin namino dleb unebib naka eli baabeniba Bebilon bib sel ibo inamin namin ayamo dlomo gabinabibo blimanobe. Ib moni osa inamin namin ayam osa blimanobo, ibo imino mo watemomabibbabo ge baabenomabiobe.

<sup>15</sup> Eka nakai bib olo inamin namino webianiba moni homono bokabibi bib olo inamin namin misiamo tam tlo watemniba tosiananiba bobol temo misiamu besoa skeim ye mabianiba mebianiba <sup>16</sup> baaniba Ayoo! Sino bib olo seli youm nama ayamo kibianiba eka youm ilemo dlusaniba eka eit homono mako tom gol osa eka tom mako olo ulaniba klaibbuo moni sum osa eka bukubsano moni sum osa webianiba kibiam binabib otane <sup>17</sup> afok smiko olokiemo dim ota monia youma olo watwat danobo genabiba eka siibo kimanin naka isa eka siibo amun temo okok kebianiba inamin namino diketoumin naka isa eka nakaia unangai besa siib tem haablib isa eka nakai siib damo kima bianiba inamin namin okoko klabib isa naka eli alukum Bebilon osuo deiboniba skeim ye mabianiba <sup>18</sup> o aso kibano atumo watemniba ngambianiba Bib olo bib mako alukum gaisonobiobo, o bib sumobo ge ngambianiba <sup>19</sup> ibbitino waa dibiaiba utnoa ili gabaman dim ut unebua i bobol temo ilum omfubebio kesoa i ina bianiba mebianiba baaniba Ayoo! Ni bib olo seli dohalimbuobe. Ni siib temo haabianoba inamin namino bib olo seli webianoba monio boka binabob biotabo, afok smiko olokiemo dim ota alukum watwat danobo, <sup>20</sup> abisel ibsa Gode nakaia unanga ibsa eka Yesuse okok dlasanin naka ibsa eka Gode wengo omkeimalin naka ibsa alukum bib olo inamin namino tam tlo seinine! Niminbabe, bib olo seli ibo kukub misiamo omkaye binabib kesoa Gode yang kenea bib olo seli yananamabebo genomabiobe.

<sup>21</sup> Eka abisak sbale tom beselibe makob asiamo wito teibinabob inamine menganea afu ofanea obbianea aaye sole dang

wat blelasea baanea Ne tom ele obbiaia unanea blimane inanoa Bebilon bib osa blimanoa nakaia unangai imino mo watemim blim keniba <sup>22</sup> gita weng osa eka ans weng osa eka dlamo weng osa eka bigulo weng osa mo wentomabibbabe. Eka o dimo inamin namin okoko mo biota nakai watemomabibbabe. Weng mako tome asiam wite teibiba umbinabo inamin osa blimanamabobe. <sup>23</sup> Bib olo ayal osa mo watemomabibbabe. Eka alelwal bokalin kukub osa blimanamabobe. Sino bib olo seli inamin namino kima bianiba webinibbio nakai niniinsabe. I kukubo dabalim nakai maki kukubo gaiseibbiobe. I naka homoni kel walin kukubo aleyebuobo gabianiba dim oyebiba i fumbianiba Bainobo gambinibbiobe.

<sup>24</sup> Eka sinanggwano bib olo seli Gode wengo omkeimalin nakai yebianiba eka Yesuse bainobo galin nakaia unangai bib mak bib mako blibi yebiam bliba Gode yateme binabe kesoa bib olo watwat dabonebo gesea wentibe.

## 19

*Nakaia unangai Bebilon bibo watwat dano seinwebiobe.*

<sup>1</sup> Omito ne wentia nakaia unangai homoni abilim ut bianiba ngansiba wentemonia i baaniba Nibo Gode niniino dobtoulele nomo! Elekiem eleta nibo hengmin temo biobo dotlanebiobo, e niniin sum eka titilsa nabo, <sup>2</sup> Gode nakaia unangai kukubo watemnea Eli kukubo ayamobe eka eli kukubo misiamobe galin kukubo molot kesoa e taman unang olo kukubo watemnea funanea Kukub olo misiamobo gene kesoa wananebe. Unang olo o kukub misiamo naka mak unang maki aleye bianoa eka o Gode okok nakaia unangai yebiam binobio kesoa Gode wananebo gesiba wentena bia <sup>3</sup> i imin baaniba Nibo Gode niniino dobtoulele nomo! Bib olo aso kibanoa atumo amitie walebnoa unemabobo gesiba <sup>4</sup> eka komokwali <sup>24</sup> isa eka inamin namini asuke asuke nai afen smiksa isa Gode komoke biin dimo toumbie ye aala unaniba e niniino dobtoulele bianiba baaniba Bainobo, nibo Gode niniino dobtoulele nomo gesiba <sup>5</sup> eka komoke biino dimo weng mako ngambianoa Gode okok naka ibo niniin men ibsa niniin sum ibsa Gode wengo wentebib ibo nib Sume God ele niniin ota dobtoulele nine genanoa wentibe.

*Eil sibsib mene alelo omamabebo.*

<sup>6</sup> Eka ne imin wentia nakaia unangai homoni mibianiba ngambiba wentio makob aayo umbinabo inamin eka makob ame ngambinabe inamin ina bianiba

baaniba Nibo God Sume niniino dobtouleub nomo! Niminbabe, e titilsa kesoa nibo kima biebe. <sup>7</sup> E eil sibsib mene alelo omonamin amo memalo tloa alelo klanoa waisabio kesoa nibo seinha bianoba e niniino dobtouleub nomo! <sup>8</sup> Gode youm namae ayame dobuenea dubusanobo, youm ele kiningobo gesoa wentibe. (Youm nama elele makob nakaia unangai bainobo gabibi kukub ayam otabe.) <sup>9</sup> Eka abisake baatnenea Kobo ne weng mako baabkenamabio weng olo dolanale! Weng olo inaminobe. Nakaia unangai Gode nganabene teniba eil sibsib mene alelo omamabe imeno downomabib nakai seinine! Weng olo Gode bain wengobo gesoa <sup>10</sup> ne esu ye tonton golbua daak tounia e niniino dobtouleub nang genamsia e baatnenea Yeye kobo mo inanemebe! Ne okoko makob kebsa keb nekwal isa ibo Yesuse bainobo geniba e niniino omkeimabio nesa makob ib okoko ulab okok kemin naka netabo, kobo Gode elekiem ele niniin ota dobtouleub nale! Nibo tekein kebob yotabo, nibo Yesuse niniino omkeimabob olo makob sinanggwano Gode wengo omkeima binibbio nakai okoko ulabobo ge baatnenebe.

*Nakae til hos namae dim ut toubiebe.*

<sup>11</sup> Eka abilimo amisalo betelasoa ne imin temia naka make hos namae dim ut toubieba atemie e niniino asube. Mak ole E Okoko Kla Kimaninobe, eka mak ole E Kukubo Bain Olota Namin nabe. E nakaia unangai kukubo motomanea i kukub misiamo nabibo watemubenea yenanang gameo e kukubo molot ota wafuneta nanamabebe. <sup>12</sup> E kino makob atol inamin dut genobiotabe. Eka e gabam otabbumino komok sumi gabam otabbumino ulabo homonobe. E aalimo e niniino bibabio emaye tekein kebebe. Eka naka maki mo tekein kebibbabe. <sup>13</sup> E youm dime ileme walanebiobe. Eka i e niniino Gode Wengobo ge ohabiba <sup>14</sup> abilimo awa genalin nakai youm nama ayamo ninik blimo dlusaniba til hos namai dim ut toulania dobsileb bebiba yatemio <sup>15</sup> skem dange yange kobot genebue nakaia unangai dabalim olo bliibi e dum yantoumabe e sital dimo biba bietabe. Eka e nakaia unangai kimanamabeo e kimanino sbalobe. Eka God Sume nakaia unangai e bainobo gabibbai alo tiaubanoa naka eli yenanang gameo makob nakai asiam waeno tamaniba teilab bubonabib inabenamabebe. <sup>16</sup> E niniino youm dim esa eka kumun milim e dim esa bibabuo niniin olo inaminobe. Naka ele Komok Sumi Komok Sum eka Naka Sumi Kimanin nabo genobua watemnia <sup>17</sup> eka imin temia

abisak make afoko tem wat manea wani abilim ut eibibi nganye bianea Ibo te minabiba Gode imeno oyameo doweine! <sup>18</sup> Komokwal isa eka awa genalin nakai komokwal isa eka naka sbal isa eka til hos isa eka i dangon dimo toulabe bliib naka isa eka nakai i okoko imaye ili bobol tem kima bianiba klamin naka isa eka nakai naka maki kima bliiba i okoko besa okok keyemin naka isa eka niniin gwab isa niniin sum isa alukum i diimo wa wenyemine gesoa wentibe.

<sup>19</sup> Eka ne imin temia kulan haleb esa eka nakaia unangai alukum dabalim olo bliibi komok sum isa eka i awa genalin naka isa miniba baaniba Nibo nakae til hose dim ut toubieba esa eka e awa genalin naka isa yemomo ge omsiba <sup>20</sup> naka ele kulan haleb esa e dim wengo omkayemin naka esa i klabuto gebenea yatemibe. Sino kulan halebe dim wengo omkayemin naka ele okok homono kulan halebe kin dimo klabea nakaia unangai kulan halebe niniino i dimo bibe bio isa eka e smike niniino dobtouleub bliib isa i kukub olo watemniba funaniba Kulan halebe sumobo ge funaibbio kesoa kulan haleb esa eka e weng dimo omkeimalin naka esa i mo kaaim blim bliiba afen dolbiaiba daakniba dabal tem daake ase sume tom baka eimbiana atole blit blit gabe tem daak uniba yatemna bia <sup>21</sup> eka nakae til hose dime toubieba skem dange e sital dimo balanea watleube skem dang ele emaye kulan halebe awa genalin nakai yalea eka wani naka eli diimo downoniba i matwayenao yatemibe.

## 20

*Gululame klabutam bia bifolo 1,000 bli-manamabe.*

<sup>1</sup> Abisake make abilimo deibonea kwiam bil amite tamalaim blim amit holo unebue amisalo kie tobonea eka sen saye tobonea tebeleb daak tenea <sup>2</sup> inab sum ele afunea atemio inab ele sinanggwano inabobe. E Gululam etabe. E niniin afeto Setanobe. Eka abisak ele e sen saye gebane biamo bifolo 1,000 blimanota tileisanamabebe. <sup>3</sup> Abisake inab ele dobbiana kwiam bil amite tamalaim blim amit holo unebue tem daak unea ewito fasino amisalo omdounea loke basalabanea atemibe. E dim omin kukubo nakaia unangai imino mo alebenamabebe. Kwiam bil amit tem daak bia bifolo 1,000 blimanota abisake imin amisalo betelabanea utenea haa tlanea imin klabutanamabebe.

<sup>4</sup> Eka Gululame sma kwiam bil amit tem daak bia ne imin temia komokwali biino naka maki o dim ye toulala bliiba yatemiei



naka eli i okok ole nakai kukubo moton sambianiba kot keyemin okok ota Gode omyebiotabe. Eka mak ole nakai sino Yesuse bainobo geniba e niniino omkeima bianiba eka Gode wengo sbalma wafuna bliba o dafa ota wasi nakai tenib gabamo weiseniba yenaiba kulila binibbio nakai smiki yatemibe. Naka eli kulan haleb esa eka e smik esa i niniino mo dotouleb nin blimobe. Eka i niniino naka eli debelon dim osa kweilon dim osa mo bibe binobioba smik ile afen aniba Gode Dofakamin Nakae temnaniba nakaia unangai komok an bliba bifolo 1,000 o blimanamabobe.<sup>5-6</sup> Nakai sin hana blib eli seimbiobe. I naka molot kesoa i imino mo kaanimbababe. I aseinin bib osa mo unomabibbabe. Naka eli God esa eka e Dofakamin Naka esa i okoko ayam okok kebianiba i niniino dotouleb bliobe. I Gode Dofakamin Nakae temnaniba komok an blibo bifolo 1,000 o blimanamabobe. Eka bainobo galin nakaia unangai maki kulilaibbue ile debliba bifolo 1,000 olo blimanota isak hana tlomabiobe.

*Gululame watwat danamabebe.*

<sup>7</sup> Bifolo 1,000 o blimanomo kwiam bil amite tamalaim blim amit holo unbue amisalo betelanoa Gululame klabutam olo deibonea <sup>8</sup> ute bib ele tlanea bib mak bib mako haabianea dim wengo oyebea Goke meletan isa eka Megoke meletan isa i e wengo wenteniba Ayamobo geniba i alukum miniba Yesuse meletani yenanomo genomabibi homonobe, i makob ninin inaminobe. <sup>9</sup> I homon kesoa moniba dabale alukum ge dabakaniba Yesuse bainobo galin nakaia unangai Gode gobo bie bibo blibi kanhanomabib otane akile abilim ut danea daak tlea awa genalin naka eli alukum kibaniiba <sup>10</sup> eka Gululam ele eta dim baabene biamabo kesoa Gode dobianea daaknea dabal tem daake ase sume tom baka eimbianea atole tlib blit gabe tem daak temnea kulan haleb esa eka e weng dimo omkeimalin naka esa i sin daak bianiba eimbib biamo tenaniba asumatna kebianiba kwinomo dim osa tab dim osa amitie enin kino watememomabiobe.

*Kot sumo tam tlamabobe.*

<sup>11</sup> Omito ne imin temia komoke biin nama sumo dimo naka make toubia atemi ele, e titilo sbal kesoa dabal esa abil esa blimanoa nakaia unangai imino mo watemim blimobe. <sup>12</sup> Eka ne nakaia unangai kulila binabibi yatemia niniin sum isa eka niniin gwab isa komoke biino kibi kaba sin ye masiba nakae komoke biin olo dimo toubie buko bamtabanea eka buk mak osa bamtaba nanea atemio nakaia unangai niniino buk olo temo bibe bio nakai amit nomabiobe. Buk olo niniino afen

smik bukobe. Eka e kulilaibbuei kukubo alukum motomanea watemala wengo buk mako temo bio kesoa watemala i kukub nabibo olota klanea <sup>13</sup> nakaia unangai aaye sole tem daak kaaibbuei imin hananabiba eka nakaia unangai kaaibbua kaanamin bibo blib isa imin hana tenaiba kukub klamin nakae i kukubo watemala klanea <sup>14</sup> kaanamin bib osa eka kaanamin kukub osa ombianea daaknoa ase sume dabal tem daake eimbe tem daak unobe. Nakaia unanga eli sino kaaibbua imin hana tlib otane i dolbiaiba daakniba aseinin bib daak unib olo makob i imin kaaibobe. <sup>15</sup> Kukub klamin nakae afen smik buk olo temo watemala nakaia unangai niniino blim bio mole ile dolbianea daakniba dabal tem daake ase sume eimbe tem daak unomabiobe.

## 21

*Abile mema esa eka dabale mema esa otabe.*

<sup>1</sup> Omito ne abile mema esa eka mema dabal esa watemi otane abile sin esa eka dabale sin esa ole blimobe. Eka aaye sol esa mo bieta atemim blimobe. Esa alukum blimobe. <sup>2</sup> Ne bib mako watemi olo bib ayam kiningobe. Bib olo mema Yelusalem bib otabe. Bib olo God esu wit bianoa abilimo deibonooa tebua watemio o eito makob unangi imakwali dlom geniba youmo memao olo kiniba dlonabib inaminobe. <sup>3</sup> Eka weng mako komoke biin dim ut danao ngambianoa Etemine! Memalo Gode bibamo nakaia unangai bekebenobe. I Gode meletan aiba eka e i Sum anea item etem nanomabiobe. <sup>4</sup> E i memino omtlabenea imino mo kaaniba eka i bobol tem osa mo misiamu benanomobabe. I mo mebianiba enin osa mo omubenanomobabe. Sin kukub olo alukum blimanamabobo gesoa wentibe.

<sup>5</sup> Eka nakae komoke biin dimo toubie baanea Wentine! Inamin namino sino blimano kesoa ne inamin namino memao imin klaiobo gesea wentena bia e ne baatnenea Kobo weng olo dolanale! Weng olo bain weng kesoa nakaia unangai wenteniba bainobo geine ge baatnenea <sup>6</sup> eka imin baatnenea Inamin namin ele tam tlo olo ne klaia blimanobe. Ne sinanggwanoo abil esa dabal esa mo klaim blimo dimo ne binibiobo, eka abil esa dabal esa blimano biamo dim osa ne biamabi kesoa nakai aa tebo yenano mole ne aaye misim oblia downoniba afen smike doboniba amit nomabiobe. <sup>7</sup> Eka nakaia unangai wanita kukub misiamo Yeye geniba ombianib mole ne i Sum ana bia eka ile ne meme ananomabiobe. <sup>8</sup> Otane nakaia unangai tosiambib isa eka bainobo geim blim isa

eka kukub misiamo wafu blib isa eka naka maki yebib isa eka tamano hengabib isa eka kelo wabib isa eka god dim omini niniino dotouleb blib isa eka dim obib isa i alukum i bibo unomabibo ase sume tom baka eimbianea atole blit blit gabe tem daak unomabiobe. I bib olo unomabibo makob imin kaanomabiobo gesea wentibe.

*Yelusalem bibo mema otabe.*

<sup>9</sup> Eka ne imin temia abisake make nesu tlea atemi ele sino abiseli 7 i diso 7 o dotouleb bianiba nakaia unangai watwat daayemom genabiba yatemie! mak etabe. Abisak ele baatnenea Kobo tele! Ne eil sibsib mene alelo omeo alebkenam-abibo gesea <sup>10</sup> Hobe beketnenea abisake nemetnea monoba am golime tekebmime malanebue golim ye unanoba bib ayam olo aletnenea watemio bib olo God esu ut bian-ota abilimo deibo tebotabe. Bib olo niniino Yelusalem otabe. <sup>11</sup> Gode ayal eta bib olo tubunea bining genea aakikit inanea makob tom yasbao moni sumo ayal inanea atemibe. <sup>12</sup> Bib olo daamo teke sumobe. O amito 12 obe. Abiseli 12 i amit olo kima bliobe. Eka Islel nakai mito 12 i niniino amit olo alukum dolaibbiotabe. <sup>13</sup> Afok tlemin sin dao daamo amito asumatnabe. Eka ken minim not da osa asumatnabe. Eka melen minim saut da osa asumatnabe. Eka afok unemin sin dao daam osa amito asumatnabe. <sup>14</sup> Bib olo daamo mit daako tom sbalo buo 12 obe. Eka eil sibsib mene okok dlasanin nakai niniino tom olo dimo dolaibbiotabe.

<sup>15</sup> Abisake wengo onebe nakae bib olosa eka amit osa eka daam osa kimin gol ase tobtouleb bianetabe. <sup>16</sup> Bib olo teke osa eka o sum osa makobobe. Eka abisake ase kinea atemio o sum osa eka o teke elaak da ewit da osa makob 2,400 kilomitabe. <sup>17</sup> E o daamo tekeo kinea atemio sumo makob 60 mitabe. Abisake kimin ele nakai tebeloniba aso kibinabib eta tobo kineta atemibe. <sup>18</sup> Gode bib olo daamo tom yasbao olonea daamo genea eka bib ole gol klananea bomat genoa makob aakikito undim inanobiotabe.

<sup>19</sup> Bib olo daamo mitem daako tom ayam moni sumo olonea eito kibonea mikikitemo ofanebue e niniino yasba etabe. Eka tue ofanebu ele mokimobe. E niniino sabaia etabe. Eka tlie ofanebu ele namabe. E niniino aget etabe. Eka foe ofanebu ele itanasitobe. E niniino emelal etabe. <sup>20</sup> Eka faibe ofanebu ele e niniino sadonikis etabe. Atosine ilem eka atosine nama nabe. Eka sikis ele ilemobe. E niniino konilian etabe. Eka seben ele ngameinobe. E niniino klisolait etabe. Eka eit ele itanasit otane afetobe. E niniino belil etabe. Eka nain

esa ngamein otane afetobe. E niniino tobas etabe. Eka ten esa atosino itanasit eka atosino ngamein nabe. E niniino klisobles etabe. Eka eleben ele mokim otane afetobe. E niniino haiasin etabe. Eka twel ele ilem otane afetobe. E niniino ametis etabe.

<sup>21</sup> Eka bib olo amito amisalo 12 ole bukubsano namao moni sum ota klaibbiotabe. Bukubsan beselibe elekiem oboniba amisal olo kla kla unibbiotabe. Bib olo deib ole gol ota oloniba klaibbua o undimo makob aakikito undim inanobua watemi otane <sup>22</sup> Yelusalem bibo Gode am sumo bib olo mo biota watemim blimobe. Niminbabe, God Sume titilsa esa eka eil sibsib men esa i dumo imaye bib olo bianiba nakaia unangai tenaniba weng obib kesoa Gode beten kehamin am sumo blimobe.

<sup>23</sup> Bib olo afoka alimao mo tubu biobabe. Gode titil ota ayal inamin eibiobe. Eka eil sibsib men ele bib olo ayalobe. <sup>24</sup> Nakaia unangai bib olo blibi bib olo seli kukub ayam watemubeniba isak kukub ayam wafu bliba eka dabalimo komok sum ile inamin namin ayam oleb teniba bib olo tlomabiobe. <sup>25</sup> Eka tabo bib olo daamo amisalo mo dounimibbabe. Eka kwamin osa bib olo blimobe. <sup>26</sup> Nakaia unangai dabalim olo blibi inamin namin ayam oleb teniba bib olo tlomabiobe. <sup>27</sup> I inanomabib otane kukub misiam osa eka nakaia unangai kukub misiamo nabib isa eka nakaia unangai weng dimo obib isa ile bib olo mo tam unomabibbabe. Eil sibsib mene e afen smik buko temo nakaia unangai niniino dolabenebio ita bib olo tam unomabiobe.

## 22

*Afen smik aay esa eka afen smik as esa o weng sangobe.*

<sup>1</sup> Eka abisake aaye nakai downaibo amit nomabibe aletnesea temia biningowanea makob aakikit inanebua atemio aay ele God esa eil sibsib men esa i biin dim wat danea tlanea bib dang tla unebetabe. <sup>2</sup> Aay ele keno milim wat osa eka milim eblasin da osa afen smik aso nakai o yamo downaibo amit nomabib aso maweno biotabe. O yamo balimino bifolo olokiemo dimo bali down down binabo 12 obe. O yamo alime elekiem elekiemo dimo amitie balibinabobe. Eka as ele aane nakaia unangai dabalim olo blibi kukub misiamo klaube-nea ayam an ayam an bliobe. <sup>3</sup> Eka inamin namin kukubo Gode mo gobo bieba ole fotebenea unoa Gode eil sibsib mene i dum ta komoke biin dimo toulu bianiba nakaia unangai kima bliba Gode e okok nakai e niniino dobtouleb nomabiobe. <sup>4</sup> I ina bianiba Gode kla atemnabibta e i debelon dimo e niniino dolabenamabebe. <sup>5</sup> Kwamin

osa eka ayal osa afok osa bib olo blimobe. Niminbabe, God Sume ayal kesoa emaye bib olo tubu bia bib olo seli inamin namino amitie kimanomabiobe.

*Yesuse hebmamsab tlamabebe.*

<sup>6</sup> Eka abisake imin baatnenea Weng olo bain wengobo, nakaia unangai alukum weng olo bainobo geine! Sinanggwano God Sume e weng omkeimalin nakai e Hobe dobyenea inamin namino tlamabo alebenebua memalosa e abisake dabanea monea e okok nakai inamin namino hebmamsab tlamabo wengo alebenebo ge baatnesea wentena bia <sup>7</sup> eka Yesuse baanea Ne hebmamsab ibsu tlamabi kesoa nakaia unangai wanita buk olo inamin namino mitda tam tlamabo wengo wafu blib mole i seinine ge baanea wentibe.

<sup>8</sup> Yon ne weng olo wentena biania eka okok olo watemnai kesoa abisake inamin namino alenebe esu ye tonton golbua daak tounia e niniino dobtouleb nang genamsia <sup>9</sup> e baatnenea Yeye kobo mo inanemebe! Ne okoko makob kebsa keb nekwalu Gode weng omkeimalin naka isa eka nakai weng olo wafu blib naka isa ib okoko ulab okok kemn naka netabo, kobo Gode elekiem ele niniin ota dobtouleb nale ge baatnenea <sup>10</sup> eka imin baatnenea Gode wengo buk olo tem wat biobo, kobo mo kimik genemebe! Gode amo inamin namin olo nanamabeo meb tlo kesoa omkeimamale! <sup>11</sup> Nakai kukub misiamo nabib biamo i kukub olo mo deibonomabibbabe. Eka nakai bobol tem misiamo fumbib biamo isa mo deibonomabibbabe. Eka nakai kukub ayamo nabib biamo isa amit inamomabiobe. Eka nakai kining biaib isa amit kining nomabiobo genasea wentibe. <sup>12</sup> Eka Yesuse baanea Wentine! Ne hebmamsab tenia nakaia unangai elekiem olokem i kukubo nabinib biamo kinia kukub ayam osa kukub misiam osa yang kenamabibe. <sup>13</sup> Ne sinanggwano abil esa dabal esa mo klaim blimo dimo ne binibiobe. Eka abil esa dabal esa blimano biamo dim osa ne biamabibe.

<sup>14</sup> Nakaia unangai wanita kukub misiamo namin bobolo funino deibonib mole i makob nakaia unangai youmo fubanabibi ulab kesoa i seinine! I afen smik ase yame downiba moniba bib olo amito tam unomabiobe. <sup>15</sup> Otane nakai misiam bianiba kelo wabib isa eka tamano hengabib isa eka naka maki yenaiba kulilabib isa eka god dim omino niniino omtouleb blib isa eka dim omin kukubo goboniba wafu blib isa i alukum Gode bib olo mo tam unomabibbabe.

<sup>16</sup> Ne Yesus neta ne abisake dabaia monea weng olo ne bainobo galin nakaia

unanga ibo omyamabebe. Ne Debite mit ole eka Debite molofeit na netabe. Awitnino boman tlamu eibinabo ulab netabo ge baasea <sup>17</sup> Gode Hob esa eka eil sibsib mene alel osa baaniba Yesus kobo tele gesiba wentibe. Eka nakaia unangai wanita i weng olo wentib mole isa baaniba Kobo tele geine! Eka nakaia unangai wanita aa tebo kaanom genabib mole tline! Eka nakaia unangai wanita aaye downomo geib mole teniba Gode afen smik aaye misim dobye ele doweine!

<sup>18</sup> Eka nakai wanita Gode inamin namin kukubo tam tlamabo wengo buk olo temo dolaio wentaib otane atosino ili bobol tem funin yebbaka omasaniba aleye bianiba baabeniba Weng olosa Gode wengobo ge baabenib biamo kukub misiamo buk olo temo dolai olo Gode i omyamabe kesoa klaine! <sup>19</sup> Eka nakai wanita Gode inamin namin kukubo tam tlamabo wengo buk olo temo dolaio omkaye bianiba baaniba Atosin olo Gode wengbabo ge baabenib biamo sinanomo i Gode bib olo mo tam unomabibbabe. Eka i afen smik ase yam esa mo downibta amit nomabibbabe.

<sup>20</sup> Yesuse inamin namino tam tlamabo wengo onebe nakae baanea Moton dam ye ne hebmamsab tlamabibo gesea ne baabania Ae Yesus Sum kobo tele ge baabaiobe.

<sup>21</sup> Sume Yesus Klaiste ibo alukum daabeneko! Bainobe. Ne wengo bayotabe. Yon neta weng olo dolaioebe.

**Read the New Testament  
daily**

*January*

date	Scripture
1	Matyu 1:1-2:12
2	Matyu 2:13-3:6
3	Matyu 3:7-4:11
4	Matyu 4:12-25
5	Matyu 5:1-26
6	Matyu 5:27-48
7	Matyu 6:1-24
8	Matyu 6:25-7:14
9	Matyu 7:15-29
10	Matyu 8:1-17
11	Matyu 8:18-34
12	Matyu 9:1-17
13	Matyu 9:18-38
14	Matyu 10:1-23
15	Matyu 10:24-11:6
16	Matyu 11:7-30
17	Matyu 12:1-21
18	Matyu 12:22-45
19	Matyu 12:46-13:23
20	Matyu 13:24-46
21	Matyu 13:47-14:12
22	Matyu 14:13-36
23	Matyu 15:1-28
24	Matyu 15:29-16:12
25	Matyu 16:13-17:9
26	Matyu 17:10-27
27	Matyu 18:1-22
28	Matyu 18:23-19:12
29	Matyu 19:13-30
30	Matyu 20:1-28
31	Matyu 20:29-21:22

date	Scripture
1	Matyu 21:23-46
2	Matyu 22:1-33
3	Matyu 22:34-23:12
4	Matyu 23:13-39
5	Matyu 24:1-28
6	Matyu 24:29-51
7	Matyu 25:1-30
8	Matyu 25:31-26:13
9	Matyu 26:14-46
10	Matyu 26:47-68
11	Matyu 26:69-27:14
12	Matyu 27:15-31
13	Matyu 27:32-66
14	Matyu 28:1-20
15	Mak 1:1-28
16	Mak 1:29-2:12
17	Mak 2:13-3:6
18	Mak 3:7-30
19	Mak 3:31-4:25
20	Mak 4:26-5:20
21	Mak 5:21-43
22	Mak 6:1-29
23	Mak 6:30-56
24	Mak 7:1-23
25	Mak 7:24-8:10
26	Mak 8:11-9:1
27	Mak 9:2-29
28	Mak 9:30-10:12

date	Scripture
1	Mak 10:13-31
2	Mak 10:32-52
3	Mak 11:1-26
4	Mak 11:27-12:17
5	Mak 12:18-37
6	Mak 12:38-13:13
7	Mak 13:14-37
8	Mak 14:1-21
9	Mak 14:22-52
10	Mak 14:53-72
11	Mak 15:1-47
12	Mak 16:1-20
13	Luk 1:1-25
14	Luk 1:26-56
15	Luk 1:57-80
16	Luk 2:1-35
17	Luk 2:36-52
18	Luk 3:1-22
19	Luk 3:23-38
20	Luk 4:1-30
21	Luk 4:31-5:11
22	Luk 5:12-28
23	Luk 5:29-6:11
24	Luk 6:12-38
25	Luk 6:39-7:10
26	Luk 7:11-35
27	Luk 7:36-8:3
28	Luk 8:4-21
29	Luk 8:22-39
30	Luk 8:40-9:6
31	Luk 9:7-27

date	Scripture
1	Luk 9:28-50
2	Luk 9:51-10:12
3	Luk 10:13-37
4	Luk 10:38-11:13
5	Luk 11:14-36
6	Luk 11:37-12:7
7	Luk 12:8-34
8	Luk 12:35-59
9	Luk 13:1-21
10	Luk 13:22-14:6
11	Luk 14:7-35
12	Luk 15:1-32
13	Luk 16:1-18
14	Luk 16:19-17:10
15	Luk 17:11-37
16	Luk 18:1-17
17	Luk 18:18-43
18	Luk 19:1-27
19	Luk 19:28-48
20	Luk 20:1-26
21	Luk 20:27-47
22	Luk 21:1-28
23	Luk 21:29-22:13
24	Luk 22:14-34
25	Luk 22:35-53
26	Luk 22:54-23:12
27	Luk 23:13-43
28	Luk 23:44-24:12
29	Luk 24:13-53
30	Yon 1:1-28

date	Scripture
1	Yon 1:29-51
2	Yon 2:1-25
3	Yon 3:1-21
4	Yon 3:22-4:3
5	Yon 4:4-42
6	Yon 4:43-54
7	Yon 5:1-23
8	Yon 5:24-47
9	Yon 6:1-21
10	Yon 6:22-40
11	Yon 6:41-71
12	Yon 7:1-29
13	Yon 7:30-52
14	Yon 7:53-8:20
15	Yon 8:21-30
16	Yon 8:31-59
17	Yon 9:1-41
18	Yon 10:1-21
19	Yon 10:22-42
20	Yon 11:1-53
21	Yon 11:54-12:19
22	Yon 12:20-50
23	Yon 13:1-30
24	Yon 13:31-14:14
25	Yon 14:15-31
26	Yon 15:1-27
27	Yon 16:1-33
28	Yon 17:1-26
29	Yon 18:1-24
30	Yon 18:25-19:22
31	Yon 19:23-42

date	Scripture
1	Yon 20:1-31
2	Yon 21:1-25
3	Abosel 1:1-26
4	Abosel 2:1-47
5	Abosel 3:1-26
6	Abosel 4:1-37
7	Abosel 5:1-42
8	Abosel 6:1-15
9	Abosel 7:1-29
10	Abosel 7:30-50
11	Abosel 7:51-8:13
12	Abosel 8:14-40
13	Abosel 9:1-25
14	Abosel 9:26-43
15	Abosel 10:1-33
16	Abosel 10:34-48
17	Abosel 11:1-30
18	Abosel 12:1-23
19	Abosel 12:24-13:12
20	Abosel 13:13-41
21	Abosel 13:42-14:7
22	Abosel 14:8-28
23	Abosel 15:1-35
24	Abosel 15:36-16:15
25	Abosel 16:16-40
26	Abosel 17:1-34
27	Abosel 18:1-21
28	Abosel 18:22-19:12
29	Abosel 19:13-41
30	Abosel 20:1-38

date	Scripture
1	Abosel 21:1-16
2	Abosel 21:17-36
3	Abosel 21:37-22:16
4	Abosel 22:17-23:10
5	Abosel 23:11-35
6	Abosel 24:1-27
7	Abosel 25:1-27
8	Abosel 26:1-32
9	Abosel 27:1-20
10	Abosel 27:21-44
11	Abosel 28:1-31
12	Lom 1:1-17
13	Lom 1:18-32
14	Lom 2:1-24
15	Lom 2:25-3:8
16	Lom 3:9-31
17	Lom 4:1-12
18	Lom 4:13-5:5
19	Lom 5:6-21
20	Lom 6:1-23
21	Lom 7:1-14
22	Lom 7:15-8:6
23	Lom 8:7-21
24	Lom 8:22-39
25	Lom 9:1-21
26	Lom 9:22-10:13
27	Lom 10:14-11:12
28	Lom 11:13-36
29	Lom 12:1-21
30	Lom 13:1-14
31	Lom 14:1-23

date	Scripture
1	Lom 15:1-21
2	Lom 15:22-16:7
3	Lom 16:8-27
4	1 Kolin 1:1-17
5	1 Kolin 1:18-2:5
6	1 Kolin 2:6-3:4
7	1 Kolin 3:5-23
8	1 Kolin 4:1-21
9	1 Kolin 5:1-13
10	1 Kolin 6:1-20
11	1 Kolin 7:1-24
12	1 Kolin 7:25-40
13	1 Kolin 8:1-13
14	1 Kolin 9:1-18
15	1 Kolin 9:19-10:13
16	1 Kolin 10:14-11:1
17	1 Kolin 11:2-16
18	1 Kolin 11:17-34
19	1 Kolin 12:1-26
20	1 Kolin 12:27-13:13
21	1 Kolin 14:1-17
22	1 Kolin 14:18-40
23	1 Kolin 15:1-28
24	1 Kolin 15:29-58
25	1 Kolin 16:1-24
26	2 Kolin 1:1-11
27	2 Kolin 1:12-2:11
28	2 Kolin 2:12-17
29	2 Kolin 3:1-18
30	2 Kolin 4:1-12
31	2 Kolin 4:13-5:10

date	Scripture
1	2 Kolin 5:11-21
2	2 Kolin 6:1-13
3	2 Kolin 6:14-7:7
4	2 Kolin 7:8-16
5	2 Kolin 8:1-15
6	2 Kolin 8:16-24
7	2 Kolin 9:1-15
8	2 Kolin 10:1-18
9	2 Kolin 11:1-15
10	2 Kolin 11:16-33
11	2 Kolin 12:1-10
12	2 Kolin 12:11-21
13	2 Kolin 13:1-14
14	Galesia 1:1-24
15	Galesia 2:1-16
16	Galesia 2:17-3:9
17	Galesia 3:10-22
18	Galesia 3:23-4:20
19	Galesia 4:21-5:12
20	Galesia 5:13-26
21	Galesia 6:1-18
22	Efesas 1:1-23
23	Efesas 2:1-22
24	Efesas 3:1-21
25	Efesas 4:1-16
26	Efesas 4:17-5:2
27	Efesas 5:3-33
28	Efesas 6:1-24
29	Filibai 1:1-26
30	Filibai 1:27-2:18

date	Scripture
1	Filibai 2:19-3:6
2	Filibai 3:7-4:1
3	Filibai 4:2-23
4	Kolosi 1:1-20
5	Kolosi 1:21-2:7
6	Kolosi 2:8-23
7	Kolosi 3:1-17
8	Kolosi 3:18-4:18
9	1 Tesalonaika 1:1-2:9
10	1 Tesalonaika 2:10-3:13
11	1 Tesalonaika 4:1-5:3
12	1 Tesalonaika 5:4-28
13	2 Tesalonaika 1:1-12
14	2 Tesalonaika 2:1-17
15	2 Tesalonaika 3:1-18
16	1 Timoti 1:1-20
17	1 Timoti 2:1-15
18	1 Timoti 3:1-16
19	1 Timoti 4:1-16
20	1 Timoti 5:1-25
21	1 Timoti 6:1-21
22	2 Timoti 1:1-18
23	2 Timoti 2:1-21
24	2 Timoti 2:22-3:17
25	2 Timoti 4:1-22
26	Taitas 1:1-16
27	Taitas 2:1-14
28	Taitas 2:15-3:15
29	Failimon 1:1-25
30	Hiblu 1:1-14
31	Hiblu 2:1-18



date	Scripture
1	Hiblu 3:1-19
2	Hiblu 4:1-13
3	Hiblu 4:14-5:14
4	Hiblu 6:1-20
5	Hiblu 7:1-19
6	Hiblu 7:20-28
7	Hiblu 8:1-13
8	Hiblu 9:1-10
9	Hiblu 9:11-28
10	Hiblu 10:1-18
11	Hiblu 10:19-39
12	Hiblu 11:1-16
13	Hiblu 11:17-31
14	Hiblu 11:32-12:13
15	Hiblu 12:14-29
16	Hiblu 13:1-25
17	Yems 1:1-18
18	Yems 1:19-2:17
19	Yems 2:18-3:18
20	Yems 4:1-17
21	Yems 5:1-20
22	1 Fita 1:1-12
23	1 Fita 1:13-2:10
24	1 Fita 2:11-3:7
25	1 Fita 3:8-4:6
26	1 Fita 4:7-5:14
27	2 Fita 1:1-21
28	2 Fita 2:1-22
29	2 Fita 3:1-18
30	1 Yon 1:1-10

date	Scripture
1	1 Yon 2:1-17
2	1 Yon 2:18-3:2
3	1 Yon 3:3-24
4	1 Yon 4:1-21
5	1 Yon 5:1-21
6	2 Yon 1:1-13
7	3 Yon 1:1-14
8	Yut 1:1-25
9	Lebelesen 1:1-20
10	Lebelesen 2:1-17
11	Lebelesen 2:18-3:6
12	Lebelesen 3:7-22
13	Lebelesen 4:1-11
14	Lebelesen 5:1-14
15	Lebelesen 6:1-17
16	Lebelesen 7:1-17
17	Lebelesen 8:1-13
18	Lebelesen 9:1-21
19	Lebelesen 10:1-11
20	Lebelesen 11:1-19
21	Lebelesen 12:1-18
22	Lebelesen 13:1-18
23	Lebelesen 14:1-20
24	Lebelesen 15:1-8
25	Lebelesen 16:1-21
26	Lebelesen 17:1-18
27	Lebelesen 18:1-24
28	Lebelesen 19:1-21
29	Lebelesen 20:1-15
30	Lebelesen 21:1-27
31	Lebelesen 22:1-21

*December*